


Quiarinio pueyaso rupaa pa jiyaniijia

Jesucristojiniji pueyano rupaajinia



New Testament in Arabela (PE:arl:Arabela)

Quiarinio pueyaso rupaa pa jiyaniijia Jesucristojiniji pueyano rupaajinia New Testament in Arabela (PE:arl:Arabela)

copyright © 2008 Wycliffe Bible Translators, Inc.

Language: Arabela

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Arabela

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files dated 29 Jan 2022
90034700-94c6-5f48-ae9c-2383843fed68

Contents

MATEO	1
MARCO	86
LUCAS	138
JUAN	225
MIISHANO	289
ROMA	375
1 CORINTO	414
2 CORINTO	456
GÁLATA	482
ÉFESO	498
FILIPO	512
COLOSA	522
1 TESALÓNICA	530
1 TESALÓNICA	538
1 TIMOTEO	542
2 TIMOTEO	553
TITO	561
FILEMÓN	566
HEBREO	568
SANTIAGO	600
1 PEDRO	610
2 PEDRO	621
1 JUAN	628
2 JUAN	637
3 JUAN	639
JUDAS	641
NIQUISHANO	644

MATEO NAAJIOTASANO JESUCRISTOJINIJI

Jesucristo supuetanaajiniji pahuatasano

(Lc 3.23-38)

¹ Jesucristoori supuetana Abraham jiuhuacuajinio supueno quiquiaari, supuetana David niqiuoacuajinionio. Nioori Jesucristo supuetanaa sesaca. Naa quiquiaaritij:

² Abrahamri Isaac que quiquiaari. Isaacri Jacobo que quiquiaari. Jacoboori Judá que quiquiaari, tapueyocuaca quejuhuaj. ³ Judaari Fares que quiquiaari, Zara quejuhuaj. Cuno pojori nucuaari quiquiaari Tamar, Judá niqiuocua. Faresri Esrom que quiquiaari. Esromri Aram que quiquiaari. ⁴ Aramri Aminadab que quiquiaari. Aminadabri Naasón que quiquiaari. Naasónri Salmón que quiquiaari. ⁵ Salmónri Booz que quiquiaari. Booz nucuaari quiquiaari Rahab. Boozri Obed que quiquiaari. Obed nucuaari quiquiaari Rut. Obedri Isaí que quiquiaari. ⁶ Isaiiri David que quiquiaari. Davidri Israel pueya jiyaniijia quiquiaari. Davidri Salomón que quiquiaari. Salomón nucuaari coteenu quiquiaari Urías niqiuocua.

⁷ Salomónri Roboam que quiquiaari. Roboamri Abías que quiquiaari. Abíasri Asa que quiquiaari. ⁸ Asaari Josafat que quiquiaari. Josafatri Joram que quiquiaari. Joramri Uzías que quiquiaari. ⁹ Uzíasri Jotam que quiquiaari. Jotamri Acáz que quiquiaari. Acázri Ezequías que quiquiaari. ¹⁰ Ezequíasri Manasés que quiquiaari. Manasésri Amón que quiquiaari. Amónri Josías que quiquiaari. ¹¹ Josíasri Jecónías que quiquiaari, tapueyocuaca quejuhuaj. Jiyacaritij, Israel pueyapueeri quioosaaquiaari Babilonia jiyajiniara. ¹² Babilonia jiyajinia, Jecóníasri tii mueratequiaari Salatiel. Salatielri Zorobabel que quiquiaari. ¹³ Zorobabelri Abiud que quiquiaari. Abiudri Eliaquim que quiquiaari. Eliaquimri Azor que quiquiaari. ¹⁴ Azorri Sadoc que quiquiaari. Sadocri Aquim que quiquiaari. Aquimri Eliud que quiquiaari. ¹⁵ Eliudri Eleazar que quiquiaari. Eleazarri Matán que quiquiaari. Matánri Jacobo que quiquiaari. ¹⁶ Jacoboori José que quiquiaari. Joseeri María niyaca quiquiaari. Cuno Maríari Jesu nucua quiquiaari. Jesu sesa tarajanu- uri quiquiaari Cristo. Nioori pueyano rupaaajinia sequeya “Pueyaso jiyarosano Jiyaniijiarano”.

¹⁷ Naacuajitij, Abrahamjiniji, catorce supuetanaari quiquiaari Davidta. David nuhuaji, socua catorce supuetanaari quiquiaari. Jiyacaritij, Israel pueyapueeri quioosaaquiaari Babilonia jiyajiniara. Babilonia jiyajiniara nojori quioosaanu nuhuaji, socua catorce supuetanaari quiquiaari Cristo jaara rasaaquiaari.

Jesucristo rasacari pahuatasano

(Lc 2.1-7)

¹⁸ Naa quiquiaariti Jesucristo rasacari: na nuclarano Maríari tari Joseeta camiriqiano quiquiaari. José numuetuqueyaquishacarijia María, Maríari tariucua manajaraca quiriquiaa. Pueyaso Sohuanucuaajari na manajetequiaari. ¹⁹ Neyacarano José jaara niishiquiaari necorano tariucua manajaraca quiya, nojuajaari jiyano hua niishirio- joriquiaa na cartenura jiyasohuaja. Nojuajaari jiyaniquiaari tamonu

jiyoteeri na manajoree. Joseeri maninia pueyano quiquiaari. Majaari María na cararonu paniniu quiquiaari pueya niquiara. ²⁰ Naa José niishiriosacari na cartenura juucuatej, Pueyaso seruuri nocua mue-taquiiaari na maquenujinia. José sequereeri:

—Supuetana jiyaniijia David niquihuacuajinio supueno Joseena, María quia camiri naajaa. Maja quia puerenu. Pueyaso Sohuanu-cuajaari na manajorucuaa. ²¹ Mariari neyanu ranutaniya. Quiocua na sesojore “Jesu”. Sesa na pueya miiijosano tuujunutaniya nojori jiuujiajinijiiri. Naaratej, na sesaari quiniutaniya “Jesu”.

²² Jesu rasaanuuri naa quiquiaaritij, tariucuacaanu pueyara Pueyaso sequesano caminiujiunia pohuatasano tohuateenura. Pueyasoori naa na pohuataniquiaari jiyanojua tarijiatej:

²³ “Nia tojiri. Niyacoori manajenutaniya. Neyanu ranutaniyari. Na sesojonutaniyari ‘Emanuel’ ”.

Nioori pueyano rupaaajinia sequeya “Pueyaso pata quiyani”.

²⁴ José niucuasacari, nojuajaari naa miiquiaaritij taa Pueyaso seru sequequiaari nojuacuajani. María riquiaariiri na tiajinia necocuara. ²⁵ Nojoriiri maja na quiniu quiquiaari juhua seetanujuanaa camitioono, María jaara raquiaari neyanujuaatijia. Jaara na raquiaari, na sesojoreeri “Jesu”.

2

Niishijiaca tiuquiiijosacari conaajaacua

¹ Jesuuri rasaquiaari Belén tiacajinia, Judea jiyajinia. Cuno quishacari, Herodesri jiyaniijia quiquiaari Judea jiyajinia. Jesu rasaanu nuhuaji, niishijiacaari tiuquiiioquiaari Jerusalén tiacajinia. Nojoriiri Jesu niquiniuria tiuquiiioquiaari jiya pajamaji. ² Nojori tiuquiiijosacari, nojoriiri pueya nequesoreetaquiaari:

—¿Tee Judiocuaca jiyaniijiarano rasaarucuaani? Canaari niishiyani nojuajaari tari rasaarucuaa. Canaari na rijia niquiquianu jiya pajamajini, canaa jiyajinia canaa quishacarijia. Canaari nocua niyareeni canaa shuquiritianura nojuaja, jiyaniijiarano na quiniuucua.

³ Jiyaniijia Herodes tojishacari naa niishijiaca sequesantej, jiyanojua tacaquiaariiri. Puetunu Jerusalén tiacajinia quiniaajanaari tacaquiaarijiuhuj. ⁴ Nocuaji, Herodesri Judiocuacaacuara secojona sequequiaari nocua nojori nijionura, Moisés Rootasanojiniji niishitiojonaanio. Nojori tiuquiiijosacari nocua, Herodesri naa nequesoreetaquiaari nojori:

—¿Tee Cristo rasaanutaniyani, Judiocuaca jiyaniijiarantej?

⁵ Nojoriiri na riucuaquiaari:

—Belén tiacajinia rasaanutaniyano, niya Judea jiyajiniani. Naa naajiotasano quiyacuajaari Pueyaso sequesano caminiujiunia sequesano. Cuno tariucuacaanu naajiotasano cuajaari naa sequeyatej:

⁶ “Belén tiacajinia quiniaanaa, nia tiacaari maja najuhuana shiitianiyojua tiaca Judea jiyajinia. Cuno nia tiacajiniani, Jiyaniijiajanaa cutaraari supuenutaniya. Nojuajaari socua cutara Jiyaniijiajanaa quiniutaniya tamasaca jiyaniijiacajiniji Judea jiyajinijinio. Cunoori maninia jitianutaniya cua pueya, Israel pueya”.

⁷ Naa pueya sequesano na tojinu nuhuajitij, Herodesri cuno jiya pajamaji nijiono niishijiaca nequesoreetaquiaari jiyasohuaja:

—¿Taacari ríjia niquishaacanu seetanujuanaani?

⁸ Nojori riucuanu nuhuaji, Herodesri na sapojonuta nojori sequequiaari:

—Nia quiaare Belén tiacajinia. Niocua jacaria nequesoretasee cuno mueyajiniji. Níaa jaara na riuriatare, niocua cua numootecuhua. Janiyacua nocua quiaarejaaniuhuj cua shuquiritianura nojuaja.

⁹ Niishijiaa tojiníu nuhuaji naa jiyaniijia Herodes sequesanootej, nojoriiri quiojiyareecuhuj. Jiya pajamaji na niquitiushano ríjia niquitiuriiri nojori puetaano. Ríjiaari pootia tiuushii tia caco, tee mueya quiriquiaacuajani. ¹⁰ Nojori niquishacari ríjia, niishijiaaari jiyanhua timitiuquiaari. ¹¹ Tiaco tiuquitiaseeri. Conaaja niquitiushii na nucua Maríataari. Conaajaacuara mojuquetacoquiaariiri. Na shuquiri-tiatureeri. Na nuhuaji, niishijiaaari na patootasano casaa riataquequiaari, nareya na niquitiosocoriquiano conaaja. Nojoriiri na niquitioquiaari oro, shanhua jaanutaja catijasocoriquianojuhuaj, tamaatiuucua shanhua jaanutajanio. Na sesaari tahue rupaaajinia “mirra”. ¹² Na nuhuaji, Pueyasoori cuno niishijiaa sequequiaari na maquenujinia, maja Herodescua nojori tacatenuhuara Herodes nojori pohuatanuhua conaajajiniji. Naacuajitij, niishijiaaari tamonu nucuacohua tacatequiaariuhua na jiyajiniohuara.

Egipto jiyajiniara Jesu mashitiasaanujiniji pohuatasano

¹³ Niishijiaa jaara quiaquiaariuhua, Pueyaso seruuri Josecua muetaquiaari na maquenujinia. José sequereeri:

—¡Quia sanere! ¡Conaaja quia mashitiare na nucuata Egipto jiyajiniara! Quiniqui nia quishii, janiya cuaara sequerohua quiajanijajaatijia. Herodesri Belén tiacajinia na pueya pajetenutaniya conaaja, na motesocoriquiano.

¹⁴ Joseeri sanequiaari. Cuno niucujaja, conaaja mashitiaree na nucuatajaari Egipto jiyajiniara. ¹⁵ Nojori tiuquishacari Egipto jiyajinia, tii quishiiquiaariiri, Herodes cuaara cusoorajaatijia. Nojoriiri naa Egipto jiyajinia quiquiaaritij, tariucuaaanu Pueyaso sequesano tohuateenura maninia, Herodes cusonu nuhuaji. Pueyasoori naa pohuatequiaari na sequenu panishano caminiujiuniacuaja:

“Cua niyanu piiriinjia, Egipto jiyajiniji na tacatenuhuara”.

Herodes puecootesacari muerasu

¹⁶ Jiyaniijia Herodes jaara niishiquiaari cuno niishijiaaari na ruuretaquiaari saaja, Herodesri jiyanhua juaaquiaari. Na pueya jiyaroquiaari puetunu naatujoori canuuniyojuajanaa nojori puecoonura Belén tiacajinia, na shocuaqueya tiacajinia quiniaa muerasunio. Naa miiquiaariiri Jesu na monura juucua. Herodesri na pueya sequequiaari cuaara puecoosaria puetunu shusha roosanojuanaa, mariyata canapuate caapiqui marijia shocoteo quiquiaarijiani. Herodesri naa sequequiaari niishijiaa pohuatanuucua nojuaja, Jesu ríjiaari tarjia niquishaaquiaari. Juhuanujuajaari maja caapiqui marijia shocojonu quiquiaari ríjia niquishaanujiniji. ¹⁷ Naacuajitij, tariucuaaanu Pueyaso sequesano caminiujiunia Jeremías sequesanoori tohuatequiaari. Jeremías sequesanoori naa naajiotasaaquiaaritij:

18 “Sapuenuuri tojishiya Ramá tiacajinia. Jiyanoehua taraatia. Raquelri necohuacua sariyacojiya. Majaari na paniniu na cumanijiasaanura. Necohuari tari puecoosaarucuaa”.

19 Na nuhuaji, Herodes jaara cusoquiaari, Pueyaso seruuri Josecua muetaquiaariuhua na maquenujinia, Egipto jiyajinia nojori quishacarijia. 20 Na sequereeri:

—Quia sanere. Mueya quia tacaretaarohua Israel jiyajiniohua na nucuataja. Mueya monu panijiacaari tari cusonuucuaa.

21 Joseeri sanequiaari. Mueya tacaretaquiaariuhua Israel jiyajiniohua na nucuatajaari. 22 Israel jiyajinia na tiuquishacari, Joseeri numootesaaquiaari Herodes niyanu Arquelaori jiyaniijia quiriquiaa jiyacari, na que niti Judea jiyajinia. Nocuaji, Joseeri puerequiaari quiniqui na quiniuria. Jiyacarijiuhuj, Pueyasoori na niishitioquiaari na maquenujinia, tamocora na quianura. Naaratej, Joseeri mueya nucua pacuquiaari Galilea jiyajiniara. 23 Galilea jiyajinia nojori tiuquijiosacari, Nazaret tiacajinia quishiiri. Naacuajitij, tariucuaaanu Pueyaso sequesano caminiujiuniaa sequesanoori tohuateequiaari nojori jaara naa naajiotaquiaaritij:

“Jiyaniquishaanutaniyari Nazaret tiacajinijinio pueyano”.

3

Tiuquinijiona Juan pohuatasacari cariiquia jiyajinia

(Mr 1.1-8; Lc 3.1-9, 15-17; Jn 1.19-28)

1 Na nuhuaji, tamonu pueyanoori cariiquia jiyajinia quiquiaari Judea jiyajinia, Jordán moo shuriucua. Nojuajaari sesojosaaquiaari Tiuquinijiona Juan. Nojuajaari Pueyaso sequenu panishano poojotaquiaari pueya niquiara. 2 Naa pohuataquiaaritij:

—¡Nioojia nia tacatore sesa nia miiniujiniji! Pueyasoori tari nia jiyanooni paniya, na muerasu nia quiniuria seetanujuanaa.

3 Jiyanoehua tarijia, Pueyasoori na pueyano Isaías pohuataniquiaari miriqui na sequenu panishano pueyara. Isaíasri naa na pohuataquiaaritij:

“Pueyano rupaari tojishaaree cariiquia jiyajinia. Naa nacajoriquiaari: ‘Nia jeecanamitiri Jiyaniijia nuu, maja mojoquetunu na quiniuria’”.

Tiuquinijiona Juanjanaacujaari nio tariucuaaanu pohuatasano tohuateequiaari, pueya na niishitiojosacari nojori jeenucuanura nojori jiuujia Jesuucujia.

4 Cuno Juan toqueeri camello cajacajiniji shitiasano quiquiaari. Na cajiniocua camarucutequiaari shoque sacuanijiasanoori. Na miaquesanoori quiquiaari cariiquia jiyajinia na riuriasano sequeru, samiyatunio. 5 Pueyari Juancua quiojoquiaari na tojtianura. Queraatia pueyari nocua quiojoquiaari Jerusalén tiacajinijinio, Judea jiyajinijiniojuhuaj, puetunu Jordán moo shocuaqueyajinijiniojuanaanio. 6 Pueya jaara pohuataquiaari Juan niquiara sesa nojori miijosano, Juanri nojori tiuquinijioquiaari Jordán moojinia, Pueyaso tojijiara nojori quiniu panishacari.

7 Na tiuquinijosacari pueya, Juanri queraatia Fariseocuaa niquiquiaari nocua nijiyano, Saduceocuaanio. (Nojoriiri Moisés

Rootasanojiniji niishitiojonaa quiquiaari.) Tiuquinijiona Juanri nojori sequequiaari:

—¡Niaaquiiri sesa pueya, juhua sacocua! ¿Cante nia numooteree nia mashiniuria Pueyaso saniitionuucuaaji nijaniyani? Nio pa quishacarini, quera Pueyaso saniitiosacari jiyanhua na ruuretajaca pueya. ⁸ Niaa jaara seetanjuanaa nioojia tacatore sesa nia miiniujiniji, ¡saaja maninia nia miiri, maja sesa! ⁹ Majaari nia jyaniniu niaari Pueyaso muerasu, Abraham niquiohuacuajinio supueno nia quiniuucua. Cua tojiri, Pueyaso jaara paniri, nojuajaari na naata Abraham niquiohuara shipininiu nio saijinijijihuaaj. ¹⁰ Nio miriqui sequesano nia tojirijihuaaj pueyanaa. Naana jaara maninia jajau muetuyaquiiri, na camaruuri na nuya na catijasocoriquiano. Naajuhuaaj, Pueyasoori quera saniitionutaniya nijaniya, na tojiyashijiaca nia quiniuucua.

Tiuquinijiona Juanri pueya sequequiaari socua:

¹¹ —Janiyari moojinia nia tiuquinijiyani, nioojia nia tacatosacari sesa nia miishanojiniji. Cua nuhuaji, tamonuuri niriquiano cutara. Nojuajaari jyanohua socua jiyaniijajanaa janiyajiniji. Janiya maara jyanohua shuquiriaatia quirini, nojuaja jaara cua sequere na seru cua quiniuria quenaaja na sapatu cua jocuanura nera. ¡Nojuajaari jiyaniijijajanaa cutara! Nojuajaari Pueyaso Sohuanu tiuquinijionutaniya nioojijinia, cumaacaraca nia quiniuria, seetanu Pueyaso muerasujuanaa nia quiniuria. Nia jeequenutaniyajaariuhua juhua manitia, sesa nia miishanojiniji. ¹² Nia tojitiare miriqui cua sequesano. Trigo jaara rapijiosaare maninia, na camaruuri na queyaroojua, jiyocuacaanuji na totinijasocoriquiano. Naa miiquiaari paratu cuaara paara na cocua, na sucuanio, na jajau na racatanura tiajiniaaco. Naajuhuaaj, cua nuhuaji niniaari tariucua pueca, na tojitianaa na rijionura na quiquiojinia, saniniuujia na tojiyashijiaca na quejionura manijinia na saniitionura, tee mani maquesaaquiyacuajani.

Jesu tiuquinishacari moojinia

(Mr 1.9-11; Lc 3.21-22)

¹³ Na nuhuaji, Jesuuri tiuquiaari Galilea jiyajiniji Tiuquinijiona Juancua, Jordán moojinia. Tiuquinijiona Juan sequeseeeri:

—Cua tiuquinirijia.

¹⁴ Juanri saaja na sequeree:

—Maja Jiyaniijianaa. ¡Quiaa cutaraari maninia pueyano! ¿Casaara cucua quia nimiaa cua tiuquininiuria quiajaniya moojiniani? ¡Cua tiuquiniri juhuari cutara!

¹⁵ Jesuuri saa sequerejaa:

—Quiarijia quia miiri cua panishano. Cua tiuquiniri naajaa. Maninaari pa miiniuria puetunu Pueyaso panishanojuanaa.

Naacuajitij, Juanri na tiuquiniquiaari. ¹⁶ Jesu jaara tiuquinishaaquiaari, nojuajaari ritia tacaquiaari moojiniji. ¡Jiyacaritij, jiya cajiniocuaari riatequee! Jesuuri Pueyaso Sohuanu niquiquiaari nocua roseyanu juhua mococoonu niquishano. Nocua tiuushiiri. ¹⁷ Jiyacaritij, jiyocuacaanuji Pueyaso rupaari tojishaaree naa sequeyano:

—Nioori cua Niyanuniyojua. ¡Na shuquiritiaa jyanohuanijia!

4

*Samaruhua jiyaniijia saniniujiushacari Jesu**(Mr 1.12-13; Lc 4.1-13)*

¹ Na nuhuaji, Pueyaso Sohuanuuri Jesu jiyataquiaari cariiquia jiyajinira, Sesaaca saniniujiushocoriquiano cuniqui.

² Majaari quenaaja Jesu miaquenu quiquiaari. Cuarenta juuca, cuarenta niucua na shoconujuquiaari na miaqueyaquishacari. Na nuhuaji miaajequiaariiri. ³ Sesaacaari jiyacari nocua niquiaari na saniniujiuniuria. Jesu sequeseeri:

—Quiaa jaara seetanujuanaa Pueyaso Niyanu quiri, nio sai quia jataniri panra. Quiocua na sarohua.

⁴ Jesuuri saaja na riucaaree:

—Maja. Pueyaso Rupaajiniacuajaari naa naajiotasano quiyatej: “Pueyanoori maja na naatanu saa miaquesanoocujaja. Seetanujuanaa saminio quiya cutaraari na tojishacari puetunu Pueyaso Rupaajanaa”.

⁵ Na nuhuaji, Sesaacaari Jesu jiyataquiaari Jerusalén tiacajinia. Na nujuatequiaari jiyocuaaanuuri, Pueyaso Secojojuia tia cacojiria. ⁶ Na sequereeri:

—Quiaa jaara seetanujuanaa Pueyaso Niyanu quiri, niiquiji quia jaataare jiyocua. Pueyaso Rupaajiniacuajaari naa naajiotasano quiya:

“Pueyasoori na seya sequenutaniya na cojuanura quiajaniya. Nojoriiri quia quianutaniya, maja quenaaja saajiacua quia jiriataaquini-uucujaji”.

⁷ Jesuuri na riucaaree:

—¡Maja! Pueyaso Rupaajinia, naa naajiotasanoori quiyajuhaaj:

“Maja quia saniniujiuniu quia Jiyaniijia Pueyaso”.

⁸ Na nuhuaji, Sesaacaari Jesu tacaniquiaari socua jiyanoehua jiyaconaja tuhuananuucua. Cuniquiji na niqitirii puetunu jiya jiyaniijiacajanaari. Jiyanoehua cumaacaraca quijiaca. Jiyanoehua queraatia casamiriaca quijiacajuhuaaj. Jiyanoehua maninia niquishano. ⁹ Jesu sequereeri:

—Janiyacua quia jiyatere jiyaniijiajanaara nojori nitini, quiaa jaara cua cariquimiaji mojuquetare quia shuquiritianura janiya, quia jiyaniijia cua quiniuria.

¹⁰ Jesuuri na sequeree:

—¡Niiquiji quia quiaare Satanásnaa! Naa naajiotasano quiyacuajaari Pueyaso Rupaajinia:

“Saaja quia Jiyaniijia Pueyaso quia shuquiritiare cutara. Saaja nojuaja quia tojiri”.

¹¹ Na nuhuaji, Sesaacaari na tarinitiaquiaari. Jiyacaritij, Pueyaso seyari Jesuucua niquiaari na mianuutenura.

*Jesu coteesacari poonijionu Galilea jiyajinia**(Mr 1.14-15; Lc 4.14-15)*

¹² Jesu niishishacari Tiuquinijiona Juan nujuatesaarucuaa nujuatejojuajinia, nojuajaari Galilea jiyajinia quiaquiaariuhua. ¹³ Jesuuri Nazaret tiacajiniji pacuquiaari Capernaum tiacajinia na quiniuria, caminia shuriucua. Cuno jiya quiquiaari Zabulón niquiohuacuajinio supueno pueya jiya, Neftalí niquiohuacuajinio supueno pueya jiyanio. Zabulón, Neftalínio, nojoriiri supuetana Jacobo niquiohua quiquiaari. ¹⁴ Jesu

quishacari cuno jiyajinia, naa tohuateequiaariiri taa tariucuacaanu Pueyaso sequesano caminiuujunia Isaías pohuataquiaari cuno jiyajini-jicuaajani. Nojuajaari naa pohuataquiaari Pueyaso niishitiosano nojuaja taa na nuhuaji na sequesano tohuateenutaniyani:

¹⁵ “Zabulón pueya jiya, Neftalí pueya jiyanio, cunoori caminia shuri-uquiumia neteja nucuama quiya, mariyata Jordán moo tamajiria. Cunoori mariyata Galilea jiya, tee taucuaca quiyacuajani. ¹⁶ Cuno jiyajinia quiniaari ninishiqui quijiaca quiquiaari. Quiar-ijia saniniuujia, nojoriiri jiuujia Cuhuatana niquiriucuaa. Nojoriiri cusonu pueretujuaca quiquiaari tarijia. Quiarijia cutara nojoriiri cuhuatasaaree nojori puereyaquiniucuaaji”.

¹⁷ Jiyacaritij, Jesuuri Pueyaso rupaa pohuatanu coteequiaari. Naa sequequiaariiri:

—Nioojia nia tacatore sesa nia miiniuujiniji. Pueyasoori nia paniya na pueya nia quiniuria.

Jesu saquiriojosacari sapitiaaja ritianaa
(Mr 1.16-20; Lc 5.1-11)

¹⁸ Jesuuri Galilea caminia shuriuquioco rucuanejoriquiaa. Jiyacaritij, Pedro niquiriiri, tarajanu Andrésnio. Pedro sesa quiquiaarijuhuaj Simón. Nojoriiri sapitiaaja ritianaa quiquiaari shiyaruta. Nojoriiri jiyacari shiyaru jaqueroorariquiaa. ¹⁹ Jesuuri nojori sequeree:

—¡Miji! Cua tarajare. Cua pueyara nia quiri. Janiyacua nia jiyatere pueya quioojuara saniniunijia, juhua sapitiaaja quioonaa.

²⁰ Nojoriiri na shiyaru tiujiaquiaari ritia. Jesuta quiojiyareeri.

²¹ Jesuuri shiitianiyojua socua rucuanequiaari na tacoji. Socua caapiqui pueya riuriataseeri. Nojoriiri quiquiaari Santiago, tarajanu Juannio. Cuno pojori queeri quiquiaari Zebedeo. Nojoriiri na queta quiriquiaa botejinia. Na shiyaru cushipirijionuuriquiaari. Jesuuri Santiago sequeree Juannio, na pueyara nojori quiniuriajuhuaj. ²² Nojoriiri ritia bote tiujiaquiaari na queta, Jesuta na quiojonura.

Jesu niishitiojosacari queraatia pueya
(Lc 6.17-19)

²³ Jesuuri puetunu Galilea jiyajiniajanaa rucuanejoquiaari na saquiriojosano pueyata. Pueyaso secojojua tiacajiniaqueya niishitiojoriquiaari. Pueyaso rupaa pohuatariquiaari taa Pueyaso jiitianu paniya maninia na pueyani. Puetunu tamaatia cusonuunu jiitiacojuajanaa naatanijioquiaariiri. Puetunu nootunejaca pueyajanaa shaataquiaariiaarijuhuaj. ²⁴ Naa maninia na miishanoori poojotasaquiaari puetunu Siria jiyajiniajanaa. Naaratej, pueyari Jesuucua patootaquiaari puetunu cusosuhujanaa, puetunu tamaatia cusonu jiitiajacajanaano, cumatacuruhuana cusosuhujahuaj, nootunejacanio. Nocua jiyatasaaquiaarijuhuaj samaruharaca quijiaca, canashiyaquiji cusojonuujucanio. Jesuuri nojori naatanijioquiaari puetunujuanaa. ²⁵ Jiyanojua queraatia pueyari Jesu nuhuajiquiaari Galilea jiyajiniji, Decápolis tiacajininio. Na nuhuajiquiaarijuhua Jerusalén tiacajininio, Judea jiyajininiojuhuaj, mariyata Jordán moo taquijiria jiyajininio.

5

Jesu pohuatasacari Pueyaso rupaa tuhuananujiniji
(Lc 6.20-23)

¹ Jesu niquishacari jiyano hua queraatia pueya nocua niyano, nojua-jaari tuhuananuucua tacaquiaari tiji na cajiniuria. Na saquiriojosano pueyari nocua catecanoquiaari. ² Jesuuri nojori niishitiojonu coteequiaari. Naa na pueya sequereeri:

³ —Shuquiriaatia quijiaca cutaraari noo pojori, canapuate niishiyani noojia sesa quiya. Nojoriiri Pueyaso pueyara quiriquiano, pueyara-caanu na jitianura nojori.

⁴ 'Shuquiriaatia quijiaca cutaraari noo pojori canapuate taraatia quiyani sesa na miiniuucua. Pueyasoori nojori cumanijanutaniya.

⁵ 'Shuquiriaatia quijiaca cutaraari noo pojori, canapuate maja tama nerajaaja niishiriojojuacani. Nojoriiri nio jiya camaruhua quiniutianiya, taa Pueyaso sequequiaaricujani.

⁶ 'Shuquiriaatia quijiaca cutaraari noo pojori, canapuate maninia quiniuucua jiaataa jiyano huan, taa pa jiaatiaacuaa miaquenuucuan. Pueyasoori maninia quijiacara nojori jiyatenutaniya.

⁷ 'Shuquiriaatia quijiaca cutaraari noo pojori, canapuate naquiya miishanoocua taraajeni. Pueyasoori nojoriicua taraajenutaniya-jaacuhuj.

⁸ 'Shuquiriaatia quijiaca cutaraari noo pojori canapuate maninia jiu-ujjaracani. Nojoriiri Pueyaso niquniutianiya cutara.

⁹ 'Shuquiriaatia quijiaca cutaraari noo pojori, canapuate pueya jiyano otiootejani. Nojoricuajaari Pueyaso muerasu quiniutianiya.

¹⁰ 'Shuquiriaatia quijiaca cutaraari noo pojori, canapuate naquiya miishanoni, Pueyaso panishano nojori miiniuucua. Pueyasoori nojori jitianutaniya pueyaracaanu shuquiriaatia, na muerasu nojori quishacari.

¹¹ 'Shuquiriaatia quijiaca niajaniya, tamasa jaara nia macaatiri cua tojtiajaca nia quishacari, naajuhuj, nojori jaara miya naquiya niajaniya. Naajuhuj, niaari shuquiriaatia quijiaca, nojori jaara saquiriojotare niaacuara na sajonuta, maninia nia tojiniuucua janiya. ¹² Naa jaara naa miishaaretej, jiyano hua nia timiquiore. ¡Shuquiriaatia nia quirijuhuj! Pueyasoori cunora jiyano hua maninia nia miiniutianiya jiyocuacaanu nia quishacari nata. Tariucuacaanu Pueyaso sequesano caminiujiuniaacuajaari naa naquiya miishaaquiaarijuhuj, nia supueyaquishaacarijijojua.

Pueyaso muerasuuri juhua shoni quiya mijiria, juhua ninishiqui cuhuatanaajuhuj

(Mr 9.50; Lc 14.34-35)

¹³ 'Mijiria, niaari juhua shoni quiya, mijiria quiniaa mariqui socua seseyareeri. Shoni jaara na tiquiriquia jatama, ¿maatucua taa tiquiriquiara quiriohuani? Maja na naata. Shoni jaara naa quiriritij, najuhua nia quiyari, shaaca. Jiyano shoni cuara jataaaria nuujinia, pueya rapijiosocoriquiano.

¹⁴ 'Naajuhuj, niaari juhua ninishiqui cuhuatana mijiria quiniaara. Tiaca jaara tuhuananuucua quiri, majaari na naata na jamaaniu. ¹⁵ Naajuhuj, pueya jaara samaritiu noshitiri, jiyocuacaanu morotashiyari, tiaco na cuhuatanura maninia, pueya niquniuria maninia

nocuaji. Majaari samaritiu niatasaanu conatu cariquiaco. ¹⁶ Naajuhuaaj, niajaniya cuara maninia miiria pueya niquiara. Maninia nia miishacari, niaari pueya cuhuataa juhua samaritiu. Naa maninia miijia nia quishacaritij, pueyari Jiyocuacaanu Quijia nia Que Pueyaso maniniuhuaqueetanutaniya.

Jesu niishitiojosanoori tariucuacaanu Moisés Rootasanojiniji

¹⁷ 'Majaari nia jyaniniu janiyari niquiaarini Moisés Rootasano cua tarinitiniuria niajaniya, Pueyaso sequesano caminiujiuniaa rootasanonio. Maja. Niquiaari cutaranijia puetunu cuno rootasanojuanaa cua tojiniuria, cua tohuateenurajuhuaaj. ¹⁸ Pueyanaa, seetanujuanaa nia sequeyanijia. Nio jiya quishacarijia, jiya cajiniocuano, majaari quenaaja niquiriyatu naashanoniyojua Pueyaso Rupaajiniji shaajetesaanu quiniutianiya. Majaari na shaajetesaanu quiniutianiya puetunu Pueyaso naajiotasanojuanaa cuara tohuateerejaatijia. ¹⁹ Naaratej, tamonu pueyano jaara jyaniri tamonu rootasano tariucuacaanu Pueyaso Rupaajiniji najuhuaana sequesano, nojuajaari cocuaatia miya. Nojuaja jaara cuno tariucuacaanu rootasano tojiyaquiri, cuno pueyanoori socua rerequetesano quiniutianiya narta Pueyaso muerasujinijinio. Naajuhuaaj, nojuaja jaara pueya niishitiojore nojori tojiyaquiniuria cuno rootasano, cuno pueyanoori socua rerequetesano quiniutianiya puetunu narta Pueyaso muerasujinijijianaa. Saniniuujia, cante tariucuacaanu Pueyaso rootasano tojiquiaanijia, na niishitiojoquiaa tamasaajaariuhuaaj, cuno pueyanoori socua tojishano pueyano quiniutianiya Pueyaso shuriucua jiyocuacaanu. ²⁰ Nia numooteyanijia, niaa jaara quiyaquiri socua maninia quijiaca Fariseocuacajiniji, Moisés Rootasano niishitiojonaajinijinio, majaari Pueyaso muerasu nia quini quiniutianiya.

Jesu niishitiojosano maja pa juaaniuria

(Lc 12.57-59)

²¹ 'Niaacuajaari tojiquiaari taa pa supuetanaa sequesaaquiaaricuajani: "Maja monu. Cante pueyano monani, nojuajaari nequesoreesaanutaniya". ²² Janiyari saniniuujia nia niishitiojyani, cante narta pueyanota juaajiani, cunoori nequesoreesaanutaniya. Naajuhuaaj, cante narta pueyano saarijiojuani, cunoori nequesoreesaanutaniya jyaniijianucua niquiara. Naajuhuaaj, cante narta pueyano sesacareeni, cunoori quera jatashiya mani quiquiojinia, pueyaracaanu saniitiosocoriquiano.

²³ 'Naacuajitij, nia niquitionu panishacari Pueyasora nia casaa, niaa jaara jiyacari niishiqui, quiaari quiarta pueyano juaatiriucuaa quiocuara, ritia quia tiujiare cuniqui quia niquitiosocoriquiano Pueyasora, catijiaja shuriucuaani. ²⁴ Quiarta pueyanota quia jyanootioocoocuara coteenu. Na nuhuaaj cutara quia naata niquitionu quia casaa Pueyasora.

²⁵ 'Tamonu jaara quia jiyataa nequesoreenaacua, sesa quia miiniuucua nojuaja, maninia quia pohuatare ritia nojuaja, taa quia miiniutianiyani na jyanooniuria quiajaniya. Ritia nia jecatoore nuacuaco nia quiasacarijia, quiaa mariqui nequesoreena niquitiosaa-reeri. Nequesoreena naasucuaari quia niquitionutaniya nujuatejijua camarnu saniniuujia. Nojuajaari quia nujuatenutaniya nujuatejo-

juajinia. ²⁶ Seetanujuanaa nia sequeyanijia, majaari quia tohuatanu quiniutianiya, quiaa cuaara niquitiojeaatijia puetunu na sequesano cumaneecajanaa quia cumaneecajinjii.

Jesu niishitiojosano, maja pa camishoo maajiicua pa jiaatiaoquiniuria

²⁷ 'Niaacuaajaari tari tojiquiaari nio tariucuaaanu rootasano: "Maja tamonu niquiocua numuetucunu". ²⁸ Janiya cutaraari nia sequeyani, pueyano jaara na camishoo maaji niquiri nocua na jiaatianuta, cunoori juhua na numuetucuree tari noojiajinia.

²⁹ Na nuhuaji, Jesuuri nio miriqui sequesano sequequiaari pueyara, jiyano hua na niishitiojonura nojori:

—Naaratej, quia miaquetajara quia namijia jaara sesa miitiri quia-janiya, quia namijia quia jiatere. Tamocora quia jatere. Quiajaninyara socua maninia cutaraari namijijiu quia quiniuria, maja quia jatasaa-nura mani quiquojinia puetunu quia cuaqueyatajanaa. ³⁰ Naajuhuj, quia miaquetajara quia numatu jaara quia miitiri sesa, quia jiyatarenaj. Tucuacaanu quia jatere. Socua maninia cutaraari quia quia jiyata-nura quia numatu, maja puetunu quia cuaqueyatajanaa quia jatasaa-nura manijinia, pueyaracaanu quia miiniuria naquiya tii.

Naa na pohuatasacaritij, Jesuuri pa niishitiojiya maja pa tojiniuria poojia panishano, sesa na miitiniuria pa cuaqueya.

Jesu niishitiojosano maja pueya cartenura necocua

(Mt 19.9; Mr 10.11-12; Lc 16.18)

³¹ Jesuuri naa niishitiojoquiaarijuhuaj:

—Pa supuetanaari naa rootasaaquiaarijuhuaj: "Pueyano jaara necocua cartere, maaji cuaara niquitiosaaaria naajionee, pueya niishini-uria neyacaqui na cartere". ³² Janiyari saniniuujia nia sequeyanijia, pueyano jaara necocua cartere, sesa miya Pueyaso niquiraari. Naacua-jitij, na cartesano maajiiri tamonuta quiniutianiya na nuhuaji. Cunoori sesa Pueyaso niquira. Pueyano jaara niishiri necocuaari tamonu caya numuetucujutequiaa, saa cunoraja cutara na naata na cartenu. Pueyanoori sesa miyajuhuj, jaara cartesano maaji camiri.

Jesu niishitiojosano maja pa sapojonura

³³ 'Niaari tarijia tojitiaquiaari taa pa supuetanaa rootasaaquiaarini. Naa rootasaaquiaariiri: "Majaari nia jatanu nia sequesano, niaa jaara sequere: 'Seetanujuanaari cua sequesano. Pueyasocuaajaari niishiya majaari cua sapojonu' ". ³⁴ Janiya cutaraari nia sequeyani, nia sequesano jaara seetanujuanaa sequesano quiri, saaja nia sequere "jaa". Jaara seetanujuanaa quiaquiri nia sequesano, saaja nia sequere "maja". Majaari nia sequesano nia maatenu najuhua naatej: "¿Janiyate sapo-jojuani? Cua rupaari juhua jiya cajiniocua. Maja na jatanu quiniutianiya". Majaari naa sequenutej pueyanaa. ¿Majateeri nia niishiniu, jiya cajiniocuaari Pueyaso quiquio? ³⁵ Naajuhuj, ¿casaara nia sequequiaa najuhuanani: "Cua sequesanoori juhua pa jiya? Majaari na shaajenu quiniutianiya". Maja naa sequenutej. Pa jiya, cunoori Pueyaso niaja na niohuaca. Naajuhuj, ¿casaara nia sequequiaani: "Cua sequesanoori juhua Jerusalén tiaca? Pueyaracaanu quiniutianiyari". Maja naa sequenutej. Jerusalén tiacaari pa Jiyaniijia Pueyaso tiaca. ³⁶ Naajuhuj, ¿casaara nia sequequiaa naa najuhuanani: "Quia naataari cua sequesanoocua tiuuniu, cua naca quishacarijia"? Majaari naa sequenutej

pueyanaa. Naa jaara naa sequeretej, nia niishiri, majaari nia naata quenaaja niquimi nia muesujinijinio nia jiyatenu taariuria, muerumuecaranio. ³⁷ Naaratej, pueyaracaanu saaja seetanujuanaa nia sequere “jaa”, “maja”. Cante na sequesano maatejani, cunoori Sesaaca niishitiojosano niajaniya.

Jesu niishitiojosano maja pa naminiuria
(Lc 6.29-30)

³⁸ 'Niaacuajaari tari rootasaaquiaari: “Pueyano jaara tamonu pueyano namijia cocuartare, na namijia cuaara cocuartasaariajuhuaj, pueya nequesoreenaa niquiara. Naajuhuj, pueyano jaara tamonu pueyano quiaja shaatare na pishacari, na quiaja cuaara shaatasaariajuhuaj”. ³⁹ Janiyari saniniuujia nia sequeyani, pueyano jaara quia miiniu paniri sesa, quia cuaqueya quia tarinitiare nera. Majaari na nujuatanu. Naacuajitij, pueyano jaara quia maseca piri, majaari juaaniu. Quia jiyanoori. Nojuaja jaara socua quia piriohua, quia jiyanoori. Majaari na naminiu. ⁴⁰ Pueyano jaara quia toque jaariutianu paniri, nera quia tarinitiare. Cuaara na paara. Mariyata quia cushishano shiniquiaacuaji quia niquitiore nareja. Majaari jamueja quia quiniu. ⁴¹ Tamonu camarnu jaara quia sequere na naacutanura na casami quia jatanura nuu cajiniocua, majaari na tarijonu. Saniniuujia, shuquiriaatia quia naacutare na casami jatanura socua tucuacaanu na sequesanojiniji. ⁴² Tamonu pueyano jaara quia casami masenu paniya nera, quia niquitiore nareja. Naajuhuj, tamonu pueyano jaara quia casaa panu paniya nareja rupaquijiara, quia niquitiore. Majaari na ruuretanu. Capora quia quiri.

Jesu niishitiojosano pa paraca pa paniniuria
(Lc 6.27-28, 32-36)

⁴³ 'Niaacuajaari nio tariucuaaanu sequesano tojtiaquiaarijuhuaj: “Quia shuriucua quinia quia paniri. Saniniuujia, majaari quia paraca quia niquiniu”. ⁴⁴ Janiya cutaraari nia sequeyani, nia paraa nia paniri. Naa sesacaja pueya nia maniniuuaqueetare pueya niquiara. Pueyano jaara niaacuara saquiriojotare na sajonuta, nocuara nia secjore Pueyaso. Sesa nia miiniaacuara nia secjorejuhuaj. ⁴⁵ Naa maninia nia miishacaritij, niaari seetanujuanaa jiyocuaaanu Quijia nia Que Pueyaso muerasu quiniutianiya. Naa niishiri, Pueyasoori pananu muetaniquiaa sesa pueyara na janura, maninia pueyara na janurajuhuj. Pueyasoori maru nitiqiaa maninia miijiaca pueyara, sesa miijiacarajuhuj, maninia nojori nataacuaca moritianura. ⁴⁶ Naa jaara saaja nia panijia pueya panijia quiriqia, ¿Pueyasoteeri cunora nia shuquiritanutianiya, socua na casaajiniji na niquitionura niajaniya? Maja. Sesa miijiaca pueyani, noo pojori canaputee cumaneeca masejoquiaa na sajonutani, nojoriiri maninia miiquiaa na panishano pueyajuhuj. ⁴⁷ Naa jaara saaja nia panishano pueya saruhuataquiaa, ¿niaateeri cunora maninia miijiaca quia Pueyaso niquiara? Maja. Pueyaso niishiyashijia pueyari naa maninia miiquiaa na panishano pueyajuhuj. ⁴⁸ Naaratej, maninia miijiaca nia quiri juhua jiyocuaaanu Quijia nia Que Pueyaso. Nojuajaari seetanujuanaa maninia miijia. Rimiajata miyashijia cutara.

6

Jesu niishitiojosano saaja maninia pa miiniuria Pueyaso niquiara

¹ Tama nia cuaqueyajaaja nia cojuare maja maninia nia miiniuria saaja pueya niquiara, pueya maniniuhuaqueetanura nijaniya. Pueya jaara nia maniniuhuaqueetare maninia nia miiniuucua, nia Que Pueyasoori maja na niqutionu quiniutianiya nijaniya socua, maninia nia miiniuucua. ² Naaratej, niaa jaara casamiijiuniucua pueya niqutionu paniri nareja nia casamijiniji, majaari juhua sesa jiuujiaraca pueya nia miiniu. Cuno pojoriiri pueya numootequiaa na niqutionu panishacari na casaa, puetunu pueyajanaa shootianura nojori. Cuno pojoriiri naa miiquiaaqui Pueyaso secojojua tiacajinia, tiacaacacohuaj, pueya maniniuhuaqueetanura nojori. Seetanujuanaa nia sequeyanijia, cuno pojoriiri tari maseree narta pueya maniniuhuaqueetanu. Majaari nojori masenu quiniutianiya socua Pueyasojiniji naa maninia nojori miiniuucua. ³ Saniniuujia, niaa jaara nia casaajiniji casamiijiuniucua niqutionu paniri nareja, quia mueneca cuaara niishiyaquiiria quia niqutionu quia miaquetajata. ⁴ Naa miriqui sequeree nijaniyanijia cua niishitiojonura nijaniya, jiyasohuaja nia miiniuria puetunu maninia nia miiniu panishanojuanaa. Naacujitij, saaja nia Que Pueyasoori jiyasohuaja maninia nia miishano niishiniutianiya. Naaratej, nojuacuajaari nia niqutionutaniya na casamijiniji, na shuquiritiasacari nijaniya.

*Jesu niishitiojosano naa pa secojonura Pueyaso**(Lc 11.2-4)*

⁵ Naa secojosacari Pueyaso, majaari juhua sesa jiuujiaraca pueya nia miiniu. Cuno pojoriiri Pueyaso secojonu maniniucuaquiaa na nujanuta pueya niquiara, saaja pueya shootianura nojori. Nojoriiri naa secojonuquiaa Pueyaso secojojua tiacajinatej, tiaca nuucujinijahuaj, tee queraatia pueya quiyacuajani. Seetanujuanaa nia sequeyanijia, cuno pojoriiri tari maniniuhuaqueetasaareecuaja. Jiyano pueyatej, majaari nojori masenu quiniutianiya socua Pueyasojiniji. ⁶ Nijaniya saniniuujia, nia secojosacari Pueyaso, nia sohuacamara nia tiuquiri. Nia tiotiu nia tiore. Na nuhuaji, cuniqui nia Que Pueyaso nia secjore jiyasohuaja tamajaaja. Nia Que Pueyaso niquishacari naa jiyasohuaja nia miishanotej, nojuaja cutaraari nia niqutionutaniya na casamijiniji, na shuquiritiasacari nijaniya.

⁷ Naa secojosacari Pueyaso, majaari nia sequesano pacutejojua nia quiniu puera, juhua Pueyaso niishiyashijiaca. Cuno pojoriiri jiyaniya Pueyasoori nojori tojiniutianiya pueyaracaanu na pacutejosacari tariucua na sequesano. ⁸ Majaari juhua nojori nia miiniu. Pa secojiyaquishaacarijiyojua, pa Que Pueyasocuaajaari tari niishiya casaa pa paniyani. ⁹ Naaratej, naate nia secjore:

“Canaa Quena, quiaa cutaraari jiyocuacaanu Quijia. Pueya cuaara niishiiria quiaari saaja maninia quijia. ¹⁰ Quia quiri canaa Jiyaniijia, canaa quia jitianura. Quia panishano cuaara miishaaria mijiria, taa jiyocuacaanu na miishaaquiacaani. ¹¹ Canaa quia niqutionu canaa miaquesocoriquiano quiarijiani. ¹² Canaa quia jiyanoori sesa canaa miishanojiniji, taa canaa jiyanooquiaa tamasacuaani, sesa nojori miishacari canaa. ¹³ Majaari canaa quia shanacunu canaa saniniuujishaanura sesa canaa miiniuria.

Saaja canaa quia cojuare cutara Sesaacaacuaji. Saaja quia-janiya cutaraari seetanujuanaa Jiyaniijajanaa. Quiaa cutaraari puetunu cumaacaracajanaa. Quiaari shanohua shacantuuca quijia cutara. Quiaari naa quijia pueyaracaanutej. Tariucuaja”.

¹⁴Naatej, niaa jaara jiyanoori tamasaca, sesa na miishacari nijaniya, nia Que Pueyasoori nia jiyanooniutianiyajuhuaaj. ¹⁵Saniniuujia, niaa jaara tamasaca jiyanoyaquiri, nia Que Pueyasoori maja na jiyanooni quiniutianiya nijaniyajuhuaaj sesa nia miishanojiniji.

Jesu niishitiojosano taate pa naata miaqueyaquiniuni Pueyaso pa secojonura

¹⁶Niaa jaara miaqueyaquiya Pueyaso nia secojonura, majaari macuhuajeconu pueya niqiuara, taa sesa jiuujiaraca pueya miiquiaacuaani. Nojoriiri naa miiquiaatej, pueya niishishocoriquiano nojori miaajeya. Naa pueya shootiasacari nojoritij, seetanujuanaa nia sequeya cutaranijia, narta pueyari tari nojori maniniuhuaque-etarecuaja. Majaari Pueyasojiniji nojori masenu quiniutianiya socua. ¹⁷Nijaniya saniniuujia, nia miaqueyaquishacari Pueyaso nia secojonura, nia jiquioco nia jeequere. Nia canuure nia muesu, taa nia miiquiaa pueyaracaanucujani. ¹⁸Naa nia miiri Pueyaso nia secojosacari, maja pueya niishiniuria cunoqui miaajeya. Saaja pa Que Pueyaso cutara cuaara niishiiria nia miishano. Naacuajitij, nojuajaari nia niqutionutaniya na casamijiniji na shuquiritianuucua nijaniya.

Pa casami pa racatare jiyocuacaanu Pueyaso shuriucua
(Lc 12.33-34)

¹⁹Pueyanaa, maja mijiria nia racatanu nia casami najuhuanaj. Saaja capora nia quiri cutara. Mijiria pa racatasacari pa casami, surequeyari na miaquenutaniya. Tiyarashiniutianiyajaaariuhuaaj. Nohuasenuujua-caari nocua tiuquiniutianiya na nohuasenura. ²⁰Nia racatare cutara nia casami Pueyaso shuriucua jiyocuacaanu. Tii cutaraari shaaqui surequeya, shaaqui tiyara. Naajuhuaaj, nohuasejojuaari maja na naata nocua tiuquiniu tii, jiyocuacaanuji nia casami na nohuasenura. ²¹Niaa jaara nia casami racatare mijiria, niaari nocua niishiriojonutaniya pueyaracaanu. Nia casami jaara racatasano quiri Pueyaso shuriucua saniniuujia, niaari Pueyasocua niishiriojonutaniya. Majaari nia tacaaniu quiniutianiya mijiria casaacua tari.

Pa cuaqueyajinia cuhuatanajiniji pohuatasano
(Lc 11.34-36)

²²Pa namijiaari juhua poojia cuhuatana. Naacuajitij, paa jaara sesa casaacua jiaatiaashijia quirini, poojiaari juhua cuhuashiqui quiya maninia. ²³Niaa jaara sesa casaacua jiaatiajaca quiri saniniuujia, nioojiaari juhua ninishiqui quiya. Nioojia jaara sesa casaacua jiaatiaja quiri, nioojiaari socua ninishiqui quiya cariyojuaru pueyanojiniji.

Pueyaso panijia pa quiri, maja cumaneeca panijia
(Lc 16.13)

²⁴Maja nia naata poonijionu maninia caapiqui camarnura. Niaa jaara caapiqui camarnuraca quiri, niaari tamonu paniniutianiya, niaari saniniuujia tamonu niqiniu paniyaquiniutianiyacujua. Naacuajitij, niaari shuquiriaatia poonijionutaniya nia panishano camarnura. Niaari tamonu soojotanutaniyacujua. Naajuhuaaj pueyanaa, majaari nia

naata Pueyasora poonijionu maninia, cumaneecaacua nia jiaatiasacar-
ijihuhaj.

Pueyaso na muerasu cojuaja

(Lc 12.22-31)

²⁵ 'Naaratej, nia sequeyanijia, maja puera nia niishiriojonu casaa nia miaquenutaniyani, casaa nia ratunutaniyani, casaa nia cushiniutiani. Pueyaso jaara pa shipiniquiaari pueyano pa quiniuria, ¿majateeri na niqutionu quiniutianiya pa miaquenu panishano, pa cushiniu panishanonio, maninia pa rishiniuria? Taaquiriirinij. ²⁶ Jiyocuacaanu jaacuatujuaca nia niquiricuaa. Nojoriiri maja na natanu. Majaari na senoonu. Majaari nojori mishinijionu tiaco na miajajaura. Naajaa, pa Que Pueyasoori nojori niqutioquiaa na panishano. Nia niishiri. Niaa cutaraari socua Pueyaso panishano cuno jiyocuacaanu jaacuatujuacajiniji. ²⁷ ¿Nia naatate socua jiyaconajara maashiniu, jiyanohua nia tacaaniutia? Maja.

²⁸ 'Naajuhuj, ¿casaara nia tacaquiaarini nia niishiriojosacari casaa nia cushiniutiani? Naana shuucuaca nia niquiriquiacuaa. Nojoriiri maja na niishiniu poonijionu. Majaari na niishiniu na maniniushitajara shitianujuhuj. ²⁹ Seetanujuanaa nia sequeyanijia, pa supuetanaa jiyaniijia Salomónri jiyanohua shanohua toqueya cushijia quiquiaari. Naajaa, na toqueeri maja socua shanohua niquishano quiquiaari cuno naana shuucuacajiniji. ³⁰ Naana shuuri saaja rupaquijia shanohua niquishano. Jaara sorere, namitiashiyari catijasocoriguiano. Pueyasoori naana shuu shipiniquiaari saaja rupaquijia shanohua niquishocoriguiano, na nuhuaji catijasocoriguianonio. Nojuaja jaara naa shanohua naana shuucuaca shipiniquiaari, ¿majateeri socua maninia na miiniu quiniutianiya niaara? ¿Casaara nia tiuyaquiya nia Que Pueyasocuaarini? ³¹ Naaratej pueyanaa, maja nia tacaaniu. Majaari nia sequenu: ¿casaa pa miaquenutaniyani?, ¿casaa pa ratunutaniyani?, ¿casaa pa cushiniutiani? ³² Pueyaso niishiyashijiaaari naa sequejatej, puera nojori tacaashacari puetunu na panishano casaacuajanaa. Niaa cutaraari jiyocuacaanu quijia Queraca. Nojuacuajaari tari niishiya puetunu nia panishanojuanaa. ³³ Naaratej, coteenu nia niishiriojore Pueyaso tojjijara nia quiniuria cutara. Pueyasocua nia niqutiojore puetunu nia panishanojuanaa. ³⁴ Naajuhuj, majaari tariquiria nia tacaaniu. Saaja nia niishiriojore cutara, taa nia miiniutianiya maninia quiarijiani. Tariqui cutara niocua niishiriojore taa nia miiniutianiya maniniani. Tariucuaja quiarijia nia niishiriojosano nio juucara. Majaari socua tariquiria nia tacaaniu. Saaja nia Que Pueyasocua nia tiuuri, juhuajaniya nia quiniuria.

7

Majaari quiarta pueyanoocuara soqueto nia quiniu

(Lc 6.37-38, 41-42)

¹ 'Maja niarta pueyano nia soquenu najuhuanaj, Pueyaso mariqui nia jiyanoyaquirijiaariuhuj. ² Taa nia sesacaquiaa tamasacacuaani, niaari naa sesacasaanutaniyajuhuj. Naatej, taa nia miiquiaa tamasacacuaani, Pueyasoori mariyata naa miiniutianiya nijaniyajuhuj. ³ Nio miriqui cua sequesano nia tojiri. ¿Casaara nia niquiya rucucua nia tarajanu

namijiajiniani, niaa jaara puereetuca maca jiiitiaa tama nia namijiajiniajaaja cutara? ⁴ Maca nia jiiitiasacari tama nia namijiajiniajaaja, ¿casaara nia sequeya niarta pueyanoni: “Cuno rucucua pa taquiri quia namijiajiniji”? ⁵ Sesa jiuujiaracanaa, coteenu nia pare cuno maca nia namijiajiniji cutara. Na nuhuaji niocua maninia niquiri cutara, nia tarajanu rucucua nia taquiniuria na namijiajiniji. Nio miriqui cua sequesanoori nio sequeya: nioojia seque nia jeeicare coteenu, na nuhuaji cutara niocua maninia nacasure niarta pueyano.

⁶ Majaari Pueyaso ruuretajaca nia niishitiojonu Pueyaso rupaa najuhanaj. Cuno tojiyashijiacaari nia tojiyaquiniutianiya, naatej taa tamonu pueyano sare tojiyaquiquiaa nijaniyacuaani. Majaari Pueyaso soojeaca nia pohuatanu Pueyaso miishano shanohua nijaniyara. Nojoriiri saaja rerequetenutaniya Pueyasojiniji nia pohuatasano, naatej taa cushiya rapijioquiaa marajinia juhuajaniya na niishishoo maninia casaacuaani.

Pueyaso pa secojorej

(Lc 11.9-13; 6.31)

⁷ Pueyaso nia secojore. Nojuajaari nia niqutionutaniya nia masesano. Niaa jaara pajere, niaari nia pajesano riuriatanutaniya. Tohuateyaji nia piquiri, niaacuajiiri riatasaanutaniya. ⁸ Cante Pueyaso maseya na panishanoni, seetanujuanaa na masenutaniyari. Naajuhuj, cante pajejani, na panishano riuriatanutaniyari. Cante tohuateyaji piquijiani, nocuajiiri riatasaanutaniyajuhuj.

⁹ Mueya jaara na que nenecojore neecaruura, ¿na queteeri na niqutionutaniya saajia? ¡Maja! ¹⁰ Mueya jaara na que nenecojore sapiti-aajara, ¿na queteeri na niqutionutaniya soconu? ¡Maja! ¹¹ Nijaniyari sesa miiniu niishijiaca. Naajaa, niaacuajaari maninia casaa niqutionu niishijia, nia mueya jaara nia nenecojore. Nia Que Pueyaso cutaraari jiyanoohua socua maninia niqutionu niishijia, na muerasu secijosacari nojuaja.

¹² Pueyaracaanu maninia nia miiri tamasaca, taa nia paniquiaa pueya miiniuria nijaniyacujani. Niaa jaara maninia miiriquia nio cua sequesano, niaari tari tojitiaa maninia puetunu tariucuacaanu Moisés Rootasanojuanaa, tariucuacaanu Pueyaso sequesano caminiujiunaa rootasanonio.

Pueyasocua nuuri secanuniyojua

(Lc 13.24)

¹³ Pueyasocua neteja nuu nia pajere, shiitianiyojua nuuri tuneja. Saniniuujia, puereetuca nuuri neteya mani quiquiojiniara. Puereetuca na tuneja. Puereetucaari neteya, carianujuhuj. Naaratej, queraatia pueyari juhuajaniya cuno nucuaco quiojiya saniitiosocoriquiano. ¹⁴ Saniniuujia, shiitianiyojua nuuri maninia cutara. Cuno nucuaco quiojonaari pueyaracaanu quiniutianiya Pueyasota cutara. Jiyanoohua shiitianiyojuaari cuno nuu tuneja. Secaja pueyari na riuriataa, cami na quojonura.

Naanaari niishishano na jajaujiniji

(Lc 6.43-44)

¹⁵ Tama nia cuaqueyajaaja nia cojuare sapojonuujuacaacuaaji, noo pojoriicuaaji canapuete najuhuana sequejacuajani: “Pueyaso Rupaa pohuatananijia”. Nojoriiri sapuenu juhua maninia pueya niquishano,

nojori sapojonura niajaniya. Nojoriiri sapuenu juhua borregoniyojua niquishano, seetanujuanaa juhua puereeta sare nojori quishacari, say-oru. ¹⁶ Niocua nojori niishiri, sesa nojori miiniucua. Nojoriiri maja na naata miiniu maninia, naatej taa cohuatucuaani, majaari na naata muetunu marijiaca. ¿Shuuniateeri na naata muetunu cohuajaru? Maja. Naajuhuaaj, cuno sesa jiuujjaraca pueyari maja na naata maninia miiniu. ¹⁷ Maninia naanaari, maninia jajau muetujua cutara. Saniniuujia, sesa naanaari, sesa jajau muetujuaaja. ¹⁸ Maninia naanaari maja na naata sesa jajau muetunu. Naajuhuaaj, sesa naanaari maja na naata maninia jajau muetunu. ¹⁹ Naana jaara sesa jajau muetujua quiri, nushiyari, manijinia catijiasocoriquiano. ²⁰ Naacujitij, niocua cuno sapojonuujuaca pueya niishiri nojori miishanojiniji sesa.

*Saaja noojiaqueya pueyari Pueyaso muerasura quiniutianiya
(Lc 13.25-27)*

²¹ 'Cuno pojori canapuate cua sequejacani: "Cua Jiyaniijianaa, cua Jiyaniijianaa", noojiaqueya nojorijiniiniori maja nojori tiuquitianu quiniutianiya cua Que Pueyaso quiquojinia. Saaja seetanujuanaa cua Que tojtiajaca cutaraari nocua tiuquitianutaniya. ²² Cua nequesoreesacari pueya nio jiya puequesacari, queraatia pueyari cua sequenutaniya: "Cua Jiyaniijianaa, cua Jiyaniijianaa, canaacuajaari quia rupaa pohuataquiaari pueya niquiarani. Canaa sequesacari quia sesa, canaari samaruhua tohuatanijioquiaari quia cumaacatani. Naajuhuaaj, canaari cusosuhua naatanijioquiaarini quia sesa canaa jiyaniquishacari". ²³ Janiyari saniniuujia naa sequejaca riucuanutaniyani: "Maja cua niishiniu niajaniya. ¡Nia quiojorohua! Niaari saaja sesa miijiaca quiquiaari".

*Jesu tojtiajaca miishanoori pueyaracaanu rishiniutianiya cutara
(Mr 1.22; Lc 6.47-49)*

²⁴ Naacujitij, cante cua sequesano tojjiani, cuno pueyanoori shuquiriaatia quiniutianiya juhua niishijia pueyano. Niishijia pueyanoori tiaquiaari cumueeca jiyajinia. ²⁵ Na nuhuaji, maruuri jiyanhua niquiaari. Moori pajaashiquiaari. Paratuuri jiyanhua piyarojoquiaari cuno tiaacuara. Naajaa, majaari na pojoretanu quiquiaari, cumueeca jiyajinia na nujuatasacari. ²⁶ Cante cua sequesano tojiyashijia saniniunijia, cunoori moseeca. Cua sequesano ruuretajaari taraatia quiniutianiya juhua moseeca pueyano. Moseeca pueyanoori jaaquajinia tiaquiaari. ²⁷ Maruuri jiyanhua niquiaari. Moori pajaashiquiaari. Paratuuri jiyanhua piyarojoquiaari cuno tiaacuara. Cuno pueyano tiaari pojotaquiaari. Na camaruuri jiyanhua taraatia quiquiaari na tia pojotasacari.

²⁸ Jesu jaara niishitiojono puecaquiaari, pueyari jiyanhua jiuujia-teriquiaa na niishitiojosano nojori tojishacari. ²⁹ Pueyari naa jiuujiatequiaari seetanu cumaacatajanaa Jesu niishitiojosacari juhua jiyaniijiajanaa, maja juhua Moisés Rootasanojiniji niishitiojanaa. Cuno pojoriiri nareja tariucuaaanu rootasano caminiujuquiaari pueyaracaanu.

8

*Jesu naatanishacari sesa cusonu jitiataja
(Mr 1.40-45; Lc 5.12-16)*

¹ Jesu jaara tuhuananujiniji rosequiaariuhua na cojiniaata, jiyano hua queraatia pueyari na nuhuajiriquiaa. ² Tamonu pueyano cusosuuri jiyacari Jesuquia catecanoquiaari. Jiyano hua sesa cusonu jiitiaquiaariiri. Tahue rupaajinia, cuno cusonu sesaari quiquiaari “lepra”. Pueyano shuuri juhua miaquesano quijia na cuaqueyajinia cuno cusonu na jittiasacari. Cusosuuri Jesu cariquimiaaji mojuquetaquiaari Jesu na sequenura na panishano. Naa na sequereeri:

—Jiyaniijanaa, quia jaara paniri, niishiyacuajanjia quia naata cua cusonu cushiriitiniu.

³ Jesuuri nocua taraajequiaari. Nocua niaree na juaashiquiaari. Na sequereeri:

—Jaa, paniyanijia. Cuaara cushiriiria quia cusonu.

¡Jiyacaritij, ritia cushiriiquiri! Jeequerohuari. ⁴ Na nuhuaji, Jesuuri naa na rootaquiaari:

—Cua tojiri. Maja tamasaca niquiara quia pohuatanu cua miishano quiajaniya. Saaja Pueyaso secojonaa jiyaniijia quia cuaqueya quia niq-uitiri, na cartenura quiajaniya, pueya tajinia quia rucanejonuhuaara juhuajaniya. Na nuhuaji, ritia quia niqutiore quia seru Pueyasocuaara catijasocoriguiano. Naa quia miiritij taa Moisés niishitiojuquiaari tar-ijiacuajani, juhua jeequesano quia quiniuria Pueyasora. Naacuajitij, pueyari niishiniutianiya quiaari tari jeequerohua quia cusonujiniji.

*Jesu naatanishacari Romano capitán seru
(Lc 7.1-10)*

⁵ Jesu jaara tiuquiquiaariuhua na pueyata Capernaum tiacajiniohua, Romano soldadohua jiyaniijiaari Jesuucua niquiaari na secojonura Jesu.

⁶ Naa na sequequiaariiri:

—Jiyaniijanaa, cua seruuri cusosu mataa maquetujinia. Majaari na naata pooniniu quenaaja. Jiyano hua naquiya miya na noonutaari.

⁷ Jesuuri na sequequiaari:

—Janiyacuaajaari nocua quianutaniyani na cusonu cua shaatanura.

⁸ Soldadohua jiyaniijiaari na riucuaaree:

—¡Maja jiyaniijanaa! Janiyari maja pueyano maniniuni, cua tiajinia quia tiuquiniuria. Nareja quia sequere, cua seru cusonu cuaara shaateera tamajaaja. Niishiyacuajanjia, quiaari na shaatanutaniya saa quia rupaataja. ⁹ Janiyari jiyaniijiaracajaniuhuj. Na tojiquiaanjia. Naa-juhuaj, cua soldadohuari cua tojitiaquiaajuhuj cua sequesacari nojori. Naacuajitij, janiya jaara tamonu sequereni: “Quia quiaare”, cunoori ritia quiaquiaa. Naajuhuj, janiya jaara tamonu sequereni cuaara niiria, cunoori ritia niya cucua. Janiya jaara cua pataaco seru sequereni cuaara miiria cua panishano, na miiquiaari. Cua sequesano jaara naa tojishaaquiaacuaa, quia sequesano cutaraari tojishaanutaniya.

¹⁰ Jesu jaara tojiquiaari naa cuno tahue sequesantej, jiuujiatequiaari-iri. Na cojiniaa sequereeri:

—¡Seetanujuanaa nia sequeyanijia, majaari quenaaja parta Israel pueyajinijinio cua niquniu quiquiaa Pueyasocua tiuujia cutara, juhua nio tahue! ¹¹ Seetanujuanaa nia sequeyanijia, queraatia taucuacaari Pueyasocua tiuujiaa quiniutianiya juhua nio tahue. Nojoriiri tu-cuacaanuji nijionutaniya pananu muetasamaji, pananu tiuquishocoji-juhuaj. Nojoriiri pa supuetanaata cajituniutianiya na miaquenuunura Pueyaso shuriucua. Tii quiniutianiya shuquiriaatiaari pa supuetanaata:

Abrahamta, Isaactajuhua, Jacobotanio. ¹²Parta Israel pueya, canapueete Abraham jiniianuucujinio supuenoni, nojoriiri saniniuujia tamocora quejoosaanutaniya ninishiqui, nojori tojitiaaquiniuucua Pueyaso. Nojoriiri tii sariyocuatunutaniya naquiya na miishacari. Na quiaa mi-aquenuunutaniyari na noonuta. Nojoriiri juucua saquiriojosaaquiaari Pueyaso muerasu nojori quiniuria. Nojoriiri jiyaniya nojoriiri Pueyaso muerasu cutara Abraham jiniianuucujinio nojori quishacari.

¹³Na nuhuaji, Jesuuri cuno soldadohua camarnu sequequiaari:

—Quia tiajinia quia quiaarohuaqui. Cuaara quiiriaqui taa quia se-quereecuajani.

Jiyacaritij, na seruuri ritia naataquiaariuhua.

Jesu naatanishacari Pedro reyarucua

(Mr 1.29-31; Lc 4.38-39)

¹⁴Jesuuri quiaaree Pedro tiajinia. Tii Pedro reyarucua niquishiiri cusosu mataano na maquetujinia. Naseeca matariquiaari. ¹⁵Jesuuri na juaashiquia quiasee. Na naseeca cusonuuri ritia na tajiquiaari. Ritia sanequiaariiri Jesu na mianuutenura.

Jesu naatanijosacari queraatia pueya

(Mr 1.32-34; Lc 4.40-41)

¹⁶Shusha ninishacari cuno juucaja, cuno tiacajinijinio pueyari queraatia samaruharaca pueya jaatucunuquiaari Jesuucua. Jesuuri cuno samaruhua tohuatanijioquiaari saa na rupaataja. Puetunu cusosuhua-janaa naatanijioreejaariuhua. ¹⁷Naa tohuateequiaariti supuetana Isaías naajiotasano, Pueyaso niishitishacari nojuaja Jesujiniji. Naa naajiotasano quiyari:

“Nojuajaari taraatia pa miiniu jaariutiaree pajaniyajiniji. Pa niti cusoyareeri puetunu pa cusonujanaa na jatanura”.

Tamasaca pueya quiniu panishacari Jesu pueyara juucua

(Lc 9.57-62)

¹⁸Jesu jaara jiyanhua queraatia pueya niquiquiaari na shocua maano, na pueya sequereeri:

—Caminia taquijiria pa niuutiaare.

¹⁹Jiyacaritij, Moisés Rootasanojiniji niishitiojona pueyanoori Jesu sequere:

—Niishitiojonanaa, janiyari quiata quianu paniyani. Janiyacua quia tarajareni puetunu tiqiyocujanaa quia rucuanijosacari.

²⁰Jesuuri na riucaare:

—Quioojuapue cutaraari na raa jiiitiaa. Shuhuari na jesuhua jiiitaa-juhuaj. Saniniuujia, pueyano cua quishacari mijiria, majaari cua maquejara cua jiiitianu quenaaja, taa cuno casami jiiitaaacuaa na maquetuuarani.

²¹Tamonu Jesu pueyajinijinoori Jesu sequere:

—Cua jiyaniijianaa, cua tarinitiare, cua que niquirijaara. Janiya jaara na shaajareni, janiyacua quia tarajare cutarani.

²²Jesuuri na riucaare:

—Naajaa, cuata quia quiaare cutara. Quia tarinitiare nojuaja. Macunucua cuaara jamoora tama narta macujuaaja. Naatej, cante Pueyaso tojitiaashijacani, nojoriiri tariucua juhua macunucua quiya Pueyasora.

Jesu suraajasacari paratu, mohuacanio

(Mr 4.35-41; Lc 8.22-25)

²³ Na nuhuaji, Jesuuri botejinia tacaquiaari. Na saquiriojosano pueyari nata quiojoquiaari. ²⁴ Paratuuri senota piyarojonu coteequiaari nojori niuutiasacari. Jiyanoehua piyarojoriquiaari. Caminiaari jiyanoehua queyocuariquiaa paratu piyarojosacari. Mohuacaari bote jiniacuma mishiriquiaa. Jesuuri jiyacari maqueriquiaa. ²⁵ Na pueyari cunora na niucuajasee. Jesu sequetureeri:

—¡Jiyaniijianaa, canaa quia naacutare! ¡Paa tari tiuquitiaareeni!

²⁶ Nojori riuuareeri:

—¿Casaara nia pueretiuyani? ¿Majateeri nia niishiniu Pueyasooocua tiuuniu?

Jesuuri saneree. Paratu sequereeri, mohuacanio:

—¡Niaaj, nia suraajere!

Paratu, mohuacaari ritia suraajequiaari. ²⁷ Jesu pueyari jiuujiatequee. Tama nojorijiaarijia sequequiaari:

—¡Juhuej! ¿Taamueca pueyanotucuaanojoni? ¡Paratuuri na tojiya, mohuacajuhuaaj!

Jesu tohuatanishacari samaruhua, caapiqui pueyajiniji Gadara jiyajinia

(Mr 5.1-20; Lc 8.26-39)

²⁸ Jesuuri na saquiriojosano pueyata tiuquiiioquiaari caminia taquijiria Gadara jiyajinia. Jiyacaritij, caapiqui pueyanoori Jesuucua tohuareetaquiaari raacajiniji, macunucua nucuhua paaquiosaqiiji. Nojoriiri samaruhuaraca quiquiaari. ¡Jiyanoehua pueya pueresano! Cuno nucuaco, majaari pueya rucuanenu quijia, cuno pojori na puerenucua. ²⁹ Samaruhuaraca caapiqui pueyanoori Jesuucua nacaturee:

—¿Casaacua miji quia niyani, Pueyaso Niyanunaa? ¿Quiaate juhuacarijia niyaree canaa quia saniitionura Jesunaa?

³⁰ Jiyacaritij, cushiyari cateca naataja miaquenuuriquiaa. Jiyanoehua queraatia cushiyari quiquiaari. ³¹ Samaruhuari cuno caapiqui pueya pocuatequiaari. Naa Jesu secojoreeri:

—¡Quiaa jaara canaa tohuatanijiore nio caapiqui pueyanojiniji, canaa quia jiyarore cuno cushiyacua canaa tiuquitianura!

³² Jesuuri cuno samaruhua sequeree:

—¡Nia quiaare!

Samaruhuari cuno caapiqui pueyajiniji tohuareetaquiaari. Cushiyacua tiuquitiaseeri. ¡Cushiyari cocuatequee! Saaja caminiajinia totesee tacobinijiiri. Cushiyari tii shushiniuushii.

³³ Cushiya cojuanaari netecuatuguiaariuhua na shiriiquiniutia na tiacajiniara. Nojori tiuquiiiosacariuhua, pueya niquiara pohuataatuguiaari cushiyajinijiiri, samaruhuaraca pueyajinjinio. ³⁴ Naaratej puetunu pueyajanaari cuno tiacajiniji nijioquiaari Jesuucua. Nojori niquishacari Jesu, na sequetureeri nojori jiyajiniji na quianura tamaqui.

9

Jesu naatanishacari cumatacuruhuana cusosu

(Mr 2.1-12; Lc 5.17-26)

¹ Na nuhuaji, Jesuuri botejinia rosetaquiaari na saquiriojosano puey-ata. Caminia taquijiria niuutiaquiaariuhuari tama na tiacajiniara-jaaja. ² Tii nojori tiuquijiosacari, Jesuucua patasaquiaariiri cumat-acuruhuana cusosu pueyano. Patasaquiaariiri na matujinia. Jesu niquishacari taa na patanaa tiuququiaari jiyanohua nocuani, cusosu sequereeri:

—¡Quia shuquiriri sanajanaa! Quiaacuajaari tari jiyanooshaaree sesa quia miishanojiniji.

³ Noojiaqueya Moisés Rootasanojiniji niishitiojonaari Jesu sequesano tojtitariquiaa. Nojoriiri tama noojiajiniajaaja niishiriojonuuquiaari: “¡Nio pueyanoori tama na cuaqueyajaaja jiyateya juhua Pueyaso na quiniuria naa na sequesacari! ¡Cunoori jiyanohua sacuraatia!”.

⁴ Jesuuri cuno pueya niishiriojosano niishiquiaari. Nojori sequereeri:

—¿Casaara sesa nia niishiriojiyani? ⁵ Seetanujuanaa, pueyano maja na naata jiyanooni pueya miishano sesa. Naajuhuj, majaari na naata tamajaaja pueya na naataniniu. ⁶ Naajaa, janiyari nia niishitiniutianiyani janiyari mijiria jiyarosaquiaarini cua jiyanooniuria pueya, sesa nojori miishanojiniji.

Jiyacaritij, Jesuuri cusosu sequequiaari cuno pueya niquiara:

—¡Quia sanere! Quia matu quia pataarohua quia tiajinia.

⁷ Cusosuuri sanequiaari. Na tiajinia quiaarohuari. ⁸ Na niquitiushacari Jesu miishano, puetunu pueyajanaari shiriqitieuquiaari. Nojoriiri Pueyaso maniniuhaqueetaquiaari pueya na niquitionuucua na cumaaca, naa Jesu miiniuriatej.

Jesu sequesacari Mateo na pueyano na quiniuria

(Mr 2.13-17; Lc 5.27-32)

⁹ Jesu quiasacari cuno tiacajiniji, tamonu pueyano niquiquiaari cajiyanoori cumaneeca masejojuajinia Romano jiyaniijara. Na sesa quiquiaari Mateo. Nojuacuajaari janiya; nio naajionani. Jesuuri cua sequequiaari:

—Cua nuhuajiyare cua pueyano quia quiniuria.

Janiyari ritia sanequiaarini. Janiyari nata quiaareeni.

¹⁰ Na nuhuaji, janiyari Jesu masuuquiaarini cua tiajinia na miaquenura, na pueyajuhuj. Naacuajitij Jesuuri cua tiajinia tiuquitiaquiaari miaquenura. Queraatia cuarta cumaneeca masejonaari canaa cajiiriquiaajuhuj, queraatia noo pojorijihuj, Fariseocuaca jiyaniqititushano sesoriquia pueyatatej. Puetunu canaajanaari Jesuta miaquenuuriquiaani. ¹¹ Fariseocuaca jaara Jesu niquiquiaari miaqueyano canaata, nojori soosano pueyani, nojoriiri naa Jesu saquiriojosano pueya nequesotaree:

—¿Casaara nia niishitiojona miaqueya cuno sacuraatia cumaneeca masejonaatani, sesoriquia pueyatano?

¹² Jesuuri naa nojori sequesano tojirii. Nojori sequeree miriquiiri:

—Cante na cuaqueya jiyaniyani maja cusosu na quiniu, nojuajaari maja naarajona na paniniu. Cusosuhua cutaraari naarajona panijia. Naajuhuj, sesa miijica pueyari cua paniya nojori cua jiyanooniuria sesa nojori miijiosanojiniji. ¹³ Niaa cuara niishitiojosuhuara socua, maninia nia niishiniuria casaa tariucuacaanu Pueyaso sequesano niishitiojiyani naa na sequesacaritij:

“Niaacuaajaari nia seya catijiaquiaa cucuara. Maninia juhuari nia taraajenura tamasaaca. Cuno cutaraari cua shuquiritiasano”. Naara niqiaarinijia nia sequesano sesa miijiaca cua jiyanooniuria sesa nojori miishanojiniji. Maja cutaraari mijiria cua ninu quiquiaari maninia pueyacia.

Pueya nequesotasano casaara Jesu pueya tarinitiaaquiQUIIAA quenaaja miaquenuni

(Mr 2.18-22; Lc 5.33-39)

¹⁴ Tiuquinijiona Juan pueyari Jesuucua niqiaari naa na nequesotamura:

—¿Casaara quia pueya tarinitiaaquiQUIIAA quenaaja miaquenuni, nojori secojonura Pueyasoni? Canaacuaajaari miaquenu cartequiaani Pueyaso canaa secojonura taa Fariseocuaca miiquiaacuaani.

¹⁵ Jesuuri nojori riucuaare miriqui:

—Pueyano camishacari, ¿na masuusano pueyatucua taraatia quiriiri, camiriquiano pueyano jaara nojoritia quiyajaa? Maja. Tamacari cutara, camiriquiano pueyanoori nojori tajiniji rishaanutaniya. Jiyacari cutara maja cua pueya miaquenu quiniutianiya, janiya jaara nojori tajiniji rishaareni.

¹⁶ Socua cua tojitiare pueyanaa. Pueyano jaara cushipirijionu paniri na toque mocua, maja na naata quiarinio toquerau ruposaanu toque mocua cuhuocojinia, jeequesoojua na quishacari. Quiarinio toquerau jaara ruposaaare toque mocua cuhuocojinia, na jeequesacari, posequenutaniyari. Cunota, toque mocua cuhuocoori socua sutenutaniya.

¹⁷ Naajuhuj, majaari pa naata uva caaca racatanu shoque tariucuacojinia. Uva quiariniacu jaara racatasaare juucua shoque tariucuacojinia, jaara jerema vinora na quiniuria, shoque tariucuaco surtanutaniyari. Vinoori niitiasaanutaniya najuhuanaj. Shoque tariucuacoori maja na naata tooni, uva caaca jaara jerema. Naaratej, uva caaca nia shuujiore shoque quiariquiojinia, maja najuhuana nia niitianura uva caaca. Naajuhuj, majaari na naata cua niishitiojosano cojitishaanu tariucuacaanu niishitiojosanota. Cua niishitiojosano nia tojitiare cutara.

Caapiqui maajipohua naatanijosacari

(Mr 5.21-43; Lc 8.40-56)

¹⁸ Jesu pocuasacarijia, nocua niqiaariiri Pueyaso secojojua tia camarnu. Jesu cariquimiaji mojuquetaquiariiri. Na sequereeri:

—¡Quiyatuuri shusha cusoquee! Naajaa, miji, cuata quia quiaare. Niishyanijia quiaa jaara niare nocua quia juaashiquia, samiitianutanihuari.

¹⁹ Jesuuri saneree. Nata quiaareeri. Canaa, Jesu saquiriojosano pueyani, canaari nata quiaareejuhuj. ²⁰⁻²¹ Canaa quiasacari, tamonu maaji cusosuuri Jesuucua catecanoquiaari jiyasohuaja na paramaji. Cuno maajiiri pueyaracaanu naatesacari. Doce marijaari tari na shoconujuquiaari pueyaracaanu na naatesacari. Tama niishiriojoriquiaajaarijia: “Janiya jaara Jesu toque quiareni, cua nanacaari curetanutaniya”. Cunora, maajiiri Jesu toque casaca quiaasee jiyasohuaja.

²² Jesuuri na nijiniara tacatequee. Cuno maaji niquiriiri. Na sequereeri:

—Shuquiriaatia quia quiri, sanaana. Cucua quia tiuushacari, quia nanacaari tari curetaquee.

Jiyacaritij, cuno maaji jiniacumaari ritia sacuantaquee.

²³ Jesuta canaa tiuquishacari Pueyaso secojojua tia camarnu tiajinia, canaari pueya niquishiini macura naajua jonneniuyano taraatia, sapiyoniuyanonio. ²⁴ Jesuuri cuno pojori sequeree:

—¡Niiquiji nia tohuareetare! Nio maaji samiriuuri maja macu. Nareja maqueyano.

Pueyari Jesu saroojotaree saaja, naa na sequesacaritij. ²⁵ Jesuuri cuno pojori tohuatanijioree saaja. Na nuhuaji, sohuacamara tiuquimiaari macuucua. Na juaashiquiajiniji na quiaseeri. ¡Maaji samiriuuri sane-maa! ²⁶ Naa Jesu miishanojinijiiri pohuatasaaquiaari puetunu cuno jiyajiniajanaa.

Jesu jeecasacari caapiqui cariyojuaru namijiaa

²⁷ Canaa jaara tohuareetaquiaari cuno tiajinijini, caapiqui cariyojuaruuri Jesu nuhuajiquiaari. Canaa nuhuaji nacariquiaari nojori niishishacari Jesuuri seetanujanaa Pueyaso Jiyarosano. Naaratej, Jesu sequeturiquiaari:

—¡Supuetana David niquiohuacuajinio supueno pueyanonaa, canaacua quia taraajere quenaaja!

²⁸ Canaa tiuquishacariuhua canaa quijia tiajinia, cariyojuarujuriiri Jesuucua catecanoquiaari. Jesuuri nojori nequesotaree:

—¿Niaate cucua tiuya nia namijiaa cua jeecanura?

Jesu riucatureeri:

—Jaa, jiyaniijianaa. ¡Quia naatacuaaquinatejaj!

²⁹ Jesuuri na juaashiquia niaree nojori namijiaacua. Jesuuri cariyojuarujuri sequeree:

—Cucua nia tiuuniucua, cuaara quiiria taa nia sequereecuajani,

³⁰ Cuno pojori namijiaari maniniuajiacara quiquiaariuhua. Jesuuri jiyanojua nojori rootaree:

—¡Majaari tamasaca niquiara nia pohuatanu cua miishano!

³¹ Na tohuareetasacari, cuno cariyojuarujuriiri ritia pohuatanu coteequiaari Jesu miishanojiniji. Naacuajitij, Jesujiniji niishishaaquiaariiri puetunu cuno jiyajiniajanaa.

Jesu pocuatesacari tiquia pueyano

³² Cariyojuarujuri tohuareetanu nuhuaji, tamasaca pueyari Jesuucua jaatucuquiaari samaruraca pueyano. Cuno pueyanoori maja na naata pocuanu quijia. Tiquiatuhuj. ³³ Jesuuri samaru tohuatanirii cuno pueyanojiniji. Na nuhuaji, cuno pueyanoori ritia pocuanu coteequiaari. Naa pueya niquishacaritij, nojoriiri jiyanojua jiuujiatequiaari. Sequetureeri:

—¡Naa miishanoori maja na niquishaanu quiquiaari Israel jiyajinia!

³⁴ Fariseocuacaari saaja Jesu macaatiquiaari pueya niquiara. Naa sequetureeri:

—Cuno Jesuni, nojuajaari samaruhua jiyaniijia cumaacaraca. Naacuajitij, na naata samaruhua tohuatanijionu.

Jesu taraajesacari pueyacua

³⁵ Jesuuri puetunu tiacajiniajanaa rucuanajoquiaari Pueyaso rupaa na pohuatanura, puereetuca tiacajinia, shiitianiyojua tiacajinianio. Maninia rupaa pohuataquiaariiri Pueyaso secojojua tiacajiniaqueya, pueya niishiniuria taa Pueyaso jiyanooni paniya nojorini. Naajuhujaj,

nojuajaari queraatia tamaatia cusonu naatanijioquiaari puetunujuaanaa, nootunejacanio.

³⁶ Jesu shootiasacari pueya, nojoriicua taraajequiaari jiyanohuari. Pueyari taraatia niquishano quiquiaari, juhua tashuquioono pueya. Nojoriiri taraatia quijiaca quiquiaari juhua cojuasoo borregohua. Shaaquina camaru. ³⁷ Cunora, Jesuuri canaa na saquiriojosano pueya sequequiaari:

—iNia niquiri! Jiyanohua queraatia pueya. Cuno pojoriiri juhua puereetuuca sucohua. Saniniuuja, secajaari na senoonaa. ³⁸ Nocujani sequeyanijia, na Camaru nia secojore, nojuaja cuara jiyaroora queraatia poonijionaa na senooriquiano nera.

10

Jesu saquiriojosacari doce pueya na jiyaramiquishocoriquiano
(Mr 3.13-19; Lc 6.12-16)

¹ Jesuuri canaa na doce saquiriojosano pueya sequequiaari na rootasano canaa tojiniuria, canaa na jiyaramiquiyaquishacarijia. Jesuuri canaa niqutioquiaari na cumaaca, samaruhua canaa tohuatanijonura, cusosuhua canaa naatanijionura, puetunu noonujuaanaa canaa shaatanurajuhua.

² Nioori canaa sesaca, na jiyaramiquishocoriquiano pueya sesacani: coteenuuri quiquiaari Simón. Pedroori na sesa quiquiaarijuhuaj. Pedro tarajanu Andrésri quiquiaarijuhuaj. Quiriquiaajaariuhua Santiago, tarajanu Juannio. Cuno pojoriiri Zebedeo niqiohua quiquiaari. ³ Felipeeri quiriquiaajuhua, Bartolomé, Tomásnio. Quiriquiaajaariuhua janiya Mateoni. Janiyari tarijia quiquiaarini cumaneeca masejojua Romano jyaniijara. Quiriquiaajaariuhua socua tamonu Santiago. Cuno Santiagoori Alfeo niyanu quiquiaari. Quiriquiaajaariuhua Lebeo. Na sesa tarajanuuri quiquiaari Tadeo. ⁴ Quiriquiaajaariuhua Simón. Nojuajaari Cananeo pueya maanujinjinio quiquiaari. Judas Iscarioteeri quiriquiaajuhua. Nojuajaari Jesu quiateriquiano quiquiaari mosocoriquiano.

Jesu rootasano na pueya na jiyaramiquiyaquishacarijia
(Mr 6.7-13; Lc 9.1-6)

⁵ Jesuuri nio na doce pueya jiyaramiquiquiaari Pueyaso rupaa canaa pohuatanura. Coteenu, canaa rootaquiariiri, canaa na jiyaramiquiyaquishacarijia. Naa canaa sequequiaariiri:

—Majaari taucuacaacia nia quiojonu. Naajuhua, majaari nia tiuquiniu Samaria pueya tiacajinia. ⁶ Saaja parta Israel pueyacia nia quiaare cutara. Nojoriiri juhua borregohua tashuquioono quiya. ⁷ Nojori niqiuara nia pohuatare puetunu tiacajiniajanaa. Nojori nia sequere: “Pueyasoori quiarijia nia jitianu paniya, niaa jaara na rupaa tojitiajacara quiri”. ⁸ Cusosuhua nia naatanijiore. Macunucua nia samiitianijiore. Canapute lepra cusonu jitianu, cuno cusonu nia shaajare pueya cuaqueyajiniji. Samaruhua nia tohuatanijore pueyajiniji. Niaacuajaari nio cumaaca maseree nareja. Naaratej, nareja nia naatanijiorejuhuaj. Majaari cua cumaaca nia jamuenu.

⁹ Majaari cumaneeca nia panu. ¹⁰ Majaari nia caashoque nia panu. Majaari socua toqueya nia panu, sapatunio. Saa nia cushishanotaja nia

quiaare. Majaari nia panu nia miojotu. Nia naacutasano pueya cuaara niquitioora saniniuujia nia panishano.

¹¹ Nia rucuanijosacari, niaa jaara tamonu tiacajinia tiuquishii, nia nequesotare tee maninia pueyano quiyani. Cuno pueyano tiajinia nia jiyojetare, niaa cuaara cuniquiji quiaarejaatijia. ¹² Niaa jaara tamonu tiajinia tiuquishiiquia, pueya nia sequere naatej: “Pueyaso cuaara nioojia cajitiiria”. ¹³ Cuno tiajinia quiniaa jaara maninia pueya quiri, juhuajaniya quiniutianiyari taa nia sequereecuajani. Nojori jaara Pueyaso tojiyashijiaca quiri saniniuujia, nojori jiuujiacaari cajitiyaquishaanutaniya. ¹⁴ Tamonu tia camaru jaara nia tiuquinitianu paniyaquiri na tiajinia, Pueyaso Rupaa ruuretajaca nojori quiniuucua, nojori niquiara nia nioluacaacuaji nia rapijiotare jiya jooqua. Naacuajitij, cuno pueyari niishiniutianiya Pueyasoori nojori jiyanoyaquiniutianiya, nojori maseyaquiniuucua na rupaa pohuatanaa. Naa nia miirijihuhaj cuno tiaca pueya niquiara, cuno pojori jaara Pueyaso rupaa tojiniu paniyaquiri nia pohuatasacari. ¹⁵ Seetanujuanaa nia sequeyanijia, jiya puequesacari, cua nequesoresacari pueya, cuno pueyari jiyanohua saniitiosaanutaniya socua Sodoma tiaca pueyajiniji, Gomorra tiaca pueyajinijinio.

Pueyaso rupaa pohuatanaari naquiya miishaanutaniya

¹⁶ Socua cua tojitiare. Janiyari nia jiyaroya Pueyaso tojitiaashijiaca niquiara nia pohuatanaura cua rupaani. Niaari nojori tajinia puereeta quiniutianiya, naatej, taa borregohua quiya sayora tajiniacuaani. Nojori sesa miiniutianiya nijaniya. Nocuaji jiyanohua niishijiaca nia quiri, tama nia cuaqueyajaaja nia cojuanura. Naajaa, majaari nojori naminiu. Saaja maninia nia quiri juhua noseja, pueyano porocua. ¹⁷ Tama nia cuaqueyajaaja nia cojuare tamasaca pueyacuaji. Cuno pojoriiri nia jiyatanutaniya tiaca jiyaniijianucuaacua nia saniitiosaanura, nojori tojiniu paniyaquishacari cua rupaa. Niaari Pueyaso secojojua tiacajinia piquishaanutaniya. ¹⁸ Cua rupaa nia pohuatanuucua, niaari quioosaanutaniya tiaca jiyaniijianucuaacuara, nojori nequesoreenura nijaniya. Niaari jiyaca jiyaniijianucua niquitiosaanutaniyajuahaj. Naajaa, naacuajitij, niaari nojori niquiara pohuatanutaniya janiyajiniji, taucuaca jiyaniijianucua niquiaranio. ¹⁹ Niaa jaara jiyaniijianucua tajoji nujuatesaare nequesoresocoriquiano, majaari nia niishiriojonu taa nia riucuanutaniyani. Nia riucuanu panishacari, niaari jiyacari niishitiosaanutaniyacuaaja maninia nia riucuanura. ²⁰ Naacuajitij, nia riucuasanoori maja tama nijaniyajinijijaaja quiniutianiya. Pueyaso Sohuanu cutaraari nia pohuatenutaniya jiyaniijianucua niquiara.

²¹ Pueyari tama tarajanujuaja niquitionutaniya mosocoriquiano, tarajanu tiuushacari cucua. Pueyanoori neyanu niquitionutaniya mosocoriquiano, cucua neyanu tiuuniuucua. Mueraasapueeri tama na queya tacartanutaniyajaacujua na motenura, na queya tiuushacari cucua. ²² Puetunu pueyajanaari nia niquiniu paniyaquiniutianiya, cucua nia tiuushacari. Naajaa, cante seetanujuanaa cucua tiuujia quiya pueyaraaanuni, nojuaja cutaraari jatanishaanutaniya pueyaraaanu shacantuca quijia na quiniuria. ²³ Pueya jaara naquiya nia miiri Pueyaso rupaa nia pohuatasacari nojori tiacajinia, cuno tiacajiniji nia mashiri tamonu tiacajiniara tii nia pohuatanaura. Seetanujuanaa nia sequeyanijia, juhuanojuaja nia tucuataaquishacari nia pohuatanu Pueyaso rupaa

puetunu Israel pueya tiacajiniajanaa, janiyari jiyocuacaanuji tacatenu-taniuhuani.

²⁴ 'Nio nia niishirijihuahaj. Pueyanoori maja socua tojishano na niishitiojonajiniji. Naajuhuj, seruuri maja socua tojishano na camarnujiniji. ²⁵ Pueyano jaara maninia tojiriqvia na niishitiojona, maniniacuajaari nojuaja jaara na nuhuaji juhua na niishitiojonara quirijihuahaj. Maniniacuajaari, seru jaara juhua na camarnura quirijihuahaj. Naaratej, nia Jiyaniija jaara jiyaniquishiyacuaa "Sesaacata", ¿taariquitijia socua na muerasu sesacasaanutaniyatej?

Cante socua pa pueresanoni
(Lc 12.2-7)

²⁶ 'Naaratej, majaari nia puerenu niarta pueya. Puetunu jiyasohuaja pueya miishanojuanaari niishishano quiniutianiya. Puetunu pueya seetasanojuanaari niishishaanutaniyajuhuj. ²⁷ Jiyasohuaja cua niishitiojosano niajaniyani, cuno nia pohuatate puetunu pueya niquliarajanaa. Cua sasacojosano nia numaa pajamani, cuno nia nacatate puetunu pueya niquliarajanaa. ²⁸ Majaari nia puerenu pa puecoojuaca. Nojoriiri maja na naata pa sohanu monu. Saaja nia puerere cutara nooj, cante cumaacaracacuajani mani quiqiojinia nia sohanu na quejoonura, nia cuaqueyano.

²⁹ 'Pa naata saaja niquiriyatu cumaneeniyajuata caapiqui shiyujuaniyosua masenu pa miaquesocoriquiano. Naajaa, pa Que Pueyasoori puetunu cuno shuhua niishiyajanaa. Naacuajitij, majaari quenaaja niquiriyatujua shiyosua cusonu Pueyaso paniyaquishacari. ³⁰ Naajuhuj, Pueyasoori puetunu nia naca cajasu niishiyajanaa. Puetunujuanaari na serojosano quiya. ³¹ Naacuajitij, maja nia puerenu. Niaari jiyanohua socua Pueyaso panishano queraatia shuhujiniji.

Maja cumaati Jesucristojiniji pa caririqiniu
(Lc 12.8-9)

³² 'Niaa jaara tamasaca pueya niquiara sequere niaari cucua tiuujia cutara, janiyacua jiyocuacaanu quijia cua Que niquiara sequerejaniuhuj, niaari cua muerasu. ³³ Cante saniniuujia cucuaji seetaja tamasaca niquiarani, janiyari cua Que niquiara na tamacanutaniyajaacuhuj.

Jesuucua tiuujia pueyari narta pueya juaashano
(Lc 12.51-53; 14.26-27)

³⁴ 'Majaari nia jyaniniu janiya mijiria niquiarini pueya quiniuria juhuajaniya. Maja. Mijiria cua niniuucua, pueyari juayonuujutanutaniya. ³⁵ Niquiari cutaranijia pueya tiuuniuria cucua. Naacuajitij, pueya tiuushacari cucua, cucua tiyashijia pueyari nojori niqiniu paniyaquiniutianiya. Naacuajitij, pueyanoori na que paracaaniutianiya, cucua tiuujia na que quiniuucua. Maajiiri na nucua paracaaniutianiyajuhuj, na nucua tiuuniuucua cucua. Pueyano niqiuocuaari na reyarucua paracaaniutianiyajuhuj, cucua tiuujia na reyarucua quiniuucua. ³⁶ Naacuajitij, tama pueya panishano pueyajaajaari na paracara quiniutianiya, cucua nojori tiuuniuucua.

³⁷ 'Cante na queya panijia socua janiyajinijini, jiyano pueyanoori maja maninia cua pueyano na quiniuria. Cante necohua panijia socua

janiyajinijini, jiyano pueyanoori maja maninia cua pueyano na quiniurijahuaj. ³⁸ Cante tama na cuaqueyajaaja panitiaaquijia na tojiniuria janiyani, cunoori maja maninia quiria. ³⁹ Cante saaja tama na cuaqueyajaaja cojuanu paniya shuquiriaatia na quiniuria mijiriani, jiyano pueyanotej, nojuaja cutaraari shaajasaanutaniya, pueyaracaanu taraatia na miitiasaanura. Saniniuujia, cante tama na cuaqueyajaaja panitaa naquiya na miishaanura cua tojjia na quiniuucuan, nojuaja cutaraari rishijiara jatanishaanutaniya. Seetanujuanaa cuata shuquiriaatia quiniutianiya pueyaracaanuuri.

Pueyasoori maninia miijiaa niqutionutaniya na jiitiasanojiniji
(Mr 9.41)

⁴⁰ Cante na tiaco nia tiuquinitiaja cua rupaajiniji nia pohuatasano na tojiniuriani, cuno pueyanoori cua tojiyajuahaj. Cuno, cante cua tojjiani, nojuajaari cua Jiyarona tojjiajuahaj. ⁴¹ Naajuhaj, cante Pueyaso rupaa pohuatana tiuquinitiaja na tiaconi, Pueyaso rupaa pohuatana na quiniuucuan, Pueyasoori cuno pueyano niqutionutaniya maninia na casaajiniji. Nojuajaari niqitiosaanutaniya mariyata taa Pueyaso rupaa pohuatana niqitiosaanutaniyacuaani, Pueyasojiniji na pohuatanu sami. Cante maninia miijia pueyano tiuquinitiaja na tiaconi, maninia pueyano na quiniuucua, na tiaco tiuquinitiaja pueyanoori maninia casaa niqitiosaanutaniya mariyata taa maninia miijia pueyano niqitiosaanutaniyacuaani. ⁴² Naajuhaj, cante quenaaja shiniitiuniacu mohuaca raateya tamonuni, cua mueyanijoyua na quiniuucua, Pueyasoori seetanujuanaa na jiitiasanojiniji na niqutionutaniya na raatenu sami.

11

Tiuquinijiona Juanri na pueya jiyaroquiaari Jesu nequesotanura
(Lc 7.18-35)

¹ Jesu jaara canaa na doce saquiriojosano pueya rootanu tucutaquiaari tii, nojuajaari tiji quiaquiaari cuno jiya tiacajinia quiniaa na niishitiojonura Pueyaso rupaa.

² Tiuquinijiona Juan quishacari nujuatejojuajinia, nojuajaari jiyacari niishiquiaari Jesucristo miishanojiniji. Cunora, nojuajaari na pueya jiyaroquiaari Jesuucua naa na nequesotanura:

³ —¿Quiaate seetanujuanaa Cristo, tariucuaaanu Pueyaso sequesano canaacua niriquianotej? ¿Canaate tamonu sashiya soj?

⁴ Jesuuri nojori riucaaree:

—Nia quiaarohua. Tiuquinijiona Juan nia pohuatasuhua puetunu cua miishanojuanaa nia niquishano, nia tojishanojuhuj. ⁵ Naa nia pohuatasuhua: “Cariyojuarujuriiri tari niqitiarohua. Shipiiniquiniuujiacaari maninia rucoorohua. Shu miaqueja cusonu jiitiajaacari tari jeequerohua. Numueejunucuaari tari tojtiarohua maninia. Macunucuaari samiitiacorohua. Casamiijiuniucua pueyari Pueyaso rupaa pohuataasaaree, Pueyaso muerasura nojori quiniuria”. ⁶ Shuquiriaatia quijia cutaraari noo pueyano, cante cucuaji taacanuyaquijiani.

⁷ Tiuquinijiona Juan pueya jaara quiojoquiaariuhua Juancua, Jesuuri Tiuquinijiona Juanjiniji naa pohuatanu coteequiaari pueya niqiaratej:

—¿Casaa niquniuucua nia quiojocanu cariiquia jiyajiniani? ¿Niaateeri paratu piyarojosano naajua niquniuucua quiacanu? Maja. ¿Tiuquinijiona Juanteeri noojia niqiiijoteja? Maja. ⁸ Cua sequeture, ¿casaa niquniuucua nia quiojocanuni? ¿Niaateeri pueyano niqiquianu maniniuqui toque cushiyano? Maja. Cuno pojori cante maniniuqui toque cushijiani, nojoriiri jiyaniijianucua tiajinia quijiaca cutara, maja cariiquia jiyajinia. ⁹ ¿Taateerinitioj? ¿Casaacua nia quiojocanuurini? ¿Pueyaso sequenu panishano caminiujiunia niquniuucuatee? Jaa. Seetanujuanaa nia sequeyanijia, Tiuquinijiona Juanri jyanohua socua cutara pueyano tamasa Puyaso sequesano caminiujiuniaajiniji. ¹⁰ Cuno Juanjinijicuaaari tariucuaaanu Puyaso Rupaajinia pohuatasaaquiaari. Naa naajiotasaaquiaari miriqiiri Puyaso sequesano janiya nojuajiniji: “Janiyari cua pueyano jiyaronutaniya quiocuajini. Nojuajaari quia puetanutaniya, quia nuu jeecariquiano quiocuaji”.

Juanri naa maninia miiquiaari cucuaji, pueya tojiniuria janiya cua tiuquishacari.

¹¹ Seetanujuanaa nia sequeyanijia. Majaari tamonu pueyano quiniu quiquiaari socua cutara pueyano Tiuquinijiona Juanjiniji. Naajaa, cante Puyaso muerasuniyojua quia cucua na tiuushacarini, cunoori socua cutara pueyano Tiuquinijiona Juanjiniji.

¹² Tiuquinijiona Juan jaara coteequiaari Puyaso rupaa pohuatanu, pueyari jyanohua saniniujiuriquiaa Puyaso muerasu nojori quiniuria. Pueyari naa saniniujiya quiarijiajuhuaj. Cante jyanohua saniniujiya Puyaso muerasu na quiniuriani, naa quiniutianiyari. ¹³ Supuetana Moisés, mariyata puetunu Puyaso sequesano caminiujiuniaajanaari tariucuaaanu pohuataquiaari taa Puyaso jitianutaniya pueyani. Naa poojotasaaquiaariiri Tiuquinijiona Juan jaara tiuquiquiaariijaatiija. Quiarijiani, Tiuquinijiona Juanta, nojori pohuatasanoori tari tohuateenu coteya. ¹⁴ Naa jaara nio cua pohuatasanoocua tiuuniu paniri, nia tojiri nio: Tiuquinijiona Juancuaaari tariucuaaanu pueyara Puyaso sequesano caminiujiunia Elíascaja. Elíascajaari sequesaaquiaari niriquiano. ¹⁵ Cante numaaracani, cuara tojiiria cua sequesano.

¹⁶ Naa pohuatareera taamuecate nio pa quishacari pueyani, quiarijiani paa na quiyani. Nio pueyari juhua naatujoori, canapute carijiniacuma tacuarishijionu pania juucuanu. Nojoriiri narta naatujooriicua naca, nojori tacuarishijionu panishacari juuca. ¹⁷ Naa nacaari: “Canaari juucua naajua jonenejiyani. Majaari nia nianujunu paniniu. Canaa jaaquequejosacari taraatia saniniuujia, majaari nia sapuenu”. ¹⁸ Naajuhua pueyanaa, Tiuquinijiona Juan quishacari, nojuajaari mashaca ratuyashijia quiquiaari, sumatuu miaqueyashijiajuhuaj. Pueyari saaja na sequequiaari samaruraca pueyanota. ¹⁹ Na nuhuaji, janiyari tiuquiquiaarinu. Janiya cutaraari sumatuucua miaquejani, mashaca ratujuajuhua. Pueyari cua sequequiaa: “Miaquejoru cuno, ratunu porocuanio. Sesa pueya cojjia, pa soosano Romano jiyaniijia seya cojjia sacuraatiajuhuaj”. Naa nia soosacari janiya, Tiuquinijiona Juannio, niaari puetunu Puyaso niishitijosanojuanaa ruuretaa. Naajaa, pueyari na naata niishiniu maninia canaa miishanojiniji, janiya, Tiuquinijiona Juannio, canaari mariyata Puyaso jiyaramiquishano cutarani.

*Jesu piriyojosacari tojiyashijianucua pueya
(Lc 10.13-15)*

²⁰ Corazín tiacajinia, mariyata Betsaida tiacajinia, Jesuuri tii socua pueya naatanijioquiaari tamasaca tiacajiniji. Jiyajeneta casaa mi-iquiaari tii Pueyaso cumaacataari. Pueyari saaja nocua tiuyaquiquiaari. Nojoriiri maja noojia na tacatonu quiquiaari sesa nojori miiniujiniji. Cunora, Jesuuri nojori piriyojoquiaari. Naa sequequiaari nio caapiqui tiacajinia quiniaa pueyari:

²¹ —¡Niaari taraatia saniitiosaanutaniya, nioojia nia tacatoyaquiniuucua sesa nia miishanojiniji! Janiya jaara Pueyaso cumaacata miiquiaari Tiro tiacajiniani, mariyata Sidón tiacajiniano, taa cua miiquiaari nia tiacajiniacuaani, cuno taucuaca maara Pueyasocua tari noojia tacatocanu cutara. Nojori maara ritia cocuaque toqueya cushiyonuquiaari nojori tacaaniu niishishaanura sesa nojori miishanojiniji. Naajuhuaaj, nojori maara juaca quejooquiaari na nacaacua, noojia nojori tacatosacari Pueyasocua, sesa nojori miiniuucua. ²² Naaratej, janiyari nia numooteyani: jiya puequesacari, niaari socua jiyanohua saniitiosaanutaniya Tiro tiacajinia quiniaa pueyajiniji, Sidón tiaca pueyajinijinio. ²³ Capernaum tiacajinia quiniaanaa, ¿niaateeri jiyaniya niaari tamasaca tiaca shocotanutaniya nia jyanishacari niaari socua maninia cutara? ¡Maja! Niaari mani quiquojinia quejoosaanutaniya. Janiya jaara cua cumaacata cutara casaa miiquiaari Sodoma pueya tiacajiniani, taa cua miiquianu nia tajiniacuaani, Sodoma tiaca maara quiriquiaajaj. ²⁴ Nocujaji nia sequeya cutaranijia: jiya puequesacari, niaari socua jiyanohua saniitiosaanutaniya Sodoma tiaca pueyajiniji.

*Jesuucua tiuuniaari samaateriquiano cutara
(Lc 10.21-22)*

²⁵ Jiyacaritij, Jesuuri na Que Pueyaso sequequiaari:

—Quia shuquiritiaanijia cua Quenaa. Quiaari jiya camarnu, jiyocuaacaanu camarnunio. ¡Quiaari maninia! Quiaari niishiyashijiaa pueya maninia casaa niishitirii, niishijiaa pueyacuajaji quia jamosanoni. Niishijiaa pueyari saaja tama nojori niishishanoocujaja tiuujiaa. ²⁶ Naacujitij cua Quenaa, quiaari maninia niishitirii niishiyashijiaa pueya, taa quia paniquiaaricujajani.

²⁷ 'Cua tojitiare pueyanaa, cua Queeri cua niqutioquiaari puetunu casaajanaa cua jiitiasocoriquiano. Majaari seetanujuanaa tamasaca niishiniu janiya. Saa cua Queja cutaraari cua niishiya. Naajuhuaaj, majaari seetanujuanaa tamasaca niishiniu cua Que. Saaja janiya, Neyanuni, na niishiya cutaranijia, naajuhuaaj canapue cua niishitiniu paniya cua Quecujajani. ²⁸ Cucua nia nijiore, puetunu nijajaniyajanaa, canapuate tacaquioyoni, canapuate puera niishiriojonuujuacani. Niaa jaara cucua nimia, janiyari nia samaraatanutaniyani. ²⁹ Cua niishitiojosano nia tojiri. Janiyajiniji nia niishiri taamuecatucuaa janiyani. Janiyari ritia juayashijiani. Janiyari pueya shocoteyaquijiani. Naacujitij, nioojiaari maja na tacaaniu quiniutianiya nia rupuesacari janiya. ³⁰ Nia tojishacari janiya, nioojiaari juhuajaniya quiniutianiya. Cua poonitijosacari nijaniya, majaari jiyajeneta na quiniu quiniutianiya niaara, cua cumaquishacari nijaniya.

12

Jesu pueya carojotasacari trigo samaatenu juuca
(Mr 2.23-28; Lc 6.1-5)

¹ Jiyacaritij, Jesuuri canaa na saquirojosano pueyata cuhuariquia jiuujiaaco tajiriquiaa samaatenu juuca. Canaari jiyacari miaajeriquiaani canaa quiasacari nucuaco. Canaari secaja trigo jajau carojotanu coteequiaarini. Canaari na miojonuuriquiaani. ² Fariseocuaca jaara canaa niqiuquiaari naa miyanotej, Jesu sequetureeri:

—¡Quia niquiri! ¡Quia pueya trigo shuniitaa! ¡Na shuquiuquiojoniuyari! ¡Naa nojori miishacaritij, poonijioniuyari! Cuno maja panishano samaatenu juuca miiniuria. ¡Pa supuetana Moiséscuajaari naa pa rootaquiaaritij!

³ Jesuuri cuno pojori riuuaree:

—¿Majateeri nia serojonu quiquiaari Pueyaso Rupaajinia taa pa supuetana David miiquiaari na miaajesacarini, na pueyano? ⁴ Nojoriiri Pueyaso Secojojua tiajinia tiuquitiaquiaari. Pueyasora niqutiojosano pan satureeri. Cuno panri saaja pueyacuara secojonaa sasocoriquiano quiquiaari, maja socua tamonu pueyano sasocoriquiano. Naajaa, Davidri na saquiaari. Na miishanoori maninia quiquiaari Pueyaso niqiuara. ⁵ Naajuhuj, ¿majateeri nia serojonu quiquiaari tariucuacaanu Moisés naajiosanoinia, taa pueyacuara secojonaa pueyaracaanu poonijioquiaa Pueyaso Secojojua tiajiniani? Nojoriiri naa poonijionuuquiaa samaatenu juucajuhuj. Naa nojori poonijiosacari Pueyaso Secojojua tiajinia samaatenu juucatej, cunoori maja sesa. ⁶ Moiséscuajaari pa rootaquiaari maja pa poonijionura samaatenu juuca. Naajaa, cuno rootasanoori seetanujuanaa maja na quiniu Pueyaso Niyanura, jaara Pueyaso Secojojua tiajinia poonijionaara quiaquirijihuj. ⁷ Maja naasucuaari nia niishiniu quiquiaari casaa nio tariucuacaanu naajiotasano niishitiojiya nijaniya juucuan. Naa sequeyari: “Janiya cutaraari socua nia panitiaani niarta pueyacu nia taraajenura, maja saaja nia niqutiojonura nia seya cucuara catijasocoriquiano”. Naa jaara nio naajiotasano niishijia quiriquia, niaa maara sesa miyashijia pueyacuara tonujiaquiriquiaj. ⁸ Cua tojitiare quiarijia. Janiyacuajaari Pueyaso Niyanuni. Naacujitij, mijiria cua quishacari cua naata sequenu casaate samaatenu juuca miishiyani.

Jesu jeeacasacari pueyano juaashiquia cuseetucojuara joojequetano
(Mr 3.1-6; Lc 6.6-11)

⁹ Na nuhuaji, canaari Jesuta quiojoquiaari quiniqijini. Canaari Pueyaso Secojojua tiajinia tiuquishiini. ¹⁰ Pueyanoori tii quiriquiaa cuseetucojuara joojequetano na juaashiquia. Taa canaa Judiocuaca camarucua Jesuucua saquirojotanu paniriquiaa juucacuajani, jiyacaritij, na sapojonuta Jesu nequesotaturee naari.

—¿Maninateeri samaatenu juuca cusosu naataniniuria? Paacuaruhua niishitiojosaaquiaarini maja pa poonijionura samaatenu juuca.

¹¹ Jesuuri cuno pojori riuuaree:

—Naa jaara niquiriyatujua borregoniyojua jitiare, cuno jaara tiyare raama samaatenu juuca, ¿majateeri nocua nia quianu, raamaji nia panura nia seruniyojua? ¡Taaquiririnij! ¹² ¿Majateeri pueyano socua jiyanoohua panishano borregonijij? Taaquiririnij. Naaratej, maja

pa tarinitianu maninia pa miiniuria pueyaracaanu, samaatenu juucajuhuaj.

¹³ Na nuhuaji, sesarucjua sequereeri:

—Quia juaashiquia quia shiitiore.

Na juaashiquia shiitioreeri. Ritia jeequequeeri juhua tanecaraja.

¹⁴ Naa Fariseocuaca niquishacari Jesu miishanotej, tohuareetaqueeri. Tama nojorijiaarijia roojotooquiaari nojori motenura Jesu.

Jesujiniji pohuatasano tariucuacaanu naajiotasanojinia

¹⁵ Jesu jaara niishiquiaari Fariseocuaca miiniu panishano nojuaja, quiniquiji quiaqueeri. Queraatia pueyari na nuhuajiquiaari canaata. Jesuuri puetunu cusosuhujanaa naatanijioquiaari. ¹⁶ Jesuuri na naatanijosano pueya rootaquiaari maja tamasaca niquiara nojori pohuata nura cante nojuajani. ¹⁷ Naacuajitij, tariucuacaanu Pueyaso sequesano caminiujunia Isaiás pohuatasanoori tohuateequiaari. Nojuajaari juhuacarijia naa pohuataquiaari Jesujiniji Pueyaso sequesano miriquitij:

¹⁸ “Niocuajaari cua seru, cua saquiriojosano. Na timitiaanijia. Nojuajaari jiyanohua cua panishano. Janiyari cua Sohuanu jiyaronutaniya nocuani. Nojuajaari tamasaca pueyapue pohuatanutaniya janiyajiniji, nojori quiniuria cua muerasura pueyaracaanu. ¹⁹ Majaari pueyata juaajia na quiniu quiniutianiya. Majaari nacojojua na quiniu quiniutianiya. Majaari na rupaa tojishano quiniutianiya tiacaacaco. ²⁰ Majaari quenaaja shuniitiasano naajua na shutianu quiniutianiya puetunujuanaa. Najuhuaj, majaari na maquishajanu quiniutianiya jatarinitiaja nojiyano samaritiu. Nojuajaari naa sesa miijiaca jiyanooniutianiya, nojuaja jaara tiuquiriohuajaatijaj, puetunu sesa miiniujianaa na puecanura, Jiyaniijajanaa na quiniuhuara pueyaracaanu. ²¹ Puetunu tiquiyocuacajinijinio quijiaca pueyajanaari nocua tiuniutianiya”.

Pueya sequesacari Jesu samaru cumaacaracana

(Mr 3.20-30; Lc 11.14-23; 12.10)

²² Tiquiaari Jesuucua jaatucusaquiaari. Cariyojuaru quiriquiaajaariuhuj. Naa quiquiaariiri samaruraca na quiniuucua. Jesuuri na jeecearee. Naacuajitij, tiquiaari pocuajara quiquiaari, niquijiarajuhuj. ²³ Cunora, puetunu pueyajanaari nocuaji jiuujiatequiaari. Sequetureeri:

—iNio jiyoteeri pa supuetana David niquiohuacuajinio supueno pueyano, tariucuacaanu sequesano pa jiyaniijara quiriquianotej!

²⁴ Fariseocuaca jaara tojiquiaari naa pueya sequesacari Jesujinijitij, nojoriiri na juaaniutia sequequiaari saaja:

—iCuno pueyanoori samaruhua tohuatanijiya Satanás cumaacata!

Satanásri samaruhua jiyaniijia. ²⁵ Jesuuri cuno pueya niishiriojosano niishiquiaari. Cunora, nojori sequereeri:

—Jiya camarucua jaara juayonuujutare tama nojorijiaaja, majaari pueyaracaanu na naata quiniu camarnura. Ritia jatashiyari. Najuhuaj, tiacajinia quiniaa jaara juayonuutare jiyareta tama nojorijiaaja, cuno pueyari maja na naata quiniu jatiqui. Naajaariuhuj, pueyano jaara juayonuujutare tapueyocuacata tama na tiajiniaaja,

majaari nojori naata jatiqúi quiniu. ²⁶ Jaara naa quirítij, samaruhua jaara tohuatanijiosaare Sesaaca cumaacata, tama na cuaqueya paracayaajarijia. Naacuaajitij, majaari na naata na cumaaca rishiniu. ²⁷ Janiya jaara samaruhua tohuatanijiya Satanás cumaacatani, taa nia sequeya janiyacujani, cua sequeretoj, ¿cante nia niishitiojosano pueya cumaquiya samaruhua nojori tohuataniniuriani? ¿Satanáste? Majaruhua. Nojoricuajaari samaruhua tohuataniquiaa Pueyaso cumaacata. Naacuaajitij, nojori tohuatanijosacari samaruhua Pueyaso cumaacata, niaari jiyanoohua jiyajeneya nia sequesacari janiya samaruhua tohuatanijiya Sesaaca cumaacatani. ²⁸ Seetanujuanaa Pueyaso Sohuanu cumaquishacari janiya, samaruhua cua tohuatanijionura, niaa cumaati cua sequesano tojirii. Naa cua tohuatanijosacari samaruhtej, niaacuajaari niishiya Pueyasoori tari poonijiya juhua Jiyaniijia, mijiria nia tajinia.

²⁹ ¿Pueyanote na naata cumueeca pueyano tiajinia tiuquiniu na casami na jaariuutianura? Maja na naata na jaariuutianu, jaara coteenu na morojiyaquiri. Jaara na morojore coteenu, na nuhuaji cutara na naata na casami panu. Naajuhuaaj, janiyari Pueyaso cumaacata jaariuutiaa Sesaaca jiitiasano pueyani.

³⁰ Cante cua jiyano quiyacujani, cunoori cua paraca. Cante cua naacutaacuiya pueya rerecojonura Pueyasorani, nojoriiri saaja pueya cocuataa Pueyasocujaji.

³¹ Naarate nia sequeyanijia: puetunu pueya miishano sesajanaari na naata jiyanooshaanu. Sesacojojua pueyanoori na naata jiyanooshaanujuhuaaj. Saniniuujia, cante Pueyaso Sohuanu miishano sesacajani, cunoori maja na jiyanooshaanu quiniutianiya cutara. ³² Cante Pueyaso Niyanu sesacajani, nojuajaari na naata jiyanooshaanujuhuaaj. Saniniuujia, cante Pueyaso Sohuanu sesacajani, nojuaja cutaraari jiyanooyaquishaanutaniya pueyaracaanu. Na ruuretanuucua Pueyaso Sohuanu, majaari na jiyanooshaanu quiniutianiya mijiria, jiyocuaaanujuhuaaj.

*Naanaari niishishano na jajaujiniji
(Lc 6.43-45)*

³³ Naana jaara maninia naana quiri, maninia jajau muetuyari. Naana jaara sesarunaja quiri, sesa jajau muetuyari. Naacuaajitij, na jajaujiniji paari niishiyani taamueca naanatenojoni. ³⁴ Niaari juhua sacocua. ¿Niaatucua taa maninia pocuajaca quirini, niaa jaara pueyaracaanu sesa miijiaa quiyajaa? Paari poojiajiniji pa niishiriojosano pocuquiaani. ³⁵ Naacuaajitij, maninia jiuujiaraca pueyanoori saaja maninia casaa pocuaja. Sesa jiuujiaraca pueyano saniniuujia, sacuaraatia casaa pocuuari. ³⁶ Nia sequeya cutaranijia, Pueyaso saniitionu juuca, pueyari puetunu najuhuaana sesa na pocuasanojinijianaa nequesoreesaanutaniya. ³⁷ Cante maninia casaa pocuaja quiquiaarini, cunoori sequesaanutaniya “maninia pueyanota”. Naajuhuaaj, cante sesa casaa pocuaja quiquiaarini, nojoriiri saniitiosaanutaniya saniniuujia. Naaratej, majaari nia niti nia taquiriocuatenu sacuaraatia casaa nia pocuanura.

*Fariseocuaca niquiniu panishacari Jesu miishano Pueyaso cumaacata
(Mr 8.12; Lc 11.29-32)*

³⁸ Noojiaqueya Moisés Rootasanojiniji niishitiojonaari tii quiriquiaa Fariseocuacata. Nojoriiri Jesu sequequiaari:

—Niishitiojonanaa, jiyajeneta casaa quia miiri Pueyaso cumaacata canaa niquishocoriquiano.

³⁹ Jesuuri nojori riucaaree:

—Niaari sesoriquia pueya, Pueyaso tojiyashijiaca. Majaari nia niquiara casaa cua miiniu quiniutianiya Pueyaso cumaacata. Niaari saaja niquiriyatu cutara miishano niquiniutianiya taa supuetana Jonás miishaaquiaaricuaani. Cuno Jonásri Pueyaso sequesano caminiujunua quiquiaari. ⁴⁰ Nojuajaari puereetuca sapitiaaja seecojinia shocojotequiaari jiuujianaraca juuca, jiuujianaraca niucuanio. Naajuhuaaj, janiyari raaco macu niojosaqui camueenujunutaniya jiuujianaraca juucani, jiuujianaraca niucuanio. ⁴¹ Jonás pohuatasacari Pueyaso rupaa Nínive tiacajinia, cuno tariucuacaanu tucuacaari nojia tacatoquiaari sesa nojori miishanojiniji. Cunora, Pueyaso nequesoreenu juuca quishacari, Nínive pueyari saneecuatanutaniya nojori tonujunura nio pa quishacari pueyacuara. Nojoriiri Pueyaso saquiriojotanutaniya nio pa quishacari pueyacuara, nojori ruoretanuucua tamonu Pueyaso sequesano caminiujunia socua jiyaniijajanaa cutara Jonásjiniji. ⁴² Naajuhuaaj, tariucuacaanu jiyaniijia maajiiri niquiaari tucuacaanuji pa supuetanaa jiyaniijia Salomón tojiniuucua. Cunoori quiquiaari jiyanohua niishijia Salomón quiniuucua. Cuno maajiiri pananu shuucuaaji niquiaari Salomón na tojiniuria, jiyanohua tucuacaanu na jiyajiniji. Naaratej, Pueyaso nequesoreenu juuca quishacari, cuno maajiiri sanenutaniya na saquiriojotanura nio pa quishacari pueyacuara. Nojoriicuara saquiriojotanunianiyari nojori ruoretanuucua tamonu niishijia, socua niishijia Salomónjiniji cutara.

Samaruuri na tohuatanishaquiji tacatejohua

(Lc 11.24-26)

⁴³ Samaru jaara tohuatare pueyanojiniji, joojuashiquio rucuaneyiyari na samaatejara na pajesacari. ⁴⁴ Jaara riuriataaquiri na samaatejara, naa niishiriojiyari: “Tacateyarohuaraqui tariucua cua quiquiojiniohua”. Jaara tacatemohua, cuno na pueyano riuriatasuhuari juhua camaruuju tia, netoosano, maninia jeenucuasano. ⁴⁵ Naaratej, samaruuri socua tamasaca narta samaruhua pajeya. Socua siete narta samaruhua riuriataari socua jiyanohua sesa nojuajiniji. Puetunu nojorijianaa jaara tiuquitiare cuno pueyanooqua tii na quiniuria, cuno pueyanoori na nuhuaji socua jiyanohua sesa quijiara jiyacateja.

Naa quiniutianiyaajaariuhua nio pa quishacari pueyara na tojitiaaquiniuucua janiya. Nojoriiri socua sesa quijiacara jiyacatenutaniuhua taa cua niyacarijia quijiaca nojori quiquiaaricuaajani.

Cante seetanujuanaa Jesu nucuani, tapueyocuacajuhuaaj

(Mr 3.31-35; Lc 8.19-21)

⁴⁶ Jesu pohuatasacarijia pueya niquiara, na nucuaari tiuquiiioquiaari Jesu tapueyocuacata Jesuucua. Carijiniacuma quitiuriquiaari. Jesuta pocoojonu paniriquiaa juucuaari. ⁴⁷ Tamonu pueyanoori Jesu sequeree:

—iNiishitiojonanaa! Quia nucuaqui quia tapueyocuacata carijiniacuma quiya. Quiata pocoojonu paniyaquiniaari.

⁴⁸ Jesuuri saaja na numootena pueyano riucaaree:

—¿Cante cua nucuani? ¿Cante cua tapueyocuacani?

⁴⁹ Jiyacaritij, Jesuuri canaa na tojtianaa pueya shishirii. Tii quiniaa pueya sequereeri:

—Nio cua tojtitianaani, nojori cutaraari juhua cua nucua, juhua cua tapueyocuaca cutara. ⁵⁰ Naacujitij, cante cua Que Pueyaso panishano miiquiaa cutarani, nojuaja cutaraari cua tarajanu, cua rimiatu, cua nucuanio.

13

Natoojojua pueyanojiniji pohnuatasano

(Mr 4.1-9; Lc 8.4-8)

¹ Cuno juucaja, Jesuuri tohuataquiaari tiajiniji. Caminia casaqueyaji cajishiiri. Canaari nata quiriquiaani. ² Jiyanoehua queraatia pueyari nocua rerequeejoquiaari. Puera pueya quiniuucua, Jesuuri botejinia tacaquiaari. Tii cajishiiri. Puetunujuanaa pueyari jaaquiajinia jatequiaari, tiji na tojtianura Jesu canaata. ³ Jesuuri queraatia casaa pueya maanu niishitiojoriquiaa miriqui. Naa pohnuataquiaari puetunu canaajanaari:

—Pueyanoori natoojonura quiaquiaari na cuhuariquiajinia. ⁴ Na jacutasacari, secajaari nucua totequiaari. Shuhuari nocua rosetaquiaari. Puetunujuanaa nucuaaji na natau miojoquiaariiri. ⁵ Tajaacaari totequiaari tamaqui sai tajiniaqueya. Majaari puera jiya quiniu quiquiaari tii. Naaratej, cuno natauri ritia moritiaquiaari. ⁶ Pananu jaara tacaquiaari, cuno natauri ritia sorequiaari maja puera nujuacaraca na quishacari. ⁷ Tajaacaari totequiaarijuhua riyocuaca tajinia. Riyocuaca maashishacari, majaari cuno natau maashiniu quiquiaari maninia. Majaari na muetunu quiquiaari. ⁸ Maninia jiyajinia totequiaariiri tajaaca saniniuujia. Tii moritiaquiaari maninia cutaraari. Maninia muetuquiaari cutaraari. Puetunu cuno jiyoneejinijijianaani, noojiaqueyari muetuquiaari cien jajau niquiriyatu jiyonaacua. Tamonu jiyoneeri muetuquiaari sesenta jajau niquiriyatu jiyonaacuajuhua. Socua tamonu jiyoneeri muetuquiaari treinta jajau. ⁹ Niaa jaara numaraca quiri, nia tojtitiare cua pohnuatasano.

Casaara Jesu niishitiojiya miriquini

(Mr 4.10-12; Lc 8.9-10)

¹⁰ Jesuuri naa pohnuataquiaari miriqui pueya niquiaratej. Na nuhuaji, canaa, Jesu saquiriojosano pueyani, canaari nocua catecanoquiaarini. Canaari na nequesotaquiaarini:

—Jiyaniijianaa, ¿casaara pueya quia niishitiojoriquiaa miriquini?

¹¹ Jesuuri canaa riucuaaree:

—Pueyasoori nia saquiriojoquiaari, nia niishishoo casaa Pueyasojiniji nia niishiniuria, taa Pueyaso poonijia pueya jiuujiajiniani, na muerasura nojori quiniuria shuquiriaatia. Tamasacara saniniuujia, majaari nio jiyasohuaja Pueyasojiniji niishishano nojori niishishocoriquiano. ¹² Cante Pueyaso rupaa tojijia cutarani, nojuajaari socua niishitiojosaanutaniya, Pueyasojiniji jiyanoehua na niishiniuria. Cante Pueyaso tojiyashijiani, shiitianiyojua Pueyasojiniji nojori niishishanoori puetunu jaariuutiasaanutaniyajanaa nojorijiniji. ¹³ Cunora, janiyari miriqui pohnuatariquiaa nojori niquiarani. Naacujitij, nojori-iri najuhuaana niquiquiaa cua miishano na niishiaquiniutia. Nojori tojishacari cua pohnuatasano, na numaa shama tojitiuquiaa saajaari.

Majaari quenaaja nojori niishiniu na tojishano. ¹⁴ Naa nojori quiniuucuatej, tari tohuateereeri juhuacarijia supuetana Isaías sequesano nojoriijiniji. Pueyara Pueyaso sequesano caminiujuunia na quiniuucua, nojuajaari naa sequeyaaari pueyatej:

“Niaari seetanujuanaa Pueyaso rupaa tojiniutianiya najuhuanaj. Majaari nia niishiniu quiniutianiya. Niaari Pueyaso miishano niquiniutianiya najuhuanaj. Majaari nia niishiniu quiniutianiya nia niquishano. ¹⁵ Nojoriiri cumajiuujiaaca quiya. Nojoriiri juhua numueeju, tojiyashijiaca. Nojoriiri juhua nimishitiu quiyajuhua. Naa juhua nimishitiu qitiuyari nojori niquiyaquiniuucujaji. Nojoriiri naa juhua numueejunucujuhua, nojori tojitiaquiniuucujaji noojiata. Naa qitiuyari nojori niishiyaquiniuucujaji noojiata, cucua nojori tacatenuhuara cua jeeanura nojori jiuujia seque”.

¹⁶ ‘Cua pueyanaa, niaari saniniuujia shuquiriaatia quiya maninia nia niishishacari cua miishano, nia tojishacari cua pohuatasanojuhuaj. ¹⁷ Seetanujuanaa nia sequeyanijia, queraatia tariucuacaanu pueyari quiarjia nia niquishano niquiniuucua jiaatiaquiaari juucua. Naa nio niquiniuucua jiaatiaquiaariiri tariucuacaanu Pueyaso sequesano caminiujuuniaa, queraatia maninia pueyano. Majaari nojori niquiniu quiquiaari saaja. Nojoriiri nia tojishano tojiniuucua jiaatiaquiaari juucujuhua. Majaari nojori tojiniu quiquiaari saaja.

Jesu niishitiojosacari miriqui na pohuatasano natoojouajiniji

(Mr 4.13-20; Lc 8.11-15)

¹⁸ ‘Nia pohuatareera nia niishiniuria cua pohuatasano natoojouajiniji. ¹⁹ Canapuee Pueyasojiniji cua pohuatasano niishiyaquiyani, nojoriiri juhua nucuaco toteno jajau. Sesaacaari niquiaa. Pueyaso Rupaa jaariutiaa noojiajinijiiri. ²⁰ Noojiaqueya pueyari juhua sai tajiniaqueya jacutasano jajau quiquiaa. Naaratej, nojori jaara shuquiriaatia tojiri Pueyaso Rupaa, nojoriiri ritia shitimia nocua tiuquiaa. ²¹ Nojoriiri juhua nujuacaaju. Majaari cumaatia na nujuatunu. Naaratej, nojori jaara naquiya miishaare Pueyaso Rupaa tojijiaca nojori quiniuucua, nojoriiri ritia Pueyaso tojiniu tarinitiaquiaa. ²² Noojiaqueya pueyari juhua riyocuaca tajinia toteno jajau quiquiaa. Nojoriiri Pueyaso Rupaa tojirii. Na nuhuaji, nojoriiri saaja puera tacaquiaa nio jiya casamicua. Naajuhua, nojoriiri sapojosaaquiaa nojori jiyanihacari nojori jaara queraatia casamiriaca quiriquia, nojori maara shuquiriaatia quiriquiaj. Cunora, Pueyaso Rupaari maja na naata poonijionu nojori jiuujajinia. Naacujitij, cuno pueyari juhua natau muetuhuo quiquiaa. ²³ Saniniuujia, cante maninia tojijia Pueyaso Rupaani, maninia na niishiyari. Cunoori juhua jiya maniniuujinia jacutasano jajau. Naacujitij, cuno pueyari juhua maninia natau, maninia muetuna cutara. Jiyanhua maninia pueyari quiquiaa na tojishacari Pueyaso Rupaa. Naaratej, tamonuuri juhua cien jajau muetujua. Tamonuuri juhua sesenta jajau muetujua. Tamonuuri juhua treinta jajau muetujuhua.

Jesu pohuatasano miriqui trigo tajinia moritaja sesa jiyasocujiniji

²⁴ Jesuuri tamonu miriqui pohuatasano pohuataquiaari pueya niquiara, nojori na niishitiojonura taa Pueyaso tojitiaashijiaca pueya quiniutianiya Pueyaso muerasu tajiniani. Jesuuri naa pueya pohuataquiaari:

—Tamonu pueyanoori maninia jajau nataquiaari na cuhuariquia-jinia. ²⁵ Puetunu pueyajanaa jaara niucua maqueturiquiaa, na paracaari jiyacari niquiaari. Sesa jiyasocua jajau jaquerooquiaari trigo natanano cuhuariquiajiniiaari. Na natanu nuhuaji, tacateyarohuari. ²⁶ Trigo jajauri maashiquiaari. Na nuhuaji, na jajau mueratuusacari shusha, sesa jiyasocuaari mariyata niquishaaquiaari maashiyo. ²⁷ Cuhariquia camaru seyari quiaquiaari na camarujuanaa nojori sequenura: “Jiyaniijiana, ¿majateeri maninia saquiriojosano jajau quiquianucua quia natanano cuhuariquiajiniani? ¿Teje cuno sesa jiyasocua moritiarucuaa quia natau tajiniacuaraarini?” ²⁸ Cuhariquia camaruuri nojori riucaare: “Pa paracaari cunohuj, naa pa miiriu-cuaani”. Na seyari na nequesotaree: “¿Quiaate paniya canaa quianura cuno jiyasocua jayotanura trigo tajiniaqueyajiniji?” ²⁹ Na seya sequeree saajaari: “Maja. Maja nia jayotanu jiyasocua, niaa mariqui trigo na cojiritiareeri. ³⁰ Naajaa, nia tarinitiare cuaara maashiiria, mariyata cuaara noshiirijaara trigo jajau. Na nuhuaji cutara janiyari senoonaa jiyarunutaniyani, cuaara coteenu jiyasocua namirioora, nojori jiuuicocjonura jiyasocua catijasocoriquiano. Na nuhuaji cutara, cuaara trigo jajau racatatuura nataco”.

Jesu pahuatasano miriqui mostaza jajaujiniji

(Mr 4.30-32; Lc 13.18-19)

³¹ Jesuuri socua miriqui pahuataquiaari pueya niquiara, na niishitiojonura taa Pueyaso poonijiya pueya jiuujiajiniani, nocua nojori tiushacari. Naa sequereeri:

—Tamonu pueyanoori mostaza jajau nataquiaari na cuhuariquia-jinia. ³² Seetanujuanaa mostaza jajauri socua jiyanoohua shiitianiyojua puetunu tamonu jajaujinijianaa. Naajaa, cuno mostaza jaara maashiri, socua puereetucara maashijaari narta nataacuacajiniji. Naacuajitij, shuhuari na cashacucuaacua jesuya. Naajuhuj, pueyano tojishacari Pueyaso rupaa, seetanujuanaa maninia Pueyaso muerasura jatanishiyari.

Jesu pahuatasano miriqui pan poreetajajiniji

(Lc 13.20-21)

³³ Jesuuri nio miriqui pahuatasano pahuatarohuacuhua pueya niquiara, taa Pueyaso Rupaa poonijiya mijiriani. Nojori sequereeri:

—Pueyaso rupaari jiyanoohua cumaacaraca na poonijionura juhua pan poreetaja. Maaji jaara pan poreetaja cojitiri jiuujianaraca shiitianiyojua tohuatashi mishaja trigo cashojuata, puetunujuanaa na poreeteyari. Pueyaso rupaari naa cumaacaracajuhuj, pueya na jataniniuria quiariniora.

Casaara saaja miriqui sequesano pahuatasaaquiaa pueya niquiarani

(Mr 4.33-34)

³⁴ Puetunu Jesu pahuatasanojuanaa pueya niquiarani, miriqui sequesanoori quiquiaari. Puetunu na pahuatasanojuanaari naa quiquiaar-itij. ³⁵ Naacuajitij, maninia tohuateequiaariiri tariucuaaanu pueyara Pueyaso sequesano caminiujuunia sequesano, jaara nio naajiotaquiaari:

“Pueyasoori naa sequeyaquij: ‘Janiyari pueya niishitiojonutaniyani saaja miriqui cua pohuatasanota. Naacuajitij, janiyari pueya pohuatanutaniya pueyaracaanu nojori niishishoo casaani, shusha jiya shipinishaanujiniji’ ”.

Jesu niishitiojosacariuhua miriqui na pohuatasano sesa jiyasocuajiniji

³⁶Na nuhuaji, Jesuuri pueya maanu sequeree:

—Tariucujaja pueyanaa. Nia quiojorohua.

Na nuhuaji, nojuajaari na quijia tiajinia tacaarohua. Jiyacaritij, canaa, na saquiriojosano pueyani, canaari nocua catecanoquiaarini. Canaari Jesu sequereeni:

—Canaa quia niishitirijia miriqui quia pohuatasano cuno sesa jiyasocuajiniji.

³⁷Jesuuri canaa sequeree:

—Janiyacujajaari canoni, maninia jajau natojojuani. ³⁸Nio jiyari juhua cuno cuhuariquia. Pueyaso muerasuuri juhua cuno maninia jajau, cuhuariquiajinia natasanoni. Tamasacaari saniniuujia Sesaaca muerasu quia. Nojoriiri juhua cuno sesa jiyasocua, cuhuariquiajinia natau tajinia maashinioni. ³⁹Sesaacaari juhua cuno cuhuariquia camaru paraca. Nojuajaari cuno sesa jiyasocua nataquiaari. Nio jiya puequesacariiri juhua cuhuariquia senosacari quiniutianiya. Jiyocuaaanuji Pueyaso seyari juhua cuhuariquia senoonaa quiniutianiya. ⁴⁰Naatej, taa sesa jiyasocua namitiashiya catijasocoriquianocuaani, naa quiniutianiyajaariuhua nio jiya puequesacari. ⁴¹Janiyari cua seya jiyaronutaniya jiyocuaaanujini. Nojoriiri sesa miijiaa quioonutaniya, mariyata canapueete tamasaca miitiquiaa sesani. ⁴²Nojoriiri quejoosanutaniya mani quiquiojinia. Nojoriiri tii sapuenutaniya pueyaracaanu. Naquiya na miishacari, na quiaa miaquenutaniyari. ⁴³Na nuhuaji, Pueyaso tojtiajacaari jiyanhua shacantuucara quiniutianiya juhua pananu, na Que Pueyaso jiiitiasacari nojori pueyaracaanu. Cante numaaracani, cuara tojtiaara cua sequesano.

Jesu pohuatasano miriqui jiyanhua panishano casaajiniji

⁴⁴Jesuuri canaa na pueya pohuataquiaari miriqui, Pueyaso muerasu pa quiniuni, cunoori jiyanhua panishano. Nojuajaari naa sequequiaar-itij:

—Tamonu pueyanoori tamasaca cuhuariquia tajiriquiaa juucua. Casaa riuriatamaari, jiyanhua panishano casaa. Tiiija na jamorohuari tee na quiriquiaacuajani. Jiyanhua na shuquiritiasacari na riuriatasano casaa, puetunujuanaa tama na casamijiaaja niqutiojoreeri queraatia cumaneeca na jiiitianura. Na nuhuaji, puetunu na cumaneecajanaa pataareeri cuno cuhuariquia camaruucua, cuno cuhuariquia na masenura. Naacuajitij, cuno jiyanhua na panishano casaari tama na casaara quiquiaarijiaaja. Naajuhuj, socua jiyanhua panishano cutaraari, Pueyaso pueyanora nia quiniuria. Cunoori jiyanhua socua panishano puetunu pa panishano casaajinijijianaa.

⁴⁵Socua nia tojiri nio pohuatasano. Casami niqutiojonaari pueyaracaanu rucuaneriquiaa shanhua cohuajaaca tiujiau na pajenura. Cunoori noturu shipinijosano sai quiquiaari. ⁴⁶Tamonu juuca, jiyanhua shanhua noturu saajia niqutishaaquiaariiri. Jiyanhua na panishano. Naaratej, puetunu na jiiitiasanojuanaa niqutiojoquiaariiri,

cumaneeca na jiitianura, cuno na panishano casaa na masetajara. Na nuhuaji, puetunujuanaa na casami samitia masequiaari cuno noturu saajiaari, jiyanhua na panishanoni. Naajuhuj, nia tarinitiare puetunu nia panishano casaajanaa, Pueyaso pueyara nia quiniuria seetanujanaa.

Jesu pohuatasano miriqui shiyarujiniji

⁴⁷ Pueyaso Rupaari juhua pueretuua shiyaru na camaru jartasano caminiajinia. ⁴⁸ Jaara mishaja quiquiaari sapitiaajata, pueyari na jayotaquiaari jaaquiajinia. Queraatia tamaatiuniucua sapitiaajaari tii quiriquiaa. Pueyari jaaquiajinia cajitiuquiaari saaja maninia sapitiaaja nojori saquiriojonura. Canaasatujinia na niojotureeri racataso-coriquiano. Sesa sapitiaajaari saniniuujia jacutasaaquiaari. ⁴⁹ Naa quiniutianiyajaariuhuj jiya puequesacari. Naacuajitij, Pueyaso seyari rosetanutaniya, sesa miijaca na saquiriojonura maninia pueya tajiniji. ⁵⁰ Na nuhuaji, sesa pueyari quejoosaanutaniya mani quiquojinia, taa sesa sapitiaaja jacutasaaquiaaricuaani. Nojoriiri tii sapuenutaniya. Na quica miaquenutaniyaariuhua naquiya na miiniutia.

Pueyaso Rupaari jiyanhua panishano: tariucuacaanu naajiotasano, quiari naataja naajiotasanonio

⁵¹ Jesu pohuatanu puecasacari, canaa na pueya nequesotaquiaariiri:

—¿Niaate maninia niishirii puetunu cua pohuatasanojuanaacuaaja?

Canaari Jesu riucuaareni:

—Taaquiriirinij Jiyanijianaa.

⁵² Jesuuri canaa sequere:

—Maniniacuajaqui. Tariucuacaanu Pueyaso Rupaajiniji niishitiojona jaara quiarinio cua niishitiojosano Pueyasojiniji niishirijuhuj, nojuaja cutaraari Pueyaso Rupaa niishijia seetanujanaa. Nojuajaari juhua tia camaru, cante tariucuacaanu shanhua casamiriacuajani, quiarinio casamiriacuajuhuj, na tiajiniaaco racatasano. Na panishacari, na camaruuri na racatasanojiniji na panishano rijia.

Jesu quishacari Nazaret tiacajinia

(Mr 6.1-6; Lc 4.16-30)

⁵³ Jesu jaara puecaquiaari miriqui pohuatanu, tiji quiaquiaariuhuari. Canaari na nuhuajiriquiaani. ⁵⁴ Canaari na maashijia tiacajinia tiuquiquiaariuhuani. Canaa tiuquijiosacari, canaari Pueyaso secojojua tiajinia tiuquiquiaarini. Jesuuri tii pueya niishitiojonu coteequiaari. Pueyari jiuujiatequiaari na niishitiojosano nojori tojishacari. Nojoriiri tama sequequiaariijaaja:

—¿Taa nio pueyano niishiya puerajaanani? ¿Tejenotejaara na cumaa-cani, cusuhua na naatanijionurani? ⁵⁵ Na shipininiocuajaari suruhuatujiniji casaa shipinijiona quijia. Na nucuacuajaari Maria. Na tapueyocuaari Santiago, José, Simón, Judasno. ⁵⁶ Na rimiatuhuari mariyata niya pa tajinia quiya. ¿Taa na niishiya pueraarini?

⁵⁷ Naaratej, pueyari na ruuretaquiaari saaja. Naa na tiacajinijinio pueya tojtiaaquishacari nojuajatej, Jesuuri nojori sequequiaari:

—Puetunu tiquiyocua pueyajanaari maninia tojtiaquiaa cutara Pueyaso sequenu panishano caminiuujunia. Saaja narta pueya tama na jiyajinijiniojuarijia na tojtianu paniyaquiya, tama na tiajinijiniojuaja pueyanio.

⁵⁸ Naa nojori ruuretanuucua Jesutej, majaari puera na cumaacata na miiniu quiquiaari tii, nojori tiuyaquiniuucua nocua.

14

Herodes motesacari Tiuquinijiona Juan

(Mr 6.14-29; Lc 9.7-9)

¹ Cuno quishacari, Galilea jiya jiyaniijia Herodesri pohuatasaaquiaari Jesu miishanojiniji na cumaacata. ² Herodesri na seya sequequiaari Jesujiniji:

—¡Nojuacuajaari cua mosano Tiuquinijiona Juan! ¡Samitiarohuacuaaquil Naacuajitij, jiyanoehua cumaaca jiitiaari, jiyajeneta casaa na miiniuria Pueyaso cumaacata.

³ Herodesri naa sequequiaariti na monuucua Tiuquinijiona Juan. Nojuajaari naa miiquiaari Juantej: coteenu na quiatequiaariiri. Na morojoquiaariiri cumayocua shipinishano jiyocuata. Na nuhuaji, na nujuatequiaari nujuatejojuajiniaari. Herodesri naa miiquiaari na juaniutia Juantej, Juan nacasunuucua nojuaja, Herodes quiniuucua tarajanu Felipe niqiuocuata. ⁴ Tiuquinijiona Juanri naa Herodes sequequiaari quiasano na quiyaquishacarijia:

—¡Quiaari Pueyaso tojiyashijia! ¡Majaari maninia quia quiniuria Herodíasta! ¡Nojuacuajaari quia tarajanu Felipe niqiuocua!

⁵ Herodesri cunora Juan monu paniriquiaa juucua. Judiocuaca puereriquiaa saajaari. Judiocuacaari niishiquiaari cutara, Juanri seetanujuanaa Pueyaso sequenu panishano caminiujiunia quiquiaari. ⁶ Tiuquinijiona Juan nujuasacarijia nujuatejojuajinia, Herodesri na rasaanu juucajinia queranacuquiaari na masuusano pueyata. Jiyacaritij, cuno maaji Herodías niyatuuri nianujuquiaari Herodes masuusano pueya niqiuara. Jiyaniijia Herodesri jiyanoehua na shuquiritiaquiaari. ⁷ Naaratej, Herodesri necanuru sequequiaari puetunu pueya niqiuarajanaa:

—Sanaunaa, cua sequere casaa quia paniyani. Janiyacua quia niqitiore quia panishanoni. ¡Seetanujuanaa quia sequeyanijia! Majaari cua rupaa cua jatanu quiniutianiya. ¿Casaa quia paniniutianiyaní?

⁸ Jiyacaritij, niyacoo nucua Herodíasri neyatu rootaquiaari jiyasohuaja, casaa na masenutaniyani. Naaratej, niyacoori jiyaniijia Herodes sequesee:

—Cua quenunaa, cua niqitiore Tiuquinijiona Juan naca miacojuajinia.

⁹ Jiyaniijia Herodesri taraajequee niyacoo sequesano na tojishacari. Naajaa, majaari na naata na rupaa jatanu quiquiaari, seetanujuanaa na sequenuucua na masuusano pueya niqiuara. Naacuajitij, Herodesri na seya sequequiaari cuara niqitiosaarianoj. ¹⁰ Naaratej, na pueyano jiyaroquiaari nujuatejojuajiniaari, Tiuquinijiona Juan na nacatanura. ¹¹ Na nuhuaji, Juan nacaari patasaaquiaariuhua miacojuajinia. Niyacoo niqitiosaasuhuari. Niyacoori saniniuuja na nucuaacua na pataquiaari.

¹² Na nuhuaji, Tiuquinijiona Juan pueyari quiojoquiaari na quiete na panura. Na jamotuquiaariiri. Na nuhuaji, nojoriiri nijioquiaari Jesu pohuatanuucua Tiuquinijiona Juanjiniji.

Jesu mianuutesacari cinco mil pueya

(Mr 6.30-44; Lc 9.10-17; Jn 6.1-14)

¹³ Jesu tojishacari Tiuquinijiona Juan tari mosaarucuaa, nojuajaari canaa jiyataquiaari botejinia tamaquiria, pueya quiyaquishaquiria. Pueya jaara niishiquiaari tee Jesu quiaareeni, queraatia pueyari cuno jiya tiacajiniji quiojoquiaari tiriarajuhuj. Nojoriiri na neteyotaquiaari nucuaco caminia shuriuquioco. Cuno pueyari canaacuaji cutesee. ¹⁴ Naacuajitij, Jesu rosesacari botejiniji, jiyanoehua queraatia pueya niquishii saajaari. Nojoriicua taraajereeri. Cuno pueya patootasano cusosuhua naatanijioreeri. ¹⁵ Tariucua tenacari, canaa, Jesu saquiriojosano pueyani, canaari nocua niquiaarini. Canaari na sequereeni:

—Canaa Jiyaniijianaa, paa niya quiya pueya quiyaquishaquini. Paari nininiutianiyani. Juhuaarijia pueya quia sequere nojori cuaara quiojohuara tiacajinia, na miaquesocoriquiano nojori masenura.

¹⁶ Jesuuri canaa sequeree saaja:

—¿Maatucua casaara quiojyarohuani? Niaa mariqui nojori mianuutere saniya.

¹⁷ Canaari Jesu sequereeni:

—Maja canaa jiiitianu miaquesano. Niya quiya saajaari cinco pan, caapiqui sapitiaajanio.

¹⁸ Jesuuri canaa sequeree:

—Miji nia patare.

¹⁹ Jesuuri sequeree pueya cuaara cajitiuuria jiyasocujinia. Na nuhuaji, Jesuuri cuno pan pataree, sapitiaajanio. Jiyocuacaanu maureeri na Queecuara, miaquesanoocuara na secojonura. Na nuhuaji, Jesuuri pan neecasequiaari queraatiara. Canaa na niquitiojoreeri puetunu pueyajanaa canaa niquitiojosocoriquiano. ²⁰ Puetunu pueyajanaari miaquenuquiaari. Maninia tooquioreeri. Nojori puecasacari miaquenu, canaari pan neeca reratequiaariuhuan, sapitiaaja raquiquiano. Doce canaasatuuri mishinijiosaaquiaari na raacuata. ²¹ Jiyanoehua queraatia pueyari miaquenuquiaari; cinco mil quiquiaari saa canuujua. Majaari maajipohua serojosaanu quiquiaari, naatujoorinio.

Jesu rucuanesacari mohuaca caco

(Mr 6.45-52; Jn 6.16-21)

²² Na nuhuaji, Jesuuri canaa na saquiriojosano pueya secootequiaari botejinia canaa tacatanura, canaa puetanuracuaa nojuaja caminia taquijiria. Jesuuri jiyacari pueya maanu sequeriquiaa nojori quiojonuhua. ²³ Pueya jaara tari quiojoquiaariuhua, Jesuuri tuhananuucua tacaquiaari tamajaaja, na Que Pueyaso na secojonura. Jaara niniquiaari, Jesuuri tii quiriquiaa tamajaaja. ²⁴ Canaari saniniuujia caminia jiuujiajinia tari jaaretariquiaacuaani. Mohuacaari saaja canaacuara cajiniuucuariquiaa, paratu piyarojosacari canaacuara. ²⁵ Juhuaquenu panishacari, Jesuuri canaa rupesee mohuaca caco na rucuanenuta. ²⁶ ¡Canaa niquishacari casaa mohuaca caco rucuaneyano, canaari jiyanoehua shiriiquitiuriini! Canaari sariyocuatereeni.

—¡Yae! ¡Samaruruhua!

²⁷ Jesuuri ritia pocuaree. Canaa sequereeri:

—¡Nioojia nia cumaquiri! Janiyacuajanijia. Maja nia puerenu.

²⁸ Canaa tojishacari Jesu, Pedroori Jesu sequere:

—¡Jaara seetanujanaa quiajaniya quiri Jiyaniijianaa, cua sequere quiocua cua quianura mohuaca caco!

²⁹ Pedro sequereeri:

—Mijicuarajaj.

Pedroori ritia rosequiaari botejiniji. Mohuaca caco rucuanenu coteequiaariiri Jesuucua na quianura. ³⁰ Na niquishacari paratu jiyanohua piyarojiyano, Pedroori puerequiaari. Na pueresacari, moo cariquimia tiuquiniu coteequiaariiri. Nacareeri:

—¡Jiyaniijianaa cua quiare!

³¹ Jesuuri ritia Pedro juaashiquiajiniji quiaree. Na sequereeri:

—Pedronaa, majaquí puera quia tiuuniu cucua. ¿Casaara cua sequesanoocuaaji quia taacanuureeni?

³² ¡Nojori jaara botejinia tacataquiaariuhua, paratuuri jiyacari pueyajequee! ³³ Canaa niquishacari naa Jesu miishano na cumaacatatej, canaari Jesuucua mojoquetacoquiaarini. Canaari na sequereeni:

—¡Quiaaqui seetanujanaa Pueyaso Niyanu!

Jesu naatanijosacari cusosuhua Genesaret jiyajinia

(Mr 6.53-56)

³⁴ Canaa jaara caminia taquijiria niuutiaquiaarini, canaari Genesaret jiyajinia shiitiaseeni. ³⁵ Genesaret pueya jaara niishiquiaari Jesu tiuquirii, nojoriiri puetunu na jiyajiniajanaa pueya numootequiaari, cuaara patootasaaria cusosuhua Jesuucua. Naacuajitij, Jesuucua patootasaquiaariiri puetunu cusosuhujanaa. ³⁶ Pueyari Jesu sequetuquiaari:

—Nareja quia shanacure cusosuhua quiocua, nojori cuaara quia tucaque toque quiaara quenaaja, nojori naataconuhua.

Jesuuri naa miirii. Puetunu na toque quianaajanaari naatacoquiaariuhua na cusonujiniji.

15

Casaate sesa miitijia pueyanoni

(Mr 7.1-23)

¹ Na nuhuaji, Jerusalén tiacajinijinio pueyari canaacua tiuquiijoquiaari Jesuta pocoojonura. Nojoriiri quiquiaari Fariseocuaca, Moisés Naajioneejiniji niishitiojonaanio. Jesu sequetureeri:

²—Quia pueyari shuquitioojua miaquenuquiaa. ¿Casaara nojori tojitiaaquiquiaa canaa niishitiojosano pa supuetanaajinijini? ¡Nojori cuaara miiria taa pa supuetanaa miiquiaaricuaani!

³ Jesuuri nojori nequesotaree saniniuujia:

—¿Niajanियariuhuj? ¿Casaara nia tojitiaaquiquiaa saniniuujia Pueyaso Rupaani, nia supuetanaa jiiitishano miiniu nia miiniuriani?

⁴ Pueyasocuaajaari sequequiaari: “Quia que tojijia quia quiri, quia nucua tojijiano. Majaari nojori rerequetenu”. Naacuajitij, maninia pa cojuare pa queya. Pueyasoori sequequiaarijuhuaj: “Cuaara mosaaria cante na que sesacajani, na nucua sesacajanio”. ⁵ Niaari saniniuujia sequequiaacujua, maniniacuaajaari pueyano jaara na queya sequere: “Cua quena, cua nucuaana, janiyari Pueyasora niquitionutaniya cua casamini. Naacuajiti majaari cua naata nia naacunu cua jiiitasano casamitia”. ⁶ Naa nia niishitiojosacari pueyatej, niaari pueya tarinitiya

na queya nojori cartenura, naacuso nojori quiniuria. Naa nia tojishacari tama nia niishitiojosanojuuaaja juhua nia supuetanaa nia miiniuriatej, niaari Pueyaso Rupaa jiyateya najuhanara. ⁷ ¡Sapuenu Pueyaso Rupaa tojtiajacanaa! Supuetana Isaiasquiiri maninia naajlotaquiaaricuaaja niajanijajiniji, na caminiujiushacari nio rupaa Pueyasojiniji:

⁸ “Nio pueyari saa na rupaataja cua maniniuhuaqueetaquiaa. Nojori jiuujiaari saniniuuja tucuacaanu quiya janiyajiniji. ⁹ Nojoriiri najuhuaana rerejoquiaa na maniniuhuaqueetanura janiya. Nojori niishitiojosanoori tama nojori niishishanojuuaaja, maja cua rupaa”.

¹⁰ Na nuhuaji, Jesuuri puetunu pueyajanaa sequeree:

—Miji, niya cua tojtiasecuarajaj maninia nia niishiniuria. ¹¹ Pa miasanoni, cunoori maja sesara na jiyatenu poojia. Pa rupaata pa pocuasano sesani, cuno cutaraari poojia sesojua.

¹² Jiyacaritij, canaa, Jesu saquiariojosano pueyani, canaari nocua catecanoquiaarini naa canaa sequenura nojuaja:

—Jiyaniijjanaa, ¿quiaate niishiya Fariseocuaari juaaquioree naa quia sequesacaritij?

¹³ Jesuuri canaa riucuaeree:

—Naajaa. Cuaara juaaquiorea. Cuno pojoriiri juhua sesa jiyasocua, Sesaaca natasano cua Que cuhuariquiajinia. Nojoriiri juhua sesa jiyasocua jayotasaanutaniya. ¹⁴ Seetanujuanaa Pueyaso niishiyashijica nojori quishacari, nojoriiri juhua cariyojuaru quiya. Narta cariyojuaru jaatucuyari. Cariyojuaru jaara narta cariyojuaru jaatucure juucua, nojoriiri mariyata raama totenutaniya.

¹⁵ Pedroori Jesu sequeree:

—Jiyaniijjanaa, canaa quia niishitiojoreja casaa quia sequenu paniriquiaa quia pohuatasacari pa miasanojinijini.

¹⁶ Pedro riucuaereeri:

—¿Niaateeri na niishiyaquiyajuhuaaj? ¹⁷ ¿Majateeri nia niishiniu, pa miaquesano pa rupaataari pa seecojinia tiuquiya saaja? Na nuhuaji, pa marecuhuacuma tajimiaari. ¹⁸ Saniniuuja, pa rupaata pa pocuasano sesani, cunoori poojiajiniji tohuataa cutara. Naacujitij, pueyanoori sesa quiya Pueyaso niquiara, sesa casaa na pocuanuucua. ¹⁹ Pueyano jiuujiajinia coretaari puetunu sesa niishiriojosanojuanaa: monu paniniu; na camishoo maajipohua numuetucunu paniniu; saaja numuetucunuucua jiaatianu; nohuasejonu paniniu; sapojonuta saquiariojotanu paniniu; sacuaraatia coriaacojonu paniniu. ²⁰ Puetunu naa sesa pueya niishiriojosanojuanaa cutaraari pueyano sesojua. Saniniuuja, pueyano jaara miaquere shuquitiojua, naajaa. Cunoori maja na sesonu pueyano Pueyasora.

Taatu tiuushacari Jesuucua

(Mr 7.24-30)

²¹ Jesuuri Genesaret jiyajiniji quiaquiaari canaa na pueyata. Canaari quiojoquiaari tamonu taucuaca jiyajinarani. Cuno jiyajinia quiquiaariiri Tiro tiaca, Sidón tiacajuhuaaj. ²² Canaa rucuanijosacari tii, cuno jiyajinijinio taatuuri Jesuucua niquiaari. Nojuajaari Cananeo pueyajinijinio maaji quiquiaari. Jesu nuhuaji nacariquiaari:

—¡Jiyaniijianaa, cucua quia taraajere! ¡Pueyaso Jiyarosanonaa, cucua quia taraajere quenaaja! Quiyatu samaru jiitiaa. Jiyanohua taraatia na miiquiaari.

²³ Jesuuri maja na riucuanu quiquiaari. Sanaa canujuriquiaa saajaari. Naaratej, canaari Jesu catecanoquiaarini canaa sequenura nojuaja:

—¡Jiyaniijianaa, na panishano quia miiri cuaara quiohuara! ¡Taajeta naca pa nuhuajini!

²⁴ Jesuuri canaa riucuaaree:

—Janiyari saaja Israel pueyacia jiyarosaaquiaarini. Nojoriiri juhua borregohua tashuquioono. Nojoriicua taraajeyanjia.

²⁵ Cuno maajiiri Jesu sequesano tojirii. Naajaa, Jesu cariquimiaaji mojoquetaseeri. Na sequereeri:

—¡Jiyaniijianaa, cua naacutare!

²⁶ Jesuuri na riucuaaree:

—Majaari maninia pa jaariutianura pa niquiohua miaquesano, sare niquiohua niqutiosocoriquiano saniniuuja.

²⁷ Maajiiri saaja na sequeree:

—Maniniacuaja quia sequesano Jiyaniijianaa. Naajaa, sareyaniyojuacuajaari miaquesano shiriya miaquenuquiaa, na camaru totinijosano na miaquejajiniji.

²⁸ Jesuuri maaji sequeree:

—Maniniacuaja quia sequesano maajiniaa. Quiaaqui jiyanohua cucua tiuya. Cuaara quiiriaqui taa quia paniyacuajani.

Jiyacaritij, neyatuuri naataquiaariuhua.

Jesu naatanijosacari queraatia cusosuhua

²⁹ Canaari Jesuta cuniquiji quiaquiaariuhuani. Canaari Galilea caminia shuriuquico tajimiaani. Canaari tuhananuucua tacatamaani. Jesuuri tii cajishii. ³⁰ Queraatia pueyari nocua nijioquiaari. Nojoriiri queraatia cusosuhua niojotaquiaari Jesu shuriucua, nojori tiacajiniji nojori patootasano. Cusosuhuari quiquiaari shipiiniquiujiunias pueya, cariyoyuarujurinio, tiqianucujuhua, sesarunecatohuano, socua queraatia tamaatia cusosuhuanio. Jesuuri nojori naatanijioquiaari puetunujuanaa. ³¹ Pueyari jiuujiatequiaari nojori niquishacari tiqianucua pocoyano, shipiiniquiujiunias rucuaneyano maninia, cariyoyuarujuri niquishacari maniniajuhuaj. Naajuhua, sesarunecatohuari maninia numatucuaraca quiquiaariuhua. Naa pueya niquishacari Jesu miishanotej, nojoriiri Pueyaso maninihuaqueetaree. Sequetureeri:

—¡Jiyanohua maninia Israel pueya Pueyaso!

Jesu mianuutesacari cuatro mil pueya

(Mr 8.1-10)

³² Na nuhuaji, Jesuuri canaa na saquiriojosano pueya sequeree:

—Miji pueyanaa. Nio pueyacia taraajeyanjia. Nojoriiri tari jiuujianaraca juuca camueenujiya niya pata. Majaari nojori jiitiatunu quenaaja casaa na miaquetusocoriquiano. Majaari cua jiyaronu paniniu miaqueyoyua nojori, nojori mariqui na miaajenuta cusojoniuyarohua nuacuoori.

³³ Canaari Jesu nequesotareeni:

—¿Canaatucua tee riuriatare queraatia miaquesano nio queraatia pueyarani? Niya, majaari pueya quiniu quenaaja.

34 Jesuuri canaa nequesotaree:

—¿Taa pan nia jiitiaani?

Canaari na riucuareeni:

—Canaa saaja siete pan jiitiaani, secaja sapitiaajaniyojuanio.

35 Jesuuri pueya sequeere na cajitiuniuria. 36 Na nuhuaji, Jesuuri cuno siete pan pataree, sapitiaajanio. Jesu jaara na Que secojoquiaari coteenu miaquesanoocuara, na nuhuaji na neecasequiaariiri canaa niqutiojonura pueya. 37 ¡Puetunu pueyajanaari maninia miaquenuquiaari! Tooquioreeri. ¡Canaari miaquesano cureenota mishinijioquiaari siete canaasatuni! 38 Queraatia pueyari na miaquenuquiaari. ¡Saaja canuuri serojosaquiaari cuatro mil pueya! Majaari maajipohua serojosaanu quiquiaari, naatujoorinio. 39 Na nuhuaji, Jesuuri pueya sequequiaari nojori quiojonuhara. Na nuhuaji, Jesuuri canaa jiyataquiaari botejinia Magdala jiyajiniara.

16

Fariseocuaca, Saduceocuaca niqiniu panishacari Jesu miishano Pueyaso cumaacata

(Mr 8.11-13; Lc 12.54-56)

1 Fariseocuacaari Saduceocuacata Jesuucua nijioquiaari nojori saniniujiuniuria nojuaja. Nojoriiri Jesu sequequiaari:

—Casaa quia miiri quia cumaacata canaa niquishocoriquiano, canaa niishiniuria quiaate seetanujuanaa Pueyaso jiyarosano.

2 Jesuuri nojori sequeere saaja:

—Jiya jaara naatuuca quiri pananu tiuquishacari, niaari sequequiaa: “Maninia juucaqui tariqui quiniutianiya”. 3 Naajuhuaaj, pananu jaara tariquiicuaaji jama, niqutioocua jaara niquishaarejuhuaj, niaari sequequiaa: “Maruqui niniutianiya”. Niaari naa niishiquiaa taamueca juucate quiniutianiyani jiya nia niquishacari. ¡Mosanucuaanaa! ¿Casaara saniniujia nia niishiyaquia casaa Pueyaso niishitiojiya juucua nia-janiyani? Nojuacuajaari juucua na cumaacata na miishano miiquiaa nia niqiara najuhanaj.

4 Jesuuri nojori niqiara sequeerejuhuaj:

—Nio sesoriquia pueya, Pueyaso tojitiaashijiacani, nojoriiri Pueyaso cumaacata cua miishano niqiniu paniya juucua. Majaari nojori niqitishaanu quiniutianiya socua. Nojoriiri saaja nio niqiriyatu Pueyaso cumaacata miishocoriquiano niqiniutianiya: janiyari miishaanutaniyani taa supuetana Jonás miishaaquiaaricuaani.

Naa Jesu sequenu nuhuajitij, nojori tarinitiaqueeri. Canaari quiaqueeni.

Jesu numootesacari na pueya Fariseocuaca niishitiojosanoocuaji

(Mr 8.14-21)

5 Canaa niuutiasacari caminia taquijiria, canaari canaa coseyaca panu niyajetaquiaari canaa sasocoriquianoni. 6 Jiyacaritij, Jesuuri canaa sequeere:

—Niishijiaca nia quiri. Tama nia cuaqueyajaaja nia cojuare Fariseocuaca pan poreetajaacuaji, Saduceocuaca pan poreetajaacujinio.

7 Cunora, canaari tama sequetooreejaanijia:

—¿Casaa na sequeyani? Pan pa paaquiniuucua naa pa sequeya jiyoteeri.

⁸Jesu niishishacari naa canaa sequesantej, canaa sequereeri:

—¿Majateeri juhuanajuaja cucua nia tiuuniu maninia? ¿Casaara tama nia pocoojiyajaaja panjinijini? ⁹¿Majateeri juhuanajuaja nia niishiniu tari cua miishanojiniji? ¿Niaateeri tari niyajetarucuaa taa canaasatu mishajate curecanuni, cinco mil canuu jaara miaquenuucanu cinco panjinijitij? ¹⁰Niaa jiyoteeri niyajetarucuaajuhuaaj taa canaasatu mishajate curecanuni, cuatro mil canuu jaara miaquenuucanu siete panjinijitij. ¹¹¿Casaara nia jyaniriini janiya miaquesanojiniji sequeriquiaani? Maja cua sequenu panjiniji. Nia sequeriquiaanijia tama nia cuaqueyajaaja nia cojuare Fariseocuaca pan poreetajaacuaji, Saduceocuaca pan poreetajaacuajinio.

¹²Naa na sequesacaritij, canaari jiyacari niishiquini majaari Jesu sequenu quiriquiaa pan poreetajajini. Canaari shusha niishiquini Jesuuri miriqui canaa numooteriquiaa tama canaa cuaqueyajaaja canaa cojuanura Fariseocuaca niishitiojosanoocuaji, Saduceocuaca niishitiojosanoocuajinio.

*Pedro sequesacari Jesuuri seetanujuanaa Pueyaso Jiyarosano
(Mr 8.27-30; Lc 9.18-21)*

¹³Canaa tiuquiiijosacari Cesareya Filipo tiaca jiyajinia, Jesuuri canaa nequesotaree:

—¿Taa pueya sequequiaa janiyajinijini, cantena janiyani?

¹⁴Canaari Jesu riucaareeni:

—Noojiaqueya pueyari sequequiaa, quiaanaari Tiuquinijiona Juan. Herodes motesano naasucuaanaari samiitiarohuacuaa. Tamasacaari sequequiaacuajua, quiaanaari Elías, tariucuaaanu pueyara Pueyaso sequesano caminiujiunia. Tamasacaari saniniuujia quia sequequiaacuajua, quiaanaari supuetana Jeremías, pueyara Pueyaso sequesano caminiujiuniajuhuaaj, tamonu Pueyaso sequesano caminiujiunia soj.

¹⁵Jesuuri canaa nequesotarohua socua:

¿Niajanियariuhuaaj? ¿Taa nia sequeyanijia? ¿Cante janiyani?

¹⁶Simón Pedroori na riucaaree:

—¡Quiaacuajaari Pueyaso Jiyarosano! Quiaari Cristo, Pueyaso Niyanu.

¹⁷Jesuuri Simón Pedro sequerohua:

—Quiaacuajaari Pueyaso shuquiritiasano pueyano, Jonás niyanunaa. Jiyocuacaanu Quijia cua Quecuajaari quia niishitirii cante janiyani. Janiyajiniji quia niishishanoori maja pueya niishitishano quiajaniya. ¹⁸Janiyari socua sequenu paniya quiajaniyani Pedronaa. Quia sesaari Pedro. Nioori pueyano rupaajinia sequeya “saajia”. Naatej, taa saajiacuaani jataniyaquishoo, quiaari cumatia nujuataja quiniutianiya, seetanujuanaa cucua quia tiuushacari, quia niishishacari janiyari Pueyaso Niyanuni. Naajuhuaaj, puetunu pueyajanaa cante cucua tiuuriini taa cucua quia tiuyacuaani, janiyari nojori jiyatenutaniya cua muerasurani. Puetunu cua saquiriojosano pueyajanaari cumatia nujuatunutaniya, nojori niishishacari janiyari Pueyaso Niyanuni. Naacujitij, nojoriiri juhua puereetuca saajiaacua tiasano quiniutianiya. Puetunu cua muerasujanaari juhua cua tia quiniutianiya, cua quiquiu

nojori quishacari. Sesaacaari maja na naata cua tia pojoretanu quiniutianiya. Majaari na naata na tarinitiniu quenaaja janiya, cua tiasacari cua quiquiora. ¹⁹ Naajuhuj Pedronaa, quiaari juhua cua quiquio tiootu riatataja jiidiana quiniutianiya. Naacuajitij, quiaari coteenu pohuatanutaniya pueya niqiuara janiyajiniji, nojori tiuuniuria cucua, juhua Pueyasooocua nojori tiuquiniuria na muerasura nojori quiniuria. Naajuhuj, quiaa jaara rootare taate Pueyaso muerasu naata miiniu maniniani, Pueyasoori sequenutaniya cuaara naa quirirotej. Naajuhuj, quiaa jaara casaa tenujure, maja naa pueya miiniuriatej, Pueyasoori naa sequenutaniyajuhuj.

²⁰ Na nuhuaji, Jesuuri canaa na pueya rootaree maja canaa pohuata-nura tamasaca niqiuara nojuacuajaari Pueyaso Niyanu.

*Jesu numootesacari na pueya, nojuajaari mosaanutaniya
(Mr 8.31–9.1; Lc 9.22-27)*

²¹ Jiyacaritij, Jesuuri canaa pohuatanu coteequiaari taa nojuaja miishaanutaniyani. Canaa sequereeri:

—Janiyari Jerusalén tiacajinia quiariquianoni. Parta Judiocuaca jiyaniijianucuaari tii cua miiniutianiya naquiya jiyanoehua. Pueyacuara secojonaa jiyaniijianucuaari nojori rupuenutaniya naa cua para-caashaanurajuhuj, mariyata tariucuaaanu Moisés Naajioneejiniji ni-ishitiojonaanio. Naacuajitij janiyari mosaanutaniyani. Jiuujianaraca juucajinia, janiyari samiitianutaniuhuani.

²² Naa Jesu sequesacaritij, Pedroori Jesu jaatucuree tamocora na nacasunura tamajaaja. Jiyanoehua Jesu sequereeri:

—¡Maja naa pocuanutej! ¡Pueyaso cuaara cojuara quiajaniya maja naa quia miishaanuratej!

²³ Jesuuri saaja Pedro nijiniaquequee. Na sequereeri:

—¡Niiquiji quia quiaare Satanásnaa! ¡Quia sanaajere! Sesaacaari naa quia pocuaterree Pedronaa. Quia sequesanoori maja Pueyasojiniji. Quia niishiriojosanoori juhua mijiria pueya niishiriojosano saaja. Naa quia sequesacaritij, quiaari cua Que sequesanoocuaaji cua tarinitiniu paniya juucua.

²⁴ Na nuhuaji, Jesuuri canaa na pueya sequequiaari:

—Pueya jaara cua tojjijara quiniu paniya, nojori cuaara carteira tama nojori panishanojuaja. Na nuhuaji cutara, cuaara miiria cua panishano, tama na cuaqueya na panitianutajaaja cucuara. ²⁵ Naatej, pueyano jaara tama na cuaqueyajaaja shuquiritiniu paniya mijiria, cuno pueyanoori na nuhuaji jiyanoehua taraatia quiniutianiya. Saniniuujia, cante tama na cuaqueyajaaja panitiaa cucuara mijiriani, cuno pueyanoori na nuhuaji pueyaracaanu shuquiriaatia quiniutianiya cutara. ²⁶ Naajuhuj, pueyano jaara masere puetunu nio jiya casamijianaa, na casamiiri najuhuana quiniutianiya nera, na maru jaara jataasaare mani quiquiojinia na shaajesacari. Nojuajaari maja na naata Pueyaso jyanootiniu tama na cuaqueyajaaja, naajaa, nojuaja jaara puetunu na casamijianaa niquitiore Pueyaso, Pueyaso samiitianiniuhuara nojuaja.

²⁷ 'Janiyacuaajaari jiyanoehua shacantuca quijijara quiniutianiyani, cua Que jiyatesacari janiya Jiyaniijiarajanaa. Na nuhuaji, janiyari

mijiria niniutianihua jiyocuacaanuji cua Que seyatani, puetunu pueyajanaa cua nequesoreenura. Jiyacaritij, pueyari maninia casaa niq-uitiosaanutaniya maninia nojori miiniuucua. Pueyaso tojitiaashijia-caari saniniuujia naquiya miishaanutaniya, sesa nojori miiniuucua. ²⁸ Seetanujuanaa nia sequeyanijia, noojiaqueya nijaniyajinijinio niya cuata quiyani, majaari nia shaajenu quiniutianiya juhuanojuaja, niaa cuara niquirijaatijia Pueyaso cumaaca cucua tiuquiyano, cucua tiuujiaca jitiariquiano.

17

Jesu jatasacari shacantuucara

(Mr 9.2-13; Lc 9.28-36)

¹ Seis juuca nuhuaji, Jesuuri nio pojori jiyataquiaari jiyaconaja tuhuananuucua. Nojoriiri quiquiaari Pedro, Santiago, Santiago tarajanu Juanio. Jiyareta tama nojorijiaarijia quiaquiaari. ² Jesuuri tii tamaatiara jataquiaari nojori niquiara. Na jiquiooori jiyanohua shacantuucara jataquee, juhua pananu. Na toqueeri mariyata jiyanohua cohuajara jataquiaarijuhuaj, juhua cuhuatana. ³ Jiyacaritij, nojoriiri caapiqui supuetanaa niquirii, Moisés, Elíasnio. Jesuta pocoojoriquiaari. ⁴ Cunora, Pedroori Jesu sequeree:

—¡Jiyaniijianaa, canaaqui namitia niya quiyani! Quiaa jaara paniri, canaa quiocuaji suhuoronutaniyani, Moisésrajuhuaj, Elíasranio.

⁵ Pedro pocusacarijia, shacantuuca najacaari nojori mishiquioma. Najacajiniji, rupaari tojishaaquiaari naa sequeyano:

—¡Nioori cua Niyanuniyojua, cua shuquiritiasano! ¡Saaja nojuaja nia tojitiare!

⁶ Naa nojori tojishacari Pueyaso pocuaanotej, nojoriiri jacamatuquiaari jiyanohua na puerenuta. ⁷ Jesuuri nojoriicua nimiaa. Nojori quiaaseeri na juaashiquiata. Nojori sequereeri:

—Nia saneecuaturuhua. Maja puerenu.

⁸ Nojori jaara niqinijionuuquiaari, majaari tari na niqutiuniu quiquiaari cuno supuetanaa. Saaja Jesuuri quiriquiaa.

⁹ Nojori rosetasacariuhua tuhuananujiniji, Jesuuri naa nojori rootaquiaari:

—¡Majaari nia pohuatanu pueya niquiara tuhuananujiniji nia niquis-hano! Niocua na pohuatarohua cutara janiya jaara samiitiarohuani.

¹⁰ Na pueyari Jesu nequesotaree:

—¿Casaara tariucuaaanu Pueyaso Rupaajiniji niishitiojonaa sequequiaacuaaarini, supuetana Elíasnaari quiocuaji mijiria niniutianihua coteenu, pueya na jyanootootenuhuara necohuata?

¹¹ Jesuuri riucuaaree:

—Elíasri seetanujuanaa coteenu niriqiano quiquiaari, puetunu pueya jiuujiaajanaa na jeenucuanura. ¹² Janiya cutaraari nia sequeyani, Elíascuajaaari tari niquiaari. Majaari pueya niishiniu quiquiaari cante nojuajani. Naaratej, pueyari taraatia na miiquiaari taa nojori paniquiaaricujani. Nojoriiri naa cua miiniutianiya naquiyajuhuj.

¹³ Naa Jesu pohuatasacari Elíasjinijitij, na pueyari niishiqui nojuajaari Tiuquinijiona Juanjiniji pohuatariquiaa miriqui.

Jesu naatanishacari samaruraca caya samijia

(Mr 9.14-29; Lc 9.37-43)

14 Jesu jaara tuhuananujiniji tiuquiiioquiaari canaacua, tamonu pueyanoori nocua catecanoquiaari canaata quiniaa maanujiniji. Jesuucua mojoquetaseeri na sequenura neyanuucua. ¹⁵ Jesu sequereeri:

—¡Jiyaniijianaa, cua niyanuucua quia taraajere quenaaja! ¡Nojuajaari pueyaracaanu cusojoquiaa! Na jiitiasano cusuunuri na taquiriocatequiaa. Na cusojosacari miiquiaa naquiyari. Naacuajitij, sequeyarucua manijinia tiquiaari, moojiniano. ¹⁶ Janiyari quia pueyacua na tiuquitiasee na naataniniuria juucuani. Nojoriiri maja na naata na naataniniu.

¹⁷ Jesuuri cunora sequeree:

—¡Niaaqui Pueyasocua tiuyashijiaca, na tojiyashijiacanio! ¿Janiyateeri nia rejeretanutaniya pueyaracaanuni? ¿Taacari nia niishiniutianiya Pueyaso tamajaajarini? Miji nia jaatucuma cuno mueya.

¹⁸ Mueya tiuquishacari nocua, Jesuuri samaru juarii. ¡Na tohuatereeri! Jiyacaritij, caya samijiaari maninia quiquiuhua.

¹⁹ Na nuhuaji, tamajaaja canaa quishacari Jesuta, canaari na nequesotareeni:

—Jiyaniijianaa, ¿casaara maja canaa naata cuno samaru tohuatenu quiriquiaani?

²⁰ Jesuuri canaa riucuaaree:

—Maja puera maninia nia tiuuniu juhuanajuaja Pueyasocua. Seetanujuanaa nia sequeyanijia, nia tiuuniu Pueyasocua jaara quiriquia shiitianiyojua juhua mostaza jajau quenaaja, jiyacari cutaraari nia naata miiniu puetunu nia panishanojuanaa. Naacuajitij, nio tuhuananu maara nia tojiri, niaa jaara na sequere: “Tuhuananunaa, niiquiji quia quiaare tamaqui”. ²¹ Saniniuujia, jiyano samarutej, na naata tohuatanishano cutara saaja Pueyaso nia secojosacari nia miaqueyaquiniutia.

Jesu pacutesacari pahuatanu nojuajaari mosaanutaniya
(Mr 9.30-32; Lc 9.43-45)

²² Tamonu juuca Jesu rucojosacari canaa na pueyata Galilea jiyajinia, Jesuuri canaa sequeree:

—Janiyari sapojonuta niqutiosaanutaniya taucucani. ²³ Nojoriiri cua monutaniya. Jiuujanaraca juucajinia, janiyari samiitianutaniuhuani.

Naa Jesu sequesacari canaatej, canaari jiyanohua taraajequiaarini.

Cumaneeca niqutiosacari Pueyaso Secojoua tiaacuara

²⁴ Canaa jaara tiuquiiioquiaari Capernaum tiaajinia Jesutani, tamonu pueyanoori Pedroocua catecanoquiaari. Nojuajaari cumaneeca masejona quiquiaari Pueyaso Secojoua tiaacuara. Cuno pueyanoori Pedro nequesotaree:

—¿Majate nia niishitijona niqutionu na cumaneeca Pueyaso Secojoua tiaacuara, taa pa jiyaniijianucua sequequiaaricujani?

²⁵ Pedroori na riucuaaree:

—Na niqutioquiaanocuaaja.

Na nuhuaji, Pedro tiuquishacariuhua na tiajinia, Jesuuri na nequesotaree:

—¿Taa quia sequeyani Simónnaa? Mijiria jiyaniijianucua jaara cumaneeca paniri, ¿teyano pueyajiniji cumaneeca maseshiyani? ¿Tama na pueyajinijiti, taucacajiniji soj?

²⁶ Pedroori Jesu riucuaaree:

—Taucuaca niqutiojoteshiyanocuaaja nojori jiya jiitiana sequesano.

Jesuuri na sequeree:

—Naacuaaquiniatejaj. Naacuaajitij, tama na pueyajaarijia maja na niqutionu. Pueyaso Secojojuua tiacuaajaari cua Que tia. Naaratej, maja cumaati Neyanu sequesaanu na niqutionura na cumaneeca. ²⁷ Naajaa, pa niqutiore juhuari nojori sequesano, paa mariqui nojori juaatiriiri. Nocuaaji quia rioosee caminiajinia. Quiocua coteenu quia jatasano sapitiaaja rupaama niquri. Quiaari tii cumanee riuriatanutaniya. Quiocua cuno cumanee niqutiosuhua nojori, quiria, quiarajuhujaj.

18

Cante jiyaniijijajanaa cutarani

(Mr 9.33-37; Lc 9.46-48)

¹ Jiyacaritij, canaa, Jesu saquiriojosano pueyani, canaari Jesuucua catecanoquiaarini naa canaa nequesotanura nojuaja:

—Jiyaniijijanaa, canaa quia sequeretoj, puetunu quia pueyajinijiniojuanaani, ¿cante jiyaniijijajanaa cutarani?

² Jesuuri naatujua piirii. Canaa tajinia na nujuatereeri.

³ Na nuhuaji, Jesuuri canaa sequeree:

—Nia niyajetare socua tojishano pueyano nia quiniu paniniu tamasacajiniji. Seetanujuanaa nia sequeyanijia, nia jataniyaquishacari tama nia cuaqueyajaaja juhua nio naatujoori nia quiniuria, majaari Pueyaso muerasura nia quiniu quiniutianiya quenaaja. ⁴ Naacuaajitij, cante tama na cuaqueyajaaja jiyateya pueya shocoteyashijia na quiniuria juhua naatujuaani, nojuajaari socua jiyaniijijajanaa quiniutianiya cutara narta Pueyaso muerasujinijinio. ⁵ Naajuhujaj, cante naatujua maseja maninia na paniniuucua janiyani, nojuajaari cua maseyajuhujaj.

Paari cocuaatia miyani sesa pa miishacari

(Mr 9.42-48; Lc 17.1-2)

⁶ 'Sesa cutaraari, sesa nia miitiniuria cucua tiuujia naatujua. Socua maninia cutaraari sesa miitiriquiano pueyanora, nojuaja jaara juhuacarijia caminia queronijinia jartasaare puereetujau saajia na riqiiajiniji morotasano. ⁷ ¡Mijiria quiniaari jiyanoehua cocuaatia miiquiaa sesa na miitishacari tamasaca! Mijiria, pueyari pueyaracaanu sesa miitishaquiaajuhuanajaj. ¡Taraatia quiniutianiya cutaraari noo pueyanora, cante sesa miitirii tamonuni!

⁸ 'Nio miriqui cua niishitiojosano nia tojiri: nia juaashiquia, nia niohuaca jaara sesa miitiya niajaniya, nia rashiquiarenoj, tucuacaanu jatasocoriquiano. Naa nia miiri niaa mariqui mani quiquiojinia jatasaaereeri puetunu nia cuaqueyatajanaa. Socua maninia cutaraari juaashiquiaaju, niohuacaaju nia tiuquitianura Pueyaso quiquiojinia jiyocuaaanu. Niaari tii quiniutianiya shuquiriaatia pueyaracaanu. ⁹ Naajuhujaj, nia namijia jaara nia miitiri sesa, nia jiatere. Tucuacaanu nia jatareno. Jiyanoehua socua maninia cutaraari niaara, jiyocuaaanu nia tiuquiniuria namijiiiu, maja nia jatasaanura mani quiquiojinia, saniitiosocoriquiano puetunu nia namijiaatajanaa.

Naa Jesu niishitiojosacari miriquitij, nojuajaari canaa niishitiojoriquiaa canaa tarinitianura jiyanoehua canaa miiniu panishano, cuno jaara sesa miiijara jiyateriquia canaa.

Jesu pohuatasano miriqui borrego tashucuanojiniji
(Lc 15.3-7)

¹⁰ Jesuuri naa canaa niishitiojorohua socua:

—Tama nia cuaqueyajaaja nia cojuare nia soyaquiniuucuaaji tamonu muerasuniyोजना, juhua nio mueyaja. Cua tojitiare. Pueyasocuaajaari na seya seerataquiaa nojori cojuanura muerasu. Cuno na seyari pueyara-caanu cua Que Pueyaso jiquioco shootiaquiaa. Naajuhua, Pueyasocua-jaari na muerasuranooocua niishiriojoquiaa. ¹¹ Naaratej, janiyari mijiria niqiaarini tashucuaano pueya cua pajenura, nojori cua jaariutianura Sesaaca.

¹² ¿Taa nia sequeyani pueyanaa? Tamonu pueyano jaara cien borregohua jiitiare, niquiriyatujua jaara tashucuaare tapueyocuaajiniji, ¿maja-teeri na camaru na borregohua cureeno tiujianu rupaquijia, tashucuaano na pajenura? Taaquiririnij. ¹³ Jaara na riuriatare, seetanujuanaa socua jiyanoehua cuno borrego tashucuaano shuquiritiaari tamasa na borregohuajiniji. ¹⁴ Naajuhua, jiyocuaaanu quijia nia Queeri maja na paniniu quenaaja niquiriyatujua nio muerasujinijinio tashucuanura puetunurajanaa.

Taa pa jiyanoya pa tarajanuni
(Lc 17.3)

¹⁵ Quarta Pueyaso pueyano jaara sesa miiri quiajaniya, nocua quia quiaare na nacasunura tamajaaja nia quishacari. Nojuaja jaara tojiri quiajaniya, maniniacuajaari. Niaari maninia rupuetoojuacara quiniutianihuacuahuaj. ¹⁶ Nojuaja jaara tojiyaquiri quiajaniya saniniuuja, nocua quia quiaare socua tamonu pueyanota, caapiqui pueyata soj. Nojori niqiaara quia nacasure cuno sesa miinia. Naa jaara naa miiritij, naa quiniutianiyari taa tariucuaaanu Pueyaso Rupaajinia niishitio-josaaquiaaricuaajani: “Querajaa pueya jaara mariyata pohuatare na niquishano, na tojishanojuhuaj, cunoori maja sapojonu”. Naacuajitij, nojori saquiriojotasanoori seetanujuanaa quiniutianiya. ¹⁷ Cuno sesa quia miinia jaara nia tojinu paniaquiya saaja, puetunu niarta Pueyaso pueya niqiarajanaa quia pohuatare sesa na miishano. Cuno pueyano jaara tojinu paniaquiri puetunu Pueyaso pueyajanaa, nojuaja cuaara quiiria juhua Pueyaso niishiyashijia niaara. Naacuajitij, majaari socua nia rupuenunoj.

¹⁸ Seetanujuanaa nia sequeyanijia, cana nia jiyanoyaquiri mijiriani, na tojinu paniaquishacari niajaniya, cunoori jiyanoyaquishano quiniutianiya jiyocuaaanu cua Que Pueyasorajuhua. Naajuhua, cana nia jiyanoori mijiria na tojishacari niajaniyani, cunoori jiyanooshano quiniutianiya jiyocuaaanu cua Que Pueyasorajuhua.

¹⁹ Naajuhua, janiyari seetanujuanaa sequeya niajaniyani. Caapiqui niajaniyajinijinio jaara mariyata niishiriojore nia panishanoocua nia secojonura Pueyaso, cua Queeri nia tojiniutianiya. Nojuajaari jiyocuaaanuji naa maninia miiniutianiya niaara, taa nia secojosacari nia sequerecuajanuj. ²⁰ Querajaa niajaniyajinijinio jaara rerejore, cucua tiuujiaca nia quishacari, janiyari tii niaata quiyajaanihuaj. Naacuajitij, cua Queeri nia secojosano tojiniutianiya cutara.

²¹ Jiyacaritij, Pedroori Jesu nequesotasee:

—Jiyaniijiana, tamonu pueyano jaara sesa miiniu pacutejore janiya, ¿janiyatucua pueyaracaanu na jiyanoorini? ¿Majateeri tariucua, janiya jaara na jiyanoori siete sesa na miishanojiniji janiyani?

²² Jesuuri Pedro riucaaree:

—Maja naatej Pedronaa. Maja quia tarinitianu na jiyanooniu. Pueyaracaanu sesa na miishacari quiajaniya, pueyaracaanu quia jiyanoori quiarta pueyano. Majaari quia serojonu sesa na miishano quiajaniya. Pueyaracaanu quia jiyanoori saaja.

Jesu pohuatasano jiyanoyashijia serujiniji

²³ Naaratej, cua tojiri pueyanaa. Nia pohuatareera nia niishiniuria taa Pueyaso paniya jiyanoootiojuaca na muerasu nia quiniuriani. Tamonu jiya jiyaniijaari nera poonijionaa pueya sequequiaari nojori cuaara tari niqutiojooora nojuaja na cumaneeca, nojori na niqutiojosanojiniji na casami. ²⁴ Noojiaqueya nera poonijionaa pueya jaara tari nojori pasano casamijiniji niqutiojoriquiacuaa tama nojori cumaneecajiniijiaaja, jiyacaritij, tamonuuri tiuquinishaareejuhuj. Nojuajaari jiyanoohua queraatia casami masejoquiaari na jiyaniijiajiniji, queraatia millón cumaneeca. ²⁵ Nojuajaari maja na jitianu quiquiaari na cumaneeca, na jiyaniijia na niqutionuhua. Na jiyaniijaari cunora na pueya sequere: “Tamonu camarnu nia niqutiore nio cua seru, necocuatataja, cua cumaneecara, necohuajuhuj, puetunu na casamijianaanio. Naacuajitij, na cuentaari puequenutaniya”. ²⁶ Cuno na seru tojishacari naa na jiyaniijia sequesantej, nocuara jacamaquiaariiri. Na jiyaniijia sequereeri: “¡Cua tarinitiare quenaaja cua jiyaniijianaa! ¡Rupaquijiaara cua tarinitiarejaara! Janiyacuajaari quia cumaneeca niqutionutaniya puetunujuanaani”. ²⁷ Na jiyaniijaari nocua taraajeree. ¡Na carterohua puetunujuanaari! Naa na jiyanooriiri, nocua na taraajenuucua.

²⁸ Cuno seru tohuatasacari jiyaniijia tiajiniji, narta seruta naacuneetooreeri. Cuno narta seruuri tarijia masequiaari shiitianiyojua casami cuno jiyanooshano serujiniji. Secaja cumaneecaari quiquiaari na cuenta. Naajaa, cuno jiyanooshano seruuri narta seru quiaree. Cumaaatia na riquiajinia na miniriiri. Na sequereeri: “¡Ritia cua niqutiore cumaneeca, tarijia quia masesano janiyajiniji!” ²⁹ Narta seruuri na riquiajinia mininia cariquimiaji mojoquetaree. Na sequereeri: “¡Cua tarinitiarecuaraja quenaaja! ¡Janiyacuaajaari quia cumaneeca quia niqutionutaniyani!” ³⁰ Majaari na sashiniu paniniu quiquiaari. Saaja na nujuatequiaari nujuatejojuajiniaari cuaara na cumaneeca na niqutiorejaatijia. ³¹ Narta seya niquishacari naa cuno jiyanooshano seru miishanotej, nojoriiri jiyanoohua taraajequiaari. Nojoriiri jiyaniijaacua quiojoquiaari puetunu sesa narta seru miishanojuanaa nojori pohuatanura. ³² Naaratej, jiyaniijaari tamonu na seru jiyaroree cuno jiyanooshano seru riniuucua. Na tiuquishacari, jiyaniijaari na juaarii. Na sequereeri: “¡Quiaaqui jiyanoohua sesajuhuanaja! Quia sequesacari janiya, janiyari quia jiyanooriicuaani, maja quia naata niqutionu quishacari quia cumaneeca. ³³ ¿Majateeri quia naata quiriquiaa taraajenu quiarta seruucua, taa cua taraajeree quiocuacuaani?” ³⁴ Jiyaniijaari jiyanoohua juaarii. Cunora, cuno sesa miijia seru jiyarotareeri nujuatejojuajinia na nujuatesaanura. Sequereejariuhuj cuaara naquiya miishaaria tii, cuaara puetunujuanaa na cumaneeca niqutiorejaatijia, casami na pasanojiniji.

³⁵ N'ia Que Pueyasoori naa miiniutianiya nijaniyajuhuaaj, niaa jaara seetanujuanaa jiyanoyaquiri niarta Pueyaso muerasu.

19

Jesu niishitiojosano maja pa niquiocua pa cartenura
(Mr 10.1-12; Lc 16.18)

¹ Jesu jaara naa pohuatanu puecaquiaaritiij, canaa na pueyata quiaquiaari Galilea jiyajiniijiiri. Canaari Judea jiya shuriucua tiuquishii Jordán moo taquijiriani. ² Jiyanohua queraatia pueyari Jesu nuhuajiyaree. Quiniqui canaa quishacari, Jesuuri cusosuhua naatanijioree.

³ Jiyacaritiij, noojiaqueya Fariseocuacajinijinioori Jesuucua nijioquiaari sesa na pocuatenura Jesu juucua nocuara nojori tonujunura. Naaratej, nojoriiri Jesu nequesotaree:

—¿Maninate pa cartenura pa niquiocua, jaara pa juaatiri?

⁴ Jesuuri nojori riucuaaree:

—¿Majate nia serojonu quiquiaacuaja Pueyaso Rupaajinia? Coteenujuanaa Pueyaso shipinishacari pueyano, Pueyasoori shipiniquiaari caya, maajinio. ⁵ Naaratej, nojori shipininaari sequequiaari: “Caya cuaara tiujiaara na que, na nucuanio, necocuata na quiniuria. Nojoriiri juhua niquiriyatu pueyanora quiniutianiya na camitioosacari”. ⁶ Naaratej, caya, maaji jaara camitioore, majaari tari na quiniu caapiqui pueyano. Juhua niquiriyatu pueyanojuaari quiquii. Naacujitiij, majaari maninia Pueyaso rupuetootesano rupartanura.

⁷ Nojoriiri Jesu sequeree:

—Jaara naa quiritiij, ¿casaara supuetana Moisés rootaquiaaricuaararini caya cuaara naajione nequitiioora necocua, na cartenu panishacari?

⁸ Jesuuri nojori riucuaaree:

—Moiséscaajaari niishiquiaari niaari puera cumajiuujiaaca. Naaratej Moisésri nia tarinitiaquiaari nia niquiocua nia cartenura. Coteenujuanaa, Pueyaso jaara shipiniquiaari caya, maajinio, majaari naa na quiniu quiquiaari. ⁹ Cua tojitiare pueyanaa. Janiyari nia sequeya cutarani. Cante necocua carteree najuhuanani, tamonu maajitia na caminiuria, coteenu necocua jaara tamonu cayata quiyaquiri, neyacaari jiyanohua sesa miya Pueyaso niquiara. Jaara naa miiritij, Pueyasora, nojuajaari sesoriquia pueyano. Nojuacuajaari juhua pueyano, cante narta pueyano niquiocua numuetucujani. Naajuhuaaj, cante cartesano maaji camiyani, naa sesa miyajaariuhuaaj.

¹⁰ Canaa, Jesu saquiriojosano pueyani, canaa tojishacari naa Jesu sequesantej, canaari na sequereeni:

—Jaara naa quiritiij taa quia sequeriquiaacuajani, maninia naasucaari maja mashaja caminiuria. ¿Naatejaaratej?

¹¹ Jesuuri canaa riucuaaree:

—Maja na naata puetunu pueyajanaa nio cua niishitiojosano tojiniu. Saaja noojiaqueya pueya cutaraari na tojiniutianiya, noo nojori canapuate jiyocuaaanuji cumaaca niqutiosareeni na tojiniuria. ¹² Naajuhuaaj, noojiaqueya canuuri maja na naata caminiu, riyacajajaaju nojori quishacari. Nojoriiri naa rasanohuanajaj. Tamasaca canuuri maja na caminiu saniniuuja, jiatejosano nojori riyacajajau quishacari.

Tamasacaari maja na caminiujiuhuaaj tama nojori paniyaquishacariijaaja, saaja Pueyasora nojori poonijionu panishacari. Cante na naata naa miiniuni, cuaara naa miiriatej.

Naatujooriicuaara Jesu secojosacari Pueyaso

(Mr 10.13-16; Lc 18.15-17)

¹³ Na nuhuaji, pueyari Jesuucua nitiaquiaari necohua juucua, Jesu nianura nojoriicua na juaashiquia, nocuara na secojonura Pueyaso. Canaa, Jesu saquiriojosano pueyani, canaari saaja nojori tenujeree canaa juaaniutiani. ¹⁴ Jesuuri saniniuujia canaa sequeree:

—¡Maja nojori tenujunu! Nia tarinitiare naatujoori cuaara cucua nijioora. Nia tojiri, canapuede seetanujuanaa juhua nio naatujoorini, nojoriiri Pueyaso muerasu quiriquiano.

¹⁵ Na nuhuaji, Jesuuri na juaashiquia niaquiaari naatujooriicua, nojoriicuaara na secojonura, Pueyaso miiniuria maninia nojori. Na nuhuaji, Jesuuri quiniquiji quiaquiaariuhua.

Jiyanohua casamiriaca mashaja pocojosacari Jesuta

(Mr 10.17-31; Lc 18.18-30)

¹⁶ Tamonu mashajaari Jesuucua niqiaari. Na nequesotaseeri:

—Niishitiojonanaa. Quiaari maninia pueyano. Cua sequere, ¿taa cua miiniutianiyani maninia cua quiniuria Pueyaso niqiara, pueyara-caanu quijjara cua quiniuriani?

¹⁷ Jesuuri na riuquaree:

—¿Casaara quia sequeya janiya maninia pueyanotani? Saaja niquiriy-atujuaari maninia quijja cutara. Nojuacuajaari Pueyaso. Naajaa, quiaa jaara maninia quiniucua jiaatiaa Pueyaso pueyano quia quiniuria, quia tojiri tariucuaaanu Moisés Rootasano Pueyasojiniji.

¹⁸ Jesu riuquareeri:

—¿Teyano rootasanoteni?

Jesuuri na sequeree:

—Maja quia monu. Maja quiarta pueyano niqiuocua quia numuetucunu. Maja quia nohuasenu. Maja quia saquiriojotanu tamonuucua quia sapojonuta. ¹⁹ Quia que, quia nucua tojjia quia quiriquia. Maja nojori quia rerequetenu. Mariyata quiarta pueyano quia paniri taa quia paniyacuaa tama quia cuaqueyajaajani.

²⁰ Mashajaari Jesu sequeree:

—Janiyacuaajaari puetunujuanaa nio tojjia quiquiaari cua naatujua-jinijini. ¿Casaa cua miiniutianiya socuani?

²¹ Jesuuri na sequeree:

—Quiaa jaara seetanujuanaa maninia quiniucua jiaatiaa Pueyaso niqiara, quia quiaarohua quia tiajinia. Quia niquitiojore puetunu quia casamijianaa cumaneecara. Na nuhuaji, casamijuniucua quia niquitiojore nareja quia cumaneeca. Naacuajitij, quiaari queraatia casami jitianutaniya jiyocuacaanu. Na nuhuaji, quiuocua nimiohua cutara, cua tojjia quia quiniuria.

²² Na tojishacari naa Jesu sequesantej, mashajaari taraatia quiaarohua jiyanohua casamiriaca na quiniucua.

²³ Jiyacaritij, Jesuuri canaa sequeree:

—Seetanujuanaa nia sequeyanijia, jiyanohua jiyajenetaari pueyano tojiniuria Pueyaso, na pueyano na quiniuria, cuno pueyano jaara

puera jiyanoehua casamiriaca quiri. ²⁴ Pueyanaa, ¿camelloteeri na naata cusupuetaja cuhuoco tamajiria tajiniu? Maja na naata. Cua tojitiare. ¡Socua jiyanoehua jiyajenetaari casamiriaca pueyanora, Pueyaso pueyanora na jatanishaanura!

²⁵ Canaa tojishacari naa Jesu sequesantej, canaari jiyanoehua jiuujitereeni. Canaari na nequesotareeni:

—¿Canteeri Pueyaso pueyanora jiyatesaanutaniya socuanitioj?

²⁶ Jesuuri canaa shootiaree tacuriitia. Canaa sequereeri:

—Pueyari maja na naata tama na cuaqueyajaaja jiyatenu Pueyaso muerasu nojori quiniuria. Pueyaso cutaraari na naata na miiniu. Nojuajaari cumaacaraca puetunu na panishanojuanaa na miiniuria.

²⁷ Pedroori Jesu sequereeri:

—¿Canaarijiaataj? Canaari puetunu canaa casamijianaa tiujiaquiaarini canaa rupuenura quiajaniya. ¿Casaa canaa masenutaniyariniija?

²⁸ Jesuuri canaa riucuarere:

—Seetanujuanaa nia sequeyanijia. Nio jiya maniniushitishacariuhua, janiyari cajiniutianiyani jiyaniijia cajitiujinia puetunu cua Quejiniija shanohua cua cumaacatajanaa. Jiyacaritij cua pueyanaa, niaari mariyata cajitijosaanutaniya doce jiyaniijia cajitiucuaajinia. Niaari pa supuetana Israel doce niqiuohuacuajinio caneno pueya nequesoreenaa quiniutianiya. ²⁹ Cua pueya tojiniuria janiya, noojiaqueya nojorijinijinoori na tia tiujianutaniya, tapueyocuaca, na rimiatuhua, na que, na nucua, necohua, na cuhuariquiano. Canapuate naa tiujiaquiaa na tojiniuria janiyani, cuno pojoriiri Pueyasojinijia socua jiyanoehua queraatia masenutaniya nojori tiujiasanojinijia. Nojoriiri pueyaracaanu shuquiriaatia quijiaca quiniutianiyajuhua, shaajeyashijiaca. ³⁰ Saniniuujia, queraatia tojishano pueyari Pueyaso shocotasano quiniutianiya na tojitiaashijiaca nojori quiniucua. Naajuhua, mijiria, queraatia pueyari juhua shocotasano pueya quia Pueyaso niishiyashijiaca pueyara. Cuno pojori jyanishano najuhua quijiacani, nojoriiri Pueyaso shuquiritiaasano pueya quiniutianiya cutara.

20

Jesu pohuatasano cuhuariquiajina poonitijosano pueyajiniija

¹ Socua cua tojiri taa Pueyaso miiquiaa na pueyani. Nojuajaari na pueya miiquiaa taa tamonu cuhuariquia camaruuri quiaquiaari poonitijosano pueyacuani. Cuno cuhuariquia camaruuri quiaquiaari tariquicuaji pueya na pajenura na uva cuhuariquiajina nojori poonijionura. ² Cuhariquia camaruuri pueyata pocoojoquiaari taa cumaneeca na niqutionutaniya cuno juuca nojori poonijosanojinijini. Poonijionaa pueyari na sequereeri: “Maniniacuajaari taa quia sequereecuajani”. Na nuhuaji, cuno pueya jiyaroreeri uva cuhuariquiajina nojori poonijionura. ³ Pananu tacasacari, cuhuariquia camaruuri tohuataquiaariuhua na tiajinijia. Jiyacaritij, socua tamasaca pueya niqishiiri juhua janiya quiyano tiaca jiuujiajina curotasano cajitiucuaajinia. ⁴ Cuhariquia camaruuri nojori sequeereeri: “Nia quiaarejuhua, cua uva cuhuariquiajina nia poonijionura. Janiyacua cumaneeca nia niqitiorohua nia poonijionu samini”. ⁵ Naacuajitij, nojoriiri quiojoquiaari cuno cuhuariquiajina poonijionurajuhua. Na camaruuri socua tohuataquiaariuhua panacari. Socua tamasaca pueya niqishiiri

juhuajaniya quiyano tiaca jiuujiajnia curotasano cajitiucujania. Nojori sequereeaariuhuaaj nera nojori poonijonura cuno juuca. Pananu mueecosacari, socua pueya riuriataquiaariiri. Nojori jiyaroree poonijionuucuaajaariuhuaaj. ⁶ Tariucua pananu piriuushacari, na camaruuri socua tohuataquiaariuhua. Socua tamasaca pueya niquishiiri tiaca jiuujiajnia curotasano cajitiucujania najuhuana quiyano. Nojori sequereeri: “¿Casaara nia quiojiaquiyaree poonijionuucuaani? ¿Casaa nia miya niyani? Nia mariqui poonijiore”. ⁷ Nojoriiri na riucaaree: “¿Canaatucua taa poonijioreni, canaa jaara pajeshiyaquiri poonijionurani?” Cuhuariquia camaruuri nojori sequeree: “Nia quiaarequi cua cuhuariquiajnia nia poonijionura. Janiyacua nia poonijionu sami cumaneeca nia niqutiorohuani”. ⁸ Pananu tiuquishacari, cuhuariquia camaruuri na casami cojuana sequeree: “Cua poonitijosano pueya quia piiri miji, nojori rerejonura. Na nuhuaji, cua sequesano cumaneeca quia niqutiojore puetunu nojorijianaa taa cua sequeree coteenujuanaa quiria poonijionaacujani. Majaari rimiajata nojori niqutiojonu. Coteenu quia niqutiojore tariucua pananu piriuushacari cua jiyaramiquishano. Naa quia niqutiojore puetunujanaa. Quiocua naa tucuatate niqutiojonu noo pojorijihuaaj, canapuate tariquicuaji coteere poonijionucujani”.

⁹ Jiyacaritij, tariucua pananu piriuushacari poonitijosano pueyari nijiomaa. Puetunu nojorijianaari cumaneeca niqutiosaaree taa cuhuariquia camaru coteenujuanaa tariquicuaji poonijionaa pueya sequequiaaricujani. Majaari rimiajata nojori niqutiosaanu quiquiaari cumaneeca, nojori poonijionu sami. ¹⁰ Na nuhuaji, coteenujuanaa poonijionaa pueyari sequesaaquiaari na cumaneeca nojori masenura. Nojoriiri jiyaniquiaari nojori naasucuaari socua cumaneeca niqutiosaanutaniya rupaquijia poonitijosano pueyajiniji. Nojoriiri saaja niqutiosaaree taa cuhuariquia camaru sequeree nojori cuno juucacujani. ¹¹ Nojori masacari na cumaneeca, nojoriiri cuhuariquia camaruta juaaquioree. ¹² Na sequetureeri: “Cuno pueyari saaja rupaquijia poonijioree. Quiaari nojori niqutioree taa quia niqutioree canaacuaani. Canaari pananucari cateree cutarani, pueyaracaanu canaa poonijosacari”. ¹³ Cuhuariquia camaruuri tamonu nojorijinijinio sequere saaja: “Sanajanaa, maja sesa cua miiniu quirii quiajaniya. ¿Majateeri quia niishiniu, paa jaara tariquicuaji pocoojoriquiaatej, janiyari juhuacarijia quia sequereeni janiyari naa cumaneeca quia niqutionutaniyani? Quiaari cua riucaaree: ‘Maniniacujaja’. ¹⁴ Naaratej, quia jiyatarohua quia cumaneeca quia tiajiniohua. Janiyacujajaari naa niqutionu paniriquiaa tariucua pananu piriuushacari cua poonitijosano pueyani, taa cua niqutioree quiajanycuaani. ¹⁵ ¿Majateeri cua naata miiniu tama cua panishanojuaja tama cua cumaneecatajaaja? ¿Quiaateeri socua cumaneecaacua jiaatiajara quiquii, capora cua quiniuucua?”

¹⁶ Na nuhuaji, Jesuuri naa sequequiaarijihuaaj, na pohuatasanojiniji na niishitiojonura:

—Naa quiniutianiyari taa cua sequeriquiaacujani: canapuate nuhuajishanaani, nojoriiri coteetanaa quiniutianiya. Naajuhuaaj, cante coteetanaani, nojoriiri nuhuajishanaa quiniutianiya saniniuujia.

Queraatia masuusano pueyari quiya. Saniniuujia, secajaari saquiriojosano quiya nojoriininijinio.

Jesu camishacarihua pohuatanu taa na mosaanutaniyani

(Mr 10.32-34; Lc 18.31-34)

¹⁷ Tari Jesu quiasacari Jerusalén tiacajiniara, Jesuuri canaa na doce saquiriojosano pueya piirii tamocora nuu shuriuquiocora, tamajaaja canaata na pocojonura. Canaa sequereeri:

¹⁸ —Cua tojiri. Niaacujaari niquiuya paa tari Jerusalén tiacajiniara tacataani. Janiyari tii niquitiosaanutaniya pueyacuara secojonaa jiyani-ijianucuaani, Moisés Naajioneejiniji niishitiojonaanio. Nojoriiri cucuara saquiriojotanutaniya nojori sapojonuta cua mosaanura. ¹⁹ Nojoriiri cua niqutionutaniya taucuaca. Cuno pojoriiri cua rerequetenutaniya. Cua majacutunutaniyari. Na nuhuaji, niyacutesanojinia cua teetetunutaniyari tii cua cusonura. Jiuujianaraca juucajinia janiyari macujiniji samitianutaniuhuani.

Santiago, Juan nucua sequesacari Jesu, maninia na miiniuria necohua

(Mr 10.35-45)

²⁰ Jiyacaritij, Zebedeo niquiocuaari Jesuucua catecanoquiaari necohuata. Jesuucuaa mojuquetaseeri Jesu na sequenura nera na miiniuria na panishano. ²¹ Jesuuri na sequeree:

—¿Casaa quia paniyani?

Jesu riucuaereeri:

—Quiaa jaara Jiyaniijia jiyatesaare, quiocua cua niquiohua cajitijore quia shuriucua, Santiago, Juannio. Tamonu cuara cajiiria quia mi-aquetajara, tamonu quia muenecara, quia naacunaa nojori quiniuria, juhua jiyaniijianucuaajuhua.

²² Jesuuri Santiago sequeree, Juannio:

—Majaari nia niishiniu casaa nia maseyani. ¿Nia naatateeri rejere-tanu naquiya miiniu taa cua miishaanutaniyacuaani?

Nojoriiri saaja Jesu riucuaere:

—Taaquiriirinij. Canaa naatacuaaquinatejaj.

²³ Jesuuri nojori sequeree:

—Seetanujuanaa, niaari naquiya miishaanutaniya taa cua miishaanutaniyacuaani. Janiya cutaraari maja cua naata sequenu nijaniya, cante cua miaquetajara cajiniutianiyani, cua muenecarano, Jiyaniijia cua quishacari. Saaja cua Que cutaraari tari na saquiriojosano pueya sequenutaniya cua shuriucua nojori cajituniuria, teyano pojoriicuaaji na jeenucuaaquiaaricuaani.

²⁴ Canaa, narta saquiriojosano pueyani, canaari Juan juaariini, Santi-agonio, canaa tojishacari nojori masesano juucua. ²⁵ Jesuuri saniniuujia canaa sequeree:

—Miji pueyanaa. Niya cua tojitiasee. Niaacujaari niishiya, mijiria jiyaniijianucuaari na pueya poonitijioquiaa juhua tama na seyajaaja. Mijiria camarucuaari taraatia miiquiaa na pueya, nojori na miitishacari puetunu na panishanojuanaa. ²⁶ Nijaniya saniniuujia, majaari naa nia quiniu quiniutianiya. Naacujitij, cante tojishano pueyano quiniu pumaya nijaniyajininijioni, cuno cuara quiiria narta Pueyaso pueya cumaquinia. ²⁷ Cante nia jiyaniijia quiniu paniyani, cuno cuara quiiria juhua nia seru, maninia na miiniuria nijaniya, naatej, taa cua miiquiaa nijaniyacuaani. ²⁸ Janiya cutaraari Jiyaniijiani. Naajaa, majaari mijiria

cua niniu quiquiaari pueya cua poonitijionura quiria, shuquiriaatia cua quiniuria tamajaaja. Niquiaari cutaranijia pueya cua naacunura, tama janiyajaaja mosaanura pueya niti, queraatia pueyacuaji cua ritianura Sesaaca.

Jesu jeecasacari caapiqui cariyojuaru namijiaa

(Mr 10.46-52; Lc 18.35-43)

²⁹ Jesuta canaa quiasacari Jericó tiacajiniji, jiyanohua queraatia pueyari Jesu nuhuajiriqiaa. ³⁰ Jiyacaritij, caapiqui cariyojuaruuri nuu shuucuaaji cajitiuriqiaa. Nojori niishishacari Jesuuri nojori tajiriquiaa, nojoriiri nacanú coteeqiaari:

—¡Jiyaniijianaa! ¡Canaacua quia taraajere! Quiaacuaajaari Pueyaso Jiyarosano, Jiyaniijia quia quiniuria pa supuetanaa jiyaniijia David niti.

³¹ Pueyari nojori juaari nojori sanaajetanura juucua. Nojoriiri saaja jiyacatequee nacanura:

—¡Jiyaniijianaa, canaacua quia taraajere, Pueyaso Jiyarosanonaa!

³² Jesuuri socua nujuasee. Nojori sequereeri:

—¡Miji! ¿Casaa nia paniya cua miiniuria niajaniyarani?

³³ Jesu riuucatureeri:

—¡Jiyaniijianaa, canaa namijiaa quia jeecare!

³⁴ Jesuuri nojoriicua taraajeree. Nojori namijiaa quiareeri. ¡Nojoriiri niqijiacara quiqii! Na nuhuaji, Jesuucua sacuaaree canaataari.

21

Jesu tiuquishacari Jerusalén tiacajinia

(Mr 11.1-11; Lc 19.28-40; Jn 12.12-19)

¹ Canaa quiojosacari, canaari socua tiuquijiose Betfagé tiacajiniani, Olivo nacuhua tuhuananu shuriucua. Cuniqijii, majaari puera tucuaaanu quiquiaari Jerusalén tiacajiniara. Jiyacaritij, Jesuuri caapiqui canaa na pueyajinjinio sequequiaari:

²—Cuno tiacajinia nia quiaare, nooj pocuaaji niquishiyatej. Niaari tii ruriatanutaniya niqiojuaraca burro morotasano. Niocua na samaacartasee. Niocua miji na jaatucuyarohuanos, necojuataja. ³ Pueya jaara nia tenujunu paniri nocuaji, niocua na sequere: “Jiyaniijia na paniya. Ritia na tacatonutanihuacuaja”.

⁴ Naa tohuateeqiaariiri tariucuaaanu Pueyaso sequesano caminiujiunia sequesano, nojuaja jaara naa naajiotaquiaari Jerusalén tiacajinia quiniaa pueyara:

⁵ “Sión tiacajinia quiniaa pueya nia sequere: ‘¡Nia niqiri! Nia Jiyaniijiaari burrojinia niaacua niya. Maninia pueyanoori, juayashijia. Burro nijinia cajiyano, necojuacuano’ ”.

⁶ Jiyacaritij, cuarta Jesu pueyari quiaquiaari. Nojoriiri naa miiquiaari taa Jesu sequequiaari nojoricuajani. ⁷ Nocua jaatucutuquiaariuhua burroori, necojuataja. Na nuhuaji, Jesu cajijiara, canaari canaa tucuaque toqueya niojoquiaari burro nijiniani, necojuaja nijiniano. Na nuhuaji, Jesuuri na nijinia cajirii. ⁸ Jiyanohua queraatia pueyari tii quiriqiaa. Nojoriiri na tucuaque toqueya muejoquiaari nucuaco Jesuucuaaji. Tamasacaari jaamasucua piyotaquiaari Jesuucuaaji niojotasocoriquiano nucuaco, nuu niquishaanura shanohua, juhua cutara jiyaniijiaacuaji maniniushitishano. ⁹ Jesu puetanaa, mariyata na nuhuaji nijionaa juhuaj, nojoriiri naa coteeqiaari nacojonura: “¡Pueyanaa,

nioori pocuaji Tacuna! ¡Nojuacuajaari pa Jiyaniijia, pa supuetanaa jiyaniijia David niti! ¡Cuaara quiiria shuquiriaatia pa Pueyaso jiyarosano! ¡Jiyanhua maniaari pa Pueyaso! ¡Cuaara shuquiritasano quiiria!”

¹⁰ Jesu tiuquishacari Jerusalén tiacajinia, puetunu tii quiniaa pueyajaari jiuujiatecoquiaari. Sequetureeri:

—¿Cantejaara cunoni, tiuquiyani?

¹¹ Jesuta tiuquijionaari nojori riucuaaree:

—Nojuacuajaari Jesu, Pueyaso sequenu panishano caminiujiunia, Nazaret tiacajinijinio pueyano, Galilea jiyajinijinio.

Jesu jaacasacari seya niqutiojonaa Pueyaso Secojoua tiacariji
(Mr 11.15-19; Lc 19.45-48; Jn 2.13-22)

¹² Na nuhuaji, Jesuuri Pueyaso Secojoua tiacari matacajinia tiuquiquiaari. Tii pueya niquishiiri seya niqutiojiyano. Jesuuri puetunu nojorijianaa tohuatanijioree. Cumaneca tacatojojuaca juhuacutucua caponeetareeri, tee pueya niqutiojoriquiaa taucuaa cumaneeca, Pueyaso Secojoua tiajinia niqutiojosocoriquiano cumaneecaracuajani. Mococoonu niqutiojonaa cajitiucua caponeetareejaariuhuj, tee mococoonu niqutiojosaariquiaacuajani Pueyasoocuaa catijasocoriquiano. ¹³ Jesuuri nojori sequeree:

—Pueyaso sequesancuajaari naa naajiotasaaquiaari tarijia:

“Cua quiquoori sesojosaanutaniya Pueyaso Secojoua tia”.

¡Niaari saniniuujia na jiyatecanu nohuasenuujuaca quiquiora!

¹⁴ Secojoua tiajinia na quishacarijia, cariojuarujuri pueya, mariyata shipiiniquiujiuniana pueyari nocua nijioquiaari. Jesuuri nojori naatanijioree. ¹⁵ Pueyacuara secojonaa jiyaniijianucuaari Moisés Naajioneejiniji niishitiojonaata Jesu shootariquiaa cusosuhua naatanijiyano. Jiyacaritij, naatujoori Secojoua tiajinia naa nacooriaquiaa Jesujiniji: “¡Pa supuetanaa jiyaniijia David niquiohuacuajinio supueno pueyano! ¡Nojuajaari pa Jiyaniijia!” Canaa Judiocuaca jiyaniijianucua niquishacari naa Jesu miishanotej, mariyata nojori tojishacari naatujoori, nojoriiri juaaquioree. ¹⁶ Nojoriiri Jesu nequesotaree:

—¿Quiaate naatujoori tojiya casaa nojori sequeyani? ¡Nojoriiri jiyaniya quiaari Pueyaso Jiyarosano!

Jesuuri nojori riucuaaree:

—¡Taaquiririnij! Na tojiyacujaniijia. Maniniacuajaari nojori sequesano. ¿Majateeri nia serojonu quiquiaacuaja tariucuaaanu Pueyaso Rupaajinia naa sequesantej:

“Quiaari naatujoori nishitirii conaajanio, seetanujuanaa nojori maniniuhuaqueetanura quia Jiyarosano”?

¹⁷ Naa nojori na sequenu nuhuajitij, Jesuuri nojori tiujiaquee. Jerusalén tiacajiniji quiaqueeri canaata Betania tiacajinia. Canaari tii maqeseeni.

Jesu sesacasacari higo naana, muetuhuo na qiniuuca
(Mr 11.12-14, 20-26)

¹⁸ Tariquicuaji, Jesuuri Jerusalén tiacajiniara tacateriquiohua canaa na saquiriojosano pueyata. Jesuuri miaajeriquiaa. ¹⁹ Higo naana niquiriiri nuu shuriucua nujuaano. Nocua canujiyareeri. Shaanoori quiriquiaa, saa na jaamasucuaa. Cunora, Jesuuri naana sequeree:

—Majaari socua quia jajau sanishaanu quiniutianiya.

¡Naanaari ritia sorequee! ²⁰ Naa canaa niquishacaritij, canaari jiuuji-
atereeni. Canaari Jesu nequesotareeni:

—¿Taateni? ¿Casaara higo naana sorequee ritiani?

²¹ Jesuuri canaa riuquaree:

—Seetanujuanaa nia sequeyanijia, niaa jaara Pueyasoocua tiuujiaca
quiri nioojia nia niquijioteyaquiniutia nocuaji, niaa maara socua cutara
miishano miiri, socua jiyajeneta cua miishanojiniji. Naacujitij, niaa
maara nia sequesano niquiri niaa jaara nio tuhuananu sequere: “Quia
jaataare shoniacu caminiajinia”. ²² Puetunujuanaa nia masesano nia
secojosacari Pueyaso, niaa jaara seetanujuanaa nocua tiuuri, niari nia
masesano masenutaniya.

Judiocuaca jiyaniijianucua nequesoreesacari Jesu, cante na jiyaronani
(Mr 11.27-33; Lc 20.1-8)

²³ Jesuuri Pueyaso Secojojua tiajinia tiuquiquiaari. Tii pueya ni-
ishitiojoriquiaari. Jiyacaritij, canaa Judiocuaca jiyaniijianucuaari
nocua catecanoquiaari. Nojoriiri pueyacuara secojonaa jiyaniijianucua
quiquiaari, canaa Judiocuaca camarucuanio. Nojoriiri Jesu nequesota-
ree:

—¿Canteeri quiajaniani, naa quia miiniuriatej? ¿Canteeri quia jiyate-
canu juhua canaa jiyaniijia quia quiniuriani?

²⁴ Jesuuri nojori sequeree saniniuujia:

—Janiyari nia nequesotanutaniya saniniunijia. Niaa jaara cua riu-
cuare, janiyacua nia sequerohua saniniunijia cante cua jiyaroquiaari
naa cua miiniuriani. ²⁵ Naacujitij, cua riuature coteenu. ¿Cante
Tiuquinijiona Juan jiyaroquiaari pueya na tiuquinijionurani? ¿Pueyasotee?
¿Tama pueyajaaja soj?

Jiyacaritij, tama nojoriijaarijia juayonuutano coteequiaari jiyaso-
hua. Tama sequetooreejaarijia:

—Paa jaara na riuquareni: “Pueyaso na jiyaroquiaari”, pa sequeru-
cua: “¿Naatee? ¿Casaara na niishitiojosanoocua nia tiuyaquiuanu-
cuaraarini?” ²⁶ Saniniuujia, paa jaara sequereni: “Nojuajaari nareja
pueya jiyarosano quiquiaari”, ¡puereeta quiniutianiyari pajaniyara!
Paacuajaari niishiyani puetunu pueyajanaari sequequiaa Tiuquinijiona
Juanna seetanujuanaa Pueyaso sequesano caminiujunia quiquiaari.

²⁷ Naaratej canaa Judiocuaca jiyaniijianucuaari Jesu riuquaree:

—Maja canaa niishiniu canariquitijia na jiyaroquiaaritijiaj.

Jesuuri nojori sequeree:

—Janiyajuhuj, majaari cua sequenu quiniutianiya nijaniya cante
cua Jiyaronani, naa cua miiniuriatej.

Jesu pohuatasano pueyano niquiohuajiniji

²⁸ Jesuuri naa nojori sequerohuacuhuj:

—¡Cua tojitiare! Tamonu pueyanoori caapiqui niyanuraca quiquiaari.
Nojuajaari jiyapueranu jiyaroree: “Quiyanunaa, quiria quia pooni-
jioose uva cuhuariquiajinia quiarijia”. ²⁹ Neyanuuri saaja na riuquaree:
“Maja cua quianu paniniu”. Na nuhuaji, niishiriojorohuari. Quiaque-
eri. Poonijioseeri. ³⁰ Na queeri naa na nuhuajishana sequereehuj.
Neyanuuri na riuquaree: “Maniniacuaja, cua quena. Janiya quianu-
taniyani”. Na nuhuaji, majaari na quianu quiquiaari saaja. ³¹ ¿Taa nia
sequenyani pueyanaa? ¿Teyano cuno caapiqui necohujinijiniote na que
tojijia quiquiaarini?

Nojoriiri Jesu riucuaaree:

—Na jiyapueranucuaaja.

Naaratej, Jesuuri nojori sequereee:

—Seetanujuanaa nia sequeyanijia. Cumaneece masejona pa pueyajiini Roma tiacajinia quijia jiyaniijiarani, mariyata paanaturinio, cuno nia soosano pueyari nia shocotanutaniya Pueyaso muerasura nojori quiniuria. ³² Cua tojitiare casaara naa cua sequereee nijaniyani. Tiuquinijiona Juanri niquiaari na niishitiojonura juucua nijaniya, maninia nia quiniuria Pueyaso niquiara. Majaari nia tiuuniu quiquianu nocua. Niaari saaja na tojiyaquiquianu. Cumaneece masejona nia soosano pueya cutaraari nocua tiuquianu, paanaturinio. Nojoriiri na tojtiajara quiquianu. Niaacuajaari na niquiquianu taa cuno sesa miijia pueya maninia pueyara jatacanuni. ¡Nijaniyarijiataj, majaari nia tacatonu quiquianu nioojia sesa nia quiniujiniji! Niaari saaja Tiuquinijiona Juancua tiuyashijia quiquianu.

Jesu niishitiojosano cuhuariquia cojuanaa sesa miijiacajiniji
(Mr 12.1-12; Lc 20.9-19)

³³ Socua tamonu cua pohuatasano nia tojiri. Tamonu pueyanoori cuhuariquiajinia uva natoocuaari. Maninia matacoquiaari puetunu na shuriuquiocojuanaari maja casa tiuquitianura nocua. Saajia quejaquiaarijiaariuhuj uva rapijiojuara, na caaca reratesaanura. Jiyaconajara tiaquiaarijiaariuhuj, cojuana niquijia tiji nohuasejoruaacuaji. Na nuhuaji, na camaruuri tamasaca pueya niquitioquiaari na cuhuariquia, nera nojori cojuasocoriquiano. Na nuhuaji, na camaruuri tucuaaanu quiaquiaari pueyaracaanu camueenujunura. ³⁴ Jaara tari quiquiaari uva carojotasacari, saniya cuhuariquia camarujuanaari na seya jiyaramiquiquiaari na cuhuariquia cojuanaa pueyacua. Nojori jiyaramiquiquiaariiri nojori masenura cuhuariquia cojuanaa carojotasanojiniji, taa nojori pocoojoquiaari taricuajani. ³⁵ Cuhuariquia cojuanaari cuhuariquia camarujuanaa jiyaramiquishano seya quiooree. Niquiriyatu majacutureeri. Tamonu moturee cutaraari. Tamonu jacuturee saitiaari. ³⁶ Na nuhuaji, na camaruuri socua queraatia seya jiyaramiquiquiaariuhuj. Nojoriiri naquiya miishaaquiaarijiaariuhuj.

³⁷ Na nuhuaji, na camarujuanaari tama sequereejaja: “Jiyaroreera cua niyanu. Maja cutara nojori rerequetenu quiniutianiya cua niyanu”. ³⁸ Cuhuariquia cojuanaa jaara niquiquiaari camarnujuanaa niyanu nojoriicua niyano, nojoriiri tama sequetooreejaja: “¡Cunocuaquiqui cuhuariquia camaru quiriquiano na que niti, na que jaara shaajequee! ¡Pa morej! Naacuajitij, pocua nio cuhuariquia camaruhua quiquiini”. ³⁹ Naaratej, camarnujuanaa niyanu tiuquishacari, cuhuariquia cojuanaari na quiaree. Na jaatucutureeri cuhuariquiajiniji tamama. ¡Cuniqui na motureeri!

⁴⁰ Naa Jesu pohuatanu nuhuajitij, nojuajaari cuno canaa Judiucua camarucua nequesotaree:

—¿Taa nia sequeyani pueyanaa? Cuhuariquia camaru jaara tiuquiriohua na cuhuariquiajinia, ¿taa na miiniutianiya cuno cuhuariquia cojuanaani?

⁴¹ Jesu tojtianaari na riucuaaree:

—¡Cuno cuhuariquia camaruuri nojori pueconutaniya, nojoriicua na taraajeyaquiniutia! Na nuhuaji, tamasaca pueya sequenutaniya

cutaraari, nojori cojuanura nera na cuhuariquia. Nojori cutaraari cuhuariquia camaru panishano niqutionutaniya nojori carojotasano-jiniji.

⁴² Jesuuri nojori sequeree:

—Jaa, naa miiniutianiyari. ¿Majate nia serojonu quiquiaaricujaja nio, tariucuacaanu Pueyaso Rupaajiniani?:

“Pueyari saitia tiariquiaa. Nojoriiri tamonu saajia jiyaniquiaari saajia sesarujajau naasucua. Cuno saajiacujajaari socua panishano saajia quiquiaari. Jiyaniijajanaari naa na jiyatequiaari. Cuno saajiata tiaree maninia cutaraari. Pueya niquishacari, jiuujiate-coreeri”.

Naa naajiotasano quiyacujajaari.

⁴³ ‘Camarucuanaa, nocuaji nia numooteyanijia, Pueyasoori nia ru-uretanutaniya maja tari nia quiniuria na muerasu jiitianaa. Tamasaca pueyari nia niti jiyatesaanutaniya cutara, nojori jiitianura maninia Pueyaso muerasurano. Nojoriiri maninia Pueyaso tojtianaa quiniutianiya cutara, Pueyaso muerasu canenura jiyanohua nera, juhua cuhuariquajiniji senoosano queraatia. ⁴⁴ Cuno saajiajiniji saniniuujia, pueyano jaara cuno saajiacua tiyare, nojuajaari juhua rashiquijiniutianiya. Cuno saajia jaara tiyare pueyanocua, jacanaura na miiniutianiyari.

⁴⁵ Pueyacuara secojonaa jiyaniijianucua, mariyata Fariseocua tojiti-asacari naa Jesu pohuatasanotej, nojoriiri niishiquii Jesuuri nojorijiniji pohuatariquiaa miriqui. ⁴⁶ Naaratej, nojoriiri Jesu quianu panirii juucua, nojori juaaniutia. Nojoriiri saaja puereriquiaa pueya. Pueyacuajaari sequeriquiaa Jesuuri seetanujanaa Pueyaso sequenu panishano caminiujiunia quiquiaari. Naaratej, jiyaniijianucuaari jiyamitia puerecoriquiaa Jesu nojori quianura.

22

Jesu pohuatasano miriqui camishacari queranacunujiniji
(Lc 14.15-24)

¹ Na nuhuaji, Jesuuri socua niishitiojoquiaari miriqui pohuatasanota. Naa pohuataquiaaritij:

² —Pueyasoori pueya masuya nojoritia na quiniuria shuquiriaatia, taa tamonu cutara jiyaniijia miiquiaari mijiriacaani. Cuno jiyaniijiaari shuquiriaatia quiniu paniriquiaa queraatia pueyata, neyanu camishacari. Naaratej, jiyaniijiaari queraatia sumatutequiaari, queraatia pueya miaquesocoriquiano. ³ Na nuhuaji, na seya jiyaramiquiriiri na masuusano pueya numootenura nojori niniuria queranacunura. Masuusano pueyari maja na niniu paniniu quiquiaari saaja. ⁴ Jiyaniijiaari socua tamasaca na seya sequeree: “Cua masuusano pueya nia numotejocoo. Nia sequese: ‘Jiyaniijia nia sashiya. Puetunujanaari tari jeenucasano nia queranacunura. Tari puecoosaaree na juyaca, na shiyoshitishano seyano. Tariucua rariyosanoori quiya. Ritia nia nimia. Nia miaquenuusee’ ”. Naa na seya na rootanu nuhuajitij, jiyaniijiaari nojori jiyaramiquirii. ⁵ Masuusano pueyari saaja tojtiaaquirii. Puetunujanaari tama na panishanojuaaja miiriquiaa saaja. Tamonuuri na cuhuariquajinia quiaaree. Tamonuuri na casami niqutiojosaqui quiaareecujaja. ⁶ Tamasacaari saniniuujia jiyaniijia seya quiooree.

Jiyanohua naquiya nojori miiriiri. Na nuhuaji, nojori puecootureeri. ⁷ Jiyaniiija niishishacari, jiyanohua juaariiri. Nocuaji na soldadohua jiyaramiquiriiri cuno monaa nojori naminiuria saniniuujia, nojori tiaca na catijiatanurajuhuj. ⁸ Na nuhuaji, jiyaniiijaari na seya sequere: “Puetunujuanaari tari jeenucuasano pa queranacunura cua niyanu camishacari. Cua masuusano pueyacuajaari saaja cua ruuretareeni. Namitia majaari nojori nijionu quimiasa, saaja cua rerequetajacia nojori quiniuucua. ⁹ Quiariija cutara, nia quiaare nuu tunequetajajinia, tee queraatia pueya tajiniuucua quiaacuajani. Nia masuure puetunu nia niquishano pueyajanaa”.

¹⁰ Na seyari quiojoquiaari tiaca nucuaco. Nojoriiri puetunu na riuriatasano pueyajanaa rerejoteree, maninia pueya, sesa pueyano. Queranacunuusaquiiri mishiquiaari masuusano pueyata. Camarnu seyari puetunu pueyajanaa cushiyotequiaari camishacari cushiyosano toqueya, nojori tiuquitasacari tiaco queranacunura.

¹¹ Na nuhuaji, jiyaniiijajanaari tiuquiquiaari masuusano pueya na niquiniuria. Tamonu pueyano niquishiiri camishacari cushiyosano toqueju. ¹² Jiyaniiijaari na sequeree: “Pueyanonaa, ¿taa quia tiuquimiasa camishacari cushishano toquejuni?” Pueyanoori sanaa na tojiriquiaa. Majaari na riucuanu quiiri. ¹³ Cunora, jiyaniiijaari na seya sequeree: “¡Nia morojore na cashacucua, na numatucuanio! ¡Niocua na jartarohua carijiniacuma ninishiqui! Tii sapuenutaniyari. Na quiaa miaquenu-taniyajaariuhua na noonuta, naquiya na miishacari”.

¹⁴ Naajuhuj pueyanaa, Pueyasoori queraatia pueya masuya quiari-
jia na muerasu nojori quiniuria. Saniniuujia, secajaari saquiriojosaanu-
taniya nojorijinijinio seetanujanaa na muerasura nojori quiniuria.

Jiya jiyaniiija cuaara niquitiojosaaria na sequesano cumaneeca
(Mr 12.13-17; Lc 20.20-26)

¹⁵ Na nuhuaji, Fariseocuacaari quiojoquiaari Jesu shuriucujaji tama nojori niishitiojotoonurajaaja. Nojoriiri Jesu pocuatenu paniquiaari sesa juucua, nocuara nojori saquiriojotanura. ¹⁶ Na nuhuaji, Fariseocuacaari na niishitiojosano pueya jiyaramiquirii Jesuucua, jiyaniiija Herodes panijiaa pueyata. Herodesri jiyaniiija César jiyatesano quiquiaari Judea jiyajinia jiyaniiija na quiniuria. Fariseocuaca jiyaramiquishano pueyari Jesu sequese:

—Niishitiojonanaa, canaari niishiyani quiaari maninia pueyano. Majaari quia cuaracashijionu. Quiaari seetanujanaa casaa niishitiojoquiaa cutara taate canaa naata maninia quiniu Pueyaso niquiarani. Majaari quia puerenu quiquiaa, pueya niquiara quia pohuatanura quia niishishano. Majaari rimiajata quia niquiniu pueya. ¹⁷ Naaratej, canaa quia sequere taa canaa miiniutianiyani. Paari sequesaaquiarini pa cumaneeca pa niquitiojonura jiyaniiijajanaa Césarra, taa cuno tahue César sequequiaaricujani. Quiajanियariuhuj, ¿taa quia sequeya sanini-unijia?

¹⁸ Jesuuri ritia niishiquii, nojoriiri naa na nequesotariquiaa na saponuta. Nocuaji nojori sequereeri:

—Sapuenu maninia quijiacanaa, ¿casaara nia saniniuujia naa janiyani?
¹⁹ Cua niquitiri nia cumaneetoj, cuno, jiyaniiija César sequesano pa niquitiojonura nojuajani.

Nojoriiri Jesu niqutirii cumanee. ²⁰ Jesu niqushacari cuno cumanee, nojori nequesotareeri:

—¿Cana naaquiti nio nocuani? ¿Cana sesate nocua naajiotasanojanihuahaj?

²¹ Nojoriiri na riucuaaree:

—Jiyaniijia César naaquicuaaja, na sesajuhuj.

Jesuuri nojori sequere:

—Jaara naa quiritij, César nia niqutiojore tama na casaajaaja. Nojuacuajaari na camaru. Saniniuujia, Pueyaso nia niqutiojore nerano tama na casaajaaja. Nojuaja cutaraari pa camarnu.

²² Nojori tojishacari naa Jesu sequesantej, jiuujiatecoreeri. Na tarini-tiatureeri. Quiojiyarohuari.

¿Macunucuate samiitiaconutaniuhua?

(Mr 12.18-27; Lc 20.27-40)

²³ Cuno juucaja, Saduceocuaari Jesuucua nijioquiaari. Nojoriiri jiyaniquiaari macunucua maja na samiitiaconu quiniutianihua. Naaratej, nojoriiri Jesu sequesee:

²⁴ —Niishitiojonanaa, supuetana Moisésri pa sequequiaari na naajiotasanojinia, pueyano jaara cusoyare mueyaju, na tarajanu cuaara camiria mashiquio, mueya na mueratenura tarajanu niti. ²⁵ Tariija, tamonu pueyanoori niya quiquiaari. Siete niqiohwaraca quiquiaariiri, saa canuujua. Jiyapueranuuri camiquiaari. Na nuhuaji, shaajequiaariiri muetuhuojua. Naaratej, na mashiquioori camitishaaquiaari neyaca tarajanuta. ²⁶ Nojuajaari muetuhuojua shaajequiaarijihuhuj. Naaratej, neyaca tarajanuuri mashiquio camiquiaarijihuhuj. Nojuajaari mueyaju cusoquiaarijihuhuj. Naa cusonuuquiaariiri puetunu cuno siete canuujuanaa. ²⁷ Na nuhuaji, mashiquioori cusoquiaarijihuhuj. ²⁸ Saniniuujia, macunucua jaara samiitacorohua, ¿teyano cuno siete neyacaajinijiniote seetanu neyacajanaa quiniutianiyan, puetunu cuno pojorijianaa jaara neyaca quiquiaari?

²⁹ Jesuuri nojori riucuaaree:

—¡Niaari jiyanohua jiyajeneya nia niishiyaquishacari Pueyaso Rupaajinia naajiotasano, Pueyaso cumaacanio! ³⁰ Macunucua samiitacosacariuhua, majaari canuu camiyonu quiniutianiya maaji. Najuuhuj, maajipohuari maja na camiyonu quiniutianiya neyacaara. Caya, maajinio, nojoriiri juhuajaniya quijiaca quiniutianiya juhua jiyocuaaanu quijiaca Pueyaso seya, maja camiyosano. ³¹ Socua cua tojitiare. Macunucuaari seetanujuanaa samiitacoriqianohua. ¿Majateeri nia serojonu quiquiaacuaja taa Pueyaso sequequiaari niajaniyacuajani? Naa sequequiaariiri:

³² “Janiyari nia supuetana Abraham Jiyaniijiani, nia supuetana Isaac Jiyaniijajuhuj, nia supuetana Jacobo Jiyaniijiano”.

Naaratej, nia sequeyanijia, Pueyaso muerasu shaajecononi, nojoriiri maja macunucua na quiniu. Canapuete seetanujuanaa Pueyaso muerasuni, nojori cutaraari pueyaracaanu quijiaca.

³³ Pueya tojishacari naa Jesu niishitiojosantej, nojoriiri jiyanohua jiuujiateree.

Puetunu Pueyaso rootasanojinijianaani, teyanote socua na pueya tojishocoriquianoni

(Mr 12.28-34)

³⁴ Fariseocuaca jaara niishiquiaari Jesu Saduceocuaca sanaajaree, nojoriiri Jesuucua nijoquiaari nojori saniniujiuniuria nojuaja, nojori nequesoreenuta. ³⁵ Nojoriiri jaarajaaja Jesu pocuatenu paniriquiaa sesa juucua. Tamonu nojorijinijinioori Moisés Rootasanojiniji niishitiojona quiquiaari. Na saniniujiuniuria, nojuajaari Jesu nequesotaree:

³⁶ —Niishitiojonanaa, ¿Pueyaso rootasanojinijini, teyanote socua na tojishocoriquianoni?

³⁷ Jesuuri na riuquaree:

—Naa naajiosano quiyacuajaari:

“Quia Jiyaniijia Pueyaso quia paniri puetunu quioojiatajanaa, puetunu quia sohuanutajanaa, puetunu quia niishitajatajanaanio”.

³⁸ Niocuajaari socua na pueya tojishocoriquiano Pueyaso rootasano.

³⁹ Tamonu na sequesanoori quera juhua niojuhuaj. Naa sequeyari:

“Quiarta pueyano quia paniri taa quia paniyacuaa tama quia cuaqueyajaajani”.

⁴⁰ Puetunu Moisés rootasanojuanaa, mariyata puetunu tariucuacaanu Pueyaso sequesano caminiujiuniaa rootasanojuanaari nio caapiqui rootasanojinijicuaaja.

¿Cante Cristo supuetanani?

(Mr 12.35-37; Lc 20.41-44)

⁴¹ Fariseocuaca quishacarijia cuniqui, Jesuuri nojori nequesotaree:

⁴² —¿Taa nia niishiriojiya Cristojinijini? ¿Cante na supuetanani?

Nojoriiri Jesu riuquaree:

—Pa jiyaniijiarano Cristoni, nojuajaari pa supuetana David niquiohuacuajinio supuenutaniya.

⁴³ Jesuuri nojori sequerohuacuahuaj:

—Taaquiriirinij. Jaara naa quiriritij, ¿niaateeri niishiyacuaja casaara David sequequiaari “cua Jiyaniijiaata” Cristocuaaarini, Pueyaso Sohuanu jaara na pocuatequiaari? Naa sequequiaariiri:

⁴⁴ “Jiyaniijia Pueyasoori cua Jiyaniijia Cristo sequequiaari: ‘Cua miacquetajara quia cajirijiaara, janiya cuaara quia paraa shocojotare quioacuajijiaatijia’ ”.

⁴⁵ ¿Cristotucua taa David niquiohuacuaji supuereni, David jaara Cristo jiyaniquiya na jiyaniijiaata?

⁴⁶ Nojoriiri Jesu niquitiaree sanaa. Nojoriiri maja na naata na riu-cuanu quiquiaari. Cuno nuhuaji, pueyari maja socua na nequesoreenu paniniu quiquiaari Jesu.

23

Jesu juaashacari Fariseocuaca, Moisés Rootasano niishitiojonaanio

(Mr 12.38-40; Lc 11.37-54; 20.45-47)

¹ Na nuhuaji, Jesuuri tii quiniaa pueya sequeree, canaa na saquiriojosano pueyano:

² —Moisés Rootasanojiniji niishitiojonaa, mariyata Fariseocuacaari supuetana Moisés niti quiya, tariucuacaanu Pueyaso Rupaa nojori niishitiojonura. ³ Naaratej, nia tojitiare puetunu nojori sequesanojuanaa niajaniya. Saniniuuja, maja cutaraari nia miiniu taa nojori

miiquiaacuaani. Nojoriiri najuhuana niishitiojoquiaa taa pueya miiniutianiyani. Majaari saniniuujia nojori miiniu tama nojori niishitiojosanojuaaja. ⁴ Nojoriiri tama nojori niishishanojuaaja rootaquiaa, maja saaja tariucuacaanu Pueyaso niishitiojosano pa supuetanaa. Nojori rootasano pueya miishocoriquianoni, cunoori juhua jiyanhua niiquia casaa pueya nitiasocoriquiano. Nojoriiri maja quenaaja na naacutanu quiquiaa na juaashiquia sacasaruta. ⁵ Nojoriiri puetunu na miishanojuanaa miiquiaa saaja pueya niquishocoriquiano, pueya shuquiritianura nojori. Nojoriiri Pueyaso Rupaajiniji naajiotasano cushitiaquiaa na jiniji morotasano, na numatucuaacuanio. Nojoriiri naa miiquiaa taa pa supuetanaa miiquiaaricuaani. Saniniuujia, nojoriiri najuhuana socua puereetucara na quiquiora cusupuequiaa pueya shootiasocoriquiano. Naajuhuj, nojoriiri na toqueecuaji sohuatacojua tunujutaquiaa taa pa supuetanaa Pueyaso tojitiajaca miiquiaaricuaani. Saniniuujia, nojoriiri puera tucuacujuara na tunujutaquiaa saaja pueya niquishocoriquiano, pueya shootianura nojori. ⁶ Nojori jaara masuusaare tamonu tiajinia queranacunura, nojoriiri secoquiaa socua panishano cajitiujinia nojori cajitiuniuria tia camaru shuriucua. Naajuhuj, Pueyaso secojojua tiacajinia pueya rerejosacari, nojoriiri cajitiuniu paniquiaa camarucua cajitiucujinia pueya shootianura nojori. ⁷ Nojori rucuanijosacari tiacajinia, nojoriiri paniquiaa pueya saruhatanura nojori. Panitiquiaajaariuhua pueya jiyaniquiniuria nojori “niishitiojonaata”.

⁸ Niajaniya saniniuujia cua pueyanaa, majaari pueya shanacunu niaacua, nojori jiyaniquiniuria niajaniya “niishitiojonaata”. Niajaniya cutaraari niquiriyatujua Niishitiojonaraca. Puetunu niajanijajanaari niarta Pueyaso pueya tapueyocua. ⁹ Naajuhuj, majaari tamonu pueyano mijiria nia jiyaniquiniu “cua queta”. Niaacujaari niquiriyatu Queraca. Nojuajaari jiyocuaaanu Quinia. ¹⁰ Naajuhuj, majaari pueya nia shanacunu niaacua, nojori jiyaniquiniuria niajaniya “cua jiyaniijata”. Niaari niquiriyatujua Jiyaniijiaracuaaja. Nojuacujaari Pueyaso jiyarosano nia Jiyaniijiaranoni. ¹¹ Cante jiyaniijiajanaa cutara niajanijajinijinioni, cuno cuaara jiyateera tama na cuaqueyajaaja nia cumaquinia na quiniuria. ¹² Cante tama na cuaqueyajaaja jiyateja pueya shocotaja na quiniuriani, narta pueya jiyaramiquijia na quiniurijuhuj, jiyano pueyano cutaraari cararosaanutaniya. Cante saniniuujia juhua narta pueya serura jiyateja tama na cuaqueyajaajani, cunoori jiyaniijara jiyatesaanutaniya cutara.

¹³ ¡Cua tojitiare, Moisés Rootasanojiniji niishitiojonaanaa, niajaniya Fariseocuacajuhuj, niaari cocuaatia miiquiaa! ¡Niaari sapuenu juhua maninia quijica niquishano! Niaari pueya tarinitiaaquiquiaa nojori rupuenura Pueyaso. Niaari maja nia tiuuniu Pueyasocua. Naajuhuj, majaari pueya nia tarinitianu nojori tiuuniuria Pueyasocua, na muera-sura nojori quiniuria.

¹⁴ ¡Niaari taraatia miishaanutaniya, Moisés Rootasanojiniji niishitiojonaanaa, niajaniya Fariseocuacajuhuj! Niaari sapuenu juhua maninia miijiaca niquishano. Niaari mashiquiopue tiaca masequiaa secaja nia cumaneecata, nia sapojonuta nojori. Naacujitij, niaari nojori tiaca masequiaa tama niajanijarajaaja. Naa nia miiniu nuhuajitij, niaari shitiarayocua secojoquiaa najuhuana Pueyaso, pueya niquiara,

maninia pueya nia jiyanihaanura. Naaratej, niaari socua jiyanohua saniitiosaanutaniya tamasa pueyajiniji.

¹⁵ ¡Niaari puereeta miishaanutaniya Moisés Rootasanojiniji niishitiojonaanaa, niajanijajuhua Fariseocuacanaa! Niaari sapuenu juhua maninia miijiaca niquishano. Niaari tucuaaanu rucuanajoquiaa jiya caco, shoniniacu caminia taquijiriano, tamonu nia niishitiojonura najuhua Pueyaso tojiijara na quiniuria juucua, juhua tama niajanijajaaja. Nia niishitiojosano pueyano jaara nia tojiijara quiri, nojuajaari socua jiyanohua saniitiosocoriquiano quiya niajanijajiniji, sesa nia rootasano tojiija na quiniucua.

¹⁶ ¡Niaari taraatia miishaanutaniya mosanucuaanaa! Nijaniyari juhua cariojuaru, cante tamonu pueyano jaatucuya juucua, nuu nia niishiaquishacari. Naacuajitij, niaari capa niishitiojoquiaa. Niaari rootaquiaa, pueyano panishacari tamonu tiuniuria na sequesanoocua, nojuaja cuara sequeera: “Taa oro Pueyaso Secojoua tiajinia pueyacaanu quiyacuaani, naajuhua, cua sequesano quiajanijari seetanujanaa tohuateenutaniya quiara”. Saniniuujia, niaari sequequiaa, Pueyaso Secojoua tiajinia oro jaara sequeyaquishaare, majaari na sequesanoocua tiushaanu. Naacuajitij, niaari sequequiaa, pueyano sequesanoori nareja sequesano, nojuaja jaara seque: “Taa Pueyaso Secojoua tia pueyacaanu quiyacuaani, naajuhua, cua sequesano quiajanijari seetanujanaa tohuateenutaniya quiara”. Niaari sequequiaa cuno sequesanoocuaari maja tiushaanu. ¹⁷ ¡Mosanucuaanaa, niaari juhua cariojuaru! ¿Teyanote socua pueresanoni, cuno orotee, Pueyaso Secojoua tia soj? Cuno oroori naa pueresanora jiyatesaquiiaari saaja Pueyaso Secojoua tiajinia na quiniucua. ¹⁸ Niaari rootaquiiaajuhua, pa sequesacari parta pueyano, casaa pa miiniutianiya nerani, pocua na tiuniuria paa cuara sequeera naatej: “Seetanujanaa quia sequeyanijia. Naatej, taa casaa Pueyasocuara catijiaja juhuacutuucua niasano jiyanohua maninia quiyacuaa Pueyasorani, naajuhua, cua sequesanoori saaja maninijuhua. Majaari cua sapojonu”. Naacuajitij, niaari sequequiaa, paa jaara naa sequereni, paa cuara miiri pa sequesano. Saniniuujia, niaari sequequiaa: “Pa sequesanoori najuhua sequesano, paa jaara saaja Pueyasocuara catijiaja juhuacutu sequereni. Majaari nocua tiushaanu”. ¹⁹ ¡Cariojuarujuriniaa! ¿Majateeri nia niishiniu? ¿Teyanote socua maniniani, Pueyasocuara catijiasocoriquiano casaate, Pueyasocuara catijiaja juhuacutu soj? Catijiasocoriquiano casaari narejajuhuanajaj, jaara Pueyasocuara catijiajaacua niasoo quiyaquiri. ²⁰ Naaratej, cante Pueyasocuara catijiaja sequeere seetanujanaani, nojuajaari maja saaja Pueyasocuara catijiaja na sequenu quirii. Nojuaja cutaraari na caco niasano sequereehuhua. ²¹ Naajuhua, cante Pueyaso Secojoua tia sequeere najuhuanani, cunoori maja saaja Pueyaso Secojoua tia na sequenu quirii. Nojuajaari Pueyaso sequereecuaaja, Pueyaso Secojoua tia na sequesacari. ¡Pueyasocuaajaari na Secojoua tiajinia quijia! ²² Naajuhua, pueyano jaara sequeere na sequesano seetanujanaa juhua jiya cajiniocua, nocua tiushaanura, cunoori maja saaja jiya cajiniocua na sequenu quirii. ¡Pueyaso cajishaqui sequereeariuhua, Pueyasojanaa sequereeariuhua, jiyocuaaanu casaa na sequesacari!

²³ ¡Niaari taraatia miishaanutaniya, Moisés Rootasanojiniji niishitio-

jonaanaa, niajanijajuhua Fariseocuacanaa! Niaari sapuenu juhua maninia miijiaca niquishano. Niaari Pueyaso niqutiojoquiaa maninia puetunu nio nia nataujiniijijianaa, shanohua jaanujua jaamasucua, mi-aquesanojinia jatasano casaa: menta, anis, cominonio. Niaari jacaria serojoquiaa diez casaa puetunu cuno cien casaajiniijijianaa, Pueyasa nia niqutiosocoriquiano taa supuetana Moisés sequequiaaricujani. ¡Niaari saniniuujia socua pa tojishocoriquiano Moisés rootasano tojitiaaquiuaa! ¡Naacujitij, majaari maninia pueyano nia quiniu taa Moisés rootaquiuaricujani! ¡Majaari nia taraajenu quiquiaa niarta pueyanoocua! ¡Majaari nia tiuuniu Pueyasoocua! Niaari maninia niqutiojoquiaa nia nataacuacajiniji. Taa nia niqutiojoquiaa nia nataacuacajinijicuaani, inaa nia tojitiarejuhua socua pa tojishocoriquiano rootasano Moisés Naajiotasanojiniji! ²⁴ Pueya nia ni-shitijosacari Moisés Rootasanojiniji juucua, niaari juhua cariyujuaru cante narta cariyujuaru jaatucuya juucua. Niaari juhua tamonu pueyanohua. Na ratuacari, nujujua taquirii na mashacajiniijiri. Socua na ratuacariuhua, ¡saaja cuartia miataaree juhuajaniyari!

²⁵ ¡Niaari cocuaatia miiquiaa, Moisés Rootasanojiniji niishitiojonaanaa, niajanijajuhua Fariseocuacanaa! Niaari sapuenu juhua maninia miijiaca niquishano. Niaari juhua noo pueyajuhua, cante nareja na ratujua cuaqueya jeequejoquiaani, na miacojua cuaqueyano. Na jiniacumaari saniniuujia jiyanoehua curuutuua quiyajaa. Nio miriqui cua sequesano nia niishiri. Nioojaari naa quiyajuhua. Niaari nohuasenujuaca, jamuejacio. ²⁶ ¡Cariyujuaru Fariseocuacanaa, nia ratujua jiniacuma nia jeequere coteenu, nia miacojua jiniacumano! Naacujitij, na cuaqueyari maninia jeequesano quiniutianiyajuhua.

²⁷ ¡Niaari taraatia miishaanutaniya, Moisés Rootasanojiniji niishitiojonaanaa, niajanijajuhua Fariseocuacanaa! Puetunu niajanijajanaari sapuenu juhua maninia miijiaca niquishano, juhua macunucua quiquio shanohua niquishano, cohuajata noshijosano. Saniniuujia na jiniacuma quiyari sacuaatia jaanujua pueya nucuha mocuaca. ²⁸ Niaari naajuhua. Niaari sapuenu juhua maninia pueya niquishano. Saniniuujia nioojaari jiyanoehua sesa, jiyanoehua sapojonu niishijia.

²⁹ ¡Niaari taraatia miishaanutaniya, Moisés Rootasanojiniji niishitiojonaanaa, niajanijajuhua Fariseocuacanaa! Niaari sapuenu juhua maninia miijiaca niquishano. Niaari macunucua niojotajara shanohua niquishano shipinijioquiaa, tariucuacaanu pueyara Pueyaso sequesano caminiujuniaa nucuahuacaji. Naajuhua, niaari tariucuacaanu Pueyaso tojitiajaca puecosano quiquio maniniushitijia. ³⁰ Naa nia miishacarijij, niaari juhua sequequiaaruhua: “Paa jaara shipinijosaaquiari pa supuetanaa quishacarijia tariucuacaanuni, paa maara nojori cojiaquiari cutarani, nojori puecosacari Pueyaso sequesano caminiujuniaa”. ³¹ Saniniuujia, naa nia sequesacarijij, niaari tama niaacuara toreejacujua. Naaquiiri cuno tariucuacaanu Pueyaso sequesano caminiujuniaa puecoonaacuajinio supuenocujua. ³² Naa Pueyaso sequesano caminiujuniaa puecoonaacuajinio supueno nia quishacarijij, Pueyaso Jiyarosano nia morejuhua, nia tucuatana nia supuetanaa cotesano.

³³ ¡Sesa miijiaca pueyanaa, niaari noonacuraca, juhua sacocua! ¿Ni-aateeri jiyaniya niaari saniitioyaquishaanutaniya mani quiquiojinia nia

supuetanaata? ³⁴ ¡Cua tojitiare! Janiyari Pueyaso rupaa caminiujiuniaa jiyaramiquiniutianiya niaacuani, Pueyaso Rupaa niishijiaca-juhuaj, Pueyaso rupaa niishitiojonaanio. Nojoriiri nia pahuatanutaniya Pueyasojiniji. Niaari noojiaqueya nojorijinijinio puecoonutaniya. Niaari tamasaca teetejonutaniya niyacutesanojinia nojori nia monura. Niaari tamasaca majacunutaniya Pueyaso secojojua tiacajinia. Niaari tamasaca neteyojotanutaniya puetunu tiacajinijianaa, naquiya nia miiniuria nojori. ³⁵ Niaacuajaari niishiya, co-teenujanaa mosaaquiaari Abel, maninia miijia pueyano. Naa puecoosaaquiaari queraatia Pueyaso tojtiajaca pueya. Na nuhuaji, socua jaatesaaquiaari monuuri Zacarías, Berequías niyanu. Cuno maninia pueyanoori mosaaquiaari Pueyaso Secojojua tiajinia, Pueyasoocuaara catijiasaqui shuriucua. Monu porocua nia quiniucua taa nia supuetanaa quiquiaaricuaani, niaari saniniuujia nocua namishaanutaniyacujua puetunu tariucuaaanu Pueyaso tojtianaa puecoosaanucujanaa. ³⁶ Seetanujanaa nia sequeyanijia, nio pa quishacari pueyani, nojoriiri saniitosaanutaniya puetunu cuno pueya puecoosaanucujanaa.

*Jesu nujuquesacari Jerusalén tiacajinia quiniaa pueyacua
(Lc 13.34-35)*

³⁷ ¡Jerusalén tiacajinia quiniaa pueyanaa, jiyanohua taraajeya niaacuaniijia! Niaari Pueyaso sequesano caminiujiuniaa pueya puecoojuaca. Niaari Pueyaso jiyaramiquishano pueya jacujuaca saitia nojori pahuatanuucua Pueyaso rupaa nia niqiuara juucua. Janiyari cucua nia nijionura panijia juucuanu taraatia nia miyaquishaanuucuaaji cua tacunura niaacuaji, naate taa caacaraja rijioquiaacuaa necohua na nesu cariquiacorani, na cojuanura nojori. Niaari saaja cua paniyaquijia cua cojuanura niajaniya. ³⁸ Cua tojitiare. ¡Niaari nia quiquojiniji sanaajasaanutaniya niiquiji! ³⁹ Seetanujanaa nia sequeyanijia, majaari socua nia niqiniu quiniutianiya janiya, niaa cuaara cua tiuquishacarihua sequerejaatijia: “Pueyaso cuaara shuquiritiiria pa Jiyaniijia qiriquiano na jiyarosano.”

24

*Jesu pahuatasacari, Pueyaso Secojojua tia niyartasaanutaniya
(Mr 13.1-2; Lc 21.5-6)*

¹ Jesuuri Pueyaso Secojojua tiajiniji tohuataarohua. Nata canaa quiojosacari nucuaco, canaa, na saquiriojosano pueyani, canaari nocua catecanoquiaarini. Canaari Jesu niqitiriquiaa Pueyaso Secojojua tiani, shanohua niquishano tia. ² Jesuuri saa canaa riuquareeja:

—Jaa, na niqiyacuajaniijia. Niaa cumaati maninia na niqiyacuajua. ¡Seetanujanaa nia sequeyanijia, cuno tia niaa na niqiyani, cunoori niyartasaanutaniya puetunujanaa! ¡Majaari quenaaja tamonu saaja manu quiniutianiya tamonu caco!

*Taa pa niishiniutianiyanu quera jiya puequesacari
(Mr 13.3-23; Lc 21.7-24; 17.22-24)*

³ Na nuhuaji, canaari Olivo cuhuariquia tuhuananuucua quiojoquiaarini. Jesu cajishacari tii, canaa na saquiriojosano pueyani, canaari nocua catecanoquiaarini. Tama canaa quishacarijaaja, canaari na nequesotareeni:

—Canaa quia sequere ¿taacari Pueyaso Secojojua tia niyartasaanutaniyani? Naajuhuaaj, ¿taa canaa niishiniutianiyarini taacari quia tacatenutaniuha mijiriani? Canaa quia sequerejuhuaaj, ¿taacari jiya puequenutaniyani?

⁴ Jesuuri canaa riucuaaree:

—Tama nia cuaqueyajaaja nia cojuare tamasaca mariqui nia sapojoreeri. ⁵ Queraatia sapojonuujuaacari supuenutaniya. Nojoriiri tama na cuaqueyajaaja sequenutaniya: “Janiyacuaja Cristoni, Pueyaso Jiyarosano”. Naa nojori sequesacaritij, queraatia pueya sapojonutaniyari. ⁶ Naajuhuaaj, niaari pueyapue miaquetoojonujiniji tojinuuuniutianiya, niya, tamonu jiyacajinianio. Niaari miaquetoojonura mianana-jotoonujiniji tojinuuuniutianiyajuhuaaj. Naa jaara naa tojinuuiritij, majaan puerenu. Naa quiniutianiyari mijiria. Naajaa, juhuanajuajaari maja jiya puequesacari quiniutianiya. ⁷ Tamonu pueyari tamasaca pueyata miaquetoojonutaniya. Tamonu jiyajiniji jiyaniijaari tamonu jiyaniijaata miaquetoojonutaniyajuhuaaj. Jiyacaritij, jiyanoehua miaajenuuri quiniutianiya queraatia jiyacajinia, cusonuunujuhuaaj. Rijiaari queraatia jiyacajinia jiuuquiuiutianutaniya. ⁸ Naa naquiya miishacari mijiriatej, cunoori juhua manajaraca coteesacari noonu. Na nuhujaji, socua jiyacatenutaniyari naquiya miishacari, mijiria cua tiuquiyaquishacarija.

⁹ Jiyacaritij, niaari jiya camarucua niqutiojosaanutaniya cua muerasu nia quiniuucua, naquiya nojori miitianura nijaniya. Niaari puecoosaanutaniya. Puetunu jiyacajinijinio pueyajanaari nia niquiniu paniaquiniutianiya, cua muerasu nia quiniuucua. ¹⁰ Jiyacaritij, queraatia cucua tiuunia pueyari cucua tiuuniu tarinitianutaniya nojori jaara naquiya miishaare. Nojoriiri narta Pueyaso muerasu tacartanutaniya. Majaari nojori niquiniu paniniu quiniutianiya tarijia narta Pueyaso muerasu. ¹¹ Queraatia sapojonuujuaa Pueyaso rupaa pohuatanaari supuenutaniya. Nojoriiri queraatia pueya sapojonutaniya. ¹² Jiyacaritij, sesa miiniuuri socua jiyanoehua jiyacatenutaniya mijiria. Cunora, queraatia pueyari narta pueya paniniu tarinitianutaniya. ¹³ Saniniuujia, cucua tiuujia jaara rejeretare pueyaracaanu cuno naquiya miishacari jiya cuara puequerejaatijia, nojuaja cutaraari shacantuca quijara jatanishaanutaniya, pueyaracaanu na rishiniuria. ¹⁴ Pueyaso rupaa jaara pohuataasaare janiyajiniji pueyapue niquiara puetunu jiyacajiniajanaa, nojori niishiniuria taate nojori naata cua muerasura quiniuni, jiyacaritij, jiyari shusha puequenutaniya cutara.

¹⁵ Pueyaso sequesano caminiujiunia Danielri tariucuacaanu pohuataquiaari sacuaraatia casaanaari supuenutaniya, puereeta niqishano. Cunoori Pueyaso pueya shaajariquiano. (Cante nio serojiyani, cuara niishiiria casaa na sequeyani.) Naa jaara cuno sacuaraatia casaa niquiri Pueyaso Secojojua tiajinia nujuatesano, niocua mashiri. ¹⁶ Jiyacaritij, canapuate Judea jiyajinia quiyani, nojori cuara mashiiria tuhuananuhuaa. ¹⁷ Canapuate na tia cacojiria quiyani, nojori cuara tiuquiyaquiiira na tiajiniaaco maja na tarishiniuria na casamiicua. ¹⁸ Canapuate cuhuariquiajinia quiyani, cuara tacateyaquihuara na tiajinihua na toqueyacia. ¹⁹ Jiyacaritij, jiyanoehua taraatia quiniutianiyari maajipohuara, canapuate manajaatohua quiyani, mariyata

canapuate supuejaca muerasu jiitiaani. ²⁰ Juhuacarijia Pueyaso nia secoriquia nia mashiyocuatunu panishacari quiyaquiniuria shuniyara, samaatenu juucanio. ²¹ Cuno quishacari, jiyanoehua naquiya miiniuuri quiniutianiya seetanujuanaa. Jiya coteenujiniji, jiyano naquiya miiniuuri maja na niquishaanu quiquiaari tari. Naajuhuj, naa naquiya pueya miiniu nuhuajitij, majaari socua na caminiu quiniutianiuhua juhua nio naquiya miiniu. ²² Cuno naquiya miishacari jaara tajiyaquiri ritia, pueya maara cureyaquirij. Pueyaso cutaraari na tajitiniutianiya ritia, na saquiriojosano pueyacia na taraajesacari.

²³ Jiyacaritij, majaari nia tojiniu, tamonu jaara sequere niajaniya: “¡Cua tarajanunaa, Cristoqui tari tiuquiriohua! Niya quiyano”. Naajuhuj, majaari nia tojiniu tamonu jaara nia sequere: “Nooj, jati quiyatej”. ²⁴ Queraatia sapojonuujacaari supuenutaniya. Nojoriiri tama na cuaqueyajaaja jiyatenutaniya juhua Pueyaso jiyarosadora. Tamasacari sequenutaniyacujua: “Janiyari Pueyaso sequenu panishano caminiujiuniani”. Nojoriiri pueya sapojonutaniya jiyajeneta nojori miishanota. Naa nojori miishacaritij, mijiria quiniaa pueyari jiyaniutianiya nojoriqui seetanujuanaa Pueyaso jiyaramiquishano. Jaara na naata quiri, Pueyaso saquiriojosano pueya sapojonutaniyajaariuhuj. ²⁵ Pueyanaa, naa cua sequesacari niajaniyatej, jiyacuajaari juhuacarijia nia numootereeni. ²⁶ Naaratej, majaari nia quianu cua pajenuucia, pueya jaara sequere niajaniya: “Cristo jati cariquia jiyajinia quiyaa”. Naajuhuj, majaari pueya nia tojiniu nojori jaara sequere niajaniya: “Miji, Cristo sohuacamara cajiya. Nia niquishiijia”. Majaari nia shanacunu naa nia sapojosaanuratej. ²⁷ Mijiria cua tiuquishacariuhua, majaari jiyasohua cua tiuquiniu quiniutianiuhua. Naatej, taa pueya niquiquiaa miacana nunujiyano pananu muetasamajicuaani, pananu tiuquishocorano, pueyari naa cua niquiniutianiya cua tiuquishacariuhua. ²⁸ Tee casa mocua quiyani, mohuari tii rerequeejonutaniya.

Jesuuri naa niishitiojoriquiaa miriqui, mijiria quiniaa pueya jaara sesere puera, nojoriiri saniitiosaanutaniya.

Taa na quiniutianiyaní Cristo tiuquishacariuhua

(Mr 13.24-37; Lc 21.25-33; 17.26-30, 34-36)

²⁹ Jesuuri naa canaa pohuataquiaari socuatej:

—Ritia naquiya miishaanu nuhuajijia, pananuuri ninishiquiria quiniutianiya. Racaari maja na cuhatanu quiniutianiya. Riyari totenutaniya. Jiya cajiniocua cumaaca jiitiajacaari tetecatunutaniya. ³⁰ Jiyacaritij, puereeta casaari jiya cajiniocua niquishaanutaniya, mijiria quiniaa niishiniuria janiyari quera roseyani. Puetunu nio jiyajinia pueyapuejanaari sapiyonuunutaniya, jiyanoehua nojori taraajenuta. Na nuhuaji, cua niquitiuniutianiyanari cohuaja najacajinia roseyano, jiyanoehua cua cumaacata, jiyanoehua shacantuuca. ³¹ Janiyari jiyocuaanuji cua seyata tiuquiniutianiuhuaní, cua jiyaramiquiniuria nojori puetunu cua saquiriojosano pueyacuajanaa. Nojori tojitasacari trompeta jonenenu jiyanoehua, nojoriiri cua saquiriojosano pueya rerejotenutaniya cucua, puetunu nio jiyajinijijianaa.

³² Nía pohuatareera higo naanajiniji, socua maninia nia niishiniuria taacari jiya puequenutaniyaní. Higo naana cashacucua jaara macumaaca quiri, na jaamasucuaari mueratiuya. Naa nia niquishacaritij, niaari niishiya tacareejonuqui quera quiniutianiya. ³³ Naajuhuj,

niaa jaara puetunu cua sequesanojuanaa niquiri tari tohuateyano, niocua niishiri janiyari quera tiuquihuani. Tari jiya puequesacari quera. ³⁴ Seetanujuanaa nia sequeyanijia, nio pa quishacari pueyani, majaari nojori shaajenu quiniutianiya juhuanojuaja, nojori cuara puetunujuanaa cua pohuatasano niquirijiaatijia. ³⁵ Jiya, jiya cajiniocuanio, cunoori shaajenutaniya. Cua sequesano cutaraari tohuateenutaniyacujua. Cua rupaari pueyaracaanu seetanu rupaajanaa quiniutianiya.

³⁶ 'Maja cutaraari quenaaja tamonu pueyano niishiniu taacari jiya puequenutaniyani, mariyata taacari cua niniutianihuani. Jiyocuaaanu quiniaa Pueyaso seyari maja na niishiniujuhuaj. Majaari quenaaja cua niishiniujuhuaj. Saaja cua Queeri tamajaaja na niishiya cutara.

³⁷ 'Quera cua tiuquiniu panishacariuhua, mijiria pueyari juhuanianiya quiniutianiya taa Noé quishacari mijiria tariucuaaanu pueya quiquiaaricuaani. ³⁸ Jiyacaritij, nio jiya pajaashitiaquishacarijia, supuetanaari juhuanianiya miaquenuujua quiquiaari. Juhuanianiya queranacunuuriquiaaariuhua. Juhuanianiya necohua camiyoteriquiaajaariuhua Noé jaara tiuquitiaquiaarijiaatijia na puereetuca buquejiniacuma. ³⁹ Nojoriiri saaja juhuanianiya quiriquiaa pajaa jaara nojori pajaashitiaquiaarijiaatijia. Puetunu pueyajanaari canashiyaquiji netasaaquiaari. Mariyata naa quiniutianiyari cua tiuquishacariuhua. ⁴⁰ Jiyacaritij, caapiqui pueya quishacari cuhuariquiajia, niquiriyatuuri rishaanutaniya, Pueyaso pueyano na quiniuucua. Tamonuuri jateenutaniya saniitiosocoriquiano saniniuujia. ⁴¹ Naajuhua, caapiqui maajipohua riiquiniuushacari tunanajiniacuma, niquiriyatuuri rishaanutaniya. Tamonuuri jateenutaniya. ⁴² Nocuaji juhua sutejaca nia quiriquia. Majaari nia niishiniu taacari nia Jiyaniijia tiuquiniutianihuani. ⁴³ Nio nia niishiri. Tia camaru jaara niishiriquia taacari nohuasejojua niniutianiya nocuani, nojuaja maara nocuaji sutere maja nohuasejojua tiuquiniuria na casami nohuasenura. ⁴⁴ Naaratej pueyanaa, niaa cumaati cua sashiya, janiya mariqui nia jiyajenetemohuarini.

Jesu pohuatasano maninia serujiniji, sesoriquia serujinijinio
(Lc 12.41-48)

⁴⁵ 'Socua cua pohuatasano nia tojitiare pueyanaa. Jiyanohua casamirica pueyanoori queraatia seyaraca quiquiaari. Cuno jiyaniijiaari tucuaaanu quianu paniquiaari tamonu jiyajinia. Naaratej, na nuhuajiria, nojuajaari niquiriyatu na seyajinijinio jiyatequiaari juhua na tia camarura, narta seya na mianuutenura maninia, puetunu juucajanaa. Cuno seruuri niishijia quiquiaari, na camarnu tojjiajuhuaj. ⁴⁶ Cuno seruuri shuquiriaatia quiniutianiya na camarnu jaara na riuriasuhua maninia poonijiyano taa na camarnu sequequiaari na nuhuajiriacujani. ⁴⁷ Naaratej, seetanujuanaa nia sequeyanijia, na camarnuuri na jiyatenutaniya puetunu na jiiitasanojuanaa cojuanara. ⁴⁸ Saniniuujia, cuno seru jaara sesa miiijia quiri, nojuajaari tama sequenutaniyajaacujua: "Cua jiyaniijiaari jiyanohua tarishiniutianiya". ⁴⁹ Jaara naa niishiriojore, nojuajaari narta seya piquiniu coteenutaniya. Mashaasequenuujuaca kojiniutianiyajaariuhua queranacunuunura. ⁵⁰ Naa juhuanianiya na quishacaritij, na jiyaniijiaari jiyacari na jiyajenetenutaniya. ⁵¹ Naa sesa na quiniuucuatej, na jiyaniijiaari jiyanohua na saniitionutaniya.

Na nuhuaji, na jatanutaniyari na cojiritiasocoriguiano saniitionu sapuenu juhua maninia niquishano miijiaca pueyata. Nojoriiri tii nujuquetunutaniya. Na quiaaca miaquenuunutaniyari, naquiya na mi-iquiosacari.

25

Jesu pahuatasano diez niyacoojorijiniji

¹ Nia pahuatareera taa Pueyaso shuriucua tiuquitianu panijiaca quiniutianiya cua tiuquishacariuhuani. Nojoriiri juhua diez niyacoojori quiniutianiya, canapuede camiriquiano pueyano sashiriquiaacuajani. Cuno niyacoojoriiri quiojoquiaari camiriquiano pueyano sashiniuria, na tiuquishacari nojori tiuquitianura nata tiaco. Nojoriiri samaritiu patootaquiaari. ² Cinco cuno niyacoojorijinijiiri mosanucua quiquiaari. Tamasacaari saniniuujia niishijiaca quiquiaari cutara. ³ Mosanucuaari saaja niquriyatu samaritiu patootaquiaari. Majaari socua samaritiu nojori panu quiquiaari. ⁴ Niishijiaca cutaraari socua samaritiu pooquiaari, nojori samaritiu puequesacari na noshitishocoriguiano. ⁵ Camiriquiano pueyano tarishishacari, puetunu nojorijianaari maquenuujuquiaari. Nojoriiri socua maquetuquee. ⁶ Shiyaqueya, tamonu pueyanoori nacaquiaari: “¡Camiriquiano pueyano cumaji tari! ¡Nia naacusee!” ⁷ Puetunu cuno niyacoojorijianaari ritia saneecuatuquiaari. Quera pueetacoyano na samaritiu nishiriiniuuriiri. Nocuaji niishijiaca niyacoojoriiri socua na pootusano samari noshitirii. ⁸ Jiyacaritij, mosanucua niyacoojoriiri narta niyacoojori sequeree: “Canaara nia rashiquiojoreja nia samaritiujiniji. Canaa samaritiu tari pueetaareeni”. ⁹ Cuno cinco niishijiaca niyacoojoriiri nojori riuquaree: “Maja. Maja maninia canaa niquitionura nijaniya, puetunu pa samaritiujianaacua senota pueetama. Ritia nia quiaare juhuari na masejosaqui, socua nia masenura tiji”. ¹⁰ Cuno mosanucua niyacoojori quiojosacari samari masenuucua, camiriquiano pueyanoori nojori niyacari tiuquishii. Cuno samaritiuriaca niyacoojori cutaraari camiriquiano pueyanota tiuquiti-aciaari camishaqui tiaco queranacunura. Tia tiotiuuri mishiquiosaa-ree. ¹¹ Na nuhuaji, mosanucua niyacoojoriiri tiuquijioquiaariuhua. Tia tohuatheyaji jiquioonuusuuhuari. Sequetureeri: “¡jiyaniijianaa, jiyani-ijianaa, canaacuaji quia riatareja tiotiu!” ¹² Jiyaniijiaari saa sequereejaa: “Seetanujanaa nia sequeyanijia, maja cua niishiniu nijaniya”.

¹³ Naa na pahuatanu nuhuajitij, Jesuuri canaa na saquiriojosano pueya sequeree:

—Pueyanaa, nia quiri juhua sutejaca, nia niishiyaquishacari taacari cua tiuquiniutianiuhuani, casaa juucatej.

Miriqui Jesu pahuatasano cumaneeca poonitijionaajiniji (Lc 19.11-27)

¹⁴ Na nuhuaji, Jesuuri socua miriqui pahuataquiaari canaa na niishitiojonura taa Pueyaso muerasu miishaanutaniya jiya puequesacari. Jesuuri naa canaa pahuataquiaaritij:

—Tamonu jiyaniijiaari tucuaaanu quianu paniquiaari tamonu jiya-jinia. Na nuhuajiria, na seya niqutiojoquiaari na racatasano cumaneecaari, nojori cuaara poonitijioora cuno cumaneeca na canijiasocoriguiano. ¹⁵ Naacuajitij, coteenu seru niqutiooree cinco mil cumaneecaari. Tamonuuri niqutiosaaree dos mil. Tamonuuri niqutiosaaree

mil cumaneeca. Na jiyaniijaari naa nojori niqutiojoquiaari na ishishacari nojoriiri rimiajata niishijiaca quiquiaari, socua cuno cumaneeca nojori canijanura. Na nuhuaji, nojori jiyaniijaari quiaquiaari. ¹⁶ Cinco mil cumaneeca jiitianaari ritia coteequiaari casami masenura na niqutiojosocoriquiano socua cumaneecara, na reratenura na jiyaniijaara. Naacujitij, cuno seruuri socua cinco mil cumaneeca reratequiaari coteenu na jiitiasanojiniji. ¹⁷ Naajuhuaaj, dos mil cumaneeca jiitianaari socua dos mil cumaneeca reratequiaari na jiitiasanojiniji. ¹⁸ Mil cumaneeca masenaari saniniuujia maja na poonitijionu quiquiaari na jiyaniija niqutiosano cumaneeca. Nojuajaari saaja jiyajinia jiuutiaquiaari na jamojuara na jiyaniija cumaneeca. ¹⁹ Seya jiyaniijaari camueenujuquiaari jiyanojua. Socua tiuquiquiaariuhuari na cumaneeca na masejonuhuaara na seyajiniji. ²⁰ Coteenu nocua tiuquiquiaariiri cante cinco mil cumaneeca niqutiosaaquiaaricujani. Nojuajaari na jiyaniija sequeree: “Jiyaniijianaa, quiaari cua niqutiocanu cinco mil cumaneeca. Niya quiyari socua cinco mil cumaneeca quiara, cua poonijosanojiniji cua reratesano”. ²¹ Na jiyaniijaari na sequeree: “Maniniacuaja. Quiaacuajaari maninia cua seru. Majaqui najuhuaana cua tiuuniu quiquianu quiocua. Quiaacuajaqui maninia miiquianu secaja cua niqutiosanota quiajaniya. Janiyari quia jiyatenu-taniya queraatia jiitianarani. Miji quia tiuquimia. Niya cuata quia quishii shuquiriaatia”. ²² Na nuhuaji, tamonu seruuri na jiyaniijaacua tiuquishijiuhuaaj, nooj, cante dos mil cumaneeca niqutiosaaquiaaricujani. Na jiyaniija sequereeri: “Jiyaniijianaa, quiaari cua niqutiocanu dos mil cumaneeca. Niya quiyari socua dos mil cumaneeca quiara, cua reratesano cua poonijosanojiniji”. ²³ Na jiyaniijaari na sequeree: “Maniniacuaja. Quiaacuajaari maninia cua seru. Majaqui najuhuaana cua tiuuniu quiquianu quiocua. Quiaacuajaqui maninia miiquianu secaja cua niqutiosanota quiajaniya. Janiyari quia jiyatenu-taniya queraatia jiitianarani. Miji quia tiuquimia. Shuquiriaatia niya quia quishii cuata”. ²⁴ Na nuhuaji, tamonu seruuri tiuquishijiuhuaaj cante mil cumaneeca niqutiosaaquiaaricujani. Na jiyaniija sequereeri: “Jiyaniijianaa, janiyari niishiyani quiaacuajaari quiarta pueyacia taraajeyashijia. Quiaari tamasaca natoosanojiniji senoojua. Quiaari tamasaca poonijosanojiniji miajajuhuaaj. ²⁵ Naaratej, janiyari quia cumaneeca pueretacanu nohuasenujuacani. Cunora janiyari quia cumaneeca jamocanu raamani. Quia niquiri. Niya quiyacuaja quia cumaneeca puetunujuanaa”. ²⁶ Na jiyaniijaari na juarii: “¡Quiaaqui sesoriquia pueyano! ¡Taajeca seque! ¿Quiaateeri niishiquianu janiyari tamasaca natoosanojiniji senoojuani, tamasaca poonijosanojiniji miajajuhuaaj? ²⁷ Quiaa jaara cua jyaniquianu naa quijiatej, ¿casaara cua cumaneeca quia niqutioyaquiquianu cumaneeca cojuanaarini? Nojori jaara cua cumaneeca poonijiotecanu, nojori maara socua na canijiacanu quiria”. ²⁸ Jiyacaritij, jiyaniijaari tamasaca na seya sequeree: “Nio sesa cua serujiniji nia jaariutiare cua mil cumaneeca. Nia niqutioire cutara cua maninia seru, cante diez mil jiitiaa tariucujani. ²⁹ Naacujitij, cante casaa jiitiaacuani, nojuajaari socua niqutiosaanutaniya, queraatia jiitiaja na quiniuria. Saniniuujia, cante secaja jiitiaa najuhuanani, nojuajaari secaja na jiitiasano jaariutiasaanutaniya puetunujuanaa. ³⁰ Nio najuhuaana quijia seru saniniuujia, nia jatatare carijiniacuma ninishiqui.

Tii sapuenutaniyari. Na quiaca miaquenutaniyari na noonuta, naquiya na miishacari”.

Jiya puequesacari, puetunu pueyapuejanaari nequesoreesaanutaniya saniitiosocoriquiano

³¹ Puetunu cua seyajanaari jiyocuacaanuji cua cojiniutianiya janiya jaara tiuquiriohuani Pueyaso shacantuuca cumaacata, Jiyaniijijanaa cua quiniuria mijiria. Janiyari shanohua puereeta jiyaniijia cajitiujinia cajiniutianiya, pueya cua nequesoreesacari. ³² Puetunu pueyapuejanaari cucua rerejotesaanutaniya puetunu nio jiyajiniinjiojuanaa. Janiyari maninia pueya saquiriojonutaniya sesoriquia pueya tajinijini, taa borrego cojuana na borregohua saquiriojoquia cabraacuaca tajinijicuaani. ³³ Janiyari maninia pueya nujuatejonutaniya cua miaquetajarani. Saniniuujia, janiyari sesoriquia pueya nujuatejonutaniya cua muenecarani. ³⁴ Na nuhuaji, janiyari cua miaquetajara nujuatiuyano sequenutaniyani: “Miji, cua Que shuquiritiasano pueyanaa. Shusha jiya shipinishacari niaarano cua Que riuriotaca nia masere. ³⁵ Cunoori nijaniyara, maninia miijiacua nia quiniucua. Cua miaajesacari, niaari cua miaqueteja. Cua jiyamuesacari, niaari cua raateja. Tucuaaanu cua rucuanesacari, niaari nia tiaco cua tiuquinijia. ³⁶ Toqueeju cua quishacari, niaari cua niqutioquiaari. Cusosu cua quishacari, niaari cua niquiniucua quiaja. Nujuatejojuajinia cua quishacari taraatia, niaari cucua quiojojuua cua cumanjianuucua”. ³⁷ Na nuhuaji, maninia pueyari cua nequesotanutaniya: “Jiyaniijianaa, ¿taacari canaa niqiquiaari quiajaniya miaajeyanoni? ¿Canaateeri quia miaquetequiaarini? Majaruhua. ¿Taacari canaa niqiquiaari quiajaniya jiyamueyanoni? ¿Canaateeri quia raatequiaarini? ³⁸ ¿Taacari canaa niqiquiaari quiajaniya canaa jiyajinia rucuanesacari? ¿Canaateeri canaa tiajinia quia tiuquiniquiaarini? Majaruhua naa canaa miiniu quiquiaari quiajaniya. ¿Naajuhua, taacari canaa niqiquiaari quiajaniya toqueejuni? ¿Canaateeri quia niqutioquiaari toqueni? Maja. ³⁹ ¿Taacari canaa niqiquiaari quiajaniya cusosuni, nujuatejojuajinianio? ¿Canaateeri quiojua quiojoquiaari canaa niquiniuria quiajaniyani? Maja”.

⁴⁰ Janiyari cuno maninia pueya riucuanutaniyani: “Seetanujuanaa nia sequeyanijia. Naa jaara naa maninia miiquiaari tamonu cua muerasuniyojuajiniinjio, niaari maninia cua miiquiaarijuhuaj”.

⁴¹ Na nuhuaji, janiyari cua muenecara nujuatiuyano sequenutaniyani: “¡Cua shuriucuaaji niqiqui nia quiaare, sesoriquia pueyanaa! ¡Niaari cua Que sesacasano! Niaari mani quiquiojia quejoosaanutaniya. Cuno mani quiquioori maquesaashijia. Shipinishaaquiaariiri samaruhua jiyaniijiaacuaji, na seya samaruhuacuajinio. ⁴² Niaari naa miishaanutaniyaqui nia taraajeyaquiniucua cucua. Cua miaajesacari, majaari nia miaquetenu quijia janiya. Cua jiyamuesacari, majaari quenaaja nia raatonu quijia janiya. ⁴³ Cua rucuanesacari nia jiyajinia, majaari nia tiajinia nia tiuquininiu quijia janiya. Toqueeju cua quishacarijuhuaj, majaari toque nia niqutionu quijia janiya. Nujuatejojuajinia cua quishacari, cusosu cua quishacarijuhuaj, majaari nia quianu quijia cua niquiniucua quenaaja”.

⁴⁴ Jiyacaritij, cuno pueyari cua nequesotanutaniya: “Jiyaniijianaa, ¿taacari canaa niqiquiaari quiajaniya miaajeyanoni, jiyamueyanujuhuaj? Majaari canaa niquiniu quijia quiajaniya canaa jiyajinia ru-

cuanejiyano tiaaju, toqueeju quiyano, cusosu quiyano, nujuatejojua-jinia quiyanojuhuaaj. Canaa jaara naa quiyano quia niquiquiaarini, canaa maara quiocua taraajequiaarini”.⁴⁵ Janiyari nojori riucuanutaniyani: “Seetanujuanaa nia sequeyanijia, nia taraajeyaquiniucua tamonu cua muerasuniyojuaacua, niaari seetanujuanaa cucua taraajeyaquiquiaari”.⁴⁶ Jiyacaritij, maninia miyashijia pueyari quejoosaanutaniya pueyaracaanu saniitiosocoriquiano. Saniniuujia maninia miijia pueyari Pueyaso shuriucua quianutaniya, pueyaracaanu shuquiriaatia nojori quiniuria.

26

Judiocuaca camarucua roojotoosacari Jesu nojori quianura

(Mr 14.1-2; Lc 22.1-2; Jn 11.45-53)

¹ Jesu jaara puetunu nio pohuatasanojuanaa pohuatanu puecaquiaari, canaa na saquiriojosano pueya sequereeri:

² —Niaacuajaari niishiya, tama tariquiri Pascua juucara queranacusacari. Janiyari jiyacari taucuaca niquitiosaanutaniyani, mosocoriquiano niyacutesanojinia teetesano.

³ Jiyacarijiuhuaaj, canaa Judiocuaca camarucuaari rerejoquiaari Caifás tiajinia. Caifásri pueyacuara secojonaa jiyaniijiajanaa quiquiaari. Cuno pueya rerejoquiaarini, nojoriiri quiquiaari pueyacuara secojonaa camarucua, canaa Judiocuaca camarucuanio. ⁴ Nojoriiri cuno tiajinia pocoojoquiaari taa nojori sapojonutaniya Jesu na quiatusocoriquianoni, nojori mosocoriquiano. ⁵ Nojoriiri tama sequetooquiaarijaaaja: “Maja pa monu Pascuara queranacusacari, paa mariqui pueya juaatiriiri”.

Tamonu maaji totasacari na shanohua jaanutaja Jesuucua

(Mr 14.3-9; Jn 12.1-8)

⁶ Tamonu juuca, Jesuta canaa quishacari Betania tiacajinia, canaari Simón tiajinia miaquenuuriquiaani. Cuno Simónri tarijia lepra cusonujiniji Jesu naatanishano quiquiaari. ⁷ Miaquejajinia Jesu cajishacari, tamonu maajiiri nocua catecanoquiaari. Shiitianiyojua shucuariquiaja pataconiyojua cacatariquiaari, cohuaja saajiajiniji quejasano. Tii quiriquiaari shanohua jaanutaja. Cuno jaanutajaari jiyanohua queraatia cumaneecata masesano quiquiaari. Cuno maajiiri Jesu nacaacua na totaree puetunujuanaa. ⁸ Canaa jaara niquiquiaari naa cuno maaji miishanotej, canaari juaaquioreeni. Noojiaqueya canaajiniinioori naa sequeturee:

—¿Casaara cuno maaji niitiaree najuhuaana shanohua jaanutajani?
⁹ ¡Cuno jaanutaja maara queraatia cumaneecara niquitiosaare, casamijiuniucua niquitiosocoriquiano!

¹⁰ Jesu tojishacari taa canaa sequeriquiaa cuno maajini, canaa sequereeri:

—¿Casaara nio maaji nia taroojiyani? ¡Na miishano janiyani, cunoori jiyanohua maninia quiria! ¹¹ Casamijiuniucuaari niaata quiriqiano pueyaracaanu cutara. Janiya saniniuujia, majaari cua quiniu quiniutaniya pueyaracaanu niaata. ¹² Nio maaji totasacari cucua na shanohua jaanutajani, juhuacarijia cua cuaqueya jeecaari, raaco cua niasaanura janiya jaara mosaareni. ¹³ Seetanujuanaa nia sequeyanijia, pueyaracaanu pueya pohuatasacari Pueyaso rupaa janiyajiniji, nio maaji miishanoori pohuatasaanutaniyajuhua puetunu jiyacajiniajanaa. Naa na

miishano janiyani, majaari na niyajetasaanu quiniutianiya pueyara-caanu.

Judas tacartasacari Jesu, na quiatenura

(Mr 14.10-11; Lc 22.3-6)

¹⁴ Jiyacaritij, Judasri pueyacuara secojonaa jiyaniijianucuaacua quiaquiaari. Nojuajaari niquiriyatu canaajiniijinio Jesu doce saquiriojosano pueyano quiquiaari. Na sesaari quiquiaari Judas Iscariote. ¹⁵ Secojonaa jiyaniijianucua sequeseri:

—¿Taa cumaneeca nia niqutionutaniya janiyani, janiya jaara nia quiatere Jesuni?

Nojoriiri ritia treinta cumaneeca niqutioquiaari Judas. ¹⁶ Na nuhuaji, Judasri pueyaracaanu niishiriojoriquiaa maatucua taacari quiatere Jesuni.

Jesu miaquesacari na nuhuajiria na pueyata

(Mr 14.12-25; Lc 22.7-23; Jn 13.21-30; 1 Co 11.23-26)

¹⁷ Puetunu marijarajanaa, canaa Judiocuacani, canaari poreetesoo pan miaquenuquiaari puetunu siete juucajanaani. Coteenu juucaari sesojosaaquiaari Pascua juuca. Naaratej, Pascua juuca, canaa, Jesu saquiriojosano pueyani, canaari nocua catecanoquiaarini naa canaa nequesotanura nojuaja:

—Jiyaniijianaa, ¿tee quia paniya canaa majeetenura quiocuaji borregoni, pa miaquesocoriquiano quiariria Pascuarani?

¹⁸ Jesuuri canaa riucuaaree:

—Paacuajaari miaquenutaniyani tari cua sequesano pueyano tiajinia Jerusalén tiacajinia. Tii nia quiaare. Tia camaru nia sequesee: “Canaa niishitiojonaari naa quia sequeya: ‘Quera cua cusosacari. Janiyari cua nuhuajiria cua pueyata miaquenutaniya Pascua borrego quia tiajiniani’ ”.

¹⁹ Canaari naa miiquiaarini taa Jesu sequequiaari canaacuajani. Canaari tii majeetequiaari borregoni, Pascua juuca miaquesocoriquiano.

²⁰ Jaara niniquiaari, Jesuuri canaa na doce pueyata miaquejajinia cajitiuriquiaa. ²¹ Canaa miaquenuusacari, Jesuuri canaa sequere:

—Seetanujuanaa nia sequeyanijia, tamonu nijaniyajiniijinioori cua tacartanutaniya, cua paraa na quiatenura janiya, nojori monura janiya.

²² Canaari jiyanhua taraajequeeni naa Jesu sequesacaritij. Puetunu canaajanaari Jesu nequesotareeni:

—¿Janiya jiyoteeri Jiyaniijianaa?

²³ Jesuuri canaa riucuaaree:

—Cante cuata tureneetaa pa miacojuajiniijini, nojuacuajaari cua quiatenutaniya mosocoriquiano. ²⁴ Janiyacuajaari mosaanutaniyani taa janiyajiniji naajiotasaaquiaaricujani tariucuaaanu Pueyaso Rupaajinia. Saniniuujia, jiyanhua taraatia miishaanutaniyani cua quiateriquiano pueyano. Maara socua maninia quiquiaari cuno pueyanora jaara raaquishaquiaari.

²⁵ Na quiateriquiano Judasri socua Jesu nequesotareejuhuj:

—¿Janiya jiyoteeri Niishitiojonanaa?

Judas riucuaareeri:

—Taaquiriirinij. Quiajanuyacuaaquiniatejaj.

²⁶ Canaa miaquesacari, Jesuuri pan ririi. Na Que Pueyaso secojoree nocuaraari.

Na nuhuaji, na neecasereeri puetunu canaarajanaa, canaa miaqueso-coriguiano. Canaa sequereeri:

—Jajaa, nia masere. Nia miaquere. Nio panri cua cuaqueya.

²⁷ Na nuhuaji, Jesuuri raatonuque pataree. Pueyaso na secojonu nuhuaji nocuara, Jesuuri canaa na niquitioree. Canaa sequereeri:

—Niojiniji nia rature puetunu niajanijajanaa. ²⁸ Nioori cua nanaca, Pueyaso jiyanooniuria niajanija. Cua nanacaari queraatia pueyacuara shoonutaniya, nojori jiyanooshaanura sesa nojori miishanojiniji. ²⁹ Seetanujanaa, majaari socua cua ratunu quiniutianiya niaata mijiria nio uva caacajiniji. Janiyari niaata na ratunutaniya cutarani janiya jaara tacatemohuani, pueyaracaanu Jiyaniijajanaa cua quiniuria. Jiyacaritij, jiyanoohua maninia quiniutianiyari cuno quishacari. Paari mariyata jiyanoohua shuquiriaatia quiniutianiya pueyaracaanuni.

Jesu sequesacari Pedro, nojuaja nocuaji seetanutaniya

(Mr 14.26-31; Lc 22.31-34; Jn 13.36-38)

³⁰ Canaa jaara jaaquequejoquiaari supuetana David naajioneeginijini, na nuhuaji canaari quiojoquiaarini Olivo cuhuariquia tuhananuucua.

³¹ Jesuuri jiyacari canaa sequereeri:

—Puetunu niajanijajanaari cucua tiuuniu tarinitianutaniya quiari niucuaaja. Naa naajiotasano quiyacuajaari Pueyaso sequesano tarijia: “Janiyari borrego cojuana monutaniyani. Na borregohuari niaquejonutaniya tamajaaja”. ³² Naajaa, janiya jaara samiitiarohua macujinijini, janiyari nia puetanutaniya Galilea jiyajiniani.

³³ Pedroori Jesu sequereeri:

—Puetunu quia pueyajanaa jaara quiocua tiuuniu tarinitiare, janiya cutaraari maja cua catenu quiniutianiya quiocuaji.

³⁴ Jesuuri Pedro sequereeri saaja:

—Seetanujanaa nio niucujani, caacaraja niunijijaquishacarijia, quiaari naa pacutejonutaniya seetanu cucuaji: “Maja cua niishiniu cuno pueyano”.

³⁵ Pedroori Jesu sequereeri:

—¡Pueya cuara moora janiyaqui, naajaa, majaari cua seetanu quiniutianiya quiocuaji!

Puetunu canaa Jesu pueyajanaari mariyata naa sequequiaaritij, taa Pedro sequeriquiaacuaani.

Jesu secojosacari Getsemani cuhuariquiajinia

(Mr 14.32-42; Lc 22.39-46)

³⁶ Na nuhuaji, Jesuuri tamonu cuhuariquiajinia tiuquiijoquiaari canaa na saquiriojosano pueyata. Cuno cuhuariquia sesaari quiquiaari Getsemani. Jesuuri canaa sequereeri:

—Niyaja nia cajitiuri cua secojosacari cua Que jati socua nia tacoji.

³⁷ Jesuuri Pedro jiyataquiaari, caapiqui Zebedeo niquiohuanio. Jesuuri juhuacatecara taraajequiaari. Jiyanoohua tacaariquiaajaarihuaj.

³⁸ Jiyacaritij, Jesuuri nojori sequereeri:

—¡Coojia quera jiaqueya jiyanoohua cua taraajenuta! ¡Quera cusoyanjia! Niyaja cua sashitiuri. Nia sutere nia tarajanura janiya quenaaja.

³⁹ Jesuuri nojori shuriucuaji canujiyaree tamajaaja socua nojori tacoji. Jiyocuara jacamaseeri Pueyaso na secojonura. Naa sequereeri:

—¡Cua Quenaa, jaara na naata quiri, maja quenaaja cua cartenu naquiya cua miishaanura! Naajaa, janiya cuara miishaariaqui taa quia panyacuajani, maja juhua na panishano.

⁴⁰ Na nuhuaji, Jesuuri na pueya niquishuhua. Nojoriiri saaja maqueturiquiaa. Pedro sequereeri:

—Pedronaa, ¿majate nia naata cuata sutenu quenaaja rupaquijia?
⁴¹ Nia sutere Pueyaso nia secojonura, niaa mariqui sesa miiriiri niaa jaara saniniujiushaare. Seetanujuanaa, poojiaari maninia miiniu panijia. Pa cuaqueyari saniniuujia sasaca quiyacujua. Naacuajitij, majaari pa naata maninia miiniu Pueyaso cumaquiyaquishacari pajaniya.

⁴² Jesuuri socua tacatequiaariuhua tamajaaja Pueyaso secojonuhua. Naa sequereeri:

—Cua Quenaa, janiya jaara naquiya miishaareni, janiya cuara miishaariaqui taa quia panyacuajani.

⁴³ Jesuuri na pueyacia tacateyarohuacuahuaj. Maquetiuyano nojori riuratasuhuariuhua. Nojori namijiaari saaja seecutayariquiaa jiyanohua nojori maquenu paniniutia. ⁴⁴ Jesuuri nojori tarinitiaquiaari socua. Quiaquiaariuhuari na Que secojonuhua. Secojonu pacutequiaariiri taa na secojoriquiaa coteenucajani. ⁴⁵ Na nuhuaji, na pueyacia nimiohuariuhua. Nojori sequesuhuari:

—Quiarijia cutara nia maquetiuyare. Nia panyatere cutara maquetunu. ¡Juaj! ¡Nia tojiri! ¡Janiyari tari quiatesaanutaniya sesa miijica pueyani! Nojoriiri cua miiniutianiya taa na panitiuyacuajani. ⁴⁶ ¡Nia saneecature! Pa quiaare. Cumaji tari cua quiateriquiano.

*Moronucua na paraa jaatucutasacari Jesu
 (Mr 14.43-50; Lc 22.47-53; Jn 18.2-11)*

⁴⁷ Jesu pocuasacarijia, Judasri jiyacari tiuquishii. Nio Judascua-jaari niquiriyatu canaajinijinio Jesu doce saquiriojosano pueyajiniji quiquiaari. ¡Queraatia pueyari Judasta nijioquiaari! Nojoriiri secojonaa jiyaniijianucua jiyaramiquishano pueya quiquiaari, canaa Judocuaca camarucua jiyaramiquishano pueyajuhua. Nojoriiri nijiniaquetucujaja mueruu pooriquiaa, macacanio. ⁴⁸ Judasri tari niishitioquiaari Jesu quiaturiquiano pueya taa nojori niishiniutianiyani teyanote Jesuni. Nojuajaquiiri tari nojori sequequiaari: “Teyano pueyano cua nujiya pa tiuquishacari, cunocujajaari nojuaja. Niocua na quiasee ritia”.
⁴⁹ Naacuajitij, Judas tiuquishacari Jesuucua, na sequeeseeri:

—Quiocua tiuquiyaniija Niishitiojonanaa.

Jiyacarijia na nujuureeri. ⁵⁰ Jesuuri na sequereeri:

—Cua rupuenanaa, ¿casaacua quia niyareerini?

Jiyacaritij, Judasta nijionaa pueyari Jesu quiatusee. ⁵¹ Jiyacaritij, tamonu canaajinijinio pueyanoori ritia shitiaree na nijiniaquetucujaja mueruu na shuucujaji. Nata jaateree secojonaa jiyaniijia seru numo-coori. ⁵² Jesuuri na sequereeri:

—¡Na co jiniacuma quia shiriohua quia mueruu! ¿Majate quia niishiniu, cante mueruuta miaqueja pueyanoni, mueruuta mosaanutaniyajaariuhua? ⁵³ ¿Quiaate niishiyaquiyajuhua, janiya jaara cua Que sequereni cucua na jiyaramiquiniuria na seya jiyocuacaanuji na cojuanura janiya, cua Que maara ritia cucua jiyaramiquiri cincuenta mil na seyajinijinio? ⁵⁴ Naajuhua, janiya jaara naa cua Que sequereeri

na cojuatenura janiyani, ¿tariucuaaanu Pueyaso Rupaajinia janiyajiniji naajiotasanotucua taa tohuateereni?

⁵⁵ Jiyacaritij, Jesuuri na paraa sequereee:

—¿Taateni? ¿Janiyateeri nohuasejojuani, naa nia tiuquitianura cua quianura mueruuta, macacatanio? Niaacuajaari juucua cua niquijia puetunu juucajanaa Pueyaso Secojoua tiajinia cajiyano, pueya cua niishitiojosacari. ¿Casaara tii nia quiaaquiuanu janiyani? ⁵⁶ Naajaa, naacuajitij puetunu nia miishanojuanaari tohuateenutaniya, taa tariucuaaanu Pueyaso Rupaajinia naajiotasaquiaari janiyajinijicujani.

Jiyacaritij, canaa, na saquiriojosano pueyani, canaari Jesu tiuji- aquiaari niquiriyatuni. Puetunu canaajanaari mashiyocuatereeni.

Judiocuaca camarucua nequesoreesacari Jesu

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Jesu quianaari na jaatucuquiaari jiyaniijia Caifásua. Caifásri pueyacuara secojonaa jiyaniijia quiquiaari. Judiocuaca camarucuaari tari Jesuucuaaji rerejoquiaari Caifás tiajinia. Nojoriiri quiquiaari Moisés Rootasanojiniji niishitiojonaa, canaa Judiocuaca camarucuanio. ⁵⁸ Pedroori Jesu nuhuajiquiaari tucuaaanuji secojonaa jiyaniijia tiajiniara. Cuno puereetuca tia shocuaari mataca quiquiaari. Pedroori tii carijiniacuma tiuquiquiaarijuhuaj. Jiyaniijia Caifás seya tajinia cajishiiri, na niqiniuria taa nojori miiniutianiya Jesuni.

⁵⁹ Pueyacuara secojonaa jiyaniijianucuaari puetunu canaa Judiocuaca camarucujatanaa pajeriquiaa pueya, nojori saquiriojotanura na sapojonuta Jesuucuaara, na mosaanura. ⁶⁰ Queraatia pueyari najuhuaana Jesuucuaara saquiriojotaree juucua. Nojori sequesanoori rimiajata quiquiaari tamasaca sequesanojiniji. Na nuhuaji, socua caapiqui pueyari mariyata sesa saquiriojotaree Jesuucuaara. ⁶¹ Nojoriiri naa sequereee:

—Cuno pueyano naa sequecanutej: “Janiya jaara Pueyaso Secojoua tia niyartareni, janiyari na tianu tucuatanutaniuhua jiuujianaraca juucajiniani”.

⁶² Jesuuri sanaa nuuariquiaa saaja. Nocuaji, secojonaa jiyaniijiaari nujuaree. Jesu sequereeri:

—¿Majate quenaaja quia riucuanuujua? ¿Quiaate pueya tojirii quiocuara saquiriojotaano? ¿Seetanutejanaa nojori sequesano?

⁶³ Jesuuri saaja sanaa na tojiriquiaa. Nocuaji secojonaa jiyaniijiaari Jesu sequereee:

—¡Cua tojiri! Paa niya quiya Pueyaso niquiarani. ¡Cua riucuaare! ¡Majaari sapojonu! ¿Quiaate Cristo, Pueyaso Niyanu?

⁶⁴ Jesuuri na riucuaaree:

—Jaa. Nojuacuajanijia taa quia sequereecuajani. Cua tojitiare. Na nuhuaji, niaari cua niqiniutianiya Pueyaso miaquetajara cajiyano. Niaari cua niqiniutianiyajuhuaaj jiyocuacaanuji tacateyanohua cohua- jajinia.

⁶⁵ Pueyacuara secojonaa jiyaniijia jaara tojiquiaari naa Jesu sequesanotej, tama na toque sutareejaarijia na juaaniutia. Nata quiniaa sequereeri:

—¡Juhuej! ¡Nia tojishuriucuaara na sequesano! ¡Nojuajaari tama na caaqueyajaaja jiyateya juhua Pueyaso na quiniuria! ¡Jiyanohua sacuaraa- tiaari na sequesano Pueyaso niquiara! ¿Paatucua casaara sashiri socua

tamonu saquiriojotanura nocuaraarini? Niaacuaja shusha tojitiaree tama na sequesanojuaaja sacuaraatia Pueyaso niquiara. ⁶⁶ ¿Taa pa miiniutianiyanoj? ¿Taa nia sequeyani?

Nojoriiri pueyacuara secojonaa jiyaniijia riucuaaree:

—¡Cuaara mosaaria!

⁶⁷ Jiyacaritij, tamasaacari Jesu jiquioco riocojoree. Na jiquioco na masetejotureejaariuhuj. Tamasaca saniniuuja, Jesu namijia na morotunu nuhuaji, na mocoritia na piquitiuriiri. ⁶⁸ Na nuhuaji Jesu nequesotatureeri:

—Quiaa jaara Cristo quiri, Pueyaso jiyarosano, quia niishiritioj, ¿cante quia piriini?

Pedro seetasacari Jesuucuaaji

(Mr 14.66-72; Lc 22.56-62; Jn 18.15-18, 25-27)

⁶⁹ Pedroori jiyacari tii cajiriquiaajaa carijiniacuma. Jiyacaritij, secojonaa jiyaniijia seruuri Pedro niquishii. Nojuajaari niyacoo quiquiaari. Pedro sequeereeri:

—¡Jaj, quiaacuaja cuno Jesuta rucuaanejua, cuno Galilea jiyajinijinio pueyanotani!

⁷⁰ Pedroori jiyacari seetaree puetunu pueya niquiarajanaa. Naa sapojoreeri:

—¡Maja cua niishiniu casaa quia sequeyani!

⁷¹ Pedroori tohuateyajiria canujiyaree. Jati, tamonu niyacoori na niquiriijuhuj. Cuno seruuri jiyacari tii quiniaa sequeeree:

—¡Nio pueyanoori cuno Jesuta quijiajuhuj, cuno Jesu, Nazaret tiacajinijinio pueyanoni!

⁷² Pedroori Jesujiniji socua seetanu camiriohuacuhuj:

—¡Maja cua niishiniu cuno pueyano! ¡Pueyasocuaajaari niishiya, seetanujanaa nia sequeyanijia!

⁷³ Pasaja na tarishiniu nuhuaji, quiniqui quiniaari Pedro sequetusee:

—¡Quiaaqui seetanujanaa cuno Jesu pueyajinijinio! ¡Quiaari juhua nojori pocuaajuhuj!

⁷⁴ Jiyacaritij, Pedroori socua jiyacaterree sapojonura. Naa cuno pueya sequeereeri:

—¡Pueyasocuaajaari niishiya maja cua niishiniu cuno pueyano, niaa na sequeyani! ¡Pueyasocuaajaari cua sequesano tojiya! ¡Majaari cua sapojonu nijajaniya!

Caacarajaari canashiyaquiji niunijioquee. ⁷⁵ Jiyacaritij, Pedroori naa cuno niucuaaja Jesu sequesano niishiquii: “Pedronaa, caacaraja niunijiaquishacarijia, quiaari tari janiyajiniji seetanu pacutejonutaniya”. Pedroori tia shocua matacainiji tohuataquiaari ritia. ¡Jiyanohua nujuquequeeri na taraajenuta!

27

Judiocuaca camarucua niqutiosacari Jesu jiyaniijia Pilato

(Mr 15.1; Lc 23.1-2; Jn 18.28-32)

¹ Tariquicuaji, puetunu pueyacuara secojonaa jiyaniijianucuaajanaari rerejoree narta Judiocuaca camarucuata. Nojoriiri roojotooree taa na miitiuniutianiya Jesu na motenurani. ² Na nuhuaji, Jesu morotureeri na jaatucutunura jiyaniijia Pilatoocua. Pilatoori jiyaniijia Césarjanaa jiyatesano quiquiaari Judiocuaca jiyaniijia na quiniuria Judea jiyajinia.

Judas Iscariote cusosacari

³ Judasri jiyano hua macuhuajequiaari na niquishacari Jesuuri mosaanutaniya na quiatenuucua nojuaja. Na tacaaniutia, Judasri quiaquiaari secोजना jiyaniijianucuaacua, canaa Judiocuaca camarucuaacuanio, nojori na niqutionuhuaa cuno treinta cumaneeca.

⁴ Judasri nojori sequesee:

—Janiyaqui sesa miiriucuaani, najuhuana cua quiatenuucua maninia pueyano nijaniya!

Nojoriiri saa na riucuaareejaa:

—Naajaa. Maja canaa miishano. Cunocuaajaari tama quia miishano-juaaja.

⁵ Judasri nojori cari cuno treinta cumaneeca jatatee Pueyaso Sec-
ojoua tiajinia. Tiji quiacuahuari. Na riquiajiniji morotaquiaari so-
huaneyocuaari. Naa cusoquiaariiri. Sohuaneyocuaacuaji jaasutaari.

⁶ Secोजना jiyaniijianucuaari Judas jatasano cumaneeca reratequiaari. Nojoriiri tama seque-tooquiaarijiaaja:

—Nio cumaneecaari maja na naata Pueyasora racatajajinia niaso-
coriquiano. Nio cumaneecaari pueyano monu sami.

⁷ Puetunu nojorijianaa jaara niishiriojoquiaari taa na miitui-
niutianiya cuno cumaneecani, nojoriiri marau paniyori pueyano
cuhariquia masequiaari cuno cumaneecata. Cuno cuhariquiaari
jiyatesaaquiaari ruconaa jamojuara, nojori jaara cusoyare Jerusalén
tiacajinia nojori quishacari. ⁸ Pueyano monu samitia cuno cuhariquia
masesaanucua, cuno cuhariquiaari sesojosaaquiaari “Nanaca
samitia masesano cuhariquia”. Naa quiyajaari na sesa. ⁹⁻¹⁰ Naacuajitij,
Pueyaso sequenu panishano caminiujiunia supuetana Jeremías
sequesanoori maninia tohuateequiaari. Nojuajaari naa sequequiaaritij:
“Nojoriiri na treinta cumaneeca pataquiaari cuhariquia masenura
marau paniyori pueyanojiniji, taa cua jiyaniijia Pueyaso se-
quequiaari janiyacujani. Tarijia, cuno treinta cumaneeata,
maninia pueyanoori nata masesaaquiaari. Israel pueyari naa
sequequiaaritij: ‘Cuaara treinta cumaneecata masesaria cuno
pueyano’ ”.

Pilato nequesoreesacari Jesu

(Mr 15.2-5; Lc 23.3-5; Jn 18.33-38)

¹¹ Jesuuri jaatucusaaquiaari jiyaniijia Pilatoocua. Pilatoori Jesu
nequesotaree:

—¿Quiaate Judiocuaca jiyaniijia?

Jesuuri na riucuaaree:

—Jaa. Naacuaaquiniatejaj, taa quia sequereecuajani.

¹² Secोजना jiyaniijianucua, canaa Judiocuaca camarucuanio, nojori
jaara Jesuucuaa saquiriojotariquiaa, Jesuuri sanaa tojiriquiaa nojori.

¹³ Naaratej, jiyaniijia Pilatoori Jesu sequeeree:

—¿Majate quia tojinu nojori, quiocuara tonujiyano queraatia?

¹⁴ Majaari Jesu riucuanu quirii quenaaja. Pilatoori nocuaji jiuuji-
ateree, casaara na riucuaaquiya quenaajani.

Pilato sequesacari Jesuuri mosaanutaniya

(Mr 15.6-20; Lc 23.13-25; Jn 18.38-19.16)

¹⁵ Puetunu Pascua juucarajanaa, Pilatoori nujuatejojuajinia
nujuatesano pueyano cartenu jitiquiaari. Judiocuaca panishano

pueyanoori cartesaaquiaari pueyaracaanu. ¹⁶ Cuno quishacari, tamonu pueyanoori nujuatejojuajinia nujuatesano quiriquiaa, Barrabás jiyanishano. Puetunu pueyajanaari na niishijia sesa na miiniucua. ¹⁷ Pueya rerejosacari Jesu na nacojotasacari Pilato niquiara, Pilatoori nojori nequesotaquiaari:

—Judiocuacanaa, ¿teyano pueyano nia paniya cua cartenurani, Barrabáste, Jesu soj? Nojuajaari pueya sequesano, Pueyaso jiyarosanona.

¹⁸ Pilatoori naa nojori nequesotaree na niishishacari casaara canaa Judiocuaca camarucua monu paniriquiaa Jesuni. Puetunu pueyajanaari tari canaa camarucua tojitiaquiriquiaa, nojori tojitianura Jesu. Cunora, camarucuaari Jesu monu paniriquiaa.

¹⁹ Pilato cajishacari na nequesoreesaqui, necocuaari nocua jiyaroguaari tamonu na seru, naa na numootenuratej: “¡Narejatejataj, nareja! ¡Janiyari niucua maquiyojoree puereeta cuno pueyanooquajini!”

²⁰ Jiyacaritij, secojonaa jiyaniijianucuaari, canaa Judiocuaca camarucua pueya niishitiojoriquiaa nojori sequenura, Barrabás cuaara cartesaaria, Jesu cuaara mosaaria saniniuuja. ²¹ Naacujitij, jiyaniijia Pilato jaara pueya nequesotaquiaariuhua teyano nojori paniya na cartenurani, nojoriiri na riucuaaree:

—¡Barrabás quia cartere!

²² Pilatoori nojori nequesotaree:

—¿Naatee? ¿Taa cua miiniutianiya Jesuurinitioj, pueya sequesano “Pueyaso jiyarosanoni?”

Puetunu pueyajanaari ritia na riucuaaree:

—¡Cuaara teetsaaria niyacutesanojinia!

²³ Pilatoori nojori nequesotarohuacuhuj:

—¿Casaarateni? ¿Sesa miiritijiaara?

Pueyari saaja socua jiyanohua nacaree:

—¡Cuaara mosaaria niyacutesanojinia teetesano!

²⁴ Pilato cartenu saniniujiushacari Jesu juucua, pueyari saaja socua jiyanohua nacooriguiaa. ¡Socua jiyanohua juaaquioriquiaari! Pilato niishishacari maja na naata quiniutianiya Jesu cartenu, taa na paniriquiaa juucuaajani, nojuajaari mohuaca maseree. Pueya niquiara shuquitiareeri. Na shuquitasacari, Judiocuaca sequereeri:

—¡Majaari cucua na tiutiasaanu quiniutianiya nia mosacari nio maninia pueyano! Cunoori maja cua miishano quiniutianiya. ¡Cunoori tama nia miishanojuaja!

²⁵ Puetunu pueyajanaari na riucuaaree:

—Naajaa. ¡Jaara mosaare, cuaara tiutiasaaria canaacua, canaa niquiohuacuanio!

²⁶ Na nuhuaji, Pilatoori Barrabás tohuateree nujuatejojuajiniji. Saniniuuja Jesu majacutereeri. Na nuhuaji, na soldadohua na niquitioreeri niyacutesanojinia nojori teetesocoriquiano.

²⁷ Jiyaniijia Pilato soldadohuari jiyacari Jesu jaatucuree Pilato tiajiniaaco. Nojoriiri puetunu narta soldadohuajanaa rerejoteree Jesu shocuaqueya. ²⁸ Na nuhuaji, nojoriiri Jesu toque jocuaturee. Tamonu tu-cuaque toque cushitishaareeri, shaaruque, juhua jiyaniijiajanaa cushishano. Naa na miitiuriiri na macaatiniuria. ²⁹ Nojoriiri juhuacusthua maaturee na nacaquerajuhuj. Na nuhuaji, na cushitituri Jesuuri.

Naajua niquitiosaareejaariuhuj, juhua na macara, na miaquetajata na muetunura juhua jiyaniijia. Na nuhuaji, soldadohuari Jesuucuaa mojoquetacuaiaari. Nojoriiri naa na macaatirii:

—¡Jejejee, Judiocuaca jiyaniijianaa!

³⁰ Nojoriiri Jesu riocojoree. Na naajua na jaariutiatureeri. Nataja na naca piquitiuriiri. ³¹ Naa nojori macaatinu nuhuaji Jesutej, nojoriiri cuno tucuaque toque jocuaquiaariuhua nocuaji. Tama na toquejaaja cushitishaarohuari. Na nuhuaji, nojoriiri na jiyataquiaari na teetenura niyacutesanojinia.

Jesu teetesacari niyacutesanojinia

(Mr 15.21-32; Lc 23.26-43; Jn 19.17-27)

³² Nojori tohuareetasacari tiacajiniji puecoosaquiria nojori quiojosacari, nojoriiri tamonu pueyano naacumaa. Nojuajaari Cirene jiyajinijinio pueyano quiquiaari. Simónri na sesa quijia. Soldadohuari cuno Simón pateree Jesu teetejara niyacutesano. ³³ Nojoriiri tiuquijioseesa sesa miijia puecoosaqui. Pueya puecoosaquini, na sesa quiquiaari “Gólgota”. Nioori pueyano rupaaajinia sequeya “Pueyano nacaco”. ³⁴ Quiniqui, soldadohuari Jesu raateree vino juucua, casaa piajata cojitishano. Jesu jaara na saniquiaari, majaari na ratunu quirii.

³⁵ Jesu jaara niyacutesanojinia teetesaaquiaari tari, soldadohuari saitia tacuarishijioree nojori niishiniuria cante Jesu toquepoonutaniya nerani. Naacuajitij, tama nojoriijaarijia Jesu toque seraatiaquiaari. Naa tohuateequiaariiri tariucuacaanu Pueyaso sequesano caminiujuunia sequesano, nojuaja jaara naa naajiotaquiaari:

“Pueyari saitia tacuarishijioree cua toque nojori seraatianura”.

³⁶ Na nuhuaji, cuno soldadohuari cajitiquiaari Jesu na cojuanura.

³⁷ Jesu nacaacuma, naajioneeri rupotasaaquiaari. Tii naajiosano quiriquiaari casaara na teetesareeni. Naa naajiosano quiriquiaari: “Nioori Jesu, Judiocuaca Jiyaniijia”.

³⁸ Caapiqui nohuasenujuacaari Jesu shuriucua teetesaaquiaarijuhuaj, socua tamonu caapiqui niyacutesanojinia; tamonu na miaquetajara, tamonu na muenecara. ³⁹ Tamasaca pueya tajishacari nucuaco Jesu shuriuquioco, nojoriiri Jesu macaatiquiaari. Na maanuquenuta, nojoriiri Jesu sequetuquiaari:

⁴⁰ —¡Jaj! ¡Cumaacaraca quijia naatiijia! Quiaacuaajaari sequeja quiaa jaara Pueyaso Secojoua tia niyartare, quia naata na tianu tucuatunuhua jiuujianaraca juucajinia. ¿Naate? ¡Quiaa jaara naa cumaacaraca quiriritij, canaa niquiara quia rosercurarajaj, quiaa jaara Pueyaso Niyanu quiri seetanujuanaa!

⁴¹ Secojonaa jiyaniijianucuaari tii quiriquiaajuhua Moisés Rootasanojiniji niishitiojonaata, canaa Judiocuaca camarucuanio. Nojoriiri Jesu macaatiriquiaajuhuj. Tama sequetooriquiaajaarijia:

⁴² —Saaja tamasa naatanijiojuaqiiri. Maja cutaraari na naata tama nocuajiaaja tacunu. Jaara seetanujuanaa pa Israel pueya jiyaniijia quiri, cuaara roseera quiarijia pa niquiara niyacutesanojiniji, nocua pa tiuuniuria. ⁴³ ¡Pueyasocua tiuujia naatiijia! Jaara naa quiriritij, Pueyaso cuaara na roshiniiria, nojuaja jaara seetanujuanaa Pueyaso panishano quiri. Nojuacuajaari pa sequeja: “Janiyari Pueyaso Niyanuni”.

⁴⁴ Cuno caapiqui nohuasenujuaca Jesu shuriucua teetejosano quiriquiaani, nojoriiri Jesu macaatiriquiaajuhuj.

*Jesu cusosacari**(Mr 15.33-41; Lc 23.44-49; Jn 19.28-30)*

⁴⁵ ¡Panacari, mijiríaari ninishiquiria quiquii! Pananu mueecosacari cuhuatamohuari. ⁴⁶ Jiyacaritij, Jesuuri jiyanhua nacaquiaari naatej:

—¡Elí, Eliinaa! ¿lama sabactani?

Nioori pueyano rupaajinia sequeya: “¡Cua Pueyasonaa, cua Pueyasonaa!, ¿casaara quia carteree janiyani?” ⁴⁷ Tamasaca na shuriucua nujuatunaari na tojtitariquiaa. Nojoriiri sequeree:

—¡Nia tojiri! ¡Supuetana Elías jiiquioonuyano! Noo Elías, tariucuaaanu pueyara Pueyaso sequesano caminiujiunia quiquiaaritij.

⁴⁸ Tamonuuri ritia netequee namasu casaa na riniuria. Naajuaacua na morotanu nuhuaji, jereeca vinojinia na shiriiri. Na nuhuaji, Jesuucua na shiitioreeri na raatenura. ⁴⁹ Tamasacaari sequeree:

—¡Pa shanacure! ¡Elías jiyoteeri nocua niniutianiya na roshininiuria niyacutesanojiniji!

⁵⁰ ¡Jiyacaritij, Jesuuri jiyanhua nacarohua! ¡Na nuhuaji na sohuanu tohuataniriiri! ¡Cusoqueeri! ⁵¹ Pueyaso Secojoua tiajinia, shiquiaruque toquejiniji sohuacaari quiquiaari Pueyaso Quishaqui mishiquietaja. ¡Jesu cusosacari, cuno toqueeri sutequee jiyocuaaanuji jiyocuaa puetunujanaa! ¡Rijiaari jiya jiuuquiutiaquiaari jiyanhua! ¡Sairi jiaquetacocuaari noojiaacoji! ⁵² ¡Macunucua raacaari riatequequiaari! ¡Queraatia tariucuaaanu Pueyasocua tiuuniaari samiitiacoquee na raacajinia! ⁵³ Jesu jaara samiitiaquiaarihua, cuno samiitiaconohua pueyari tohuareetaquiaari na raacajiniji. Nojoriiri Jerusalén tiacajinia tiuquitiaciaari. Nojoriiri queraatia pueyacua muetaquiaari tii, Pueyaso panishano tiacajiniani. ⁵⁴ Soldadohua capitánri na pueyata Jesu cojuariquiaa, Jesu cuaara cusoyarejaatijia nojori niquiara. Nojori jaara jiya niquitiuquiaari jiuuquiutiaano, socua puetunu nojori niquishanojuanaano, nojoriiri jiyanhua puereturee. Sequetureeri:

—¡Nio pueyanoqui seetanujanaa Pueyaso Niyanu quiquianu!

⁵⁵ Queraatia maajipohuari tii quiriquiaajuhuj. Nojoriiri tucuaaanuji shootiaturiquiaa Jesu. Nojoriiri Jesu nuhuajiquiaari Galilea jiyajiniji, Jesura pueraquenuuriquiano. ⁵⁶ Cuno maajipohua tajinia quiriquiaari María Magdalena, Santiago nucua Maríajuhuj, José nucua Maríanio, mariyata Zebedeo niquiohua nucuanio.

*Jesu quete niasacari raaco**(Mr 15.42-47; Lc 23.50-56; Jn 19.38-42)*

⁵⁷ Tamonu pueyanoori quiquiaari Arimatea tiacajinijinio. Jiyanhua casamiriaca quijiaari. Na sesa quiquiaari José. Nojuajaari tarijia Jesu tojijiaa quiquiaari. Joseeri Jesu cusunu juucaja tiuquiquiaari cuno tenacari. ⁵⁸ Joseeri Pilatoocua quiaquiaari Jesu quete na masenura. Pilatoori na pueya sequeree cuaara na niquitiosarianoj. ⁵⁹ Joseeri Jesu quete paquiaari na jeenucuanura raaco na niasocoriquiano. Na jiuniocoreeri quenaaruque cohuajaque toquejinia. ⁶⁰ Na nuhuaji na niaquiaari tama na raacojaarijia. Quiarinio raa quiquiaariiri, José jiuutianishano saajiajinia. Na nuhuaji, Joseeri puereetuca saajia saquitiniquiaari raa tiotiuria. Quiacuhuari. ⁶¹ María Magdalenaari na sesaanuata cajitituriquiaa raa canaja taquijiria.

Soldadohua cojuasacari Jesu raa

⁶² Pascuara jeenucuuanu juuca nuhuaji, secojonaa jiyaniijianucuaari Pilatoocua quiojoquiaari Fariseocuacata. ⁶³ Naa na sequetuseeri:

—Jiyaniijianaa, canaari cuno sapojoua pueyano sequesano niishiquini, na sequesano samini na quishacarijia. Nojuajaari sequeja: “Janiyari jiuujianaraca juucajinia samiitianutaniuhanu”. ⁶⁴ Nocuaji na raa quia cojuatere maninia tiosano, jiuujianaraca juuca cuara shocorejaatijia, na pueya mariqui niucua macu nohuasequeeri. Nojori jaara na nohuasere, nojoriiri sequenutaniya Jesu samiitiarohuacuaa. Nojori jaara naa sapojore pueyatej, socua jiyacatenutaniyari Jesu sequesano, nojuaja jaara sequecanu: “Janiyari Pueyaso Jiyarosani”.

⁶⁵ Pilatoori nojori sequeree:

—Niya quiyacuaja cua soldadohua. Nojori nia cojuatere maninia cuno raa, taa nia paniyacuajani.

⁶⁶ Nojoriiri soldadohua nujuatejoquiaari raa nojori cojuanura. Raa tiotiuuri rupanacusaquiaarijuhuaj jiyaniijia Pilato sesa naajiotajata.

28

Jesu samiitiasacariuhua

(Mr 16.1-8; Lc 24.1-12; Jn 20.1-10)

¹ Samaatenu juuca jaara shocoquiaari, coteenu juuca semaanajini-jinio juhuaquesacari, shusha cuhuatesacari, María Magdalenaari raa niqiniuucua quiariquiaa na sesaanucuata. ² ¡Canashiyaquiji, rijiaari jiyanhua jiuuquiutiaree! Cunoori quiquiaari Pueyaso seru rosenuucua jiyocuacaanuji raacua. Raa tiotiu saajia saquitinishiiri. Na nuhuaji, saajiaacua cajiriohuari. ³ ¡Pueyaso seruuri niquishaaquiaari shacantuuca juhua miacana! Na toqueeri jiyanhua cohuajaque quiquiaari, juhua sohuanatuu. ⁴ Raa cojuatunaari jiyanhua shiriqititiquiaari nojori niquishacari Pueyaso seru. Jiyanhua tetecatureeri. Na puerenuta socua cusojonuureeri. ⁵ Maajipohua jaara tiuquiquiaari raajinia, Pueyaso seruuri nojori sequeree:

—Maja nia shiriiquiniu. Janiyacuajaari niishiyani niari Jesu pajeya, niyacutesanojinia mosanotej. ⁶ Maja niya na quiniu. Tari samiitiarohuanu, taa nojuaja sequequiaari niajaniyacuajani. Miji. Nia niquishushiiria na masaqui. Shaaqui. ⁷ Ritia nia quiaarohua. Na saqiriojosano pueya nia sequesuhua: “Jesu tari samiitiarohua. Nojuajaari nia puetanutaniya Galilea jiyajinia. Niaari jati na niqiniutianiya”. Janiyacuajaari tari nia sequereeni. Naa nia pohuatasuhua na pueya.

⁸ Maajipohuari masaacujutanuuriquiohua raajiniji na puerenuta, na shuquiriniutiajuhuaj. Nojoriiri socua netecuatiuyarohuaquij, canaa na pohuatanuhua Pueyaso seru sequesano nojori. ⁹ ¡Jiyacaritij, Jesujuaari canashiyaquiji nojoriicua muetaquee nuujinia! Nojori saruhuatareeri. Maajipohuari nocua catecanoree. Na cariquimiaji mojuquetacoreeri. Jesu niohuaca quiatoreeri. Jesu shootiatoreeri na jiuujiatenuta. ¹⁰ Jesuuri nojori sequeree:

—Maja nia puerenu. Nia quiaarohua. Cua pueya nia sequesuhua nojori cuara quiojoora Galilea jiyajinia. Nojoriiri seetanujuanaa cua tapueyocuaca. Nojoriiri jati cua niqitiuniutianiya.

Raa cojuanaa pohuatasano

¹¹ Maajipohua quiojosacariuhua, noojiaqueya raa cojuanaajiniijini-
ioori tiacajinia quiojoquiaariuhua pueyacuara secojonaa jiyaniijianu-
cua nojori pohuatanura nojori niquishano. ¹² Pueyacuara secojonaa
jiyaniijianucuaari canaa Judiocuaca camarucuata rerejoree na roo-
jotoonura taa na miitiuniutianiyani. Na nuhuaji, nojoriiri queraa-
tia cumaneeca niquitioquiaari raa cojuanaa, pueya niquiara nojori
pohuatanura tamaatia nojori niquishanojiniji. ¹³ Soldadohuari naa
rootasaaquiaaritij:

—Niocua naa sequere pueyatej: “Canaa maquesacari, Jesu pueyaqui-
iri niucua nohuasequee Jesu quete raajiniji”. Niocua naa sequeretej.
¹⁴ Jiyaniijia Pilato jaara niishiri naa nia pohuatasacaritij, majaari nia
puerenu. Canacuajaari na shiniajanutaniyani jaara juaari. Naacujitij,
majaari na juaaniu quiniutianiya niajaniya.

¹⁵ Jiyacaritij, soldadohuari cumaneeca maseree. Nojoriiri naa pohu-
atanu coteequiaari taa nojori rootasaareecuajani. Nojori cuarachashis-
hanoori ritia caminiujiushaaquiaari canaa Judiocuacaa. Naacujitij,
canaa Judiocuacaari naa sequeyajaa quiarjia.

Jesu rootasacari na pueya na jiyaramiquiyaquishacarijia nojori
(Mr 16.14-18; Lc 24.36-49; Jn 20.19-23)

¹⁶ Canaa, Jesu once saquiriojosano pueyani, canaari Galilea jiya-
jinia quiojoquiaari tamonu tuhananuucuan. Jesuuri canaa se-
quequiaari canaa quiojonura tiriara, tii canaa coquetonura nata.
¹⁷ Canaa niquishacari Jesu quiyano tii, canaari nocuara mojuquetaco-
quiaari canaa shuquiritianura nojuajani. Tamasaca canaajiniijinioori
jiyaniriquiaa maja naasucuaari Jesu. ¹⁸ Jesuuri canacua catecanoree.
Canaa sequereeri:

—Janiyari puetunu cumaacajanaa niquitiosaareeni, Jiyaniijiajanaa
cua quiniuria jiyocuacaanu, mijirianio. ¹⁹ ¡Naaratej, nia quiojore!
¡Puetunu pueyapuejanaa nia pohuatare cua rupaa, cua tojitiajacara
nojori quiniuria! Moojinia nia tiuquinijiore cua tojitiajaca Pueyaso
sesajinia, nojori rupuesacari pa Que Pueyaso, janiya, na Sohuanunio.
²⁰ Nojori nia niishitiojore puetunu cua rootasanojuanaa niajaniya, no-
jori tojishocoriquiano. Nia niishiri nio: jianiyacuajaari niaata quiniu-
tianiya pueyaracaanuni, jiya cuara puequerejaatijia!

MARCO NAAJOTASANO JESUCRISTOJINIJI

*Cariiquia jiyajinia Tiuquinijiona Juan poojotasacari Pueyaso rupaa
(Mt 3.1-12; Lc 3.1-9, 15-17; Jn 1.19-28)*

¹ Pueyaso Niyanu Jesucristojiniijiiri naa coteetasaaquiaari pohu-
atanutej. ² Tariucuacaanu pueyara Pueyaso sequesano caminiujiunia
Isaíasri Pueyaso Niyanu niyacari naajiotaqueiaari. Naajiotaqueiaariiri taa
Tiuquinijiona Juan poojotanutaniya pueya jeenucuanura nojori jiuu-
jiani, niriquiano Jesu tojjia nojori quiniuria. Isaíasri naa naajiotaqueiaari
Pueyaso sequesano miriqui Neyanutej:

“Janiyari quiocuaji jiyaronutaniya tamonuni, quiocuaji quia nuu jeenu-
cuariquiano. ³ Na nacanuari tojishaanutaniya cariiquia jiyajinia.
Naa pueya sequeyari: ‘¡Nia jeenucuare Jiyaniijia nuu! ¡Nia nu-
unore maninia, maja shuutiuniu!’ ”

⁴ Quiari naataja, Tiuquinijiona Juanri seetanujuanaa naa miiquiaari
cariiquia jiyajiniatej. Nocua nijionaa pueya tiuquinijioriquiaa moojini-
aari. Tiuquinijiona Juanri cuno pueya sequequiaari:

—¡Nioojia nia tacatore sesa nia miiniujiniji, moojinia cua tiuquini-
jionura niajaniya! ¡Pueyasocua sesa nia miishanojiniji nia jiyanoori
puetunujuanaa!

⁵ Puetunu Judea jiyajininio pueyajanaari nocua nijioquiaari nojori
tojitianura nojuaja, Jerusalén tiacajininio pueyanio. Cuno pueya jaara
sesa na miishano pohuataquiaari Juan niquiara, Pueyaso niquiara-
juhuaj, Juanri nojori tiuquinijioquiaari Jordán moojinia.

⁶ Tiuquinijiona Juan toqueeri camello cajacajiniji shitiasano
quiquiaari. Na cajiniocua na camarucutesanoori quiquiaari
shoque sacuanijiasano. Na miaquesanoori quiquiaari sequeru,
samiyatunio, cariiquia jiyajinia na riuriatasano. ⁷ Juanri pueya niquiara
pohuataquiaari naatej:

—Tamonuari cua nuhuaji niniutaniya. Nojuajaari socua
cumaacaraca janiyajiniji. Janiya maara shuquiriaatia quirini, nojuaja
jaara quenaaja cua sequere cua naacutanura nojuaja, juhua na seru, na
sapatu neyocua cua samaacatanura. Nojuajaari Jiyaniijiajanaa cutara
janiyajiniji. ⁸ Janiyari nia tiuquinijiya moojiniani, juhua jeequejosano
nia quiniuria sesa nia miishanojiniji. Cua nuhuaji ninia cutaraari
Pueyaso Sohuanu tiuquinijionutaniya nioojiajinia, na cumaaca nia
jiitianura, seetanujuanaa maninia miijiaca nia quiniuria.

*Jesu tiuquinishacari moojinia
(Mt 3.13-17; Lc 3.21-22)*

⁹ Jesuuri jiyacari Nazaret tiacajiniji quiaquiaari Tiuquinijiona Juan-
cua. Nazaret tiacaari Galilea jiyajinia quijia. Tiuquinijiona Juanri Jesu
tiuquiniquiaari Jordán moojinia. ¹⁰ Jesu tacasacari moojiniji na tiuquin-
ishaanu nuhuaji, jiyacaritij, nojuajaari jiya cajiniocua niquiquiaari
riateyano. Pueyaso Sohuanu niquiriiri nocua roseyano juhua moco-
coonu. Nocua tiuushiiri. ¹¹ Jiyacaritij, jiyocuaaanuji tojishaaquiaariiri
Pueyaso pocuaano. Naa Jesu sequequiaariiri:

—¡Quiaari Quiyanuniyojua, cua panishano! ¡Jiyanhua quia timitiaani-
jia!

Samaruhua jiyaniijia saniniujiushacari Jesu

(Mt 4.1-11; Lc 4.1-13)

¹² Na nuhuaji, Pueyaso Sohuanuuri Jesu jiyatequiaari ritia cariiquia jiyajiniara. ¹³ Jesuuri cuarenta juuca shocojotequiaari tii tamajaaja, puereeta jiya camaruhua casami quishaqui. Tii na quishacari, Satanásri Jesu saniniujiuriquiaa na tojijiara Jesu quiniuria juucua. Na nuhuaji, Pueyaso seyari nocua nijioquiaari na naacunura, na mianuutenura-juhuaj.

Jesu coteesacari poonijionu Galilea jiyajinia

(Mt 4.12-17; Lc 4.14-15)

¹⁴ Jiyaniijia Herodes jaara Tiuquinijiona Juan nujuatequiaari nujuatejojuajinia, na nuhuaji, Jesuuri Galilea jiyajinia quiaquiaariuhua. Nojuajaari pueya niqiara poojotaquiaari tii, maninia pohuatasano Pueyasojiniji, taa Pueyaso jitianutaniya na muerasuni. ¹⁵ Jesuuri naa sequequiaari pueyatej:

—Nia sequeyanijia, nio pa quishacarini, quiarijiaari Pueyaso jiyanooshacari pueya, na muerasura nia quiniuria. Cunora, Pueyasojiniji cua pohuatasanoocua nia tiuuri. Nioojia nia tacatore sesa nia miiniujiniji, Pueyaso tojitiajaca nia quiniuria.

Jesu saquiriojosacari pueya, na tarajariquiano

(Mt 4.18-22; Lc 5.1-11)

¹⁶ Galilea caminia shuriuquioco Jesu rucuanijosacari, nojuajaari Pedro niqiquiaari, tarajanu Andrésnio. Nojoriiri shiyaru jaquerootanaa quiquiaari. Jiyacaritij, nojoriiri shiyaru jaquerootariquiaa caminiajia. ¹⁷ Jesuuri nojori sequesee:

—¡Miji, cua nuhuajitiuyare! Janiyari nia jiyatenutaniya pueya quioojuara saniniunijia, juhua sapitiaaja.

¹⁸ Nojoriiri ritia na shiyaru tiujiaquiaari. Jesuta quiojyareeri.

¹⁹ Socua shiitianiyojua na tacoji Jesu canujusacari, Santiago niquishiri, tarajanu Juannio. Nojoriiri na shiyaru cushipirijionuuriquiaa botejinia. Nojoriiri Zebedeo niquiohua quiquiaari. ²⁰ Jesuuri jiyacari nojori sequequiaari nata nojori quianurajuhuj. Nojoriiri na que Zebedeo tiujiaquiaari botejinia na naacunaata. Nojoriiri Jesuta quiojoquee.

Samaruraca pueyanojiniji pohuatasano

(Lc 4.31-37)

²¹ Nojoriiri Capernaum tiacajinia tiuquishii. Samaatenu juuca, Jesuuri tiuquiquiaari Pueyaso secojojua tiajinia. Tii pueya niishitiojonu coteequiaariiri. ²² Pueyari jiyanohua jiuujiatequiaari na rootasano nojori tojishacari. Jesuuri juhua jiyaniijiajanaa niishitiojoriquiaa. Majaari na niishitiojonu quiquiaari taa Moisés Rootasanojiniji niishitiojonaa niishitiojoquiaaricuaani. Nojoriiri saaja Moisés pohuatasanojiniji caminiujuquiaari, pueya niqiara nojori pohuatasacari Pueyaso Rupa. ²³ Samaruraca pueyanoori Pueyaso secojojua tiajinia quiriquiaa tiijihuj. Nojuajaari nacaquiaari:

²⁴ —¡Nazaret tiacajinijinio Jesunaa!, ¿quiaateeri tari canaacua nimiaa, canaa quia shaajanura? Janiyari quia niishiyani. ¡Quiaacuajaari Pueyaso Niyanu!

²⁵ Jesuuri cuno samaru juarii. Na sequereeri:

—¡Quia sanaajere! ¡Quia tohuatate nio pueyanojiniji!

²⁶ Jiyacaritij, samaruuri jiyanoehua taraatia miirii cuno pueyano. Jiyanoehua na sariyotequiaariiri na tohuatasacari nojuajiniji. Juhua macu tiujiaquee pueyanoori. ²⁷ Puetunu pueyajanaari shiriiqui-tiujiaari. Tama nojorijiaarijia nequesoreetooquiaari:

—¿Casaatucuaa nioni? ¡Nioruhua quiarinio niishitiojosano! ¡Nio pueyanoqui cumaacaraca! ¡Taa samaruhua tojitiaa nojori na jiyarosacariiri!

²⁸ Pueyari ritia caminiujuquiaari Jesujiniji puetunu Galilea jiyajiniajanaa.

Jesu naatanishacari Simón Pedro reyarucua
(Mt 8.14-15; Lc 4.38-39)

²⁹ Jaara tohuareetaquiaariuhua Pueyaso secojojua tiajiniji, Jesuuri Simón, Andrés tiajiniaara quiaquiaari Santiagota, Juantanio. ³⁰ Simón reyarucuaari naseeca matariquiaa maquetujinia. Cusosutuhuj. Tiajinia quiniaari Jesu sequeturee nojuaja cusosu mataa. ³¹ Jesuuri nocua canujyaree. Na juaashiquiajiniji cusosu sanaseeri. Na cusonuuri seetanujuanaa ritia tajiquiaari nocuaji. Naacujitij, nojuajaari pueya mianuutenu coteequiaari ritia.

Jesu naatanijosacari queraatia cusosuhua
(Mt 8.16-17; Lc 4.40-41)

³² Shusha ninishacari, Jesuucua patootasaaquiaariiri puetunu cusosuhujanaa, samaruhuaraca cusosu pueyano. ³³ Puetunu cuno tiacajiniji pueyajanaari tia tohuateyaji rerequeequiaari tee Jesu quiriquiaacuajani. ³⁴ Jesuuri queraatia puetunu tamaatia cusonujuanaa naatanijioquiaari na rupaa cumaacata. Queraatia samaruhua tohuatanijioquiaari tamasaca pueyajinijiaariuhuj. Samaruhuari niishiquiaari cante Jesuni. Nocuaji, majaari Jesu shanacunu quiquiaari samaruhua pocuanura quenaaja.

Jesu pohuatasacari Pueyaso rupaa Galilea jiyajinia
(Lc 4.42-44)

³⁵ Jesuuri jiyanoehua tariquicuajani sanequiaari, ninishiqui quishacarijia. Tiacajiniji quiaquiaari tamaquiriaari, tii Pueyaso na secojonura tamajaaja. ³⁶ Na nuhuaji, Simónri Jesu pajenuucua quiojoquiaari, nata quiniaata. ³⁷ Jaara na riuriatatuquiaari, na sequetuseeri:

—¡Puetunu pueyajanaa quia juuretaa!

³⁸ Jesuuri saaja nojori sequeree:

—Pa quiaare juhuari catecanaataja tiacajinia. Tii pa pohuatarehujhua Pueyaso rupaa pueya niquiara. Janiyacuajaari cunora jiyasohujaja tohuataareni.

³⁹ Naacujitij, Jesuuri puetunu Galilea jiyajiniajanaa rucuanajoquiaari. Pueyaso rupaa pohuataquiaariiri Pueyaso secojojua tiacajiniaqueya puetunu Galilea jiya tiacajiniajanaa. Nojuajaari samaruhua tohuatanijioquiaarijuhuj.

Jesu naatanishacari lepraraca pueyano
(Mt 8.1-4; Lc 5.12-16)

⁴⁰ Lepraraca cusosu pueyanoori Jesuucua catecanoquiaari. Jesu cariquimiaji mojuquetaseeri. Na sequereeri:

—Quiaa jaara paniri, quia naata cua naataniniu cua cusonujiniji.

41 Jesuuri nocua taraajequiaari. Na juaashiquia niaree nocuaari. Na sequereeri:

—Taaquiriirinij. Quia naataniniu paniyanijia. Quia cuaqueya cuaara jeequehuara.

42 Jesu jaara naa na sequequiaaritij, na lepraari ritia cushiriiquii. Na cuaqueyajiniji shaajequiaariiri na cusonu. Na cuaqueyari maniniara quiquiaariuhua. 43 Na jiyaroyaquishacarijia na naatanishano pueyano, Jesuuri jiyanoehua na rootaquiaari. Na sequereeri:

44 —¡Cua tojiri, majaari pueya quia pohuatanu cua miishano! Saaja pueyacuara secojonaa jiyaniijia quia cuaqueya quia niqutishii, na cartenuhuara quiajaniya, pueya tajinia quia rucanejonuhuara juhua-janiya. Mariyata ritia quia niqutiore quia seru Pueyasooacara catijiasocoriguiano. Naa quia miiri taa Moisés niishitiojoquiaaricujani, puetunu pueyajanaa niishiniuria quiaa tari naatarohua quia cusonujiniji.

45 Cuno pueyano jaara quiaquiaari, juhuacatecara pohuataquiaari puetunu pueyajanaari taa na naatanishaarohuani. Naaratej, puetunu pueyajanaari Jesu niquniu panijia. Cunora, Jesuuri maja tari na naata tiuquiniu quiquiaari juhua-janiya tamonu tiacajinia. Nocuaji Jesuuri pueya quiaquishaqui rucanejojua. Naajaa, puetunu cuno jiyajiniji pueyajanaari saaja nocua nijioquiaari na niquniuria.

2

Jesu naatanishacari cumatacuruhuana cusosu
(Mt 9.1-8; Lc 5.17-26)

1 Na rucanejonu nuhuaji, Jesuuri Capernaum tiacajinia tiuquiquiaariuhua na saquiriojosano pueyata. Pueya jaara niishiquiaari Jesu tari na quijia tijinia tiuquiriohua, 2 queraatia pueyari nocua nijioquiaari cuno tijiniara. Nojoriiri tiaco mishiquiaari, tohuateyajijihua. Jesuuri cuno pueya niqiuara pohuataquiaari Pueyaso rupaa. 3 Jesu quishacari tii, nocua patasaaquiaariiri pueyano cusosu na matujinia. Cuatro pueyari na patamaa. Cuno cusosuuri pootia mataja quiquiaari pueyaracaanu, cumatacuruhuana na quiniuucua. 4 Cusosu patanaari maja na naata tiaco tiuquitianu quiquiaari Jesuucua, puera pueya rerequeesacari tohuateyaji. Nocuaji nojoriiri tia cacojiria cusosu tacataquiaari tacatuhuoco. Nojoriiri tia nijinia cuhuataquiaari. Namitia Jesu nujuasaquijianaa cuhuataturee tiaari. Na nuhuaji, tia cuhuocojiniji, Jesuucua roshinitiasaareeri cusosu na matujinia. 5 Jesuuri cusosu patanaa pueya niquirii seetanujanaa nocua tiuyano. Naaratej, Jesuuri cusosu sequeree:

—Quiyanunaa, sesa quia miishanojiniji quia jiyanoorii taricujaniijia.

6 Moisés Rootasanojiniji niishitiojonaari tii cajitiuriquiaa. 7 Nojori tojishacari Jesu jiyanoyno cuno pueyano, nojoriiri niishiriojonuuree: “¿Casaara nio pueyano pocuaa naani? Majaari quenaaja pueyano naata pa jiyanooniü sesa pa miishanojiniji. ¡Nojuajaari tama na cuaqueyajaaja jiyateya juhua Pueyaso na quiniuria! ¡Cunoori jiyanoehua sacuaraatia! ¡Saaja Pueyaso cutaraari na naata pa jiyanooniü!” 8 Jesuuri tamajaaja ritia niishiquiaari noojiajinia naa cuno pueya niishiriojonuusano. Jesuuri cunora nojori sequeree:

—¿Casaara naa nia niishiriojiyani? ⁹ ¿Casaate jiyajenetashiya sequenu-rani: “Sesa quia miishano tari jiyanooshaaree”? ¿Mariyata jiyajeneta-teeri sequenurajuhujaj: “Quia sanere. Quia matu quia pataarohua”? ¹⁰ Seetanujuaanaa nia sequeyanijia, janiyari quiarijia nia niishitiniutianiyani, pueyano cua quishacari mijiria, naajaa, janiyari Pueyaso cumaaca jiitiaa sesa miijiaca cua jiyanooniuriani.

Jiyacaritij, Jesuuri cumatacuruhuana cusosu sequeree:

¹¹—Cua tojiri. ¡Quia sanere! Quia matu quia patare. Quia tiajinia quia quiaarohua.

¹² Cusosuuri ritia sanequee. Pueya niqiuara na matu pataarohuari. Naaratej, pueyari jiuujiatequiaari. Pueyaso maniniuhuaqueetatureeri. Cuno pueyari naa sequetuquiaaritij, na shuquiritiasacari Pueyaso:

—¡Majaari quenaaja pa niqiniu quiquiaari naa miishanotej!

Jesu sequesacari Leví na nuhuajiniuria

(Mt 9.9-13; Lc 5.27-32)

¹³ Na nuhuaji, Jesuuri na saquiriojosano pueyata tacatequiaariuhua caminia casaqueyajiria. Queraatia pueyari nocua nijioquiaari. Jesuuri cuniqui nojori niishitiojoquiaari Pueyaso rupaa. ¹⁴ Na nuhuaji, Jesu quiojosacari na saquiriojosano pueyata cuniquiji, Jesuuri Leví niqiumiaa cajiyano Roma tiacajinia quijia jiyaniijiaara cumaneeca masejojuajinia. Nojuajaari Alfeo niyanu quiquiaari. Jesuuri na sequeree:

—Miji. Cua nuhuajiyare.

Jiyacaritij, Leviiri sanequiaari. Jesu pueyanora quiaquiaariiri.

¹⁵ Cuno niucuaja, Jesuuri Leví tiajinia miaqueriquiaa. Leví tiajinia miaquenuuriquiaajaariuhua queraatia narta cumaneeca masejona. Queraatia tamasaca pueyari nojoritia miaquenuuriquiaajuhujaj, canapue Judiocuaca camarucua sequequiaari sesa pueyatacuajani. Nojoriiri Jesuta miaquenuuriquiaa, Jesu saquiriojosano pueyatatio. Jiyanohua queraatia pueyari Jesu rupuenaa quiriquiaa. ¹⁶ Moisés Naajioneejiniji niishitiojona, mariyata Fariseocuaca jaara Jesu niquirii cuno pueyata miaqueyano, nojoriiri Jesu saquiriojosano pueya nequesotaquiaari:

—¿Casaara nia niishitiojona miaqueya cuno cumaneeca masejon-aatani, mariyata cuno sesa miijiacatani? ¿Casaara cuno pojoritia na ratuyajaaniuhujaj?

¹⁷ Jesuuri cuno pueya sequesano tojirii. Nojori sequeree miriquiri:

—Jiyotuucaari maja na paniniu naarajona. Cante cusosuni, cuno cutaraari naarajona paniya. Majaari cua niniu quiquiaari maninia miijiacaacua. Niquiaari cutaranijia nia sequesano sesa miijiaca cua jiyanooniuria sesa nojori miijiosanojiniji.

Pueya nequesotasacari Jesu, casaara na pueya miaquenu carteyaquiyaani, nojori shuquiritiniuria Pueyaso

(Mt 9.14-17; Lc 5.33-39)

¹⁸ Tamacari, Tiuquinijiona Juan tojtiajaca, mariyata Fariseocuaca miaqueyaquishacari, tamasaca pueyari Jesuucua nijioquiaari. Na sequetuseeri:

—¿Casaara quia saquiriojosano pueya carteyaquiya miaquenu quenaajani? Tiuquinijiona Juan pueya cutaraari miaajecoquiaa Pueyaso nojori shuquiritiniuria. Fariseocuacaari naa miiquiaajuhujaj. ¿Casaara naa quia pueya miyaquiyajaaniuhujaj?

¹⁹ Jesuuri nojori riucuaaree miriqui:

—¿Masuusano pueyateeri miaajenutaniya nojori jaara queranacusaqui quiya, pueyano camishacari maaji? Camiriquiano pueyano jaara nojoritia quiyajaa, maja na naata nojori miaajenu, shuquiriaatia nojori quishacari. ²⁰ Tamacari cutara, cuno camiriquiano pueyanoori nojori tajiniji rishaanutaniya. Cua pueyari jiyacari miaqueyaquiniutianiya cutara.

²¹ 'Seetanujuanaa nia sequeya cutaraniija, toque mocua cuhuocoori maja na naata cushipirijiosaanu quiariqui toquerauta. Jaara jeequesaare, quiarinio toquerauri posequeja. Naacujitij, toque mocua cuhuocoori socua queraaquetaaree. ²² Naajuhuaaj, quiariniaacu uva caacaari maja na naata racatasaanu shoque tariucuacojinia. Quiariniaacu uva caaca jaara jerema, shoque tariucuaco pojuaretaari. Naacujitij, paari najuhuaana niitiaa uva caacani, shoqueno. Cunora, maninia cutaraari quiariniaacu uva caaca shuujionu shoque quiariquiojinia, maja vino niitiasaanura najuhuanaj, shoqueno.

Jesuuri naa pohuataquiaaritij, pueya na niishitiojonura quiarinio na niishitiojosanoori maja na naata cojitishaanu tariucuacaanu niishitiojosanota.

Jesu pueya carojotasacari trigo samaatenu juuca
(Mt 12.1-8; Lc 6.1-5)

²³ Jesuuri samaatenu juuca quiojoquiaari cuhuariquiajiniaaco na saquiriojosano pueyata. Na pueyari jiyacari trigo carojotanu coteequiaari na miaajenuta. ²⁴ Fariseocuaca jaara na niqiuquiaari, Jesu sequetureeri:

—¡Quia niqiri! ¿Casaara quia saquiriojosano pueya poonijiya samaatenu juucani? ¡Pueyaso Rupaajinia, paari piriyojoshiyacujani maja samaatenu juuca pa poonijionura!

²⁵ Jesuuri nojori sequere:

—¿Majateeri nia serojonu quiquiaari Pueyaso Rupaajinia pa supuetanaa jiyaniija David miishanojiniji, nojuaja jaara miaajequiaari na cojiniaata, nojori jiitiaaquishacari na coseyaca? ²⁶ Cuno quishacari, supuetana Abiatar pueyacuara secojonaa jiyaniija quiquiaari. Davidri tiuquiquiaari Pueyaso Secojoua tiajinia. Nojuajaari Pueyasora niqitiosano panjiniji saquiaari. Cuno panri saaja Pueyaso Secojoua tia cojuanaa sasocoriquiano quiquiaari. Naajaa, Davidri na saquiaari. Na necasequiaariijaariuhua nata quiniaa pueyara.

²⁷ Jesuuri nojori sequequiaarijuhuaj:

—Pueyasoori samaatenu juuca shipiniquiaari pueyara. Maja cutaraari Pueyaso shipiniinu quiquiaari pueya, samaatenu juucara. ²⁸ Naaratej, pueyano cua quishacari mijiria, janiyari cumaacaraca cua Quejinijini cua sequenura casaa pa miiniutianiya samaatenu juucani. Janiyacuajaari samaatenu juuca camarnuni.

3

Jesu jeeacasacari pueyano juaashiquia cuseetucjuara joojequetano
(Mt 12.9-14; Lc 6.6-11)

¹ Jesuuri Pueyaso secojojua tiajinia tiuquiquiaariuhua na saquiriojosano pueyata. Tii quiriquiaari pueyano, cuseetucjuara joojequetano juaashiquiaraca. ² Cuniqiu quiniaa Fariseocuacaari shanacutariquiaa

na niquniuria taa Jesu miiniutianiyanoj. Nojoriiri tama sequetooree-
jaaja:

—¿Jesuteeri sesarucjua pueyano juaashiquia jeeccanutaniya
samaatenu juucani?

Nojoriiri Jesuucara saquiriojotanu paniriquiaa, nojuaja jaara
samaatenu juuca poonijiore. ³ Jesuuri jiyacari sesarucjua pueyano
sequeree:

—Quia sanere. Niya quia nujuasee canaa tajinia pueya niquiara.

⁴ Na nuhuaji, Jesuuri pueya nequesotaree:

—¿Casaate samaatenu juuca miishiyani? ¿Paate maninia miyani, paate
sesa miya soj? ¿Pueyanote naatanishiya, moshijajanaa soj?

Nojoriiri sanaa niqutiariquiaa saaja, Jesu sequesacari naatej.
⁵ Jesuuri na shocuaqueya nujuatiuyano pueya niqunijioree na
juaaniutia. Nojoriicua taraajeriquiaajaariuhuj, cumajiuujiaaca nojori
quiniuucua. Majaari nojori niishiniu paniniu quiquiaari taa Pueyaso
paniya pueyacua taraajeja pa quiniuriani. Jesuuri sesarucjua pueyano
sequeree:

—¡Quia juaashiquia quia shiitiore!

Na juaashiquia shiitioreeri. ¡Jiyacaritij, na juaashiquiaari ritia jee-
quequee! ⁶ Fariseocuaca niquishacari naa Jesu miishanotej, nojoriiri
tohareetaquee na juaaniutia. Nojoriiri Herodes panijiaa pueyata
pocoojoquiaari ritia, taa nojori monutaniya Jesuni.

Queraatia pueya rerequeejosacari caminia casaqueyaji

⁷ Na nuhuaji, Jesuuri quiojoquiaari caminiajinia na saquiriojosano
pueyata. Queraatia pueyari na nuhuajiquiaarijuhua Galilea jiyajiniji.

⁸ Pueya niishishacari puetunu Jesu maninia miishanojinijianaa na
cumaacata, queraatia pueyari nocua nijioquiaari na niquniuria. No-
joriiri nocua nijioquiaari puetunu jiyacajinijiniojuanaa: Judea jiyajini-
jino pueya, Jerusalén tiacajinijinio pueyajuhuj, Idumea jiyajinijinio
pueyano. Nijioquiaarijuhua Jordán moo taquijirajiniji pananu
muetasamaji pueya, Tiro tiacajinijinio pueyano. Sidón tiacajinijinio
pueyari nijioquiaarijuhua na niquniuria Jesu. ⁹ Nocuaji Jesuuri na
saquiriojosano pueya sequequiaari:

—Niocua juhuacarijia bote cojuare quiria, cua tacajara pueyacuai,
maja pueya tanuujunura janiya.

¹⁰ Jesuuri jiyacari jiyanohua queraatia pueya naatanijioriquiaa.
Nocuaji cusosuhuari Jesuucua riutioconeetariquiaa na quianura Jesu,
nojori cusonujiniji nojori naataconuhua.

¹¹ Samaruharaca pueya jaara Jesu niqutiuquiaari, nojoriiri nocuara
mojoquetacoquiaari. Naa nacatuquiaariiri:

—¡Quiaacuajaari Pueyaso Niyanu!

¹² Nocuaji Jesuuri nojori sequequiaari na juaaniutia, maja nojori
sequenura pueya niquiara cante nojuajani.

*Jesu saquiriojosacari doce pueya na pueyajinijinio, na rupaa pohu-
atariquiano*

(Mt 10.1-4; Lc 6.12-16)

¹³ Na nuhuaji, Jesuuri tacaquiaari tuhananuucua. Nojuajaari tiji
sequequiaari cana na paniquiaaricujani. Nocua nijioquiaariiri na
jiyaniquishano pueya. ¹⁴ Jesuuri doce pueya saquiriojoquiaari nata
nojori quiniuria. Nojori jiyatereeri na jiyaramiquishocoriquiano,

Pueyaso rupaa nojori pohuatanura. ¹⁵ Nojori niqutioree na cumaacaari, cusosuhua nojori naatanijionura, samaruhua nojori tohuatejonurajuhua. ¹⁶ Nioori na saquiriojosano doce pueya sesaca: Simón, Jesuuri na sesojoquiaari Pedro; Santiago, tarajanu Juannio. ¹⁷ Jesuuri nojori sesojoquiaari “Boanerges”. Naa sequenu paniyari nio, “Ritia juaajia, juhua miacana”. Nojoriiri Zebedeo niquiohua quiquiaari. ¹⁸ Socua quiquiaariiri Andrés, Felipe, Bartolomé, Mateo, Tomás, Santiagonio. Nojuajaari Alfeo niyanu quiquiaari. Socua quiquiaari Tadeo, Simónnio. Nojuajaari Romano pueya jatanu panijiaca pueya maanujinjinio quiquiaari. ¹⁹ Quiquiaarijiaariuhua Judas Iscariote, Jesu quiatequiaari mosocoriqianoni.

Judiocuaca camarucua sapojosacari, Jesu samaruhua cumaaca jiitiaa (Mt 12.22-32; Lc 11.14-23; 12.10)

²⁰ Na nuhuaji, Jesuuri na saquiriojosano pueyata tamonu tiajinia tiuquitiaquiaari tamonu tiacajinia. Queraatia pueyari tiuquitiaquiaarijuhua cuno tiajinia Jesuucua. Naacuajitij, majaari nojori naata miacquenu quiquiaari. ²¹ Jesu tapueyocuaca jaara niishiquiaari naa nocuajitij, nojoriiri nocua nijioquiaari na riniuucua juucua. Tama sequeutoriquiaajaarijia:

—Jesuqui tari paatecara quiriijuhuanajaj!

²² Moisés Rootasanojiniji niishitiojanaa Jerusalén tiacajiniji nijiono pueyari saniniuujia naa sequetuquiaari Jesujiniji:

—Samaruhua jiyaniijia Satanáscuajaari cumaaca niqutiorucuaa cuno pueyano. Cunora, samaruhua tohuatanijiyi pueyajinijiiri.

²³ Naaratej, Jesuuri cuno pojori sequequiaari nojori na niishiriojotenura:

—Miji, niya cua tojitiasee. ¿Pueyanoteeri na naata Satanás tohuatenu pueyanojiniji tama Satanás cumaacatajaaja? Maja na naata. ²⁴ Naajuhua, mijiria jiya jiyaniijia jaara juayonuutaa tama na pueyatajaaja, nojuajaari maja na naata nujuatanu na paraa, jaara nocua nijioma. Nojuajaari shocotasaanutaniya. ²⁵ Naajaariuhua, pueyano jaara tapueyocucata juayonuutare, majaari nojori naata jatiqui quiniu nojori tiajinia. ²⁶ Niaari saniniuujia cua sequeree, janiyana Satanás cumaacata tohuatanijioquiaa samaruhuanu. Satanás jaara naa miiritij, cuno maara tari quiri na shaajasaanurajanaa.

²⁷ Naajuhua, pueyano maja na naata tiuquiniu cumueeca pueyano casamiriaca tiajinia, na casami na jaariuutianura, jaara coteenu na camaru morojiaquiri. Pueyano jaara coteenu na camaru morojorejatijia, naa cutara na naata na casami jaariuutianu.

²⁸ Seetanujanaa nia sequeya cutaranijia, pueyano sesa miishanoori na naata jiyanooshaanu. Janiyajiniji sesa na pocuasoori jiyanooshiyajuhua. ²⁹ Saniniuujia, cante sesa rimiaaqueja Pueyaso Sohuanuucarani, cuno cutaraari maja na jiyanooshaanu quniutianiya quenaaja. Jiyano pueyanotej, nojuajaari pueyaracaanu saniitiosaanutaniya.

³⁰ Jesuuri naa nojori sequequiaaritij, pueya sequesacari, nojuajana samaruraca quiija, Pueyaso Sohuanu cumaacata na tohuatejosacari samaruhua.

Jesu nucuajiniji pohuatasano, Jesu tapueyocuacajinijinio

(Mt 12.46-50; Lc 8.19-21)

³¹ Jiyacaritij, Jesu nucuuari tiuquiiijioquiaari, Jesu tapueyocuacanio. Majaari tiajiniaaco na tiuquitianu quiquiaari Jesuucua. Saaja carijini-acumaji tamonu pueyano sequetureeri na numootenura Jesu nojoricuara. ³² Jesu shocuaqueya cajitiuniaari Jesu sequeturee:

—Quia nucuana quia tapueyocuacata jati carijiniacuma nujuatiuya. Quia pajenuyaquinia.

³³ Jesuuri saaja nojori sequeree:

—¿Cante cua nucuani, cua tapueyocuacajuhua?

³⁴ Na nuhuaji, na shocuaqueya cajitiuniaa niqinijioreeri. Sequereeri:

—Nio pueyari cua nucu, cua tapueyocuacanio. ³⁵ Cante cua Que panishano miijiani, nojuaja cutaraari cua tarajanu, cua rimiatu, cua nucuanio.

4

Miriqui pohuatasano natoojouja pueyanojiniji

(Mt 13.1-9; Lc 8.4-8)

¹ Jesuuri socua Pueyaso rupaa niishitiojonu coteequiaariuhua caminia casaqueyaji. Jiyanohua queraatia pueyari rerequeejoquiaari nojori tojitianura nojuaja. Boteeri tii cuatariquiaa caminiajinia. Naacuajitij, Jesuuri botejinia tacaquiaari. Tii cajishiiri, caminia casaqueyaji rerequeejono pueya na niishitiojonura tiji. ² Cuno pueya niishitiojoreeri queraatia miriqui pohuatasanota. Na niishitiojosacari pueya, Jesuuri naa sequequiaaritij:

³ —Nia tojitiare nio sequesano. Tamonu juuca, pueyano na cuhuariquiajinia natoojonuucua quiaquiaari. ⁴ Na jacutasacari, nucuaco totequiaariiri tajaaca. Shuhuari na miojoree. Majaari na moritianu quiquiaari. ⁵ Tajaacaari totequiaari sai tajiniaqueyajuhua. Majaari cuniqui puera jiya quiniu quiquiaari na maashiniuria. Naacuajitij, najuhuana ritia moritiaquiaariiri. ⁶ Pananu jaara jaquiaari, na catijiareeri. Maja puera nujuacaraca na quishacari, ritia sorequeeri. ⁷ Tajaacaari totequiaarijuhua riyocuaca tajinia. Jiohuacacaari socua ritia maashiquiaari. Natauri tarinitiucua quiquiaari saniniuujia. Naaratej, majaari na muetunu quirii. ⁸ Tajaacaari saniniuujia totequiaari maninia jiyajinia cutara. Cuno cutaraari maninia maashiquiaari cuno jiyajinia. Senoosaareeri queraatia. Niquiriyatu jiyonajiniji carojosaaquiaariiri treinta jajau. Tanajajiniji socua sesenta jajau, naajuhua socua cien jajau tanajajiniji.

⁹ Jesuuri nojori sequeree:

—Cante numaaracani, cuara cua sequesano tojitiaara.

Casaarate miriqui pohuatasanoni

(Mt 13.10-17; Lc 8.9-10)

¹⁰ Na nuhuaji, Jesu quishacari tamajaaja, na saquiriojosano doce pueyari na nequesotaquiaari, tamasaca pueyanio. Cuno pojoricujaari Jesu shuriucua quiriquiaa. Nojoriiri Jesu sequeree:

—¿Casaa miriqui quia pohuatasano sequenu paniyani?

¹¹ Jesuuri nojori sequeree:

—Pueyasoori nia niishitiojiya jiyasohua na miiniu panishano, taa na muerasu na jitianutaniya pueyaracaanu cutarani. Tamasacara

saniniuujia, canapuate Pueyaso ruuretjacani, nojoririaari miriqui pohuatashiyacujua. ¹² Naacujitij, nojoriiri cua cumaacata cua miishano niqutiiquiaa pueyaracaanu najuhuanaj. Majaari nojori niishiniu na niquishano. Naajuhuj, nojori jaara Pueyaso Rupaa tojitiare, majaari na niishiniu na tojishano. Nojori jaara niishiri, nojori mariqui noojia tacatorohuari sesa nojori miishanojiniji nojori jiyanooshaanura.

Jesu niishitiojosacari miriqui na pohuatasano natoojonajiniji
(Mt 13.18-23; Lc 8.11-15)

¹³ Jesuuri nojori sequequiaarijuhuaj:

—¿Majateeri nia niishiniu miriqui cua pohuatasano? ¿Niaatucua taa niishiriquia socua tamonu cua pohuatasanoni? ¹⁴ Cua pohuatasano cuhuariquiajinia natoojonajinijini, nojuajaari juhua Pueyaso Rupaa pohuatana. ¹⁵ Noojiaqueya pueyari juhua nucuaco toteno jajau. Najuhua Pueyaso Rupaa tojiyari. Na tojiniu nuhuaji, Satanásri nimiaa. Nojuajaari puetunu Pueyaso Rupaajanaa noojiajinia natasano jaariutiaquiaa. ¹⁶ Tamasaca pueyari juhua noo jajau saniniuujia, sai tajiniaqueya jacutasanotej. Nojori jaara Pueyaso Rupaa tojiri, jiyanohua na timitiaari. ¹⁷ Cunoori juhua secaja nujuacaraca moritiano jajau, sai tajinia na moritianuucua. Majaari na rishiniu. Naajuhuj, cuno pueya jaara saniniujiushaare taraatia, jaara naquiya miishaarejuhuaj Pueyaso Rupaa tojijia nojori quiniuucua, nojoriiri ritia Pueyasocua tiuuniu tarinitiaja. ¹⁸ Noojiaqueya pueyari juhua noo jajau, jiohuacaca tajiniaqueya jacutasanotej. Pueyaso Rupaa tojiyari. ¹⁹ Na nuhuaji, nojoriiri puera niishiriojiya taa nojori quiniutianiya maninia mijiriani. Nojoriiri sapojosaaquiaa puera na shuquiritiasacari mijiria casami. Nio jiya casamiicua jiaatiaquiaajaariuhuj. Puetunu cunorajanaa, nojoriiri Pueyaso rupaa tojitiaquiaa na numaa shama. Naacujitij, nojoriiri juhua muetuhuo quiya. ²⁰ Noojiaqueya pueya saniniuujia, nojori cutaraari maninia tojitiaja Pueyaso Rupaa. Cuno pueyari juhua cuhuariquiajinia natau, queraatia muetujua, maninia jiyajinia natasano. Cuno maninia nataujinijinioni, noojiaqueyari maja puera na muetunu. Tarajanuuri maninia muetuna. Naajuhuj, tarajanuuri jiyanohua queraatia muetujua. Naajuhuj, cante Pueyaso Rupaa tojijia cutarani, nojuajaari juhua maninia muetujua natau.

Pueyaso muerasuuri juhua samari
(Lc 8.16-18)

²¹ Jesuuri nojori sequereejuhuj:

—¿Samaritiutiiri noshitishano, conatu cariquiaco jamotasocoriquiano, maquetu cariquiacojuhuaj? Maja. Samaritiu jaara noshitishaare, morijiuucua morotashiyari, tiajiniaaco na cuhuatanura maninia. ²² Naajuhuj, jiyasohua nia miishanoori puetunujuanaa niishishaanutaniya. Cua pohuatasanoori juhua samaritiu, puetunu pueya jiuujiaajanaa na cuhuatanura. Naajuhuj, Pueyaso Rupaa jaara nioojiajinia jamosaare, juhua muetunutaniyari puetunu pueya niquishocoriquianojuanaa. ²³ Niajaniya, canapuate numaa jiitiaani, nia tojitiare cua pohuatasano.

²⁴ Jesuuri naa nojori sequequiaarijuhuaj:

—Nia niishiri nia tojjishano. Nia shanacutajataja, teyanota nia shanacujuquiaa nia niquitiosocoriquianocujani, Pueyasoori cunotaja niaara shanacunutaniyajuhuj. Naacujitij, niaa jaara capora quiriquia tamasacata, Pueyasoori socua capora quiniutianiya niaarajuhuj. ²⁵ Cante na rupaa tojjiani, socua na niishitiojonutaniyari. Saniniuujia, canapue te na rupaa tojtiaaquiyani, secaja na niishishanoori puetunu jaariutiasaanutaniyajanaa.

Miriqui pohuatasano natau moritianojiniji

²⁶ Jesuuri nojori sequequiaarijuhuaj:

—Nia niishitiojonu saniriiria taa Pueyaso muerasu supuequiaani, Pueyaso jittiasano nojori quiniuria. Tamonu pueyanoori na cuhuariquiajinia nataquiaari jajau. Na nuhuaji, majaari na tacatenu quiquiaariuhua pueyaracaanu na natasano na niquiniuria. ²⁷ Cuno pueyanoori na natanu nuhuaji camueenujuquiaari. Cuno jajauri moritiaquiaari juuca, niucuanio. Maashiquiaariiri na camaru maquesacari, na niquishacarijuhuaj. Tamonu juuca, na camaru tacatesacariuhua na natasano na niquiniuria, tariucua puereetuucari quiquiaari. Majaari na camaru niishiniu quiquiaari taa na moritiareeni. ²⁸ Jiyari tamajaaja moritianijia natau. Coteenu moritiaari na jiyona. Na nuhuaji, na jajau coori supueya. Na nuhuaji, na jajauri querasapijiaacara quimiaa na noshiniuria. ²⁹ Na natau jaara noshimia, na senoonaari na senoojua na racatasocoriquiano. Pueyaso muerasuuri naa miishaanutaniyajuhuj.

Miriqui pohuatasano mostaza jajaujiniji

(Mt 13.31-32; Lc 13.18-19)

³⁰ Jesuuri socua sequequiaari:

—¿Juhua casaa niquishanote Pueyaso cumaacani? ¿Casaatate pa naata na saniniuuniuni, taa Pueyaso Rupaa poonijia pueya jiuujiajiniani? Quiarijia nia pohuatareeraj. ³¹ Pueyaso Rupaari pueya jiuujiajinia quia juhua mostaza jajau. Mostaza jajauri jiyanojua socua shiitianiyojua puetunu tamasaca jajaujinijianaa, majaari puera maatia na niquishaanu. Pueyaso Rupaari naajuhua pueya jiuujiajinia, nocua nojori tiuushacari. ³² Mostaza jajau jaara natsaare, maashiyari socua puereetucara tamasaca nataujiniji. Na cashacucuaari maashiya puereetucucara. Shuhuari na cashacucua cariquiaco nujuatujua shinishiqui.

Pueyaso Rupaari pueyano jiuujiajinia naa cumaacaracajuhuj, na jataniniuria na tojjia, maninia miijia na quiniuria.

Jesu niishitiojosacari pueya saa na miriqui pohuatasannotaja

(Mt 13.34-35)

³³ Jesuuri naa queraatia miriqui pohuatasannota niishitiojoquiaari Pueyaso rupaa saaja pueya niishishano casaata. Majaari socua jiyajeneta casaa na pohuatanu quiquiaari. ³⁴ Naacujitij, nojuaja jaara casaa niishitiojonu paniquiaari pueya niquiara, nojuajaari puetunujuanaa naa niishitiojoquiaari miriqui na pohuatasannota. Tamajaaja nojori quishacari saniniuujia, Jesuuri na saquiriojosano pueya niishitiojoquiaari maatia, casaa miriqui na pohuatasano sequenu paniriquiaani.

Jesu pueyajetesacari paratu, mohuaca cajiniuucuanunio

(Mt 8.23-27; Lc 8.22-25)

³⁵ Cuno juuca jaara niniquiaari, Jesuuri na saquiriojosano pueya sequequiaari:

—Caminia taquijiria pa quiaare.

³⁶ Cuniqijia pueya tiujiatiuyareeri, nojori quianura caminia taquijiria. Na pueyari Jesuta quiojiyaree cuno botejiniaja, tee nojuaja quiriquiaacuajani. Jesu quiasacari caminia taquijiria, tamasa boteeri nata jaatequetariquiaajuhuj. ³⁷ Maja puera na quenaacoyaquishacarijia, maruuri paratuta canashiyaquiji jiyanojua niquiaari nojoriicua nojori niuutiasacari. Paratuuri jiyanojua cajiniuucuatequiaari mohuaca nojori botejiniaacumara. Nocuaji na boteeri tari quera tiuquitiariquiaa mohuacata. ³⁸ Jesuuri jiyacari bote pajamaji maqueriquiaa juhuajaniya. Na nacaacuaji mataja caco maqueriquiaari. Na pueya niucujatusacari nojuaja, Jesu sequetureeri:

—¡Niishitiojonanaa!, ¿majateeri quia puerenuujua paa tari tiuquitiaareeni?

³⁹ Jesuuri sanemaa. Paratu sequereeri, caminiano:

—¡Quia suraajere! ¡Tariucujaj!

Paratuuri tajimiohua. Caminiaari pootia maquee. ⁴⁰ Jesuuri na saquiriojosano pueya sequeree:

—¿Casaara nia puereya puerani? ¿Niaateeri Pueyasocua tiuyashijiaca quiyajaaruhuaj?

⁴¹ Nojoriiri jiyanojua shiriiquitiurii. Tama nojoriijaarijia seque-tooquiaari:

—¿Cantejaaranojoni? ¡Paratu, caminiaari na tojirii!

5

*Gerasa jiyajinijinio samaruhuaraca pueyanojiniji pohuatasano
(Mt 8.28-34; Lc 8.26-39)*

¹ Na nuhuaji, nojoriiri caminia taquijiria tiuquijioquiaari, Gerasa jiyajinia. ² Jesu tacasacari botejiniji, nocua niquiaariiri tamonu pueyano raacajiniji, macunucua nucuhoa paaquiosaquiji. Cuno pueyanoori samaruraca quiquiaari. ³ Raacajinia quijia quiquiaariiri. Majaari na naata moronu quishaquiaari quenaaja cumayocua shipinishano casaata. ⁴ Pueyari juucua na morojouja, na cashacucua, na juaashiquiacanio. Saaja na turojotajaari. Majaari quenaaja na nujuataja pueyano quiniu quijia. ⁵ Pueyaraaanu tuhuananuhuacua rucuanajoquiaariiri, raacajiniano. Na rucuanajosacari sariyacojuaari, juuca, niucuanio. Tama na cuaqueyajaaja piquijia saitiaari. ⁶ Nojuaja jaara Jesu niquiquiaari tucuaaanuji, nocua netequiaariiri. Jesu cariquimiaji mojoquetaseeri. ⁷ Jesuucuaa nacareeri:

—¿Casaacua miji quia niyani, Jesunaa, jiyocuacaanu Quijia Pueyaso Niyanunaa? ¡Quia secojiyanijia maja naquiya quia miiniuria janiya!

⁸ Samaruhuaraca pueyanoori naa sequeree Jesutej, tari Jesu sequenuucua samaru nojuajiniji na tohuatanura.

⁹ Jesuuri na nequesotaree:

—¿Taa sesanaacatequia?

Na riucuaereeri:

—Canaa jiyanojua queraatiani, cunora cua sesa “Queraatia”.

¹⁰ Cuno samaruuri jiyano hua Jesu secojoriquiaa maja nojori na taanu-unura cuno jiyajiniji. ¹¹ Cushiyari jiyacari cateca naataja miaquenu-uriquiaa tuhuananucari. Jiyano hua queraatia cushiyari quiriquiaa. ¹² Samaruhuari Jesu secojoree naatej:

—¡Canaa quia jyarore canaa tiuquitianura cuno cushiyacua!

¹³ Jesuuri samaruhua jyaroree. Samaruhuari pueyanojiniji tohua-reetaquee. Cushiyacua tiuquitiaseeri. Dos mil cushiya naasucuaari quiriquiaa. Cuno cushiyari cocuatequiaari, samaruhuaraca nojori quiniuucua. Tacojiniji totesee caminiajiniaari. Puetunujuanaari tii shushiniuquiaari.

¹⁴ Cushiya cojuanaari jiyacari netecuaturuhua na shiriiquiniutia. Na tiacajinia pueya poojotanuusuhua nojori niquishanoori, cuhuariquia-cajinia quiniaa pueyano. Nocuaji pueyari nijioquiaari nojori niquini-uria casaate quiquiaarini. ¹⁵ Cuno pueya jaara tiuquiiijioquiaari Jesu quishaqui, cuno tarijia samaruhuaraca quijia pueyano niquitiushiiri panaatia cajiyano, toqueraca. Naa nojori niquishacari nojuajatej, pueyari pueretuquiaari. ¹⁶ Jesu miishano niquitiuniiaari cuno pueya pohuataquiaari taa samaruhuaraca pueyano miishaareni, mariy-ata cushiyajinijinio. ¹⁷ Cunora, cuno pueyari Jesu secooteree na quianuhua cuniquiji, nojori jiyajiniji.

¹⁸ Jesu jaara tacaquiaariuhua na botejina, cuno tarijia samaruhuaraca quijia pueyanoori nata quianu paniquiaari juucua. ¹⁹ Majaari Jesu paniniu quiquiaari. Na sequeree saajaari:

—Quia quiaarohua quia tijinia quia pueyacua. Quia pohuatasuhua nojori taa Pueyaso miirii quiajaniani, quiocua na taraajenuucua.

²⁰ Pueyanoori quiaarohua. Nojuajaari pohuatanu coteequiaari cuno na jiya diez tiacajinia taa Jesu miiquiaari maninia nojuajani. Puetunu pueyajanaari jiuujiatequiaari nojori tojishacari nojuaja. Cuno diez tiaca sesa quiquiaari “Decápolis”.

Jairo niyatujiniji pohuatasano, Jesu toque quiana maajijinijiuhuaj
(Mt 9.18-26; Lc 8.40-56)

²¹ Jesu jaara niuutiaquiaariuhua botejina caminia taquijiriohua, queraatia pueyari nocua tiuquiiijioquiaari na quishaqui. ²² Jesu quishacarijia caminia casaqueyaji, nocua tiuquiquiaariiri tamonu pueyano, Pueyaso secojowa tia jiyaniijia. Na sesa quiquiaari Jairo. Jaara Jesu niquiquiaari, na cariquimiaaji mojuquetaseeri. ²³ Naa Jesu secojoree jiyano huari:

—¡Quiyatu quera cusoya! ¡Miji, quia juaashiquia nocua quia niaquee na naatanuhua!

²⁴ Jesuuri jiyacari nata quiaaree, na saquirojosano pueyano. Puera jiyano hua queraatia pueyari na nuhuajiriquiaa. Jesu tanuujuturiquiaari. ²⁵ Cuno pueya tajinia quiriquiaaariuhua tamonu cusosu maaji. Doce marijiaari tari na shoconujuquiaari pueyaracaanu na naatesacari. ²⁶ Queraatia naarajonaari nareja naquiya na miiquiaari. Socua na jiyacatojoquiaari saajaari. Najuhuaana na cumaneeca puecaquiaariiri na naarajosaanura juucua. ²⁷ Cuno maaji jaara Jesujiniji tojiquiaari, na ninijini na nuhuajiquiaari jiyasohuari. Na tucuaque toque quiaasee pueya tajiniaari. ²⁸ Cuno maajiiri tama sequequiaarijiaaja: “Janiya jaara quenaaja na toque quiaareni, janiyari naatanuhuaani”. ²⁹ Naacuajitij, na quiasacari Jesu toque, na nanacaari ritia curetaquee.

Jiyacari na niishiquiri. Tama sequequiaarijaarija: “¡Cua cusonu tari tajiyatema!”³⁰ Jesuuri jiyacari niishiquiri nojuaja na cumaacata cusosu naatanirii. Cunora, nojuajaari tacareecuaree na niquiniuria pueya. Pueya nequesotareeri:

—¿Cante cua toque quiareeni?

³¹ Na saquiriojosano pueyari na sequere:

—Quiaacuaajaari queraatia pueya niquiya quia tanuujiano. Quiaari najuhuana nequesotaariquiohua saajuhuj: “¿Cante cua quiareeni?”

³² Jesuuri saaja na shocuaqueya niquinijioriquiaa, na niquiniuria cante na toque quiareeni. ³³ Maajiiri jiyacari tetecariquiaa na puerenuta. Jesu cariquimiaaji mojuquetasee ritiaari. Nojuajaari niishiquiaari Jesu cumaca na naataniriohua. Cunora, Jesu sequere puetunu seetanujanaari. ³⁴ Na nuhuaji, Jesuuri na sequere:

—Sanaunaa, cucua quia tiuuniucua, quiaacuaaja tari quia cusonujiniji naatarohua. Juhujaniya quia quiaarohua. Quia cusonucuaaja tari tajiyatemohua quiocuaaji.

³⁵ Jesuuri cuno maajiicua pocuariquiaajaa pueya tiuquijiosacari Jairo tiajiniji. Cuno pojoriiri maaji samiriu que sequetusee:

—¡Quia niyatu tari cusoquee! Maja najuhuana Niishitiojona riniu quia tiajiniaara.

³⁶ Jesuuri nojori sequesano tojirii. Naaratej, maaji samiriu que sequereeri:

—¡Maja puerenu! ¡Cucua quia tiuuri saaja!

³⁷ Majaari Jesu paniniu quiquiaari tamasaca quiojonura nata. Saaja nata quiojoquiaari cutaraari Pedro, Santiago, Santiago tarajanu Juanio. ³⁸ Nojori jaara tiuquijioquiaari Jairo tiajinia, pueya niquishii nujuquetiuyanoori, sariyocuatiuyanonio. ³⁹ Jesu jaara tiajiniaaco tiuquiquiaari, cuno pojori sequereeri:

—¿Casaara puera nia cojuatuneyani? ¿Casaara naa nia nujuqueyani? Maaji samiriu maja macu. Nareja maqueyano.

⁴⁰ Pueyari saaja Jesu saroojotaquiaari nojuaja na rerequetenuta, naa nojori na sequenucuatej. Jesuuri cunora nojori tohuatanijioree tiajiniaacoji. Jesuuri macuucua sohuacamara tiuquinitiaquiaari Jairo necocuta, tama na pueyajaajanio, cuniqui tii nata quituriquiaani. ⁴¹ Macu juaashiquiajiniji quiaseeri. Na sequereeri:

—Talita, cumi.

Nioori pueyano rupaajinia sequeya: “¡Maaji samiriuniaa, quia sequeyanijia, quia sanere!”

⁴² Jiyacaritij, maaji samiriuri ritia saneequee. Juhucatecara rucuanereeri. Doce marijaari tari cuno maaji samiriu shocojoquiaari na queyata na quishacari. Pueya niquishacari naa Jesu miishanotej, nojoriiri jiyanohua jiuujiatequiaari. ⁴³ Jesuuri jiyanohua nojori rootaree maja nojori puhatanura pueya niquiara na miishano. Saaja sequere cutaraari maaji samiriu cuara mianuutesaaria.

6

Jesu quishacari Nazaret tiacajinia
(Mt 13.53-58; Lc 4.16-30)

¹ Jesuuri cuniquiji quiaquiaariuhua tama na jiyajiniohuajaaja. Na saquiriojosano pueyari nata quiojoquiaarijuhuaj. ² Jaara quiquiaari

samaatenu juuca, Jesuuri tii niishitiojonu coteeqiaari Pueyaso secojua tiajinia. Queraatia pueyari na tojitiariquiaa. Nojoriiri jiuujiatequiaari. Tamajaaja sequetooquiaariiri:

—¿Tee nio pueyano niishitiojosaquiaari puetunu niojuanaani? ¿Teje na masecanu puetunu na niishishanojuanaani, cuno cumaacanio, jiya-jeneta miishano na miiniuriani? ³Nojuacuajaari suruhuatujiniji casaa shipinijiona tiajiniaacora, niya pa tiacajiniani. Nojuajaari pa tiacajinia quinia María niyanu. Niya quiyajaariuhua na tapueyocuaca: Santiago, José, Judas, Simónnio. Na rimiatuhuari niya quiyajuhuj pa tiacajiniani.

Cunora, majaari nojori tojitianu paniniu quiquiaari Jesu. ⁴Naaratej, Jesuuri nojori sequeree:

—Pueyari tiquiyocua Pueyaso sequenu panishano caminiujiunia tojiniu paniquiaa cutara. Saaja tama na tiacajinijinio pueya cutaraari maja na tojitiuniu paniniu, na jiyasojinijinio supueno pueyajuhuj, tama na tiajinia quiniaajaajanio.

⁵Naacuajitij, nocua nojori tiuyaquiniucua, majaari na naata na cumaacata na miiniu quiquiaari. Saaja secaja cusosuhuacua niojoquiaari na juaashiquiaari, nojori na naatanijionura. ⁶Jesuuri jiuujiatequiaari nojori tiuyaquishacari nocua. Na nuhuaji, Jesuuri rucuanajoquiaari pueya na niishitiojonura, queraatia shiitianiyojua tiacajinia catecaja na tiaca shocua.

Jesu jiyaramiquishacari na saquiriojosano pueya Pueyaso rupaa pohuatanura

(Mt 10.5-15; Lc 9.1-6)

⁷Na nuhuaji, Jesuuri na saquiriojosano doce pueya sequequiaari nocua nojori niniuria. Nojori jiyaramiquiniu coteereeri, nojori quiojonura caapiqui, caapiqui, Pueyaso rupaa nojori pohuatanura. Nojori niqutioree na cumaacaari samaruhua nojori tohuatanijionura pueyajiniji. ⁸Nojori sequereeri maja nojori panura nojori panishano, saaja nojori miojotu cutara. Nojori sequereajaariuhuj, maja nojori panura caashoque, coseyaca, cumaneecanio. ⁹Nojori sequereeri saaja nojori cushiniuria na sapatu cutara, maja socua toque nojori panura na cushishocoriquiano. ¹⁰Nojori sequereajaariuhuj:

—Niaa jaara tiuquishiiquia tamonu tiajinia, cuniquijia nia jiyojetare, niaa jaara cuniquiji quiaarejaatijia. ¹¹Pueya jaara nia tiuquinitianu paniyaquiri na tiajinia, nia pohuatasano nojori tojiniu paniyaquishacarijiuhuj, niocua cuniquiji quiaare. Niocua nia niohuacaacujaji jiya joooca piitiare nojori niqiuara, nojori niishiniuria Pueyasoori nojori saniitionutaniya, na rupaa tojiyashijianucua nojori quiniuucua.

¹²Na nuhuaji, Jesu jiyaramiquishano pueyari quiojoquiaari. Nojoriiri Pueyaso rupaa pohuatanuquiaari pueya tacatonuhuara nojori jiuujia Pueyasoocua. ¹³Nojoriiri queraatia samaruhua tohuatanijioquiaari. Naajuhuj, nojoriiri cusosuhuacua tarooquiaari naana jajau shiyocua, nojori naatanijosacari queraatia pueya.

Tiuquinijiona Juan mosacari

(Mt 14.1-12; Lc 9.7-9)

¹⁴Jesu miishanojinijiri caminiujiushaaquiaari puetunu cuno jiyajinijiana. Naacuajitij, Galilea jiya jiyaniijia Herodesri Jesujiniji pohuataaaquiaarijiuhuj. Herodesri cunora sequequiaari:

—¡Tiuquinijiona Juanqui samiitiarohuacuaa, cua mosano pueyanotej! Naaratej, cuno Jesuuri cuno cumaacaraca, jiyajeneta casaa na miiniuria na cumaacata. Nojuacuajaari cua mosano Juan samiitianohua.

Jiyaniijia Herodesri na jiyajenetaquiaari jiyanohua cumaacaraca Jesu quiniucua. ¹⁵ Tamasaca pueyari Jesujiniji sequequiaari tamaatia saniniuuja, nojori jiyajenesacarijiuhuj. Naa sequetuquiaariiri:

—¡Nojuacuajaari tariucuacaanu pueyara Pueyaso sequesano caminiujiunia Elías!

Tamasaca pueyari saniniuuja naa sequequiaari, nojori jiyajenesacarijiuhuj:

—Nojuacuajaari quiarijia nio pa quishacari Pueyaso sequesano caminiujiunia pajaniyara, juhua tariucuacaanu pueyara Pueyaso sequesano caminiujiuniaajuhuj.

¹⁶ Herodes jaara pueya sequesano tojiquiaari, nojuajaari saa sequequiaarijia:

—Nojuacuaja Tiuquinijiona Juan, cana cua nacataniquianucujani. Samiitiarohuacuaaquiiri.

¹⁷ Tiuquinijiona Juan moyaquishacarijia, nojuajaari Herodías rupaa-jinia nujuatesaaquiaari. Cuno maaji Herodíasni, nojuajaari Herodes tarajanu Felipe niquiocua quiquiaari coteenu. Herodesri tarajanu Felipe niquiocua jaariutiaquiaari necocuara. ¹⁸ Nocujaji, Tiuquinijiona Juanri Herodes nacasujujua. Naa na sequejaari:

—¡Pueyasora, majaari maninia quia jiitianura quia tarajanu niquiocua!

¹⁹ Cunora, cuno maaji Herodíasri maja na niqiniu paniniu quijia Tiuquinijiona Juan. Na monu panijiaari. Majaari na naata quiquiaari saaja. ²⁰ Herodesri Tiuquinijiona Juan puereja. Nojuajaari niishiquiaari Tiuquinijiona Juanri maninia pueyano, Pueyaso tojijia pueyano, maja sesa mijia. Naaratej, Herodesri maninia na cojuateja nujuatejojuajinia. Majaari na shanacunu quiquiaari sesa na miishaanura. Herodesri Tiuquinijiona Juan pohuatasano tojinu maniniucua. Nojuajaari saaja noojia niqijiteja quiquiaari. Majaari na niishiniu quijia taa na miiniutianiyani. ²¹ Saniniuuja, cuno maaji Herodíasri pueyara-caanu niishiriojoriquiaa, Tiuquinijiona Juan na motenura. Jiyacari-tij, namitia nera, Herodes rasaanu juuca quiquiaari. Cuno juuca, jiyaniijia Herodesri queraatia pueyata queranacuree. Na queranacunura, nojuajaari Galilea jiyajinijinio jiyaniijianucua masuquiaari, tama na soldadohua jiyaniijianucuaajajanio. ²² Jiyacari-tij, Herodías niyatuuri tiuquiquiaari queranacusaqui, tii na nianujunura puetunu pueya niquiarajanaa. Herodesri niyacoo nianujunu shuquiritiaquiaari jiyanohua. Nata miaquenaa pueyari jiyanohua na shuquiritiaquiaarijiuhuj. Naaratej, jiyaniijia Herodesri niyacoo sequeree:

—Cua masere quia panishano. Janiyacua quia niqitioreni.

²³ Herodesri socua puetunu pueya niquiarajanaa na sequerohuacuhuj:

—¡Seetanujanaa quia sequeyanijia, maja cua sapojonu! Janiyari quia niqutionutaniya quia masesanoni. Quiaa jaara cua masere cua jiitiasano cajiniocua, naajaa, janiyari quia niqutionutaniyani.

²⁴ Niyacoori tohuataquee na nucua Herodías na nequesotanura. Na sequeseri:

—Cua nucuanaa, ¿casaa cua masenutaniya cua quenuni?

Na nucuaari na sequere:

—¡Quia masere Tiuquinijiona Juan naca!

²⁵ Cuno niyacoori ritia tiuquiquiuhua jiyaniijia Herodes quishaqui. Na sequereeri:

—¡Quiaritia cua niquitiore Tiuquinijiona Juan naca miacojuajinia!

²⁶ Naa jiyaniijia Herodes tojishacaritij, jyanohua taraajequeeri. Naajaa, seetanujuanaa na sequenuucua na masuusano pueya niquiara, majaari tari na naata ruuretanu quiquiaari cuno niyacoo masesano.

²⁷ Naaratej, jiyaniijiaari ritia jiyaroree na soldado, Juan naca na niquitionura cuno niyacoo. ²⁸ Soldadoori quiaaree nujuatejojuajinia. Juan nacataseeri. Na naca patamohua miacojuajiniaari. Soldadoori niyacoo na niquitiosuhua. Nojuajaari na nucua na niquitiose saniniuujia.

²⁹ Tiuquinijiona Juan pueya jaara na niishiquiaari, na maanu patuquiaariiri, na jamotusocoriquiano.

Jesu mianuutesacari cinco mil pueya

(Mt 14.13-21; Lc 9.10-17; Jn 6.1-14)

³⁰ Jesu jiyaramiquishano pueyari tiuquijioquiaariuhua Jesuucua nojori rucuanenonu nuhuaji Pueyaso rupaa nojori pohuatanura. Nojoriiri Jesu pohuataquiaari puetunu nojori miitiushanojuanaa, nojori niishitijosanojininjio. ³¹ Na nuhuaji, Jesuuri nojori sequere:

—Miji, pueya quiaquishaqui pa quiaare tamaqui, tii pa samaatenura rupaquijia quenaaja.

Jyanohua queraatia pueyari pueyaracaanu nojoriicua nijioriquiaa. Tamasacaari quiojoriquiiohuacuaa. Tamasacaari saniniuujia shusha tiuquijioriquiaacujua. Naaratej, majaari jeya nojori quiniu quiquiaari na miaquenura quenaaja. ³² Jiyacaritij, Jesuuri saaja na jiyaramiquishano pueyata quiaquiaari botejinia, pueya quiaquishaqui. ³³ Queraatia pueyari saaja nojori niquitiurii quiaano. Cuno pojoriiri Jesu niishitiuquiaari. Naaratej, puetunu caminia shuriuquico tiacajinijijianaa pueyari netecuatuquiaari. Nojoriiri Jesuucujia cutesee. ³⁴ Jesu rosesacari botejiniji, saaja queraatia pueya niquiriiri. Nojori na niquishacari, cuno pojoriicua taraajequiaariiri. Nojoriiri juhua cojuanaaju borregohua quiriquiaa. Naaratej, Jesuuri nojori niishitijonon coteeree queraatia casaa Pueyasojiniji. ³⁵ Jaara quiquiaari tari tenacari, na saquirijosano pueyari nocua nijioquiaari. Na sequetuseeri:

—Tari tenacari. Paa tiajiaqui quiyani. ³⁶ Pueya quia sequere, nojori cuara quiojora cateca naataja tiacajinia, na miaquesocoriquiano nojori masenura tii.

³⁷ Jesuuri nojori riucuaaree saaja:

—Niaa mariqui nojori miaquetereja saniya.

Nojoriiri na sequere:

—¿Quiaateeri paniya queraatia pan masenuucua canaa quianura puetunu cuno pojoririjanaa? ¡Pa mianuutenura nojori, panishiyari dosciento cumaneeca! Majaari pa jitianu.

³⁸ Jesuuri nojori nequesotaree:

—¿Taa pan nia jitiaani? Nia niquishiitioj.

Nojori jaara niishiquiaari taa pante quiyani, na sequetusuhuari:

—Cinco pan quiya, caapiqui sapitiaajanio.

³⁹ Jesuuri jiyacari na pueya sequeree nojori cajitijionura pueya jiyasocujinia, na mianuutesocoriguiano. ⁴⁰ Pueyari cajitiurii cien, tamocora cincuenta, tamaqui socua cien, camiria cincuenta. Pueyari naa queraatia maapuera raquiriojotasaaree nojori mianuutesaanura. ⁴¹ Jesuuri cuno pan pataree, sapitiaajanio. Na nuhuaji, jiyocuacaanu maureeri Pueyaso na secojonura nocuara. Na nuhuaji pan neecasequiaari na saquiriojosano pueyaraari, nojori serotasocoriguiano pueya. Cuno caapiqui sapitiaaja shiquioreereejaariuhua puetunu pueyara-janaa. ⁴² Puetunu pueyajanaari maninia miaquenuuquiaari. Maninia tooquioreejaariuhuj. ⁴³ Na nuhuaji, doce canaasatuuri mishinijiosaaquiaari pan raacuata, sapitiaaja raquiquiatanio. ⁴⁴ Cinco mil pueyari cuno panjiniji miaquenuunaa quiquiaari.

Mohuaca caco Jesu rucuanenujiniji pohuatasano
(Mt 14.22-27; Jn 6.16-21)

⁴⁵ Nio nuhuaji, Jesuuri na saquiriojosano pueya tacanitiaquiaari botejini, nojori puetanura nojuaja caminia taquijiria Betsaida tiacajiniara. Jiyacarij, Jesuuri pueya sequeriquiaa nojori quiojonuhua na tiacajin-
iohua. ⁴⁶ Pueya jaara tari quiojoquiaariuhua, Jesuuri tuhananuucua tacaquiaari tii na secojonura na Que Pueyaso. ⁴⁷ Jaara niniquiaari, boteeri tari caminia jiuujiajinia jaaretariquiaa. Jesuuri juhuanojuaja na jatesaqui quiriquiaajaa. ⁴⁸ Jesuuri nojori niquiquiaari najuhua
juaarioconuyano. Majaari nojori naata jaaretanu quiriquiaa, puera paratu piyarojosacari nojoriicuaara. Quera juhuaquenu panishacari, Jesuuri nojori rupuesee. Mohuaca caco canujuriquiaari. Quera nojori tajiriquiaari. ⁴⁹ Nojori jaara na niqutiuguiaari mohuaca caco canujyano, nojoriiri na jyanitiuguiaari samaru. Nocuaji sariyocuatereeri. ⁵⁰ Puetunu nojorijianaari na niqutiurii. Shiriiqutiuriiri. Jesuuri ritia pocuaree. Nojori sequereeri:

—¿Casaara nia puereyani? ¡Nioojia nia cumaquiri! ¡Maja pueretunu! Janiyacuajanijia.

⁵¹ Botejini tacasee nojoriicuaari. Paratuuri jiyacari pueyajequee. Nojoriiri na shootiariquiaa tacuriitia, jyanohua na jiuujiatenuta. ⁵² Nojoriiri juhuanojuaja maja na niishiniu quiquiaari Jesu miishano, queraatiara na jiyatesacari pan, pueya miaquesocoriguiano. Nojori jiuujiaacari juhua ninishiqui quiquiaarijia.

Jesu naatanijosacari cusosuhua Genesaret jiyajinia
(Mt 14.34-36)

⁵³ Jesuuri na pueyata caminia niuutiaquiaari. Tiuquiijioseeri Genesaret jiyajinia. Nojoriiri tii morotasee na bote. ⁵⁴ Nojori jaara tohuareetaquiaari botejiniji, cuniquijinio pueyari ritia Jesu niishiquiaari. ⁵⁵ Pueyari jiyacari netecuatuquiaari, Jesujiniji nojori pohuatanura puetunu cuno jiyajiniajanaa. Cusosuhuari juhuacatecara patootasaaquiaari na matucuajinia tee Jesu quiriquiaa na rucuanesacari nojori jiyajiniacuajani. ⁵⁶ Tiquiyocua Jesu rucuanesacari, cusosuhuari nocuaji nojotasaquiaari nucuaco, tuhuaqui tiacajinia, queraatia shiitaniyojua tiacajiniajuhuj, cuhuariquiacajinianio. Pueyari Jesu secojoree cusosuhua na quietenura quenaaja na toque casaca. Canapuate na toque quiaquiaarini, puetunu nojorijianaari na cusonujiniji naatacoquiaariuhua.

7

*Casaate sesoriquiara pa jiyateja Pueyasorani**(Mt 15.1-20)*

¹ Jesuucua catecanoquiaariiri Fariseocuaca, Moisés Rootasanojiniji niishitiojonaanio, canapueete Jerusalén tiacajiniji nijioquiaaricuajani.

² Cuno pojori quishacari tii, nojoriiri noojiaqueya Jesu pueyajinijinio niquiquiaari shuquitioojua miaqueyano. Nojoriiri jiyanjia, nojori ru-canejosacari sesa miijiaca pueya tajinia, sesa nojori quiniu na naata nojoriicua pacunu. Nojoriiri cunora shuquitianu jitiqquiaari, nojori jiyanihacari nojori jiuujia naasucua curuushiniutianiya, shuquitioojua nojori miaquesacari. Naaratej, cuno pueyari Jesu pueya pocuanu coteequiaari.

³ Cuno Fariseocuaca, puetunu narta Judiocuacajanaanio, nojoriiri maja na cartenu quijia tariucuacaanu nojori supuetanaa niishitiojosano. Naaratej, majaari nojori miaquenu quijia shuquitioo.

⁴ Naacuajitij, nojori jaara miaquesano niquitiojosaquiji tacatequiohua, majaari nojori miaquenu shuquitioojua. Socua queraatia quiyari cuno pojori niishishano. Naacuajitij, nojoriiri jiyaniquiaa, sesa nojori quiyaquiniuucuaaji Pueyaso niquiara, nojori cuaara na ratujua jeequejoora, pataco, coshi, na maquetucuanio.

⁵ Naaratej, Fariseocuaca, Moisés Rootasanojiniji niishitiojonaanio, nojoriiri Jesu nequesotaquiaari:

—¿Casaara quia pueya tojtiaaquiya pa supuetanaa niishitiojosanoni? Nojoriiri maja na shuquitianu quiquiaa na miaquenuunura.

⁶ Jesuuri cuno pojori riucaaree:

—¡Niaari sapuenu juhua maninia pueya niquishano! ¡Niaacuajaari seetanujuanaa sesa miijiaca! Pueyaso sequesano caminiujiunia Isaíasri maninia sequequiaari niajanijajinijicuaja, naa na naajiotasacari Pueyaso sequesano:

“Nio pueyari saaja na rupaata shuquiritiaa janiya. Nojori jiuujiaari saniniuujia tucuacaanu quiya janiyajiniji. ⁷ Nojori miishano quiriani, cunoori najuhuanaj. Naa nojori miishanoni, majaari na shuquiritiniu janiya. Nojori niishitiojosanoni, cunoori tama pueya niishitiojosanojuaaja, maja cua sequesano”.

⁸ Niaari cua pueya pocuariquiaa. ¿Niajanijariuhua? ¿Casaara Pueyaso sequesano nia tojiyaquiquiaanijia? Niaacuajaari Pueyaso sequesano tojiyaquiya, tama nia supuetanaa niishishanojuaaja nia miiniuria najuhuanaj.

⁹ Jesuuri socua naa sequequiaari cuno pojoritij:

—Tama nia miiniu jitiishanoocua nia miiniurijaaja, ¡niaari Pueyaso sequesano shocortaa saaja! ¹⁰ Moisés cuajaari naa rootaquiaari: “Maninia quia miiri quia que, quia nucuano. Majaari nojori rerequetenu. Cante na que, na nucua sesacajani, cuno pueyano cuaara mosaaria”. ¹¹ Niaari sequeya saniniuujia, maniniacuaja, pueyano jaara na que, na nucua sequere: “Maja cua naata naacutanu niajaniya cua casamitia. Janiya tari Pueyasora jiyateree puetunu cua jitiiasanojuanaani”. ¹² Niaari sequequiaajuhua, pueyano jaara naa sequeretej, maniniacuaja maja na naacutanura na que, na nucuano. ¹³ Naacuajitij, niaari Pueyaso sequesano shocortaa saaja, tama nia niishishanojuaaja nia miiniuria najuhuanaj. Cuno nia niishishanocuajaari saaja nia supuetanaajiniji caminiujiushano. Niaari socua queraatia casaa miiquiaa juhua cunojuhuaj.

¹⁴ Naa na nacasunu nuhuaji cuno pojoritij, Jesuuri pueya rerejotero-hua na shocua. Nojori sequereeri:

—Cua tojitiare puetunu niajanijajanaa, maninia nia niishiniuria. ¹⁵ Casaa pa miaqueyani, Pueyasora naajaa. Cunoori maja na naata pueyano jiyatenu sesa miijiara. Poojiajinia pa niishiriojosano cutaraari sesara pa jiyateya Pueyasora. ¹⁶ Cante numaaracani, nojuaja cuaara tojitiaara cua sequesano.

¹⁷ Jesu jaara tiujiaquiaari cuno pueya, tiajiniaaco tiuquiyarohuari. Na saquiriojosano pueyari tii na nequesotaree pueya na niishitiojosano-jiniji. ¹⁸ Jesuuri nojori sequeree:

—¿Niaateeri cua sequesano niishiyaquiyajuhuj? ¿Majateeri nia niishiniu? Puetunu pa jiniacuma tiuquijiajanaani, cunoori maja na jiyatenu sesa miijiara pajaniya. ¹⁹ Pa miasanoni, majaari na tiuquiniu poojiajinia, saaja pa seecojinia mishiya cutaraari. Na nuhuaji pocoma tajiyari pa marecuhuacuma.

Nio sequesanota, pueya niishitiojoriquiaari, puetunu miaquesanojuanaari maniniacuaja pa miaquesocoriquiano. Maja cutaraari na naata na jiyatenu pajaniya juhua curuutuucara Pueyasora. ²⁰ Jesuuri sequereehujhuj:

—Pueyano niishiriojosano sesa noojiajiniani, cuno cutaraari sesara na jiyatequiaa. ²¹ Pueyano jiuujiajiniji supueya cutaraari sesa niishiriojosano, sesa na miiniuria. Naacujitij, pueyanoori na camishoo maa-jipohua numuetucujua, seya numuetucujuhujhuj. Tamonu pueyano casami nohuasejoquiaari. Pueya moquiaajaariuhuj. ²² Narta pueyano niqiuocua numuetucujuaari. Tamonu pueyano casamiicua jiaati-aquiaari. Jiyanohua sesa miiquiaari. Cuaracashijionu niishiyari. Tama na cuaqueyajaaja shuquiritiquiaari na miiniu jiiitishanota. Narta pueyano miananajoquiaari. Tamonuucuaara tonujuquiaari. Naajuhuj, saaja tama na cuaqueyajaaja shuquiritiaja quiquiaari. Juhujaniya sesa miiquiaajaariuhuj, moseca na quiniucua. ²³ Puetunu nio sesa miishanojuanaari pueya jiuujiajiniji supuequiaa. Cuno cutaraari sesa quijiaara pueya jiyateja Pueyaso niqiuara.

Taatu tiuushacari Jesuucua
(Mt 15.21-28)

²⁴ Jesuuri cuniquiji quiaaree Tiro tiaca shocua jiyajiniara. Tii tiuquishii tamonu tiajiniaari. Majaari na paniniu quiquiaari pueya niishiniuria nojajiniji, tee na quiyani. Naajaa, majaari na naata jamaaniu quiriquiaa. ²⁵ Tamonu maajiiri ritia Jesujiniji niishiquiaari. Neyatuuri samaruraca quiriquiaa. Naaratej, maajiiri Jesuucua niqiuari. Na cariquimiaji mojuquetaseeri. ²⁶ Cuno maajiiri Sirofenicia jiyajinijinio taatu quijia. Jesu secoseeri samaru na tohuataniniuria neyatujiniji. ²⁷ Jesuuri maaji sequeree miriqui:

—Quia tarintiare, muerasu cuaara coteenu miaquenuura. Majaari maninia muerasu pa jaariutianura na miaquesano, sareyacari jatasocoriquiano.

²⁸ Maajiiri Jesu riuacuaree:

—Jaa, Jiyaniijanaa. Naajaa, sareyacuaari miaqueja cariquiacoji tatucuaaja, muerasu totinijosano miaquesano shiriya.

²⁹ Jesuuri na sequeree:

—¡Quiaacuaja maninia cua riucuaaree! Quia tacateyarohua. Samaru-cuajari tari tohuataree quia niyatujiniji.

³⁰ Maaji tiuquishacariuhua na tiajiniohua, neyatu riuriasuhuari na maquetujinia mataano. Samaruuri tari tohuatano quiriquiaa nocuaji.

Jesu jeecasacari numueju, tiquia pueyano

³¹ Jesuuri tacatequiaariuhua Tiro tiaca shocua jiyajiniji. Na tacate-sacariuhua, Sidón tiaca shocojoquiaariuhuari, Decápolis jiya tiacanio. Galilea caminiajinia tiuquishuhuari. ³² Tii na quishacari, nocua jaatucusaquiaariiri numueju, tiquia pueyano. Na jaatucunaari Jesu secojo-tuquiaari na juaashiquia na nianura nocua, na jeeanura cuno pueyano.

³³ Jesuuri pueyano numueju jaatucuree tamocora pueyacuaji. Na numaama shirii na juaashiquiaari. Na nuhuaji, tama na juaashiquia-jiniaaja riocoreeri. Na riacau cojuata pocuaashijia niti quiareeri.

³⁴ Jiyacaritij, jiyocuacaanu maureeri. Noojia niareeri. Na nuhuaji, cusosu numaa sequereeri:

—¡Efata!

Nioori pueyano rupaaajinia sequeya: “¡Quia riatere!”

³⁵ Jiyacaritij, numueju numaari riatequequee. Na nitiiri jeequequee-juhuaj. Ritia pocuaquee maniniaari. ³⁶ Jesuuri cuno pojori rootaree maja nojori pohuatanura na jeecasano pueyanojiniji tamasaca niqiuara. Nojoriiri saaja tiqiyocua pohuatanuuquiaari. Naa Jesu rootasacari na naatanijosano pueyatej, maja nojori pohuatanura na miishanojiniji, nojoriiri saaja socua jiyacatequiaari pohuatanura. ³⁷ Pueyari jiyanohua jiuujiatequiaari Jesu miishano na niqutiushacari. Tama nojorijiaarijia sequetooquiaari:

—¡Puetunujuanaa miya maniniaari! Numuejunucua jiyateya tojitia-jacaraari. Tiquianucua pohuateyajaariuhuj.

8

Jesu mianuutesacari cuatro mil pueya

(Mt 15.32-39)

¹ Jiyacaritij, jiyanohua queraatia pueyari rerejoquiaari Jesu na tojitia-nura. Majaari nojori jiitianu quiquiaari casaa quenaaja na miaquetuso-coriquiano. Jesuuri na saquiriojosano pueya piirii. Nojori sequereeri:

²—Nio pueyacua taraajeyanijia. Nojori tari jiuujianaraca juuca quiya niya cuata. Majaari quenaaja nojori jiitiatunu miaquesano. ³ Janiya jaara nojori jiyaramiquiriohua na tiajinia miaqueyojuani, nucuaco cu-sojoniuyarohuacua. Noojiaqueya nojorijinijinioori niyara nijiorucuaa tucuaaanuji.

⁴ Na saquiriojosano pueyari na riucuaaree:

—¿Paatucua taa miaquetere nojori niyani, pueya quiaquishaquini?

⁵ Jesuuri nojori nequesotaree:

—¿Taa pan nia jiitiaani?

Nojoriiri na sequeree:

—Nareja siete.

⁶ Jesuuri na pueya sequeree, nojori cuaara sequeera puetunu pueya-janaa nojori cajitiuniuria. Na nuhuaji, Jesuuri cuno siete pan pataree. Pueyaso secojoree nocuaraari. Na nuhuaji, na saquiriojosano pueyara na neecasereeri. Nojoriiri saniniuujia pueya na serotaree puetunu-juanaa. ⁷ Secaja sapitiaaja jiitiatuquiaajaariuhuj. Jesuuri socua

nocuara secojorohuacuhuj. Na nuhuaji, na pueya sequereeri nojori niquitiojonura pueya. ⁸ Puetunu pueyajanaari maninia miaquenuuree. Tooquioreejaariuhuj. Miaquesano cureenota mishinijiosaquaari-iri siete canaasatu. ⁹ Na miaquenaa pueyari quiquiaari cuatro mil pueya. Na nuhuaji, Jesuuri nojori sequereeri nojori quiojonuhua. ¹⁰ Na nuhuaji, Jesuuri botejinia tacataquiaari na saquiriojosano pueyata. Quiaareeri Dalmanuta jiyajiniara.

Fariseocuaca niquiniu panishacari Jesu miishano Pueyaso cumaacata (Mt 16.1-4; Lc 12.54-56)

¹¹ Fariseocuacaari Jesuucua tiuquijiose. Nata juayonuutaseeri. Nojori saniniujiuniuria Jesu, nojoriiri na sequereeri juucua cuaara nojori niquishocoriquiano casaa miiria Pueyaso cumaacata. Nojoriiri naa na sequeturee, nojori niishiniuria Jesute seetanujuanaa Pueyaso Jiyarosano. ¹² Jesuuri noojia niaree na taraajenuta. Sequereeri:

—¿Casaara nio pueya niquiniu paniya Pueyaso cumaacata miishanoni? Seetanujuanaa nia sequeyanijia, majaari cua niquitiniu quiniutianiya nijaniya cua cumaacata cua miishano.

¹³ Jiyacaritij, cuno pojori tiujiaqueeri. Na pueyata botejinia tacataaru-huari. Caminia taquijiria niuutiaareeri.

Jesu numootesacari na pueya Fariseocuaca niishitiojosanoocuaji (Mt 16.5-12)

¹⁴ Jesu pueyari na coseyaca niyajetatuquiaari. Nareja niquiriyatujua panniyojua jiitiatuquiciaa botejiniari. ¹⁵ Jiyacaritij, Jesuuri nojori sequeriquiaa miriqui:

—Cua tojitiare. Niocua tama nia cuaqueyajaaja cojuariquia Fariseocuaca pan poreetajaacuaji, Herodes pan poreetajaacuajijuhuj.

¹⁶ Majaari na pueya niishiniu quiriquiaa naa Jesu sequesacaritij. Nojoriiri cunora tama sequetooriquiaajaaja:

—Pa jiyaniijia jiyoteeri naa pa sequeya, coseyaca pa paaquiniuucua pa sasocoriquiano.

¹⁷ Jesuuri na saquiriojosano pueya niishiriojosano niishi-quii. Nojori sequereeri:

—¿Casaara naa nia niishiriojija pan nia jiitiaaquishacarini? ¿Majateeri juhuanojuaja nia niishiniu tamonu juuca cua miishanojinijij? ¿Niaateeri cumajiuujiaacato, maja nia niishiniuria? ¹⁸ ¿Majateeri cua miishano nia niquiniu quiquiaacuaja nia namijiata? ¿Majateeri nia tojiniu quiquiaa nia numaatajuhuj? ¿Niaateeri ritia niyajetarucuaa cua miishano? ¹⁹ Janiya jaara cinco pan neecasecanu cinco mil pueyaratej, ¿taa canaasatu nia mishinijiocanu miaquesano cureenotani?

Nojoriiri na riucaree:

—Doce.

²⁰ —Naajuhuj, janiya jaara siete pan neecaserucuaa cuatro mil pueyaratej, ¿taa canaasatu nia mishinijiorucuaani?

Nojoriiri na riucaree:

—Siete.

²¹ Naaratej, Jesuuri nojori sequereeri:

—¿Majateeri juhuanojuaja nia niishiniu naa cua miishanojinijitij?

Jiyacariti nojoriiri Jesu sequesano niishi-quii.

Jesu jeeacasacari cariyujuaru pueyano, Betsaida tiacajinia

²² Na nuhuaji, Jesuuri Betsaida tiacajinia tiuquiiioquiaari na pueyata. Tii na quishacari, Jesuucua jaatucusaquiaariiri cariojuaru pueyano. Pueyari Jesu secojotuquiaari cuno cariojuaru namijia na quianura quenaaja. ²³ Jesuuri cariojuaru quiaree na juaashiquiajiniji. Tiaca jiyaquiria na jaatucuyareeri. Cariojuaru namijia piquiojoree na riacautaari. Na nuhuaji, na juaashiquia niaree nocuaari. Na nequesotareeri:

—¿Quia naatate niquiniu shiitianiyojua quenaaja?

²⁴ Cariojuaruuri niquiniu sanirii. Jesu sequereeri:

—¡Jaa! ¡Pueya niquianijia, juhua nacuhua rucoyano!

²⁵ Jesuuri socua pacuterohua na juaashiquia nianu cariojuaru namijiaacua. Cariojuaruuri niquiniu saniriohuacuhuj. Jiyacaritij, tojetaarucujanaa maninia niquijiaara quiquiiri. ²⁶ Jesuuri na tiajinia na jiyarorohua. Cariojuaru rootaree naari:

—Majaari tiacajinia quia quianuhua pueya quia pohuatanura cua miishanojiniji quiajanija.

Pedro sequesacari, Jesu seetanujuanaa Pueyaso Jiyarosano
(Mt 16.13-20; Lc 9.18-21)

²⁷ Na nuhuaji, Jesuuri quiojoquiaari na saquiriojosano pueyata tucaqui tiacajiniara Cesareya Filipo tiaca shocuaqueya. Na quiasacari nucuaco, na pueya nequesotareeri:

—¿Taa pueya sequequiaa janiyani, cantena janiyani?

²⁸ Nojoriiri na riucuaaree:

—Noojiaqueya pueyari quia sequequiaa, quiaanaari Tiuquinijiona Juan. Tamasacaari saniniuujia quia sequequiaacujua quiaanaari supuetana Elías. Naajuhuj, tamasaari quia sequequiaa, quiaa naasucuaari tariucuaaanu pueyara Pueyaso sequesano caminiuujunia, samiitianohuatuhuj.

²⁹ Na nuhuaji, Jesuuri nojori nequesotaree:

—¿Niajanijarijiataj, taa nia sequeyani, cante janiyani?

Pedroori na sequeree:

—Quiajanijacuaja Cristo, Pueyaso Jiyarosano.

³⁰ Jesuuri nojori rootaree maja nojori pohuatanura tamasa niquiara nojuajiniji Pedro niishishano.

Jesu numootesacari na pueya, nojuaja mosaanutaniya
(Mt 16.21-28; Lc 9.22-27)

³¹ Jiyacaritij, Jesuuri na pueya niishitiojonu coteequiaari tama nojuajinijiaaja, taa Pueyaso Nianu miishaanutaniya jiyanohua naquiya taraatiani. Naa na pueya sequereeri:

—Parta Israel pueya jiyaniijianucuaari cua tojitiaaquiniutianiya, pueyacuara Pueyaso secjonaa jiyaniijianucujuhuj. Naajuhuj, Moisés Rootasanojiniji niishitiojonaari cua rerequetejaca quiniutianiya. Janiyari mosaanutaniyani. Na nuhuaji, janiyari jiuujianaraca juucajinia samiitianutaniuhuan.

³² Jesuuri naa seetanujuanaa nojori sequequiaari. Na pohuatasanoori maja miriqui na quiniu quiquiaari. Jesu jaara naa sequequiaari, Pedroori tamocora na jaatucuree. Cuniqui na nacasureeri maja naa na pocuanuratej. ³³ Jesuuri na nijiniara tacatequee saaja. Na saquiriojosano pueya na niquiniutia, Pedro sequereeri:

—¡Cua shuriucuaji quia quiaare, Satanásnaa! Quia niishiriojosanoori maja Pueyasojiniji. Majaari quia niishiriojonu juhua Pueyaso panishano. Quiaari saaja juhua nio jiyajininio pueya niishiriojiya.

³⁴ Naa na sequenu nuhuajitij, Jesuuri na saquiriojosano pueya piirii, puetunu cuniqui quiniaa pueyajanaano. Nojori sequereeri:

—Pueyano jaara cua tojjijara quiniu paniri, nojuaja cuaara niiria cucua, seetanujuanaa noojiata na panishacari janiya. Nojuaja cuaara niyajetaara tama na cuaqueya na cojuanurajaaja. Cuaara cucuara panitiaara tama na cuaqueyajaaja. ³⁵ Saniniuujia, cante tama na cuaqueyajaaja shuquiritiniu panijiani, na nuhuaji, nojuajaari jiyanohua taraatia quiniutianiya pueyaracaanu. Saniniuujia, cante tama na cuaqueya panitiaa cua panishano na miiniuriani, na pohuatanura janiyajinijijiuhuaj, cuno pueyano cutaraari pueyaracaanu quiniutianiya shuquiriaatia. ³⁶ ¿Niaarate maninia, pueyano jaara puetunu nio jiya casamijianaa jiitiare, na nuhuaji na sohuanu jaara jatasaare mani quiquiojinia pueyaracaanura? ³⁷ ¿Pueyanote na naata Pueyaso niqutionu queraatia na casamijininio, Pueyaso jiyatenuhuara nojuaja pueyaracaanu rishijia na quiniuria nata? Maja na naata. ³⁸ Cante cua rupaa pohuatanu caririquiya sesa miijiaca pueya niquiara nio jiyajiniani, janiyari nojori caririquiniutianiyajaacuhuj. Naajuhuj, cante caririquiya mijiria quiniaa niquiara sequenurani, janiya nojori jiyaniijiani, janiyari cua tacatesacariuhua nojori caririquiniutianiyajuhuj. Janiyari jiyacari cua Que cumaacata jiyocuacaanuji tacatenutaniuhuanu, maninia miijiaca cua Que seyatajuhuj.

9

¹ Jesuuri nojori sequequiaarijuhuj:

—Seetanujuanaa nia sequeyanijia pueyanaa. Noojiaqueya niya quiniaajininio quiarijiani, majaari nojori cusonuunu quiniutianiya juhuanujuaja, nojori cuaara niquirijiaatijia Pueyaso cumaaca tiuquiyano cucua, na muerasu jiitiriquianoni.

Jesu jatasacari shacantuucara

(Mt 17.1-13; Lc 9.28-36)

² Seis juuca nuhuaji, Jesuuri jiyaconaja tuhuananuucua tacaquiaari. Saaja nata quiojoquiaariiri Pedro, Santiago, Juannio. Jesu quishacari tuhuananujiniji, na cuaqueyari tamaatiuucua jataquiaari nojori niquiara. ³ Na toqueeri shacantuquera jataquiaari, socua jiyanohua cohuajara sohuanatuujiniji. Nio jiyajinia toqueya jeequejonaari maja na naata jiyanohua cohuajaquera toque na jiyatenu, taa Jesu toque jataquiaaricuaani. ⁴ Jiyacaritij, nojoriiri supuetana Elías niqutiucuiaari, supuetana Moisésjuhuaj, Jesuta pocoojiyano tii. ⁵ Jiyacaritij, Pedroori Jesu sequereeri:

—Niishitiojonanaa, ¡canaa namitia niya quiyani! ¡Canaacua niaacuaji suhuorojoreni: quiaara, Moisésra, Elíasranio!

⁶ Jesu pueyari shiriiquitiuriquiaa. Nocuaji Pedroori naa juhujaniya pocuariquiaa. Majaari na niishiniu quiriquiaa casaa na pocuariquiaani. ⁷ Jiyacaritij, jiyocuacaanuji cohuaja najacaari nojoriicua rosequiaari. Cohujaaari nojori mishiquioma. Cohujaa najacajiniji, Pueyasoori tojishaaree pocuaano. Naa sequequiaaritij:

—¡Niocuaja cua Niyanuniyojua, cua shuquiritiasano! ¡Saaja nojuaja nia tojiri!

⁸ Jiyacaritij, nojori jaara ritia niquinijionuuquiaari na shocuaqueya, majaari quenaaja tamonu na niquitiuniu quiquiaari socua. Saaja Jesuuri tamajaaja quiriquiaa.

⁹ Nojori rosetasacariuhua tuhananuucocoji, Jesuuri nojori rootaquiaari maja nojori pohuatanuhua tamasaca niquiara nojori niquishano. Jesuuri nojori sequequiaari cuaara noojiajinia racatatuura, nojuaja jaara samiitarohuajaatijia. ¹⁰ Cunora, tama nojorijiaarijia maninia racataquiaari noojiajinia nojori niquitiushano. Maja cutaraari nojori niishitiuniu quiquiaari, casaara naa Jesu sequeere nojorini “cua samiitasacariuhua”. ¹¹ Cunora, nojoriiri Jesu nequesotaquiaari:

—¿Casaara Moisés Rootasanojiniji niishitiojonaa sequequiaacuararini, Elíasna coteenu tiuquiniutianihua Pueyaso Jiyarosocoriquianoocuaji?

¹² Jesuuri nojori riucuaaree:

—Seetanujuanaacuaaquinatejaj, Elíasri coteenu tiuquiriquiano quiquiaari, puetunu cucuaji jeenucuariquianojuanaa. ¿Niaate niishiya casaara tariucuacaanu Pueyaso Rupaajinia naa naajiotasaaquiaari janiyajinijini: “Pueyaso Jiyarosanoori naquiya miishaanutaniya? Pueyari na soonutaniyajuhuj”. ¹³ Janiyari seetanujuanaa nia sequeyani, Elíascuajaari tari niquiaari. Pueyari naquiya na miiquiaari taa nojori paniquiaaricujani. Pueyaso Rupaajiniacuajaari naajiotasaaquiaari nojuajaari naa miishaanutaniyaquij. Seetanujuanaa tari naa miishaaquiaariiri.

Jesu tohuatesacari samaru, caya samijiajiniji
(Mt 17.14-21; Lc 9.37-43)

¹⁴ Na nuhuaji, Jesu jaara tacatequiaariuhua na saquiriojosano pueya quishaqui, queraatia pueya niquishuhuari nojori shocua maano. Tii quituriquiaajaariuhua Moisés Rootasanojiniji niishitiojonaa. Nojoriiri Jesu pueyata juayonuutariquiaa. ¹⁵ Pueya jaara Jesu niquitiuquiaari, puetunu pueyajanaari nocuaji jiuujiatequiaari. Nojoriiri nocua netecuatuquiaari na saruhatanura. ¹⁶ Jesuuri na saquiriojosano pueya nequesotaree:

—¿Casaajiniji nia juayonuutariquiaa cuno pojoritiani?

¹⁷ Tamonu cuno pueyajinijinoori Jesu riucuaaree:

—¡Niishitiojonanaa, quiocua nitiaaree quiyanunijia! ¡Samaru jiitiaano! ¡Samaruuri na jiyatequiaari tiquiara! ¹⁸ Tiquiyocua na quishaqui, samaruuri na pojotequiaa. Naa na cusojosacaritij, cushau jataquiaa na rupaamajiiri. Na quiaca miaquequiaajaariuhuj. Na nuhuaji, pootia maquiaari juhua macu. Quiyanuuri cunora sasacara quiyaree. ¡Socua piruquiuniutianiyari! Janiyacuajaari tari sequeere quia pueyani, nojori tohuatenura cuno samaru nojuajiniji. Nojoriiri maja na naata na tohuatenu quiriquiaa.

¹⁹ Jiyacaritij, Jesuuri naa sequeere:

—¡Niaaqui Pueyasocua tiuyashijiacaja! ¿Janiyatucua pueyaracaanu nia jiitariquiani? ¿Janiyateeri pueyaracaanu nia rejeretanutaniyajaaniuhuj? ¡Miji nia jaatucure cuno caya samijia!

²⁰ Nocua jaatucusaareeri caya samijia. Samaru niquishacari Jesu, caya samijia miirii taraatiaari. Caya samijiaari pojoquee Jesu niquiara.

Tii taquiriocuariquiaari. Na rupaamajiiri cushaariquiaa. ²¹ Jesuuri caya samijia que nequesotaree:

—¿Taacari na coteecanu naa na quiniuria juhuacatecarani?

Na queeri Jesu riucaaree:

—Na naatujuajiniji naa quijiajuhuanajaj. ²² Na cusojuanura juucua, cuno samaruuri sequeyarucua na pojotequiaa manijinia, moojinijuhujaj. Naaratej, ¡jaara quia naata quiri, canaacua quia taraajere quenaaja! ¡Canaa quia naacure!

²³ Jesuuri na sequeree:

—¿Casaara naa quia sequeree janiyani, “jaara quia naata quiri”? Cante Pueyasocua tiuya noojiata setanujuaanaani, nera miishiyari puetunu na panishanojuanaa.

²⁴ Jiyacaritij, caya samijia queeri nacaree:

—¡Jaa, quiocua tiuyanijia! ¡Cua naacure socua cua tiuuniuria quiocua!

²⁵ Jesu niquishacari queraatia pueya nocua rerequeejiano, ritia samaru sequereeri:

—¡Tojiyashijia, tiquia samarunaa, janiya quia sequeyani, quia tohuatate nio caya samijiajiniji! ¡Puetunu quia tohuatatejanaa! ¡Majaari socua quia tacatenuhua, nocua quia tiuquiniuhua!

²⁶ Samaruuri sariyocuaquee. Caya samijia taquiriocuaterohuariuhujaj. Na tohuatesacari caya samijiajiniji, juhua macu na tiujiaqueeri. Nocujaj, queraatia na niquitianaa pueyari sequequiaari:

—¡Juaj! ¡Tari cusoquee cutaratej!

²⁷ Jesuuri na juaashiquiajiniji na quiaree. Na sanareeri. Caya samijiaari juhuajaniya nujuaquiaariuhua.

²⁸ Na nuhuajaj, Jesuuri tiaco tiuquitiaquiaari na pueyataja. Tamajaaja nojori quishacari tii, na saquiriojosano pueyari na nequesotaree:

—¿Casaara maja canaa naata cuno samaru tohuatenu quiriquiaani?

²⁹ Jesuuri nojori riucaaree:

—Jiyano samaruuri na naata tohuatanishaanu cutara saaja jiyanohua Pueyaso nia secojonuta nia miaqueyaquiniutia.

Jesu pohuatenu pacutesacariuhua nojuaja mosaanutaniya

(Mt 17.22-23; Lc 9.43-45)

³⁰ Nojori jaara quiojoquiaariuhua tiji, Galilea jiya tajimiaari. Majaari Jesu paniniu quiquiaari pueya niishiniuria tee na quiyani. ³¹ Jesuuri jiyacari saaja na saquiriojosano pueyata quiniu paniriquiaa. Jiyacari, nojori niishitiojoriquiaari. Naa nojori sequereeri:

—Janiyari pueya niqutiosaanutaniyani, nojori miiniuria janiya taa nojori paniyacuajani. Nojoriiri cua monutaniya. Jiuujanaraca juucajinia, janiyari samiitianutaniuhua.

³² Majaari quenaaja na pueya niishiniu quiriquiaa Jesu sequesano. Nojoriiri saaja puereriquiaa maninia na nequesoreenura casaa naa na sequenu paniriquiaani.

¿Cante jiyaniijiajanaa cutarani?

(Mt 18.1-5; Lc 9.46-48)

³³ Nojoriiri Capernaum tiacajinia tiuquijiose. Tari nojori quishacari tiajinia, Jesuuri nojori nequesotaree:

—¿Casaajiniji nia juayonuutariquiaa nucuamajini?

³⁴ Nojoriiri saaja sanaajetaquee. Na juayonuutanujiniji niishi-tiuriquiaacuajaari. Nucuumaji, nojoriiri riutioconeetariquiaa teyano nojorijinijiniote socua tojishano pueyanoni. ³⁵ Jesuuri jiyacari cajirii nojori na rootanura. Na doce pueya piiriiri. Nojori sequereeri:

—Cante socua tojishano pueyanora quiniu paniyani, nojuaja cuaara quiiria juhua serura, narta pueya na naacunura puetunujanaa.

³⁶ Na nuhuaji, Jesuuri mueya nujuatequiaari nojori tajinia. Cuno mueya paree nojori niquiaraari. Na pueya sequereeri:

³⁷—Cante jiyano mueya maseja na paniniutia janiyani, nojuajaari cua maseyajaacuhuj. Cante cua maseyani, majaari saaja na masenu janiya. Jiyocuacaanu Quijia cua Jiyarona maseyajaariuhuj.

*Tamonu pueyano tohuatanijosacari samaruhua Jesu cumaacata
(Mt 10.42; Lc 9.49-50)*

³⁸ Tamacari, Juanri Jesu sequereeri:

—iNiishitiojonanaa, canaari tamonu pueyano niquiriini quia sesa jiyaniquiiano samaruhua na tohuatanijionura pueyajiniji! Nojuajaari maja pajaniyajinijinio. Nocuaji, ¡canaari na tenujureeni maja socua naa na miiniuriatej!

³⁹ Jesuuri nojori sequereeri:

—¿Casaara nia tenujureeni? Pueyano jaara maninia miishano miiri cua sesa cumaacata, na nuhuaji, nojuaja maja na naata sesa pocuanu janiyajiniji. ⁴⁰ Nia niishiri, cante maja pa paracani, nojuajaari pa jiyano.

⁴¹ Nia rucuanijosacari, cante nia raateya mohuacaniyojua na paniniutia janiyani, cua pueya nia quiniuucujuhuj, Pueyasoori saniniuuja maninia casaa na niqutionutaniya na jiiiasanojiniji.

*Puereeta quiniutianiyari sesa miijiacara
(Mt 18.6-9; Lc 17.1-2)*

⁴² Nio mueyari cucua tiuuja. Cante jiyano mueya miitirii sesani, nera maara socua maninia quiri, puereetujuajau saajia jaara morotasaare na riqiajiniji, caminia queronijinia jartasocoriquiano. ⁴³⁻⁴⁴ Nio miriqui cua niishitijosano nia tojiri: tama nia juaashiquiaaja jaara nia jiy- atere sesa miijiaara, nia juaashiquia nia rashiquiare juhuari niaa mariqui mani quiquiojinia jatasaareeri, sesa miijia nia quiniuucua. Cuno mani quiquiojiniani, majaari mani maquesanu. ¿Niaateeri paniya tii nia jatasaanura caapiquiquiojuata? Jiyano nio socua maninia cutaraari niaara, juaashiquiaaju nia tiuquinishaanura Pueyasoori shuriucua, pueyaracaanu shuquiriaatia nia quiniuria nata. ⁴⁵⁻⁴⁶ Naajuhuj, nia niohuaca jaara nia jiyatere sesa miijiaara, nia rashiquiarenoj maja nia jatasaanura mani quiquiojinia. ¿Niaateeri paniya tii nia jatasaanura caapiquiniocuata, pueyaracaanu tii nia saniitiosaanura? Jiyano nio socua manini-aari niquiniocuata Pueyasoo nia tiuquiniuria, pueyaracaanu nata nia quiniuria shuquiriaatia. ⁴⁷⁻⁴⁸ Naajuhuj, nia namijia jaara sesa miitiriquia niajaniya, nia jiaterejoj. Naa nia tarinitiare sesa nia miiniu, maja nia jatasaanura caapiqui namijiaata pueyaracaanu mani noshishaqui. Sesa miijiaaari cuno mani quiquiojinia quejoosaanuta nia, pueyaracaanu nojori saniitiosaanura. Cuno manijinia, majaari porohua cusonuunu. Maniiri tii pueyaracaanu noshiya. Majaari na maquesanu. Jiyano nio socua maniniaari nia tiuquiniuria Pueyasoo nia niquiriyatujua namijiaata pueyaracaanu shuquiriaatia nia shootianura nojuaja.

Naa Jesu niishitiojosacari miriquitij, nojuajaari pueya niishitiojoriquiaa nojori tarinitianura jiyanoehua na miiniu panishano, cuno jaara sesa miijiara jiyateriquia nojori.

⁴⁹ Jesuuri socua niishitiojorohua:

—Puetunu Pueyaso muerasujuaanaari saniniujiushaanutaniya juhua manitia, taa shu caquishiyacuaani na moqueyaquiniuucuaaji. ⁵⁰ Naajuhuaaj, shoniiri jiyanoehua maninia, shu moqueyaquiniuucuaaji. Saniniuujia, shoni jaara shaacara quiri, ¿maatucua taa tiquiriiquiara quiriohua saajaniuhuaaj? Maja na naata. Naajuhuaaj, Pueyaso cumaaca nia jiitiare nioojiajinia, niaa mariqui najuhuana quijia quiriiri juhua Pueyaso niishiyashijia pueya. Naajuhuaaj, jiyanoojiaca nia quiri, jatiqui nia quiniuria shuquiriaatia.

10

Jesu niishitiojosano maja pueya cartenura necocua

(Mt 19.1-12; Lc 16.18)

¹ Na nuhuaji, Jesuuri Capernaum tiacajiniji quiaquiaari na saquiriojosano pueyata. Judea jiyajinia quiojiyareeri, Jordán moo taquijiriahuhuaaj, pananu muetasamaji jiyajinia. Pueyari jati nocua rerejoquiaariuhua Jesu quishaqui. Jesuuri nojori niishitiojonu coteeree socua, taa na niishitiojoquiaari tarijiacuajani. ² Jiyacaritij, noojiaqueya Fariseocua-caari Jesuucua nijioquiaari na saniniujiuniuria nojori nequesotanuta, nocuara nojori saquiriojotanura juucua. Cunora, cuno pojoriiri Jesu nequesotaree:

—¿Maninate pueyano cartenura necocua?

³ Jesuuri nojori nequesotaree saniniuujia:

—Cua sequeretoj, ¿taa Moisés sequequiaari nijajaniyani?

⁴ Cuno pueyari Jesu riucuaaree:

—Moisésri pa sequequiaaricuaaja, pueyanoori na naata necocua cartenu. Neyaca cuaara coteenu na niquitioora na cartetaja naajione, necocua na cartenura. Moisés cuajaari naa pa sequequiaaritij.

⁵ Jesuuri cuno pojori sequerree:

—Moisésri naa sequequiaari nijajaniyatej, pueyaracaanu cumajiuujiaaca nia quiniuucua, nia niquiocuaacua taraajeyashijiaca nia quiniuucujuhuaaj. ⁶ Saniniuujia, Moisésri naa naajiotaquiaari pueyajiniji:

“Pueyaso jaara puetunu casaajanaa shipiniquiaari, nojuajaari niquiriyatu caya shipiniquiaari, niquiriyatu maajinio”.

⁷ Naaratej, pueyanoori na queya tiujianutaniya necocuara na caminiuria. ⁸ Nojori jaara camitioore, nojoriiri juhua niquiriyatujua pueyanora quiqui. Naacuaajitij, nojoriiri maja juhua caapiqui pueya na quiniu tari. Saaja juhua niquiriyatujua pueyano quiyari. ⁹ Cunora, pueyano cuaara necocua carteyaquiiria, Pueyaso rupuetootesano nojori quiniuucua.

¹⁰ Majaari Jesu saquiriojosano pueya niishitiuniu quiquiaari naa Jesu sequesano. Na nuhuaji, tijajinia nojori quishacariuhua, na saquiriojosano pueyari Jesu nequesotaquiaari casaa na sequenu paniriquiaa naani. ¹¹ Jesuuri nojori sequerree:

—Cante necocua carteya tamonu maajitia na caminiuriani, cuno pueyanoori jiyanoehua sesa miya coteenu necocua. Pueyasora, naa na miishacaritij, nojuajaari juhua narta pueyano niquiocuata quijia.

¹² Naajuhuj, maaji jaara cartere neyaca tamonuta na caminiuria, cuno maajiiri sesa miya Pueyaso niquiarajuhuj.

Jesu niasacari na juaashiquia naatujooriicua

(Mt 19.13-15; Lc 18.15-17)

¹³ Na nuhuaji, Jesuucua jaatucunuusaacuaariiri naatujoori, Jesu nianura na juaashiquia nojori nacaacua. Na saquirojosano pueyari naatujoori jaatucunaa tenujuriquiaa saaja. ¹⁴ Jesu jaara na niquiquiaari, juaaquiiri. Nojori sequereeri:

—¡Nia tarintiare naatujoori cuaara niiria cucua! ¡Maja na tenujunu! Canapuate Pueyaso muerasura quiniu paniyani, nojori cuaara juhua nio naatujooriria jataara. ¹⁵ Seetanujuanaa nia sequeyanijia, Pueyasoocua nia tiuuri seetanujuanaa, taa naatujoori tiuya cucuacuaani na taacanuyaquiniutia. Saaja naacuajiti niaari Pueyaso pueyara jiyate-saanutaniya cutara, pueyaracaanu Pueyaso jiitiasano nia quiniuria.

¹⁶ Jesuuri jiyacari cuno naatujooriniyojua pooree. Nojori nacaacua niojoree na juaashiquiaari Pueyaso na secojonuta, Pueyaso miiniuria maninia nojori.

Jiyanhua casamiriaca mashaja pocoojosacari Jesuta

(Mt 19.16-30; Lc 18.18-30)

¹⁷ Quera Jesu quianu panishacari quiniquiji, nocua netequiaariiri tamonu pueyano. Jesu cariquimiaji mojoquetaseeri. Na nequesotareeri:

—Maninia niishitiojonanaa, ¿taa cua miiniutianiyani, seetanujuanaa Pueyaso pueyanora cua quiniuriani?

¹⁸ Jesuuri na sequeree:

—¿Casaara quia sequeya janiya maninia pueyanotani, quia niishiyaquishacari janiyani? Saaja Pueyaso cutaraari seetanujuanaa maninia. ¹⁹ Quiaacuajaari Pueyaso niishitiojosano niishiya. Moiséscajaari naa na naajiotaquiaari:

“Maja quia camishoo maaji quia numuetucunu. Maja monu. Maja nohuasenu. Maja tamonuucuaara tonujunu sapojonuta. Maja cuaracashijionu. Quia queya tojjia quia quiriquia”.

²⁰ Pueyanoori Jesu riucuaaree:

—Niishitiojonanaa, janiyacajaari puetunu cuno rootasanojuanaa tojjia pueyaracaanu cua naatujajinjini.

²¹ Jesuuri na paniniutia na niquirii. Na sequereeri:

—Juhuanajuaja niquiriyatu casaari quiyajaa quia miishoo. Quia quiaarohua. Puetunu quia casamijianaa quia niquitiojocoo. Na nuhuaji, casamijiniucua nareja quia niquitiore quia masesano cumaneeca quia casami sami. Naacuajitij, quiaari quia casami jiitianutaniya jiyocuacaanu Pueyaso shuriucua. Na nuhuaji cutara, quiocua nimiohua cua nuhuajiriqiano.

²² Cuno pueyano jaara tojiqiaari naa Jesu sequesantej, jiyanhua taraajequeeri. Na taraajenuta quiacuhua na tijajiniaari. Nojuajaari jiyanhua casamiriaca pueyano quiquiaari. ²³ Na nuhuaji, Jesuuri na shocuaqueya niquinijoree. Na saquirojosano pueya sequereeri:

—¡Jiyanhua jiyajeneta cutaraari casamiriaca pueyano quiniuria Pueyaso pueyanora!

²⁴ Na saquirojosano pueyari shiriiquitiuquiaari naa na sequesacari-tij. Na nuhuaji, Jesuuri nojori sequenu pacutequiaari:

—Sanajooriniaa, seetanujuanaa nia sequeyanijia. Jiyanoehua jiyajene-taari casamiriaca pueyano quiniuria Pueyaso pueyanora. ²⁵ Taa camello maja na naata cusupuetaja cuhuoco tamajiria tajiniucuaani, naajuhujaj, casamiriaca pueyanoori maja na naata tama na cuaqueyajaaja jiyatenu Pueyaso pueyano na quiniuria.

²⁶ Na saquirojosano pueya jaara na tojtiaquiaari, nojoriiri socua jiyanoehua jiuujiateree. Naaratej, tama nojorijiaarijia nequesoree-tooquiaari:

—¿Canteeri Pueyaso pueyanora jiyatesaanutaniya socuanitioj?

²⁷ Jesuuri nojori niquirii. Naa sequereeri:

—Pueyano maja na naata tamajaaja Pueyaso pueyanora quiniu. Pueyaso cutaraari na naata na jiyatenu na muerasura. Pueyasora, maja jiyajeneta casaa quiniu.

²⁸ Pedroori Jesu sequereeri:

—Jiyaniijianaa, canaari puetunu canaa jiiitiasanojuanaa tiujiaquiaarini quia pueya canaa quiniuria.

²⁹⁻³⁰ Jesuuri nojori riucuaeree:

—Seetanujuanaa nia sequeyanijia, shuquiriaatia quijia quiniutianiya cutaraari noo pueyano cante na jiiitiasano tiujiaja cua tojjia na quiniuucuaani, janiyajiniji pohuatana na quiniuucujuhujaj. Cante na tia tiujajani, tapueyocuaca, na rimiatuhua, na queya, necohua, na cuhuariquiano, nojuajaari maninia miishaanutaniya quiarijia mijiria na quishacarijia. Nojuajaari socua jiyanoehua queraatia niq-uitiosaanutaniuhua na tiujiasanojiniji. Niquitiosaanutaniyari tiaca, tapueyocuaca, na rimiatuhua, na nucua, necohua, cuhuariquiano. Naajuhujaj, naquiya miishano quiniutianiyari cua tojjia na quiniuucua. Naajaa, na nuhuaji, pueyaracaanu Pueyasota shuquiriaatia quiniutiani-yari quiarinio jiyajinia. ³¹ Saniniuujia, queraatia tojishano pueyari najuhua quijia quiniutianiya Pueyasora, nojori tojiaquiniuucua nojuaja. Saniniuujia, Pueyaso ruuretajacara, queraatia Pueyaso pueyari quiarijia juhua najuhua quijia quiniutianiya quiquiaa. Naajaa, nojoriiri na nuhuaji seetanujuanaa juhua jiyaniijianucua quiniutianiya Pueyasora, na tojtiajaca nojori quiniuucua.

Jesu pacutesacariuhua pohuatano nojuaja mosaanutaniya

(Mt 20.17-19; Lc 18.31-34)

³² Jerusalén tiacajiniara nucuaamaji nojori quiasacari, Jesuuri na saquirojosano pueya puetariquiaa. Nojoriiri na nuhuaji sacuariquiaa na puerenuta. Socua pueyari na nuhuajitiuriquiaa nojori puerenuta-juhujaj. Nu cajiniocua, Jesuuri na doce saquirojosano pueya jaatiaree tamocora tamajaaja. Tii nojori sequeriquiaari taa nojuaja miishaanutaniyani, nojori tiuquishacari Jerusalén tiacajinia.

³³ Nojori sequereeri:

—Niaacuajaari niishiya, paa tari Jerusalén tiacajinia quiaani, tee cuniqui Pueyaso Niyanu niqutiosaanutaniya pueyacuara secojonaa jiyaniijianucuaani, Moisés Rootasanojiniji niishitiojonaanio. Cuno pojoriiri cucuara tonujunutaniya jiyaniijianucua na sapojonuta, cua mosaanura. Janiyari taucuaca niqutiosaanutaniyani. Janiyari jiyanoehua naquiya miishaanutaniyani. ³⁴ Nojoriiri cua rerequetenu-taniya. Cua riocojotunutaniyani. Cua piquitiuniutianiyajaariuhujaj.

Naa cua miishaanu nuhuajitij, nojoriiri socua cua monutaniya. Naajaa, jiuujianaraca juucajina, janiyari seetanujuanaa samiitianutaniuhuani.

Santiago, tarajanu Juanta, nojori sequesacari Jesu, maninia nojori na miiniuria

(Mt 20.20-28)

³⁵ Na nuhuaji, Santiagoori, tarajanu Juanta Jesuucua catecanoquiaari. Nojoriiri Zebedeo niquiohua quiquiaari. Jesu sequetuseeri:

—Niishitiojonanaa, canaara quia miiri canaa masenu panishano quiajaniya.

³⁶ Jesuuri nojori nequesotaree:

—¿Casaa nia paniya cua miiniuria niaarani?

³⁷ Nojoriiri Jesu riucuaaree:

—Pueyaso jaara quia jiyatere pueya jiyaniijiara, quiocua canaa cajitijiore quia shuriucua, tamonu quia miaquetajara, tamonu quia muenecara, quia naacunaa canaa quiniuria.

³⁸ Jesuuri nojori sequere:

—Majaari nia niishiniu nia masesano. ¿Nia naatateeri rejeretanu naquiya miiniu taa cua miishaanutaniyacuaani? Naquiya cua miiniuuri jiyanoehua noonu quiniutianiya juhua pueyano jaara mani noshiyanojinia tiuquinishaare.

³⁹ Nojoriiri na riucuaaree:

—Taaquiriirinij, canaa naatacuaaquiniateja naquiya miiniu rejere-tanu juhua quiajaniya.

Jesuuri nojori sequere:

—Seetanujuanaa, niaari na nuhuaji cua ratusano raturiquianojuhuaj. Niaari juhua manijinia tiuquinishaariquianojuhuaj, taa cua tiuquin-ishaanutaniyacuaani.

Jesuuri naa nojori sequeriquiaa miriqui, taa jiyanoehua naquiya na miishaanutaniyani, na cusosacari pueyacuara. Jesuuri naa nojori se-querere socuatej:

⁴⁰—Maja cutara cua naata niqutionu nijaniya nia masesano, cua cajitiniuria nijaniya cua miaquetajara, cua muenecarano. Cunoori noo pojori niqitiosaanutaniya cutara, canra tari na jeenucuasaaquiaar-icujani.

⁴¹ Narta saquiritiosano pueya jaara tojiquiaari nojori masesano Jesu juucua, nojoriiri juaaquioquiaari. ⁴² Jesuuri nojori piirii. Nojori se-querere:

—Niaacuajaari niishiya, mijiria jiya jiyaniijianucuaari na pueya jiiti-aquiaa juhua na seya, tama nojori panishano na miiniuriajaaja nojori-tia. Naajuhuj, pueya jiyaniijianucuaari na jiitiasano pueyacu paare-taquiaa na cumaaca, tojishano pueya nojori quiniuria. ⁴³ Nijaniya saniniuujia, majaari naa nia quiniu quiniutianiya. Cante tojishano pueyanora quiniu paniya nijaniyajinijinioni, cuno cuara jiyateera tama na cuaqueyajaaja juhua narta Pueyaso pueya serura na quiniuria.

⁴⁴ Cante nia jiyaniijia quiniu paniyani, nojuaja cuara quiria narta Pueyaso muerasu cumaquinia. ⁴⁵ Janiyajuhuj, majaari mijiria cua ninu quiquiaari pueya cua poonijiotenura quiria, tama cua cuaqueya cua shuqiritiniuriajaaja. Janiya cutaraari niquiaarini pueya cua naa-cutanura, tama janiyajaaja mosaanura pueya niti, queraatia pueyacuaji cua ritianura Sesaaca.

Jesu jeeacasacari Bartimeo namijia

(Mt 20.29-34; Lc 18.35-43)

⁴⁶ Nojoriiri jiyacari tiuquijioquiaari Jericó tiacajinia. Jesuuri cuno tiacajiniji quiariquiaa na saquiriojosano pueyata. Queraatia pueyari nata quiariquiaajuhuj. Jiyacaritij, tamonu cariojuaru pueyanoori tii cajiriquiaa nuu shuucua. Na sesa quiquiaari Bartimeo, Timeo niyanu. Nojuajaari cumaneeca mashiniquijiona quiquiaari, cariojuaru na quiniuucua. Nojuajaari maja na naata poonijionu quijia tamaaja. ⁴⁷ Nojuaja jaara tojiquiaari cuno tajiyano pueyano quiquiaari Jesu, Nazaret tiacajininio, nojuajaari naa nacanu coteeree:

—¡Jesunaa, Pueyaso Jiyarosanonaa, cucua quenaaja quia taraajereja!

⁴⁸ Queraatia pueyari na tenujiriquiaa na sanaajanura juucua. Saaja socua nacaree jiyanoahuari:

—¡Pueyaso Jiyarosanonaa, cucua quia taraajere!

⁴⁹ Jiyacaritij, Jesuuri socua nujuasee. Pueya sequereeri:

—Miji nia sequere cuno nacaani.

Cariojuaruuri naa sequesaree:

—¡Quia sanere! ¡Quia shuquiriri! ¡Quia sequeyacuaja! ¡Nocua quia canujiyare!

⁵⁰ Naa na tojishacaritij, cariojuaruuri na tucuaque toque jataquee. Ritia jaaqueeri Jesuucua na catecanonura. ⁵¹ Jesuuri na nequesotaree:

—¿Casaa quia paniya cua miiniuria quiajaniani?

Cariojuaruuri na riucuaaree:

—¡Niishitiojonanaa, niquijiara quiniu paniuhanijia! ¡Cua namijia quia jecarohua quiria!

⁵² Jesuuri na sequeree:

—Quia quiaarohua. Quia namijiaacuaja tari jeequerohua cucua quia tiuuniuucua.

Jiyacaritij, cariojuaruuri tari na naata niquniu quiriquiaa. Nucua Jesu nuhuajiyareeri.

11

Jesu tiuquishacari Jerusalén tiacajinia

(Mt 21.1-11; Lc 19.28-40; Jn 12.12-19)

¹ Nojoriiri tari catecanoriquiaa Jerusalén tiacaacua. Jiyacaritij, nojoriiri tiuquijiojosee Olivo cuhuariquia tuhananuucua. Cunoori Betfagé tiaca shuriucua, Betania tiaca shuriucuanio. Jesuuri caapiqui na saquiriojosano pueya jiyaroree tiji. ² Nojori sequereeri:

—Cuno tiacajinia nia quiaare, pa tacoji niquishiyani. Naa jaara tiuquishii tii, niaari burro riuriatanutaniya morotasano, pueyano cajishoojua na nijinia. Naa jaara niquishiinioj, niocua na samaacartasee. Niocua na jaatucumohua miji. ³ Pueya jaara naa nequesotare nijaniya: “¿Casaa nia samaacartaanoj?”, niocua na sequere: “Jiyaniijia na paniya rupaquijia. Ritia na niqutionutaniuhuacuaja”.

⁴ Nojoriiri quiojoquiaari. Burro riuriatatusereeri morotasano nuujinia, tamonu tia tohuateya shuriucua. Nojoriiri na samaacartasee.

⁵ Tamasaca tii quiniaari nojori sequeree:

—¿Casaa nia miyani? ¿Casaa nia samaacartaa cuno burroni?

⁶ Nojoriiri na riucuaquiaari taa Jesu rootaquiaari nojoricuajani. Naaratej, cuno pueyari nojoriria na tarinitiaquiaari. ⁷ Na nuhuaji,

Jesuucua jaatucutumohua cuno burroori. Pueyari na toqueya niojoquiaari burro nijinia, Jesu cajijiara. Na nuhuaji, Jesuuri nocua cajirii. ⁸ Queraatia pueyari na toqueya muevoquiaari nuco, Jesuucuaaji nojori maniniushitiniuria nuu. Tamasacaari jaamasucua piyotaquiaari cuhuariquiacajiniji, Jesuucuaaji nojori niojotasocoriquiano na nucua-cojuhuaj. ⁹ Jesu puetanaa, mariyata na nuhuaji nijionaari jiyanoehua nacojonu coteequiaari nojori shuquiriniutia. Naa sequeturiquiaari:

—¡Pa shuquiritiare pa Jiyaniijia Pueyaso! ¡Jiyanoehua maniniacuaja pa Jiyaniijia, cuno, Pueyaso cumaacata tiuquiyani! ¹⁰ ¡Pueyaso cuaara na jiyateera maninia Jiyaniijia na quiniuria pajaniyara! ¡Nojuajaari pa supuetanaa jiyaniijia David niti pa jitianutaniya maninia cutara! ¡Jiyocuacaanu Quijia pa Pueyasocuaajaari pa shuquiritiasano!

¹¹ Jesuuri naa tiuquiquiaari Jerusalén tiacajiniatej. Pueyaso Secojoua tiajinia tiuquishiiri. Na niquinijionu nuhuaji puetunu casaajanaa, Betania tiacajiniara quiaquiaari ritiaari na doce saquiriojosano pueyata. Jiyacaritij, tari tenacariiri quiriquiaa.

Jesu sesacasacari jajauju higo naana
(Mt 21.18-19)

¹² Tariqui, nojori quiojosacari Betania tiacajiniji, Jesuuri miaajeriquiaa. ¹³ Tucuaacaanuji niquirii higo naanaari queraatia jaamasucuaraca. Nocua canujiyareeri na niqiniuria seetanjuanaa jajauracate quiriquiaa. Saaja queraatia jaamasucuaari quiriquiaa. Maja higo muetusacari quiquiaari jiyacari. ¹⁴ Jesuuri naa sesacaree higo naana:

—Maja quioquaji socua quia jajau miasaanu quiniutianiya.

Na saquiriojosano pueyari na tojitiariquiaa naa na sequesacaritij.

Jesu jaacasacari seya niqutiojonaa Pueyaso Secojoua tiajiniji
(Mt 21.12-17; Lc 19.45-48; Jn 2.13-22)

¹⁵ Nojori jaara tiuquijioquiaari Jerusalén tiacajinia, Jesuuri tiuquiquiaari Pueyaso Secojoua tiajinia. Tiji pueya tohuatanijionu coteereeri, cuno pojori, canapueete Pueyasoocuaa puecosocoriquiano seya niqutiojoriquiaa cumaneecaracuajani. Na masejonaa tohuatanijioreejaariuhuj. Cumaneeca tacatojojuaca juhuacutucua caponeetareeri, tee pueya tacatojoriquiaa taucuaa cumaneecacuajani, Pueyaso Secojoua tiajinia niqutiojosocoriquiano cumaneecaracuajani. Naajuhuj, Jesuuri mococoonu niqutiojonaa cajitiucua caponeetaree. ¹⁶ Naajuhuj, majaari na shanacunu quiquiaari pueya niyacunura najuhuaa Pueyaso Secojoua tia, na nitiootasano casamitia. ¹⁷ Na nuhuaji, pueya niqiuara niishitijionu coteereeri. Naa sequereeri:

—Tariucuacaanu Pueyaso Rupaajinia naa naajiotasanocuaajaari quia:

“Cua tia sesaari quiniutianiya, Pueyaso Secojoua tia. Puetunu jiyacajiniijiojuanaa pueya secojonuujuara quiniutianiyari”.

Niaari saniniuujia na jiyatequiaari nohuasenujuaca quiquiora.

¹⁸ Pueyacuara secojonaa jiyaniijianucua, mariyata Moisés Rootasanojiniji niishitijionaari niishiquiaari naa Jesu miishanojiniji. Cunora, nojoriiri roojotooquiaari taa na motunutaniya Jesuni. Saniniuujia, puetunu pueyanaari jiuujiteriquiaa Jesu niishitiojosano nojori tojishacari. Cunora, Judiocuaa jiyaniijianucuaari Jesu puereturiquiaa,

puetunu pueyajanaa tojishacari na niishitiojosano. ¹⁹Jaara niniquiaari, Jesuuri Jerusalén tiacajiniji quiacuhua na saquiriojosano pueyata.

Higo naana sorenojini pohuatasano

(Mt 21.20-22)

²⁰ Tariquicuaji, nojori shocosacari higo naana, na niqituuquiaariiri tariucua soreno, puetunu na nujuacatajanaa. ²¹ Pedroori jiyacari Jesu sequesano niishiquii. Jesu sequereeri:

—Niishitiojonanaa, ¡quia niquiri! ¡Quia sesacasano higo naanaqui tari soreree!

²² Jesuuri nojori riucuaaree:

—Pueyasocua nia tiuuri. ²³ Seetanujuanaa nia sequeyanijia, niaa jaara Pueyasocua tiuuriquia nia taacanuyaquiniutia, nia naata nio tuhuananu sequenu: “Shiiquia niiquiji. Quia jaataare shoniacu caminiajina”. Niaa jaara naa sequere seetanujuanaa Pueyasocua nia tiuuniutia, niaari nia sequesano niqiniutianiya. Naacujitij, Pueyasocua nia taacanuyaquishacari, nia sequesancuajaari tohuateenu-taniya taa nia sequereecuajani. ²⁴ Janiyari cunora nia sequeyani, puetunujuanaa nia masesano nia secojosacari Pueyasoni, nia niishiri niaa na jiitiaa tari. Na nuhuaji, niaari seetanujuanaa na masenutianiya. ²⁵ Nia secojosacari, niaa jaara niishiquii niaa sesa quiya tamonu pueyanota, sesa na miiniucua niajaniya, nojuaja nia jiyanoori. Naacujitij, jiyocuacaanu Quijia nia Queeri nia jiyanooniutianiya sesa nia miishanojinijiuhuaj. ²⁶ Niaa jaara jiyanyashijia quiriquia, jiyocuacaanu Quinia nia Queeri nia jiyanyoquiniutianiya, sesa nia miishanojinijiuhuaj.

Pueya nequesotasacari Jesu, cante na jiyaronani

(Mt 21.23-27; Lc 20.1-8)

²⁷ Na nuhuaji, nojoriiri quiaquiaariuhua Jerusalén tiacajiniohua. Jesu rucuanajosacari Pueyaso Secojoua tiajinia, nocua catecanoquiaariiri pueyacuara secojonaa jiyaniijianucua, Moisés Rootasanojiniji niishitiojonaajuhuj, narta Judiocuata camarucuanio.

²⁸ Nojoriiri Jesu nequesotaree:

—¿Cante quia sequecanu naa quia miiniuriani? ¿Cante quia jiyatecanu Pueyaso Secojoua tia jiyaniijia quia quiniuriani?

²⁹ Jesuuri nojori riucuaaree:

—Janiya nia nequesotanutianiya saniniunijia. Niaa jaara cua nequesotasano riucuaare coteenucuaa, janiyari nia sequenutaniyahuaj cante cua jiyaroquiaari naa cua miiniuriani. ³⁰ Cua riucuaturotoj, ¿cante Tiuquinijiona Juan jiyaroquiaari pueya na tiuquinijionura moojiniani? ¿Narejaca pueyatee, Pueyaso soj? Cua riucuaare.

³¹ Jiyacaritij, cuno pueyari jiyasohuaja tama juayonuutanu coteequiaarijiaaja. Naa sequetooquiaariiri:

—Paa jaara na sequereni Pueyaso na jiyaroquiaari, pa riucuaruca: “¿Casaara nocua nia tiuyaquiquianucuaarini?” ³² ¿Paatucua taa sequereeri, nojuaja nareja pueya jiyarosano quiquiaari?

Cuno pojoriiri narta Israel pueya puereturiquiaa sequenura, Tiuquinijiona Juanri nareja pueya jiyarosano quiquiaari. Nojoricuajaari niishiriquiaa puetunu pueyajanaari niishiquiaari Tiuquinijiona Juanri seetanujuanaa Pueyaso sequesano caminiujunua quiquiaari. Cunora, nojoriiri Tiuquinijiona Juan rerequetenu

pueretuquiaari, pueya quishacari tii. ³³ Naacujitij, maja na naata na riucuatunu quishacari, Jesu sequetureeri:

—Maja canaa niishiniu.

Jesuuri nojori sequeree:

—Janiyajuhuj, maja cua sequenu quiniutianiya niajaniya, cante cua jiyaroquiaari naa cua miiniuriani.

12

Miriqui pahuatasano sesa miijiaca poonijionaajiniji

(Mt 21.33-46; Lc 20.9-19)

¹ Jiyacaritij, Jesuuri miriqui pahuatanu coteequiaari cuno pojori niquiara. Cuno camarucua sequereeri:

—Tamonu pueyanoori cuhuariquiajinia uva natoquiaari. Na nuhuaji, na shuriuquioco maticoreeri. Naajuhuj, saajia quejaquiaari uva rapijiojuara, na caaca reratesaanura. Jiyaconajara tiareejaariuhuj, tiji na cuhuariquia na cojuajara nohuasejojuacuaji.

'Na nuhuaji, tamasa poonijionaa pueya na niqitioreeri nojori cojuasocoriquiano nera. Naacujitij, uva carojotasacari, nojoriiri nojuaja niqutionutianiya tijijiuhuj, na camarujanaa na quiniucua. Na nuhuaji, nojuajaari tucuacaanu quiaquiaari, tii marijia na shocotejonura. ² Jaara tari quiquiaari uva carojotasacari, saniya cuhuariquia camarujanaari na seru jiyaroquiaari cuhuariquia cojuanaa pueyacua. Na jiyaroquiaari cuhuariquia cojuanaa niqutionura nojori carojotasanojiniji, taa na camarujanaa pocoojoquiaaricuaa nojoritia tarijiani. ³ Cuhuariquia cojuanaa pueyari saaja jiyarosano seru quiaturee. Na piquitiuriiri. Na nuhuaji, juhuasu na jiyaroturohua na camarnucuaari. ⁴ Na camaruuri socua jiyaroquiaari tamonu na seru. Cuno seruuri jacusaaree saitia. Na nacaari surtasaree saajiata jasano. Na sesacatureejaariuhuj. ⁵ Na camaruuri socua jiyaroquiaari tamonu na seru. Cuno na seru cutaraari mosaaquiaari. Na nuhuaji, socua jiyaramiquiquiaari queraatia na seyari. Puetunu nojorijinijiojuanaani, tamasaari piquishaaquiaari. Tamasaari puecoosaaquiaari cutara.

⁶ 'Cuhuariquia camaruuri saaja niquiriyatujua niyanuniyojua jiitaquiaari, jyanohua na panishano. Cunora, nojuajaari socua cuno neyanuniyojua jiyaroquiaari. Na queeri tama sequequiaarijaaja: "Cuno pueya jaara niquiri cua niyanu, nojoriiri na tojiniutianiya cutara". ⁷ Cuno cuhuariquiajinia poonijionaa niquishacari nojori camarnu niyanu nojoriicua niyano, nojoriiri saaja tamajaaja niishitiojotooquiaari:

—¡Niiori pa camarnu niyanu! Nio cuhuariquiaari tama nerajaaja quiniutianiya, na que jaara cusoyare. ¡Pa morej! ¡Pocua nio cuhuariquia camaruhuaa quiquii tamajaajani!

⁸ Cunora, na quiatureeri. Na motureeri. Na motunu nuhuaji, nojoriiri macu jatarae cuhuariquiajiniji tamama.

⁹ Jiyacaritij, Jesuuri cuno pojori nequesotaree:

—¿Taa cuhuariquia camaru miiniutianiya socuani? Nia sequereera pueyanaa. Nojuajaari cuhuariquia cojuanaa puecoonutianiya. Na nuhuaji, tamasa pueya niqutionutianiya cuno cuhuariquiaari, nera nojori cojuanura.

¹⁰ ¿Majateeri tariucuacaanu Pueyaso Rupaajinia nia serojonu quiquianucujaja nio? Naa sequeyari:

“Tiajonaa pueyari tamaatiujiajau saajia jatatee nojori tiasacari saijinijia. Na nuhuaji, cuno jatasano saajiaari socua cutara saajiaari jiyatesaaruhua tamasaca saijinijia. ¹¹ Cunoori pa Jiyaniijia miishano. Pajaniyara, na miishanoori jiyanoohua maninia. Nocujaji jiuujiatesano”.

¹² Jiyacaritij, cuno Judiocuaca camarucuaari niishiriicujaja miriqui Jesu pohuatasanoori tama nojoriijiniijiaaja quiquiriquiaa. Naaratej, nojoriiri Jesu quiatunu panirii juucua, nojori nujuatesocoriquiano. Nojoriiri pueya puereriquiaa saaja, naa nojori miiniuria Jesutej. Naacuajitij, nojoriiri nareja quiojoquiaariuhua. Naa Jesu pohuatasacari miriqui cuno saajiajinijitij, nojuajaari tama na cuaqueyajiniijiaaja pohuatariquiaa.

Jiya jiyaniijia cuaara pueyaracaanu niquitiosaaria na sequesano cumaneeca

(Mt 22.15-22; Lc 20.20-26)

¹³ Na nuhuaji, Jesuucua jiyaramiquishaaquiaariiri noojiaqueya Fariseocuacajiniijinio, Herodes panijiaa pueyajiniijiojuhuaj. Cuno pojoriiri Jesu pocuatenu paniquiaari sesa juucua, jiyaniijia nojori saquiriojotanura nocuara. ¹⁴ Naaratej, cuno pojoriiri Jesuucua nijioquiaari. Na sequetuseeri:

—Niishitiojonanaa, canaari niishiyani quiaa cutaraari sapojiyashijia. Quiaari seetanujanaa sequeja. Majaari rimiajata quia niquiniu pueyajuhuj. Majaari pueya naata sapojonu quiajaniya. Quiaari seetanujanaa pueya jiuujia niquijia. Quiaa cutaraari seetanujanaa Pueyaso-jiniji niishitiojua, taate pa naata maninia quiniu Pueyaso niquiarani. Naaratej, canaa quia sequare, ¿maninate pa niquitiojonura pa cumaneecajiniji jiyaniijia Césarra, taa cuno tahue sequequiaari pajaniyacujani? ¿Taa quia sequeyani, niquitiojoshiyatee, maja soj?

¹⁵ Jesuuri ritia niishiqui, naa nojori nequesotasacari nojuajatej, cuno pojoriiri na saniniujiuriquiaa sesa na pohuatenura najuhuanaj. Naaratej, Jesuuri nojori sequaree:

—¿Casaara nia saniniujiya janiyani? Miji nia riri cumanee cua niquishocoriquiano.

¹⁶ Nera rishaareeri cumanee. Jaara na niquiquiaari, Jesuuri nojori nequesotaree:

—¿Cana naaquiti nocuani? ¿Cana sesateeri nocua naajiotasanojaniuhuj?

Nojoriiri na riucuree:

—Jiyaniijia César naaquicujaja, na sesajuhuj.

¹⁷ Jesuuri jiyacari nojori sequaree:

—Jaara tama César casaajaaja quiri, tama na casaajaaja nia niquitiore na camaru. Saniniuujia, Pueyaso nia niquitiore nerano tama na casaajaaja.

Jesu jaara naa nojori riucuaquiaaritij, nojoriiri jiyanoohua jiuujiatequiaari.

¿Macunucuate samitiaconutaniuhua?

(Mt 22.23-33; Lc 20.27-40)

¹⁸ Fariseocuaca nuhuaji, noojiaqueya Saduceocuacajinijinioori Jesuucua nijiioquiaari. Saduceocuacaari jiyaniya macunucua maja na samiitiaconu quiniutianihua. Naaratej, nojoriiri Jesu nequesotasee nojori niishiniuria taa na sequenutaniya macunucujinijini. Na sequetuseeri:

¹⁹ —Niishitiojonanaa, supuetana Moiséscaajaari pa rootaa na naajioneejinia, pueyano jaara cusoyare mueyaju, tarajanu cuaara camiiria mashiquio, mueya na mueratenura tarajanu niti. ²⁰ Tariija, tamonu pueyanoori niya quiquiaari. Siete niquiohwaraca quiquiaariiri, saa canuujua. Jiyapueranuuri camiquiaari. Na nuhuaji, shaajequiaariiri muetuhuoju. ²¹ Naaratej, na nuhuajishanaari tarajanu mashiquio camiquiaari. Nojuajaari muetuhuoju cusoquiaarijihuhaj. Naajuhuj, jiyareta na nuhuajishanaari na camiquiaari. Nojuajaari juhua tapueyocuaca cusoquiaari mueyajuhuhaj. ²² Cuno siete canuuri naa camioquiaari cuno maaji. Puetunu nojorijianaari cusuquiciaari. Majaari quenaaja niquiriyatujua mueya nojori mueratenu quiquiaari. Na nuhuaji, cuno maajiiri cusoquiaarijihuhaj. ²³ Naacuajitij, macunucua jaara samiitiacorohua, ¿teyano cuno siete neyacaajinijiniote seetanu neyacajanaa quiniutianiyani, puetunu cuno pojorijianaa jaara neyaca quiquiaari?

²⁴ Jesuuri nojori riucuaaree:

—Niaari jiyanohua jiyajeneya Pueyaso Rupaajinia naajiotasano nia niishiyaquishacari, Pueyaso cumaacanio. ²⁵ Macunucua samiitiacosacariuhua, majaari canuu camiyonu quiniutianiya maaji. Naajuhuj, maajipohuari maja na camiyonu quiniutianiya neyacaara. Canuu, maajipohua, nojoriiri mariyata quiniutianiya juhua jiyocuacaanu quijiaca Pueyaso seya, maja camiyosano. ²⁶ Niaa macunucua samiitianiionujiniji nequesoreetaate. ¿Majateeri nia serojonu quiquiaacuaja supuetana Moisés naajioneejinia, taa Pueyaso sequequiaari Moiséscaaja nequeru casaja noshiyanojinijini? Pueyasoori naa sequequiaari Moisés:

“Janiyari quia supuetana Abraham Jiyaniijiani, quia supuetana Isaac Jiyaniijiajuhuj, quia supuetana Jacobo Jiyaniijiano”.

²⁷ Naacuajitij, paari niishiyani Pueyaso pueya shaajeconoori saminiucua quia Pueyasora cutara. Pueyasoori maja macunucua Jiyaniijia, saaja saminiucua pueya Jiyaniijia cutaraari. Janiyari cunora nia sequeyani, niaari jiyanohua jiyajeneya nia niishiyaquiniucua Pueyaso Rupa.

Puetunu Pueyaso Rootasanojinijijianaani, teyanote socua pa tojishocoriquianoni

(Mt 22.34-40)

²⁸ Tamonu pueyanoori Jesu tojiriquiaa Saduceocuaca riuhaneyano maninia saaja. Cuno pueyanoori Moisés Rootasanojiniji niishitiojona quiquiaari. Nojuajaari Jesuucua catecanoquiaari. Jesu nequesotareeri:

—¿Teyano tariucuaaanu Pueyaso Rootasanojinijiniote socua pa tojishocoriquianoni?

²⁹ Jesuuri na riucuaaree:

—Pueyaso sequesano socua na pueya tojishocoriquianoori nio: “Nia tojitiare Israel pueyanaa, pa Jiyaniijia Pueyasoni, nojuacuajaari pa Jiyaniijijanaa. Majaari tamonu quiniu socua. ³⁰ Nia Jiyaniijia

Pueyaso nia paniri puetunu nioojiatajanaa, puetunu nia sohanu-tajanaa, puetunujuanaa nia niishitiajata, puetunu nia cumaacata-janaano”. Nio rootasanoori socua pa tojishocoriquiano puetunu Pueyaso rootasanojinijijianaa. ³¹ Socua tarajanu na rootasanojuhuaj. Naa sequeyari: “Quiarta pueyano quia paniri taa quia paniyacuaa tama quia cuaqueyajaajani”. Puetunu Pueyaso rootasanojinijijianaani, majaari socua tamonu rootasano quiniu socua tojishocoriquiano nio caapiqui na rootasanojiniji.

³² Jiyacaritij, cuno Moisés Rootasanojiniji niishitiojonaari na sequeere:

—Quiaacuaja maninia sequeree, niishitiojonanaa. Seetanujuanaari quia sequesano: quiyacuaaquinateja niquiriyatujua Pueyaso. Majaari socua tamonu quiniu juhua nojuaja. ³³ Seetanujuanaa jiyanhua maninia cutaraari Pueyaso pa paniniuria puetunu poojiatajanaa, puetunujuanaa pa niishitiajata, puetunu pa sohanutajanaa, puetunujuanaa pa cumaacatano. Naajuhuj, jiyanhua maniniaari parta pueyano pa paniniu, juhua tama pa cuaqueyajaaja. Paa jaara nio sequesano tojijiaa quirini, cunoori jiyanhua socua maninia Pueyasora, puetunu seya catijiasanojinijijianaa nocuara, mariyata puetunu pueya niqutiojosano na casamijinijijianaa nera.

³⁴ Jesu jaara tojiqiaari naa cuno pueyano riucuasano maninatej, na sequeereeri:

—Quiaaqui quera Pueyaso pueyanora quiya.

Na nuhuaji, majaari socua pueya nequesoretanu paniniu quiriqiaa Jesu.

¿Canaacuajinio supuenote Cristoni?

(Mt 22.41-46; Lc 20.41-44)

³⁵ Jesuuri Pueyaso Secojoua tiajinia niishitiojoriqiaa pueya. Jiyacaritij, nojuajaari na tojitianaa pueya nequesotaree:

—¿Casaara Moisés Rootasanojiniji niishitiojonaa sequerquiaacuaraarini: “Cristonaari supuetana David niqiuohuacuajinio supenuutaniya”? ³⁶ Pueyaso Sohanu pohuatesacari supuetana David, nojuacuajaari sequerquiaari:

“Jiyaniiija Pueyasoori cua Jiyaniiija Cristo sequeree: ‘Quia cajirijiaara cua miaquetajara, janiya cuaara quia paraa shocojotare quiocuajijiaatijia, Jiyaniiijajanaa quia quiniuria pueyaracaanu cutara’ ”.

³⁷ Supuetana David jiyaniijiacasacari Cristo, ¿Cristotucua taa supuetana David niqiuohuacuajinio supueno quirini? Davidcuajaari na jiyaniquiya “cua Jiyaniijiata”.

Queraatia pueyari shanhua tojitiariqiaa Jesu pohuatasano.

Jesu sequesano Moisés Rootasano niishitiojonaajiniji

(Mt 23.1-36; Lc 11.37-54; 20.45-47)

³⁸ Jesuuri nojori na niishitiojosacari sequeriquiaa:

—Tama nia cuaqueyajaaja nia cojuare Moisés Rootasano niishitiojonaacuaji. Cuno pojoriiri puera tucuaque toque cushiyonu maniniucuaaja nojori rucuanetajara, pueya shootianura nojori. Nojoriiri timiquiaa pueya sarhuatasacari nojori, nojori quishacari tiaca jiuujiajinia curotasano cajitiucujinia. ³⁹ Nojori jaara masusaare tamonu tiajinia queranacunura, nojoriiri ritia secooquiaa socua panishano cajitiujinia nojori

cajitiuniuria tia camaru shuriucua. Naajuhuaaj, Pueyaso secojojua tiacajiniaqueya pueya rerejosacari, nojoriiri camarucua cajitiucuaajinia cajitiuniu paniquiaa, pueya shootianura nojori. ⁴⁰ Nojoriiri mashiquiopue tiaca masequiaa secaja cumaneecata nojori na sapojonuta. Naa nojori miiniu nuhuajitij, nojoriiri Pueyaso secojoquiaa shitiarayocua pueya niqiuara, maninia pueya nojori jiyanishaanura. Naaratej, Pueyaso saniitiosacari maninia miyashijiaca pueya, nojoriiri socua jiyanohua naquiya miishaanutaniya tamasacajiniji.

Casamijiu mashiquio niqutiosacari na cumanee juurane Pueyasora (Lc 21.1-4)

⁴¹ Tamacari, Jesuuri cajiriquiaa Pueyaso Secojojua tiajinia cumaneeca niqutiojojua taccoji, tee pueya niojoriquiaa na cumaneeca Pueyasoracuajani. Jesuuri tiji pueya shootiariquiaa na cumaneeca niqutiojijano. Queraatia casamiriaca pueyari queraatia cumaneeca niqutiojoriquiaa. ⁴² Jiyacari tiuquishijiaariuhua casamijiu mashiquio. Caapiquiu cumaneeniyojua niasee cumaneeca niojojuajiniaari. Cuno cumaneeca na niasanoori maja puera cumaneeca na quiniu quiriquiaa. Saaja cobrejiniiji shipinishano quiquiaariiri. ⁴³ Jesuuri jiyacari na saquiriojosano pueya piirii. Nojori sequereeri:

—Seetanujuanaa nia sequeyanijia, nio casamijiu mashiquio cutaraari socua queraatia niqutioree puetunu tamasacajinijijianaa. ⁴⁴ Puetunu pueyajanaari na cumaneeca cureenojiniji niqutiojoriquiaa. Saniniuujia, nio maajiiri puetunujuanaa na miaquesocoriquiano na masetajarano niqutioree cutara.

13

Jesu sequesacari Pueyaso Secojojua tia niyartasaanutaniya (Mt 24.1-2; Lc 21.5-6)

¹ Jesu tohuareetasacari Pueyaso Secojojua tiajiniji, tamonu na saquiriojosano pueyajinijinoori na sequereeri:

—Niishitiojonanaa, quia niqiri Pueyaso Secojojua tia, puereetujuaaca saitia tiasano. ¡Jiyanohua shanohua tia!

² Jesuuri na riucuarere:

—¿Quiaateeri cuno shanohua tia niquiya, saijiniji tiasano jiyaconajani? Cuniqiu, majaari saajia cureenu quiniutianiya tamonu caco maano quenaaja. Puetunu niyartasanोजना quiniutianiyari.

Taa pa niishiniutianiyani jiya sequesacari quera (Mt 24.3-28; Lc 21.7-24; 17.22-24)

³ Na nuhuaji, nojoriiri quiojoquiaari olivo cuhuariquia tuhuananuuca. Cuniqiuji, maja puera tucuaaanu quiquiaari Pueyaso Secojojua tia. Na taqijiriraja quiquiaariiri. Jesu cajishacari tii, nocua catecanoquiaariiri Pedro, Santiago, Juan, Andrésnio. Nojoriiri na sequetuquiaari jiyasohuaja:

⁴ —Canaa quia sequere taacari Pueyaso Secojojua tia niyartasaanutaniyani. ¿Casaa Pueyaso miiniutianiyani canaa niishiniuria quia sequesano quera tohuateya?

⁵ Jesuuri nojori riucuarere:

—Tama nia cuaqueyajaaja nia cojuare tamasaca sapojiaquiniuucujaji niajaniya. ⁶ Nia numooteyacuajanijia, queraatia sapojonuujaacaari nijionutaniya nojori sequenura niajaniya: “Janiya Cristoni”. Naa sapojotunutaniya queraatia pueyari.

⁷ Naa jaara tojiniuuri miaquetoojonujiniji niya, tucuacaanujuhuj, majaari najuhuaana nia shiriiquitiuniu. Seetanujuanaa naa quiniutiani-yari. Naajaa, jiyacari, majaari jiya puequesacari quiniutianiya juhuano-juaja. ⁸ Tamonu rupaa pocujajacaari miaquetoojonutaniya tamaatiu-ucua rupaa pocujacata. Pueyari tamonu jiyajiniji miaquetoojonu-taniya tamonu jiyajinijinio pueyata. Naajuhuj, rijiaari jiuuquiujiu-tianutaniya queraatia tiquiyocua tiacajinia. Jiyano-hua miaajesacari-iri quiniutianiya jiyacari. Naajaa, puetunu niojuanaari saaja shusha naquiya miiniu coteesacari quiniutianiya.

⁹ Tama nia cuaqueyajaaja nia cojuare. Niaari tama nia tiacajinia jiyaniijianucuaajaaja niqitiosaanutaniya saniitiosocoriquiano. Naa-juhuaj, niaari Pueyaso Secojoua tiacajiniajanaa majacusaanutaniya. Niaari jiyatasaanutaniyajuhua tiaca jiyaniijiaacua, jiya jiyaniijianu-cuaacuanio, nojori nequesoreenura niajaniya, janiyajiniji pohuatanaa nia quiniuucua. Naacujitij, niocua janiyajiniji pohuatara nojori niqiarajuhuj. ¹⁰ Jiya puequeyaquishacarijia, Pueyaso rupaari tari pohuatasano quiniutianiya puetunu jiyacajiniajanaa. ¹¹ Cua tojiri, niaa jaara jiyatashiyare jiyaniijianucuaacua nequesoreesocoriquiano, ma-jaari nia tacaaniu taa nia sequenutaniyani, taa nia pocuanutaniyani. Majaari quenaaja nia niishiriojonu naatej. Saaja nia sequere no- jori niqiuara jiyacari Pueyaso Sohuanu niishitijosano niajaniya. Nia pocuasanoori maja niajanijianijini quiniutianiya, nia pocuasacari nojori niqiuara. Cunocujajaaari Pueyaso Sohuanu niishitishano quiniutianiya, na pocuatesacari niajaniya. ¹² Jiyacarijuhuaj, pueyanoori sesa miiniu- tianiya tama tarajanujuaaja, cua tojijia tarajanu quiniuucua. Tama tara- janujuaarijia na niqutionutaniya mosocoriquiano. Jiyacaritij, pueyari tama necohuaajaaja miiniutianiya sesa, cucua tiuujica necohua quini- uucua. Naajuhuj, necohuari tama na queya tacartanutaniya monu- juaaja, na queya tojiniuucua Pueyaso rupaa. ¹³ Puetunu nio jiyajinijinio pueyajanaari maja na niqiniu paniniu quiniutianiya niajaniya, cua tojitijajaca nia quishacari. Naajaa, cante seetanujuanaa pueyaracaanu cucua tiuyajaani nio jiya jaara puequerejaatijia, nojuaja cutaraari sha- cantuuca quiijara jatanishaanutaniya, pueyaracaanu cuata na quini- uria shuquiriaatia.

¹⁴ Naa jaara cuno jiyano-hua sacuaraatia casaa niquiri Pueyaso Secojoua tiajinia nujuatesano, taa supuetana Daniel sequeya na naa- jioneejiniacuajani, niocua ritia mashiri. (Cante nio serojiyani, nojuaja cuaara niishiiria casaa na sequeyani.) Judea jiyajinia quiniiaa cuaara mashiiria ritia tuhuananuhuacua, cuno sacuaraatia casaa jaara nuju- atesaare Pueyaso Secojoua tiajinia. ¹⁵ Canapuete jiyacari quiya na tia cacojiriani, nojori cuaara tiuquitiaaquiiria tiajiniaaco na casaa na rini- uria juucua. ¹⁶ Canapuete jiyacari quiya na cuhuariquijianiani, nojori cuaara tacateyaquiuhuara na toqueya na poonuhua. ¹⁷ Jiyacaritij, jiyano-hua taraatia quiniutiani-yari maajipohuara, nojori jaara manajaa- tohua quiya, jaara jiyacari jiitiare supuejaca conaajuhuj. ¹⁸ Naa seco- josacari, Pueyaso nia maseriquia juhuacarijia, nia mashiyocuatuserari

cuaara quiyaaquiiiria shiniquia quishacari. ¹⁹ Cuno quishacari, jiyano hua naquiya miiniuuri quiniutianiya. Tariucuacaanu, majaari naa naquiya miiniu quiquiaari Pueyaso shipininiu nuhuaji nio jiya. Naajuhuaaj, cuno naquiya miiniu nuhuaji, majaari jiyano naquiya miiniu quiniutianiuhua socua, juhua nio. ²⁰ Pueyaso jaara ritia tajitiyaquiri cuno naquiya miiquiosacari, pueya maara mijiria cureyaquirij. Pueyasocuaajaari ritia tajitiniutianiya cuno naquiya miiniu, na saquiriojosano pueyacua na taraajenuucua.

²¹ 'Jiyacaritij, tamasaca jaara nia sequere: "Nia niquiri, Cristo tari niya quiya", jaara sequerejuhuaaj: "Nooj, jati quiyatej", majaari na tojitianunoj. ²² Jiyacaritij, queraatia sapojonuujuacaari supuenutaniya. Nojoriiri sequenutaniya: "Janiyacuaaja Cristoni". Tamasacaari sequenutaniyajuhuaaj: "Janiya Pueyaso sequenu panishano caminiujiuniani". Nojoriiri pueya niquishoo casaa miiniutianiya na cumaacata, Pueyaso saquiriojosano pueya na sapojonura juucua. Jiyacaritij, queraatia pueya cutaraari sapojosaanutaniya. ²³ Cunora pueyanaa, tama nia cuaqueyajaaja nia cojuare. Janiyacuajaari tari juhuacarijia nia nu-mooteyani. Majaari cua sequesano nia niyajetanu.

Pueyaso Niyanu tacatenujiniji pohuatasano
(Mt 24.29-35, 42, 44; Lc 21.25-36)

²⁴ 'Naa naquiya pueya miiniu nuhuajitij, pananuuri ninishiquiria quiniutianiya. Naajuhuaaj, racaari maja na cuhuatanu quiniutianiya mijiria. ²⁵ Riyari totenutaniya. Jiyocuacaanu cumaacaraca quijiacaari tete-catunutaniyajuhuaaj. ²⁶ Jiyacari, janiya Pueyaso Niyanuuri niquishaanutaniya jiyocuacaanuji roseyano cohuajajiniani, jiyano hua shacantuuca cua cumaacata. ²⁷ Jiyacaritij, janiyari cua seya jiyaramiquiniutianiyanijori rerejotenura puetunu cua saquiriojosano pueyajanaa. Nojoriiri puetunu nio jiyajinijiniojuanaa rerejotesaanutaniya, socua jiyano hua tucuaaanu jiya cajiniocua puequeetujinijinio.

²⁸ 'Quiarjia cutara nia niishiri higo naanajiniji. Shuniyara, na jaamasucuaari totequiaa jaranacujua na quiniuria. Na nuhuaji, na cashacua jaara macumaaca quiri, quiarinio jaamasucuaari muer-atuumohua. Niaa jaara naa niquiritij, niaari niishiquiaa tacareejonuqui quiniutianiya. ²⁹ Quiarjia saniniuujia, naatej taa nia niishiquiaa higo naanacuaani, niocua naa niishirijuhuaaj janiya quera tiuquihuani, niaa jaara puetunu cua pohuatasanojuanaa niquiri tohuateyano. ³⁰ Seetanujuanaa nia sequeyanijia, puetunu cua pohuatasanojuanaari niquishaanutaniya nio pa quishacari quiniaa pueya cusonuyaquishacarijia. ³¹ Jiya cajiniocuaari shaajenutaniya, nio jiyajuhuaaj. Cua Rupaa cutaraari maja na jatanu quiniutianiya. Cua sequesanoori puetunujuanaa tohuateenutaniya.

³² 'Maja cutaraari nia niishiniu taacari cua tiuquiniutianihuani, casaa juucatej. Majaari jiyocuacaanu quijiaca Pueyaso seya niishinijuhuaaj. Janiyajanaari maja cua niishiniu. Saaja cua que Pueyaso cutaraari tamajaaja na niishiya.

³³ 'Cunora, janiyari nia sequeya cutarani, maja juhua maquenuujua nia quini. Pueyaracaanu nia niqutiare cucuaji, juhua sutejaca. Tamajaaja nia soquere. Saaja pueyaracaanu nia secojoriquia Pueyaso. Majacuajaari nia niishiniu taacari cua tiuquiniutianihuani. ³⁴ Cunoori

quiniutianiya juhua tamonu pueyano quianu panishacari tamonu jiya-jiniara tucuaaanu. Na quianura, nojuajaari na seya seerataaree maninia nojori cojuanura na tia. Tamasaca niqutiyaree na poonijiosanoori, nojori poonijiosocoriquiano. Tamonu sequereeri, tohuateyaji na cojuanura pueyaracaanu, nojuaja cuaara tiuquihuarajaati-jia. ³⁵ Naaratej, nia sutere. Maja maquenuujunu. Majaari nia niishiniucuaaja taacari tia camaru tiuquiniutianihuani, shusha ninishacari, shiyaqueya, caacaraja niunijiosacari, tariquicuaji soj. ¿Taacari cua tiuquiniutianihuani? Johuaj, maja pa niishiniu. ³⁶ Cunora, juhua sutejaca nia quiriquia, janiya mariqui nia jiyajenetesuhuari, canashiyaquiji cua tiuquishacariuhua niaacua. ³⁷ Cua sequesano niajaniyani, cunoori puetunu pueyarajanaa: “¡Nia sutereja! ¡Maja maquenu!”

14

Judiocuaca camarucua roojotoosacari nojori quianura Jesu
(Mt 26.1-5; Lc 22.1-2; Jn 11.45-53)

¹ Jiyacari, juhuanujuaja querajaa juuca quiriquiaajaari Pascua juucara queranacunura. Pascua juucajuhuj, poreetajaaju shipinishano pan miaquenu coteesaaquiaari siete juucara. Pueyacuara secojonaa jiyaniijianucuaari jiyacari Moisés Rootasanojiniji niishitiojonaata roojotooriquiaa Jesuucara. Nojoriiri roojotooriquiaa taa nojori saponuta nojori quietunutaniya Jesu jiyasohujani, na motusocoriquiano.

² Nojoriiri naa sequetooriquiaa:

—Maja queranacusacari naa pa miiniutij, paa mariqui puetunu pueyajanaa juaatiriiri.

Tamonu maaji totasacari na shanohua jaanutaja Jesuucua
(Mt 26.6-13; Jn 12.1-8)

³ Jesuuri Betania tiacajinia quiriquiaa Simón tiajinia na saquiri-ojosano pueyataja. Cuno Simónri tarijia lepra cusotaja quiquiaari. Jesu cajishacari tii miaquejajinia, tamonu maajiiri tiuquiquiaari. Shitianiyojua shucuariquijaja pataconiyojua cacatariquiaari, shanohua cohujaja saajijajini quejasano. Mishaja quiriquiaari shanohua jaanutajata, nardo jaamasucujajini shipinishano. Jiyanojua queraatia cumaneecata masesano quiquiaariiri. Jiyacaritij, cuno maajiiri na shucuariquijaja pataconiyojua cocuataree, na totanura Jesu nacaacua.

⁴ Tamasaca tii quiniaa pueyari juaarii naa cuno shanohua jaanutaja niitiasaanucua. Tama nojoriijaarijia sequetooriquiaa:

—¿Casaara cuno shanohua jaanutaja niitiasaaree najuhuanani? ⁵ ¡Cuno jaanutaja maara niqutiosaacanu queraatia cumaneecara, casamijiuniucua niqutiosocoriquiano!

Nojoriiri juhuacatecara cuno maaji juaarii.

⁶ Jesuuri nojori sequere saaja:

—¡Nia tarinitiare! ¿Casaara nia rimiaaqueya nio maajiicuarani? Naa na miishano janiyani, cunoori jiyanojua maninia quiria.

⁷ Casamijiuniucua pueyacuajaari pueyaracaanu quiriquiano niaata. Nia naatacuajaari maninia miiniu nojori nia panishacari. Janiya saniniuujia, maja cutaraari cua quiniu quiniutianiya pueyaracaanu niaata. ⁸ Nio maajiiri maninia miirii. Majaari na naata miiniu quiriquiaa socua maninia nio na miishanojiniji. Na totasacari cucua na shanohua jaanutajani, nojuajaari jhuuacarijia cua

cuaqueya jeenucuaa, raaco cua niasaanura janiya jaara mosaareni. ⁹Seetanujuanaa nia sequeyanijia, puetunu jiyacajiniajanaa tee Pueyaso rupaa pohuatasaanutaniyani, nio maaji miishanoori pueyaracaanu pohuatasaanutaniyajuhuj. Naa na miishano janiyatej, majaari na niyajetasaanu quiniutianiya.

Judas tacartasacari Jesu, na quiatenura

(Mt 26.14-16; Lc 22.3-6)

¹⁰ Jiyacaritij, Judas Iscarioteeri quiaquiaari pueyacuara secोजना jiyaniijianucuaata rojotoonura taa nojori na quiatenutaniya Jesuni. Nojuajaari Jesu saquiriojosano pueyajinijinio quiquiaarijuhuaj. ¹¹ Jiyaniijianucua jaara tojiquiaari, Judas nojori quiatenu paniya Jesu, nojoriiri jiyanoohua shuquiririi. Nojoriiri Judas sequeree:

—Canaa quia niquitnutaniya cumaneecani, canaa quia quiatenu sami Jesu.

Cunora, Judasri niishiriojonu coteequiaari taacari nojori na quiatenu-taniya Jesuni.

Jesu miaquesacari na nuhuajiria na pueyata

(Mt 26.17-29; Lc 22.7-23; Jn 13.21-30; 1 Co 11.23-26)

¹² Puetunu mariijarajanaa, Judiocuacaari Jerusalén tiacajinia rerejo- quiaari poreeteso pan nojori miaquenuunura siete juuca. Coteenu juuca sesaari quiquiaari “Pascua”. Cuno juuca puecoosaaquiaari- iri Pascuara riuriotaca borregohua, Pueyaso niquiara miaquenuuso- coriquiano. Naaratej, Pascua juuca quishacari, Jesu saquiriojosano pueyari Jesu nequesotaree:

—Jiyaniijianaa, ¿tee quia paniya canaa majeetenura quiocuaji borre- goni, pa miaquesocoriquiano quiarijia Pascuarani?

¹³ Jiyacaritij, Jesuuri caapiqui na saquiriojosano pueyajinijinio se- queree:

—Nia quiaare Jerusalén tiacajinia. Niaari tii riuritanutaniya tamonu pueyano, na mohuaca pataano na patacojinia. Niaa jaara na riuri- atasee, niocua na nuhuajimia. ¹⁴ Jaara tiuquishii tiajinia, niocua cuno tia camaru sequeese: “Niishitiojona naa quia sequeya: ‘¿Tee cuniqui cua miaquenutaniya cua saquiriojosano pueyata quiarijia Pascua ni- ucuan?’ ” ¹⁵ Jiyacaritij, nojuajaari nia niquitiniutianiya puereetuca sohuaca, jiyocuacaanu nataco, tariucua maninia jeenucuaano. Niocua cuniqui borrego majeetesee, niucua pa miaquesocoriquiano.

¹⁶ Na saquiriojosano pueyari quiojoquiaari. Tiacajinia tiuquijioseeri. Nojori tiuquijiosacari, nojoriiri puetunujuanaa riuriatasee taa Jesu sequeree nojoricuajani. Nojoriiri tii majeetesee borrego, Pascuara mi- aquesocoriquiano.

¹⁷ Jaara niniquiaari, Jesuuri tiuquijioseese na saquiriojosano doce pueyata. ¹⁸ Nojori miaquenuusacari, Jesuuri nojori sequeree:

—Seetanujuanaa nia sequeyanijia, tamonu nijaniyajinijinio niya cuata miaqueyani, nojuajaari cua tacartanutaniya na quiatenura janiya, naquiya cua miishaanura.

¹⁹ Jesu sequesacari naatej, nojoriiri jiyanoohua taraajequee. Jiyacaritij, tama nojoriijaarijia na nequesoreetanu coteeree:

—¿Janiya jiyoteeri quia quiatenutaniyani Jiyaniijianaa?

Puetunu nojoriijianaari naa na nequesotaree.

²⁰ Jesuuri nojori riucuaaree:

—Niquiriyatujua doce nijaniyajiniociuaja, nojuacuajaari nio, shusha pan shiya miacojuajiniani, nojuajaari cua quiatenutaniya. ²¹ Janiyacuajaari maninia tohuateenutaniya puetunujuanaani, taa tariucuaaanu Pueyaso Rupaajinia janiyajiniji naajiotasaaquiaaricuaajani. Saniniuujia, jiyanohua taraatia quiniutianiyari cuno pueyanora, cantucuaaja cua quiatenutaniya mosocoriquianoni. Maara socua maninia quiquiaari cuno pueyanora, nojuaja jaara raaquishaaquiaari.

²² Nojori miaquenuusacari, Jesuuri pan ririi. Na Que Pueyaso secogoree nocuaraari. Na neecasenu nuhuaji, nojori niquitiojoreeri. Na niquitiojosacari, naa miriqui sequequiaariiri:

—Jajaa. Nia miaquere. Nioori cua cuaqueya.

²³ Na nuhuaji, Jesuuri ratujua pataree. Na Que Pueyaso secogoreeri nojori ratusocoriquianoocuaara. Na secojonu nuhuaji, na saquiriojosano pueya niquitioereeri nojori ratunura tiji. Puetunu nojorijianaari ratujua-jiniji raturee. ²⁴ Nojori sequereeri miriquiiri:

—Nioori cua nanaca. Cua nanacaari queraatia pueyacuara shoonutaniya. Naacuajitij, Pueyasoori seetanujuanaa jiyanooniutianiya pueya, saaja nojori tiuuniucua cucua, taa Pueyaso sequequiaaricuaajani. ²⁵ Seetanujuanaa nia sequeyanijia, maja socua cua ratunu quiniutianihua uva caacajiniji, janiya cuaara tacatemohuajaatijia pueyaracaanu Jiyaniijiajanaa cua quiniuria. Jiyacaritij, janiyari shusha niaata na ratunutaniuhuani.

Jesu sequesacari Pedro, nojuaja nocuaji seetanutaniya
(Mt 26.30-35; Lc 22.31-34; Jn 13.36-38)

²⁶ Pueyasora na jaaquequenuunu nuhuaji, nojoriiri quiojoquiaari olivo cuhuariquia tuhuananuucua. ²⁷ Na quiojosacari, Jesuuri nojori sequereeri:

—Nio niucuaajani, puetunu nijaniyajanaari cucua tiuuniu tarinitianutaniya. Naa naajiotasano quiyacuajaari nijaniyajiniji tariucuaaanu Pueyaso Rupaajinia. Naa sequeyari:

“Janiyari borrego Cojuana monutaniyani. Na borregohuari na camaru nuhuaji niaquejonutaniya tamajaaja”.

²⁸ Na nuhuaji, janiya jaara samiitiarohua macujinijini, janiyari nia puetanutaniya Galilea jiyajiniani.

²⁹ Pedroori jiyacari Jesu sequereeri:

—Niya cuata quiniaa naasucua quiocuaji carajenutaniya. ¡Janiya cutara maja cua catenu quiniutianiya quiocuaji!

³⁰ Jesuuri saaja na sequereeri:

—Pedronaa, janiya seetanujuanaa quia sequeyani, nio niucuaajani, quiaari janiyajiniji naa seetanutaniya pueya niquiara: “¡Maja cua nishiniu Jesu!” Quiaari naa pacutejonutaniya sequenutej, caacaraja caminiujiyaquishacarijia niunijionu.

³¹ Pedroori saaja na pataariquiaa naa Jesu sequesacari nojuajatej. Socua sequerohuari:

—¡Janiya cuaara mosaaria quiataqui, naajaa, majaari cua seetanu quiniutianiya quiocuaji!

Narta saquiriojosano pueyari naa sequetureejuhuj.

Taraatia Jesu secojosacari Getsemani cuhuariquiajina
(Mt 26.36-46; Lc 22.39-46)

³² Nojoriiri jiyacari tiuquiiioquiaari tamonu cuhuariquiajinia. Cuno cuhuariquia sesa quiquiaari Getsemaní. Jesuuri na saquiriojosano pueya sequereee:

—Niyaja nia cajitiuri, cua secojosacari cua Que socua nia tacoji.

³³ Nojuajaari saaja nocua rupojiyaree jiuujianaraca na pueya: Pedro, Santiago, Juannio. Jesuuri juhuacatecara shiriiquiriquiaa. Tacaariquiaajaariuhuj. ³⁴ Nojori sequereeri:

—¡Coojiajinia taraajeya jiyanojuanijia, quera cusoyanijia! Niyaja nia jiyojetare. ¡Niocua niqutiareja! ¡Majaari maquenu!

³⁵ Jesuuri socua shiitaniyojua quiaaree nojori tacoji. Na secojonura Pueyaso, mojoquetaseeri. Jiyocuara jacamaquiaariiri. Pueyaso masereeri, maja naquiya na miishaanura juucua. ³⁶ Na secojosacari, nojuajaari naa sequequiaaritij:

—Cua Quenaa, quiara maja jiyajeneta quia panishano quia miiniuria. Naaratej, janiya quia secojiyani, nio raatonuque cucuaji quia tajitiri. Naajaa, cuara quiyaquiiria juhua cua panishano. Saaja cuara quiiria cutara taa quia paniyacuajani.

“Nio raatonuque” na sequesacari, Jesuuri miriqui sequeriquiaa naquiya na miishocoriquiano.

³⁷ Na secojonu nuhuaji, na saquiriojosano pueyacuatacategyarohuari. Nojori riuriasuhua maquetiuyanoori. Jesuuri Pedro sequereee:

—Simónnaa, ¿quiaate maqueya? ¿Majateeri quenaaja quia naata rejeretanu rupaquiija quia maquenu? ³⁸ Nia sutere. Maja maquenu. Pueyaso nia secojore niaa mariqui sesa miitishaareeri. Seetanujuanaa, poojiaari maninia miiniu panijia. Pa cuaqueyari saniniuujia sasaca quiyacujua. Majaari pa naata maninia miiniu pa panishano tamajaaja. Cunora, Pueyaso nia secojore na cumaquiniuria nijaniya maninia nia miiniuria.

³⁹ Jesuuri quiaquiaariuhua socua secojonuhua. Na secojosacari, socua sequenu pacutequiaariiri juhua coteenu na sequesano. ⁴⁰ Na nuhuaji, socua tacatequiaariuhua na saquiriojosano pueyacuara. Nojori riuriasuhuariuhua maquetiuyano. Nojori namijiaari saaja secutayariquiaa na maquenuujunuta. Jiyacaritij, nojoriiri maja na niishiniu quiriquiaa taa na riucuatunutaniyanoj. ⁴¹ Jesuuri socua quiaquiaariuhua na Que secojonura. Na tacatesacariuhua secojonujiniji, nojori sequesuhuari:

—¿Niaate maquetiuyajaa? ¿Niaate samaateyajaa? ¡Tariucujaja! ¡Quiarijia cutara janiyari sesa miijiaca pueya quiatesaanutaniyani, nojori miiniuria janiya taa nojori panitiuyacuajani! ⁴² Nia saneeculture. Pa quiaare. Cua quiateriquiano tari cumaji.

Na paraa quiasacari Jesu

(Mt 26.47-56; Lc 22.47-53; Jn 18.2-11)

⁴³ Jesuuri pocuariquiaajaa Judas tiuquishacari nojoriicua. Cuno Judasri, Jesu saquiriojosano doce pueyajinijinio quiquiaarijuhuaj. Queraatia pueyari Judasta nijioquiaari. Cuno pueyari nijiniaquetucujaja mueruu pooriquiaa, macacanio. Cuno pojoriiri pueyacuara secojonaa jiyaniijianucua jiyaramiquishano pueya quiquiaari, Moisés Rootasanojiniji niishitiojonaa jiyaniijianucua jiyaramiquishanojuhuaj,

Judiocuaca camarucua jiyaramiquishanonio. ⁴⁴ Judas, Jesu quia-teriquianoni, nojuajaari juhuacarijia nata quiniaa pueya rootaquiaari, nojori niishiniuria teyanote Jesuni. Naa nojori sequequiaariiri:

—Teyano pueyano cua nujuya pa tiuquishacarini, cunocuaajaari nojuaja. Niocua na quiasee. ¡Niaari maninia morojosano jaatucutaarohuaquinioj!

⁴⁵ Naacuajitij, Judas jaara tiuquiquiaari Jesuucua, nocua catecanoquiaariiri. Na sequereeri:

—¡Niishitiojonanaa!

Jiyacari na nujuureeri. ⁴⁶ Judasta nijionaa pueyari jiyacari Jesu quiasee. Morojosanoori jaatucutashiyarohua.

⁴⁷ Cuniqiu Jesuta quiniaa pueyajinijinioni, niquiriyatu nojorijini-jinioori na shuucuaaji shitiaquiaari nijiniaquetucuaaja mueruu. Nata jaateree pueyacuara secojonaa jiyaniijia seru numocoori. ⁴⁸ Jesuuri nocua nijionaa pueya sequeree:

—¿Casaara cucua nia nijioree nijiniaquetucuaaja mueruutani, macacatania, morojosano nia riniuria janiya juhua nohuasejojuani? ⁴⁹ Janiyacuajaari puetunu juucajanaa nia tajinia quiquiaani, Pueyaso Secojoua tiajinia cua niishitiojosacari pueya niquiara. Majaari tii cua quishacari nia quianu quiquianu janiya. Naajaa, naa nia miiriqui, tariucuaaanu janiyajiniji Pueyaso Rupaajinia naajiotasano tohuateenura.

⁵⁰ Jiyacaritij, puetunu Jesu saquiriojosano pueyajanaari na shuriucuaaji mashiyocuatucuaaari. Tamajaaja Jesu tiujiatuqueeri. ⁵¹ Saaja tamonu mashajaari Jesu nuhuaji sacuariquiaa cutara. Cuno mashaja sesaari Marco. Nojuajaari saaja puereetunque lino toquerauta cuhua-jaatiariquiaa. Jesu quiatunaa niquishacari nojuaja, na quiatureejaari-uhuj. ⁵² Nojuajaari saaja na toque tiujiaquee nojori juaashiquiajinia. Juhuasuuri ritia netequee. Mashimiaari. Janiyacuajaari cuno pueyano quiquiaarini, nio naajionajuhuj.

Judiocuaca camarucua nequesoreesacari Jesu

(Mt 26.57-68; Lc 22.54-55, 63-71; Jn 18.12-14, 19-24)

⁵³ Jesu quiatunaaari Jesu jaatucucuaaari pueyacuara secojonaa jiyani-ijia tiajinia. Puetunu nio pojorijianaari tii rerejoquiaari: puey-acuara secojonaa jiyaniijianucua, Judiocuaca camarucujuhuj, Moisés Rootasanojiniji niishitiojonaanio. ⁵⁴ Pedroori Jesu nuhuajiquiaari tu-cuaaanuji. Jateeseeri pueyacuara secojonaa jiyaniijia tia carijini-acuma. Cuno jiyaniijiajanaa seya tajinia cajishiiri. Mani jitiuriquiaa nojoritia cuniquiiri.

⁵⁵ Pueyacuara secojonaa jiyaniijianucua, puetunu Judiocuaca ca-marucuaajanaari niishiriojonuuriquiaa nojori saquiriojotanura Jesu-ucuaara. Jesuucuaara tonujuriquianoori pajesaaquiaari juucua, na motenura. Saaja shaaqui quiquiaariiri sesa casaa, nocuara tonujusocoriquiano. ⁵⁶ Queraatia pueyari nocuara tonujuriquiaa juucua, nojori sapojonuta. Nojori saquiriojotasanoori saaja rimiajata quiriquiaa puetunujuanaa. ⁵⁷ Na nuhuaji, tamasaari sanetaquiaari nocuara nojori tonujunura na sapojonutajuhuj. Nojoriiri naa sequetucuaaritij:

⁵⁸ —Canaa na tojiqiuanaa sesa sequeyanoni. Naa sequecanuuri: “Janiya nio Pueyaso Secojoua tia niyartanutaniyani, pueya tiasanoni.

Jiuujianaraca juucajinia, janiyari tamajaaja na tianu tucuatanutani-
uhuan. Cunoori maja pueyata tiasano na quiniu quiniutianiya”.

⁵⁹ Nojori saquirojotasanoori saaja rimiajata quiquiaari jiyaniijianu-
cua niqiara.

⁶⁰ Jiyacaritij, pueyacuara secojonaa jiyaniijiaari nujuaree pocuanura.
Jesu nequesotareeri:

—¿Majate quenaaja quia riucuanuujua? ¡Quia tojiri, pueyaruhua
quiocuara tonujiya!

⁶¹ Jesuuri saaja sanaa nujuariquiaa. Majaari na riucuanu quiriquiaa
quenaaja. Pueyacuara secojonaa jiyaniijiaari socua na nequeso-
taquiaariuhua:

—¿Quiaate Cristo, jiyocuacaanuji Pueyaso Jiyarosano?

⁶² Jesuuri na riucuaaree:

—Jaa, nojuacuajaniija. Niaari cua niqiniutianiya jiyocuacaanu
cumaaca Jitiana miaquetajara cajiyano. Na nuhuaji, niaari cua
niqiniutianiya tacatehuano cohujajinia jiyocuacaanuji.

⁶³ Pueyacuara secojonaa jiyaniijia jaara tojiquiaari naa Jesu seques-
otej, tama na toquejaaja sutaree na juaaniutiaari. Sequereeri:

—¿Casaara pa sashiya tamasaca saquirojotanura saa nocuarajaara-
niuhua? ⁶⁴ Niaacuaja shusha tojirii Pueyasocuara na sequesano
sacuraatía. ¿Niajanियarijijataj, taa nia niishiriojiyani?

Puetunu pueyajanaari sequequiaari:

—¡Cuara mosaaria!

⁶⁵ Jiyacaritij, tamasacaari Jesu riocojonu coteequiaari. Na jiquioco
morotureejaariuhua maja na niqiniuria. Na nuhuaji, pueyari na
piquiniu coteequiaari. Na piniu nuhuaji, na nequesotaturiquiohuari:

—Quia niishiritioj, ¿cante quia piriini?

Secojoja tia cojuanaa pueyari na jiquioco piquitiurijiuhuaj.

Pedro seetasacari Jesujiniji

(Mt 26.69-75; Lc 22.56-62; Jn 18.15-18, 25-29)

⁶⁶ Pedroori jiyaniijia tia carijiniacuma quiriquiaa. Jiyacaritij, tamonu
niyacoori rucuanejoriquiaa carijiniacuma. Nojuajaari pueyacuara sec-
ojonaa jiyaniijia seru quiquiaari. ⁶⁷ Pedro niquishii cajiyanoori, mani
jitiuyano. Tacuriitia na shootariquiaari. Na nuhuaji na sequereeri:

—Jaj, quiaacuajaruhua Jesuta rucuanejojuajuhua, cuno Nazaret tia-
cainijinio pueyanotani.

⁶⁸ Pedroori na seetaree. Na sequereeri:

—¡Cuno pueyano maja cua niishishano! ¡Majaari quenaaja cua ni-
ishiniu casaa quia sequeyani!

Pedroori canujyaree. Mataca tohuateyaji nujuaseeri. Caacarajaari
jiyacari niunijioree. ⁶⁹ Cuno niyacoo jaara Pedro niquiquiaariuhua
socua, juhuacatecara nata quiniaa sequereeri:

—¡Nio pueyanoori cuno Jesu pueyajinijiniojuhuaj!

⁷⁰ Pedroori socua na seetaquiaari. Pasaja na tarishishacari, cuniqui
nata quiniaari Pedro sequeree socua:

—Seetanujuanaa, quiaari cuno pueyajinijinio. Quiaacuajaari Galilea
jiyajinijinio pueyano. Canaa tojishacari quiajaniya, quia pocuanuuri
juhua nojori pocuanujua.

⁷¹ Pedroori socua jiyanohua sapojonu coteequiaari. Naa sequereeri:

—¡Pueyaso cuaara saniitioora janiyaqui, janiya jaara sapojiyani! ¡Seetanujuanaa, maja cua niishiniu cuno pueyano, canajiniji nia nequesoreetaacuajani!

⁷² Jiyacaritij, caacarajaari niunijionu pacuterohuacuhuj. Pedroori jiyacari niishiqui naa Jesu sequesano nojuajatej: “Juhuanajuaja caacaraja niunijionu pacutejiyaquishacarijia juhuaquenu panishacari, quiaari janiyajiniji tari seetanu pacutejonutaniya”. Pedro jaara niishiqui naa Jesu sequesano nojuajatej, jiyanojua njuquequeeri.

15

Jesuucuaa pueya saquiriojotasacari Pilato
(Mt 27.1-2, 11-14; Lc 23.1-5; Jn 18.28-38)

¹ Tariquicuaji, pueyacuara secojonaa jiyaniijianucuaari rerejoquiaari Judiocuaca camarucuata, Moisés Rootasanojiniji niishitiojonaatajuhuj, Sanedrín maanutanio. Nojoriiri moronucua Jesu jaatucutaquiaari Pilatoocua. Cuno Pilatocuaajaari Judea jiya jiyaniijia quiquiaari. ² Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucuaaree:

—Jaa. Naacuaaquiniatejaj, taa quia sequereecuajani.

³ Pueyacuara secojonaa jiyaniijianucuaari Jesuucuaa tonujuriquiaa queraatia sesa casa. ⁴ Pilatoori Jesu nequesotarohuacuhuj:

—¿Majateeri quenaaja quia riucuanuujua? Quia tojiri taa cuno pojori saquiriojotaa quicuuarani.

⁵ Jesuuri maja na riucuanu quiriquiaa quenaaja. Cunora, Pilatoori jiyanojua jiuujiatequiaari.

Na paraa sequesacari Jesu cuaara mosaaria
(Mt 27.15-31; Lc 23.13-25; Jn 18.38-19.16)

⁶ Puetunu marijijarajanaa, Pascuara queranacunu juuca, Pilatoori nujuatesano pueyano tohuataniniu jitiquiaari nujuatejojuajiniji, cana pueya paniquiaari na cartesaanuracuajani. ⁷ Jiyacaritij, tamonu pueyanoori nujuatejojuajinia nujuariquiaa. Na sesa quiquiaari Barrabás. Nojuajaari tamasa pueyata pueyano moquiaari. Cunoori quiquiaari nojori juaashacari, Romano taucuaca jiyaniijia jitianuucua Judiocuaca. ⁸ Pilato nequesoresacari Jesu, jiyacaritij, queraatia pueyari Pilatoocua nijioquiaari naa nojori secojonura nojuaja:

—Pueyano quia carterohua nujuatejojuajiniji, taa quia miquiaacuaja puetunu marijijarajanaani.

⁹ Pilatoori nojori riucuaaree:

—¿Cana nia paniya cua cartenurani? ¿Niaate niarta Judiocuaca jiyaniijia paniya cua cartenura?

¹⁰ Nojuajaari tama niishiquiaarijiaaja, pueyacuara secojonaa jiyaniijianucuaari Jesu niqiniu paniyaquiquiaari pueya shocotenuucua nojori saniniuujia Jesuucua. ¹¹ Pilato nequesotasacari nojori, pueyacuara secojonaa jiyaniijianucuaari jiyacari pueya shiniujuquiaari nojori sequenura Pilato, nojuaja cuaara carteera Barrabás. ¹² Naarate Pilatoori nojori nequesotarohua socua:

—¿Taa nia paniya cua miiniuria nio pueyanoni, nia sequesano niarta Judiocuaca jiyaniijiani?

¹³ Nojoriiri naa nacaree jiyanojua:

—¡Cuaara mosaaria niyacutesanojinia teetesano!

¹⁴ Pilatoori nojori riucuaaree:

—¿Casaarateni? ¿Casaa na miiquianu sesajaarani?

Nojoriiri saaja jiyanojua nacaree:

—¡Niyacutesanojinia quia teetere!

¹⁵ Pilatoori socua tariniquiaari. Nojuajaari maninia quiniu paniquiaari Judiocuacata. Cunora, Barrabás cartereeri. Saniniuujia, Jesu majacuteree cutaraari. Na nuhuaji, na soldadohua na niqutioreeri, niyacutesanojinia na teetsaanura.

¹⁶ Jiyacaritij, soldadohuari Jesu jaatucuquiaari jiyaniijia Pilato tiajiniaaco. Nojoriiri puetunu narta soldadohuajanaa rerejoteree Jesu shocua. ¹⁷ Soldadohuari Jesu cushitiquiaari shaaruque toque, juhua jiyaniijiajanaa cushishano. Juhuacontucua maatusano cushitishaareejaariuhua na nacaquera. ¹⁸ Na nuhuaji, nojoriiri na rupaa paaretanu coteequiaari Jesu na macaatinuria:

—¡Jejee, Judiocuaca camarnuna nooj!

¹⁹ Nojoriiri na naca piquirii naajuata. Na riocojoturejaariuhuj. Nocuaa mojoquetacoreeri juhua jiyaniijiajanaa cariquimiaaji, nojori sapojonuta na macaatinuria nojuaja. ²⁰ Naa na rerequetesaanu nuhuajitij, toque naatuqueeri nocuaji jocuasaaquiaari. Tama na toquejaaja cushitishaarohuari. Na nuhuaji, soldadohuari na tohuataniquiaari. Na jiyatatuquiaariiri niyacutesanojinia na teetsaanura.

Jesu teetesacari niyacutesanojinia

(Mt 27.32-44; Lc 23.26-43; Jn 19.17-27)

²¹ Soldadohua jiyatasacari Jesu, tamonu pueyanoori jiyacari taceriquiohua na cuhuariquijini. Cuno pueyano sesa quiquiaari Simón. Soldadohuari Jesu teetejarano niyacutesano patanirii nojuaja. Nojuacuajaari Alejandro que, Rufo quenio.

²² Jesuuri shiitaniyojua tuhananuucua jiyatasaaquiaari. Cuno tuhananu sesa quiquiaari Gólgota. Nioori pueyano rupaaajinia sequeya, “Pueyano nacaco”. ²³ Soldadohuari Jesu raatequiaari vino juucua, mirrata cojitishano. Saaja na ratuyaquiriiri. ²⁴ Jiyacaritij, nojoriiri Jesu teetequiaari niyacutesanojinia. Na nuhuaji, soldadohuari saitia tacuarishijioquiaari, nojori niishiniuria cantucua Jesu toque poore nerani. Naacuajitij, nojoriiri Jesu toqueya seraatiaquiaari tama nojoririjaaja.

²⁵ Jiyacaritij, niyacutesanojinia na teetesacari, shusha pananu tacasacariiri quiquiaari. ²⁶ Naajioneeri na nacaacuma rupotasano quiquiaarijuhuaj. Tii sequequiaariiri casaara na mosaareeni. Naa naajiosano quiquiaariiri cuno rupotasanojinia: “Nioori Judiocuaca jiyaniijia”. ²⁷ Jiyacaritij, caapiqui nohuasenujuacaari Jesu shuriucua teetejosaaquiarijiuhuj, socua tamonu caapiqui niyacutesanojinia; tamonu na miaquetajara, tamonu na muenecara. ²⁸ Naa tohuateequiaariiri taa tariucuacaanu Pueyaso Rupaaajinia na naajiotasaaquiaricujani. Naa sequeyari:

“Na sesaari sesa miijiaca pueya sesacata cojiritiasaaquiaari naajiotasaanujuhuj”.

²⁹ Pueya tajishacari nuacuaco Jesu shuriuquioco, nojoriiri na macaatiquiaari. Na maanuchenuta naa na sequetuquiaariiri:

—¡Jaj! ¿Majateeri quiajaniya cumaacaracacujaja? ¿Quiaateeri jyaniriquiaa, quiaa jaara Pueyaso Secojoua tia niyartare, quia naata

na tianu tucuatunuhua jiuujianaraca juucajinia? ³⁰ Quiaa jaara naa cumaacaraca quiriritij, niyacutesanojiniji quia roserecuarajaj.

³¹ Pueyacuara secojonaa jiyaniijianucua, Moisés Rootasanojiniji ni-
ishitiojonaari na macaatiquiaarijuhuaj. Tama nojoriijaarijia naa se-
quetojoquiaari:

—¿Maatucua saa tamasaca naatanijioriquiajaari? Tama nojuaja cu-
taraari maja na naata niyacutesanojiniji rosenu. ³² Jaara seetanujuanaa
quiri Pueyaso Jiyarosano, pa jiyaniijia na quiniuria, cuara roseera
niyacutesanojiniji pa niquiara. Pocua jiyacari nocua tiuuri cutarani.

Cuno nohuasenuujuaca Jesu shuriucua teetejosano quiriquiaani, no-
joriiri na sesacariquiaajuhuj.

Jesu cusosacari

(Mt 27.45-56; Lc 23.44-49; Jn 19.28-30)

³³ Panacari, jiyari ninishiquiria quiquiaari puetunujuanaa. Tar-
ishiquiaariiri. Shusha tenacariishacari cuhuatemohuari. ³⁴ Jiyacaritij,
Jesuuri jiyanohua na rupaa paaretaquiaari:

—Eloi, Eloi, ¿lama sabactani?

Nioori sequeya: “Cua Pueyasonaa, cua Pueyasonaa, ¿casaara quia
carteree janiyani?”

³⁵ Na shuriucua nujuatunaa tojitiasacari naa Jesu paaretasacari na
rupaatej, nojoriiri sequeturee:

—¡Nia tojiri, supuetana Elías jiiquioonuyano, nocua na niniuria!

³⁶ Tamonu pueyanoori ritia netequiaari namasu casaa na shiniuria
jereeca vinojinia. Na nuhuaji, na morotaree naajuacuaari, na shiti-
asocoriquiano Jesu rupaama. Na raatereeri. Na nuhuaji, nojuajaari
sequequiaari:

—¡Pa shanacure! ¡Supuetana Elías jiyoteeri nocua niniutianiya na
roshiniuria niyacutesanojiniji!

³⁷ Jiyacaritij, Jesuuri jiyanohua na rupaa paaretarohuacuhuj. Cuso-
queeri. ³⁸ Jiyacaritij, Pueyaso Secojoua tiajiniaacuma, shiquiiquia toque-
jiniji sohuacaari sutequee tamajaaja, jiyocuacaanuji jiyocuara. Cunoori
pueya pueresano quiquio mishiquiotaja quiquiaari, pueya mariqui
cusoqueeri Pueyasocua nojori tiuquishacari juucua, jiyanooshoojua
nojori quishacari. ³⁹ Cuno Romano soldadohua jiyaniijiaari Jesu taccoji
nujariquiaa. Na niquishacari taa Jesu nacaquiaarini, naajuahuaj, taa
Jesu cusoquiaari na rupaa na paaretanutani, jiyacariti nojuajaari naa
sequeree:

—¡Nio pueyanoqui seetanujuanaa Pueyaso niyanu!

⁴⁰ Maajipohuari tii quiriquiaajuhuj. Tucuaaanuji Jesu shootia-
turiquiaari. María Magdalenaari nojoritia quiriquiaajuhuj, socua
narta maajipohuanio. Cuno maajipohuani, nojoriiri quiquiaari Salomé,
Mariano, cante Santiago, José nucua quiquiaaricuaajani. Nio Santiagoni,
nojuajaari socua naatujua na sesaanucua Santiagojiniji. ⁴¹ Puetunu nio
maajipohuajanaari Jesu nuhuajiniaa quiquiaari. Nojoriiri nera puer-
aquenuunaa quiquiaari, Galilea jiyajinia na quishacari. Socua queraa-
tia maajipohuari tii quiriquiaajuhuj, canapete Jerusalén tiacajiniara
nijioquiaari Jesutacuaajani.

Jesu quete niasacari raaco

(Mt 27.57-61; Lc 23.50-56; Jn 19.38-42)

⁴² Jesu cusonu juucani, cuno juuca sesa quiquiaari “Jeenucuanu juuca”, maja samaatenu juuca poonijionura. Saniniuujia, tariqui quiquiaariiri samaatenu juuca. Cunora, pueyari juhuacarijia jeenucuaquiaari puetunujuanaa. ⁴³ Cuno juucajani, jeenucuanu juuca ninishacari quera, tamonu pueyanoori Pilatoocua quiaquiaari. Nojuajaari José, Arimatea tiacajinijinio pueyano. Cuno Joseeri tojishano pueyano quiquiaari narta Sanedrín pueyara. Joseeri mijiria Pueyaso Jiyaroso-coriquiano niquiniuucua jiaatiaja quiquiaarijuhuaj, canaa Jiyaniijia-janaa na quiniuria. Nojuajaari maja na puerenu quiquiaari Pilatoocua na tiuquiniuria, Jesu quete na masenura. ⁴⁴ Pilatoori jiyanhua jiuujiatequiaari na tojishacari Jesu tari cusoquee. Pilatoori soldadohua jiyaniijia sequeree nocua na niniuria. Nocua na tiuquishacari, na nequesotareeri:

—¿Taacari Jesu cusoqueeni?

⁴⁵ Soldadohua jiyaniijia jaara na riucuaquiaari taacari na cusoqueeni, Pilatoori jiyamitia José sequeree Jesu quete na panura. ⁴⁶ Joseeri jiyacari shanhua quenaaruque toque masequiaari tama na cumaneecatajaaja. Na nuhuaji, macu roshiniriiri niyacutesanojiniji. Cuno toquejinia na jiuniooreeri. Na nuhuaji, na niaquiaari raacoori. Cuno raari jiuutiasano quiquiaari saajiajinia. Joseeri raa tioree jiyanhua puereetuca quejasano saajiata. ⁴⁷ María Magdalena, José nucua Maríano, nojoriiri na niquitariquiaa tee na niasaareeni.

16

Jesu samiitiasacariuhua

(Mt 28.1-10; Lc 24.1-12; Jn 20.1-10)

¹ Samaatenu juuca jaara shocoquiaari, María Magdalena, Santiago nucua Mariájuhua, Salomeenio, nojoriiri shanhua jaanutaja masequiaari macuucua na tuujutasocoriquiano. ² Jiyanhua tariquicuaji Domingo juuca, shusha pananu muetasacari, nojoriiri raajinia quiojoquiaari. ³ Nucuo na quiojosacari, tama nojoriijaarijia sequetooriquiaa:

—¿Canteeri pocuaji shuquitiniutianiya tamocora raa tiootiuni?

⁴ Nojori jaara niquiquiaari raa, saajia niquitiuriiri tariucua tamocora shuquitishano. Puereetuca saajiaari quiquiaari raa tiootiu. ⁵ Nojoriiri raaco tiuquitiamaa. Mashaja niquitiushiiri tii cajiyano nojori miaquetajara, cohuaja tucuaque toque cajitiaano. Nojoriiri jiyanhua shiriiquitiuquiaari na niquitiushacari nojuaja. Cuno mashaajari Pueyaso seru quiriquiaa. ⁶ Maajipohua sequereeri:

—¡Maja nia shiriiquiniu! Janiyari niishiyacuajani, niaari Jesu pajeya, Nazaret tiacajinijinio pueyano, niyacutesanojinia teetesaarucuaani. ¡Nojuacuaja tari samiitiarohua! Maja niya na quiniu. Nia niquishuriiria na maja, tee na niasaarucuaacuajani, shaaqui. ⁷ Na saquiriojosano pueya nia sequesuhua, Pedrojaajanio: “Nojuajaari nia puetanutianiya Galilea jiyajiniara. Niaari tii na niquiniutianiya, taa na sequedanu niajaniyacuajani”.

⁸ Maajipohuari netecuatuquiaariuhua raajiniji. Nojoriiri tetecaturiquiaa na shiriiquiniutia. Majaari quenaaja tamasaca pueya na sequetunu quiquiaari na puerenuta.

Jesu muetasacari María Magdalenaacua
(Jn 20.11-18)

⁹ Jesu samiitianu nuhuaji, cuno Domingo juucaja, shusha semaana coteenu juucani, Jesuuri coteenujuanaa muetaquiaari María Magdale-naacua. Jesucuaajaari tarijia siete samaruhua tohuatanijioquiaari cuno Maríajiniji. ¹⁰ María Magdalena niqiniu nuhuaji Jesu, nojuajaari quiaquiaari Jesu cojiniaa na numootenura. Cuno pojoriiri jiyacari taraajecoriquiaa. Nujuqueturiquiaari Jesu mosaanuucua. ¹¹ María Magdalenaari nojori sequeese:

—Pueyanaa, ¡Jesu tari samiitiarohua! ¡Janiya na niqiriini!
Nojoriiri María sequesano cuaracashitirii saaja.

Jesu muetasacari caapiqui na saquiriojosano pueyacua
(Lc 24.13-35)

¹² Na nuhuaji, Jesuuri socua caapiqui na pueyacua muetaquiaari no-jori quiojosacari tamocora. Nojuajaari tamaatia niquishano quiriquiaa nojoriria. ¹³ Nojori niishishacari nojuacuaja Jesu quiquiaari, no-joriiri ritia riujiuuquiaariuhua tamasaca nojorijinijinio nojori nu-mootenuhuara. Naajuhuj, Jesu saquiriojosano pueyari nojori pohu-atasano cuaracashitiriijuhuaj.

Jesu rootasacari na jiyaramiquishocoriquiano pueya
(Mt 28.16-20; Lc 24.36-49; Jn 20.19-23)

¹⁴ Tamacari, Jesuuri na once saquiriojosano pueyacua muetaquiaari. Nojoriiri miaquejajinia cajituriquiaa jiyacari. Jesuuri jiyacari nojori juaarii cumajiuujiaaca nojori quiniuucuaaja. Majaari quenaaja nojori tiuuniu quiquiaari nojorijinijinio pueyacua, nojori sequesacari: “Canaa Jesu niqiriini, samiitiarohuacuaaqui”. ¹⁵ Na nuhuaji, Jesuuri nojori sequere:

—Nia quiaare puetunu jiyacajiniajanaa, janiyajiniji Pueyaso rupaa nia pohuatanura, puetunu nia pohuatasanoocua tiuujiaa pueyapue-janaa jiyanooshaanura. ¹⁶ Cante moojinia tiuquinishiya Pueyaso ru-paacua na tiuuniuucuan, Pueyasoori na jiyatenutaniya na pueyanora. Saniniuujia, cante Pueyaso rupaacua tiuyaquiyani, nojuajaari sani-itosano quiniutianiya. ¹⁷ Cucua tiuujiaaari nocuaji pueya jiuujiate-sano casaa miiniutianiya cua cumaacata, pueya niishiniuria Pueyaso rupaaqui seetanu rupaajanaa. Naacujitij, cucua tiuuniaa pueya nia quiniuucua, niaari samaruhua tohuatanijionutaniya cua cumaacata, nia jiyaniquishacari cua sesa. Niaari nia niishiyaquishoo rupaaca pocuajaca quiniutianiyajuhuj. ¹⁸ Naajuhuj, niaa jaara soconu saji-tishaare, niaa jaara casaa raatesaarejuhuaj nia cusosuaanura juucua, majaari nia cusonu quiniutianiya. Naajuhuj, cusosuhuacua nia nisacari nia juaashiquia, cusosuhuari naataconutaniuhua.

Jesu tacasacariuhua jiyocuacaanu na Queecua
(Lc 24.50-53)

¹⁹ Na pocuanu nuhuaji, Jiyaniijia Jesuuri tacanishaaquiaariuhua jiy-ocuacaanu. Nojuajaari Pueyaso miaquetajara cajiquiaariuhua. ²⁰ Na nuhuaji, na saquiriojosano pueyari quiojoquiaari Pueyaso rupaa nojori pohuatanura puetunu jiyacajiniajanaa. Jiyaniijia Jesuuri pueyaracaanu nojori cumaquiriquiaa. Pueya niqitiriijaariuhua na cumaacata na pueya miiijosano, pueya niishiniuria maatia, Jesu jiyaramiquishano pueya pohuatasanoori seetanu rupaajanaa.

LUCAS NAAJIOTASANO JESUCRISTOJINIJI

Niya pohuatashiyari casaara Lucas naajiotaquiaari nioni

¹ Queraatia pueyari suraattia naajionu saniniujuquiaari puetunu canaa tajinia miishanojuanaa. ² Nojoriiri naajioquiaari taa Jesu jiyaramiquishano pueya pohuataquiaari Jesujiniiji pajaniyani. Cuno pojoriiri Jesu niquiniaa quiquiaari, shusha poonijionu na coteesacari. Nojoriiri na nuhuaji na rupaa pohuataanaara jiyatesaaquiaari. ³ Janiyari niishiriojoriquiaani, maniniaruhua quiocuara cua naajionurajuhuj cua panishano Teófilonaa. Naaratej, janiyari pueyaracaanu jacaria nequesoreeriquiaa puetunu Jesu miishanojuanaani, na coteejajiniiji. ⁴ Naacuajitij, quiocuara naajiyaniija na coteenujiniiji, seetanujuanaa quia niishiniuria puetunujuanaa, taa quia niishitiojosaacanucujani.

Pueyaso seru pohuatasacari Tiuquinijiona Juan rasaanutaniya

⁵ Herodes jaara jiyaniijia quiquiaari Judea jiyajinia, Zacaríasri jiyacari pueyacuara secojona quiquiaari. Nojuajaari supuetana Abías niqiuoacuajinio supueno quiquiaari. Necocua sesa quiquiaari Isabel. Cuno maajiiri supuetana Aarón niqiuoacuajinio supueno quiquiaari. Nojori supuetanaari mariyata tariucuacaanu pueyacuara secojonaa quiquiaari. ⁶ Zacaríasri necocua Isabelta maninia miijiaca quiquiaari Pueyaso niqiara. Nojoriiri puetunu Pueyaso rootasanojuanaa tojitiajaca quiquiaari, taa Pueyasojiniji caminiujiuniaa naajionuutaquiaaricujani. Nojoriicuara maja na naata sesa casa tonujusaanu quiquiaari, saaja maninia miijiaca nojori quishacari. ⁷ Nojoriiri maja na muetunu quijia, niyajaru Isabel quiniucua. Naajuhuj, nojoriiri maja tari na naata muetunu quiquiaari, saaquiapue nojori quishacari.

⁸ Tamacari, Zacaríasri narta pueyacuara secojonaata poonijioriquiaa Pueyaso Secojoua tiajinia Pueyaso niqiara Jerusalén tiacajinia. Jiyacari saniniuujia nojori poonijosacariiri quiquiaari. ⁹ Shanohua jaanutajaari catijiasaquiaari puetunu juucajanaa Pueyaso Shuriucua Quiquiojonia, Secojoua tiajinia. Pueyacuara secojo naari jitiqiaari saajia naajiosano jacutanura juhua tacuarishijosacari, nojori niishiniuria teyano nojorijinijiniote Pueyaso Shuriucua Quiquio tiuquiniutianiyani, shanohua jaanutaja na catijianura tii. Cuno juuca saniniuujia, saajiaari Zacaríascuara tacatequiaari. Naacuajitij Zacaríasri seeratasaaquiaari tii na tiuquiniuria shanohua jaanutaja na catijianura. ¹⁰ Na catijasacari, puetunu pueyajanaari Pueyaso secojonuuriquiaa Secojoua tia carijiniacuma. ¹¹ Jiyacaritij, Pueyaso seruuri Zacaríascu muetaquiaari. Nujuariquiaari shanohua jaanutaja catijiasaqui miaquetajara. ¹² Zacaríasri shiriiquirii na niqishacari Pueyaso seru. Jiyanohua na puerereeri. ¹³ Pueyaso seruuri na sequeree:

—Maja puerenu Zacaríasnaa. Pueyasocujiaari quia secojosano tojiquiaari. Quia niqiuocua Isabelri quiara muetunutaniya. Quiocua na sesojore “Juan”. ¹⁴ Quiaari shuquiriaatia quiniutianiya. Quiaari quia mueya timitianutaniya. Queraatia pueyari na shuquiritianutaniya na rasacari. ¹⁵ Quia niyanuuri cutara pueyano quiniutianiya Pueyaso niqiara. Nojuajaari vino ratuyashijia quiniutianiya, najatunacunio.

Pueyaso Sohuanuraca pueyano quiniutianiyari na rasaacarijijoyua. ¹⁶ Nojuajaari queraatia Israel pueya tacatonutaniuhua nojori Jiyani-ijia Pueyasooqua. ¹⁷ Nio Juanri pa Jiyaniijia puetana quiniutianiya. Nojuajaari pueyara Pueyaso sequesano caminiujunia supuetana Elías sohuanu jitianutaniya, na cumaacanio. Naacuajitij, pueya jiuujia taraajonutaniyari, nojori jiyanooniuria necohua. Naajuhuaaj, nojuajaari tojitiaashijiaca pueya rootanutaniya maninia, Pueyaso tojitiajaca nojori quiniuria. Naacuajitij, pueya jiuujiacaari jeenucuasano quiniutianiya pa Jiyaniijiaacuaji.

¹⁸ Zacaríasri Pueyaso seru nequesotaree:

—¿Taa cua niishiniutianiyarini quia sequesano seetanujuanaa tohu-ateenutaniya quiria? Janiyari tari saaquianoni. Cua niquiocoaari motajajuhuaaj.

¹⁹ Pueyaso seruuri na riucuaaree:

—Janiyacuajaari Gabrielni, Pueyaso taccoji nujuana, na sequesano cua miiniuria. Nojuajaari cua jiyaroree cua pohuatanura quiajaniya nio maninia casaa Pueyasojiniji. ²⁰ Quiarijia saniniuujia, cua sequesanoocua quia tiuyaquiniuucua, quiaari tiquia quiniutianiya. Majaari quia pocuanu quiniutianiya cuaara rasaarejaatijia quia niyanu. Naajaa, puetunu cua sequesanojuanaari naa quiniutianiya taa Pueyaso paniyacuajani.

²¹ Jiyacaritij, pueyari Pueyaso quiquio carijiniacuma sashiriquiaa, Zacarías cuaara tohuatohuara. Nojoriiri shiriquituri pueyaracaanu Zacarías tarishishacari Pueyaso Shuriucua Quiquiojinia. ²² Zacaríasri socua tohuatamohua. Majaari na naata pocuanu quiriqiaa. Nareja shishiniojoriqiaari. Naacuajitij, pueyari niishirii Pueyasocui casaa niqitirii Zacarías, Pueyaso Shuriucua Quiquiojinia na quishacari.

²³ Zacarías jaara puecaquiaari puetunu na poonijionu juucajanaa taa na sequesaaquiaaricuajani, na tiajinia quiaarohuari. ²⁴ Na nuhuaaji, necocua Isabelri manajeree. Na manaja jamaatiaquiaariiri. Majaari na muetanu quiquiaari na tiajiniji cuaara na shocojoquiaarijiaatijia cinco raca. Nojuajaari tama sequequiaarijiaaja: ²⁵ “Quiarijiani, cua Jiyaniijiaari maninia miirii janiya. Majaari socua pueya rerequetenu quiniutianiya janiya, muetujua cua quishacari tari”.

Pueyaso seru sequesacari Jesu rasaanutaniya

²⁶ Seis raca jaara shocojoquiaari Isabel manajesacaricuaa, Pueyasoori na seru Gabriel jiyaroree Nazaret tiacajinia, Galilea jiyajinia. ²⁷ Tamonu niyacocua na jiyaroreeri, cante tari sequesaaquiaaricuajani José jiyani-ishano pueyanota na caminiuria. Na camiriquianoori supuetana jiyani-ijia David niquiohuacuajinio supueno pueyano quiquiaari. Niyacoo sesa quiquiaari María. ²⁸ Pueyaso seruuri nocua tiuquimiaa. Na se-queereeri:

—Janiyari quiocua jiyarosaareeni, Pueyaso shuquiritiasano niya-coonaa. Jiyaniijia Pueyasoori quiata quiya, socua shuquiriaatia quia quiniuria tamasaca maajipohuajiniji.

²⁹ Maríari jiyanhua tacaquiaari naa Pueyaso seru sequesacari no-juaja. Nojuajaari tamajaaja niishiriojoriqiaa: “¿Casaara naa na se-queeree janiyani?” ³⁰ Na nuhuaaji, Pueyaso seruuri na sequeeree:

—Maríanaa, maja puerenu. Pueyasoori quia shuquiriniutianiya. Quiaacuajaari na timitiasano. ³¹ Quiarijiani, quiaari manajenutaniya. Quiaari cayaniyojua ranutaniya. Quiocua na sesojore “Jesu”. ³² Nojuajaari cutara pueyano quiniutianiya. Sesojosaanutaniyari “Pueyaso Niyanu”, jiyocuacaanu Quijia Niyanu. Pa Jiyaniijia Pueyasoori na jiyatenutaniya Jiyaniijiarajanaa na quiniuria na supuetana David niti. ³³ Israel pueya jiyaniijia quiniutianiyari. Pueyaracaanu jitianutaniya na pueyari. Majaari na shaajenu quiniutianiya Jiyaniijia na quishacari.

³⁴ Maríari Pueyaso seru nequesotaree:

—¿Taa cua manajenutaniyari, niyacaaju cua quishacari?

³⁵ Pueyaso seruuri na sequeree:

—Pueyaso Sohuanuuri quiocua niniutianiya. Na cumaaca naaquiri quiocua pacunutaniya. Naacuajitij, quia niyanuranoni, cunoori Pueyaso Niyanu quiniutianiya. Nojuajaari seetanujuanaa Pueyaso tojjia quiniutianiya. ³⁶ Naajuhuj, quia supuetanajinijinio motaja Isabelri neyanu ranutaniyajuhuj. Cuno maajiiri sequesaaquiaari “niyajaru maajitia”. Naajaa, seis racaari tari na shocojia na manajesacari. ³⁷ Pueyasora, majaari jiyajeneta casaa quiniu. Nojuajaari cumaacaraca na miiniuria puetunu na panishanojuanaa.

³⁸ Maríari sequeree:

—Maniniacuajaqui. Janiyacuajaari cua Jiyaniijia Pueyaso seruni. Pueyaso cuara miiria janiya taa quia sequereecuajani.

Na nuhuaji, Pueyaso seruuri quiacuhua.

María quiasacari Isabel niqiniuucua

³⁹ Maríari jiyacari quiaquiaari na secoonuta Judea jiyajinia, Zacarías tiajinia tamonu tiacajinia. Cuno jiyari tuhuananuhuaraca. ⁴⁰ Zacarías tiajinia María tiuquishacari, Isabel sequereeri. ⁴¹ Isabel tojjishacari María sequesano nojuaja, ¡conajaari na jiniacuma nujuanequequee! Pueyaso Sohuanuuri Isabelcua tiuquiquii na cumaaca na jitianura. ⁴² Naacuajitij, Isabelri jiyacari na rupaa paaretaree. Naa María sequereeri:

—¡Pueyasocujaari socua maninia miiriucuaa quiajaniya tamasa maajipohujiniji! ¡Maninia miiniutianiya quia niyanujaariuhuj!

⁴³ ¿Janiyateeri pueya tojjishano maajini, cua Jiyaniijia nucua tiuquiniuria cua tiajinia, na niqiniuria janiya? ¡Maja! Naajaa, ¡jiyanohua timiyaniijia!

⁴⁴ Shusha cua tojjishacari quiajaniya cua sequeyano, cua mueyari cua jiniacuma nujuanequequee na shuquiriniutia. ⁴⁵ Shuquiriaatia quia quiri, quia tiuuniuucua Pueyaso sequesanoocua quiajaniya.

⁴⁶ Maríari sequeree:

—¡Coojia jiyanojua shuquiritiaa cua Jiyaniijia Pueyaso! ⁴⁷ ¡Cua sohuanuuri cua Jiyanoonia Pueyaso timitiaani! ⁴⁸ Juhua najuhuaa quijianijia. Naajaa, Pueyasoori cua jiyanoorii. Cua saquiriojorucuaari na tojjia cua quishacari. Quiarijiani, pueyari pueyaracaanu cua sequenutaniya: “Pueyaso shuquiritiasano María”. ⁴⁹ ¡Pueyasoori jiyanojua maninia miirii janiya! Nojuajaari puetunu cumaacaracajanaa. Nojuajaari tojetaarucujanaa maninia quijia. ⁵⁰ Nojuajaari pueyaracaanu jiyanoocua na tojtianaa, canapuate na rerequeteyaquijiacacuajani. ⁵¹ ¡Nojuajaari

jiyanohua maninia miiquiaa na cumaacata! Nojuajaari niishi-
jiaca pueya shocotequiaari, canapuede tama na cuaqueyajaaja
jiyatequiaari juhua niishijiacaracuajani. ⁵² Nojuajaari cutara
jiyaniijianucua jataree, cuno pojori jiyaniishano niishiyashiji-
aca pueya jiyatesaanura jiyaniijiaara nojori niti saniniuujia.
⁵³ Miaajeejunucua tootijioreeri maninia sumatuuta. Puera
casamiriaca pueya taanuuquiaariiri, casaaju nojori quiojonura.
⁵⁴ Na pueya Israel naacureeri. Majaari na niyajetanu quiquiaari
nojoriicua na taraajenu. ⁵⁵ Naa miiquiaariiri taa na sequequiaari
pa supuetanaacuajani. Pueyasoori naa pa supuetana Abra-
ham sequequiaari: “Seetanujuanaa quiocua taraajenutaniyani-
jia, quiocuajinio supueriquiano pueyacuanio”.

⁵⁶ Na nuhuaji, Mariari queraatia tarishiquiaari Isabel tiajinia. Jiuujia-
naraca raca nuhuaji, Mariari tacatequiaariuhua na tiajiniohua.

Tiuquinijiona Juan rasacari

⁵⁷ Na nuhuaji, Isabel rasacari quiquiaari. Jiyapueratereeri. ⁵⁸ Na
shuriucua quiniaa, mariyata na jiyasoocujinio supueno pueyajuhuj,
nojoriiri jiyanoehua shuquiriquiaari nojori tojishacari taa Pueyaso
jiyanohua taraajequiaari Isabelcuani, na shuquiritiniuria neyanuta.
Nojoriiri Isabelta shuquiriquiaarijuhuaj. ⁵⁹ Nojoriiri Zacarías tiajinia
rerejoquiaari conaaja jiiiasacari ocho juuca, na cararaatiuuquia
co mialesaanura, taa Moisés rootaquiaaricuajani. Nojoriiri na sesojonu
paniriquiaa juucua Zacarías, na que sesaanucua na quiniuria. ⁶⁰ Na
nucuaari saaja sequeree:

—¡Maja! Sesojosaanutaniyano “Juan”.

⁶¹ Pueyari saaja sequeree:

—¿Casaarateni? ¡Majaari quenaaja tamonu quia pueyajiniinio cuno
sesaraca na quiniu quiquiaari! ¿Casaara naa quia sesojonu paniyarini?

⁶² Cunora, pueyari na que Zacarías shishinioree na nequesotanura
taa na sesojonu paniriquiaa neyanuni. ⁶³ Zacaríasri naajiooju casaa
maseree na naajionura tii neyanu sesarano. Naajioreeri: “Na sesa,
Juan”. ¡Pueyari jiuujiatequee! ⁶⁴ Jiyacaritij, Zacarías nitiiri sasaquiti-
acuhua. Juhucatecara pocuarohuari. Pueyaso miishano pohuatere
pueya niquiaraari, na shuquiritiasacari Pueyaso. ⁶⁵ Cunora, na tia
shuriucua quiniaa pueyari jiuujiatere. Puetunu niojuanaari caminiu-
jiushaaquiaari puetunujuanaa cuno Judea tuhuananuhucua quijiaca
pueyara. ⁶⁶ Puetunu nio tojtianaa pueyajanaari niishiriojonuuquiaari.
Tama nojoriijaarijia nequesoreetooquiaari:

—¿Casaaquitijia cuno mueya quiniutianiya na nuhuajitijiaj?

Pueyari niishiquiaari Pueyasoori seetanujuanaa cuno mueyata
quiriquiaa, na cumaquiniuria.

Zacarías sequesano na shuquiritiasacari Pueyaso

⁶⁷ Na que Zacarías jiuujiaari jiyanoehua mishaja quiriqiaa Pueyaso
Sohuanuta. Pueyaso Sohuanuuri na pohuatere. Naaratej, Zacaríasri
naa sequequiaari:

⁶⁸ —¡Jiyanoehua maninia pa Jiyaniijia Pueyaso, pa supuetana Israel Jiyani-
ijia! ¡Cuaara jiyanoehua shuquiritiasaaria mijiria na niniuucua na
pueyacua, pocuaji na tacunura! ⁶⁹ Pocua jiyaroree cumaacaraca
pocujaji Tacuriquianoori. Pa Jiyaniijiaranoori Pueyaso seru David

niquiohuacuajinio rasaanutaniya, taa Pueyaso sequequiaari tariucuacaanucujani. ⁷⁰⁻⁷¹ Tariucuacaanu na sequenu panishano caminiujiuniaacuajaari naa pohuataquiaari pa supuetanaa niquiaratej, taa pa paraa na ritianutaniya pocujini, pa niqiniu paniyaquijia pueyano. ⁷² Nojuajaari sequequiaarijuhuaj, majaari na niyajetanu quiniutianiya na sequesano pa supuetanaa, pocua na taraajenura. ⁷³⁻⁷⁴ Pueyasoori pa supuetana Abraham sequequiaari seetanujuanaa, nojuajanaari pocujia ritianutaniya pa paraa, pa puereyaquiniutia nera pa poonijionura shitimia. ⁷⁵ Nojuajaari Abraham sequequiaarijuhuaj maninia quijiara pa jataniniutianiyaquinaari, saaja nera pa quiniuria pueyaracaanu. ⁷⁶ Quiajaniya saniniujia, quiyanuniyojuanaa, quiaari sesojasaanutaniya Jiyocuacaanu Quinia sequenu panishano caminiujiunia. ¡Quiaari pa Jiyaniijiaranojuanaa puetanutaniya, juhua na nuu jeenucuariquiano! ⁷⁷ Quiocua Pueyaso saquiriojosano pueya niishitiojore, nojoriiri na naata jiyanooshano quiniu sesa nojori miishanojiniji Pueyaso pueya nojori quiniuria. ⁷⁸ ¡Pa Pueyasoori jiyanohua jiyanoojia! Pocua taraajeja. Na jiyarosacari poojia Cuhuatariquiano, nojuajaari pa cuhuatanutaniya, maja ninishiqui pa quiniuria socua. ⁷⁹ Maninia pa cuhuatanutaniyari, maninia pa rucunejonura Pueyaso niqiara, panaatia poojiacata. Naacuajitij, majaari socua pa cajitiuniu quiniutianiya taraatia ninishiqui, juhua pa jamaca shuriucua.

⁸⁰ Conaajaari maashiquiaari. Nojuajaari tama na cuaqueyajaaja cumaquiquiaari socua seetanujuanaa Pueyasooocua tiuujia na quiniuria. Nojuajaari pueyaracaanu cariquia jiyajinia quijia quiquiaari nojuajaara Pueyaso sequenu panishano caminiujiuniu coteequiaarijiaatijia narta Israel pueya niqiara.

2

Jesu rasacari (Mt 1.18-25)

¹ Tiuquinijiona Juan rasaanu nuhuaji, jiyaca jiyaniijiajanaa César Augustoori Roma tiacajiniji sequequiaari puetunu na jittiasano pueyapuejanaa cuaara serojosaaria puetunu nojori jiyacajiniajanaa. ² Pueya jaara coteenujuanaa serojosaaquiaari, Cirenio jiyanishano pueyanoori jiyacari Siria jiyajinia jiyaniijia quiquiaari. Nojuajaari jiyaniijiaara César Augusto jiyatesano quiquiaari. ³ Puetunu pueyajanaari sequesaaquiaari nojori cuaara quiojohuara na raja tiacajinia, na sesaca naajiotasaanura tii.

⁴ Joseeri jiyacari Nazaret tiacajinia quiriqiaa, Galilea jiyajinia. Na raja cutaraari quiquiaari Belén tiacajinia, Judea jiyajinia, tee na supuetana David rasaanuacuani. Naaratej, Joseeri Belén tiacajinia quiaquiaariuhua. ⁵ Mariari tari sequesaaquiaari nojuaja Joseeta caminiutianiya. Naaratej, Mariari nata quiaquiaarijuhua Belén tiacajinia, nojori sesaca naajiotasaanura tii. José niquiocuaranoori tariucua manajaraca quiriqiaa. ⁶ Belén tiacajinia nojori quishacari, jiyacari tari quiquiaari Maria ranu juuca. ⁷ Tii jiyapueratereeri. Conaaja jiu-niocoquiaari toqueraacuacajiniaari. Na nucuaari na niaquiaari juyaca

miaquejajinia. Maríari naa raquiaari cuniqui maja quiquio quishacari nojoriria ruconaa tiuquijia tiajinia.

Pueyaso seya muetasacari borrego cojuanaa pueyacua

⁸ Belén tiaca shuriucua cuno niucuaaja, borregohua cojuanaari sureriquiaa cuhuariquiajinia, na seya nojori cojuasacari. ⁹ Canashiyaquiji Pueyaso seruuri nojoriicua muetaquiaari. Jiyaniijia Pueyaso shacantuuca cumaacaari nojori cuhuataquiaari. ¡Nojoriiri jiyanohua shiriiquitiirii! ¹⁰ Pueyaso seruuri nojori sequeree:

—¡Maja nia puerenu! Niaacua nimiaanijia, jiyanohua maninia casaa cua pohuatanura nijaniya. Cunora, puetunu pueyajanaari shuquiriniutianiya. ¹¹ ¡Niaacuaji Tacunaari tari rasaaree supuetana David tiacajinia! Nojuajaari Pueyaso Jiyarosano, pa Jiyaniijia Cristotuhuj. ¹² Níaa jaara nocua quiaare, niaari conaaja riuriatanutaniya toqueraacuacajinia jiuniososano, juyaca miaquejajinia maano. Naacuajitij, niaari niishiniutianiya, seetanujuanaari cua pohuatasano nijaniya.

¹³ Jiyacaritij, narta Pueyaso seyari na cojishii. Jiyanohua queraatia quiriquiaari. Nojoriiri naa maniniuuaqueetariquiaa Pueyaso:

¹⁴ —¡Jiyanohua maninia pa Pueyaso, jiyocuacaanu Quijia! ¡Nojuajaari jiyanohua pa shuquiritasano, na jiyaronuucua jiyacua quiniaa Jiyanoonia! Naacuajitij, cana Pueyaso shuquiritiaani, nojoriiri jiyanoootionutaniya narta pueyata.

¹⁵ Pueyaso seya jaara tacataquiaariuhua jiyocuacaanu na quiquiojiniohua, borregohua cojuanaari tama sequetooquiaarijiaaja:

—¡Belén tiacajinia pa quiaarequij! ¡Pa niquishii cuno, casaajiniji pa Jiyaniijia numooteree pajaniyacujani!

¹⁶ Nojoriiri ritia quiojoquiaari. Conaaja riuriatatuseri, María, Josénio. Conaajaari juyaca miaquejajinia niasano mariquiaa. ¹⁷ Nojori niquishacari conaaja, nojoriiri ritia tii quiniaa pueya caminiujuirii conaajajiniji Pueyaso seru pohuatasano nojori. ¹⁸ Puetunu pueyajanaa, cante nojori pohuatasano tojiriquiaani, nojoriiri jiuujiateree. ¹⁹ Majaari María niyajetanu quiquiaari puetunu nojori pohuatasanojuanaa. Noojiajinia na niishiriojoriquiaa pueyaracaanuuri. ²⁰ Borregohua cojuanaari quiojoquiaariuhua. Nojoriiri Pueyaso maniniuuaqueetariquiaa nojori tojishanojiniji, nojori niquishanojinijinio. Puetunujuanaari naa quiquiaari taa cuno niucua Pueyaso seru pohuataree nojoricujani.

Conaaja Jesu pasacari Pueyaso Secojoua tiajinia, Pueyasora jiyateso-coriquiano

²¹ María conaaja jaara ocho juuca jiiatiaquiaari, na cararaatiuuquia coori miatesaaquiaari, taa Moisés rootaquiaaricujani. Na miatesaanu nuhuaji, nojuajaari sesojosaaquiaari “Jesu”, taa Pueyaso seru sequetiquiaari Maríacuajani, na manajeyaquishacarijia.

²² Na nuhuaji, Moisés sequesano juucaari quiquiaari na nucua neyacata cuaara juhua tuteera, jeequesano nojori quiniuria Pueyaso niquiara, mueya rasaanu nuhuaji. Naaratej, nojoriiri conaaja Jesu paquiaari Jerusalén tiacajinia, Pueyasora na jiyatesaanura, Pueyasora na quiniuria. ²³ Na queyari naa miiquiaaritij, tariucuacaanu Pueyaso Rupaajinia naajiotasano tojtiajaca nojori quiniucua. Naajiotasanoori naa quiyatej: “Puetunu nia jiyapueranuhujanaa cuaara Pueyasora

jiyatesaaria". ²⁴ Naaratej nojoriiri quiaaree na seru mosaanura nojori-icuara Pueyaso Secojoua tiajinia, juhua jeequesano nojori quiniuria Pueyaso niquiara, taa pueya rootasaaquiaari Moisés naajiotasanojinijicuaajani. Pueyasoori naa sequequiaari Moisés tarijiatej:

"Cuaara puecoosaaria caapiqui mococoonu. Mococoonu jaara quiyaquiri, cuaara puecoosaaria caapiqui shinijia".

²⁵ Jiyacaritij, tamonu pueyanoori Jerusalén tiacajinia quijia quiriquiaa. Na sesa quiquiaari Simeón. Nojuajaari maninia miijia quiquiaari Pueyaso niquiara. Pueyaracaanu Pueyaso shuquiritiaja quiquiaariiri. Nojuajaari pueyaracaanu sashijia Pueyaso cuaara jiyarooro Israel pueyacuaji Tacuriquiano. Nojuajaari Pueyaso Sohuanu jiitiaja. ²⁶ Pueyaso Sohuanuuri na niishitiquiaari majaari na shaajenu quiniutianiya nojuaja cuaara niquiri Cristojaatijia, Pueyaso jiyarosaariquiano. ²⁷ Pueyaso Sohuanuuri na jiyatequiaari namitia cuno juuca Pueyaso Secojoua tiajinia. Naacuajitij, Jesu jaara pasaaquiaari Secojoua tiajinia, nera na miishaanura puetunu tariucuaaanu rootasanojuanaa, Simeónri jiyacari tii na niquirii. ²⁸ Simeónri Jesu patee. Na cacanuureeri. Naa Pueyaso sequereee jiyanoohua na shuquiriniutiiaari:

²⁹ —¡Cua Jiyaniijianaa, tariucuaaja! ¡Quiarijia cutara cua naata cusonu juhuajaniya, shuquiriaatia cua quishacari! Quiaacuajaari tari cua niquitirii tarijia quia sequesano janiya, quia seru cua quini-uucua. ³⁰ Tari niquirii quia Jiyarosanocujanijia, canaacuaji Tacuriquianoni. ³¹ Nojuajaari quia niquitiosano puetunu jiyacajinia quiniaa pueyapueecuarajanaa. ³² Nojuajaari puetunu tau-cuaca jiuujijajanaa cuhatanutaniya, maninia nojori niishiniuria quiajaniya. Naajuhuj, quia pueya Israelni, nojoriiri tamasa pueya shuquiritasano quiniutianiya na seera.

³³ Jesu que, na nucuajuhuj, nojoriiri jiuujiatereee naa Simeón sequesacari conaajajiniji. ³⁴ Na nuhuaji, Simeónri nojoriicua niaree na juaashiquia. Naa sequereeri:

—Pueyaso cuaara jiitiaara maninia niajaniya.

Jesu nucua María sequereejariuhuj:

—¡Cua tojiri! ¡Nio conaajaari cutara pueyano quiniutianiya! Queraatia Israel pueyari juhua tiuriiniutianiya nojori ruuretasacari nojuaja. Saniniuujia, queraatia Israel pueyari cumaatia nujuatujuca quiniutianiya, nocua nojori tiuushacari. Na cumaacata na miiniuucua, pueyari na naata Pueyaso niishiniu maninia. Naajaa, queraatia pueyari na ruuretanutaniya saaja. ³⁵ Naacuajitij, tama pueya niishiriojosano noojia-cajiniajaarijia niishishaanutaniya. Quiara saniniuujia, jiyanoohua taraatiaari quiniutianiya. Quioojiaari juhua mueruuta tohuariquiritishaanutaniya quia mueyacua quia miishacari.

³⁶ Cuniquijia, Pueyaso Secojoua tiajiniani, tamonu motajaari tii quiriquiaajuhuj. Cuno motajaari Pueyaso sequesano caminiujia quiquiaari. Na sesa quiquiaari Ana, Fanuel niyatu. Nojuajaari supuetana Israel niyanu Aser niquiohuacuajinio supueno maaji quiquiaari. Jiyanoohua motaja quiquiaariiri. Shusha niyacoo na quishacari, nojuajaari camiquiaari. Na nuhuaji, siete marijiaari na shocojoquiaari neyacata na quishacari. ³⁷ Neyaca cusonu nuhuaji, socua ochenta y cuatro marijia na shocojoquiaari mashiquio na

quishacari. Nojuajaari pueyaracaanu quiquiaari Pueyaso Secojoua tiajinia, Pueyaso na shuquiritiasacari juuca, niucuanio. Nojuajaari sequeyarucua miaqueyaquiquiaari Pueyaso na secijosacari pueyara-caanu. ³⁸ Simeón pocusacarijia, jiyacaritij, Anaari nocua nimiaa. Na niquishacari conaaja Jesu, Anaari noojiajinia niishiquiaari cante no-juajani. Cunora, Pueyaso sequeree na shuquiriniutiaari: “¡Paacarasho!” Na nuhuaji, nojuajaari juhuacatecara Jesujiniji pohuataree Pueyaso Jiyarosocoriquiano sashijiaca pueya niquiara. Nojori sequereeri:

—¡Niocujaari pa sashishano pa pueyacuaji Tacuriquiano!

Na queya tacartasacariuhua conaaja Nazaret tiacajiniohua

³⁹ Jesu queyari puetunu Moisés naajioneejinia Pueyaso rootasanojuanaa tucuaatquiaari na conaajara. Na nuhuaji, nojoriiri Galilea jiyajiniara tacatequiaariuhua tama nojori tiacajiniohuajaaja, Nazaret tiacajinia. ⁴⁰ Naatujua Jesuuri maashiquiaari. Socua cumueecara quiquiaari-iri, maninia niishijiaranio. Pueyasoori jiyanohua na naacujua.

Mashajaniyojua Jesu quishacari Pueyaso Secojoua tiajinia

⁴¹ Puetunu marijijarajanaa, Jesu queyari quiojoquiaari Nazaret tiacajiniji, Jerusalén tiacajiniara, Pascua juucajinia nojori queranacunura. ⁴² Doce marijia jaara Jesu shocojoquiaari tari, Jesuuri nojoritia jiyacari quiaquiaari shushajanaa, taa nojori quianu jitiquiaaricujani puetunu marijijarajanaa. ⁴³ Queranacunuunu jaara puequequiaari, Jesu queyari quiojoriquiohua juhuajaniya. Jesuuri jiyacari Jerusalén tiacajinia jiyojequiaari. Majaari na queya niishiniu quiriquiaa. ⁴⁴ Nojoriiri jiyaniquiaari Jesu naasucua narta quiojonaa tajinia quiariquiohuaju-huaj. Naacujatij, nojoriiri juhuajaniya rucuaneree puetunu cuno juucajanaa. Cuno niucuaaja, nojoriiri Jesu pajequiaari nojori pueya tajinia, nojori niishishano pueya tajiniano. ⁴⁵ Shaacui quiriquiaari. Cunora, nojoriiri Jerusalén tiacajinia tacatequiaariuhua, tii na pajenuhuara.

⁴⁶ Jiuujianaraca juuca nuhuaji, nojoriiri socua Jesu riuriataquiaari Pueyaso Secojoua tiajinia, Moisés Rootasanojiniji niishitiojonaa pueya tajinia cajiyano. Nojori tojiriquiaari. Nojori nequesoreetariquiaajaari-uhuj. ⁴⁷ Puetunu pueyajanaa, canapuate na tojitiariquiaani, nojoriiri jiuujiatequiaari niishijia Jesu quishacari. Jesuuri maninia nojori rihuaneriquiaa saaja, nojori jaara na nequesoreeriquiaa. ⁴⁸ Na queya jaara na niquiquiaari, nojoriiri shiriiquitiuquiaari. Na nucuaari na sequeree:

—Quiyanunaa, ¿casaara naa quia miirii canaani? ¡Janiyari quia queta quia pajeriquiaani jiyanohua canaa tacaaniutia quiocua!

⁴⁹ Jesuuri na riucuaaree:

—¿Casaara nia pajeriquiaa janiyani? ¿Majateeri nia niishiniu, janiyari cua Que Secojoua tiajinia quiniuucua jiaatiaani?

⁵⁰ Majaari nojori niishiniu quiquiaari Jesu sequesano.

⁵¹ Jesuuri na queyata quiaarohua nojori tiajiniohua Nazaret tiacajinia. Na queya tojijia quiquiaariiri. Na nucuaari pueyaracaanu noojiajinia racataja puetunu na niishishanojuanaa neyanu Jesujiniji. ⁵² Jesuuri socua maashiquiaari, socua niishijia quiquiaarijaariuhuj. Pueyaso shuquiritiasano quiquiaariiri. Puetunu pueyajanaari na shuquiriti-aciaarijuhuaj.

3

Tiuquinijiona Juan pohuatasacari Pueyaso rupaa cariiquia jiyajinia
(Mt 3.1-12; Mr 1.1-8; Jn 1.19-28)

¹ Na nuhuaji, Tiuquinijiona Juanri Pueyaso rupaa pohuatanu coteequiaari. Jiyacaritij, quince mariijaari tari shocojoquiaari César Tiberio, jiyaniijajanaa na quishacari Roma tiacajinia, puetunu jiyaca pueyapuejanaa camarnu na quishacari. Jiyacaritij, Poncio Pilatoori jiyaniijia quiriquiaa Judea jiyajinia. Herodesri saniniuujia jiyaniijia quiriquiaa Galilea jiyajinia. Tarajanu Felipeeri jiyaniijia quiriquiaajuhua Iturea jiyajinia, Traconite jiyajinianio. Lisanasri jiyaniijia quiriquiaa Abilinia jiyajinia. Puetunu cuno jiyaniijianucujanaani, nojoriiri jiyaniijianucua César Tiberio jiyatesano quiquiaari cuno jiyacajinia. ² Jiyacaritij, Anásri Caifásta Judiocuacaacuara secojonaa jiyaniijianucua quiriquiaa. Jiyacaritij, Zacarías niyanu Juanri cariiquia jiyajinia quiriquiaa. Tii na quishacari, Pueyasoori na rupaa na niishitiquiaari. ³ Naaratej, Juanri puetunu Jordán moo shuriuquioco jiyacajanaa tajiquiaari na poojotasacari Pueyaso rupaa pueya niquiara. Nojuajaari naa pohuataquiaaritiij:

—¡Nioojia nia tacatore maja socua sesa nia miiniuria, moojinia cua tiuquinijionura niajaniya, Pueyaso jiyanooniuria niajaniya sesa nia miishanojiniji!

⁴ Naacujitij, supuetana Isaías naajiotasanoori tohuateequiaari. Pueyaso sequenu panishano caminiujiunia na quiniucua, nojuajaari naa miriqui naajiotaquiaari supueriquiano Juanjiniji:

“Pueyano rupaari tojishiya cariiquia jiyajinia nacaano. Sequeyari: ‘¡Jiyaniijia nuura nia jeenucuare! ¡Puetunu maninijanaa nia nuunure, maja shuutiuniu na quiniuria! ⁵ ¡Puetunu tacocuajanaa cuaara mishiquiojosaaria maninia jamatunu na nuu quiniuria! ¡Puetunu tuhuananuhujanaa cuaara jiuurioosaaria jacananu na nuu quiniuria! ¡Shuyorocotunu nuu cuaara pocuareesaaria! ¡Puetunu surocoshiquiajanaa cuaara mishiquiojosaaria jacananu na nuu quiniuria! ⁶ Naacujitij, puetunu jiyacajinia pueyajanaari Pueyaso Jiyarosano niishiniutianiya, Pueyaso jiyanootiriquiano pueyani’ ”.

Naa miriqui Isaías naajiotasanoni, cunoori pueya numooteriquiaa juhuacarijia nojori jeenucuanura noojiaca, Jiyaniijia Jesu tojitiajaca nojori quiniuria.

⁷ Pueya jaara quiojoquiaari na tiacajiniji Tiuquinijiona Juancua, Juan tiuquinijionura nojori, Juanri naa nojori juaaquiaari:

—¡Niaacuajaari juhua sacocua! ¿Cante nia numooteree nia mashiniuria jiyanojua Pueyaso saniitionu panishacari niajaniyani? ⁸ ¡Maninia miijia nia quiri, canaa niishiniuria niaari seetanujuanaa nioojiaca tacatoree sesa nia miiniujiniji! ¡Majaari najuhua nia nia cuaqueyajaaja nia sequenu: “Pueyaso pueyanonijia, supuetana Abrahamjinijinio cua supenuucua!” ¡Nia niishiri, Pueyaso jaara paniri, nojuajaari na naata nio saijiniji shipiniu Abraham niqiuohuarajuhua! ⁹ ¡Pueyaso cajiiri tari mataa naana pajama, sesa naana nuujutajara! Naana jaara sesa jajau muetujua quiri, nushiyari catijasocoriguiano. Naajuhua, niajaniyari juhua sesa muetuna naana, maninia miyashijia nia quishacari. ¡Niaari quera saniitioshiyacuaja!

¹⁰ Naaratej, pueyari Tiuquinijiona Juan nequesotaree:

—¿Taa canaa miyarinitioj?

¹¹ Juanri nojori riucuaaree:

—Cante querajaqueya toqueracani, nojuaja cuaara niqutioora taque cante toqueejuni. Naajuhuj, cante miaquesanoracani, nojuaja cuaara niqutioora miaquesanoojunucua.

¹² Roma tiacajinia quijia jiyaniijajanaa Césarra cumaneeca masejonaari Tiuquinijiona Juancua nijioquiaarijuhuaj. Nojoriiri tiuquinijosano quiniu paniriquiaajuhuj. Naaratej, nojoriiri Juan nequesotaree:

—Niishitiojonanaa, ¿canaarijataj, casaa canaa miyarinijia?

¹³ Juanri nojori riucuaaree:

—Maja puera cumaneeca nia masenu pueyajiniji. Saaja nia jiyaniijia sequesano nia masejore.

¹⁴ Naajuhuj, soldadohuari Tiuquinijiona Juan nequesotaree:

—¿Canaarijataj? ¿Casaa canaa miiniutianiyarinijia?

Juanri nojori riucuaaree:

—Niaacuajaari puecootajaraca. Naajaa, majaari pueya casami nia jaariutianu, nojori nia miananajonuta, nojoriicuara nia tonujusacarijuhua nia sapojonuta. Juhujaniya nia quiri saaja nia jiyaniijia niqutiosano cumaneecata.

¹⁵ Pueyari jyanohua niishiriojoriquiaa Tiuquinijiona Juanjiniji. Nojoriiri Pueyaso sequesano na Jiyarosocoriquiano niquniuucua jiaatiaja. Naaratej, nojoriiri jyaniriquiaa Tiuquinijiona Juan naasucua Cristo, tariucuacaanu Pueyaso sequesano na Jiyarosocoriquianotej. ¹⁶ Nocuaji, Tiuquinijiona Juanri puetunu pueyajanaa sequeree:

—Janiya nareja nia tiuquinijiya moojiniani, juhua jeequejosano nia quiniuria sesa nia miishanojiniji. Tamonu cutaraari cua nuhuaji niniutianiya. ¡Nojuajaari Pueyaso Sohuanu tiuquinijionutaniya nioojiajinia, na cumaaca nia jitianura, seetanujanaa maninia mijia nia quiniuria! ¡Nojuajaari juhua manitia nia saniniujiuniutianiyajuhuj, maninia jiujiaraca nia quiniuria! ¡Nojuajaari socua jyanohua cumaacaraca janiyajiniji! Janiya maara shuquiriaatia quirini, nojuaja jaara cua sequere cua naacutanura nojuaja juhua na seru, quenaaja na sapatu neyocua cua saacatanura. ¹⁷ Niaari niishiyacuaja taa pueyano miiquiaa na trigoni paratu panura na cocua, na sucuanio, saniniuujia na jajau na racatasocoriquiano tiajiniaaco. Naajuhuj, cuno pueyanoori tari niya quiya na pueya na saquiriojonura na tojiyashijiaca pueya tajiniji, na rijiosocoriquiano nata nojori quiniuria. ¡Sesa pueyari juhua trigo sucua catijiasaanutaniya saniniuujia! ¡Nojoriiri jatasaanutaniya manijinija! ¡Cuno maniiri maja na maquesanu quiniutianiya!

¹⁸ Tiuquinijiona Juanri naa pohuataquiaari Pueyaso rupaa pueya niqiuara. Maninia rupaari, na tojtiajaca pueya quiniuria shuquiriaatia. Socua queraatia quiquiaariiri na pohuatasano na numootenura pueya.

¹⁹ Jiyaniijia Herodesri jiyacari tarajanu Felipe niqiuocua jitiariquiaa necocuara. Cuno maaji sesa quiquiaari Herodías. Tiuquinijiona Juanri jiyaniijia Herodes piriyojoquiaari sesa na miishanojiniji. Herodesri maja na tojiniu quiquiaari saaja. Jiyaniijia Herodesri socua queraatia sesa casaa mijia quiquiaari. ²⁰ Na nuhuaji, jiyaniijia Herodesri socua sesa miiquiaari: Tiuquinijiona Juan nujuatequiaari nujuatejojuajiniaari.

Jesu tiuquinishacari moojinia

(Mt 3.13-17; Mr 1.9-11)

²¹ Tiuquinijiona Juan jaara puetunu pueyajanaa tiuquinijioriquiaa-
jaa, nojuajaari Jesu tiuquiniquiaarijiuhua. Jesu tohuatasacari moo-
jiniji, na que Pueyaso secojoriquiaari. Jiyacaritij, jiya cajiniocuaari ri-
atequee. ²² Pueyaso Sohuanuuri Jesuucua roseyaree juhua mococoonu
niquishano. Jiyocuacaanuji, Pueyaso rupaari tojishaaree sequeyano:

—¡Quiaacuajaari cua panishano quiyanuniyojua! ¡Jiyanojua quia
shuquiritiaanijia!

Jesu supuetanaa sesaca

(Mt 1.1-17)

²³ Treinta marijia jaara na shoconujuquiaari, Jesuuri na Que Pueya-
sora poonijionu coteequiaari. Pueyari jiyaniquiaari José naasucua
seetanujuanaa na que quiquiaari. Joseeri Elí niyanu quiquiaari. ²⁴ Eliiri
Matat niyanu quiquiaari. Matatri Leví niyanu quiquiaari. Leviiri
Melqui niyanu quiquiaari. Melquiiri Jana niyanu quiquiaari. Janaari
José niyanu quiquiaari. ²⁵ Joseeri Matatías niyanu quiquiaari. Matatíasri
Amós niyanu quiquiaari. Amósri Nahúm niyanu quiquiaari. Nahúmri
Esli niyanu quiquiaari. Esliiri Nagai niyanu quiquiaari. ²⁶ Nagairi Maat
niyanu quiquiaari. Maatri Matatías niyanu quiquiaari. Matatíasri Semei
niyanu quiquiaari. Semeiri Josec niyanu quiquiaari. Josecri Judá niyanu
quiquiaari. ²⁷ Judaari Joanán niyanu quiquiaari. Joanánri Resa niyanu
quiquiaari. Resaari Zorobabel niyanu quiquiaari. Zorobabelri Salatiel
niyanu quiquiaari. Salatielri Neri niyanu quiquiaari. ²⁸ Neriiri Melqui
niyanu quiquiaari. Melquiiri Adi niyanu quiquiaari. Adiiri Cosam
niyanu quiquiaari. Cosamri Elmadam niyanu quiquiaari. Elmadamri
Er niyanu quiquiaari. ²⁹ Erri Jesús niyanu quiquiaari. Jesúsri Eliezer
niyanu quiquiaari. Eliezerri Jorim niyanu quiquiaari. Jorimri Matat
niyanu quiquiaari. ³⁰ Matatri Leví niyanu quiquiaari. Leviiri Simeón
niyanu quiquiaari. Simeónri Judá niyanu quiquiaari. Judaari José
niyanu quiquiaari. Joseeri Jonam niyanu quiquiaari. Jonamri Eliaquim
niyanu quiquiaari. ³¹ Eliaquimri Melea niyanu quiquiaari. Meleari
Mena niyanu quiquiaari. Menaari Matata niyanu quiquiaari. Matataari
Natán niyanu quiquiaari. ³² Natánri David niyanu quiquiaari. Davidri
Isaí niyanu quiquiaari. Isaiiri Obed niyanu quiquiaari. Obedri Booz
niyanu quiquiaari. Boozri Sala niyanu quiquiaari. Salaari Naasón
niyanu quiquiaari. ³³ Naasónri Aminadab niyanu quiquiaari. Ami-
nadabri Admin niyanu quiquiaari. Adminri Arni niyanu quiquiaari.
Arniiri Esrom niyanu quiquiaari. Esromri Fares niyanu quiquiaari.
Faresri Judá niyanu quiquiaari. ³⁴ Judaari Jacobo niyanu quiquiaari.
Jacoboori Isaac niyanu quiquiaari. Isaacri Abraham niyanu quiquiaari.
Abrahamri Taré niyanu quiquiaari. Tareeri Nacor niyanu quiquiaari.
³⁵ Nacorri Serug niyanu quiquiaari. Serugri Ragau niyanu quiquiaari.
Ragauri Peleg niyanu quiquiaari. Pelegri Heber niyanu quiquiaari.
Heberri Sala niyanu quiquiaari. ³⁶ Salaari Cainán niyanu quiquiaari.
Cainánri Arfaxad niyanu quiquiaari. Arfaxadri Sem niyanu quiquiaari.
Semri Noé niyanu quiquiaari. Noeeri Lamec niyanu quiquiaari.
³⁷ Lamecri Matusalén niyanu quiquiaari. Matusalénri Enoc niyanu
quiquiaari. Enocri Jared niyanu quiquiaari. Jaredri Mahalaleel niyanu
quiquiaari. Mahalaleelri Cainán niyanu quiquiaari. ³⁸ Cainánri Enós

niyanu quiquiaari. Enósri Set niyanu quiquiaari. Setri Adán niyanu quiquiaari. Adánri Pueyaso niyanu quiquiaari.

4

Samaruhua jiyaniijia saniniujiushacari Jesu

(Mt 4.1-11; Mr 1.12-13)

¹ Jesu quiasacariuhua Jordán moojiniji, Pueyaso Sohuanuuri noojijinia quiriquiaa puetunu na cumaacajanaa na jiitianura. Pueyaso Sohuanuuri na jiyatequiaari pueya jiyaqui cariiquia jiyajiniara. ² Tii camueenujuquiaariiri cuarenta juuca. Sesaacaari tii na saniniujiuriquiaa. Majaari quenaaja casaa na miaquenu quiquiaari tii na quishacari. Na nuhuaji miaajequiaariiri. ³ Jiyacaritij, Sesaacaari na sequeree:

—Quiaa jaara seetanujuanaa Pueyaso Niyanu quiri, nio saajia quia jataniri neecaruura na quiniuria.

⁴ Jesuuri saaja na riucuarree:

—Pueyaso Rupaajiniacuajaari naa naajiotasano quiya:

“Pueyanoori maja saminio na quiniu saa miaquesanotaja. Seetanujuanaa saminio quiyari na tojishacari puetunu Pueyaso Rupaajanaa”.

⁵ Na nuhuaji, Sesaacaari Jesu jiyataaree jiyanoehua jiyaconaja tuhuananuucua. Sesaacaari ritia niqutirii Jesu puetunu mijiria jiyacajanaa.

⁶ Jesu sequereeri:

—Janiya quia niqutionutaniya puetunu nio jiyaca jiyaniijianucua cumaacajanaani, maninia jiyaniijiajanaa quia quiniuria mijiria. Janiyari puetunu nio jiyacajanaa niqutiosaaquiaarini. Naacuajitij, janiyari cumaaca niqutioquiaani cana cua niqutionu paniyacujani, jiyaniijia na quiniuria. ⁷ Puetunujuanaari quiara quiniutianiya, quiaa jaara cucuara mojoquetare quia shuquiritianura janiya.

⁸ Jesuuri saaja na sequeree:

—Pueyaso Rupaajiniacuajaari naa naajiotasano quiya:

“¡Quia Jiyaniijia Pueyaso quia shuquiritiare! ¡Saaja nojuaja quia tojiri!”

⁹ Na nuhuaji, Sesaacaari Jesu jiyataaree Jerusalén tiacajinia. Na tataniriiri Pueyaso Secojoua tia cacojiria, jiyocuacaanu. Jesu sequereeri:

—Niiquiji quia jaataare jiyocua, quiaa jaara seetanujuanaa Pueyaso Niyanu quiri. ¹⁰ Pueyaso Rupaajiniacuajaari naa naajiotasano quiya:

“Pueyasoori na seya sequenutaniya na cojuanura quiajaniya.

¹¹ Nojoriiri quia quianutaniya, saajiaacua quia jiriataaquiniucujaji”.

¹² Jesuuri na riucuarree saaja:

—Naa naajiotasano quiyajaariuhua Pueyaso Rupaajinia:

“Maja quia Jiyaniijia Pueyaso quia saniniujiuniu”.

¹³ Sesaacaari naa Jesu saniniujiuniu puecaquiaari puetunujuanaa. Majaari quenaaja na naata quiriquiaa sesa na miitiniuria. Naaratej, rupaquijia na tarinitiaquiaari tamacaririaari.

Jesu coteesacari na poonijosano miiniu Galilea jiyajinia

(Mt 4.12-17; Mr 1.14-15)

¹⁴ Na nuhuaji, Jesuuri tacatequiaariuhua Galilea jiyajinia puetunu Pueyaso Sohuanu cumaacatajanaa. Puetunu cuno jiyajiniajanaa pueyari Jesujiniji caminiujiutioquiaari. ¹⁵ Jesuuri Pueyaso secojojua

tiajiniaqueya niishitiojoquiaari puetunu tiacajiniajanaa cuno jiyajinia. Puetunu pueyajanaari na timitiaja.

Jesu quishacari Nazaret tiacajinia

(Mt 13.53-58; Mr 6.1-6)

¹⁶ Jiyacaritij, Jesuuri quiaquiaari Nazaret tiacajinia, tee na canashitishaaquiaaricujani. Samaatenu juuca, Jesuuri Pueyaso secojojua tiajinia tiuquiquiaari taa na jiitiquiaari miiniucujani. Nojuajaari nujaquiaari Pueyaso Rupaa serojonura pueya niquiara.

¹⁷ Pueyari na niquitioree tariucuaaanu Pueyaso sequesano caminiujiunia Isaiás naajionee jiuniocosano, pueya niquiara na serojosocoriquiano. Jesuuri na saacartaree. Serojonu coteereeri tee nio naajiotasano quiyacujani:

¹⁸ “Pueyaso Sohuanuuri coojiajinia quiyani, na cumaaca cua jiitianura. Naacuajitij, Pueyasoori cua seeratarucuaa maninia rupaa cua pohuatanura casamiijiuniucua pueya niquiara. Cua jiyaroreejaariuhua Sesaaca quioosano pueya cua pohuatanura maninia rupaa Pueyasojiniji. Naacuajitij, nojoriiri cartesano quiriohua Sesaaca sapojosanojiniji. Cua jiyaroreejaariuhua cariyojuarujuri pueya namijiaa cua jecanura, maninia niquijiara nojori quiniuhua. Cua jiyaroreejaariuhua taraatia miitiasusano pueya cua jiyatenura shuquiriaatia quijiacara. ¹⁹ Cua jiyaroreejaariuhua cua pohuatanura pueya niquiara, quiarijaari Jiyaniiija Pueyaso jiyanooshacari pueya”.

²⁰ Na serojonu nuhuaji, Jesuuri naajionee jiuniocorohua. Na niq-uitiorohua na cojuanaari. Jesuuri cajiriohua. Puetunu pueyajanaari tacuriitia na shootiaturiquiaa. ²¹ Jesuuri juhuacatecara pocuarohua. Naa sequereeri:

—Quiarijiani, Pueyaso Rupaajinia nio naajiotasanoori tari tohua-teeree nia niquiara.

²² Puetunu pueyajanaari jiuujiateree shanohua Jesu pohuatasano nojori tojishacari. Naaratej, nojoriiri maninia pocoojoriquiaa Jesujiniji. Tama nojorijaarijia nequesoreetooriquiaa:

—¿Majate nio pueyano José niyanucujaja, niya pa tiacajinia maashin-iotej?

²³ Jesuuri nojori sequereeri:

—Niaa jiyoteeri cua sequenu paniya nio tariucuaaanu sequesano: “Naarajonanaa, tama quia cuaqueyajaaja quia naarajore”. Niaari naa cua sequenu paniya jiyajeneta casaa cua miiniuria cua cumaacata niya tama cua tiacajiniaajajani, taa nia tojiquianucujaja cua miishanojiniji Capernaum tiacajiniacuaani.

²⁴ Jesuuri socua sequereeri:

—Seetanujuanaa nia sequeyanjia, puetunu Pueyaso sequenu panishano caminiujiuniaajanaari tojishoo quijia, tama nojori tiacajiniaajaaja. ²⁵ Supuetana Elías quishacari, queraatia mashiquiopeeri quiquiaari Israel jiyajinia. Jiyanohua miaajesacari quiquiaariiri maru niaquishacari pueyaracaanu. Jiuujianaraca marijaari shocojoquiaari socua seis racanio, maru niaquishacari. ²⁶ Naajaa, majaari Pueyaso jiyaronu quiquiaari Elías narta Israel jiyajinia quiniaa mashiquioocua. Pueyaso cutaraari na jiyaroquiaari taatu mashiquioocua Sarepta tiacajinia, Sidón tiaca shuriucua. Naacuajitij, cuno taatu mashiquioori

miaquesano jiitiaquiaari pueyaracaanu cutara, Elías na mianuutesacari miaajenu quishacari pueyaracaanu. Elías quiniuucua Pueyasocua tiuujia, cuno taatu miaquesanoori maja na pueetanu quiquiaari no-joriria. ²⁷ Naajuhuaaj, supuetana Eliseo quishacari, queraatia leprata cusosuhuari quiquiaari Israel jiyajinia. Majaari quenaaja tamonu no-jorijinijinio naatanishaanu quiquiaari Eliseo jiitiasano Pueyaso cumaa-cata. Saaja cuno tahue Naamánri naatanishaaquiaari cutara, Siria jiyajinjini pueyanoni.

²⁸ Pueyaso secojojua tiajinia quiniaa pueya tojishacari naa Jesu pohu-atasanotej, puetunu nojorijianaari jiyanoehua juaaquioree. ²⁹ Nojoriiri saneecuatuquee. Jesu caponeeturee nojori tiacajinjiiiri. Nojoriiri Jesu jaatucuquiaari socua jiyocuacaanu nojori quijia tuhuananujini-jiria, teyanocua nojori tiaca tiasano quiquiaaricuajani. Nojoriiri na capotunu paniriquiaa juucua tacyiyaji naa na monura. ³⁰ Jesuuri saaja nojori tajiniaaco canujuquiaari juhuajaniya. Quiniquiji tamocora quiaareeri.

Samaruraca pueyanojiniji pohuatasano
(Mr 1.21-28)

³¹ Jesuuri Capernaum tiacajinia quiaquiaari, Galilea jiyajinia tiaca. Samaatenu juuca, Jesuuri pueya niishitiojoriquiaa. ³² Nojoriiri jiu-ujiateree na niishitiojosano nojori tojishacari. Na niishitiojosanoori seetanujuanaa cumaacaraca quiquiaari juhua jiyaniijia niishitiojosano, maja juhua nareja rootasano caminiujunia.

³³ Pueyaso secojojua tiajinia, samaruraca pueyanoori jiyacari tii quiriquiaa. Na niquishacari Jesu, naa jiyanoehua nacareeri:

³⁴ —¡Nazaret tiacajinjini Jesunaa! ¿Taa quia miiniu paniya canaani? ¡Canaa quia niquiri nareja! ¿Quiaate tari niyaree canaa saniitionuucua? ¡Quia niishiyacuajaniija, cante quiajaniyani! ¡Quiaacuajaari sesa miyashijia Pueyaso Niyanu!

³⁵ Jesuuri samaru sequeree:

—¡Quia sanaajere! ¡Quia tohuatate nio pueyanojiniji!

Samaruuri pueyano pojotequee puetunu pueya niquiarajanaa. Pueyanojiniji tohuataqueeri. Majaari na nuhuajiria sesa na miiniu quirii pueyano. ³⁶ Puetunu pueyajanaari shiriiquitiurii. Tama Jesujiniji sequetooreejaariija:

—¡Nia tojiri! ¿Taamueca rupaatucuaanojoni? ¡Nio pueyanoori samaruhua jiyaronu niishiya juhua jiyaniijia! ¡Na rupaari jiyanoehua cumaacaraca! ¡Cunora samaruhua tohuataniriiri!

³⁷ Puetunu cuno jiyajiniajanaa, Jesu miishanojinijiiri caminiujiushaaquiaari pueya niquiara.

Jesu naatanishacari Simón Pedro reyarucua
(Mt 8.14-15; Mr 1.29-31)

³⁸ Jesuuri Pueyaso secojojua tiajiniji tohuareetaquiaari na pueyata. Quoijiyareeri. Simón tiajinia tiuquitiushiiri. Simón reyarucuaari jiyacari jiyanoehua naseeca matariquiaa. Pueyari Jesu sequeree na naataniniuria. ³⁹ Jesuuri cusosu cacó nujuasee. Jesuuri na naseeca cusonu jiyaroree. ¡Na naseecaari ritia shinitiaquee! Tariucua jiyotuucaari jiyacari sanemaa, na tiajinia quiniaa pueya na mianuutenura.

Jesu naatanijiosacari queraatia cusosuhua

(Mt 8.16-17; Mr 1.32-34)

⁴⁰ Pananu tiuquishacari, puetunu pueyajanaa, cante cusosuhua jiitiaquiaarini, nojoriiri na jiyataquiaari Jesuucua. Jesuuri na juaashiquia niaquiaari puetunu cusosuhuacuajanaa. Nojoriiri queraatia tamaatia cusonu jiitiaquiaari. Jiyacari na naatanijioree puetunujuanaari. ⁴¹ Naajuhuj, queraatia samaruhuari tohuareetaquiaari cusosuhua-jiniji. Samaruhuari naa nacaquiaari Jesuucua:

—¡Quiaacuaja Pueyaso Niyanu!

Jesuuri nojori juaarii. Majaari na shanacunu quirii nojori pocuanura, nojori mariqui pueya niquiara pohuatareeri, nojuajaari Pueyaso Jiyarosano.

Jesu pohuatasacari Pueyaso rupaa Pueyaso secojonuujua tiajiniaqueya

(Mr 1.35-39)

⁴² Tariquicuaji, Jesuuri tiacajiniji quiaquiaari tamaquicuata tamaaja. Pueyari na pajequiaari. Nojoriiri socua nocua tiuquijioquiaari na pajenuusacari. Majaari nojori cartenu paniniu quiquiaari Jesu quianura cuniquiji. ⁴³ Jesuuri nojori sequeree saaja:

—Janiyari jiyarosaaquiaarini pueyapue niquiara cua pohuatanura quiarinio Pueyaso Rupaa. Quiarijiani, Pueyasoori pueya jiyanooniu paniya, nojori quiniuria na pueya, nojori tiuushacari nocua. Naaratej, janiyari na rupaa pohuatanura quianu paniya tamonu tiacajiniajaniuhuj. Janiyacuajaari cunora jiyarosaaquiaarini.

⁴⁴ Naacuajitij, Jesuuri puetunu Judiocuaca jiyajiniajanaa rucuanajoquiaari Pueyaso rupaa pohuatanura puetunu Pueyaso secojonuujua tiajiniaqueyajanaa.

5

Sapitiaajara jaquerootanaa shiriiquitiushacari

(Mt 4.18-22; Mr 1.16-20)

¹ Tamacari, Jesuuri caminia casaqueyaji quiriquiaa na pueyata. Jesuuri Pueyaso rupaa pohuatariquiaa. Puera jiyanohua pueyari nocua catecanoquiaari catecaji na tojitianura nojuaja. Nojoriiri Jesu tanuujuriquiaa puera. ² Jesuuri caapiqui bote niquirii caminia casaqueyaji. Shaama quiriquiaari. Na camaruhuari na shuriucua jeequejonuuriquiaa na shiyaruhua. ³ Jesuuri Simón botejinia tacaquiaari. Simón sequereeri cuara bote juaariocotaara caminia jiuujiajinia naata. Na nuhuaji, Jesuuri cajirii. Quiniquiji pueya niishitiojonu coteequiaariiri. ⁴ Jesu jaara niishitiojonu puecaquiaari, Simón sequereeri:

—Queronijinia pa jaaretaare. Niocua tii jartasee nia shiyaruhua sapitiaajara.

⁵ Simónri na riucuaaree:

—Niishitiojonanaa, canaacuajaari tari jaquerootariquiaa najuhuanani. Canaari naajaa nocua juhuaquemaani. ¡Saa shaa quiriquiaanojua! Naajaa, quiaacuaja na sequeya, socua canaa jaquerootarohuacuarauqij.

⁶ Nojori jaara socua na shiyaruhua jartaquiaariuhua, jiyanohua queraatia sapitiaaja ritiatureeri! Shiyaruhuari sureequatanu coteequiaari.

⁷ Nojoriiri jatiqui nata poonijionaa piinioree bote tarajanujinia quiyano, nojori niniuria na naacutanura. Nojoriiri ritia nimiaa. Cuno caapiqui

bote mishinijituree sapitiaajataari. ¡Quera tiuquitiariquiaari queraatia sapitiaajata! ⁸ Simón Pedro niquishacari naa Jesu miishano nojoriratej, Jesuucuaa mojoquetareeri. Jesu sequereeri:

—¡Jiyaniijianaa, maja cua rupenu socua! Janiya puera sesa pueyanoni quia rupuena cua quiniuria.

⁹ Simónri shiriiquirii, jiyanhua queraatia sapitiaaja nojori quiasacari. Nata quiniaa pueyari shiriiquitiuriijiuhua. ¹⁰ Cuno pojoritia quiriquiaaariuhua Zebedeo niquiohua, Santiago, Juannio. Nojoriiri Simón cojiniaa quiquiaari. Jesuuri Simón sequeree miriqui:

—Maja puerenu. Quiaari saniniuujia pueya quioojua quiniutianiya juhua sapitiaaja.

¹¹ Nojori shiitiasacari, nojoriiri puetunu na casaajanaa tiujiaquiaari Jesuta nojori quiojonura.

Jesu naatanishacari lepraraca cusosu

(Mt 8.1-4; Mr 1.40-45)

¹² Tamonu tiacajinia Jesu quishacari, lepraraca cusosu pueyanoori tii quiquiaari. Na niquishacari Jesu, nocuara jacamareeri. Jesu sequereeri:

—Jiyaniijianaa, quiaa jaara paniri, quia naata cua naataniniu cua cusonujiniji.

¹³ Jesuuri na quiaree. Na sequereeri:

—Taaquiririnj. Quia naataniniu paniyanijia. Quia cuaqueya cuara jeequehuara.

Naa na sequesacartij, na lepraari shaajequee na cuaqueyajiniji.

¹⁴ Jesuuri na rootaree maja na pohuatanura na miishano tamasaca niquiara. Na sequereeri:

—Saaja pueyacuara secojonaa jiyaniijia quia niquitishii quia cuaqueya, na cartenuhuara quiajaniya, pueya tajinia quia rucuanefonuhua juhujaniya. Naajuhuj, quia seru quia niquitiosee Pueyasocuara catijasocoriquiano. Naa quia miiri taa Moisés rootaquiaaricujani, puetunu pueyajanaa niishiniuria quiaa tari jeequerohua quia cusonujiniji.

¹⁵ Maninia Jesu miishanojinijiiri jiyanhua socua tamaquiicua caminiujiushaaquiaari pueya niquiara. Naaratej, jiyanhua queraatia pueyari nocua nijioquiaari na tojiniuria, mariyata Jesu naatanijionura nojori, nojori cusonujiniji. ¹⁶ Jesuuri saaja pueya quiyaquishaqui quiaquiaari na Que Pueyaso na secojonura. Nojuajaari naa pueyaracaanu miiquiaari.

Jesu naatanishacari cumatacuruhuana cusosu

(Mt 9.1-8; Mr 2.1-12)

¹⁷ Tamonu juuca, Jesuuri pueya niquiara niishitiojoriquiaa. Na tojitanaa tajinia cajituriquiaaariuhua Fariseocuaca, Moisés Rootasanojiniji niishitiojonaanio. Nojoriiri nijioquiaari puetunu Galilea jiya tiacajiniijianaa, Judea jiya tiacajiniji, Jerusalén tiacajininio. Jesuuri jiyanhua Pueyaso cumaaca jitiariquiaa cusosuhua na naatanijionura. ¹⁸ Jiyacartij, socua pueyari tiuquiijoquiaari. Nojoriiri cumatacuruhuana cusosu patariquiaa na matujinia. Nojoriiri juuca na tiuquitanu paniriquiaa tajiniaaco Jesuucua. ¹⁹ Puera queraatia pueya rerejosacari tohuateyaji, majaari na naata cusosu tiuquinitiasaanu quiquiaari. Nocuaji, nojoriiri tia cacojiria tacanitiaquiaari cusosu. Cuno

pueya tiaca tucuruuri quiquiaari marauneeca majeetejosano. Nojoriiri tia nijinia papataquiaari. Na nuhuaji, nojoriiri cusosu roshinitiaree cuhuocojiniji na matujinia, Jesu nujuasaqui pueya tajinia. ²⁰ Jesu niquishacari taa nojori tiuuriquiaa nocuani, cunora Jesuuri cusosu sequere:

—Pueyanonaa, quiaacuaja tari jiyanooshaaree sesa quia miishanojiniji.

²¹ Naa Jesu sequesacaritij, Moisés Rootasanojiniji niishitiojona, mariyata Fariseocuacaari naa niishiriojonuuriquiaa: “¿Cantejaara cuno pueyanoni? ¡Nojuajaari tama na cuaqueyajaaja jiyateya juhua Pueyaso na quiniuria! ¡Pueyanoori maja na naata tamonu pueyano jiyanooni sesa na miishanojiniji! ¡Saaja Pueyaso cutaraari na naata pa jiyanooni!”

²² Jesuuri naa nojori niishiriojosano niishiriquiaa. Cunora, nojori sequereeri:

—¿Casaara naa nia niishiriojiyani? ¿Niaateeri cucuaji taacanuyajaa? ²³ Jiyayara, maja jiyajeneta cua sequenura: “Quiaari tari jiyanooshaaree sesa quia miishanojiniji”. ¿Jiyajenetatejaariuhua sequenura: “Quia sanere. Quia rucuanere”? ²⁴ Cunora, janiyari quiarijia nia niishitiniutianiyani, janiyari mijiria jiyarosaquiaarini pueya cua jiyanooniuria sesa nojori miishanojiniji.

Naacuajitij, Jesuuri cumatacuruhua pueyano sequere:

—Cua tojiri. ¡Quia sanere! ¡Quia matu quia patarohua quia tiajinia!

²⁵ Jiyacaritij, pueyanoori sanequee nojori niquiara. Na tiajinia patarohua na matuuri. Shuquiriaatia quiariquiohua na tiajiniohuari Pueyaso na maniniuhuaqueetanuta. ²⁶ Puetunu pueyajanaari shiriiquitirii. Nojoriiri Pueyaso maniniuhuaqueetariquiaa cuno maninia casaa nojori niquiniuucua. Nojoriiri na puerenuta naa sequetuquiaarijiuhuaj:

—¡Paari quiarijia jiyanhua maninia miishano niquiriini! ¡Nocujaji jiuujiatesano!

Jesu sequesacari Leví, na pueyano na quiniuria

(Mt 9.9-13; Mr 2.13-17)

²⁷ Nio nuhuaji, Jesuuri tohuataquiaari. Tamonu pueyano niquiriiri jiyaniijiajanaa Césarra cumaneeca masejosaqui cajiyano. Na sesa quiquiaari Leví. Jesuuri na sequere:

—¡Cua nuhuajiri, cua pueyano quia quiniuria!

²⁸ Jiyacaritij, Leviiri ritia sanequiaari. Puetunu na jítiasanojuanaa tiujiaqueeri. Jesuta quiaqueeri.

²⁹ Na nuhuaji, Leviiri jiyanhua queraatia sumatuquiaari na tiajinia, Jesu na queranacutanura. Queraatia narta cumaneeca masejonaari tii quiriquiaajaacuhaj. Nojoritia miaquejajinia cajituriquiaari, socua tamasaca pueyano. ³⁰ Moisés Rootasanojiniji niishitiojona, mariyata narta Fariseocuacaari juhuacatecara Jesu pueyacuara rimiaaquenu co-tequiaari. Nojoriiri naa Jesu pueya sequeturee:

—¿Casaara cuno sesa pueyata nia miaqueyani, nia ratuyani, tama parta pueya tacartajacatajaajanio? Nojoriiri pa paraa sequera cumaneeca masejona.

³¹ Jesuuri nojori riucuaaree:

—Cante na cuaqueya jiyaniyani nojuaja maja cusosu na quiniu, nojuajaari maja naarajona na paniniu. Cusosuhua cutaraari naarajona paniya. ³² Naajuhuj, majaari mijiria cua ninu quiquiaari maninia

mijia pueyacia. Niquiaari cutaranijia sesa mijiaa cua tacatonuhuaa Pueyasocua, maninia mijia nojori quiniuria.

Pueya nequesotasacari Jesu, casaara na pueya carteyaquiya miaquenu quenaajani Pueyaso nojori secojonura

(Mt 9.14-17; Mr 2.18-22)

³³ Pueyari Jesu sequeree:

—Tiuquinijona Juan pueya cutaraari sequeyarucua miaqueyaquiuaa. Nojoriiri naa Pueyaso secojoquiaa pueyaracaanu. Fariseocuacaari naa miiquiaajuhuaaj. Quia pueya saniniuujia, saaja miaquequiaari, ratuquiaari. ¿Casaarateni?

³⁴ Jesuuri nojori riucaaree:

—Pueyano camishacari maaji, majaari masuusano pueya miaajenu, camiriquiano pueyano jaara nojoritia quiyajaa. ³⁵ Tamacari, camiriquiano pueyano jaara jaariutiasaare nojori tajiniji, jiyacariti nojori cutaraari miaqueyaquiniutianiya. Naajuhuaaj, janiyari cua pueya tajiniji jaariutiasaanutaniyani. Jiyacariti nojori cutaraari miaqueyaquiniutianiya.

³⁶ Jesuuri socua nojori niquiara pahuataquiaari nio miriqui sequesano:

—Majaari pueyano miatenu quijia na toque quiariquijiniji, na toque mocua cuhuoco na cushipirijiotajara. Saniniuujia, jaara naa miiritij, na toque quiariqui sesoyari. Quiarinio toquerauri sesoshiyajuhuaaj, toque mocujinia na posequesacari. Cua rupaari naajuhuaaj, juhua quiarinio toque. ³⁷ Naajuhuaaj, majaari na naata quiariniacu uva caaca mishinishaanu shoque tariucuacojinia, tariucuaco shoque mariqui pojuaretareeri, uva caaca jaara jerema vino na quiniuria. Jaara naa miishaaretej, vinoori najuhuaana niitiashiya. Shoqueeri najuhuaana sesoshiyajuhuaaj. ³⁸ Naaratej, maninia cutaraari quiariniacu uva caaca shuujionu shoque quiariquiojinia, maja vino niitiasaanuucuaaji, na quiquo shoquenio. Naajuhuaaj, nia niishitiojosanoori juhua tariucuaco shoque. ³⁹ Naajuhuaaj, pueyano jaara vino tariucuanacu ratujua quiri, majaari na paniniu quiariniacu vino. Sequeyari: “Tariucuanacuuri maniniacuaja”. Naajuhuaaj, majaari cua niishitiojosano nia paniniu, quiarinio na quiniuucua.

Jesu pueya carojotasacari trigo samaatenu juuca

(Mt 12.1-8; Mr 2.23-28)

6

¹ Tamonu samaatenu juuca, Jesuuri trigo cuhuariquiajiniaaco quiojoriquiaa na pueyata. Na pueyari trigo carojotariquiaa. Nojoriiri na juaashiquiajinia na shuquiojoriquiaa na corequetanura. Na nuhaaji, na jajau miojonuuriquiaari. ² Fariseocuacaari na niqitiariquiaa. Nojoriiri Jesu pueya juarii:

—¿Casaara nia tojtiaaquiya Moisés Rootasanoni, taa na sequequiaaricuaajani maja pa poonijionura samaatenu juuca?

³ Jesuuri nojori riucaaree:

—¿Majateeri nia serojonu quiquiaacuaja casaa supuetana David miiquiaari na miaajesacarini, mariyata na cojiniaa miaajesacarijjuhuaaj?

⁴ Nojuajaari Pueyaso Secojojua tiajinia tiuquiquiaari. Pueyasora niojosano pan pooquiaariiri. Na sareeri. Mariyata nata quiniaa niq-uitiojoreeri nojori sanurajuhuj. Cuno panri sequesaaquiaari saaja pueyacuara secojonaa sasocoriquiano. Naajaa, Davidri na saquiaari. Majaari Pueyaso juaaniu quiquiaari naa David miiniuucua.

⁵ Jesuuri socua cuno Fariseocuaca sequequiaari:

—Janiyacuajaari Pueyaso Jiyarosaroni. Jiyaniijiara jiyate-saaquiaarinijia cua sequenura casaate samaatenu juuca miishiyani, Pueyaso pa shuquiritiniuria.

Jesu jeeacasacari pueyano juaashiquia, cuseetucojuara joojequetano
(Mt 12.9-14; Mr 3.1-6)

⁶ Tamonu samaatenu juuca, Jesuuri Pueyaso Secojojua tiajinia tiuquiquiaari. Tii niishitiojoriquiaari. Quiniqui quiriquiaari pueyano, cuseetucojuara joojequetano na juaashiquia miaquetajara.

⁷ Moisés Rootasanojiniji niishitiojonaa, mariyata Fariseocuacaari Jesu shanacutariquiaa. Nocuara tonujunu paniriquiaari Jesu jaara cuseetucojuara joojequetano juaashiquiaraca pueyano jeeicare samaatenu juuca. ⁸ Jesuuri tari niishiriquiaa taa nojori niishiriojoriquiaani. Jesuuri cuno rimiajatucojua pueyano sequeree:

—¡Quia sanere! ¡Niya quia nujuasee pueya tajinia!

Pueyanoori saneeque. Nujuaseeri tee Jesu sequequiaari na nujuanu-racujani. ⁹ Jesuuri nocuara tonujunu panijiaca pueya sequeree:

—Nia nequesotareeraj. Cua sequere, ¿taa pa niishitiojosaaquiaari Moisés Rootasanojinijini? ¿Paate maninia miya samaatenu juucani? ¿Paate sesa miya soj? ¿Cusosuhuate naatanijioshiya, puetushiyajanaa monu soj? ¿Taa nia sequeyani?

¹⁰ Jesuuri puetunu na shocuaqueya quiniaajanaa niquinijoree. Na nuhuaji cusosu sequereeri:

—¡Quia juaashiquia quia shiitiore!

Pueyanoori na juaashiquia shiitioree. ¡Na juaashiquiaari ritia jeeque-quee! ¹¹ Cuno pueyari jiyanohua juaaquioree naa Jesu miishacaritij. Nojoriiri naa pocoojoquiaari tamajaaja: “¿Taa pa miiniutianiya socua cuno Jesuurini?”

Jesu saquiriojosacari doce pueya na jiyaramiquishocoriquiano
(Mt 10.1-4; Mr 3.13-19)

¹² Jiyacaritij, Jesuuri tamonu tuhananuucua quiaquiaari, Pueyaso na secojonura. Puetunu niucujanaa secojoriquiaa Pueyasoori. ¹³ Jaara juhuaquequiaari, Jesuuri na tojitajaca pueya sequequiaari nocua nojori nijionura. Puetunu nojorijinijiniojuanaa, Jesuuri nareja doce pueya saquiriojoquiaari. Nojori sesojoreeri, “cua jiyaramiquishocoriquiano pueya”. ¹⁴⁻¹⁵ Nioori Jesu saquiriojosano pueya sesaca: Simón. Jesuuri na sesojoquiaarijuhua “Pedro”. Simón tarajanu Andrésri saquirio-josaaquiaarijuhua, mariyata Santiago, Juan, Felipe, Bartolomé, Mateo, Tomás, Alfeo niyanu Santiago, socua tamonu Simónnio. Nojuajaari Celote maanujiniji pueyano quiquiaari. ¹⁶ Santiago niyanu Judasri saquiriojosaaquiaarijuhua, Judas Iscarioteno. Nojuajaari quiquiaari Jesu quiateriquiano mosocoriquiano.

Jesu niishitiojosacari queraatia pueya
(Mt 4.23-25)

17 Na nuhuaji, Jesuuri tuhuananujiniji rosetaquiaariuhua na saquiri-
ojosano pueyata, jamatujiniara. Cuno jamatujinia, queraatia na nuhua-
jiniaa pueyari tari nocuaji quiriquiaa. Mariyata jiyanohua queraatia
pueyari tii quiriquiaa puetunu Judea jiyajinjinio, Jerusalén tiacajinjin-
iojuhuaj, shoniniacu caminia shuriuquiumia quijiacajinjinio pueyanio.
Saaja nio pojoriiri quiquiaari Tiro tiacajinjinio, mariyata Sidón tiaca-
jiniji pueyanio. Puetunu cuno pueyajanaari cuniquiria nijioquiaari no-
jori tojiniuria Jesu, na cusonujiniji nojori naatanijosaanurajuhuj. Je-
suuri nojori naatanijioree. 18 Naajuhuj, taraatia samaruhua miishano
pueyari naatanijosaaquiaarijuhuj. 19 Puetunu cusosuhajanaari Jesu
quianu paniriquiaa, naatanijosano nojori quiniuria. Jesu cumaacaari
jiyanohua poonijioriquiaa. Naaratej, puetunu pueyajanaari naatani-
jiosaariquiaa, saaja nojori quiasacari nojuaja.

*Jesu pohnatasano shuquiriaatia quijiajiniji, taraatia quijiajinjinio
(Mt 5.1-12)*

20 Na nuhuaji, Jesuuri na pueya niquirii na pocuanura. Naa se-
quereeri:

—Niaari Pueyaso shuquiritasano, niaa jaara niishiriquia nioojia
saaja sesa miiija. Niaa jaara niishiri nioojia naa quiyatej, niaari Pueyaso
jiitiasano pueya quiniutianiya.

21 'Niaari Pueyaso shuquiritasano, niaa jaara maninia miiija quiniu-
ucua jiaatiaa, taa miaajeyantio pueyano miaquesanoocua jiaatiaacuaani.
Niaa jaara naa quiniucua jiaatiaa, Pueyasocuaajaari nia jataniniu-
tianiya maninia quijiaara nia quiniuria.

'Niaari Pueyaso shuquiritasano, niaa jaara sesa nia miiniu nuhuaji
taraajequiaa. Niaari na nuhuaji saroojonutaniya nia shuquiriniutia,
niaa jaara jiyanooshaarohua.

22 'Niaari Pueyaso shuquiritasano, pueya jaara nia niqiniu
paniyaquiri, pueya jaara nia taanuure, pueya jaara nia macaatiri,
pueya jaara nia soore cua tojijia nia quishacari. 23 Niaa
jaara naa miishaaretej, jiyanohua nia timiri. Nia jaacuatate nia
shuquiriniutia. Niaa jaara naa nia miishacari rejeretajaca quiri,
Pueyasoori nia niishishoo casaa racatasano jiitiaa jiyocuaaanu, na
niqitiosocoriquiano niajaniya. Nia paraa supuetanaari naa taraatia
miiquiaari tariucuaaanu Pueyaso sequenu panishano caminiujuniaa
pueyajuhuj.

24 'Niaari saniniuujia taraatia quijia nia quiniutianiya, jamuejaca
casamiriaca pueyanaa. Niaacuaajaari tari shuquiriaatia quiquianu,
puetunu nia panishanojuanaa nia jiitiasacari.

25 'Taraatia quijiaacaari niajaniya, cante sequejani: "Janiyacuaaja
maninia pueyanoni. ¿Janiyatucua casaara paniri Pueyaso jiyanooniuria
janiyani?" Naa sequejaca pueyanaa, na nuhuaji, niaari niishiniutianiya
niaari saaja sesoriquia pueya seque.

'Taraatia quijiaacaari niajaniyajuhuj, jeya nia quiyaquishacari
Pueyasora, saaja tamajaaja shuquiriaatia nia quiniuria nia cojesacari
pueyaracaanu. Niaari na nuhuaji sapuenutaniya Pueyasooju nia
quishacari pueyaracaanu.

26 'Taraatia quijiaacaari niajaniya, puetunu pueyajanaa jaara maninia
pohnataquiaa niajaniyajiniji, maninia nia cojiniucua cuno pueya,
Pueyaso tojiyashijia pueyani. Cuno pojori supuetanaacuaajaari naa

shuquiritiaquiaari cuno sapojonuujuaa, canapueete maja seetanujuaanaa Pueyaso sequesano caminiujiuniaa quiquiaaricujani.

*Pa paraa panijiaca pa quirij
(Mt 5.38-48; 7.12)*

²⁷ 'Niajaniya, cante niya cua tojitiaacuajani, cua tojitiuri. ¡Nia paraa nia paniri! Maninia nia miiri nia niquniu paniyashijia pueya. ²⁸ Saaja maninia nia riucua nia juayano pueyano. Sesa nia miijiaca pueyacuara nia secojore Pueyaso. ²⁹ Pueyano jaara quia maseca piri, quia jiyanoori nojuaja. Jaara taquijiria pirijiuhuaj, socua quia jiyanoori. Majaari na naminiu. Pueyano jaara shiniquiaacuaji quia cushishano toque jaariutiare, quia cacojoqui quia niqutiorejuhuaj. ³⁰ Pueyano jaara quia sequere quia casamijiniji quia niqutionura nojuaja, quia niqutiore nareja. Pueyano jaara quia casaa jaariutiare, majaari na sequenu: "Cua niqutiorehua". ³¹ Maninia nia miiri tamasaca, taa nia paniquiaa tamasaca miiniuria niajanuyacuani.

³² 'Niaa jaara saaja nia panijiaca paniri quia, majaari nia jiyaniniu Pueyasoori nia shuquiritiaa naa nia miishacari. Sesa miijiaca pueyari naa paniquiaa nojori panijiacajuhua. ³³ Maja puera maninia miijia niajaniya, niaa jaara maninia miiquiaa saaja noo pojori, canapueete maninia miiquiaa niajanuyacuani. Sesa miijiaca pueyari naa maninia miiniu niishiquiaajuhua, noo pojori canapueete maninia miiquiaa nojoricuaani. ³⁴ Maja puera maninia miijia niajaniya, niaa jaara nia masena niqutioquiaa na panishano, nia niishishacari nojuaja ritia niqutionutaniuhua niajanuyajiniji na masesano casaa. Sesa miijiaca pueyari na casaa rupaquijia nia niqutioquiaa narta sesa miijia pueyajuhua, na niishishacari nojori ritia niqutionutaniuhua nojori masesano casaa rupaquijia. ³⁵ Nia paniri nia paraa. Maninia nia miiri nojori. Nia casami nia niqutiore nareja, pueya jaara na paniya rupaquijia. Majaari nia taraajenu cuno pueyano jaara nia niqutioyaquirohua nia casaa. Naa nia miishacaritij, niaari seetanujuaanaa Jiyocuacaanu Quijia muerasu. Pueyasoori socua jiyanoohua queraatia nia niqutionutaniya tamasaca nia niqutiosanojiniji. Naaratej, capora nia quiri, taa nia Que Pueyasocuaani. Nojuajaari nareja niqutiojoquiaa sesa miijiaca pueya, mariyata canapueete na sequeshijiacani "paacarasho". ³⁶ Naaratej, jiyanootio nia quiri, taa nia Que Pueyasocuaani, jiyanoojia.

*Maja sesa nia niishiriojonu niarta pueyanoocuara
(Mt 7.1-5)*

³⁷ 'Maja nia rimiaaquenu tamasacaacuara, Pueyaso mariqui saniniujia nia jiyanoyaquiriiri. Niaa jaara tamasacaacuara tonujiyashijia quiri, naajuhua, Pueyasoori maja na saneenu quiniutianiya sesa nia miishanojuhuaj. Niaa jaara jiyanootio quiri, Pueyasoori nia jiyanoonutianiyaacuahuaj. ³⁸ Niaa jaara tamasaca niqutioquiaa na panishano, Pueyasoori naa nia niqutionutaniya nia panishanojuhuaj, maninia shanacusano, jiuuquiutiasano, maninia quianujusano, mishaja quera niitiyano. Pueyasoori mariyata juhua nia shanacutajajinia nia niqutionutaniya niajaniya, taamueca shanacutajajinia nia niqutioquiaa pueyacuani.

³⁹ Jesuuri socua niishitiojoquiaari pueya, nio miriqui sequesanota:

—¿Cariyojuarute na naata narta cariyojuaru jaatucunu? Naa na jaatucusacari narta cariyojuarutej, nojoriiri mariyata totenutaniya raama.⁴⁰ Pueyanoori maja socua niishijia na niishitiojonajiniji. Jaara puetunu maninia niishitiojosaarejanaa, saaja jiyacariti niishijia quiniutianiya-jaariuhuj, juhua na niishitiojonaja.

⁴¹ ¿Casaara nia niquiya rucucua maano quia tarajanu namijiajiniani, niaa jaara puereetuuca maca jiitiaa tama nia namijiajiniajaaja?⁴² Niaa jaara puereetuuca maca shanacuya tama nia namijiajiniajaaja, ¿niaatucua casaara sequere quiarta pueyanoni: “Cua tarajanunaa, cuno rucucua pa taquiri quia namijiajiniji”? Sesa jiuujiaracanaa, tama nia namijiajinijiaaja nia pare coteenu cuno maca. Na nuhuaji cutara nia naata maninia niquniu, cuno rucucua nia taquiniuria nia tarajanu namijiajiniji. Naaratej, majaari nia rimiaaquenu niarta pueyanooacara.

Naanaari niishishano na jajaujiniji

(Mt 7.17-20; 12.34-35)

⁴³ Maninia naanaari maja na naata piiquia jajau muetunu. Saniniuujia, sesa naanaari maja na naata shoqueeca jajau muetunu.⁴⁴ Puetunu naanajanaari maninia niishishano na muetusanojiniji. Majaari pa naata satuna carojonu shuunijajiniji. Naajuhuj, majaari pa naata tuhuaracona carojotanu saarianajiniji.⁴⁵ Naajuhuj, maninia pueyanoori maninia pocuaa cutara, maninia jiuujiaraca na quishacari. Sesa pueyanoori saniniuujia sacuaraatia rimiaaqueja, sesa jiuujiaraca na quishacari. Casaa pa niishiriojoquiaa poojiajiniani, paari cuno pocuaani.

Miriqui Jesu pohuatasano cumueeca jiyajiniji, sasaca jiyajinijinio

(Mt 7.24-27)

⁴⁶ ¿Casaara nia sequequiaa janiyani, “Cua jiyaniijianaa, cua jiyaniijianaa”, niaa jaara cua rootasano tojitiaaquiquiaa?⁴⁷⁻⁴⁸ Cua tojiri. Cante cua rupenara quirii cua rootasano tojjia na quiniuriani, nojuajaari juhua tamonu pueyano cante maninia tiaquiaarini. Cuno pueyanoori coteenu tucuaara jiuutiaquiaari cumueeca jiyajinia na morijiuucujaji. Na nuhuaji, moo jaara pajaashiquiaari, pajaacaari jiyanhua cajiquiaari cuno tiaacua. Naajaa, majaari na mueecurujutanu quiquiaari, maninia nujuatejosano na morijiuucua quishacari cumueeca jiyajinia.⁴⁹ Saniniuujia, cante najuhuaa cua niishitiojosano tojiaquiquiaani, na miyaquishacari cua sequesano, cuno pueyanoori juhua tianu niishiyashijia. Cuno pueyanoori sesa tiaquiaari sasaca jiyajinia. Na nuhuaji, moo pajaashishacari, pajaacaari jiyanhua cajiquiaari cuno tiaacua. Cuno tia pojoretaquiaariiri. Pajaari cuno tia niyartaquiaari puetunujuanaa.

7

Jesu naatanishacari Romano capitán seru

(Mt 8.5-13)

¹ Jesu jaara pueya niishitiojonu puecaquiaari, na pueyata quiaaree Capernaum tiacajiniaari. ² Romano soldadohua capitánri quiniqui quijia quiquiaari. Jiyanhua na panishano seruuri cusosu matariquiaa. Quera cusoriquiaari. ³ Capitán jaara tojiquiaari Jesujiniji, nojuajaari Judiocuaca camarucua jiyaramiquiquiaari Jesuucua, nojori sequenura

Jesu cuaara niiria nocua na seru na naataniniuria. ⁴Judiocuaca camarucuaari Jesuucua quiojoquiaari. Nojoriiri juhuacatecara Jesu secojonu coteequiaari jiyanohua, nojoritia na quianura. Nojoriiri Jesu sequeeree:

—Cuno Romano capitánri canaa jiyaroreeni, ¡nojuajaari jiyanohua maninia pueyano! ¡Quenaaja quia miiri na panishano! ⁵Nojuajaari parta Judiocuaca panijia. ¡Nojuacuajaari Pueyaso secojojua tiatequiaari canaara tama na cumaneecatajaaja!

⁶Naacuajitij, Jesuuri nojoritia quiaquiaari capitán tiajiniara. Tari Jesu quishacari cateca na tiaacuara, capitánri na rupuenaa pueya jiyaroquiaari Jesuucua, nojori caminiujiuniuria na sequesano Jesura. Naaratej, nojoriiri naa Jesu caminiujiushii capitán sequesano:

—Jiyaniijianaa, capitán naa sequeya: “Cua Jiyaniijianaa, majaari cua taajetenu paniniu quiajaniya. Janiyari maja maninia pueyanoni cucua quia tiuquiniuria cua tiajinia. ⁷Nocuai, majaari cua quianu quiyaree janiyajanaa, cua pajenura quiajaniya. Nareja cuniquiji quia sequere cua seru naatanura. Janiyari niishiyani, quiaa jaara naa sequeere, cua seruuri naatanutaniuhua. ⁸Janiyari niishiyajaaniuhua, cuno cusonuuri quia tojiniutianiya taa cua tojiquiaa cua jiyaniijianucuaaani. Janiyari cua jiyaramiquishano soldadohua jitiiaajuhua. Janiya jaara tamonu sequerene, ‘Quia quiaare’, nojuajaari quiaqueequiaa. Janiya jaara tamonu sequerene, ‘Miji’, ritia nimiaquiaari. Janiya jaara cua seru sequerene casaa na miiniuria, ritia na miyari. Niishiyanjia quiaari jiyano cumaacaracajuhua”.

⁹Jesu tojishacari cuno pojori caminiujiushano capitán sequesano, Jesuuri jiuujiateree. Jesuuri na nuhuajiniaa pueya niquinijioree. Nojori sequereeri:

—Seetanujuanaa nia sequeyanijia, puetunu parta Israel pueyajini-jiniojuanaani, ¡majaari quenaaja cua niquiniu quiquianu Pueyasocua tiuujia pueyano juhua nio tahue!

¹⁰Capitán jiyaramiquishano pueya tiuquijiosacariuhua capitán tiajiniohua, nojoriiri Capitán seru niquishuhua tariucua naatanohua.

Jesu samiitianishacariuhua mashiquio niyanu

¹¹Na nuhuaji, Jesuuri tamonu tiacajinia quiaquiaari. Cuno tiaca sesa quiquiaari Naín. Na pueyari nata quiojoriquiaajuhua, socua queraatia tamasa pueyano. ¹²Nojori catecanosacari Naín tiacaacia, Jesuuri pueya niquiquiaari macu pataano jamosocoriquiano. Macuuri jiyacunojuanaa na nucua niyanu quiquiaari. Na nucuaari mashiquio quitiasuquiaari. Queraatia pueyari na nucuaata macu nuhuaji sacuariquiaa, jamajiniara nojori quiojosacari. ¹³Jesu niquishacari mashiquio, nocua taraajereeri. Na sequereeri:

—Maja nujuquenu.

¹⁴Jesuuri macuucua catecanoree. Macu quiquio quiatareeri. Na patanaari pootia na nujuataquee. Jesuuri macu sequeree:

—Mashajanaa, janiya quia sequeyani: “¡Quia sanere!”

¹⁵¡Macuuri cajiqui! Juhucatecara pocuareeri. Jesuuri na nucuaacia na jaatucuree. ¹⁶Puetunu pueyajanaa jaara naa Jesu miishano niquiquiaari, jiyanohua pueretureeri. Nojoriiri Pueyaso shuquiritariere jiyanohua. Na puerenuta sequetureeri:

—¡Pueyaso sequenu panishano caminiujiuniaqui niya supueree pa tajinia! ¡jiyanohua cumaacaraca!

Nojoriiri naa sequetureejuhuj:

—¡Pueyasoori shusha quiaríjia na saquiriojosano Israel pueya niishiri-ohuacuahuaj, na cumaquiniuria pajaniya!

¹⁷ Jesujiníjia pueya pohuatasanoori caminiujiushaaquiaari puetunu Judiocuaca jiyajiniajanaa, mariyata puetunu na shocuaqueya jiyacajini-ajanaanio.

Tiuquinijiona Juan jiyaramiquishano pueya nequesoreesacari Jesu (Mt 11.2-19)

¹⁸ Tiuquinijiona Juan pueyari puetunu Jesu miishanojuanaa pohuataquiaari Tiuquinijiona Juan. Na nuhuaji, Tiuquinijiona Juanri caapiqui na pueya sequequiaari:

¹⁹ —Jesuucua nia quiaare. Niocua na sequesee: “¿Quiaate seetanujanaa Pueyaso Jiyarosano, tariucuacaanu sequesano niriqianotej, tamonute sashishiyajaara soj?”

²⁰ Naaratej, Tiuquinijiona Juan jiyarosano pueyari Jesuucua quiojoquiaari. Na sequetuseeri:

—Tiuquinijiona Juanri canaa jiyaroree quiocuani, canaa nequesotamura quiajaniya: “¿Quiaatena Cristo, Pueyasojiníjia niriqianotej, canaate tamonu sashiyajaara soj?”

²¹ Nojori tiuquiiijosacari Jesuucua, jiyacaritij, Jesuuri queraatia pueya naatanijioree nojori niquiara; cusosuhua, pueyaracaanu nootunejaca, samaruhuaraca pueyanio. Mariyata queraatia cariojuarujuri jiyaterohua niquijiacaraari. ²² Na nuhuaji, Jesuuri naa Tiuquinijiona Juan pueya sequeree:

—Nia quiaarohua. Tiuquinijiona Juan nia pohuatasuhua taa nia niquiriicuajani, nia tojishanonio. Nia sequesuhuanoj: “Cariojuarujuriiri niquijiacara quiriohua. Shipiiniuquiujuníjiaari maninia rucoorohua. Lepra cusotajacaari cushiritishaarohua juhua juhuanaraja nojori quiniuhuara. Numueejunucuaari tojijiacara quiriohua. Macunucuaari samíitianiijosaarohua. Casamíijuniucua pueyari Pueyaso rupaa pohuataasaaree, Pueyaso pueyara nojori jiyatesaanura. ²³ Shuquiriaatia quijia cutaraari nooj, cante cucua tiuuniu tarinitiaaquiyani”.

²⁴ Tiuquinijiona Juan jiyarosano pueya jaara quiojoquiaariuhua, Jesuuri juhuacatecara pueya pohuataree Tiuquinijiona Juanjiníjia. Jesuuri naa nojori nequesotaree:

—¿Casaa niquiniuucua nia quiojocanu caríiquia jiyajiniani? ¿Niaate noojia niquijíoteja niquiniuucua quiojocanu? ¿Tiuquinijiona Juante juhua paratu piyarojosano naajua jiyareta na tacarojosano? Majaruhua. ²⁵ ¿Casaa niquiniuucua nia quiojocanunitioj? ¿Niaate maniniuqui toque cushíjia niquiniuucua quiojocanu? Niaacuajaari niishiya, shanohua toqueya cushiyonuujacaari saaja jiyaniijianucua tiajinia quiyano niquishano. Nojoriiri tama na panishanojuaja miijia. ²⁶ ¿Taateerinitioj? ¿Casaa niquiniuucua nia quiojocanuurini? ¿Pueyaso sequenu panishano caminiujiuniate quiquianu? Taaquiríiriníj. Nia niquishano pueyanoori seetanujanaa socua tojishano pueyano puetunu Pueyaso sequenu panishano caminiujuníjiajiníjianaa. ²⁷ Cuno Juanjiníjicuajaari tariucuacaanu Pueyaso Rupaajinia naajiotasano quiquiaari. Pueyaso sequesano nojuajiníjiri naa naajiotasaquiaarítij: “Cua sequenu panishano caminiujiuriquiano jiyaroyanjia, na pueta-nura quiajaniya, nuu jeenucuaríquiano quíocuaji”.

²⁸ Seetanujuanaa nia sequeyanijia, puetunu Pueyaso sequenu panishano caminiujiuniaajiniijiniojuanaani, majaari tamonu socua cutara pueyano quiniu quiquiaari Tiuquinijiona Juanjiniji. Naajaa, cante Pueyaso muerasuniyojua quiya cucua na tiuushacarini, Pueyasora, nojuajaari socua cutara pueyano Tiuquinijiona Juanjiniji.

²⁹ 'Puetunu pueyajanaa, mariyata cumaneeca masejonaa Roma tiacajinia quijia jiyaniijiarani, nojoriiri niishiquianu Tiuquinijiona Juan pohuatasano Pueyasojinijiiri seetanu rupaajanaa quiquianu. Naaratej, nojori tacatosacari nojori jiuujia sesa nojori miishanojiniji, nojoriiri moojinia tiuquinijiosaacanu.

³⁰ 'Saniniuujia, Fariseocuaca, mariyata Moisés Rootasanojiniji niishitiojonaani, nojoriiri Tiuquinijiona Juan pohuatasano ruuretacanu saaja. Naacuaajitij, majaari nojori tiuquinijiosaanu quiquianu, nojori seetanucua nojoriiri sesa miijiacajuhuj. Nojoriiri Pueyaso miiniu panishano nojoriria soocanu saaja. Naacuaajitij, majaari nojori jiyanooshaanu quiquianu.

³¹ Jesuuri socua sequeree:

—¿Quiarijia nio pa quishacari pueyarijiaataj? ³² Nojoriiri juhua naatujoori, na tacuarishijionu panishacari, na cajitiushacari tiaca jiuujiajinia cajitiucua curaasanojinia. Nojoriiri narta naatujooriicua naca: “Canaari juucua naajua jonenejiyani. Majaari nia nianujunu paniniu. Canaari taraatia jaaquequejosano jaaquequejiyani. Majaari nia sapuenu paniniuujuhuj”. ³³ Naajuhuj pueyanaa, niaari Tiuquinijiona Juan tojiyaquiquianu Pueyaso rupaa na pohuatasacari nia niquiara. Nojuaja cutaraari miaquesano miaqueyashijia quijia, vino ratuyashijiano. Naaratej, niaari na sequeja, “samaruraca”. ³⁴ Na nuhuaji, janiyari niquianuni. Janiyari saniniuujia miaquesano miaquejojuani, vino ratujuajuhuj. Cunora niaari cua sequequiaa: “Cunoori sacuaatia mi-aquejoru, ratunu porocuanio, sesa miijiacarupueja sacuaatia, mariyata pa soosano cumaneeca masejonaa rupuenanio”. Naa nia sequesacaritij, niaari cua tojitiaaquiyaacuhuj. ³⁵ Naajaa, pueya jaara canaa pohuatasano tojiijaca quiri, jiyacari cutara nia naata niishiniu canaa niishitiojosanoori seetanujuanaa Pueyasojiniji, cua tojiijaca jatasacari maninia quijiacara.

Jesu miaquesacari Fariseo Simón tiajinia

³⁶ Tamonu Fariseo pueyanoori Jesu masuquuaari na tiajinia na mi-aquenura. Jesuuri na tiajinia quiaaree. Miaquenuujua shuriuquiumia roshishiiri. ³⁷ Paanatuuri cuno tiacajinia quijia quiquiaari. Na niishishacari Jesuuri cuno Fariseo tiajinia tiuquirii mi-aquenura, nojuajaari cuno tiajinia quiaquiaarijuhuaj. Shiitaniyojua seesariquiaja pataconiyojua cacatariquiaari, cohuaja saajiajiniji quejasano. Mishaja quiriquiaari shanohua jaanutajata. ³⁸ Maajiiri Jesu cashacuucuma mojuquetasee. Nujuqueriquiaari. Na namijiaacaari Jesu niohuacaacua totejoriquiaa. Naa Jesu niohuaca piquiojoreeri. Na nuhuaji, na muecacata na sacuanijiarohuari. Na niohuaca nujuureeri. Na shanohua jaanutaja totaree Jesu niohuacaacuaari. ³⁹ Cuno Fariseo pueyano niquisacari naa cuno maaji miishanotej, noojiajinia niishiriojoriquiaari: “Jesu jaara seetanujuanaa Pueyaso sequenu panishano

caminiujuunia quiri, mariqui niishiri cante na coyani, taamueca maa-jitijianojoni”. ⁴⁰ Jesuuri cuno Fariseo pueyano niishiriojosano niishiriquiaa. Cunora na sequereeri:

—Simónnaa. Quia sequenu paniyanijia.

Fariseo pueyanoori Jesu riucaaree:

—Cua sequere, Niishitiojonanaa.

⁴¹ Jesuuri na sequeree:

—Caapiqui pueyanoori cumaneeca masequiaari rupaquijjara tamonu cumaneeca niqutiojonajiniji. Niquiriyatu pueyanoori queraatia cumaneeca masequiaari, juhua quiniento juuca poonijiosanojiniji masesano. Tamonu pueyanoori masequiaari nareja juhua cincuenta juuca poonijiosanojiniji masesano. ⁴² Na nuhuaji, nojori sequesano juuca jaara tari quiquiaari na camaru nojori niqutionuhuara na cumaneeca, majaari nojori jitianu quiquiaari cumaneeca. Naaratej, cumaneeca niqutiojonaari nojori sequeree: “Naajaa, maja socua nia niishiriojonu nia niqutionuhuara tarijia cua niquticosano cumaneeca niajaniya”. Cumaneeca niqutiojonaari naa cuno caapiqui pueya jiyanooquiaari. Simónnaa, cua sequeretoj, ¿teyano cuno caapiqui pueyanojinijiniote socua cuno cumaneeca niqutiojona panijjara quiniutianiyani?

⁴³ Simónri Jesu riucaaree:

—Cunocujani, cante socua queraatia cumaneeca niquticosaaquiaaricujani.

Jesuuri na sequeree:

—Taaquiririnj.

⁴⁴ Jiyacaritij, Jesuuri cuno maajiicua tacateree. Simón sequereeri:

—¿Quiaate nio maaji niquiya? Cua tiuquishacari quia tiajinia, majaari quenaaja quia niqutionu quirii mohuaca janiya, cua niohuaca cua jeequetajara. Nio maaji cutaraari cua niohuaca jeequeree na nami-jiaacata. Na sacuanijiarohua na muecacataari. ⁴⁵ Majaari quenaaja quia nujuunu quirii janiya, quia saruhuatascari janiya. Nio maaji cutaraari cua niohuaca nujuunequejoriquiaa pueyaracaanu, niya cua cajishacari. ⁴⁶ Naajuhuj, majaari quia totanu quirii miesu nunacu cua nacaacua. Nio maaji cutaraari cua niohuacaacua totaree shanohua jaanutaja. ⁴⁷ Naaratej cua tojiri. Nio maajiiri jiyanohua sesa miijia quiriquiaa. Naaratej, jiyanohua cua paniyari puetunu sesa na miishanojinijijianaa cua jiyanooniucua nojuaja. Saniniuujia, cante secaja sesa na miishanojiniji jiyanooshaareni, naajuhuj, nojuajaari secaja panijia na jiyanoonia.

⁴⁸ Na nuhuaji, Jesuuri cuno maaji sequeree:

—Quiaacuajaari tari jiyanooshaaree sesa quia miishanojiniji.

⁴⁹ Narta masusano pueya nata cajitiuyanoori juhuacatecara tama sequetooreejaaja:

—¿Cantucuaa nio pueyanoni, sesa miijia jiyanooriqianoni?

⁵⁰ Jesuuri maaji sequeree saaja:

—Cucua quia tiuushacari, quiaacuajaari tari jiyanooshaaree. Juhua-janiya quia quiaarohua.

8

Jesura pueraquena maajipohuajiniji pohuatasano

¹ Na nuhuaji, Jesuuri rucuanajoquiaari queraatia tiacajinia, shiitaniyojua tiacajiniajuhuaj. Nojuajaari tii Pueyaso rupaa pohuatariquiaa, taa Pueyaso jitianu paniya na muerasuni. Na doce saquiriojosano pueyari na cojiriquiaajaacuhuj. ² Noojiaqueya maajipohuari na tarajariquiaajuhuj. Cuno maajipohuari tamaatia cusonujiniji Jesu naatanijosano quiquiaari. Tii quiriquiaajaariuhua noo maajipohua, Jesu nojorijiniji tohuatanijioquiaari samaruhuatej. Nojorijinijiniori quiquiaari María Magdalena. Jesuuri cuno Mariájiniji tohuatanijioquiaari siete samaruhua. ³ Quiriquiaajaariuhua Juana, Cuza niqiuocuaní. Cuzaari jyanijija Herodes jittiasano casami cojuana quiquiaari. Susaanaari nojorijinijinio quiquiaarijuhuaj. Socua queraatia maajipohuari quiriquiaa. Puetunu cuno maajipohujanaari Jesu naacutaquiaari tama nojori jittiasano casaatajaaja. Nojoriiri nera pueraquenuunaa quiquiaarijuhuaj, tiquiyocua nojori rucuanijosacari Jesuta.

Jesu pohuatasano natoojona pueyanojiniji
(Mt 13.1-9; Mr 4.1-9)

⁴ Queraatia cuno jiya tiacajinijinio pueyari nijioquiaari nojori niqiniuria Jesu. Jaara nocua rerequeejoquiaari queraatia pueya, Jesuuri nojori niishitiojioquiaari miriqui, nio pohuatasanota. Nojori sequereeri: ⁵—Tamonu pueyanoori na cuhuariquiajinia quiaquiaari natoojonucua. Na jacutasacari, secajaari totequiaari nucuaco. Tii rapijosaaquiaariiri. Shuhuari na miojioquiaari. ⁶ Tajaacaari totere sai tajinia. Cuno jajau jaara moritiaquiaari, ritia sorereeri puera joojuashiqui na quishacari. ⁷ Tajaacaari totere riyocuaca tajinia. Riyocuaacari socua ritia maashiquiaari. Na natasanoori tarinitiucua quirii. ⁸ Socua tajaacaari maninia jiyajinia totere. Tii maashiquiaari maninaari. Queraatia mueturee cutaraari. Noojiaqueya cuno nataujinijiiri cien jajau quiquiaari niquiriyatu jiyonajiniji.

Nio pohuatasano na puecasacari, Jesuuri na rupaa paaretaree. Naa sequereeri:

—iNiaa jaara numaaraca quiri, nia tojitiare cua pohuatasano!

Casaarate miriqui pohuatasanoni
(Mt 13.10-17; Mr 4.10-12)

⁹ Na nuhuaji, Jesu pueyari na nequesotaree casaa na miriqui pohuatasano niishitiojonu paniani. ¹⁰ Jesuuri nojori riucuaaree:

—Niaari saquiriojosaaquiaari nia niishiniuria taa Pueyaso poonijija pueya jiuujiajiniani, na muerasura nojori quiniuria. Cunoori tariucuaaanu pueya niishishoo. Janiyari tamasaca pueya niquiara pohuataquiaa miriqui cutarani. Naacuajitij, nojoriiri cua pohuatasano niishiyaquiaa na tojittiasacari. Naajuhuj, cua cumaacata cua miishano caryoshitioquiaari, nojori niquiara cua miishacari.

Jesu niishitiojosacari na pueya, miriqui na pohuatasano natoojonajiniji

(Mt 13.18-23; Mr 4.13-20)

¹¹ 'Nia niishitiojoreera miriqui cua pohuatasano natoojonajiniji. Pueyano natoojosano jajauri juhua Pueyaso rupaa. ¹² Pueyano jaara Pueyaso rupaa tojiri najuhuanaj, nojuajaari juhua nucuaco toteno jajau. Sesaacaari nimiaa. Pueyaso rupaa na tojishano jaariutiarohua noojajinijiiri, maja nocua na tiuuniuria, nojuaja mariqui jiyanooshaareeri.

¹³ Sai tajinia toteno jajauri juhua noo pueya, canapuate Pueyaso rupaa tojiriini. Na nuhuaji, rupaquijia Pueyasocua tiuquiquiaa shuquiriaati-aari. Naa miijiaaari juhua puera shiitianiyojua nujuacaraca. Naacua-jitij, nojori jaara saniniujiushaare, nojoriiri ritia Pueyasocuaaji rupate-quiaa. ¹⁴ Riyocuaca tajinia toteno jajauri juhua noo pueya, canapuate maninia tojirii Pueyaso rupaani. Na nuhuaji, nojoriiri puera tacaquiquiaa mijiria casaacua, casamiriaca nojori quiniuria, tama na cuaqueyajaaja nojori shuquiritiniuriajuhuaj. Naaratej, nojoriiri juhua muetuhuo natau quiya, tarinitiuacara riyocuaca tariyoshitishano. ¹⁵ Maninia jiyajinia toteno jajauri saniniuuja juhua noo pueya, canapuate maninia tojtiaarecuaja Pueyaso rupaani. Na racataa maninia noojiajiniiaari. Pueyaracaanu na tojtiaquuaari. Majaari na pishiniu Pueyasocuaaji. Naacua-jitij, nojoriiri juhua queraatia muetujua natau.

Pueyaso muerasuuri juhua samaritiu cuhuataja
(Mr 4.21-25)

¹⁶ Majaari pueya noshitiniu quiquiaa samaritiu, na jamotasocoriquiano conatu cariquiaco, maquetu cariquiaconio. Samaritiu jaara noshitishaare, morijiuucua morotashiyari na cuhuatanura, pueya tiuquitasacari tiajiniaaco. Naajuhuj, Pueyaso Rupaari pueya jiuujia cuhuataja. Cunora, Pueyaso Rupaa cuaara maatia pohuatasaaaria puetunu pueya niquliarajanaa. ¹⁷ Puetunu jamojosano casaajanaari riuriatasaanutaniya. Puetunu jiyasohuaja nia miijosanojuanaari niishishaanutaniyajuhuj. Cahuatasaanutaniyari maninia niquishocoriquiano. ¹⁸ Cunora, cua sequesano tojtiajaca nia quiri maninia. Cante maninia jiiitia cua rupaani, nojuajaari socua na niishijiaari jiyatesaanutaniya. Saniniuuja, cante cua rupaa tojiyashijiani, secaja najuhuana na niishishanoori jaariutiasaanutaniya, puetunu shaaquiriajanaa.

Jesu tapueyocuaa tiuquiiiosacari Jesuucua nojori nucuata
(Mt 12.46-50; Mr 3.31-35)

¹⁹ Jiyacaritij, Jesu nucua Jesu tapueyocuaata tiuquiiioquiaari Jesu quishaqui. Majaari nojori naata tiuquitianu quiriqiquiaa Jesuucua. Jiyanojua queraatia pueyari nocuara ritiariqiquiaa saaja tia tohuateyaji.

²⁰ Tamonuuri Jesu numooteree:

—Quia nucua quia tarajanuhuata jati carijiniacuma quiya. Quia niqutiuniu paniyaquinia.

²¹ Jesuuri tii quiniaa niqiuara sequeree saaja:

—Canapuate seetanujuanaa Pueyaso Rupaa tojtiajacani, nojoriiri cua nucua cutara, cua tarajanuhanio.

Jesu pueyajetesacari paratu, mohuacanio
(Mt 8.23-27; Mr 4.35-41)

²² Tamonu juuca, Jesuuri botejiniya tacataquuaari na saquiriojosano pueyata. Nojori sequereeri:

—Pa niuutiaare caminia taquijiria.

Naaratej, nojoriiri niuutiariqiquiaa. ²³ Nojori niuutiasacari, Jesuuri maqueriquiaa. Canashiyaquiji paratuuri juhuacatecara piyarojonu co-teeree jiyanojua. Mohuaca queyaqueteriquiaa bote jiniacumaraari. Boteeri quera tiuquitiariqiquiaa tari. ²⁴ Jiyacaritij, na pueyari Jesu niucua-jasee ritia. Na sequetuseeri:

—¡Niishitiojonanaa! ¡Niishitiojonanaa! ¡Paa tari tiuquitiaani!

Jesuuri sanemaa. Paratu sequereeri, mohuacanio:

—¡Tariucuaja! ¡Nia suraajere!

Paratu, mohuacaari ritia suraajequee. Paratu piyarojonuuri tajimiaa, caminia queyocuaanonio. ²⁵ Jesuuri na pueya sequerohua:

—Niaacuaja juucua Pueyasocua tiuujiaa. ¿Casaa nia tojetareerini?

Nojoriiri Jesuucuaaji jiuujiatecoree. Shiriiquitiuriquiaari Jesu miishano nojori niquishacari. Tama nojorijiaarijia nequesoreetooriquiaa:

—¿Cantucuaanojoni? ¡Paratu, mohuacaari na tojirii na sequesacari!

Gerasa jiyajinijinio samaruhuaraca pueyanojiniji pahuatasano

(Mt 8.28-34; Mr 5.1-20)

²⁶ Na nuhuaji, nojoriiri shiitiaseequiaari Gerasa jiyajinia, Galilea jiya taquijiria. ²⁷ Jesu jaara rosequiaari botejiniji, jiyacaritij, samaruhuaraca pueyanoori nocua niquiaari, cuno jiya tiacajinijinio pueyano. Cuno pueyanoori pueyaracaanu samaruhuaraca quiquiaari. Majaari toque na cushiniu quijia. Naajuhuj, majaari tiajinia na quiniu quijia. Saaja raacajinia quijiaari, macunucua nucuhua paaquiosaqi. ²⁸ Na niquishacari Jesu, na cariquimiaji mojuquetaseeri. Jesuucua nacareeri:

—¿Casaara quia niyaree miji canaa quia cushitionurani Jesunaa? ¡Quia niishiyanjia! ¡Quiaacuajaari Jiyaniijiajanaa Pueyaso Niyanu! ¡Cua tarinitiare quenaaja! ¡Maja naquiya cua miiniu!

²⁹ Samaruhuaraca pueyanoori naa sequeriquiaa Jesutej, Jesu sequesacari tari nojuaja, cuara tohuataara cuno pueyanojiniji. Samaruuri sequeyarucua cuno pueyano miitiquiaari sesa. Narta pueyari juucua na cashacucua, na numatucua morojuquiaari cumayocua jiyocua shipinishanota, na cojuasaanura maninia. Samaruhuaraca pueyanoori saaja na turojotaquiaari. Samaruuri na mashiquijia tiquiyocua, pueya quiyaquishaqui na quiniuria. ³⁰ Jiyacaritij, Jesuuri na nequesotaree:

—¿Taateja quia sesani?

Samaruuri na riucuree:

—Cua sesa “Queraatia”.

Naa Jesu sequequiaariiri jiyanohua queraatia samaruhua na jiitiasacari. ³¹ Samaruhuari jiyanohua secojoree Jesu, maja nojori na jiyaronura puequeetuuju raama saniitosocoriquiano. ³² Jiyacaritij, queraatia cushiyari miaquenuuriquiaa cateca naataja, tuhuananujinia quiniqi. Samaruhuari cunora Jesu secojoree nojori na tiuquitianinuria cushiyajinia. Jesuuri nojori tarinitiaree. ³³ Cunora, samaruhuari pueyanojiniji tohareetaquee. Cushiyajinia tiuquitiaseeri. Puetunu cushiyajanaari cocuateree. Tacobiniji totesee caminiajinaari. Tii shushiniuuriiri.

³⁴ Cushiya cojuanaa jaara niquiquiaari naa miishanotej, nojoriiri netecuatuquiaari na shiriiquiniutia, Jesu miishano nojori pahuatanura tiacajinia, cuhuariquiacajiniajuhuaj, tee pueya quiriquiaacuajani. ³⁵ Puetunu pueyajanaari Jesuucua nijioquiaari na tiacajiniji, pueya pahuatanuusanojiniji nojori niquiniuria. Nojori tiuquijiosacari Jesuucua, nojoriiri cuno pueyano niquishii, canajiniji samaruhua tohareeta-reecuajani. Nojuajaari Jesu shuriucua cajiriquiaa toqueraca, panaatia na quishacarihua. Naa pueya niquishacari nojuajatej, pueretuquiaariiri. ³⁶ Jiyacaritij, Jesu miishano niqutiuniaari shusha nijiono pueya pahuataree taa samaruhuaraca pueyano naatanishaarohuani. ³⁷ Cunora,

puetunu Gerasa jiyajinijinio pueyajanaari jiyanoehua puereturiquiaa. Naaratej, ¡Jesu secojotureeri na quianura nojori jiyajiniji! Naaratej, Jesuuri botejinia tacataquiaariuhua na pueyata na quianuhara. ³⁸ Cuno pueyano, canajiniji samaruhua tohuareetareecujani, nojuajaari Jesu secojoree juucua nata na quianura. Jesuuri saaja naa na sequeree:

³⁹ —Quia tiajinia quia quiaarohua. Quia pueya niquiara quia pohuatasuhua taa Pueyaso miirii maninia quiajaniyani.

Pueyanoori quiaarohua. Puetunu na tiacajiniajanaa pohuatasuhuari taa Jesu miiriucuaa maninia nojuajani.

Jesu naatanishacari Jairo niyatu, Jesu toque quiana maajinio
(Mt 9.18-26; Mr 5.21-43)

⁴⁰ Jesu jaara niutiaquiaariuhua caminia taquijiria na pueyata, pueyari na timitiarohua na tiuquishacariuhua. Puetunu nojorijianaari na sashiriquiaa. ⁴¹ Jiyacaritij, tamonu pueyanoori Jesuucua tiuquishii. Na sesaari quijia Jairo. Nojuajaari Pueyaso secojojua tia jiyaniijia quiquiaari cuno tiacajinia. Jesu cariquimiaji mojoquetaseeri na secojonura na tiajinia Jesu quianura. ⁴² Neyatuniyojuuari quera cursoriquiaa jiyacari. Majaari socua niquiohuaraca na quiniu quijia. Doce marijiaari tari shocojoquiaari cuno neyatu.

Jesu quiasacari Jairota, jiyanoehua queraatia pueyari nata quiojoriquiaajuhua. Pueyari jiyanoehua na tanuujuriquiaa, nata nojori quiojosacari nuuaco.

⁴³ Tamonu maaji cusosuuri cuno pueya tajinia quiriquiaajuhua. Doce marijiaari tari na shocojoquiaari pueyaracaanu na naatesacari. Cuno maajiiri puetunu na cumaneeca puecaquiaarijanaa najuhuanaj, na naarajosaanura juucua. Naarajonaari maja na naata na naataniniu quiquiaari. ⁴⁴ Maaji cusosuuri Jesu nijiniji catecanoquiaari nocua. Na tucuaque toque casaca quiasee jiyasohuari. ¡Na nanacaari ritia curetaquee!

⁴⁵ Jiyacaritij, Jesuuri pueya nequesotaree:

—¿Cante cua quiareeni?

Puetunu na shocuaqueya pueyajanaari sequeree:

—Maja canaa quianu quirii quiajaniya.

Pedroori Jesu sequeree:

—Niishitiojonanaa, ¿majateeri quia niquniucuaaja? Queraatia pueyacuajaari quia tanuujia.

⁴⁶ Jesuuri saaja sequeree:

—Maja. Cusosu cua quiareeni. Niishyanijia cua cumaacaari tari na naatanirii.

⁴⁷ Maaji niishishacari na miishano jiyasohuaja tari niishishaaree, Jesuucua nimiaari. Na puerenuta tetecariquiaari. Jesu cariquimiaji mojoquetaseeri. Puetunu pueya niquiarajanaa pohuatareeri casaara Jesu na quiareeni. Pohuatareejaariuhua taa na naataquee ritiani, Jesu na quiasacari. ⁴⁸ Jesuuri na sequeree:

—Sanaunaa, cucua quia tiuuniucua, quiaari naatarohua. Quioojia quia cajitiriohua. Juhuaianiya quia quiaarohua.

⁴⁹ Jesu pocoojosacarijia cuno maajitia, tamonu pueyanoori tiuquiquiaari Jairo tiajiniji. Jairo sequeeseeri:

—¡Quia niyatu tari cusoquee! Maja najuhua riniu paniniu Niishitiojona quia tiajinia.

⁵⁰ Jesu tojishacari cuno pueyano sequesano, Jairo sequereeri:

—Maja puerenu. Cucua quia tiuuri saaja. Quia niyatucujaja naatanu-taniuhua.

⁵¹ Jesu tiuquishacari Jairo tiajina, nojuajaari maja na shanacunu quirii quenaaja tamonu pueyano tiuquiniuria macuucua. Saaja nata tiuquitiamaa cutaraari Pedro, Santiago, Juan, maaji samiriu que, na nucuanio. ⁵² Puetunu tii quiniaa pueyajanaari maaji samiriucua nujuqueturiquiaa. Sapiyonuuriquiaajaariuhuj. Jesuuri nojori sequeree:

—Maja najuhua nia nujuquenu. Maaji samiriu maja macu, nareja maqueyano.

⁵³ Naa Jesu sequesacaritij, pueyari na saroojotaree saaja. Nojoricua-jaari niishiriquiaa maaji samiriuuri seetanujanaa macu quiriquiaa.

⁵⁴ Jiyacaritij, Jesuuri macuucua tiuquiquii. Na juaashiquiajiniji na quiaseeri. Jiyano hua na sequereeri:

—Maaji samiriuniaa, ¡quia sanere!

⁵⁵ Na sohuanuuri nocua tacatemohua jiyacari. Samiitamohuari. Ritia saneeeri. Jesuuri na nucua sequeree na mianuutenura. ⁵⁶ Na queyari jiyano hua jiuujiateree. Jesuuri nojori sequeree, maja nojori pohuatanura tamasaca niquiara na miishano.

9

Jesu jiyaramiquishacari na doce pueya Pueyaso rupaa nojori pohuatanura

(Mt 10.5-15; Mr 6.7-13)

¹ Jesuuri na doce saquiriojosano pueya rerejotequiaari na jiyaramiquishocoriquiano. Nojori niquitioree cumaacaari, puetunu tamaatia sesa samaruhujanaa nojori tohuatejonura, cusosuhua nojori naatanijionurajuhuj. ² Nojori jiyaramiquiriiri Pueyaso rupaa nojori pohuatanura pueya niquiara, pueya niishiniuria taa Pueyaso jiyanooni paniya nojorini, na muerasu nojori quiniuria. Nojori jiyaramiquiriijaariuhua cusosuhua nojori naatanijionura. ³ Jesuuri nojori sequeree:

—Maja nia panu nia rucuanejotajara nia panishano. Majaari nia miojotu nia panu, nia caashoque, nia coseyaca, nia cumaneecanio. Saa nia cushishano toquetaja nia quiaare cutara. Maja socua toque nia panu nia cushishocoriquiano. ⁴ Naa jaara tamonu tiajina tiuquishiiquia, niocua cuniqui jijojetaseequiaja, nia jaara cuno tiacajiniji quiaare-jaatijia. ⁵ Naa jaara tamonu tiacajinia tojinu paniyaquishaare, cuno tiacajiniji nia quiaare. Naa nuhuajiria, cuno pueya niquiara niocua nia nioluacajiniji cuno tiaca jaaquia nuutare. Naacuajitij, cuno pueyari niishiniutianiya, Pueyasoori nojori jiyano yaquiniutianiya, nojori tojitanu paniyaquiniucua Pueyaso rupaa pohuataanaa.

⁶ Na nuhuaji, Jesu pueyari quiojoquee puetunu cuno jiyajinia shiitianiyojua tiacajiniajanaa, Pueyaso rupaa nojori pohuatanura tii. Nojoriiri Pueyaso rupaa pohuatanuquiaari pueya jiyanooshaanura, Pueyaso pueya nojori quiniuria. Naajuhuj, cusosuhua naatanijio-tuquiaariiri.

Jiyaniija Herodes niishiniu panishacari cante Jesuni
(Mt 14.1-12; Mr 6.14-29)

⁷ Jiyaniijia Herodesri pohuatasaaquiaari puetunu Jesu miishanojinijijanaa. Herodesri saaja jiyajenequiaari cante Jesuni. Jiyacaritij, noojiaqueya pueyari sequeriquiaa: “Jesucuaajaari jiyaniijia Herodes nacatanishano Tiuquinijiona Juan samiitianohua”. ⁸ Tamasaca pueyari Jesujiniji sequeriquiaajuhuaaj: “Supuetana Elíascuaja tari tiuquiriohua”. Nojuacuajaari tariucuacaanu Pueyaso sequenu panishano caminiujiunia quijia. Saniniuujia, tamasa pueyari sequeriquiaajuhuaaj: “Jesucuaajaari tamonu tariucuacaanu Pueyaso sequenu panishano caminiujiunia samiitianohua”. ⁹ Herodesri saniniuujia sequeree:

—Janiyacuaajaari cua pueyano jiyarocanu Tiuquinijiona Juan na nacatanurani. ¿Cantejaara cuno Jesuni? Janiyari queraatia nocuaji tojiniuyani.

Cunora, Herodesri jiyanohua Jesu niqiniu paniriquiaa juucua.

Jesu mianuutesacari cinco mil pueya
(Mt 14.13-21; Mr 6.30-44; Jn 6.1-14)

¹⁰ Jesu jiyaramiquishano pueya tacatesacariuhua, nojoriiri Jesu pohuataquiaari puetunu nojori miishanojuanaa. Na nuhuaji, Jesuuri nojori jiyataaree tamaquiria, Betsaida tiaca shuriucua, tii tamajaaja nojoritia na quiniuria. ¹¹ Pueya niishishacari tee Jesu quiriquiaani, nojoriiri saaja nocua quiojoquiaari. Naajaa, Jesuuri maninia nojori masree saaja. Cuno pueya pohuatareeri taa Pueyaso quiniu paniya nojori jiyaniijiarani. Jesuuri nojori cusosuhua naatanijioreejuhuaaj.

¹² Tenacariishacari, Jesu doce pueyari nocua catecanoquiaari. Na sequetureeri:

—Pueya quia jiyaramiquiri cateca tiacajinia, nojori cuaara cuniqui pajenuura na miaquenuusocoriquiano, na maquetujuarajuhuaaj. Nojori panishanoori shaaqui niya pa quishaquini.

¹³ Jesuuri nojori sequeree saaja:

—Niaa mariqui nojori mianuutere saniya.

Nojoriiri Jesu sequeturee:

—¿Canaateeri miaquesanoracajaarani? Canaa saaja cinco panniyojua jitiiaani, caapiquiriyatu sapitiaajanio. ¿Canaateeri secaja pa cumaneecata masenutaniya queraatia miaquesano puetunu nio pueyara-janaani?

¹⁴ Cuniqui nojoritia quiriquiaa naasucuaari cinco mil pueya. Jesuuri na pueya sequeree:

—Pueya nia raquiriojotare maninia. Cuaara cajitiuuria cincuenta jatiqi, socua cincuenta tamaqui. Mianuutesocoriquiano puetunu pueyajanaa, cuaara naa cajitiuuriatej.

¹⁵ Nojoriiri Jesu sequesano miirii. Puetunu pueyajanaari cajitiurii. ¹⁶ Na nuhuaji, Jesuuri cuno cinco pan pataree, caapiqui sapitiaajanio. Jiyocuacaanu maureeri na Que Pueyaso na secojonura miaquesanoocuara. Na nuhuaji na neecasereeri. Na pueya na niqutioreeri puetunu pueyajanaa nojori serotasocoriquiano. ¹⁷ Puetunu pueyajanaari na miaquenuuree. Maninia tooquioreeri. Na nuhuaji, doce canaasatuuri mishinijosaaquiaari pan raacuata, sapitiaaja raquiuiatanio.

Pedro sequesacari Jesuuri seetanujuanaa Cristo
(Mt 16.13-19; Mr 8.27-29)

¹⁸ Tamacari, Jesuuri Pueyaso secojoriquiaa tamajaaja. Na saquiriojosano pueyari nata quiriquiaa. Jiyacaritij, Jesuuri nojori nequesotaree: —¿Taa pueya sequequiaa janiyani, cantena janiyani?

¹⁹ Nojoriiri na riucuaaree:

—Noojiaqueya pueyari quia sequequiaa, quiaana nacatasano samiitianohua Tiuquinijiona Juan. Tamasacaari quia sequequiaajuhua, quiaana Elías, tariucuacaanu Pueyaso sequenu panishano caminiujunia. Tamasacaari saniniuujia quia sequequiaa, quiaa naasucuaana tamonu tariucuacaanu Pueyaso sequenu panishano caminiujunia samiitianohua.

²⁰ Jesuuri saniniuujia nojori nequesotaree:

—¿Niajaniyariuhua? ¿Taa nia sequeyani, cante janiyani?

Pedroori na sequeere:

—Quiajaniyacuaajaari Cristo, Pueyaso Jiyarosano.

²¹ Jesuuri jiyanhua nojori rootaree maja nojori pohuatanura tamasca niquiara cante nojuajani.

Jesu numootesacari na pueya, nojuaja mosaanutaniya

(Mt 16.20-28; Mr 8.30-9.1)

²² Jesuuri naa nojori sequerohuacuhua:

—Janiyari jiyanhua naquiya miishaanutaniyani. Pa Judiocuaca camarucuaari cua niqiniu paniyaquiniutianiya, na tojtianu paniyaquishacari janiya. Naajuhua, pa pueyacuara secojonaa jiyaniijianucuaari cua niqiniu paniyaquiniutianiya, Moisés Rootasanojiniji niishitiojonaanio. Nojoriiri cua monutaniya. Naajaa, jiuujianaraca juucajinia, janiyari samiitianutaniuhua.

²³ Na nuhuaji, Jesuuri puetunu pueyjanaa sequeere:

—Cante cua nuhuajiniu paniyani, cua pueyano na quiniuria, nojuaja cuaara niyjetaara tama na miiniu panishanojuaja. Cuaara panitiaara tama na cuaqueyajaaja puetunu juucajanaa, cua tojjia na quiniuria seetanujuanaa. ²⁴ Saniniuujia, cante tama na cuaqueyajaaja shuquiritiniuria niishiriojoquiaani, nojuajaari jiyanhua taraatia quiniutianiya na nuhuaji. Saniniuujia, cante tama na cuaqueyajaaja panitiaquiaa cua panishano na miiniuriani, nojuaja cutaraari Pueyaso pueyanora jiyatesaanutaniya, pueyaracaanu shuquiriaatia na quiniuria. ²⁵ Pueyano jaara puetunu nio jiya casamijanaa jiitiana quiri, cuno maara najuhua quiri, nojuaja jaara na shaajesacari jataaare mani quiquiojina Pueyasooju. ²⁶ Cante cua seera caririquiya mijiria quiniaa pueya niquiara sequenurani, janiyari nojori jiyaniijiani, naajuhua janiyari nojori seera caririquiniutianiyani cua tiuquishacariuhua Jiyaniijia cua quiniuria. Janiyari shanhua niquishano quiniutianiya cua tiuquishacariuhua cua Que shacantuuca cumaacatani, na seya cumaacatajuhua. Naajuhua, cante cua rupaa pohuatanu caririquiya sesa mijia pueya niquiarani, janiyari nojori seera caririquiniutianiyajuhua. ²⁷ Seetanujuanaa nia sequeyanijia, noojiaqueya niajaniyajinijinioori maja nia cusonuunu quiniutianiya juhuanajuaja, niaa cuaara niquirijiaatijia Pueyaso cumaaca tiuquiyano cucua, na muerasu jiitariquianoni.

Jesu jatasacari shacantuucara

(Mt 17.1-8; Mr 9.2-8)

²⁸ Naa Jesu sequenu nuhuajitij, ocho juuca nuhuaji, nojuajaari tuhuananuucua tacaquiaari na Que Pueyaso na secojonura. Nata quiaareeri

Pedro, Santiago, Juannio. ²⁹ Jesu secojosacari Pueyaso, na jiquiooori tamaatiara jataquiaari. Na toqueeri jiyanoehua cohujara jataquiaar-
 ijuhuaj, shacantuquera. ³⁰ Jiyacaritij, caapiqui pueyari nocua mue-
 taquiaari. Jesuta pocoojoriquiaari. Nojoriiri quiriquiaa supuetana
 Moisés, supuetana Elíasnio. ³¹ Nojori nujuatasaquiiri shacantuuca
 quiriquiaa puetunu nojori shocujanaa. Nojoriiri pocoojoriquiaa taa
 Jesu mosaanutaniya Jerusalén tiacajiniani. ³² Jiyacaritij, Pedroori
 jiyanoehua maquenuujuriquiaa, nata quiniaajuhuj. Naajaa, majaari
 nojori maquenu quiriquiaa. Naacujitij, nojoriiri Jesu shacantuuca
 niquiriquiaari. Cuno caapiqui supuetanaa niqutiuriiaariuhuj, Jesuta
 pocoojiyano. ³³ Cuno caapiqui pueya quiojonu panishacariuhua Jesu
 shuriucuaji, Pedroori Jesu sequeree najuhanaj:

—¡Niishitiojonanaa, canaa namitia niya quiyani! ¡Canaa suhuororeera
 jiuujianaraca suhuorotucua; quiara, Moisésra, Elíasraniol

Pedroori naa najuhuaa pocuariquiaa. Majaari na niishiniu
 quiquiaari casaa na sequeriquiaani. ³⁴ Pedro pocuasacarijia, cohujara
 najacaari nojori mishiQuiomaa. Nojoriiri puereturiquiaa cohujara
 najacajinia nojori quishacari. ³⁵ Na nuhuaji, nojoriiri Pueyaso tojirii
 pocuaano cuno cohujara najacajiniji. Naa sequereeri:

—¡Nioori cua Niyanu, cua saquiriojosano nia Jiyaniijia na quiniuria!
 ¡Nojuaja nia tojitiare!

³⁶ Naa nojori tojiniu nuhuaji cuno rupaatej, nojoriiri Jesu niquiriohua.
 Tari tamajaaja nujuariquiaari. Nojoriiri sanaa na niqutiariquiaa. Na
 nuhuaji, majaari quenaaja tamonu nojori pohuatanu quiquiaari nojori
 niquishano, Jesu jaara samiitiaquiaariuhujajatiijaj.

Caya samijajiniji Jesu tohuatesacari samaru

(Mt 17.14-21; Mr 9.14-29)

³⁷ Tariqui, nojori jaara rosetaquiaariuhua tuhuananujiniji, queraa-
 tia pueyari Jesuucua nijioquiaari. ³⁸ Cuno pueya tajiniji, tamonu
 pueyanoori naa nacaquiaari:

—¡Niishitiojonanaa, cucua quia taraajere quenaaja! ¡Cua niyanuniyojua
 quia niquiri! ¡Jiyaniojuanaari quiyanuniyojua! ³⁹ ¡Samaruuri na miiquiaa
 taraatia! ¡Na sariyotequiaari! ¡Na taquiriocuatequiaaariuhuj! ¡Na
 rupaamajiiri cushaaquiaa! ¡Na cuaqueya miiquiaa moqutiuriuriaari!
 Majaari ritia na cartenu paniniu quiquiaa. ⁴⁰ Janiyari juucua quia pueya
 sequereeni, cuno samaru nojori tohuatenura. Majaari nojori naata
 quiriquiaa na tohuatenura.

⁴¹ Jesuuri sequeree:

—Pueyaso tojitiaashijiicanaa, niaaqui Pueyasoocua tiuyashijiaca-
 juhanajaj. ¿Janiyateeri pueyaracaanu rejeretanutaniya nijaniyani?
 Miji quia niyanu quia jaatucure.

⁴² Caya samijia catecanosacari Jesuucua, samaruuri na pojotequee.
 Na taquiriocuatereeri. Jesuuri samaru sequeree na tohuatanura.
 Caya samijia naataniriiri. Na niqutiiorohua na queeri. ⁴³ Puetunu
 pueyajanaari jiyanoehua jiuujiatereeri nojori niquishacari Jesu miishano
 Pueyaso cumaacata.

Jesu pacutesacari pohuatanu nojuaja mosaanutaniya

(Mt 17.22-23; Mr 9.30-32)

Pueya jiuujiatesacarijia puetunu Jesu miishanojinijijianaa, Jesuuri na
 pueya sequeree:

⁴⁴—Maninia nia tojiri casaa cua sequenutaniya niajaninyani. Majaari na niyajetanu. Janiyari niquitiosaanutaniyani pueya miiniuria janiya taa nojori paniyacuajani.

⁴⁵ Majaari na pueya niishiniu quiriquiaa Jesu sequesano. Juhua miriqui sequesanoori quiriquiaa nojoriria. Naacuajitij, majaari nojori naata niishiniu quiquiaari. Nojoriiri Jesu nequesotanu puereturiquiaa-juhuaj, casaa nojori na pohuatasano sequenu paniriquiaani.

Cante jiyaniijijanaa cutarani

(Mt 18.1-5; Mr 9.33-37)

⁴⁶ Jesu pueyari juhuacatecara juayonuutariquiaa teyano nojorijini-jiniote jiyaniijijanaa quiniutianiyani. ⁴⁷ Jesuuri nojori niishiriojosano niishirii. Naaratej, Jesuuri naatujua nujuateree na shuriucua. ⁴⁸ Na pueya sequereeri:

—Cante nio mueya rupueya na cumaquiniuria cucua tiuujia cuno mueya quiniuucuanu, nojuajaari cua rupueyajuhuaaj. Cante cua rupueyani, cua Jiyarona rupueyajaariuhuaaj. Naacuajitij, cante tama na cuaqueyajaaja jiyateya pueya shocoteyashijia na quiniuria juhua naatujuanu, nojuajaari jiyaniijijanaa quiniutianiya puetunu narta Pueyaso muerasujinijiniojuanaa.

Cante maja pa paracani, nojuajaari pa jiyano

(Mr 9.38-40)

⁴⁹ Juanri Jesu sequereeri:

—Niishitiojonanaa, canaari pueyano niquiriucuaani samaruhua tuhuatanijiyano quia cumaacata. Canaari na tenujurucuaani nojuaja quiyaquiniucua pajaniyajinijinio.

⁵⁰ Jesuuri na riucuaaree:

—¿Casaara nia tenujurucuaarinioj? ¿Niaateeri niishiyaquiya, cante pa paraca quiyaquiyaani, nojuajaari pa jiyano?

Jesu nacasusacari Santiago, Juannio

⁵¹ Quera Jesu tacanu panishacari jiyocuacaanu, nojuajaari juhuacatecara Jerusalén tiacajiniara quiaaree, juhua jiuujiaaju na puereyaquiniutia. ⁵² Jerusalén tiacaacuara nuu cajiniocua Samaria jiyajinia Jesu quishacari na pueyata, noojiaqueya na pueyajinijinio puerateree tamonu tiacajinia nojori masenura tia nojoriicuaajiiri. Naacuajitij, na pueyari Samaria jiyajinia quijia shiitianiyojua tiacajinia quiojoquiaari tii Jesu maquejara nojori pajenura. ⁵³ Cuno Samaria pueya jaara niishiyaari Jesuuri Jerusalén tiacajiniara quiariquiaa, majaari nojori paniniu quirii Jesu maquenura nojori tiacajinia. ⁵⁴ Santiago, Juan niishishacari cuno Samaria pueyari nojori sooriquiaa, nojoriiri cunora Jesu nequesotaree:

—Jiyaniijijanaa, ¿quiaate paniya canaa tininiuria mani jiyocuacaanuji, cuno pojori na catijianura, taa tariucuaacaanu Pueyaso sequenu panishano caminiujiunia Elías miiquiaaricuaani?

⁵⁵ Jesuuri nojoriicua tacateree. Nojori nacasureeri naa nojori sanitionu panishacari cuno Samaria pueya. Naa nojori sequereeri:

—Majaari nia niishiniu cana sohanute naa nia niishiriojoteyani. Nia niishiri, majaari cua ninu quiquiaari mijiria cua pucoonura pueya. Saaja niquiaari cutaranijia, pueyacuaji cua tacunura.

⁵⁶ Na nuhuaji, nojoriiri tamonu shiitianiyojua tiacajinia quiojiyaree tii maquenura.

Tamasaca pueya quiniu panishacari Jesu pueyara juucua
(Mt 8.19-22)

⁵⁷ Nojori quiojosacari nucuaco, tamonu pueyanoori Jesu seque-
quiaari:

—Jiyaniijianaa, quia pueyanora quiniu paniyanijia. Janiyacua quia tarajareni puetunu tiqiyocua quia rucuanijosacariijianaa.

⁵⁸ Jesuuri na riuquaree:

—Quiojuapueeri na raaca jiitiaa cutara. Shuhuari na jesuhua jiitiaa-
juhuaj. ¿Saniniuujia Pueyaso Niyanuurijataj? Majaari cua jiitianu tama
cua maquejarajaaja.

⁵⁹ Jesuuri tamonu pueyano sequeree:

—Cua nuhuajiniara quia quiri.

Nojuajaari saa sequereeja:

—Cuaara Jiyaniijianaa. Cua que cuaara cua niquiara shaajeerajaara.
Janiya jaara na jamoreni, janiyacua na nuhuaji quiata rucuanejore
cutarani.

⁶⁰ Jesuuri na riuquaree:

—Naajaa, quia tarinitiare. Cua tojitiaashijiacaari juhua macunucua.
Naaratej, cuno macunucua cuaara jamoora tama narta macujuaaja.
Quia rucuanejore cutara Pueyaso rupaa quia pohuatanura.

⁶¹ Na nuhuaji, tamonu pueyanoori Jesu sequeree:

—Jiyaniijianaa, janiya cutara quiata quianu paniyani. Coteenu cua
tiajinia quiquiooraj, cua pueya cua niquiniuria cua nuhuajiria.

⁶² Jesuuri miriqui na riuquaree:

—Pueyano jaara na juyaca poonitijiya, jiya jiacataja na jayotanura na
cuhuariquia na jeenucuanura, maja cumaati na nijiniara na niquiniu.
Na camaru jaara na nijiniara niquiri, sesa naaniutianiyari shuyoro-
cotiuyocuara. Naajuhuj, cua pueyano jaara na quiquiojina tacatenu
panijiohua quiri, nojuajaari maja maninia Pueyasora poonijiona.

10

*Jesu jiyaramiquishacari setenta y dos na pueyajinijinio, Pueyaso rupaa
nojori pohuatanura*

¹ Nio nuhuaji, Jesuuri socua setenta y dos pueya saquiriojoquiaari,
nojori puetanura nojuaja, puetunu Israel pueya tiacajiniajanaa
Pueyaso rupaa nojori pohuatanura. Jesuuri nojori nuhuaji tii quianu
paniriquiaajuhuj. Puetunu nojorijianaa jiyaramiquiriiri caapiqui,
caapiqui. ² Nojori nuhuajiria, Jesuuri nojori rootaree nio miriqui
sequesano:

—Queraatia Pueyaso muerasuranoori quiya, juhua senooso-
coriquiano. Saniniuujia, secaja na senoonaari quiya. Cunora,
cuhuariquia camaru nia secojore, socua senoonaa na jiyaramiquiniuria
puetunujuanaa na senoosaanura. ³ Nia quiojiyare pueyanaa. Nia
niishiri, janiyari nia jiyaramiquiya juhua borrego niquiohuani
puereeta sareya tajinia. Pueyaso paraari juhua puereeta sareya.

⁴ Nia quiojosacari, majaari nia caashoque nia patanu, nia cumaneeca
quiquiojuhuaj, nia sapatunio. Majaari nucuaco nia tarishiniu pueya
nia sarhuatasacari. ⁵ Tamonu tiajina nia tiuquishacari, coteenu nia

saruhuatare na camaru nio sequesanota: “Juhuaianiya nia quiri, nio tiajinia quiniaanaa”. ⁶ Cuno tiajinia quiniaa pueya jaara jiyanoojiaca quiri, naa nia sequesacarij, Pueyasoori nojori miiniutianiya maninia. Nojori jaara juaajiaca quiri saniniuujia, Pueyasoori nojori shuquiritiyaquiniutianiya. ⁷ Tee nia masesaareni, cuno tiajinia nia jiyojere. Nia miaquere, nia rature nojori niqutiosano niajaniya. Nia pohuatanuucua Pueyaso rupaa nojori niqiuara, niajaniya cuaara niqutiosaaria nia panishano. Majaari tamasa tiajinia nia pacunujunu tii nia miaquenura. ⁸ Nia tiuquiiijosacari tamonu tiacajinia, pueyano jaara nia masuure na tiajinia nia quiniuria, niocua niaara nojori rupojosano miaquere. Majaari na soonu. ⁹ Cusosuhua nia naatanijiore cuno tiacajinia. Pueya niqiuara nia sequere: “Pueyasoori quiarjia nia jiyatenu paniya na muerasu nia quiniuria”. ¹⁰ Nia tiuquishacari tamonu tiacajinia, pueya jaara tii nia tojiniu paniyaquiri, niocua cuno tiaca nuucujinia nia naacare pueya niqiuara: ¹¹ “Nia tiacajinijinio jaaquiani, canaari canaa nioluacaacuaji na majiriuutiaani. Cunoori nia niishiniuria, Pueyaso jaara nia saniitiore, majaari canacua na tiutiasaanu quiniutianiya. Pueyasocujaari nia jiyanooni paniriquiaa juucua, na muerasu nia quiniuria”. ¹² Seetanujuanaa nia sequeyanijia pueyanaa, Pueyaso saniitionu juuca jaara quiri, cuno tiacajinia quiniaari socua jiyanohua saniitiosaanutaniya Sodoma tiacajinia quiniaa pueyajiniji.

*Jesu piriyojosacari Pueyaso tojtiaashijiaca pueya
(Mt 11.20-24)*

¹³ ¡Corazín tiacajinia quiniaa pueyanaa, mariyata Betsaida tiacajinia quiniaa pueyanaa! Cua tojiri. ¡Niaari jiyanohua saniitiosaanutaniya! ¡Niaari socua Pueyaso tojiyashijiaca quiya cuno tariucuaaanu Tiro tiacajinia quiniaa pueyajiniji, Sidón tiacajinia quiniaa pueyajinijinio! Cuno pueya jaara Pueyaso cumaacata miishano niqiuquiaari, taa cua miiquianu nia tiacajiniacuaani, nojori maara ritia noojia tacatoquiaari cutara, sesa nojori miishanojiniji. Cuno tiacajinijinio pueya maara cocuaque toqueya cushiyonuuquiaari, nojori taraajesacari sesa nojori miiniuucua. Naajuhua, nojori maara juaca niojoquiaari nojori nacaacua quera nojori macaashacari, sesa miijia nojori quiniuucua. ¹⁴ Niaa cutaraari cua cumaacata cua miijosano niqiujiaca. Naajaa, majaari nioojia nia tacatonu quiquianu Pueyasocua. Naaratej, Pueyaso saniitionu juucujinia, ¡niaari socua jiyanohua saniitiosaanutaniya Tiro tiaca pueyajiniji, Sidón tiaca pueyajinijinio! ¹⁵ Niajaniyarjijataj, Capernaum tiacajinia quiniaa pueyanaa, ¿niaateeri jiyaniya niaari jiyocuaaanu quiniaara jiyatesaanutaniya? ¡Maja! ¡Niaari puequeetuuj raama quejoosaanutaniya saniya!

¹⁶ Cua pueyanaa, cante nia tojtiajacani, nojoriiri cua tojtiajaca-juhua. Naajuhua, cante nia ruuretaa cua rupaa nia pohuatasacari, nojoriiri cua ruuretaajuhua. Cante cua ruuretaani, nojoriiri cua Jiyarona ruuretaajuhua.

Jesu jiyaramiquishano setenta y dos pueya tiuquiiijosacariuhua nocua

¹⁷ Jesu jiyaramiquishano setenta y dos pueyari Jesuucua tiuquiiioquiaariuhua. Nojoriiri jiyanohua shuquiriaatia quiriquiaa. Jesu seque-
tureeri:

—¡Jiyaniijanaa, samaruhuari canaa tojitiacanuni canaa tohuatani-jiosacari nojori, canaa jiyaniquishacari quia sesa!

¹⁸ Jesuuri nojori sequeree:

—Taaquiriirini. Janiyari Sesaaca niqiquianuni juhua niaco tiyano jiyocuacaanuji. ¹⁹ Janiyacuajaari cua cumaaca nia niqutiocanuni, juhujaniya nia rucuanenura sacocua caco, turucuaniniu caconio. Cua cumaacata, niaari puetunu Sesaaca cumaacajanaa shocotanutaniya, juhujaniya panaatia nia rucuanenura, cua rupaa nia pohuatanura. Majaari quenaaja tamonu casaa miiniu quiniutianiya naquiya nia-janiya. ²⁰ Naajaa, majaari saaja shuquiriaatia nia quiniu samaruhua tojtianuucua nijaniya. Shuquiriaatia nia quiri cutara nia sesaca naajiotasano quishacari jiyocuacaanu, Pueyaso muerasu sesaca naajio-tasaqui.

Jesu shuquirishacari

(Mt 11.25-27; 13.16-17)

²¹ Jiyacaritij, Pueyaso Sohuanuuri Jesu shuquiritirii jiyanhua. Cunora, Jesuuri na Que Pueyaso sequeree:

—¡Quia shuquiritiaanijia cua Quena! ¡Quiaacuajaari Jiyaniijajanaa quia jiyocuacaanu, mijiriano! ¡Quiaari maninia miirri! Cua pueyari juhua naatujoori, maja puera niishijiaca. Naajaa, quiaari quiarijia nojori niishitirii quia niishishano, quia jamosano mijiria niishijiacaacuai. Jaa, cua Quena, quiaacuajaari naa nojori panitijaa.

²² 'Cua Queeri tari cua niqutioquiaari puetunu na jiiitasanojuanaa, Jiyaniijiarano cua quishacari. Majaari tamonu niishiniu quenaaja cante Pueyaso Niyanuni, saaja cua Que cutaraari cua niishiya. Naajuhuj, majaari tamonu niishiniu cutara cante cua Queni. Saaja janiya cutaraari na niishiyani. Naajuhuj, noo pueyari na niishiya, canapue cua niishitiniu paniya cua Quecuajani.

²³ Na nuhuaji, Jesuuri na pueyacia tacateree. Saaja nojori sequereeri: —Shuquiriaatia quiijaca cutaraari nijaniya, nia niqiniuucua puetunu nia niquishanojuanaa nia ruenuucua janiya. ²⁴ Seetanujuanaa nia sequeyanijia, queraatia tariucuaaanu Pueyaso sequesano caminiujuninaa pueya, mariyata jiyaca jiyaniijianucuanio, nojoriiri nia niquishano niqiniuucua jiaatiaquiaari juucua. Majaari na niqitiuniu quiquiaari. Nojoriiri cuata nia quishacari nia tojishano tojtianuucua jiaatiaquiaari juucujuhuj. Majaari na tojtioniu quiquiaari.

Samaria jiyajinijinio maninia miijajiniji pohuatasano

²⁵ Na nuhuaji, Moisés Rootasanojiniji niishitiojona pueyanoori Jesuucua niqiaari nata na pocoojonura. Jesu na pocuatenura sesa juucua, naa na nequesotareeri:

—Niishitiojonanaa, ¿taa cua miiniutianiya pueyaracaanu rishijia cua quiniuriani?

²⁶ Jesuuri na riuquaree:

—¿Taate Moisés Rootasanojinia naajiotasanoni? ¿Taa quia niishiriojo-quiaani, quiaa jaara na serojoquiaa?

²⁷ Moisés Rootasanojiniji niishitiojonaari Jesu riuquaree:

—Naa sequeyano:

“Quia Jiyaniijia Pueyaso quia paniri puetunu quioojiatajanaa, puetunu quia sohuanutajanaa, puetunu quia cumaacatajanaa, puetunu

quia niishitiajatajanaano. Naajuhuj, quiarta pueyano quia paniri taa quia paniyacuaa tama quia cuaqueyajaajani”.

²⁸ Jesuuri na sequeree:

—Quiaacuaajari maninia riuquaree. Naa quia miishacaritij, quiaari pueyaracaanu rishijia quiniutianiya.

²⁹ Moisés Rootasanojiniji niishitiojonaari tama nocuaji tacunu paniriquiaajaaja, maninia quijia na quiniuria Pueyaso niquiara. Naaratej, naa nequesotarohua Jesuuri:

—¿Canteeri cuarta pueyanoni?

³⁰ Jesuuri nio pohuatasano na pohuataree na niishitiojonura nojuaja. Naa coteereeri:

—Tamonu parta Judio pueyanoori Jericó tiacajiniara quiariquiaa juucua, Jerusalén tiacajiniji. Nohuasenuujuaca pueyari na quiaree. Puetunu na jiiatasanojuanaa na jaariuutiatureeri, na cushishano toquenio. Na piquitiuriiri. Quera macu na tiujiatuqueeri.

³¹ Na nuhuaji, pueyacuara secojonaari cuno nucuaco quiariquiaajaacuhuj. Na niquishacari piquishano narta Judio pueyano mataano nuu shuriuquicora, na shocortamaa saajaari. ³² Na nuhuaji, Levita pueyanoori cuno nucuaco quiariquiaajuhuj. Na niquishacari narta Judio piquishano pueyano, nojuajaari saaja na shocortamaajuhuj.

³³ Na nuhuaji, Samaria jiyajinijinio tahueri cuno nucuaco quiariquiaajuhuj. Na niquishacari parta Judio pueyano mataano, Samaria jiyajinijinio tahueri nocua taraajeree. ³⁴ Na cacataseeri. Nohuasenuujuaca piquiyashiquia matejoree shiyocuataari, vinotanio. Na nuhuaji, na piquiyashiquia morojoreeri. Na nuhuaji, na niataree tama na seru nijiniajaarijia. Ritia na jiyataaree rucojojuaca tiuquiiijiojua tiajiniaraari. Cuniqi na cojuatareeri. ³⁵ Tariqui, cuno tahue quianu panishacariuhua, nojuajaari caapiqui cumaneeca pueraree. Rucoonaa tia camaru na niquitioreeri. Na sequereeri: “Cucua quia jiyanoori. Nio pueyano quia cojuatare quiria. Quiaa jaara socua quia cumaneeca nocua puecare, janiyacua saniniuujia quia niquitiorohuanijia cua tacatesacariuhua”.

³⁶ Nio pohuatanu nuhuaji, Jesuuri cuno pueyano nequesotaree:

—Quiarijiani, ¿taa quia sequeyani? Cuno jiuujianaraca rucoonaa pueyajinijinioni, ¿teyano cuno pojorijinijiniote narta pueyanoocua taraajeja cutarani?

³⁷ Moisés Rootasanojiniji niishitiojona pueyanoori Jesu riuquaree:

—Cuno Samaria jiyajinijinio tahuecuajani, nocua taraajequiaarini.

Jesuuri na sequeree:

—Taaquiriirinj. Quia quiaarohua. Naa pueyacua taraajeja quia quirijiuhuaj, taa cuno tahue taraajequiaaricuaani.

Jesu quishacari Marta, María tiajinia

³⁸ Socua na rucuanesacari, Jesuuri tamonu tiacajinia tiuquiquiaari na pueyata. Cuno tiacajinia na quishacari, tamonu maajiiri na masuquiaari. Naaratej, na tiajinia na tiuquinitiareeri. Cuno maaji sesa quiquiaari Marta. ³⁹ Martaari tarajanu jiiitaja. Na sesaari quiquiaari María. Maríari Jesu niohuaca shuriuquiumia cajiriquiaa, na tojiniuria Jesu pohuatasano. ⁴⁰ Marta cutaraari poonijioriquiaa queraatia na mishocoriquiano na jiiitasacari. Cunora, Martaari Jesuucua catecanoree. Na sequereeri:

³⁸ Socua na rucuanesacari, Jesuuri tamonu tiacajinia tiuquiquiaari na pueyata. Cuno tiacajinia na quishacari, tamonu maajiiri na masuquiaari. Naaratej, na tiajinia na tiuquinitiareeri. Cuno maaji sesa quiquiaari Marta. ³⁹ Martaari tarajanu jiiitaja. Na sesaari quiquiaari María. Maríari Jesu niohuaca shuriuquiumia cajiriquiaa, na tojiniuria Jesu pohuatasano. ⁴⁰ Marta cutaraari poonijioriquiaa queraatia na mishocoriquiano na jiiitasacari. Cunora, Martaari Jesuucua catecanoree. Na sequereeri:

—Taaquiriirinj. Quia quiaarohua. Naa pueyacua taraajeja quia quirijiuhuaj, taa cuno tahue taraajequiaaricuaani.

Jesu quishacari Marta, María tiajinia

³⁸ Socua na rucuanesacari, Jesuuri tamonu tiacajinia tiuquiquiaari na pueyata. Cuno tiacajinia na quishacari, tamonu maajiiri na masuquiaari. Naaratej, na tiajinia na tiuquinitiareeri. Cuno maaji sesa quiquiaari Marta. ³⁹ Martaari tarajanu jiiitaja. Na sesaari quiquiaari María. Maríari Jesu niohuaca shuriuquiumia cajiriquiaa, na tojiniuria Jesu pohuatasano. ⁴⁰ Marta cutaraari poonijioriquiaa queraatia na mishocoriquiano na jiiitasacari. Cunora, Martaari Jesuucua catecanoree. Na sequereeri:

—Jiyaniijanaa, ¿majate cucua quia taraajenu? Cua tarajanuuri cua tarinitiaquee niquiriyatujua, puetunu nio poonijiosanotajanaa. ¡Quia sequere na naacutanura janiya!

⁴¹ Jesuuri saaja na sequere:

—Martanaa, quioojia quia cajitiri sanaunaa. Quiaari puera quia miishano tacaatiaa. ⁴² Saaja niquiriyatu casaa cutaraari jiyanohua panishano. María cutaraari cuno socua panishano casaa saquiriojoree. Tamonuuri maja na naata na tojishano jaariutianu noojajiniji.

11

*Jesu niishitiojosacari na pueya nojori secojonura Pueyaso
(Mt 6.9-15; 7.7-11)*

¹ Tamacari, Jesuuri Pueyaso secojoriquiaa tamaqui. Na puecasacari secojonu, tamonu na pueyajininioori na sequere:

—Jiyaniijanaa, canaa quia niishitiojore canaa secojonura Pueyaso, taa Tiuquinijiona Juan niishitiojoquiaari na pueyacuaani.

² Jesuuri nojori sequere:

—Pueyaso nia secojosacari, naa nia sequere:

“Jiyocuacaanu quijia canaa Quenaa, puetunu pueyajanaa cuaara niishiria quiaari tojetaarucujanaa sesa miyashijia. Pueya cuaara seetanujuanaa quia jiyateera nojori jiyaniijia quia quiniuria. Quia panishano cuaara miishiiria mijiria, taa jiyocuacaanu miishiyacuaani. ³ Canaa quia niquitioriquia canaa miaquesocoriquiano canaa panishano puetunu juucajanaa. ⁴ Canaa quia jiyanoori sesa canaa miishanojiniji, taa canaa jiyanooquiaacuaa sesa canaa miiniaani. Naajuhuj, canaa quia cojuare, maja sesa canaa mitishaanura”.

⁵ Jesuuri naa sequereejuhuj, socua nojori na niishitiojonura:

—Niaa jaara nia rupuenacua quiaare shiyaqueya, casaa nia masenura nojuajiniji, ¿nojuajatucua taa quia sequereni?, quiaa jaara na sequere: “Cua rupenanaa, cua niquitioire jiuujianaraca pan. ⁶ Tamonu cua cojiniaari shusha tiuquiriohua tucuacaanuji, miaajeyari. Shaaquiiri cua sumatuu cua miaquetesocoriquiano nojuaja”. ⁷ ¿Quiaatucua taa miirini quia rupuenajaara na tijiniacumaji quia riucua?: “Maja cua taajetenu. Cua tia tiootiu tioree tarinijia. Tari cua mueya mataa maquetujinianijia. Maja cua naata sanenu cua niqutionura quia panishano”. ⁸ Jaara naa sequeretej, niaa jaara na tia tiootiu piquiniu tarinitiaaquiri, janiyari seetanujuanaa nia sequeyani, nojuajaari sanenutaniya na niqutionura nijaniya puetunu nia panishanojuanaa. Majaari na sanenu quiniutianiya saaja nia rupena na quiniucua. Sanenutaniyari pueyaracaanu taajeta nia piquishacari na tia tiootiu. ⁹ Naajuhuj, maja nia tarinitianu Pueyaso nia secojonu. Nojuajaari nia panishano nia niqutionutaniya. Cunora, nia panishano nia pajeriquia. Niocua na riuriatare. Tiootiu nia piquiriquia. Niaara riatasaanutaniyari. ¹⁰ Naaratej, cante Pueyaso secojoquiaani, nojuajaari na panishano masenutaniya. Cante na pajejani, na panishano riuriatanutaniyari. Cante tiootiu piquiquiaani, nera riatasaanutaniyari.

11 '¿Niaatucua nia niyanu niquitiore saajia, neecaruu na masesacari niajaniya? Maja. ¿Niaatucua soconu niquitiore nia niyanu, sapiti-aaja na masesacari niajaniya? Maja. 12 ¿Niaatucua turucuaniniinu niquitiore nia niyanu, caacaraja riuriuquiu na masesacari niajaniya? Maja. 13 Puetunu niajanijajanaari sesa miiniu niishijiaca. Naajaa, niaari maninia casaa niquitionu niishiya nia niquiohua. ¿Taatucuaa socua jiyocuacaanu Quijia nia Que Pueyasoni, tojetaarucujanaa sesa miyashijiani? Seetanujuanaa capora na quishacari, nojuacuajaari na Sohuanu niquitionu niishijia na muerasu, canapuate na masequiaacua-jani.

Pueya sequesacari Jesu, samaru cumaacaracana

(Mt 12.22-30; Mr 3.20-27)

14 Tamacari, Jesuuri samaru tohuataniriquiaa tamonu pueyanojiniji. Cuno pueyanoori tiquia quiquiaari samaru na jiitiasacari. Samaru jaara tohuataquiaari cuno pueyanojiniji, pocujara quiriohuari. Pueya niquishacari naatej, nocuaji jiuujiatereeri. 15 Tamasaca pueyari saa sequequiaarjia:

—Cuno pueyanoori samaruhua tohuatanijija samaruhua jiyaniijia Satanás cumaacata.

16 Tamasaca pueyari Jesu saniniujiuniu paniriquiaa. Naaratej, nojoriiri na sequeturee na cumaacata na miiniuria casaa, na niqitini-uria nojori, nojori niishiniuria nojuajaari seetanujuanaa Pueyasojini-jinio. 17 Jesuuri nojori niishiriojosano niishiriquiaa. Nocuaji nojori sequereeri:

—Tamonu jiyajinia, cuno pueya jaara miaquetoojija tama nojori pueyatajaaja, nojoriiri maja na naata na paraa nujuatanu, na paraa jaara nocua tiuquitiare raquiritano nojori quishacari. Naajuhuj, niquiriyatu tiajinia quiniaa jaara tama nojorijiaaja juayonuujutaquiaa, nojoriiri maja na naata jatiqiu quiniu. 18 Naajuhuj, niaari cua se-queriquiaa, janiyana samaruhua tohuatanijija Satanás cumaacatani. Jaara naa quirijitij, ¿Satanástucua taa pueyaracaanu quiri jiyaniijiani, nojuaja jaara tama na samaruhuajaaja tohuatanijija tama na cumaa-catajaaja? 19 Naajuhuj, janiya jaara samaruhua tohuatanijija Satanás cumaacatani, taa nia sequeyacuajani, ¿nia niishitiojosano pueyariuhuj, cana cumaacata nojori tohuatanijioquiaa samaruhanani? ¿Taa nia se-queyani? ¿Satanás cumaacatatee? Majaruhua. Naacuajitij, tama nia-janiyajaaja nia niishiri, niaari jiyajeneya. 20 Naa Pueyaso cumaacata cua tohuatanijiosacari samaruhaatej, naacuajiti nia niishiri, Pueyasoori tari nia masuya seetanujuanaa na muerasu nia quiniuria.

21 'Niojinia nia niishiriojorejuhuj: cumueeca pueyano jaara na tia cojuua queraatia na miaquejotaja casaata, majaari tamonu naata na jiitiasano casami jaariuutianu. 22 Saniniuujia, socua cumueeca pueyano jaara nocua tiuquiri, na miaquejotaja casaa jaariuutiaari, cuno, nocua na tiuushano juucuanu. Na nuhuaji, na jaariuutiasano casami paari, na pueya na serotasocoriquiano. Naajuhuj, janiyari Satanás jiitiasano jaariuutiajani.

23 'Cante cua jiyano quiyaquiyani, nojuajaari cua paraca. Cante cua naacutaquiyia pueya rerecojonura Pueyasorani, nojoriiri saaja pueya cocuataa Pueyasocuai. Naaratej, jacaria nia niishiriojore casaa nia niishiriojija janiyajinijini.

Samaruhuari riujuuujia na quiquiojiniohua

(Mt 12.43-45)

²⁴ Samaru jaara tohuatare pueyanojiniji, joojuashiquio rucuaneyiyari na samaatejara na pajenura. Jaara na riuriataaquiri, niishiriojiyari: “Cua quiquiojinia riujuuyarohuaraqui teje cua tohuatacanucujani”.
²⁵ Samaru tiuquishacariuhua cuno pueyanooqua, na riuriatasuhuari shaaco, juhua maninia netoonujusano tia, maninia jeenucuasanojuhuaj. ²⁶ Naaratej, cuno samaruuri socua sesa miijiaca nojuajiniji siete narta samaruhua riquiohua nata na quiniuria. Puetunu nojorijianaari cuno pueyanojinia tiuquitasuhua. Naacuajitij, cuno pueyanoori socua sesara jiyacateja, tarijia na quiniujiniji.

Seetanujuanaa shuquiriaatia quiniu cutara

²⁷ Jesu pohuatasacari nio, tamonu maajiiri jiyacari pueya tajiniji naa nacaree:

—iShuquiriaatia quijia cutaraari cuno maaji cante quia raquiaarini, cante quia canashitiquiaarini!

²⁸ Jesuuri saaja na riucuaaree:

—Socua shuquiriaatia quijia saniya sajara cante Pueyaso rupaa toji-jiani, cante Pueyaso panishano miiquiaaaniuhuj.

Sesa pueyari saaja Pueyaso cumaacata miishano niqiniu panijiaca

(Mt 12.38-42; Mr 8.12)

²⁹ Socua queraatia pueyari Jesuucua rerejoriquiaa puetunu na shocuaqueyajanaa. Jesuuri juhuacatecara naa pohuataree nojori niqiuara:

—Nio pa quishacari pueyari sesa miijiaca. Nojoriiri cua sequequiaa, jiyajeneta casaa cua miiniuria Pueyaso cumaacata, nojori niishiniuria janiyari Pueyaso Jiyarosanoni. Seetanujuanaa majaari socua cua niq-uitiniu quiniutianiya nojori, cua cumaacata cua miishano. Nojoriiri saaja niqiniutianiya cutara taa cua miishaanutaniyani, naatej taa supuetana Jonás miishaaquiaaricuaani. ³⁰ Jonás miishaanuuri nocuaji jiuujiatesano quiquiaari cutara. Naacuajitij, Nínive tiacajinia quiniaa pueyari niishiquiaari Jonásri Pueyaso jiyarosano quiquiaari. Janiyari naa miishaanutaniyajaaniuhuj, nio pa quishacari pueya niishiniuria janiyari Pueyaso Jiyarosanoni. ³¹ Cua supuetana Salomón jaara Israel pueya jiyaniijia quiquiaari, jiyacari tamonu maajiiri pananu shu-cuaji jiyajinia jiyaniijia quiquiaari. Nojuajaari jiyanhua tucuaaanuji niqiuari narta jiyaniijia Salomón tojinuuuca, jiyanhua niishijia Salomón quishacari. Jiya puequesacari Pueyaso saniniujiushacari pueya, cuno maajiiri jiyacari sanenutaniya nio pa quishacari pueyacuara na tonujunura, nojori ruuretanuucua socua Niishijiajanaa cutara Salomónjiniji. Cuno Niishijiaari niya nia tajinia quiyacuaja. Janiyacuajaari nojuajani. ³² Naajuhuj, cuno tariucuacaanu Nínive tiacajinia quiniaa pueyari saneecuatunutaniya Pueyaso nequesoreesacari nio pa quishacari pueya. Nojoriiri nio pa quishacari pueyacuara tonu-junutaniyajuhuj, nojori tacatoyaquiniuucua nojori jiuujia sesa nojori miishanojiniji, Pueyaso rupaa nojori tojiyaquiniuucua. Nínive pueya cutaraari noojia tacatoquiaari sesa nojori miishanojiniji, Pueyaso sequenu panishano caminiujiunia Jonás jaara Pueyaso rupaa pohuataquiaari nojori niqiuara. Pueyaso sequenu panishano caminiujiunia quiarijia

nia tajinia quiyani, nojuajaari socua cutara Jonásjiniji. Janiyacuajaari nojuajani.

Pueya jiuujia cuhuatanajiniji pohuatasano
(Mt 5.15; 6.22-23)

³³ Pueya jaara samaritiu noshitiri, majaari na jamotanu. Majaari na niatanu conatu cariquiaco. Maninia cutaraari jiyocuacaanu na morotanu, tiaco tiuquitianaa cuhuatariquiano. ³⁴ Pa namijiaari juhua pa cuaqueya cuhuatanajuhua. Naacujitij, paa jaara Pueyaso casaacua jiaatiaja quirini, paari cuhuashiqui quiya puetunujuanaani. Saniniuujia, pa namijia jaara sesa casa niquiniuucua jiaatiaja quiri, paari ninishiqui quiya puetunujuanaani. ³⁵ Tama nia cuaqueyajaaja nia cojuare, niaa mariqui nioojia cuhuatana maquishajareeri. ³⁶ Niaa jaara puetunujuanaa juhua cuhuashiqui quiya, sesa casaacua jiaatiaashijia nia quishacari, niocua maninia niquijiaara quiri puetunujuanaa, juhua samaritiu cuhuatasacari nijaniya. Naacujitij, niocua niishijia quiri, maninia miijia nia quiniuria.

*Jesu nacasusacari Fariseocuaca, Moisés Rootasanojiniji niishitiojoo-
aanio*
(Mt 23.1-36; Mr 12.38-40; Lc 20.45-47)

³⁷ Jesu puecasacari pocuanu, tamonu Fariseo pueyanoori na masuquíaari na tiajinia na miaquenura. Jesuuri na tiajinia quiaquiaari. Na tiuquishacari, miaquejajinia cajishijianaari. ³⁸ Fariseo pueyanoori jiuujiatequiaari na niquishacari Jesuuri shuquitioo tari cajiriquiaa mi-aquenura. Judiocuacaari jiyanjia, nojori rucoojosacari tamasaca pueya tajinia, tamasaca sesa miishanoori na naata nojoriicua pacunu. Nocujaji nojoriiri shuquitianu niishijia, tiajinia nojori tiuquishacariuhua. ³⁹ Naa cuno Fariseo pueyano niishiriojosacaritij, Jesuuri saa na sequereejaa:

—Nijaniya Fariseocuacanaa, niaari juhua noo pueya, canapueete saaja na ratujua cuaqueya jeequejoquiaacuajani, saaja na miacojua cuaqueyano. Majaari na jiniacuma na jeequenu. Niaari naajuhua. Niaari sapuenu maninia pueya niquishano. Saniniuujia nioojiaacari jiyanhua sesa quiya, casami nia masejonuucua nia nohuasejonuta, puetunu sesa nia miiniutiajanaajuhua. ⁴⁰ Mosanucanaa, ¿niaateeri niishiyaquiya, pa cuaqueya Shipininaari poojia shipiniquiaarijihua? Naaratej, nioojia nia jeequere cutara, maja saaja nia cuaqueya. ⁴¹ Niaa jaara puetunu nioojiajinia nia jiiiasanojuanaa jiyatere Pueyasora na quiniuria, niaa maara juhua jeequesano quiri puetunujuanaa.

⁴² ¡Niaari taraatia miishaariquiano, Fariseocuacanaa! Niaari miaquesano jaamasucua serojoquiaa jacaria diez jaamasucua, puetunu cien jaamasucujinijiojuanaa, Pueyasora nia niqutiosocoriquiano. Cuno jaamasucuaari culantro, menta, socua tamonu jaamasucuaniojuanio. Niaari naa maninia miiquiaa taa Moisés niishitiojoquiaaricuajani. Naajaa, Moisésri niishitiojoquiaarijihua maninia pa miiniuria parta pueya, Pueyaso pa paniniuriajuhua. Majaari cuno na sequesano nia miiniu quiquiaa. Puetunu na sequesanojuanaa tojjijia nia quiri. Majaari saaja jaamasucua niqutiojojuaca nia quiniu.

⁴³ ¡Niaari taraatia miishaariquiano, Fariseocuacanaa! Niaari jiyani-
ijianucua shuriucua cajiniuucua jiaatiaquiaa, Pueyaso secojojua tiajinia

nia quishacari, juhua cutara pueya nia quiniuria pueya niqiuara. Naa-juhuj, niaari pueya paniquiaa nojori saruhuatnura niajaniya juhua jiyaniijianucua, nia rucuanesacari tiacajinia.

⁴⁴ 'iNiaari taraatia miishaariquiano! Niaacuajaari juhua niqishoo jamaca. Pueyari juhujaniya na caco rucoquiaa na niishiyaquishacari. Naajuhuj, pueyari juhujaniya nia rupuequiaa, nojori niishiyaquishacari nioojaari jiyanhua sesa, juhua pueyano mocua jamajinia.

⁴⁵ Jiyacaritij, tamonu Moisés Rootasanojiniji niishitiojonaari Jesu se-
quere:

—iNiishitiojonanaa, naa quia sequesacari Fariseocuatej, quiaari canaa sequeyajuhuj!

⁴⁶ Jesuuri na riuquaree:

—Taaquiriirinij. iNiaari taraatia miishaariquianojuhuj, Moisés Rootasanojiniji niishitiojonaanaa! Puetunu nia rootasanojuanaari juhua jiyanhua niiquia casaa nitiasocoriquiano. Majaari nia tojtiajaca pueya nia naacunu quiquiaa quenaaja nia juaashiquia sacasaruta, cuno niiquia casaa nitiasaanura. Naacuajitij, pueyari maja na naata rejere-tanu nia niishitiojosano.

⁴⁷ iNiaari taraatia miishaariquiano! Niaari macunucua niojotajara shipinijioquiaa shanohuara, tariucuacaanu pueyara Pueyaso sequesano caminiujiuniaa nucuahuacuj, teyano nia supuetanaa puecoquiaaricujani. ⁴⁸ Naacuajitij, canaari niishiyani, niaari nia supuetanaa miishano shuquiritiaa, nia cojuasacari nojori puecoosano nucuha.

⁴⁹ Naacuajitij, Pueyasoori na niishiniutia sequequiaari:

“Janiyari cua sequenu panishano caminiujiuniaa jiyaramiquiniutianiya Israel pueyacuani, cua rupaa niishitiojonaanio. Israel pueyari noojiaqueya puecoonutaniya. Tamasacaari naquiya miishaanutaniyajuhuj”.

⁵⁰ Cunora, Pueyasoori nio pa quishacari pueya naminiutianiya puetunu na sequenu panishano caminiujiuniaa nanacaacuajanaa, canapue te nio jiya coteejajiniji puecoosaquiaaricujani. ⁵¹ Coteenujuanaa mosaquiaari Abel. Na nuhuaji, queraatia Pueyaso sequesano caminiujiuniaari puecoosaquiaari. Na nuhuaji, Zacariasri socua jaatesaquiaari monujuhuj. Nia supuetanaari na moquiaari Pueyaso Secojua tiajinia, Pueyaso Shuriucua Quiquio tacoji, Pueyasoocua catijiasaqui shuriucua. Seetanujuanaa nia sequeyanijia, nio pa quishacari pueyari namishaanutaniya puetunu nojori puecoosaanuucujanaa.

⁵² iNiaari taraatia miishaariquiano, Moisés Rootasanojiniji niishitiojonaanaa! Niaari najuhua Pueyaso Rupaa jiitiaa. Majaari nia tojiniu paniniu, Pueyaso jiyanooshano pueya nia quiniuria. Saniniuujia, tamasa jaara Pueyaso Rupaa niishiniu paniri, Pueyaso muerasu nojori quiniuria, majaari nojori nia niishitiojonu paniniu quiquiaa.

⁵³ Jesu jaara nio sequequiaari, Moisés Rootasanojiniji niishitiojonaa, mariyata Fariseocuaari jiyanhua juaaquioree. Jiyanhua nojori juaaquisacari, nojori Jesu nequesoreenu coteere queraatia. Nojori Jesu pocuatenu paniriquiaa sesa juucua. ⁵⁴ Nojori nocua tonujunu paniriquiaa juucua, jaara sesa quiri na sequesano.

12

Jesu niishitiojosano, maja sapuenu maninia pueyano niquishano pa quiniuria

¹ Jiyacaritij, jiyanohua jiyanohua queraatia pueyari Jesuucua rerejoree. Tama nojorijiaarijia rapijiotooriquiaa puera nojori rerequeejosacari. Jiyacaritij, Jesuuri saa na pueyaja sequenu coteeree. Naa nojori sequereeri:

—Tama nia cuaqueyajaaja nia cojuare Fariseocuaca pan poreetajaacuaji. Nojori niishitiojosanoori juhua pan poreetaja. Majaari na jataniniu pueya, sesa nojori miiniuujiniji. Nojoriiri sapuenu maninia miijiaa pueya niquishano tamasaca niquiara. Saniniuujia, nojori jiuujaari saa sesaja pueyaracaanu. ² Nia niishiri, puetunu jiyasohuaja miishanojuanaari niishishaanutaniya. Puetunu jamosano casaa-janaari niquishaanutaniyajuhuj. ³ Puetunu nia sequesanojuanaa ninishiquini, cuhuashiqui caminiujiushaanutaniyari. Naajuhuj, nia sasacojosano tama nia sohuacamarajaajani, cunoori jiyocuacaanu tia nijiniji nacatasaanutaniya puetunu pueya tojishocoriquianojuanaa.

Cante puereshiya cutarani

(Mt 10.26-31)

⁴ 'Cua rupuenaanaa, majaari nia puerenu canapujete nareja pa cuaqueya mojuani. Nojoriiri maja na naata socua sesa na miiniu pajaniya, paa jaara tariucua macu quiyani. ⁵ Seetanujuanaa nia sequereeraj, cante puereshiya cutarani. Noo nia puerere cutara, cante cumaacaraca cutara na jatanura niajaniya mani quiqiojiniani, na cusojuanu nuhuaji niajaniya. Saaja nojuaja nia puerere cutara.

⁶ 'Cinco shuhuari saaja caapiqui cumaneecaniyojuata masesano. Pueyara, cunoori najuhuanaj. Naajaa, majaari Pueyaso niyajetanu cuno shuhua jaara puecoosaare. Nojuajaari na niishiya cutara. ⁷ Naajuhuj, nia muesuuri puetunu serojosanojuanaa. Pueyasoori na niishiya. Naaratej, maja nia puerenu. Niaari socua jiyanohua Pueyaso panishano cutara queraatia na cojuasano shuhujiniji.

Tamasaca niquiara pa sequere paari Jesucristo pueyani

(Mt 10.32-33; 12.32; 10.19-20)

⁸ 'Cua tojitiare. Cante tamasaca niquiara sequejani: “Janiya Jesucristo pueyanoni”, naajuhuj, janiyari cua Que Pueyaso seya niquiara sequenutaniyani: “Nojuaja cua pueyano”. ⁹ Cante saniniuujia tamasaca pueya niquiara seetaa janiyajinijini, cua pueyano na quishacarini, janiyari cua Que Pueyaso seya niquiara na tamacanutaniyajuhuj.

¹⁰ 'Cante cua sesacareeni, nojuaja na naata jiyanooshaanu. Saniniuujia, maja cutaraari na naata jiyanooshaanu cante Pueyaso Sohuanu sesacareeni.

¹¹ 'Cua muerasu nia quiniuucua, niaari Pueyaso secojojua tiajini-aqueya jiyatasaanutaniya, nequesoreenaa niquiara, mijiria jiyani-ijianucua niquiaranio. Nojori nequesoreesacari niajaniya, majaari nia niishiriojonu taa nia riucuanutaniyanoj, casaa nia sequenutaniyajaani-uhuj. ¹² Nia riucuanu panishacari, Pueyaso Sohuanuuri jiyacari nia niishitiojonutaniya taa nojori nia riucuanutaniyani.

Puereetaari casamiriaca pa quishacari

¹³ Tamonu pueyanoori pueya tajiniji naa Jesu sequequiaari:

—Niishitiojonanaa, cua tarajanu quia sequere na niquisitionura janiya canaa shipininio jiiitasanojiniji, taa canaa shipininio sequequiaari canaacuajani, saminio na quishacarjia.

¹⁴ Jesuuri saaja na riucauree:

—Pueyanonaa, ¿janiyateeri pueya nequesoreenara jiyatesaaquiaarini, cua serotanura niajaninya nia shipininio casamini?

¹⁵ Jesuuri naa nojori sequequiaarijuhuaj:

—Jiyanohua nia cojuare tama nia cuaqueyajaaja, maja casamiicua jiaatiajaca nia quiniuria. Pa naata shuquiriaatia quiniu casamiijiu. Queraatia casamiiri maja na naata seetanujuanaa shuquiriaatia quijiacara na jiyatenu pajaniya.

¹⁶ Na nuhuaji, Jesuuri pueya niishitioree nio miriqui pohuatasanta. Naa sequereeri:

—Tamonu pueyanoori quiquiaari, jiyanohua casamiriaca. Na cuhuariquiajinia na natoosanoori jiyanohua muetuquiaari. Naacuajitij, queraatia miaquesocoriquiano jiiitiaquiaariiri na cuhuariquiajiniji na carojotasano. ¹⁷ Tama sequereejariija: “¿Taa cua miiniutianiyani? Cua tiajosano cua racatajara cua carojotasanoori puetunujuanaa tari mishaja quiya. ¿Tee cua racatanutaniya shusha cua carojotasanoorinitioj? ¹⁸ ¡Jaj, niishiQuiinijia! Coteenu cua tiajosano cua casamiicuaaji niyaroorohuaraqij. Janiyari socua puereetucocuara tiajonutaniyani. Janiyari cuniqui mishinijionutaniya puetunu cua carojotasano cua cuhuariquiajinijiniojuanaani, puetunu cua jiiitasano casamijianaanio. ¹⁹ Na nuhuaji, janiyari tama cua cuaqueyajaaja sequenutaniyani: ‘Pueyanonaa, quiarjia cutara juhuajaniya quia quiri. Quiaari queraatia casamiriacacuaja, queraatia marijiaara. Quiaari queraatia quia miaquesocoriquiano jiiitaacuaja. Quiarjia cutara quia samaatere. Quia miaquere. Quia rature. Tama quia cuaqueyajaaja quia shuquiritiri’ ”. ²⁰ Cuno niucuaja, Pueyasoori na sequequiaari: “Moseecanaa, quiaari quiarjia macu juhuaquenutaniya. ¿Canteeri puetunu quia jamuesano casamijianaa jiiitanutaniya quia nuhuajini? ¿Canra na quiniutianiyarini?” ²¹ Naa miishaanutaniyari puetunu pueyajanaa, cante saaja tama nerajaaja reratequiaa casamini. Cuno, jamuejaca casamiriaca pueyani, nojoriiri seetanujuanaa casamiijuniucua Pueyasora.

Pueyasoori na muerasu cojuaja maninia

(Mt 6.25-34)

²² Na nuhuaji, Jesuuri na saquiriojosano pueya sequequiaari:

—Naaratej nia sequeyanijia pueyanaa, majaari nia tacaaniu casaa nia miaquenutaniyani, casaa nia cushiniutianiyani. ²³ Pueyaso jaara pa shipiniquiaari saminio pa quiniuria, majaari jiyajeneta nera na rishitiniuria pajaniyajuhuaj. Naajaariuhuaj, nojuaja jaara pa cuaqueya shipiniquiaari, majaari jiyajeneta na cushitiniuria pajaniyajuhuaj. ²⁴ Riquiacujua nia niquiriquia. Majaari nojori natoojonu. Majaari nojori carojotanu na racatasocoriquiano, na nuhuaji na miojosocoriquiano. Naajuhuaj, majaari nojori jiiitanu na miojosano na racataja. Majaari tiaca nojori jiiitanu na carojotasano nojori racatajarajuhuaj. Naajaa, Pueyasoori nojori miojotequiaa. Niaa cutaraari socua jiyanohua Pueyaso panishano cuno riquiacuhajiniji. ²⁵ Naajuhuaj, nia nequesotaanijia, niaa jaara socua tamonu juucara rishiniu paniriquia quera

nia shaajenu panishacari, ¿nia naatateeri socua rishiniu, jiyanoehua nia tacaaniutia? Maja nia naata. ²⁶ Naaratej, nia tacaaniu jaara najuhuana quiya socua shiitianiyojua nia rishiniuria, ¿niaatucua casaara tacaari tamonu casaacuanii?

²⁷ 'Natau shuucuaca nia niquishurij, taa nojori corequetaani. Majaari nojori poonijionu. Majaari na cusupuenunujuhuaaj. Supuetana jiyaniijia Salomónri jiyanoehua shanohua toqueyaraca quiquiaari. Cuno jiyanoehua shanohua niquishano na cushishano toqueni, naajaa, majaari na shocotanu cuno natau shuucuaca. ²⁸ Pueyasoori cuno natau shuucuaca shipiniquiaari rupaquijia naa shanohua niquishocoriquianotej. Jaara sorere, tariqui catijishiya saniniuurijia pan majeetetajara. Pueyaso jaara naa maniniushitiyacuaa shuucuacatej, ¿majateeri na naata cushitiniu nijaniyajuhuaaj, jatarinitiaja Pueyasocua tiuujiacanaa? ²⁹ Naaratej, nia sequeyanijia, maja nia tacaaniutia nia pajenu casaa nia miaquenutaniyani, casaa nia ratunutaniyani. ³⁰ Pueyaso niishiyashijia pueyari pueyaracaanu na panishano casaacua tacaquiaa. Nijaniya cutaraari Queraca. Nojuacuajaari tari niishiya puetunu nia panishanojuanaa. ³¹ Naaratej, nia niishiriojore Pueyaso panishano nia miiniuria. Nojuajaari saniniuuja nia niqutionutaniya puetunu nia panishanojuanaa.

Nia casami nia racatare Pueyaso shuriucua

(Mt 6.19-21)

³² 'Maja nia puerenu, cua muerasuniyojuanaa. Niaari secajaniyojua. Naajaa, cua Queeri nia panijia. Capora na quiniucua, ¿nia niqutionutaniya puetunu na jiiatasanojuanaari! ³³ Nia casami nia niqutiojore cumaneecara. Na nuhuaji, cuno cumaneeca nia niqutiojore nareja casamiijuniucua pueya. Naa nia miishacaritij, niaari jiyocuacaanu racataa nia jiiatasano. Tee Pueyaso racataa nareja nera nia niqutionutanosocujani, cuniqui, nia cumaneeca quiquioori maja na piquiniu. Niaari tii nia racatasano jiiitanutaniya pueyaracaanu. Majaari nohuasejojua na naata nocua tiuquiniu na nohuasenua. Naajuhuaaj, surequeyari maja na naata miaquenu nia casami tii. ³⁴ Nia casami jaara naa racatasano quiya jiyocuacaanu Pueyaso shuriucuatej, niaari saaja Pueyasocua niishiriojonutaniya, tee nia casami racatasano quiyacuani.

Jeenucuasano nia quiri nia Jiyaniijiaacuaji

³⁵ 'Juhuata jeenucuasano nia quiri pueyaracaanu, nia sashishacari nia Jiyaniijia, taa tiajiniaaco maninia seyacuaani. Nojori sashishacari nia jiyaniijia, nojoriiri na toqueya cushiyono quiya tari, na samaritiu noshitishanojuhuaaj. ³⁶ Naa jeenucuasano nia quirijiuhuaaj, juhua cuno seyaja. Nojoriiri na jiyaniijia sashiya na caminiujiniji na tiuquishacariuhua. Nojuaja jaara tohuateya piquishuhua, nojoriiri ritia nocuaji riatanutaniya tia tohuateya. ³⁷ Shuquiriaatia quijiaca cutaraari cuno seya, canapete na jiyaniijiaacuaji suteyajaani, na jiyaniijia cuaara tiuquiriohuajaatijia. Seetanujuanaa nia sequeyanijia, nojori jiyaniijiaari nojori cajitijionutaniya miaquejajinia. Na toque maniniuqui jocuanutaniyani na mianuutenura nojori. ³⁸ Nojori jiyaniijia jaara tiuquiriohua shiyaqueya, juhuaquenu panishacari, naajaa, shuquiriaatia quijiaca quiniutaniyani cuno seya, nojori jaara suteyajaa tia tohuateya riatariquiano nojori jiyaniijiaacuaji. ³⁹ Nio nia niishirijiuhuaaj, tia camaru jaara niishiri

taacari nohuasejojua niniutianiyani, nojuaja maara sutere na tia co-juanura, maja nohuasejojua tiuquiniuria na casami na nohuasenura. ⁴⁰ Naajuhuaaj, jeenucuasano nia quiri pueyanaa, juhua cuno sutejaca seyaja. Niaa jaara jiyaniya juhuanajuaja maja cua tiuquiniu quiniutian- iuhua, janiyari jiyacari nia jiyajenetenutaniyani.

Jesu pohuatasano maninia serujiniji, sesa serujinjinio

(Mt 24.45-51)

⁴¹ Jiyacaritij, Pedroori Jesu nequesotaree:

—Jiyaniijianaa, ¿quiaate nio pohuataree saa canaaraja, puetunu pueyarajanaa soj?

⁴² Jiyaniijiaari na riucuarree:

—Tamonu seru jaara maninia seru quiri, nocua tiuushano, niishi- jiajuhuaaj, na jiyaniijiaari cuno na seru jiyatenutaniya narta seya ji- itiariquiano na niti na niyacari. Nojori jiyaniijia niyacari, cuno seeratasano seruuri narta seya mianuutenutaniya maninia, taa no- jori jiyaniijiajanaa mianuutequiaa nojoricuaani. ⁴³ Cuno seruuri shuquiriaatia quiniutianiya na jiyaniijia jaara na riuriasuhua naa maninia miyanojua, taa na sequesaaquiaari na miiniuriacuajani. ⁴⁴ Seetanujuanaa nia sequeyanijia, na jiyaniijiaari cuno maninia seru jiyatenutaniya puetunu na jiiatasano casamijianaa cojuana na quini- uria. ⁴⁵ Saniniuujia, cuno seru jaara sesa miiniuria niishiriojore, na jiyaniishacari na jiyaniijiaari jiyanohua tarishiniutianiya, nojuajaari niishiriojonutaniya nojuaja na naata miiniu na panishano. Cunora, nojuajaari narta seya majoonu coteenutaniya, seya maajipohuanio. Naajuhuaaj nojuajaari saaja miaquejonutaniya. Pueyaracaanu raru- junutaniyari. Mashaasequejonutaniyajaariuhuaaj. ⁴⁶ Na jiyaniishacari na jiyaniijia juhuanajuaja maja na tiuquiniu quiniutianiuhua, jiyacari- tij, cuno juucaja, na jiyaniijiaari tiuquiniutianiuhua canashiyaquiji. Naa cuno seru miiniuucua sesatej, na jiyaniijiaari jiyanohua na saniitionu- taniya. Na jatanutaniyari Pueyaso tojiyashijiaca pueyata na saniitioso- coriquiano.

⁴⁷ Tamonu jiyaniijia jaara na seru rootare maninia, taa nojuaja mi- iniutianiyani, cuno seru jaara jeenucuaaquiri na jiyaniijiaacuaji, mariy- ata jaara miyaquiri taa na jiyaniijia sequequiaari na nuhuajiriacuaj- ani, nojuajaari jiyanohua majacusaanutaniya cutara. ⁴⁸ Saniniuujia, tamonu seru jaara sesa miiri na niishiyaquiniuucua na jiyaniijia pan- ishano na miiniuria, nojuajaari saaja secaja majacusaanutaniya. Naa- juhuaaj, cante queraatia niquitiosaareeni, cuno serujinijiiri queraatia masenu panishaanutaniya. Naajuhuaaj, cante jiyatesaaree queraatia jiiatiana na quiniuriani, na jiyaniijiaari nocua tiuuniutianiya socua jiyanohua maninia miijia na quiniuria.

Jesuucua tiuujiaacari narta pueya panishoo

(Mt 10.34-36)

⁴⁹ Mijiria niquiaarinijia, juhua mani cua noshitiniuria pueya tajinia. ¡Seetanujuanaa na noshitiriquia tarinij! Cua rupaari juhua mani quiniu- tianiya. ⁵⁰ Coteenu, janiyari jiyanohua saniniuujishaanutaniya juhua manitiani. Nocuaji coojaari tacaya janiya jaara naa miishaarejaati- jia. Seetanujuanaa na jiyateriquia tariucua tucuateenonij. ⁵¹ ¿Niaateeri jiyaniya janiyari niquiaarini mijiria quiniaa quiniuria juhuajaniya? ¡Maja! Seetanujuanaa nia sequeyanijia, janiyari niquiaarini pueya cua

raquiriojotanura. ⁵² Naaratej, pueyari quiarijia juayonuutanu coteenu-taniya. Pueyano jaara necocuata jiitiare jiuujianaraca niquiohua na tia-jinia, jiuujianaraca nojorijinijinio jaara cucua tiuuri, cuno caapiqui cucua tiuyashijacaari saniniuujia nojori juaajia quiniutianiya. Naa noo-jiaqueya pueyajinijinio tiuuniucua cucuatej, queraatia pueyari naa tama tacaresetanutaniyajaacujua. Naacuajitij, tamonu tiajinia, quera-jaa pueyari caapiquiriyatu cucua tiuujia juaajia quiniutianiya. ⁵³ Pueyari necohua paracaajia quiniutianiya, necohua tiuushacari cucua. Naajuhuj, necohuari na que paracaajia quiniutianiya na que tiu-ushacari cucua. Naajuhuj, maajipohuari necojori paracaajia quiniu-tianiya necojori tiuushacari cucua. Naajuhuj, necojoriiri na nucua paracaajia quiniutianiya na nucua tiuushacari cucua. Naajuhuj, maajipohuari necohua niquiocohua paracaajia quiniutianiya, necohua niquiocohua quiniuucua cucua tiuujia. Naajuhuj, pueya niquio-cohuari na quinia paracaajia quiniutianiyajuhuj, cucua tiuujia na quinia quiniuucua.

*Pueya cuaara niishiiria quiarijia Pueyaso miishanojiniji, casaa na ni-
ishitini paniyani*

(Mt 16.1-4; Mr 8.11-13)

⁵⁴ Jesuuri naa sequequiaari pueyajuhuj:

—Naa jaara niquitioocua niquiquiaa pananu tiuquishocora, niaari sequequiaa: “Maruqui niniutianiya”. Seetanujuanaa naa quiquiaari. ⁵⁵ Naajuhuj, paratu jaara piyarojoquiaa pananu shuucuj, niaari sequequiaa: “Tacareejonuqui quiniutianiya”. Naa quiquiaari. ⁵⁶ Pueyanaa, ¿niaateeri seetanujuanaa niishijia? Niaari maninia niishiquiaa jiya cajiniocua nia niquishano, nio jiyajinia nia niquishanonio. Saniniuujia, nia niquishacari quiarijia Pueyaso miishano nia niquiara, majaari cuno nia niishiniu, casaa na sequenu paniyani. Naaratej, majaari seetanujuanaa niishijia nijaniya.

Niaacuara tonujunata nia jeecatoore

(Mt 5.25-26)

⁵⁷ Niaacuajaari niishiya, sesa miijiaari saniitiosaanutaniya. Naaratej, tama nijaniyajaaja nia niishiriojore, casaate maninia nia miiniuriani. ⁵⁸ Tamonu pueyano jaara quiocuara tonujure quia sesonuucua na casaa, quia saniri juhuata nata pocoojonu maninia, na jaatucusacari quijaniya nequesoreena pueyanoocua. Quia sequerenoj casaa quia miiniutianiya nerani, na jiyanooniuria quijaniya. Quia jaara jeeatoyaquiri nata, nojuajaari quiocuara saquiriojotanutaniya nequesoreena pueyano. Jaara quiocuara saquiriojotare nequesoreena pueyano, nequesoreenaari saniniuujia quia niquitionutaniya na pueya, quia nujuatesaanura nujuatejoajinia. ⁵⁹ Seetanujuanaa nia sequeyanijia, majaari nia tohuatanu quiniutianiya nujuatejoajiniji, nia jaara puetunu nequesoreena sequesano cumaneecajanaa niquitiorejaatijia niaacuara tonujuna pueyano.

13

Niojia nia tacatore sesa nia quiniujiniji

¹ Jiyacari, tamasaca pueyari Jesuucua tiuquijioquiaari. Cuno pueyari naa Jesu pohuataquiaari:

—¡Jiyaniijia Pilatoori Galilea jiyajinijinio pueya puecoorucuaa! ¡Na nuhuaji, nojori nanaca cojitiriiri Pueyasooacara nojori puecoosano seya nanacata!

² Jesuuri nojori sequeree:

—¿Niaateeri jiyaniya cuno Galilea pueyari naa miishaarucuaa socua jiyanohua sesa miijiaca nojori quiniuucua narta Galilea pueyajiniji? ³ Seetanujuanaa nia sequeya cutaranijia, nojoriiri maja socua sesa miijiaca quiqianu nijaniyajiniji. Nijaniyajuhuj, niaa jaara tama nioojiaaja tacatoyaquiri sesa nia miiniujiniji, niaari taraatia puecoosaariquianojuhuaj. ⁴ ¿Cuno dieciocho pueyariuhuj, canapuede cusonuucanu cuno jiyaconaja tia jaara nojori shiniacacanu Siloé cuari shuriucuatej? ¿Niaateeri jiyaniya nojori socua sesa miijiaca quiqianu narta Jerusalén tiacajinia quiniaa pueyajiniji? ⁵ Seetanujuanaa nia sequeyanijia, nojoriiri maja socua sesa miijiaca quiqianu nijaniyajiniji. Janiyari quiarjia nia numooteyani, niaa jaara tacatoyaquiri nioojia sesa nia miiniujiniji, niaari taraatia puecoosaanutaniyajuhuj.

Miriqui Jesu niishitiojosano muetuhuo naanajiniji

⁶ Jesuuri na nuhuaji pueya niishitiojoquiaari nio miriqui pahuatasanta:

—Tamonu pueyanoori higo naana jiitiaquiaari na uva cuhuariquiajina. Tamacari, na camaruuri nocua quiaquiaari na niquniuria. Na jajau mianu paniriquiaa juucuaari. Shaanoori quiriquiaa. ⁷ Cunora, na cuhuariquia cojuana sequereeri: “Quia niquiri nio naana. Janiyari pueyaracaanu najuhuaana niqiaani na jajau pajenura. Pueyaracaanu muetuyaquiari. Tari na shocojorucuaari jiuujanaraca marijia. ¡Quia nure! Tamonu cuaara na nujuasaqui natasaaria, na muetunura cutara”. ⁸ Cuhuariquia cojuanaari na riucaare: “Jiyaniijianaa, quia tarinitiarejaara tamonu marijiaara. Janiya na pajama jiya tacarojotanuniani na sasetanura. Na nuhuaji, janiyari juunu cueaca na pajama paatiniutianiani. ⁹ Janiya jaara naa na miirini, muetunutaniya naasucua. Jaara muetuyaquiri, pocua socua na nureni”. Naajuhuj pueyanaa, Pueyasoori sashiya, maninia miijiaca nia quiniuria.

Jesu jeeacasacari porocuatucua samaatenu juuca

¹⁰ Tamonu samaatenu juuca, Jesuuri tamonu tiacajinia niishitiojoriquiaa Pueyaso secojojua tiajina. ¹¹ Tamonu maaji cusosuuri tii quiriquiaajuhuj. Dieciocho marijiaari na shoconujuquiaari porocuatua na quishacari. Samaruuri naa na jiyatequiaari. Majaari quenaaja na naata maninia nujuanu quijia. ¹² Jesu jaara na niqiquiaari, na sequereeri:

—¡Maajiniaa miji! ¡Quia nijiniacuaja tari jeequerohua!

¹³ Jesuuri na juaashiquia niaree maajiicua. Jiyacaritij, maajiiri maninia jeequequee. Nojuajaari Pueyaso maniniuhuaqueetanu co-teeree naa na miishaanuucuatej. ¹⁴ Pueyaso secojojua tiajina jiyaniijiaari juaarii naa Jesu miiniuucua samaatenu juuca. Naaratej, tii quiniaa pueya sequeree Jesu niqiaaraari:

—¡Seis juucacuaajaari quiya puetunu semaanajiniajanaa pa poonijonura! ¡Niocua cuno juuca nijioriquia nia naatanijiosaanura, maja samaatenu juuca!

¹⁵ Jiyaniijia Jesuuri sequeree:

—¡Sapuenu juhua maninia miijiaca niquishano pueyanaa, puetunu niajanijanaari nia juunu, nia burro samaacartaquiaa samaatenu juuca, nia jaatucusocoriguiano mohuaca na raatenura! ¹⁶ ¿Nio maajiriuhua? Nojuaja cutaraari supuetana Abraham niquihuacuajinio supueno. ¿Majateeri maniniajuhua samaatenu juuca pa samaacatanura Satanás morojosano? Dieciocho marijiaari tari nio maaji shoconujuru-cuaa pueyaracaanu porocuatú na quishacari.

¹⁷ Naa Jesu sequesacaritij, puetunu na paraajanaari caririquituri. Saniniuujia, puetunu pueyajanaari shuquiriaatia quiriquiaa nojori niquishacari queraatia maninia Jesu miishano na cumaacata.

Miriqui Jesu pohuatasano mostaza jajaujiniji

(Mt 13.31-32; Mr 4.30-32)

¹⁸ Jesuuri sequequiaari:

—¿Taate cua naata niishitiojonu niajaniani, nia niishiniuria taa Pueyaso poonijiya pueya jiuujiajinia na rupaatani? ¹⁹ Na rupaari juhua mostaza jajauniyojua, pueyano natasano na cuhuariquiajinia. Cuno jajau jaara moritiare, puereetucara caneyari. Naacuaajitij, shuhuari na cashacucuaacua jesuya. Naajuhua, Pueyaso rupaari caneya pueya jiuujiajinia puetunu nio jiyajiniajanaa maninia miijiaca nojori quiniuria.

Miriqui Jesu pohuatasano pan poreetajajiniji

(Mt 13.33)

²⁰ Jesuuri nio pohuataquiaari socua:

—¿Casaa cua pohuatanutaniya nia niishiniuria taa Pueyaso poonijiya mijiria na rupaatani? ²¹ Pueyaso rupaari juhua pan poreetaja maaji cojitishano trigo cashojuata, shanacusano jiuujianaraca shiitianiyojua tohuatashijinia. Pan poreetajaari puetunu cuno cashojua miniquiootasanojuanaa poreeteja. Pueyaso rupaari naa poonijiojua-juhuaj.

Juhua shiitianiyojua tohuateyari quiya Pueyasocua pa quianura

(Mt 7.13-14, 21-23)

²² Jesuuri Jerusalén tiacajiniara quiariquiaa na pueyata. Nucuaaco na quiasacari, pueya niishitiojoriquiaa tiacajiniaari, shiitianiyojua tiacajinianio. ²³ Jiyacaritij, tamonu pueyanoori na nequesotaree:

—Jiyaniijianaa, ¿saaja quenaaraqui pueyateeri Pueyaso pueyara jiyatesaanutaniya?

Jesuuri nojori riucuree miriqui:

²⁴ —Jyanohua nia saniniujiuri shiitianiyojua tohuateyaco nia tiuquiniuria, Pueyaso nia rupuenura. Jhuuacarijia nia numooteyanijia, queraatia pueyari nocua tiuquitianu paniniutianiya juucua. Majaari nojori naata quiniutianiya saaja. ²⁵ Cua tojitiare. Tia camaru jaara sanere, tohuateya tionutaniyari. Nijaniya, cante na tia carijiniacuma quiyajaaní, niaari tohuateya piquiniuuniutianiya najuhuanaj. Níaa jaara naa nacare: “Jiyaniijianaa, canaacuaji quia riatare tohuateya!”, nojuajaari nia riucuanutaniya: “Maja cua niishiniu tejenote niajaniani”. ²⁶ Jiyacaritij, niaari juhuacatecara sequenutaniya: “¿Majateeri canaa quia niishiniu? Canaacuajaari quiata miaquenujuani. Canaari quiata ratujua mariyatani. Quiaacuajaari canaa tiaca nuucacajinia niishitiojua”. ²⁷ Tia camaruuri nia riucuanutaniya: “Janiyacuajaari tari nia sequereeni, maja cua niishiniu

tejenote niajaniania. Nia quiojorohua niiquiji, puetunu niajanijajanaa sesa miijiacanaa”.²⁸ Naa na taanuusacari niajaniatej, niaari nujuquetunutaniana. Niaari nia quiaa miaquenutaniana jijanohua nia taraajenuta, nia niquishacari Abraham, Isaac, Jacobo, puetunu pueyara Pueyaso sequesano caminiujiuniaa Pueyaso shuriucua quiyanocuaa.²⁹ Queraatia tamasa pueyapueeri nijionutaniana puetunu jiyacajinijuniojuanaa Pueyaso shuriucua cajitiuniuria, nojori miaquenuunura nata. Nijionutanianari pananu muetasamaji, pananu tiuquishacojinio, pananu shuucuaaji jiyacajinijunio, pananu muetasamaji miaquetajara jiyacajinijuniojuhuaj.³⁰ Quiarijiani, queraatia pueyari juhua tojishoo quiya narta pueyara. Cuno quishacari saniniuujia, nojori cutaraari seetanujuanaa tojishano pueya quiniutianiana Pueyasora, Pueyaso tojitiajaca nojori quiniuucua mijiria. Naajuhua, quiarijiani, queraatia pueyari juhua tojishano pueya quiya narta pueyara. Saniniuujia, jiya puequesacari, nojoriiri najuhuaa quijiaa quiniutianiana Pueyasora, nojori tojitiaaquiniucua nojuaja.

Jesu taraajesacari Jerusalén tiacajinia quiniaa pueyacia

(Mt 23.37-39)

³¹ Jiyacari noojiaqueya Fariseocuacaari Jesuucua tiuquiiioquiaari. Nojoriiri Jesu numooteree:

—¡Niiquiji quia mashiri! ¡Jiyaniijia Herodes quia monu paniya!

³² Jesuuri nojori sequeree saaja:

—Cuno pueyanoori niishijia juhua jaami. Naa nia caminiujiushuhua cua sequesano cuno jaamiria: “Janiyari samaruhua tohuatanijiyani. Janiyari cusosuhua naatanijiyajaaniuhuaaj. Janiyari naa miya quiarijiani, tariquijiuhuaaj. Janiyari tama tariqui tucuanutaniana puetunu cua miiniu panishanojuanaani”. Naa nia sequesuhua cuno pueyano.³³ Cuaara rupaquijia cua sashiiria. Janiya quiarijia rucuanenutaniana-jaarani, tariqui, tama tariquinio. Janiya cuaara mosaaria ctara Jerusalén tiacajinia, tee cuniqui puetunu pueyara Pueyaso sequesano caminiujiuniaajanaa puecoosaaquiaaricuaani. Majaari tamaqui cua monu quishaanutaniana.

³⁴ Jerusalén tiacajinia quiniaa pueyanaa, niaacuaajaari Pueyaso sequesano caminiujiuniaa puecojuaca. Niaari Pueyaso jiyaramiquishano pueya jacujuaca saitia. Janiyari juucua pueyaracaanu nia rerejonuucua jiaatiajani, taa caacaraja necohua rijioquiaacuaa na nesu cariquiaconi. Niaari saaja paniyaquiquiaa cua cojuanura niajaniana.³⁵ ¡Cunora, cua tojitiare! Nia quiquioori tojetaarucujanaa shaaqui quiniutianiana. Naa-juhuaaj, majaari socua nia niquiniu quiniutianiana janiya, niaa jaara nia timitiasacari janiya sequerejaatija: “¡Cuaara shuquiriaatia quiiria pa Jiyaniijia, Pueyasojiniji tiuquihuano!”

14

Jesu naatanishacari cusosu poreeno pueyano

¹ Tamonu samaatenu juuca, Jesuuri tamonu Fariseocuaca jiyaniijia tiajinia quiaquiaari miaquenura, socua tamasa Fariseocuatano. Nojoriiri Jesu shootiaturiquiaa nojori niishiniuria casaa na miiniu-tianiana samaatenu juucani.² Jiyacaritij, tamonu pueyanoori Jesu tacoji nuuariquiaa, poreeno cusotaano.³ Jesuuri Moisés Rootasanojiniji ni-ishitiojona nequesotare, Fariseocuacano:

—¿Taa nia serojoquiaa Moisés Rootasanojiniani? ¿Maniniate cusosu pa naataniniu samaatenu juuca?

⁴ Nojoriiri saaja sanaa na tojtiriquiaa. Jesuuri cusosu quiaree jiyacari. Na naataniriiri. Na jiyarorohua na tiajiniaari. ⁵ Na nuhuaji, Jesuuri cuno Fariseocuaca sequeree:

—Nia burro, nia juunu jaara raama tiyare samaatenu juuca, ¿niaatucua samaatenu juuca shocoterejaara, raamaji nia jaaniuhuara nia seru?

⁶ Majaari nojori riucuanu quirii quenaaja.

Taa pa miyani queranacunura masuusano pa quishacari, taamueca pueyate masuushiyajaaniuhuj

⁷ Jesuuri shootiriquiaa taa masuusano pueya socua panishano cajitiucujinia nojori cajitiuniuria riutioconeetariquiaani. Jesuuri cunora nojori niquiara pohuataree nio pohuatasano. Naa sequereeri:

⁸ —Quiaa jaara masuusaariquia camishacari queranacunura, maja cumaati quia cajiniu socua tojishano pueyano cajijiaranojinia, tamonu pueyano mariqui tiuquiriiri socua tojishano pueyano quiajanijini. ⁹ Socua tojishano pueyano jaara tiuquishii, nia masuuna pueyano naa-sucuaari quiocua niniutianiya na sequenura quiajaniya: “Shiiquia. Quia sanere nio pueyanoocuaji”. Naacuajitij, quiaari cajitishaanutaniya quia caririquiniutia pueya paniyaquishano cajitiujinia, miaqueja puequeetujinia. ¹⁰ Nocuaji nia sequedianija, niaa jaara masuusaariquia miaquenura tamonu tiajinia, niocua cajishiiquia socua paniyaquishano cajitiujinia. Naacuajitij, quia masuuna jaara niquiri quiajaniya, nojuajaari quia sequenutaniya: “Cua rupuenanaa, ¿niya quia cajishii socua panishano cajitiujiniani!” Naacuajitij, cuniqui quiata quini-aari niishiniutianiya, quiajanijaqui nia masuuna panishano pueyano. ¹¹ Naajuhua Pueyasora, cante tama na cuaqueyajaaja jiyateya juhua tojishano pueyano na quiniuriani, nojuajaari cararosaanutaniya. Saniniuujia, cante tama na cuaqueyajaaja jiyateya juhua panishoo pueyanoni, nojuajaari maninia jiyatesaanutaniya juhua tojishano pueyanora.

¹² Jesuuri na masuuna pueyano sequereehujua:

—Quiaa jaara queranacunu paniya, majaari quia masuunu saaja quia rupuenaa, quia tapueyocuaca, quia panishano pueyano. Naajuhuj, majaari quia masuunu quia shuriucua quiniaa casamiriaca pueya. Quiaa jaara nojori masuure, nojoriiri quia masuunutaniya saniniuujia. Naacuajitij, quiaari tari namishaarohuacaja. Cunora, majaari socua quia masenu quiniutianiya Pueyasojiniji. ¹³ Naaratej, quiaa jaara queranacunu paniya, quia masuure casamijiuniucua pueya, sesaruneca pueya, sesacujanucua pueya, cariyojuarujurinio. ¹⁴ Naacuajitij, quiaa jaara naa miiri, quiaari shuquiriaatia quijia quiniutianiya cutara. Majaari nojori naata masuunu quiajaniya saniniuujia. Naaratej, Pueyaso cutaraari maninia miiniutianiya quiajaniya saniniuujia, na samitiani-jiosacariuhua maninia miijia pueya.

Miriqui Jesu pohuatasano na queranacunujiniji

(Mt 22.1-10)

¹⁵ Jesuta cajiyano pueyano tojishacari naa Jesu pohuatasanotej, Jesu sequereeri:

—¿Shuquiriaatia quijia cutaraari cuno, cante Pueyaso shuriucua mi-aquenutaniya jiyocuaaanuni!

¹⁶ Jesuuri na sequereee:

—Tamonu pueyanoori queraatia sumatuquiaari pueyata na queranacunura. Nojuajaari coteenu queraatia pueya masuuquiaari. ¹⁷ Quera miaquenuusacari, na seru jiyaroreeri na masuusano pueya na sequenura: “Miji, puetunujuanaa tari jeenucuasaaree niaacuaji. Nia miaquesee”.

¹⁸ Puetunu masuusano pueyajanaari juhuacatecara sequequiaari maja na naata quianu miaquenuucua. Coteenu masuusano pueyanoori cuno seru sequereee: “Janiyari shusha maseree tamonu cuhuariquiani. Janiyari nocua quiaa na niquiniuucuanu. Cua jiyanoori quenaaja. Maja cua naata quianu quiata queranacunuucua”. ¹⁹ Tamonu masuusano pueyanoori sequereee: “Janiyari diez poonijiojuaca juyaca masereeni. Na saniniuucua quiaanijia. Quiocua cua jiyanoori cua quiaaquishacari queranacunujinia”. ²⁰ Tamonu masuusano pueyanoori sequereeejuhuaj: “Shusha camiriinijia. Cunora, maja cua naata quianu”. ²¹ Seruuri tamajaaja tacateyarohua na camarnu tiajiniohua. Na jiyaniijia pohuatasuhua na masuusano pueya sequesanoori. Na jiyaniijiaari juaaquii. Na seru sequereeri: “Ritia quia quiaare tamasaca pueya masuunucua tiaca nucuaacaco. Miji quia rijiooco casamiiuniucua pueya, sesaruneca pueya, sesacujua pueya, cariojuarujuri pueyano”. ²² Seru tiuquishacariuhua, na jiyaniijia sequesuhuari: “Jiyaniijianaa, janiyari tari miiriini taa quia sequereee janiyacuajani. Juhuanujuaja maja tia mishiniu”. ²³ Na jiyaniijiaari na sequereee: “Socua pueya quia pajecoo tiaca nucuaacaco, tamasaca tiacajiniara nucuaaconio. ¡Socua pueya quia nenecojocoo nojori niniuria, cua tia mishiniuria! ²⁴ Seetanujuanaa nia sequeyanijia, coteenu cua masuusano pueyajiniinioni, majaari quenaaja niquiriyatu nojorijiniinino saniniu quiniutianiya cua sumatusano”.

Saja tama na cuaqueya panitajajaarija na naata Cristo nuhuajiniu (Mt 10.37-38)

²⁵ Jiyanoohua queraatia pueyari Jesuta quiojoriquiaa. Jesuuri nojoricua tacateree. Nojori sequereeri:

²⁶ —Cante cucua niya cua pueyano na quiniuriani, nojuaja cuaara niishiiria nio. ¡Maja nia naata cua pueyano nia quiniu nia paniaquishacari janiya socua nia quejiniji, nia nucujiniinino! Nia niquiocua, nia niquiohua, nia tapueyocua, nia rimiatuhajujuaj, nia panishacari nojori socua janiyajiniji, ¡majaari nia naata cua pueyara nia quiniu! Naajuhuj, ¡majaari quenaaja nia naata tama nia cuaqueyajaaja panijia nia quiniu socua janiyajiniji! ²⁷ Cante tama na cuaqueyajaaja panitiaaquijia cucuarani, majaari na naata cua pueyanora na quiniu. ²⁸ Niaa jaara jyaconaja tia tianu paniri, ¿majate coteenu nia cajiniu nia niishiriojonura taa cumaneecate panishaanutaniyani, na tucuatunura puetunujuanaa? Naajuhuj, niaari niishiriojiya, queraatia quiyacuajate nia cumaneeca. ²⁹ Niaa jaara coteenu naa miyaquiri, niaari najuhuaana morijiuucua nujatejonutaniya, na nuhuaji majaari socua nia cumaneeca quiniu nia tucuatunura nia tia. Puetunu nia tia niquiniaajanaari juhuacatecara nia macatiniutianiya. ³⁰ Nojoriiri sequenutaniya: “Cuno pueyanoori tianu coteecanu najuhuanaj. Majaari na naata na tucuatunu quiarijia”. ³¹ Naajuhuj, jiya jiyaniijia jaara quianu paniri narta jiyaniijiaa miaquetonura,

¿majate coteenu na cajiniu na niishiriojonura, na naatate diez mil na pueyata shocotanu cuno tamonu jiyaniijia, nocua niyano veinte mil na pueyatani? ³² Cuno jiyaniijia jaara niishiri, maja na naata na shocotanu quiniutianiya narta jiyaniijia nocua niyano, majaari na miaquetoonu quiniutianiya. Saniniuujia, tucuacaanu narta jiyaniijia quishacarijia, nocua jiyaramiquiniutianiya na pueyari, nata nojori pocoojonura maninia, nojori jiyanoootoonura. ³³ Naajuhuj, niaa jaara carteyaquiri puetunu nia jiiiasanojuanaa, majaari nia naata cua pueyanora nia quiniu.

Miriqui Jesu pahuatasano shonijiniji
(Mt 5.13; Mr 9.50)

³⁴ 'Shoni jaara tiquiriigua quiya, maniniaari, pa panishano. Jaara shaacara quiqúi, ¿taate na naata tiquiriigua na quiniuhuaní? Maja na naata. ³⁵ Najuhua quiyari. Majaari quenaaja maninia na quiniu cuhuariquiajia jatasocoriquiano maninia na moritianiniuria natacuaca. Majaari quenaaja maniajuhuj, na paatishaanura na moquijianura, natau pajama niojosocoriquiano. Jaara naa maninia quiyaquiritij, nareja jatashiyari. Cante numaaracani, cuaara tojitiaara miriqui cua pahuatasano. Cuaara na niishiiriahuj. Seetanujuanaa cua tojitiajaca pueyani, nojoriirí juhua shoni mijiria.

15

Jesu pahuatasano miriqui tashucano borregojiniji
(Mt 18.10-14)

¹ Roma tiacajinia quijia jiyaniijia cumaneeca masejonaa, mariyata sesa miijia pueyari Jesuucua nijioriquiaa na pahuatasano nojori tojitianura. ² Cuno pojoriiri Fariseocuaca soosano pueya quiriquiaa, Moisés Rootasanojiniji niishitiojonaa soosano pueyano. Cunora, Fariseocua-caari, mariyata Moisés Rootasanojiniji niishitiojonaari tama rimiaaque-turiquiaaja Jesuucua. Naa pocaturiquiaa Jesuuri:

—Cuno pueyanoori sesa miijia pueya shanacuquiaa nocua nojori nijionura. ¡Juhujaniya nojoritia miaquequiaajaariuhuj!

³ Naaratej, Jesuuri nojori niquiara pahuataree nio miriqui pahuatasano:

⁴—Niaa jaara cien borregohua jiiitariquia, nojorijinijinio niquiriyatunijoyua jaara tashucua, ¿taa nia miiquiaani? ¿Niaatucua nia noventa y nueve borregohua cureeno tujiaaquiri rupaquijia cuhuariquiajia, tashucano borrego nia pajenura, niaa cuaara na riuriatarohuaajia? Taaquiririni. Niaacuajaari naa miiquiaaqui. ⁵ Niaa jaara na riuriatasee, niaari nia shuquiriniutia na paquihua nia numuecuaji. ⁶ Niaa jaara na tiuquitarohua nia tiajiniohua, niaari nia rupueña, mariyata nia shuriucua quiniaa rerejotenuaniya nia sequenura nojori: “¡Cuata nia shuquiriri quiarijia! ¡Tari riuriatarohua cua borregonijoyua tashucuanonijia!” ⁷ Seetanujuanaa nia sequeyanijia, naajaariuhuj, jiyocuacaanu quiniaari jiyanohua shuquiritiquiaa niquiriyatu sesa miijia jaara noojia tacatore sesa na miiniujiniji. Cuno pueyanoori socua jiyanohua shuqiritiasano tamasa noventa y nueve pueyajiniji, canapuetucuaa tari maninia pueyacuani.

Jesu pahuatasano miriqui juurequetesano cumaneejiniji

⁸ 'Naajuhuaaj, tamonu maaji jaara diez cumaneecaraca quiri, jaara niquiriyatu juurequetere tiajiniaaco, ¿maatucua taa miirini? Na samaritiu noshitiniutianiyari, na tia na netoonujunura. Pueyaracaanu jacaria na pajentunianiyari cuaara na riuriatारेजातिया. ⁹ Na riuriasacari na juurequetesano cumanee, maajiiri na rupuenaa, mariyata na shuriucua quiniaa maajipohua rerejotenutaniya na sequenura nojori: “¡Miji nia nimia! ¡Cuata nia shuquiriri! ¡Tari riuriatarohua cua juurequetesano cumaneenijia!” ¹⁰ Seetanujuanaa nia sequeyanijia, jiyocuaaanu Pueyaso seyari naa shuquiriquiaajuhuaaj sesa miijia jaara noojia tacatore sesa na miiniujiniji.

Jesu pohuatasano taa tamonu pueyano jiyanooquiaari neyanuni

¹¹ Na nuhuaji, Jesuuri nio pohuatareejuhuaj:

—Tamonu pueyanoori caapiqui niyanuraca quiquiaari. ¹² Socua naatujuaari na que sequeree: “Cua quena, quiarjia cua niqutiore quia jittiasanojiniji, quiria quiriquiano quiaa jaara shaajeyare”. Naacuaajitij, na queeri puetunu na jittiasanojuanaa niqutiojoree necohua. ¹³ Socua naatujuaari rupaquijia camueenujuquiaari na que tiajinia. Na nuhuaji, puetunu na que niqutiosanojuanaa nojuajani, nojuajari saniniuujia tamasa na niqutiojoree na cumaneecara. Na nuhuaji, na cumaneecata quiaquiaari tucuaaanuuri, tamonu jiyajinia. Cuniqiu, puetunu na cumaneecajanaa puecaquiaariiri sesa na miiniutia. ¹⁴ Nojuaja jaara puetunu na cumaneeca puecaquiaarijanaa, cuno jiyajiniaari jiyanohua miaajesacari quiquiaari. Mashajaari juhuacatecara miaajequiaari. ¹⁵ Cunora quiaaree tamonu tahuecua cuno jiyajiniaari, nera na poonijionura. Cuno tahueri na jiyaroree na cuhuariquiajinia na cushiya na cojuanura. ¹⁶ Mashajaari cushiya miaquesano miaquenu paniriquiaa juucua na miaajenuta. Cunoori tamaatia purootu cocua quiquiaari. Majaari tamonu pueyano niqutionu quijia quenaaja na miaquesocoriquiano. ¹⁷ Na nuhuaji, tama sequereejaarijia: “Cua queeri queraatia na tiajiniaaco seyaraca. Nojoriiri mania miaquenuquiaa taquiya. Nojori sumatuuri cureequiaajuhuaaj. ¿Janiyarijiataj? ¡Janiyari niya quera cusoya cua miaajenutani! ¹⁸ ¡Cua queecua tacateyarohuarajui! Janiyacua na sequesuhani: ‘Cua quena, janiyari Pueyaso miiquianu sesani. Janiyari sesa miiquianu quiajaniyajuhuaaj. ¹⁹ Majaari socua cua sequenu quia niyanuta. Janiyari puera sesa miijiani. Cua jiyatere juhuari juhua quia seru cua quiniuria, quiara cua poonijionura’ ”. ²⁰ Naa na niishiriojonu nuhuajitij, mashajaari quiaquiaariuhua na queecua.

⁷Tucuaaanu na quishacarijia na que tiajiniji, na queeri na niquirii. Nocua taraajereeri. Nocua neteyareeri na naacunura. Na cacaseeri. Na nujuuneguereeaariuhuaaj. ²¹ Neyanuuri na que sequeree: “Cua quena, janiyari sesa miiquianu Pueyasoni, quiajaniyanio. Majaari cua sequenu quia niyanuta”. ²² Na queeri saaja na tiaco seya sequeree: “¡Ritia! ¡Socua maniniuqui toque miji nia riquioo! ¡Niocua quiyanu cushitirinioj! ¡Jaaniisho nia cushitiri! ¡Sapatu nia cushitirijihuaaj! ²³ Pa riutianishano juunu niqutiojua nia quiacoo mosocoriquiano. Quiarjia pa queranacure. Pocua miaquenuureni, quiyanu pa shuquiritiasacari. ²⁴ Nio quiyanuniyojuaari juhua macu quiriquiaa. Quiarjia samiitiarohuari. Nojuajari shaajequiaari. ¡Tari pocua muetarohuari!” Naacuaajitij, nojoriiri juhuacatecara queranacuquiaari.

²⁵ Jiyacaritij, jiyapueranuuri cuhuariquiajinia quiriquiaa. Na tacate-sacariuhua tiajiniohuara, jaara tari cateca quiriquiaa, saaja pueya tojirii jaaquequenuyanoori, nianujuniuyanonio. ²⁶ Naaratej, na que tiaco seru piiriiri: “Miji, cua sequere, ¿casaara tiajinia cojuatuneshiyani?” ²⁷ Seruuri na riucuaare: “Quia nuhuajishanacuaaja tari tiuquishacariuhua. Quia queeri shuquiriaatia quiya maninia na tiuquishacariuhua, maja cusosu. Naaratej, canaa sequereeri querasapiquia juunu niquiojua canaa monura”. ²⁸ Jiyacaritij, jiyapueranuuri jiyanoehua juaaqui. Majaari tiajinia na tiuquiniu paniniu quiriquiaa. Nocuaji na queeri nocua tohuatamaa carijiniacuma, na nenecojonura tiajinia na tiuquiniuria. ²⁹ Na que sequeree saajaari: “Quiaacuajaari niishiya, janiyari pueyara-caanu poonijioquiaa quiarani. Majaari quenaaja cua tarijonu quiquiaa quiajaniya. Naa maninia tojijia cua quishacari quiajaniyatej, ¡majaari quia niqutionu quiquiaari janiya quenaaja niquiriyatu cabraniyojua, cua queranacunura cua rupuenta! ³⁰ Quiarijia saniniuujia, quia niyanu seque tiuquishacariuhua, ¡quiaari querasapiquia juunu niquiojua moree nera! ¡Nojuajaari quia cumaneeca puecacan u paanatujiurica!” ³¹ Na queeri na sequeree: “Sanajanaa, quiaari pueyara-caanu cuata quiya. Puetunu cua jiiutasanojuanaari quia casaa. ³² Naajaa, quiarijiani, maninia pa queranacure. Shuquiriaatia pa quirij. Quia tarajanuuri juhua macu quiriquiaa tari. Quiarijia samiitiarohua pajaniyaraari. Nojuajaari juhua tashucuacanu pocuaji. Quiarijia pocua muetarohuari”.

16

Miriqui Jesu pohuatasano pueyanojiniji, cante na jiyaniijia cumaneeca riutiocojuani

¹ Jesuuri na pueya pohuataquiaari nio miriqui pohuatasanojuhuaj, nojori na niishitiojonura:

—Tamonu casamiriaca pueyanoori tamonu pueyano jiiitaja na casami cojuariquiano, na cumaneecanio. Tamasaca pueyari cuno camarnu pohuataree na seruna na cumaneeca riuticoriquiaa jiyasohuaja, tama nerajaaja. ² Cunora, jiyaniijiaari cuno na seru sequeree: “¿Taa quia miiquiaa janiyani? ¡Quiaana sesa miiquiaa! Quiarijia cua niqutiore quia naajiotasano puetunu quia miishanojinijianaa. Majaari socua quia quiniu quiniutianiya cua casami cojuana”. ³ Cunora, cumaneeca cojuanaari niishiriojoquee. Tama sequereejaarija: “¿Taa cua miiniutianiyarini cua jiyaniijia jaara cua jatara cua poonijosanojiniji? Janiyari maja cumueecani, cuhuariquiajinia cua poonijionura. Naajuhua, jiyanoehua cararaatiaari quiria, pueyajiniji nareja cua mashiniquijionura cua panishano. ⁴ ¡Jaj! Tari niishiQuiinijia taa cua miiniutianiyani tamasaca taraajenura cucua, nojori masuunura janiya nojori tiajinia cua quiniuria, janiya jaara nio poonijosanojiniji jataaareni”. ⁵ Naaratej, nojuajaari naa miiquiaari. Juhucatecara sequequiaari pueyari, nojori nijionura nocua, canapue na jiyaniijia niqutiojoquiaari casamicuajani. Coteenu tiuquinia pueyano nequesotareeri: “¿Casaa cua jiyaniijia niqutiojocanu quiajaniyani?” ⁶ Pueyanoori na riucuaare: “Cua niqutiojocanu cien patacoca mishaja shiyocuan”. Cumaneeca cojuanaari na sequeree: “Ritia quia cajiri. Niya quiya quia masesano casamijiniji naajiotasano.”

Tamonu quiarinio quia miiri. Quia naajiotare saaja cincuenta patacocua mishaja shiyocua”. ⁷ Na nuhuaji, tamonu pueyano nequesotareeri: “¿Quiajaniyariuhuj? ¿Casaa cua jiyaniijia niquitiojocanu quiajaniyani?” Na riucareeri: “Cua niquitocanu cien canaasatu mishaja trigoni”. Cumaneeca cojuanaari na sequeree: “Niya quiya quia masesano casamijiniji naajiotasano. Tamonu quiarinio quia naajiotare saaja ochenta canaasatu mishaja trigo”. ⁸ Na jiyaniijia jaara niishiquiaari sesa na seru miishano, na sequereeri: “¡Quiaaqui jiyanoehua niishijia tama quia cuaqueyajaaja quia cojuanura!”

⁹Seetanujuanaa pueyanaa, Pueyaso niishiyashijiaca pueyari socua jiyanoehua niishijiaca cuhuashiqui quijiaca pueyajiniji. Nojori cutaraari niishijia maninia nojori miiniuria narta pueya, pueya paniniuria saniniuujia nojori.

⁹Naarate nia nacasuyanijia, naa capora nia quirijiuhuj, maninia nia miiniuria pueya. Maja nia casami nia jamuenu. Cunocujaari nareja Pueyaso niquitiosano niajaniya. Naacuajitij, capora nia quishacari mijiria jaara puequema, nia Jiyaniijiaari nia tiuquinitianutaniya pueyaraaanu quishaqui jiyocuaaanu, jiyanoehua na shuquiritiasacari niajaniya.

¹⁰Pueyano jaara jiyatesaare secaja casami cojuana na quiniuria, nojuaja jaara maninia cojuaquiaa cuno secaja casami, na camarnuuri nocua tiuuniutianiya. Naaratej, na camarnuuri queraatia casami cojuanara na jiyatenutaniya. Saniniuujia, cante jiyatesaaree secaja casaa cojuana na quiniuriani, cuno pueyano jaara secaja na cojuasanojiniji nohuasejoquiaa jiyasohujaja, majaari tari nocua tiuushaanu. Nojuaja jaara jiyatesaare queraatia casami cojuanara, naa nohuasejonutaniya-jariuhuj. ¹¹Naajuhuj, niaa jaara maninia jiiatiaquiquiaa mijiria casami, Pueyasoori niaacua tiuyaquiniutianiya seetanujuanaa maninia jiyocuaaanuji casami nia jiiatiana. ¹²Naacuajitij, niaa jaara tamonu pueyano casami cojuaaquiquiaa maninia, ¿Pueyasotucua taa niquitioere niaarano na riuriotacani? Maja cutaraari nia niquitiosaanu quiniutianiya.

¹³Poonitijosano pueyanoori maja na naata caapiqui jiyaniijiaraca poonijionu. Jaara caapiqui jiyaniijiaraca quiri, tamonu samiritiaari, na panishacari tamonu. Naajuhuj, niquiriyatu jiyaniijia tojijia quiniutianiya maniniaari, na soosacari tamonu. Naajuhuj pueyanaa, majaari nia naata Pueyasocua jiaatianu, cumaneecaacuanio. Niaa jaara cumaneeca panijia quiri, niaari cumaneecara poonijiotesaanutaniya saaja. Naacuajitij, Pueyasoori maja na naata nia poonitijionu nera.

¹⁴Fariseocuaacari jiyanoehua cumaneeca panijia quijia. Naaratej, nojori tojishacari Jesu sequesano, nojoriiri saaja na rerequeteree. ¹⁵Jesuuri nojori sequeree:

—Niaacuajaari tama nia cuaqueyajaaja jiyatequiaa sapuenu pueyano maniniu nia niquishaanura. Pueyasocujaari nioojia niishiya. Niaari pueya jiyajenetequiaa nojori jiyaniishacari niaari Pueyaso panishano cutara, queraatia casami nia jiiatiasacari. Saniniuujia, casaa pueya jiyatequiaa socua jiyanoehua na panishanorani, Pueyasoori cuno soya cutara.

Moisés Rootasanoori coteenu quiquiaari, quiarijia quiya cutaraari quiarinio Pueyaso Rupaa

¹⁶ Moisés Rootasano, mariyata puetunu tariucuaaanu Pueyaso sequenu panishano caminiujiuniaa pohuatasanojuanaari pueya to-jitiasocoriguiano quiquiaari, Tiuquinijiona Juan pohuatasanojuhuaj. Quiarijia saniniuujia, maninia rupaa Pueyasojinijiri pohuatasaaquiaa, taa Pueyaso jiyanooni pania pueyani, na muerasu nojori quiniuria. Quiarijiani, puetunu pueyajanaari jiyanohua saniniuujia Pueyaso muerasu nojori quiniuria.

¹⁷ Nio jiyari shaajeriguiano, jiya cajiniocuanio. Saniniuujia, tariucuaaanu pueyara Pueyaso sequesano caminiujiuniaa pohuatasano cutaraari maja na shaajenu quiniutianiya quenaaja.

*Jesu niishitiojosano, pueyano carteyaquiniuria necocua
(Mt 19.1-12; Mr 10.1-12)*

¹⁸ Pueyano jaara necocua cartere tamonu maajitia na caminiuria, cuno pueyanoori jiyanohua sesa miya Pueyaso niquiara. Naajuhuj, cante cartesano maajitia camiyani, cunoori sesa miyajuhuj.

Jesu pohuatasano casamiriaca pueyanojiniji, Lázarojinijinio

¹⁹ Casamiriaca pueyanoori quiquiaari. Jiyanohua maniniuqui toqueya cushiyojuaari, juhua jiyaniijianucua toqueya. Jiyanohua na shuquiriniutia, puetunu juucajanaa queranacujuaari. ²⁰ Jiyacaritij, casamijiu pueyanoori quijiajuhuaj. Jiyanohua sapueyaraca. Nojuajaari cuno casamiriaca pueyano tia tohuateyaji niojotasano puetunu juucajanaa. Na sesaari quijia Lázaro. ²¹ Nojuajaari casamiriaca mi-aquejajiniji totinijosano raacua miaquenu panijia juucua. Saaja sareyari na sapueya rimianacunuujua. ²² Na nuhuaji, cuno casamijiu pueyanoori cusoquiaari. Pueyaso seyari na riquiaari supuetana Abrahamta na quiniuria, Pueyaso muerasurano shanohua quiquiojinia. Cuno casamiriaca pueyanoori cusoquiaarijuhuaj. Jamosaaquiaari-iri. ²³ Sesa miijiacarano quiquiojinia na quishacari, naquiya na mi-ishacari tii, nojuajaari mauquiaari. Cuniquiji tucuaaanu niquirii Lázaroori, shuquiriaatia quiyano supuetana Abrahamta. ²⁴ Casamiriaca pueyanoori nacaree: “¡Cua supuetana Abrahamnaa, cucua quia taraa-jere quenaaja! ¡Lázaro quia jiyarore cucua! ¡Cuaara na juaashiquia nacatu shiiria mohuacajinia! ¡Cua niti shiniajaquee quenaajacua! ¡Jan-yari puera jiyanohua naquiya miya nio manijiniani!” ²⁵ Abrahamri saaja na riucuarree: “Sanajanaa, quia niishiri taa jiyanohua maninia quia quiquiaarini, pueyaracaanu jiyocua quia quishacari. Lázaroori saniniuujia jiyanohua taraatia quiquiaari pueyaracaanu, jiyocua na quishacari. Lázaroori quiarijia niya cumanijiahiya. Quiaari saniniuujia naquiya miishiyacujua. ²⁶ Naajuhuj, jiyanohua tucuaa taccoori pa tajinia quiya. Cunora, cante niiquiji niuuniu pania cuniquijiria quiocuani, majaari na naata. Naajuhuj, cante quia quiquiojiniji niuuniu pania niiquijiriani, majaari na naatajuhuaj”. ²⁷ Casamiriaca pueyanoori supuetana Abraham sequerohuacuhuj: “Naa naasucuj cua supuetana Abrahamnaa. Naajaa, quia secojyanijia, Lázaro quia jiyarorohua cua que tiajinia. ²⁸ Tii quiyajaari cua tapueyocuaca. Cinco tarajanuhuaracanjia. Lázaro cuaara nojori numooteera, maja nojori quejoosaanurajuhua nio saniitiosaqui quiquiojinia”. ²⁹ Abrahamri na riucuarree: “Nojoricuajaari Moisés Rootasano jiitiaa, puetunu Pueyaso sequesano caminiujiuniaa naajiotasanojuanaanio. Quia tapueyocuaca

cuaara tojtiaara cuno”. ³⁰ Casamiriaca pueyanoori riucuaaree: “Naa naasucuatuhuaaj, cua supuetana Abrahamnaa. Naajaa, tamonu pueyano macunucuaajinijinio jaara muetarohua nojoriicua, nojoriiri noojia tacatonutaniya sesa nojori miiniujiniji”. ³¹ Abrahamri saaja na riucuaaree: “Nojori jaara Moisés Rootasano tojtianu paniyaquiquiaa, Pueyaso sequesano caminiujiuniaa naajionuutasanonio, majaari nojori tojtianu quiniutianiyajuhuaaj, macu pueyano jaara samiitiarohua”.

17

Puereetaari quiniutianiya sesa miijiacara
(Mt 18.6-7, 21-22; Mr 9.42)

¹ Na nuhuaaji, Jesuuri na pueya sequequiaari:

—Mijiria, pueyari pueyaracaanu sesa miitishaaquiaa. Jiyano hua taraatia quijaari cuno, cante sesa miitirii tamonuni. ² Jiyano pueyanoratej, maara socua maninia quiri nera, puereetuuca saajia jaara na riquiajiniji morotasaare, shoniniacu caminia jiuujiajinia jartasocoriquiano. Jaara naa miishaaretej, maara maninia quiri, maja sesa miijiaara na jiyatenura niquiriyatu nio muerasuniyojuajinijinio. ³ Cunora, tama nia cuaqueyajaaja nia cojuare maja quenaaja sesa nia miitiniuria pueya.

⁴ Quia tarajanu jaara sesa miiri, quia nacasurenoj. Nojuaja jaara taraajerohua sesa na miiniucua quiajaniya, quia jiyanoorinijoj. ⁴ Nojuaja jaara sequeyarucua sesa miya quiajaniya niquiriyatu juuca, naajaa, quia jiyanooriquia, nojuaja jaara quia sequere: “Sesa miirii quiajaniyanijia. Cua jiyanoori quenaaja”. Nojuaja jaara quia pacutejore sesa miiniu siete cuno juucaja, naajaa, majaari na tarinitianu jiyanooniu.

Pueyasocua tiuujia pueyanoori jiyano hua cumaacaraca

⁵ Jesu saquiriojosano pueyari Jesu sequequiaari:

—Jiyaniijianaa, socua jiyano hua canaa quia tiutiri Pueyasocua, socua cumaaca canaa jitianura.

⁶ Jiyaniijia Jesuuri nojori riucuaaree:

—Pueyasocua nia tiuuniu jaara quiri quenaaja juhua mostaza jajau-niyojua, jiyano hua shiitianiyojua, niaa jaara nio satuna jiyona sequere: “Niiquiji quia pacure. Moojinia quia nujuasee”, maara nia sequesano tojiri.

Pueyasora poonijionatucua taa miijia quiriqianij

⁷ Niaa jaara seruraca quiriquia, nojuaja jaara tijinia tiuquirio-hua quia cuhuariquiajiniji tee na namitariquiaacuajani, quia seya cojuanujiniji soj, ¿niaatucua na sequere: “Miji, quia miaquesuhuaaja”? ⁸ Majaruhua. Niaari saaja na sequenutaniya: “¿Quiria quia sumature! Cua mianuutere coteenu. Cua raaterejuhuaaj. Cua miaquenu nuhuaaji, quiocua saniniuujia miaquerohua. Quiocua raturohuajuhuaaj”. ⁹ Na nuhuaaji, nia seru jaara puetunu nia sequesanojuanaa miiri, ¿niaateeri na sequequiaa “paacarasho”? ¡Maja! ¹⁰ Naajuhuaaj, niaa jaara puetunu Pueyaso sequesanojuanaa miiri, tama nia sequerejaaja: “Janiyari maja maninia seruni. Majaari tama cua niishitajajinijiaaja cua miiniu quiquiaa cua Jiyaniijiaara. Janiyari saaja pueyaracaanu paniquiaa cucua na tequejonura juhua naatujuaacuani”.

Jesu naatanijosacari diez pueya, lepraraca cusosuhua

¹¹ Jesuuri Jerusalén tiacajiniara na pueyata quiariquiaacuhua. Jiyacari, Galilea jiya, Samaria jiya tajiniaaco quiariquiaari. ¹² Quera na tiuquishacari shiitianiyojua tiacajinia, diez pueya lepraraca cusosuhuari na naacuquiaari. Nojoriiri tucuaaanujijia Jesuucujaji nujua-tusee. ¹³ Nojoriiri Jesuucua nacaree:

—¡Niishitiojona Jesunaa, canaacua quia taraajere!

¹⁴ Jesu niquishacari nojori, nojori sequereeri:

—Nia cuaqueya nia niqutishii pueyacuara secojonaa, taa supuetana Moisés sequequiaaricujani.

Nojori canujuucuatucarijia, nojori cusonuuri shaajequee. ¹⁵ Tamonu nojorijinijinio niquishacari na cuaqueya tari cushiriiquei, nojuajaari Jesuucua tacateyarohua. Nojuajaari na rupaa paaretariquiaa na maniniuhuaqueetasacari Pueyaso. ¹⁶ Jesu cariquimiaaji mojuquetaseeri. Jiyocuara naniriiri. Jesu sequereeri: “¡Paacarasho Jesunaa!” Cuno pueyanoori Samaria jiyajinijinio tahue quiquiaari. ¹⁷ Jesuuri na pueya niqiuara naa sequeree:

—¿Majateeri diez cusosuhua naatanijiosaanu quirii? ¿Teeteeri narta naataconohua nueve pueyani? ¹⁸ ¿Saaja nio tahueteeri tacaterohua Pueyaso na maniniuhuaqueetanura?

¹⁹ Na nuhuaji, Jesuuri cuno tahue sequeree:

—Quia sanere. Quia quiaarohua. Quiaacuaja naatarohua cucua quia tiuuniuucua.

Taa na quiniutianiyani, Jiyaniijia Cristo tiuquishacariuhua
(Mt 24.23-28, 36-41)

²⁰ Fariseocuacaari Jesu nequesotaquiaari taacari Pueyaso Jiyarosocoriguiano niniutianiya jiyaniijiaara na quiniuria mijiriani. Jesuuri nojori riucuarere saaja:

—Pueyaso Jiyarosano jittiasacari na muerasu, majaari namijiata niquishano. ²¹ Majaari na naata sequesaaanu: “Niya quiya pa Jiyaniijia quiquio”, “Jati quiyaruhua”. Pueyasocuajaari tari niya jittiaa na muerasu nia tajinia.

²² Na nuhuaji, Jesuuri tama na pueyajaaja sequequiaari:

—Na nuhuaji, taraatia quishacariiri quiniutianiya. Niaari cua niquniuucua jiaatianutaniya niaata cua quiniuria rupaquijia, taa ni-aata cua quiya quiarijiacuaani. Majaari nia niquniu quiniutianiya janiya. ²³ Tamasacaari nia sequenutaniya: “¡Niya quiyacuaja nia Jiyaniijia!” Tamasacaari saniniuujia sequenutaniyacujua: “¡Nooj, jati quiyatej!” Majaari nia tojiniu jiyano pueyatej, nojori jaara naa nia sequeriquia. Majaari nojori neteyotanu najuhuanaj. ²⁴ Mijiria cua tacatesacariuhua, cuno juuca, janiyari niquishaanutaniyani, naatej, taa miacana puetunu jiya cajiniocuajanaa niquishaaquiaacuaani na nunujusacari. ²⁵ Saniniuujia, mijiria cua quishacarijia, janiyari co-teenu jiyanohua naquiya miishaanutaniyani. Nio pa quishacari pueyari cua paniyaquiniutianiya. ²⁶ Quera cua tiuquiniu panishacariuhua mijiria, naa quiniutianiyari taa mijiria quiniaa pueya quiquiaaricuaa supuetana Noé quishacari. ²⁷ Naa quiquiaariiri cuno quishacari. Mijiria quiniaa pueyari juhuajaniya miaquenuujua. Raruujuaari. Juhua-janiya maaji camiyojuaari. Pueyari necojori camiyoteja. Pueyari naa juhuajaniya miijioriquiaa Noé jaara tiuquitiaquiaari na puereetuca buquejinia. Canashiyaquiji, maruuri jiyanohua niqiuari. Puetunu

mijiria quiniaajanaari cusonuuquiaari pajaacajinia. ²⁸ Naa quiquiaar-
 ijuhua supuetana Lot quishacari Sodoma tiacajinia. Cuno pueyari
 juhuajaniya miaquenuujua. Raruujuaari. Casami masejojuuari. Juhua-
 janiya na casami niqutiojojuuari. Na cuhuariquiaca natoojuaari. Na
 tiacara tiajojuajaariuhuj. ²⁹ Naa juhuajaniya nojori quishacaritij,
 Lotri tohuataquiaari Sodoma tiacajiniji. Jiyacaritij, maniiri asufreta
 cojitishano juhua maru niquiaari jiyocuacaanuji. Puetunu cuno sesa
 miijiacajanaari manijinia catequiaari. ³⁰ Naa quiniutianiyaariuhua
 quera jiya puequesacari. Pueyari juhuajaniya quiniutianiya. Janiyari
 jiyacari canashiyaquiji tiuquiniutianihuani.

³¹ 'Cuno juuca, pueyano jaara na tia cacojiria quiya, cuaara
 roseyaquiiria na casamiicua tiajiniaaco. Naajuhuj, pueyano jaara
 na cuhuariquiajinia quiya, nojuaja cuaara tacateyaquiuhuara na
 tiajinia. ³² Nia niishiriquia supuetana Lot niquiocua. Na mashishacari,
 nojuajaari ritia cusoquiaari na nijiniara na niquiniucua, na casamiicua
 na taraajesacari. ³³ Cante saaja shuquiriaatia mijiria na quiniuria
 niishiriojuani, nojuajaari na nuhuaji jiyanohua taraatia quiniutianiya
 Pueyasooju. Saniniujia, cante tama na cuaqueyajaaja panitija cua
 tojjijara na quiniuriani, nojuajaari pueyaracaanu shuquiriaatia quijara
 jiyatesaanutaniya.

³⁴ 'Cua tojiri. Cuno niucujuhuj, caapiqui pueya jiuriatoosacari juu-
 cua na maquetujinia, niquiriyatujuaari rishaanutaniya jiyocuacaanura,
 Pueyaso pueyano na quiniucua. Tamonuuri tiujiasaanutaniya sani-
 itiosocoriquiano. ³⁵ Cuno juucajuhuj, caapiqui maajipohua riiquiniu-
 ushacari jatiqui juucua, cucua tiuujaari tarajanu shuriucujaji rishaanu-
 taniya. Tamonuuri tiujiasaanutaniya saniitiosocoriquiano. ³⁶ Caapiqui
 pueya quishacari cuhuariquiajinia, cua pueyanoori rishaanutaniya.
 Tamonuuri tiujiasaanutaniya saniitiosocoriquiano.

³⁷ Jesu pueya tojishacari naa Jesu sequesantej, nojoriiri na neque-
 sotaree:

—¿Tee nio quia pohuatasano niquishaanutaniyarini?

Jesuuri nojori riucuree miriqui:

—Tee casaa moqueyani, mohuari tii rerejiya.

Naajuhuj, majaari quenaaja niquiriyatu Pueyaso tojiyashijia
 curenu quiniutianiya saniitiosoo.

18

*Jesu pohuatasano mashiquojiniji, pueya nequesoreena pueyanojini-
 jinio*

¹ Jesuuri na pueya pohuataquiaari nio miriqui pohuatasano nojori na
 niishitiojonura, nojori cuaara Pueyaso secojoora pueyaracaanu, nojori
 taacanuyaquiniutia. ² Naa nojori sequereeri:

—Tamonu tiacajinia, pueya nequesoreena pueyanoori quijia.
 Pueyaso puereyashijia quijiaari, pueya rerequetejanio. ³ Cuno
 tiacajiniaaja tamonu mashiquoori quiquiaarijuhua. Mashiquoori
 cuno nequesoreenaacua rucanejojua pueyaracaanu. Na secojojuuari
 sesa na miinia pueyano cuaara na niqutiohuara na casaa saniniujia,
 sesa na miishanojiniji nojuaja. ⁴ Majaari nequesoreena tojinu paniniu
 quijia pueyaracaanu cuno mashiquio. Naajaa, pueyaracaanu nocua na
 rucanejosacari, cuno nequesoreenaari socua tama sequequiaarijaaja:

“Janiyari maja Pueyaso puerejani. Janiyari pueya tojiyashijia cutarani.⁵ Naajaa, naa nio mashiquio taajetesacari janiya pueyaracaanutej, janiyari quiarjia na panishano miiniutianiya nerani, mariqui cua juaatijiore pueyaracaanuuri na nenecojosacari janiya”.

⁶Maninia na pueya niishiniuria na pohuatasano, Jiyaniijia Jesuuri naa nojori sequerohuacuhuj:

—Naa miiquiaariiri, cuno pueya nequesoreena seque. Jiyanohua pueya rerequeteja quiquiaariiri, naajaa, nojuajaari maninia miiquiaari cuno mashiquiora.⁷ ¿Nia que Pueyasoorijiataj? ¿Niaateeri jiyaniya maja nojuaja tojiniu quiniutianiya na muerasu, canapuate na secojoquiaani juuca, niucuanio? ¿Pueyasoteeri nia sashitiniutianiyaajaara? ¡Maja!⁸ Nojuajaari maja na tarishiniu quiniutianiya. Ritia nia naacunutaniyari sesa nia miijica pueyacuaji. Sesa nia miijicaari namishaanutaniya niaacua. Naaratej, majaari secojonu nia tarinitianu. Mijiria cua tiuquishacariuhua, ¿janiyate Pueyasooocua tiuujica riuriatanutaniya naa pueyaracaanu secojonuujuacani?

Jesu pohuatasano miriqui Fariseo pueyanojiniji, Romano jiyaniijara cumaneeca masejojuajinijinio

⁹Jesuuri socua nio miriqui pohuatasano pohuataquiaari noo pueya niqiuara, canapuate tama na cuaqueyajaaja jiyaniijiani nojoriiri maninia pueyano. Naacujitij, nojoriiri tamasa pueya soojea, nojori jyanishacari cuno pueyari socua sesa miijica nojorijiniji. Cunora, Jesuuri nojori niqiuara naa pohuataquiaari:

¹⁰—Fariseo pueyanoori quiaquiaari Pueyaso Secojoua tiajinia na seconura Pueyaso. Jiyacaritij, Romano jiyaniijara cumaneeca masejoua pueyanoori quiaquiaari Pueyaso na secojonura tiijihuaj.¹¹ Fariseo pueyanoori nujuariquiaa Pueyaso na secojosacari. Naa sequeriquiari: “Pueyasonaa, paacarasho janiyari maja juhua tamasa pueyani. Tamasa cutaraari nohuasenuujuaca, sesa miijica, maaji porocua-juhuaj. Naajuhuj, shuquiriaatia quiyanijia, janiyari maja sesa miijiani juhua nio pueyanouja niya cuata secojiyani, cumaneeca masejona pueyanoni.¹² Janiyari caapiqui juuca miaqueyaquiaani puetunu seamanajanaa cua shuqiritiniuria quijaniya. Naajuhuj, janiyari pueyaracaanu puetunu cua masesanojinijianaa niqutioquiaa quiarani, taa Moisés rootaquiaaricujani”.¹³ Cumaneeca masejonaari saniniuujia tucuaaanuji nujuasee. Na secojosacari, majaari que-naaja na maunu quiriquiaa jiyocuaaanu. Tama nojuajaari na jiriquia piquiriquiaa na taraajenuta sesa na miishanojiniji. Naa sequereeri: “Pueyasonaa, cucua quia taraajere. ¡Cua jiyanoori! ¡Sesa miijianijia!” Naa secojoquiaariiri.¹⁴ Seetanujuanaa nia sequeyanijia, cumaneeca masejonaari Pueyaso jiyanooshano tacateyarohua cutara. Fariseo pueyanoori saniniuujia jiyanoyaquishoo tacateyarohuacujua. Naacujitij, cante tama na cuaqueyajaaja jiyateya juhua maninia pueyano na quiniuria tamajaajani, nojuajaari cararosaanutaniya. Saniniuujia, cante sesa na miishano seetaaquijiani Pueyaso jiyanooniuria nojuajani, Pueyasoori cuno pueyano jiyatenutaniya seetanujuanaa sesa miyaquijia na quiniuria.

*Jesu niasacari na juaashiquia conaajaacua
(Mt 19.13-15; Mr 10.13-16)*

¹⁵ Jiyacaritij, conaajaari poosaariquiaa Jesuucua, Jesu nianura nojori-icua na juaashiquia, Pueyaso jitianura maninia nojori. Jesu saquiriojosano pueya jaara niquiquiaari conaaja pooshiyano Jesuucua, nojoriiri na poonaa juaarii. ¹⁶ Jesuuri saaja conaaja poonaa sequeree, conaaja cuaara nocua poosaaria. Na nuhuaji, na pueya sequereeri:

—Naatujoori cuaara poosaaria cucua. Maja na poonaa tenujunu. Cante Pueyaso muerasura quiniu paniyani, nojori cuaara jiyateera tama na cuaqueyajaaja juhua nio naatujooriria. ¹⁷ Seetanujuanaa nia sequeyanijia, cante tama na cuaqueyajaaja jiyateyaquiya juhua naatujooriria Pueyaso rupaacua na tiuniuriani, cuno pueyanoori maja na naata Pueyaso muerasura na quiniu.

Casamiriaca pueyano pocoojosacari Jesuta
(Mt 19.16-30; Mr 10.17-31)

¹⁸ Tamonu Judiocuaca camarnuuri Jesu nequesotaquiaari:

—Maninia niishitiojonanaa, ¿taa cua miiniutianiyani, jiya puequesacari cua samitianishaanura, pueyaracaanu quijiara cua quiniuria Pueyasotani?

¹⁹ Jesuuri na riucuaaree:

—¿Casaara quia sequeya janiya maninia pueyanotani? Saaja Pueyaso cutaraari seetanujuanaa maninia. Majaari socua tamonu quiniu. ²⁰ Pueyanonaa, quiaacuajaari Moisés Rootasano niishijia. Naa naajio-tasanocuaajaari quiya: “Maja quia camishoo maaji numuetucunu. Maja monu. Maja nohuasenu. Maja tamonuucua saquiriojotanu quia sajonota. Quia que, quia nucua tojijia quia quiri”.

²¹ Pueyanoori Jesu riucuaaree:

—Janiyacuaajaari cua naatujuaajiniji puetunu cuno tojijiajanaani.

²² Naa na sequesacaritij, Jesuuri na sequeree:

—Quiyajaari niquiriyatu casaa quia miishoojua. Nio quia miiri: puetunu quia jitiananojuanaa quia niquitiojore cumanecara. Na nuhuaji, casamijiuniucua pueya cuno cumaneca quia niquitiojore nareja. Naacuajitij, quiaari jiyanojua casamiriaca quiniutianiya cutara jiyocuaaanu. Na nuhuaji, quiocua nimiohua cutara, cua pueyano quia quiniuria.

²³ Na tojishacari Jesu sequesano, nojuajaari jiyanojua taraajeequee, jiyanojua queraatia casamiriaca na quishacari. ²⁴ Jesu niquishacari nojuaja taraajeyano, Jesuuri na pueya sequeree:

—Casamiriaca pueyara, jiyanojua jiyajenetaari Pueyaso muerasu nojori quiniuria. ²⁵ ¿Camelloteeri na naata cusupuetaja cuhuoco tamajiria tajiniu? Maja na naata. Naajuhuj, casamiriaca pueyanora, socua jiyanojua jiyajenetaari Pueyaso muerasu na jatanishaanura.

²⁶ Pueya tojishacari naa Jesu sequesantej, nojoriiri naa na nequesota-ree:

—¿Canteeri Pueyaso muerasura quiniutianianitioj?

²⁷ Jesuuri nojori riucuaaree:

—Maja pueya na naata tama na cuaqueyajaaja jiyatenu Pueyaso muerasu nojori quiniuria. Naajaa, Pueyaso cutaraari na naata.

²⁸ Pedroori Jesu sequeree:

—Jiyaniijianaa, ¿canaarijiataj? Canaari puetunu canaa jitiananojuanaa tiujiaquiaarini canaa nuhuajiniuria quiajaniya.

²⁹ Jesuuri na riucuaaree:

—Seetanujuanaa nia sequeyanijia, cante na panishano casaa tiujiaquiaari Pueyasora na poonijionurani: na tia, na que, na nucua, tapueyocuaca, necocua, necohua, nojuajaari socua jiyanoehua queraatia masenutaniya mijiria na quishacarijia. ³⁰ Na nuhuaji, samiitianishano quiniutianiyari pueyaracaanu shuquiriaatia na quiniuria Pueyaso shipinishocoriquiano quiarinio jiyajinia.

Jesu pacutesacari pohuatanu, nojuaja mosaanutaniya

(Mt 20.17-19; Mr 10.32-34)

³¹ Jesuuri saaja na doce saquiriojosano pueya jiyataaree tamocora. Naa nojori sequereeri:

—Paari quiarijia Jerusalén tiacajinia quiaani. Janiyari quiniqui puetunujuanaa miishaanutaniyani taa tariucuacaanu pueyara Pueyaso sequesano caminiujiuniaa sequequiaaricuaja janiyajinijini. ³² Naacuaajitij, janiyari tahua niquitiosaanutaniyani. Nojoriiri cua macaatinutaniya. Taraatia cua miitiuniutianiyari. Cua riocojotunutaniyari. ³³ Cua piquitiuniutianiyajaariuhua. Na nuhuaji, cua motunutaniyari. Naajaa, jiuujanaraca juucajinia, janiyari samiitianutaniuhua.

³⁴ Majaari Jesu pueya niishiniu quiriquiaa quenaaja na sequesano. Majaari nojori niishiniu quiriquiaa casaa Jesu sequeriquiaani. Juhua miriqui sequesanoori quiriquiaa nojoriria.

Jesu jeeacasacari cariojuaru pueyano Jericó tiacajinia

(Mt 20.29-34; Mr 10.46-52)

³⁵ Na pueyata Jesu quishacari tari cateca Jericó tiacaacuara, cariojuaru pueyanoori nuu shuucuaji cajiriquiaa, cumaneeca na masejonura pueya tajishacari nucuaco. ³⁶ Cariojuaru tojishacari queraatia pueya tajiyo, pueya nequesotareeri:

—¿Casaatejanojoni?

³⁷ Pueyari na sequereeri:

—Nazaret tiacajinijinio Jesucuaaja tajiya.

³⁸ Cariojuaruuri nacaquee:

—¡Jesunaa! ¡Supuetana David niquiohuacuajinio supueno pueyanonaa! ¡Cucua quia taraajere quenaaja!

³⁹ Jesu puetanaa pueyari na juaarii na sanaajanura juucua. Nojuajaari saaja socua jiyanoehua nacaree:

—¡Supuetana David niquiohuacuajinio supueno pueyanonaa! ¡Cucua quia taraajere!

⁴⁰ Jesu tojishacari nojuaja, nujuaseeri. Jesuuri pueya sequereeri cariojuaru cuara jaatucusaaria nocua. Cariojuaru tiuquishacari nocua, Jesuuri na nequesotaree:

⁴¹ —¿Casaa quia paniya cua miiniuria quiajanianiyani?

Cariojuaruuri Jesu riucuaaree:

—¡Jianijianaa, niquijia quiniu panihuanijia!

⁴² Jesuuri na sequereeri:

—¡Niquijia quia quiriouhua! Quia namijiacuaaja tari jeequerouhua cucua quia tiushacari.

⁴³ Jiyacaritij, cariojuaruuri maninia niquijia quiqui. Jesu nuhuaji sacuaareeri na shuquiritianuta Pueyaso. Puetunu Jesu miishano niquiniaajanaari Pueyaso maniniuhuaqueetariquiaa.

19

Jesu poccojosacari Zaqueota

¹ Jesuuri Jericó tiacajinia tiuquiiioquiaari na pueyata. Tiaca jiuuji-aaco quiariquiaari. ² Cuno tiacajinia quiquiaariiri casamiriaca pueyano. Na sesa quiquiaari Zaqueo. Zaqueori Roma tiacajinia quijia jiyaniijara cumaneeca masejona camarnu quiquiaari. ³ Nojuajaari Jesu niishiniu panijia juucua. Majaari na naata niquniu quiriquiaa Jesu, puera jiyanhua pueya quiniuucua Jesu shocua. Naajuhuj, Zaqueori puera posucuashi quijia. ⁴ Cunora, Zaqueori netequiaari Jesu tacoji. Nuu shuucujaji sicómoro naanaacua macaseeri, maninia na niquniuria tiji Jesu, jaara cunoco tajimia. ⁵ Jesu tajishacari Zaqueo cariquiaco, Jesuuri nocua mauree. Na sequereeri:

—Zaqueonaa, ¡ritia quia rosemohua! Janiya quiarijia quia tiajinia maquenutaniyani.

⁶ Zaqueori ritia rosemohua. Jesu tiuquinitiaree na tiajiniaari jiyanhua na shuquiriniutia. ⁷ Tamasaca pueya jaara Jesu niquiquiaari Zaqueo tiajinia tiuquiyano, puetunu nojorijianaari Jesu sesacanu coteequiaari. Tama sequeturiquiaajaarijia: “Cuno pueyanoori sesa miijia pueyano tiajinia tiuquishii”. ⁸ Na nuhuaji, Zaqueori nujuaree. Jesu sequereeri:

—Seetanujuanaa quia sequeyanijia, Jiyaniijanaa, janiyari quiarijia quiocua tiuuriini. Naacuajitij, janiyari casamiiijuniucua nareja niq-uitiojonutaniya puetunu cua jiiitasano cajiniocuajiniijianaani. Naajuhuj, janiya jaara puera cumaneeca masecanu tamasaca pueyajiniji cua sapojonutani, janiyari nojori niqutionutaniuhua socua jiyanhua queraatia cumaneecani cua nohuasesanojiniji nojori.

⁹ Jesuuri na sequeree pueya niquiara:

—¡Quiarijiani, nio tiajinia quiniaa pueyari tari jiyanooshaaree! Nio pueyanocujaaari supuetana Abraham niqiuohuacuajinio supuenojuhuj. Nojuajaari cucua tiuuri taa Abraham tiuquiaari Pueyasocucuaani. ¹⁰ Janiyacuajaari cunora mijiria niquiaarini, tashucuaano pueya cua pajenura, nojori cua jaariutianura Sesaaca.

Miriqui Jesu pahuatasano diez cumaneecajiniji
(Mt 25.14-30)

¹¹ Tii quiniaa pueyari Jesu pahuatasano tojitiariquiaa. Jesuuri tari cateca quiriquiaa Jerusalén tiacajiniji. Pueyari jyaniriquiaa Jesuuri Israel pueya jiyaniijara quiniutaniya tari, Pueyaso muerasu na jiiitianura mijiria. Nocujaji, Jesuuri nojori pahuataree nio miriqui pahuatasano, nojori na niishitiojonura. ¹² Naa nojori niquiara pahuatareeri:

—Tamonu jiyaniijia niyanuuri quiquiaari. Nojuajaari tucuaaanu tamonu jiyajinia quiaquiaari jiyaniijara na jiyatesaanura. Jiyaniijara na jiyatesaanu nuhuaji, nojuajaari tacateriquianohua quiriquiaa, narta pueya jiyaniijia na quiniuria. ¹³ Na nuhuajiria, nojuajaari diez na seya sequeree nocua nojori nijionura. Nojuajaari puetunu nojorijianaa niqutiojoree niquiriyatu cumanee, orojiniji shipinshano. Nojori sequereeri: “Nio cumanee nia poonitijiore, janiya cuara tiuquiriohuj-jaatiinijaj”. ¹⁴ Na nuhuaji quiaqueeri. Na jiyajinijinio pueyari maja

na niquiniu paniniu quijia cuno pueyano. Cunora, nojoriiri pueya jiyaramiquirii na nuhuaji, jiyaniijijanaa nojori sequenura: “Maja canaa paniniu cuno pueyano, canaa jiyaniijia na quiniuria”.

¹⁵ Naajaa, nojuajaari saaja jiyatesaaree jiyaniijia na quiniuria. Na nuhuaji, na jiyajinia tacateyarohuari. Jaara tiuquishuhua, na cumaneeca na niquitijosano seya sequereeri, nocua nojori nijionura. Nojuajaari niishiniu paniriquiaa taa cumaneeca socua nojori reratequiaarini, nojori poonitijosacari na niquitijosano cumaneeca. ¹⁶ Coteenu seruuri nocua nimiaa. Na jiyaniijia sequeeseeri: “Cua jiyaniijianaa, cua poonitijosacari quia niquitiosano cumanee janiya, janiyari socua diez cumaneeca reratecanuni”. ¹⁷ Na jiyaniijiaari na sequereeri: “Maniniacuaja! ¡Quiaacuajaari maninia cua seru! Quiaari secaja cua niquitiosano quiajaniya poonitijori quiaa shitimia quiria. Naaratej, janiyari quia jiyatenutaniya diez tiaca jiyaniijia quia quiniuriani”. ¹⁸ Na nuhuaji, tamonu na seruuri nocua nimiaajuhua. Nojuajaari na jiyaniijia sequereeri: “Cua jiyaniijianaa, cua poonitijosacari quia niquitiosano cumanee janiya, janiyari socua cinco cumaneeca reratecanuni”. ¹⁹ Na jiyaniijiaari na sequereerijuhua: “Quiaari cinco tiaca jiyaniijia quiniutianiya”.

²⁰ Na nuhuaji, tamonu na seruuri nocua nimiaajuhua. Na jiyaniijia sequeeseeri: “Jiyaniijianaa, niya quia quia cumanee quia niquitiosano janiya. Janiyari na cojuacanu maniniani, toqueraujinia jiuniocosano. ²¹ Janiyari naa miiquianuni cua pueresacari quiajaniya. Janiyari niishiyani, quiaari quiarta pueyacuataaraajeyashijia. Quiaari tamasaca racatasanojiniji poojua. Quiaari tamasaca natoosanojiniji senoojuajuhua”. ²² Na jiyaniijiaari na juarii: “Sesaacanaa, tama quia sequesanotajaaja janiyari quia nequesoreenutaniyani. ¿Naatee? ¿Quiaateeri niishiquianu janiyari pueyacuataaraajeyashijiani? ¿Janiyateeri tamasaca racatasanojiniji poojuani? ¿Janiyateeri tamasaca natoosanojiniji senoojuajuhua? ²³ Quiaa jaara jiyaniquianu janiya naa miijiani, ¿casaara cua cumanee quia niquitioyiquianu cumaneeca cojuanaarini? Nojori jaara cua cumanee poonitijiocanu, janiya maara socua queraatia na riuriasuhuani, cua tijajinia cua tiuquishacariuhua”. ²⁴ Cunora, na jiyaniijiaari tii quiniaa pueya sequereeri: “¡Cua cumanee nia jaariutiare cuno! Nia niquitiore cua maninia seru, cante diez cumaneeca jiiitiaacuajani”. ²⁵ Nojoriiri na sequereeri: “Jiyaniijianaa, ¿casaarateni? Nojuacuaja tari diez cumaneeca jiiitaa”. ²⁶ Jiyaniijiaari saaja nojori riucaaree: “Seetanujuanaa nia sequeyanjia, cante tari jiiitaa, nojuajaari socua niquitiosaanutaniya. Cante na jiiitaaquiyani, secaja na jiiitiasanoori puetunujuanaa jaariutiasaanutaniya, cucua tiuyashijia na quiniucua. ²⁷ Quiarijia, cua paraa saniniuujia, cuno pojori canapuee cua paniyaquiquianu nojori jiyaniijia cua quiniuriani, miji nia jayore nojori. Niya cua niquiara nia puecoore cua ruuretajaca seque”.

Jesu tiuquishacari Jerusalén tiacajinia

(Mt 21.1-11; Mr 11.1-11; Jn 12.12-19)

²⁸ Nio na pohuatanu nuhuaji, Jesuuri na pueya puetaareecuahuaj Jerusalén tiacajiniara. ²⁹ Jaara cateca quiri quiaa tari Betfagé tiaca, Betania tiacanio, Olivo cuhuari quia tuhuananujuhua, Jesuuri caapiqui na pueya sequereeri:

³⁰ —Cuno shiitianiyojua tiacajinia nia quiaare, pa tajoji niquishiyani. Niaa jaara tiuquishii, niaari burro riuriantanutaniya morotasano,

pueyano cajishoojua na nijinia. Niaa jaara na niquishii, niocua na samaacartasee. Niaari na jaatucumohua miji. ³¹ Pueya jaara nequesotare niajaniya casaara nia samaacartaanoj, niocua na riucuaare: “Jiyaniijia na paniya”.

³² Jesu pueyari quiaaree. Nojoriiri na riuriatasee taa Jesu seque-quiaaricuajani. ³³ Nojori samaacartasacari burro, na camaruhuari nojori nequesotaree:

—¿Casaara nia samaacartaa canaa burroni?

³⁴ Nojoriiri na riucuaaree:

—Jiyaniijia na paniya.

³⁵ Na nuhuaji, nojoriiri na jaatucuyarohua Jesuucua. Jesu pueyari na toqueya niojoree burro nijinia Jesu cajijiara. Na nuhuaji, nojoriiri Jesu cajitirii na nijinia. ³⁶ Na quiasacari Jerusalén tiacajiniara, pueyari na toqueya muejoquiaari nucuaco Jesuucujai. ³⁷ Nojori rosetanu panishacari Olivo cuhuariquia tuhuananujiniji, puetunu Jesu pueyajanaari juhua-catecara nacoquiaari nojori shuquiriniutia. Nojoriiri Jesu manini-uhaqueetariquiaa puetunu na cumacata na miishanojuanaa nojori niquiniuucua. Nojoriiri cunora jiyanoehua shuquiritariquiaa Pueyaso. ³⁸ Nojoriiri naa nacooriquiaa:

—¡Pueyaso cuaara shuquiritiiria pa Jiyaniijia, Pueyaso Jiyarosano na quiniuucua! Pueyaso pocua taraajerohuani. Pa jiyanooriohuani. ¡Nojuajaari jiyanoehua maninia! ¡Pa shuquiritiarenoj!

³⁹ Cuniqiu pueya tajinia quiniaa Fariseocuaca tojishacari naa nojori sequesantej, nojoriiri Jesu sequeree:

—¡Niishitiojonanaa, quia pueya quia sanaajare, maja naa nojori sequenura!

⁴⁰ Jesuuri saa sequereejaa:

—Seetanujuanaa nia sequeyanijia, nio pojori jaara sanaajetare, ¡sairi saniniuujia nacoanutaniyacujua!

⁴¹ Tari Jesu quishacari Jerusalén tiaca shuriucua, na niquishacari cuno tiaca, Jesuuri cuno tiacajinia quiniaacua nujuquere. ⁴² Cunora, juhua pueyano sequere Jerusalén tiacaari:

—Jerusalén tiacanaa, quia niishitiriquia quiarijiani, casaa quia paniya jiyanooshano quia quiniuriani, shuquiriaatia quia quiniuriajuhuaj. Taraatia quijianaa, quia Jiyanooriquianoori juucua niya quia. Majaari quia niishiniu nojuaja, juhua nimishitiu quia quishacari. ⁴³ Cunora, na nuhuajiiri jiyanoehua taraatia quiniutianiya quiara. Quia paraari quia mataconutaniya quia shocuaqueya, na cosenura maninia quia-janiya quia mashiaquiniuucujai. Naacuajitij, quia paraari quiocua juhuacunutaniya na miaquejonura quiajaniya. ⁴⁴ Quiaari jiyareta suresaanutaniya. Quia tiacajinia quiniaari puecoosaanutaniya. Quia tiacaari puetunu niyartasaanutaniyajanaa. Majaari tamonu saajia cureenu quiniutianiya quenaaja tamonu saajia caco maano. Quiaari naa miishaanutaniyatej quia niishiyaquiniuucua, Pueyasoori quiocua niquiaari najuhuanaj, quiocuaji na tacunura juucua. Quiaari saaja na ruuretacanu.

*Jesu jaacasacari seya niqutiojonaa Pueyaso Secojoua tiajiniji
(Mt 21.12-17; Mr 11.15-19; Jn 2.13-22)*

⁴⁵ Na nuhuaji, Jesuuri Pueyaso Secojoua tiajinia tiuquiquiaari na pueyata. Nojuajaari juhuacatecara pueya tohuatanijioree, canapuete

na seya niqutiojoriquiaacuajani Pueyasocuara puecosocoriquiano.
⁴⁶ Jesuuri nojori sequeree:

—Tariucuacaanu Pueyaso Rupaajinia naa naajiotasaquiaariti Pueyaso sequesano: “Cua tiaari pueya secojonuujua janiya”. ¡Niaari saniniuujia na jiyatecanu nohuasenuujuaca quiquiora!

⁴⁷ Puetunu juucajanaa, Jesuuri jiyacari pueya niishitiojoriquiaa Pueyaso Secojoua tiajinia. Narta Judiocuaca jiyaniijianucuaari saaja na monu paniriquiaa. Pueyacuara secojonaa jiyaniijianucua, Moisés Rootasanojiniji niishitiojonaa, mariyata narta Judiocuaca jiyaniijianucuanio, puetunu nojorijianaari tari rojotooriquiaa juucua taa na motunutaniya Jesuni. ⁴⁸ Puetunu pueyajanaari saaja shamaatia tojitiariquiaa puetunu Jesu sequesanojuanaa. Cunora, majaari cuno jiyaniijianucua naata monu quiriqiaa Jesu.

20

Pueya nequesotasacari Jesu, cante na jiyaronani

(Mt 21.23-27; Mr 11.27-33)

¹ Tamonu juuca, Jesuuri Pueyaso Secojoua tiajinia niishitiojoriquiaa. Pueya niquiara pohuatariquiaari taate nojori naata Pueyaso muerasura quiniuni. Jiyacaritij, pueyacuara secojonaa jiyaniijianucuaari Jesuucua nijiomaa. Moisés Rootasanojiniji niishitiojonaari nojoritia nijiomaa-juhuaj, narta Judiocuaca camarucuanio. ² Nojoriiri Jesu nequesotaree:

—¿Cante quia jiyatecanu Pueyaso Secojoua tia jiyaniijia quia quiniuriani? ¡Canaa quia riuquare! ¿Cante quia jiyaronani?

³ Jesuuri nojori sequeree saniniuujia:

—Janiya nia nequesotanu panijajuhuj. Cua riuquare. ⁴ ¿Cante Juan jiyaroquiaari na tiuquinijionura pueyani? ¿Pueyasote na jiyaroquiaari, tama narta pueyajaaja soj?

⁵ Nojoriiri juhuacatecara tamajaaja pocoojoquiaari. Tama seque-tooriquiaajaarijia:

—¿Taa pa riuceanutaniyani? Paa jaara sequereni: “Pueyaso na jiyaroquiaari”, nojuajaari pa sequenutaniya: “¿Casaara nocua nia tiuyaquiquiaariirini?” ⁶ Saniniuujia, paa jaara na sequereni: “Juan-cuaja nareja pueya jiyarosano quiquiaari”, puetunu pueyajanaari pa jacunutaniya saitia na puecoonura pajaniya. Nojoricuajaari sequequiaa: “Juanna seetanujuanaa Pueyaso sequenu panishano caminiujunia quiquiaari”.

⁷ Nojoriiri cunora Jesu riuquaree:

—Johuj. Maja canaa niishiniu canaquitijia Juan jiyaroquiaari na tiuquinijionura pueyatej.

⁸ Naaratej, Jesuuri nojori sequeree:

—Janiyajuhuj, majaari cua sequenu quiniutaniya nijaniya, cante cua jiyaroquiaarini naa cua miiniuriatej.

Miriqui Jesu pohuatasano sesa miijicaa poonijionaajiniji

(Mt 21.33-44; Mr 12.1-11)

⁹ Na nuhuaji, Jesuuri pueya niishitiojonu coteerohuacuhuj nio miriqui pohuatasanota. Sequereeri:

—Tamonu pueyanoori cuhuariquiajinia uva natoquiaari. Na nuhuaji, na niqutioquiaari tamasaca pueyari, nojori cojuanura nera. Na camaruuri tucuacaanu quiaaree, tii na shocotejonura marijia.

¹⁰ Uva quishacari noshuriujua, saniya cuhuariquia camarujuaanaari na seru jiyaroree cuhuariquia cojuanaa pueyacu. Jiyarosaareeri tiji na masenura na camarurajanaa, uva carojotasanojiniji. Na camarujuaanaacujaari tarija pocoojoquiaari cuhuariquia cojuanaa pueyata, taa nojori niqutionutaniya na carojotasanojinijini. Cuhuariquia camaru seru tiuquishacari, ¡cuhuariquia cojuanaari na piquitiurii saaja! Na jiyaroturohua juhuasuuri. ¹¹ Cunora, cuhuariquia camarujuaanaari tamonu na seru jiyaroree. Cuhuariquia cojuanaari na miitiurii sesajuhuaaj. Na saarijiotureeri. Na piquitiuriiri. Na jiyaroturohua juhuasujaariuhuaaj. ¹² Cuhuariquia camarujuaanaari socua tamonu na seru jiyaroree nojoriicua. Nojoriiri sesa miitiurii nojuajuhuaaj. Na nuhuaji, nojoriiri na caponeeree cuhuariquiajiniji tariucua naatishano.

¹³ Naaratej, cuhuariquia camaruuri tama sequereeaaja: “¿Taa cua miiniutianiyarini? Quiyanunioyua jiyaroreeraquij. Cuno pojori jaara cua panishano niyanu niqutiuri, maja naasucua nojori rerequetenu quiniutianiya nojuaja”. ¹⁴ Saniniuujia, cuhuariquia cojuanaa jaara cuhuariquia camaru niyanujuaanaa niquirii nojoriicua niyano, tama nojorijaarijia sequetooree: “Nojuacuaja cuhuariquia camarura quiniutianiya na que niti, na que jaara shaajeyariquia. ¡Pa morej! Paari nio cuhuariquia camarura quiniutianiya saniniunijia”. ¹⁵ Naacuajitij, cuno cuhuariquia cojuanaa pueyari cuhuariquia camaru niyanu jaatiurii cuhuariquiajiniji. ¡Cuniqui na motureeri!

Naa nojori na pahuatanu nuhuajitij, Jesuuri pueya nequesotaree:

—Naa nojori miiniuucua neyanutej, ¿taa na que miiniutianiya cuno sesa pueyarini? ¹⁶ Seetanujuaanaa nia sequeyanijia, nojuajaari nocua quianutaniya nojori na pueconura. Na nuhuaji, na cuhuariquia niqutionutaniya tamasaca pueyari, nera nojori cojuanura cutara.

Pueya tojishacari nio, nojoriiri sequequiaari:

—¡Juhuej! ¡Pueyaso cuaara naa miyaquiiiriatej!

¹⁷ Jesuuri nojori niquinijioree. Nojori sequereeri:

—¿Naatee? ¿Nio naajiotasanooriuhuaaj, tariucuacaanu Pueyaso Rupaa-jiniani? ¿Niaate niishiya casaa na sequeyani? Naa sequeyariquij:

“Saitia tiana pueyari tamonu saajia soojotanutaniya, nojori jiyani-
ishacari cuno saajia sesarujau. Na nuhuaji, cuno saajiaari
socua panishano saajia jiyatesaanutaniuhua”.

¹⁸ Cante cuno saajiaacua tiuriyani, nojuajaari juhua rashiquijiniutianiya. Cuno saajia jaara pueyanocua tiyare, cuno pueyano jacanonutaniyari. Shahuej.

¹⁹ Jiyacaritij, pueyacuara secojonaa jiyaniijianucua, mariyata Moisés Rootasanojiniji niishitiojonaari Jesu quianu panirii juucua. Nojoricua-jaari niishirii, Pueyaso saquiriojosano Israel pueya jitianaa nojori quiniuucua, Jesuuri miriqui pahuatariquiaa nojorijiniji, tianaajiniji na pahuatasacari. Naajaa, jiyacaritij, majaan nojori quiatunu quiquiaari Jesu, nojori pueresacari Jesu panijiaca pueya.

*Jiya jiyaniijia cuaara niqitiosaaria na sequesano cumaneeca
(Mt 22.15-22; Mr 12.13-17)*

²⁰ Naaratej, nojoriiri tamasaca pueya jiyaramiquiquiaari Jesu-cua, sapuenu juhua maninia pueya niquishano. Cuno pueyari jiyaramiquishaaquiaari Jesu nojori pocuatenura sesa juucua, nocuara

tonujasaanura. Jesu jaara nojori riucuaquiaari sesa, maara Romano jiyaniijia niquitiosaaquiaari saniitiosocoriquiano. ²¹ Naacuajitij, cuno pueyari Jesu nequesotaquiaari:

—Niishitiojonanaa, canaari niishiyani, quiaari maninia niishitiojona. Majaari sesa quia sequesano. Naajuhujaj, majaari rimiajata quia niquniu pueya. Quiaacuajaari seetanujuanaa niishitiojoquiaa, taa Pueyaso paniya canaa miiniuriacuajani. ²² Cunora, canaa quia sequere taa canaa miiniutianiyani. Roma tiacajinia quijia jiyaniijiaari pa sequequiaari Judiocuaca cuaara cumaneeca niqutiojoora nera, na jiitiasano pueya pa quishacari. Naaratej, ¿maniniateeri pa miiniuria na sequesano?

²³ Jesuuri niishiquii nojoriiri nojuaja nequesotariquiaa najuhuanaj, nojori sapojonuta. Cunora, nojori sequereeri:

²⁴—Cua niqutiri quia cumanee. ¿Niooriuhujaj? ¿Cana naaquititi nocuani? ¿Cana sesate nocua naajiotasanoni?

Jesu riucuatereeri:

—Cunocuaja canaa sequesano Roma tiacajinia quijia jiyaniijia César naaqui, na sesajuhujaj.

²⁵ Jesuuri nojori sequereeri:

—Jiyaniijia César cuaara tama na casaajaaja niquitiosaaaria. Nojuacuajaari na camaru. Saniniuujia, Pueyaso nia niqutiore cutara nerano tama na casaajaaja. Nojuajaari pa camarnu.

²⁶ Saaja maninia Jesu riucuasacari pueya niqiuara nojori, majaari nojori naata nocuara tonujunu quirii. Nojoriiri saniya jiuujiateree Jesu riucuasacari saaja maninia nojori. Naacuajitij, nojoriiri socua sanaajetaree.

¿Paate samiitiaconutaniuhuanii?

(Mt 22.23-33; Mr 12.18-27)

²⁷ Na nuhuaji, noojiaqueya Saduceocuacajiniijioori Jesuucua niqiuari. Saduceocuacaari jiyaniijia macunucua pueya maja na samiitiaconu quiniutianihua. Naaratej, nojoriiri Jesu sequereeri:

²⁸ —Niishitiojonanaa, supuetana Moiséscuajaari pa rootaa na naajioneejinia, pueyano jaara cusoyare mueyaju, tarajanu cuaara camiria mashiquio, mueya na mueratenura tarajanu niti. ²⁹ Tamonu mashajaari seis tapueyocucaraca quiquiaari. Nojuajaari jiyapueranu quiquiaari. Coteenu camiquiaariiri. Nojuajaari cusoquiaari muetuhuojua. ³⁰ Cunora, na nuhuajishanaari na mashiquio camirii. Nojuajaari muetuhuojua cusoquiaarijiuhujaj. ³¹ Naaratej, neyaca tarajanuuri mashiquio camiquiaarijiuhujaj. Nojuajaari muetuhuojua cusoquiaarijiuhujaj. Puetunu cuno mashiquiorijianaari naa camiyocquiaari cuno maajitia. Puetunu nojorijianaari csonuucquiaari muetuhuojua. ³² Na nuhuaji, pueya mashiquioori shaajequiaarijiuhujaj. ³³ Naacuajitij, macunucua jaara samiitiacorohua, ¿teyano cuno siete neyacaajiniijioote seetanu neyacajanaa quiniutianiyani? Cuno mashiquiocuajaari puetunu cuno siete pueya niqiuocua quiquiaari.

³⁴ Jesuuri nojori riucuarereeri:

—Mijiria pa quishacarijia, canuu, maajipohuari camiyocquiaa. ³⁵ Saniniuujia, majaari noo pojori camiyonu quiniutianiya canapuee samiitianijiosaanutanihuacuajani, maninia quijiaca nojori quiniucua Pueyaso niqiuara mijiria. ³⁶ Majaari nojori

shaajenu quiniutianihua. Nojoriiri shaajeyashijiaca quiniutianiya juhua Pueyaso seya. Nojori samiitiaconuucua macujiniji, cunora, nojoriiri Pueyaso muerasujanaa quiniutianiya cutara.
³⁷ Supuetana Moisés cuajaari pa niishitiquiaari, macunucuaari samiitianijiosaanutaniuhua. Moisésri naa naajiotaquiaari Pueyaso sequesano nojuaja nequeru casaja noshiyanojinijitij. Pueyasoori naa sequequiaari Moisés:

“Janiyari quia supuetana Abraham Jiyaniijiani, quia supuetana Isaac Jiyaniijiano, quia supuetana Jacobo Jiyaniijiajuhuj”.

³⁸ Naacuajitij, paari niishiyani, puetunu Pueyasocua tiuujiaca shaajecono pueyajanaani, nojoricuajaari saminiucua quiya Pueyasora. Pueyasoori maja macunucua Jiyaniijia. Na pueya shaajeconocujaari saminiucua quiya nera cutara.

³⁹ Noojiaqueya Moisés Rootasanojiniji niishitiojonaa pueya tojishacari naa Jesu sequesantej, nojoriiri Jesu sequeree:

—Maniniacuajaari quia sequesano, Niishitiojonanaa.

⁴⁰ Naa Jesu rihuanesacari saaja maninia nojoritij, majaari socua pueya nequesoreenu paniniu quiri quiaa nojuaja.

¿Cante Cristo supuetanani?

(Mt 22.41-46; Mr 12.35-37)

⁴¹ Jesuuri naa nojori nequesotaree saniniuujia:

—¿Casaara na sequesaaquiacuaraarini, Pueyaso Jiyarosanaari supuetana David niquiohuacuajinio supuenutaniya? ⁴²⁻⁴³ Supuetana Davidjanaacuajaari naa naajiotaquiaari na jaaquequejoneejinia:

“Jiyaniijia Pueyasoori cua Jiyaniijia Cristo sequequiaari: ‘Cua miacquetajara quia cajirijiaara, janiya cuara quia paraa shocotare puetunujuanaajaatijia’ ”.

⁴⁴ ¿Cristotucua taa David niquiohuacuajinio supuereni? Davidcuajaari na sequeya “cua Jiyaniijjata”.

Cuno pueyari maja na naata na riucuanu quiri quiaa.

Jesu numootesacari na pueya, Moisés Rootasanojiniji niishitiojonaa pueyacuaji

(Mt 23.1-36; Mr 12.38-40; Lc 11.37-54)

⁴⁵ Puetunu pueyajanaa tojitasacarija Jesu, Jesuuri naa na saquiriosano pueya sequeree:

⁴⁶ —Tama nia cuaqueyajaaja nia cojuare Moisés Rootasanojiniji niishitiojonaa pueyacuaji, nia miyaquiniuucuaaji taa nojori miiquiaacuaani. Nojoriiri tucuaque toqueya cushiniu maniniucuaquiaa na rucuanejotajara pueya niquiara, pueya shootianura nojori. Nojoriiri paniquiaa pueya saruhatanura nojori juhua tojishano pueya, nojori rucuanajosacari tiaca jiuujiajinia curotasano cajitiucuajinia. Nojoriiri socua panishano cajitiucuajinia cajiniu maniniucuaquiaa Pueyaso Secojoua tiajinia, tamasaca tiajiniajuhuj, nojori jaara masuusaare queranacunura. ⁴⁷ Naajuhuj, nojoriiri mashiquiopue tiaca masequiaa secaja cumaneecata nojori sapojonuta. Naa jiyasohuaja nojori miiniu nuhuajitij, pueya niquiara, nojoriiri najuhwana tucayocua secojoquiaa Pueyaso, pueya jiyaniuria nojori maninia pueya cutara. Naa nojori miiniuucuatej, nojoriiri jiyanoahua saniitiosano quiniutianiya.

21

Casamiiju mashiquio niquitiosacari na cumanee juurane Pueyasora (Mr 12.41-44)

¹ Pueyaso Secojoua tiajinia, Jesuuri casamiriaca pueya shootiariquiaa na cumaneeca niojiyano cumaneeca racataja quiquiojinia, nojori niq-uitiosano Pueyasora. ² Jesuuri tamonu casamiiju mashiquio niquiriijihua caapiqui cumaneeniyojua niaano tiijihuaaj. Na niasanoori nareja cobrejiniji shipinishano cumaneeca quiquiaari. ³ Jesuuri na pueya sequere:

—Seetanujuanaa nia sequeyanijia, cuno casamiiju mashiquioori socua queraatia niqutioree Pueyaso, cuno casamiriaca pueyajiniji. ⁴ Puetunu cuno pojorijianaari saaja na cureeno cumaneecajiniji niquti-otijia puetunu nojori panishanojuanaa nojori masejonu nuhuaji. Cuno mashiquio cutaraari puetunu na miaajaara na masetajara cumaneecajanaa niqutioree.

Jesu pohuatasacari, Pueyaso Secojoua tia niyartasaanutaniya (Mt 24.1-2; Mr 13.1-2)

⁵ Noojiaqueya tii quiniaa pueyari pocoojoriquiaa Pueyaso Secojoua tiajiniji. Jiyanoehua shanohua saitia shipinishano quiriquiaari. Nojoriiri na shootiariquiaa, naajuhuaaj taa na maniniushitishaaquiaari nareja pueya niqutiotosano casamitiani. Jesuuri nojori sequere:

⁶ —Puetunu cunojuanaa niaa na niquiyani, tamacari niyartasaanutaniyari. Majaari quenaaja tamonu saajia cureenu quiniutianiya tamonu caco maano. Puetunu niyartasaanutaniyajanaari.

Taa nio jiya puequenu panishacari quiniutianiyan
(Mt 24.3-28; Mr 13.3-23)

⁷ Na pueyari Jesu nequesotaquiaari:

—Niishitiojonanaa, ¿taacari nio tia niyartasaanutaniyarini? ¿Casaa canaa niqiniutianiyanini, canaa niishiniuria quia sequesanoori quera tohuateya?

⁸ Jesuuri nojori riuquaree:

—Tama nia cuaqueyajaaja nia cojuare niaa mariqui sapojosaareeri. Queraatia sapojonuujuaca pueyari supuenutaniya. Nojoriiri sequenutaniya: “¡Janiya Cristoni, Pueyaso Jiyarosano! ¡Nio jiya quera puequeya!” Niaa jaara naa sequesaretej, majaari nia tojinu cuno sapojonuujuaca. ⁹ Naajuhuaaj, majaari nia puerenu niaa jaara tojiri tamonu jiyajinijinio pueyari tamasa jiyacajiniji pueyata miaquetoojiya, naajuhuaaj, pueya jaara juaatioquiaa tama nojori jiyaniijia nojori jatanurajaaja. Naa quiniutianiyanini coteenu. Naajaa, juhuanouaja maja nio jiya puequesacari.

¹⁰ Jesuuri naa nojori pohuatariquiaa socua:

—Tamonu rupaa pocuajacaari miaquetoohonutaniya tamaatia rupaa pocuajacata. Naajuhuaaj, tamonu jiyajinijinio jiyaniijaari miaquetoohonutaniya tamonu jiyajinijinio narta jiyaniijata. Naa queraatia miaquetoohonuuri quiniutianiya. ¹¹ Rijiaari jiyanoehua jiuuquuij-utianutaniya queraatia jiyacajinia. Jiyanoehua miaajenuuri quiniutianiya queraatia tamonu jiyacajiniajuhuaj. Paaqueja cusonuuri quiniutianiya niya, tamaquicuajuhuaaj. Naajuhuaaj, jiyanoehua puereeta casaari niqishaanutaniya jiyocuaanu, mijiria quiniaa niishiniuria jiya puequenuraari tari catecanoya.

12 'Cuno puereeta quiyaquishacaríjia, níari quíosaanutaníya naquíya nía míishaanúra, cua pueya nía quíniuucua. Níari jaatucusaanutaníya Pueyaso secojonuujua tíajíniaqueya nequesoreesoríquiano. Níari nujuatejojuacajínia nujuatejosaanutaníya. Níari nía pueya camarucuaacua, mariyata jíyaca jíyanííjianucuaacua jaatucusaanutaníya nequesoreesoríquiano. Níari naa míishaanutaníya nía pohuatanuucua jíyaníjíníjí pueya níquíara. 13 Naacujítíj, nía naata cuno jíyanííjianucua níquíara pohuatanu jíyaníjíníjí. 14 Níoojíaca nía cajítírí, mája júhuacaríjia nía níishíríojónúra taa nía ríucuanutaníya nojóríní. 15 Jáníyacuajáari jíyacari nía níishítíojónutaníyaní taa nía ríucuanutaníyanój, mariyata casaa nía pohuatanutaníya jíyanohua cua níishítíajataní. Níari nojórí sanaajanutaníya manínia nía ríuhuanesacari saaja. Nía paraari mája na naata nía sequesano rerequetenu quíniútíaníya. 16 Jíyacaríjíuhuaaj, tama nía queyajaríjia nía tacartanutaníya, cua pueya nía quíniuucua. Nía tapueyocuaacari nía tacartanutaníyajúhuaj, nía jíyasooacuajínío supueno pueyajúhuaj, nía rupuenaanío. Nojóríírí noojíaqueya níajáníyajíníjínío pucoonutaníya. 17 Puetunu míjíría quíníaa pueyájanaari nía níquíniu paníyaquíniútíaníya cua pueya nía quíshacari. 18 Naajaa, májaari nía puerenu. Májaari quenaaja níquíríyatú muesu shaajenu quíniútíaníya nía nacajíníjí, Pueyaso jaara paníyaquíri. Pueyaso jaara naa nía muesu cojuaacuaa, ¿maatucua casaara cojuaaquíri saníya níajáníyaní? 19 Naaratej, rejeretajaca nía quíri. Níaa cutaraari shacantuuca quíjíacara jataníshaanutaníya pueyaracaanu nía ríshíníuría, níaa jaara cumaatía nujuatare pueya míishacari sesa níajáníya.

20 'Níocua níishírí Jerusalén tíaca tarí níyartasaanutaníya, níaa jaara na paraa níquíri puetunu na shocuaqueyájanaa maano. 21 Jíyacarítíj, canapúete Judea jíyajínia quíyaní, cuno pojórí cuaara máshíría tuhuananuhuacua. Canapúete Jerusalén tíacajínia quíyaní, nojórí cuaara rítía máshíría tíjí. Canapúete na cuhuaríquíajínia quíyaní, nojórí cuaara tacateyaquíuhuaa Jerusalén tíacajíníohua. 22 Cuno quíshacari, jíyanohua saníítíosacaríírí quíniútíaníya. Jíyacarítíj, puetunu Pueyaso Rupaajínia naajíotasanojuanaari tohuateenutaníya. 23 Jíyanohua taraatía quíniútíaníyaní noo maajípohuara, canapúete manajaatohua quíya jíyacaríní, mariyata canapúete conaaja supueja jíítíaaaní. Jíyanohua naquíya quíniútíaníyaní cuno quíshacari níoo jíyajínia. Níoo jíya pueyarí jíyanohua saníítíosaanutaníya. 24 Noojíaqueya nojóríjíníjínííoorí pucoosaanutaníya tahuu míaquetoosacari nojórítía. Tamasaca nojóríjíníjínííoorí quíosaanutaníya. Nojóríírí puetunu jíyacajínííara-janaa ríjíosaanutaníya poonítíjíosocoríquiano. Taucuacari Jerusalén tíaca jíítíanutaníya tama nojóríírajaaja, Jerusalén tíaca nojórí jíítíanu cuaara puequerejaatíjía, taa Pueyaso sequequíaaari tamajacuajáni.

Taa na quíniútíaníyaní Jesu tacatesacaríuhua

(Mt 24.29-35, 42-44; Mr 13.24-37)

25 'Míjíría quíníaa níishíníuría jíya quera puequeya, nojóríírí puereeta casaa níquíniútíaníya pananujínia, racajínia, ríyajíníajúhuaj. Shoníníacu camíníaaacuají shíríquíítíuníútíaníyaaaríuhuaaj, jíyanohua na queyocuasacari. Nojóríírí cushítíuníútíaníya na pueretunatájuhuaaj, jíyanohua cojuata shoníníacu camíníaa cajíníuucuasacari. 26 Míjíría

quiniaari cusojonuunutaniya na puerenuta, nojori niishiriojosacari taa nio jiya miishaanutaniyani. Puetunu jiya cajiniocua Pueyaso shipinishano casaajanaari jiuuquiutiasaanutaniya jiyanhua. ²⁷ Jiyacaritij, mijiria quiniaari cua niqutiuniutianiya cohuaja najacajinia niyano, jiyanhua shacantuuca cua cumaacata. ²⁸ Naaratej, niaa jaara nio cua pohuatasano niquiri tari coteyano, niocua tama cumaquutioorejaaja. ¡Niocua timiri! ¡Niaacuajaari quera rijiosaanutaniya niiquiji, pueyara-caanu cuata nia quiniuria!

²⁹ Jesuuri nojori pohuataree nio miriqui pohuatasanojuhuaj:

—Higo naana nia niquiri, tamonu jaranacujua naanano. ³⁰ Na jaamasucua jaara mueratuure, niaari niishiya, tacareejonuqui quera quiniutianiya. ³¹ Naajuhuj, niaa jaara puetunu cua pohuatasanojuanaa niquiri tari tohuateyano, niocua jiyacari niishiri, janiyari quera tiuquihuani, Jiyaniijajanaa cua quiniuria.

³² 'Seetanujanaa nia sequeyanijia, puetunu cua sequesanojuanaari tohuateenutaniya Pueyaso tojitiaashijiaca pueya puequeyaquishacarijia. ³³ Jiya cajiniocua, mariyata nio jiyari shaajenutaniya. Cua sequesanoori saniniujia puetunu tohuateenutaniyajanaa cutara, taa cua sequeyacujani.

³⁴ "Tama nia cuaqueyajaaja nia cojuare niaa mariqui cua tojiyashijiacara quiriohuari. Naaratej, majaari shuquiriaatia nia quiniu paniniu juucua nia queranacunuunuta, nia mashaasequejonuta, mijiria casaacua nia niishiriojonutano. Maja naa nia quiniu, janiya mariqui nia cariyatureeri, jeenucuasoo nia quishacari, canashiyaquiji cua tiuquishacariuhua. ³⁵ Cua tiuquishacariuhua, juhua norijiotaja quiniutianiyari puetunu mijiria quiniaa pueyarajanaa, taa norijiotaja canashiyaquiji majaacuaani. ³⁶ Cunora, cucuaji jeenucuasano nia quiri juhuacarijia. Pueyaso nia secojore pueyaracaanu, maja naquiya nia miishaanura cuno taraatia quishacari, taa cua sequeyacujani, mariyata juhuajaniya nia nujuatunura cua tacoji, cua nequesoreesacari puetunu pueyajanaa.

³⁷ Jesuuri puetunu juucajanaa niishitiojojua Pueyaso Secojojua tiajinia. Saniniujia, niucua quiojojuaari Olivo cuhuariquia tuhuananujinia tii na quiniuria. ³⁸ Puetunu pueyajanaari tariquicuaji quiojojua Pueyaso Secojojua tiajinia, nojori tojiniuria Jesu pohuatasano.

22

Judiocuaa camarucua roojotoosacari Jesu nojori quianura
(Mt 26.1-5, 14-16; Mr 14.1-2, 10-11; Jn 11.45-53)

¹ Quera Pascuara queranacunuusacari quiquiaari, pueya miaquesacari pan na poreetajaaju shipinishano. ² Jiyacari, pueyacuara secjonaa jiyaniijianucua, mariyata Moisés Rootasanojiniji niishitiojonaari roojotooriquiaa juucua taa nojori motunutaniya Jesuni, nojori juaatiyaquiniutia pueya. Nojoriiri narta pueya pueretujuaca, jiyanhua queraatia pueya paniniucua Jesu.

³ Jiyacaritij, Satanásri Jesu pueyano Judas Iscariote jiuujiajinia tiuquiquiaari. ⁴ Nojuajaari pueyacuara secjonaa jiyaniijianucuaacua quiaquiaari, Pueyaso Secojojua tia cojuanaa jiyaniijianucuaacujuhuj. Judasri cuno pojoritia pocoojoquiaari. Nojori sequereeri nojuaja na naata nojori quietenu Jesu. ⁵ Nojoriiri shuquiririi. Cunora, Judas

sequetureeri taa cumaneeca nojori niqutionutaniya nojuajani. ⁶ Judasri jaarajaaja nojori sequesano tojirii. Jiyacaritij, Judasri juhuacatecara niishiriojoquiaari taa na quiatenutaniya Jesu jiyasohuajani.

Jesu miaquesacari na nuhuajiria na pueyata

(Mt 26.17-29; Mr 14.12-25; Jn 13.21-30; 1 Co 11.23-26)

⁷ Poreetajaaju pan miaquenu juucaari tari quiquiaari. Cuno juucajuhuj, borregoori mosano quijia, Pueyaso niqiuara miaquesocoriquiano Pascuara queranacusacari. ⁸ Cunora, Jesuuri Pedro jiyaroree Juannio, nojori miaquesocoriquiano nojori majeetenura. Nojori sequereeri:

—Nia quiaare. Borrego nia majeeteseecuaa pocuaji, pa miaquesocoriquiano quiarijia Pascuara.

⁹ Nojoriiri na nequesotaree:

—¿Tee quia paniya canaa majeetenurani?

¹⁰ Jesuuri nojori riucuaare:

—Niaa jaara Jerusalén tiacajinia tiuquishii, niaari tamonu pueyano riuriatanutaniya mohuaca taquitiaano patacojinia. Niocua na nuhuaji rupaamia na tiajinia. ¹¹ Cuno tiajinia na tiuquishacari, niocua cuno tia camaru sequeese: “Canaa niishitiojona naa quia sequeya: ‘¿Teete sohuacani, cua pueyata cua miaquejara quiarijia Pascua niucuan?’ ” ¹² Nojuajaari nia niquitiniutianiya puereetuca sohuaca, nataco na tiajinia, tariucua jeenucuasano. Niocua cuniqui miishii puetunujuanaa pa miaquesocoriquiano.

¹³ Jesu pueyari quiaare. Nojoriiri puetunujuanaa riuriataquiaari taa Jesu sequequiaari nojoricuajani. Nojoriiri tii miishii puetunujuanaa, Pascua niucua nojori miaquesocoriquiano.

¹⁴ Jaara tari quiquiaari Pascuara miaquesacari niucua, Jesuuri na saquiriojosano pueyata cajitiushii miaquejajinia. ¹⁵ Jesuuri nojori sequereeri:

—Janiyari jiyanohua niaata miaquenu paniriquiaa nio Pascua niucuan, pueya moyaquishacarijia janiya. ¹⁶ Seetanujuanaa nia sequeyanijia, majaari socua cua miaquenu quiniutianiya Pascuara, janiya jaara tiuquiriohuajaatijia puetunu Pueyaso muerasuranotajanaa. Jiyacari cutara, paari jatiqui miaquenutaniyani, Jiyaniijajanaa cua quishacari.

¹⁷ Na nuhuaji, Jesuuri ratujua pataree. Pueyaso sequereeri:

—Paacarasho nio mashacara.

Na pueya sequereeri:

—Jajaa, nio nia masetare. Nia rature puetunu niajanijajanaa. ¹⁸ Seetanujuanaa nia sequeyanijia, majaari socua cua ratunu quiniutianiya uva caacajiniji, janiya jaara tiuquiriohuajaatijia, Jiyaniijajanaa cua quiniuria puetunu Pueyaso muerasurajanaa.

¹⁹ Na nuhuaji, Jesuuri pan ririi. Pueyaso secojoree nocuaraari. Na necasereeri. Na pueya na niqutiojoreeri. Nojori sequereeri:

—Nioori cua cuaqueya niaacuara mosocoriquiano. Niocua naa miriquia pueyaracaanutej, nia niishiriojonura janiya.

²⁰ Nojori miaquenu nuhuaji, Jesuuri ratujua patareejuhuj. Naa sequereeri:

—Cua nanacaari niaacuara shoonutaniya nia jiyanooshaanura seetanujuanaa. Majaari socua seya nanaca panishaanu quiniutianiya. Quiarijiani, saaja cua nanaca shoonuucua, Pueyasoori pueya jiyanooniutianiya.

²¹ 'Cua tojitiare. Quiarijiani, cante cua tacartanutaniya pueya na motenura janiyani, nojuajaari cuata miaqueya. ²² Janiyari naa miishaanutaniyani taa janiyajiniiji juhuacarijia pohuatasaaquiaaricujani tariucuaaanu Pueyaso Rupaajinia. Saniniuujia, cua tacartanaari jiyanoohua taraatia quiniutianiya naa na miiniuucua janiya.

²³ Jesu pueyari jiyacari juhuacatecara nequesoreetoooree tama nojorijiaaja:

—¿Canteeri na tacartanutaniyani?

Cante seetanujuanaa jiyaniijijajanaani

²⁴ Jesu pueyari tama juayonuutariquiaajaacujua, teyano nojorijinijiniote jiyaniijijajanaani. ²⁵ Jesuuri nojori sequereee saaja:

—Mijiria, jiya jiyaniijianucuaari jiyanoohua jiyaramiquiniu niishijia nojori jiiitasano pueya, juhua nojori poonitijosano pueya. Nojoriri tama nojorijinijijiaaja sequeja: “Canaari maninia miiquiaa canaa pueyani”. ²⁶ Niajaniya saniniuujia, majaari naa nia quiniu juhua nojorijia. Cante socua tojishano pueyano quiya niajaniyajiniinioni, nojuaja cuaara tama na cuaqueyajaaja jiyateyaquiiria na cumaaca paaretaja pueyacua. Cuaara quiiria jacaria pocujaja. Naajuhuj, cante jiyaniijijajanaa quiya niajaniyajiniinioni, nojuaja cuaara jiyateera tama na cuaqueyajaaja juhua nia serura. ²⁷ ¿Taa nia sequeyani? ¿Cante jiyaniijijajanaani? ¿Miaqueyano pueyanotee? ¿Na mianuutena soj? ¡Miaqueyano pueyanocujaja! Naajaa, janiyari juhua nia seru quiquiaa niaarani, maninia cua miiniuria niajaniya. Naajuhuj, naa maninia miijiaa nia qiriqia.

²⁸ 'Niaacuajaari pueyaracaanu cua cojiriquiaa janiya jaara saniniujiushaariquiaani. ²⁹ Naaratej, janiyari nia jiyatenutaniya jiyaniijianucua nia quiniuriani, taa cua Que jiyatequiaari janiyacuaani, Jiyaniijia cua quiniuria. ³⁰ Naacujitij, niaari cua miaquejajinia cajituniutianiya cuata nia miaquejonura, cuata nia raruujunurajuhuj, Jiyaniijijajanaa cua quishacari. Niaari mariyata jiyaniijianucua quiniutianiya, supuetana Israel doce niquiohuacuajinio supueno pueyapue nequesoreena nia quiniuria.

Jesu sequesacari Pedro, nojuaja nocuaji seetanutaniya
(Mt 26.31-35; Mr 14.27-31; Jn 13.36-38)

³¹ Jiyaniijia Jesuuri Pedro sequequiaari:

—Simónnaa, cua tojiri. Satanásri niaacuara sequerucuaa Pueyaso, jiyanoohua na saniniujiuniuria niajaniya. Naacujitij, niaari jiyanoohua saniniujiushaanutaniya, naatej, taa trigo quejooshiya jiyocuaaanucuaani, paratu panura na cocua. ³² Janiyari saniniuujia Pueyaso secjoree quocuara cutarani Simónnaa, cucua tiuuniu quia tarinitiaaquiniuucujaji. Naacujitij, quiaa jaara quioojia tacatorohua cucua, quiocua quiarta pueya cumaquiriohuajuhuj, nojori tiuuniuria seetanujuanaa pueyaracaanu cucua.

³³ Simónri Jesu sequereee:

—¡Cua Jiyaniijanaa, quiaa jaara nujuatejojuajinia nujuatesaare, janiya cuaara nujuatesaaria quiatajuhuaj! ¡Quiaa jaara mosaare, naajaa, janiya cuaara cojiritiasaaria quiajaniyajuhuaaj!

³⁴ Jesuuri na sequeree:

—Pedronaa, seetanujuanaa quia sequeyanijia, caacaraja niunijiaquishacarijia quiarijia, quiaari tari naa cucuaji seetanu caminiujiuniutianiya pueya niquiara: “¡Maja cua niishiniu Jesu!”

Quera Jesu miishacari taraatia

³⁵ Jesuuri na pueya nequesotaree:

—Janiya jaara nia jiyaramiquiquiaari Pueyaso rupaa nia pahuatana caashoqueejuni, cumaneeca quiquioju, sapatuujunio, ¿niaateeri nia panishano casaa niqutioyaquishaaquiaari?

Nojoriiri Jesu riucuaaree:

—Maja. Canaacuajaari puetunu canaa panishanojuanaa niqutiojosaaquiaarini.

³⁶ Jesuuri nojori sequeree:

—Quiarijia saniniuujia, cante caashoqueracani, cuaara na pataara. Cante cumaneeca quiquioracani, cuaara na pataarajuhuaaj. Cante nijiniaquetucuaja mueruu jitiiaquiyani, cuno cuaara niqutioora na shiniquiaacuaji toque, nijiniaquetucuaja mueruu na masenura na toque samitia. ³⁷ Seetanujuanaa nia sequeyanijia, tariucuacaanu Pueyaso Rupaaajinia janiyajiniji naajiotasanoori tohuateenutaniya. Janiyajiniji naajiotasanoori naa sequeyatej: “Nojuajaari jiyanishaaree sesa miijia, sesa miijiacata na teetesacari”. Puetunu janiyajiniji naajiotasanojuanaari tari tohuateya taa na naajiotasaaquiaaricujani.

³⁸ Nojoriiri Jesu sequeree:

—Jiyaniijanaa, niya quiya caapiqui nijiniaquetucuaja mueruu.

Nojori riucuaareeri:

—Tariucuaja.

Jesu secojosacari Pueyaso, Getsemani cuhuariquiajia

(Mt 26.36-46; Mr 14.32-42)

³⁹ Na nuhuaji, Jesuuri tohuataquiaari tiajiniji. Olivo cuhuariquia tuhuananujiniara quiaareeri. Nojuajaari cuniqui quianura jitiquiaari. Na saquiriojosano pueyari na nuhuajiyaree. ⁴⁰ Na tiuquishacari tii, Jesuuri nojori sequeree:

—Pueyaso nia secojore, niaa mariqui sesa miiriiri niaa jaara saniniu-jiushaare.

⁴¹ Na nuhuaji, Jesuuri tamajaaja quiaaree socua nojori tacoji, juhua saajia tishaqui, pueyano jasacari. Tii mojuquetasee Pueyaso secojonu-raari. ⁴² Naa secojoreeri:

—¡Cua Quena, maja cua miiniu paniniu naquiya! Naajaa, janiya cuaara miyaquishaaria taa cua paniyani. Janiya cuaara miishaaria cutara taa quia paniyacuajani.

⁴³ Jiyacaritij, Pueyaso seruuri jiyocuacaanuji nocua nimiaa na cumaquiniuria. ⁴⁴ Jesuuri jiyanhua naquiya miiriquiaa. Noojiaari quera jiaqueriquiaa na tacaaniutia. ¡Jiyanhua, jiyanhua secojoriquiaa Pueyasoori! Cunora, na paneyacaari puereetujuaaca juhua nanaca quiriquiaa, na caatesacari jiyocua. ⁴⁵ Na secojonu nuhuaji, Jesuuri sanerohua. Na pueyacia tacateyarohuari. Nojori niquishuhua

maquetiuyano saajaari, puera nojori taraajenuucua. ⁴⁶ Jesuuri nojori sequere:

—¿Casaara nia maquetiuyani? Nia saneecuatere. Pueyaso nia secojore na cojuanura nijaniya, maja sesa nia miiniuria niaa jaara saniniujushaare.

Judiocuaca camarucua quiasacari Jesu

(Mt 26.47-56; Mr 14.43-50; Jn 18.2-11)

⁴⁷ Jesu pocusacarijia na pueyata, queraatia pueyari jiyacari nocua tiuquishii. Judasri cuno pojori puetariquiaa. Nojuajaari Jesu doce saquiriojosano pueyajinijinio quiquiaari. Judasri Jesuucua nimiaajanaa. Na saruhuataseeri na nujuunuta. ⁴⁸ Jesuuri na sequere:

—Judasnaa, ¿quiaate tama cua tacartaajaaja, quia nujuunuta sapojonu janiya?

⁴⁹ Jesu pueya niquishacari casaa cuno pueya miiniu paniriquiaani, nojoriiri Jesu nequesotaree:

—Jiyaniijianaa, ¿canaate nojori miaqueyani?

⁵⁰ Tamonu nojorijinijiniori pueyacuara secojonaa jiyaniijia seru pirii na mueruuta. Saaja na miaquetajara numoco jaatereeri. ⁵¹ Jesuuri na sequere:

—¡Tariucuaja! Maja naa miiniu.

Jesuuri numoco ririi. Na ruporohuari. ⁵² Judasta quiriquiaari pueyacuara secojonaa jiyaniijianucua, Pueyaso Secojoua tia cojuanaa jiyaniijianucujuhuaaj, Judiocuaca camarucuanio. Nojoriiri Jesuucua nijioquiaari na quianura. Jesuuri cuno pojori sequere:

—¿Casaara cucua nia nijioree nijiniaquetucuaja mueruutani, macacatanio nia quianura janiyani? ¿Janiyateeri nohuasejojuani, naa nia nijionura cucuatej? ⁵³ Pueyaracaanu cua quishacari niaata Pueyaso Secojoua tiajinia, majaari nia quianu quijia janiya. Naajaa, quiarijia cutaraari nijaniyara, nia panishano nia miiniuria janiya. Quiarijiani, Sesaacaari cumaacaraca na panishano na miiniuria.

Pedro seetasacari Jesujiniji

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Jiyacaritij, nojoriiri Jesu quiaree. Na jaatucutiuyareeri pueyacuara secojonaa jiyaniijia tiajinia. Pedroori tucuacaanuji na nuhuajiriquiaa. ⁵⁵ Jiyacaritij, pueyari jiyaniijia tia carijiniacuma mani noshitirii. Na shocua cajitiurihuari. Pedroori nojori tajinia cajishiijuhuaj. ⁵⁶ Cuno jiyaniijia serujinijinioni, niyacoori Pedro niquirii mani jitiuyano. Nojuajaari Pedro shootariquiaa. Na nuhuaji, niyacoori Pedro shishirii. Sequereeri:

—Noo pueyanoori cuno quiasano pueyanota quijiajuhuaj.

⁵⁷ Pedroori seetaree. Naa sequereeri:

—Niyacoona, ¡majaari quenaaja cua niishishano cuno pueyano!

⁵⁸ Na nuhuaji, tamonu pueyanoori Pedro niquiriijuhuaaj. Nojuajaari cuno jiyaniijia seru quiriquiaajuhuaaj. Pedro sequereeri:

—¡Quiaaqui cuno pojorijinijinio pueyanojuhuaaj!

Pedroori saa sequereejaa:

—¡Maja, pueyanonaa! ¡Janiya maja nojorijinijinioni!

⁵⁹ Pasaja na tarishiniu nuhuaji, tamonu pueyanoori sequenu pacterohua:

—Nio pueyanocuaajaari cuno pueyanota quijia. Nojuajaari Galilea jiyajiniujuhuj.

⁶⁰ Pedroori saa sequereejaa:

—¡Pueyanonaa, maja cua niishiniu quenaaja casaa quia sequeyani!

Pedro pocusacarijia, jiyaciritij, caacarajaari niunijioree. ⁶¹ Jiyaniijia Jesuuri tacatequee. Na nijiniara niquirii Pedroori. Pedroori jiyacari Jiyaniijia sequesano nojuaja niishiquii, naa na sequesanotej: “Quiaari tari seetanu caminiujiuniutianiya janiyajiniji pueya niquiara, caacaraja niunijiyaquishacarijia”. ⁶² Pedroori cuniquiji tohuataquee. Jiyanohua nujuquereeri na taraajenuta, sacuaaata na seetanuucua.

Pueya macaatishacari Jesu

(Mt 26.67-68; Mr 14.65)

⁶³ Jesu cojuanaa pueyari Jesu macaatiriquiaa. Nojoriiri na piquituriquiaa. ⁶⁴ Nojoriiri Jesu namijia morotuquiaari coteenu. Na jiquioco piquituriuhuari. Na nuhuaji, na sequetureeri:

—¡Quia niishiritioj! ¿Cante quia pirini?

⁶⁵ Nojoriiri socua queraatia sesa casaa sequeturiquiaa na macaatinuria Jesu.

Judiocuaca jiyaniijianucua nequesoreesacari Jesu

(Mt 26.59-66; Mr 14.55-64; Jn 18.19-24)

⁶⁶ Jaara juhuaquequiaari, Judiocuaca camarucuaari rerejoree pueyacuara secojonaa jiyaniijianucuaata, mariyata Moisés Rootasanojiniji niishitiojonaatajuhuj. Nojoriiri Jesu jiyataquiaari Judiocuaca jiyaniijianucua rerejosaquiria. Nojoriiri na nujuatesee jiyaniijianucua tajoji, nojori nequesoreenura tii nojuaja. Nojoriiri naa Jesu nequesoreeree:

⁶⁷ —Canaa quia sequere, ¿quiaate Cristo, Pueyaso Jiyarosano?

Jesuuri nojori riucuaaree:

—Janiya jaara nia sequerene: “Taaquiriirinij”, niaari saaja cua sequenutaniya: “Quiaa sapojiya”. ⁶⁸ Saniniuujia, janiya jaara nia nequesoreere Pueyaso Jiyarosanojinijini, majaari nia riucuanu quiniutianiya janiya. ⁶⁹ Naajaa, quiarijiani, janiyari puetunu cumaacaraca Quijiajanaa miaquetajara cajiniutianiya jiyocuacaanuni.

⁷⁰ Naa Jesu sequesaciritij, puetunu nojorijianaari na sequere:

—¿Quiaateeri tama sequeyajaaja quiaari Pueyaso Niyanu?

Jesuuri nojori riucuaaree:

—Taaquiriirinij. Naacuaaquiniatejaj, taa nia sequeyacuajani.

⁷¹ Nojoriiri tama sequetooreejaja:

—¿Paatucua casaara socua tamonu pueyano pajere nocuara tonujuriquianoni? Paacuaajaari tari tama pa numaatajaaja sesa na sequesano tojitiareeni.

23

Pilato nequesoreesacari Jesu

(Mt 27.1-2, 11-14; Mr 15.1-5; Jn 18.28-38)

¹ Cuno nuhuaji, puetunu nojorijianaari sanetaree. Jesu jiyatatiuyareeri jiyaniijia Pilatoocua. ² Cuniqui, nojoriiri juhuacatecara Jesuucuaa saquiriojotaree na sapojonuta. Pilato sequetureeri:

—Canaari nio pueyano niishiyani. Nojuajaari canaa Israel pueya najoquiaa pocuara. Nojuajaari niishitiojoquiaajuhuj, maja canaa Israel

pueya niqutiojonura canaa cumaneeca pa jiyaniijiajanaa Césarra, taa César sequequiaaricujani. Naajuhuj, tama nojuajaari naa sequequiaa: “Janiya Cristoni, Pueyaso Jiyarosano, nia jiyaniijia cua quiniuria”.

³ Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucaaree:

—Taaquiririni. Naacuj, taa quia sequereecujani.

⁴ Jiyacaritij, Pilatoori pueyacuara secojonaa jiyaniijianucua sequeree, pueya maanunio:

—Nio pueyano nequesoreeree tarinijia. Nojuajaari maja sesa miijia.

⁵ Nojoriiri saaja socua jiyacaterree Jesuucua tonujunu. Naa sequereeri:

—¡Nojuajaari puetunu canaa Judiocuacajanaa sesoya na niishitiojosanota! Nojuajaari Galilea jiyajinia niishitiojonu coteequiaari. Quiarjia, nia niishitiojiyajaariuhua Judea jiyajiniani.

Jiyaniijia Herodes nequesoreesacari Jesu

⁶ Pilato tojishacari naa nojori sequesantej, nojori nequesotareeri:

—¿Nio pueyanote Galilea jiyajinijinio?

⁷ Nojoriiri na riucaaree:

—Jaa.

Cunora, Pilatoori pueya jiyarotaree Jesu, Galilea jiya jiyaniijia Herodescua. Herodesri namitia tii Jerusalén tiacajinia quiriquiaa jiyacari. ⁸ Nojuajaari pueyaracaanu Jesu niquniuucua jiaatiaja juucua. Herodesri tari pohuatasaaquiaari Jesujiniji. Naaratej, Herodesri Jesu miishacari na cumacata niquniu panijia juucua. Naacujitij, na niquishacari Jesu, nojuajaari timirii. ⁹ Herodesri queraatia nequesoreeree Jesu. Majaari quenaaja Jesu riucaanu quiquiaari nojuaja. ¹⁰ Pueyacuara secojonaa jiyaniijianucuaari tii quiriquiaajuhuj, Moisés Rootasanojiniji niishitiojonaanio. Cuno pojoriiri jiyanhua Jesuucua saquiriojotariquiaa queraatia sesa casaa. ¹¹ Herodesri na soldadohuta Jesu rerequeteriquiaa. Na macatiriiri. Na cushitirii jiyanhua shanhua toqueeri juhua jiyaniijia cushishano. Na nuhuaji, Herodesri pueya jiyarotarohua Jesu Pilatoocua. ¹² Herodesri cuno juuca Pilato rupenara quiquiaari. Coteenu, majaari nojori niqutioonu paniniu quijia. Nojoriiri saaja shocotetoojua.

Puetunu pueyajanaa sequesacari Jesu cuaara mosaaria

(Mt 27.15-26; Mr 15.6-15; Jn 18.39-19.16)

¹³ Na nuhuaji, Pilatoori pueyacuara secojonaa jiyaniijianucua rerejotequiaari na tacoji, Judiocuaca camarucujuhuj, tii quiniaa pueyano. ¹⁴ Nojori sequereeri:

—Niaari nio pueyano jaatucuree cucua najuhanaj. Niaari cua sequereeri, nojuajaari niarta pueya nasojoquiaa. Janiyacuajaari na nequesoreeriquiaa nia niquiarani. Niaacuajaari cua tojitariquiaa cua nequesoreesacari nojuaja. Quiarjia niishiya cutaranijia, puetunu nocuara nia tonujusanojuanaari maja seetanujuanaa. ¹⁵ Jiyaniijia Herodesquiiri tari niishiyajuhuj, majaari seetanujuanaa nocuara nia saquiriojotasano. Cunora, Herodesri pocua na jiyarorohua. Seetanujuanaa, majaari sesa na miiniu quiquianu na mosanura. ¹⁶ Janiyari na majacutenutaniya narejani, cartesaarohuari.

17 Pascua juucara queranacusacari, Pilatoori nujuatesano pueyano cartenu jiitiquiaari nujuatejojuajiniji. Nojuajaari naa miiquiaari pueyaracaanutej, pueya na shuquiritiniuria. 18 Jiyacaritij, puetunu pueyajanaari juhuacatecara jiyanoohua nacaree jatiqiu:

—¡Jesu quia more! ¡Barrabás quia cartere saniniuujia!

19 Tariija cuno Barrabásri narta nasojosano Judiocuacata Romano pueya taanuquuaari juucua Jerusalén tiacajiniji. Nojuajaari jiyacari pueyano moquiaarijuhuaj. Cunora, nojuajaari nujuatejojuajinia nujuatesano quiriquiaa. 20 Pilatoori Jesu cartenu panijia juucua. Naaratej, Pilatoori pueyata pocoojorohua socua. 21 Pueyari saaja jiyacaterere jiyanoohua nacoonura jatiqiu:

—¡Cuaara mosaaria niyacutesanojinia teetesano! ¡Cuaara mosaaria!

22 Pilatoori pueya sequenu pacuterohuacuahuaj:

—¿Maatucua casaara mosaarejaarani? ¿Sesa miiriitijiaaraj? Janiyacuajaari tari na nequesoreereeni. Majaari sesa na miiniu quirii na mosaanura. Janiyari na majacutenutaniya narejani. Na nuhuaji cartesaarohuari.

23 Pueyari saaja socua jiyanoohua nacooree niyacutesanojinia na mosaanura. Pueyacuara secojonaa jiyaniijianucuaari mariyata pueyata jiyanoohua nacooriguiaa. Puera jiyanoohua nojori nacoosacari, nojoriiri Pilato shocotaree. Cunora, Pilatoori maja na naata cartenu quirii Jesu, taa na paniriquiaacuajani. 24 Naaratej, Pilatoori socua tariniriohua. Pueya panishano miiriiri. 25 Pueya sequesano pueyano cartereeri, cante nujuatesaaquiaari nujuatejojuajiniacuajani na taanuunu paniniuucua Romano pueya, na monuucua pueyanohuhaj. Na nuhuaji, Pilatoori Jesu tarinitiaree socua, nojori mosocoriguiano, taa nojori paniriquiaacuajani.

Niyacutesanojinia Jesu teetesacari

(Mt 27.32-44; Mr 15.21-32; Jn 19.17-27)

26 Pueya jiyatasacari Jesu puecoosaquiria, nojoriiri tamonu pueyano quiaree Jerusalén tiacajiniara riujiuyano juucua. Nojuajaari Cirene jiyajinijinio pueyano quiquiaari. Na sesa quiquiaari Simón. Nojuajaari niyacutesano patesaaree Jesu nuhuaji.

27 Queraatia pueyari Jesu nuhuajiriquiaa, queraatia maajipohuanio. Maajipohuari Jesuucua nujuqueturiquiaa, na nuhuaji nojori sacuasacari. Nocua sapiyonuuriquiaari, nocua nojori taraajenuta. 28 Jiyacaritij, Jesuuri cuno maajipohuacua tacateree. Nojori sequereeri:

—Jerusalén tiacajiniji maajipohuanaa, maja cucua nujuquetunu. Tama niaacuajaaja nia nujuquette, nia niquiohuacuano. 29 Na nuhuaji, jiyanoohua taraatia quishacariiri quiniutianiya niaara, jiyanoohua taraatia. Jiyacaritij, pueyari sequenutaniya: “Socua shuquiriaatia quiijaca cutaraari noo maajipohua cante muetuyashijiani, cante manajeyashijianucuni, mariyata cante mueya supueteyashijianucujaniuhaj”. Mueyaraca maajipohuari jiyacari jiyanoohua taraajenutaniya, nojori niquishacari necohua miishacari naquiya. 30 Naquiya miishacari, jiyacaritij, pueyari tuhananuhua sequenutaniya: “¡Canaacua quia jiyaretaare!” Naajuhaj, shiitianiyojua tuhananuhua sequenutaniya: “¡Canaacua nia tiyare canaa nia jamonura!” 31 Jiyacariiri jiyanoohua naquiya miishacari quiniutianiya.

Quiarijia, janiya jaara naa naquiya miishiyacuaani, ¿taaquitijia Pueyaso tojitiaashijiaca miishaanutaniyatejaj?

³² Caapiqui sesa miijiacaari jaatucunuusaariquiaajuhuj, mariyata teetejosocoriquiano Jesuta. ³³ Nojoriiri puecoosaqui tiuquiiijiosee. Cuniqiu pueya puecoosaquini, na sesa quiquiaari “Pueyano Nacaco”. Nojoriiri tii Jesu teeteree maca niyacutesanojinia. Cuno caapiqui sesa miijiacaari teetejosaareejuhuj, niquiriyatu na miaquetajara, tamonu na muenecara. ³⁴ Jesu jaara tari pijiosaariquiaa maca niyacutesanoocua, nojuajaari na Que Pueyaso sequeree:

—¡Cua Quenaa, quia jiyanoori nio pojori! Majaari nojori niishiniu casaa na miitiuyani.

Na nuhuaji, soldadohuari saitia tacuarishijioree, nojori niishiniuria taa nojori seraatianutaniya Jesu toqueni. ³⁵ Pueyari Jesu shootiariquiaa. Judiocuaca jiyaniijianucuaari jaarajaaja Jesujiniji naa tama seque-tooriquiaajaaja:

—Nojuajaari saaja tamonu pueya naatanijiojua. Quiarijia, nojuaja jaara seetanujuanaa Pueyaso Jiyarosano Cristo quiri, cuara roseera niyacutesanojiniji pa niquiara.

³⁶ Soldadohuari Jesu macaatiriquiaajuhuj. Nojoriiri Jesu raateree piiquia vino juucua. ³⁷ Jesu sequetureeri:

—Quiaa jaara Judiocuaca jiyaniijia quiri, ¡niyacutesanojiniji quia roserecuarajaj!

³⁸ Jesu nacaacuma, suruhuatuneeri rupotasaquiaari naajiosano Griego rupaajinia, Romano pueya rupaajinia, Hebreo rupaajinianio. Tii naajiotasano quiriquiaari naa nocuara pueya saquiriojotasano: “Nio pueyanoori Judiocuaca jiyaniijia”.

³⁹ Tamonu cuno sesa miijiacajininio Jesu shuriucua teetesano quiriquiaani, nojuajaari Jesu rerequeteriquiaajuhuj. Naa Jesu sequeriquiaari:

—Quiaa jaara Pueyaso jiyarosano Cristo quiri, tama quia roserejaaja cuniquiji. ¡Canaa quia roshiniijorejuhuj!

⁴⁰ Narta sesa miijiaari na juaarii:

—¿Quiaateeri Pueyaso puereyashijia? Quiaari mosaanutaniyajuhuj. ⁴¹ Pajaniya cutaraari sesa pa miiniucua naquiya miishiyani. Paacua-jaari maninia saniitioshiyani sesa pa miiniucua. Saniniuujia, nio pueyano pa tajinia nujuataani, ¡nojuajaari sesa miyashijia cutara!

⁴² Na nuhuaji, narta sesa miijia juaaniaari Jesu sequeree:

—Jesunaa, majaari cua niyajetanuuja, Pueyaso jaara quia jiyatere Jiyaniijiajanaa quia quiniuria.

⁴³ Jesuuri na riucuaaree:

—Seetanujuanaa quia sequeyanijia, quiarijiani, nio juucaja, quiaari cuata quiniutianiya shuquiriaatia quishaqui cutara.

Jesu cusosacari

(Mt 27.45-56; Mr 15.33-41; Jn 19.28-30)

⁴⁴ Panacari, jiyari ninishiquiria quiquiaari puetunujuanaa, juhua niucua! Pananu piriushacari, cuhuatemohuari. ⁴⁵ Jiya quishacarijia ninishiqui, jiyacaritij, Jerusalén tiacajinia Pueyaso Secojoja tajinia, jiyanohua shiquiiquia toquejiniji sohuacaari noojiaacoji sutequiaari puetunujuanaa querajaquera! ⁴⁶ Jiyacarijuhuj, Jesuuri nacaree:

—¡Cua Quenaa, cua sohuanu quia cojuare!

Naa na sequenu nuhuajitij, Jesuuri cusoquee.

⁴⁷ Romano soldadohua jiyaniijia niquishacari puetunu niojuanaa, nojuajaari maninia sequeree:

—¡Seetanujuanaa, nio pueyanoqui sesa miyashijia quiquianu!

Naa na sequesanoori Pueyaso shuquiritirii.

⁴⁸ Puetunu pueyajanaa, canapuate Jesu shootiariquiaa cusoyanoni, nojoriiri taraatia na tiajina quiojoquiaariuhua. Nojoriiri tama na jiriquiajaaja piquiniuuquiaariuhua, jiyanohua nojori tacaaniutia naa nojori monuucua Jesu. ⁴⁹ Saniniuujia, puetunu Jesu niishishano pueyajanaari tii jiyojetarohuajaa, maajipohuajuhua, canapuate Jesu nuhuajiquiaari Galilea jiyajiniicuaajani. Puetunu nojorijianaari tucuaaanuji niquitiariquiaa Jesu.

Jesu quete niasacari raaco

(Mt 27.57-61; Mr 15.42-47; Jn 19.38-42)

⁵⁰ Tamonu maninia pueyanoori quiquiaari. Nojuajaari Pueyaso tojjia pueyano quiquiaari Arimatea tiacajinijinio. Cuno tiacaari Judea jiyajiniajuhuaj. Cuno pueyano sesa quiquiaari José. Nojuajaari Judiocuaca jiyaniijianucuaajinijinio quiquiaari. ⁵¹ Cuno Joseeri Pueyasooocua tiuujia quiquiaari. Nojuajaari pueyaracaanu sashijia, Pueyaso Jiyarosocoriquiano cuaara Jiyaniijiaara jiyatesaaria cutara. Cunora, majaari José paniniu quiquiaari cutara, narta jiyaniijianucua sequesacari Jesu cuaara mosaaria. ⁵² Naacujitij, Jesu cusosacari, Joseeri Pilatoocua quiaquiaari, Jesu quete na masenura. ⁵³ Na nuhuaji, Jesu quete roshinirii niyacutesanojinijiiri. Na jiunioceeri cohuajaque quenaruque toquejina. Jesu quete niaree tarijia na jiuutianishano saajiajinaari. Cuno raajinia, juhuanojuaja maja macu niasaanu quiquiaari. ⁵⁴ Cuno juucaari quiquiaari Judiocuaca jeenucuasacari juhuacarijia samaatenu juucaacuara. Nojori samaatenu juucaari quera coteeriquiaa tari. Judiocuacaara, pananu tiuquishacari, tamonu juucaari tari coteequiaari nojoriria.

⁵⁵ Cuno maajipohua, cante Jesuta nijioquiaari Galilea jiyajiniicuaajani, cuno pojoriiri José nuhuajiquiaari raajinara. Nojoriiri raaco niquishii, taa Jesu quete niasaareeni. ⁵⁶ Nojori riujuuushacariuhua na tiajiniohua, nojoriiri juhuataja shanohua jaanutaja cojitijosuhua, macuucua nojori niojosocoriquiano. Na nuhuaji, nojoriiri pootia quiriohua samaatenu juuca, taa Moisés rootaquiaaricuaajani.

24

Jesu samiitiasacariuhua

(Mt 28.1-10; Mr 16.1-8; Jn 20.1-10)

¹ Coteenu semaana juucajinia, cuno maajipohuari tariquicuaji raajinara quiaquiaari. Nojori cojitijosano shanohua jaanutaja patootaareeri. ² Nojori tiuquijiosacari raajinia, saajiajiniji quejasano raa tiootiu niquitiushiiri tariucua tamocora shuquitishano. ³ Naaratej, nojoriiri raaco tiuquitiamaa. Shaaqui quiriquiaari Jiyaniijia Jesu quete. ⁴ Nojoriiri shiriiquirii. Majaari nojori niishiniu quiriquiaa taa nojori miiniutianiyani. Canashiyaquiji caapiqui pueyari nojori shuriucua nujuatuquee. Nojori toqueeri shacantuque quiriquiaa. ⁵ Maajipohuari na puerenuta jiyocuara naniquioree. Cuno canuuri nojori sequeree:

—¿Casaara nia pajeya saminio pueyano macu niojosaquini? ⁶ Maja tari niya na quiniu. ¡Tari samiitiarohuano! ¿Niaateeri tari niyaretaree na sequesano najaniya, Galilea jiyajinia na quishacarijia? ⁷ Nojuajaari tari nia sequedanucuaaja, nojuaja sesa miijiaca niquitiosaanutaniya. Nojoriiri na monutaniya niyacutesanojinia. Na nuhuaji, nojuajaari samiitianutaniuhua jiuujianaraca juucajinia.

⁸ Jiyacaritij, maajipohuari shusha niishiqui tarijia Jesu sequesano nojori. ⁹ Nojori tacatesacariuhua jamajiniji, nojoriiri Jesu once saquiriojosano pueya caminiujiushuhua puetunu niojuanaa, puetunu Jesuucua tiuunaa pueyajanaano. ¹⁰ Cuno maajipohua, Jesu saquiriojosano pueya pohuataquiaariuhua, nojoriiri nio maajipohua quiquiaari: María Magdalena, Juana, Santiago nucua Mariajuhuj, socua tamasa maajipohuano. ¹¹ Jesu once pueyara, maajipohua pohuatasanoori juhua paateca sequesano quiquiaari saaja. Nojoriiri saa cuaracashitirijiaa maajipohua pohuatanuusano.

¹² Naajaa, Pedroori tiajiniji netequiaari raajiniara. Raaco na cuuquesacari, saaja Jesu jiunocotaja cohuaque toque niquiquiaari maanoori. Pedroori juhua jiuujiaaju tacateyarohua na shiriiquiniutia, na niqishanojiniji, maajipohua pohuatasanojinijinio.

Jesu tojitianaa pueya niquishacari Jesu, nojori quiasacari Emaús tiacajiniara

(Mr 16.12-13)

¹³ Cuno domingo juucaja, caapiqui Jesu pueyari Emaús tiacajiniara quiojoriquiaa. Emaús tiacaari querajaa hora quiquiaari Jerusalén tiacajiniji, nihuacata quiasacari tiriara. ¹⁴ Nojori quiojosacari nucucaco, nojoriiri Jesujiniji pocojoriquiaa, mariyata shusha naataja pueya miishanojiniji Jesu. ¹⁵ Naa nojori pocojosacari nucucotej, Jesujuanaari jiyacari nojori rupuesee. Juhujaniya nojoritia pacutaareeri. ¹⁶ Majaari nojori niishiniu quiquiaari cana pueyanote cuno quiquiaarini. Nojori namijiaari tojequiaari, maja nojori niishiniuria Jesu. ¹⁷ Jesuuri nojori nequesotaree:

—¿Casaa nia pocojotaacuaani?

Nojoriiri nujuatuquee. Taraajecoyano niquishaariquiaari.

¹⁸ Cuno caapiqui pueyanojinijini, tamonu sesa quiquiaari Cleofas. Nojuajaari Jesu riucuaaree:

—Puetunu pueyajanaacuaajaari niishiya casaate Jerusalén tiacajinia miishaarucuaa taraatiani. Quiaacuaajaari Jerusalén tiacajinia quiquianujuhuj. ¿Quiaatucua casaara niishiyaquirini casaate miishaarucuaani?

¹⁹ Jesuuri nojori nequesotaree:

—¿Casaate tii miishaarucuaajaarani?

Jesu sequereeri:

—¡Nazaret tiacajinijinio Jesuuri mosaarucuaajaj! Nojuajaari Pueyaso sequesano caminiujiunia quiquianu. ¡Jiyanohua maninia quijiaari na cumaacata na miijosano, na niishitiojosanojuhuj! Pueyaso timitasano quijiaari, puetunu pueya panishanojuanaano. ²⁰ Pueyacuara secjonaa jiyaniijanucua, mariyata pa camarucuaari na niqitiorucuaa Romano jiyaniijia na motesocoriquiano. Niyacutesanojinia mosaarucuaari. ²¹ Canaari juucua jiyaniquianuni, nojuajaari Romano pueya

taanuunutaniya, pa Israel pueya quiniuria juhuajaniya tama pajaniya-jaaja. Quiarijiani, jiuujianaraca juucaari tari na shoconujiya na mosaanujiniji. ²² Tamasaca maajipohua canaa maanujinijinioori canaa shirioree nojori pohuatasanota. Nojoriiri quiarijia tariquicuaji quiojoma Jesu raajinia. ²³ Nojoriiri maja na riuriatanu quishii na quiete. Nojori tacatesacariuhua, nojoriiri canaa pohuatasuhua, nojorinia Pueyaso seya niquirii juhua na maquenujina. ¡Cuno Pueyaso seyanaari nojori sequeree, Jesu tari samiitiarohua! ²⁴ Na nuhuaji, tamasa canaajinijinioori raajinia quiojiyareejuhuj. Seetanujuanaa naa quiriquiaari, taa maajipohua sequeree canaacuajani. Maja cutaraari nojori niqiniuquirii Jesu.

²⁵ Jiyacaritij, Jesuuri nojori sequeree:

—Pueyanaa, majaquiiri juhuanajuaja nia niishiniu. Niaari taacanuyajaa puetunu tariucuacaanu Pueyaso sequesano caminiujiuniaa naajiotasanoocuajanaa nia tiuuniuria. ²⁶ ¿Majateeri naa na pohuatasaanu quiquiaaricuaaja: “Cristoori coteenu naa mosaanutaniyaquij. Na nuhuaji cutara, jiyanoohua cumaacaracara quijiara jiyatesaanutaniuhuari Jiyaniijajanaa na quiniuria”?

²⁷ Jesuuri juhuacatecara nojori niishitiojoree puetunu tariucuacaanu Pueyaso Rupaajinijijianaa, tee nojuajiniji naajiotasano quiyacuajani. Moisés naajiotasanojiniji pohuatanu coteereeri, na nuhuaji, puetunu Pueyaso sequesano caminiujiuniaa naajiotasanojinijijianaano.

²⁸ Nojori tiuquishacari cuno tiacajinia, terara nojori quiojoriquiaacuajani, Jesuuri juhua shocoriquiano canujoriquiaa. ²⁹ Nojoriiri nojoritia na jiyojetenu paniriquiaa jiyanoohua. Nojoriiri na sequeree:

—¡Niyaja canaata quia jiyojere! Paa tari niniyareeni.

Naaratej, Jesuuri nojoritia jiyojesee cuniqui. ³⁰ Jesu jaara nojoritia cajiriquiaa tari miaquejajinia, nojuajaari pan ririi. Nocuara Pueyaso secojoreeri. Nojoriria na neecasereeri. Na nuhuaji, nojori serotareeri. ³¹ Jiyacaritij, nojori namijjaari juhua riatequequee. Jiyacariqui na niishitiuquiiri. Jesuuri saaja shaajequee cuniquijia nojori tajiniji. ³² Nojoriiri sequetooree:

—¡Jesucujajiquiri quiriquiaa! ¡Cunora poojiaqui jiyamitia timiriquiaa na pocoojosacari pajaniyata nucuamaji, nojuaja jaara niishitiojoriquiaa pajaniya Pueyaso Rupaajinia naajiotasantej!

³³ Jiyacaritij, nojori shuquiriniutia, nojoriiri ritia sanetaquee. Cuniqiji Jerusalén tiacajiniara tacaretaarohuari. Nojori tiuquishacariuhua, nojoriiri puetunu Jesu once saquiriojosano pueyajanaa riuriatasuhua tii tariucua rerejono, mariyata socua narta Jesu pueyata. ³⁴ Tariucua tiajinia quiniaari Emaús tiacajiniji tiuquijijionaa sequeree:

—¡Pa Jiyaniijiaqui seetanujuanaa samiitiarohua! ¡Simónri na niquirii!

³⁵ Na nuhuaji, shusha tiuquijijionaari nojori pohuatareejuhuaj, taa Jesu pocoojoriquiaa nojoritiani, nucuaco nojori quiasacari, mariyata taa nojori niishirii nojuajani, pan na neecasacari nojoriria.

Jesu muetasacariuhua na saquiriojosano pueyacua

(Mt 28.16-20; Mr 16.14-18; Jn 20.19-23)

³⁶ Nojori pocoojosacarijia nojori niquishanojiniji Jesu, jiyacaritij, Jesujuanaari canashiyaquiji nojori tajinia nujaaquee. Naa nojori sequereeri:

—¿Niaate quiyajaa? Nioojia nia cajitiri.

³⁷ Nojoriiri shiriiquituuqii. Jiyanoehua puereturiquiaari. Nojoriiri Jesu jiyaniriquiaa naaqui. ³⁸ Jesuuri nojori sequeree:

—¿Casaara nia pueretiuyani? ¿Casaara nia jiyajenetaa janiyani? ³⁹ Cua juaashiquia nia niqiri, cua nihuacanio, nia niishiniuria janiyacua-jaari quiyani. ¡Cua cootiuri! ¡Cua niqitiuri! Naaquiiri maja cuaqueyaraca, maja nucuhuaraca taa nia niqiiya janiyacujani.

⁴⁰ Naa nojori na sequesacaritij, Jesuuri nojori niqitijioree na juaashiquia, na nihuacanio. ⁴¹ Puera nojori jiuujiatesacari, puera nojori shuquirishacarijiuhuj, nojoriiri taacanuuriquiaajaa, maja naasucua Jesu. Cunora, Jesuuri nojori sequeree:

—¿Niaate miaquesocoriquiano jiitiaacuaa?

⁴² Nojoriiri Jesu niqitiooree sapitiaaja raqui caquishano. ⁴³ Jesuuri na maseree. Nojori niqiiara na miaquereeri. ⁴⁴ Na nuhuaji, nojori sequereeri:

—Janiyari naa miishaarucuaani taa cua pohuataquiaari niajaniyacujani, pueyaracaanu niaata cua quishacari tarijia. Nia sequequiaaricuaajani, janiyari naa miishaanutaniyani, taa Moisés naajiotaquiaari janiyajinijicujani. Puetunu Pueyaso sequesano caminiujuniaajanaari janiyajiniji naajionuutaquiaarijiuhuj. Supuetana Davidri janiyajiniji naajiotaquiaarijiuhua na jaaquequejoneejinia. Quiarijia tari tohua-terucuaari puetunu janiyajiniji cuno naajionuutasanojuanaa.

⁴⁵ Jiyacaritij, Jesuuri nojori niishitirii tariucuaaanu Pueyaso Rupaa naajiotasano. ⁴⁶ Nojori sequereeri:

—Tariucuaaanu naa naajiotasanoori quiya: “Pueyaso Jiyaroso-coriquianoori mosaariquiano, na nuhuaji, jiuujianaraca juucajinia samiitianutaniuhuari”. ⁴⁷ Naa naajiotasaaquiaarijiuhuj, Jerusalén tiacajinia, janiyajiniiji pohuatasaanutaniya pueya niqiiara, na nuhuaji puetunu jiyacajiniajanaano. Pueya tiuushacari cucua, nojori jaara nojiaa tacatorohua sesa nojori miiniujiniji, sesa nojori miishanoori tuu-jaasaanutaniya, Pueyaso jiyanooshacari nojori. ⁴⁸ Niaacuaajaari puetunu cua miishanojuanaa niqiijiaca. ⁴⁹ Cua tojitiare. Janiya jaara jiyocuaaanu quiaarohua cua Queecuani, janiyari Pueyaso Sohuanu jiyaronutaniya niaacuani, taa cua Que sequequiaaricujani. Niyaja pootia nia quiri Jerusalén tiacajiniani, niaa jaara jiyocuaaanuji niriquiano cumaaca maserejaatijia.

Jiyocuaaanu Jesu tacasacariuhua

(Mr 16.19-20)

⁵⁰ Na nuhuaji, Jesuuri nojori jiyataquiaari Jerusalén tiacajiniji, Betania tiacajiniara. Cuniqii nojori quishacarijia, Jesuuri na juaashiquia shiitioquiaari nojoriicuaara na secojosacari Pueyaso, Pueyaso jiitianura maninia pueyaracaanu nojori. ⁵¹ Nojoriicuaara na secojosacarijia, Jesuuri nojori shuriucuaaji tacanishaaquiaari jiyocuaaanu. ⁵² Nojoriiri na shuquiritiaree. Na nuhuaji, nojoriiri Jerusalén tiacajinia panaatia tacateyarohua. Nojoriiri jiyanoehua shuquiriaatia quiriquiaa. ⁵³ Nojoriiri pueyaracaanu quijia Pueyaso Secojoua tiajinia. Tii Pueyaso maniniuhuaquetatujua pueyaracaanuuri. Tariucuaaja.

JUAN NAAJIOTASANO JESUCRISTOJINIJI

Pueyaso Rupaa jatasacari pueyanora

¹ Paari Jesucristojiniji niishiyani taamuecateja na Que Pueyasoni. Naaratej, Jesucristoori sesojosaaquiaari “Pueyaso Rupaa”. Nojuajaari tari pueyaracaanu quijia, jiya quiyaquishacarijia. Na Que Pueyasota quijiaari. Pueyaso quijiajaariuhuj. ² Jiya coteesacari, nojuajaari na Que Pueyasota quiriquiaa. ³ Na Queeri na shipinitiquiaari puetunu casaajanaa. Puetunu casaajanaari na shipinishano. Maja tamonu shipininia quiniu socua. ⁴ Nojuajaari quijiajuhuanaj. Naaratej, nojuajaari na naata pueya jiuujia cuhuatanu, pueyaracaanu rishijia nojori quiniurijuhuj. ⁵ Jesucristoori cuhuashiqui quijia. Naaratej, na rupaata poojia cuhuataari. Saniniuujia, Sesaacaari ninishiqui quijia. Naajaa, majaari na naata Pueyaso Rupaa na shocotanu. ⁶ Pueyasoori quiari naataja tamonu pueyano jiyaroquiaari, Neyanujiniji pohuatariquiano. Na sesa quiquiaari Tiuquinijiona Juan. ⁷ Pueyasoori na jiyaroquiaari pueya na niishitiniuria cante Jesucristoni, pueya tiuuniuria Jesuucua, nojori jiuujia na cuhuatanura. ⁸ Juanri maja pueya jiuujia cuhuatana. Nojuajaari Jesucristojiniji pohuataquiaari pueya niishiniuria cante saniya poojia cuhuatana cutarani. ⁹ “Pueyaso Rupaari” seetanu poojia cuhuatana-janaa. Nojuajaari Jesucristo. Jiyocua niquiaariiri puetunu pueyajanaa niishiniuria cante Pueyasoni.

¹⁰ “Pueyaso Rupaari” mijiria rucuanerujua quiquiaari. Pueyari tama nojori Shipinijajaaja niishiyaquiquiaari. ¹¹ Tama na saquiriojosano Israel pueyacua niquiaariiri. Nojoriiri na tamacaquiaari saaja. ¹² Saaja noojiaquyaa pueyari nocua tiuququiaari. “Pueyaso Rupaari” cuno pueya jiyatequiaari Pueyaso muerasura nojori quiniuria. ¹³ Nojoriiri Pueyaso jatanishano, seetanujanaa na muerasu nojori quiniuria. Pueyaso saquiriojosano pueyajiniji pueyano supuesacari, cunoori maja na naata na jiyatenu Pueyaso pueyano na quiniuria. Pueyari maja na naata muetunu tariucua Pueyaso pueya. Naajuhuj, pueyanoori maja na naata tama na cuaqueyajaaja jiyatenu Pueyaso pueyano na quiniuria. Pueya cutaraari Pueyaso muerasura jataquiaa Neyanuucua nojori tiuushacari saaja.

¹⁴ “Pueyaso Rupaari” seetanujanaa pueyanora jataquiaari mijiria na quiniuria. Nojuajaari Jesucristo. Canaata quiquiaariiri. Canaari na cumaacata na mijiosano niquiquiaarini. Jiyanojia maninia quiquiaariiri. Na Que Pueyasoori na cumaquijia jiyanojia maninia na miiniuria, Neyanuniojua na quishacari. Nojuajaari saaja seetanu rupaajanaa sequeja Pueyasojiniji. Jiyanojia quijiaari. ¹⁵ Tiuquinijiona Juanri Jesucristojiniji pohuataquiaari pueya niquiaru. Jiyanojia na rupaa paaretaquiaariiri pueya tojtianura nojuaja. Naa sequejaari:

—Janiyacuaajaari nojuajiniji nia pohuatajani, janiya jaara nia sequejani: “Tamonu pueyano cua nuhuaji niniutianiya”. Nojuajaari jiyaniijijanaa cutara janiyajiniji. Nojuajaari tari quijia cua quiyaquishacarijia.

Juanri naa pohuataquiaari Jesucristojiniji.

¹⁶ Jiyaniijiajanaa Jesucristo quiniuucua, puetunu pajaniyajanaari na jiiitiasanojiniji masequiaani. Jiyanohua capora na quiniuucua, nojuajaari pueyaracaanu pa cumaquiquiaa. ¹⁷ Pueyasoori supuetana Moisés naajjotequiaari na rootasano pajaniyara. Cunoori maja na cumaquiniu quiquiaari pajaniya. Quiarijia saniniuujia, pa panijia Pueyaso quiniuucua, nojuajaari Neyanujanaa jiyaroquiaari pocua, pa jiyanooshaanura, naajuhuj, seetanu rupajanaa pa niishiniuria nojuajiniji. ¹⁸ Majaari quenaaja tamonu pueyano niquiniu quijia Pueyaso. Neyanu, cante na Que shuriucua quijiacuajani, nojuajaari na Que pa niishitioquiaari.

Tiuquinijiona Juan pohuatasano Jesucristojiniji

(Mt 3.11-12; Mr 1.7-8; Lc 3.15-17)

¹⁹ Jerusalén tiacajinijinio canaa Judiocuaca camarucuaari na pueya jiyaramiquiquiaari Tiuquinijiona Juancua, nojori nequesoreenura Juan cante nojuajani. Nojori jiyaramiquishano pueyari quiquiaari supuetana Leví niquiohuacuajinio supueno pueya. Noojiaqueya cuno pojorijinijinioori quiquiaarijuhua pueyacuara secojonaa pueya. ²⁰ Nojori nequesotasacari Tiuquinijiona Juan, nojuajaari maja quenaaja na seetanu quiquiaari cante nojuajani. Seetanujanaa naa nojori sequesquiaariiri:

—Janiyari maja Pueyaso Jiyarosano Cristoni.

²¹ Cuno pueyari socua na nequesotarohua:

—¿Canteeri quiajaniani? ¿Quiaa jiyoteeri Pueyaso sequesano caminiujunia Elías soj? ¿Quiaa jiyoteeri samiiarohuacuaa?

Tiuquinijiona Juanri saaja nojori riucuaaree:

—Maja. Janiya maja supuetana Elíasni.

Cuno pueyari socua na nequesotarohuacuahuaj:

—¿Quiaa jiyoteeri Pueyaso sequesano caminiujunia, noj tariucuaaanu sequesaaquiaari niriqianotej?

Juanri saaja nojori riucuaaree:

—Maja.

²² Cuno pueyari socua na sequeree:

—Canaa quia pohuatareja, ¿cante quiajaniani? Canacua saniniuujia canaa camarucua pohuatasuhanijia.

²³ Juanri saaja naa nojori riucuaaree:

—Janiyacuaajaari nooni, cariiquia jiyajinia nacajatej, taa supuetana Isaías juhuacarijia naajjotaquiaari janiyajinijicujani: “¡Jiyaniijiaacuajia nia nuunore maninia! ¡Maja shuutiuniu!”

²⁴ Jiyacaritij, Fariseocuaca camarucua jiyaramiquishano pueyari Tiuquinijiona Juan nequesotaree:

²⁵ —Quiaa jaara quiaquiri Cristo, Elíasjuhuj, cuno tariucuaaanu sequesaaquiaari niriqiano Pueyaso sequenu panishano caminiujuniatej, ¿casaara pueya quia tiuquinijiya moojiniacuaraarini?

²⁶ Juanri nojori riucuaaree:

—Janiyari nareja moojinia tiuquinijiya pueyani. Saniniuujia, tamonuuri niya quia, nia niishiyaquishoojua. ²⁷ Nojuajaari cua nuhujia niniutianiya. Nojuajaari Jiyaniijiajanaa cutara. Majaari quenaaja cua naata na seru quiniu na sapatu neyocua cua saacatanura nera.

²⁸ Naa cuno pojori nequesoreesacari Tiuquinijiona Juantej, cunoori quiriquiaa Betania jiyanišano tiacajinia, Jordán moo taquijiria, tee cuniqui Juan tiuquinijioriquiaa moojinia pueyacuaani.

Jesu juhua Pueyaso borregoniojua pocuara mosaariquiano

²⁹ Tariqui saniniuujia, Tiuquinijiona Juanri Jesu niquirii nocua niyano. Juanri naa sequeree canaa niquiara:

—Paari pueyaracaanu mooquiaa borregohuani Pueyaso jiyanooniuria pajaniya. ¡Nia niquiri! ¡Cuno cumaji canujiyani, cunoori Pueyaso Jiyarosano, juhua borrego puetunu pueyacuaara mosocoriquiano, seetanujuanaa sesa pa miishanojiniji pa jiyanooshaanura! ³⁰ Janiyacuajaari nojuajiniji nia pohuatajani janiya jaara nia sequejani: “Cua nuhuaji niniutianiyari Jiyaniijiajanaa cutara. Nojuajaari tari rishijia cucuaji cua quiyaquishacarijia”. ³¹ Janiyari na niishiyaquijiajuhuj, cante nojuajani. Naajaa, janiyari parta Israel pueya tiuquinijioquiaa moojiniani, noojia nojori jeenucuanura, Pueyaso Jiyarosano nojori niishiniuria cutara.

³² Tiuquinijiona Juanri pueya sequereejuhuj:

—Janiyari Pueyaso Sohuanu niquiriucuaani jiyocuacaanuji roseyano nocua juhua mococoonu. Nocua tiuushiiri. ³³ Cuno, cua jiyarocuaari pueya cua tiuquinijionura moojiniani, nojuajaari cua sequerocuaari: “Quiaa jaara cua Sohuanu niquiri pueyanocua roseyano, nocua na tiuuniuria, quiocua niishiri, cunocuaajaari cua sequesano quiajaniya. Nojuajaari cua Sohuanu tiuquinijionutaniya pueya jiuujiajania cutara, seetanujuanaa cua muerasu nojori quiniuria”. Nojuaja jaara naa cua sequeyaquiquiaari, janiya maara na niishiyaquiquianuni. ³⁴ Janiyacuajaari tari na niquiquianuni. Naaratej, janiyari saniniuujia nia pohuataani pueyanaa, nojuajaari seetanujuanaa Cristo, Pueyaso Niyanu!

Coteenujanaa Jesu pueyajiniji pohuatasano

³⁵ Tariqui, Tiuquinijiona Juanri tii quishiiquihua caapiqui na pueyata. Janiyari niquiriyatu cuno caapiqui pueyanojinijinio quiriquiaani. ³⁶ Tiuquinijiona Juan jaara Jesu niquiquiaari shocoyano, jiyacari canaa sequereeri:

—¡Nia niquiri! Cunoori cua sequesano niajaniya, Pueyaso Jiyarosano pocuara mosocoriquiano juhua borrego, sesa poojia seque jeequesaanura.

³⁷ Naa canaa tojishacari Juan sequesantej, canaari Jesu nuhuajiquiaarini. ³⁸ Jesuuri canaacua tacateree. Canaa na niquishacari na nuhuaji sacuaano, canaa sequereeri:

—¿Casaa nia paniani?

Canaari na sequereeni:

—Niishitiojonanaa, ¿tee quia maquequiaacuaani?

³⁹ Jesuuri canaa riucuaaree:

—Miji. Nia niquiquii.

Canaari nata quiaareeni. Canaari na quijia niquitiushiini. Tari pananu piriuushacariiri quiriquiaa jiyacari. Cunora, canaari tii maquetusee Jesutani.

⁴⁰ Tiuquinijiona Juan niquitiniucua Jesu canaa, canaari Jesu nuhuajiquiaarini. Andrésri cua cojiriquiaa. Andrésri tarajanu jiiitaja. Na

sesaari quijia Simón Pedro. ⁴¹ Tariquicuaji, Andrésri ritia tarajanu Simón pajenuucua quiaquiaari. Na riuriasacari, na sequereeri:

—¡Cua tarajananaa, canaari Cristo niquiriquiacuaani, tariucuacaanu Pueyaso sequesano na jiyarosocoriquianotej!

⁴² Na nuhuaji, Andrésri tarajanu Simón jiyataaree Jesuucua. Jesu niquishacari Simón, na sequereeri:

—Quiaacuajaari Simón, Juan niyanu. Quiarijia saniniuujia, quia sesaari quiniutianiya Cefas.

Griego rupaajinia, nioori sequeya Pedro. Pedroori saniniuujia pueyano rupaajinia sequeya “Saajia”.

Jesu saquiriojosacari Felipe, Natanaelnio

⁴³ Tariqui, Jesuuri Galilea jiyajiniara quiariquiaa. Felipe riuriataamaari. Na sequereeri:

—Cua tarajare cua pueyano quia quiniuria.

⁴⁴ Felipeeri nata quiaaree. Nojuajaari Betsaida tiacajinijinio quiquiaari. Andrésri tarajanu Pedrota cuno tiacajinijinio quiquiaarijuhuaj. ⁴⁵ Na nuhuaji, Felipeeri Natanael pajeree. Na riuriasacari, na sequereeri:

—¡Canaa noo pueyano niquiriini, Moisés nojuajiniji naajiotaquiaari tariucuacaanutej! Tariucuacaanu Pueyaso sequesano caminiujuniaa pueyari nojuajiniji naajionuutaquiaarijuhuaj. ¡Nojuajaari Nazaret tiacajinijinio Jesu, José niyanu!

⁴⁶ Natanaelri saa riucaareejaa:

—¡Jaj! ¿Na naatate maninia miiijia pueyano supenujuuara cuno sesa miiijia Nazaret tiacajiniji?

Felipeeri na sequeree saaja:

—¡Mijil! ¡Pa niquishii!

⁴⁷ Jesuuri Natanael niquirii nocua niyano. Na sequereeri:

—Nio pueyanoori seetanu pa supuetana Israel niquiohuacuajinio supenujuanaa cutara. Majaari na niishiniu sapojonu.

⁴⁸ Natanaelri na sequeree:

—¿Taa quia niishiya janiyarini?

Jesuuri na riucaaree:

—Felipe sequeyaquishacarijia quiajaniya cucua quia niniuria, janiyaritari quia niquirii coojiatani, higo naana pajama tateyano.

⁴⁹ Natanaelri shiriquirii. Jesu sequereeri:

—Niishitiojonanaa, ¡quiaacuajaqui Pueyaso Niyanu! ¡Quiaari parta Israel pueya jiyaniijiaranojuhuaj!

⁵⁰ Jesuuri na sequeree:

—¿Quiaateeri cucua tiuuquii shusha saaja cua sequesacari quiajaniya: “Quia niquirii higo naana pajama tateyanonijia”? Seetanujuanaa quia sequeyanijia, quiaari na nuhuaji cua cumaacata cua miiijosano niquiniutianiya cutara.

⁵¹ Jesuuri cuniqui quiniaa pueya sequereejuhuj:

—Seetanujuanaa nia sequeyanijia, niaari jiya cajiniocua niquiniutianiya riateno. Pueyano cua quishacari, niaari Pueyaso seya niquiniutianiya cucua roseetaano, cucuaji taqueetaanojuhuaj.

2

Jesu jatanishacari mohuaca vinora, pueyano camishacari

¹ Jiuujianaraca juuca nuhuaji, tamonu pueyanoori camiquiaari Caná tiacajinia, Galilea jiyajinia. Masuusano pueyari queranacuriquiaa. Jesu nucuaari tii quiriquiaajuhuj. ² Jesuuri na saquiriojosano pueyeta masuusaquiaarijiuhuj, camishacari queranacunura. Janiyari na saquiriojosano pueyano quiriquiaa jiyacari tarijiuhuj. ³ Jiyacaritij, mashacaari ritia puequemaa. Na nucuaari Jesu sequeree:

—Sanaa, mashaca tari puequemaa.

Mashacaari quiquiaari uva caaca, vinotuhuj. ⁴ Jesuuri na nucua riucuaree saaja:

—Maajiniaa, ¿casaara quia sequeya janiyani? Juhuanajuaja maja cua poonijiosacari Pueyaso cumaacata.

⁵ Na nucuaari pueya raatojonaa sequeree:

—¡Niocua Jesu tojirijia! Jaara nia sequere, niocua puetunu na sequesanajuanaa miiri.

⁶ Tii cajitiuriquiaari seis conatu, saajiajiniji quejasano. Canaa Judiocuacaari sequeyarucua shuquirioojua tiajinia nojori tiuquishacariuhua, juhua jeequesano nojori quiniuria Pueyaso niqiara. Nojori mohuaca cajitiacojua quiquiaari cuno conaa. Jiyanojua puereetucocua quijiaari. Cuno conatuuri setenta tumococua mishaja mohuacata mishinishano quijia. ⁷ Jesuuri pueya raatojonaa sequeree:

—Mohuaca nia taquirioore. Niocua nio conaa mishinijiore.

Pueya raatojonaari conaa mishinijioree. Mohuacaari conaa ru-paacuma puecacosee. ⁸ Jesuuri nojori sequeree:

—Quiarijiani, tiji nia shuuri. Queranacunu camaru nia sanitiore coteenu.

Raatojonaari na raatesee. ⁹ Queranacunu camaruuri vinora jatano mohuaca sanirii. Majaari na niishiniu quiquiaari cuno na ratusanoori mohuacajiniji jatanishaaree vinora. Saaja pueya raatojonaa cutaraari na niishiriquiaa. Nojoricuajaari mohuaca mishinijioree cuno conaa-jinia. Queranacunu camaru saniniu nuhuaji cuno ratusano, camiyano pueyano piiriiri. ¹⁰ Na sequereeri:

—Pueyaruhuatijia coteenu raateja shocuanacu vinote. Puetunu masuusano pueya jaara tari raruure queraatia, na nuhuaji raatesano cutaraari shaarunacu vino. ¡Quiarijia saniniuujia, nio cua ratusanoni, cunoori socua maniniuniacu vino coteenu quia raatojotesanojiniji!

¹¹ Naa Jesu jatanishacari mohuaca vinoratej, cunoori coteenujuanaa na cumaacata na miishano quiquiaari Caná tiacajinia, Galilea jiyajinia. Nojuaajari naa niqitiquiaari Pueyasojiniji na cumaaca. Naacuajitij, canaa na saquiriojosano pueyani, canaari niishi-quiaarini Jesuuri seetanujuanaa Pueyaso Jiyarosano.

¹² Na nuhuaji, Jesuuri Capernaum tiacajinia quiaaree na nucuaata, tapueyocucatajuhuj, canaa na saquiriojosano pueyano. Canaari tii camueenujuquiaari pasajani.

Jesu jaacasacari seya niqitiojonaa Pueyaso Secojoua tiajiniji
(Mt 21.12-13; Mr 11.15-18; Lc 19.45-46)

¹³ Quera canaa Judiocuaca queranacusacari Pascua juucara Jerusalén tiacajinia, Jesuuri tii canaa jiyataareejuhuj. ¹⁴ Na tiuquishacari, Pueyaso Secojoua tiajinia quiaamaari. Tii niqishii pueyari juyaca niqitiojiyano Pueyasoocuara puecoosocoriquiano, borregohua, noseyanio.

Pueyari tii na juhuacutucuaajinia cajitiuriquiaajuhuaaj, pueya na taca-tojonura taucuaca cumaneeca, Pueyaso Secojojua tiajinia niqutiojosocoriquiano cumaneecara. ¹⁵ Naa na niquishacari pueya miyano Pueyaso Secojojua tiajinatej, Jesuuri seya morojotaja jiyocua tatucuaaree. Na majacutajara na shitiareeri. Cunota, puetunu nojorijianaa jaacaree Pueyaso Secojojua tiajinijiiri, puetunu nojori borregohuatajanaa, mariyata puetunu nojori juyacatajanaanio. Cumaneeca rerecojoree jiyocuara juhuacutucuaajiniijiiri. Naajuhuaaj, cumaneeca juhuacutucua caponeetareeri. Pojotaariquiaacuaari. ¹⁶ Noseya niqutiojonaa pueya sequereeri:

—¡Niiquiji nia patootare nio noseya! ¿Casaara nia jiyatecanu juhua casami niqutiojosaquiria cua Que tiani?

¹⁷ Jiyacaritij, canaa, Jesu saquiriojosano pueyani, canaari niishiquiini, seetanujanaa tariucuaaanu Pueyaso Rupaajinia naa naajiotasanoori quiya:

“Quia tiaacua juaatishaaree jiyanoahuanijia, jiyanohua cua panishacari quia tia”.

¹⁸ Naa Jesu miiniuucuatej, narta Judiocuaca camarucuaari Jesu nequesotaturee:

—¿Cante quia sequerucuaa naa quia miiniuriani? ¡Canaa quia niqutir-icuaraja Pueyaso cumaacata quia miishano, canaa niishiniuria quiaari seetanujanaa Pueyaso Jiyarosano!

¹⁹ Jesuuri nojori riucuaaree miriqui:

—Pueyaso tia nia niyartare, janiyacua saaja jiuujianaraca juucajinia na tucatarohua tianu tamajaajani.

²⁰ Narta Judiocuaca camarucuaari na riucuaaree:

—¡Cuarenta y seis marijaari shoconujuquiaari pueya tucatanura nio secojojua tia! ¿Quiaateeri jiyaniya quia naata na tianuhua ritia, saaja jiuujianaraca juucajinia? ¡Maja quia naata!

²¹ Jesuuri tama na cuaqueyajaaja pohuatariquiaa, Pueyaso tia na sequesacari. ²² Naacuajitij, Jesu jaara samiitiaquiaariuhua, canaa na pueyari jiyacari shusha niishiquiaari naa Jesu sequesano miriquini. Naaratej, canaari tariucuaaanu Pueyaso Rupaajinia naajiotasanoocua tiuquiaarini, Jesu sequesanoocuanio.

Jesu puetunu jiuujia niishijajanaa cutara

²³ Canaari ocho juuca camueenujuquiaari Jesuta Jerusalén tiacajini-ani, Pascuara queranacunuusacari. Tii canaa quishacari, tii quiniaa pueyari Jesu cumaacata na miijiosano niqiquiaari. Naaratej, queraatia pueyari nocua tiuquiaari. ²⁴ Naajaa, majaari Jesu tiuuniu quiriquiaa seetanujanaa nojoriicua. Nojuajaari nojori niishiriquiaa, taamueca pueyate nojorini. ²⁵ Tamonu pohuataaquishacarijia nojuaja, nojuajaari tari niishiya taamueca jiuujiaracate pueyani.

3

Nicodemo pocojosacari Jesuta

¹ Niucua, tamonu pueyanoori niquiaari Jesuucua. Na sesa quiquiaari Nicodemo. Nojuajaari canaa Judiocuaca camarucuaajinijinio quijia, Fariseocuaca maanujinijiniojuhuaaj. Tojishano pueyano. ² Jesuucua na tiuquishacari, naa na sequeseeeri:

—Niishitiojonanaa, quia cumaacata quia miiniuucua canaa niquiara, canaari cunora niishiyani quiaari Pueyaso jiyarosano, canaa niishitiojoriquiano. Seetanujuanaa, Pueyaso jaara pueyano naacuyaquiri na cumaacata, nojuajaari maja na naata cusosuhua naatanijionu taa quia miiquiaacuaani.

³ Jesuuri Nicodemo sequeree:

—Seetanujuanaa quia sequeyanijia, pueyano jaara juhua conaaja raacquishaarohua, majaari na naata Pueyaso pueyanora na quiniu, Pueyaso jitianura nojuaja.

⁴ Nicodemoori Jesu nequesotaree:

—¿Pueyanotucua taa rasaarohuani, nojuaja jaara tari cumantumaca quiya? Majaari na naata na nucua saracajinia tiuquiniuhua na rasaanuhua.

⁵ Jesuuri na riucuaaree:

—Seetanujuanaari cua sequesano. Cua tojiri. Paari coteenu rasaanuquiaari pueyano pa quiniuriani. Saniniuujia, cante quiarinio pueyanora jataniyaquishano Pueyaso Sohuanutani, nojuajaari maja Pueyaso jitianoniyojua na quiniu quiniutianiya. ⁶ Mijiria pueya mutesanoori saaja pueyano. Saniniuujia, cante Pueyaso Sohuanu jatanishano quiarinio pueyano na quiniuriani, nojuajaari Pueyaso pueyano cutara, pueyaracaanu rishiriquiano. ⁷ Naaratej, majaari quia shiriquiniu puera, naa cua sequenuucua quiajaniyatej, quiaa cuara rasuhua, seetanujuanaa quiarinio pueyano quia quiniuria. ⁸ Mijiria, paratuuri piyarojoquiaa taa na paniyacuajani. Paari nareja na cojuatunenu tojiquiaani. Majaari pa niishiniu teje na piyarojiyani, tee cunocora na quiaajaaniuhua. Naajaariuhua, majaari quia niishiniu taa Pueyaso Sohuanu jataniquiaa pueyanoni, quiarinio pueyano na quiniuria.

⁹ Nicodemoori Jesu nequesotarohuacuahuaj:

—¿Pueyanotucua taa quiarinio pueyanora jatanishaarejaarani?

¹⁰ Jesuuri na riucuaaree:

—¿Majateeri quia niishiniu cua sequesano quiajaniya? Quiaari Pueyaso Rupaa niishitiojonacuaja Israel pueyara. ¹¹ Canaari seetanujuanaa pohuataquiaa canaa niishishanoni, canaa niquishanojuhuaj. Niaari saniniuujia saaja na cuaracashitiquiaa, canaa pohuatasacari niajaniya seetanu rupaajanaa. ¹² Niaa jaara saaja cuaracashitiquiaa cua pohuatasano mijiria casaajiniji, ¿niaatucua taa niishiriquiani, janiya jaara nia pohuatare jiyocuacaanuji casaani? ¹³ Janiyari jiyocuacaanu quijiani. Majaari quenaaja tamonu pueyano tacanu quiquiaari jiyocuacaanu, saaja tijinio roseno cutara. Nojuacuajaari janiya. ¹⁴ Cariiquia jiyajinia pa supuetanaa Israel pueya rucuanesacari, Moisésri na shipinishano soconu nujuaretaquiaari macaacia, soconu sasuhua niqishocoriquiano. Na niquiniaa pueyari naatacoquiaariuhua. Naajuahuaj, janiyari macaacia nujuaretasocoriquianoni. ¹⁵ Naacuajitij, puetunu cucua tiuuniaajanaari pueyaracaanu quijiaca quiniutianiya.

Pueyasoori puetunu mijiria quiniaa pueyajanaa panijia

¹⁶ Jiyanohua cua Que Pueyaso paniniuucua puetunu mijiria quiniaa pueyajanaa, nojuajaari Neyanujuanaa jiyaroquiaari puetunu pueyapueecuarajanaa mosocoriquiano. Puetunu cucua tiuuniaa pueyajanaari saniitioyaquishaanutaniya cutara. Nojori cutaraari pueyaracaanu rishijiaca quiniutianiya Pueyaso shuriucua. ¹⁷ Pueyasoori maja

na jiyaronu quiquiaari janiya pueya cua saniitionura. Seetanujuanaa cua jiyaroquiaari cutaraari pueyacuaji Tacuna cua quiniuria.

¹⁸ 'Cante cucua tiuujiani, majaari na saniitiosaanu quiniutianiya. Saniniuujia, cante cucua tiuyashijiani, nojuajaari tari pueyaracaanu saniitiosocoriquiano jiyatesano quiya. ¹⁹ Janiyari mijiria niquiaarini pueya jiuujia cua cuhuatanura Pueyaso Rupaata. Pueyari saaja na ruuretaquiaa, ninishiqui nojori jiuujia quiniucua. Sesa miijiaca nojori quiniucua, majaari nojori paniniu cuhuatasano nojori quiniuria. Naaratej, nojoriiri saniitiosaanutaniya. ²⁰ Puetunu sesa miijiacajanaari cua niquiniu paniyashijia, pueya jiuujia cuhuatana cua quishacari. Majaari nojori ninu paniniu cucua, sesa nojori miishano mariqui niishishaareeri. ²¹ Saniniuujia, cante maninia miiquiaani taa Pueyaso sequeya na Rupaajiniacuajani, nojoriiri cuhuashiqui quiniu panijaca cutara. Nojoriiri cucua nijioquiaa na niishishaanura nojori miishano cutaraari puetunu maniniajanaa, taa Pueyaso paniyacuajani.

Tiuquinijiona Juan pohuatasacari socua Jesujiniji

²² Na nuhuaji, Jesuuri quiojoquiaari canaata Judea jiyajinia, canaa na saquiriojosano pueyatani. Tii canaa quishacari Jesuta, canaari pueya tiuquinijioriquiaa moojiniani, pueya tacatosacari noojia sesa nojori miishanojiniji. ²³ Tiuquinijiona Juanri jiyacari pueya tiuquinijioriquiaa-juhua Enón tiacajinia, Salím tiaca shuriucua. Juanri tii tiuquinijioriquiaa pueya, queraatia mohuaca quishacari tii. Pueyari nocua quiojoquiaari-jihuaj tiuquinijosano nojori quiniuria. ²⁴ Juanri jiyacari nujuatejojuajinia nujuatesoo quiriquiaajaa.

²⁵ Cuno quishacari, Tiuquinijiona Juan pueyari tamonu narta Judio pueyanota pocoojoriquiaa taate pueya naata juhua jeequesano quiniu Pueyaso niquiarani. ²⁶ Nocuaji nojoriiri Tiuquinijiona Juan sequetusee Jesujiniji:

—Niishitiojonanaa, noo pueyano, quiaa nojuajiniji canaa pohuat-acanutej, noo quiata quiqianu Jordán moo taquijiriatej, nojuajana pueya tiuquinijiyajuhuj. Puetunu pueyajanaana nocua quiojia tiuquinijosano nojori quiniuria.

²⁷ Tiuquinijiona Juanri nojori riucuaaree saaja:

—Saaja Pueyaso cumaquishacari pueyano, pueyano na naata maninia miiniu Pueyasora. ²⁸ Niajanियacuajaari cua tojiquianu sequeyano: “Janiyari maja Pueyaso Jiyarosano Cristoni. Janiyari nareja nocuaji jeenucuariquiano jiyarosaaquiaarini”. ²⁹ Pueyano rupuena jaara camiya necocuara, quiarjia cutara necocuaari seetanujuanaa saaja nerano. Naajaa, na rupuena quishacari na shuriucua, na timitiaari na tojishacari necota pocoojiano shuquiriaatia. Naajuhuj, janiyari cunora shuquiriaatia quiarjia quiyani pueya rupuesacari Jesucristo. ³⁰ Janiyari cunora jiyarosaaquiaaricuajani, pueya cua tojitiniuria nojuaja. Naaratej, pueya cuara carteera janiya, Cristoocua nojori pacunura saniniuujia, nojori tojiniuria nojuaja. ³¹ Cante jiyocuaaanuji niquiaaricuajani, nojuajaari Jiyaniijajanaa cutara. Janiyari saaja mijiria quiniani. Cunora, cua pohuatasanoori saaja mijiria cua tojishano. Jesucristo saniniuujia, nojuajaari jiyocuaaanuji ninio cutara. Nojuajaari Jiyaniijajanaa. ³² Naacujitij, na pohuatasanoori tama na niquishanojuaja jiyocuaaanu, na tojishanonio. Pueyari na pohuatasano cuaracashitiquiaa saaja. ³³ Canapuee Jesucristo

pohuatasanoocua tiuujiacani, nojoriiri sequeya, seetanujuanaaqui Pueyaso sequesano Neyanujiniji. ³⁴ Pueyasoori jiyanoohua queraatia na Sohanu niqutioquiaari na Jiyarosano. Naacujitij, seetanu Pueyaso rupajaanaa pohuataari. ³⁵ Pueyasoori jiyanoohua panijia Neyanu. Naaratej, nojuajaari na jiyatequiaari puetunu casaa jiitianarajanaa na quiniuria. ³⁶ Canapuate Neyanuucua tiuujiacani, nojoriiri tari jatanishano pueyaracaanu rishijia nojori quiniuria Pueyasota. Saniniuujia, canapuate Neyanuucua tiuyashijiacani, nojoriiri tariucua Pueyaso juaashano quiya. Nojoriiri saniitiosaanutaniya Pueyasooju nojori quiniuria pueyaracaanu.

4

Jesu pocoojosacari Samaria jiyajinijinio maajitia

¹ Fariseocuacaari pohuatasaaquiaari, jiyanoohua queraatia pueya Jesuucua quiojiya na tojitianaa nojori quiniuria. Nojoriiri pohuatasaaquiaarijuhuaj, Jesuuri socua queraatia pueya tiuquinijiya Tiuquinijiona Juanjiniji. ² Seetanujuanaa majaari Jesujuanaa tiuquinijionu quiriquiaa pueya. Saaja canaa cutaraari pueya tiuquinijioriquiaani. ³ Jesu jaara niishiquiaari Fariseocuaca naa pohuatasaarucuaa nojuajinijitij, nojuajaari Judea jiyajiniji jiyataquiaariuhua canaa Galilea jiyajiniara.

⁴ Canaa quiasacari nucuaco, canaari Samaria jiyacuma tajiriquiano quiriquiaani. ⁵ Naa canaa quiasacari nucuacotej, canaari Sicar tiacajinia tiuquishiini, Samaria jiyajinia. Cuniqiji, cateca quiriquiaari supuetana José cuhuariquia, na que Jacobo niquticosano nojuaja. ⁶ Cuno cuhuariquiajia quiriquiaari cuari, supuetana Jacobo jiuutiasano tariucuaanu. Pueyaracaanu Jesu rucuanenuucua nucuamaji, nojuajaari cuno cuari shuriucua cajishii na samareenuta. Panacariiri quiriquiaa. ⁷⁻⁸ Jiyacaritij, canaari tiacajinia quiamaani canaa miaquesocoriquiano canaa masenura casaa. Canaa niyacari, cuno Samaria tiacajinijinio maajiiri cuarimia quiaquiaari mohuaca taquitianura. Jesuuri na sequeree:

—Cua raatere.

⁹ Cuno maajiiri Jesu sequeree:

—Pueyanonaa, ¿casaara quia sequeya Samaria jiyajinijinio maaji raatenura quiajaniani? Quiaacuajaari Judio.

Cuno maajiiri naa sequeree Jesutej, na niishiniuucua Judiocuacacua-jaari maja na niquiniu paniniu quijia Samaria jiyajinijinio pueya.

¹⁰ Jesuuri saaja na sequeree:

—Majaari quia niishiniu cante quia sequereeni: “Cua raatere”. Quiaa jaara niishiriquia casaa Pueyaso jiiitaa quiarani, quiaa maara cua sequere cua raatenura quiajaniani. Quiaa jaara cua masere, janiya maara quia raatere pueya samiitianijia mohuacani.

¹¹ Maajiiri na sequeree:

—Jiyaniijianaa, majaari quenaaja quia jiitianu casaa, mohuaca quia taquiriatajara. Nio cuariiri jiyanoohua tucuaa. ¿Quiaatucua teje taquitiare cuno mohuacani, pueya samiitianijiani? ¹² ¿Quiaateeri jiyaniijianaa cutara, socua pa supuetana Jacobojiniji? Nojuajaari nio cuari tiujiaquiaari canaara. Nojuajaari niqiji ratujua quiquiaari necohuata, na seesano seyano.

¹³ Jesuuri na riucuaree miriqui:

—Puetunu nio cuarijiniji ratujuacajanaari saaja jiyamuecoquiaa.

¹⁴ Saniniuujia, cante cua mohuaca ratunutaniyani, majaari socua na jiyamuenu quiniutianihua. Cua mohuacaari juhua samo naca pacartanuniya pueyaracaanu noojiajina, shuquiriaatia na rishinuria pueyaracaanu.

¹⁵ Cuno maajiiri Jesu sequeree:

—¡Pueyanonaa, cuno mohuaca cua niqutiore cua ratusocoriqiano, maja socua cua jiyamuenura, naajuhuj, maja pueyaracaanu cua taquiriojonura nio cuarijiniji!

¹⁶ Jesuuri na sequeree:

—Miji quia niyaca quia sequecoo coteenu.

¹⁷ Maajiiri na riucuaree:

—¿Janiyate niyacaracajaarani, quiaa jaara naa cua sequere?

Jesuuri na sequeree:

—Quiaacuajaari seetanujuanaa cua sequeree: “Niyacaajunijia”.

¹⁸ Seetanujuanaari. Quiaari tari cinco niyacaaraca quiquiaari. Mariyata cuno, quiarijia quiata quiyani, majaari quia niyacajuhuj.

¹⁹ Naa cuno maaji tojishacari Jesu sequesantej, Jesu sequereeri:

—Jiyaniijiana, ¡quiaaqui Pueyaso sequenu panishano caminiuujunia!

²⁰ Canaa supuetanaa pueyari niya nio tuhananuucua Pueyaso secjonuujua tarijia. Niajaniya saniniuujia, Judiocuacani, niaari sequequiaa Pueyaso cuara secojosaaria saaja Jerusalén tiacajinia.

²¹ Jesuuri na riucuaree:

—Seetanujuanaa quia sequereera maajinia. Cua sequesanoocua quia tiurii. Quera quiniutianiyari Pueyaso nia secojosacari puetunu tiqiyocua nia quishacarijiana. Majaari tari Pueyaso secojosaanu quiniutianiya saaja Jerusalén tiacajinia, nio tuhananuucujuhuj, taa quia sequereecuajani. ²² Niajaniyari maja nia niishiniy cana nia secojoquiaani. Canaa Judiocuacani, canaa cutaraari niishiyani cana cana secojoquiaani. Pueyasocuajaari canaa Judiocuaca supuetanaa niishitioquiaari pueyacuaji Tacunaari supuenutaniya tama cana Judiocacajinijiniojuaaja. ²³ Quiarijia cutara, cante seetanujuanaa Pueyaso shuquiritiajani, nojoriiri na Que Pueyaso secjonutaniya puetunu nojiatajanaa, seetanujuanaa na tojijia nojori quishacari. Pueyasoori naa paniya pueya secjonura nojuaja, cante na secjonuujacuajani. ²⁴ Pueyasoori sohanu. Naaratej, cante Pueyaso shuquiritiniu panijiacani, nojori cuara secojora Pueyaso puetunu nojiatajanaa, Pueyaso Sohanu tojijia nojori quishacari.

²⁵ Cuno maajiiri Jesu sequeree:

—Janiyacuajaari niishiyani Pueyaso sequesano Cristo mijiria na jiyarosocoriqianoori niniutianiya. Nojuaja jaara tiuquiri, nojuajaari puetunu maninia pa pohuatanutaniyajanaa.

²⁶ Jiyacaritij, Jesuuri maatia na sequeree:

—Janiyacuajaari cunoni, quiata pocoojiyacujani.

²⁷ Jiyacaritij, canaari Jesuucua tiuquijiorohuani. Canaari jiuujiatequiaarini canaa niquishacari Jesu pocoojiyano cuno maajitia. Majaari quenaaja canaa nequesotanu quirii Jesu, casaa cuno maaji paniriquiaani, mariyata casaajiniji nojori pocoojoriquiaani. ²⁸ Cuno

maajiiri cuniquijia na pataco tiujiaquee. Na tiacajinia quiaarohuari. Na tiuquishacari, na tiacajinia quiniaa pueya sequesuhuari:

²⁹ —¡Miji pueyanaa, nia niquiqui pueyano! ¡Nojuajaari cua sequeree puetunu cua miishanojuanaa! ¿Majate Cristoni, tariucuacaanu Pueyaso sequesano pocua na jiyarosocoriquianotej?

³⁰ Pueyari cuno tiacajiniji Jesuucua nijioquiaari. ³¹ Cuno maaji quiasacari na tiacajiniohua, jiyacartij, canaari Jesu mianuutenu paniriquiaa juucuan. Canaari na sequeriquiaani:

—¡Niishitiojonanaa, quia miaquere!

³² Jesuuri saaja canaa sequeree:

—Janiyacuaaja miaquesanoracani, cuno miaquesanoori nia niishishoo.

³³ Canaa, Jesu saquiriojosano pueyani, canaari naa tama nequesoree-tooreejaanijia:

—Pa niyacari miaquetesaaquee jiyotucuaajaari.

³⁴ Jesuuri miriqui canaa sequeree:

—Cua miishacari cua Jiyarona panishano, cunoori cua miaquesano, naajuhuaaj, cua tucuatascari na panishano. ³⁵ Niaari sequequiaa: “Cuaara shocoorajaara cuatro raca. Pueyari jiyacari shusha coteenutaniya na nataacuaca carojotanu”. Janiyara, maja naatej. Seetanujanaa nia sequeya cutaranijia, nia namijia nia riatate maninia nia niquiniuria. Nataacuacacuaaja tari noshiquia, carojotasocoriquiano. ³⁶ Na carojotanaari na poonijionu sami niquitioshiya. Na carojotasanoori pueyaracaanu quiriquiano. Naacuajitij, cuhuariquia natoonaari jatiqui shuquiriniutianiya nataacuaca carojotanaata. ³⁷ Naaratej, seetanujanaari nio tariucuacaanu sequesano. Naa sequeyari: “Tamonuuri saaja nareja nataja. Na nuhuaji, tamonuuri saniniuujia na carojotaja”. ³⁸ Janiyari saniniuujia nia jiyaramiquiquianuni nataacuaca nia carojotanura quenaaja nia poonijiyaquishoo cuhuariquiajinia. Cunoori tamasaca poonijosano quiquiaari. Niaari juhuajaniya tamasaca poonijosanojiniji carojotaquiaa shuquiriaatia.

³⁹ Queraatia pueya cuno Samaria tiacajinijinoori Jesuucua tiuquiaari, nojori tojishacari naa cuno maaji sequesantej: “Cua sequeree puetunu cua miishanojuanaani”. ⁴⁰ Naaratej, cuno pueya jaara Jesuucua tiuquijioquiaari, nojoriiri na masuquiaari tii na camueenujunura nojori tiacajinia quenaaja. Naaratej, canaari Jesuta tii camueequiaari caapiqui juucani. ⁴¹ Socua queraatia cuno pueyajinijinoori Jesuucua tiuquiaari, nojorijianaa jaara Jesu tojiquiaari Pueyaso rupaa pohuataano. ⁴² Naaratej, nojoriiri cuno maaji sequeturee:

—Quiarijiani, majaari canaa tiuuniu Jesuucua, saaja canaa quia pohuatanuucua nojuajiniji. Quiarijia cutara, canacuajaari tama canaa numaatajaaja tojirii na pohuatasanoni. Naaratej, canaari quiarijia niishiyani, Jesuuri seetanujanaa Pueyaso jiyanootiriquiano pajaniya, puetunu mijiria quiniaa pueyajanaanio.

Jesu naatanishacari jiyaniijia Herodes pueyano niyanu

⁴³ Caapiqui juuca Jesu camueetanu nuhuaji canaa, Samaria pueya tiacajinia, nojuajaari cuniquiji canaa na pueya jiyataare Galilea jiyajiniara. ⁴⁴ Jesuuri tarijia sequequiaari: “Nio tariucuacaanu sequesanoori seetanujanaa sequesano. Naa sequeyari: ‘Pueyaso sequenu

panishano caminiujiuniaari maja tojishano quijia tama na jiyajinia-jaaja' ". ⁴⁵ Naajaa, Jesu jaara canaa tiuquitiaseequiaari jiyacari Galilea jiyajinia, cuniquijinio pueyari maninia na tiuquitiqiaari saaja. Nojoriiri naa maninia na tiuquitiqiaari tari nojori niquniuucua Jesu miishano na cumaacata Jerusalén tiacajinia, Pascuara nojori queranacusacari tii.

⁴⁶ Galilea jiyajinia canaa quishacari, Jesuuri canaa jiyataaree Caná tiacajinia, tee na jataniquiaari mohuaca vinoracuajani. Jiyacaritij, Capernaum tiacajinia quiquiaariiri tamonu pueyano, Galilea jiya jiyaniijia jiyatesano camarnura. Cuno pueyano niyanuuri jiyanohua cusosu matariquiaa. ⁴⁷ Cuno camarnu jaara niishiquiaari Jesu tari tiuquiriohua Judea jiyajiniji, nojuajaari jiyacari niquiaari Capernaum tiacajiniji Jesuucua, Caná tiacajinia. Na tiuquishacari Jesuucua, na sequeeseeri:

—¡Jiyaniijianaa, cucua quia taraajere! ¡Cua niyanu quia naataniquii, quera cusoyano!

⁴⁸ Jesuuri na riucuaaree:

—Niaa jaara cua cumaacata cua miishano niquiyaquiri, niaari cucua tiuyaquiaa.

⁴⁹ Cuno camarnuuri saaja Jesu sequeeree:

—¡Jiyaniijianaa, mijijijaj, jati pa quiaare cua tiajinia, quiyanu cusoyaquishacarijia!

⁵⁰ Jesuuri na sequeeree:

—Quia quiaarohua. Quia niyanucuaa tari naatarohua.

Cuno camarnuuri Jesu sequesanoocua tiuurii. Quiaarohuari.

⁵¹ Jiyacari na tiajinia, na seyari niquiquiaari camarnu niyanuuri seetanujuanaa maninia naatarohua. Naaratej, nojoriiri quiojoquiaari na camarnu numootenuucua. Nojori quiojosacari, na camarnu naacuteree saaja nuu cajiniocuaari. Nojoriiri na sequeeree:

—¡Quia niyanu tari naatarohua!

⁵² Nojori camarnuuri nojori nequesotaree:

—¿Taacari na casonu tajiyatemohuacuaani?

Nojoriiri na riucuaaree:

—Naseeca nocuaji tajimiohuacuaa shusha pananu mueecosacari nio niniriquiacuaani.

⁵³ Cusosu queeri niishiquii, Jesucuaajaari jiyacari na sequeriquiacuaa: “Quia niyanu tari naatarohua”. Naaratej, camarnuuri necocuataja Jesuucua tiuurii, puetunu necohuatajanaanio.

⁵⁴ Judea jiyajiniji Jesu tiuquishacariuhuaaj, naa na naatanishacari cuno cusotej, cunota tari caapiqui quiquiaariiri na cumaacata na miishano Galilea jiyajinia.

5

Jesu naatanishacari cumatacuruhuana cusosu Betzata cuari shuricuacua

¹ Tamacariuhua, socua canaa Judiocuaa queranacusacari quiquiaari Jerusalén tiacajinia. Naaratej, canaari Jesuta nocua quiojoquiaarijiiuhuaaj. ² Jerusalén tiacaari puetunujuanaa puereetuca sohuacajiniacuma quiya. Tohuateyacaari quiya tiuquitiajara. Tamonu tohuateya sesa quiquiaari “Borregohua tiuquitiaja”. Na shuriucua quiyari cuari. Canaa Judiocuaa rupaaajiniani, cuno cuariiri sesojosaaquiaari “Betzata”. Cinco suhuorotucuaari quijia cuno cuari shuriuquiuco.

³ Queraatia cusosuhuari tii matacojua cuno cuari shuriuquioco. Cuno cusosuhuari quiquiaari cariyojuarujuri, shipiiniquiujiunaa, cumatacuruhuana cusosuhuanio. Nojoriiri mohuaca sashijia cuaara queyaquetesaaria. ⁴ Pueyaso seruuri noojiaqueya rosequiaari mohuaca na queyaquetenura. Cuari queyaquesacari, cante coteenujuanaa rosequiaari tiini, nojuajaari naataquiaariuhua na cusonujini. ⁵ Tamonu cusosuri tii narta cusosuhua tajinia matariquiaajuhuj. Tari na shoconujuquiaariiri treinta y ocho marijia, pueyaracaanu na matasacari. ⁶ Jesuuri na niquiquiaari mataano. Noojiajinia niishirijiiaariuhuj cuno pueyano tari shocotejoquiaari queraatia marijia, naa pueyaracaanu na matasacari. Nocuaji Jesuuri na sequeree:

—¿Quiaate naatanu paniya?

⁷ Cusosuuri na riucuree:

—¿Cantucua cua naacure cuarijinia cua rosenurani, mohuaca jaara queyaquetesaarecuaa? Janiya jaara rosenu paniquiaa juucuan, cuarta cusosuuri saaja cua shocotaquiaani.

⁸ Jesuuri na sequeree:

—¡Quia sanere! Quia matu quia pataarohua.

⁹ Jiyacaritij, cusosuuri ritia jeequequee. Na matu pataarohuari. Cuno juucaari Sábado quiriquiaa, canaa Judiocuaca samaatenu juuca Pueyaso niquiara. ¹⁰ Canaa Judiocuaca camarucua jaara cusosu niquiquiaari na matu pataano, na juaatiuriiri. Naa na sequetureeri:

—¿Majateeri quia niishiniu, quiarijiaari Sábado? ¡Maja quia matu quia patanujuaj!

¹¹ Cusosu naatanohuari nojori riucuree:

—Cua naataniniacuaja cua sequereeno: “Quia matu quia pataarohua”. Janiyari cunora na pataani.

¹² Narta Judiocuaca camarucuaari na nequesotaree:

—¿Cantejaara naa quia sequereeni?

¹³ Nojori riucureeri:

—Johuj. Maja cua niishiniu canaquitijia cua naataniritij.

Jesu naatanishacari cuno pueyano, queraatia pueyari namitia tii quiriquiaa. Naacuajitij, Jesuuri ritia tajiniocuareequiaari pueya tajinia, na naatanishano pueyanoocuaji. ¹⁴ Na nuhuaji, Jesuuri na riuritaquiaari cuno juucaja Pueyaso Secojoua tiajinia. Jiyacari na sequereeri:

—Quiaacuajaari tari naatanishaarohua. Quiarijia cutara tama quia cuaqueyajaaja quia cojuare maja sesa quia miiniuhuara socua, quiaa mariqui socua taraatia miiriiri.

¹⁵ Naacuajitij, cuno pueyanoori Jesu niishirii. Cunora, canaa Judiocuaca camarucuaacua quiaareeri. Nojori sequeseeri:

—Jesui cunocuaja cua naataniriini.

¹⁶ Naa Jesu miiniuucua samaatenu juucatej, narta Judiocuaca camarucuaari na quiatunu panijia juucua. ¹⁷ Jesuuri saaja nojori sequeree:

—Cua Queeri pueyaracaanu poonijia. Janiyari cunora poonijia-jaacuhuj.

¹⁸ Naa Jesu sequesacari nojoritij, narta Judiocuaca camarucuaari jiyanhua na monu paniriquiaa. Nojoriiri maja na monu paniniu quiriquiaa saaja samaatenu juuca na poonijionuucua. Socua jiyanhua

na motunu paniriquiaari Jesu jiyatenuucua tama na cuaqueyajaaja juhua Pueyaso, Pueyaso na jiyaniquishacari na Queta.

Jesuuri Jiyaniijajanaa, Pueyaso Niyanu na quishacari

¹⁹ Nocuaji Jesuuri narta Judiocuaca camarucua sequere:

—Seetanujuanaa nia sequeyanijia, Pueyaso Niyanu cua quishacari, maja cua naata casaa miiniu tamajaaja. Janiyari saaja miiquiaani taa cua Que cua niquiquiaa miyanocuaani. Casaa cua Que miiquiaacuaani, janiyari naa miiquiaajaacuhuj. ²⁰ Cua Queeri cua panijia. Cunora, nojuajaari puetunu na miishanojuanaa cua niishitiojoquiaa. Naa-juhuj, cua niishitiojonutaniyari socua jiyajeneta casaa tariucua cua miishanojinijicuaa. Niaari nocuaji shiriiquituniutianiya. ²¹ Cua Queeri macunucua samiitianijioquiaa, pueyaracaanu rishijia nojori quiniuria. Naajuhuj, janiyari pueya samiitianijioquiaani, cana cua samiitianiniu paniyacuajani. ²² Cua Queeri maja na nequesoreenu quiniutianiya pueya. Nojuacuajaari tari cua niquitioanu na cumaaca, puetunu pueyajanaa cua nequesoreenura. ²³ Nojuajaari naa miiquianu puetunu pueyajanaa quiniuria cua tojitajaca, naatej, taa cua Que na tojitiatuquiaacuaani. Cante cua ruuretajani, cunoori cua Que ruuretajujuhuj, nooj, cante mijiria cua jiyaroquiaaricujani.

²⁴ 'Seetanujuanaa nia sequeyanijia, cante cua sequesano tojjiani, mariyata cante cua Jiyaronaacua tiuyajaaniuhuj, nojuajaari pueyaracaanu Pueyasota rishiriquiano cutara. Nojuajaari maja na saniitiosaanu quiniutianiya. Nojuacuajaari tari samiitianishaarohua juhua macu na quiniujiniji Pueyasooju na quishacari. ²⁵ Seetanujuanaa nia sequeyanijia, quera quiniutianiyaari juhua macunucua quijiaca samiitiacosacari. Seetanujuanaa quiarijiaari, juhua macunucua quijiacaari cua rupaa tojitianutaniya. Cua rupaa tojitajacaari samiitiaconutaniya, pueyaracaanu rishijia nojori quiniuria. ²⁶ Cua Queeri quijiajuhuanajaj. Majaari na naata shaajenu. Nojuajaari naa quijiaara cua jiyatequiaarijuhuj, juhua nojuarajuhuj. Naacujitij, cua naata pueya jiyatenu na quijiarajuhuj. ²⁷ Pueyanora cua quiniucua, na cumaaca cua niquitioereeri cuarta pueya cua nequesoreenura, nojori cua sanitionurajuhuj. ²⁸ Cua tojitiare. Majaari nio sequesanoocujani nia shiriqiniu. Tamacari, puetunu macunucujanaari cua rupaa tojitiuniutianiya. ²⁹ Macunucua tojitiushacari cua rupaa, nojoriiri samiitiaconutaniya, na jamacajiniji nojori tohuareetanura. Cante maninia miijiaca quiquiaarini, samiitiaconutaniuhuari pueyaracaanu shuquiriaatia quijiaca nojori quiniuria Pueyasota. Saniniuujia, cante sesa miijiaca quiquiaarini, puetunu nojorijianaari quejoosanutaniya pueyaracaanu saniitiosocoriquiano.

Jiyaniijajanaa na quiniucua, Jesu tama nojuajiniji pohuataajaaja

³⁰ 'Pueyaso Niyanu cua quishacari, naajaa, majaari cua miiniu tama cua panishanojuajaaja. Janiyari sesa miijiaca juaaquiaacuajani, saaja cua Que niishitishacari janiya, nojori miishanoori sesa. Tama cua panishanojuajaaja miyashijia cua quiniucua, janiyari namitijanaa nojori juaaquiaani. Janiyari pueyaracaanu miiquiaa saaja cua Jiyarona panishanoni. ³¹ Pueyano jaara tama nojuajinijiaaja pohuataa narta pueyano, na pohuatasanoocua maja tiuushano. Naaratej, janiya jaara

tama janiyajiniji pohuatariquia nia niquliarani, tama cua pohuatasanojuaaja maara najuhuana quiriquiaj. ³² Naajaa, quiarjia cutara nia naata niishiniu cua pohuatasanoori seetanujuanaa. Tamonucuajaari janiyajiniji pohuataa seetanujuanaa. Nojuajaari cua Que. Cunora, niishyanijia na pohuatasano janiyajinijiiri maja najuhanaj.

³³ Niaari nia pueya jiyarocanu Tiuquinijiona Juancua, nojori nequesotanura janiyajiniji. Nojuajaari saaja seetanujuanaa nia pohuatacanu janiyajiniji. Majaari na seetanu quiquianu janiyajiniji. ³⁴ Nojuaja jaara seetacanu janiyajiniji niajaniya, quiria, naajaa. Janiyacuajaari niishyani seetanujuanaari cua pohuatasano niajaniya tama janiyajinijijiaaja. Tiuquinijiona Juanri seetanujuanaa pohuatacanu janiyajiniji niajaniya. Niaa cuaara na pohuatasanoocua tiuuria, Pueyaso jiyanooniuria niajaniya. Janiyari saaja cunora nia pohuataa Tiuquinijiona Juanjinijini. ³⁵ Nojuajaari juhua samaritiu noshitishano nia tajinia na quishacari. Niaari rupaquijia na timitiacanu, juhua na cuhuatasacari niajaniya. Niaari najuhuana tojiqiuianu na pohuatasano. ³⁶ Tiuquinijiona Juan pohuatasano janiyajinijiiri seetanujuanaa. Niaa jaara na pohuatasanoocua tiuuniu paniyashijiaca quiyajaa, naajaa. Cua cumaacata cua miishacari, cunora seetanujuanaa nia niishiri, cua Que Pueyasoori cua jiyaroquiaari. Nojuacuajaari cua sequequiaari naa cua miiniuriatej. ³⁷ Cua Quejanaari cua jiyaroquiaari. Nojuajaari janiyajiniji niishitioquiaari pueya. Naajaa, majaari quenaaja nia tojiniu quiquiaari na pocuanu. Nojuajaari nia niqishoojuhuaj. ³⁸ Majaari quenaaja na rupaa quiniu nioojiajinia, nia tiuyaquishacari na Jiyarosanoocua. ³⁹ Niaari suraatia serojoquiaa tariucuaacaanu naajosano Pueyaso Rupaa. Niaari jiyaniya niaa jaara Pueyaso Rupaa niishijiaca quiri, niaari naa pueyaracaanu quiijara quiniutianiya. Seetanujuanaa majaari naatej. Cuno Naajioneeginia, tiiri janiyajiniji naajiotasano quiyacuaja. ⁴⁰ Niaari saaja cucua niniu paniaquiquiaa cua jiyatenura niajaniya pueyaracaanu quiijacara cutara.

⁴¹ Maninia cua miishanoori maja pueya sequenura janiya: “Quiaari maninia pueyano”. Janiyari saaja cua Que shuquiritiquiaa cutarani. ⁴² Janiyari seetanujuanaa nia niishyani. Niaari Pueyaso shuqiritiaashijiaca, nia paniaquishacari nojuaja. ⁴³ Cua Quecuajaari cua jiyaroquiaari cua niishitiojonura niajaniya nojuajiniji. Quiarjiani, majaari nia tojiniu paniniu janiya. Saniniuujia, tamonu jaara tama na cuaqueyajaaja jiyateya juhua Pueyaso Jiyarosadora na quiniuria, niaa maara cuno tojiri cutara, nojuaja jaara niaacua nimia na niishitiojonura niajaniya tama na niishishanojuaaja. ⁴⁴ Majaari nia naata cua pohuatasanoocua tiuuniu, niaa jaara saaja niarta pueya shuqiritiasano quiniu paniquiaa, maja Pueyaso shuqiritiasano. ⁴⁵ Majaari nia jiyaniuu janiya niaacuara tonujunutaniya cua Queni. Tama Moiséscuajaari niaacuara tonujunutaniya, cua tojtiaashijiaca nia quiniuucua. Niaari jiyaniya niaa Pueyaso muerasu, juhua Moisés tojijiacua nia quishacari. ¿Niaateeri seetanujuanaa Moisés tojijiacua? ¡Maja! ⁴⁶ Nojuacuajaari janiyajiniji naajiotaquiaari. Naacuajitij, niaa jaara seetanujuanaa na naajiotasanoocua tiuuriquia, niaa maara cucua tiuurijuhuaj. ⁴⁷ Nocuaji, niaa jaara Moisés naajiotasanoocua tiuyaquiquiaa, ¿niaatucua taa tiuuri quiarjia cua pohuatasanoocuanii?

6

Jesu mianuutesacari cinco mil canuu

(Mt 14.13-21; Mr 6.30-44; Lc 9.10-17)

¹ Na nuhuaji, canaari Jesuta niuutiaquiaari Galilea caminia taquijiriani. Galilea caminia sesa quiquiaarijuhua Tiberias caminia. ² Jiyanoehua queraatia pueyari Jesu niquiquiaari tari, cusosuhua na naatanijiosacari. Naaratej, nojoriiri Jesu neteyotariquiaa caminia shuriuquico. ³ Canaa shiitiasacari caminia taquijiria, Jesuuri canaa tacatamaa tuhuananuucua. Tii cajitiasee canaari. ⁴ Jiyacaritij, quera Pascuara queranacusacariiri quiriquiaa. ⁵ Jesu niquishacari jiyanoehua queraatia pueya nocua niyano, canaa cojinia Felipe sequereeri:

—¿Tee pa masenutaniya queraatia pan nio pueyaraarini?

⁶ Naa Felipe nequesotareeri nareja na saniniuria. Jesuuri tari nishiriquiaa taa nojuajanaa mianuutenutaniya cuno pueyani. ⁷ Felipeeri na riucuaaree:

—¡Paa jaara cumaneeca jiitiare doscientos juuca pa poonijosanojiniji pan pa masetajarani, cuno maara najuhuaa secaja quiri puetunu nojorirajanaa!

⁸ Jiyacaritij, canaa cojinia Andrésri Jesuucua nimiaa. Andrésri Simón Pedro tarajanu. Nojuajaari Jesu saquiriojosano pueyanojuhuj. Jesu sequeseeri:

⁹ —Jiyaniijianaa, caya samijia niya cinco pan jiitiaa cebada cashojua-jiniji shipinishano, caapiqui sapitiaajanio. Naajaa, cunoori najuhuaa puetunu cuno pueyarajanaa.

¹⁰ Jesuuri saaja canaa na saquiriojosano pueya sequereeri:

—Puetunu pueyajanaa nia sequere cuaara cajitiuuria.

Cuniqui, canaa tii quiriquiaani, shanohua jiyasocuaari quiriquiaa, maninia cajitijua. Naaratej, pueyari cajituri. Puetunu cuno pueya maanujinijinojuanaani, saaja canuuri quiquiaari cinco mil pueya. ¹¹ Jiyacaritij, Jesuuri cuno pan pataree. Pueyaso secojoree nocuaraari. Na nuhuaji, canaa na serotaniriiri. Canaari cajitiuyano pueya puetunu na panishanojuanaa niquitiojoreeni nojori miaquenuusocoriquiaa. Jesuuri naa miirii sapitiaajajuhuj. ¹² Puetunu pueyajanaa jaara tooquioquiaari, Jesuuri canaa na saquiriojosano pueya sequereeni:

—Puetunu miaquesano raquiquiajanaa nia reraterohua, maja najuhuaa na niitiasaanura.

¹³ Canaari cuno cinco panjiniji pueya miaquesano raacua reratereeni. Canaa reratesacari, canaari doce canaasatu mishinijioreeni. ¹⁴ Pueya niquishacari naa Jesu miishano na cumaacatej, nojoriiri sequeturiquiaa:

—¡Nio pueyanoqui seetanujanaa Pueyaso sequenu panishano caminiujiunia, nooj, tariucuaaanu sequesaaquiaari pocua niriquianotej!

¹⁵ Jesuuri niishirii cuno pueyari na quianu paniriquiaa, nojori jiyatenura nojuaja puetunu Israel pueyajanaa jiyaniijia na quiniuria. Nocujaj, Jesuuri tamajaaja tacaquese socua jiyaconaja tuhuananuucua.

Jesu rucuanesacari mohuaca caco

(Mt 14.22-27; Mr 6.45-52)

¹⁶ Tariucua pananu tiuquishacari, canaa, Jesu saquiriojosano pueyani, canaari rosetaarohua caminiajiniarani. ¹⁷ Canaari botejinia

tacataseeni, cuniquiji Capernaum tiacajiniara canaa niuutianura caminia taquijiria. Tariucua ninishiquiri quiriquiaa. Majaari Jesu tiuquiniu quiriquiohua juhuanajuaja canaacua. ¹⁸ Tari canaa niuutiasacari, paratuuri jiyanhua piyarojoriquiaa. Caminiaari cunora jiyanhua cajiniuucuariquiaa. ¹⁹ Canaari tari caminia jiuujiajinia quiriquiaani, seis kilómetroruhua canaa ruparetasaquiji. ¡Canaari jiyacari casaa niquirii canaacua catecanoyanoni! ¡Mohuaca caco canujuriquiaari! ¡Canaari nocuaji shiriqutiurii jiyanhuanoni! ²⁰ Jiyacaritij Jesuuri canaa sequereeni:

—¡Maja pueretunu! ¡Janiyacujajaniija!

²¹ Na rupaa canaa tojishacari, canaari shuquiriaatia na tacanitiurii botejiniani. Canashiyaquiji boteeri ritia shiitiasee terara canaa quariquiaacuajani.

Jesu mianuutesano pueya pajesacari nojuaja

²² Jaara juhuaquequiaari, Jesu mianuutesano pueyari na pajenuunu coteequiaari tee canaa quiriquiaa caminia taquijiriacuajani. Nojoricua-jaari tenacari niquiquiaari saaja niquiriyatu boteeri shiitiriquiaa. Saaja canaa, Jesu saquiriojosano pueyani, canaari cuno botejinia quiaquiaariuhua nojori niquiarani. Majaari Jesu quianu quiriquiaa cutara canaata. ²³ Jiyacaritij, Tiberias tiacajiniji boteeri tiuquijioquiaari catecaja nojorijiniji, tee Jesu mianuutequiaari nojoricuajani. ²⁴ Cuno pojori niishishacari maja Jesu quiniu quiriquiaa tari tii, canaa na saquiriojosano pueyajuhuj, nojoriiri cuno boteyajinia tacataquiaari. Nojoriiri Capernaum tiacajinia nijioquiaari cuno boteyajinia, tii nojori pajenura Jesu.

Jesucristo juhua poojia miaquesano

²⁵ Cuno pojori tiuquijiosacari caminia taquijiria, Jesu riuriatatusaari. Na nequesotatureeri:

—Niishitiojonanaa, ¿taacari quia niyarohuacuaarini?

²⁶ Jesuuri saaja nojori sequeree:

—Janiyari seetanujuanaa nia sequeyani, majaari nia pajenu janiya nia niquiniuucua cua cumaacata cua miishano. Niaari cua pajenuya saaja cua mianuutenuucua niajaniya, taa nia tooquiorucuaacuajani, cua mianuutesacari niajaniya. ²⁷ Maja saaja miaquesanoocua nia tacaaniu, nia cuaqueya nia cumaquitajara. Cunoori maja na jiyatenu quiniutianiya niajaniya pueyaracaanu rishijiara. Saaja nia tacaari cutara nioojia samiitianija miaquesanoocua, pueyaracaanu rishijia nia quiniuria. Janiyacuajaari cuno nia niquitioriquianoni, pueyano cua quiniuucua. Cua Quecuaajaari cunora cua jiyaroquiaari. Cunora, cua Queeri cua miitiquiaa cua miishano na cumaacata, nia niishiniuria janiyari na jiyarosononi.

²⁸ Cuno pueyari Jesu nequesotaree:

—¿Casaa canaa miiniutianiyani Pueyaso panishano canaa miiniuria, Pueyaso shuquiritiasano canaa quiniurijuhuj?

²⁹ Jesuuri nojori riucuaaree:

—Pueyaso jiyarosanoocua nia tiuuri. Saaja naa nia miishacaritij, Pueyasoori nia shuquiritianutaniya.

³⁰ Cuno pueyari Jesu sequeturee:

—Canaa niquiara quia cumaacata casaa quia miiricuarajaj, canaa niishiniuria quiaari seetanujuanaa Pueyaso Jiyarosano. ¿Casaa canaa quia niqutiniutianiya canaa tiuuniuria quiocuani? ³¹ Canaa quia niq-uitiricuaraja quia cumaacata quia miishano, taa Moisés niqutiquiaari canaa supuetanaacuaani. Nojuajaari jiyocuacaanuji pan tinqiuaari pueyaracaanu nojoriria, cariiquia jiyajinia nojori rucuanijosacari. Naa naajiotasano quiyacuajaari tariucuacaanu Pueyaso Rupaajinia: “Nojuajaari nojori mianuutequiaari jiyocuacaanuji tinio pan”. Naacuajitij, canaari niishiyani Moisés cuajaari Pueyaso jiyarosano quiquiaari.

³² Jesuuri nojori riucuaaree:

—Seetanujuanaa nia sequeyanijia, cuno jiyocuacaanuji panni, cunoori maja Moisés tinishano quiquiaari. Majaari seetanujuanaa jiyocuacaanuji pan na quiniu quiquiaarijihuaj. Quiarijia cutara, cua Queeri niaacua jiyarorucuaa seetanujuanaa jiyocuacaanuji panjanaa cutara. ³³ Cuno, Pueyaso niqutiosano pan jiyocuacaanuji rosenoni, cunoori puetunu mijiria quiniaa pueyajanaa samiitianijiojua cutara.

³⁴ Naaratej, cuno pueyari Jesu sequeeree:

—¡Jiyaniijianaa, quiocua pueyaracaanu canaa niqutioriquia cuno pan!

³⁵ Jesuuri nojori sequeeree:

—Janiyacujaari cuno panni, pueya samiitianijiojuani. Cante cucua niyani, majaari na miaajenu quiniutianiya socua. Cante cucua tiuuri-ijiaaniuhuj, majaari na jiyamuenu quiniutianiyajuhuj. ³⁶ Taa cua sequeeree tari niajaniryacuajani, niari juucua cua niquiya. Majaari quenaaja cucua nia tiuuniu. ³⁷ Naajaa, puetunu cua Que niqutiosanojuanaa janiyani, nojoriiri cucua niya. Cuno pojori, cante cucua nijiyani, majaari cua ruuretanu nojori. ³⁸ Majaari jiyocuacaanuji cua rosenu quiquiaari cua miiniuria tama cua miiniu panishanojuaja. Mijiria niquiariniijia saaja cua Que panishano cua miiniuria, cante cua jiyaroquiaaricuajani. ³⁹ Majaari cua Jiyarona paniniu cua juurequetenura quenaaja niquiriy-atujua na niqutiosanojiniji janiya. Nojuajaari paniya cutara, nojori cua samiitianijionura jiya puequesacari. ⁴⁰ Canapuate cucua tiuujiacani, nojori niishishacari janiya Pueyaso Niyanuni, cua Queeri puetunu cuno pojorijianaa paniya pueyaracaanu rishijiaca nojori quiniuria. Naacuajitij, janiyari nojori samiitianijionutaniya jiya puequesacarini.

⁴¹ Jesu sequenucua, “Janiya jiyocuacaanuji roseno panni”, ti quiniaa narta Judiocuacaari cunora juaaquioree. ⁴² Sequetureeri:

—¿Majate nio pueyano Jesucuaaja, José niyanutej? ¡Paacuajaari na queya niishiyani! ¿Casaara quiarijia na sequeyari: “Jiyocuacaanuji rosenonijia”?

⁴³ Jesuuri nojori sequeeree:

—¡Tariucuaja! ¡Maja nia juaaquiону! ⁴⁴ Pueyanoori maja na naata tiuuniu cucua tamajaaja, cua Que jaara noojiajania poonijiyacquiri. Janiyari puetunu cucua tiuuniaajanaa samiitianijionutaniya jiya puequesacarini. ⁴⁵ Tariucuacaanu pueyara Pueyaso sequesano caminiujiunia naajiotasanocuajaari naa sequeya:

“Pueyasocujaari puetunu nojorijianaa niishitiojonutaniya”.

Naacuajitij, cante cua Que niishitiojosano tojijia seetanujuanaani, nojuajaari cucua tiuya.

46 'Cua Queeri maja pueya niquishano quenaaja. Saaja na niquinia cutaraari janiya cante Pueyasojiniji niquiaaricuaajani. 47 Seetanujuanaa nia sequeyanijia, cante cucua tiuujiani, nojuajaari tari pueyaracaanu rishijiaa jatanishaaree. 48 Janiyacuajaari pueya samiitianijia panni. 49 Cariiquia jiyajinia nia supuetanaa camarucuneejotasacari, nojori-iri cuno jiyocuacaanuji tinio pan miaquenuuquiaari juucua. Naajaa, saaja cusonuquiaariiri. 50 Saniniuujia, cante quiarijia seetanujuaanaa jiyocuacaanuji roseno pan miaqueyani, majaari Pueyaso shaa-janu quiniutianiya nojuaja. 51 Janiyacuajaari cuno samiitianijia panni, jiyocuacaanuji rosenoni. Cante nio panjiniji miaquejani, nojuajaari pueyaracaanu quijia quiniutianiya. Nio pan, janiya na niqutionutaniya puetunu mijiria quiniaa pueyacularajanaani, cunoori tama cua cuaqueyajaaja.

52 Jiyacaritij, tii quiniaa narta Judiocuacaari naa sequetooree tama-jaaja na juaaniutia:

—¿Nio pueyanotucua taa miaquetere tama na cuaqueyajaaja panyani?

53 Jesuuri jiyacari nojori sequeree miriqui:

—Seetanujuanaa nia sequeyanijia, niaa jaara miaqueyaquiri cua shu, niaa jaara ratuyaquiri cua nanacajuhuaaj, majaari samiitianijosano nia quiniu quiniutianiya, pueyaracaanu quijia nia quiniuria. 54 Cante cua shu miaquereeni, cante cua nanaca ratureejaaniuhuaaj, nojuajaari tari naatarohua shuquiriaatia na quiniuria pueyaracaanu. Jaara cusoyare, naajaa, janiyari na samiitianiniutianihuaa jiya puequesacari. 55 Cua shuuri seetanujuanaa miaquesano cutara. Naajuhuaaj, cua nanacaari seetanujuanaa ratusano cutara. Cunoori maja juhua mijiria nia miaquesano. 56 Cante cua shu miaquenani, cante cua nanaca ratunajaniuhuaaj, nojuajaari coojia rupueja. Janiyari noojia rupuejajuhuaaj, pueyaracaanu rupuetootesano canaa quiniuria. 57 Cua Jiyarona cua Queeri seetanujuanaa quijia cutara. Cua Que rupueja cua quishacari, janiyari cunora shaajeyashijiani. Naaratej, cante cua miaquenani, nojuajaari pueyaracaanu quijia quiniutianiyajuhuaaj, na rupuesacari janiya. 58 Janiyari maja juhua nia supuetanaa miaquesano panni. Nia supuetanaari cuno pan miaquenuuquiaari najuhuanaj. Naajaa, saaja cusonuquiaariiri. Janiyari seetanujuanaa jiyocuacaanuji roseno pan cutarani, nia miaquesocoriguiano. Cante cua miaquejani, jaara cusoyare, naajaa, samiitianutaniuhuari pueyaracaanu quijia na quiniuria.

59 Jesuuri puetunu niojuanaa pohuataquiaari pueya niquiara Pueyaso secojojua tiajinia Capernaum tiacajinia.

Queraatia Jesu nuhuajiniaa pueya cartesacari nojuaja

60 Naa pueya tojishacari Jesu niishitiojosanotej, queraatia na nuhuajiniaa pueyari naa sequetooquiaari tamajaaja:

—Cuno na sequesanoori jiyanojua jiyajeneta pa miiniuria puetunujuanaa. Maja pa naata. ¿Cantucua na tojirijaaraaranijia?

61 Jesuuri naa nojori sequesano niishirii noojiajinia. Nocuaji nojori sequereeri:

—¿Niaateeri naa cua sequenuucua juaya? 62 ¿Niaatucua taa sequere socuani, niaa jaara cua niquiri tacaano jiyocuacaanuhua, teje cua

niquiaaricuajani? ⁶³ Cua shu maja cumaacaraca pueya na samiitianiniuria. Saaja cua Sohuanu cutaraari pueya samiitianijia, pueyaraanu rishijiaca nojori quiniuria. Niaa jaara cua sequesanoocua tiuuri, cunoori cumaacaraca cutara na samiitianiniuria nijaniya. ⁶⁴ Noojiaqueya nijaniyajinijinioori cucuaji taacanuyajaa.

Jesuuri tarijia niishijia cante nocua tiuyashijiacani, mariyata cante na paraa na quiatenutaniyani.

⁶⁵ Naa sequeree socua cuno pojoriiri:

—Janiyacuajaari cunora nia sequereeni: “Maja pueyano naata cucua tiuuniu, cua Que jaara noojiajini poonijiaquiri”.

⁶⁶ Jiyacaritij, queraatia Jesu nuhuajiniaa pueyari na cartequiaari. Nojoriiri maja tari Jesuta na rucojonu quijia. ⁶⁷ Nocuaji, Jesuuri jiyacari canaa na saquiriojosano pueya nequesotaree:

—¿Niajanियariuhuj, niaateeri cua cartenutaniyajaacuhuj?

⁶⁸ Simón Pedroori Jesu riucaaree:

—¡Maja Jiyaniijiajanaa! ¿Canaatucua tamonu jiyaniijiaacua pacureni? Canaa quia pohuatasano cuajaari na naata canaa jataniniu pueyaraanu rishijia canaa quiniuria. ⁶⁹ Canaacua jaari tari quiocua tiuquianuni, canaa niishishacari quiaari Pueyaso Niyanu, saa maninia miijiaja.

⁷⁰ Jesuuri canaa sequeree:

—Niaacuajaari tama cua saquiriojosano doce pueyajaaja. Saniniujia, niquiriyatu nijaniyajinijinioori sesaaca.

⁷¹ Naa Jesu sequesacaritij, Judasjiniji sequeriquiaari, Simón Iscariote niyanuni. Nojuajaari seetanujuanaa niquiriyatu canaajinijinio Jesu doce saquiriojosano pueyajinijinio quiquiaari. Naajaa, tama na Jiyaniijiajaaja tacartariquiano quiri quiaquiri.

7

Tama Jesu tapueyocuacajaaja Jesuucua tiuyashijiaa quiquiaari

¹ Na nuhuaji, Jesuuri Galilea jiyajinia rucuaneriquiaa. Canaari na cojiriquiaani. Majaari na quiniu paniniu quiri quiaa Judea jiyajinia, tii quiniaa Judiocuaca monu panishacari nojuaja. ² Jiyacaritij, quera socua canaa Judiocuaca queranacusacariiri quiquiaari Jerusalén tiacajinia. Cuno queranacusacariiria pueyari ocho juuca shocotejoquiaari suhuorotucujinia nojori quishacari. Naa miituquiaariiri puetunu marijarajanaa canaa niishiriojonura, canaa supuetanaa Israel pueyari saaja suhuorotucujinia quijiaca quiquiaari, pueyaracaanu nojori camarucuneejotasacari cariiquia jiyajinia nojori quishacari. ³ Jiyacaritij, tama Jesu tapueyocuacajarjia naa Jesu sequeturee nojori macaatinuria nojuaja:

—¡Majaari niyaja quia jateenu! Quiocua queranacunuucua Judea jiyajinia quiaarejuhuaj. Quiocua tii miijiosee quia cumaacata, quia jiyopue niquiniuria puetunu quia miishanojuanaa. ⁴ Pueyano jaara puetunu pueyajanaa tojiniu panishano pueyano quiniu paniri, ¿maatucua casaara jiyasohuaja miijiore na cumaacatani? Naatej, taa niya quia miijioquiaa quia cumaacatacuaani, naa quia miijiosee puetunu pueya niquiaraanaa Jerusalén tiacajiniajuhuaj.

⁵ Majaari quenaaja tapueyocuaca tiuuniu quijia Jesuucua. Cunora naa na sequetureeri. ⁶ Jesuuri saaja nojori riucaaree:

—Juhuanajuaja maja cua quiasacari cua miiniuria taa nia sequeyacuajani. Niaa jaara quianu paniri, niama juhuajaniya quiaaretej.⁷ Niarta mijiria quijiaca pueyari maja na naata juaaniu nijaniya. Janiya cutaraari nojori niquniu paniyaquishooni. Cua niqutiuniu paniyaquiquiaari, nojori cua niishitishacari nojori miishanoori sesa.⁸ Nia quiojiyare queranacunuucua. Janiya cutaraari maja cua quianu quiniutianiya juhuanajuaja. Quiarijiani, puera juhuacarijaari cua miiniuria taa nia sequeree janiyacujani.

⁹ Naa nojori na sequenu nuhuajitij, Jesuuri cuniquijia jiyojeree Galilea jiyajinia.

Jesu quishacari cuno queranacunuunujinia

¹⁰ Na tapueyocuaca jaara quiojoquiaaricuaa Jerusalén tiacajiniara tii queranacunuunura, Jesuuri jiyasohuaja quiaaree nojori nuhuajijiuhuaj. ¹¹ Queranacunuusacari, narta Judiocuaca camarucuaari Jesu pajenuuriquiaa. Nojoriiri na sequeturiquiaa:

—¿Tee cuno pueyano quiyarini?

¹² Puetunu pueyajanaari Jesujiniji sasacojotooriquiaa. Noojiaqueyari sequeriquiaa:

—Jesuuri maninia pueyano.

Tamasacaari saniniuujia sequeriquiaacujua:

—¡Maja maninia pueyano! ¡Pueya sapojoua najuhuanaj!

¹³ Puetunu pueyajanaari naa sasacojotooriquiaa jiyasohuaja, nojori pueresacari narta Judiocuaca camarucua.

¹⁴ Jiuujianaraca juuca jaara tari shocojoquiaari nojori queranacunuusacari, Jesuuri jiyacari shusha tiuquiquiaari Pueyaso Secojoua tiajinia. Tii coteeree pueya niishitiojonuuri. ¹⁵ Canaa Judiocuaca camarucuaari jiuujiatequiaari nojori tojishacari Jesu niishitiojosano. Naa sequetureeri:

—¡Cuno pueyanoori maja quenaaja na serojonu quiquiaari! ¿Taa na niishiya pueraarini?

¹⁶ Jesuuri nojori sequeree:

—Cua niishitiojosanoori maja tama cua niishishanojuaaja. Cunoori cua Jiyarona niishitishano janiya. ¹⁷ Cante Pueyaso panishano miiniu paniyani, nojuaja cuaara miiria taa cua niishitiojiyacuaani. Naacuajitij, nojuajaari jiyacari niishiniutianiya, cua niishitiojosanocuaajaari Pueyasojiniji seetanujuanaa, maja tama cua niishishanojuaaja. ¹⁸ Cante tama na niishiriojosanojuaaja pahuatajani, nojuajaari saaja naa miiquiaa juhua tojishano pueyano na quiniuria. Jiyano pueyano cuaara tojiyaquishaaria. Saniniuujia, cante na jiyarona niishitiojosano pahuataa pueyani, pueya tojiniuria na jiyarona, cuno pueyano pahuatasano cutaraari seetanujuanaa. Cuno pueyanoori maja pueya sapojoua.

¹⁹ ¿Niaateeri seetanujuanaa supuetana Moisés Rootasano tojitiajaca? Majaruhua. Majaari quenaaja niquiriyatu nijaniyajinijinio na rootasano tojijia. ¿Casaara nia monu paniya janiyani? ¿Supuetana Moiséste naa nia niishitiojiya na naajioneejinia?

²⁰ Nojoriiri Jesu riucuateree na juaaniutia:

—¡Quiaaqui samaruraca! ¿Cante quia monu paniyani? ¡Canaa quia sequeretoj!

²¹ Jesuuri nojori sequeree:

—Puetunu nijaniyajanaari shiriqitiuquianu samaatenu juuca cua miishacari niquiriyatu casaaniyojua cua cumaacata. ²² Supuetana Moisés cuajaari nia rootaquiari nia mueya cararaatiuuquia co nia miatenura, ocho juuca jaara na shocojore na rasaanujiniji. Seetanujuanaa, nio niishishanoori maja tama Moisés niishishanojuaaja. Cunoori tariucuaaanu pa supuetanaa niishishano Moisés niyacarijia. Pueyari naa rootasaaquiari naa nojori miiniuria necohua, seetanujuanaa Pueyaso saquiriojosano Israel pueya nojori quiniuriajuhuaj. Naaratej, jaara quiri samaatenu juuca, naajaa, niaari naa nia niquiohua cararaatiuuquia co miatejoquiaa. ²³ Naa nia miishacari samaatenu juucatej Moisés Rootasano nia tojiniuria, ¿casaara nia juaya janiyani, cua naataniniuucua cusosu samaatenu juucani? Niaari saaja shiitianiyojua miatejiya, maninia nia niquiohua quiniuria Pueyaso niquiara. Janiya cutaraari puetunu cuno cusosu cuaqueyajanaa jeecacanuni. ²⁴ Naaratej, maja ritia pueya juaajia nia quiniu, nia niishiyaquishacari maninia. Jacaria niishiriojojua nia quiri, niaa mariqui najuhuana pueya juaariiri na miishano jaara sesa quiyaquiri.

Jesu pohuatasacari tama nojuajinijiaaja

²⁵ Jiyacaritij, noojiaqueya Jerusalén tiacajinijinio pueyari tama seque-tooreejaaja:

—¿Majate nio pueyano pa camarucua pajesanocuaaja na mosocoriquianotej? ²⁶ ¿Taateni? Noocujaruhua juhuajaniya pohuataa pueya niquiaratej. Majaari quenaaja pa camarucua tenujununoj. ¿Pa camarucuate jiyaniya soj, nojuaja seetanujuanaa Cristo, tariucuaaanu sequesano pocua jiyarosaariquianotej? ²⁷ Paacuaajaari nio pueyano niishiyani, tejenote nojuajani. Saniniuujia, Cristojuanaa jaara tiuquiri, majaari quenaaja na niishishaanu quiniutianiya cutara tejenote nojuajani.

²⁸ Jesuuri jiyacari niishitiojoriquiaa Pueyaso Secojojuajinia. Naa na tojishacari pueya sequesantej, naa na rupaa paaretareeri:

—¿Naatee? ¿Niaateeri cua niishiya? ¿Niaateeri niishiyajuhuj, tejenote janiyani? Naajaa, majaari cua ninu quiquiaari tama cua panishacarijiaaja. Janiyari jiyarosanoni. Cua Jiyaronaari seetanujuanaa quijiajuhanajaj. Nojuajaari nia niishishoo. ²⁹ Janiyari na niishiya cutarani. Janiyacuajaari tiji ninioni. Nojuajaari cua jiyaroquiaari.

³⁰ Nojoriiri jiyacari Jesu quiatunu panirii. Naajaa, majaari quenaaja tamonu naata quiriquiaa na quianura. Majaari na naata quianu quishaaquiari, juhuanajuaja na monu juuca quiyaquishacarijia. ³¹ Saniniuujia, queraatia cuniqui quiniaa pueyari Jesuucua tiuquiaari. Nocua tiuuniaari naa sequetuquiaari:

—¿Cristojuanaa jaara tiuquiri, nojuajatucua socua jiyajeneta casaa miri na cumaacata nio pueyano miishanojiniji?

Fariseocuaca quiatenu panishacari Jesu juucua

³² Fariseocuacaari cuno pueya tojiquiaari naa nojori maniniuhuaqueetaano Jesu. Naaratej, cuno Fariseocuaca, pueyacuara secojonaa camarucuanio, puetunu nojorijianaari Jesuucua rojotooquiaari. Na nuhuaji, nojoriiri Pueyaso Secojoja tia cojuanaa pueya jiyaramiquiariaari Pueyaso Secojoja tiajiniara, tii nojori quianura Jesu. ³³ Jesuuri jiyacari nojori sequeere:

—Janiyari saaja rupaquijia niaata quiniutianiyani. Na nuhuaji, janiyari cua Jiyaronaacua riujiuuniutianiuhuani. ³⁴ Niaari cua pajenu-unutaniya najuhanaj. Majaari nia riuriatanu quiniutianiya janiya. Majaari nia naata quianu quiniutianiya tee cua quiniutianiyacuaani.

³⁵ Nocuaji, cuno Judiocuacaari tama sequetoorejaaja:

—¿Tee na quianutaniyajanojoni naa pocuaaniquitij, na riuriataaquishaanurajuhuaaj? ¿Parta Judiocuacaacua quianutaniya soj, noo pojoriicua Griegohua tajinia niayaquejoquiaaritij? ¿Tii niishitiojonutaniya cuno taucuaca soj? ³⁶ ¿Casaa na sequenu paniya pajaniyarini na sequesacari: “Niaari cua pajenutaniya najuhanaj. Majaari nia riuriatanu quiniutianiya janiya”, na sequesacarijuhuaj: “Maja nia naata quianu quiniutianiya tee cua quiniutianiyacuaani”?

Jesu pahuatasano miriqui Pueyaso Sohuanujiniji

³⁷ Siete juuca jaara tari shocojoquiaari, queranacunuunu puequesacari juucajanaari juhuaquequiaari. Cuno juucaari quiquiaari socua Pueyaso timitiasaanu juuca. Jiyacaritij, Jesuuri nujuaquiaari pueya niqiuara. Jiyanohua na rupaa paaretareeri. Naa sequereeri:

—¡Cante jiyamueyani, nojuaja cuara niiria cucua, na ratunura janiyajiniji! ³⁸ Cucua na tiushacari, nera quiniutianiyari taa na naajiotasaaquiaari tariucuaaanu Pueyaso Rupaajiniacujani. Naa sequeyari: “Cante cucua tiuyani, pueyano samiitianijiojua mohuacaari noojiajiniji jaatenutaniya”.

³⁹ Naa Jesu sequesacaritij, nojuajaari Pueyaso Sohuanujiniji pahuatariquiaa miriqui. Jiyacaritij, Pueyaso Sohuanuuri juhuanajuaja maja na quiniu quiriqiaa mijiria, Jesu tacaaquishacarijia Jiyaniijajanaa na quiniuria. Naaratej, tii quiniaa pueya sequeriquiaari, cante quiarijia nocua tiuyani, nojoriiri Pueyaso Sohuanu masenutaniya na nuhuaji, nojuaja jaara na jiyarosee jiyocuacaanuji.

Pueya juaatioosacari Jesuucua

⁴⁰ Jesu jaara pahuatanu puecaquiaari, tii quiniaa pueyari tama pocoojoriquiaajaaja. Noojiaqueya nojorijinijiniori sequereeri:

—¡Nio pueyanoqui seetanujuanaa Pueyaso sequenu panishano caminiujunua, nooj, tarijia sequesaaquiaari pocua niriqianotej!

⁴¹ Tamasacaari saniniuujia naa sequeriquiaacujua:

—¡Nojuacuajaari Cristo, Pueyaso Jiyarosano pocua!

Tamasacaari saaja nojori riucuaree:

—¿Cristoteeri Galilea jiyajiniji supuenutaniya? ¡Maja! ⁴² Tariucuaaanu Pueyaso Rupaajinia naajiotasanojiniji, paari niishiyani, Cristoori pa supuetanaa jiyaniijia David niqiuhuajiniji supuenutaniya. Belén tiacajinia rasaanutaniyari, supuetana David tiacajinia.

⁴³ Naacuajitij, puetunu pueyajanaari Jesuucua juayonuutaquiaari.

⁴⁴ Tamasacaari saniniuujia Jesu quianu paniriqiaa juucua. Naajaa, majaari na quiatunu quirii.

Judiocuaca camarucua tiuyaquishacari Jesuucua

⁴⁵ Pueyaso Secojoua tia cojuanaa pueyari Jesu tojitariquiaa juhuanajaniya. Na nuhuaji, socua quiojiyarohuari na jiyaramiquiniaa pueyacua. Nojori jiyaramiquiniaa pueyari quiquiaari Fariseocuaca, pueyacuaara secojonaa camarucuanio. Nojori jiyaramiquiniaari nojori sequereeri:

—¿Casaara Jesu nia jaatucuyaquimiohuani?

⁴⁶ Nojori jiyaramiquishano pueyari saaja nojori riucuaaree:

—¡Majaari quenaaja tamonu pueyano pocuanu juhua cuno pueyano-jua, seetanu rupaaajanaa pohuataja cutara!

⁴⁷ Fariseocuacaari cunora nojori juaarii:

—¿Niaateeri niaacua na shanacuree na sapojonura niajanijajuhua?

⁴⁸ ¿Tamonu pa camarucuajinijiniote nocua tiurii, canaa Fariseocuacajinijiniojuhua? ¡Maja! ⁴⁹ ¡Cuno pojori Jesuucua tiuujiacani, nojoriiri Moisés Rootasano niishiyashijiaca! ¡Nojoriiri sesoriguia seque!

⁵⁰ Nicodemoori narta Fariseocuacata tii quiriquiaa. Nojuajaari noo Nicodemo quiriquiaa Jesuucua niquiaari niucuatej. Nojuajaari narta Fariseocuaca sequere:

⁵¹ —Pueyanaa, supuetana Moisés cuajaari pa rootaquiaari maja najuhua na sesacanura pueyano, paa jaara coteenu na nequesoreyaquirini casaa na miiriini.

⁵² Narta Fariseocuacaari Nicodemo juaarii saaja:

—¿Quiaateeri narta Galilea jiyajinijinio pueyanojuhua? ¡Jacaria quia pajere tariucuacaanu Pueyaso Rupaajinia! ¡Quiocua jiyacari niishiri majaari quenaaja niquiriyatu Pueyaso sequesano caminiujunia pueyano supueno quiniutianiya Galilea jiyajinia!

⁵³ Na nuhuaji, puetunu cuno pojorijianaari na tiajinia quiojijarohua.

8

Jesu jiyanooshacari maaji

¹ Jesuuri saniniuujia Olivo cuhuariquiaajinia quiaaree. ² Jesuuri tariquicuaji tiuquiriohua Pueyaso Secojoua tiajinia. Canaari nata quiriquiaajuhua. Pueyari nocua rerejoquiaari. Nojuajaari cajirii pueya na niishitiojonura juuca.

³ Moisés Rootasanojiniji niishitiojonaa, mariyata Fariseocuacanio, cuno pojoriiri jiyacari maaji jaatucumaa Jesuucua. Cuno maajiiri ruriatasaaquiaari numuetucushiyano. Nojoriiri cuno maaji nujuateree pueya tacoji. ⁴ Jiyacari Jesu sequetureeri:

—Niishitiojonanaa, nio maajiiri quiasaaree numuetucushiyano.

⁵ Moisés Rootasanojiniji paari niishiyani, jiyano maaji cuara mosaaria saitia jacusano. ¿Quiajanijarijataj, taa quia sequeyanijia?

⁶ Judiocuaca camarucuacari naa Jesu nequesotaree najuhuanaj, nojori tojiniuria casaa na sequenutaniyani. Jesu jaara nojori sequere maja nojori miiniuria Moisés Rootasano, nojori maara nocuara saquiriojotare nojori jiyaniijianucua. Jesu cutaraari maja quenaaja nojori na riucuanu quirii. Nojuajaari saaja jojoree, jiyajinia na naajionura na juaashiquiata. ⁷ Pueyaracaanu nojori nequesoreesacari nojuaja, Jesuuri socua sanerohua. Nojori sequereeri:

—Teyano niajanijajinijiniote sesa miyashijiani, nojuaja cuara na coteetaara janu.

⁸ Jesuuri jojorohuacuhua socua na naajionura jiyacua. ⁹ Cuno pojori tojishacari naa Jesu sequesantej, puetunujuanaari sanaa quiojorohua. Juhucatecara quiojonu coteequiaariiri socua saaquiapue, na nuhuaji, socua naatujoori nojorijiniji. Nojoriiri naa quiojoquiaariuhua puetunujanaa. Saaja Jesuuri jateeqee cuno maajitia. ¹⁰ Jiyacaritij, Jesuuri sanerohua. Maaji sequereeri:

—¿Teete quiocuara saquiriojotanaani? ¿Majate quenaaja tamonu curenu quirii na jacunura quiajaniya saitia?

¹¹ Maajiiri Jesu riucuaaree:

—Shaaqui puetunujuanaa, Jiyaniijianaa.

Jesuuri maaji sequereee:

—Janiyari quia jiyanoya cutarani. Juhujaniya quia quiaarohua. Majaari sesa quia miiniu socua.

Jesuuri pueya jiuujia cuhuatana

¹² Nojori nuhuaji, Jesuuri pueya niishitiojonu coteerohua. Nojori sequereeri:

—Janiyari pueya jiuujia cuhuatanani. Cante cucua tiuuriini, majaari tari ninishiqui quijia na quiniu quiniutianiya. Pueyaracaanu cuhuashiqui quijia quiniutianiya cutaraari.

¹³ Tii quiniaa Fariseocuacaari naa Jesu juaarii:

—¡Quiaacuajaari tama quia cuaqueyajiniji pohuataa! ¡Puetunu quia pohuatasanojuanaari maja tojishano!

¹⁴ Jesuuri nojori riucuaaree:

—Tama cua cuaqueyajinijiaaja cua pohuatasacari, cunoori maja najuhuana pohuatasano. Cua pohuatasanoori seetanujuanaa cutara. Janiyacuajaari niishiyani teje cua niquiaarini, tee cua quianutaniuhuanani. Niaari saniniuujia niishiyaquiyacujua teje cua niquiaarini, tee cua quianutaniuhuanani. ¹⁵ Niaari pueyacuara saquiriojotaquiaa saaja nia niquishanojiniji, nia tojishanojinijiiuhuj. Janiya cutaraari maja cua saquiriojotanu pueyacuara. ¹⁶ Janiya jaara juaari sesa mijia cutarani, cua sequesano cutaraari seetanujuanaa, niquiriyatujua cua quiyaquishacari. Cua Jiyarona cua Quecuajaari cua cojiquiaa cuata na juaniuria sesa miijiaa. ¹⁷ Niaacuajaari Moisés Rootasanojiniji niishitiojoquiaa: “Caapiqui pueyanu pohuatasano jaara juhua tarajanu pohuatasano quirijiiuhuj, cuno cutaraari seetanujuanaa”. ¹⁸ Naajuhuj, canaari caapiquini. Tama cua cuaqueyajaaja cua pohuatasacari, cunoori seetanujuanaa, cua Jiyarona cojishacari janiya. Nojuajaari cua Que.

¹⁹ Fariseocuacaari na nequesotaree:

—¿Teeteeri quia queni?

Jesuuri nojori riucuaaree:

—Majaari nia niishiniu janiya, cua Quejuhuaj. Niaa jaara cua niishiriquia, niaa maara cua Que niishirijiiuhuj.

²⁰ Jesuuri puetunu nio pohuatariquiaajanaa Pueyasora niqutiojosano cumaneeca racataja shuriucuaji, Pueyaso Secojoua tiajinia. Naajaa, majaari pueya quianu quiriiquinioj, juhuanojuaja na monu juuca quiyaquishacarijia.

Jesuucua tiuyashijiaaari jiyanoyaquishaanutaniya

²¹ Jesuuri cuno Fariseocuaca sequerohuacuahuaj:

—Janiyari quianutaniyani. Niaari cua pajenuunutaniya juucua. Niaari cusonuunutaniya sesa miijiacaja, jiyanooshoo nia quishacarijia, cucua nia tiuyaquiniucua. Naaratej, majaari nia naata quianu quiniutianiya tee cua quianutaniyacuaani.

²² Naa Jesu sequesacaritij, cuno narta Judiocuacaari tama sequetooreejaaja:

—¿Casaara na sequereecuaraarini: “Maja nia naata quianu quiniutianiya tee cua quianutaniyacuaani”? Tama na cuaqueyajaaja miaque-nutaniya jiyoteeri.

²³ Jesuuri nojori sequeree:

—Niaari ninishiqui quiqiuojinijinio. Janiya cutaraari jiyocuaaanu-jinijinioni. Niaari saaja mijiria quijiaca. Janiya cutaraari maja niqiu-jinioni. ²⁴ Janiyacuajaari cunora nia sequereeni, niaari jiyanooshoojua cusonuunutaniya nia cuaracashitiniuucua janiyari maja Pueyaso Niyanuni, taa cua sequequiaa nijaniyacujani. Cunora niaari jiyanooshoo quiniutianiya, pueyaracaanu saniitiosano nia quiniuria.

²⁵ Nojoriiri Jesu nequesotaree:

—¿Canteeri quiajaniyani?

Jesuuri nojori riucaaree:

—Janiyari najuhuana niaata pocoojiyani. Majaari nia tojiniu janiya. Janiyacuajaari tari nia sequereeni cante janiyani. ²⁶ Janiyari queraatia jiitiajaa cua sequesocoriquiano nijaniyani. Niaa jaara nocua tiuyaquiri, niaari pueyaracaanu saniitiosaanutaniya. Puetunu cua sequesanojuanaa nijaniyani, cunoori seetanujuanaa. Cua pohuatasano mijiria, cunoori cua Jiyarona sequesano janiya. Na sequesanoori seetanujuanaa cutara.

²⁷ Majaari nojori niishiniu quiriquiaa Jesuuri na Que Pueyasojiniji pohuatariquiaa na sequesacari “cua Jiyarona”. ²⁸ Jesuuri cunora nojori sequeree:

—Niaa jaara cua teetere, niaari shusha jiyacari niishiniutianiya, janiyari Pueyaso Niyanuni. Niaari niishiniutianiyajuhua, majaari tama cua niishiriojosanojuaja cua miiniu quijia. Janiyari saaja cua Que niishitiojosano pohuatajani. ²⁹ Cua Jiyaronacuajaari cuata quiya. Majaari cua Que cartenu janiya, pueyaracaanu cua miiniuucua na panishano.

³⁰ Naa Jesu pohuatasacari pueya niquiaratej, queraatia pueyari jiyacari nocua tiuuri.

Pueyaso pueyajiniji pohuatasano, Sesaaca pueyajinijinio

³¹ Jesuuri shusha nocua tiuuniaa narta Judiocuaca sequeree:

—Niaa jaara seetanujuanaa cua pohuatasano tojjiaa quiri pueyaracaanu, niaari cua pueya quiniutianiya. ³² Niaa jaara naa miiritij, niaari seetanu rupaajanaa niishijiaa quiniutianiya. Naacuajitij, niaari seetanujuanaa juhua cartesano pueya quiniutianiya, juhuajaniya quijiaca nia quiniuria.

³³ Narta Judiocuacaari Jesu riucaaree:

—Canaacuaruhua supuetana Abraham jihuacuajinio supueno pueyani. Majaari quenaaja canaa quiniu quijia tamasaca poonijotesano pueya. ¿Casaara naa quia sequeya canaarini, canaa quiniuria cartesano pueyani?

³⁴ Jesuuri nojori sequeree:

—Seetanujuanaa nia sequeyanijia, cante sesa miijiacani, nojoriiri juhua poonijotesano pueya quiya. Majaari na naata maninia miijia na quiniu. ³⁵ Poonijotesano pueyanoori maja seetanujuanaa na quiniu juhua na camarnu niyanu. Maja na naata sequenu: “Janiya pueyaracaanu quiniutianiya cua camarnutani”. Na camarnu jaara na paniaquiri, na naata na jatanu na panishacari. Camarnu niyanu cutara, na queeri maja na jatanu quijia, neyanu na quiniuucua.

³⁶ Naajuhuaaj, janiya jaara nia jaariuutiare nia poonijiotenajinijini, niaari seetanujuanaa cartesano pueya quiniutianiya, Pueyaso muerasura nia quiniuria cutara. ³⁷ Janiyacuajaari niishiyani, niaari seetanujuanaa pa supuetana Abraham jihuacuajinio supueno pueya. Naajaa, niaari cua tojiniu paniyaquiya. Niaari cunora cua monu paniya. ³⁸ Janiyari nia pohuatariquiaa cua Quejiniji cua niquishanoni. Niaari saniniuujia nia que sequesano miiquiaacujua.

³⁹ Nojoriiri Jesu sequeree:

—¡Abrahamcuajaari canaa shipininio!

Jesuuri nojori riucuarree saaja:

—Abraham jaara seetanujuanaa nia shipininio quiri, niaa mariqui maninia miijiaca quiricuara, taa Abraham quiquiaaricuaani.

⁴⁰ Saniniuujia, niaari cua monu paniya saaja cua pohuatanuucua seetanu rupaajanaa, cua tojishano Pueyasojiniji. Abrahamri maja naa na miiniu quijia cutara. ⁴¹ Niaari saaja sesa miijiaca taa nia que miiquiaacuaani.

Nojoriiri Jesu juaarii:

—¿Casaa quia sequeyani? ¡Canaari maja saa maaji rasanajuani! ¡Pueyasocuajaari canaa Que, maja tamonu!

⁴² Jesuuri nojori sequeree:

—Pueyaso jaara nia Que quiri seetanujuanaa, niaa mariqui cua paniricuara, Pueyasojiniji ninio cua quishacari. Majaari tamajaaja cua ninu quiquiaari. Cua Que Pueyasocuajaari cua jiyaroquiaari. ⁴³ Cua rupaa nia tojiniu paniyaquishacari, niaari cunora cua pohuatasano niishiyaquiya. ⁴⁴ Seetanujuanaa, nia quecuajaari Sesaaca, samaruhua jiyaniijia. Niaari cunora miiniu paniquiaa na panishano. Nojuaja jaara shushajanaa coteequiaari sesa miiniuria, nojuajaari naajuhua-najaj, mona. Nojuajaari maja na niishiniu sequenu seetanujuanaa. Pueyaracaanu sapojuuari. Na sapojosacari, naa miyari sapojuua na quiniuucua. Sapojonu niishiniuni, cunoori nojuajiniji supuequiaari. Niaari cuno nia que tojijiaca. Nocuaji niaari naa sapojonuujacuajuhuaaj.

⁴⁵ Saniniuujia, cua pohuatasacari seetanu rupaajanaa niajaniya, majaari cucua nia tiuuniu quiquiaa. ⁴⁶ ¿Casaa cua miiquianu sesani? Cante na niishiyani cuara sequeera. Saniniuujia, janiya jaara sesa miyashijia quirini, ¿casaara cucua nia tiuyaquiyacuaraarini, seetanu rupaajanaa cua pohuatasacari niajaniyani? ⁴⁷ Cante Pueyaso pueyani, nojoriiri Pueyaso rupaa tojiquiaa cutara. Niajaniya saniniuujia, niaari na rupaa tojiyaquiya, na muerasu nia quiyaquishacari.

Jesucristoori tariucuacaanu quijiajuhanaja Abrahamjiniji

⁴⁸ Narta Judiocuacaari naa Jesu juaarii:

—¡Canaacuajaquiiri maninia sequeriquiaa quiajaniyajinijini, quiaari Samaria jiyajinijinio tahue, samaruraca pueyanotuhuaaj!

⁴⁹ Jesuuri nojori riucuarree:

—Majaari janiya samaruracani. Janiya cutaraari saaja cua Que tojiquiaani. Niaari saniniuujia cua rerequetequiaacujua. ⁵⁰ Naajaa, majaari cua tacaaniu naa nia sesacasacari janiya. Tamonu cutaraari quiya, nojuajaari paniya pueya tojiniuria janiya. Nojuajaari cua rerequetejaca saniitioriquiano. ⁵¹ Seetanujuanaa nia sequeyanijia, cante cua rupaa tojijiani, nojoriiri maja na shaajenu quiniutianiya.

⁵² Narta Judiocuacaari na sequeree:

—¡Quiarjia cutara canaari niishiyani quiaari seetanujuanaa samaruraca! Canaa supuetana Abrahamri cusoquiaari, mariyata puetunu Pueyaso sequenu panishano caminiujiuniaajanaanio. Quiaari saniniujia quiarjia sequeyacuaja: “Cante cua rupaa tojjiani, majaari na shaajenu quiniutianiya”.⁵³ ¿Quiaateeri jiyaniya quiaa socua cutara pueyano canaa supuetana Abrahamjiniji? ¡Maja! Nojuajaari shaajequiaari. Mariyata puetunu Pueyaso sequesano caminiujiuniaa pueyajanaari shaajequiaarijuhuaj. ¿Canteeri quiajaniyani naa quia sequenuratej?

⁵⁴ Jesuuri nojori riucaaree:

—Janiya jaara tama cua cuaqueyajaaja jiyatenu paniri juhua jiyaniijiarani, cunoori najuhanaj. Seetanujuanaa, cua Quecuajaari cua jiyatequiaari Jiyaniijiarajanaa. Nojuajaari nia sequesano nia Pueyasota.⁵⁵ Niaari seetanujuanaa na niishiyashijaca. Janiya cutaraari cua Que Pueyaso niishiyani. Janiya jaara nia sequereni, maja cua niishiniu nojuaja, janiya maara sapojoua quirini taa nia quiyacuaani. Janiya cutaraari na niishiyani. Janiyari cunora na rupaa tojjiani.⁵⁶ Nia supuetana Abrahamri timiquiaari na niishishacari janiya mijiria supenutaniyani. Nojuaja jaara cua niquiquiaari mijiria quiyano tari, jiyanohua timiquiaariiri.

⁵⁷ Narta Judiocuacaari Jesu juaarii. Naa na sequetureeri:

—¡Jaj! Majaruhua juhuanoujaaja cincuenta marijia shocojonu quiajaniya. ¿Taa quia sequeyarini quiaa canaa supuetana Abraham niquiquiaari?

⁵⁸ Jesuuri nojori riucaaree:

—Janiya nia sequeya seetanujuanaani, Abraham raaquishacarijia, janiyari tari quijiani.

⁵⁹ Naa nojori tojishacari Jesu sequesantej, narta Judiocuacaari sai pajenuuree Jesu na jacutajara juucua. Jesuuri nojoriicuaji jamaarii saaja. Pueyaso Secojoua tiajiniji tohuatamaari.

9

Jesu jeecasacari cariyoujuru namijia, naa rasanoujuuanajaj

¹ Tamacari Jesu rucuanajosacari canaata, canaari cariyoujuru pueyano niquiriini, naa rasanoujuuanajaj. ² Canaari cunora Jesu nequesotareeni:

—Niishitiojonanaa, ¿casaara naa cuno pueyano rasaaquiaari cariyoujuaruni, na queya miiniuucua sesatee, tama sesa na miiniuucuaajaaja soj?

³ Jesuuri canaa riucaaree:

—Maja. Maja cunora naa na rasaanu quiquiaari. Naa rasaaquiaariiri Pueyaso cumaaca niishishaanura, na namijia jaara jeecasaare niqijiaara na quiniuria. ⁴ Juuca quishacarijia, pa tucutare miiniu cua Jiyarona sequesano cua miiniuria. Paa quera niniyani. Jaara niniqui, majaari pa naata poonijionu quiniutianiya tari. ⁵ Mijiria cua quishacarijia, janiyari pueya jiuujia cuhuatanani.

Jesu sequesacari: “Paa quera niniyani”, nojuajaari pa shaajenujiniji sequeriquiaa miriqui.

⁶ Naa Jesu sequenu nuhuajitij, nojuajaari jiyocua riocoree. Na riacautu caniquiereeri. Coriyacau mara ruporohua cariyoujuru namijiaacuaari. ⁷ Cariyoujuru sequerohuari:

—Siloé cuarimia quia jeequese quia namijia.

Hebreo rupaajinia, Siloé cuariiri sequeya “Pueyaso Jiyarosano cuari”. Cariyojuaruuri cuarimia quiaare. Tii na namijia jeequeseeri. Tariucua niquijiaari na tiajinia tiuquiriohua. ⁸ Cariyojuaru na quishacarijia, nojuajaari na miajajau na masetajara cumaneeca mashiniquijiojua quiquiaari. Puetunu pueyajanaari na niqutiujia naa na mashiniquijiosacari. Naacuajitij, nojuaja jaara niquijiara quiquiaari, tarijia na niquninaa pueyari, mariyata na shuriucua quiniaa pueyano, nojoriiri tama sequetooquiaarijiaaja:

—¿Cante cuno pueyanojaarani? ¿Majate noocuaja tarijia cumaneeca mashiniquijiojuatej?

⁹ Noojiaqueya pueyari sequere:

—¡Taaquiriirinij, nojuajacua!

Tamasacaari saniniuujia sequereecujua:

—Nojuajaquinio naasucua. Juhua nojuaja niquishiyacua, majaari seetanujuanaa nojuaja.

Tarijia quijia cariyojuaruuri saa sequereejaa:

—Taaquiriirinij, janiyacuaaquinatejaj.

¹⁰ Naaratej, pueyari na nequesotaree:

—¡Quiaacuaja cariyojuaru quijiaruhua! ¿Taa niquijiara quia quiriohuarini?

¹¹ Nojuajaari pueya riucuaare:

—Cuno, Jesu jiyanihano pueyanoni, nojuajaari mara coniquioree cucuara. Cua namijiaacua na ruporohuari. Na nuhuaji, cua jiyaroreeri Siloé cuarimia cua jeequenura cua namijia. Janiyari quiaareeni. Cua namijia cua jeequesacari, janiyari niquijiara quiquiini!

¹² Pueyari na nequesotaree:

—¿Teeteeri quia namijia jeecana pueyanoni?

Nojori riucuaareeri:

—Johuaj. Maja cua niishiniu.

Fariseocuaca nequesoreesacari na namijia jeecasano pueyano

¹³ Pueyari Fariseocuacaacua jiyataaree Jesu jeecasano cariyojuaru pueyano. ¹⁴ Jesu jaara mara coniquioquiaari na jeeanura cuno pueyano namijia, cuno juucaari Judiocuaca samaatenu juuca quiquiaari. ¹⁵ Nocuaji Fariseocuacaari tarijia cariyojuaru quijia nequesotaree taa niquijiara na quiriini. Nojuajaari nojori riucuaare:

—Jesu cua namijiaacua rupojorucuaa marani. Na nuhuaji, janiyari cua namijia jeequeseeni. Naacuajitij, janiyari quiarijia niquijia quiyani.

¹⁶ Noojiaqueya cuno Fariseocuacajininioori saa sequereejaa:

—Cuno pueyano, nio pueyano namijia jeeucarucuaani, nojuaja maja Pueyaso Jiyarosano. ¡Nojuajaari Moisés Rootasano tojiyashijia, naa na miiniuucua samaatenu juuca!

Tamasacaari saniniuujia sequeriquiaacuajua:

—Jaara sesa miijia quiri, ¿maatucua casaara poonijiore Pueyaso cumaacatacuaraarini?

Naa nojori juayonuutanuucuatej, nojoriiri juhua raquitiirii. ¹⁷ Nocuaji tarijia quijia cariyojuaru nequesotaturoruhuarihuaj:

—Niquijia quia quishacari quiarijia, ¿taa quia sequeya Jesuni? ¿Maninia miijiatee?

Nojuajaari saaja Fariseocuaca riucuaare:

—Janiyara, nojuajaari Pueyaso sequesano caminiujiunia.

¹⁸ Tii quiniaa Judiocuacaari na cuaracashitirii saaja. Nojoriiri jiyaniquiaari maja naasucua seetanujuanaa cariyujuaru cuno pueyano quiniu quijia. Nocuaji nojoriiri na queya sequeturee nojoriicua na niniuria. ¹⁹ Nojori tiuquishacari, cuno Judiocuacaari nojori nequesotaree:

—Canaa nia sequere, ¿nio pueyanote seetanujuanaa nia niyanu, nia sequesano cariyujuaru rasanøjuhuanani? ¿Taa quiarijia niquijiaara na quiriohuarini?

²⁰ Na queyari cuno pojori riucaaree:

—Taaquiriirini, nojuacuaaquinateja canaa niyanujuaj. Naa cariyujuaru rasaanquiaariiri. ²¹ Majaari canaa niishiniu cutara taa na quiri-ohua niquijiarani. Majaari canaa niishiniujuhuaj, cante na namijia jeecarucuaani. Nojuaja nia nequesotare, tari cumantumacacuaja. Nojuajanaa cuaara nia pohuataara cutara.

²² Na queyari naa riucaquiaari narta Judiocuaca camarucuatej, na pueretusacari nojori. Judiocuaca camarucuaari tari sequetuquiaari: “Cante Jesu sequeyani nojuaja seetanujuanaa Pueyaso Jiyarosano, na sequejaca pueya cuaara tenujusaaria maja Pueyaso secojojua tiajinia na tiuquiniuria socua”. ²³ Naaratej, na queyari naa narta Judiocuaca riucaquiaari: “Nojuaja nia nequesotare, cumantumacacuaja”.

²⁴ Cunora cuno Judiocuacaari socua piiriohua na namijia jeeçasano pueyano. Nojoriicua na nishacari, na sequetureeri:

—¡Paacuajaari Pueyaso niquiara niya quiyani! Naaratej, ¡seetanujuanaa canaa quia pohuatare cuno pueyanojiniji! ¡Canaa cutaraari niishiyani cuno pueyanoori sesa miijia!

²⁵ Na namijia jeeçasano pueyanoori nojori riucaaree:

—Naajaa, jaara sesa miijia quiri, jaara maninia miijia quirijiuhuaj, maja cua niishiniu cuno. Janiya cutaraari niishiyani, ¡janiyari tarijia niquiyashijia quiquiaarini! ¡janiyari saniniuujia quiarijia niquijia quíya cutarani!

²⁶ Nojoriiri na nequesotarohuacuhuj:

—¿Taa na miiriucaaa quiajanijaaarani, niquijia quia quiniuriani?

²⁷ Narta Judiocuaca camarucua sequere saajaari:

—Janiyacujaja tari nia pohuatareeni. Majaari nia tojinu paniniu janiya. ¿Casaara nia paniya socua cua pacutenura sequenu nijaniyani? ¿Niaate na pueyara quiniu paniya soj?

²⁸ Naa na sequesacari nojoritij, cuno Judiocuaca camarucuaari na sesacaturee. Naa na sequetureeri:

—¡Quiaari cuno pueyano tojjiaacuaja! ¡Canaa cutaraari supuetana Moisés Rootasano tojitiajacani! ²⁹ ¡Canaa cutaraari niishiyani Pueyasojuanaari Moisés cua muetaquiaari na rootanura nojuaja! ¡Saniniuujia cuno pueyanoorijiataj, majaari quenaaja pa niishiniu teje na supuequiaarini!

³⁰ Na namijia jeeçasano pueyanoori nojori riucaaree:

—¡Niaaquiiri mosanucua seetanujuanaa! ¿Majateeri nia niishiniu teje na supuequiaarini? ¡Nojuajaari cua namijia jeecarucuaa! ³¹ ¡Paacuajaari niishiyani Pueyaso maja na tojinu quijia sesa miijia secojosano! ¡Saaja na timitiajaca secojosano tojiya cutaraari, cante na panishano

miiquiaacuajani! ³² ¡Majaari quenaaja pa tojiniu quijia tamonu pueyano-jiniji, cante cariyojuaru namijia jeecajani, naa cariyojuaru rasanohuhua-naj! ³³ Cuno pueyano jaara Pueyaso Jiyarosano quiyacquiri, ¿*taa* cua namijia na jeecarucuaacuaraarini?

³⁴ Cuno pojoriiri na juaaniutia na sequeturee:

—¡Quiaari sesa mijia rasaaquiaari! ¿Quiaateeri jiyanojuua canaa niishitiojonu paniyaruhua?

Naaratej, narta Judiocuaca camarucuaari na tenujuturee maja socua na tiuquiniuria Pueyaso secojojua tiajinia. Naacuajitij, cuno pueyanoori juhua taanuusano pueyano quiquiaari narta Pueyaso timitiajaca pueyajiniji.

Jesu tojtiaashijiaca pueya juhua cariyojuaru

³⁵ Jesuuri niishiquiaari cuno pueyanoori tenujusaarucuaa. Jaara na riuriataquiaari, Jesuuri na sequeree:

—¿Quiaate Pueyaso Niyanuucua tiuujia?

³⁶ Jesu sequereeri:

—Jiyaniijianaa, cua sequere canteeri nojuajani, nojuaja cua niishiniuria nocua cua tiuuniuria.

³⁷ Jesuuri na sequeree:

—Quiaacuaja na niquiyaruhua. Nojuajaari cunocujaja, quiata pocoojiyani.

³⁸ Jiyacaritij, pueyanoori Jesu cariquimijaji mojuquetaree. Na sequereeri:

—¡Quiocua tiuyanijia, cua Jiyaniijianaa!

³⁹ Na nuhuaji, Jesuuri cuniqui quiniaa pueya niquiara sequeree:

—Janiyari mijiria niquiaarini juhua cua raquiriojotanura mijiria quiniaa. Naacuajitij, cante niishiyani nojuaja juhua cariyojuaru quiya, nojuajaari juhua namijiaraca quiniutianiya cucua na tiushacari. Saniniuujia, cante jiyaniyani nojuaja niquijia cutara, nojuajaari juhua cariyojuarura tari jiyatesaaree, cucua na tiuyaquiniuucua.

⁴⁰ Tii quiniaa Fariseocuaca jaara tojiquiaari naa Jesu sequesanotej, nojoriiri Jesu sequeree:

—Naa quia sequesacaritij, ¿quiaateeri sequeya canaari cariyojuarujurijihuhaj?

⁴¹ Jesuuri nojori riuucaree:

—Niaa jaara tama nia cuaqueyajaaja jiyatere juhua cariyojuarura cucua nia tiuuniuria, Pueyaso maara nia jiyanoori. Quiarijiani, tama nia sequenuucujajaaja, “Canaa niquijia cutarani”, niaari jiyanooshoojuua nioojia nia tacatoyaquiniuucua.

10

Jesu pohuatasano miriqui borrego cojuanajiniji

¹ Jesuuri socua pohuatarohua pueya niquiara. Naa sequereeri:

—Seetanujuanaa nia sequeyanijia, cante borrego mataca tohuateyaco tiuquiyacquiriani, nojuaja jaara tamocoji tiuquimia, cunoori nohuasejojua. ² Saniniuujia, cante tohuateyaco tiuquijia cutarani, cunoori borregohua camarujuanaa cutara. ³ Tohuateya cojuanaari tiotiu ritataquiaa nocuaji. Borregohua camaruari puetunu na seya sesacajanaa jiyaniquijia. Na borregohuari na rupaa niishijia. Na camaruari naa na

tohuatanijiojua puetunujuanaa na matacajiniji. ⁴ Puetunu na borregohuajanaa jaara tohuareetama, na camaruuri na puetaja. Na seyari na nuhuaji sacuaaja, na camaru rupaa nojori niishishacari. ⁵ Saniniuujia, borregohuari maja na nuhuajiniu quijia na niishyaquishoo pueyano. Saaja nocuaji cocuatejaari na niishishacari cunoori maja na camaru rupaa.

⁶ Jesuuri na pahuataquiaari miriqui nojori niquiara. Nojoriiri saaja niishyaquiquiaari casaa na niishitiojonu paniriquiaa nojorini.

Jesu Cristo, maninia pa cojuana

⁷ Nocuaji Jesuuri naa nojori sequerohua maatia:

—Seetanujuanaa nia sequeyanijia, janiyari juhua tohuateyani, cua borregohua tiuquitianura cua Que Pueyasocua. ⁸ Cante cua niyacarijia nijioquiaari coteenuni, nojoriiri sesa miijiaca quiquiaari, nohuasenuujuaca. Cua borregohuari namitia nojori numueejushiquiaari. ⁹ Janiyari juhua tohuateyani. Cante janiyajiniji tiuquiya cua Queecuaní, nojuajaari Pueyaso pueyanora jiyatesaanutaniya cutara. Cuno pueyanoori maninia cojuasano juhua borrego. Janiyari na tiuquininiutianiyani, tii na quiniuria maninia cojuasano. Janiyari juuca na tohuatenutaniyani, jiyasocua cua miaquetenura carijiniacuma.

¹⁰ Nohuasejojaari saaja tiuquijia borregohuacua na nohuasenuura, na puecoonurajuhuj. Naa na shaajaaja puetunujuanaari. Janiyari saniniuujia niquiaarini cua borregohua cua jiyatenura pueyaraaanu quijiacara, seetanujuanaa jiyanoohua shuquiriaatia quijiaca nojori quiniuria. ¹¹ Janiyari maninia cojuanani, maja tamonu. Pueyano jaara maninia na seya cojuana maniniu quiri, tama na cuaqueyajaaja panitiaja na seyacuaari. ¹² Saniniuujia, borregohua camarujuanaa jaara tamonu cojuateya na seya, cuno pueyano jaara niquiri sare nocua canujiano, nojuajaari na puerenuta neteja. Borregohua tiujiaqueeri. Naa miijiaari cuno borregohua quiyaquiniucua na seyajanaa. Naacuajitij, sareeri borregohua soojua. Naa na cocuatajaari. ¹³ Cuno borregohua cojuanaari naa neteja sareecuaji na tacayaquishacari seetanujuanaa cuno borregohuacua. Nojuajaari saaja paniya na poonijosano sami na niqitiosaanura.

¹⁴ Janiya cutaraari maninia cojuaja borregohuani, na camarujuanaa cua quishacari. Janiyari puetunu cua seyajanaa niishijiani. ¹⁵ Nojoriiri cua niishiyajuhuj, taa cua Que niishiya janiyacuaani, mariyata taa cua niishiya cua Quejaniuhuj. Janiyari tama cua cuaqueyajaaja panitiaja cua borregohuacuarani. ¹⁶ Janiyari socua borregohua jiiitiaani. Nojoriiri maja nio cua borregohua maanujinijinio. Janiyari nojori rijionutaniya niyarajuhuj. Nojoriiri cua tojtiaquiano. Naacuajitij, puetunu cua borregohuajanaari jatiqui quiriquiano, niquiriyatu cojuanaracajuhuj.

¹⁷ Cua Queeri cua paniya naa cua panitiasacari tama cua cuaqueyajaaja cuno borregohuacua. Janiyari tama cua panishacarijaaja mosaanutaniyani, na nuhuaji cua samiitianuhua, pueyaraaanu quijia cua quiniuhua. ¹⁸ Majaari quenaaja tamonu naata monu janiya cua paniyaquishacari. Janiyari cua panishacari cusonutaniya cua borregohuacuarani. Janiyari cumaacaracani nojoriicuara cua cusonura. Janiyari cumaacaracajuhuj cua samiitianuhua. Cua Quecuajaari naa cua miiniuria cua jiyaroquiaari mijiria.

¹⁹ Narta Judiocuaca jaara tojiqiaari naa Jesu sequesantej, nojoriiri socua tama juayonuutaquiaarijiaaja Jesuucua. ²⁰ Queraatia pueyari jiyacari sequeree:

—¡Cuno pueyanoori samaruraca! ¡Maja na tojiniu, pueyanaa! ¡Najujuanaa pocuaano!

²¹ Tamasacaari saniniuujia sequeriquiaacujua:

—¿Samaruraca pueyanoteeri maninia casaa pohuatajaara juhua nio pueyanojua? ¡Maja! ¿Pueyanoteeri na naata samaru cumaacata jee canu cariyujuaru namijiajaara? ¡Maja na naata!

Judiocuaca camarucua niqiniu paniyaquishacari Jesu

²² Tamacari, Jerusalén tiacajiniaari queranacusaariquiaa. Cunoori quiriquiaa pueya niishiriojonura nojori juhua cuno juucajinia Pueyaso Secojoua tia jiyatequiaariuhua seetanujuanaa juhua Pueyaso quiquiora na quiniuhua. Jiyacariiri shuniya quiriquiaa. ²³ Jesuuri tii quiriquiaajuhua. Pueyaso Secojoua tiajia quiriquiaari. Nojuajaari pueya jiyaniquishano tariucuacaanu jiyaniijia Salomón canujuucojuaajinia riujuuuniuquojoriquiaa. ²⁴ Jiyacaritij, canaa Judiocuaca camarucuaari tii na cosesee. Naa na nequesotatureeri:

—¿Taacari canaa quia sequenutaniya socuaari cante quiajaniyani? ¡Quiaa jaara seetanujuanaa Pueyaso Jiyarosano quiri, quiarijia canaa quia sequere!

²⁵ Jesuuri nojori riucuaaree:

—Janiyacuaaja tari nia sequacanuni. Niaari saaja na cuaracashitiquianu. Niaa cuaara niishiiria cante janiyani, nia niquishacari cua miishano cua Que sequesano janiya. ²⁶ Niaari saaja cucua tiuyaquiquiaa cua borregohua maanujinijinio nia quiaquishacari. ²⁷ Cua borregohuari cua rupaa tojijia cutara. Janiyari nojori niishiyajaaniuhua. Nojoriiri cunora cua nuhuajiquiaa. ²⁸ Janiyari pueyaracaanu quijiaara nojori jiyatequiaani. Majaari nojori juurequenu quiniutianiya. Majaari quenaaja tamonu naata jaariuutianu quiniutianiya nojori janiyajiniji. ²⁹ Cua Queeri cua borregohua cua niqutioquiaari. Nojuajaari socua jiyanohua cumaacaraca tamasa cumaacaraca quijiacajiniji. Naacua-jitij, maja quenaaja tamonu naata cua borregohua jaariuutianu cua Quejiniji. ³⁰ Janiya cua Queta, canaari juhua niquiriyatuni.

³¹ Jiyacaritij, canaa Judiocuaca camarucuaari sai rijiorohuacuuhua, Jesu na jacutajara juucua. ³² Jesuuri saaja nojori sequeree:

—Janiyari queraatia maninia casaa miiquianu saaja cua Que cumaacata nia niquiarani. ¿Teyanoocua nia jacunu paniya janiyani?

³³ Nojoriiri Jesu riucuaaree:

—Majaari canaa jacunu quiniutianiya quiajaniya maninia quia miiniuucua. ¡Canaari quia jacunutaniyani sacuaraatia quia pocuanuucua Pueyaso niqiuara! ¡Quiaari tama quia cuaqueyajaaja jiyateya juhua Pueyasora! ¡Cunoori jiyanohua sesa! ¡Quiaacuajaari pueyano, juhua canaajuhua!

³⁴ Jesuuri nojori sequeree:

—Niaacuajaari tariucuacaanu naajiosano Pueyaso Rupaa jiiitia. Pueyaso sequesanoori naa naajiotasano quiya tii: “Janiyacuaajaari nia sequeriquiaarini, niaari pueyasohua”.

³⁵ Paacuajaari niishiyani, Pueyaso Rupaajinia naajiotasanoori maja na naata cuaracashitishaanu. Pueyasojuanaari pueya jiyaniquiquiaari

“pueyasohuata”, noo pojori, teyano nojuaja jiyatequiaari Israel pueya jiiitianaaracuajani. ³⁶ Naajuhuj, Pueyasocuaajaari cua saquiriojoquiaari mijiria na jiyarosocoriquiano. Naa Pueyasojuaanaa Jiyarosano cua quishacaritij, ¿niaatucua casaara sequereni janiya Pueyaso niqiiara pocuaree sesani, cua sequesacari janiya Pueyaso Niyanuni? ³⁷ Janiya jaara cua Que panishano miyaquiri na cumaacatani, janiya maara nia juayaquirini cucua nia tiuyaquiniucua. ³⁸ Niaacuajaari cua Que cumaacata cua miishano niquiquiaa. Niaa jaara cua pohuatasanoocua tiuuniu paniyaquiri, naajaa, cua Que cumaacata cua miishanoocua nia tiuuri quenaaja. Niaa jaara niishiri puetunu cua miishanojuanaari cua Que Pueyaso cumaacata miishano, niaa maara niishiri Pueyasoori coojia rupueja, janiyari noojia rupueyajaaniuhuj.

³⁹ Jiyacaritij, nojoriiri socua Jesu quiatunu paniriohuacuahuaj. Jesuuri saaja nojoriicuaaji mashiquii.

⁴⁰ Jesuuri canaa jiyataarohua Jordán moo taquijiria tee Juan tiuquini-jioquiaari tarijia pueyacuajani. Canaari tii quishiini. ⁴¹ Queraatia pueyari Jesuucua nijioquiaari tee canaa quiriquiaacuajani. Nojoriiri tama sequequiaarijiaaja Jesujiniji:

—Tiuquinijiona Juanri maja quenaaja na miiniu quijia casaa Pueyaso cumaacata. Naajaa, puetunu nio pueyanojiniji na sequesanojuanaaquiri seetanujuaanaa quijia.

⁴² Naacuaajitij, queraatia pueyari Jesuucua tiuquiquiaari tii, tee canaa quiriquiaacuajani.

11

Lázaro shaajenujiniji pohuatasano

¹ Jiyacaritij, tamonu pueyanoori cusosu matariquiaa. Na sesa quiquiaari Lázaro. Nojuajaari Betania tiacajinijiniojuanaa quiquiaari, Judea jiyajinia. Na rimiatuhua quiquiaari María, Martanio. Nojoriiri cuno Betania tiacajinijinio quiquiaarijuhuaj. ² Lázaro rimiatu Maríani, nojuajaari noo maajicuaaja Jesu niohuaca sacuanijiaquiaari na mucacatatej, nocua na totanu nuhuaji na shanohua jaanutaja. ³ Lázaro matasacari cusosu, na rimiatuhuari pueyano jiyarotuchiaari Jesu numootenuucua. Naaratej, cuno pueyano tiuquishacari Jesuucua, nojuajaari naa caminiujuquiaari Lázaro rimiatuhua sequesano nojuaja:

—Jiyaniijianaa, quia panishano pueyanona cusosu mataa.

⁴ Jesu tojishacari naa cuno pueyano sequesanotej, tii quiniaa pueya sequereeri, canaajuhuj:

—Nojuajaari maja na cusonu quiniutianiya na shaajenura puetunujuanaa. Cuno cusonu na jiiitiasanojinijini, pueyari Pueyaso cumaacata miishano niquiniutianiya. Pueyari cunora Pueyaso Niyanu maniniuhuaqueetanutianiya, cua Que Pueyasojuhuj.

⁵ Marta, María, Lázaronio, nojoriiri Jesu panishano pueya quijia. ⁶ Naajaa, Jesu jaara numootesaaquiaari Lázarojiniji, majaari nocua na quianu quiquiaari ritia. Caapiqui juuca camueeree cuniquijiaaraari, tee canaa quiriquiaacuajani. ⁷ Na nuhuaji, canaa na saquiriojosano pueya sequereeri:

—Judea jiyajinia pa quiaarohuacuara socua.

⁸ Canaari Jesu sequereeni:

—Niishitiojonanaa, cuniquijinio Judiocuacacuaajaari shusha naataja tii quia jacunu paniquianu. ¿Casaara socua tii quia quianu paniuhuar-iniuhuaaj?

⁹ Jesuuri canaa riucuaree miriqui:

—Janiyara, juuca juhuanajuaja. Juucaari maninia seetanujuanaa pa rucuanefonura. Paa jaara pananu tiuquiyaquishacarijia rucuanefoneni, paari maninia niquiya pocuajini. Majaari pa tiuriiniu. ¹⁰ Paa jaara ninishiQUI rucuanefonore saniniunijia, paari tiuriijiani cuhuashiqui na quiyaquishacari.

Jesuuri naa sequeriquiaa miriquitij, nera, maja puereeta na quiniu quiriquiaa Judiocuaca niquiara na rucuanefonura, na mosaanu juuca quiyaquishacarijia. ¹¹ Na nuhuaji, Jesuuri naa canaa sequeree socua:

—Pa rupuena Lázaroori tari maquequee. Janiyari na niucujanuucua quianutaniyani.

¹² Canaari Jesu sequereeni:

—Jiyaniijianaa, nojuaja jaara maqueya, maniniacuajaqui. Naacua-jiti paari niishiyani naatanutaniuhuacuajaajaqui. ¿Paatucua casaara nahuana nocua quiaareni?

¹³ Naa Jesu pohuatasacari canaa Lázarojinijitij, canaa sequeriquiaa juucuaari Lázaro tari macu quiriquiaa. Canaari saniniuujia jyaniriquiaani Jesu naasucuaari canaa pohuatariquiaa Lázaro nareja maqueriquiaa.

¹⁴ Nocuaji Jesuuri maatia canaa sequeree:

—Lázaro tari cusoyarucuaa. ¹⁵ Janiyari timiyani tii cua quiyaquiniuucua Lázaro quishacarijia saminio. Naa quiarijia macu na quishacaritij, niaari socua jiyajeneta casaa cua miishano niquiniutianiya, seetanujuanaa cucua nía tiuuniuria cutara. Quiarijia cutara, nocua pa quiaare.

¹⁶ Jiyacaritij, Tomásri canaa narta saquiriojosano pueya sequeree:

—Pa Jiyaniijiaata pa quiaarejuhuaj, nata pa cojiritiasaanura puecoonu. Cuno Tomásri pueya sesojosano quiquiaari “Caapueya muetusano”.

Jesu, macunucua samiitianijiojua

¹⁷ Canaa jaara tiuquijioseequiaarini, Jesuuri pohuatasaaquiaari Lázaro tari cuatro juuca shocotejoriquiaa raaco na niasaanujiniji.

¹⁸ Betania tiacaari catecaja Jerusalén tiacajiniji. (Nareja media hora paa jaara ritia rucuaneyareni). ¹⁹ Naaratej, queraatia narta Judiocuacaari quiojoquiaari Marta, María tiajinia, nojori na cumanjianura na nanu nuhuaji. ²⁰ Marta jaara niishiquiaari Jesu shusha tiuquiriquiaa, nojuajaari nocua tohuataquiaari canaa na naacunura. Majaari María ninu quiriquiaa cutara. Tiajiniaja quiriiri. ²¹ Canaacua Marta tiuquishacari, nojuajaari Jesu sequesee:

—Jiyaniijianaa, quiaa jaara niya quiquianu, cua nanu maara shaajeyaquiquianu! ²² Naajaa, janiyari niishiyani quiaa jaara Pueyaso secjore, Pueyasoori quia secijosano tojiniutianiya.

²³ Jesuuri Marta sequeree:

—Quia nanucuaaja samiitianutaniuhua.

²⁴ Martaari na riucuaree:

—Taaquiriirinij, janiyacuaja niishiyani nojuajaari samiitianutaniuhua macunucua samiitiacosacariuhua jiya puequesacari.

²⁵ Jesuuri na sequeree:

—Janiyacujaari macunucua samiitianijiojuani. Cante cucua tiuujiani, jaara cusoyare, naajaa, samiitianutaniuhuari. ²⁶ Cante cucua tiuuri saminio na quishacarijiani, nojuaja jaara cusoyare, naajaa, majaari na shaajenu quiniutianiya seetanujuanaa. ¿Quiaate cua sequesanoocua tiuya Martanaa?

²⁷ Nojuajaari Jesu riucuaaree:

—Jaa, Jiyaniijianaa. Janiyacuja niishiyani quiaari Cristo, Pueyaso Niyanu, nooj tariucuaaanu sequesaaquiaari mijiria niriqianotej.

²⁸ Naa Marta riucuanu nuhuaji Jesutej, na tiajinia quiaarohuari. Naa María numaama sasacasuhuari:

—Niishitiojona jati quiya. Quia sequeyano nocua quia qianura.

²⁹ Naa María tojishacari Marta sequesanootej, ritia sanequeeri. Jesuucua nimiaari tee canaa quiriqiaacuajani. ³⁰ Jesuuri juhuanujuaja maja na tiuquitianu quiquiaari canaa cuno tiacajinia. Canaari tiaca shuriucua quiriqiaajaani tee Marta naacuquiaari canaacuajani, Jesuucua na nishacari. ³¹ Nojori cumanijianaa pueya jaara María niquiquiaari ritia tohuataano tiajiniji, nojoriiri na jiyaniquiaari na nanu raajinia nujuquenuucua quiaa naasucua. Naaratej, nojoriiri na nuhuaji quiaaree.

³² María tiuquishacari canaacua, Jesu cariquimiaji mojuquetaseeri. Naa na sequereeri:

—Quiaa jaara niya quiquianu, cua nanu maara shaajeyaquiquianu.

³³ Jesu niquishacari María nujuqueyano, mariyata nata quiniaa nujuqueyanojuhuaj, Jesuuri nojori taraajetaree. ³⁴ Jesuuri pueya nequesofaree:

—¿Tee na niasaarucuaani?

Pueyari Jesu sequeree:

—Miji, Jiyaniijianaa. Quia niquiquii. Niya niasaarucuaano.

³⁵ Jesuuri nujuquesee. ³⁶ Tii quiniaa Judiocuaca niquishacari Jesu nujuqueyano, tama sequetooreejaarija:

—¡Nia niquiri! Jiyanohua Lázaro panijiaquiiri.

³⁷ Noojiaqueya cuno pojorijinjiniioori sequeriquiaajuhuaaj:

—Jesu jaara cariyojuaru namijia jeecacanucuaa, maara Lázaro naataniquianujuhuaj maja na shaajenura.

Jesu samiitianishacari Lázaro

³⁸ Jesuuri jiyanohua na taraajenuta raa jiyajiria catecanoquiaari, canaajuhuaaj. Raari puereetuuca saajiata mishiquiosano quiriqiaaa.

³⁹ Jesuuri pueya sequeree:

—¡Saajia nia ruutiniri tamocora!

Martaari Jesu sequeree:

—¡Jiyaniijianaa, cuatro juuca tari na shoconujia! ¡Tari mocuaatia jaaniyuua naasucua!

⁴⁰ Jesuuri Marta sequeree:

—Janiyacuja tari quia sequereeni, quiaa jaara cua sequesanoocua tiuuri, quiaari Pueyaso cumaacata cua miishano niquiniutianiya.

⁴¹ Jiyacaritij, pueyari saajia ruutinirii tamocora. Jesuuri jiyocuacaanu mauree. Naa Pueyaso sequereeri:

—Cua Quenaa, quia timitiaanijia. Quiaari tari cua sequesano tojiruucuaacuaja. ⁴² Janiyari niishiyani quiaari pueyaracaanu cua tojiquiaa. Janiyari naa quia sequereeni, niya quiniaa pueya niishiniuria quiaari mijiria cua jiyaroquiaari.

⁴³ Naa Jesu sequenu nuhuajitij, jiyanohua na rupaa paaretareeri. Naa sequereeri:

—¡Lázaronaa, quia tohuatama!

⁴⁴ Macuuri tariucua saminio tohuatamaa. Na juaashiquiaca, na niohuacaari jiuniocosano quiriquiaajaa. Na nacaari puetunu na jiquiocotajanaa mishiquosano quiriquiaajuhuaaj, toquerauta morosano. Jesuuri pueya sequereé:

—Nia saacatare, cuaara rucaneera.

Judiocuaca camarucua rojotoosacari na monura Jesu

(Mt 26.1-5; Mr 14.1-2; Lc 22.1-2)

⁴⁵ Naa Jesu samiitianishacari Lázarotej, queraatia narta Judiocuacaari nocua tiuquuaari, noo pojori canapute Mariácuca nijioquiaari na cumanjianuracuajani. ⁴⁶ Noojiaqueya cuno Judiocuacajiniiniori Fariseocuacaacua quiojoquiaari nojori pohuatanura Jesu miishano. ⁴⁷ Naaratej, Fariseocuaca, pueyacuara secojonaa jiyaniijianucuanio, nojoriiri rerejoquiaari puetunu Judiocuaca camarucuatajanaa. Nojoriiri sequetuquiaari:

—¿Taa pa miiniutianiyani? Cuno pueyanoori queraatia casaa miiquiaa na cumaacata pueya niqiuara. ⁴⁸ Paa jaara nareja na shanacure naa na miiniuriatej, ¡puetunu pueyajanaari na pueyara quiniutianiya, nocua nojori tiushacari! Nojoriiri na jiyaniijiaara socua na jiyatenu-taniya. Naaratej, pa jitianaa Romano pueyari pocua nijionutaniya Pueyaso Secojoua tia nojori niyartanura, pa pueya na puecoonura-juhuaaj.

⁴⁹ Caifásri tii quiriquiaajuhuaaj. Nojuajaari canaa pueyacuara secojonaa jiyaniijiajanaa quiriquiaa cuno marijiaara. Jiyacaritij, nojuajaari narta camarucua sequereé:

—¡Niaaquiiri niishiyashijiaca seetanujuanaa! ⁵⁰ ¿Majateeri nia ishiniu? Maninia cutaraari niquiriyatu pueyano cusonura pa niti, maja najuhuaana puetunu pa pueyajanaa puecoosaanura.

⁵¹ Caifás sequesanoori maja tama na sequesanojuuaaja quiquiaari. Pueyacuara secojonaa jiyaniijiajanaa na quishacari, Pueyasoori naa na pohuaterree taa Jesu cusonutaniya puetunu Judiocuacaacuarajanaani. ⁵² Seetanujuanaari. Jesuuri maja cusoriquiano quiquiaari saaja Judiocuacaacuara. Nojuajaari cusoriquiano quiquiaari puetunu tariucua Pueyaso saquiriojosano pueyapueecuarajanaajuhuaaj, tee tiqiyocua niaquejonu na muerasurano quiyacuajani. Nojuajaari cusoriquiano puetunu cuno pojorijianaa na rerejotenura, jatiqui na qutiuniuria juhua niquiriyatu maanu. ⁵³ Naacuajitij, cuno juucajiniji, cuno Judiocuaca camarucuaari rojotooriquiaa taa nojori monutaniya Jesuni.

⁵⁴ Nocuaji, Jesuuri maja tari na rucanejonu quijia narta Judiocuaca niqiuara. Cunora tamaquiria canaa jiyataquiaariiri. Canaari nata quishii cariiquia jiya shuriucua tamonu tiacajiniani. Cuno tiaca sesa quiquiaari Efraín.

⁵⁵ Jaara quera quiquiaari tari canaa queranacusacari Pascua juucara, queraatia pueyari quiojoriquiaa Jerusalén tiacajiniara tama na tiacajiniijiaaja. Nojoriiri quiojoquiaari juhuacarijia nojori jeenucuanura na cuaqueya nojori puecoosacari tama na seyajaaja nojoriicuara. Nojoriiri naa miiquiaari jiyanooshano nojori quiniuria Pueyaso niqiuara, taa

supuetana Moisés rootaquiaaricujani. Nojoriiri naa miiquiaari juhua-janiya nojori queranacunura Pueyaso niQUIARA Pascua juuca. ⁵⁶ Pueyari tii Jesu pajenuuriquiaa. Pueyaso Secojoja tiajinia nojori quishacari, nojoriiri tama nequesoreetooriquiaajaaja:

—¿Taa nia sequeyani? ¿Pa queranacunujinia niniutianiyatenojotij, maja soj?

⁵⁷ Pueyacuara secojonaa jiyaniijianucua, Fariseocuacanio, nojoriiri tari pueya rootaquiaari, tamonu pueyano jaara niishiri tee Jesu quiyani, cuaara nojori numooteera nojori quiatenura Jesu.

12

María totasacari na shanohua jaanutaja Jesuucua
(Mt 26.6-13; Mr 14.3-9)

¹ Seis juuca jaara cureeriquiaajaa Pascua juucara, canaari jiyacari Jesuta Betania tiacajinia quiaareeni, Lázaro quijia tiacajinia, teyano Jesu samiitianiQUIAARICUJANI. ² Cuno tiacajiniJINIO Jesu rupuenaa pueya timitiasacari Jesu, nojoriiri sumatunuQUIAARI nojori miaquenuunura cuno niucua Jesuta. Martaari miaquesano patootariquiaa pueyara. Lázaroori Jesuta miaquenuuriquiaa narta masuusano pueyata, canaatanio. ³ Jiyacaritij, Maríari Jesuucua pataree na shanohua jaanutaja. Cunoori “nardo” jiyaniishano nataujiniji shipinishano quiquiaari. JiyanoHUA queraatia cumaneecata masesano. Puereetuca motiiquio cajiniocua puecariQUIAARI cuno shanohua jaanutaja. Maríari Jesu niOHUAACUA na totaree. Na nuhuaji, na sacuanijiarohua na muecacataari. Puetunu tiacojuanaari shanohua jaanuriquiaa. ⁴ Naa María miishacaritij, niQUIRIYATU canaajiniJINIO Jesu saquiriojosano pueyanoori juaarii. Nojuajaari Judas Iscariote quiriquiaa, na nuhuaji Jesu quiateQUIAARI na paraani. Nojuajaari naa sequeree:

⁵ —¿Casaara cuno shanohua jaanutaja niQUITIOYAQUISHAAREE queraatia cumaneecarani, casamiijiuniucua pueya niQUITIOJOSOCORIQUIANONI? ¡Jaara masenu panishaare, maara niQUITIOSAARE juhua niQUIRIYATU marijia pueyano poonijionu sami!

⁶ Naa Judas sequesacaritij, majaari seetanujuanaa na taraajenu quiriquiaa casamiijiuniucua pueyacua. Naa sequereeri saaja cumaneecaacua jiaatiaja na quiniucua, nohuasejojua na quishacari. Judasri cumaneeca quiquio cojuatana quijia puetunu canaarajanaa. Naacua-jitij, nojuajaari tiji nohuasejojua, pueya niQUITIOJOSANOJINIJII canaara. ⁷ Jesuuri saaja Judas sequeree:

—Nareja quia niQUIRI. Nojuajaari nio shanohua jaanutaja cojuataja pueyaracaanu, juhuaacarijia na jeenucuatajara cua cuaqueya, pueya niaaquishacarijia janiya raajinia, janiya jaara mosaareni. ⁸ Casamiijiuniucua pueyari pueyaracaanu niaata quiriquiano cutara. Saniniuujia, janiyari maja pueyaracaanu niaata quiriquianoni.

Pueyacuara secojonaa jiyaniijianucua roojotoosacari Lázaroocua

⁹ Queraatia canaa Judiocuacaari niishiQUIAARI Jesu Betania tiacajinia quiriquiaa. Cunora, nojoriiri nocua quiojoQUIAARI na niQUINIUCUA, Lázaro niQUINIUCUAJUHUJ, teyano Jesu samiitianiQUIAARICUJANI. ¹⁰⁻¹¹ Jesu samiitaniniucua Lázaro, queraatia canaa Judiocuacaari Jesuucua tiuucuaari, na pueya nojori quiniuria. Cunora, canaa

pueyacuara secोजना jiyaniijianucuaari rojotooquiaari Lázaro na motunurajuhuj.

Juhua Jiyaniijijajanaa Jesu tiuquishacari Jerusalén tiacajinia
(Mt 21.1-11; Mr 11.1-11; Lc 19.28-40)

¹² Cuno queraatia pueya, tari Jerusalén tiacajinia quiriquiaacuaa Pascua juucara queranacunurani, nojoriiri niishiquiaari Jesu tariqui tiuquiniutianiyajuhuj. ¹³ Nocuaji, nojoriiri tucuru piyotaree. Na nuhuaji, nijiyareeri Jesu naacunuucua, na tucuru shiiniotanuuriquiaari. Naa nacooriguaajaariuhua nojori shuquiritiasacari Jesu:

—¡Pocuaji Tacuna! ¡Pocuaji Tacuna! ¡Cuaara shuquiriaatia quiiria pa Jiyaniijia, teyano Pueyaso jiyaroquiaari pocuacujani! ¡Nojuacuajaari Israel pueya Jiyaniijijajanaa!

¹⁴ Jesuquiiri jiyacari burro niquiojua riuriatamaa. Tari na nijinia cajiriquiaari, taa tariucuaaanu Pueyaso Rupaajinia naajiotasano quiyacuajani. ¹⁵ Naa sequeyari:

“¡Sión tuhananuucua quiniaa pueyanaa, maja puerenu! ¡Nia niquiri!
¡Nia Jiyaniijia cumaji niya niaacua! ¡Burro niquiojua nijinia caji-yari!”

¹⁶ Jiyacaritij, majaari canaa niishiniu quiriquiaa naa canaa tiuquitishacari canaa Jiyaniijia Jesutej, canaari nio tariucuaaanu Pueyaso Rupaajinia naajiotasano tohuateeriquiaani. Pueyaso jaara Jesu samiitianiquiaariuhua, canaari jiyacari shusha niishiquiaarini cuno naajiotasanoquiiri Jesujiniji quiquiaari.

¹⁷ Cuno pueya, Jesu samiitianishacari Lázaro niquiquiaarini, nojoriiri pueya pohuatariquiaa taa Jesu jiiquiooquiaari Lázaro na raacoji na tohuatanurani. ¹⁸ Queraatia pueya niishishacari naa Jesu miishano na cumaacatatej, nojoriiri Jesu naacunuucua nijiyaree. ¹⁹ Nocuaji, Fariseocuacaari tama sequetooriquiaajaaja:

—¡Canaacuajaari cunora nia sequequiaani pa morejanaa! ¿Niaate na niquiya? ¡Puetunu pueyajanaari cuno pueyanoocua pacuree, na pueya nojori quiniuria!

Grecia jiyajinijinio taucuaca pocoojonu panishacari Jesuta

²⁰ Grecia jiyajinijinio taucuacaari Jerusalén tiacajiniara nijioquiaari-jiuhuj Pueyaso niquiara nojori queranacunuunura Pascuara. ²¹ Cuno pojoriiri canaa cojinia Felipeecua catecanoquiaari. Felipeeri Betsaida tiacajinijinio quiquiaari. Cunoori Galilea jiyajinia tiaca. Cuno Griego-huari Felipe sequeturee:

—Pueyanonaa, canaa quia Jiyaniijia Jesuta pocoojonu paniyani.

²² Jiyacaritij, Felipeeri Andrés sequesee cuno pojori sequesano nojuaja. Na nuhuaji, Andrésri Felipeta quiaaree Jesuucua. Nojoriiri Jesu pohuataseejuhuj. ²³ Jesuuri naa nojori riucuree:

—Quiarijiani, tama janiyajaarijia mosaanutaniya pueya nitini. ²⁴ Seetanjuanaa nia sequeyanijia, sohuajajau jaara raama jataaquishaare, pueyaracaanu niquijijajau quiniutianiyari. Saniniuujia, jaara natasaare juhua na moquenura, saaja moritianutaniyari queraatia na muetunura. ²⁵ Naajuhuj, cante tama na cuaqueyajaaja panijia puerani, nojuajaari puetunu shaajenutaniyajanaa. Saniniuujia, cante tama na cuaqueyajaaja panitiaja na tojiniuria janiya mijiriani,

nojuajaari pueyaracaanu shuquiriaatia rishijiara jiyatesaanutaniya.
²⁶ Cante quiria poonijionu paniyani, cuara seetanujuanaa cua tojjijia quiiria. Tee cua quiniutianiyacuaani, cua tojtijajacaari tii quiniutianiyajuhuaaj. Cua Queeri cua tojjijiaa timitianutaniya. ¡Jiyano hua maninia nojori miiniutianiyajaariuhuaaj!

Jesu pohuatasacari nojuaja mosaanutaniya

²⁷ 'Quiarrijiani, janiyari jiyano hua tacayani. ¿Casaa cua sequeyarini? ¿Janiyate sequeya soj: "Cua Quenaa, maja naquiya cua miitiniu"? Maja. Maja naa cua sequenu quiniutianiya. Janiyacuajaari cunora niquiaari mijiriani. ²⁸ ¡Cua Quenaa, janiya cuara miishiiriaqui taa quia paniyacuajani, pueya niishiniuria quiaari jiyano hua maninia!

Jiyacaritij, Pueyasoori tojishaaree pocuaano jiyocuacaanuji. Naa Neyanu sequereeri:

—Janiyacujaari naa niishitirii pueyani, pueyaracaanu quia miishacari cua panishano. Janiyari socua pacutenutaniuhua pueya niishitiniuni, quiaa jaara nojoriicuara mosaare.

²⁹ Cuno pueya, canaata tii quiriquiaa Jesutani, nojori tojishacari Pueyaso pocuaano, nojoriiri sequeturee:

—¡Miacanacuja cuno tojishaareeni!

Tamasacaari saniniuujia sequereecujua:

—¡Pueyaso serucuja nocua pocuareeno!

³⁰ Saniniuujia, Jesuuri canaa sequereee:

—Cuno rupaa niaa na tojjiriini, majaari quiria na quiniu quiriquiaa. Cunoori nia tojishocoriquiano quiriquiaa, nia niishiniuria cua Queeri cua tojiquiaa cua secojosacari nojuaja. ³¹ Quiarrijiani, mijiria quiniaa miishacari naquiya janiya, nojoriiri saniniuujia saniitioscoriquiano jiyatesaaree tari. Naajuhuaaj, mijiria jiyaniijia Sesaacaari jataasaanutaniyajuhuaaj, maja cumaacaraca na quiniuria socua. ³² Janiya jaara nujuaretasaareni, janiyari puetunu pueyapuejanaa nijiotenutaniya cucuani. Nojoriiri juhua jaatiasaanutaniya cucua, cucua nojori tiuuniuria, nojori ruuretanura janiya soj.

³³ Naa Jesu sequesacaritij, canaa niishitiriiri taa pueya monutaniya nojuajani. ³⁴ Tii quiniaa pueyari na riucuaree:

—Canaacujaari tariucuaaanu Pueyaso Rupaajiniji niishiyani, Pueyaso Jiyarosocoriquiano Cristoori pueyaracaanu rishiriquiano cutara. Quiajanijarijataj, ¿casaara quia sequeyarinijia, Pueyaso Jiyarosanoori nujuaretasaanutaniya tii na cusonura? ¿Canteeri cuno pueyanoni, quiaa na sequeya Pueyaso Jiyarosanooni?

³⁵ Jesuuri nojori sequere saaja:

—Janiya, nioojia cuhuatanani, janiyari niaata quiniutianiyajaara rupaquijiani. Nocua nia tiuuri juhuacarijia, ninishiqui quiaquishacarijia. Cante ninishiqui rucuanajojuani, nojuajaari maja na niishiniu tee na quiaani. ³⁶ Nioojia cuhuatanaacua nia tiuuri, niaata cua quishacarijia, seetanujuanaa cuhuashiqui quijijia nia quiniuria.

Naa Jesu sequenu nuhuaaji cuno pojoritij, quiacuhuari. Nojoriicuajii jamaashiiri.

Judiocuaca tiuyaquishacari Jesuucua

³⁷ Jesuuri jiyano hua queraatia jiyajeneta na cumaacata miishano miiquiaari pueya niquiara. Nojoriiri saaja nocua tiuyaquiquiaari.

³⁸ Naacuaajitij, tariucuacaanu Pueyaso sequenu panishano caminiujunia Isaías pohuatasanoori tohuateequiaari, nojuaja jaara naa sequenciaari:

“Jiyaniijianaa, ¿cante canaa pohuatasanoocua tiuuriini, canaa pohuatasacari quia Jiyarosocoriquianojinijini? ¡Shaaqui! ¿Cante niishiriijaaniuhuaaj, jiyajeneta casaa nojori niquishanoori seetanujuanaa quia cumaacata miishano quiriquiaa? ¡Shaaqui!”

³⁹ Naacuaajitij, majaari nojori naata tiuuniu quiquiaari Jesuucua. Isaíasri naa naajiotaquiaarijiuhuaaj:

⁴⁰ “Pueyasoori nojori jiyateree juhua nimishituriia, maja nojori niquiniuria na namijiata. Nojori niishitiaja cushitioreejaariuhuaaj, maja nojori niishiniuria nojori jiuujiata. Naa nojori miiriiri maja nojori tacatonura nojori jiuujia, cua jiyanooniuria nojori, quiarinio pueyara cua jataniyaquiniuria nojoriujiuhuaaj”.

⁴¹ Supuetana Isaíasri naa caminiujuquiaari Pueyaso niishitishano nojuajatej, Jesu na niquiniucua na shacantuuca cumaacajinia quiyano. Naa na pohuatasacaritij, nojuajaari juhuacarijia Jesujiniji pohuatariquiaa.

⁴² Naajaa, queraatia narta Judiocuacaari Jesuucua tiuquiaari. Queraatia canaa jiyaniijianucuaari nocua tiuquiaarijiuhuaaj. Cuno jiyaniijianucuaari maja na pohuatanu quijia pueya niquiara, Jesuucua tiuujiaa nojori quishacari. Nojoriiri na pohuataaquijia, Fariseocuaca na pueretusacari, Fariseocuaca mariqui nojori tenujureeri maja socua nojori tiuquitianura Pueyaso secojoja tiacajinia. ⁴³ Nojoriiri saaja narta pueya shuquiritiasano pueya quiniu panijia, maja Pueyaso shuquiritiasano cutara.

Pueya tojtiaaquiniucua Jesu sequesano, nojoriiri saniitiosaariquiano

⁴⁴ Jesuuri jiyanoohua na rupaa paaretaree. Naa sequereeri:

—¡Cante cucua tiuuriini, majaari saaja na tiuuniu cucua! ¡Cua Queecua tiuuriijiaariuhuaaj, cante cua jiyaroquiaaricuaajani! ⁴⁵ ¡Cante cua niquiriini, nojuajaari cua Jiyarona niquirijiuhuaaj! ⁴⁶ Janiyari mijiria niquiaarini cua cuhuatanura niajanija. Naacuaajitij, cante cucua tiuuriini, majaari tari na quiniu ninishiQui. ⁴⁷ Pueyano jaara cua rupaa tojiriquia najuhanaj, janiyajanaari maja nocuara cua saquiriojotanu quiniutianiya na saniitiosaanura. Majaari cua ninuu quiquiaari mijiria, pueya cua saniitionura. Janiya cutaraari niquiaarini nojoriicuaaji cua tacunura. ⁴⁸ Cante cua ruuretaja saajani, cua sequesano tojijaquiyajaariuhuaaj, nojuajaari tari nocuara saquiriojotana jiiitia na saniitiosaanura. Nojoriiri cua sequesano cutaraari tama nojoriicuara saquiriojotariquianojuaja nio jiya puequesacari. ⁴⁹ Cua pohuatasanoori maja tama cua niishishanojuaja. Cua Jiyarona cua Quecuajaari cua niishitiquiaa casaa cua sequenutaniyani, mariyata casaa cua niishitiojonutaniyani. ⁵⁰ Janiyari niishiyani cante cua Que rupaa tojjiani, nojuajaari pueyaracaanu quijia quiniutianiya cutara. Naaratej, janiyari seetanujuanaa saaja na sequesano caminiujuquiaani, taa na niishitiquiaa janiyacuaajani.

13

Jesu jeequejosacari na saquiriojosano pueya niohuaca

¹ Jesuuri canaa na saquiriojosano pueyata rerejoquiaari Pascuaacuara juucajinia. Jesuuri jiyacari niishiquiaari tari quiquiaariiri quera na tiujiasacari canaa mijiria, na Queecua na tacanuhuara. Nojuajaari canaa paniriquiaajaa, taa canaa na paniquiaari pueyaracaanucujani, mijiria na quishacari canaata.

² Cuno niucujaja, Jesuuri canaa na saquiriojosano pueyata miaque-
riquiaa. Sesaacaari tari Judas Iscariote niishitirii noojiajinia, nojuaja
cuaara Jesu quiateera na paraa, na mosaanura. Cuno Judasri ta-
monu Simón jyanishano pueyano niyanu quiquiaari. ³ Jesuuri ni-
ishijia nojuaja seetanujuanaa Pueyasojiniji niquiaari. Naajuhujaj, no-
juajaari niishiquiaari, na Que Pueyasoori na jiyatequiaari Jiyaniijjara-
janaa, puetunu casaa jiitianajanaa na quiniuria. Niishiriquiaajaariuhua
nojuajaari quera na Queecua tacanutaniuhua. ⁴ Jiyaniijjajanaa na
quishacari, naajaa, nojuajaari miaquejajiniji sanequiaari. Na tucuaque
toque jocuareeri. Na nuhuaji na cajiniocua camarucuteree cuaqueya
tuujutajaj. ⁵ Na nuhuaji, mohuaca shuurii tohuatashijiniaari. Canaa
niohuaca jeequejoriquiaari juhua tiaco seru. Na nuhuaji, na sacuanij-
jariquiaajaariuhujaj na cajiniocua na camarucutesano cuaqueya tuuju-
tajata.

⁶ Na jeequenu panishacari Simón Pedro niohuaca, Pedroori saaja Jesu
sequeree:

—Jiyaniijjanaa, ¿taa quia miyani? ¿Quiaateeri cua niohuaca jeequenu-
taniya?

⁷ Jesuuri Pedro riucuaaree:

—Quiarijiani, majaari quia niishiniu casaara naa cua miyani. Naajaa,
quiaacuaja na nuhuaji niishiniutianiya.

⁸ Pedroori Jesu sequeree:

—¡Cua Jiyaniijjanaa, janiya cutaraari maja quenaaja cua shanacunu
quiniutianiya cucua quiajaniya, cua niohuaca quia jeequenura!

Jesuuri na riucuaaree:

—Janiya jaara quia niohuaca jeequejiyaquirini, majaari cua pueyano
quia quiniu quiniutianiya.

⁹ Simón Pedroori na sequeree:

—¡Jaara naa quiritij Jiyaniijjanaa, maja saaja cua niohuaca jeequenu-
cuarajaj! ¡Quia jeequerejuhua cua juaashiquiaa, cua nacanio!

¹⁰ Jesuuri na sequeree:

—Cante shusha nanajani, saaja na niohuacaari jeequeshiya cutara.
Na cuaqueyacuajaari tariucua jeequesano quiya. Puetunu niajaniya-
janaari tari jeequejosano quiyacuaja. Saa niquiriyatujuaari jeequesoo
quia saniniuuja.

¹¹ Jesuuri tari niishiquiaari cante na quiatenutaniya na paraani.
Nocujaj sequeriquiaari: “Niquiriyatu pueyanoori jeequesoo quia cu-
tara”.

¹² Canaa niohuaca na jeequejonu nuhuaji, Jesuuri na toque cushirio-
hua. Miaquejajinia cajiriohuari. Canaa nequesotareeri:

—¿Niaate niishiya casaara naa cua jeequejoree nia niohuacani?

¹³ Niaacuajaari cua sequequiaa “Niishitiojonata”, nia “Jiyaniijjatania”.

Seetanujuanaa nojuacuajaniija, taa nia jyaniquiquiaa janiyacujani.
¹⁴ Naaratej, janiya jaara jeequejoree nia niohuacacuaani, nia Jiyani-
ijia cua quishacari, nia Niishitiojonajuhujaj, naa nia miiriquia niarta
Pueyas muerasujuhujaj. ¹⁵ Janiyari naa miiriini, cua niishitiojonura

nijaniya, naa nia miitioonurajuhuj taa cua miirii nijaniyacuaani. ¹⁶ Seetanujuanaa nia sequeyanijia, seruuri maja socua tojishano quijia na camarnujiniji. Naajuhuj, jiyarosano pueyanoori maja socua tojishano quijia na jiyaronajiniji. ¹⁷ Naa jaara cua rootasano niishiri, niaari shuquiriaatia quijiaa quiniutianiya niaa jaara na tojijiaa quiri.

¹⁸ 'Shusha cua sequesano nijaniyani, cunoori maja puetunu nijaniyaranojuanaa. Janiyacuajaari niishiyani canapue cua saquiriojoquiaarini, taamueca pueyate nijaniyani. Naacujitij, tariucuacaanu Pueyaso Rupaajinia janiyajiniji naajiotasanoori tohuateenutaniya. Naa sequeyari:

“Tama cuata miaquenajaarijia cua paracara quirii”.

¹⁹ Janiyari juhuacarijia nia toyani. Naacujitij, cua pohuatasano jaara tohuateere, niaari niishiniutianiya janiyari seetanujuanaa Pueyaso Niyani. ²⁰ Seetanujuanaa nia sequeyanijia, cante cua jiyaramiquishano pueya tojijiani, nojuajaari cua tojijiyuhuj. Cante cua tojijiaa quiriini, nojuajaari cua Jiyarona tojijiaa quiriijuhuj.

Jesu pohuatasacari, Judascuajaari na paraa na quiateriquiano
(Mt 26.20-25; Mr 14.17-21; Lc 22.21-23)

²¹ Naa Jesu sequenu nuhuaji canatej, jiyanojia na taraajenuta naa canaa sequereeri:

—Seetanujuanaa nia sequeyanijia, niquiriyatu nijaniyajinijinioori cua paraa cua quiatenutaniya.

²² Canaari jiyacari tama niqutiooreejaanijia. Majaari canaa niishiniu quiriqiaa canajiniji naa Jesu sequeriquiaani. ²³ Jiyacarijij, janiyari na shuriucuaji cajiriquiaa miaquenujuajiniani, na panishano pueyano cua quiniucua. ²⁴ Naaratej, Simón Pedroori cua mashiniquirii sanaa cua nequesotanura Jesu, canajiniji naa na sequereeni. ²⁵ Naarate janiyari Jesuucua tatereeni, jiyasohuaja cua nequesotanura nojuaja. Janiyari naa na sasacareeni:

—Jiyaniijianaa, ¿canteeri naa quia miiniutianiyani?

²⁶ Jesuuri cua riucuaaree:

—Janiyari pan rau piquiojonutaniya caacajiniani. Cana cua niqutiojonutaniyani, nojuajaari cuno.

Jesuuri jiyacari pan rau piquiojoree. Judas Iscariote na niqutiooreeri. Nojuajaari tamonu Simón jiyaniishano niyanu. ²⁷ Judas masesacari cuno pan rau, Satanásri noojiajinia tiuquiquii. Jesuuri jiyacari Judas sequereeri:

—Cuno, quiaa na niishiriojiya miiniuni, quiocua ritia miirinioj.

²⁸ Canaa na saquiriojosano pueya nata miaquenuuriquiaani, majaari quenaaja canaa niishiniu quiriqiaa casaara naa Jesu sequereeri Judasni. ²⁹ Judasri canaa cumaneeca cojuatana quijia. Naaratej, noojiaqueya canaajinijinioori jiyaniquiriaani Jesu naasucua na jiyaroriquiaa socua casaa na masenura canaa queranacunuutajara, casamijuniucua na niqutiojonura cumaneeca soj. ³⁰ Judas jaara masequiaari Jesu niqutiojonu pan, jiyacari tohuataqueeri. Tariucua niucuaari quiriqiaa.

Jesu rootasano quiarinio

³¹ Judas tohuatanu nuhuaji, Jesuuri canaa sequereeri:

—Quiarijia cua miishanojiniji, janiyari maniniuhuaqueetasaanutaniyani. Pueyasoori jiyanojia maniniuhuaqueetasaanutaniyajuhuj,

naa cua miishanojiniji. ³² Pueyaso jaara maniniuhuaqueetasaare naa maninia cua miiniucuatej, nojuajaari cua jiyatenutaniya cumaacaraca quijia cua quiniuria na shuriucua. Quera naa cua miiniutianiyari. ³³ Quiquiohuaniojuanaa, janiya rupaquijia niaata quiniutianiyajaarani. Taa cua sequecanu parta Judiocuacacuaani, janiyari naa nia sequeyajaaniuhuj. Niaari cua pajenuunutaniya juucua. Majaari nia naata quianu quiniutianiya cucua, tee cua quianutaniyacuaani. ³⁴ Quiarijia nia niishitiriiria nio quiarinio rootasano. Nia tojiri. ¡Panitioojuaca nia quiri! Naatej, taa cua paniquiaacuaa nijaniyani, naa nia panitioorejuhuaj. ³⁵ Naa jaara naa panitioojuaca quiri, puetunu Pueyaso niishiyashijaca pueyajaanaari naacuaji niishiniutianiya, niaari cua tojtiajaca pueya.

Jesu pohuatasacari Pedro nocuaji seetanutaniya
(Mt 26.31-35; Mr 14.27-31; Lc 22.31-34)

³⁶ Simón Pedroori jiyacari Jesu nequesotaree:

—Jiyaniijianaa, ¿tee quia quianutaniyani?

Jesuuri na riucuaaree:

—Tee cua quianutaniyacuaani, majaari quia naata nuhuajiniu janiya. Naajaa, quiaari na nuhuaji quiariquiano.

³⁷ Pedroori na sequeree:

—Jiyaniijianaa, ¿casaara quia sequeyarini, quiarijia cutara maja cua naata quianu quiata? Janiyacuaja tama cua cuaqueyajaaja tarinijiotaaree quiocuarani.

³⁸ Jesuuri na riucuaaree:

—¿Naatee? ¿Quiaate tama quia cuaqueyajaaja tarinijiotaaree cucuara? Janiyari seetanujuanaa quia sequeyani: juhuaquenu panishacari caacaraja niunijiyaquishacarijia, quiaari jiyacari cucuaji seetanu pacutejonutaniya tari.

14

Jesuuri juhua nuu Pueyasocua

¹ Jesuuri naa canaa sequeree socua:

—Maja nia tacaaniu, pueyanaa. Nioojia nia cajitiri. Saaja Pueyasocua nia tiuuri. Cucua nia tiuurijuhuaj. ² Cua Que tiaari puereetuca. Queraatia quiquioori tii quiya. Cunora, janiyari coteenu nia puetanutaniyani, niaacuaji cua jeenucuanura nia quiijara. Jaara naa quiaquiritij, janiya maara nia sequeyquirini janiya nia puetanutaniyani, niaacuaji cua jeenucuanura. ³ Cua jeenucuanu nuhuaji nia quiquiora, janiyari niaacua tacatenutaniuhuaani, cua rijionuhuaa nijaniya, cuata nia quiniuriajuhuaj tee cua quiniutaniyacuaani. ⁴ Niaacuajaari cua quiquiojiniara neteja nuu niishiya, tee cua quianutaniyacuaani.

⁵ Tomásri Jesu sequeree:

—Jiyaniijianaa, ¡maja canaa niishiniu quenaaja tee quia quiaani! ¿Canaatucua taa cuno nuu niishirini, quiaa na sequeyani?

⁶ Jesuuri na riucuaaree:

—Janiyacuajaari cuno nuuni, Pueyasocua nia quianura. Janiyacuajaari seetanujuanaa Pueyaso Rupaani. Janiyari pueya samiitianiija-juhuaj. Majaari pueya naata Pueyaso rupeenu tamajaaja. Saaja janiya cutaraari pueya rupeuteja Pueyasoni, nojori tiuushacari cucua. ⁷ Naa

jaara seetanjuanaa cua niishiquiaaricuaa, niaa maara cua Que niishirijuhuaaj. Seetanjuanaa, niaari tari na niishiyacuaja. Niaari na niquiquiaajuhuaaj.

⁸ Felipeeri na sequeree:

—Jiyaniijianaa, quiaa jaara canaa niquitiri quia Que Pueyaso, canaacua panaatia quiriohuani.

⁹ Jesuuri Felipe riucuaaree:

—Felipenaa, janiyacuaruhua pueyaracaanu niaata quiquiaa juucuan. ¿Majateeri juhuanajuaja quia niishiniu janiya? Cante cua niquiquiaani, cua Que niquiquiaajaariuhuaaj. ¿Casaara quia sequeya cua niquitiniuria cua Que nijaniyarini? ¹⁰ ¿Majateeri quia tiuuniu cucua cua sequesacari quiajaniya, janiyari cua Que jiuujiajinia quiyani, cua Queeri saniniuujia coojiajinia quiyacuaja? Canaari maja rimiajatani. Nio, cua sequesano nijaniyani, cunoori maja tama cua niishishanojuaja. Cua Que, coojiajinia quiyani, nojuajaari na panishano miitiquiaa janiya. ¹¹ Cucua nia tiuuri cua sequesacari nijaniya, janiyari cua Que jiuujiajinia quiyani, cua Queeri saniniuujia coojiajinia quiyacuaja. Niaa jaara cua sequesanoocua tiuuniu paniyaquiri, cucua nia tiuuriqui na cumaacata cua miiniuucua nia niquiara. ¹² Seetanjuanaa nia sequedianijia, cante cucua tiuujiani, nojuajaari puetunu cua miishanojuanaa miiniutianiyajuhuaaj. Cua tacasacariuhua cua Que shuriucua cua quiniuhuara, cucua tiuujiaaari cua cumaacata seetanjuanaa socua jiyajeneta casaa miiniutianiya cua miishanojiniji. ¹³ Seetanjuanaa nioojiajinia cua quishacari, janiyari niaara miiniutianiyani puetunu nia masesanojuanaa nia secojosacari cua Que. Naacujitij, pueyari cua Que timitianutaniya, nojori niishishacari cua Queeri jiyanohua maninia miijia. ¹⁴ Nioojia rupetoosacari coojiaata, janiyari puetunu nia masesanojuanaa miiniutianiya niaarani.

Jesu sequesacari, nojuaja Pueyaso Sohuanu jiyaronutaniya mijiria

¹⁵ 'Niaa jaara seetanjuanaa cua panijiaa quiri, niaari cua rootasano tojtiaajaca quiniutianiya. ¹⁶ Naajuhuaaj janiyari cua Que secojonutaniyani, niaacua na jiyaronura tamonu cua niti mijiria, nia cumaquiriquiano. Nojuajaari pueyaracaanu niaata quiriquiano. ¹⁷ Nojuajaari Pueyaso Sohuanu, seetanu rupaa jitianajanaa. Pueyaso tojiyashijiaa pueyari maja na naata cuno Sohuanu na jitianu, nojori niquiyaquiniuucua nojuaja, na niishitiuyaquiniuucua nojuajuhuaaj. Niaa cutaraari na niishijiaa. Nojuajaari niaata quiyacuaja. ¡Pueyaracaanu nioojiajinia quiriquianojaariuhuaaj!

¹⁸ 'Majaari seetanjuanaa cua tiujianu quiniutianiya nijaniya juhua japueyojuaca nia quiniuria. Janiyacuajaari tacatenutaniuhuani niaata cua quiniuhuara. ¹⁹ Pueyaso tojtiaashijiaa pueyari quiari naataja cua niquiyaquiniutianiya socua. Niaa cutaraari cua niquijiaa quiniutianiya. Samiitianijiojua cua quiniuucua, niaari pueyaracaanu quijiaa quiniutianiyajuhuaaj. ²⁰ Jiyacaritij, niaari niishiniutianiya janiyari cua Que jiuujia rupuejani, niaari coojia rupuejajuhuaaj. Janiyari saniniuujia nioojiajinia quijiani. ²¹ Cante cua rootasano niishijiani, nojuaja jaara na tojjiaa quirijuhuaaj, nojuajaari cua panijia cutara. Cante cua panijiani, cua Queeri na panijia quiniutianiyajuhuaaj. Janiyari na panijia quiniutianiyajuhuaaj. Janiyari cua panijiaacua niniutianiyani, seetanjuanaa na niishiniuria janiyari nata quiyani.

²² Canaa cojinia Judasni, nooj, Judas Iscariote sesaanucuatej, nojuajaari Jesu nequesotaree:

—Jiyaniijianaa, ¿casaara saaja canaacua quia niniutianiyarini, maja puetunu mijiria quiniaa pueyacujananaa?

²³ Jesuuri na riucaaree:

—Cante cua panijiani, cua rootasano tojjijaajariuhuj. Cua Queeri jiyano pueyano panijia. Naaratej, canaari nocua niniutianiyani, noojiajinia canaa quiniuria, canaa quiquiora canaa jiyatenura nojuaja. ²⁴ Saniniuujia, cante cua paniyaquijiani, jiyano pueyari cua rootasano tojjiyashijiacajuhuj. Puetunu cua rootasanojuanaa, niaa na tojiquiaani, cunoori maja tama cua niishishanojuaaja. Cunoori cua Que niishitishano janiya, cante mijiria cua jiyaroquiaaricujani.

²⁵ 'Janiyari puetunu niojuanaa nia pohuataani, niaata cua quishacarijia mijiria. ²⁶ Cua Que jiyarosocoriquiano na Sohuanuuri nia cumaquiriquiano. Nojuajaari nia niishitiojonutaniya puetunu cua niishitionu panishanojuanaa niajaniya. Naajuhuj, nojuajaari nia niishitiniutianihua puetunu tari cua pohuatasano niajanijajanaa.

²⁷ 'Janiyari nioojia cajitiniutianiyani. Janiyari coojia nianutaniya nioojiajiniani, juhuajaniya quijiacua nia quiniuria taa cua quiyacuaani. Naacuajitij, niaari seetanujuanaa juhuajaniya quiniutianiya. Mijiria quiniaa pueyari maja na niishiniu cumanijianu juhua janiya. Naaratej, maja nia tacaaniu. Majaari puerenujuhuaj. ²⁸ Tari nia sequereecuanijia: "Janiya quera quiohuani. Janiyari na nuhuaji tacatenutaniuhuani niaata cua quiniuria". Niaa jaara seetanujuanaa cua panijiacua quiriqia, niaa maara shuquiriri nia niishishacari janiyari cua Queecua quiohuani. Nojuajaari seetanu Jiyaniijajanaa cutara janiyajiniji. ²⁹ Janiyacuajaari juhuacarijia nio nia sequeyani. Naacuajitij, niaa jaara niquiri tohuateyano cua sequesano niajaniya, niaari niishiniutianiya puetunu cua pohuatasanojuanaari seetanujuanaa.

³⁰ 'Majaari puera cua pocojonu quiniutianiya niaata tari. Cua Paraca cucua quenaacoya tarini, na miiniuria janiya taa na paniyacujani. Nojuajaari Pueyaso tojtiaashijiacua jiyaniijia. Pueyaracaanu cua Que Pueyaso tojjia cua quiniucua, cua Paraca maara naquiya cua miyaquiri janiya jaara cucua na shanacuyaquirini. Na cumaacaari maja na shocotanu cua cumaaca cutara. ³¹ Naajaa, na miishanojiniji janiya, puetunu pueyajanaari niishiniutianiya, janiyari puetunu cua Que sequesanojuanaa tojjiani, na panijia cua quiniucua.

'Nia sanetare. Niiquiji pa quiaare.

15

Jesu pueyari juhua Jesu cashacucua, Jesu quishacari juhua neyona

¹ Jesuuri naa pohuataquiaari socua canaa niquiara:

—Janiyari juhua uva jiyonani, cua Que natau. ² Cua pueyari juhua cua cashacucua. Tamonu cua cashacucujinijinio jaara muetuyashijia quiri, cua Queeri na piyotaja. Teyano cua cashacucujinijiniote muetujua saniniunijia, cua Queeri na nacareetaja, socua queraatia na muetunura. ³ Nia tojinuuucua cua rootasano, niaari tari juhua nacareetasano quiya. ⁴ Pueyaracaanu coojia nia rupeere, taa cua rupueya nioojiacuaani, niaa mariqui juhua uva cashacucua piyotasaareeri. Jaara neyonaacuaji

piyotasaare, majaari na naata muetunu tari. Naajuhuj, majaari nia naata muetujua quiniu, niaa jaara coojia rupueyashijiaca quiri.

⁵ Janiyari juhua nia jiyonani. Niaari juhua cua cashacucua. Cante coojia rupuejani, taa cua rupueya niajanianyacuaani, naacuajitij, niaari juhua queraatia muetujuaca quiniutianiya. Cucuaji rupatejacaari maja na naata casaa miiniu janiyaju. ⁶ Cante cua rupueyashijiani, nojuajaari taraatia miishaanutaniya juhua uva cashacucua piyotasano neyonajiniji, tamocora jaquerootasano. Jaara sorere, tatucusaarohuari manijinia quejoosocoriquiano. Tii cateyari.

⁷ 'Niaa jaara coojia rupuejaca quiri, niaa jaara cua rootasano tojjijia quirijihuj, puetunu nia panishanoocuarajanaa nia secojore Pueyaso. Nojuacuajaari nia masesano miiniutianiya. ⁸ Naa cua Que miishacari nia panishanotej, niaari juhua queraatia muetujuaca quiniutianiya. Naacuajitij, cua Queeri jiyanoehua timitiasaanutaniya. Naacuajitij, niishishaanutaniyajaariuhua niaari cua tojtiajaca pueyaniojua. ⁹ Janiyari nia panijiani, taa cua Que paniya janiyacuani. Coojia rupuejaca nia quiri pueyaracaanu, cua panishano pueya nia quiniuria. ¹⁰ Janiyari cua Que panishanoni, pueyaracaanu cua miiniuucua na panishano. Naajuhuj, niaa jaara cua rootasano tojjijia quiriquia, niaari pueyaracaanu cua panishano pueya quiniutianiyajuhuj.

¹¹ 'Janiyari naa nia sequeyani, shuquiriaatia quijia nia quiniuria, taa shuquiriaatia quijia cua quiyacuani. Naacuajitij, niaari tojetaarucujanaa shuquiriaatia quijia quiniutianiya. ¹² Cua tojiri. Nioori cua sequesano niaara: "¡Pueyaracaanu panitioojuaca nia quiriquia, taa cua paniya niajanianyacuani!" ¹³ Cante tama na cuaqueyajaaja panitaja na cusonura na rupuenaa nitini, naa miijia cutaraari seetanujanaa jiyanoehua narta pueya panijia. ¹⁴ Niaa jaara cua sequesano miijia quiri, niaari cua rupuenaa. ¹⁵ Naacuajitij, majaari cua sequenu quiniutianiya tari niajaniya cua seyata. Pueyano seruuri maja na niishiniu casaa poonijosano na camarnu miiquiaacuani. Janiyari quiarijia nia sequeya cua rupuenaatani, cua niishitiniuucua niajaninya puetunu cua Que sequesanojuanaa janiya. ¹⁶ Majaari nia saquirojionu quiquiaari janiya. Janiya cutaraari nia saquirojoquiaarini cua jiyaramiquiniuria niajaninya, cua panishano nia miiniuria. Naa nia miishacari cua panishanotej, niaari juhua queraatia muetujua naana quiniutianiya. Puetunu nia miishanojuanaa cua cumaacatani, cunoori pueyaracaanu rishijia quiniutianiya. Cuno miishanoori maja najuhuanaj. Naaratej, cua Queeri puetunu nia masesanojuanaa nia niqutionutaniya seetanujanaa coojia rupuejaca nioojia quishacari. ¹⁷ Janiyari cunora nia sequeyani: "Pueyaracaanu panitioojuaca nia quiri".

Pueyaso niishiyashijiaca pueyari Pueyaso muerasu niqiniu paniyashijiaca

¹⁸ 'Pueyaso niishiyashijiaca jaara nia niqiniu paniyaquiriquia, majaari nia tacaaniu. Cuno pojoricuajaari naa cua niqitiuniu paniyaquijiacacuaa. ¹⁹ Niaa jaara Pueyaso muerasu quiyaquiriquia, Pueyaso niishiyashijiaca maara nia panijia quiri quia, taa nojori paniquiaa narta Pueyaso niishiyashijiacacuaani. Niaari Pueyaso niishiyashijiac quiquiaarijuhuj. Naajaa, janiyari nojori tajiniji nia saquirojoquiaarini, cua pueya nia quiniuria. Cunora, Pueyaso niishiyashijiacari nia niqiniu paniyaquiquiaa, maja tari nia quishacari juhua

nojori. ²⁰ Majaari nio cua sequesano nia niyajetanu: “Seruuri maja socua tojishano na camarnujiniji”. Naaratej, Pueyaso niishiyashijia jaara naquiya cua miiquiaacuaa, niaari naquiya miishaanutaniyajuhaaj. Naajuhuaaj, nojori jaara cua rootasano tojiquiaacuaa, nojoriiri nia rootasano tojijiaca quiniutianiyajuhaaj. ²¹ Nojoriiri naa naquiya miiniutianiya niajanijatej, cua pueya nia quiniuucua, nojori niishiyaquishacari cua Jiyarona.

²² Janiya jaara niaquiquiaari nojori cua pohuatanura Pueyaso rupaa ni, nojoriicuara maara saquiriojotaaquishaare, sesa nojori miishanojiniji. Nojori niquiara cua pohuatanuucua Pueyaso rupaa, majaari nojori naata sequenu quiniutianiya: “Cua jiyanoori. Maja cua niishiniu quiquiaari quia rootasano”. ²³ Cante cua niquiniu paniyashijiani, nojoriiri cua Que niquiniu paniyashijiajuhaaj. ²⁴ Sesa nojori miishano maara nojoriicuara saquiriojotaaquishaare, janiya jaara cua cumaacata miyaquiquiaari nojori niquiarani. Janiyari socua jiyajeneta casaa miijioquiaari cua cumaacata nojori niquiarani, socua tamasaca miishanojiniji. Naajaa, naa nojori niquishacari cua cumaacata cua miishanotej, nojoriiri saaja cua niqutiuniu paniaquijiaa, cua Que niqutiuniu paniaquijiaacaariuhuaaj. ²⁵ Naajaa, naa nojori miiniuucua janiyatej, tariucuacaanu Pueyaso Rupaajinia naajiotasano janiyajiniiri tari tohuateeree. Naa sequeyari:

“Janiyari najuhuaana niquiniu paniaquishiyani”.

²⁶ Janiya jaara cua Que shuriucua quishuhuaani, janiyari tiji Pueyaso Sohuanu jiyaronutaniya mijiriani. Nojuajaari seetanu rupaajanaa jiitija. Nojuajaari janiyajiniji niishitiniutianiya pueya. ²⁷ Niaari janiyajiniji pohuatanutaniya pueyajuhuaaj, pueyaracaanu cuata nia quiniuucua shushajanaa cua coteesacari pohuatanu Pueyaso rupaa.

16

¹ Janiyari naa nia numooteyani maja nia tarinitianura cucua tiuuniu niaa jaara naquiya miishaare. ² Cua pueya nia quiniuucua, majaari nia shanacusaanu quiniutianiya nia tiuquitianura Pueyaso secojojua tiacajinia. Pueya jaara nia puecoorejuhuaaj cua tojitiajaca nia quiniuucua, nojoriiri jiyaniutianiya nojori maninia miya Pueyasora, naa nojori miishacari. ³ Nojoriiri naa miiniutianiya niajanijatej, nojori niishiyaquiniuucua janiya, cua Quejuhuaaj. ⁴ Janiyacuajaari juhuacarijia naa nia sequeyani. Naacuajitij, niaa jaara naquiya miishaare, niocua jiyacari niishiri janiyacujaari tari naa nia sequequiaarini. Majaari quenaaja nio cua sequenu quijia niajaniya, pueyaracaanu niaata cua quiniuucua.

Pueyaso Sohuanu miishanojiniji pohuatasano

⁵ Quiarijiani, janiyari cua Jiyaronaacua quiohuani. Quiarijiani, majaari quenaaja niajanijajinijinio nequesotanu janiya: “¿Tee quia quiohuarini?” ⁶ Janiya jaara nia sequereeni janiya quianutaniuhuaani, niaari saaja taraajequee. ⁷ Seetanujanaa nia sequeyanijia, socua maninia quiniutianiya niaaraari, janiya jaara quiaarohuani. Janiya jaara quiaaquiyarohuani, majaari Pueyaso Sohuanu ninu quiniutianiya niaacua, naa cumaquiniuria niajaniya. Janiya jaara quiaarohua cutarani, janiyari niaacua na jiyaronutaniyani. ⁸ Mijiria na tiuquishacari,

nojuajaari pueya jiuujiajinia poonijionutaniya, nojori na niishitiniuria nojoriiri seetanujuanaa sesa miijiaca. Nojori niishitiniutianiya-jaariuhua nojoriiri na naata sesa miyashijiacara jiyatesaanu. Naa-juhuaj, nojori niishitiniutianiyaari Pueyasoori na naata jiyanooniu nojori, maja Sesaacata nojori cojiritiasaanura mani quiquiojinia quejoonu.⁹ Seetanujuanaa, Pueyasora, nojoriiri sesa miijiaca nojori tiuyaquini-uucua cucua.¹⁰ Jiyocuacaanu cua tacasacariuhua cua Queecua, majaari socua nia niquiniu quiniutianiya janiya. Naacuajitij, Pueyaso Sohuanuuri pueya niishitiniutianiya, janiyari seetanujuanaa cua Que Pueyaso jiyanootijia cucua tiuuriquiano pueyani.¹¹ Cua shocotasacari Sesaaca, Pueyaso Sohuanuuri pueya niishitiniutianiya, nojoriiri sanitiosaanutaniya. Naacuajitij, nojori jiyaniijia Satanás jaara tari sanitiosocoriquiano quiyacuaa, nojoriiri saniitiosaanutaniyajuhuaaj, cucua nojori tiuyaquiniuucua.

¹² Janiyari queraatia jiiitiaajaa cua pohuatanura nijaniyani. Naajaa, majaari cua pohuatanu quiniutianiya quiarijia nijaniya. Juhuanujuaja maja nia naata na niishiniu. Pueraruhua.¹³ Pueyaso Sohuanu tiuquishacari niaacua, nojuajaari nia niishitiniutianiya puetunujuanaa cutara. Nojuajaari seetanu rupajaanaa jiiitiaja. Nojuajaari maja tama na niishishanojuaja na niishitiniu quiniutianiya nijaniya. Puetunu na tojishanojuanaa janiyajiniijini, cuno nia niishitiniutianiya cutaraari. Nia niishitiniutianiyaariuhua taate nio pa quishacari nuhuaji quiniutianiyani.¹⁴ Niaari cua shuquiritianutaniya, nojuaja niishitiniuucua nijaniya janiyajiniji.¹⁵ Puetunu cua Que jiiitiasanojuanaani, cunoori cua casaajuhuaaj. Naaratej, janiyari nia sequereeni, Pueyaso Sohuanuuri janiyajiniji masenutaniya cua jiiitiasano niaara, na caminiujuuniuria nijaniyarajuhuaaj.

¹⁶ Niaari saaja quiarijia cua niquiya. Na nuhuaji cutara, majaari socua nia niquiniu quiniutianiya janiya. Pasa naataja na nuhuaji, niaari cua niquiniutianihuacuuhuaaj.

Nia taraajenuuri jatanutaniya shuquiriaatia nia quiniuria

¹⁷ Jiyacaritij, noojiaqueya canaa na saquiriojosano pueyajinijinioori tama nequesoreetooreejaaja:

—¿Casaa na sequenu paniyarini, nojuaja jaara sequeree: “Niaari saaja quiarijia cua niquiya. Na nuhuaji cutara, majaari socua nia niquiniu quiniutianiya janiya”? ¿Casaa na sequenu paniyajaanuuhua na sequesacari: “Pasa naataja na nuhuaji niaari cua niquiniutianihuacuuhuaaj”, na sequesacarijuhuaj: “Cua Queecua quianutianihuani-
jia”?¹⁸ Naajuhuaaj, ¿casaa na sequerariini na sequesacari “quiarijiani”, mariyata “pasa naataja na nuhuaji”? ¡Majaari pa niishiniu casaaraqui na sequeratejaaj!

¹⁹ Jesuuri tari canaa nequesotanu panishano nojuaja niishirii. Cunora naa canaa sequereeri:

—Janiyari nia sequereeni: “Niaari quiarijia cua niquiya, na nuhuaji cutara maja socua nia niquiniu quiniutianiya janiya. Pasa naataja na nuhuaji, niaari cua niquiniutianihuacuuhuaaj”. ¿Niaatejaara niojiniji nequesoreetoya tama nijaniyajaaja? ²⁰ Seetanujuanaa nia sequerani-
jia, niaari nujuquenutaniya. Niaari taraajeconutaniyajuhuaaj. Jiyacaritij, Pueyaso niishiyashijiacaari taquiya shuquiriaatia quiniutianiyacuaa

niajanijajini. Naajaa, cuno nia taraajenuuri jatanutaniya shuquiriaatia nia quiniuria. ²¹ Naajaariuhuj, maaji ranu panishacari na mueya, jiyanoehua naquiya miyari. Naajaa, mueya na ranu nuhuaji, naquiya na miiniu nijajetaqueeri, na mueya na timitiasacari. ²² Quiarijiani, niaari naa taraatia quiyajuhuj. Naajaa, niaacua tacatenuhuanijia. Niaari jiyanoehua shuquiriniutianiya nia niquishacari janiya. Majaari quenaaja tamasa pueya naata quiniutianiya cuno nia shuquirini jaariutianu.

²³ Jiyacaritij, majaari socua nia nequesotanu quiniutianiya janiya. Seetanujuanaa nia sequeyanijia, cua Queeri nia niqutionutaniya puetunu nia masanojuanaa nojuaja, seetanujuanaa coojia rupuejaca nioojia quishacari. ²⁴ Majaari juhuanajuaja nia secojonu Pueyaso seetanujuanaa taa cua sequeyacuajani, seetanujuanaa coojia rupuejaca nioojia quishacari. Naa nia secojoretej. Niocua nia panishano niqitiosaare, seetanujuanaa shuquiriaatia nia quiniuria.

Jiyaniijia Jesuuri Sesaaca shocotana

²⁵ Janiyari pueyaracaanu nia pohuataquiaa miriquini. Janiya quera nia pohuatanutaniya maatia seetanujuanaa cua Quejiniji cutarani. ²⁶ Jiyacaritij, niaari cua Que secojonutaniya coojia rupuesano nia quishacari. Jiyacaritij, majaari na panishaanu quiniutianiya cua shiniujiunuria cua Que, na tojinuura niajanija. ²⁷ Cua Quejanaacujajari nia panijia, nia paniniuucua janiya, nia niishiniuucujuhuj janiyari na jiyarosani. ²⁸ Niaacuajari niishiya, janiyari cua Que shuriucujaj niqiaarini pueyanora cua quiniuria mijiria. Quiarijia saniniuujia, janiyari nio jiya tiujanutaniyani, cua Queecua cua quianuhua.

²⁹ Naa Jesu sequesacari canatej, canaari na sequereeni:

—Quiarijia cutara, quiaari maatajanaa sequeree, maja miriqui. ³⁰ Quiarijia cutara, canaari niishiyani quiaari puetunu casaajanaa niishijia. Majaari quenaaja na panishaanu pueya nequesoreenura quiajanija. Naacuajitij, canaari niishiyani, quiaacuajajqui Pueyaso Jiyarosano.

³¹ Jesuuri canaa sequeree:

—¿Naatee? ¿Niaate shusha cucua tiyuruhua? ³² Tari quenaacoyari naquiya cua miishaanura. Seetanujuanaa quiarijiaari. Niaari cucujaj cocuataaanutaniya puetunujuanaa. Niaari tamajaaja cua tiujanutaniya. Naajaa, seetanujuanaa maja cua quiniu tamajaaja. Cua Quecujajari cua cojiyani. ³³ Janiyari puetunu niojuanaa nia sequeyani, nioojia nia cajitiniuria nio cua pohuatasanoocua nia tiuushacari. Mijiria nia quishacari, niaari seetanujuanaa naquiya miiniutianiya. Naajaa, janiyacujajari mijiria jiyaniijia shocotareeni. Naacuajitij, nioojia nia cumaquiri tamajaaja.

17

Jesu secojosacari na pueyacuara

¹ Naa Jesu sequenu nuhuajitij, jiyocuaaanu na mausacari, naa na Que sequereeri:

—Cua Quena, janiya nio juuca naquiya miishaanutaniyani taa quia sequequiaaricujajani. Cua tojinuucua quiajanija, quia Jiyarosano quia jiyatere pueya timitiasano cua quiniuria. Naacuajitij, janiyacua saniniuujia quia jiyatere pueya timitiasano quia quiniuriani, tojetaarucujajanaa

maninia miijia quia quiniuucua. ² Quiaacuajaari quia cumaaca cua niquitioquiaari puetunu pueyajanaa cua jitianura. Naacujitij, janiyari saniniuuja nojori jiyatenutaniya pueyaracaanu quiijaca nojori quiniuriani, teyano pojori quia niquitioquiaari janiyacuaani. ³ Nojori niishishacari saaja quiajaniyari seetanujuanaa Pueyasocuaaja, naajuhuj, nojori niishishacari janiyari quia jiyarosanoni, naacujitij, nojoriiri pueyaracaanu quiijara quiniutianiya shuquiriaatia.

⁴ 'Janiyari tari tucataree quia sequesano cua miiniuria mijiriani. Naa cua miiniuucua puetunu quia panishanojuanaatej, pueyari quia timitiaa. ⁵ Jiya shipiniyaquishacarijia, janiyari jiyanohua shuquiriaatia quiijaca quiquiaari quia shuriucuaani, jiyaniijajanaa cua quishacari. Cua Quenaa, naa quiijara cua jiyaterohua quiarijiani, quia shuriucua cua quiniuhuara.

⁶ 'Quia niquitiosano pueya janiya, quia saquiriojosano pueya quia niishiyashijia pueyajinjinioni, quiarijia cutara, nojoriiri niishiya cante quiajaniyani. Nojoriiri quia niishiya, nojori niquiniuucua cua mijiosano quia cumaacata, cua pohuatasano quiajaniyajiniji nojori tojiniuucujuhuj. Nojoriiri quia pueya quiijaca. Quiaari saniniuuja nojori cua niquitioquiaari. Nojoriiri quiarijia quia rupaa tojtiajaca cutara. ⁷ Nojoriiri niishiya puetunu cua jitiiasanojuanaani, cunoori quia niquitiosano janiya. ⁸ Janiyari quia rupaa rootacanu nojorini, quia niishitishano janiyani. Nojoriiri seetanujuanaa nocua tiurii. Nojoriiri seetanujuanaa niishiya, janiyari quia shuriucuaaji niquiaarini. Niishi-tiuyajaariuhuj, janiyari seetanujuanaa quia jiyarosanoni.

⁹ 'Janiyari cunora nojoriicuara quia secojiyani, seetanujuanaa quia pueya nojori quiniuucua. Majaari cua secojonu quia niishiyashijia pueyacuara. Saaja noo pojoriicuara quia secojiyanijia, quiaa na niquitioquiaari janiyatej. ¹⁰ Naaratej, puetunu cua jitiiasano pueyajanaari quia pueyajuhuj. Mariyata puetunu quia jitiiasano pueyajanaari cua pueyajuhuj. Nojori tiuniuucua cucua, nojoriiri jatanishano pueya quiniutianiya. Naacujitij, queraatia pueyari cua timitianutaniyajuhuj, naa nojori niquishacari cua cumaaca.

¹¹ 'Majaari puera cua tarishiniu quiniutianiya mijiria. Cua pueya cutaraari mijiria quiniutianiyajara, janiya jaara quiaarohua quiocuaani. Jiyanohua maninia cua Quenaa, nojori quia cojuare quia cumaacata, teyano pojori quia niquitioquiaari janiyacuaani. Naa quia jitiare nojori, jatiqii nojori quiniuria juhua niquiriyatu jiuujiaraca, taa pa quiyacuaani. ¹² Mijiria cua quishacari nojoritia, janiyari nojori cojuajani quia cumaacata, quia rupaacua tiuujiaa nojori quishacari. Majaari quenaaja niquiriyatu nojorijinjinio cua juurequetenu quiquiaari. Saa nojuuari juurequecanu cutara, tariucua juurequeriquiano quiijacuatej. Naacujitij, tariucuaaanu quia rupaajinia naajiotasanoori tohua-tecanu.

¹³ 'Quiarijiani, janiyari quiocua quianutaniyani, tee quia quiyacuaani. Niya cua quishacarijia, janiyari nio sequeya nojori niquiarani, nojori jitianura cua shuquiriniujuhuj, tojetaarucujanaa shuquiriaatia quiijaca nojori quiniuriajuhuj. ¹⁴ Janiyari nojori niishitocanu quia rupaani. Naa nojori tojishacari quia rupaatej, quia niishiyashijia pueyari nojori niquiniu paniyaquiquiaa. Cua pueya nojori quishacari, nojoriiri maja saaja mijiria quiijaca na quiniu tari, taa janiyacuaani. Naaratej, mijiria quiijaca pueyari nojori niquiniu paniyaquiquiaa.

¹⁵ Naa cua secojosacari quiarijia nojoriicuaratej, majaari cua sequenu quiajaniya nojori quia rijionura niiquiji. Saaja quia secojiya cutaranijia, nojori quia cojuanura Sesaacaacuaji. ¹⁶ Nojoriiri maja mijiria quijiaca na quiniu tari cua pueya nojori quishacari, taa nio jiyajinijinio cua quiyacuacuaani. ¹⁷ Quia rupaa quia poonijiotere nojori jiuujiajinia, tojetaarucujanaa quia tojijiaca nojori quiniuria. Quia rupaari seetanu rupaajanaa cutara. ¹⁸ Quiaacuajaari cua jiyaroquiaari mijiria quiniaa pueya niquiara cua pohuatanura quia rupaa. Naajuhuaaj, janiyari cua pueya jiyaramiquiyani mijiria quiniaa pueyacuajuhuaaj. ¹⁹ Quia tojijiaca nojori quiniuria seetanujuanaa, janiyari tama cua cuaqueyajaaja jiyateya puetunu quia panishanojuanaa miijia cua quiniuriani. Naacua-jitij, nojori niishishacari seetanu rupaajanaa janiyajiniji, nojoriiri toje-taarucujanaa maninia miijiacara jatanishaanutaniya.

²⁰ 'Majaari saaja cua secojonu nio pojoriicuarara, tariucua quia toji-tiacacuaani. Janiyari secojiyajuhuaaj na nuhuaji cucua tiuuriquiano pueyacuara, noo pojoriicuarara cante cucua tiuuniutianiya na nuhuajini, nojori tojishacari nio pojori pohuatasano janiyajiniji. ²¹ Cucua tiuuriquiano pueyacuara secojiyanijia puetunu cucua tiuuniaajanaa cuara quiiria jatiqúi, juhua rupuetootesano, taa pa quiyacuuaani, cua Quenaa. Naatej, taa cua quia quiioojiajiniaacuuaani, quiaari saniniu-ujia coojiajinia quiyacujua. Nojori jiuujia cuara juhua rupuetootesano quiiria poojiatajuhuaaj, mijiria quiniaa pueya niishiniuria, quiaari cua jiyaroquiaari mijiria. ²² Janiyari nojori cumaquiya quia So-huanutani, quia niqúitiosano janiyacuaa, juhua niquiriyatu jiuujiaraca nojori quiniuria, naatej, taa niquiriyatu jiuujiaraca pa quiyacuuaani. ²³ Quiaari coojiajinia quiya. Naajuhuaaj, janiyari nojori jiuujiajinia quiyajaacuhuaaj. Naacua-jitij, paari nojoritia juhua niquiriyatu quiniutianiya. Naacua-jitij, mijiria quiijacaari niishiniutianiya, quiaari seetanujuanaa mijiria cua jiyaroquiaari. Nojoriiri niishiniutianiyajuhuaaj, quiaari jiyanhuaa cua pueya panijia, taa quia paniya janiyacuaani.

²⁴ 'Cua Quenaa, cuno pueya quia niqúitiosano janiyani, janiyari paniyani nojori quiniuria cuata quia shuriucua, nojori niquiniuria cua shacantuuca cumaaca. Quiaari cuno cumaaca cua niqúitioquiaari pueyaracaanu quia paniniucua janiya, jiya shipiniyaquishacarijia. ²⁵ Tojetaarucujanaa sesa miyashijia cua Quenaa, mijiria quijiaca pueyari maja na niishiniu quiajaniya. Janiya cutaraari quia ni-shiyani. Nio cua pueyari niishiyajuhuaaj, janiyari seetanujuanaa quia jiyarosanoni. ²⁶ Janiyari nojori niishitioanucuaajani cante quiajaniyani. Janiyari naa pueyaracaanu nojori jiuujiajinia niishitiniutianiya quia-janiyajinijini, seetanujuanaa nojori niishiniuria quiajaniya. Naacua-jitij, taa quia paniya janiyacuaani, nojori cuara cuno paniniu jiitiaara nojori jiuujiajiniajuhuaaj. Naa nojori niishishacari quiajaniyatej, janiyari nojori jiuujiajinia quiniutianiyajuhuaaj.

18

Na paraa quiasacari Jesu

(Mt 26.47-56; Mr 14.43-50; Lc 22.47-53)

¹ Naa Jesu secojonu nuhuaji na Quetej, nojuajaari canaa puetaaree Cedrón surocono taquijiria. Tii quiquiaari olivo cuhuariquia. Cuno cuhuariquiaari maticosano quijia puetunu na shocujanaa. Jesuuri

tii tiuquitiamaa canaa, na Que Pueyaso na secojonura. ² Jesuuri tii jiiitiquiaari canaata na rerejonura. Naacuaajitij, na paraa na quia-teriquiano Judasri cuno cuhuariquia niishiquiaarijuhuaj. ³ Canaa quishacari tii, Judasri jiyacari soldadohua tiuquitiasee, Pueyaso Secojojua tia cojuanaa pueyano. Cuno pojoriiri pueyacuara secojonaa jiyaniijianucua jiyaramiquishano pueya quiriquiaa, Fariseocuaca jiyaramiquishano pueyano. Nojoriiri pueya na miaquetaja pooriquiaa, nocuaji na nunutaja jayoco, samarinio. ⁴ Jesuuri tari puetunujuanaa niishiriquiaacuaja taa nojuaja miishaanutaniyani. Naaratej, nojuajaari cuhuariquia matacajiniji tohuatamaa, na paraa na naacunura. Na naacusacari nojori, nojori nequesotareeri:

—¿Cana nia pajeyani?

⁵ Na paraari na riucuaaree:

—Canaa Nazaret tiacajinijinio Jesu pajeyani.

Jesuuri nojori riucuaaree:

—Janiyacuaaja nojuajani.

Jesu tacartana Judasri cuno pojoritia quiriquiaa tii. ⁶ Jesu sequesacari, “Janiyacuaaja nojuajani”, na paraari na nijiniara pojotuquee. ⁷ Jesuuri socua nojori nequesotarohua:

—¿Cana nia pajeyani?

Nojoriiri socua pacuterohua sequenu:

—Canaa Nazaret tiacajinijinio Jesu pajeyani.

⁸ Jesuuri nojori riucuaaree:

—Janiyacuaaja tari nia sequereeni, janiyacuaaja nojuajani. Niaa jaara cua pajeya, nareja nia niquiri nio, cua cojiniaani.

⁹ Naacuaajitij, tama Jesu sequesanojuuarijia tohuateequiaari, nojuaja jaara naa na Que sequequiaari: “Majaari quenaaja niquiriyatu pueyano cua juurequetenu quiquiaari quia niquitiosano pueyajinijinio janiya”.

¹⁰ Jiyacaritij, Simón Pedroori tama na mueruujuaaja shitiaree na shucujaji shiyano. Nata, pueyacuara secojonaa jiyaniijia seru numoco jaatereeri, na miaquetajara na numoco. Cuno seru sesa quiquiaari Malco. ¹¹ Jesuuri Pedro sequeree:

—Na co jiniacuma quia shiiriohua quia mueruu. Cua Que jaara paniya naa cua miishaanura naquiyatej, ¿janiyatucua nio pojoriria tama cua cuaqueyajaaja tarinitiaaquiri naquiya cua miishaanurani? ¡Taaquiri-irinij!

Anás nequesoreesacari Jesu

(Mt 26.57-58; Mr 14.53-54; Lc 22.54)

¹² Jiyacaritij, na paraari Jesu quiaaree. Nojoriiri quiquiaari Romano soldadohua, nojori jiyaniijiajuhuaj, Pueyaso Secojojua tiaco cojuanaa pueyano. Nojoriiri Jesu morojoturee. ¹³ Na nuhuaji, nojoriiri co-teenu na jaatucutaquiaari Anáscua, canaa pueyacuara secojonaa jiyani-ijia Caifás cama na quiniucua. Cuno marijiara, Caifásri pueyacuara secojonaa jiyaniijiajanaa quiriquiaa. ¹⁴ Cuno Caifáscajaari tari naa sequequiaari narta Judiocuaca camarucua: “Maniniacuajaari niquiriy-atu pueyano mosaanura puetunu pueya nitijianaa, maja najuhuaa puetunu pueyajanaa puecoosaanura”.

Pedro coteesacari seetanu Jesujiniji

(Mt 26.69-70; Mr 14.66-68; Lc 22.55-57)

¹⁵ Simón Pedroori cuata Jesu nuhuajiriquiaa tucuacaanuji. Janiya cutaraari pueyacuara secojonaa jiyaniijiajanaa niishishano pueyano quiquiaarini. Naacuaajitij, janiyari tiuquinishaaree cutara Jesutani, jiyaniijia tia shocua mataca jiniacuma. ¹⁶ Saaja Pedro cutaraari tohuateyaji jateesee. Jiyaniijiajanaa niishishano pueyano cua quiniucua, janiyari tohuateyaji cojuana niyacoota pocoojoseeni, Pedro na tiuquininiuriajuhuaj. ¹⁷ Cuno niyacoori Pedro nequesotaree:

—¿Majate quiajaniya cuno Jesu pueyajinijiniojuhuaj?

Pedroori na riucaaree:

—¡Maja janiya!

¹⁸ Shiniquiaari jiyacari jaanujiriquiaa. Nocuaij cuno jiyaniijia seyari Pueyaso Secojoua tiajinia cojuanaa pueyata mani naatequiaari. Nojoriiri na jitiuriquiaa. Pedroori nojoritia tii quiriquiaajuhuaaj. Mani jitiuriquiaari.

Pueyacuara secojonaa jiyaniijia nequesoreesacari Jesu

(Mt 26.59-66; Mr 14.55-64; Lc 22.66-71)

¹⁹ Jiyacaritij, pueyacuara secojonaa jiyaniijia Anásri Jesu nequesoreenu coteeree canaa na saquiriojosano pueyajiniji. Jesu niishitiojosanojiniji Jesu nequesoreereejaariuhuaaj. ²⁰ Jesuuri na sequeree:

—Janiyacuaajaari pueyaracaanu puetunu pueya niquiarajanaa maatia niishitiojoquiaani. Janiyari pueyaracaanu tiquiyocua Pueyaso secojonuujuaca tiacajiniaqueya niishitiojoquiaa pueyani. Naajuhuaaj, janiyari niya Jerusalén tiacajinia Pueyaso Secojoua tiajinia niishitiojoriquiaani, tee puetunu parta Judiocuacajanaa rerejoquiaacuajani. Majaari quenaaja jiyasohua cua rootanu quiquiaa pueya. ²¹ ¿Casaara quia nequesoreya janiyani? Quia nequesoreere juhuari cuno pojori, canaputee cua pohuatasano tojiqianuni. Nojoricuaajaari quia sequenutaniya casaa cua rootaquiaa nojorini.

²² Jiyacaritij, Pueyaso Secojoua tiaco cojuana pueyanoori Jesu shuriucua nujuariquiaa. Naa Jesu riucaasacari jiyaniijia Anástej, Secojonuujuaja tiaco cojuana pueyanoori Jesu jiquioco maseteree. Naa Jesu sequereeri:

—¿Naa riucaasanote pueyacuara secojonaa jiyaniijia?

²³ Jesuuri na riucaaree:

—Janiya jaara sesa riucaareeni, cua sequere casaate sesa quiiriini. Saniniuuja, janiya jaara maninia sequereeni, ¿casaara quia maseteree cua jiquiococuaraarini?

²⁴ Canaa pueyacuara secojonaa jiyaniijiajanaa Caifás quiniucua, jiyacaritij, Anásri Jesu moronucua jiyarotaree Caifásua.

Pedro pacutesacari seetanu Jesujiniji

(Mt 26.71-75; Mr 14.69-72; Lc 22.58-62)

²⁵ Anás nequesoreesacarijia Jesu, Pedroori tii jitiuriquiaajaa. Tii quiniaa pueyari jiyacari na nequesotaree:

—¿Majate quiajaniya cuno pueyano pueyajinijiniojuhuaj?

Pedroori saaja seetaree. Sequereeri:

—¡Maja janiya!

²⁶ Pueyacuara secojonaa jiyaniijia seruuri Pedro niquirii. Nojuajaari noo pueyano cuna quiriquiaa, Pedro jaatesano na numocotej. Nojuajaari Pedro sequeree:

—¡Janiyacuaajaruhua quia niquirii cuno pueyanota quia quishacari olivo cuhuariquiajiniani!

27 Pedroori na seetarohuacuhuj. Caacarajaari jiyacari niunijioquee.

Jiya jiyaniijia Pilato nequesoreesacari Jesu

(Mt 27.1-2, 11-14; Mr 15.1-5; Lc 23.1-5)

28 Caifás tiajiniji, Jesuuri jaatucusaquiaari Romano jiyaniijia tiajinia. Cuno tiaari jyanohua puereetuuca quiriqiuase, jiyaniijiaacuaji tiasano. Cuno jiyaniijiani, nojuajaari Romano jiyaniijijajanaa César jiyatesano quiquiaari jiyaniijijajanaa na quiniuria Judea jiyajinia. Na sesa quiquiaari Pilato. Canaa Judiocuaca jaara tiuquiiijioquiaari Jesuta Pilato tia carijiniacuma, shusha juhuaqueriquiaari. Nojoriiri maja na tiuquitianu quiquiaari Pilato tiaco, nojori mariqui juhua curuushiriiri Pueyaso niqiuara, nojori tiuquitianuucua tahue tiajinia. Nojori jaara juhua curuutuuca quiri Pueyaso niqiuara, naacuajitij, nojori maara Pascuara miaquesano borrego miaqueyaquirij. 29 Naaratej, Pilatoori nojoriicua tohuataquiaari. Nojori nequesotareeri:

—¿Casaa nio pueyano miiriucuaani, miji nia nitianura cucuani?

30 Nojoriiri saaja riucuaaree:

—Jaara sesa miyashijia quiriqiuia, ¿canaatucua casaara quiocua na nitiamani?

31 Pilatoori nojori sequereee:

—¡Niiquiji nia jiyataarohua! ¡Tama nia nequesoresuhuaajaaja, taa nia supuetanaa rootasano sequeyacuajani!

Canaa Judiocuaca camarucuaari Pilato riucuaaree:

—¡Niajaniya Romano pueyani, niaacuajaari canaa sequecanu maja canaa monura pueyano!

32 Naacuajitij, naa tarijia Jesu sequesanoori tohuateeriquiano quiquiaari, nojuaja jaara sequequiaari taa na mosaanutaniya niyacutesanojiniani. Saaja Romano pueyari naa monu niishiquiaari niyacutesanojinia. 33 Jiyacaritij, Pilatoori na tiaco tiuquiyarohua. Jesu piiriiri nocua na niniuria. Tii Jesu nequesotareeri:

—¿Quiaate seetanujuanaa Judiocuaca jiyaniijia?

34 Jesuuri Pilato sequereee:

—¿Cunote tama quia niishishanojuajaaja naa quia nequesotanura janiyatej? ¿Tamonu soj quia pohuatacanu janiyajiniji?

35 Pilatoori Jesu juaarii. Na sequereeri:

—¡Quiaa jaara Judiocuaca jiyaniijiarano quiri, janiyara naajaa! ¿Janiyateeri quiarta Judio pueyanoni? ¡Tama quiarta Judiocuacuajaari cucua nitiamaa quiajaniya, nia pueyacuara secojonaa jiyaniijianucua! ¡Cua sequere casaa quia miiriucuaani!

36 Jesuuri na riucuaaree:

—Janiyacuajaari Jiyaniijiani, maja juhua mijiria jiyaniijia. Janiya jaara mijiria jiyaniijia quiriqiuiani, cua pueya maara cua quiatunaa cuarta Judiocuacata miaquetoore, maja nojori quiatunura janiya. Maajari jiyaniijia cua quiniu mijiria, taa quia quiyacuani.

37 Pilatoori Jesu nequesotaree:

—¿Naatee? ¿Quiaateeri jiyaniijia?

Jesuuri na riucuaaree:

—Jaa. Janiyacuaja Jiyaniijiani. Janiyacuajaari cunora rasaaquiaarini. Janiyari mijiria niqiuarini seetanu rupaajanaa cua niishitiniuria pueya. Cante seetanu rupaajanaa panijiani, nojoriiri cua sequesano tojtiajaca.

38 Pilatoori najuhuana na nequesotaree:

—¿Casaateeri cuno seetanu rupaaajanaani?

Naa na nequesotanu nuhuajitij, Pilatoori tohuatamohuacuhua canaa Judiocuacaacua.

Pueya sequesacari Jesu cuaara mosaaria

(Mt 27.15-31; Mr 15.6-20; Lc 23.13-25)

Pilatoori jiyacari pueya sequereee:

—Nio pueyano nequesoreereecuajaniija. Nojuajaqui maja sesa na miiniu quiquianu. ³⁹ Niajaniya Judiocuacani, niaari puetunu Pascua juucarajanaa cua nenecojoquiaa cua cartenura nujuatejojuajiniiji nujuatesano pueyano. Quiarijiani, ¿cana nia paniya cua cartenura nio Pascua juucarani? ¿Niarta Judiocuaca jiyaniijiatee?

⁴⁰ Puetunu pueyajanaari naa jiyanohua nacoorohuacuhuj:

—¡Maja cuno cartenu! ¡Barrabás quia cartere cutara!

Cuno Barrabásri nohuasejojua quijia.

19

¹ Jiyacaritij, Pilatoori na soldadohua majacuteree Jesu, coqueeca casaata. ² Soldadohuari juhuacontucua maaturee Jesu nacaquera. Na nuhuaji cushitishaarohuari. Na macaatiinuria, shaaruque toque cushitishaarohuari, juhua jiyaniijia toque. ³ Naa nojori miiniu nuhuaji Jesutej, nojoriiri nocua catecanoquiaari. Na sequetureeri:

—¡Judiocuaca jiyaniijianaa! ¡Quia timiri, Judiocuaca jiyaniijianaa!

Naa nojori sequesacari Jesutej, nojoriiri na jiquioco piquitirii.

⁴ Pilatoori socua tohuataquiaari canaa Judiocuacaacua. Nojori sequereeri:

—¡Nia niquiri! Janiya na tohuateya niaacuani, nia niishiniuria janiyacuaa tari na nequesoreereeni. Janiyari quiarijia niishiyani, nio pueyanoqui maja sesa na miiniu quiariucuaa.

⁵ Jesu muetasacari nojoriicua, juhuacontucuaajiniiji nacaque cushiriquiaari, shaaruque toquenio. Pilatoori Judiocuaca sequereee:

—Nia niquiri niarta pueyano.

⁶ Canaa pueyacuara secojonaa jiyaniijianucua, Pueyaso Secojoua tiaco cojuanaa pueyajuhuj, nojori jaara Jesu niquiquiaari, na nacoonu coteetureeri:

—¡Niyacutesanojinia quia teetere tii na cusonura! ¡Niyacutesanojinia quia teetere!

Pilatoori nacoyano riucuaaree saaja:

—¡Maja! ¡Janiyacuaaari niishiyani, nio pueyano maja sesa na miiniu quiquianu! ¡Niaa jaara na monu paniri, nia teetere tama niajanijajaaja!

⁷ Canaa Judiocuacaari Pilato riucuaaree:

—¡Canaari Pueyaso Rootasano naajionee jiiitiaani! ¡Canaari cunojiniiji niishiyani, nio pueyano cuaara mosaaria tama na cuaqueyajaaja na jiyatenuucua Pueyaso Niyanura!

⁸ Pilato tojishacari naa canaa Judiocuaca sequesantej, nojuajaari socua puerequiaari. ⁹ Pilatoori na tiaco tiuquiyarohua Jesuucua. Na nequesotareeri:

—¿Tejenotejaara quiajaniani?

Jesuuri maja na riucuanu quirii. ¹⁰ Pilatoori na sequereee:

—¡Cua riucuaorejaj! ¿Quiaate niishiyaquiya, janiya jiyaniijiani? ¡Janiya jaara panirini, cua naata cua pueya sequenu na teetenura quiajaniya! ¡Janiya jaara paniyaquirijihuaaj, cua naata quia cartenujuhuaaj!

¹¹ Jesuuri saaja na riucuaaree:

—Jiyocuacaanu Quijia jaara quia jiyateyaquiquiaari jiyaniijia quia quiniuria, quiaa maara quia cumaaca paaretaaquiri cucuaj. Naaratej, cante niyara cua nitiamaa quiocuani, nojuajaari socua jiyanhua sesa miirii quiajanijini.

¹² Naa Pilato tojishacari Jesu sequesantej, nojuajaari socua shiri-iquiquiaari. Nocuaji, Jesu cartenu saniniujiuriquiaa juucuaari. Judiocuacaari saa nacooreejaa. Naa Pilato sequetureeri:

—¡Cante tama na cuaqueyajaaja jiyateja jiyaniijiarani, nojuajaari pa jiyaniijia César paracara quijia! ¡Naaratej, quiaa jaara cuno pueyano cartere, majaari socua pa jiyaniijiajanaa César rupuenta quia quiniu quiniutianiya!

¹³ Naa Pilato tojishacari pueya sequesano nojuajatej, nojuajaari na soldado sequeree na tohuatenuhuara Jesu pueya niquiara. Pilatoori jiyacari cajirii pueya na nequesoreesaquiji cajitijinia. Pilato tii cajiriquiaani, na tacoji pueya nujuatusaquini, cunoori shanhua saitia shipinishano quiquiaari. Naaratej, na sesa quiquiaari “Saitia maniniushitishano”. Judiocuaca rupaajinia saniniujia, cunoori quiquiaari “Gábata”. ¹⁴ Jiyacariiri panacari quiriquiaa. Cuno juuca, canaa Judiocuacaari juhuacarijia jeenucuariquiaa Pascuara juucajinia. Pilatoori jiyacari tii quinia Judiocuaca sequeree:

—¡Nia niquiri nia jiyaniijia!

¹⁵ Pueyari saa nacooreejaa:

—¡Cunoori maja canaa panishano canaa jiyaniijia na quiniuria! ¡Niyacutesanojinia quia teetere!

Pilatoori nojori sequeree:

—¿Janiyatucua nia jiyaniijia teetereni? ¡Maja!

Pueyacuara secojonaa jiyaniijianucuaari Pilato sequeree:

—¡Jiyaniijia Césarcajaari canaa jiyaniijiajanaa! ¡Maja socua tamonu jiyaniijia canaa jitianu!

¹⁶ Pilatoori socua Judiocuaca niqutioree Jesu, nojori teetesocoriquiano. Naaratej, nojoriiri na jiyataquiaari na teetenucua.

Jesu teetesacari

(Mt 27.32-44; Mr 15.21-32; Lc 23.26-43)

¹⁷ Jesuuri tama na teejaranojuajaaja canujutaaree pueya puecoosaquiria. Puecoosaqui sesa quiquiaari “Pueyano nacaco tuhuananu”. Judiocuaca rupaajinia saniniujia, “Gólgota”. ¹⁸ Jesuuri tii teetesaaquiaari, socua caapiqui pueyano. Jesuuri cuno pojori tajinia nujuaretasaaree. ¹⁹ Pilatoori naa naajitequiaarijuhuaaj Jesu nacaacuma rupotasocoriquiano: “Nazaret tiacajinijinio Jesu, Judiocuaca jiyaniijia”. ²⁰ Naajiosano quiriquiaari canaa Judiocuaca rupaajinia, Romano pueya rupaajiniajuhuaaj, Griego rupaajinianio. Jesuuri catecaja teetesaaquiaari Jerusalén tiacajiniji. Naacujitij, queraatia Judiocuacaari cuno naajio serojoquiaari. ²¹ Naaratej, Judiocuacaacuara secojonaa jiyaniijianucuaari Pilato juaatiirii:

—¿Casaara naa quia naajiotereeni: “Judocuaca jiyaniijia”? Cuaara naajiosaaria cutara: “Tama na cuaqueya sequejajaaja, Judocuaca jiyaniijianijia”.

²² Pilatoori nojori riuquaree saaja:

—Janiyacuaajaari naa naajiotereeni. ¡Cuaara naa quiiriatej!

²³ Cuno cuatro soldadohua teetenu nuhuaji Jesu, nojoriiri Jesu toqueya seraatiaree. Socua quiriquiaari Jesu tucuaque cacojoqui. Cuno toqueeri shitiasano quiquiaari na riquiajiniji jiyocuara. Maja cusupuesano. ²⁴ Naaratej, cuno soldadohuari sequetooquiaari:

—Maja pa sureenu nio toque. Coteenu pa tacuarishijiore, pa niishinuria cante nera na panutaniyani.

Naacuajitij, tariucuacaanu Pueyaso Rupaajinia naajiotasanoori tohuateequiaari. Naa naajiotasano quiyari:

“Cua toqueeri seraatiasaaree. Cua tucuaque toqueecuara tacuarishiyonuureeri, na pasocoriqiuano”.

Seetanujuanaa, naa miitiuquiaariiri cuno soldadohua.

²⁵ Niyacutesano shuriucua tee Jesu teeriquiaacuajani, tii nujuaturiquiaari na nucua, na nucua tarajanujuhuj, Cleofas niquiocua Maríajuhuj, María Magdalenanio. ²⁶ Jiyanohua Jesu panishano pueyanoori Jesu nucua shuriucua nujuariquiaa. Cuno pueyanocuaajaari janiya. Jesu niquishacari canaa, na nucua sequereeri:

—Maajiniaa, cua panishano pueyano cuaara quiiria juhua quia mueya cua niti.

²⁷ Na nuhuaji, cua sequereeaariuhuj:

—Juannaa, cua nucua cuaara quiiria juhua quia nucua.

Naaratej, janiyari María riquiaari cua tiajiniarani, tii na quiniuria canaata.

Jesu cusosacari

(Mt 27.45-56; Mr 15.33-41; Lc 23.44-49)

²⁸ Na nuhuaji, Jesuuri niishiquiaari puetunu nojuajiniji naajiotasanojuanaari tari tohuateeree. Naajuhuj, tariucuacaanu Pueyaso Rupaajinia naajiotasano tohuateenurajuhuj, Jesuuri sequequiaari:

—¡Jiyamueyanijia!

²⁹ Cuniqúi, vino jereecaari patacojinia mishaja cajitariquiaa. Jiyacaritij, namasu casaari jereeca vinojinia shishaaree. Naajuacua na morotatureeri. Na nuhuaji, Jesu rupaama shitiasaareeri. ³⁰ Jesu ratunu nuhuaji cuno jereeca vino, naa sequerohuari:

—¡Tari tucuatatee puetunujuanaacuajaniijia!

Naa na sequenu nuhuajitij, naniquiiri. Cusoqueeri.

Soldado jitasacari Jesu shuucuaaji na cashanata

³¹ Cuno juucaari canaa Judocuaca jeenucuasacari quiriquiaa Pascuaacuara juucajinia. Cuno marijara, Pascua juucaari Sábado juucajinia quiriquiaajuhuj, samaatenu juuca. Naaratej, canaa Judocuaca camarucuaari maja na paniniu quiquiaari samaatenu juuca macunucua jaasuconura na niyacutesanojinia. Naaratej, nojoriiri Pilato sequeere cuno teetejosano pueya cashacucua na shuniitianiniuria, ritia nojori cusonuunura, na roshinijiosaanura cuno juucaja. ³² Naaratej, Pilatoori na soldadohua jiyaramiquirii. Cuno soldadohuari coteenu shuniitiaree niquiriyatu pueyano cashacucua. Na nuhuaji, tamonu cashacucua

shuniitiatuureejaariuhuj. ³³ Saniniuujia, nojori pacusacari Jesuucua, Jesuuri tariucua macu quiriquiaa cutara. Nojoriiri cunora na cashacucua shuniitiaaquirii.

³⁴ Naajaa, tamonu soldadoori Jesu shuucuaaji jitiaree na cashanata najuhanaj. Ritia shooqueeri nanaca, mohuacanio. ³⁵ Cuno pueyano, na naajiojinia naa nia pohuataani, cunocuaajaari janiya. Janiyajanaari na niquiquiaarini. Naarate janiyari seetanujuanaa nia pohuataani. Tama janiyajaarijia niishiyani cua sequesanoori seetanujuanaa, nocua nia tiuuniuria. ³⁶ Jesuuri naa miishaaquiaariti, tariucuacaanu nojuajiniji naajiotasano tohuateenura. Naa sequeyacuajaari juhuacarijia nojuajiniji naajiotasano:

“Majaari quenaaja na nucu shuniitiasaanu quiniutianiya”.

³⁷ Tamaquiiri nojuajiniji naa naajiotasano quiyajuhuj:

“Cashanata na shuucuaaji na jitiatusano niqutiuniutianiyari”.

Jesu quete niasacari raaco

(Mt 27.57-61; Mr 15.42-47; Lc 23.50-56)

³⁸ Na nuhuaji, Arimatea tiacajinijinio Joseeri Pilato sequesee:

—Cua niqutiore Jesu quete raaco cua niasocoriquiano.

Nio Joseeri jiyasohuaja Jesuucua tiuujia quiquiaari, na pueresacari narta Judiocuaca. Pilatoori na sequequiaari na panura Jesu quete. Naacuajiti, Joseeri quiaaree. Macu paquiaariiri. ³⁹ Nicodemojuhuaj, noo pueyano Jesuucua niquiaari niucua nata pocoojonurate, nojuajaari jiyacari tiuquishii Joseecua. Nojuajaari queraatia shanohua jaanutaja nitiariquiaa, macuucua niojosocoriquiano. Na niquiaari quiquiaari cuarenta y cinco kilo. Cuno shanohua jaanutajaari quiquiaari mirra, aloeta cojitijosano. ⁴⁰ Joseeri Nicodemota Jesu jiuniocoree toque-neecajinia. Nojori jiuniosacari, nojoriiri nocua niojoriguiaa cuno shanohua jaanutaja. Canaa Judiocuacaari naa miituijaca quiquiaari, na macu na niatunura raaco. ⁴¹ Tee Jesu teetesaaquiaaricuaajani, cuniquija na shuriucua quiquiaariiri cuhuariquia. Cuno cuhuariquiajiniani, quiarinio jiuutiasano raari quiriquiaa, macunucua niojojuara. Cuno raaconi, juhuanojuaja maja macu niasaanu quiquiaari. ⁴² Macuuri cuno raaco niasaaquiaari, cateca na quiniuucua. Naajuhuj, quera puequeriquiaari canaa Judiocuaca jeenucuanu juuca. Cunoori, Pascuaacura juuca.

20

Jesu samiitiasacariuhua

(Mt 28.1-10; Mr 16.1-8; Lc 24.1-12)

¹ Domingo, coteenujuanaa semaana juucani, María Magdalenaari tariquicuaji quiaquiaari Jesu raajiniara. Ninishiquiiri quiriquiaajaa. Na tiuquishacari, cuno puereetuuca saajia niquishiiri tariucua tamocora ruutinishano, teyanota raa tiosaaquiaaricuaajani. ² Naa na niquishacariti, nojuajaari neterohua Simón Pedroocua, cucuanio. Canaa sequesuhuari:

—¡Pueyanaa, pa Jiyanijiaqui na raajiniji pasaaree! ¡Majaari canaa niishiniu teeriquitijia na niasaareteja!

³ Naarate, janiyari Pedrota netequiaari raajinarajuhuj. ⁴ Canaari mariyata netequatariquiaa coteenuni. Janiya cutaraari socua ritia netequiaari Pedrojinijini. Naacuajiti, janiyari coteenu tiuquishii raajiniani.

⁵ Janiyari raaco cuuqueseeni. Janiyari saaja Jesu jiunioctotaja toque niquirii maanoni tee Jesu quete niasaarucuaacuajani. Majaari cua tiuquiniu quimiasa raaco. ⁶ Simón Pedroori cua nuhuaji tiuquishii. Cami tiuquimiaajanaa cutaraari. Nojuajaari Jesu jiunioctotaja toque niquishii tii maanojuhuaj. ⁷ Jesu naca jiunioctotaja niquiriijaariuhuj tamoco maano, maninia mariquiosano. Majaari na manu quiriquiaa Jesu cuaqueya jiunioctotaja toqueta. ⁸ Pedro tiuquiniu nuhuaji raaco, janiyari shusha jiyacari tiuquimiaajaaniuhuj. Cua niquishacari Jesu jiunioctotaja toque, janiyari niishiquiini Jesuqui tari samiitiarohua. ⁹ Canaari juhuanajuaja maja canaa niishiniu quiriquiaa tariucuaaanu Pueyaso Rupaajinia naajiotasano Jesujiniji. Tii sequeyacuajaari Jesuuri samitianutaniuhua macujiniji. ¹⁰ Na nuhuaji, canaari tiajinia quiaarohuani.

Jesu muetasacari María Magdalenaacua

(Mr 16.9-11)

¹¹ Canaa quiojosacariuhua raajiniji, María Magdalenaari tiijia jateequiaari. Raa shuriucua nujuqueriquiaari. Na nujuquenuta, raaco cuuquereeri. ¹² Raaco na niquishacari, caapiqui Pueyaso seya niquiriiri, cohuajaque toqueyaraca. Nojoriiri macu niasaqui cajituriquiaa, tamonu na nacaacora, tamonu na cashacuucumara. ¹³ Pueyaso seyari María Magdalena sequeree:

—Maajiniaa, ¿casaara quia nujuqueyani?

Nojuajaari Pueyaso seya riucuaaree:

—Cua jiyaniijia quete niiquiji pasaarucuaa. Majaari cua niishiniu teeriquitijia na niasaarucuaatejaj.

¹⁴ Naa na sequenu nuhuajitij, na nijiniara tacaterohuari. Saaja Jesu niquirii na shuriucua nujuaanoori. Maja cutaraari na niishiniu quiriquiaa nojuaja Jesu.

¹⁵ Jesuuri na nequesotaree:

—Maajiniaa, ¿casaara quia nujuqueyani? ¿Cana quia pajeyani?

Maríari na jyanirii cuno cuhuariquia cojuana pueyano naasucua. Cunora, naa na sequereeri:

—Pueyanonaa, quiaa jaara canaa macu parucuaa, cua sequere tee quia niarucuaanoj. Janiyacua nocua quiaare na panurani.

¹⁶ Jesuuri na sequeree:

—¡Maríanaa!

Jiyacaritij, Maríari nocua tacatequee na niishishacari nojuajaari Jesu. Hebreo rupaajinia na sequereeri:

—¡Rabuni!

Cunoori sequeya, “Cua Niishitiojonanaa”. ¹⁷ Jesuuri María sequeree:

—Maja cua quianu. Juhuanajuaja maja cua tacanu quiquiao cua Queecua. Quia quiaarohua. Cua tapueyocuaca quia sequesuhua: “Janiya cua Que Pueyasoocua tacanutaniuhuani. Nojuajaari nia Quejuhuaj. Nojuajaari cua Jiyaniijia, nia Jiyaniijiajuhuaj”.

Jesuuri naa na saquiriojosano pueya sequeree na tapueyocuacata, na Que Pueyaso na jiyatesacari nojori Quejuhuaj. ¹⁸ Jiyacaritij, María Magdalenaari nimiohua canaacua, Jesu saquiriojosano pueyacuani. Nojuajaari canaa pohuatasuhua taa Jesu na niquiriini. Naajuhuj, Jesu sequesano caminiujiurii canaaraari.

Jesu muetasacari na saquiriojosano pueyacua

(Mt 28.16-20; Mr 16.14-18; Lc 24.36-49)

19 Cuno domingo juucajani, shusha ninishacari, canaa, Jesu saquiri-ojosano pueyani, canaari jatiqui quiriquiaa tiaconi. Canaari tia tohuataeya mishiquiojoquiaari cumaatiani, canaa pueresacari Jesu motenaa Judiocuaca. Naa tia tiootiu mishiquiojosano quishacaritij, Jesuuri saaja canaacua tiuquimiaa. Canashiyaquiji nujuasee canaa tajiniaari. Naa canaa sequereeri:

—¿Niaate quiyajaa? Juhujaniya nia quiri.

20 Naa canaa na sequenu nuhuajitij, canaa niquitijioree na juaashiquiaari, na shuucuaji cashana jiyanio. Canaari jiyanohua timiriini canaa niquishacari canaa Jiyaniijia. 21 Jesuuri socua pacuterohua sequenu:

—¡Juhujaniya nia quiri! Naatej, taa cua Que jiyaroquiaari janiya mi-jiria na rupaa cua pohuatanuracuaani, janiyari naa nia jiyaramiquiniutianiyajuhuaaj.

22 Naa canaa na sequenu nuhuajitij, canaa caco nooriiri. Sequereeri:

—Pueyaso Sohuanu nia tiuquiniri nioojiajinia. 23 Naa jaara pueyano jiyanoori sesa na miishanojiniji, seetanujuanaa jiyanooshano quiniutianiyari. Saniniuujia, niaa jaara pueyano jiyanoyaquiri sesa na miishanojiniji, Pueyasora, jiyanooshoo quiniutianiyajaariuhuaaj.

Tomás niquishacari Jesu, saminio seetanujuanaa

24 Majaari Tomás quiniu quiriquiaa canaata, narta saquiriojosano pueyatani, Jesu muetasacari canaacua. 25 Naaratej, canaari Tomás sequequiaari na nuhuajini:

—¡Caapueyanonaa, canaa pa Jiyaniijia niquiricuaani!

Tomásri saa canaa sequereejaa:

—Majaari cua tiuuniu quiniutianiya nia sequesanoocua, janiya jaara Jesu juaashiquiajinia niquiyaquiri clavo jiyacani. Janiya jaara cua juaashiquia shiyaquiri clavo jiyamani, janiya jaara cashana jiyama pueraaquiri na shuucuajijuhuaaj, janiyari nia cuaracashitiniutianiyani.

26 Cuno nuhuaji, socua tamonu domingora, canaa, Jesu saquiriojosano pueyani, canaari rerejoquiaariuhuani. Tomásri jiyacari canaata quiriquiaa cutara. Tia tiootiuuri maninia mishiquiojosano quiriquiaa. Naajaa, Jesuuri saaja canaacua tiuquiquiaari. Canashiyaquiji canaa tajinia nujuaseeri. Canaa sequereeri:

—¿Niaate quiyajaa? Juhujaniya nia quiri.

27 Jiyacari Tomás sequereeri:

—Miji, Tomásnaa. Cua juaashiquia quia niquiri. Quia juaashiquia quia shiri clavo jiyama. Cashana jiyama cua shuucuaji quia puerarejuhuaaj. ¿Casaara cucuaji quia taacanuyajaani? Cucua quia tiuuri.

28 Tomásri jiyacari Jesu sequereeri:

—¡Cua Jiyaniijianaa! ¡Cua Pueyasonaa!

29 Jesuuri na sequereeri:

—Quia niquishacari janiya, quiaari shusha cucua tiuya. Socua shuquiriaatia quiniutianiya cutaraari noo pojori, canapuate cucua tiuuniutianiya saaja nojori tojishacari janiyajinijini, nojori niquiyaquishacari janiya.

Casaara Juan naajioquiaari nio naajioneeni

³⁰ Jesuuri jiyanoehua socua queraatia casaa miiquiaari na cumaacata canaa na saquirojosano pueya niqiuara. Cunoori nio nequesoreetuneejinia naajiotasoo. ³¹ Janiyari secaja saquirojoree niya cua naajiotasocoriquianoni, nia niishiniuria Jesuuri seetanujuanaa Pueyaso Jiyarosano, Pueyaso Niyanutuhuj. Janiyari nio naajioreeni nocua nia tiuuniuria, Pueyaso muerasura nia jiyatesaanura, pueyaracaanu rishijiaca nia quiniuria.

21

Tiberias caminiajinia Jesu muetasacari na saquirojosano pueyacua

¹ Na nuhuaji, Jesuuri canaa na saquirojosano pueyacua muetaquiaariuhua Tiberias caminiajinia. Naa quiquiaariti na muetasacari canaacua. ² Nio pojoriiri jiyacari mariyata quiriquiaa: Simón Pedro, Tomás (Caa-pueyano jyanishano), Natanaeljuhuj. Nojuajaari Caná tiacajinijinio quiquiaari, Galilea jiyajinijinio. Janiyari cua tarajanuta tii quiriquiaajaaniuhuj. Canaari Zebedeo niqiuohuani. Socua caapiqui Jesu saquirojosano pueyajinijinioori tii quiriquiaajuhuj. ³ Simón Pedroori jiyacari canaa sequeree:

—Sapitiaajara quejootaseera shiyaru.

Canaari na riucuaareeni:

—Canaa quiata quiaajuhuj.

Naacuajitij, canaari quiojyareeni. Canaari botejinia tacataseeni. Canaari puetunu cuno niucujanaa shiyaru quejootariquiaa sapitiaajara juucuaani. Canaari shaa juhuaquetumaani. ⁴ Jiyacaritij, Jesuuri caminia casaqueyaji jaaquiajinia nujuariquiaa. Majaari canaa niishiniu quiquiaari cante nojuajani. ⁵ Jesuuri canaa jiiquiooree. Canaa nequesotareeni:

—¡Sanajoorinia! ¿Niaate na quiaree?

Canaari na riucuaareeni:

—¡Maja! ¡Shaaqui sacaj!

⁶ Jesuuri canaa sequeree:

—¡Nia shiyaru nia jartare nia miaquetajara bote tamajiria! ¡Niaari cuniqui na quianutaniya cutara!

Canaari naa miiriini taa na sequeree canaacujani. Na nuhuaji, majaari canaa naata canaa shiyaru jaatianu quiriquiaa, queraatia sapitiaaja canaa ritiasacari. ⁷ Jiyacaritij, janiyari Pedro sequereeni:

—¡Pa Jiyaniijiaqui!

Naa Pedro tojshacari cua sequesantej, nojuajaari ritia na toque cushirii. Nojuajaari juhuasu quiriquiaa. Na toque na cushiniu nuhuaji, caminiajinia jaataareeri Jesuucua na quianura. Jiritiuri quiriquiaa. ⁸ Canaari na nuhuaji jaatiariquiaa shiyaru botejinijini. Jaaquiaari namitia maja tucuacaanu na quiniu quiriquiaa, saaja cien metroruhua. ⁹ Canaa rosetasacari botejiniji, canaari na mani niquishiini. Sapitiaajari tii majeriquiaa, pannio. ¹⁰ Jesuuri canaa sequeree:

—Nia sapitiaajajiniji miji nia riri rarishocoriquiano.

¹¹ Simón Pedroori ritia botejinia tacamaa. Shiyaru tacanitiaree jaaquiajinaari. Queraatia sapitiaajaari quiriquiaa. Ciento cincuenta y tres sapitiaaja, saa puereetunucujaja. Naa queraatia sapitiaaja quishacaritij, naajaa, majaari shiyaru turejetanu quirii quenaaja.

¹² Jesuuri canaa sequeree:

—Pueyanaa, miji. Nia miaquesee.

Majaari quenaaja niquiriyatu canaajinijinio nequesotanu quiriquiaa, cantejaaranononi. Canaacuajaari niishiriquiaani nojuacuajaari canaa Jiyaniijia Jesu. ¹³ Jiyacaritij, Jesuuri pan rishii manijiniji. Canaa na serotareeri. Sapitiaaja rariquia canaa niquitiojoreejaarihuaj.

¹⁴ Jiyacari Jesu muetasacari canaa na saquiriojosano pueyacuatej, cunota tari quiquiaari jiuujianaraca na muetasacari canaacua na samitianu nuhuaji.

Jesu pocoojosacari Simón Pedrota

¹⁵ Canaa miaquenuunu nuhuaji, Jesuuri Simón Pedrota pocoojoriquiaa. Na nequesotareeri:

—Juan niyanu Simónnaa, ¿quiaate cua panijia socua nio quiarta saquiriojosano pueyajiniji?

Pedroori na riucuaaree:

—Jaa, Jiyaniijianaa, quiaacuajaari niishiya janiyari quia paniyani.

Jesuuri na sequereee:

—Cua borregohua niqiuohuanioyua cojuanara quia quiriqui.

Naa Jesu sequesacari Pedrotej, nojuajaari miriqui na sequeriquiaa maninia na jitianura narta Pueyaso muerasu. ¹⁶ Jesuuri Pedro nequesotarohuacuhuj:

—Juan niyanu Simónnaa, ¿quiaate cua panijia?

Pedroori Jesu riucuaaree:

—Jaa, Jiyaniijianaa. Quiaacuajaari niishiya janiyari quia paniyani.

Jesuuri na sequereee:

—Cua borregohua cojuanara quia quiriqui.

¹⁷ Jesuuri socua camiriohua Pedro nequesotanu:

—Juan niyanu Simónnaa, ¿quiaate cua paniya?

Pedroori socua taraajequee pueyaracaanu Jesu nequesoreesacari nojuaja. Seetanujuanaa Jesu riucuaareeri:

—Jiyaniijianaa, quiaacuajaari puetunujuanaa niishijia! ¡Quiaari niishiya janiyari quia paniyani!

Jesuuri na sequereee:

—Cua borregohuanioyua cojuanara quia quiriqui. ¹⁸ Seetanujuanaa quia sequeyanijia, mashaja quia quishacari, tama quiajanijajaarijia quia toque cushijia, quia quianura quia panishaqui. Saniniuujia, quiaa jaara saaquiano quiri, quiaari nareja quia numatucua shiitionutaniya tamasaca cushitiniuria quia toque. Na nuhuaji, quiaari canujutesaanutaniya quia paniyaquishaquiria.

¹⁹ Naa Jesu pohuatasacari miriqui Pedrotej, nojuajaari Pedro numooteriquiaa taa nojuaja mosaanutaniyani. Pedro jaara naa mosaare, nojuajaari Pueyaso timitiniutaniya na mosaanuucua. Na nuhuaji, Jesuuri na sequereee:

—¡Pueyaracaanu cua tojjia quia quiri! Pa quiaarej.

Juanjiniji pohuatasano

²⁰ Pedro tacatesacari na nijiniara, Jesu panishano pueyano niquirii na nuhuaji sacuaanoori. Nojuacuajaari janiya. Janiyari noo pueyanocua-jani, canaa miaquenuusacari Pascuara, Jesu shuriucua cua cajishacari na nequesotaquiaaritij: “¿Cantejaara cunoni, quia quiatenutaniyani?”

²¹ Quiarijiani, Pedro niquishacari janiya saniniuujia, Jesu nequesotareeri:

—Jiyaniijanaa, janiya jaara naa mosaanutaniyacuaani, ¿nojuajaarijii-ataj, taa na miishaanutaniyarini?

²² Jesuuri Pedro riucuaaree:

—Janiya jaara paniri nojuaja rishiniuria pueyaracaanuni, janiya jaara jiyocuacaanuji tiuquiriohuajaatijia, quiara, naajaa. Quiajaniya cutara, pueyaracaanu cua tojijia quia quiri.

²³ Naa Jesu sequenuucua Pedrotej, puetunu cuarta Jesu pueyajanaari jiyaniriquiaa janiya naasucua shaajeyaquiriquianoni. Jesuuri seetanujuanaa maja naa na sequenu quiquiaari janiyajiniji. Nojuajaari saaja naa sequequiaari Pedro: “Janiya jaara paniri pueyaracaanu na rishinuriani janiya jaara jiyocuacaanuji tacatemohuajaatijia, quiajanियारा naajaa”.

²⁴ Janiyacuajaari nojuajani, Jesucristo panishano pueyanoni. Nio cua naajiojiniani, janiyari nojuajiniji cua niquishano pohuataani. Cua pohuatasanoori seetanujuanaa.

²⁵ Jesuuri jiyanoohua queraatia socua casaa miiquiaari na cumaacata mijiria. Puetunu na miishanojuanaa jaara naajiotasaare, naa naasucua nio jiyajinia maara quiquiao quiyaquiri puetunu cuno nequesoreetuneecaacuajijianaa.

JESUCRISTO JIYARAMIQUISHANO PUEYA MIISHANO

“Pueyaso Sohuanu niaacua jiyarosaanutaniya”

¹ Quiocuara naajionu pacuterohuanijia, cua panishano Teófilonaa. Coteenu cua naajiosanojinia, janiyari quia pohuataquiaarini taa Jesu na poonijosano coteequiaari mijiriani. Puetunu na miishanojuanaa naajiotaquiaarinijia, mariyata na niishitijosano na coteenujiniji, jaara tacanishaaquiaariuhua jiyocuacaanu na Queta na quiniuhua. ² Mijiria na quishacarijia, Jesuuri na jiyaramiquishocoriquiano pueya rootaquiaari Pueyaso Sohuanu cumaacata, taa nojori miiniutianiya na nuhuajini. ³ Jesu cusonu nuhuaji, nojuajaari muetaquiaariuhua na saquirijosano pueyacua. Nojoriicua mueranacujuquiaariiri. Cuarenta juuca nuhuaji tacaquiaariuhua puetunujuanaari. Na miishanota nojoriicua na mueranacujusacari, nojori niishitiriiri nojuaja seetanujuanaa saminio quiya. Nojoritia pocoojuquiaariiri taa Pueyaso jitianutaniya na muerasuni.

⁴ Nojoritia na pocoojosacari tamonu juuca, Jesuuri nojori numootequiaari maja ritia nojori quianuhua Jerusalén tiacajiniji. Nojori sequequiaariiri:

—Nia sashirijaara cua Que cuaara niquitioorajaara na Sohuanu niajaniya. Nojuajaari cua sequequiaari na niquitionutaniya niajaniyana, taa cua caminiujuquiaari tari niaaracuajani. ⁵ Naa sequequiaari niajanijacuajanjia: “Tiuquinijiona Juanri nia tiuquinijioquiaari moojinia, Pueyaso tojijara nia jatasacari. Pueyasoori saniniuujia na Sohuanu nioojiajinia tiuquinijionutaniya, seetanujuanaa Pueyaso tojijara nia quiniuria”. Quera niaacua tiuquiniutaniyacujajaari. Naaratej, nia sashiri.

Jesu tacasacariuhua jiyocuacaanu

⁶ Tamonu juuca, Jesu pueyari Jesuucua rerejoquiaari. Na nequesotatureeri:

—Jiyaniijianaa, ¿quiaate Jiyaniijia jiyatesaanutaniya quiarjia Israel pueyara, maninia pa quiniuhua tama pa jiyaniijiatajaaja, taa pa supuetanaa quiquiaaricuaani?

⁷ Jesuuri nojori riuquaree:

—Nio cutaraari maja nia niishishocoriquiano, taacari Israel pueya jiyaniijiaara cua jiyatesaanutaniyani. Pa Que Pueyasoori cuno niishishano racataa tama nerajaaja. Saa nojuajaari na niishiya cutara. ⁸ Naajaa, niaari Pueyaso cumaaca masenutaniyacujaja, Pueyaso Sohuanu jaara nioojiajinia tiuquiri. Niaari janiyajiniji pohuatanutaniya pueya niquiara Jerusalén tiacajinia, puetunu Judea jiyajiniajanaano, Samaria jiyajiniajuhuaj. Naa pohuatasaanutaniyajaariuhua puetunu jiyacajiniajanaa, socua tucuaacaanu jiya puequeetujinianio.

⁹ Jesu puecasacari pocuanu, nojuajaari tacanishaaquiaari na pueya shootiasacarijia nojuaja. Cohuajajinia shaajemaari pueya niquiyaquini-uucujaji nojuaja. ¹⁰ Nojori mautasacari jiya cajiniocua Jesu tacasacari,

canashiyacuiji, caapiqui pueyari nojori shuriucua nujuatuquiaari. Nojori toqueeri jiyanoehua cohuajaque quiriquiaa. Nojoriiri jiyocuacaanujinio Pueyaso seya quiquiaari. ¹¹ Nojoriiri Jesu pueya sequere:

—Galilea jiyajiniinio pueyanaa, ¿casaara nia mautaa jiyocuacaanuni? Taa nia niquirii tacaanocujani, niaari naa na niquniutianiya tacatehuanohujuhuj.

¹² Nojoriiri jiyacari Olivo nacuhua tuhuananuucua quiriquiaa. Pueyaso seya nuhuaji, Jesu pueyari Jerusalén tiacajiniohua tacatequiaari. Cuniqiji, cateca naataja quiquiaari Jerusalén tiaca. Moisés Naajiotasanojiniji, Judiocuacaari naa rootasaaquiaari maja socua tucuacaanu nojori rucuanenura samaatenu juuca. ¹³ Nojori tiuquiiiosacari Jerusalén tiacajinia, nojoriiri nojori quijia tiajinia tiuquitiaquiaariuhua. Nojoriiri nataco tacataquiaari na sohuacajinia, tee nojori sashiquiaari Pueyaso Sohuanocujani. Nojoriiri quiquiaari Pedro, Juan, Santiago, Andrés, Felipe, Tomás, Bartolomé, Mateo, tamonu Santiagonio cante Alfeo niyanu quiquiaaricujani. Quiquiaariijaariuhua Simón, cante tari quiquiaari Romano pueya jatanu panijiacujani. Mariyata quiriquiaari Judas, Santiago tarajanu. ¹⁴ Nojoriiri jiyacari pueyaracaanu Pueyaso secojonuuriquiaa tii maajipohuata, mariyata Jesu nucua Mariata, Jesu tapueyocucatanio.

Pueya saquiriojosacari Matías Judas niti

¹⁵ Nojori sashishacari Pueyaso Sohuanu tii, tamonu juuca, Pedroori nujuaquiaari pueya niquiara na sequenura nojori. Naa naasucuatuhuj ciento veinte pueyari tii quiriquiaa puetunujuanaa. Naa nojori sequereeri:

¹⁶ —Cua tapueyocucanaa, Pueyaso Sohuanu sequesanoori maja na naata naajaa tajiniu. Seetanujuanaa tari tohuateerucuaari Judasjiniji na pohuatanishano pa supuetanaa jiyaniijia David. Naacuajitij, Judasri Jesu monaarano niishitiquianu tee Jesu quiriquiaani, nojori na quiatenura. Judasri cunora niqutiosaacanu cumaneeca, naa nojori na niishitiniuucua Jesu quiasaanura. ¹⁷ Nojuacuajaari parta Jesu saquiriojosano pueyano quiquiaarijuhuaj. Nojuajaari mariyata Jesu jiyaramiquishano quiriquiaa juhua pajaniyajuhuj. ¹⁸ Tamonu cuhuariquiaari masesaacanu sesa na miishano samitia. Na nuhuaji, tama cusoyareejaarijia. Jiyocuacaanuji tiquianu na nacaraari. Na saracaari cocuaretasee. ¹⁹ Jerusalén tiacajinia quiniaa jaara na niishiquianu, nojoriiri cuno cuhuariquia sesojoree “Acéldama”. Acéldamaari pueyano rupajinia sequeya “Nanaca samitia masesano cuhuariquia”. ²⁰ Judasjinijiiri naa naajiotasaaquiaarijuhua tariucacaanu supuetana David jaaquequejojuajinia. Naa sequeyari: “Na quiquio cuara quiiria shaaco. Cuara quiiria sanaaca, camaruju”. Sequeyajaariuhuj:

“Tamonu pueyano cuara jiyatesaaria na poonijosano miiriquiano na niti”.

²¹ ‘Cuarta Jesu saquiriojosano pueyanaa, niya quiyacuaja pueya, canapuetucujia pa tarajaquiaarini pueyaracaanu pa jiyaniijia Jesu quishacari pata. ²² Nojoriiri Juan niquiquiaarijuhuaj Jesu tiuquiniyano moojinia, Jesu tacasariuhua jiyocuacaanunio. Canapuetucujia puetunu nio niquiquiaarijianaani, niquiriyatu nojorijininiinio cuara

jiyatesaaria Jesu jiyaramiquishanora, pata na quiniuria, Jesu samiitianujiniji na pohuatanurajuhua.

²³ Naaratej, pueyari caapiqui pueya saquiriojoquiaari. Cuniqui quiriquiaari José. Nojuajaari socua caapiqui sesaraca quiquiaari: Barsabás, mariyata Justo. Tamonu pueyanoori quiriquiaajuhua, Matías.

²⁴ Na nuhuaji, pueyari naa secojoquiaari Pueyaso:

—Jiyaniijianaa, quiaari puetunu pueya jiuujia niishijajanaa. Canaa quia niishitiri teyano pueyano tari quia saquiriojoreeni, quia jiyaramiquishocoriquiano na quiniuria, Judas niti poonijioriquiano. ²⁵ Judasri quia niquitiosano poonijosanojiniji catecanu sesa na miini-uucua, naquiya miishaqui na quianura, sesa miijia na quiniuucua.

²⁶ Na nuhuaji, pueyari naajosano saajia jaquerooree nojori niishiniuria teyanote Pueyaso panishano pueyanoni. Saajiaari Matíascuara tacatasee. Naacujitij, Matíasri Jesu saquiriojosano pueyanora quiquiaarijuhua. Naacujitij Jesu saquiriojosano pueyari juhua juhuanoraja quiquiaariuhua doce.

2

Pueyaso Sohuanu tiuquishacari

¹ Pentecostés juuca jaara quiquiaari, puetunu Jesuucua tiuuni-aajanaari rerejono quiquiaari tamonu tiajinia Jerusalén tiacajinia. ² ¡Canashyaquiji, paratuuri tojishaaquiaari jiyocuacaanuji, juhua paratu pocuaano jiyanoehua cojuata! Jiyanoehua tojishaareeri cuno tiajinia tee Jesu pueya cajituriquiaacuajani. ³ Jiyacari, juhua maniiri niquishaa-ree pueya caco rimianuqueyano. Puetunu nojori cacojuanaa rimi-anacuriquiaari juhua mani. ⁴ Jiyacaritij, Pueyaso Sohuanuuri puetunu tiajinia quiniaa jiuujiajiniajanaa tiuquirii. Pueyari juhuacatecara tamaatia rupaaca pocuaree. Pueyaso Sohuanuuri naa nojori pocooteree puetunujuanaa tamaatia rupaaca.

⁵ Cuno quishacari, queraatia Judiocuaca puetunu jiyacajinijinio-juanaari camueenujuriquiaa Jerusalén tiacajinia. Nojoriiri jiyacari Jerusalén tiacajinia queranacunuuriquiaa Pentecostés juuca. Nojori-iri Pueyaso tojtiajaca quiquiaari. ⁶ Nojori tojishacari cuno coju-atunenu, nojoriiri cuqueree tee Jesu pueya pocooriquiaa tamaatia ru-paacacuajani. Nojori tojishacari naatej, nojoriiri jiyanoehua cushitiirii. Naatej, puetunu rucoonaajanaari tama na jiyajinijinio rupaacajaaja tojtitariquiaa, cuno pojori pocoosacari. Nojoriiri maja na niishiniu quiquiaari casaara naa nojori miiriini. ⁷ Nojoriiri jiyanoehua jiuujiate-coree. Tama sequetooreejaarijia:

—¡Juhuej! ¿Cuno pojoriti maja Galilea jiyajinijinio pueyacuaja naa pocoyaniquitij? ⁸ ¿Taa nojori pocuaa puetunu coteenu pa rupaacajanaani? Pajaniyacujaari queraatia tamaatia jiyacajinijinioni, puetunu tamaatia rupaaca pocuajacajanaa.

⁹ Seetanujuanaari. Cuno pojoriiri Partiya jiyajinijinio nijiono quiquiaari, Media jiyajinijinio, Elam jiyajinijinio, Mesopotamia jiyajinijinio, Judea jiyajinijinio, Capadocia jiyajinijinio, Ponto jiyajinijinio, Asia jiyajinijinionio. ¹⁰ Quiquiaarijaariuhua Frigia jiyajinijinio, Panfilia jiyajinijinio, Egipto jiyajinijinio, África jiyajinijinionio. Cuno Africa jiyajinijinio pueyari quera Cirene tiaca shuriucuaji quiquiaari. Roma tiacajinijinio pueyari

tii quiquiaarijuhuaj, canapuate Jerusalén tiacajinia pacunaa quiquiaaricuajani. Puetunu cuno pojorijianaari Judiocuaca quiquiaari. Noojiaqueyari rasaaquiaari Judiocuacajanaa. Tamasacaari na cararaatiuuquia co miatejosaaquiaari Judiocuacara na quiniuria, Pueyaso tojjiacara nojori quiniu panishacari. ¹¹ Creta jiyajiniinio pueyari tii quiquiaajuhuj, Arabia jiyajiniinionio. Puetunu cuno jiyacajiniajanaari tamaatia rupaaca pocuajaca quiquiaari. Nojoriiri socua naa sequetooquiaari:

—¿Taateni? ¡Puetunu pajaniyajanaari cuno Galilea pueya tojtiaani Pueyaso cutara miishano pohuataano, tama pa coteenu rupaajiniajaaja!

¹² Puetunu nojorijianaari jiuujiateriquiaa nojori jiyajenenuta. Tama nojorijiaarijia nequesoreetooquiaari nojori tacaaniutia:

—¿Casaa na miitiuyajaanonjoni?

¹³ Tamasaca nojorijiniinioori saaja Jesu pueya macaatirii. Tama nojorijiaarijia tama sequetooreejaacujua:

—Cuno pojoriqui mashaasequenuya shocuanacuhuata.

Pedro pohuatasano pueya niqiara

¹⁴ Jiyacaritij, Pedroori juhuacatecara pocuaree cuno pojori niqiara. Pedroori nujuaturiquiaa narta once pueyata. Na rupaa paaretaree Judiocuaca tojiniuriaari. Naa sequereeri:

—Cuarta Judiocuacanaa, maninia nia tojitiare casaa cua sequenutaniya nijaniyani. Puetunu Jerusalén tiacajinia quiniaajanaa cuaara niishiiria cua pohuatasano. ¹⁵ Niaari canaa jiyaniya mashaasequenuyano. Pananucujaaari shusha taqueejia. Maja canaa mashaasequenuunu. ¹⁶ Niaari canaa tojtiaa tamaatia rupaaca pocuaano. Niocujaaari tariucuaaanu Pueyaso sequesano caminiujiunia Joel pohuatasano. Cuno niaa na niquiiani, cunocujaaari na sequesano, shusha tohuatayani. Nojuajaari naa sequequiaaritij:

¹⁷ “Pueyasoori naa sequeyaquij: ‘Quera jiya puequesacari, janiyari cua Sohuanu niqutionutaniya puetunu pueyarajanaani. Naacuajitij, mashiquioriiri janiyajiniji pohuatanutaniya, niyacoojorinio. Cua Sohuanuuri cua niishishano niqitiniutianiya mashiquiori juhua na maquenujina. Cua niishishano niishitiojonutaniya saaquiapue na maquenujiniijaariuhuj. ¹⁸ Cuno quishacari, janiyacua na Sohuanu niqitiore puetunu cua tojtianaajanaani, canuu, maajipohuanio. Nojoriiri janiyajiniji pohuatanutaniya pueya niqiara. ¹⁹ Puereeta cua miishanoori jiya cajiniocua niquishaanutaniya. Cua miishanoori jiyacua niquishaanutaniyajujuaj, pueya na numootenura. Nanacaari niquishaanutaniya, mani, jiyanohua najacanio. ²⁰ Pananuuri ninishiquiria quiniutianiya. Racaari juhua nanacara quiniutianiyajuhuj. Naa coteenutaniyari jiya puequenura. Na nuhuaji, Jiyaniijiajanaari rosenutaniya mijiria quiniaa na nequesoreenura, saminiucua pueya, macunucuanio. Na rosesacari, cutara juuca quiniutianiyari, puereetajuhuj. Jiyanohua shanohua quiniutianiyari na rosesacari. ²¹ Puetunu Jiyaniijia secojonaa pueyajanaari jiyaanooshaanutaniya Pueyaso pueya nojori quiniuria’ ”.

’Supuetana Joelri naa naajiotaquiaari Pueyaso sequesano tarijiatej. ²² Naaratej, socua cua tojitiare cuarta Israel pueyanaa. Jesujiniji nia pohuatanutaniyanijia, Nazaret tiacajiniinio pueyano. Pueyasocujaaari pa

niishitiquiaari, Jesuuri na jiyarosano pueyano quiquiaari. Naacuajitij, Pueyasoori na poonitijioquiaari pa niquiara jiyanoehua jiyajeneta casaa na miiniuria. Paacuaajaari nocuaji jiuujiatequiaarini pa niquishacari Jesu miishano Pueyaso cumaacata. Na miishanoori maninia quiquiaari pa niishiniuria Jesuuri seetanujuanaa Pueyaso Jiyarosano quiquiaari. Niajanuyacuajaari maninia niishiya puetunu maninia na miishanojuanaa. ²³ Saniniuujia, Jesu jaara niqutiosaarucuaa niajanuya, niaari na quiarucuaa juhua sesa miijia. Na nuhuaji, niaari Pueyaso tojiyashijiaca pueya na moterucuaa maca niyacutesanojinia, taa Pueyaso paniquiaari tarijiacuajani. Pueyasocuaajaari niishiquiaari naa mosaanutaniyari Jesu. ²⁴ Pueyaso cutaraari na samiitianiriohuacuaa macujiniji. Na carterohua macujinijiiri. Majaari quenaaja tamonu cumaacaraca quijia quiniu quiquianu Jesu na jiyojetenura macu quiquiojinia pueyaracaanura. ²⁵ Pueyaso Sohuanu jaara pohuatequiaari pa supuetanaa jiyaniijia David, nojuajaari juhuacarijia naa pohuataquiaari Jesu sequesocoriquianotej:

“Cua shuriucua niquiquiaa Jiyaniijianijia. Nojuajaari cua shuriucua quiyu, cua miaquetajara, maja quenaaja casaa teteyatenura janiya. ²⁶ Naaratej, coojaari timirii. Cua niti taquiriocuateree cua shuquiriniutianijia. ²⁷ Naajuhuj, cua cusosacari, cua que-teeri juhuajaniya quiniutianiya, cua niishishacari quiaari cua tarinitiaaquiniutianiya macunucua quiquiojinia. Quiaari cua shu moquijiaaquiniutianiya saa maninia miijiaja cua quishacari quia niquiara. ²⁸ Quiaari cua niishitiojoree maninia cua miiniuria, pueyaracaanu quijara cua quiniuria. Quiaari jiyanoehua cua shuquiriritiniutianiya quiata cua quishacari pueyaracaanu”.

²⁹ Cua pueyanaa, paacuaajaari niishiyani, pa supuetanaa jiyaniijia Davidri jamosaquiaari na cusosacari. Na jamaari niya quiyajaa Jerusalén tiacajinia. ³⁰ Nojuajaari niishiquiaari Pueyasoori tari na sequequiaaricuaaja:

“Davidnaa, tamonu pueyanoori supuenutaniya quiajanijajiniji, jiyanoehua quia nuhuaji. Cuno pueyanoori Jiyaniijiaa cua jiyatesano quiniutianiya quia niti. Nojuajaari cua jiyarosocoriquiano Cristo. Seetanujuanaa naa quiniutianiyari Davidnaa. Maja cua sapojonu”.

³¹ Pueyanaa, paacuaajaari niishiyani Davidri Pueyaso sequesano caminiujinua quiquiaari. Naacuajitij, Davidri Cristojiniji pohuatariquiaa jiyanoehua tariucuacaanujiniji, juhua tari na niquishano. Pueyaso Sohuanuuri na niishitiquiaari taa Cristo miishaanutaniyani. Naacuajitij, Davidri Cristo samiitianujiniji pohuatariquiaa naa na sequesacari: “Pueyasoori na tarinitiaaquiniutianiya macunucua quiquiojinia”, mariyata naa na sequesacari: “Na quete moquijiaaquiniutianiyari”. ³² Pueyasoori nio Jesu samiitianiriohuacuaa. Na samiitianu nuhuaji, puetunu canaajanaari na niquiquianuni. Janiyari nia pohuataa seetanu canaa niquishanojuanaani. ³³ Cutara na cumaacata, Pueyasoori na tacanirioehua na miaquetajara cajiriquiano, Jiyaniijiajanaa na quiniuria. Na nuhuaji, Jesuuri Pueyaso Sohuanu maseree na Quejiniji, taa Pueyaso sequequiaari tarijiacuajani. Jesuuri saniniuujia quiarijia canaa na niqutioree. Naaratej, niaari canaa niquirii tamaatia rupaaca pocuaano.

³⁴ Majaari David tacanu quiquiaari jiyocuacaanu cutara. Nojuacuajaari Jesujiniji sequequiaari:

“Jiyaniijia Pueyasoori cua Jiyaniijia sequequiaari: ³⁵ ‘Cua miaquetajara quia cajishiiijaara, janiya cuaara quia paraa shocotarejaatijia’ ”.

³⁶ Cunora, puetunu niajanijajanaa Israel pueyanaa, niaa cumaati niishiya, Pueyasocujaari nio Jesu jiyatecanu Jiyaniijijajanaa na quiniuria. Niaacuajaari niyacutesanojinia na mocanucuja. Nojuajaari Cristo, Pueyaso jiyatesano Jiyaniijia. Majaari canaa pohuatasanojiniji nia taacanuunu pueyanaa.

³⁷ Pueya tojishacari naa Pedro pohuatasanoj, nojoriiri tetecatuquiaari. Pueyari saniniuujia Pedro nequesotaquiaari, na cojiniaanio:

—Canaa pueyanaa, ¿taa canaa miiniutianiyarinijia?

³⁸ Pedroori nojori riucuaquiaari:

—Nioojia nia tacatore sesa nia miiniuujiniji. Niajanija cuaara moojinia tiuquinijiosaaria Jesucristoocua nia tiuushacari, nia jiyanooshaanura sesa nia miishanojiniji. Naa nia miishacaritij, Pueyasocua nia niqutiore na Sohuanu. ³⁹ Pueyaso sequesacari nojuaja na Sohuanu niqutionutaniya pueya, cunoori niaaranocuja, nia niquiohwaranonio, tucua caanu quijiacarajuhuj. Pueyaso Sohuanucujaari puetunu pueyajanaa niqutiosaanutaniya, cana pa Jiyaniijia Pueyaso sequeya na muerasura na quiniuriacuajani.

⁴⁰ Pedroori jiyacari pueya pohuataree queraatia socua Jesujiniji na niishishano. Jiyanhua nojori nacasureeri. Naa nojori sequereeri:

—Nioojia nia tacatorohua Pueyasocua, maja Jesu ruuretajaca nia cojiritiasaanura quejoonu mani quiquojinia.

⁴¹ Pedro pohuatasanoocua tiuuniaari tiuquinijiosaaquiaari. Cuno juuca, tres mil pueya naasucuaari coteenu Jesu tojitianaa rupuenaa quiquiaari. Pueyaso pueyari naa canequiaaritij. ⁴² Puetunu nojorijianaari maninia tojitiaquiaari pueyaracaanu Jesu jiyaramiquishano pueya niishitiosano. Nojoriiri jatiqui quijia maninia. Majaari nojori juayonuujutanu quijia. Nojoriiri pueyaracaanu rerejojua neecaru serotanura Jesu cusonu niishiniuria. Mariyata Pueyaso secojonuujia pueyaracaanuuri.

Panitiojuaca Jesu tojitianaa quishacari juhua tapueyocucata

⁴³ Jesu jiyaramiquishano pueyari jiyajeneta miishano miijioriquiaa Pueyaso cumaacata. Naacuajitij, puetunu pueyajanaari puereturiquiaa. Pueyari shiriiquitiurii. ⁴⁴ Puetunu Jesuucua tiuuniaajanaari maninia rupuetooquiaari juhua tapueyocucata. Nojoriiri maja jamuejaca quiquiaari. Casamiriaca pueyari na casami niqutiojoquiaari nareja casamiijiuniucua pueya. ⁴⁵ Tamasacaari na jiiiasano casami niqutioquiaari na cumaneeca na masenura na casami sami. Na cumaneeca na masenu nuhuaji, nojoriiri tamasaca niqutioquiaarijuhuaj, casamiijiuniucua jiiianura puetunu nojori panishanojuanaajuhuj. Tamasaca pueyari na cuhuariquia niqutioquiaari nojori jiiianura na cumaneeca, tamasaca na naacunurajuhuj. ⁴⁶ Nojoriiri jatiqui rupuetooquiaari. Nojoriiri rerejojua puetunu juucajanaa Pueyaso Secojoua tiajinia. Mariyata tama nojori tiajiniajaaja nojoriiri rerejojua, neecaru neecasenura Jiyaniijia Jesu cusonu nojori niishiniuria,

mariyata jatiqui nojori miaquenuunura nojori shuquiriniutia. Nojoriiri maninia jiuujiaraca quiquiaari. Nojoriiri maja tamonu pueya shocotanu panijiaa quiquiaari. ⁴⁷ Nojoriiri pueyaracaanu Pueyaso maniniuhuaqueetariquiaa nojori shuquiriniutia. Puetunu Jesuucua tiuyashijiaa pueyajanaari nojori paniquiaari. Puetunu juucajanaa, Jiyaniijia Jesuuri nojori canijiariquiaa, socua pueya tiuushacari nocua.

3

Sesarunocua pueyano jeecasacari

¹ Tamonu juuca, Pedroori Juanta tacatariquiaa Pueyaso Secojoua tiajinia. Tari quiquiaariiri pananu piriuushacari. Nojoriiri jiyacari quiojonu jiiitiquiaari Pueyaso secojonura Secojoua tiajinia. ² Jiyacaritij, tamonu sesarunocua pueyanoori tii cajitiariquiaa Secojoua tia tohuatayaji. Nojuajaari naa rasanohuanaja quiquiaari. Pueyaracaanu patoojotasaquaaariiri Pueyaso Secojouajiniara, pueya na mashiniquiniuria cumaneeca nojori tiuquitasacari. Na cajitiasaqui tohuateya sesa quiquiaari “Tohuateya Maniniu”. ³ Sesarunocua pueyano jaara niquiquiaari Pedro, Juannio, nojori tiuquitianu panishacari Secojoua tiajinia, nojori maseree juucua na cumaneecaari. ⁴ Pedroori Juanta na shootiaree tacuriitia. Jiyacaritij, Pedroori na sequeree:

—Canaa quia niquiri.

⁵ Sesarunocuaari juucua shootiariquiaa nojori. Cumaneeca niqutiosaariquiano jyaniriquiaa juucuaari. ⁶ Pedroori na sequequiaari:

—Shaaqui cua cumaneeca. Shaaqui tojetaarucujanaa. Naajaa, cua jiiitiasanota quia naacureera quiarijia. Quia sequeya Jesucristo sesajini-anijia: “Quia sanere. Quia rucuanerejuhuaj”.

⁷ Pedroori na juaashiquiajiniji na quiaquiaari. Na nujuatereeri. Na niohuacaari jiyacari ritia jeequequiaari na sanesacari. Na sairi maniniujiaacara quiquiijihuaj. ⁸ Sesarunocuaari juhuacatecara rucuanequiaari. Nojoritia tiuquiquiaari Pueyaso Secojoua tiajiniaari. Maninia rucuaneriquiaari. Jaacuatariquiaari. Pueyaso maniniuhuaqueetariquiaajaarihuaj. ⁹ Puetunu pueyajanaari na niquiquiaari rucuaneyano, Pueyaso maniniuhuaqueetaanojuhuaj. ¹⁰ Puetunu pueyajanaari na niishiquiaari nojuajaari sesarunocuaajaja, Secojoua tiajinia tohuateya Maniniujinia cumaneeca mashiniquiijiojuatej. Pueyari cunora jiuujiatequiaari. Jiyanohua shiriiquitiuquiaariiri.

Pedro pohuatasacari Pueyaso rupaa pueya niquiara

¹¹ Sesarunocuaari Pedro juaashiquia carteyaquiquiaari, Juan juaashiquiano. Nojoriiri Pueyaso Secojouajinia nujuaturiquiaa tamocora. Nojori nujuatusaquiiri pueya jyaniquishano tariucuaaanu jiyaniijia Salomón canujuucojojua quiquiaari. Puetunu pueyajanaari nocua netecuatuquiaari na shiriiquiniutia. ¹² Pedro niquishacari nojori, pueya sequequiaariiri:

—Cuarta Israel pueyanaa, ¿casaara nia jiuujiateya nocuajini? ¿Casaara nia niqutitaa canaani? ¿Niaate jiyaniya canaa na niohuaca jeecareeni? Maja canaa. Majaari canaa cumaacata na jeequenu quirii. Niaa naasucuaari jiyaniya canaari nio miiriini socua maninia miijia canaa quiniucua Pueyaso niquiara tamasa pueyajiniji. ¡Maja! ¹³ ¡Jesucajaari na jecarohua! Nojuacajaari na Que Pueyaso jiyatesano Jiyaniijiajanaa na quiniuria. Jiyaniijiajanaara na jiyatenacujaari Pueyaso, cante nio

pojori pa supuetanaa jiyaniijia quiquiaaricuajani: Abraham Jiyaniijia, Isaac Jiyaniijiano, Jacobo Jiyaniijiajuhuaj. Tama pa supuetanaa Jiyaniijia Pueyasocuajaari Neyanu Jesu jiyatequiaari Jiyaniijiajanaa na quiniuria. Naa cutaraari Pueyaso Niyanu niquitocanu jiyaniijia Pilato, nojuaja na motenura. Pilato cartenu panishacari Jesu, majaari nia paniniu quiquianu na cartesaanura. ¹⁴ Naa maara maninia pueyanoocuaaji tacucanu saniya cutara, niaari pueyano puecoojuaacua shiriqutiurii saaja Pilato cartenura jiyano sesoriquia pueyano seque. ¹⁵ Naaari naa motecanu pueyano samiitianijiacuajatej. Naajaa, Pueyasoori na samiitianiquianuhua macujiniji. Canaari na niquiquianuni. Naacuajitij, canaari nojuajiniji nia pahuataani. ¹⁶ Nio sesarunocua pueyanoori Jesuucua tiurii. Naacuajiti jeequerohuari. Nojuacuajaari sesarunocua quiquiaari taa nia niquiquiaaricuajanoj. Jesuucua na tiuushacari, na cuaqueya cumaquiriiri. Na cuaqueyari seetanujuaanaa jeequerohua maninia, taa nia niquiyacuajanoj. ¹⁷ Cuarta Israel pueyanaa, quiarijia niishiyaniijia, majaari nia niishiniu quiquianu casaa nia miiquianuni. Majaari pa camarucua niishiniu quiquianujuhuaj. Naaari Pueyaso Jiyarosano mocanu nia niishiyaquishacari cante nojuaja quiquianuni. ¹⁸ Naacuajitij, Pueyasoori na sequesano tohuateecanu, tarijia na niishitishano na rupaa caminiujiuniaa. Seetanujuaanaa, puetunu Pueyaso sequesano caminiujiuniaajanaari pa supuetanaa niquiara poojotaquiaari: “Pueyaso Jiyarosanoori naquiya miishaanutaniya”. Jesuuri naa miishaacanu taritij. ¹⁹ Naaratej, nioojia nia tacatore sesa nia miishanojiniji. Pueyasoocua nia tacaterohua sesa nia miiniu tuujusaanura. ²⁰ Naacuajitij, pa Jiyaniijia Pueyasoori na naata juhua maniniushiquiariria jiyatenuhua pajaniyara, shuquiriaatia pa quiniuhua mijiria na jiyarosacariuhua Jesu. Pueyasoori tarijia na sequesquiaari pa Jiyaniijia nia quiniuria. ²¹ Nojuajaari jiyocuaaanu quiniutianiya na Que shuriucua, Pueyaso cuara tucuaterejaatijia puetunu tariucuaaanu na pahuatanishanojuanaa na sequenu panishano caminiujiuniaa. ²² Moisés cuajaari naa sequesquiaari pa supuetanaatej:

“Jiyaniijia Pueyasocuajaari niaacua jiyaronutaniya nojuajiniji pahuatana tama nia niquiohuacuajinio supuenojuaaja, taa na jiyarocquiaari janiyacuaani. Nojuaja jaara supuere, niocua puetunu na sequesanojuanaa tojiri. ²³ Canapuete cuno pueyano pahuatasano ruuretanutaniyani, nojoriiri Pueyaso saquiriojosano pueya tajiniji shaajasaanutaniya puetunurajanaa”.

²⁴ Pueyanaa, puetunu Pueyaso sequesano caminiujiuniaajanaari Moisés nuhuaji naa Jesujiniji pahuatanuuquiaarijuhuaj. Naacuajitij, Samuelri Jesucristojiniji pahuataquiaari taa na niniutianiyani. Naajuahuaj, Samuel nuhuaji, puetunu Pueyaso sequesano caminiujiuniaajanaari naa pahuatanuuquiaarijuhuaj. ²⁵ Puetunu Pueyaso sequesano Jesujinijianaani, cunoori quiarijia pajaniyara, taa Pueyaso pahuataniquiaari tariucuaaanu na sequenu panishano caminiujiuniaacuaajani. Nojoriiri pa supuetanaa quiquiaari. Pajaniyaranoljaariuhuj Pueyaso sequesano pa supuetana Abraham. Pueyasoori naa sequesquiaari pa supuetana Abraham:

“Quia muetusanojiniji tamonu pueyanoori supuenutaniya quia nuhuaji, cante pueya shuquiritiniutianiya puetunu jiyacajiniaacuaajani”.

²⁶ Pueyaso jaara na tojjia Nyanu samiitianiqianu, coteenu na jiyaree pocuuri poojia tacatoriquiano, sesa pa miiniu pa cartenura, shuquiriaatia quijiara pa quiniuria.

Pedroori naa pohuataquiaari pueya niquiaratej.

4

Judiocuaca camarucua nequesoreesacari Pedro, Juannio

¹ Pedro pohuatasacarijia pueya niquiara, nocua nijioquiaariiri pueyacuara secojonaa, Pueyaso Secojojua tia cojuanaata, Saduceocuatano. ² Nojoriiri Pedro tojiquiaari pueya niishitiojiyano. Nojuajaari pueya niishitiojoriquiaa macunucuaari saneecuatunutaniuha na jamacajiniji, naatej taa Jesu samiitiarohuacuaani. Cuno jiyaniijianucua jaara naa tojiquiaari sequeshiyanotej, nocuaji jiyanohua juaaquiocuaariiri, na ruuretasacari Pedro sequesano. ³ Cuno juaaquiocuaariiri Pedro quiatuquiaari, Juannio. Jiyacariiri tariucua tenacari quiquiaari. Tariucua niucua nujuatejosaaquiaariiri. Nojoriiri tii juhuaquequiaari nujuatejojuajinia. ⁴ Naajaa, queraatia pueyari Jesuucua tiuuquiaari Pedro pohuatasacari Jesujiniji. Quera cinco mil saaja canuuri tari Jesuucua tiuunaa quiquiaari. Maajipohuari serojosoo quiquiaari.

⁵ Tariqui, Judiocuaca camarucuaari rerejoquiaari camarucua naca-sunaata, Moisés Rootasanojiniji niishitiojonaatanio. Nojoriiri Jerusalén tiacajinia rerejoquiaari Jesujiniji pohuataanaa nojori nequesoreenura. ⁶ Anásri tii quiriquiaajuhuj. Nojuajaari pueyacuara secojonaa jiyaniijia quiquiaari. Caifásri tii quiriquiaajuhuj, tamonu Juannio, Alejandronio, mariyata puetunu secojonaa jiyaniijia tapueyocuaanio. ⁷ Pedro, Juannio, nojoriiri nujuatejojuajiniji tohuatejosaaquiaari. Nujuatejosaaree jiyaniijianucua tajiniaari. Pedro shocua, Juan shocua cajitiuniaari nojori nequesoreere:

—¿Taa nia miirucuaa noonijia, sesarunocuatej? ¿Cana cumaacata nia jecarohuacuaanoj? ¿Cante nia sequecanu naa nia miiniuriani?

⁸ Jiyacaritij, Pueyaso Sohuanuuri Pedro jiuujia cumaquiocuaari Pueyaso niishitiajata na pocuanura. Naacuajitij, Pedroori naa nojori riucaquiaari:

⁹ —Canaa camarucuaanaa, nia pohuatareera sesarunocujiniji, taa na jeequerohuacuaani. ¹⁰ Naa canaa nequesoreetaate, nia tojitiare canaa sequesano, nia niishiniuria cua pohuatasano, puetunu Israel pueyajanaa niishiniurijuhuj. Nio pueyano niya nujuanaani, nojuajaari Jesucristo cumaacata jeequerohuacuaa. Niaari Nazaret tiacajinijinio Jesu cusujuacanu niyacutesanojinia. Pueyaso cutaraari na sanacanhua macujiniji, pueyaracaanu na quiniuhua. ¹¹ Niajaniyari juhua saitia tijaonaa Pueyasora. Nia tiasacari, niaari maniniujajau saajia jataquiaari, nia jyanishacari sesarujajau naasucua. Na camaruuri saniniujia sequeya:

“Cuno nia jatasano saajiani, cunoori saniya cua maniniujajau saajia”. Niaari naa Jesu jataquiaari juhua saajia sesarujajau. Naajaa, Pueyasoori na niaquiaariuhua socua maniniushiqui. ¹² Majaari tamonu quiniu pocuaji tacuna. Puetunu pueya tajinijiniojuanaani, maja Pueyaso tamonu pueyano sesa jyaniquiniu quiquiaari cante pocuaji tacuriquianoni. Saaja Jesu cutaraari sequesaaquiaari pocuaji tacuriquianora.

¹³Judiocuaca camarucuaari jiyano hua na namijiaa riunitiquoquiaari nojori niquishacari taa Pedro, Juan seetanujuanaa cumaacata pohuatariquiaa nojori niquiarani. Nojoriiri Pedro, Juan niishiquiaari nojoriiri seetanujuanaa maja puera naajionuujuaca quiquiaari. Nareja poonijionuujuaca pueyajinijinio quiquiaariiri. Naa nojori niishishacariitij, nojoriiri seetanujuanaa niishirii nojoriiri Jesu cojiniaa quiquiaari. ¹⁴Sesarunocua jeequenohuari cuniqui nojori shuriucua nujuariquiaa-jaacuhuj. Naaratej, jiyaniijianucuaari socua sanaajetaquiaari. Saaja niishiriojonuuriquiaari. ¹⁵Camarucuaari Pedro, Juan tohuatanijioquiaari tamocora nojori tajiniji. Jiyareta camarucuaari tama pocoojologiaariiaaja. ¹⁶Naa sequetuquiaariiri:

—¿Taa pa miya socua nio pueyarini? Puetunu Jerusalén tiacajinia quiniaajanaari nojori cutara miishanojiniji niishiya. Majaari pa naata seetanu parta Israel pueya, pa sequenura nojori, cuno sesarunocuaari jeecasoo. Nojoricuaajaari tari maninia na niishitiuya. ¹⁷Nio pojori pa piriyojore juhuari, maja socua quiaritia nojori pohuatanura Jesujiniji pueya niquiara, nojori miishano paaqueyaquiniuria socua niya pa tiacajiniani.

¹⁸Camarucuaari socua piiquiaariuhua Pedro, Juannio. Nojori nacasuree jiyano huari, maja socua quenaaja nojori pohuatanura Jesujiniji pueya niquiara.

¹⁹Pedroori Juanta nojori riucuaquiaari:

—¿Canaatucua casaara Pueyaso samiritiare canaa tojiniuria niajaniani? ¿Taa nia sequeyani jiyaniijianucuaanaa? ²⁰Maja cutaraari canaa naata tarinitianu pohuatanu canaa niquishano, canaa tojishanonio.

²¹Camarucuaari nojori piriyojoquiaari juucuohuj. Puetunu pueyajanaari saaja maniniuhuaqueetariquiaa Pueyaso, puetunu maninia na miishanojinijijianaa. Naaratej, camarucuaari socua Pedro tarinitiaquiaari Juannio. Majaari na mojoosaanu quirii. ²²Pedro jeecasanohua sesarunocua pueyanoni, nojuajaari cuarenta marijia shocotejoquiaari tari na quishacari.

Jesu pueya secojosacari Pueyaso, na cumaquiniuria nojori

²³Pedro, Juan jaara cartesaaquiaari, nojoriiri narta Pueyaso pueyacu quiojoquiaariuhua. Nojori pohuataatureeri Judiocuaca camarucua sequesano nojori, camarucua nacasunaa sequesanojuhuaj. ²⁴Na tojishacari camarucua piriyojosano, puetunu nojorijianaari Pueyaso secojonu coteequiaari. Naa sequetuquiaariiri:

—Canaa Jiyaniijianaa, quiaari jiya cajiniocua shipinia, jiyanio. Shoniacu caminiaari quia shipinishanojuhuaj. Puetunu casaajanaari quia shipinishano. Quiaari jiyano hua maninia. ²⁵Canaa supuetanaa jiyaniijia Davidri quia seru quiquiaari. Naacujitij, quia Sohuanuuri na pohuatequiaari quia sequesano Jesujiniji juhua tariucua miishano. Quiaari naa na pohuatequiaaritij:

“¿Casaara jiyacua quiniaa pueya juayani? Pueyari najuhuaana sesa niishiriojoriquiaa juucua. ²⁶Jiyajinijinio jiyaniijianucuaari na juaaquiaca sanetaree. Queraatia tiacajinijinio camarucuaari Jiyaniijia Pueyasocuara roojotooree, na jiyarosano Cristoocuaranio”.

²⁷ Pueyasonaa, naacuaaquiniatejaj. Jiyaniijia Herodes, Poncio Pilatonio, nojoriiri nio tiacajinia rerejocanu narta taucacata, Israel pueyatano. Quia Niyanuucuaa roojotoocanuuri, tama quia Jiyarosanooocuarajaaja. ²⁸ Naa nojori miiniuucuatej, nio pueyari tari quia miiniu panishano miiriucuaa, taa quia sequequiaari tariucuaaanucujani: “Cua Niyanu cuaara mosaaria puetunu pueyacuarajanaa”. ²⁹ Canaa Pueyasonaa, quia tojishuriucuaraj. Nojoriiri quiarijia canaa miananojiya saniniuujia. Canaacuajaari quia seyani. Canaa jiuujia quia cumaquri quiarijia, canaa pohuatanura socua quia rupaa canaa puereyaquiniutia. ³⁰ Cusosuhua cuaara naatanijiosaaria quia cumaacata. Canaa jiyaniquishacari quia Niyanu sesa, jiyajeneta casaa cuaara miijiosaaria quia cumaacata pueya niqishocoriquiano. Nojuacuajaari saa maniniaja.

³¹ Nojori puecasacari secojonu, nojori quishaqui tiaari canashiyaquiji jiuuquiutiaquiaari. Pueyaso Sohuanuuri puetunu nojori jiuujiajinia tiuquiquiaari, nojori na cumaquiniuhuaa. Naacujitij, pueyari saaja maninia pohuataquiaari Pueyaso rupaa pueya niqiara. Majaari na pueretunu quiquiaari.

Jamueyashijia Jesu tojitianaa quishacari

³² Jesuucua tiunuaari maninia juhua rupuetootesano quiquiaari puetunujanaa. Nojoriiri juhua seetanujanaa tapueycuacataja quiquiaari. Majaari nojori sequenu quiquiaari: “Cua casami saaja quiria quiniutianiya”. Nojori jiiitasano casamiiri saniniuujia puetunu narta Jesuucua tiunuaarajanaa quiquiaarijuhuaj. ³³ Jesu saquiriojosano pueyari Jesu samiitanujiniji poojotaquiaari jiyanohua cumaacata. Naajuhuj, Pueyasoori puetunu Jesuucua tiunuaarajanaa naacuriquiaa jiyanohua, shuquiriaatia nojori quiniuria. ³⁴ Puetunu Pueyaso pueyajanaari na panishano jiiitiaquiaari puetunujanaa. Nojorijinijinio jaara cuhuariquia jiiitiaquiaari, tiano, nojoriiri na niqutioquiaari cumaneecara. ³⁵ Jaara cumaneeca masequiaari na casaa sami, nojoriiri nareja na niqutioquiaari Jesu saquiriojosano pueya. Nojoriiri saniniuujia casamijiu Pueyaso pueya na serotaquiaari, nojori jiiitanura na panishanojuhuaj. ³⁶ Nojorijinijinio, tamonu pueyanoori quiquiaari. Na sesaari José, Levita pueyano. Jesu jiyaramiquishano pueyari na sesojoquiaari Bernabé. Nioori sequeya “Cumanijiana”. Chipre jiyajinia na raja. ³⁷ Bernabeeri cuhuariquia jiiitiaquiaari. Na cuhuariquia niqutioquiaari cumaneecaraari. Jaara masequiaari cumaneeca na cuhuariquia sami, nojuajaari nareja na niqutioquiaari Jesu jiyaramiquishano pueya, casamijiu narta Pueyaso pueya niqutiojosaanura saniniuujia.

5

Ananías, Safira sesa miishanojiniji pohuatasano

¹ Tamonu pueyanoori quiquiaari. Na sesaari Ananías quijia. Necocua sesa quiquiaari Safira. Nojoriiri na cuhuariquia niqutioquiaari cumaneecarajuhuj. ² Ananíasri na cuhuariquia samijiniji queyataquiaari nera. Na cureeno pataquiaari Jesu saquiriojosano pueyacuari. Juhua papatasoo niqutioquiaari na sapojonutaari. Necocuaari na miishano niishiquiaarijuhuaj. Majaari neyacata na quiniu quiriqiaa Ananías

niqutiosacari nareja na cumaneeca. ³ Ananías niqutiosacari na cumaneeca, Pedroori na sequeree:

—Ananíasnaa, ¿casaara quia tiuquinirii Sesaaca quioojiajiniani, quia sapojonura Pueyaso Sohuanu juucuani? ¡Nojuacuajaari cua niishitiqui nio cumaneecaari maja puetunu quia masesanojuanaa quia cuhuariquia samijiniji! ¡Quiaacuajaari tiji queyataree! ⁴ Quia cuhuariquia quia niqutioyaquishacarijia cumaneecara, cuno cuhuariquiaari quia casaa quiriquiaa. Na nuhuaji, quiaa jaara quia cuhuariquia niqutiooree cumaneecara, quia cuhuariquia samiiri quia casaa quiriquiaajuhua. ¿Casaara naa sesa quia niishiriojoreerini? Naa sacuaraatia quia miishacarij, majaari quia sapojonu quirii parta pueyano. ¡Quiaa cutaraari Pueyaso sapojoree juucua!

⁵ Ananías tojishacari naa Pedro sequesantej, ¡macuuri pojoquee! Puetunu pueyjanaa jaara tojinuuquiaari nocuaji, jyanohua shiriq-uitiuquiaariiri. ⁶ Mashiquioriiri na jiuniocoquiaari toquejinia. Na nuhuaji, na patuquiaari na jamonuraari.

⁷ Jiuujianaraca hora nuhuaji, necocuaari juhuajaniya tiuquiquiaari Pedrocuajuhua. ⁸ Pedroori na nequesotaree:

—Cua sequere, ¿niojuanaate nia cuhuariquia sami quiriucaa?

Na riucaareeri:

—Jaa, niojuanaacuaaquinatejaj.

⁹ Pedroori na sequeree:

—¿Casaara naa nia rojotoorucuaa Pueyaso Sohuanu nia sapojonurani? Quia niquiri. Cuno mashiquioriiri quia niyaca jamonu nuhuaji shusha tiuquijiohua. Nojoriiri quiarijia quia panutaniyajuhua.

¹⁰ Jiyacarij, maajiiri macu pojoquee Pedro shuriucujuhua. Mashiquiori tiuquijiosacarihua, nojoriiri Safira niquishuhua pojianojuhua, tariucua macu. Nojoriiri na patuquiaarijuhua. Neyaca shuriucua na jamotuquiaariiri. ¹¹ Puetunu Pueyaso pueyjanaa, tamasaca pueyano, nojori jaara tojinuuquiaari puetunu nio miishanojinijijiana, jyanohua pueretuquiaariiri.

Queraatia miijosacari Pueyaso cumaacata pueya niqiara

¹² Jesu jiyaramiquishano pueyari jyanohua cutara casaa miijioquiaari Pueyaso cumaacata. Queraatia pueya naatanioquiaariiri. Puetunu Pueyaso pueyjanaari pueyaracaanu rerejoquiaari pueya jyaniquishano tariucuaaanu jyanijia Salomón canujuucojuajinia, Pueyaso Secojoua tiajinia. ¹³ Tamasaca pueyari nojori puerequiaari. Majaari nojori rupesaanu quijia. Na pueretujuacaari nojorijiniji sequetujua:

—Cuno pojoriiri maninia pueya.

¹⁴ Queraatia pueyari Jyanijia Pueyasocua tiuquiciaari, canuu, maa-jipohuanio. ¹⁵ Naajuhua, cusosuhuari patootasaaquiaari na maquetucuaajinia nuujinara. Pueyari naa niishiriojocuaari, Pedro jaara cusosuhua shuriuquico tajimia, cusosuhuari naataconutaniuhua Pedro naaqui jaara nojori caco netema. ¹⁶ Queraatia Jerusalén tiaca shocua quiniaa pueyari na cusosuhua patootaquiaarijuhua, Jerusalén tiacajinara. Samaruhua sesosano pueyari jaatucunuusaaquiaarijuhua. Puetunu pueyjanaari naatanijosaaquiaari.

Pedro, Juan nujuatejosacari nujuatejojuajinia

17 Naaratej, pueyacuara secojonaa jiyaniijia, nata quiniaa narta Saduceocuacano, nojoriiri juaaquiouaari shocotaso nojori quishacari. 18 Secojonaa jiyaniijaari na pueya jiyaroquiaari Jesu jiyaramiquishano pueya nojori quioonura. Jaara na quiootuquiaari, nujuatejosaaquiaariiri Judiocuaca nujuatejojuajinia. 19 Pueyaso seruuri niucua jiyocuacaanuji nojoriicua rosequiaari. Nujuatejojua tohuateya riataseeri. Na tohuatejosacari Pedro, Juannio, nojori sequereeri:

20 —Juhujaniya nia quiaarohua. Pueyaso Secojojua tiajinia puetunu Jesujiniijianaa nia pohuatate pueya niquiara. Nia pohuatatejuhujaa taa jatanishano pueya nia quiya quiarijiani.

21 Nojoriiri Pueyaso seru sequesano tojiquiaari. Nojoriiri tariquicuaji quiojoquiaari Pueyaso Secojojua tiajinia. Tii niishitiojonuuriquiaa juhujaniya Jesujiniji pueyari. Jiyacari, pueyacuara secojonaa jiyaniijaari nata quiniaata saniniuujia quiojoquiaari pueya nequesoreesaqui. Puetunu Israel pueya camarucujanaa rerejotereeri, nojori nequesoreenura Jesu jiyaramiquishano pueya. Puetunu nojorijianaa jaara tari rerejoquiaari, na pueya sequequiaariiri nojori tohuatejona Jesu jiyaramiquishano pueya nujuatejojuajiniji, nequesoresocoriquiano. 22 Na pueya jaara tiuquitiaquiaari nujuatejojuajinia, majaari nujuatejosano na riuriatatanu quishii nujuatejojuajinia. Nojoriiri tacaretacuhua na shaacanu nuhuaji. 23 Naa pohuatanuusuhua camarucua niquiaraari:

—Canaa tiuquishacari nujuatejojuajinia, canaari maninia cumaatia mishiquionucua na riuriataseeni. Tii cojuanaari maninia cojuariquiaa na tiotiu. Canaa riatasacari tohuateya, jshaacoori quiriquiaa!

24 Secojojua tia cojuanaa camarnu, mariyata pueyacuara secojonaa jiyaniijianucuaari tama sequetooquiaarijiaaja nojori shiriiquiniutia:

—¿Taateerini? ¿Taariquitijia socua na nuhuaji quiniutianiyatej?

25 Jiyacaritij, tamonu pueyanoori camarucuaacua tiuquishii. Naa nojori sequeseeri:

—¡Noo pojori, niaa na nujuatejocanu nujuatejojuajinatej, nojoriiri juhujaniya pueya niishitiojonuya Pueyaso Secojojua tiajinia!

26 Tari nojori niishishacari tee Jesu jiyaramiquishano pueya quiriquiaani, Secojojua tia camarnuuri na pueyata quiojoquiaari Jesu jiyaramiquishano pueya quioonura. Jaara na quiootuquiaari, nojoriiri jacaria na jaatucunuquiaariuhua. Secojojua tia camarnuuri pueya puereriquiaa. Nojori jaara caponeere Jesu jiyaramiquishano pueya na juaaniutia, pueya mariqui nojori jacure saitia saniniuuriijia. Nojoriiri cuno puerequiaari. Nocuaji Jesu jiyaramiquishano pueyari jacaria jaatucunuusaquiaari. Majaari na caponeesaanu quiquiaari. 27 Jaara tiuquitiasaaquiaariuhua, nojoriiri Israel pueya camarucujanaa tajinia nujuatejosaaquiaari, Sanedrínucua tajiniatuhuj. Pueyacuara secojonaa jiyaniijaari nojori sequequiaari:

28 —¡Majaquiiri nia niishiniu tojinu! Canaacuajaari tari nia tenujucanu juucuanu maja socua cuno Jesujiniji nia pohuatanura pueya niquiara. ¿Niaate nia numaa shama tojiquianu canaa sequesano? Naa nia niishitiojosacaritij, ipuetunu Jerusalén tiacajinia quiniaajanaari canaacua tiuutiantaniya Jesu mosaanu! Canaa sequetunutaniyari: “Cuno pojoriiri Jesu motucanu”.

29 Pedroori narta Jesu saquiriojosano pueyata nojori riucuaquiaari:

—Seetanujuanaari, pueya cuaara Pueyaso sequesano miiria coteenu, maja narta pueya sequesano. Maja cutaraari canaa tarinitianuonj. Na nuhuaji cutara, nio jiyajinia jiyaniijianucua sequesano cuaara miishaaria. ³⁰ Pueyasoori tariucuacaanu pa supuetanaa Jiyaniijia quiquiaarijuhuaj. Cuno Pueyasajuanaacuaajaari niyacutesanojinia nia cusojuasano samiitianiquianuhua. ³¹ Pueyasoori na tacaniquianu jiyocuacaanu. Na miaquetajara na cajitiquianuuri Jiyaniijiajanaa na quiniucua, pocuaji Tacuna na quiniucuaajuahuaj. Naa miiquianuuri Israel pueya tacatonuhara noojia Pueyasocua, Pueyaso jiyanooniuria pajaniya sesa pa miishanojiniji. ³² Naaratej, canaari canaa tojishano pohuataani, canaa niquishanonio. Naajuhuj, Pueyaso Sohuanuuri canaa niishitiojoquiaa maninia canaa pohuatanura pueya niqiara. Pueyasocuaajaari na tojitiaanaa niquitioquiaa na Sohuanu.

³³ Naa Judiocuaca camarucua tojishacari nojori sequesantej, juaaquioreeri. Nojori puecoonu panirii juucuaari. ³⁴ Jiyacaritij, tamonu pueyanoori narta camarucua tajiniji nujuaquiaari pocuanura. Na sesa quiquiaari Gamaliel, Fariseo pueyano. Nojuajaari Pueyaso tariucuacaanu rootasano niishijia quiquiaari cutara. Naajuhuj, nojuajaari jiyanoohua narta Israel pueya tojishano pueyano quiquiaari. Gamalielri Secojoua tia cojuanaa camarnu sequequiaari Jesu jiyaramiquishano pueya na tohuatanijionura rupaquijia. ³⁵ Na nuhuaji, saa camarucua quishacarijia tii nata, nojuajaari naa nojori sequequiaaritij:

—Cuarta Israel pueyanaa, jacaria nia niishiriojore taa nia miiniutianiya nio pueyani. ³⁶ ¿Majateeri nia niishiniu taa Teudas miiquiaari quiari naatajani? Nojuajaari jiyaniijiaara quiniu paniquiaari juucua. Queraatia pueyari na nuhuajiquiaari, quera cuatrociento pueya. Na nuhuaji, Teudasri mosaaquiaari. Puetunu na pueyajanaari niyaquejoquiaariuhua. Naa puequequiaariiri Teudas miiniu panishano. ³⁷ Teudas nuhuaji, jiyaniijia César naajiotanishacari puetunu pueya sesacajanaa, Galilea jiyajinijinio tamonu Judasri jiyacari César ruuretaquiaari. Queraatia pueyari na nuhuajiquiaari nojori jiyaniijia na quiniuria juucua. Nojuajaari mosaaquiaarijuhuaj. Puetunu na pueyajanaari niyaquejoquiaariuhujahuaj. ³⁸ Naaratej, naa nia sequeyanijia: nia tarinitiare nio canuu. Nojori niishitiojosano jaara tama nojori niishishanojuaja quiri, shaajenutaniyari. ³⁹ Saniniuujia, nojori miishano jaara seetanujuanaa Pueyasojiniji quiri, majaari nia naata nojori tarinitiniu quiniutianiya nojori miishanojiniji. Nocuaji tama nia cuaqueyajaaja nia cojuare, majaari Pueyasota nia miaquetojonuruhua, naa nojori nia miishacaritij.

⁴⁰ Puetunu camarucuaajanaari Gamaliel sequesano tojiquiaari. Na nuhuaji, Jesu jiyaramiquishano pueyari tiuquinitiasaarohua. Camarucuaari nojori mojooree nareja. Nojori tenujutureeri maja Jesujiniji nojori pohuatanura socua pueya niqiara. Naa nojori miishaanu nuhuajitij, Jesu pueyari cartequesaaquiaariuhua. ⁴¹ Jesu jiyaramiquishano pueyari camarucua rerejojuajiniji tohuaretaquiaariuhua shuquiriaatia. Nojoriiri timiquioriquiaa cararaatia nojori camarucua miiniucua nojori, Jesujiniji nojori poojotanuucua maninia. Majaari nojori seetanu quiquiaari nojori Jiyaniijia Jesujiniji. ⁴² Majaari nojori pishiniu quiquiaari nojori pohuatanura Jesujiniji. Socua pueya niishitiojonura jiyacatequiaariiri. Nojoriiri pueyaracaanu pueya niqiara

pohuatariquiaa Jesucristojiniji, puetunu juucajanaa, Pueyaso Secojua tiajinia, mariyata puetunu Jerusalén tiacajiniaqueyajanaano.

6

Mashiquiopue mianuutenaara saquiriojosacari

¹ Jiyacaritij, Jesuucua tiuunaa pueyari socua canequiaari. Puetunu nio pojorijinijiniojuanaani, noojiaqueyari Judio rupaa pocuanaa quiquiaari. Naajuhuj, noojiaqueyari Griego rupaa pocuanaa quiquiaari. Jiyacaritij, Griego rupaa pocuanaari juaaquiouquiaari Judio rupaa pocuanaata. Griego rupaa pocuanaari naa sequequiaari Judio rupaa pocuanaatej:

—¿Casaara canaa mashiquiopue nia niqutioyaquiquiaa miaquesanon-ijia?

² Nocuaji, Jesu jiyaramiquishano doce pueyari puetunu Jesuucua tiuunaa pueyajanaa rerejoquiaari. Naa nojori sequequiaariiri:

—Maja maninia canaa cartenura Pueyaso rupaa pohuatanu, canaa mianuutenura mashiquiopue. ³ Cunora canaa tapueyocucanaa, tama niajanijajinijinio nia saquiriojore siete maninia miijia pueya, niishi-jiaca, Pueyaso Sohuanuraca cutara. Nojori nia seeratare nio pooni-jiosano, maninia nojori mianuutenura pa mashiquiopue. ⁴ Canaacua saniniuujia saa Pueyaso secojorenijia. Naajuhuj, majaari canaa tarin-itanu quiniutianiya Jesujiniji niishitiojonu.

⁵ Puetunu pueyajanaari na shuquiriniutia naa riucuaquiaari:

—Taaquiriirinij, naacuaaquinateja maniniajaj.

Jiyacaritij, pueyari Esteban saquiriojoquiaari. Nojuajaari jiyano- hua Pueyasoocua tiuujia pueyano quiquiaari. Nojuajaari Pueyaso So- huanu cumaacaraca quiquiaarijuhuaj. Nio pojoriiri Estebanta saquiri- ojsaaquiaarijuhuaj: Felipe, Prócoronio, Nicanornio, Timónnio, Parme- nasjuhuaj, Nicolásnio. Nicolásri tahue quiquiaari Antioquiya tiacajini- jinio. Tii rasaquiaariiri. Nojuajaari tarijia Judiocuaca niishitiojosano pueyano quiquiaari, Judio pueyanora na quiniuria. ⁶ Puetunu pueya- janaa jaara cuno siete pueya saquiriojoquiaari, nojori jiyataquiaariiri Jesu jiyaramiquishano doce pueyacua. Jesu saquiriojosano pueyari cuno siete canuu nacaacua niaquiaari na juaashiquiaca. Pueyaso sec- ojuree nojoriicuaaraari Pueyaso Sohuanu cumaquiniuria nojori, mi- aquesano niqutiojonaa nojori quiniuria.

⁷ Jiyacariti Pueyaso rupaari socua tojishano quiquiaari. Jesuucua tiuuniaari socua canequiaarijuhuaj. Queraatia Judiocuacaacuara sec- ojonaa pueyari Jesuucua tiuquiaarijuhuaj.

Jesu ruuretajaca quiasacari Esteban

⁸ Estebanri Pueyaso cumaacaraca quiquiaari jiyano- hua. Pueyasoori maninia na jiiquiaari. Naacuajitij, nojuajaari cusosuhua pueya naatanijioquiaari Pueyaso cumaacata. Pueyari niishiquiaari Esteban pohuatasanoori seetanujuanaa Pueyasojiniji quiquiaari, nojori niquishacari jiyajeneta na miishano Pueyaso cumaacata. ⁹ Jiyacariti, tamasa Judiocuacaari Jerusalén tiacajinia quiriquiaa. Nojori maanuari sesojosaaquiaari “Quioosanojiniji carteqesano pueya”. Quiquiaarijuhuaj Cirene tiacajinijinio pueya, Alejandria tiacajinijinio pueya, Cilicia jiyajinijinio pueyajuhuj, Asia jiyajinijinio pueyanio. Puetunu nojorijianaari Estebancua rerejoquiaari

nata juayonuutanura. ¹⁰ Nojoriiri maja na naata Esteban shocotanu quiquiaari nojori niishishanota. Estebanri saniya nojori shocotaquiaarijia. Nojuajaari Pueyaso Sohanu niishitiojosanota saa maninia pohuataquiaarijia nojori niquiara. ¹¹ Maja socua nojori rejeretasacari Esteban pohuatasano, nojoriiri tamasaca pueya niqutioquiaari cumaneeca, najuhuana nojori cuaracashiniuria camarucua niquiara Estebancuara. Cuno pueya, cumaneeca niqutiojosaaquiaari na cuaracashiniuriani, nojoriiri naa sequequiaari Judiocuaca camarucua niquiaratej:

—¡Taaquiririnij, canaacuajaari cuno pueyano tojiquianu Moisés sesacaanoni, Pueyaso sesacaanojuhuaj!

¹² Naa nojori sequesacaritij, puetunu pueyajanaari juaaquioree, Judiocuaca camarucujuhuj, Moisés Rootasano niishitiojonaanio. Puetunu nojorijianaari Estebancua catecanoquiaari. Na quiatureeri. Na nuhuaji, na jaatucutuquiaari pueya nequesoreesaquiriaari, Israel pueya camarucua nequesoreesocoriquiano tii nojuaja. ¹³ Socua pajesaaquiaariiri tamasaca, Estebancuara tonujuriquiano najuhanaj, na cuaracashiniutia. Cuno pojoriiri naa sequequiaari camarucua niquiaratej:

—Nio pueyanoori pueyaracaanu sesacaquiaa Pueyaso Secojoja tia. Moisés Rootasano sesacaariquiohuariuhuj. ¹⁴ Canaari socua naa na sequesano tojiquiaajaaniuhuj: “Nazaret tiacajinijinio Jesuni, nojuajaari Pueyaso Secojoja tia niyartanutaniya”. Naajuhuj, tariucuacaanu Moisés niishitiojosano pajaniya pa cartetenutaniyaquiniaari.

¹⁵ Puetunu camarucujanaari na cajitiushaquiiji niqutiariquiaa Esteban. Nojoriiri na jiquioco niquiquiaari shacantuuca, juhua Pueyaso seru jiquioco.

7

Esteban pohuatasano

¹ Pueyacuara secojonaa jiyaniijiaari Esteban nequesotaquiaari:

—¿Seetanutejanaa taa nio pojori sequereecuajani?

² Nojuajaari na riucuaree:

—Cua panishano pueyanaa, cua camarucuaanaa, cua tojitiare. Pueya-soori jiyanohua maninia. Nojuajaari pa supuetana Abrahamcua muestaquiaari Mesopotamia jiyajinia na quishacari, na pacuyaquishacarijia Harán tiacajinia. ³ Pueyasoori jiyacari naa na sequequiaari:

“Quia tiujiaare quia jiya, quia pueyanio. Niiquiiji quia quiaare, janiya cuaara quia sequerejaatijia, niya quia quishii. Quiocua tii jiyojese cutara”.

⁴ Abrahamri Pueyaso sequesano tojiquiaari. Quiaquiaariiri Caldeo pueya jiyajiniji. Harán tiacajinia quishiiri. Tii shaajaquiaari na shipiniioori. Na nuhuaji, niyara pacuquiaariiri, paa tii quiyani. ⁵ Jiyacaritij, Pueyasoori juhuanajuaja maja Abraham na niqutionu quiquiaari nio jiya. Naacuajitij, Abrahamri maja quenaaja jiya na jiitianu quiquiaari tama na quiijarajaaja. Naajaa, Pueyasoori na sequequiaari:

“Janiya na nuhuaji quia niqutionutaniya nio jiyani. Quiaa jaara shaajeyare, quia niquiohuara quiniutianiya saniniuurijia”.

Pueyaso jaara naa sequequiaari Abrahamtej, Abrahamri jiyacari juhuanajuaja niquiohuaju quiquiaari. ⁶ Pueyasoori naa pacutequiaari sequenu Abrahamtej:

“Puetunu quia jinienucuajinio supueno pueyajanaani, nojoriiri na niishishoo pueya jiyajinia quiniutianiya. Cuno jiya pueyari nojori poonijiotenutaniya jiyanoehua. Naa naquiya miishaanutaniyari. Tii nojori quishacari, na shoconujunutaniyari cuatro ciento mar-ijia”.

⁷ Pueyasoori Abraham sequereejuhuj:

“Janiyari saniniuujia cuno taucuaca naminiutianiya quiocuajinio supueno pueyacuani. Janiyari nojori saniitionutaniya saniniunijia nojori poonijiotenuucua quiocuajinio supueno pueya. Na nuhuaji, nojoriiri tiji quiojonutaniuhua niyara. Nojori tiuquiijosacariuhua, nojoriiri cua secojonuujuaca quiniutianiya niya”.

⁸ Pueyasoori naa Abraham rootaquiaarijuhuaj:

“Niocua nia cararaatiuuquia co miatejore. Cunoori juhua naajiosano nia cuaqueyajinia quiniutianiya, pueyaracaanu nia niishiniuria cua sequesano niajaniya”.

Naa Pueyaso sequesanoori quiquiaari puetunu Israel pueyarajanaa. Naaratej, Abraham niyanu Isaac jaara rasaquiaari, na queeri neyanu cararaatiuuquia co miatequiaari na camueesacari ocho juuca. Isaacri naa miiquiaari neyanu Jacobojuhuj. Pueyasoori Jacobo sesojouquiaari “Israel”. Jacoboori naa miiquiaari necohujuhuj. Necohuari quiquiaari doce canuu. Cuno doce canuu, Jacobo niquiohuani, nojoriiri puetunu pa doce Israel pueyapue supuetanaajanaa.

⁹ 'Pa supuetana Jacobo niquiohuajinijinioni, tamonuuri sesojosaaquiaari José. Tapueyocuacaari José juaajiaa quiquiaari jiyanoehua, puera na que panishano José quishacari. Majaari nojori niqutiuniu paniniu quijia nojuaja. Na queeri socua jiyanoehua José panijia quiquiaari na pueranaajiniji. Tapueyocuacaari cunora casami niqutiojonaa pueya niqutioquiaari cumaneecara tarajanu José. Casami niqutiojonaari José jiyataquiaari Egipto jiyajinia, saniniuujia tii na niqutiosocoriquiano serura. Naajaa, Pueyasoori Joseeta quiriquiaa.

¹⁰ Pueyasoori na naacuquiaari naquiya na miishacari. Pueyasoori na jiyatequiaari niishijara. Naaratej, Egipto jiya jiyaniijia Faraónri na maniniucuaquiaari. Na jiyatequiaariiri puetunu Egipto jiya pueya camarnurajanaa. Na jiyateree na tia camarnurajaariuhuj.

¹¹ 'Na nuhuaji, miaajenuuri quiquiaari puetunu Egipto jiyajinia-janaa, Canaán jiyajinianio. Pa supuetanaa quishacari Canaán jiyajinia, nojoriiri quera titiacoquiaari na miajajaara. Seetanujuanaa shaaqui quiquiaariiri nojori miasano. ¹² Jiyacaritij, Jacoboori caminiujushaaquiaari: “Egipto jiyajinia quiyaquinia trigo”. Naaratej, necohua jiyaroreeri trigo masenura. Jiyacari nojori quiojosacarini, cunoori shushajanaa nojori quianu quiquiaari Egipto jiyajinia. Cuno Jacobo niquiohuani, nojoriiri pa supuetanaacuaja. ¹³ Coteenu nojori masenano jaara puequequiaari, nojoriiri Egipto jiyajinia tacatequiaariuhua socua trigo nojori masenura. Jiyacaritij, Joseeri tapueyocuaca sequequiaari: “Janiya nia tarajanuni”. Joseeri Faraón niishitiquiaari tapueyocua-cajuhuj. Naaratej, Faraónri shusha niishiquiaari tejeno pueyanote

José quiquiaarini. ¹⁴ Joseeri tapueyocuaca sequequiaari: “Pa que Jacobo nia riquioo niyara, puetunu necohuatajanaa”. Puetunu nojorijianaari quiquiaari setenta y cinco pueya. ¹⁵ Jacoboori naa pacuquiaari Egipto jiyajiniaratej. Na nuhuaji, saaquianoori tii shaajeseequiaari. Necohuari tii puequeseequiaarijiuhuj, tariucua saaquiapue. ¹⁶ Na nuhuaji, Egipto jiyajiniji pacusaaquiaariiri nojori nucuhua. Siquem tiacajinia niojosaaquiaariiri na supuetana Abraham raaco. Cuno raari cuhuariquiajinia quijia. Abrahamri cuno cuhuariquia masequiaari tariucuaaanu pueyajiniji raa na jiiitianura necocua na niajara jaara cusoyare. Cuno cuhuariquia masequiaariiri cumaneecata Hamor niquiohuajiniji, Siquem tiacajinia.

¹⁷ Pueyasocujaaari tariucuaaanu Abraham sequequiaari nojuajaari nio jiya na niqutionutaniya. Quera na niqutionu panishacari, Israel pueyari jiyanojua canequiaari Egipto jiyajinia. ¹⁸ Jiyacaritij, tamonu pueyanoori jiyaniijia quiquiaari Egipto jiyajinia. Cunoori jiyanojua tarijia quiquiaari José shaajenu nuhuaji. Naacuajitij majaari cuno jiyaniijia niishiniu quiquiaari José. ¹⁹ Cuno jiyaniijiaari taraatia miiquiaari shusha roosano pa supuetanaa niquiohua. Pa supuetanaa sequequiaariiri shusha roosano cuara quejoosaaria moojinia. Pa supuetanaari taraatia miiquioquiaari naacuatej. ²⁰ Moisésri jiyacari rasaanquiaari. Pueyasoori na maniniucuaquiaari. Na queyari na jiiitaquiaari ru-paquijia. Jaara na shoconujuquiaari jiuujianaraca raca, conajaari carijiniacuma niasaaquiaari. ²¹ Faraón niyatuuri na paquiaari sanini-uujia. Na canashitiquiaari juhua na mueyari. ²² Egipto pueyari Moisés niishitiojoquiaari puetunu nojori niishishanojuanaa. Puetunu Moisés sequesanojuanaari jiyanojua tojishano quiquiaari cutara. Puetunu na miishanojuanaari maninia quiquiaarijiuhuj.

²³ Cuarenta marijia jaara shocojoquiaari Moisés, mashaja na quishacarijia, narta Israel pueyacua rucuanenu paniquiaariiri, nojori na niquiniuria. Judiocuaacujaaari cuno pojori, naa sesojoshiya Israel pueyatani, maja tamonu. ²⁴ Naacuajitij, Moisés jaara quiaquiaari narta Israel pueya niquiniuucua, saaja Egipto pueyano niquishii narta Israel pueyano majacuyanoori. Moisésri narta Israel pueyanocua namiquiaari. Na juaaniutia moquiaari saniniuujia cuno Egipcio pueyanoori. ²⁵ Moisésri juucua jiyaniquiaari narta Israel pueyari niishiniutianiya Pueyasoori na jiyaroree nojori na mashiquiniuria Egipto jiyajiniji. Majaari nojori niishiniu quiquiaari saaja. ²⁶ Moisésri socua tariqui quiaquiaari narta Israel pueya niquiniuuquiohuaj. Nojuajaari saaja riuriatasee tama nojori piyotanojuaja. Juucua nojori ruparetanu panishiiri. Nojori sequereeri: “¿Niaateeri tamonu, niaa jaara naa miitioyaniquitij? ¿Casaara naa nia nootujutoyani?” ²⁷ Cuno narta pueyano piquiriquiaani, nojuajaari saaja Moisés caporee. Na sequereeri: “¿Cante quia jiyatecanu juhua canaa jiyaniijia quia quiniuriani, naa quia sequenura canatej? ¿Cante quia jiyatecanu canaa nequesoreenarani?” ²⁸ ¿Quiaateeri cua monu paniyajuhuj, naatej taa quia morucuaa cuno Egipto pueyanocuaani?” ²⁹ Moisés tojishacari naa cuno pueyano sequesantej, ritia mashiquiaari Egipto jiyajiniijiri. Madián jiyajinia quishiiri tamonu pueya jiyajinia. Moisés quishacari cuno jiyajinia, tii camiquiaariiri. Caapiqui canuuniyojua mueratejoquiaariiri.

³⁰ 'Cuniqui na quishacari, na shocojoquiaariiri cuarenta marijia socua. Tamonu juuca, Moisésri rucuanajoriquiaa cariiquia jiyajinia, pueya sesojosano Sinaí tuhuananu shuriucua. Pueyaso seruri tii nocua muetaquiaari nequeru casaja noshiyanojiniji. ³¹ Moisés niquishacari mani noshiyano, nojuajaari shiriiquiquiaari. Jaara nocua catecanoquiaari na niquniuria maninia, saaja Jiyaniijia Pueyaso tojirii manijiniji pocuaanoori. ³² Pueyasoori naa na sequequiaariti:

“Janiyacuaajaari Pueyasoni: quia supuetanaa Jiyaniijia: Abraham Jiyaniijia, Isaac Jiyaniijiajuhuj, Jacobo Jiyaniijiano”.

Moisés jaara naa tojiquiaariti, tetecareeri. Majaari mani noshiyano na niquniu paniniu quiquiaari na puerenuta. ³³ Pueyasoori na sequequiaari:

“Cuniquijia quia jocojore quia sapatu. Niya, quiaa tii nujuaani, nioori cua quishaqui. ³⁴ Janiyacuajaari cua pueya niquiquiaa Egipto jiyajinia quiyanoni. Egipto pueyari nojori miitiaa puera. Cua pueyari noonu rejeretacoya. Janiyari nojori sariyocuatunu tojiquiaa taraatiani. Nojoriicua roseyareenijia cua mashiquiniuria nojori Egipto pueyajiniji. Cunora, janiyari quia jiyaronutaniya Egipto jiyajiniani”.

Pueyasoori naa Moisés sequequiaariti.

³⁵ 'Israel pueyari tarijia Moisés juaaquiaaricuaaja. Naa na sequequiaariiri: “¿Cante quia jiyatecanu juhua canaa jiyaniijia quia quiniuriani, canaa nequesoreenarajuhuj?” Naajaa, Pueyaso cutaraari seetanujuanaa na jiyaroquiaariuhua nojori jiyaniijia na quiniuria, Pueyaso seru jaara nocua pocuaquiaari nequeru casaja noshiyanojiniji. Na jiyaroquiaariiri puetunu nojori tohuatanijioriquianojuanaa Egipto jiyajiniji. ³⁶ Moisés cuajaari pa supuetanaa mashiquiquiaari Egipto jiyajiniji. Nojuajaari jiyajeneta miishano miijioquiaari Pueyaso cumaacata cuno jiyajinia, mariyata nojori niuutiasacari Naatunacu jyanishano caminajuhuj. Naa miiquiaari pueyaracaanu cariiquia jiyajiniajaariuhuj. Cuarenta marijiaari nojori shocojoquiaari pueyaracaanu nojori rucuanajosacari tii. ³⁷ Nio Moisésni, nojuajaari naa sequequiaari puetunu Israel pueyajanaa:

“Pueyasoori niaacua jiyaronutaniya tamonu pueyano, na rupaa pohuatariquiano nia niquiara, taa na jiyaroquiaari janiyacuaani. Tama nia niquihuacuajinijuaaja supuenutaniyari. Niocua saa nojuaja tojiri cutara”.

³⁸ Nio Moisésri narta Israel pueyata quiquiaari cariiquia jiyajinia. Nojuajaari Pueyaso seruta pocoojoquiaari Sinaí tuhuananuucua pa supuetanaa jateesacari tuhuananu cari. Moisésri Pueyaso seru rootasano na tojishano niishitiojoquiaariuhua pa supuetanaa. Cuno rootasanoori samitianiijia rupaa quiquiaari pajaniyara, maninia pa quiniuria pueyaracaanu.

³⁹ 'Pa supuetanaari saa na ruuretaquiaarijia. Majaari nojori tojiniu paniniu quiquiaari Moisés. Egipto jiyajinia tacatenu paniquiaariuhua saajaari. ⁴⁰ Naacuajitij, Moisés tarishishacari tuhuananuucua Pueyaso seru na tojishacari, pueyari socua Moisés tarajanu Aarón sequequiaari: “Puera quia shipinijiorequi pueyasohua, nojori puetariquiano pajaniya. Majaari pa niishiniu taa Moisés miishiicuaani. Shaajeseecuaa naasucuaajuhuanajaj, mariqui tiuquiriohua. Nojuajaari najuhuaana pa

mashiquiquianu Egipto jiyajiniji”.⁴¹ Naacuaajitij, nojoriiri na pueyasora shipiniquiaari juhua seru juunu niyanujua niquishano. Nojoriiri na seya puecooquiaari na shuquiriniutia na juaashiquiata na shipinitushano pueyasooacara. Nojoriiri jiyacari sacuaraatia timiquioriquiaa.⁴² Pueyasoori socua nojoriicuaaji pishiquiaari. Nojori tarinitiaquiaariiri jiya cajiniocua nunucojuua nojori jiyatenura tama nojori pueyasohuaraaja. Seetanujuanaa naa naajiotasano quiyajaariuhua tariucuacaanu Pueyaso sequesano caminiujiuniaa naajioneejinia. Naa sequeyari:

“Israel pueyanaa, ¿canaacuara nia puecooquiaari pueyaracaanu nia seyani cariiquia jiyajinia nia camarucuneetasacari cuarenta marjia cuaara nia shocojoquiaariijaatijia? ¿Cucuaratee? ¡Maja! ¿Canaacuara nia catijiaquiaari nia seyani? ¿Cucuaratee? ¡Maja! Niaari puetunu cuno miiquiaarijianaa tama nia jiyatesano pueyasohuacuarajaaja.⁴³ Niaari Moloc suhuorotu pataquiaari, shoquejiniji suhuorotu, nia pueyasora nia jiyatesanoni. Cuncuajaari nia sequesano, ‘canaa pueyaso’. Niaari Refam pataquiaarijiuhuj, juhua rijia niquishano shipinishano. Niaari puetunu nio shipinijioquiaarijianaa nia pueyasohuara, nojori cariquimiaji nia mojuquetaconura, nia shuquiritiasacari nojori. Nocuaiji, janiyari nia jiyaronutaniya tucuacaanuni, Babilonia jiya tamajiria”.

Pueyasocuaajaari naa sequequiaari pa supuetanaatej nojori miiniuucua sesa.

⁴⁴ Estebanri socua pahuataquiaari naatej:

—Pa supuetanaari Pueyaso secojojua suhuorotu jiitiaquiaarijiuhuj, cariiquia jiyajinia nojori quishacari. Nojoriiri tii racataquiaari Pueyaso niquitiosano saajianeeca. Nocua naajiotasano quiquiaariiri Pueyaso rootasano na pueyara. Pueyasoori cuno suhuorotujiniji pocuaquiaari na pueyacia. Cuno suhuorotuuri shipinishaaquiaari taa Moisés niquitishaaquiaaricuaajani Sinaí tuhuananuucua na quishacari. Pueyasoori jiyacari naa sequequiaari Moisés: “Quia shipiniri taamueca cua niquitiquianu quiajanuyacuajani”.⁴⁵ Na nuhuaji, pa supuetanaa, canapuate naatujoori quiriquiaa Moisés quishacarini, nojoriiri cuno suhuorotu pataquiaari. Na patatuquiaariiri Josuéta nojori pacusacari nio jiyajinia paa tii quiyani. Nojori miaquetoosacari taucacata, nojoriiri Pueyaso secojojua suhuorotu patariquiaa. Pueyasoori cuno taucuaca jataquiaari nio jiyajiniji, saniniuuja pa supuetanaa jiya na quiniuria. Cuno suhuorotuuri pa supuetanaata quiquiaarijia, David jaara jiyaniijia quiquiaari.⁴⁶ Jacoboori pa supuetanaa jiyaniijia David supuetana quiquiaarijiuhuj. Davidri Pueyaso tojijia quiquiaarijiuhuj. Pueyasoori na shuquiritiaquiaari. Naaratej, Davidri Pueyaso Secojojua tiara tianu paniquiaari juucua.⁴⁷ David niyanu Salomón cutaraari Pueyasora tiaquiaari.⁴⁸ Naajaa, jiyocuacaanu Quijiaari maja na quiniu pueyano tiasanojiniaaco. Tariucuacaanu Pueyaso sequesano caminiujiuniaari naa naajiotaquiaari Pueyaso sequesano nojuaja:

⁴⁹ “‘Jiyocuacaanuuri cua quiquio. Jiyari saniniuuja cua niohuaca cua niaja. ¿Taamueca tia nia tianutaniya quiriijaarani?’ Jiyaniijiaari naa sequeyaquij. ‘¿Taa nia sequeyani: na mueecujuara pa miri, shuquiriaatia na quijiaara? Maja. ⁵⁰ ¿Majateeri puetunu nio jiyajinia niquishanojuanaa cua juaashiquiata cua miishanocuaaja, jiyocuacaanujuhuj?’ ”

⁵¹ Estebanri socua nojori sequequiaari:

—¡Niaari tojitiaashijianucua! ¡Niaari Pueyaso sequesano ruuretaquiaa juhua nia supuetanaa! Nioojaari maja juhua Pueyaso pueya jiuujia. Nia numaacaari maja Pueyaso rupaa na tojiniu paniniu. Niaari pueyaraaanu tojijaquiaa Pueyaso Sohuanu Niishitiojosano. Niaari Pueyaso tojyashijianucua juhua nia supuetanaajuhua. ⁵² Nia niishiritioj, ¿nia supuetanaate quenaa niquiriyatujua Pueyaso sequesano caminiujiuniaa miitiaaquiuaari? Nia supuetanaari puetunu Pueyaso sequesano caminiujiuniaajanaa miiquioquiaari naquiaa. ¿Quenaaja niquiriyatu nojorijinijiniote miitiasoo cureequiaari? Maja. Nojoriiri tari puecooquiaari noo pueya, canapuete maninia miijia mijiria niriquianojiniji pohuatanuquiaaricujani. Cuno maninia miijia jaara tiuquiaaari, niaari sesa miijia pueya na niqutiocanu nojori mosocoriquiano. ¡Niaari naa mocanu Pueyaso Jiyarosanotej! ¡Niaari pueyaraaanu Pueyaso ruuretaquiaa! ⁵³ Naacujitij jiyocuacaanu Pueyaso seya pohuatasano Pueyaso rootasano niaarani, majaari cuno nia tojiniu quiquiaajuhua.

Jesu ruuretajaca mosacari Esteban

⁵⁴ Pueya jaara naa tojitiuquiaari Esteban sequesantej, nojoriiri jiyanhua juaaquioree. Na juaaniutia miaquenuuree na quiaaari. ⁵⁵ Jiyanhua Pueyaso Sohuanu cumaquishacari Esteban jiuujia, nojuaari jiyocuacaanu mauquiaari. Saaja Pueyaso shacantuca niquiriiri. Jesu niquiriijaariuhua na Que Pueyaso miaquetajara nujuaano. ⁵⁶ Naa na niqishacaritij, nojori sequeree juucuaari:

—¡Nia niquishuriniaja! Jiyocuacaanu niquia riatenonijia. ¡Pueyaso Niyanu niqiyaniija na Que miaquetajara nujuaano!

⁵⁷ Pueyari na numaaca mishiquiojonuquiaari saaja, maja na tojitiuniuria Esteban sequesano. Jiyanhua sariyocuatquiaari na juaaniutiaari. Na nuhuaji, Estebanca cocuatequiaari. ⁵⁸ Na caponeetuquiaari Jerusalén tiacajiniiri. Tiacajiniji tohuatesaaree tamamaari. Na tohuatesaanu nuhuaji, tii na jacutuquiaari saitiaari. Na jacaturiquianoori na toqueya cojuatequiaari tamonu mashaja. Nojori toqueya cojuana sesa quiquiaari Saulo. ⁵⁹ Nojori jacutusacari saitia Esteban, Estebanri Pueyaso secojoriquiaa naatej:

—¡Jiyaniijanaa, cua sohuanu quia riri quia shuriucua.

⁶⁰ Na nuhuaji, mojuquetareeri. Jiyanhua nacaquiaari na nuhuajiri-aari:

—¡Jiyaniijanaa, majaari nio pojori saniitionu naa nojori miiniuucua janiyatej!

Naa na sequenu nuhuajitij, cusoqueeri.

8

Saulo miishacari naquia Jesuucua tiuuniaa

¹⁻² Pueyaso panijiaa pueyari Esteban quete patuquiaari na jamotusocoriquiano. Nojoriiri Esteban sapuequiaari. Cuno juuca, Jerusalén tiacajinia quiniaa Judiocuaari juhuacatecara miitianu coteequiaari puetunu Jesuucua tiuuniaajanaa. Nocujia, puetunu nojorijianaari tiji mashiquiaari. Saaja Jesu saquiriojosano doce pueyari tii cureequiaari nojori nuhuaji. Nojoriiri na mashishacari niaquejoquiaari puetunu Judea jiyajinijanaa, Samaria jiyajinariano. ³ Jiyacari Sauloori socua jiyacateriquiaa miitianu Pueyaso pueya. Nojori pajequiaari puetunu

tiacajiniaqueyajanaari Jerusalén tiacajinia. Na riuriatasacari, na jay-oqúiaari tiacojiiri, na nujuatejosocoriquiano nujuatejojuajinia, maa-jipohua, canuunio.

Jesujiniji pohuatasacari Samaria jiyajinia

⁴ Mashiyocuatuno pueyari puetunu na quiasacojuanaa Jesujiniji pohuatanuquaaari pueya niqúiaara. ⁵ Nojorijinijinio quiqúiaarijuhuaj Felipe. Nojuajaari mashiquiaarijuhuaj tamonu tiacajiniara Samaria jiyajinia. Cuno tiacajinia juhuacatecara pohuataquaaari Jesucristojinijijaarihuaj. ⁶ Puetunu pueyajanaari Felipe pohuatasano tojinuucua rerejoquaaari. Pueyari sanaa na tojtiaquaaari. Nojoriiri Felipe shootiaquaaari tacuriitia, na miishacari jiyajeneta casaa Pueyaso cumaacata. ⁷ Samaruhua tohuatanijioriquiaa pueyajinijiiri. Samaruhua tohuareetasacari pueyajiniji, sariyocumaquaaari. Queraatia cumatacuruhuaana cusosuhuari naatanijosaaquaaarijuhuaj, sesacujanucuanio. ⁸ Naaratej, puetunu cuno tiacajinia quiniaa pueyajanaari jiyanhua shuquiriquaaari.

⁹ Shimiacuuri cuno tiacajinia quijiajuhuaj. Na sesa quiqúiaari Simón. Cuno tiacajinia quiniaa pueyari na pueretujua. Puetunu pueyajanaa sapojojuaaari jiyajeneta na miijiosanota. Naa sequeja tama na cuaqueyajaarijia: “Janiya cutaraari tojishano pueyanoni”. ¹⁰ Puetunu pueyajanaari na tojijia quiqúiaari, camarucua, muerasunio. Nojoriiri sequetuquaaari: “Nio pueyanuqui jiyanhua Pueyaso cumaaca jítiaa”.

¹¹ Puereeta Simón miishacari pueyaracaanu, pueyari sapojosaaquaaari. Naaratej, pueyari na sequesanoocua tiuquaaari. ¹² Na nuhuaji, nojori jaara tojiquaaari Felipe pohuatasacari Pueyaso rupaa, Jesucristojinijijuhuaj, cuno Samaria pueyari Jesuucua tiuquaaari cutara. Canuu, maajipohuajuhuaaj, nojoriiri tiuquinijosaaquaaari moojinia. ¹³ Simónri Jesuucua tiuquaaarijuhuaj. Tiuquinishaaquaaarijiaarihuaj. Na tiuquinishaanu nuhuaji Felipepecua sacuaquaaariiri. Felipe shootiaquaaari tacuriitiaari Felipe miijiosacari jiyajeneta casaa Pueyaso cumaacata.

¹⁴ Jerusalén tiacajinia Jesu saquiriojosano pueya jaara tojiquaaari taa Samaria pueya tiuuri Pueyasoocuan, nojoriiri cuniquiji jiyarotúquaaari Pedro, Juannio. ¹⁵ Nojori tiuquishacari Samaria jiyajinia, cuniqui quiniaa Pueyaso pueyacura secojotureeri nojori jiuujiajinia Pueyaso tiuquitiniuria na Sohuanujuhuaj. ¹⁶ Majaari Pueyaso Sohuanu tiuquiniu quiqúiaari juhuanujuaja nojori jiuujiajinia. Nojoriiri nareja moojinia tiuquinijosano quiqúiaari Jesuucua nojori tiuushacari. ¹⁷ Pedro, Juan, cunora na juaashiquia niojoquaaari pueyacua, nojoricuara na secojotusacari Pueyaso. Naa nojori miishacaritij, Pueyaso Sohuanuuri cuno pueya jiuujiajinia tiuquiquaaari cutara.

¹⁸ Simónri niqúiriquiaa taa Pueyaso Sohuanu tiuquiquaaari pueya jiuujiajinia Jesu saquiriojosano pueya niasacari na juaashiquia nojoriicuan. Naaratej nojuajaari Jesu saquiriojosano pueya niqúitionu paniquaaari cumaneeca juucua, cuno cumaaca na jítianurajuhuaaj.

¹⁹ Simónri naa sequequaaari nojori:

—Cua niqúitiotureja cuno cumaaca. Janiyacua Pueyaso Sohuanu panijiacacua niare cua juaashiquianijia, Pueyaso Sohuanu nojori masenurajuhuaaj, taa nia miyacuaani.

²⁰ Pedroori na sequequaaari saaja:

—¡Quia cumaneeca cuaara shaajeera quiatajuhuaj! Quiaa naasucuaari jiyaniya Pueyaso Sohanu cumaneecata masesano. Quia niishiri, Pueyasoori na Sohanu niqutioquiaa nareja na tojitiajaca pueya. ²¹ ¡Pueyaso Sohanu cumaacaari maja quiarano! Quioojaari jiyanhua sesa quiya Pueyaso niquiara, nocuaji maja na cumaaca niquticosaanu quiniutianiya quiajaniya. ²² Jiyanhua sesa quia niishiriojosanojiniji quia pishiriohua. Pueyaso quia secojore na jiyanooniuria quiajaniya naa quia niishiriojosanojiniji quioojajiniatej. ²³ Niishiyacuajanijia, quiaari juhua cartesoo quiyajaa, sesa miiniuucua jitinio quia quishacarijia. Quioojaari puera najiquitishano quiyajaa jiyanyashijia quia quiniuucujuhuj.

²⁴ Simónri na riucuaquiaari:

—¡Pueyaso nia secojorequi cucuara, mariqui cua saniitioreeri taa nia sequeyacuajani!

²⁵ Na nuhuaji, Pedroori Juanta socua pohuataquiaari Jiyaniijia Pueyaso rupaa cuno pueya niquiara. Pueya niquiara pohuataatureeri socua Samaria jiya tiacajinia, cuniqui quiniaa tiuuniuria Jesuucua-juhuj. Maninia rupaari Pueyasojiniji pohuatasaaquiaari queraatia tiacajinia, Samaria jiyajinia. Na nuhuaji, Pedroori tacatequiaariuhua Juanta Jerusalén tiacajiniohua.

Jesujiniji Felipe pohuatasacari Etíope pueyano

²⁶ Cuno nuhuaji, Pueyaso seruuri Felipeecua rosequiaari. Na seque-seeri:

—Quia sanere Felipenaa. Pananu shuucuaajiria nucuama quia quiaare. Quiocua tiuquishii tamonu nuujinia, Jerusalén tiacajiniji neteja Gaza tiacajinira. Cuno nuuri cariquia jiyacuma neteya.

²⁷ Felipe tojishacari naatej, nojuajaari ritia sanequiaari. Nucuama quiaquiaariiri. Nuujinia naacuneetooquiaari saaja Etiopía jiyajinijinio pueyanotaari. Cuno pueyanoori riyacajajaaju quiquiaari Etiopía jiya jiyaniijia naacutana na quiniuucua, maaji na jiyaniijia quiniuucua. Na jiyaniijia sesa quiquiaari Candace. Cuno maajiiri cuno pueyano jiyatequiaari Etiopía jiya casami jitianara, na cumaneeca cojuariquiano nera. Nio Etíope pueyanoori Jerusalén tiacajinia quiaquiaari Pueyaso secojonuucua. Cuniquiji tacateyanoori Felipeeta naacuneetooquiaari nuujinia. ²⁸ Nucucoji na tacatesacariuhua na jiyajiniohuara, caballoori na jaatiariquiohua, rucuanegotajarujinia cajiyano. Pueyaso rupaa serojoriquiohuari, tariucuaaanu Pueyaso sequesano caminiuujunia Isaías naajioneejiniji. ²⁹ Pueyaso Sohanuuri jiyacari Felipe sequequiaari:

—¡Ritia nocua quia catecanore! Quiocua nata quiaare.

³⁰ Jaara nocua catecanoquiaari, Felipeeri Etíope pueyano tojiquiaari Isaías naajiosano serojiyano cojuata. Felipeeri na nequesotaquiaari:

—¿Quiaate quia serojosano niishiya casaa na sequeyani?

³¹ Etíope pueyanoori na riucuaquiaari:

—¿Janiyatucua taa niishirinio, tamonu jaara cua serojosano niishitioy-aquiri janiyani?

Felipe sequereeri:

—Miji quia tacama. Cua shuriucua quia cajishii.

³² Etíope pueyanoori nio serojoriquiaa tariucuaaanu Pueyaso Rupaa-jinia:

“Juhua borrego jaatucusa aquiaariiri mosocoriquiano. Naatej, taa borre-gocuaani sanaa niquiyari na cajaca miatejosacari, nojuajaari naa quiquiaarijiuhuaaj. Majaari na sariyocuanu quiquiaari quenaaja naquiya na miishacari. ³³ Naquiya miishaaquiaari cararaati-aari. Nocua namiyaquishaaquiaariiri. Mashaja na quishacarijia, nojuajaari shaajasa aquiaari nio jiyajiniji. Cunora, majaari na muetunu quiquiaari. Niquiohuajuuri mosaaquiaari”.

Etíope pueyanoori nio serojoriquiaa Pueyaso rupaajiniji.

³⁴ Na nuhuaji, Etíope pueyanoori Felipe nequesotaree:

—Cua sequere pueyanonaa, ¿canajiniji Isaías pohuataa niya na naa-jiosanojiniani? ¿Tama nojuajiniji pohuataate? ¿Tamonujiniji soj?

³⁵ Felipeeri Etíope pueyano niishitiojonu coteequiaari Jesujiniji shusha na serojosano Isaías naajiosanojiniji. Felipeeri naa na sequeree:

—Isaías naajiosacari nio, nojuajaari juhuacarijia Jesujiniji pohu-ataquiaari, taa quiarijia Jesu miishaacanu taraatiacuajani.

Felipeeri socua na pohuataquiaari Jesu miishanojiniji. ³⁶ Nojori quiasacari nuuaco, caminiaco shuriuquico tajitariquiaari. Etíope pueyano jaara caminiaco niquiquiaari, Felipe sequereeri:

—¿Majate maninia cua tiuquinishaanura niya?

³⁷ Felipeeri na sequeree:

—Quiaa jaara seetanujuanaa tiuuri Jesuucua, quia naata tiuquin-ishaanu.

Cuno pueyanoori na riuquaree:

—Jaa, janiya Jesucristoocua tiuyani. Nojuacuajaari Pueyaso Niyanu. Na niishyanijia.

³⁸ Etíope pueyanoori jiyamitia na seru sequeree:

—Quia nujuaretare rucuanejotaja.

Felipeta rosetamaa caminiacojiniaari. Felipeeri tii na tiuquiniquiaari Jesuucua na tiuushacari. ³⁹ Nojori tacatasacariuhua caminiacojiniji, Pueyaso Sohuanuuri Felipe riquiaari canashiyaquiji cuno Etíope pueyano shuriucuaji. Nojuajaari juucua tacareecuquiaari na tiuquiniaacua. Majaari socua na niquniu quiquiaari Felipe. Tariucua tiuquinishanoori shuquiriaatia quiaquiaariuhua na jiyajiniohua. ⁴⁰ Pueyaso Sohuanuuri Felipe jataquiaari Azoto tiacajinia. Nojuajaari cuniquiji puetunu tiacajinia poojotaquiaariuhujanaa Pueyaso rupaa Jesujiniji. Naa tiuquishuhua Cesareya tiacajiniaari.

9

Saulo jatasacari Jesu tojiniaara na quiniuria

¹ Sauloori jiyacari pueyaracaanu Jesuucua tiuuniaa mianana-joriquiase. Nojori puecoonu paniquiaari puetunujuanaari. Naaratej, Sauloori pueyacuara secojonaa jiyaniijaacua quiaquiaari. ² Naa na sequeseeeri:

—Damasco tiacajinia quianu paniyanijia. Quiria quia naajiore cuniqui secojojua tiaca camarucuacuara Damasco tiacajiniani, cuno naajioneeta cua tiuquiiionura nojori rerejojuacajinia. Jesu tojiniaa pueya morojonu paniya cuniquijinijia. Janiyari cua quioosano jaatucunutaninya nyara Jerusalén tijajinarani, canuu, maajipohuanio.

³ Naacuajitij, nuuaco Saulo quiasacari, tari quenaacoturiquiaa Damasco tiacajiniaraari. Jiyacaritij, ¡shacantuucaari canashiyaquiji

nunuquiaari jiyocuacaanuji! ⁴ Sauloori juhua jatasaaquiaari na cari. Na pojosaquiji tojiquiaari rupaa na sequeyanoori:

—¡Saulonaa, Saulonaa, cua tojiri! ¿Casaara quia miitiaa puera janiyani?

⁵ Sauloori na riucuaaree:

—¿Cantequia Jiyaniijianaa?

Jiyocuacaanuji nocua pocuaanoori na riucuaquiaari:

—Janiya Jesuni. Quiaari puera cua miitiaajanaajataj, cucua tiuuniaa quia miitiasacari puera. Naa quia miishacari puera quia juaaniutiatej, quiaari tama quia cuaqueya sesoyajaacujua. Quiaari juhua juaajia pueyano. Quiaari quia juaaniutia juhua jiohuaca patiyashijia.

⁶ Sauloori na puerenuta na tetecasacari na sequequiaari:

—Jiyaniijianaa, ¿casaa quia paniya cua miiniuriani?

Jiyaniijiaari na sequeree:

—Quia sanere. Naajaa quia tiuquishii Damasco tiacajinia. Quiaari tii sequesaanutaniya cua panishano quia miiniuria.

⁷ Saulota quiojonaari shiriiquitiuquiaari nojori jaara tojitiuquiaari jiyocuacaanuji pocuanu. Nojoriiri juucua na niquiniu paniquiaari. Saaja shaaquiiri quiriquiaa. ⁸ Na nuhuaji, Sauloori na pojosaquiji sanerohua juucua. Majaari na naata niquiniu quiquiaari saaja. Nata quiniaari na jaatucutaquiaari Damasco tiacajiniara. ⁹ Nojuajaari tii camueenujuquiaari jiuujianaraca juuca, cariyojuaru na quishacari. Majaari na miaquenu quiquiaari pueyaracaanu cariyojuaru na quishacari. Ratuyaquiquiaarijiaariuhuj.

¹⁰ Tamonu Jesuucua tiuunia pueyanoori Damasco tiacajinia quijia. Na sesa quiquiaari Ananías. Jiyaniijia Jesuuri na sequequiaari juhua na maquenujia:

—¡Ananíasnaa!

Nojuajaari na riucuaquiaari:

—¿Casaate cua Jiyaniijianaa?

¹¹ Jiyaniijiaari na sequeree:

—Quiarjia quia quiaare Saulo pajenuucua. Nojuajaari noo Saulo, Tarso tiacajinijinio pueyanotej. Nojuajaari Judas tiajia quiya. Judas tiaari jati tamonu nuujinia quiya. Cuno nuu sesa, Nu Maniniu. Sauloori cuno tiajia secojiya Pueyaso. ¹² Nojuajaari juhua na maquenujia tari niquirii quiajaniya nocua tiuquiyano. Tari quia sesa niishiyajaariuhuj. Sauloori tari quia niquirii na maquenujia. Quiaari quia juaashiquia niariquiaa nocua, na namijia jeequenuhuara, maninia na niquiniuhua.

¹³ Ananías jaara naa tojiquiaari Jiyaniijia sequeyanotej, nojuajaari sequeree:

—¡Cua Jiyaniijianaa, queraatia pueyari cuno pueyanojiniji cua pohuatacanuni! ¡Quiocua tiuuniaa pueya miitiaquiaa taraatia Jerusalén tiacajiniaari! ¹⁴ Pueyacuara secojona jiyaniijia jiyarosanonaari cunohuj, quiarjia niya tiuquiriini. ¡Nojuajanaari quia secojona pueya quioonutaniya, morojonucua canaa na jiyatasocoriquiano Jerusalén tiacajiniara!

¹⁵ Jiyaniijiaari Ananías sequequiaari saaja:

—Naajaa, quia quiaare. Janiyacuajaari cuno pueyano saquiriojoquiaari tarijia cua jiyaramiquishocoriquianoni. Nojuajaari tamasa jiyacajinia poojotanutaniya janiyajiniji taucua niquiaara. Taucua jiyaniijianucua poojotanutaniya janiyajinijiaariuhuj, Israel

pueyano. ¹⁶ Janiyacuajaari Saulo niishitiojonutaniyani taa jiyanhua naquiya pueya miitianutaniya nojuajani, janiyajiniji na pohuatasacari.

¹⁷ Naaratej, Ananíasri quiaquiaari. Judas tiajinia tiuquishiiri, tee Saulo quiriquiaacuajani. Na tiuquishacari, Sauloocua niasee na juaashiquiaari. Na sequireeri:

—Cua tarajanunaa, pa Jiyaniijia Jesu, quioocua muetarucuaa nio tiaca nucuamaji niyara quia nishacarini, nojuajaari quioocua cua jiyaroreeni. Cua jiyaroreeni quia namijia jeequenuhuara maninia, Pueyaso Sohuanu tiuquiniuria quioojiajiniajuhuaj.

¹⁸ Jiyacari ritia totequiaariiri juhua sapitiaaja cocua Saulo namijiajiniji. Maninia niquiquiaariuhua na nuhuajiiri. Na nuhuaji, Sauloori ritia tiuquinishaquiaari moojinia Jesuucua na tiuushacari. ¹⁹ Na nuhuaji, miaquereeri, raturohuajaariuhuj. Noojia jatarohuari. Pasaja camueenujuquiaari Damasco tiacajiniaari Jesuucua tiuniaa pueyata.

Jesujiniji Saulo pohuatasacari Damasco tiacajinia

²⁰ Sauloori juhuacatecara coteequiaari Jesujiniji pohuatanu narta Judiocuaca secojojuaca tiajinia Damasco tiacajinia. Nojuajaari pueya niquiara na pohuatasacari sequeja:

—¡Jesuuri seetanujuanaa Pueyaso Niyanu!

²¹ Naa nojori tojishacari Saulo pocuaanotej, pueyari shiriiquiaari. Na shiriiquitiuniutia sequetureeri:

—Nio pueyano pocuaani, ¿majate nootej, naquiya miiquiaa Jesuucua tiuniaa pueya Jerusalén tiacajinatej? Niyara niyareejaariuhuj, Jesuucua tiuniaa pueya na morojonura. Nojuajaari nojori jiyatanu paniriquiaa juucua Jerusalén tiacajinia secojonaa jiyaniijianucua na niquitiosocoriquiano, nojori nujuatejosaanura.

²² Sauloori socua noojia cumaquiaari Pueyaso Sohuanuta, jiyanhua maninia na pohuatanura puetunu juucajanaa. Nocuaji pataquiaari saaja Damasco tiacajinia quiniaa narta Judiocuacaari. Sauloori maninia pohuataquiaari tariucuacaanu Pueyaso Rupaajiniji, seetanujuanaa maatia pueya niishiniuria Jesuuri Pueyaso Jiyarosano pocuaji tacuriquiano.

Saulo mashishacari narta Judiocuacaacuaji

²³ Quiniqui Saulo camueenujusacarijia pueyaracaanu, narta Judiocuacaari nocuara rojotooquiaari na motunura juucua. ²⁴ Tamonuuri Sauloocua jiyanoocuaari. Naa na sequequiaariiri:

—¡Quiaa monu panishiya sacaj!

Judiocuacaari na sashiriquiaa tiaca tohuateyaji, na monu paniniutia juucua Saulo. Na shanacuriquiaari juuca, niucuanio. ²⁵ Damasco tiacaari puereetuca sohuacaraca quiquiaari puetunu na shocujanaa. Jesuucua tiuniaa pueyari saaja Saulo mashiquiaari niucua. Sohucajiniji roshinitiasaquiaari jiyocuacaanuji puereetuca canaasatujiniaari. Sauloori naa mashiquiaaritij.

Saulo quishacariuhua Jerusalén tiacajinia

²⁶ Na tiuquishacariuhua Jerusalén tiacajinia, Sauloori Jesuucua tiuniaa pueya rupeunu paniquiaari juucua. Nojoriiri saaja na puerequiaari. Na puerenuta sequetuquiaariiri:

—Pueyasooocua tiuujiaquinio naasucua jiyanotej.

²⁷ Bernabé cutaraari maja na puerenu quiquiaari Saulo. Nojuajaari Jesu saquiriojosano pueyacua na jiyataquiaari, Saulo niishiniuria puetunu nojorijianaa. Bernabeeri Jesu jiyaramiquishano pueya sequequiaari:

—Sauloori pa Jiyaniijia niqiquianu Damasco tiacaacua neteja nu-cuamaji. Jiyaniijiaari nata pocoojocanu. Sauloori cunora juhuajaniya pohuatariquiaa Jesujiniji Damasco tiacajinia.

²⁸ Sauloori narta Jesuucua tiuunaa pueyata jyojequiaari cuniquijia Jerusalén tiacajinia. Nojoritia rucanejojuaari, mariyata Jesujiniji pohuataja juhuajaniyari. ²⁹ Saulo pocuasacari, nojuajaari seetanujuanaa cumaacata pocuaquiaari Jiyaniijia Jesuucua na tiuushacari. Griego rupaa pocuanaa Judiocuacata pocoojoquiaariiri. Noojiaqueyari Saulota juayonuutaquiaari saaja. Nojoriiri socua na motunu paniquiaari. ³⁰ Jesuucua tiuunaa pueya jaara niishiquiaari naatej, nojoriiri Saulo jiyataquiaari Cesareya tiacajinia. Cuniquiji jiyarosaquiaari na raja Tarso tiacajiniaari.

³¹ Na nuhuaji, puetunu Judea jiyajinia Jesuucua tiuunaa pueyajanaari panaatia quiquiaari quenaaja, Samaria jiyajinia, Galilea jiyajiniano. Tamasacaari maja tari naquiya na miishaanu quijia. Nojoriiri socua Jiyaniijia tojtiajacara quiquiaari nojori pueretusacari nojori mariqui na tojiyashijara quiriohuari. Pueyaso Sohuanu naacusacari nojori, Pueyaso pueyari socua canequiaari queraatiara.

Pedro naatanishacari Eneas

³² Pedroori pueyaracaanu rucanejojua Jesuucua tiuunaa pueyacua, nojori na niishitiojonura socua Jesujiniji. Tamonu juuca nojuajaari Pueyaso pueya niquiniuucua quiaquiaari Lida tiacajiniajuhuaj. ³³ Tii quiriquiaari tamonu pueyano. Na sesa quiquiaari Eneas. Cuno pueyanoori cumatacuruhuana cusosu quijia. Tari na shocojoquiaari ocho marijia pootia na matasacari na matujinia. ³⁴ Pedroori cuno cusosu sequequiaari:

—Eneasnaa, ¡Jesucristo tari quia naatanirii! ¡Quia sanere! Quia matu quia jecare.

Eneasri ritia sanequiaari. ³⁵ Puetunu pueyajanaa Lida tiacajinia quiniaa, mariyata Sarón tiacajinijinio pueyajuhaj, puetunu nojorijianaari nio miishano niqiquiaari. Nojoriiri cunora tama na supuetanaa niishitiushano casaajaaja cartequiaari. Puetunu nojorijianaari Jesuucua tiuquiaari.

Dorcas samiitianishaanujiniji pohuatasano

³⁶ Jiyacarijuhuaj, Jope tiacajinia quiquiaari tamonu maaji. Na sesa quiquiaari Tabita. Tabitaari griego rupaajinia sequesano “Dorcas”. Dorcasri saniniuujia pueyano rupaajinia sequeshiyacujua “nequeru”. Cuno maajiiri Jesuucua tiuujia quiquiaari. Nojuajaari maninia miijia maaji quiquiaari. Casamiijuniucua pueya niqitiojojua nareja na jittiasano-jinijiiri. ³⁷ Na nuhuaji, Pedro quishacari Lida tiacajinia, Dorcasri cusoquiaari. Na cusonu nuhuaji, pueyari macu cuaqueya jeequequiaari. Na jeequetunu nuhuaji, nojoriiri na niaquiaari cuno tiajinia nataco, tamonu sohuacajinia. ³⁸ Jope tiacaari cateca quiya Lida tiacajiniji. Pedroori Lida tiacajinia quiriquiaajaa Dorcas shaajesacari. Jesuucua tiuunaa pueyari tari niishiriquiaa tee Pedro quiyani. Naaratej, caapiqui

pueyano jiyarotureeri Pedro na numootenura. Nojoriiri na jiyarosano caapiqui pueyano sequequiaari:

—Niocua naa Pedro sequesee: “Quia quiaarena ritia Jope tiacajinia. Majaari tarishiniu”.

³⁹ Pedroori nojoritia tacatequiaariuhua Jope tiacajiniuhua. Na tiuquishacari, quiniqui quiniaari Pedro tiuquiniquiaari macuucua sohuacamara. Mashiquiopueeri Pedro shocua rerejoquiaari na nujuquetunuta. Nojoriiri Pedro niqutijioquiaari Dorcas cusupuenuusano toqueya, cacojoquiyanio. Cunoori quiquiaari na cusupuenuusano saminio na quishacarijia. ⁴⁰ Pedroori jiyacari puetunujuanaa pueya tohuatanijioquiaari sohuacamaji. Na nuhuaji, nojuajaari mojoquetaquiaari Pueyaso na secojonura. Na secojonu nuhuaji, macuucua tacatereeri. Na sequereeri:

—¡Dorcasnaa, quia sanere!

Macuuri juhua na maquenujiniji niucuaquiaari. Na niquishacari Pedro, cajiriiri. ⁴¹ Pedroori na juaashiquiajiniji na quiaquiaari. Na nujatereeri. Na nuhuaji sequequiaari Jesuucua tiuuniaa pueyari, mashiquiopuenio:

—Miji pueyanaa, ¡nia nimia!

Nojori tiuquitasacari, saaja maaji niqutiushii nujuaanoori, tariucua saminio. ⁴² Pedro miishanoori puetunu Jope tiacajiniajanaa niishishaaquiaari. Queraatia pueyari cunora Jesuucua tiuquiaari. ⁴³ Pedroori na nuhuaji janiya camueenujuquiaarijiaara Jope tiacajinia. Nojuajaari Simón tiajinia quiriquiaa cuniqui na camueenujusacari. Nio Simónri piiquia casaata shoqueya majeetejojua quiquiaari, casaara shipinishocoriquiano shoquejiniji.

10

Pedro quiasacari Cornelio niqiniucua

¹ Cesareya tiacajinia quiquiaariiri tamonu tahue, Romano soldadohua jiyaniijia. Na sesa quiquiaari Cornelio. Na soldadohuari cien quiquiaari. Cuno soldadohua maanuuri sesojosaaquiaari “Italiano”. ² Cornelioori Pueyaso secojojua pueyano quiquiaari, mariyata puetunu na tiajinia quiniaatajanaanio. Nojuajaari seetanujuanaa Pueyaso shuqiritiniu panijia quiquiaari. Cornelioori queraatia na cumaneecajiniji niqutiojojua quiquiaari nareyajuhuj, casamiijiuniucua Judiocuaca niqutiojosocoriquiano. Pueyaso secojojua pueyaracaanuuri. ³ Tamonu juuca, tariucua pananu piriushacari, Cornelioori Pueyaso seru niquiquiaari juhua na maquenujinia nocua niyano na tiajinia. Na sequeseeri:

—Cornelionaa.

⁴ Cornelioori saaja Pueyaso seru shootiaquiaari na shiriiquiniutia. Na nuhuaji na riucuaereeri:

—¿Casaate jiyaniijianaa?

Pueyaso seruuri na sequeree:

—Pueyasoori quia secojosano tojiquiaa. Quia timitiaari capora quia quiniucua, quia jiiitiasanojiniji quia niqutiojosacari nareja casamiijiuniucua pueyara. ⁵ Naaratej, quia seya quia jiyaramiquiri Jope tiacajinia. Nojori cuara Simón masuunuucua quiaara. Na sesaari Pedrojuhuaj. ⁶ Nojuajaari na sesaanucua pueyano tiajinia quiya. Tia camaruuri shoque majeetejojua piiquiajinia. Cunoori na poonijiosano. Na tiaari

shoniniacu caminia casaqueyaji naniya. Simón Pedroori quia sequenu-taniya casaa quia miiniutianiyani Pueyaso jiyanooniuria quiajaniya.

⁷ Pueyaso seru jaara quiaquiaariuhua, Cornelioori caapiqui na seya-jinijinio piiquiaari, niqúiriyatu na soldadonio. Cuno soldadoori Pueyaso secojona quiquiaarijuhuaj. Maninia na jiyaniijia naacujua quiquiaari-jaariuhua. ⁸ Cornelio jiyarosaacarijia na seya, nojori pohuatatee co-teenuuri puetunu Pueyaso seru sequesanojuanaa nojuaja. Na nuhuaji, nojori jiyaramiquirii Jope tiacajiniaari.

⁹ Tariqui, Cornelio seya quiasacari nucuaco, nojori quenaacotusacari tari Jope tiacajiniara, Pedroori jiyacari tacaquiaari tia cacojiria, Pueyaso na secojonura. Pananu quishacari pa nacasuhuojuajinia quiquiaari jiyacari. ¹⁰ Nojuajaari jiyacari miaajeriquiaa. Neraari juucua sumatusaariquiaacuaja. Nera sumatusacarijia, Pueyasoori casaa na niquti-quiaari juhua na maquenujia, na quishacari tia cacojiria. ¹¹ Pedro niquishacari jiyocuacaanu, saaja jiya cajiniocua niqurii riateyanoori. Sonaque queraque niqurii tiji roshinitiahiyanoori, na nacatucujiniji morojotasanu. Pedroocua roshinitiasaareejanaari. ¹² Sonaque jini-acuma quiriquiaari puetunu casaajanaa: sacocua, jiyacua rucoojua-canio, jiyocuacaanu jaacuatujuacajuhua. Cuno casamiiri quiquiaari Judiocuaca pueresano casaa puetunujuanaa. Maja nojori miaquesano. ¹³ Jiyacaritij, Pedroori rupaa tojirii jiyocuacaanuji na sequeyano. Naa sequeriquiaari:

—¡Pedronaa, nocua quia sanere! Quia puecoore quia miaqueso-coriquiano.

¹⁴ Pedroori na riucuaaree:

—¡Maja cua Jiyaniijianaa! ¿Janiyatucua taa miaquere sacuaraatia cua miaquesooni? ¡Cunocuaajari tarijia quia sequesano canaa puereso-coriquiano!

¹⁵ Jiyocuacaanuji rupaari socua na sequerohua:

—Pedronaa, majaari miaquesocoriquiano Pueyaso jiyatesano soonu.

¹⁶ Pueyasoori naa pacutejoquiaari sequenu Pedrotej. Na nuhuaji, sona-queeri tacanitiasaaquiaariuhua jiyocuacaanu. ¹⁷ Pedro tacaashacari naa na niquniuucua juhua na maquenujinatej, jiyacari Cornelio jiyaramiquishano pueyari tia tohuateyaji tiuquiijioquiaari, Simón tia na pajetunura. Cornelio pueyari nequesoretariquiaa nucuacoji nojori tiuquiniuria Simón tiajinia. ¹⁸ Nojoriiri tohuateyaji nacaquiaari:

—¿Niya quiyate Simón jiyaniishano pueyano? Na sesaari Pedrojuhuaj.

¹⁹ Pedroori juhuanujuaja niishiriojoriquiaa na niquishanojiniji juhua na maquenujia tia cacojiria. Pueyaso Sohuanuuri jiyacari na se-queere:

—Pedronaa, jiuujianaraca pueya quia pajeya. ²⁰ Tariucujia. Quia sanerohua. Nojoriicua quia roseyarohua. Quiocua nojoritia quiaarohua-juhuaj. Majaari taacanuunu. Janiyacuajaari nojori jiyaramiquiriucuaa quiocuaní.

²¹ Pedroori Cornelio jiyarosano pueyacua rosequiaari. Nojori seque-seeri:

—Janiyacuaja nia pajesano pueyanoni. ¿Casaacua nia niyareecuarani?

²² Nojoriiri na riucuaaree:

—Canaa jiyaniijiaari Romano soldadohua jiyaniijia. Na sesa Cor-nelio. Nojuajaari canaa jiyarorucuaa quiocuaní. Maninia miijia

pueyanoori. Jiyaniijia Pueyaso tojjijajaariuhuj. Puetunu Judiocucajanaari maninia na miiniuucua na panitiuya. Pueyaso seruuri na sequerucuaa, nojuaja masuunura quiajaniya na tiajinia quia quianura, na tojiniuria puetunu quia sequesanojuanaa.

²³ Pedroori Cornelio pueya tiuquinitiaquiaari na quijia tiajinia. Nojori sequereeri:

—Niyaja nia maqueseajaara. Pocua tariqui quiaariquiani.

Jaara juhuaquequiaari, Pedroori nojoritia quiaquiaari. Nata quiojoquiaarijiaariuhua Jope tiacajinijinio Jesuucua tiuuniaa pueya.

²⁴ Tama tariqui saniniuujia, nojoriiri Cesareya tiacajinia tiuquijioquiaari. Cornelioori na tiajinia sashiriquiaa Pedro, puetunu na tiajinia quijiacatajanaa, queraatia na rupuenaatano. Cornelioori puetunu nio pueyajanaa masuquiaari, nojori rerejonura juhuacarijia na tiajinia Pedro tiuquiyaquishacarijia. ²⁵ Pedro tiuquishacari, Cornelioori nocua tohuataquiaari. Carijiniacuma na naacuseeri. Pedroocuara mojuquetaquiaariiri juhua Pueyasocuara. ²⁶ Pedroori saaja na sanaquiaari. Na sequereeri:

—¡Quia nujuare! Janiyari cayajuhuj, juhua quiajaniya.

²⁷ Tiaco na tiuquitasacari, pocoojoriquiaa Pedrotaari. Pedro tiuquishacari, saaja queraatia pueya niqishiiri. ²⁸ Pedroori nojori sequereeri:

—Taucuacanaa, niaacuajaari niishiya canaari Judiocucani. Judiocucaari rootasaquiaari maja canaa rupenura taucuaca, maja quenaaja tahue tiajinia canaa tiuquiniuriajuhuaj. Saniniuujia, Pueyasoori quiarijia cua niishitiorucuaa cutara maja cua soonura tamasaca. Taucuacaari maja sacuaraatia quiarijia quiria. ²⁹ Naaratej, cua niishishacari niaari cua masuurucuaa niyara, janiyari ritia canujiyarucaani cua taacanuyaquiniutia. Cua totureja, ¿casaara nia masuurucuaa janiyani?

³⁰ Cornelioori na riucuree:

—Cuatro juucaari tari shoconujiya. Janiyari jiyacari Pueyaso secoriquiaa juucua cua tiajiniani, pananu mueecosacari. Jiyacari-tij, pueyanoori cucua muetarucuaa. Jiyacaricuajaari quiriquiaa, tee pananu tiuyanijia. Cuno pueyano toqueeri shacantuque quiriquiaa.

³¹ Cua sequereeri: “Cornelionaa, Pueyasoori quia secojosano tojirii. Naajuhuj, niishiyari taa quia niquitiojoquiaa quia casami casamijiuucuan. ³² Naaratej, quia seya quia jiyaramiquiri Jope tiacajinia, cuara Simón masuunucua quiatuura. Na sesaari Pedrojuhuaj. Nojuajaari na sesaanucua tiajinia quia, shoniniacu caminia casaqueyaji. Tia camaruri piiquiajinia shoqueya majeetejonu poonijiojua. Simón Pedro jaara nimia quia tiajinia, quiata pocoojonutaniyari”. Pueyaso seruuri naa cua sequerucuaaqui Simónnaa. ³³ Janiyari jiyamitia ritia jiyarorucuaa cua seya Jope tiacajiniani, nojori pajenura tii quiajaniya. Quiaacuajaari maninia miirii cucua quia nishacari. Quiarijiani, puetunu pajaniyajaanaari niya Pueyaso niquiara quiyani. Naa quia pohuatare canaa tojishocoriquiano quiarijia, taa Pueyaso niishitiojorucuaa quiajaniya canaa quia pohuatanuracujani.

Pedro pohuatasacari Cornelio tiajinia

³⁴ Pedroori juhuacatecara pohuatanu coteequiaari. Sequereeri:

—Quiarijia niishiya seetanujuanaa cutaranijia, Pueyasoori maja rim-
 iajata na niquiniu pajaniya. Majaari nia jiyaniinu Pueyasoori saaja Ju-
 diocuacaacia jiaatiaa, Israel pueya nojori quiniuucua. Maja. Nojuajaari
 tamasaacia jiaatiaajuhuj. ³⁵ Tiquiyocua jiyacajinia Pueyaso seco-
 jojua pueya quishacari, nojoriiri Pueyaso jiyanooshano pueya quiya-
 juhuj, maninia miiijia nojori quishacari. ³⁶ Pueyasoori na rupaa pohu-
 ataniquiaari puetunu canaa Israel pueyarajanaa, jiyanooshano canaa
 quiniuria Jesucristoocua canaa tiuushacari. Nio Jesucristoori puetunu
 mijiria quiniaa Camarnujuanaa. ³⁷ Tiuquinijiona Juanri Pueyaso rupaa
 pohuataquiaari pueya tiuquinijosaanura. Na nuhuaji, Jesuuri cutara
 miishano miiniu coteequiaari Pueyaso cumaacata. Niaari tari niishiy-
 acuaja na miishano canaa Galilea jiyajinia, na nuhuaji na miishano
 puetunu Judea jiyajiniajanaanio. ³⁸ Niaari niishiyajuhuj, Pueyasoori
 na Sohuanu niquitioquiaari Jesu, na cumaaca na jiiitanura. Nojuajaari
 maninia miiiquiaari pueya, tiquiyocua na rucuanesacari. Cusosuhua
 naatanijiojuaari. Samaruhua camarnu sesosano jeecaquiaarijiaari-
 uhuaj. Puetunu naa miiijia maniniajanaari na Que Pueyaso quini-
 uucua nata. ³⁹ Canaari puetunu na miishanojuanaa niquiquiaarini,
 puetunu canaa Judiocuaca jiyajiniajanaa, Jerusalén tiacajiniajuhuj.
 Janiyari seetanujuanaa canaa niquishano pohuataani. Na nuhuaji,
 pueyari na teetequiaari niyacutesanojinia. Tii na cusojuatuquiaari-
 iri. ⁴⁰ Jiuujianaraca juucajinia, Pueyasoori na samiitianiquiaariuhua.
 Jiyacaritij, na saquiriojosano pueyacua na mueratereeri. ⁴¹ Majaari
 na muetanu quiquiaari puetunu pueyacujanaa. Saaja canaacua
 muetaquiaariiri, teyano Pueyaso saquiriojoquiaari coteenu tariucua-
 caanucujani, Jesujiniji pohuatanuuriquiano. Na samiitiasacariuhua,
 canaari nata miaquenuquiaari mariyatani. Canaari nata raruquiaar-
 ijuhuaj. ⁴² Jesu jaara canaa jiyaramiquiquiaari, nojuajaari canaa se-
 quequiaari: “Naa nia pohuatare pueya niquiara: ‘Pueyasoori Jesu jiy-
 atequiaari puetunu mijiria quiniaa nequesoreenarajanaa, macunucua
 nequesoreeriquianojuhuj’”. ⁴³ Tariucuacaanu pueyara Pueyaso se-
 quesano caminiujiuniaari naa juhuacarijia sequetuquiaari Jesujinijiji-
 uhuj: “Cante nocua tiuyani, nojuajaari jiyanooshaanutaniya sesa na
 miishanojiniji”.

Pueyaso Sohuanu tiuquishacari taucuaca jiuujiajiniajuhuj

⁴⁴ Pedro pohuatasacarijia taucuaca niquiara, Pueyaso Sohuanu-
 uri Pedro tojitianaa taucuacaacia niquiaari, nojori jiuujiajinia na
 tiuquiniuria. ⁴⁵ Pueyasoocua tiuuniaa Judiucacani, Pedrota ni-
 jioquiaari Jope tiacajinijini, nojoriiri shiriiquiquiaari Pueyaso niq-
 uitiosacari cuno taucuaca na Sohuanu. ⁴⁶ Cuno taucuacaari no-
 jori niquiara pocooriquiaa tamaatia rupaacajinia. Pueyaso manini-
 uhuaqueetaturiquiaari. ⁴⁷ Naaratej, Pedroori sequequiaari:

—Nio pueyari tari jiiitaa Pueyaso Sohuanu noojiajinia, taa pa jii-
 aacuaani. Naaratej, nojori cu meta tiuquinijosaaaria quiarijia. ¿Cantucua
 nojori tenujura maja na tiuquinijosaanurani?

⁴⁸ Pedroori na nuhuaji sequequiaari cuno taucuaca tiuquinijosaa-
 nura Jesucristo sesajinia, nojori tiuushacari nocua. Na nuhuaji, Corne-
 lioori Pedro sequequiaari:

—Niyaja quia camueenujurejaara canaata. Maja senota quianuhua.

11

Taucuacajiniji Pedro pohuatasacari Jerusalén tiacajinia

¹ Jesu jiyaramiquishano pueya, mariyata puetunu Jesuucua tiuniaa pueyajanaa Judea jiyajinia, nojoriiri naa pohuatasaaquiaariti: “Taucuacanaari Pueyaso rupaacua tiuuriucuaajuhuj”. ² Nocujaji, Pedro jaara tacatequiaariuhua Jerusalén tiacajiniuhua, narta Pueyaso pueyari na juaaquiariuhua. Na juaaniaari taucuaca cararaatiuuquia cō miatejonu panijiaa quiquiaari, taucuaca quiniuria seetanujanaa Pueyaso pueya nojoriria. ³ Nojoriiri naa juaaquiari Pedro:

—¿Casaara quia quiaarucuaa cuno taucuacaacuani? Nojoriiri maja Judiocuaca juhua pajaniya. ¡Quiaanaari nojoritia miaquejocanujuhuj! Quia miishanoori maja maninia taa Pueyaso rootaquiari tariucuaacuanucujani.

⁴ Pedroori suraatiaja nojori pohuataquiari puetunujanaa tahujiniji. Coteenu pohuataree na niquishano juhua na maquenujiniaari. Naa sequereeri:

⁵ —Jope tiacajinia cua quishacari, janiyari panacari secojoriquiaani. Janiyari jiyacari juhua cua maquenujinia sonaque na nacatucujiniji morojotasano niqiriini. Jiyareta cucujanaa roshinitiasaareeri. ⁶ Cua niquishacari sonaquejinia cua niishiniuria casaate mii quiriquiaani, janiyari saa puereeta casami niquiriijaani. Janiyari niqiriini jiyacua rucojuaca, sacocuajuhuj, jiyocuacaanu jaacuatujacanio. Puetunujanaari pa miaquesocoriquiano pa pueresano casaa quiriquiaa. ⁷ Janiyari jiyacari jiyocuacaanuji rupaa tojiriini. Cua sequereeri: “Pedronaa, nocua quia sanere. Quia puecoore quia miaquesocoriquiano”. ⁸ Janiyari saaja na riucuaareeni: “¡Maja cua Jiyaniijiana! ¿Janiyatucua taa miaquere sacuaraatia cua miaquesooni?”

⁹ Jiyocuacaanuji rupaari socua cua sequerohuani: “Pedronaa, majaari miaquesocoriquiano Pueyaso jiyatesano soonu”. ¹⁰ Pueyasoori naa pacutejocanu sequenu juucua janiyatej. Na nuhuaji, sonaque tacanitiarohua jiyocuacaanuuri. ¹¹ Jiyacaritij, jiuujianaraca canuuri cua quijia tiajinia tiuquishii. Nojoriiri Cesareya tiacajiniji jiyaramiquishano quiquianu, na pajenuunura janiya. ¹² Nojori tiuquiyaquishacarijia, Pueyaso Sohuanuuri cua sequeree: “Quiocua nojoritia quiaare. Majaari taacanuunu. Majaari tahua soonu nojori quia rupesacari”. Naa cua tojiniucuatej, janiyari cunora juhuajaniya nojoritia quiaarucuaani. Nio seis parta Jesuucua tiuniaa pueyari cuata quiojijarucuaajuhuj. Canaari mariyata cuno tahua tiajinia tiuquishiini. ¹³ Tia camaruuri canaa pohuatarucuaa taa na niquiquianu Pueyaso seru na tiajinia nocua nujuaanoni. Pueyaso serunaari na sequeree: “Jope tiacajinia quia jiyarore quia seya, nojori cuara quiaara Simón masuunuucua. Na sesaari Pedrojuhuj. ¹⁴ Nojuajaari quia sequenutaniya taate quia naata jiyanooshano quiniuni, Pueyaso pueyano quia quiniuria, puetunu quia tiajinia quiniaajuhuj”. ¹⁵ Saaja cua coteesacari Pueyaso rupaa pohuatanu nojori niqiara, Pueyaso Sohuanuuri nojoriicua niquianu, taa pocua coteenujanaa na niquianucujani. ¹⁶ Janiyari jiyacari niishiquii pa Jiyaniija sequesaroni. Naa na sequesanotej: “Juanri moojinia tiuquinijia pueya. Pueyaso cutaraari na Sohuanu jiyaronutaniya niaacua, nioojiajinia na tiuquiniuria”. ¹⁷ Naacuajitij, taucuaca tiushacari pa Jiyaniijaacua, Pueyasoori na Sohuanu niqitiorucuaa

nojorijihuaaj, taa na niqutiocanu pajaniyacuaani. Cante Jesucristoocua tiuyani, Pueyasoori na Sohuanu na niqutioya. ¿Janiyatucua taa Pueyaso sequereruhuarini: “Maja cuno pojori niqutionu quia Sohuanu”?

¹⁸ Jerusalén tiacajinia quiniaa Pueyaso pueya jaara tojiqiaari naa Pedro sequesantej, nojoriiri sanaajetaqiaari. Tama nojorijiaarijia Pueyaso maniniuhuaqueetaqiaari. Naa sequetuqiaariiri:

—¡Pueyasojuhuanaja jiyanohua maninia! Nojuajaari taucua paniyahuhuaaj nojori tacatonura noojia sesa nojori miishanojiniji, jiyanooshano nojori quiniuriajuhuaaj, pueyaracaanu nojori rishiniuria Pueyasota.

Antioquiya tiacajinia Jesu pueyajiniji pohuatasano

¹⁹ Esteban jaara mosaaquiaaricuaa, Judiocuacaari juhuacatecara Jesuucua tiuninaa miiqiaari naquiyajuhuaaj. Queraatia Jesuucua tiuninaa pueyari nocuaji mashiyocuatqiaari. Nojoriiri tiqiyocua niaquejoqiaari. Noojiaqueyari na mashiyocuatqiaari tiuquiiioqiaari Fenicia jiyajinia. Tamasacaari tiuquiiioqiaari Chipre jiyajinia. Noojiaqueyari Antioquiya tiacajinia tiuquiiioqiaarijuhuaaj. Nojoriiri tii pohuatanuuqiaari Pueyaso rupaa Jesujiniji saa Judiocuacaraja, maja taucucara. ²⁰ Mashiyocuatunaa tajinia quiquiaariiri Chipre jiyajininio pueya, Cirene tiacajininio pueyajuhuaaj. Nio pueya jaara tiuquiiioqiaari Antioquiya tiacajinia, nojoriiri Jesujiniji pohuataqiaari Griegohua niqiarajuhuaaj. ²¹ Jiyaniijia Jesu cumaacaari nojoritia quiquiaarijuhuaaj. Naacuajitij, queraatia Griegohuari tariucuaaanu tama nojori niishishanojuaaja carteqiaari, Jiyaniijia Jesu tojijia nojori quiniuria.

²² Jerusalén tiacajinia quiniaa Pueyaso pueya jaara nio niishiqaari, nojoriiri Bernabé jiyarotuqiaari Antioquiya tiacajinia. ²³ Bernabé jaara tiuquiquaari nojoriicua, nojuajaari jiyanohua shuquiriquaari na niqishacari taa Pueyaso miiriucuaa maninia cuno Griegohuani, nocua nojori tiuushacari. Naaratej, nojuajaari naa rootaqiaari nojori:

—Pa Jiyaniijiaacua nia tiuuri pueyaracaanu. Majaari nocua tiuuniu nia cartenu. Suraatia na tojijia nia quiri.

²⁴ Bernabeeri jiyanohua maninia pueyano quiquaari. Pueyaso Sohuanuuri noojia cumaquiquaari jiyanohua. Naacuajitij, na pohuatasacari Jesujiniji, queraatia pueyari Jiyaniijiaacua tiuquiquaari.

²⁵ Na nuhujia, Bernabeeri Tarso tiacajinia quiaquiquaari Saulo pajenucua. Jaara na riuriataqiaari, na jiyataqiaari Antioquiya tiacajiniaari. ²⁶ Nojori quishacari Pueyaso pueyata cuno tiacajinia, nojoriiri tii shocoteqiaari niqiriyatu marijia. Nojoriiri queraatia Pueyaso pueya niishitijonuuqiaari. Tii Antioquiya tiacajiniani, Jesuucua tiuninaa pueyari coteenu sesojosaquiquaari “Cristiano”. Nioori pueyano rupajinia sequeshiya “Cristo tojiniaa pueya”.

²⁷ Cuno quishacari, Jerusalén tiacajiniji Pueyaso sequenu panishano caminiujuuninaa pueyari tiuquiiioqiaari Antioquiya tiacajinia. ²⁸ Tamonu nojorijinijinioni, na sesa quiquaari Ágabo. Nojuajaari Jesuucua tiuninaa pueya rerejonaa tajiniji nujuaqiaari pocuanura. Naa caminiujuquiquaari Pueyaso Sohuanu niishitiosano nojuajaari:

—¡Pueyanaa, puetunu pa jiyacajiniajanaani, miaajenuuri quiniutianiya!

Seetanujuanaa sequequiaariiri Ágabo. Cuno miaajenuuri quiquiaari Claudio quishacari jiyaniijajanaa, Césartuhuj. Nojuajaari Roma tiacajiniji jiitiaquiaari puetunu jiyacajanaa. ²⁹ Antioquiya tiacajinia quiniaa Pueyaso pueya tojishacari naa Ágabo sequesantej, nojoriiri sequequiaari:

—¡Judea jiyajinia quiniaa parta Pueyaso pueya pa naacure!

Nojoriiri naa miiquiaari. Naaratej, cante queraatia cumaneeca jiitaaquiaarini, nojoriiri queraatia niqutioquiaari. Saniniuujia, cante maja puera cumaneecaraca quiquiaarini, nojoriiri secaja niqutioquiaari na jiitiasanojiniji. ³⁰ Na nuhuaji, nojoriiri nareja na niqutiojosano cumaneeca jiyarotaquiaari Bernabeeta, Saulotanio. Nojoriiri Pueyaso pueya jiitianaa niqutioquiaari saniniuujia Judea jiyajinia.

12

Jacobo nacatasaanujiniji pohuatasano, Pedro nujuatesaanujinijinio

¹ Jiyacaritij, Herodesri jiyaniijia quiquiaari Judea jiyajinia. Nojuajaari Jesucua tiuunaa miiquiaari naquiya. Noojiaqueya quiotequiaari na saniitiosocoriquiano nujuatejojuajiniaari. ² Naa Juan tarajanu Santiago motequiaaricuaajaari nijiniaquetucujia mueruuta. ³ Judiocuacaari shuquiriquiaari naa nojori jiyaniijia motesacari Santiagotej. Naaratej, Herodesri Pedro quiatequiaari na soldadohuajuhuj, Judiocuaca timitianura socua nojuaja. Pedroori quiasaaquiaari Judiocuaca queranacunuusacari, nojori sasacari pan na poretajaaju majeetesano. ⁴ Pedro quiasaanu nuhuaji, Herodesri na nujuatequiaari nujuatejojuajinia. Na tohuatenu paniriquiohua juucua Pascua nuhuajiiri, na nequesoresocoriquiano puetunu quiniqui quiniaa Judiocuaca niquiarajanaa. Dieciséis soldadohuari Pedro cojuariquiaa pueyaracaanu. Nocua sanitijiootooquiaariiri; coteenu cuatro, na nuhuaji socua cuatro. Nojoriiri naa sanitijiootooquiaaritij. ⁵ Pedroori maninia cojuasaaquiaari nujuatejojuajinia. Jiyacaritij, Jesucua tiuunaa pueyari saniniuujia nocuara secojonuuriquiaa jiyanohua, Pueyaso naacunura Pedro.

Pueyaso mashiquishacari Pedro nujuatejojuajiniji

⁶ Cuno niucujani, na juhuaqueyaquishacarijia, quera Herodes tohuatesee tariquicuaji Pedroni, na nequesoresocoriquiano puetunu pueya niquiarajanaa. Pedroori caapiqui soldadohua tajiniocoma maqueriquiaa, maninia saatijiotasano cumayocuata na numatucua cajiniocua. Tamasaca soldadohuari nujuatejojuaja tohuateyaji cojuariquiaacujua. ⁷ Jiyacaritij, Pueyaso seruuri canashiyaquiji coretaquiaari jiyareta Pedro shuriucujajanaa nujuatejojuaja jiniacuma. Na shacantuucari jiyanohua cuhuataquiaari nujuatejojuaja. Pueyaso seruuri Pedro jiuuquirii na shuucujia. Na niucujareeri. Na niucuasacari, na sequereeri:

—¡Ritia quia sanere!

Cumayocuari tamajaaja saacarejetaquiaari Pedro numatucuaacujia. ⁸ Pueyaso seruuri na sequereehujuhuj:

—¡Quia cajiniocua camarucujua quia saatiri socua! ¡Quia sapatu quia cushirijuhuj!

Pedro jaara naa miiquiaari puetunu na sequesanojuanaa, Pueyaso seruuri socua na sequerohua:

—¡Quia toque quia cushiri ritia! Majaari tarishiniu. ¡Quiocua cua nuhuaji rupaashijia!

⁹ Pedroori ritia Pueyaso seru nuhuaji sacuariquiaajaa. Jiyano hua jiyajeneriquiaari. Majaari na niishiniu quiriquiaa puetunu na niquishanojuanaa. Nojuajaari jyaniriquiaa na maquenujinia niquiya naasucua. ¹⁰ Nojoriiri coteenu shocoma na tajoji cojuanaa soldadohua. Socua na tajoji cojuanaa tajitiumiaajaariuhuj. Naa quenaacoturee nujuatejojua tohuateyajiiri. Nojuajaari Pueyaso seruta nujuatusee jiyareta tohuateyaji. Tohuateyari cumueeca casaata shipinishano quiquiaari. Jiyacaritij, tohuateyari tamajaaja riatequee. Nojoriiri tohuareetamaa carijiniacuma. Pueyaso seruuri Pedro jiyatariquiaa sapuenujaara tiaca jiuujiaaco. Na nuhuaji, na shuriucujaji shaajequeeri. ¹¹ Pedroori jiyacari shusha niishiquii. Naa sequereeri:

—¡Seetanujuaanaaqui quiriquiaa! ¡Cua Jiyaniijiaquiiri na seru jiyaroree cucua, na mashiquiniuria janiya Herodescujaji, cuarta Judiocuacaacua-jijiuhuaj! Naa na jiyaroreeri maja cua miishaanura taa nojori niishiriojoriquiaa na miiniuria juucua janiyani.

¹² Nojuajaari naa na niishiriojonuta María tiajinia quiaquiaari. Nio Mariacuajaari tamonu Juan nucua. Cuno Juan sesaari Marcojuhuaj. Cuno tiajinia, queraatia Pueyaso pueyari Pedrocuara tii secojonuuriquiaa jiyacari. ¹³ Pedroori jiyacari piquiquiaari carijiniacuma mataca tohuateyaji. Tiaco seruuri na tojiquiaari piquiyano. Nio seru sesaari quiquiaari Rode, niyacoo. Nojuajaari juucua catecanoquiaari tohuateyaji, na niquiniuria cante quiriquiaani. ¹⁴ Nojuajaari saaja Pedro tojishii tia camaru jyaniquiyano, na tiotiu na riatanura nocujaji. Niyacoo tojishacari seetanujuaana Pedro rupaa, majaari tiotiu na riatanu quiquiaari na shuquiriniutia. Saaja netequiaariuhua tiaco quiniaa numootenuraari. Nojori sequesuhuari:

—¡Pedrocuajaqui nooj, tohuateyaji nujuaatej!

¹⁵ Pueyari saa niyacoo riucuaquiaarijia:

—¿Quiaate paateya? Teyano Pedrote nujuatesaarucuaacujani.

Niyacoori nojori sequenu pacutequiaariuhua:

—¡Taaquiririnij! ¡Pedrocuaaquinatejaj, nooj nujuaatej!

Pueyari saaja sequequiaari:

—Maja nojuaja. Pedro cojuana Pueyaso seru naasucuaajaja.

¹⁶ Nojori nacojosacari tiaco, Pedroori tohuateyaji piquijioriquiaajaa. Tiotiu jaara socua riatasaaquiaari, nojuacuajaari quiriquiaa. Pueyari na niquishacari shiriiquitiuquiaari. ¹⁷ Pedroori nojori sanaajaree jiyacari na juashiquiata. Cuniqii quiniaa pohuatareeri taa Pueyaso tohuaterohua nojuaja nujuatejojuaajiniini. Pedroori naa sequequiaari nojoritij:

—Niocua naa pohuatare Santiagojuhuaj, parta Jesuucua tiuuniaanio.

Na nuhuaji, Pedroori tiji tohuatacuhua. Tamaqui quiaareeri.

¹⁸ Jaara juhuaquequiaari, nujuatejojuaajinia cojuanaa soldadohuari jyanohua shiriiquitiuquiaari. Majaari nojori niishiniu quiquiaari taa Pedro miirii nujuatejojuaajiniini nojori tajiniini. Tama nojoriijaarijia naa sequetuquiaari na puerenuta:

—¡Pa jiyaniijia Herodesri quiarijia pa puecoonutaniya, maninia pa cojuaaquiniucua Pedro!

¹⁹Herodes niishishacari, na shuriucua nujuatunaa soldadohua jiyaroquiaari nijuatejojuajinia nojori pajenura Pedro. Nojori jaara na riuri-ataaquiuaari, Herodesri nujuatejojuajinia Pedro cojuanaa soldadohua nequesoreequiaari na juaaniutia, na niishiniuria juucua taa Pedro juurequere nojori shuriucuaajini. Na nuhuaji, Herodesri jiyanoehua na juaaniutia na shuriucua nujuatunaa soldadohua sequequiaari, nojori puecoonura narta soldadohua, nojori cojuaaquiniucua maninia Pedro nujuatejojuajinia. Naa na miiniu nuhuajitij, Herodesri Judea jiyajiniji pacuquiaari. Cesareya tiacajinia quishiiri.

Herodes shaajenujiniji pohuatasano

²⁰Jiyacaritij, Herodesri jiyanoehua juaariquiaa Tiro tiacajinia quiniaa pueyata, Sidón tiacajinia quiniaatano. Nio caapiqui tiacajinijinio pueyari jiyaniijia Herodes tiacajinia quiojoquiaari nata nojori pocoojonura juucua. Majaari cuno juuca nojori pocoojonu quirii jiyaniijia Herodesta. Nocuaji, nojoriiri Herodes seru sequere:

—Quiocua quia jiyaniijia sequere, canaa nata jiyanoootoonu paniyani.

Cuno Herodes seru sesaari quiquiaari Blasto. Nojuajaari na jiyaniijia panishano quiquiaari. Na jiyaniijia maqueja cojuana quiquiaarijiaariuhuj. Tiro tiacajiniji pueya, mariyata Sidón tiacajinijinio, nojoriiri na cumaneecata masetujua na miaquesocoriquiano jiyaniijia Herodes jiiatasano pueyajiniji. Nojoriiri jiyamitia jecatoonu paniriquiaa cuno jiyaniijiaata, maninia nojori quiniuhua nata, Herodes niqutiojotenuhuara na jiiatasano pueya na miajajaura Sidón tiacajinijinio pueya, Tiro tiacajinijinio pueyano. ²¹Herodes seruuri nojori sequequiaariuhua:

—Niocuaana tamonu juuca nimia, jiyaniijiaata nia pocoojonura.

Na nuhuaji, cuno pueyari na sequesano juucajinia niqiaariuhua. Jiyaniijia Herodesri nojoriicuaaji maniniushiquiaari. Na maniniuqui toque cushiquiaariiri. Jiyaniijiaacuajinio shipinishano cajitijunia cajiriohuari. Tiji pocuaquiaari cuno pueyacuuaari. ²²Puetunu cuniqui quiniaa pueya tojishacari naa maninia Herodes pocuaano nojori niquiaratej, nojoriiri nacoonu coteequiaari. Naa sequetuquiaari na nacoosacariiri:

—¡Nio pueyano pocuaani, majaari nareja pueyano! ¡Nojuajaqui Pueyaso!

²³Pueya sequesacari naa Herodestej, nojuajaari juhua shuquiuriosaaquiaari saajaruhua. Majaari quenaaja cuno pueya na sequenu quirii: “Maja naa cua sequetunutej. Janiya maja Pueyasoni”. Nocuaji, Pueyaso seruuri canashiyaquiji na tojetequiaari. Na pocuasacarijia cusomaari. Na sarapiyari na jiniacuma miaquequiaari. Naa cusotaquiaari tama na sarapiyajaarijia.

²⁴Pueyaso rupaari saniniuujia socua niyacasaquiaari, tiquiyocua pohuatasacari puetunu pueya niquiarajanaa. Naacuajitij, Pueyasocua tiuuniaa pueyari socua queraatiara canequiaarijihuaj. ²⁵Bernabé, Saulonio, nojori jaara niqutioquiaari cumaneeca Jerusalén tiacajinia Pueyaso pueya jiiatanaa, nojoriiri ritia quiojoquiaariuhua Antioquiya tiacajiniohua. Nojoriiri jiyacari Jerusalén tiacajiniji riquiaariuhua Juan. Juan sesaari quiquiaarijihuaj Marco.

13

Saulo Bernabeeta rucuanefonu cotelesacari Jesujiniji pohuatanura tiqiyocua

¹ Antioquiya tiacajinia Jesuucua tiuuniaa pueyajinijinioni, noojiaqueyari quiquiaari Pueyaso sequenu panishano Pueyaso pueyara caminiujiuniaa. Quiquiaarijaariuhua Pueyaso Rupaa niishitiojona. Nioori nojori sesaca: Bernabé; Simónnio, na sesa tarajanu quiquiaari Negro; Lucionio. Nojuajaari Cirene tiacajinijinio pueyano. Quiquiaarijaariuhua Manaén. Nojuajaari mariyata Galilea jiyajinia jiyaniijiarano Herodesta canashitijosaaquiaari. Quiquiaarijaariuhua Saulo. ² Tamonu juuca, puetunu nojorijianaari Pueyaso secojonuuriquiaa. Cuno juucajuhuaj, majaari nojori miaquenuunu quiriquiaa socua na secojonunura Pueyaso. Jiyacaritij, Pueyaso Sohuanuuri nojori sequequiaari:

—Bernabé Saulonio, nojori nia jiyatere cua panishano miiriquiano, taa cua sequequiaari tariucuaaanucujani.

³ Nojoriiri jiyacari socua maja na miaquenuunu quiquiaari. Saaja Pueyaso secojonuuriquiaa socua jiyanohuari. Na secojonuunu nuhuaji, nojoriiri Bernabé nacaacua, mariyata Saulo nacaacua niatuquiaari na juaashiquiaca. Nojoriiri naa miishaaquiaari nojori jiyatesaanura Pueyaso jiyaramiquishano pueyara, Pueyaso rupaa pohuatanuuriquiano jiyanohua Pueyaso Sohuanu cumaacata.

Jesujiniji pohuatasacari Chipre jiyajinia

⁴ Pueyaso Sohuanu jiyaramiquishano Bernabé, Saulonio, nojoriiri cuniquiji janiya quiaquiaarijaara nucuaco Seleucia tiacajiniara, shoniacu caminia casaqueyaji. Nojoriiri cuniquiji quiaquiaari puereetuca buquejinia Chipre jiyaniishano jiyajiniara. Chipre jiyari jiya tucuaatija, shoniacu caminia jiuujajinia. ⁵ Nojori tiuquijiosacari Salamina tiaca tacatajajiniji, tii Pueyaso rupaa pohuatanuunu coteequiaari puetunu cuniqui quiniaa Judiocuaca secojojuaca tiajinaqueyajanaari. Juanri nojoritia quiriquiaajuhua, nojori naacuriquiano. ⁶ Naa nojori rucojosacari Pueyaso rupaa pohuatanura Chipre jiya tucuaatijaacuatej, socua tiuquijioseequiaari Pafos tiacajiniaari Chipre tamajiria. Nojoriiri tii riuriataquiaari shimiacu, narta Judio pueyano. Na sesa quiquiaari Barjesús. Nojuajaari cuniqui quiniaa sapojoquiaari naatej: “Janiyacujaja Pueyaso sequenu panishano caminiujiunia pajaniyarani”.

⁷ Cuno shimiacuuri pueyaracaanu Sergio Paulota quiquiaari. Sergio Pauloori Chipre jiya jiyaniijia quiquiaari. Cuno jiyaniijiaari jiyanohua niishijia quiquiaari. Nojuajaari Bernabé masuuquiaari Saulonio, nojori pohuatanura Pueyaso rupaa nojuaja. ⁸ Cuno shimiacu sesaari Griego rupaajinia sequesaaquiaari Elimas. Nojuajaari saaja cuno jiyaniijia niqiara cuaracashitiquiaari Pueyaso rupaa. Naa sequeree cuno jiyaniijiaari:

—Maja cuno pojori tojinu. Jiyanohua sesaari nojori pohuatasano. Quia sapojotiuvano.

⁹ Saulo sesaari Pablo quiquiaarijuhua. Jiyacari, Pueyaso Sohuanu cumaquishacari nojuaja, Pabloori jiyanohua shitimia shimiacu jiquioco shootiaree naa na sequesacari nojuaja:

¹⁰ — ¡Sesaaca niyanu sequenaa! ¡Maninia miijiaca paracaajanaa! ¿Casaara pueya quia tenujiya Pueyasooquajini? ¹¹ ¡Cua Jiyaniijaari quiar-
ijia quia saniitionutaniya! ¡Quiaari cariyojuarura quiniutianiya seetanu-
juanaa! ¡Quiaari pasaja tarishiniutianiya cariyojuaru quia quishacari!

Jiyacaritij, juhua niniquiaari na namijajinia cajimiaa. Cariyojuarura
quiquiiri. Juhua ninishiQUI quiaquejoquiaari puetunu cunocojuanaari,
na juaashiquiajiniji na jaatucusaanura juucua. ¹² Cuno jiyaniija jaara
naa niquiquiaaritij, Pueyasooqua tiuuriiri na niquiara nojori pohn-
atasacari shanohua Jiyaniija Jesujiniji.

Pablo, Bernabé quishacari Antioquiya tiacajinia, Pisidia jiyajinia

¹³ Pabloori na cojiniaata Pafos tiacajiniji quiaquiaari buquejinia Perge
tiacajiniara, Panfilia jiyajinia. Juanri Perge tiacajinia catesequiaari
nojoriicuaji. Tiji riujuuquiaariuhua Jerusalén tiacajiniohuari. ¹⁴ Na
nuhuaji, Pabloori Bernabeeta Perge tiacajiniji quiaquiaari Antioquiya
tiacajinia. Antioquiya tiacaari Pisidia jiyajinia. Tii nojori quishacari,
nojoriiri samaatenu juuca quiaquiaari narta Judiocuaca secojonuujua
tiajinia. Na tiuquishacari, cajitiushiiri. ¹⁵ Jiyacaritij, tariucuacaanu
Moisés Rootasanoori serojosaaquiaari. Tariucuacaanu Pueyaso se-
quesano caminiujiuniaa naajiotasanoori serojosaaquiaarijuhuaj. Na
nuhuaji, rerejovia tia camarnuuri naa sequequiaari Pablo, Bernabee-
nio:

—Cuarta Judiocuacanaa, niaa jaara Pueyasojiniji nia niishishano
casaa sequenu paniri, nia niishitiojore quiarijia niya quiniaa niquiara.

¹⁶ Pabloori sanequiaari. Na juaashiquiata sanaajaree pueyari. Naa
nojori sequereeri:

—Nia tojitiare cuarta Israel pueyanaa, niajanijajuahuaj, canapue-
te Pueyaso tojitiajacacuajani tamasa pueyapuejinijinio. ¹⁷ Paari se-
quequiaani: “Pueyasoori pa Jiyaniija, Israel pueya pa quiniu-
cua”. Seetanujuanaa, paacuajaari Pueyaso saquiriojosano pueyacu-
jinioni. Tariucuacaanu, Pueyasoori maniniushiQUIARI pa supuetanaa
saquiriojoquiaari na pueyara quiriQUIANO. Na nuhuaji, jiyano-
hua pa supuetanaa caneteQUIARIiri Egipto jiyajinia nojori quishacari. Na
nuhuaji, Pueyasoori nojori mashiQUIQUIARI cuno jiyajiniji na cumaa-
cata. ¹⁸ Cuarenta marijaari pa supuetanaa shoconujuQUIARI pueyara-
caanu nojori rucojosacari najuhuaa cariQUIA jiyajinia. Pueyasoori
jiyacari nojori rejeretaQUIARI na tojitiaQUIASHACARI nojuaja. ¹⁹ Na
nuhuaji, Pueyaso cumaacata, siete tamaatiuucua rupaa pocuajaca tau-
cuacaari puecoosaaQUIARI Canaán jiyajiniji, saniniuujia cuno jiya na
niquitiosocoriQUIANO pa supuetanaa. ²⁰ Pa supuetanaa jaara Canaán
jiya camaruhua quiquiari tari, socua cuatrociento cincuenta mar-
ijiaari nojori shoconujuQUIARI saaja nequesoreenaa jiiTiasacari no-
jori. Na nuhuaji Samuelri nojori nequesoreenara jiyatesaaQUIARI-
juhuaj. Nojuajaari Pueyaso sequesano caminiujiunia quiquiarijuhuaj.
²¹ Samuel quishacarija, pa supuetanaari Pueyaso secojonuuQUIARI
na panitiushacari jiyaniija, nojori jiiTiariquiano nequesoreenaa niti.
Naacuajitij, Pueyasoori nojori jiyaniijia jiyateQUIARI Saúl, Cis niyanu,
supuetana Benjamín niQUIOHUACUAJINIO supueno pueyano. Saúlri
nareja cuarenta marija shocotejoQUIARI pa supuetanaa jiyaniija na
quishacari. ²² Na nuhuaji, Pueyasoori Saúl soojotaQUIARIuhua Saúl to-
jiyaquiniuucua nojuaja. Saúl niti David jiyateQUIARIuhua Israel pueya

jiyaniijjara saniniuuriija. Pueyasoori naa sequequiaari Davidjiniji, na timitiasacari nojuaja:

“Isaí niyanu Davidcuajaari cua shuquiuriojua. Nojuajaari cua panishano pueyano. Nojuajaari puetunu cua panishano miiniutianiyajanaa”.

²³ Quiari naataja, Pueyasoori na sequesano tohuateequiaari na mueratesacari pocuaji Tacuna. Nojuajaari Jesu, David niquiohuacua-jinio supuenoni. Pueyasoori na seerataquiaari Israel pueyacuaaji Tacuna quiriquiano, taa na sequequiaari tariucuacaanucujani. ²⁴ Jesu coteyaquishacarijia rucuanenu na Quejiniji pohuatanura, Tiuquinijiona Juanri coteenu nocuaji pohuataquiaari Pueyasojiniji puetunu Israel pueya niquiarajanaa. Tiuquinijiona Juanri nojori sequequiaari noojia nojori tacatonuhua Pueyasooqua, naajuhuj, moojinia nojori tiuquinijiosaanura, Pueyaso tojjijara nojori quiniuria. ²⁵ Quera Tiuquinijiona Juan shaajesacari, nojuajaari naa sequequiaari: “Janiyari maja Pueyaso Jiyarosanoni taa nia jiyaniquiaa najuhua janiyacua-jani. Na Jiyaroso cutaraari cua nuhuaji niniutianiya. Nojuajaari seetanujuanaa Jiyaniijajanaa cutara. Janiya maara jiyanhua shuquiriaatia quirini, nojuaja jaara cua sequere na serura cua quiniuria quenaaja na sapatu cua jocuanura nera. Nojuaja cutaraari saaja maninia miijia”.

²⁶ ‘Cuarta pueyanaa, niajanija cante Abraham niquiohuacua-jinio pueyacujani, cua tojitiare, niajanijajuhuj taucuacanaa, canapuate Pueyaso tojjiacacuajani. Niaaranoori nio maninia rupaa Pueyasojiniji, nia jiyanooshaanura sesa nia miishanojiniji. ²⁷ Jerusalén tiacajinia quiniaa, mariyata na camarucuanio, nojoriiri maja na niishiniu quijia cante Jesu quiquiaarini. Majaari nojori niishitiuniu quiquiaarijijuhuj Pueyaso sequesano caminiujiunaa naajiotasano tariucuacaanu. Cunoori najuhua nojori serojonuusano puetunu samaatenu juucajanaa. Naacujitij, nojori jaara moquiaari Jesu, maninia tohuateequiaariiri Pueyaso sequesano caminiujiunaa naajiotasano, taa Jesujiniji sequesaaquiaari tariucuacaanucujani. ²⁸ Jesuuri seetanujanaa maja na miiniu quiquiaari sesa. Tama nojoriijaarijia juhua sesa miijia na jiyatequiaari cutara. Naacujitij, Pilato sequetquiaariiri cuaara na moteeranoj. ²⁹ Nojori jaara tari miiquiaari taa nojuajiniji naajiotasano quiya tariucuacaanu Pueyaso Rupaajiniacuajani, na roshinituquiaari niyacutesanojinijiiri. Raaco na niatureeri. ³⁰ Naajaa, macu na quishacari, Pueyasoori saaja na samiitianiquiaariuhua. ³¹ Na samiitianu nuhuaji, Jesuuri sequeyarucua na pueyacu mueranacujquiaari, noo pojoriicua canapuate na tarajaquiaari na quiasacari Galilea jiyajiniji Jerusalén tiacajiniaracuajani. Nojoricuajaari quiarijia nojuajiniji poojotaniuhua puetunu pueya niquiarajanaa.

³² ‘Canaari timiyani canaa pohuatasacari niajanija, ¡Pueyaso pohuatasano pa supuetanaari tari tohuateecanu! ¡Pocuaji Tacunacuajaari tari miiquianu puetunu pa jiyanooshaanurajanaa! ³³ Seetanujanaa, Pueyaso sequesano pa supuetanaa Israel pueyarani, cunoori shusha pajaniyara tohuateecanu, pa supuetanaa Israel pueyacua-jinio pa quiniucua. Pueyasoori tari tohuateecanu na sequesano pajaniyara, na samiitianishacariuhua Jesu, naatej, taa David jaaquequejonee Salmojinia na sequesano quiyacuajani. Naa naajiotasano quiyari segundo Salmojinia: “Quiaari cua Niyanucujaja. Janiyari quiarijia quia samiitianiriini”.

³⁴ Pueyasocuajaari sequequiaari, nojuacuajaari na samiitianiniutianihua na moqueyaquiniuucujaji na raaco. Nioori naajiotasano quiyajuhuj tariucuacaanu Pueyaso Rupaaajinia. Naa sequeyari:

“Janiyari maninia niara miiniutianiyani taa cua sequequiaari Davidcujani”.

³⁵ Naa naajiotasanoori Jesujiniji quiyajuhua David jaaquequejonee Salmojinia:

“Majaari quia panishano seru cuaqueya quia shanacunu quiniutianiya na moquenura”.

³⁶ Pueyanaa, paari seetanujuanaa niishiyani Davidri puetunu Pueyaso panishano na miiniu nuhuajijianaa shaajequiaari. Nojuajaari na supuetanaa rupuequiaari macunucua quiquiojina. Na cuaqueyari seetanujuanaa moquequiaari cutara. ³⁷ Noo Jesu saniniuujia, Pueyaso cutaraari na samiitiani quiaariuhua. Majaari na moquenu quiquiaari cutara. ³⁸ Cuarta Israel pueyanaa, niaa cumaati canaa pohuatasano niishiya. Canaari Jesujiniji nia pohuataani. Niaa jaara nocua tiuuri, niari sesa nia miishanojiniji jiyanooshaanutaniya. ³⁹ Moisés Rootasanojina, paari tariucuacaanu niishitiojosaaquiaarini pa seya pa puecoonura Pueyasora, Pueyaso jiyanooniuria pajaniya sesa pa miishanojiniji, maja pa mosaanura saniniuujia. Majaari seetanujuanaa pa jiyanooshaanu quiquiaari naa pa miishacaritij. Quiarjia cutara, canapete Jesuucua tiuya saniniunijia, nojoriiri puetunu sesa na miishanojinijijianaa jiyanooshiya. ⁴⁰ Niaa cutaraari cocuaatia miiniutianiya pueyanaa, nia jaara cua pohuatasano ruuretare. Pueyasoori na tojiyashijiaa saniitionutaniya taa tariucuacaanu Pueyaso sequesano caminiujuniaa sequequiaaricujani. Naa sequetuquiaariiri:

⁴¹ “Nia tojitiare, rerequetejacanaa. Niaari jiuujiatenutaniya najuhanaj. Na nuhuaji, niari shaajasaanutaniyajuhuj. Janiyari Pueyasoni. Janiyari tarijia nia niquishoo casaa miiniutianiyani. Tamasaca jaara nia pohuatare, niari saaja na cuaracashitiniutianiya”.

⁴² Na nuhuaji, Pabloori narta Judiocuaca rerejojua tiajiniji tohuareetaquiaariuhua na cojiniaata. Taucuacaari tii quiriquiaajuhuj. Nio taucacaari Judiocuacaacua pacunaa quiquiaari, Judiocuaca nojori quiniurijuhuj, Pueyaso sequesano tojitianaara na quiniuria. Nojoriiri Pablo sequequiaari, Bernabeenio:

—Niocua tamonu sábadu canaa pohuatareeruhuj, socua canaa tojiniuria Jesujiniji.

⁴³ Nojori quiojosacariuhua Judiocuaca rerejojua tiajiniji, queraatia narta Judiocuacaari nojori nuhuajiquiaari, queraatia taucacajinijinio Judiocuacaacua pacunaanio. Cuno pojoriiri maninia Moisés niishitiojosano tojitianaa quiquiaari. Nojoriiri Pablo, Bernabé nuhuaji sacuariquiaa. Naaratej, Pabloori Bernabeeta naa rootaquiaari nojori:

—Saaja Pueyasocua tiuujiaa nia quiri. Majaari nocuaji taacanuunu. Nojuacuajaari pa cumaquijia.

⁴⁴ Cuno nuhuaji, Sábado juuca jaara tari quiquiaari, quera puetunu cuno tiacajiniji pueyajanaari Pueyaso rupaa tojiniuucua rerejoquiaari.

⁴⁵ Judiocuaca secojojua tia camarucua jaara niquiquiaari queraatia pueya na rerejojuaajinia mishiyano, Pablo pohuatasano na tojitianura, nojoriiri juaaquioquiaari. Nojoriiri tama sequetooquiaariijaaja:

—Puetunu pueyajanaari cuno pojori tojtiajacara quiniutianiya. Pa tojiaquiniutianiya saniniuurijia.

Naa sequeturiquiaa pueya niquiara Pablojinijijaariuhua:

—¡Pabloori maja maninia na niishiniu Pueyaso rupaa! ¡Najuhuana sesa pahuataano! ¡Nojuajaari niishiyashijia!

⁴⁶ Pabloori saaja Bernabeeta sequequiaari na puereyaquiniutia:

—Maniniacuajaqui, cuarta Judiocuacanaa. Canaacujaari naa panitaja niajaniatej, Pueyaso rupaa canaa coteetanura pahuatanu niajaninya, Pueyaso saquiriojosano Judiocuaca nia quiniuucua. Niaacuajaari saa na ruuretarejaa. ¡Majaquiiri nia rishiniu paniniu, pueyara caanu nia quiniuria Pueyasota! Quiarijiani, canaari saniniuujia taucuacaqua quianutaniyani, Pueyaso rupaa canaa pahuatanura nojori niquiara. ⁴⁷ Canaa Jiyaniijia jaara canaa jiyaramiquiquiaari, nojuajaari naa canaa sequequiaaritij: “Quia jiyatequiaari mijiria cuhatariquianonijia. Quia pahuatasano janiyajiniijiri caminiujushaanutaniya taucuaca niquiara puetunu jiya puequeetujinijanaa, Pueyaso jiyanooniuria nojorijihuhaj”.

⁴⁸ Cuniqiu quiniaa taucuaca jaara naa tojiquiaari sequeshiyantej, nojoriiri shuquiriquiaari. Pueyaso rupaa maniniuhuaqueetareeri. Sequetureeri:

—¡Jiyanohua maninia pa Jiyaniijia Pueyaso rupaa!

Teyano pueya Pueyaso saquiriojoquiaari tariucuacaanu na pueyara quiriquianocujani, pueyaracaanu nata rishiniuriacuajani, jiyacaritij, nojoriiri Jesuucua tiuququiaari. ⁴⁹ Jiyaniijia rupaari pahuatasaaquiaari puetunu cuno jiyajinijanaa. ⁵⁰ Judiocuacaari na juaaniutia Pueyaso panijaca maajipohua shiniujuquiaari na cojituniuria nojori, nojori miiniuria naquiya Pablo, Bernabeenio. Naa rootatuquiaari cuno tiacajiniji camarucuajaariuhua, mariyata cuno jiyajiniji nojori taanuunura Pablo, Bernabeenio. ⁵¹ Naaratej, na nuhuajiria, Pablo, Bernabeenio, nojoriiri na nihuacajiniji seseeca rapijionuutaquiaari. Naacuajitij, Antioquiya tiacajinia quiniaa pueyari niishiquiaari, Pueyaso saniitosacari nojori, majaari nojori Pablooca, Bernabeecua na tiuutianu quiniutianiya Pueyaso jiyanoyaquishacari nojori. Na nuhuaji, Pabloori Bernabeeta cuno tiacajiniji quiaquiaari Iconio tiacajinia. ⁵² Jesuucua tiuuniaa pueyari saniniuujia shuquiriaatia jateequiaari Antioquiya tiacajinia, nojori jiiatasacari Pueyaso Sohuanu.

14

Pablo, Bernabé quishacari Iconio tiacajinia

¹ Pablo, Bernabeeta naa miiquiaarijihua Iconio tiacajinia. Nojoriiri narta Judiocuaca rerejojua tiajinia tiuquitiaquiaari. Nojoriiri tii pahuataquiaari Jesujiniji puetunu nojori niquiarajanaa. Queraatia pueyari Jesuucua tiuququiaari, Judiocuaca, taucuacanio. ² Noojiaqueya Judiocuacajinijiniori maja na tojinu paniniu quiquiaari Jesujiniji pahuatasano. Cuno pojoriiri taucuaca shiniujuquiaari nojori juaaniuria Jesuucua tiuuniaa pueya. ³ Pabloori, Bernabeeta cunora socua jiyojequiaari pueyaracaanu cuniqiu, Jesuucua tiuuniaa nojori cumaquiniuria. Nojoriiri maja na puerenu quiquiaari Jiyaniijajiniji nojori pahuatasacari. Seetanujuanaa, Jiyaniijiaari nojori naacuquiaari jiyanohua cutara maninia miishano nojori miiniuria, pueya naatanijionurajuhua.

Jiyaniijiaari nojori naacuquiaari cuno pueya niishiniuria, seetanujua-naari quiquiaari Pablo, Bernabé pohuatasano. ⁴ Cuno tiacajinia quiniaa pueyari raqitiiquiaari. Noojiaqueyari tama narta Judiocuaca tojijiaarijiaaja. Saniniuujia, tamasaacari Jesu jiyaramiquishano pueya tojijiaara quiquiaari. Nojoriiri naa quiquiaari cuno tiacajinia. ⁵ Naa nojori quishacaritij, Judiocuacaari taucucata rojotooquiaari cuno tiacajinia jiyaniijianucuata. Naa rojotooquiaariiri nojori sesacanura Pablo, Bernabeenio, na jacutunura saitiajuhuaj. ⁶ Pablo, Bernabé jaara niishiquiaari naa cuno pueya miiniu panishacari nojoritij, tiji mashiy-ocuatuuquiaariiri Licaonia jiyajiniara. Nojoriiri Litra tiacajinia quiojoquiaari, Derbe tiacajiniaranio, cuno caapiqui tiaca shocua quijiaca tiacajiniajuhuaj. ⁷ Nojoriiri tii poojotaquiaari Jesujiniji nojori niishishano.

Litra tiacajinia pueya jacutusacari Pablo saitia

⁸ Litra tiacajinia quiquiaariiri sesarunocua pueyano. Majaari na rucuanenu quijia. Nojuajaari naa rasaquiaarijuhanaj. Majaari na pooniniu quijia na cajitiiujiniji. ⁹ Cuno pueyanoori Pablo tojiriqiaa na pohuatasacari Jesujiniji. Pablo jaara na niquiquiaari, na niishiriiri nojuajaari seetanujuaanaa tiuuriquiaa na pohuatasanoocua. Naa Jesuucua na tiuuniuucuatej, Pabloori niishirii cuno pueyano na naata na cashacu jeequenuhua. ¹⁰ Pabloori jiyamitia jiyanoohua na sequeree:

—¡Maninia quia nujuare! ¡Maja porequetanu!

Cuno pueyanoori ritia sanequee. Rucuanenu saniriiri. ¹¹ Cuno Licaonia pueya jaara niqituuquiaari naa Pablo miishanotej, nojoriiri tama na rupaajiniajaaja sequetuquiaari:

—¡Cumaacaraca quijiacaari juhua pueyasohua pocua rosetareeni, juhua pueya niquishano!

¹² Naa nojori sequesacaritij, majaari Pablo, Bernabé niishiniu quiquiaari nojori sequesano tama nojori rupaajiniajaaja. Cuno pueyari Bernabé sesojoree Júpiterta, juhua nojori pueyaso sesa. Pabloori sesojosaareecujua Mercurio, jiyanoohua pocuanu niishijia na quiniuucua, juhua nojori pueyaso Mercurio. Nio sesacaari Licaonia pueyapue pueyasohua sesaca quiquiaari, nojori jiiiasano juhua na pueyasohuara cuno jiyajinia. ¹³ Júpiter secojojua tiaari Litra tiaca tohuateya shuriucua quiquiaari. Jiyacaritij, Júpiter secojojua tia cojuanaari juyaca jaatucunuuquiaari, Pabloocuara nojori puecoosocoriquiano Bernabeecuaranio, juhua nojori pueyasohuacuara. Maniniushitiajara naana shuucucua shiyosano patootaquiaarijiaariuhuj. Cuno pueyanoori puetunu pueyatajanaa Pablo, Bernabé shuquiritianu paniriquiaa juucua, juyaca na puecoosacari nojoriicuara juhua Pueyasoocuara. ¹⁴ Pablo, Bernabé jaara niquiquiaari naa cuno pueya miiniu paniyano nojoritij, nojoriiri na toqueya sutaquiaari nojori tacaaniutia. Pueya tajiniaaco netecuatuquiaariiri nojori miiniu panishano nojori tarinitianura. Pabloori naa nacaquiaari puetunu cuno pueya tojishocoriquianojuanaa:

¹⁵ —¡Pueyanaa! ¿Casaara naa nia miya canaani? ¡Canaari nareja pueyani taa niajaniyacuaani! ¡Canaari naacua niyarucuaa niaacuatej canaa sequenura nijaniya, puetunu nio najuhua nia miishanojuanaa nia cartenura! ¡Saaja nia shuquiritiare cutara pueyaracaanu rishijia

Pueyaso! Nojuajaari nio jiya shipiniquiaari, jiya cajiniocua. Na shipinishanojaariuhua shoniniacu caminia. Puetunu pa niquishanojuanaari na shipinishano. ¹⁶ Pueyasoori tarijia puetunu pueyajanaa tarinitiaquiaari nojori miiniuria tama nojori panishanojuaja. ¹⁷ Naajaa, nojuajaari pa supuetanaa niishitiquiaari cante nojuajani, maninia na miishacari nojoriria. Nojuajaari maru nitiqiaa pajaniyara, pa nataacuaca moritianura, pa miasocoriquiano pa jiitianura queraatia, shuquiriaatia pa quiniuriajuhuaj.

¹⁸ Pablo, Bernabé jaara naa sequequiaari cuno pueyatej, pueyari jatarinitiaja socua tarinitiaquiaari nojoriicua na puecoonu panishano juyaca.

¹⁹ Jiyacaritij, Antioquiya tiacajinijinio Judiocuacaari tii tiuquiiiosequiaari, Iconio tiacajinijinionio. Nojoriiri cuniqui quiniaa nasojosee Pablocuara, Bernabeecuaranio. Cuniqui jacuturee saitia Pabloori. Nojori jaara jiyaniquiaari Pablo naasucuaari tari cusoyaree saitia jacusano, na jaatiuquiaari tiacajiniji tamamaari. ²⁰ Jesuucua tiuuniaa pueya jaara rerejoquiaari Pablo shocua, macu na quishacari, nojuajaari saaja sanequiaariuhua, saitia jacusano juucua. Na jacunaa tiacajinia tiuquiiariauhua saajaari. Tariqui cuno tiacajiniji quiaquiaari Bernabeeta Derbe tiacajiniaari.

²¹ Jaara Jesujiniji pohuataquiaari tii, queraatia pueyari Jesuucua tiuquiaari. Na nuhuaji, nojoriiri Derbe tiacajiniji riujuutiaquiaariuhua. Tiuquiiioquiaariuhuari Listra tiacajinia, Iconio tiacajinia, Antioquiya tiacajinianio. ²² Pabloori Bernabeeta puetunu cuno tiacajinia quiniaa Pueyaso pueya rootaquiaari socua, maja nojori tarinitianura Jesuucua tiuuniu. Pabloori naa nojori sequequiaari:

—Canapute Pueyaso shuriucua quiriqianoni, nojoriiri naquiya miiniutianiya mijiria.

²³ Nojoriiri maninia Pueyaso tojjijaca pueya saquiriojotuquiaari, nojori jiyatesocoriquiano Pueyaso pueya jiitariquiano. Naa miitiuquiaari puetunu cuno tiacajiniajanaari, Pueyaso pueya jiitianura tama nojori nacasunaajaja. Jesu saquiriojosano pueyari maja na miaquenuunu quiquiaari Pueyaso na secojonuusacari. Nojoriiri naa secojoquiaari Pueyasotej, narta Pueyaso pueya jiitariquianoocua:

—Canaa Jiyaniijanaa, nio pueya quiocua tiuujacani, nojori quia naacure quiocua tiuuniaa narta pueya nojori jiitianura maninia.

Pablo tacatesacariuhua Bernabeeta Siria jiyajinia Antioquiya tiacajiniara

²⁴ Nojori riujuuniuhuara Antioquiya tiacajiniohuara, Pisidia jiya shocotumohuari. Na nuhuaji, tiuquiiioquiaariuhua Panfilia jiyajiniaari. ²⁵ Tii Pueyaso rupaa pohuataquiaari Perge tiacajiniaari cuno pueya niquiara. Nojori pohuatanu nuhuaji, Atalia tiacajinia quiojoquiaarijiaariuhuj. ²⁶ Cuniquiji, buquejinia jaaretatuquiaari Antioquiya tiacajiniaraari. Cuno Antioquiya tiacaari quiquiaari tee cuniqui narta Pueyaso pueya niaquiaari nojoriicua na juaashiquiacuajani, Pueyaso nojori secojosacari. Nojori naa miiquiaari, Pablo, Bernabé jiyatesaanura tucuacaanu nojori quiojonura Pueyaso rupaa nojori pohuatanura taucua. Cunoori quiquiaari shushajanaa nojori coteenu panishacari rucuanefonu tamaquicua. Naacuajitij, nojori tohuatenu

nuhuaji puetunu Pueyaso panishanojuanaa, jiyacari shusha tiuquijioriquiohuari. ²⁷ Antioquiya tiacajinia nojori quishacari tari, nojoriiri puetunu Jesuucua tiuunia pueya masuunujuquiaarijianaa. Cuniqiu pohuataturee puetunu nojori niquiarajanaari, taa Pueyaso naacucanu maninia nojori pohuatasacari Jesujinijini. Pohuatanuuquiaarijaari-uhuj taa Pueyaso taraajetequiaari taucuaca jiuujiani, Jesuucua nojori tiuuniuriajuhuaj. ²⁸ Pabloori, Bernabeeta cuniqiu tarishiquiaarijaara narta Jesuucua tiuuniaata.

15

Jesuucua tiuuniaa jiiitianaa nacoosacari Jerusalén tiacajinia

¹ Jiyacaritij, Judea jiyajinijinio pueyari Antioquiya tiacajinia quiojoquiaari. Nojoriiri tii sesa niishitiojonu coteequiaari cuniqiu quiniaa Jesuucua tiuuniaa pueya. Nojoriiri naa sequeriquiaa Antioquiya tiacajinia quiniaa narta Pueyaso pueyatej:

—¡Pueyanaa, Jesuucua tiuuniaa pueya cuaara na cararaatiuuquia co miatejoteera, taa Moisés niishitiojoquiaaricujani! ¡Jaara miatesoo quiri, majaari Pueyaso jiyanooni quiniutianiya jiyanotej, na pueya nojori quiniuria!

² Pablo, Bernabeenio, nojori jaara tojiquiaari naa cuno pojori niishitiojosanotej, nojoriiri cuno pojoritia nacojoquiaari jiyanohua. Naacujitij, Antioquiya tiacajinia quiniaa Pueyaso pueyari Pablo, Bernabé sequediaari nojori quianura noojiaqueya cuniqiu jinio pueyata Jerusalén tiacajinia. Nojori jiyaroreeri na nequesotanura Jesu jiyaramiquishano pueya Jerusalén tiacajinia, mariyata Jesuucua tiuuniaa pueya jiiitianaanio. Nojoriiri jiyaramiquishaaree cuno pojori nequesotasaa-nura, ¿seetanutejanaa naa miishiyatena, taa cuno Judea jiyajinijinio nijiono pueya niishitiojiya canaacujani?

³ Naacujitij, Pabloori Bernabeeta jiyarosaaquiaari Jerusalén tiacajinara. Nojori quiasacari Jerusalén tiacajinara, Fenicia jiyacuma quiojomaquiaariiri, Samaria jiyacumanio. Nojoriiri cuno jiyacajinia Pueyaso pueya pohuatanuumaquiaari taa taucuaca cartequiaari tama sesa nojori miishanojuajani, Pueyaso tojijiaara nojori quiniuria. Jesuucua tiuuniaa pueya jaara naa tojiquiaaritij, nojoriiri jiyanohua shuquiriquiaari.

⁴ Nojori tiuquijiosacari Jerusalén tiacajinia, puetunu Jesuucua tiuuniaa pueyajanaari nojori rerejotaquiaari, mariyata puetunu Jesu jiyaramiquishano pueyajanaanio. Pablo, Bernabeeri jiyacari nojori pohuataquiaari puetunujuanaa, naajuhuj, taa Pueyaso naacuquiaari maninia nojorini, nojori pohuatasacari taucuaca Jesujiniji. ⁵ Cuniqiu quiriquiaajaariuhua Fariseocuaca, tariucua Jesuucua tiuujiaa. Cuno pojoriiri rerejonaa tajiniji nujuatuquiaari. Naa sequetureeri:

—Cuno taucuaca Jesuucua tiuuniaani, na cararaatiuuquia co cuaara miatejosaaria Judiocuaca nojori quiaquishacari. Na nuhuaji, nojori cuaara Moisés niishitiojosano tojijiaara quiiria, taa Moisés rootaquiaari tariucuacaanucujani.

⁶ Naa nojori nacojonu nuhuajitij, saa Jesu jiyaramiquishano pueyajaari rerejoquiaari jiyareta Jesuucua tiuuniaa narta pueya jiiitianaata. Nojoriiri maninia niishiriojonuuquiaari taa na miiniutianiyan. ⁷ Naa

pueyaracaanu nojori pocoojosacaritij, Pedroori socua nojori tajiniji nujuaquiaari. Naa nojori sequereeri:

—Pueyanaa cua tojitiare. Niaacuajaari niishiya, pa Jiyaniijiaari cua saquirioquiaari na rupaa pohuatariguiano taucuaca tojishocoriguiano, nojori tiuuniuria Pueyasooquajuhuj. ⁸ Pueyasocuaajaari poojia niishijia. Nojuajaari cuno taucuaca niishitiquiaari, nojuajaari nojori jiyateree na pueyarajuhuj, na Sohuanu na niqutiosacari nojori, taa na niqutioquiaari pajaniyacuaani. ⁹ Majaari nia jiyaniniu Pueyasoori saaja Judiocuaca paniya. Pueyasoori maja rimiajata na paniniu. Nojuajaari puetunu pueya paniyajanaa. Cuno taucuaca jaara nocua tiuquuiaari, nojuajaari nojori jiuujia jeequereehuj saaja Jesuucua nojori tiuushacari. ¹⁰ Naa nia tamacasacari taucacajininio parta Pueyaso pueyatej, niaari Pueyaso miishano soojotaaruhua. ¿Casaara nia tamacaa Pueyaso miishanoni? Niaari quiarijia Moisés niishitiojosano tojitiniu paniya Jesuucua tiuuniaa pueya, juhua pa tojishanocuaa. Saniniuujia, majaari quenaaja pa supuetanaa na naata na miiniu quiquiaari puetunujanaa, taa Moisés niishitioquiaaricujani. ¹¹ Paari niishiyani pa Jiyaniijia Jesuuri pa jiyanoojia. Naaratej, pa jiyanooquiaari, na pueya pa quiniuria. Mariyata naa miiquianu cuno taucacajaariuhuj. Majaari seetanujanaa maninia pa miiniu quiquiaari pa jiyanooshaanura.

¹² Naa Pedro sequesacaritij, puetunu pueyajanaari socua sanaajetaquiaari. Bernabeeri Pablota jiyacari pohuataquiaari taa Pueyaso na cumacata miitiquiaari maninia taucuaca niquiarani, naajuhuj, taa nojori naatanijioquiaari cusosuhujaniuhuj. ¹³ Naa nojori pohuatanu nuhujitij, Santiagoori sequequiaarijihuaj:

—Cuarta Pueyaso muerasunaa, cua tojitiare. ¹⁴ Simón Pedrocuajaari tari pa pohuataree taa Pueyaso coteecanu shusha na Sohuanuta poonijionura cuno taucuaca jiuujiajiniani. Pueyasocuaajaari nojorijinijinio jiyateya seetanujanaa na pueyara, nojori maninuhuaqueetanura nojuaja. ¹⁵ Seetanujanaari nio. Naajuhuj, tariucuaaanu Pueyaso sequenu panishano caminiujiuniaacuajaari naa naajionuutaquiaari Pueyaso sequesantej:

¹⁶ “Janiyari David niquiohuacuajininio mueratenutaniya tamonu pueyanoni. Davidcuajaari na supuetanarano. Nojuajaari Jiyaniijiajanaa quiriquiano puetunu pueyapuerajanaa, taa David quiquiaari Israel pueya jiyaniijiacuaani. ¹⁷ Naacuajitij, puetunu taucacajanaari cua pajenuunutaniya, noo pojori teyano cua saquiriojoquiaari tariucuaaanucujani, nojori jiyatesocoriguiano na Jiyaniijiaara janiya”. ¹⁸ Jiyaniijiaari naa sequeyaquij. Nojuajaari tariucuaaanu pueya toquiaari nio”.

¹⁹ Naaratej pueyanaa, janiyari nia sequeyani, nareja nia niquri cuno taucuaca, Jiyaniijia Jesuucua tiuuniaani. Majaari nojori najiqutiniu Pueyasooquaji, nia tojitiniu panishacari nojori tariucuaaanu Moisés niishitiojosano. ²⁰ Nareja nojoriicuaara pa naajiore. Pocua pa naajioneejinia sequere nojorini, maja tari nojori miaquenuunura shipinishano pueyasooquara na puecootusano casaa, juunu, borregonio. Cuaara quituuria saa necocuataja, maja tamonu na numetucunura socua. Jaara shu miaquetunu paniri, cuaara na miaqueera puetunu na nanaca caatinijasanojuanaa, naajuhuj, maja na miaquenuunura

casami nanaca. ²¹ Puetunu nio cua sequesanojuanaari parta Judiocuaca tojishano. Cuno niishitiojosanoori pueyaracaanu parta Judiocuaca rerejojuaca tiajiniaqueya naa serojosaaquiaa Moisés naajioneejiniji puetunu samaatenu juucajanaa, puetunu tiquiyocua tiacajiniajanaa.

²² Naa nojori pocoojonu nuhuaajitij, Jesu jiyaramiquishano pueya, puetunu tii quiniaa Jesuucua tiuuniaa pueyajanaano, nojori jiiitianaajuhuaaj, puetunu nojorijianaari mariyata niishiriojonuuquiaari. Naacuajitij, nojoriiri narta Pueyaso pueya saquiriojotuquiaari na jiyarotusocoriquiano Antioquiya tiacajinia Pablota, Bernabeetanio. Jiyacari saquiriojosaareeri Judas, Silasnio. Judas sesaari Barsabás quiquiaarijihuuaaj. Cuno pojoriiri Jesuucua tiuuniaa pueya tojishano quijia cutara, cuniqui Jerusalén tiacajiniani. ²³ Nojoritia jiyarotasaquiaariiri naajionee. Cuno naajioneejiniaari naa sequequiaari:

“Niaacuara naajionaani, canaari Jesu jiyaramiquishano pueyani, Jesuucua tiuuniaa jiiitianaano, Jerusalén tiacajinia niarta Jesuucua tiuuniaa pueyajuhuaaj. Canaari nia saruhuataani pueyanaa. Taucuaca nia quishacari, naajaa. Jesuucua tiuuniaa nia quishacari, niaari canaa tapueyocucajuhuaaj, tiquiyocua Antioquiya tiacajinia quijiaca, Siria jiyajinia quiniaano, Cilicia jiyajinia quiniaajuhuaaj. ²⁴ Canaari niajanijini pahuatasaarucuaani, niiquiji pueyanaari niaacua quiaacanu. Canaa nia jiyanoori. Majaari canaa jiyaronu quiquianu nojori. Cuno pojoriniaari nia taajetecanu tamaatia nojori niishitiojosacari niajanिया. Naajuhuaaj, nia cushitioicanuuri nojori sequesacari nia cararaatiuuquia co nia miatejonura taa Moisés niishitiojoquiaaricuaajani. Nojorini-aari nia shiniujuquianu nia tojitianura socua Moisés Rootasanojuhuaaj. Quiarijia maja naate pueyanaa. ²⁵ Naaratej, saa jiyareta canaajaari niya rerejoreeni canaa niishiriojonura canapue canaa saquiriojonutaniyani niaacua jiyaramiquishocoriquiano. Canaari nojori saquiriojoree tarini canaa jiyarosocoriquiano Pablota, Bernabeetanio, nojori pocoojoriquiano maninia niaata. ²⁶ Canaa panishano pueya Pablo, Bernabeenio, nojoriiri tama na cuaqueya panitiaquiaarijiaaja Jesujiniji nojori pahuatasacari tiquiyocua. ²⁷ Quiarijiani, canaari niaacua jiyaroya canaajinijinio canaa saquiriojosano pueyani. Nojoriiri Judas, Silasnio. Nojoriiri nia sequenutaniya casaa nia miiniutianiyani, naatej, taa canaa pocoojoree canaa rerejosacaricuaajani. ²⁸ Canaa niishiriojosanoori maninia quiya Pueyaso Sohuanura. Canaari na shuquiritiaajuhuaaj. Majaari canaa cushitionu paniniu niajanिया puera canaa supuetanaa niishitiojosanota najuhuanaj. ²⁹ Canaari saaja nio nia sequenu paniyani pueyanaa. Nia tojitiare. Majaari socua nia miaquenu shipinijosano pueyasohuacuara puecoosano casaa. Majaari nanaca miaquenu. Naajuhuaaj, niaa jaara shu miaquenu paniri, nia miaquere maninia na nanaca caatinijasano. Naajuhuaaj, saaja nia niquiocohuata nia quiriquia. Majaari socua tamonu numuetucunu. Niaa jaara nio tojijia quiri, niaari maninia miyacuaja. Tariucuaja pueyanaa”.

³⁰ Naacuajitij, cuno cuatro pueyari jiyarosaaquiaari Jerusalén tiacajiniji. Jaara tiuquiijoquiaari Antioquiya tiacajinia, nojoriiri puetunu Jesuucua tiuuniaa pueyajanaa numootejoquiaari na rerejonura. Puetunu nojorijianaa jaara tari rerejoquiaari, jiyacari niquitiosaaquiaariiri cuno naajionee puetunu nojori niquiarajanaa serojosocoriquiano.

³¹ Naajionee jaara serojosaaquiaari, puetunu Jesuucua tiuunias taucacajanaari shuquiriquiaari jiyanoehua. Naacuajitij, nojoriiri noojia cajitiquiaariuhua tacaquoyano juucua. ³² Na nuhuaji, Judasri Silasta cuniqui Antioquiya tiacajinia camueenujuquiaari. Nojoriiri Pueyaso Sohuanu cumaaca jittiaquiaari, Pueyaso sequenu panishano nojori caminiujiuniuria. Naacuajitij, nojoriiri Jesuucua tiuunias pueya cumanjiaquiaari jiyanoehua. Na rootatuquiaariiri maja nojori tarinitianura Jesuucua tiuuniu. ³³ Nojoriiri Antioquiya tiacajinia camueenujuquiaari pasaja. Na nuhuaji, nojori quianu panishacariuhua Jerusalén tiacajinioehua na jiyaronaacua, Antioquiya tiacajinia quinia Pueyaso pueyari nojori sequequiaari:

—Maniniacuaja. Juhuajaniya nia quiaarohuaqui.

³⁴ Silasri saaja na cojiniaacuaji jateequiaari cuniquijia Antioquiya tiacajinia. Naacuajitij, Judasri tamajaaja tacatequiaariuhua Jerusalén tiacajinioehua. ³⁵ Pablo, Bernabeeri Antioquiya tiacajinia camueenujuquiaarijuhuaj. Nojoriiri cuniqui Jesuucua tiuunias pueya niishitiojoquiaari. Queraatia cuniquijinio pueyari nojori rupuequiaari niishitiojonurajuhuj. Puetunu nojorijianaari Jiyaniijia Jesujiniji pohuataquiaari tamasaca niquiarajuhuj.

Pablo pacutenu panishacariuhua quianu Pueyaso pueya na niqiniuhua

³⁶ Nojori jaara tari tarishiquiaari tii, Pabloori Bernabé sequequiaari:

—Noo tiacajinia pa camiquioocuara socua niqiniuhua, paa tii pohuatacanu Jiyaniijia rupaatej. Naa pa miiri pa niishiniuria taa parta Jesuucua tiuunias pueya quiyani.

³⁷ Bernabeeri na riucuaaree:

—Jajaa. Juan pa riyarecuarajaj, pa tarajariquiano.

Juan sesaari Marco quiquiaarijuhuaj. ³⁸ Majaari Pablo paniniu quiquiaari Juan quianura nojoritia. Nocuaji Bernabé sequequiaariiri:

—¿Paatucua casaara rupoyare pocua Marco saajaanuiuhua? Nojuacuajaari pa tiujiaquiaariuhua Panfilia jiyajinia pa quishacari. ¿Pueyaso rupaa pa pohuatasacari pa tarajacanu maniniatucua? Naacuajaa.

³⁹ Saa nojorijiaari socua juayonuutaquiaari Juan Marcoocua. Nocuaji Bernabeeri jiyacari Pabloocuaji rupatequiaari. Na rupatesacari na rupuena Pablojiniji, nojuajaari Juan riquiaari cutara na tarajariquiano. Jiyacaritij, tama nojorijiaarijia buquejinia quiaquiaari Chipre jiyajiniara. ⁴⁰ Pabloori saniniuujia Silas saquiriojoquiaari na tarajariquiano. Nojori quiaaquishacarijia, Jesuucua tiuunias pueyari nocuara Pueyaso secojotuquiaari. Naa na miitiuniu nuhuajitij, Pablo, Silasnio, nojoriiri panaatia quiaquiaari cutara Pueyaso rupaa pohuatanura. ⁴¹ Nojori quiasacari Jesuucua tiuunias pueya shiniujiuniuucua, Siria jiyacuma tajitiumiaquiaariiri, Cilicia jiyacumano. Pabloori cuno jiyaca tiacajinia socua poojotaquiaari Jesujiniji. Naa cumaquiquiaari Jesuucua tiuunias pueyari.

16

Timoteo cojishacari Pablo, Silasnio

¹ Pabloori Silasta tiuquijioquiaari Derbe tiacajinia, Lистра tiacajinio. Tii riuriatatuquiaari Timoteo jiyanishano pueyanoori. Cuno

mashajaari Jesuucua tiuujia pueyano quiquiaari. Na nucuaari Judio maaji quiquiaari, Jesuucua tiuuniajuhuaj. Timoteo queeri tahue quiquiaari cutara. ² Listra tiacajinia Jesuucua tiuuniaa pueyari Timoteo maniniucuatujua. Naa sequetujuaari nojori: “Timoteori jiyano hua maninia pueyano”. Iconio tiacajinijinio Jesuucua tiuuniaa pueyari naa sequetujua juhuaj. ³ Naaratej, Pabloori Timoteo riniu paniquiaari na tarajariquiano. Cunora, coteenu Timoteo cararaatiuuquia co miatetequiaariiri, cuno jiyajinia quiniaa Judiocuaca sojotanuucaaji nojuaja. Puetunu pueyajanaari na niishijia, na queeri seetanujuanaa tahue quijia. Nocuaji naa miishaareeri. Na nuhuaji, Timoteo cutaraari Pablo cojiquiaari. ⁴ Pabloori Jesuucua tiuuniaa tucuaaca niquiquiaari puetunu tiacajinijanaa. Nojori niquiaara caminiujuquiaari Jerusalén tiacajiniji Jesu jiyaramiquishano pueya sequesano nojoririaari, mariyata Jesuucua tiuuniaa pueya jiiatanaa sequesanojuhuaj. ⁵ Naa Pablo caminiujuishacaritij, puetunu Jesuucua tiuuniaa pueyajanaari socua noojia cumaquiquiaari jiyano hua. Tamasacaari socua Jesuucua tiuquiaarijuhuaj. Jesuucua tiuuniaa pueyari naa canequiaari socua. Naa caneriquiaa puetunu juucajanaari.

Pueyaso Sohuanu tosacari Pablo, Macedonia jiyajiniara na quianura

⁶ Na nuhuaji, Pueyaso Sohuanuuri Pablo tenujuquiaari maja nojori pohuatanura Jesujiniji Asia jiyajinia. Naacujitij, nojoriiri Frigia jiyacuma quiojoquiaari, Galacia jiyacumano. ⁷ Naa tiuquiiioseequiaari Misia jiya shuriucuaari. Nojoriiri cuniquiji quianu paniquiaari Bitinia jiyajinia juucua. Naajuahuaj, majaari Pueyaso Sohuanu paniniu quiquiaari tii nojori quianura. ⁸ Cunora, Pabloori na cojiniaata cuaniquiaari Misia jiyacuma. Troas tiacajinia tiuquiiioseeri. Nio Troas tiacaari shoniniacu caminia casaqueyaji quiya. Tiiri buque tiuutiacojua. ⁹ Pabloori cuno niucua juhua na maquenujini niquiquiaari Macedonia jiyajinijinio pueyano nocua nujuaano. Cuno pueyanoori Pablo sequequiaari: “¡Miji! Canaa quia naacutaquee Macedonia jiyajinia”. Cuno Macedonia jiyari quiquiaari shoniniacu caminia taquijiria. ¹⁰ Naa Pablo niquiniu nuhuaji juhua na maquenujinatej, canaari jiyacari ritia pajequiaarini taa canaa quianutaniya cuniquijini. Canaari sequereeni:

—¡Pa quiaarequi! Pueyasocujaari pa panitiaa Jesujiniji pa pohuatanura cuno pueya niquiarajuhua.

Pablo quishacari Filipino tiacajinia Silasta

¹¹ Canaari Troas tiacajiniji quiaquiaari buquejiniani. Canaari Samotracia jiya tucuaatiajaacua tiuquishiini. Canaari cuniquiji sanequiaari tariquiniuhua, tiuquishiiri Neápolis tiacajinia. ¹² Canaari cuniquiji quia-maa Filipino tiacajiniani. Filipino tiacaari socua panishano tiaca quiquiaari tamasa tiacajiniji Macedonia jiyajinia. Roma tiacajinijinio pueyari tii pacuquiaari tarijia. Nojoriiri cuno Filipino tiaca jiyatequiaari nojori quiquiora. Canaari tii camueenujuquiaari rupaquijiani. ¹³ Cuniqui canaa quishacari, canaari samaatenu juuca quiaquiaari cuno tiacajiniji moo casaqueyajiriani. Canaari soquequiaarini cuno pueyari tii jii-tiquiaari Pueyaso secojonura. Canaari tii narejashiquijia cajitiquiaari

mariyatani. Jiyacaritij, maajipohuari cuniqui rerejoquiaari na secojonuunura juucua. Canaari saaja nojori niquiara pohuatatee Jesujinijini. ¹⁴ Cuniqui maajipohua rerejosaquini, nojori tajinia quiquiaari-jiariuhua tamonu maaji. Na sesa quiquiaari Lidia. Nojuajaari Tiyatira tiacajinijinio quiquiaari. Shanohua quenaaruqueya naatuque toqueya niquitiojojua quiquiaari na cumaneecaraari. Nio maajiiri tarijia Pueyaso secojojua quiquiaari. Tii na quishacari, Pablo pohuatasano tojiriquiaari. Pueyasoori jiyacari na tojeteree. Juhua noojia riatareeri seetanujuanaa Pablo pohuatasano na tojiniuria maninia. Jesuucua tiuuriiri. ¹⁵ Na nuhuaji, Lidiaari puetunu na tajinia quiniaatajanaa tiuquinijosaaquiaari moojinia. Canaa tiuquinijionu nuhuaji puetunu nojorijianaa, Lidiaari canaa sequequiaari:

—Niaa jaara cucuaji taacanuyaquiri, miji, nia quishii cua tajinia. Janiyari pa Jiyaniijia tojjiajuhuaj.

Nojuajaari seetanujuanaa canaa panitiaquiaari na tajinia canaa quiniuria. Naacuaajitij, canaari na tajinia camueenujuquiaarini.

¹⁶ Tamonu juuca, socua canaa pacutesacari quianu pueya secojonujuajiniara, canaari samaruraca niyacoo niquiquiaarini. Cuno niyacoori camaruhuaraca quiquiaari. Niyacoori “niishijia samaru” jiitiaja. Naaratej, cuno niyacoori puetunu pueya niishiniu panishanojuanaa pohuataja nojoriria. Naa na miishacaritij, na camaruhuara maseja queraatia cumaneecaari. ¹⁷ Cuno niyacoori canaa nuhuaji sacuariquiaa. Naa nacariquiaa canaa na nuhuajishacariiri:

—¡Nio canuu cutaraari jiyocuacaanuji Jiyaniijajiniji pohuatanaa! Nia niishitiojyari Pueyaso jiyanooshano nia quiniuria, pueyaracaanu nia rishiniuria nata.

¹⁸ Saa naa canaa nuhuaji nacajaari, cuno tiacajinia canaa camueenujusacari. Pabloori socua na juaatiaquiaari. Nocua tacatequiaariiri. Cuno niyacoojinia quijia samaru sequereeri:

—¡Janiyari Jesucristo sesajinia quia jiyaroyani! ¡Cuno maajijiniji quia tohuatare!

Naa Pablo sequesacaritij, samaruuri na tojjiquiaari. Ritia tohuataquiaari cuno niyacoojinijiiri.

¹⁹ Cuno niyacoo camaruhuari niishiquiaari maja tari nojori masenu quiniutianiya socua cumaneeca juhua coteenu, niyacoo pohuatasanojiniji. Naaratej, nojoriiri Pablo, Silas quiooquiaari na juaaniutia. Nojori jaatucunuquiaari tiaca jiuujiajinia curotasano pueya cajitiucua-jiniaraari. Tiaca jiyaniijianucuaari tii quijiaca pueyaracaanu, nojori jiitianura pueya. ²⁰ Niyacoo camaruhuari Pablo, Silas nujuatejoquiaari tiaca jiyaniijianucua taccoji, cuniqui na nequesoreesaanura. Jiyaniijianucua sequetureeri:

—¡Nio canuuri Judiocuaca! Nojoriiri niya pa tiacajinia quiniaa pueya juaatijiosee. ²¹ Nojoriiri tamaatia niishishano niishitiojonuya. Maja cumaati pa tojiniunioj. ¡Paari Romano pueyani!

²² Naacuaajitij, puetunu cuno pueyajanaari na juaaniutia, Pablo, Silas cosequiaari ritia. Jiyaniijianucuaari nojori toqueya jaamitiquiaari jiyanohua, na jocojosacari nojorijiniji. Na nuhuaji, tamasaari seerataaaree nojori na mojoonura macata. ²³ Jiyanohua na mojoosaanu nuhuaji, nojoriiri socua na tiuquinioquiaari nujuatejojuajinia. Na nuhuaji, nujuatejojua tia camarnu seerataaareeri maninia na cojutatenura nojori nujuatejojuajinia. ²⁴ Naacuaajitij, cuno nujuatejojua

tia camarnuuri Pablo, Silas nujuatejoquiaari socua mij, nujuatejojuu cariquimiatej. Cuniqiu nujuatejosaaquiaariiri tii na cojuasaanura maninia, na mashiyocuatunuucuaaji. Nojori cashacucuaari suruhuatuneece quejasano tajiniocoma saatijiosaaquiaarijiuhuaaj.

²⁵ Cuno niucua shiyaqueya, Pabloori Silasta Pueyaso secojonuuriquiaajaa. Pueyaso maniniuhuaqueetaturiquiaari na jaaquequejosanota. Cuniqiu nujuatejosano pueyari nojori tojitiariquiaa. ²⁶ Jiyacaritij, rijiaari canashiyaquiji jiuuquiutiaquiaari jiyanohua cuno nujuatejojua tia. Puetunu na tiotiuhuajanaari riateguequiaari. Puetunu pueya numatucuaacua morojotasano casaajanaari tamajaaja saacarejetaquiaari. ²⁷ Nujuatejojua camarnuuri ritia niucuaquiaari. Saaja niquirii puetunu tohuateya riateguenojuanaari. Cunora, na nijiniaquetucuaaja mueruu shitiaree ritia na shuucuaajiiri tama na cuaqueya na miaquenurajaaja. Naa miiriiri na jiyanishacari puetunu nujuatejosano pueyajanaa naasucuaari tari mashiyocuatuneece. ²⁸ Pablo jaara na niquiquiaari, nocua nacareeri:

—¡Maja najuhuaana naa miiniutij! ¡Canaacuaajari puetunujuanaa niya quiyani!

²⁹ Nujuatejojua camarnuuri na shiriiquiniutia tetecariquiaa. Tamonu sequereeri ritia samaritiu na patanura nocua. Samaritiu caaniuji netequee cutaraari nujuatejojua jiniacumara. Pablo, Silas cariquimiaaji mojoquetaseeri. ³⁰ Jiyacari nojori tohuatejoree carijiniacumaari. Nojori nequesotareeri:

—¡Pueyanaa! ¿Taa cua miyarinijia, Pueyaso jiyanooshano cua quiniurijuhuaaj?

³¹ Nojoriiri na riucuaaree:

—Jiyaniijia Jesucristoocua quia tiuuri jiyanooshano quia quiniuria, puetunu quia tiajinia quiniaa quiniuria jiyanooshanojuhuaj.

³² Naaratej, Pabloori Silasta na niquiara pohuataree Pueyaso rupaa Jesujiniji, mariyata puetunu na tiajinia quiniaajanaa niquiaranio. ³³ Jiyacaritij, nujuatejojua camarnuuri cuno niucuaaja Pabloocua jiyanooquiaari, Silascuanio. Nojori cuaqueya majacuyashiquia jeequejoreeri. Na nuhuaji, puetunu cuno pueyajanaari ritia tiuquinijiosaaquiaari moojinia Jesuucua nojori tiuushacari. ³⁴ Jiyacari na tiajinia nojori jiyataquiaariiri. Tii Pablo, Silas mianuutereeri. Cuno nujuatejojua camarnuuri jiyanohua shuquiriaatia quiriquiaa puetunu na tiajinia quiniaatajanaa, Pueyasoocua tiuuniaa nojori quishacari.

³⁵ Cuno tariqui, Filipino tiaca jiyaniijianucuaari na seya jiyaroquiaari nujuatejojua tia camarnuucua, na sequenura nojuaja cuaara Pablo, Silas tohuatanijioora tari. ³⁶ Nujuatejojua camarnuuri Pablo sequesee:

—Tiaca jiyaniijianucua cucua jiyaroree na rupaani, cua cartenura quiarijia niajaniya. ¡Juhuaajaniya nia quiaarohuaqui!

³⁷ Pabloori saaja jiyaniijianucua seya sequequiaari:

—¿Majateeri nia jiyaniijianucua niishiniu canaari Romano pueyajuhuaaj? Canaa mojooturiquiaacuaa puetunu pueya niquiarajanaari. Majaari coteenu canaa nequesoreesaanu quiriucuaa. Canaari jiyanojuua nujuatejosaarucuaani. ¿Taa na miitiuniu paniya quiarijia canaarini, jiyasohuaaja tohuatejonu paniniu? ¿Jiyasohuaaja mojooturiquiaacuaa canaatucuaa? ¡Nojorijianaa cuaara niiria quiarijia, niiquiji nojori tohuatejonura canaa!

³⁸ Jiyaniijianucua seya jaara tacatequiaariuhua, puetunu Pablo sequesanojuanaa pohuataquiaari Filipo tiaca jiyaniijianucua niquiaraari. Nocuaji jiyaniijianucuaari pueretuquiaari nojori niishishacari Pablo, Silas Romano pueya quiquiaarijiuhuj. ³⁹ Naaratej, cuno jiyaniijianucuaari ritia quiaquiaari nujuatejojuajinia Pabloocua, Silascuanio, nojori jiyanoootioonura. Jiyaniijianucuaari nojori tohuatejosee. Nojori sequereeri cuaara quiojoora quenaaja nojori tiacajiniji. ⁴⁰ Naacuajitij, Pablo, Silas jaara tohuareetaquiaari nujuatejojuajiniji, Lidia tiajinia quiojoquiaariiri. Tii rootatuquiaari socua Jesuucua tiuuniaa pueyari, socua Pueyasocua nojori tiuuniuria. Na nuhuaji, tiji quiojoquiaari-uhuari.

17

Tesalónica pueya juaashacari Pueyaso pueya

¹ Pablo rucuanajosacari Silasta Jesujiniji nojori pohuatasacari, nojoriiri jiyacari shoconujutuquiaari Anffipolis tiaca, Apolonia tiacanio. Naa tiuquijioseequiaari socua Tesalónica tiacajiniaari. Cuno tiacajinia quiquiaariiri Judiocuaca rerejojua tia. ² Taate Pablo quijiacuajani, nojuajaari narta Judiocuaca rerejojua tiajinia quiaquiaari. Cuno tiacajinia na quishacari, jiuujianaraca semaana shocotejoquiaariiri. Puetunu semaana shocojosacarijanaa, samaatenu juuca, cuno pueya niquiara pohuataquiaari Pueyaso rupaari. ³ Pabloori nojori niishitiojoquiaari taa tariucuacaanu Pueyaso sequesano caminiujiuniaa naajiotaquiaari Pueyaso Jiyarosocoriquianojinijicuajani. Niishitiojoquiaariiri cuno naajiotasanoori tari tohuateequiaari Jesu jaara naquiya miishaaquiaari, naajuhuj, Jesu jaara na cusonu nuhuaji samiitiaquiaariuhua. Naa nojori sequereeri:

—Nio Jesucujani, janiya nia pohuataani, nojuajaari Pueyaso Jiyarosano pocua.

⁴ Jiyacaritij, noojiaqueya Judiocuacaari Jesuucua tiuquiaari. Queraatia taucuacaari Jesuucua tiuquiaarijiuhuj, canapute tari Moisés niishitiojosano tojjijaca quiquiaaricuajani. Queraatia cuno tiacajinia quiniaa pueya tojishano maajipohuari Jesuucua tiuquiaarijiuhuj. ⁵ Pueyasocua tiuyashijaca Judiocuacatej, nojoriiri juaaquoquiaari juhua shocotasano nojori quiniuucua. Nocuaji, nojoriiri sesa miijaca taajecori masuunujuquiaari. Nooj, nareja rucoojuaca tiacaacacotej. Cuno pojoriiri masuusaquiaari nojori na cojiniuria, tamasa nojori nasojonura. Na nuhuaji, puetunu cuno pojorijianaa jaara tonujutooquiaari taa na miitiuniutianiyani, nojoriiri puetunu cuno tiacajinia quiniaajanaa juaatiquiaari Pueyaso pueyacuara. Nocuaji, puetunu cuno pojorijianaari Jasón tiaco tiuquitiaquiaari, Pablo, Silas nojori quioonura juucua, juaaquiyoano pueya nojori niquitiosocoriquiano. ⁶ Nojori jaara na riuriataaquiquiaari, noojiaqueya Jesuucua tiuuniaa pueyari Jasóna cojiritiasaaquiaari quioonu. Cuno tiacajinia jiyaniijia-caacua na jayotuquiaariiri. Naa nacatureeri:

—¡Nio canuuri puetunu jiyacajinia pueya sesojijajanaa! ¡Niya tiuquijioreejaariuhua naa na miiniuriajuhuaj! ⁷ ¡Jasónri nojori masecanu maninia na tiajinia! ¡Puetunu nojorijianaari pa jiyaniijia César sequesano tojtiaashijaca! ¡Nojoriiri saaja sequequiaa socua tamonu jiyaniijianaari quiya! ¡Na sesanaari “Jesu”! Naa sequetuquiaaqui nio pojori.

⁸ Puetunu pueyajanaa, mariyata tiaca jiyaniijianucuanio, nojori jaara naa tojiqiaari sequeshyanotej, nojoriiri juaaquoquiaari. ⁹ Jiyacaritij, tiaca jiyaniijianucuaari queraatia cumaneeca masequiaari Jasónjiniji, narta Jesuucua tiuuniaa pueyajinijinio. Naa sequeturee nojoriiri:

—¡Pablo jaara niiquiji quiaaquiri, majaari canaa niqutionu quiniutia-niuhua nia cumaneeca!

Naa na miishaanu nuhuajitij, Jasónri nata quioosano pueyata cartesaaquiaariuhua.

Berea tiacajinia Pablo quishacari Silasta

¹⁰ Cuno niucuaaja, cuno tiacajinia quiniaa Jesuucua tiuuniaa pueyari Berea tiacajiniara mashiquiquiaari Pablo, Silasnio. Berea tiacajinia na tiuquijiosacari, cuniqui quiniaa Judiocuaca rerejojuatijinia quiojoquiaariiri. ¹¹ Cuniqui quijiaa Judiocuaca cutaraari maninia pueya quiquiaari, maja juhua Tesalónica tiacajinia quiniaa. Naacuajitij, Pablo jaara Jesujiniji pohuataquiaari nojori niquiara, nojoriiri maninia tojitiaquiaari na pohuatasano. Na nuhuaji, puetunu juucajanaa, tama nojorijiaarijia tariucuacaanu Pueyaso Rupaajinia naajiotasano pajenuuquiaari, nojori niishiniuria seetanujuanaa quiriquiaate Pablo niishitiojosano. ¹² Naacuajitij, queraatia Judiocuacaari Jesuucua tiuquiaari, queraatia taucuacanio, canuu, mariyata queraatia tojishano maajipohuanio. ¹³ Tesalónica tiacajinia quiniaa Judiocuaca jaara niishiquiaari Pabloori Berea tiacajinia Pueyaso rupaa pohuatasecuhuaaj, nojoriiri nocua quiojoquiaari nojori taanuunura nojuaja cuniquijijiuhuaaj. Na tiuquijiosacari Berea tiacajinia, cuniqui pueya nasojoseeri, Pablo na juaatiuniuria. ¹⁴ Nocuaji, Jesuucua tiuuniaa pueyari cuniquiji ritia mashiquiquiaari Pablo shoniniacu caminiajiniara. Silasri Timoteota Berea tiacajinia jateequiaari saaja. ¹⁵ Berea tiacajinijinio pueyari Pablo mashitiaquiaari, nuu na niishitiniuria. Nojoriiri Pablo jiyataquiaari Atenas tiacajiniara. Nojoriiri cuniqui jataquiaari Pablo. Cuno pojori jaara tacaretanu paniquiaariuhua cuniquiji Berea tiacajiniohuara, Pabloori nojori sequequiaari:

—Niocua ritia jiyarosuhua Silas, Timoteonio. Nojoricua niyaja cua coqesee.

Pablo quishacari Atenas tiacajinia

¹⁶ Pabloori Silas, Timoteo sashiquiaari Atenas tiacajinia. Cuno tiacajinia na rucuanesacari pueya na sashishacari, Pabloori niquiquiaari tama cuno pueya shipinijiosanojuaja na pueyasohuara. Nojori shipinijiosanoori puetunu cuno tiacajiniajanaa quiriquiaa. Pabloori cunora jiyanojua tacaquiaari. ¹⁷ Pabloori Jesujiniji Judiocuaca poojotaquiaari nojori rerejonuuja tijinia, noo pojori taucuacajuhuaaj, canapuate Pueyaso tojtiajaca quiquiaaricuaajani. Naajuhuaaj, Pabloori cuno tiaca jiuujiajia pueya cajitiucuaa curotasanojinia pohuataquiaari Jesujiniji cuniqui quiniaa niquiara. ¹⁸ Tamasaca niishijiaaari Pablo pohuatasacari Jesujiniji tojtiaquiquiaa. Nojoriiri caapiqui maapuejinijinio quiquiaari. Tamonu maanuuri sesojosaaquiaari “Epicureohua”, Epicuro jiyaniishano niishijia niishitiojosano tojtiajaca nojori quiniucua. Tamonu maanuuri saniniuuja sesojosaaquiaari “Rejeretajaca”. Naa sesojosaaquiaariiri Zenón jiyaniishano niishijia niishitiojosano nojori tojiniucua. Pablo pohuatasacari nojori niquiara, nojoriiri maja na

niishitiuniu quiquiaari casaa na pohuatariquiaani. Nocuaji tama nojori-
jiaarijia sequetooquiaari:

—¿Casaariquitijia cuno paateca pohuataa pajaniyatejaj? Najuhuana
pocuaa pueyaracaanuuri.

Tamasacaari saniniuujia sequetuquiaari:

—Tamasaca pueyasohuajiniji poojotana juhanaruhua.

Nojoriiri naa sequeriquiaa Pablo pohuatanuucua Pueyaso rupaa Jesu-
jiniji, mariyata taa cusonuuno samiitiaconutaniuhuanu. ¹⁹ Na nuhuaji,
nojoriiri Pablo jiyataquiaari tuhuananujiniji, tee nojori jiiitiquiaari rere-
jonuunucujani. Cuno tuhuananu sesaari quiquiaari Areópago. Nojori-
iri naa sequetuquiaari Pablo:

—Miji. Socua canaa tojishocoriquiano quia pohuataqueeruhuj.
Canaari quia pohuatasanojiniji socua maninia niishiniu paniyani.
²⁰ Quiaari jiyajeneta sequeriquiaa canaa niquiara quia pohuatasacari.
Quiarijia canaa quia tore maninia.

²¹ Puetunu Atenas tiacajinia quiniaa pueyajanaa, mariyata tamonu
jiyacajinijinio cuniqui quiniaajuhuj, nojoriiri maja socua tamonu
casaa na miitiuniu quijia. Saaja quiarinio sequesanojiniji niishitiuniu
panijiaaari.

²² Jiyacaritij, Pabloori Areópagojiniji nujuaquiaari na pohuatanura na
tojitianu panijiaa niquiara. Naa coteereeri:

—Atenas tiacajinia quiniaa pueyanaa, janiyari quiarijia niishiyani,
niaaqui pueyasohuacua jiaatiajaca jiyanoehua. ²³ Janiyari naa nia
sequeyani pueyanaa, cua niquniuucua queraatia nia shipinijosano
pueyasohua, cua rucuanijosacari nia tiacajinia. Naajuhuj, janiyari
saajiajiniji nia shipinishano juhua juhuacutura niquiriucuaajuhuj.
Nocua naajoori sequeya, “Niishishoo Pueyasora”. Cuno Pueyaso niaa
na tojtiaquiaa na niishiyaquiniutiani, nojuajaari nio Pueyasocuaaja
janiya nia pohuataani.

²⁴ Cuno Pueyasoori nio jiya shipiniquiaaricuaaja, puetunu pa niquis-
hanojuanaanio. Nojuajaari jiyocuacaanu camarnujuhuj. Nojuajaari
puetunu tiqiyocuajanaa Quijia. Majaari pueya tiajosano secojojua tia-
jinia na quiniu. ²⁵ ¿Taa nia jiyaniyani pueyanaa, cutara Pueyasojuaante
pa jiiitasano casamijiniji panijajuhuj? Maja. Nojuacuajaari puetunu
pa jiiitasanojuanaa shipiniquiaari puera. Pa rishiniuria, na Sohanu-
jiniji pa niqutioquiaarijiaariuhuj, pa rijiosocoriquiano paratunio.

²⁶ Pueyasoori niquiriyatu pueyano shipiniquiaari juhuacatecara.
Paari cuniquiji canequiaarini, puetunu jiyacajiniajanaa pa quini-
uria. Pueyasoori tarijia sequequiaari tee pueya quiniutianiyani. Se-
quequiaarijiaariuhuj taacari tii pa quiniutianiyani. ²⁷ Pueyasoori
naa panitiaquiaaricuaaja puetunu jiyacajinia quiniaa pueyajanaa pa-
jenura nojuaja. Pueyasoori pa saniya, na niishiniuria, ¿pueyate na
pajenutaniyani pa riuritanura nojuaja? Pueyasocuaajaari maja na
quiniu tucuacaanu pajaniyajiniji. ²⁸ Pueyasoori pa samiitianiya.
Pa cumaquiquiaajaariuhua pa poonijionura. Pa rishitiquiaajaari-
uhuj. Naatej, taa nia pohuatajaca sequequiaaricujani: “Paari
Pueyaso muerasuni”. ²⁹ Paa jaara seetanujuanaa Pueyaso muerasu
quirini, majaari socua pa jiyaniniu Pueyaso naasucuaari juhua oro-
jiniji pa shipinijosano niqishano. Majaari juhua platajiniji shipin-
ishano, juhua saajiajiniji shipinishanonio. Pueyaso cutaraari maja

na niquishaanu juhua tama pa niishiriojosanojuuaaja. Majaari na niquishaanu taa pueya shipinijioquiaacuajani, nojori jiyanishacari Pueyaso naasucuaari naa niquishanotej. ³⁰ Pueyasocuaajaari pueya miniu sesa rejeretariquiaa pueyaracaanu. Saniniuujia, nojuajaari quiaritia puetunu tiqiyocua quijiaca pueyajanaa sequeya, nojori cartenura puetunu sesa na miiquiosanojuanaa, saaja nojuaja nojori tojtianura. ³¹ Pueyasocuaajaari tari saquiriojoquiaari tamonu juuca taacari na nequesoreenutaniya mijiria quiniaani. Maninia pa nequesoreenutaniya puetunujuanaari. Pueyasoari tari na saquiriojosano pueyano jitiaa pa nequesoreeriquianojuhuaj. Na samiitianishacari cuno pueyano macujiniji, nojuajaari naa pa niishitiquiaari, cunocuaajaari na saquiriojosano pueyano.

³² Nojori jaara tojiquiaari Pablo pohuatasacari taa macunucua samiitiaconutaniuhuani, cuno niishijiacaari na saroojotaquiaari na rerequetenuta. Tamasacaari saniniuujia Pablo sequequiaari:

—Canaacua tamacari quia tojiriirianiuhuaj.

³³ Na nuhuaji, Pabloori cuno pueya tajiniji quiacuhua. ³⁴ Noojiaqueya cuno pueyajinijinoori Jesuucua tiuquuaari, Pablo pohuatasano nojori tojtiasacari. Nojorijinijinoori quiquiaari Dionisio jiyanishano pueyano. Nojuajaari Areópago niishijiaca pueya maanujinijino quiquiaari. Jesuucua tiuquuaarijaariuhua tamonu maaji. Dámaris na sesa. Socua tamasaca pueyari Jesuucua tiuquuaarijuhuaj.

18

Pablo quishacari Corinto tiacajinia

¹ Na nuhuaji, Pabloori Atenas tiacajiniji quiaquiaari Corinto tiacajinia.

² Cuniqiu riuriatasequiaari tamonu Judio pueyanoori. Na sesaari Aquila quiquiaari. Nojuajaari Ponto jiyajinia rasaanquiaari. Aquilaari necocua Priscilata shusha Italia jiyajiniji tiuquijiono quiriquiaa Corinto tiacajinia, tii Pablo tiuquishacari. Jiyacaritij, Claudioori jiyaniijiajanaa quiquiaari Roma tiacajinia, Italia jiyajinia. Nojuajaari puetunu pueyapue camarnujuanaa quiquiaari puetunu jiyacajiniajanaa. Nojori jitiaquiaari Roma tiacajinijiiri. Nojuajaari tama na tiacajinia pueyajaaja sequequiaari puetunu Judiocuacajanaa nojori taanuunura Roma tiacajiniji. Naaratej, Aquilaari necocuata quiaquiaari Roma tiacajiniji. Corinto tiacajinia quishiiri. Pabloori nojoriicua quiaquiaari nojoritia na pocojonura. ³ Aquilaari necocuata suhuoronuutaja toqueya cusupuenuuja quiquiaari juhua Pablojuhuaj. Naaratej, Pabloori nojoritia quishii, mariyata na poonijionuunura tii. ⁴ Pabloori maja nareja na shocotenu quijia samaatenu juuca. Nojuajaari Judiocuaca rerejojua tiajinia rucanejojua. Tii nojori pohuataquiaari Jesujinijiiri, taucuaa niquiaranio, noo pojori canapute Judiocuacara jiyatesaaquiaaricua-jani, tariucuaaanu Moisés niishitiojosano nojori tojishacari.

⁵ Silas jaara Timoteota Pabloocua tiuquijioquiaari Macedonia jiyajiniji, Pabloori jiyacari coteequiaari puetunu juucajanaa Jesujiniji pohuatanura Judiocuaca niquiara. Nojori sequequiaariiri:

—Jesuucuaajaari nia sashishano, Pueyaso Jiyarosano seetanujuanaa pocual!

⁶ Judiocuaca jaara tojiquiaari naa Pablo sequesantej, na tojtiaaqiri saajaari nojori cuaracashitiniutia Pablo sequesano. Saaja

juaaquioreeri. Sesa pocooreejaariuhuj. Naaratej, Pabloori nojori niqiuara na toque nuutojoquiaari, nojori niishiniuria Pablo tari nojori tujiaarohua. Pabloori nojori sequequiaari:

—Majaari cucua nia tiutianu, Pueyaso jaara mijiria quiniaa sanitiore. Niaacuajaari Pueyaso rupaa ruuretaquiaa saaja. Quiaritia taucuaacua quiaa cutaranija, nojori cua pohuatanura Pueyaso rupaa Jesucristojiniji.

⁷ Na nuhuaji, Pabloori cuno Judiocuaca rerejovia tiajiniji tohuataquiaariuhua. Tamonu pueyano tiajinia quiaquiaariiri. Cuno pueyano sesaari quiquiaari Justo. Nojuajaari Pueyaso tojinia quija. Na tiaari jiyareta Judiocuaca rerejovia tia shuriucua quiriqiuase.

⁸ Crispoori jiyacari cuno Judiocuaca rerejovia tia camarnu quijia. Nojuajaari puetunu na tiajinia quiniaa pueyatajanaa Jesuucua tiuuquiaari. Naajuhuj, queraatia Corinto pueyari Jesuucua tiuuquiaari Pueyaso rupaa nojori tojishacari. Naaratej, puetunu Jesuucua tiuuniaajanaari moojinia tiuquinijosaaquiaari. ⁹ Jiyacari tamonu niucua, Jiyaniijia Jesuuri Pablo sequequiaari na maquenujinia:

—Maja quia puerenu Pablonaa. Socua quia pohuatare cuno pueya tojishocoriquiano. Majaari sanaajenu. ¹⁰ Janiyacuajaari quiata quiyani. Majaari quenaaja tamonu pueyano jiyashiniu quiniutianiya taa na miiniu paniniuria quiajaniya. Janiyari queraatia pueya nio tiacajinia jiitiaa cucua tiuuriquianoni.

¹¹ Naaratej, Pabloori Corinto tiacajinia jijojequiaari. Tii na quishacari, quera shocotequiaari caapiqui marijaari. Cuniqiu na quishacari, Pueyaso rupaa niishitiojoriquiaa cuno pueyari.

¹² Jiyacaritij, Galión jiyaniushano tahuari Acaya jiyajinia pueya camarnu quiquiaari. Corinto tiacaari Acaya jiyajinia quiriqiuasejuhuaj. Jiyacari, Judiocuacaari tii Pabloocua roojotooquiaari. Na nuhuaji, na quiatuquiaariiri. Naa na jaatucutuquiaari cuno jiya camarnuucuaari, Pablo nequesoreesaanura. ¹³ Naa sequetusee camarnuuri:

—¡Canaa camarnunaa, nio pueyanoori pueya shiniujiya Pueyaso nojori shuquiritianura tamaatia canaa supuetana Moisés Rootasanojiniji!

¹⁴ Pabloori jiyacari juucua pocuanu paniriquiaa. Galiónri saa na rupaa niyacutequeejaa senota. Cuno Judiocuaca sequereeri:

—Judiocuacanaa, niaa jaara maninia miyashijiaca cucua jaatucure cutara, sesa miijiaca sequenio, janiya maara jiyano pueyanooacara nia tonujusacari tojiri cutarani. ¹⁵ Niaari saaja tama nia niishishanojiniji juayonuutaajaacujua. Maja cua nequesoreenu quiniutianiya tama nia juayonutasacarijaaja nia sequesano tamasaca shaajecono pueya sesacajiniji, tama nia supuetanaa rootasanojinijiaajanio. ¡Tama nia jecatoorejaaja!

¹⁶ Na nuhuaji, cuno camarnuuri nojori juarii. Na shuriucuaaji na jiyaramiquiriohuari. ¹⁷ Naa Galión miishacari nojoritij, narta taucuaacari cuniquijia quiatuquiaari Sóstenes, Judiocuaca rerejovia tia cojuana. Na piquitiurii camarnu Galión niqiuara cuniquijiaari. Majaari Galión tenujunu quirii nojori. Nareja na niquiriquiaari.

Pablo riuujiushacariuhua Antioquiya tiacajinihua. Na nuhuaji jiuujianaraca pacutequiaariuhua quianuuri

¹⁸ Pabloori cuniqui queraatia camueenujuquiaariijaara Corinto tiacajinia. Tari na riuujiushacariuhua cuniquiji, na nuhuajiria saruhuataarohua narta Jesuucua tiuunias pueyari. Buquejina quiaarohua Siria jiyajiniohuari. Na kojiriquiaaari Priscila, neyaca Aquilano. Nojori tacataaquishacarijia buquejiniaacuma, Cencrea tiacajiniji na quionura, Pabloori jiyacari na naca riuujiuquiaari caritianajara. Nojuajaari Pueyaso sequequiaari tari, maja na naca na riuujiutiniu quiniutianiya nojuaja jaara na sequesano Pueyaso tucuataaquiri.

Cunora, naa quiarjia riuujiutirii na nacaari. ¹⁹ Nojori tiuquijiosacari Éfeso tiacajinia, Pabloori tii jatamaquiaari Priscila, Aquilano. Nojuajaari tajimiaa Judiocuaca rerejua tiajinia. Cuniqui rerejono Judiocuaca pohuatasee Jesujiniiri. ²⁰ Nojoriiri Pablo nenecojoquiaari juucua cuniqui na camueenujunurajara nojoritia. Majaari Pablo paniniu quiquiaari. ²¹ Cuniqui quiniaa sequereeri:

—Quiohuanijia pueyanaa. Jerusalén tiacajiniara secohuanijia. Canaari tii rerejonutaniya Jesuucua tiuunias pueyatani. Pueyaso jaara paniri, janiyacua nia niquniuria tacatemohuaranihuaj.

Cuniquiji tacaquiaariuhua buquejinaari. Éfeso tiacajiniji quiaarohuari. ²² Pablo tiuquishacariuhua Cesareya tiacajiniohua, cuniquiji quiaamaa Jerusalén tiacajinaari, puetunu Jesuucua tiuunias na saruhuanurajanaa. Na nuhuaji, quiaarohua Antioquia tiacajinaari. ²³ Cuniqui tarishiquiaari pasajaari. Na nuhuaji, socua quiaquiaariuhua cuniquijiiri puetunu jiyacajinarajanaa. Quiariquiaari na niquniuhuaa Jesuucua tiuunias pueya Galacia jiyajinia, Frigia jiyajinianio. Pabloori nojori niquiara pohuataquiaari socua Pueyaso rupaaajiniji. Jesuucua tiuunias nacasuquiaariiri maja nojori tarinitianura Jesuucua tiuuniu.

Éfeso tiacajinia Apolo pohuatasacari Pueyaso rupaa

²⁴ Jiyacaritij, tamonu Judio pueyanoori Éfeso tiacajinia tiuquiquiaari. Alejandría tiacajinijinio pueyano. Na sesaari Apolo quijia. Nojuajaari maninia Pueyaso rupaa pohuatana quiriquiase. Tariucuaaanu Pueyaso Rupaa naajosano niishijia quiquiaariijaariuhuaaj. ²⁵ Nojuajaari maninia niishitiojosaquiaari Jiyaniijia Jesu niishitiojosanojiniji. Shitimia pohuataja pueya niquiaraari. Maninia niishitiojua Jesujiniji na pohuatasacariijaariuhuaaj. Seetanujuanaa sequeja Jesujiniji puetunujuanaari. Maja cutaraari na niishiniu quijia Pueyaso Sohuanute pueyano jiuujiajia tiuquijia. Saaja moojinia tiuquinijionu niishiquiaariiri, taa Tiuquinijiona Juan niishitiojoquiaaricuaani. ²⁶ Apoloori na puerenu jataquiaari tii na pohuatasacari Pueyaso rupaa narta Judiocuaca rerejua tiajinia. Aquilaari Priscilata tii quiriquiaajuhuaaj. Apolo pohuatasano tojtariquiaari. Apolo jaara puecaquiaari pohuatanu, nojoriiri tamocora na jaatucuquiaari na niishitiojonura taa pa jatanishaaquiaa Pueyaso Sohuanutani, Pueyaso muerasu pa quiniuria cutara. ²⁷ Na nuhuaji, Apolo jaara quianu paniquiaari Éfeso tiacajiniji Acaya jiyajiniara, Jesuucua tiuunias pueyari na cumaquiquiaari. Naajuhuaaj, nojoriiri Acaya jiyajinia Jesuucua tiuunias pueyacuara naajioquiaari Apolo patasocoriguano, maninia cuno pueya tojiniuria nojuaja na tiuquishacari tii. Jaara tiuquishiquiaari Acaya jiyajinia, Apoloori Jesuucua tiuujiaa

cumaquiquiaari jiyanoehua, nojori na niishitiojosacari. ²⁸ Apoloori nojori niqiuara niishitiojoquiaari tariucuacaanu Pueyaso Rupaajiniji naajiotasano. Jiyanoehua maninia na niishitiojosacari Jesuuri seetanujuanaa nojori sashishano quiquiaari, naacuajitij Judiocuaca niishishano pataquiaariiri.

19

Pablo quishacari Éfeso tiacajinia

¹ Apolo quishacari Corinto tiacajinia, Pabloori saniniuujia Antioquiya tiacajiniji quiaquiaari nucuaco Éfeso tiacajiniara. Na quiasacari, tuhuanuhua shoconujuquiaariiri. Naa tiuquishiiquiaari Éfeso tiacajiniaari. Tii riuriataquiaari Pueyaso pueya maanuuri. ² Pabloori jiyacari nojori nequesotaquiaari:

—¿Niaate Pueyaso Sohuanu tiuquiniquianu nioojiajinia, Pueyaso ru-paacua nia tiuushacari?

Pablo riucuatereeri:

—Majaari quenaaja canaa niishiniu quijia Pueyaso Sohuanute quiyajuhuj.

³ Pabloori nojori sequequiaari:

—¿Casaara nia tiuquinijiosaacanucuararini?

Nojoriiri na riucuaquiaari:

—Canaari tiuquinijiosaquiaarini taa Tiuquinijiona Juan niishitiojoquiaaricujani.

⁴ Pabloori nojori riucuaaree:

—Taaquiriirinij. Tiuquinijiona Juancuaaquiniateja pueya tiuquinijioquiaarijiaj, nojori jaara noojia tacatoquiaari sesa na miitiushanojiniji. Nojori sequequiaarijiaariuhuj: “Cua nuhuaji Niriqianooocua nia tiuuri”. Naa Tiuquinijiona Juan sequesacaritij, nojuajaari Jesucristojiniji sequeriquiaa.

⁵ Cuno pojori jaara Pablo pohuatasano Jesucristojiniji tojiquiaari, nojoriiri socua tiuquinijiosaquiaariuhua Jesuucua nojori tiuushacari seetanujuanaa. ⁶ Naacuajitij, Pablo niasacari na juaashiquia nojori nacaacua Pueyaso na secojosacari, Pueyaso Sohuanuuri cuno pojori jiuujiajinia tiuquiquiaari. Naacuajitij, nojoriiri niishishoo rupaacajinia pocooree. Naajuhuj, Pueyaso Sohuanu niishitiojosano Pueyasojiniji pohuatanuuquiaariiri. ⁷ Cuno pojoriiri doce canuu quiquiaari.

⁸ Pablo quishacari cuno tiacajinia, nojuajaari tii shocotejoquiaari jiuujianaraca raca. Jiyacari, puetunu samaatenu juucajanaa quiaja Judiocuaca rerejojua tiajiniaari. Tii pohuataja Pueyaso rupaa pueya niqiuaraari. Naajuhuj, nojori niishitiojuaari taa Pueyaso jiitianutaniya pueyaracaanu Jesuucua tiuunaa pueyani. Pueyari na tojtiaquiaari maninia, na puereyaquiniutia na niishitiojosacari. ⁹ Noojiaqueya cuno pueyajinijinioori saaja ruuretaquiaari Pueyaso rupaa. Na rerequetequiaari saajaari. Sacuaraatia pocooquiaari Jesu rupaajiniji pueya niqiuaraari, Jesuucua nojori tiuuniu paniyaquishacari. Nocujia, Pabloori saa jiyareta Jesuucua tiuunaa pueya jiyataquiaari cuniquiji, tamaquiria serojonuujuja tiajiniaara. Tirano jiyaniishano pueyanoori cuno serojonuujuja tia camar quiquiaari. Pabloori cuniqui puetunu juucajanaa niishitiojua Pueyaso rupaa Jesuucua tiuunaa pueya. ¹⁰ Caapiqui marijaari

socua Pablo shocojoquiaari tii na poojotasacari Pueyaso rupaa Tirano serojonuujua tiajinia. Naacujitij, puetunu Asia jiyajinia quiniaa pueyajanaari Pueyaso rupaajiniji caminiujiushaaquiaari, Judiocuaca, taucuaajuhua. ¹¹ Pueyasoori jiyacari Pablo cumaquiaari jiyajeneta casa na miiniuria Pueyaso cumaacata. ¹² Naacujitij, pueyari Pablo paneyaca tuujutaqueya rijioquiaari, Pablo cooshano toqueraacuano. Cuno pueya jaara na cusosuhuacua niojoquiaariuhua cuno toqueraacua, ¡cusosuhuari naatacoquiaariuhua! Naajuhua, samaruhuari tohareetaquiaarijuhua, samaruhua jiiitaja pueyacuaji.

¹³ Tamasaca Judiocuacajinijinioori quiriquiaajuhua, pueyajiniji samaruhua tohuatanijiojua. Nojoriiri puetunu tiacajinijanaa rucojojuaca quiquiaari. Jiyacaritij, nojoriiri juhua Pablo miiniu paniquiaarijuhua. Juucua naa sequetuquiaari samaruhuari:

—Pablo pohuatasano Jesu sesajinia nia sequeyanijia: “¡Nio pueyanojiniji nia tohareetare!”

¹⁴ Naa miijacaari siete canuu quijia. Nojoriiri Esceva jyanishano pueyano niqiuohua quiriquiaa. Escevaari pueyacuara secojona camarnu quiriquiasejuhua, Judio pueyanotuhua. ¹⁵ Cuno pojori jaara saniquiaari juucua Jesu sesajinia samaruhua tohuatanijionura pueyanojiniji, samaruuri saaja nojori riucuaquiaari:

—Jesu niishiyacuajanijia. Janiyari Pablo niishiyajaniuhua. ¿Canterini niajanianijia, naa nia sequenura janiyatej?

¹⁶ Samaruharaca pueyanoori jiyacari nojoriicua jaaquee. Nojori piyoree saajaari. Maja na naata nojori nujuataaquishacari, nocuaji netecuatuquiaari tiacojiiri juhuasunucua, jiyareta naatiquishanojuhua. ¹⁷ Puetunu Éfeso tiacajinia quiniaa Judiocuacajanaa, mariyata tii quiniaa taucuaacano, nojori jaara niishiquiaari naa miishanojinijitij, jyanohua pueretuquiaariiri. Naacujitij, puetunu Éfeso tiacajinia quiniaa pueyajanaari sequequiaari:

—¡Jesuquí seetanujanaa Jyanijianijanaa cutara!

¹⁸ Naajuhua, queraatia Jesuucua tiuniana pueyari nijioquiaari, tarijia sesa na miitiushano pohuatanura puetunu pueya niqiarajanaa. ¹⁹ Naajuhua, queraatia pueyari juhua shimiacuri miijiojuaca quiquiaari. Nojoriiri na nequesoretuneececa mueratejotaquiaari. Cuno nequesoretuneececajiniaari serojosano quijia taate pueyano cumueca shimiadura quiniuni. Na camaruhuari jiyacari puetunu cuno nequesoretuneececajanaa patootaquiaari. Na catijiaquiaari puetunu pueya niqiarajanaari. Puetunu cuno nequesoretuneececajanaa catijiasaaciaarini, cunoori cincuenta mil platajiniji shipinijosano cumaneecata masesano quiquiaari. ²⁰ Naacujitij, Pueyaso rupaari socua cuno jiyajinia paaquequiaari, na cumaaca poonijosacari pueya jiuujajinia.

²¹ Na nuhuaji, Pabloori cuniquiji naquerejoquiaari Macedonia jiyajinarajuhua, Acaya jiyajinariano. Cuniquiji riujiuuniu paniriquiohua Jerusalén tiacajiniohuaraari. Sequequiaariiaariuhua:

—Janiya jaara tiuquishuhua Jerusalén tiacajiniohuani, janiyari Roma tiacajinia tajiriquianohuani.

²² Jiyacaritij, Pabloori na naacunaa jiyaramiquiquiaari Macedonia jiyajinia. Na jiyaramiquishanoori quiquiaari Timoteo, Erastonio. Nojuajari cuniqui Asia jiyajinia jiyojequiaarijiaara.

Éfeso pueya cushitiishacari na juaaquionuta najuhuanaj

²³ Pablo quishacari Éfeso tiacajiniaja, Éfeso tiacajinia quiniaa pueyari jiyanoehua juaaquioquiaari Pablo niishitiojonuucua Jesucristojiniji. ²⁴ Naa quiquiaariiri. Demetrio jiyaniishano pueyanocuaajaari juhuacatecara narta pueya nasojoquiaari. Cuno pueyano, Demetrioni, nojuajaari shiirijiaa tia platajiniji shipinijiojua quiquiaari. Cuno shiirijiaa tiacaari juhua nojori jiyaniishano pueyaso secojojua tia niquishano quiquiaari. Nojori pueyasoori maaji sesaanucua quijia, “Artemisa”. Na shipinijosano niqutiojojua na cumaneecaraari. Naacuajitij, Demetrioori nata poonijionaa pueyata queraatia cumaneecaraca quijia. ²⁵ Demetrioori jiyacari nata poonijionaa rerejotequiaari nojori nacootanura Pablo miishanojiniji nojori tiacajinia. Nojoritia rerejoquiaariiri tamasaca pueya, casaa shipinijionaa platajiniji juhua nojorijihuhaj. Puetunu cuno pueyajanaa jaara tari rerejoquiaari, Demetrioori nojori sequequiaari:

—Pueyanaa, niaacuajaari niishiya, paari puetunu pa panishanojuanaa jiiitiaani pa niqutiojosacari pa cumaneecara pa shipinijosano. ²⁶ Quiarjiaa cuno Pablo jiyaniishano pueyanoni, nojuajaari queraatia pueya niishitiojoquiaa, pueyano shipinijosano pueyasohuanaari maja seetanu pueyasohujanaa. Niaari na niquriquiaacuaja naa na niishitiojosacari. Niaari na tojiriquiaajuhaj. Naacuajitij, majaari tari pueya masenu quiniutianiya pa shipinijosano platajiniji casami. Queraatia nio Éfeso tiacajinia quiniaa pueyari na sequesano tojiya. Puetunu pa Asia jiyajinia pueyapuejanaari na sequesano tojtiaajuhaj. ²⁷ Taa cua sequeyacuajani, pa shipinijosano jaara shocotesaare saaja, paari pa poonijosano carteriquiano socuani. Majaari pueya shocotenu quiniutianiya saa pajaniyaja, pa pueyaso Artemisa rerequetunaniyajaariuhaj. Nocuaji, majaari pueya nijionu quiniutianiya tari pa pueyaso Artemisa secojojua tiajiniaara, tii nojori secojonura, naa cuno Pablo niishitiojonuucua pueyaracaanu pueyatej. ¡Naacuajitij, puetunu pa Asia jiyajinijinio pueya, mariyata puetunu jiyacajinijinio pueyapuejanaari pa pueyaso Artemisa rerequetejacara jatanutaniya! ¡Puetunu pueyapuejanaari naa niyajetanutaniya socua pa pueyaso Artemisatej!

²⁸ Cuniqwi quiniaa pueya jaara tojiqwiaari naa Demetrio sequesantej, nojoriiri jiyanoehua juaaquioquiaari. Naa nacoquiaariiri:

—¡Pa timitiasano Artemisa cuara pueyaracaanu quiiria Éfeso tiacajinia quiniaa pueyaso!

²⁹ Naa nojori juaaquiosacaritij, puetunu cuno tiacajinijanaa pueyari cushitiiquiaari. Nojoriiri jiyacari quiooturee caapiqui Pablo cojiniaa pueya, Macedonia jiyajinijinio pueya. Nojoriiri quiquiaari Gayo, Aristarconio. Na jayoturee Éfeso tiacajinijinio pueya rerejojua tiajiniaaraari. ³⁰ Pabloori cuno pueya nacoosaqui tiajinia tiuquiniu paniqwiaari juucuajuhaj. Quera na pocuasee cuno pueya tajiniani. Jesuucua tiuunaa pueyari saa na cosequiaarijia na tiuquiyacquiniucujaji. ³¹ Asia jiya camarucuaari na seya jiyaroquiaari Pabloocujuhaj. Camarucuaari coteenu na sequequiaari na seya:

—Niocua Pablo sequesee, maja cumaati jaarajaaja na tiuquiniu pueya nacojosaqui, mariqui mosaareeri.

Cuno camarucua na seya jiyaroquiaari nocuani, nojoriiri Pablo rupuenaa quijia. ³² Cuno nasojosano rerejono pueyari saaja cushitiquiaari na juaaquionuta. Jiyanhua nacooreeri. Tamasacaari saniniujia tamaatia nacoorigiaajuhuj. Jiyacaritij, tama cuno nojorijinijinio pueyari maja na niishiniu quiquiaari casaajiniji na nacoorigiaani. Secaja nojorijinijinoori na niishiquiaari cutara. ³³ Jiyacaritij, Judiocuacaari Alejandro jyanishano pueyano caponeequiaari pueya nacoyano tacoji na nujuatesocoriquiano. Cuniqijinio pueyajaari tii toquiaari Alejandro casaara pueya nacoyani. Alejandroori Judio pueyano quiquiaar-ijihuhuj. Naaratej, Judiocuacaacujaji tacunu paniriquiaa juucuaari. Alejandro jaara nujuaquiaari pocuajajiniji, na juaashiquia shiitioquiaariiri pueya sanaajetanura. ³⁴ Saniniujia, cuno pueya jaara niishiquiaari Alejandroori Judio pueyano, puetunu pueyajanaari socua jiyacatequiaari nacoona. Nojoriiri caapiqui hora shocoteree pueyaracaanu naa na nacoosacari najuhuanaj. Naa sequeturiquiaa na nacoosacariiri:

—¡Pa timitiasano Artemisa cuaara pueyaracaanu quiiria Efesio tiacajinia quiniaa pueyaso!

Naa pueyaracaanu nacoorigiaari. ³⁵ Cuno tiaca camarucua najaona pueyano jaara na naata quiriqiaa nojori na sanaajanura, nojori sequereeri:

—Cuarta Éfeso pueyanaa, puetunu jiyacajinia quiniaajanaari niishiya, pajaniya Éfeso tiacajinia quiniaari pa pueyaso Artemisa secojojua tia cojuanaani. Niishituyajaariuhuj paacuajaari cuno casa juhua pa pueyaso Artemisa niquishano cojuaquiaani, jiya cajiniocuaji tinio pa riuriatasanoni. ³⁶ ¡Canteeri nio niishiyaquiyanijia! Shaaqui. Cunora tariucuaja. ¡Nia sanaajetarohua! Majaari najuhua nia nia miituniu, maninia nia niishirojijaquishacari. ³⁷ Nio canuu niaa niyara na jayoreeni, nojoriiri maja na nohuasenu quirii casa pa pueyaso secojojua tiajiniji. Majaari na sesacatunu quiqiaa pa pueyasojuhuj. ³⁸ Demetrio jaara nata poonijionaata cuno pueyacuara tonujunu paniri, ¿casaara na quiaaquiya pa nequesoreenaa niqiara tonujunuraarini? ¿Casaara pa jütiaa nequesoreenaa pa tiacajiniarini? ¿Najuhuanaj? Pa nequesoreenaa pa paraa tacujua pocuaji. ³⁹ Niaa jaara tamonu casaacua juaaquioreja, pocua tamonu juuca na rerejotariquiiani pa jiyaniijianucata pa jeeanura puetunu nia sequesanojuanaa. ⁴⁰ Pueyanaa, ¿majate nia puerenu, Roma tiacajinia quijia pa jiyaniijiajanaa jaara pocuara tosaare pa nacojonujiniji? Paa jaara sequesaa nocua quiojonurani, ¿paatucua taa pocuaji tacureni jaara pa nequesoreere pa nacojonujiniji?

⁴¹ Tiaca camarucua najaona pueyano jaara puecaquiaari pocuanu, pueya sequequiaariiri:

—Nia quiojorohua pueyanaa.

Naacuajitij, puetunu pueyajanaari cuniqiji niyaquejoquiaariuhua.

20

Pablo rucuanajosacariuhua Macedonia jiyajinia, Grecia jiyajinianio

¹ Pueya jaara na juaaniutia na nacojonu nuhuaji sanaajetaquiaariuhua, Pabloori jiyacari Jesucua tiunuaa pueya sequequiaari tama jiyareta nojorijiaaja rerejonura. Tii nojori nacasuree maniniaari. Tari na quiasacari cuniqiji, na nuhuajiria cacanuquiaari puetunu nojorijianaari. Na nuhuaji, Macedonia jiyajinia quiaareeri. ² Nojuajaari

puetunu cuno jiyajinia rucuanequiaarijianaa. Jesuucua tiuunaa pueya cumashitiquiaari socuaari, maja nojori tarinitianura Jesuucua tiuunuu. Naa na rucuanesacari cuno jiyajiniatej, socua tiuquishiiquiaari Grecia jiyajiniaari. ³ Pabloori tii na quishacari shocotejoquiaari jiuujianaraca raca. Juucua cuniquiji quianu paniriquiaa buquejinia Siria jiyajiniaraari. Judiocuacaari na niishiquiaari saaja. Nojoriiri jiyacari na monu paniquiaari. Naa Pablo niishishacaritij, nojuajaari nocuaji Macedonia jiyajiniara neteja nucuacohua tacatequiaariuhua saaja. ⁴ Nucuaco na quiasacariuhua, na tarajaquiaariiri Sópater jiyaniishano pueyano Berea tiacajinijinio, Pirro niyanu. Na tarajaquiaariijaariuhua Aristarco, Segundonio. Nojoriiri Tesalónica tiacajinijinio pueya quiquiaari. Nata quiaquiaariijaariuhua Gayo, Derbe tiacajinijinio. Timoteori nojoritia quiriquiaajaacuhuj, Tíquiconio, Trófimojuhuaj. Nojoriiri Asia jiyajinijinio quiquiaari. ⁵ Puetunu nio canaa tapueyocucajanaari canaa puetaquiaari. Canacuaji tiuquiiijioseequiaari co-teenu Troas tiacajiniaari. Cuniqii sashitiquiaari canaari. ⁶ Jiyacariiri queranacunuusacari quiquiaari, poretajaaju shipinijosano pan mi-aquesacari. Queranacunuunu nuhuaji, canaari Filipo tiacajiniji jaaretaquiaari buquejiniani. Canaari cinco juuca camueenujuquiaari canaa tiuquiniuria Troas tiacajiniani. Canaari tii nojori coqueseeni. Canaari mariyata tii camueenujuquiaari siete juucani.

Pablo niishitiojosacari Troas tiacajinia

⁷ Shusha semaana coteejajinia domingo juuca, canaari rerejoguiaarini pan neecasenura pa Jiyaniijia cusosacari niishiriojonura. Pabloori jiyacari Jesuucua tiuunaa pueya rootariquiaa niucua. Nojuajaari cuno tariqui quiariquiano quiriquiaa cuniquiji. Naaratej, na nuhuajiria pocoojoriquiaa pueyataari. Pueyaracaanu na pohuatasacari, shiyaqueyari tari quiquiaari. ⁸ Cuno tiajinia canaa tii quiriquiaani, canaari jiyocuaaanu tercero na natacojinia rerejoriquiaani. Queraatia samariiri canaa caaniuji noshiquioriquiaa. Pabloori shitimia pohuatariquiaa pueya niqiiara. ⁹ Jiyacaritij, tamonu mashajaari tia shuucujaji tacuhujiniji cajiriquiaa. Na sesaari Eutico quijia. Pablo pohuatasacari pueyaracaanu, socua maquequiaari na cajishaquiiri. Jiyanoehua na maquesacari, jiyocua tiqii socuaari. Cusoseejanaari. ¹⁰ Pabloori nata quiniaata ritia nocua netecuatuquiaari jiyocua. Pabloori nocua jacamasee na cacatanura. Narta Jesuucua tiuunaa pueya sequereeri:

—Maja najuhuana shiriiquitiuniu. Saminiocuaja.

¹¹ Na nuhuaji, puetunu nojorijianaari tiniota shuquiriaatia tacataquiaariuhua. Pabloori neecaruu neecasequiaari canaa miaquenuusocoriquiano. Pabloori socua pohuataquiaari pueya na niishitiojonura. Naa juhuaquemaajaa socuaari. Tariucua juuca quiaqueeri. Nojuajaari nucuaco quianu paniquiaari cuniquiji Asón tiacajiniara. ¹² Cuno mashajaari saminio jaatucusaaquiaariuhua na tiajiniohua. Puetunu pueyajanaari noojia cajitiquiaariuhua, saminio mashaja tacatesacariuhua.

Pablo quiasacari Mileto tiacajiniara

¹³ Pabloori na quiaaquishacarijia tari canaa sequequiaari:

—Nia puetaarecuaa buqueta. Niocua cua rimia Asón tiacajiniji. Janiya nucuaco quianu paniyani.

¹⁴ Naacujitij, canaari coquetoquiaari Asón tiacajiniani. Canaari cuniquiji Pablo tacanomiaquiaarini. Canaari mariyata tiji quiaaree Mitilene tiacajiniani. ¹⁵ Canaari tariqui shocoma Quío jiya tucuaatijani. Canaari tama tariqui tiuquishii Samos tiaca tacatajajinijini. Canaari ru-paquijia samaatemaacuara Trogilio tiacajiniani. Canaari cuniquiji sanetaaree tariquiniuhuj. Canaari Mileto tiacajinia tiuquishiini. ¹⁶ Canaari naa secooriquiohua ritiani. Majaari Pablo tarishiniu paniniu quiquiaari Asia jiyajinia. Naaratej, majaari na quianu paniniu quiquiaari Éfeso tiacajiniajuhuaj. Ritia tiuquiniu paniquiaariuhua Jerusalén tiacajiniaari. Pentecostés juucara quiniu paniriquiaa tiiri.

Pablo cumashitishacari Éfeso tiacajinijinio Jesuucua tiuuniaa jiitianaa pueya

¹⁷ Canaa quishacari Mileto tiacajinia, Pabloori pueyano jiyaroquiaari na masuunura Éfeso tiacajiniji Jesuucua tiuuniaa pueya jiitianaa. ¹⁸ Nojori jaara canaacua tiuquijioquiaari, Pabloori nojori sequeeree:

—Niaacujaari maninia niishiya taa cua quishiiquiaari niaatani, cua tiuquishacari Asia jiyajinia niaacua. ¹⁹ Niaata cua quishacari, janiyari pueyaracaanu nia niishitiojuani, pueyaracaanu pa Jiyaniijiaara cua poonijosacari. Naa cua miishacaritij, majaari cua quiniu paniniu quijia juhua nia jiyaniijia. Janiyari niaacua cua tacaashacari nujuquejuani. Janiyari pueyaracaanu naquiya miishanoni, cuarta Judiocuaca para-caashacari janiya. ²⁰ Naajaa, majaari cua pishiniu quijia nia niquiara cua pohuatanura Pueyaso rupaa. Janiyari nia niishitiojuani puetunujuanaa maninia nia quiniuria, maninia miijia nia quiniuriajuhuaj. Majaari cua niishitiojonu quijia jiyasohuaja. Janiyari puetunu pueya niquiarajanaa nia niishitiojuani, tama nia tiacajiniaqueyajaajani. ²¹ Janiyari Judiocuaca sequejani taucacanio, nojori tacatonuhuaara noojia Pueyasocua, sesa nojori miishanoiniji, pa Jiyaniijiaacua nojori tiuuniuria cutara. ²² Quiarijiani, Pueyaso Sohuanuuri cua jiyaroya Jerusalén tiacajinia. Majaari cua niishiniu taa cua miishaanutaniya cuno tiacajiniani. ²³ Janiyari saaja niishiya cutarani, puetunu tiacajinijanaa cua quiasacari, Pueyaso Sohuanuuri cua sequeya: “Quiaari nujuatesaanutaniya. Quiaari naquiya miishaanutaniyajuhuj”. ²⁴ Janiya jaara naa niishirini, majaari cua tacaaniu quiquiaa. Cuaara cua motuuraqui jaara monu panitiuri. Janiyari saaja pa Jiyaniijia sequesano tucuatunu paniya cutarani. Pa Jiyaniijia Jesuuri cua jiyaroquiaari cua pohuatanura pueya niquiara, taa Pueyaso jiyanooniya paniya pueyani.

²⁵ Janiyari seetanujuanaa nia sequeyani pueyanaa. Puetunu nia-janiyajanaa, cana niquiara cua pohuataquiaari Pueyaso rupaacuajani, majaari socua nia niquiniu quiniutianiya mijiria janiya. ²⁶ Naaratej, janiyari nia sequeyani, majaari na nuhuaji nia sequenu: “Maja canaa pohuataasaanu quiquiaari Pueyaso rupaani”. ²⁷ Janiyacuajaari tari nia pohuataquiaari puetunu Pueyaso sequesanojuanaa pajaniyarani. ²⁸ Quiarijiani, tama nia cuaqueyajaaja nia cojuare. Maninia nia cojuare Jesuucua tiuuniaa pueyajuhuj. Pueyaso Sohuanucujaari nia jiyatequiaari Jesuucua tiuuniaa pueya jiitianaa nia quiniuria. Nojuajaari nojori masequiaari na nanacata tama nerajaaja, pocuara na

cusosacari. ²⁹ Janiyari seetanujuanaa niishiyani, janiya jaara niiquiji quiaqueeni, tamasaacari cua nuhuaji nijionutaniya. Jesuucua tiuuniaa pueya sesonutaniyari, sacuaraatia nojori niishitiojosanota. Nojoriiri juhua marucatuque sareya tiuquitianutaniya Jesuucua tiuuniaa pueya tajinia. Taa marucatuque sare tiuquiya borregohua tajiniacuaani, puetunu na sooseejanaari, cuno pojoriiri naa miiniutianiya Pueyaso muerasutej. ³⁰ Naajuhuj, tama niajanijajiniinjiojuaarijia najuhuaana tamaatia niishitiojonu coteenutaniya na sapojonuta. Majaari Pueyaso panishano na niishitiojonuunu quiniutianiya tari. Naa sapojotunutaniya Jesuucua tiuuniaa pueyari, pueya tojiniuria nojori saniniuujia. ³¹ Janiyacuajaari nia sequeyani, jiyanohua nia cojuare tama nia cuaqueyajaaja. Nia niishirijihuhuj, jiuujanaraca marijiaari tari cua shocojoree pueyaracaanu cua niishitiojosacari niajaniya. Majaari cua tarinitianu quijia rootanu niajaniya, juuca, niucuanio. Janiyari naajaa cua namijiaacatenuta niishitiojoo puetunu niajanijajanaani. Majaari naa cua miishano nia niyajetanu pueyanaa.

³² 'Nia tiujanutaniya tarinijia. Janiyacuajaari pa Jiyaniijia juaashiquiajinia nia jataani. Na rupaa nia tojiriquia pueyaracaanu, juhua rishimiaca pueyano nia quiniuria, cumueecara. Nia jaara naa miiritij, Pueyasoori nia rijionutaniya na shuriucua, na saquiriojosano pueyata nia quiniuria. ³³ Niaata cua quishacari, majaari tama quiriajaaja cua paniniu quijia cumaneeca, toquenio. ³⁴ Niaari naa quiyano cua niqijiajuhuaj. Janiyari tama cua juaashiquiatajaaja poonijiojuani, cua panishano cua masetajara, cua cojiniaa panishano masetajarajuhuj. ³⁵ Janiyari nia niishitiojoojuani, naa poonijiosanotej casamiiuniucua pa naacunura pa jiiťiasanota. Majaari pa Jiyaniijia Jesu sequesano nia niyajetanujuhuj. Naa sequequiaariiri: "Maninia pueyano jaara na jiiťiasanojiniji niqitiore nareja tamonu pueyano, na niqitiosacari tamonu, nojuajaari socua shuquiriaatia quiya, niqitiosano masejajiniji".

³⁶ Naa nojori na sequenu nuhuajitij, Pabloori mojoquetaree. Puetunu nojoritajanaa secojoreeri. ³⁷ Puetunu pueyajanaari nujuqueturee. Pablo cacanuutureeri. Na nujuunetureejaariuhuj. ³⁸ Pueyari jiyanohua taraajeriquiaa Pablo sequenuucua nojori, maja tari socua na niqitiuniu quiniutianiya nojuaja. Nojoriiri caminiajiniaara rose-taquiaarijuhuaj, Pablo na niqitiuniuria buquejinia na tacasacari.

21

Pablo quiasacari Jerusalén tiacajiniara

¹ Efeso tiacajiniji canaa ruparetasacari, canaari shoniniacu caminia jiuujiaaco quiaareeni. Canaari Cos tiacajinia tiuquishiini. Cuniquiji canaa quiasacari tariqui, canaari Rodas tiacajinia tiuquishiiniuhuj. Tama tariqui canaa quiasacari Rodas tiacajiniji, canaari Pátara tiacajinia tiuquishiini. ² Pátara tiacajinia canaa tiuquishacari, canaari tii riuriatasee tamonu buque quera Fenicia jiyajiniara ruparetaanoni. Canaari tii tacataareeni. ³ Canaa jaaretasacari, canaari canaa muenecara niqimiöhua Chipre jiya tucuaatijani. Canaari Siria jiyajinia tiuquishiini. Cuno buquejinia canaa tii quiariquiaani, casami pariquiaari Tiro tiacajinia jatasocoriquiano. Naaratej, canaari Tiro tiaca tacatajajiniji

tiutiaseeni, casami jatanura tii. ⁴ Jesuucua tiuunaa pueyari tii quijajuhua. Canaari nojoritia quishiini. Canaari siete juuca camueenujusee cuniqui nojoritiani. Pueyaso Sohuanuuri cuniquijinio Jesuucua tiuunaa pueya niishitioquiaari taa Pablo miishaanutaniyani. Nocuaji nojoriiri Pablo sequetuquiaari maja na quianura Jerusalén tiacajinia. ⁵ Naajaa, siete juuca jaara tari shocojoquiaari cuniqui canaa quishacari, canaari tiji quiaquiaarini. Jiyacaritij, puetunu Jesuucua tiuunaa pueyajanaari necocohuata, mariyata necohuata canaata quiaquiaari canaa na jatanura buquejinia. Canaari rosetaquiaari tiacajiniji tacatajajinijiriani, Pueyaso canaa secojonura jaaquajinia. Puetunu canaajanaari mojoquetacoquiaarini shoniacu caminia casaqueyaji. ⁶ Na nuhuaji, canaari nojori cacanuuree canaa nuhuajiriani. Canaari buquejinia tacataqueeni. Nojoriiri tacatajajiniji quiojoquiaariuhua na tiajiniohua.

⁷ Canaari Tiro tiacajiniji jaaretaareeni. Canaari Tolemaida tiacajinia tiutiaseeni. Canaari cuniqui tacatasee puetunujuanaani. Canaari tii quijiaa Jesuucua tiuunaa pueya saruhuataseeni. Canaari nojoritia quishii niqiriyyatu juucani. ⁸ Tariqui saniniuujia, puetunu canaajanaari mariyata quiojoquiaari Pablotani. Canaari Cesareya tiacajinia tiuquishiini. Felipeeri cuno tiacajinia quiriquiaa. Canaari na tiajinia quishiini. Felipeeri Jesujiniji pohuatana quijia. Nojuacuaajaari Jerusalén tiacajinia coteenujuanaa tamacata jiyatesaquiaari mashiquiopue mianuuteriquiano. ⁹ Felipeeri necojori jiiitaja, saa caqueetacaneeja, niyacojori. Cuno niyacojoriiri Pueyaso Sohuanu jiiitajaca. Naacuajitij, Pueyaso Sohuanu niishitiojosano nojori jiuujajinia Pueyasojiniji pohuatenuujaari. ¹⁰ Canaa camueenujusacari cuniqui, jiyacari tiuquishi-iquiaariiri Judea jiyajinijinio pueyano. Nojuajaari Pueyaso sequenu panishano caminiujunia quijajuhua. Ágabo jiyaniishano pueyano. ¹¹ Nojuajaari canaacua niqiaari Felipe tiajinia. Jiyacaritij, Pablo cajin-
iocua camarucujua samaacataseeri. Nata morojoree tama na cashacucuaajaariija, na numatucuanio. Na nuhuaji sequerohuari:

—Jerusalén tiacajinia parta Judiocuacaari naa morojonutaniya nio cajiniocuaque camarutej. Na nuhuaji, taucuaa niqitiosaanutaniyari. Pueyaso Sohuanuuri naa cua sequereequij.

¹² Naa Cesareya tiacajinia quiniaa Jesuucua tiuunaa pueya tojishacar-
itij, canaajuhua, puetunu canaajanaari juucua Pablo nenecojoquiaarini maja na quianura Jerusalén tiacajinia. ¹³ Saa canaa sequereajaari:

—¿Casaara nia nujuquetiuyajaarani? ¿Niaateeri cua taraajonu pan-
iyaruhua? Majaari saaja cua paniniu pueya morojonura janiya Jerusalén
tiacajinia; janiyari tama cua cuaqueyajaaja panitiaacujua. Cuaara cua
motuuraqui, cua pohuatenuucua cua Jiyaniijia Jesujiniji.

¹⁴ Maja canaa naata na tarinitiniu quishacari, canaari socua na tarini-
tiareeni.

—Cuajaquij. Pueyaso cuaara miiria taa na miiniu paniyacuajani.

¹⁵ Naa canaa sequenu nuhuaji nojuaja juucuatej, canaari canaa ji-
itiasano casaa jeenucuareeni. Canaari Jerusalén tiacajinia quiaaree-
jaaniuhua. ¹⁶ Canaata quiojoquiaariiri Cesareya tiacajiniji Jesuucua
tiuunaa pueyajuhua. Canaata quiariquiaaariuhua Mnasón jiyani-
ishano pueyano. Nojuajaari Chipre jiya tucuaatiajajinijinio pueyano
quiquiaari. Nojuajaari tarijia Jesuucua tiuuja quijia. Nojuajaari canaa
sequetquiaari:

—Paa jaara Jerusalén tiacajinia tiuquishiini, niocua cua tiajinia quishii cuata.

Pablo pocoojosacari Santiagota

¹⁷ Canaa tiuquijiosacari Jerusalén tiacajinia, cuniquijinio Jesuucua tiuunaa pueyari canaa timitiaree canaa tiuquijiosacari. ¹⁸ Pabloori tariqui canaata quiaquiaari Santiago niquiniuucua. Tii quiriquiaajaariuhua puetunujuanaa Jesuucua tiuunaa jitianaa pueya. ¹⁹ Canaa tiuquishacari, canaari nojori saruhuataquiaarini. Na nuhuaji, Pabloori nojori pohuataquiaari puetunu Pueyaso miishanojuanaa na pohuatanuucua Jesujiniji, na rucuanajosacari tucuaaanu taucuaca quijia jiyacajinia. ²⁰ Pueya jaara naa tojiquiaari Pablo pohuatasanotej, puetunu tii quiniaajanaari Pueyaso maniniuhuaqueetaquiaari nojori shuquiriti-asacari Pueyaso.

Na nuhuaji, nojoriiri Pablo sequequiaari:

—Canaa tarajanunaa, taa quia niquiquiaacuajani, jiyanhua queraatia parta Judiocuacari Jesuucua tiuya. Puetunu nojorijianaari tariucuacaanu Moisés niishitiojosano tojitiajajahuaj, nocua nojori jiaatiantuta jiyanhua. ²¹ Nio Jerusalén tiacajinia quiniaa Jesuucua tiuunaa pueyari quiocuaji tojiqianujuhuaj. Quiaanaari tamonu jiyacajinia quijia parta Judiocuaca niishitiojoquiaa maja nojori miiniuria tari tariucuacaanu Moisés niishitiojosano. Quiaanaari niishitiojoquiaajuhuaaj maja nojori necohua cararaatiuuquia co nojori miatejonura, taa pa supuetanaa niishitiojosaquiaaricuaani. ²² Naacuajitij, pueya jaara niishiri quiaa tari niya tiuquiriohua, nojoriiri quia rerejotanutaniya ritia. ¿Taa pa miyarini? ²³ Canaari naa niishiriojijyani, naa quia miiri juhuari. Niya quiyari cuatro pueya na naca tuquenuuteriquiano, tarijia na sequetusano Pueyaso na tohuateenura. ²⁴ Nojori quia jiyataare Pueyaso Secojoua tiajinia. Niocua nia cuaqueya jeequejosee taa pa supuetanaa sequequiaaricuaajani. Naajuhuaaj, quiocua nojoriria cumaneeca niquitiore nojori naca riuujiushaanura. Quiaa jaara naa miiritij, puetunu pueyajanaari niishiniutianiya majaqui seetanujuanaa quiquianu pueya sequesano quiajanijajiniji. Niishituniutianiyajaariuhuaaj, quiaaqui tariucuacaanu Moisés niishitiojosano miyajaa. ²⁵ Majaari Jesuucua tiuunio taucuacaacia quia tacaaniu. Canaacuaajaari tari nojori nacasuquiaari canaa naajioneejiniani, nojoriicuaara canaa naajiosacari. Canaari nojori sequequiaari cutarani maja tari nojori tojiniuria Moisés niishitiojosano. Canaari nojori sequequiaarijuhuaj, maja na miaquenuunura shipinishano pueyasohuacuara puecoosano casaa, naajuhuaaj, maja na miaquenuunura nanaca. Canaari nojori sequequiaarijuhuaj maja na miaquenuunura shu na nanacataja, naajuhuaaj, maja na numuetacunura na camishoo maaji. Puetunu pa supuetanaa rootasanoinijijianaani, saa niojuuari taucuaca tojishocoriquiano rootasano.

Na cojiniaata Pablo quioosacari Pueyaso Secojoua tiajinia

²⁶ Pabloori narta Pueyaso pueya sequesano tojiquiaari jaarajaaja. Naaratej, nojuajaari cuno cuatro pueya jiyataquiaari tariqui. Nojoritia jeequejoquiaari na cuaqueyari taa Moisés niishitiojoquiaaricuaajani. Naa na miiniu nuhuajitij, Pueyaso Secojoua tiajinia tiuquitiaquiaariiri

pueyacuara secojonaacua. Na sequetuquiaariiri casaa juuca na tu-
cuatatanutaniya na cuaqueya na jeequejonuununi, naajuhuj, casaa
juuca nojori panutaniya Pueyasora na niquitiosocoriquianoni.

²⁷ Quera nojori tucuatascari puetunu cuno semaana juucajanaa, Asia
jiyajinijinio narta Judiocuacaari Pablo niquiquiaari Pueyaso Secojoua
tiajinia. Nojoriiri puetunu pueyajanaa nasajoquiaari ritia. Jiyacari
Pablo quiatureeri. ²⁸ Na quiatusacari Pablo, pueya na jiiquioonuuta-
reeri:

—¡Israel pueyanaa, miji! ¡Canaa nia naacuseeja! Niiori noo
pueyanocujaja tiquiyocua na rucuanesaqui pueya niishitiojoquiaa
sacuaratía pocuaratej, nio Pueyaso Secojoua tiaacuarajuhuj.
Naajuhuj, tariucuacaanu Moisés Rootasano sesacatequiaa
pueyajaariuhuj. ¡Quiarijiani, pa Secojoua tiajinia sacuaratía
tiuqiniitíaree taucuacaari!

²⁹ Cuno Judiocuacaari naa sequetuquiaari Pablotej, Tróximo jiyanis-
hano pueyanota nojori niqiniuucua nojuaja tarijia na rucuanesacari
cuno tiaacajinijaja. Tróximoori Jesuucua tiuunia tahue quijia, Éfeso tia-
cajinijinio pueyano. Naaratej, cuno Judiocuacaari jiyaniquiaari Pablo
naasucuaari cuno tahue tiuquinirii Pueyaso Secojoua tiajinia.

³⁰ Puetunu Jerusalén tiaacajinia quiniaa pueyajanaari juaaquoquiaari.
Pabloocua netecuatuquiaariiri. Na quiatureeri. Pueyaso Secojoua
tiacoji na jaatiuquiaari carijiniacumaari. Pueyaso Secojoua tia to-
huateyari ritia tionujusaaquiaari na nuhuaji. ³¹ Pueyari tari monu
paniriquiaa Pablo. Jiyacaritij, tii Jerusalén tiaacajinia quijia Romano sol-
dadohua comandanteeri numootesaaquiaari: “¡Judiocuaca na juani-
tia nacoya!” Cuno comandanteni, nojuajaari soldadohua capitáncuaca
jiyaniijia. ³² Jiyacaritij, comandanteeri na soldadohua rerejotequiaari
ritia, na capitáncuacano. Tee pueya nacooriguiaani, nocua netecu-
atuquiaariiri. Judiocuaca jaara niquiquiaari comandante na soldado-
hua neretaano nojoriicua, jiyacari shusha cartetuquiaari Pablo piquitiu-
niuri. ³³ Comandante tiuquishacari nojoriicua, Pablo quiaseejanaari.
Na soldadohua sequereeri:

—Caapiqui cumayocua casaa nia saatijiore na numatucua cajiniocua.
Comandanteeri na nuhuaji pueya nequesoreeree:

—¿Cante nio pueyanoni? ¿Casaa na miiriini?

³⁴ Pueyari saaja jiyajeneta nacooriguiaa. Niiori tamaatia na-
cooriguiaacujua. Tamasacaari socua tamaatia nacooriguiaajanaajataj.
Comandanteeri cunora maja na niishiniu quiquiaari casaa Pablo mi-
irijiaarani, puera nojori cojuatunenuucua na nacoosacari. Cunora na
soldadohua sequereeri:

—¡Pa quijia tiajinia nia jaatucuyarohua!

³⁵ Soldadohua tacatasacari tari nojori quijia tia tacatuhuoco Pablo
nojori jaatucusacari, Judiocuacaari jiyacari quera na macaniutia socua
shiiniuquitiaquiaari Pabloocua, na monu paniniuria juucua. Soldado-
huari nojoriicujaja Pablo shiitioquiaari jiyocuaaanu. ³⁶ Pueyari soldado-
hua nuhuaji na cocuatesacari jiiquioonuuriquiaa:

—¡Nia more cuno sesaaca! ¡Nia more!

Tama nocuaji Pablo tacusacarijiaaja

³⁷ Quera soldadohua tiuquinishacari Pablo nojori quijia tiaco,
Pabloori soldadohua comandante sequeree:

—Quenaaja niquiriyatu rupaa sequereera cuno pueya.

Comandanteeri na riucuaaree:

—¿Quiaaquiiri Griego rupaa pocuaja? Janiya juucua quia jiyaniriquiaa Egipto jiyajiniinio pueyanoni. ³⁸ ¿Majateeri noo quiajaniya quiquianucuaaja, cariiquia jiyajinia jiyatacanu cuatro mil puecoojuaca pueyatej?

³⁹ Pabloori saaja na sequereee:

—Janiyari Judio pueyanoni, Tarso tiacajinia rasanotuhuj. Naacua-jitij, janiyari Tarso tiacajiniinio pueyanoni, teyano tiacatucuaaja socua panishano tiaca Cilicia jiyajiniani. Quenaaja rupaquijia cua tarishitir-icuarajaj. Cuno pueya sequenu paniya niquiriyatu rupaa quenaajanijia.

⁴⁰ Comandanteeri socua na sequereee:

—Quia pocuare.

Pabloori jiyacari tacatujiniji nujaquiaari. Na juaashiquia shi-itioquiaari pueya na sanaajanuraari. Puetunujuanaa jaara sanaajetaquiaari, nojoriicuara pocuaree tama nojori Hebreo rupaaajiniaari. Naa nojori sequereeri:

22

¹ —Cua tapueyocucanaa, cua jiyaniijianucuaanaa, nia tojitiare cua sequesano niajaniya tama cua tacusacarijiaaja cucuaji.

² Cuno pueya jaara tojiquiaari Pablo pocuasacari nojoriicuara Hebreo rupaaajinia, pueyari maninia sanaajetaquiaarijianaa. Pabloori nojori sequereee:

³ —Janiyari Judio pueyanoni. Tarso tiacajinia cua raja, Cilicia jiyajinia. Janiyari nio Jerusalén tiacajinia maashiquiaarini. Gamalielri cua niishitiojona quijia. Jiyanohua rootasaaquiaari pa supuetanaa niishitiojosanonijia. Janiyari pueyaracaanu Pueyaso panishano miiniuucua jiaatuaquiaani, taa quiarijia nia miiniu paianianijia. ⁴ Janiyari tarijia Jesuucua tiuunaa pajejani naquiya cua miitiasocoriquiano. Janiyari na mooquiaarijuhuaj. Janiyari canuu cojiritiaquiaari quioonu maajipohuatajani, cua nujuatejosocoriquiano nujuatejojuajinia. ⁵ Pueyacuaara secojonaa camarnuuri cua miijiosano niishiyajuhuj, puetunu pa jiyaniijianucuaajanaano. Nojoricuajaari cua niqutitioquiaari nojori naajione Damasco tiacajinia quiniaa parta Judiocuacaacuara. Janiyari juucua quiariquiaa Jesuucua tiuunaa pueya cua pajenura Damasco tiacajiniani. Quera cua quioosano cua nitiamohua niya Jerusalén tiacajiniani, saniitiojosocoriquiano.

Pablo pohuatasacari Jesuucua na tiuuniujiniji

⁶ Janiyari juucua nucuaco quiariquiaani. Quera cua tiuquishacari Damasco tiacajinia, panacariiri quiriquiaa. Canashiyaquiji jiyanohua shacantuuca juhua miacanaari cua nunuquiaari. ⁷ Janiyari juhua jatasaareeni. Jiyacaritij, janiyari rupaa tojirii cua sequayanoni: “Saulo, Saulonaa, ¿casaara quia miitiaa puera janiyani?” ⁸ Janiyari na nequesotareeni: “¿Cantequia Jiyaniijianaa?” Cua sequereeri: “Janiyacuaajaari Jesuni, Nazaret tiacajiniinio pueyano. Cunocuaajaari quiaa na miitiaani”. ⁹ Cua cojiniaa pueyari cuno shacantuuca na niquishacari shiri-iquititioquiaari. Majaari na tojitiuniu quiquiaari cutara jiyocuaanuji rupaa cucua pocuaano. ¹⁰ Janiyari socua na sequereeni: “¿Casaa cua miyarini Jiyaniijianaa?” Jiyaniijiaari cua sequereeni: “Quia sanerohua. Naajaa quia quiaare Damasco tiacajinia. Quiaari tii sequesaanutaniya

puetunu cua panishanojuanaa quia miiniuria”. ¹¹ Cuno shacantuua cua nunuquiaari jiyocuacaanujini, cua namijia sesoquiaariiri. Janiyari cariyajuaru quiriquiaani. Naacujitij, cua cojiniaari cua jaatucutuquiaari. Naa cua tiuquitiatusee Damasco tiacajiniaari.

¹² Tamonu pueyanoori cuniqui quijia, parta Judio pueyano. Na sesaari Ananías quijia. Nojuajaari seetanujuanaa tariucuacaanu Moisés niishitiojosano tojijia cutara. Puetunu Damasco tiacajinia quiniaa Judiocuacaari na panijia. Nojoriiri na sequetujua: “Ananías cutaraari maninia pueyano”. ¹³ Ananíasri jiyacari cua niquiniuucua niquiaari. Jaara tiuquiquiaari cucua, cua sequeeseeri: “Cua tarajanu Saulonaa, maninia niquijiaara quia quiriohua”. Jiyacaritij, cua namijiaari ritia jeequequee. Janiyari maninia niquiqui Ananíasni. ¹⁴ Cua sequereejariuhuj: “Pa supuetanaa Jiyaniijia Pueyasocujajaari quia saquiriojoquiaari tariucuacaanujiniji, na niishitionura quiajaniya na panishano quia miiniuria. Quia saquiriojoquiaarijiaariuhuj quia niquiniuria taquiya pocujainio sesa miyashijia cutara, tama na camaru rupaajiniji quia tojinijia na sequesanojuhuaj. Nojuacuajaari pa Jiyaniijia Jesu-cristo. ¹⁵ Quiaari puetunu pueyapue niquiarajanaa pohuatanutaniya nojuajiniji quia niquishano, quia tojishanonio”.

¹⁶ Ananíasri socua cua sequequiaari: “¿Casaara quia tarishiyarini? Quiarijiani, quiaa cuara tiuquinishaaria. Jiyaniijia Jesu quia sequere: ‘Cua jiyanoori sesa cua miishanojiniji’. Nocua quia tiuushacari, quia sesa miishanoori jeequesaanutaniya”.

Pablo pohuatasano taa Jesu jiyaroquiaari nojuaja taucuacaacuani

¹⁷ Janiya jaara rujiuuquiaariuhua Jerusalén tiacajinihuani, janiyari Pueyaso Secojonujua tiajinia secojoriquiaani. ¹⁸ Cua secojosacari, janiyari Jesu niquiquiaari juhua cua maquenujiniani. Cua sequereeri: “Ritia quia quiaare niiquiji. Nio pueyari maja na tojitianu quiniutianiya quiajaniya, nojori quia pohuatasacari janiyajiniji”. ¹⁹ Janiyari saaja na sequereeni: “Cua Jiyaniijianaa, nojoricuajaruhua niishiya janiyari quiocua tiunnaa pueya quioojuani puetunu rerejoja tiajinijijianaa cua nujuatejosocoriquiano nojori. Janiyari nojori mojuajuajuhuj. ²⁰ Naajuahuaj, quia rupaa pohuatana Esteban jaara mosaaquiaaritij, janiyari catecaji saitia na jacusacari shootiaquiaarini. Janiyari na jacunaa toqueya cojuariquiaaaniuhuj, nojori mosacari Esteban. Janiyari jaarajaaja sequequiaarini: ‘Cuaara mosaaria’ ”. ²¹ Naa cua sequesacaritij, Jiyaniijiaari saaja cua sequereeni: “¡Niiquiji quia quiaarejaj! Janiyacuajaari tucuacaanu quia jiyaronutaniya taucuacaacuani”.

Comandante jitiiasacari Pablo

²² Pueyari sanaa tojitariquiaa Pablo pohuatasacari. Saniniuuja, Pablo jaara jiyaniquiquiaari taucuaca, pueyari jiyacari coteequiaari nacoonu, taucuaca sojeaca nojori quiniuucua:

—¡Cuaara mosaaria cuno pueyano! ¡Majaari maninia jiyano pueyano rishiniuria socuatej!

Cuno pueyari naa nacooriquiaa.

²³ Na juaaquionaa na nacoosacarijia, na toqueya quejootuquiaari jiyocuacaanuuri quera na macaaniutia. Naa quejootuquiaari jiyojuaajariuhuj. ²⁴ Comandanteeri na capitáncuaca sequequiaari Pablojiniji:

—Nio pueyano nia tiuquiniri nia quijia tiajinia. Niocua na saniri majacununoj, cuara sequeera casaara naa pueya nacoyani.

²⁵ Soldadohua jaara tari Pablo morojotuquiaari tiacuara na majacutusocoriquiano juucua, Pabloori capitán sequequiaari:

—¿Jiyaniijia César rootasanotee, naa nequesoreesoojua nia majacunura narta Romano pueyanotej?

²⁶ Capitán jaara tojiquiaari naa Pablo sequesantej, ritia netequiaari-iri. Na comandante sequeeseeri:

—¡Quiaa cocuaatia miya! ¡Cuno pueyanona Romano!

²⁷ Comandanteeri ritia Pabloocua catecanoquiaari. Na nequesotaseeri:

—¿Seetanutejanaa? ¿Quiaatena Romanotej?

Pabloori na riucaaree:

—Taaquiririnij.

²⁸ Comandanteeri na sequerohuacuhuj:

—Romano pueyano cua quiniuria, janiyari queraatia cua cumaneeca niquitioquiaarini.

Pabloori saaja na sequere:

—Janiyari Romano cutarani, nojori tiacajinia cua rasaanuucua.

²⁹ Cuno pojori, Pablo majacunura seeratasaaquiaari juucuan, naa nojori tojtiasaciritij, Pablo shuriucuj ritia shiriquitiaquiaariiri. Comandante niishishacari Pablo seetanujuanaa Romano quiquiaari, puerereejaariuhuj, Pablo na morojotenuucua.

Tama nocuaji Pablo tacusacarijiaaja Judiocuaca jiyaniijianucua niquiara

³⁰ Tariqui saniniuujia, comandanteeri maninia niishiniu paniquiaari casaara Judiocuaca nacootariquiaacuaa naa Pabloni. Naaratej, comandanteeri Judiocuacaacuara secojonaa jiyaniijianucua rerejotequiaari. Puetunu Judiocuaca camarucua nacasunaa maanujuanaa rerejotequiaarijaariuhuj. Nojoricuajaari Sanedrín maanu. Jiyacari Pablo numatucujiniji rupareetaquiaari cumayocua saatijiotasanoori. Puetunu nojorijianaa jaara tari rerejoquiaari, jiyacari Pablo tohuatequiaariiri. Nojori taccoji na nujuatereeri.

23

¹ Pabloori juhuacatecara pohuatanu coteequiaari camarucua niquiara. Nojori sequereeri:

—Cua tapueyocuaanaa, janiyari pueyaracaanu juhuajaniya quiquiaani, Pueyaso tojjia cua quishacari pueyaracaanu.

² Naa Pablo sequesaciritij, pueyacuara secojonaa jiyaniijijanaari juaari. Ananías na sesa. Nojuajaari Pablo jiyaniquiaari najuhuaana pocuaa naasucua. Nocuaji, Ananíasri Pablo shuriucua nujuatunaa sequequiaari ritia:

—¡Na rupaajinia nia piri naa pocuaaniquitij!

Pablo shuriucua nujuanaari jaarajaaja na piqui. ³ Majaari Pablo niishiniu quiquiaari casaate Ananías quiquiaarini. Naacuajitij, Pabloori juhuajaniya Ananías sequequiaari:

—¡Pueyasoori saniniuujia cucua quia naminiutianiyacujua, Moisés Rootasano tojiyashijanaa! Nia jiyaniishacari janiyari Moisés Rootasano tojiyashijani, niaari coteenu cua nequesoreya maninia taa Moisés

rootaquiaaricuajani. ¡Quiaa sajara Moisés Rootasano tojiyashijia cutara, quia sequesacari cua pishaanura nia nequesoreyaquishacarijia maninia janiya!

⁴ Pablo shuriucua nujuatunaari Pablo sequequiaari:

—¿Quiaateeri saa rerequeteyajaa pueyacuara secojonaa jiyaniijiaruhua?

⁵ Pabloori nojori riucuaaree:

—Cua tapueyocucanaa, cua jiyanoori. Paacuaajaari naa rootasaquiaari Moisés nequesoreetuneejiniani:

“Majaari sacuaraatia rimiaaquenu nia camarnuucuaa”.

Cua pueyanaa, maja cutaraari cua niishiniu quiriquiaa nojuajate pueyacuara secojonaa jiyaniijia.

⁶ Pabloori niishiquii cuno Judiocuaca camarucua nacasunaa cuniqui quiriquiaani, noojiaqueya nojorijiniiniioori Saduceocuaca maanujiniji quiriquiaa. Tamasacaari saniniuujia narta Fariseocuaca maanujiniji quiriquiaacujua. Naaratej, Pabloori jiyanoohua na rupaa paaretaquiaari naa na sequenura nojori:

—¡Cua tapueyocucanaa, janiyari Fariseo pueyanoni! Cua shipinioori Fariseo pueyano quiquiaarijuhuaj. Canaari Pueyaso Rupaacua tiuujacani. Naacuajitij canaari niishiyani Pueyasoori macunucua samiitianijionutaniuha taa puetunu cuarta Fariseocuaca niya quiniaa tiuyanijia. ¡Niaaquiiri jiyamitia cua nequesoreya!

⁷ Pablo jaara naa sequequiaaritij, Fariseocuacaari Saduceocuacata juhuacatecara juayonuutaquiaari tama nojorijiaaja. Naacuajitij, nojoriiri caapiqui maapuera raqititiquiaari. ⁸ Saduceocuacaari jiyaniya maja macunucua samiitiaconu quiniutianiuha. Nojoriiri sequeyajuhaaj: “Maja Pueyaso seya quiniu”. Pueyapuenaari sohanuujujuhuaj. Fariseocuaca cutaraari nojori cuaracashitishanoocua tiuya. ⁹ Naacuajitij, puetunu pueyajanaari nacooriquiaa na juayonuutasacari. Jiyacaritij, tariucuacaanu Moisés Naajiotasanojiniji niishitiojonaa pueyari sanetaquiaari. Nojoriiri Fariseocuaca quijiajuhuaj. Nojoriiri naa sequetuquiaari Pablojiniji:

—¡Nio pueyanoori maja sesa na miiniu quiquianu! Maninia sohanu jiyoteeri nocua muetacanu, Pueyaso seru soj. Majaari pa niishiniu. ¿Paatucua casaara tenujere Pueyaso panishano na miishacarini?

¹⁰ Pueyari socua jiyacatequiaari nacoonu. Comandanteeri puerequiaari, na jyanishacari Pablo naasucua socua sureesaanutanियाquij. Naa jyaniquiaariiri, puerajanaa pueya juaaquiosacari. Nocuaji, comandanteeri ritia na soldadohua jiyaramiquiquiaari, na tajinia nojori tiuquininiuhaara Pablo pueya tajiniji. Naa miitiquiaariiri.

¹¹ Cuno niucujani, Jiyaniijia Jesuuri Pabloocua muetaquiaari. Na sequereeri:

—Quioojia quia cumaquiri Pablonaa. Naatej, taa quia pohuatarucuaa janiyajiniji niya Jerusalén tiacajiniacuaani, quiaari naa pohuatanutanija janiyajiniji Roma tiacajinia quiniaajuhaaj, Césarjanaa niqiuarajuhuaj.

Judiocuaca roojotoosacari Pablo na motunura juucua

12 Tariqui saniniuujia, noojiaqueya Judiocuacajinijinioori Pabloocuara roojotooquiaari na monura. Nojoriiri naa sequetuquiaaritiij:

—Paa jaara Pablo moyaquirini, pocua miaqueyaquirini, pocua ratuyaquirijianihuhaj.

13 Nojoriiri cuarenta canuu quiquiaari, naa sequetuquiaarini. 14 Na nuhuaji, cuno pojoriiri pueyacuara secojonaa jiyaniijianucuaacua quiaquiaari, Sanedrín maanuucuanio. Nojoriiri naa sequetuquiaari:

—Majaari canaa miaquenu quiniutianiya quenaaja casaa, canaa cuaraa more Pablojaatijia. 15 Niajaniya, pueyacuara secojonaa jiyaniijianucuaanaa, puetunu Sanedrín maanujuaanaano, nia sequere comandante cuaraa nitiaara tariqui Pablo niaacua. Niocua naa na sequerenoj: “Miji Pablo quia nitiaare. Canaari socua maninia na nequesoreenu paniyani”. Canaacua jiyacari niaacua na tiuquiyaquishacarijia nuu cajiniocua na moreni.

16 Tamonu pueyanoori Pablo raaquia caminiujuquiaari naa cuno pojori sequesano camarucuatej. Pablo raaquiaari nocuaji ritia soldadohua quijia tiajinia quiaquiaari na cama Pablo na pahuatanura. 17 Jaara tari na pahuataquiaari, Pabloori jiyacari cuniqui cojuanaajinijinio capitán piiquiaari. Na sequereeri:

—Nio caya samijia quia jiyataare comandantecua. Nojuajaari comandante numootenu paniya.

18 Jiyacaritij, capitánri Pablo raaquia jiyataquiaari. Na tiuquishacari, comandante sequequiaariiri:

—Pa quiasano Pabloori cua piiriini. Cua sequereeri cua nitianura quiocua nio caya samijia. Nojuajanaari casaa quia sequenu paniya.

19 Jiyacaritij, comandanteeri caya samijia numatujiniji quiaquiaari. Tamocora na jaatucureeri. Tii na nequesotaseeri:

—¿Casaa quia sequenu paniya janiyani?

20 Caya samijiaari na sequereeri:

—Noojiaqueya Judiocuacajinijinioori Pabloocuara roojotoorucuaa. Quiaari sapojonu sequesaaanutaniya tariqui quia jiyatanura Pablo, puetunu Sanedrín maanujuaanaa niqiuara nequesoreesocoriquiano.

21 Quiaa jaara sequesaaere, majaari nojori tojinuu. Cuarenta canuuri tari nuu cajiniocua nocuaji jamaatiuya. Cuno pojoriniaari maja na miacquenuunu quiniutianiya, majanaari na raruunu quiniutianiyajuhuj, cuaraa moture Pablojaatijia.

22 Comandanteeri caya samijia sequequiaari:

—Maniniacuaja. Majaari tamasaca pahuatanu quia sequesano janiya. Tariucujia. Quia quiaarohua.

Soldadohua jiyatasacari Pablo camarnu Félix

23 Comandanteeri caapiqui capitán piiquiaari. Nojori sequereeri na numootejonura dosciento soldadohua, Cesareya tiacajinia quiojoriquiano cuno niucujia. Mariyata cuaraa quiojoora setenta soldadohua caballohua nijinia cajitiujiacajuhuj, socua dosciento soldadohua saa cashiriacajano. 24 Comandanteeri na capitáncuaca sequequiaarijihuaj, nojori niojotanura cajitiucua tamasaca caballohua nijinia Pablo cajijiara. Nojori sequequiaarijiaariuhuj:

—Niocua maninia cojuare Pablo, cuaraa tiuquiiiria camarnu Félix nequesoreesocoriquiano.

²⁵ Comandanteeri na naajionee niqutioquiaari Pablo jiyatanaa. Naa naajiosanoori quiquiaari camarnu Félixcuara:

²⁶ “Camarnu Félixnaa. Nio Claudio Lisias naajionee. ¿Taa quia quiyani cua panishano camarnunaa? ²⁷ Cua jiyarotasano pueyanojiniji quia pohuatareeraj. Na sesa Pablo. Narta Judiocuacaari na motunu paniquianu. Janiyari jiyacari cua soldadohuata nocua tiuquishii namitiani. Janiya jaara niishiquianuni nojuaja Romano pueyano, janiyari cua soldadohua sequereeni: ‘Judiocuacaacuaji nia quiare ritia cuno pueyano, mariqui na motureeri’. ²⁸ Maninia cua niishiniuria casaara naa pueya nacootariquiaa Pabloni, janiyari puetunu Judiocuaca camarucua nacasunaa rerejotecanuni. Janiyari nojoriicua tohuatecanu Pabloni, nojori nequesoreenura nojuajanaa cua tojishocoriquiano. Janiyajanaa jaara Pablo tojiquianuni, casaara pueya monu paniriquiaanoj, janiyari jiyacari shusha niishiriini. ²⁹ Nojoriqiiiri na nacootacanu Pablo tojiyaquiniuucua tariucuacaanu tama nojori supuetanaa rootasanojuaja. Cunora na motunu paniriquiaari. Janiyari quia sequeyani, ¿maatucua cunora mosaareeri? Majaari quenaaja sesa na miiniu quiquianu, pueyaracaanu na nujuatesaanura. ³⁰ Janiyari sequesaaarucaajuhua, noojiaqueya Judiocuacajinijinionaari na monu paniya. Janiyari jiyamitia quiocua cua soldadohua na jiyarotareeni. Janiyari nocuara saquiriojotanaa sequesaaarucaajuhua, cuara quia saquiriojotatuura nocuara cutara. Cunojuanaa quia sequeyanijia cua camarnunaa. Tariucuaja”.

³¹ Soldadohuari naa miiquiaari taa comandante sequequiaari nojoricuajani. Nojoriiri cuno niucuaja Pablo jiyataquiaari. Antípatris tiacajinia tiuquiiijioseeri. ³² Na nioluacata quiojonaa soldadohuari Antípatris tiacajiniji tariquicuaji riujuutiaquiaariuhua Jerusalén tiacajiniuhua. Caballohua nijinia cajituniaa soldadohua cutaraari Pablo jiyataquiaari. ³³ Pablo jiyatanaa jaara tiuquiiijioseequiaari Cesareya tiacajinia, nojoriiri comandante naajionee niqutiosee camarnu Félix. Pablo na niqutioitureejaariuhua. ³⁴ Camarnu serojonu nuhuaji comandante naajionee, Pablo nequesotaquiaariiri:

—¿Tee quia rasaanquiaarini?

Pabloori na riucuree:

—Cilicia jiyajinia rasanonijia.

³⁵ Camarnuuri na sequeree:

—Janiyacua quia nequesoreeriquiani quiocuara saquiriojotanaa jaara tiuquiiijiore.

Jiyacaritij, camarnuuri na soldadohua sequequiaari cuara maninia cojuatuura Pablo tariucuacaanu jiyaniijia Herodes tiaco. Herodes quishacari jiyaniijia, cuno tiaari nocuaji tiasaaquiaari na quijiara.

24

Tama Pablo tacusacari nocuajijiaaja camarnu Félix niqiuara

¹ Pabloori cinco juuca camueequiaari tari Cesareya tiacajinia. Jiyacari tiuquiiijioquiaariiri nocuara saquiriojotanuuriquiano pueya. Nojoriiri quiquiaari pueyacuara secojonaa jiyaniijia Ananías, mariyata secaja

Judiocuaca camarucuanio. Nojoritia tiuquiquiaariiri Tértulo jiyanis-hano pueyanojuhuaaj. Jiyanohua pocuanu niishijia. Puetunu nio pojori-jianaari camarnu Félix^{cua} tiuquitiaquiaari Pabloocuara na saquiriojotana. ² Pablo jaara tohuatesaaquiaari nojoriicua, Tértulo juhuacatecara coteequiaari camarnu Félix saquiriojotanu nocuara. Naa sequequiaari camarnu Félixri:

—Canaa camarnunaa, quiaari jiyanohua niishijia. Naa niishijia quia quishacaritij, quiaari maninia quia pueya jiiitaa. Canaari naacua juhuajaniya quiyani, maninia canaa quia jiiitiasacari. ³ Canaari cunora quia timitiaani camarnunaa, maninia quia jiiitanuucua canaa pueyaracaanu, puetunu canaa jiyajinijanaa. ⁴ Maja puera cua tarishitiniu paniniu quiajaniya. Quenaaja rupaquijia canaa quia tojiricua. ⁵ Nio pueyanoori tariucuacaanu canaa supuetanaa rootasano tamacateya queraatia cuarta Judiocuaca. Nojuajaari tamaatia niishitiojoquiaa tamonu jiyacajinia quiniaa Judiocuacajuhuaaj. Naa sesa na niishitiojonuucua pueyatej, tamasaari maja tari na rupeunu paniniu narta pueyano. Nio pueyano tojitiajacaari sesojosaaquiaari Nazarenoocua tiuniaa maapue. Nio pueyanocuaajaari cuno pojori jiyaniijia. ⁶ Juucua Pueyaso juaatiniu paniquianujaariuhuaaj, tahue na tiuquininiu panishacari Pueyaso Secojojua tiajinia. Canaari jiyamitia na quiarucuaani, canaa nequesoreesocoriquiano taa tariucuacaanu canaa supuetanaa rootasaaquiaaricujani. ⁷ Comandante Lisiasri canaa na jaariutiarucuaa saajani. ⁸ Canaa sequerucuaajaariuhuaaj: “Cante nio pueyanocuaara saquiriojotanu paniyani, cuara quiaara camarnu Félix^{cua}”. Naa canaa sequerucuaari. Nio pueyano quia nequesotasure, quia niishiniuria maninia. Seetanujuanaacuaaj, canaari cunora nocuara quia saquiriojotaani.

⁹ Cuniqii quiniaa Judiocuacaari jaarajaaja sequeturee:

—Taaquiriirinij, camarnu Félixnaa. Naacuaaquiniatejaj, taa Tértulo sequeyacuajani.

¹⁰ Camarnuuri na juaashiquia shiitioquiaari Pablo pocuanura saniniujia. Pabloori jiyacari coteeree. Naa sequereeri:

—Taaquiriirinij, pocuashiyacuaaquiniatejaj. Camarnunaa, janiyari niishiyani, quiaari tari queraatia marijia shocotejiya cuarta Judiocuaca nequesoreena quia quishacari. Naaratej, janiyari juhuajaniya quia niqiuara tama cucuaji tacunu paniyani, cuarta Judiocuaca saquiriojotasacari cucuara quiajaniya. ¹¹ Janiyari shusha tiuquirohuacuaa Jerusalén tiacajiniani, Pueyaso cua secojonura Secojonuujua tiajinia. Janiyari shusha camueesuhua doce juucani. Cucuara saquiriojotanaa quia nequesoreesureeraj. ¹² Nojoriiri maja quenaaja na riuriatanu quiquianu janiya tamonu pueyanota juayonuutaano. Majaari na riuriatatunu quiquianu janiya pueya ruutaqueyano quenaaja Pueyaso Secojojua tiajinia. Majaari quenaaja nojori riuriatanu quiquianu janiya canaa Secojojua tiajinia juayonuutaano pueyata. Majaari quenaaja naa cua miiniu quiquiaari puetunu tiacajinijanaa cua rucuanesacari. ¹³ Nio pojori cucuara quia saquiriojotaani, nojoriiri maja na naata sequenu seetanujuanaa janiya sesa miijiani. ¹⁴ Nojori sequesacari janiyanaari Pueyaso tojjia tamaatia nojoriinijini, cua tojinuuucua cuno Nazareno pueyano, taaquiriirinij. Saaja cuno nojori sequesano cutaraari seetanujuanaa. Janiyari Nazareno tojjiani seetanujuanaa cua

tiuushacari puetunu Moisés naajiotasanoocujanaa, naajuhuj, cua tiuushacari puetunu canaa supuetanaa caminiujiushano Pueyasojiniji naajionuutasanoocujanaano. ¹⁵ Janiyari juhua cucuara saquiriojotanaa pueya tiuya Pueyasooaujuhuj, taa Pueyaso samiitianijionutaniuhua macunucuari; maninia miijiaca, sesa miijiacanio. ¹⁶ Naaratej, janiyari pueyaracaanu sesa miyaquiniu saniniujuiquiaani, maninia cua quiniuria Pueyaso niquiara, pueya niquiaranio. Naacuajitij, janiya jaara samiitiarohuani, majaari cua macuhujenu quiniutianiya.

¹⁷ 'Queraatia marijia cua shocotejonu nuhuaji cua rucuanijosacari tamonu jiyacajinia, janiyari shusha tiuquiriohuacuaa cua jiyajiniani. Tamonu jiyacajiniji Jesuucua tiuunaa niquitiojosano cumaneeca tiuquitiarohuacuanijia. Janiyari na tiuquitiarohuani na jatanuhuara Jerusalén tiacajinia, Jesuucua tiuunaa casamiijiuniucua niquitiojosocoriquiano, mariyata cua jiiitasanojiniji cua niquitionuhuara Pueyasora. ¹⁸ Naa cua miiniu nuhuaji Pueyaso Secojoua tiajiniatej, Asia jiyajinijinio Judiocuacari cua naacutucanu tohuataano juucua Pueyaso Secojoua tiajiniji. Janiyari juucua tohuatariquiohuani cua cuaqueya cua jeequenu nuhuaji, taa canaa supuetanaa niishitiojosaquiaaricujani. Cuno juuca, majaari queraatia pueya quiniu quiriquiaa Pueyaso Secojouuujajinia. Majaari quenaaja pueyata cua juayonuuatanu quiriquiaajuhuj. ¹⁹ ¿Teete cuno pojoricuarani? Mariqui niya nimaacara cucuara na saquiriojotanuunura, janiya jaara sesa miiquianuni. ²⁰ Cucuara saquiriojotanaa jaara nijiyaquimia, naajaa, nio pojori niya quiyani, nojori Judiocuaca camarucua nacasunaa nequesoresacari janiya tii quituquianu jiyacarijuhuaj. Nojori cuara sequeera, ¿cuno camarucuate cua sequecanu janiya sesa miiquianuni? ²¹ ¿Pueyateeri cucuara saquiriojotaa soj, nio cua sequenuucua Judiocuaca camarucua: “Niaari cua nequesoreya quiarjia, cua niishishacari macunucuari samiitianijosaanutaniuhua”? Janiyacuajaari naa nacacanu camarucua nequesoresacari janiyani.

²² Camarnu Félix jaara naa tojiquiaari Pablo sequesantej, nojuajaari pueya sequequiaari:

—Comandante Lisias cuara tiuquiirijaara, janiyacua Pablo nequesoreeriquiani.

Camarnu Félixri Jesujiniji pohuatasano tari maninia niishiquiaari. Naaratej, nojuajaari Pabloocua saquiriojotanaa pueya tarinitiaquiaarijaara. ²³ Na nuhuaji, camarnu Félixri soldadohua capitán sequequiaari:

—Pablo nia tiuquiniriohuajaara. Niocua maninia na cojuarenoj. Na rupueña, tapueyocucanio, nojori jaara Pabloocua nimiaquia, majaari nocuaji na tenujununoj. Nojori cuara na niquitiotuura na panishano.

²⁴ Na nuhuaji, camarnu Félixri tamaqui quiaquiaari camueenujunura. Na nuhuaji, juhua shusha tiuquiquiaariuhua necocuataari. Necocua Drusilaari Judiocuacajinijinio maaji quijia. Camarnu Félixri na soldadohua sequequiaari:

—¡Pablo nia tohuatere! Janiyari cua niquiocuata na tojinu paniyani. Cuara canaa niquiara pohuataara taate Jesuucua tiuushanojuaarani.

²⁵ Naacuajitij, Pabloori Félix pohuataquiaari nojori niquiara taate pa naata maninia miijara pa quiniuni. Pohuataquiaarijuhuaj taate pa naata tama pa cuaqueyajaaja pa cojuanu maniniani, sesa pa

miyaquiniuucuaaji. Naajuhuj, Pabloori na numootequiaari Pueyasoori sesa miijiaca saniitionutaniya.

Camarnu Félix jaara naa tojiquiaaritij, jiyanoehua shiriquiquiaariiri. Pablo sequereeri:

—¡Tariucuaaja! Quia quiaarohuacuarajaara. Janiya jaara jeya quiriquiani, janiyacua quia sequereeraniuhuj.

²⁶ Camarnu Félixri naa sequerarucua na soldadoehua sequequiaari Pablo na jiyatanura nocua, nata na pocoojonura. Nojuajaari juucua jiyaniquiaari Pablo naasucuaari cumaneeca na niqutionutaniya na cartesaanura. ²⁷ Pablo shocojoquiaariiri caapiqui marijia, nujuatesano na quishacari Cesareya tiacajinia. Jiyacaritij, Porcio Festoori sanini-uujia camarnura jiyatesaquiaari Félix niti. Majaari Félix tohuatenu quiquiaari na nuhuajiria Pablo. Naajaa na tiujiaquiaari nujuatesanoori. Naa miiquiaariiri Judiocuaca timitianura nojuaja.

25

Pablo pohuatasacari Festo niqiuara Jesujiniji

¹ Jiyacaritij, Festoori tiuquiquiaari Cesareya tiacajinia, Judea jiya camarnu na quiniuria. Jiuujianaraca juuca nuhuaji, Cesareya tiacajiniji quiaquiaari Jerusalén tiacajiniaari. ² Jerusalén tiacajinia na quishacari, pueyacuara secojonaa jiyaniijianucuaari tii Judiocuacajinijino socua tojishano camarucuaa Pabloocuaa saquiriojotaquiaari camarnu Festo. ³ Nojoriiri camarnu Festo sequequiaari cuaara na soldadoehua jiyarooru, Pablo na riniuria Jerusalén tiacajiniara. Nojoriiri naa sequequiaari camarnu juucuatej, na motunu panishacari Pablo nucuamaji na nishacari. ⁴ Camarnu Festoori saaja nojori riucuaquiaari: —Nujuatesano quiya Cesareya tiacajiniacuaruhua. ¿Maatucua casaara niyara rishaareni? Janiyacuajaari nocua tacatenutaniuhuaani.

⁵ Camarnuuri nojori sequequiaarijuhuaj:

—Niajanijajinijinio socua tojishano pueya cuaara quiojohuara cuata Cesareya tiacajinia. Nojoriiri na naata Pabloocuaa saquiriojotanu cua niqiuara tii, cua niishiniuria maninia, Pablote seetanujuaana sesa miiquianujuaara.

⁶ Camarnu Festoori camueenujuquiaari Jerusalén tiacajinia ocho juuca, diez juucaruhua. Na nuhuaji, quiaquiaariuhua Cesareya tiacajiniohuari. Na tiuquiniu nuhuaji, saniniuujia tariqui cajiquiaari nequesoreesaqui camarnu cajitiujiniaari, camarnu na quishacari. Jiyacari na soldado sequequiaariiri cuaara Pablo tohuateera na nequesoreesoriquiano. ⁷ Judiocuacaari tari tiuquiijoquiaari Jerusalén tiacajinijijuhuj, Pabloocuaa na saquiriojotanuunura. Pablo jaara nujuatesaquiaari camarnu tacoji, cuno pojoriiri jaarajaaja catecanoquiaari Pabloocua. Nojoriiri jiyanoehua sesa nocuara saquiriojotanuquiaari najuhuana queraatia casaa. ⁸ Jiyacaritij, Pabloori tama nocuaji na tacusacarijiaaja naa sequequiaari:

—Maja sesa cua miiniu quiquianu. Janiyari tariucuaaanu Moisés Rootasano tojiquiaaaniuhuj. Majaari sesa cua miiniu quiquianu Pueyaso Secojoua tijuhuj. Majaari Roma tiacajinia quijia pa jiyaniijia tojiyashijia cua quiniu.

⁹ Camarnu Festoori jaarajaaja Judiocuaca panishano miiquiaari, cuno pueya paniniuria nojuaja. Naaratej, Pablo nequesotaquiaariiri:

—¿Quiaate Jerusalén tiacajinia quianu paniya, tii cua nequesoreenura quiajaniya?

¹⁰ Pabloori na riucuaquiaari:

—¿Majateeri Roma tiacajiniji pa jiyaniijiajanaa quia jiyatecanu niya camarnura quia quiniuriacuaja? ¿Casaara niyaja quia nequesoreyaquia janiyarini? Roma tiacajinia quijia pa jiyaniijiacuajaari niya camarnura quia jiyatecanu. Quiaacuajaari niishiyajuhuaaj, majaari sesa cua miiniu quiquianu Judiocuaca. ¹¹ Janiya jaara sesa miirii seetanujuanaani, cuaara cua motuuraqui. Cucuara cuno pojori saquiriojotasano jaara coriaa quiri, majaari quenaaja tamonu pueyano naata niqutionu janiya cua mosaanura. ¿Janiyatucua casaara mosaare najuhanani? Naaratej, janiyari quia sequeyani camarnunaa: jiyaniijia Césarjanaa cuaara cua nequesoreeraqui.

¹² Camarnu Festo pocoojonu nuhuaaji na nacasunaata, Pablo sequequiaariiri:

—Quiaacuajaari cua sequeree cua jiyaronura quiajaniya pa jiyaniijia Césarca, nojuajanaa nequesoreenura quiajaniya. Janiyari nocua quia jiyaronutaniya cua soldadohuanani.

Jiyaniijia Herodes Agripa niquiara Pablo pohuatasacari Jesujiniji

¹³ Naa Pablo sequesaanu nuhujitij, pasaja camueenujuquiaariiri. Jiyacari jiyaniijia Agripaari Cesareya tiacajinia tiuquiquiaari Festoocua, na saruhuanura nojuaja. Agripaari tiuquiquiaari na rimiatiu Bereniceeta. ¹⁴ Nojori camueenujusacari camarnu Festo tiajinia, Festoori socua jiyaniijia Agripa pohuataquiaari Pablojiniji. Na sequequiaariiri:

—Tamonu pueyanoori niya quiya, Félix tiujiasano nujuatesano. ¹⁵ Jerusalén tiacajinia cua quishacari, Judiocuacaacuara secojonaa jiyaniijianucuaari nocuara cua saquiriojotacanu, Judiocuaca camaru-cuata. Nojoriiri cua sequetucanu Pablo cua motenura. ¹⁶ Janiyari saaja nojori riucucanuni: “Roma tiacajiniji jiyaniijiaari maja ritia na monu pueyano. Nocuara saquiriojotanaa cuaara nijjoma niya nocuara saquiriojotanuunurajaatijia. Monu panishano cuaara rihua-neera tamajaaja quenaaja nocuaji, jaara seetanujuanaa quiaquiri nocuara saquiriojotasano”. ¹⁷ Naacuajitij, Jerusalén tiacajinijinio pueya nocuara saquiriojotanuuriquiano jaara cucua tiuquiijocanu, majaari socua cua tarishiniu quiquianu. Janiyari tariquicuaji nequesoreeja cajitujinia cajiquianuni, pueya camarnu cua quishacari. Janiyari jiyacari cua soldadohua sequereeni nojori jaatucunura cucua cuno pueyano. ¹⁸ Cuno pojori Pabloocua saquiriojotanuucanuni, nojoriiri maja quenaaja na saquiriojotanuunu quiriucuaa juhua cua niishiriojosano. ¹⁹ Saaja tamaatia nocuara cua saquiriojotanuureeri. Pablonaari nojori supuetanaa Pueyasojiniji rootasano tamacaquiaa saaja. Cua seque-teejaariuhuaaj, Jesu jyanishano pueyanonaari mosaaquiaari. Pablonaari saaja pueya niishitiojiyacujua, cuno Jesu jyanishanonaari samitiquiaariuhua. Saminionaari quiari quiyajaa. ²⁰ Naa cua tojishacari nocuara pueya saquiriojotasanootej, majaari cua niishiniu quiquianu taa cua miiniutianiyani. Janiyari cunora Pablo nequesotarucuaani: “¿Quiaate Jerusalén tiacajinia quianu paniya, tii cua nequesoreenura socua quiajaniya?” ²¹ Nojuajaari saaja cua sequecanu: “Jiyaniijia César Augustojanaa cuaara cua nequesoreera juhuaari”. Janiyari cunora

niyaja nujuatesano na jiiitiaani, janiya cuaara na jiyarore jiyaniijia César Augustoocuaajaatijia.

²² Jiyaniijia Agripaari camarnu Festo sequequiaari:

—Janiyari cuno pueyano tojiniu paniyajaacuhuj.

Festoori na riucuaquiaari:

—Quiaacuajaari tariqui na tojiniutianiya.

²³ Tariqui, jiyaniijia Herodes Agripaari niqiaariuhua Bereniceta. Nojoriiri tiuquitiaquiaari nequesoreeja sohuacajinia, shanohua jacaria na rucuanenuta, shanohua na toqueya maniniuquiyatajuhuaj. Puereeta niquishano. Nojori tiuquitasacari, nojori cojiquiaariiri soldadohua camarucua, mariyata tama cuno tiacajinijinio camarucuaajaanio. Camarnu Festoori jiyacari na soldadohua seerataquiaari Pablo na riniuria, nojori tacoji na nujuatesocoriquiano. ²⁴ Pablo tiuquishacari, Festoori sequequiaari:

—Jiyaniijia Agripanaa, puetunu niya canaata rerejono pueyajanaanaa, cua tojitiare. Cuno pueyano niaa na niqiyani, queraatia Judiocuacaari nocuara cua saquiriojotanuquiaa, Jerusalén tiacajinia cua quishacari, niya Cesareya tiacajiniajuhuaj. Nojoriiri pueyaracaanu cua taajetequiaa. Cua sequetuquiaari: “Cuno pueyano cuaara mosaaria camarnunaa”. ²⁵ Janiyacuajaari tari niishiyani, nio pueyanoori maja sesa na miiniu quiqianu. Naacuaajitij, janiyari niishiriojiyani, ¿pueyanotucua casaara najuhuaana mosaareni? Tama nojuajaari cua sequerucuaani, cua jiyaronura nojuaja pa jiyaniijia César Augustoocua, pa Jiyaniijiajanaa nequesoreenura nojuaja. Janiyari cunora na jiyaronutaniyani. ²⁶ Saniniuujia majaari cua niishiniu taa cua pohuatanutaniya cua jiyaniijia cua naajiojiniani. Cunora, nio pueyano nitirij niya nia nequesoreesocoriquianonijia, pueyanaa. Janiyari quia panitiaa cutara nojuajanaa quia nequesoreenurani, jiyaniijia Agripanaa. Quia nequesoreere, cua naajionura pa jiyaniijia Augustoocuaara casaara nio pueyano cua jiyaroree nocuani. ²⁷ Majaari cua naata naajaa jiyaronu quiasano pueyano, maninia nequesoreyaquishoojua.

26

Pablo riuhanesacari jiyaniijia Agripa

¹ Jiyacaritij, Jiyaniijia Agripaari Pablo sequequiaari:

—Quiocuaji quia riuhanereja, jaara seetanujuanaa quiyaquiri quiocuara pueya saquiriojotasano.

Pabloori na juaashiquia sanaquiaari. Naa coteequiaari pocuanuuri:

² —Timiyaniijia jiyaniijia Agripanaa, quia sequesacari cua pocuanura quia niqiiara, tama cua tacunura cucuaajijiaaja, Judiocuaca saquiriojotasanojiniji cucuara. ³ Quiaari puetunu cuarta Judiocuaca miijosanojuanaa niishijiajuhuaj, puetunu canaa nacojotasanojuanaanio. Janiyari cunora quia sequeyani, nareja cua tojiri cua pohuatasacari quiajaniya.

Pablo pohuatasacari taa na quiquiaari Jesuucua na tiuyaquishacarijiani

⁴ Puetunu Judiocuacajanaari niishiyajuhuj taa quijia cua quiquiaari cua naatujuajiniji nojoritia cua quishacari cua jiyajiniani, Jerusalén tiacajiniano. ⁵ Cuno Judiocuaca quia nequesotasareeraj. Nojori

cuaara quia pahuataara jaara paniri pahuatanu. Cua mashajinjini, janiyari seetanujuanaa Fariseo quijiani. Fariseocuacaari puetunu canaa supuetanaa rootasano Pueyasojinijijianaa tojitiaja cutara, socua tamasaca cuarta Judiocuacajinjiji. ⁶ Nojorijaari cucuara saquiriojotacanu cua tiushacari Pueyasoocua, taa na samiitianijionutaniuhua macunucuanu. Pueyasoori nojori samiitianijionutaniuhua taa na sequequiaari tariucuaaanu canaa supuetanaacuajani. ⁷ Quiarijiani, canaa supuetana Israel doce niqiuohuacuajinio caneno pueyari naa seetanujuanaa Pueyaso sequesano niquniuria sashiyajaa. Naaratej, nojoriiri pueyaracaanu Pueyaso secojonuuquiaa, juuca, niucuanio, Pueyaso na tojitasacari. Naa cua sashishacari Pueyaso sequesanojuhuaj Jiyaniijia Agripanaa, nio cuarta Judiocuacaari quiarijia cucuara saquiriojotanuquiaa. ⁸ ¿Niaateeri jiyaniya Pueyasoori maja na naata macunucua samiitianijionuhua?

Taa Pablo miitiaquiaari Jesuucua tiuuniaa tarijiani

⁹ Janiyari tarijia sequequiaari tamajaajani sesa cua niishiriojosacari Jesujinjiji: “Nazaret tiacajinjini pueyanocua tiuuniaa pueya para-caariirij”. ¹⁰ Janiyari seetanujuanaa taraatia nojori miitiaquiaari Jerusalén tiacajinjiani. Pueyacuara secojonaa jiyaniijianucuaari cua jiyatequiaari nojori cua miitianura. Naacuajitij, janiyari queraatia Jesuucua tiuuniaa riuniujuquiaari nujuatejojuajinjiani. Nojori jaara puecoosaaquiaarijuhuaj, janiyari jaarajaaja sequequiaarini: “Manini-acuaja, cuaara puecoosaaia”. ¹¹ Janiyari sequeyarucua naa miitiaquiaari Jesuucua tiuuniaa pueyani, nojori cua pishojonura Jesuucua nojori tiuuniu.

Janiyari naa miiquiaari nojorini puetunu cuarta Judiocuaca rerejojua tiacajiniaqueyajanaa canaa jiyajinia. Janiyari jiyanoehua nojori juaajia quiquiaarini. Majaari quenaaja nojori cua niquniu paniniu quijia. Naa cua miitiasocoriquiano nojoritij, janiyari nojori pajequiaari tucuaaanu tamonu jiyaca tiacajinjiani.

Pablo pahuatasacari taa Jesuucua tiuujiara na quiquiaarini

¹² Naacuajitij, janiyari juucua quiariquiaa Damasco tiacajinjiani, pueyacuara secojonaa jiyaniijianucua jiyarosano. Janiyari tiriara quiariquiaani cua pajenura socua Jesuucua tiuuniaa pueya cua miitiasocoriquiano. ¹³ Nucuaaco cua quiasacari jiyaniijia Agripanaa, janiyari jiyocuaaanuji nunusaaquiaarini, cuata quiojonaajuhuj. Cuno shacantuucaari socua jiyanoehua shacantuuca quiquiaari pananujinjiji. Panacari-iri jiyacari quiriquiaa. ¹⁴ Cuno shacantuuca jaara canaa nunuquiaari, canaari juhua quejoosaaquiaarini. Janiyari jiyacari tojiquiaari rupaani. Hebreo rupaaajinia cua sequeriquiaari: “¡Saulo, Saulona! ¿Casaara puera quia miitiaa janiyani? Naa quia miishacaritij, quiaari tama quia cuaqueya miitiaajaacujua. Juhua juaajia pueyano, na juaashacari saaja mocoshoco patiyashiyari”. ¹⁵ Janiyari na sequereeni: “¿Cantequia Jiyaniijianaa?” Cua riucuaereeri: “Janiyacuaajaari Jesuni, quiaa na miitiaquiaani. ¹⁶ Quia sanerohua. Janiyacuajaari quiocua mueta-reeni puetunu cua panishanojuanaa miijiaa cua jiyatenura quiajaniya, quiarijia janiyajinjiji quia niquishano quia pahuatanurajuhuj. Naa-juhuj, na nuhuaji janiyari quiocua muetanutaniuhuanu janiyajinjiji quia niquishanorano pahuatana quia quiniuria. ¹⁷ Cua jiyarosacari

quiajaniya, janiyari quarta Judiocuacaacuaaji quia cojuanutaniyacua-jani, tamonu jiyacajinijinio taucuacaacuaajinio, tiqiyocua quia ru-cuanejosacari janiyajiniji quia poojotasacari. ¹⁸ Nojoriicua quia jiyaroyanija, janiyajiniji nojori quia pohuatanura, maja juhua nimishitiu nojori quiniuria pueyaracaanu. Quia pohuatasacari janiyajiniji nojori, nojori jiuujiaari juhua cuhuatasaanutaniya cucua nojori tiuushacari. Nojori jaara naa miiri, Sesaacaari maja tari nojori jiyaniijia na quiniu quiniutianiya. Naa nojori tiuushacari cucuatej, Pueyasoori puetunu sesa nojori miishanojuanaa jiyanooniutianiya. Pueyasoori puetunu na saquiriojosano pueyatajanaa nojori rupuetootenutaniya, puetunu Pueyaso jiiitasanojinijijianaa nojori jiiitanurajuhuaaj”.

Pablo pohuatasano Jesu tojjiara na jatanujiniji

¹⁹ Naacuajitij jiyaniijia Agripanaa, janiya jaara naa tojiquiaari se-queshiyano jiyocuacaanujini, majaari cua tarijonu quiquiaarinioj. ²⁰ Janiyari jiyacari juhuacatecara Damasco tiacajinia Pueyaso rupaa Jesujiniji pohuatanu coteequiaarinini, na nuhuaji Jerusalén tiacajinia, mariyata puetunu cuno Judea jiyajinijanyaanio. Maja saaja cuarta Judiocuaca cua pohuatanu quiquiaari Jesujiniji, janiyari taucuaca pohuataquiaarijuhuaj. Nojori nacasuquiaarinijia cuaara sesa nojori miishano carteera, Pueyasocua nojori tacatonuhuaa nojori jiuujia. Janiyari nojori sequequiaarijuhuaj, cuaara saaja maninia miijiaa quiri-ria, na niishishaanura Pueyasoori seetanujuanaa nojori jataniquianu. ²¹ Naa cua pohuatanuucuatej jiyaniijianaa, cuarta Judiocuacaari cua quiatucanu Pueyaso Secojonuujua tiajinia. Cua motunu paniquianuuri. ²²⁻²³ Naajaa, Pueyaso cumaquishacari janiya, majaari cua tarinitianu quiquiaa puetunu pueyajanaa cua pohuatanu Pueyasojiniji; pooni-jionuutesano pueya, tojishano pueyano. Majaari tama cua niishishano-juaaja cua pohuatanu quiquiaa. Janiyari pueya niishitiojoquiaani taa tariucuaaanu Pueyaso sequesano caminiujuuniaa naajionuutaquiaar-icuaajani, naajuhuaaj, taa Moisés naajiotasano quiya tariucuaaanu Pueyaso Rupaajiniacuajani. Nojori naajionuutasanoori seetanujuanaa. Naa sequeyari:

“Pueyaso Jiyarosocoriquianoori naquiya miishaanutaniya. Na cusonu nuhuaji, nojuajaari coteenu samiitariquianohua. Jaara sami-itiarohua, nojuajiniji pohuatasanoori puetunu pueyapuejanaa cuhuatanutaniya. Naacuajitij, nojoriiri niishiniutianiya nojori jaara nocua tiuuri, nojoriiri samiitiaconutaniuhuaajuhuaaj; Judiocuaca, taucuacanio”.

Pablo tiuutiniu panishacari jiyaniijia Agripa Jesuucua juucua

²⁴ Pablo jaara naa sequequiaari tama nocuaji na tacusacaritij, camarnu Festoori nacaquiaari:

—¿Taa quia miyani Pablonaa? ¡Quia mueyocuaquui seseree puera quia niishiniucua!

²⁵ Pabloori na riucuaquiaari saaja:

—Maja cua paatenu, camarnu Festonaa. Cua sequesanoori seetanujuanaa, maja cuaracashiniu. ²⁶ Jiyaniijia Agripaari puetunu cua sequesanojiniji niishiyajuhuaaj. Cunora majaari cua puerenu na niquiara pocuanu. Nojuaja naasucuaari tarijia tosaquiaaricuaa Jesujiniji, Jesuucua tiuuniaa pueya miishanojinijijihuaaj. Puetunu canaa miishanojuanaari maja jiyasohuaaja na miishaanu quiquiaa. ²⁷ Jiyaniijia

Agripanaa, ¿quiaate tariucuacaanu Pueyaso sequesano caminiujiuniaa naajionuutasanoocua tiuyajuhuj? Quiaacuajaari nocua tiuya. ¿Naatejaaratej?

²⁸ Jiyaniijia Agripaari na sequequiaari:

—¿Quiaateeri ritia cua jiyatenu paniya Jesuucua tiuuniara?

²⁹ Pabloori na riucuaquiaari:

—Naajaa, ritia, na nuhuaji soj, taa quia paniyacuajani. Pueyaso maara seetanujuanaa naara quia jiyatere taa quia sequeyacuajani; maja saaja quiajaniya, mariyata puetunu pueyajanaa niya cua tojitiaani, juhua janiya nia quiniuriajuhuaj. Maja naatej, taa cumayocuata moronucua cua nujuatashuyanijia.

³⁰ Jiyacaritij, jiyaniijia Agripaari sanequee, camarnu Festojuhuj, Berenecio, puetunu cuniqui nojoritia cajitiuniaa pueyano. ³¹ Nojoriiri cuniquiji tamaqui pacutaquiaari jiyareta nojori pocoojonura Pablojiniji. Tama nojoriiri sequetooquiaari:

—Cuno pueyanoqui seetanujuanaa maja sesa na miiniu quiquianu na mosaanura, maja quenaaja na nujuatesaanurajuhuj.

³² Jiyaniijia Agripaari camarnu Festo sequequiaari:

—Paa maara cuno pueyano cartereni nojuaja jaara quia sequeyaquiquianu pa jiyaniijiaacua quia jiyaronura nojuaja.

27

Roma tiacajiniara Pablo jiyarosaanujiniji pohuatasano. Nio naajiona Lucasri nata quiriquiaa na cojiriquiano

¹ Camarucua jaara sequequiaari canaa buquejinia jiyarosaanutaniya Italia jiyajiniani, Pabloori jiyacari narta quioosano pueyata cojiritiasaaquiaari niqutionu soldadohua capitán. Cuno capitán sesaari quiquiaari Julio. Na soldadohua maanuuri sesojosaaquiaari “Augusto”.

² Jiyacaritij, Adramitio tiacajiniji buqueeri quera ruparetariquiaa, Asia jiya tiacajinia shiiniuquitariquiano. Canaari cuno buquejinia jaaretaquiaarini. Canaata quiriquiaajaariuhua Aristarco. Nojuajaari Macedonia jiyajinia Tesalónica tiacajinijinio pueyano quijia. ³ Canaa quianu nuhuaji Cesareya tiaca tacatajajiniji, canaari tariqui tiuquishiiquiaari Sidón tiaca tacatajajiniani. Capitán Julioori jiyacari cuniqui maninia miiquiaari Pablo. Nojuajaari Pablo tarinitiaquiaari cuara tacaara na rupuenaa pueyacua, nojori na saruhuatanura Sidón tiacajinia, naajuhuj, na rupuenaa niqutionura puetunu Pablo panishanojuanaano. ⁴ Canaa jaara jaaretaquiaari Sidón tiacajinijini, canaari canaa muenecara niqumiaa Chipre jiya tucuaatijani. Paratuuri buque nacaacoji piyarojoriquiaa saaja. ⁵ Canaari Sidón tiacajiniji niuti-aquiaari Cilicia jiyacuani, Panfilia jiyacuanio. Canaari na shuriuquiumia jaaretamaani. Canaari Mira tiacajinia tiuutiaseeni, Licia jiyajinia.

⁶ Capitánri cuniqui riuriataquiaari Alejandría tiacajinijinio buque. Italia jiyajinia quiariquiaari. Naaratej, canaa tacanitiaquiaari cuno

buquejinaari, tii canaa quianura saniniuujia. ⁷ Canaari camueenujuquiaarini, puera jacaria canaa jaaretanuucua. Naa canaa tarishiniuucuatej, canaari socua tiuquishiiquiaari Gnido tiaca taquijiriani. Paratuuri saa canaa patariquiaajaa. Naacuajitij, canaari Salmón jiya tucuaatiajanijoyua shuriucuaratamaani. Canaari Creta jiya tucuaatiaja camarucutamaajaaniuhuj. ⁸ Naa puera canaa tarishiniuucua canaa jaaretasacari Creta jiya shuriuquiumiatej, canaari socua tiuquishiiquiaari pueya jiyaniquishano “Tacataja Maniniuiniiani”. Cunoori Lasea tiaca shuriucua quiya.

⁹ Canaari puera tarishiquiaari tarini. Judiocuaca miaquenuyaquiniujuucaari tari shocoquiaari. Jiyacaritij, shoniniacu caminiajinaari puereeta quijia tari buqueta jaaretanura. Pabloori juucua sequequiaari:

¹⁰ —Camarucuanaa, janiya niishiyani paari cocuaatia miiniutianiyani. Paa jaara socua jaaretaareni, pa buqueeri jiaquetanutaniya socua. Pa pasano casamiiri niitiiniutianiya. Paa naasucuaari cusuunutanijajuhuj. ¿Casaatejaj pa toyani?

¹¹ Pablo jaara naa sequequiaaritij, majaari buque jiyatana capitán tojinu quiquiaarinioj. Saaja buque camarujanaa tojiquiaariiri, buque capitánio. ¹² Cuno tacatajajiniji canaa tii tiutiariquiaani, majaari maninia quiquiaari shuniya canaa tajitiniuria tii. Nocujaj, puetunu pueyajanaari sequetuquiaari:

—¡Niiquiji pa quiaarej! Fenice tiacajinia pa quishii shuniyacuaji.

Cuno Fenice tiaca tacatajaari pananu muetasamaji quiquiaari, cuno Creta jiya tucuaatiajaacuaja.

Shoniniacu caminiajina paratu piyarojosacari jiyanojua nojori

¹³ Jiyacaritij, paratuuri jacaria piyarojonu coteequiaari pananu shuucujaj, canaa muenecarajiniji. Naaratej, nojoriiri sequetuquiaari:

—¡Pa naatacuajaqui niiquiji quianu!

Canaari cuniquiji ruparetaquiaarini. Creta jiya tucuaatiaja shuriuquiumia jaaretaareeri. ¹⁴ Na jaaretasacari shiitianiyojua, paratuuri canashiyaquiji jiyanojua piyarojoquiaari buque. Cuno paratu sesaari quijia “Noreste”. ¹⁵ Paratuuri buque capotariquiaa na shuucujajiria saaja. Naaratej, majaari canaa naata jaaretanu quiriquiaa paratu piyarojosacaji. Paratuuri saa canaa patariquiaajaa. Nocujaj, canaari buque tarinitiaquiaarini paratu cuara na capotaara tamajaaja. ¹⁶ Paratuuri canaa capotaquiaari tamonu jiya tucuaatiaja tamajiria. Cuno jiya tucuaatiaja sesaari quiquiaari Cauda. Majaari puera paratu piyarojonu quiriquiaa tii. Canaa rishano boteniyojuaari buque pajamaji jaasutariquiaa. Canaari jiyanojua poonijioquiaari cuniquini, canaa tacaniniuhua buque cacojiria cuno boteniyojua. ¹⁷ Bote tacanishaanu nuhuaji, canaari buque cuaqueya morojoquiaarini na cumaquiniuria na jiaqueyaquiniuucujaj. Pueyari na puerenuta sequetuquiaari:

—¡Paratuuri pa capotanutaniya jaaquijiniara! ¡Paari tii riitianutaniyani!

Cuno canaa pueresano jaaquiani, na sesa quiquiaari Sirte. Nocujaj, nojoriiri buque toqueya roshinitiaquiaari. Paratuuri saaja capotaquiaari buque. ¹⁸ Jaara juhuaquequiaari, paratuuri saaja jiyanojua piyarojoriquiaajaa. Naaratej, nojoriiri buque pasano casami quejoonu coteequiaari moojinia. ¹⁹ Canaa camueenujusacari jiuujianaraca juuca naquiya canaa miishacari, canaari buque

casamijianaa quejooquiaari socuani, buque namuenura quenaaja. ²⁰ Tari canaa shocojoquiaari queraatia juuca. Majaari quenaaja canaa niquniu quiquiaari pananu, riyano. Paratu piyarojosacari canaacua, mohuacaari socua jiyanohua cajiniuucuaquiaari canaacua. Nocuaji, canaari niishiriojoriquiaani canaari quiarijia cusonuunutaniyani.

²¹ Majaari tojetaarucujanaa quenaaja canaa miaquenu quiquiaari pueyaracaanu. Pabloori jiyacari nujuaquiaari canaata quiniaa tajiniji. Naa nojori sequequiaariiri:

—Camarucuaanaa, niaa jaara tojiqianu quenaaja cua sequesano, maja pa ruparetanura Creta jiya tucuaatiajajiniji, paatuma naa miya naquiiani. ²² Naajaa, nioojia nia cumaquiri. Maja quenaaja niqiriyatu pajaniyajinijinio cusonu quiniutianiya. Pa buque cutaraari juhua rapitiasaanutaniya puetunujuanaa. ²³ Janiyari quiarijia cua maquenujinia cua Jiyaniijia Pueyaso seru niqiriri cua shuriucua nujuaanoni. Janiyari cuno Pueyaso tojjiani. Janiyacuajaari na pueyanoni. ²⁴ Pueyaso seruuri cua sequeree: “Majaari puerenu Pablonaa. Quiaacuajaari jiyaniijajanaa Augustooocua tiuquiniutianiya Roma tiacajinia. Quiaari na tajoji nujanutaniya quia pocuanura. Naajuhuaaj, Pueyasoori quia secojosano tojiriucuaa. Naaratej, puetunu quiata quiniaajanaari quiata rishiniutianiyajuhuaaj”.

²⁵ Naacuajitij camarucuaanaa, nioojia nia cumaquiri. Janiyacuajaari seetanujanaa niishiyani, naa quiniutianiyari taa Pueyaso seru sequeree janiyacujani. ²⁶ Naajaa, paari tamonu jiya tucuaatiajaacua juhua niojosaanutaniyani.

Pabloori naa canaa cumanijiaquiaari.

²⁷ Pueyaracaanu canaa jaaretasacari shoniniacu caminiajinia, caapiqui semaanaari tari canaa shocoquiaari. Tamonu niucua canaa jaaretasacari, canaari Adriaajinia quiriquiaa tarini. Pueyari cuno shoniniacu caminia jiuujiajinia sesojoquiaari Adria. Paratuuri canaa niyacuneetariquiaa jiyareta. Jaara shiyaqueya quiriquiaa cuno niucua, buque jiniacuma poonijionaari niishiquiaari canaari tari jiyacua catecanoyani. ²⁸ Buque jiniacuma poonijionaari jiya shanacuquiaari, na niishiniuria queroniti quiriquiaajaa. Na shanacutusacari, saaja treinta y seis metro queroni quiriquiaari. Jaara socua na tajoji shanacutuquiaariuhua, saaja veintisiete metro queroni quiriquiaari. ²⁹ Nojoriiri puerequiaari buque naasucuaari shoniniacu caminia casaqueyaji pojotujua saicua cutetanutaniya. Nocuaji, buque pajamaji sohuaneyocuata morojotasano cuatro niajaaca casaa quejootuquiaariiri, buque nujuatanura pootia. Nojoriiri cuniquijia na puerenuta sashiquiaari cuaara juhuaqueera. ³⁰ Jiyacaritij, buquejinia poonijionaa pueyari juucua cuno niucuaaja jiyasohuaja mashiyocuatunu paniriquiaa buquejiniji. Naaratej, nojoriiri buque nacaacoji sapojonu tinijitotariquiaa niajaaca casaa moojinia. Jiyasohuaja roshiniutariquiaa jiyocuaaanu tacanishano boteeri, tii na mashiyocuatunura. ³¹ Pabloori jiyacari na jiyatana capitán toquiaari, na soldadohuanio. Naa nojori sequequiaariiri:

—Cuno pojori jaara niya juhuaqueyaquimia pata, niaari cusonuriquiano.

³² Soldadohuari ritia jiyocuacaanu tunusano bote neyocua jiyatajo-taquiaari. Moojinia na tinitiuriiri. Paratuuri na piyarojoquiaari tamoco nojoriijiniji.

³³ Juhuaquenu panishacari, Pabloori puetunu buquejinia quiniaa-janaa sequequiaari cuara quenaaja miaquenuura. Naa nojori seque-
quiaariiri:

—Tari nia shocojiyari catorce juuca pueyaracaanu nia sutesacari. Ma-
jaari nia miaquenu quiquiaajuhuj. ³⁴ Quiarijia nia miaquerecuara, nia
cuaqueya nia cumaquitajara quenaaja. Majaari quenaaja niquiriyatu
niajanijajininio cusonu quiniutianiya quiarijia.

³⁵ Naa na sequenu nuhuajitij, Pabloori pan riquiaari. Na mi-
aqueyaquishacarijia, coteenu Pueyaso secojoree puetunu nata quiniaa
niquiarajanaari. Na nuhuaji miaquerohuari. ³⁶ Tamasaca jaara
naa niquiquiaari Pablotej, puetunu nojorijianaari noojia cajitiquiaari.
Pan satureejaariuhuj. ³⁷ Cuno buquejinia, puetunu canaajanaari
quiquiaarini dosciento setenta y seis pueya. ³⁸ Puetunu pueyajanaa
jaara tooquioquiaari, na nuhuaji trigo quejootuquiaari moojiniaari,
buque namuenura quenaaja.

Buque coquesacari caminiajinia

³⁹ Jaara juhuaquequiaari, buquejinia poonijionaa pueyari maja na
niishiniu quiquiaari teyano jiya tucuaatijatejaara cunoni, nojori
na niquiriquiaani. Nojoriiri cuno jiya tucuaatijaacua niquiquiaari
puereetuca surocohua. Jaaquiaari puetunu na shocuajanaa
quiriquiaa. Naacuajitij, nojoriiri sequetuquiaari:

—Buque pa saniri shiitianiniu cuno surocohuama.

⁴⁰ Buquejinia poonijionaa pueyari niajaaca sohuaneyocua jiyatajo-
taquiaari. Cuno niajaacaari caminia jiuujiajinia jateequiaari cuniqui-
jia. Nojoriiri buque niquinijiotetajaa roshinitiaquiaarijuhuaj, buque
tacutajara. Buque nacaacuaji teeja toque tacanitiatureejaariuhuj.
Buqueeri canujutaaree jaaquiajiniara, paratu piyarojosano. ⁴¹ Buqueeri
saacariji jaaquiajinia riitiaseequiaari, caminia cajiniuucasacari mo-
huaca paatishano jaaquiajinia. Buque nacaari jiyanohua tiuquishii
cumaatia jaaquiajinia. Majaari quenaaja na naata pooniu quiriquiaa
na matasaquiji. Na pajaari maa rapuequiaarijia moo cajiniuucasacari
jiyanohua nocua. ⁴² Soldadohuari nojori jiyatasano quioosano pueya
puecoonu paniquiaari cuniquijia, nojori jiyanishacari cuaconutaniya
naasucua, mashiyocuatumaari. ⁴³ Capitán cutaraari Pablo tiuquitiniu
paniquiaari jiyaniijia Augustoocua. Naaratej, na soldadohua seque-
quiaariiri:

—¡Maja quioosano pueya puecootunu!

Cuno capitánri puetunu pueyajanaa sequequiaari:

—Cante cuacojua cutarani, nojori cuara cuacoora coteenu, jaaquia-
jinia rupaatiushiicuaari. ⁴⁴ Cuaashijianucua saniniuuja cuara buque
jiniacumaji suruhuatuneeacaacua jacamatuura na cuatajara. Tamasaca
cuara buque neecaacua jacamatuurajuhuj.

Naa miitiquiaariiri. Puetunu pueyajanaari jaaquiajinia rupaatiushi-
quiaari.

¹ Puereeta canaa cuaconu nuhuaji shoniniacu caminiajinia, canaari namitia puetunujuanaa maninia tacataseequiaari cuno jiya tucuaatiajaacuaní. Canaari jiyacari shusha niishiquiaarini, cuno jiya tucuaatiaja sesaari quiquiaari Malta. ² Cuno jiya tucuaatiajaacua quijia taucuacaari maninia canaacua jyanooquiaari. Shiniquiaari quiriquiaa. Maruuri niriquiaajuhuj. Naa canaa shiniquiosacaritij, taucuacaari canaara noshitiquiaari puereetuuca mani. Na nuhuaji canaa sequetureeri:

—Miji. Nia jitiushii.

³ Pabloori naanacucua reratejoriguiaajuhuj. Manijinia na quejoriguiaari. Jiyacaritij, soconuquiiri maniicuaaji mashiriquiaa juucua. Pablo juaashiquia saariiri. ⁴ Cuno jiya tucuaatiajaacua quijia pueyari soconu niquiquiaari Pablo juaashiquiaacuaji sohuataano. Jaara naa niqititiquiaaritij, tama nojoriijaarijia sequetooquiaari:

—¡Nio pueyano naasucuaari pueyano mojuá! Cocuaatia miirii juucua shoniniacu caminiajinia na cuasacari buquejinijiiri. Pueyasoori quiarijia saniniuujia cunora soconu na sajitirii na cusonura.

⁵ Pabloori saaja manijinia majriataree soconu. Majaari quenaaja na sajiyashi noonu quiirii. ⁶ Puetunu pueyajanaari na sashiriquiaa, taacari na poreenutaniyani. Na sashituriquiaajaariuhuj na jiyantiushacari canashiyaquiji cusunutaniya naasucua. Naa pueyaracaanu na sashitiushacari juucuatej, nojoriiri socua tamaatia niishiriojonu-uquiaari. Nojoriiri Pablojiniji sequetooquiaari:

—¡Cuno pueyano naasucuaari pueyasojuhuanajaj!

⁷ Cuniqiu canaa quishaquini, canaari tamonu pueyano cuhuariquia shuriucua quiriquiaani. Na camaruuri cuno Malta jiya tucuaatiaja camarnu quiquiaari. Na sesaari Publio quijia, maninia pueyano. Nojua-jaari canaa masuuquiaari na tiacora. Canaa mianuutequiaari maninia tiiri. Canaari jiuujianaraca juuca na tiajinia camueequiaarini. ⁸ Cuno camarnu queeri jiyacari cusosu matariquiaa. Jyanohua nasecaari quiriquiaa. Coriyacau rurequeriquiaajaariuhuj, na jiniacuma noonunio. Pabloori nocua tiuquiquiaari na matasaqui. Pueyaso secjoree nocuaraari. Na secjosacari, nocua niaquiaari na juaashiquiaari. Pueyanoori naatarohua. ⁹ Cuno jiya tucuaatiajaacua cusosuhua jaara niishiquiaari naa Pablo naatanishanocuaa cuno pueyanotej, nojori-iri nijioquiaarijuhuaj. Pabloori puetunujuanaa na naatanijioquiaari. ¹⁰ Naa Pablo miiniuucuatej, cuno pueyari na jiiitasano casamijiniji canaa niqutiojoquiaari nareja. Na nuhuaji, canaa jaara quiaquiaari cuniquiji tamonu buquejiniani, nojoriiri canaa jiyatajara canaa panishano niqutiojotuchiaari narejajuhuj.

Pablo tiuquishacari Roma tiacajinia

¹¹ Canaa sashishacari shuniya cuaara tajiiria, jiuujianaraca racaari canaa shocojoquiaari Malta jiya tucuaatiajaacua canaa quishacari. Alejandro tiacajinijinio buqueeri tii nujuatariquiaajuhuj. Shuniyacuaaji tiutiaquiaari tiiquiiri. Cuno buque nacatuuri juhua nojori pueyasohua Cástor nacara quejasano quiquiaari, juhua Pólux nacanio. Canaari cuno buquejinia quiojoquiaari cuniquijini. ¹² Canaari Siracusa tiaca tacatajajiniji tiutiaseequiaarini. Canaari jiuujianaraca juuca camueenujusee tiini. Siracusa tiacaari Sicilia jiya tucuaatiajaacua. ¹³ Cuniquiji canaa quiasacari, canaari cuno jiya tucuaatiaja shuriucuaataareeni.

Canaari Regio tiacajinia tiuquishiini. Tariqui, paratuuri maninia piyaro-joriguiaa buque ninijiji. Canaari cunora tama tariqui tiuquishii Puteoli tiacajiniani. Canaari quiniqui tacatasee puetunujuanaani. ¹⁴ Puteoli tiacajinia Jesuucua tiuunaa pueyari canaa masuuquiaari na tiajinia. Canaa sequetuquiaariiri:

—¡Maja canaa shoconu pueyanaa! Canaa tiajinia nia camueenujuma-jaara.

Naaratej, canaari siete juuca nojoritia camueenujuquiaarini. Na nuhuaji, canaari cuniquiji Roma tiacajiniara neteja nucuaco quiaquiaarini. ¹⁵ Roma tiacajinijinio Jesuucua tiuunaa pueya jaara niishiquiaari canaa tari nucuamaji niyani, nojoriiri nucuacoji canaa naacunuucua nijioquiaari. Coteenu nijionaari canaa naacuquiaari Foro de Apio tiacajinia. Tamasacaari saniniuujia canaa naacuquiaari Tres Tabernas jyanishano tiacajinia. Pablo jaara narta Jesuucua tiuunaa niquiquiaari, nojia cumaquiquiaariiri. Naaratej, Pueyaso sequequiaariiri:

—¡Paacarasho cua Pueyasonaa!

¹⁶ Canaa jaara tiuquiquiaari Roma tiacajiniani, Pablo jiyatana capitánri puetunu quioosano pueyajanaa niqutioquiaari Roma tiacajinia quioosano cojuanaa camarnu. Pabloori saniniuujia tarinitiasaquiaari tamonu tiajinia na quiniuria tamajaaja, tamonu soldadota na cojuariquiano.

Pablo pohuatasacari Jesujiniji Roma tiacajinia

¹⁷ Jiuujianaraca juuca na quishacari tari Roma tiacajinia, Pabloori puetunu tii quijiaca narta Judiocuaca camarucujanaa masuuquiaari, nata nojori rerejonura. Cuno pueya jaara rerejoquiaari, Pabloori nojori sequequiaari:

—Cua tapueyocuaacanaa, majaari cua miiniu quiquiaari sesa parta Judiocuacani. Majaari cua numueejushiniu quiquiaa pa supuetanaa niishitiojosanojuhuaj. Naajaa, pueyari cua quiatucanu Jerusalén tiacajinia. Cua niqutiotucanu Romano pueyari, cua morosaanura. ¹⁸ Nojori nequesoreenu nuhuaji janiya, cua cartetunu paniquianu juucuaari, nojori niishishacari maja sesa cua miiniu quiquiaari cua mosaanura. ¹⁹ Romano camarucua jaara cua cartenu paniquianu, parta Judiocuacaari saaja juaaquioree. Janiyari jiyamitia sequecanuni, cuara cua jiyarotuura jyanijiajanaacua niya Roma tiacajiniani, Césarjanaa nequesoreenura janiya. Naajaa, majaari cua saquiriojotanu quiniutianiya saniniuujia nojoriicuaara, cuarta Judiocuaca nojori quiniuucua. ²⁰ Janiyari cunora nia niquiniu paniriquiaani, cua pohuatanura nia-janiya taa puetunujuanaa parta Israel pueya niishiyacuajani, niajaniya-juhuaj; macunucuaari samiitianijiosaanutaniuhua. Janiyari cunora cumayocuata moronucua niya quiyani.

²¹ Judiocuaca camarucuaari Pablo riucuaquiaari:

—Maja quenaaja canaa masetanu quiquianu Judea jiyajiniji naajione, canaa pohuatasaanura quiajanijiniji. Cuniquijinio parta Judiocuacaari niya tiuquijiocanujuhuj. Naajaa, nojoriiri maja quenaaja sesa na pohuatanuunu quiquianu canaa quiajanijiniji. ²² Canaari saaja niishiyani, puetunu tiqiyocujanaa sesacasaquiaaquiniaari Jesujiniji pohuatasano. Quiaa mariqui cunojiniji canaa pohuatare, canaa niishiniuria socua.

²³ Jiyacaritij, Judiocuacaari Pablo sequetuquiaari:

—Canaacua tamonu juuca quia tojiqiiquiani.

Na nuhuaji, nojoriiri na sequetusano juuca nijioquiaari. Pablo quijia tiajinia mishitiuquiaariiri. Pabloori nojori niqiara pohuatanu coteequiaari tariquicuaji. Naa niniyareejaari. Juucua nojori niishitiojquiaariiri, Jesuuri seetanujuanaa Pueyaso Jiyarosano quiquiaari. Nojori sequequiaariijaariuhuj taa Pueyaso jiidiaa na jiyanooshano pueyani. Naajuhuj, tariucuacaanu Moisés naajiotasano Jesujiniji niishitiojquiaariiri, Pueyaso sequesano caminiujiuniaa naajionuutasanonio.

²⁴ Noojaqueya nojorijinijinioori Pablo sequesano tojiquiaari cutara. Tamasacaari saaja na cuaracashitiquiaari saniniuujia. ²⁵ Nojorijinijinio jaara Pablo niishitiojosano tojiquiaari cutara, tamasaari nojoritia juayonuutano coteequiaari. Naa na juayonuutasacaritij, tohuareetaquiaariiri na quiojonuhara. Pabloori jiyacari nojori sequequiaari:

—Pueyaso Sohuanuquiiri seetanujuanaa tariucuacaanu Pueyaso sequenu panishano caminiujiunia Isaiás pohuataniquiaari parta Israel pueya niqiara, jaara na sequequiaari:

²⁶ “Quia quiaare cuno pueyacua. Quiocua nojori sequesee: ‘Niaari cua rupaa tojiniutianiya. Majaari nia niishiniu quiniutianiya casaa nia tojiyani. Niaari cua cumaacata cua miishano niqiniutianiyajuhuj. Majaari quenaaja nia niishiniu quiniutianiya’.

²⁷ Cuno pueyari noojia cumantaree maja na tojitianura cua rupaa. Naaratej, saaja sesa tojitiaquiaari. Nojori namijiaari mishiquiojosanojuhuj, na niqitaaquiniuucujia, maja na numaata na tojitianura, noojiata na niishitiuyaquiniuriano. Naa jiyatecanu nojorinjia, maja na niishitiuniuria janiya, mariqui cucua tacate-turohuari, nojori cua naarajonura”.

²⁸ Pueyanaa, nia niishiri. Naa jaara ruuretare cua pohuatasano Jesujiniji, taucuacaari saniniuujia pohuatasanutaniyacujua, taa Pueyaso jiyanooni paniya pueyani, maninia na jiidianura nojori. Taucuacaari na tojitianutaniya cutara.

²⁹ Pablo jaara naa sequequiaari nojoritij, Judiocuacaari quiojiyaro-hua. Tama nojorijaarijia juayonuutaarohua na quiojosacariuhua.

³⁰ Caapiqui marijiaari Pablo shocojoquiaari rupaquijia na masasano tiajinia moronucua na quishacari Roma tiacajinia. Puetunu pueyanaa jaara nocua niqiaari na niqiniuria, nojuajaari maninia na masequiaari na quijia tiajinia. ³¹ Majaari jiyasohujia na pohuatanu quijia taa Pueyaso jiidiaa na jiyanooshano pueyani. Jiyaniijia Jesujiniji niishitiojjuajaariuhuj. Majaari na sanaajasaanu quijia.

PABLO NAAJIONEE ROMA TIACAJINIA QUINIAA PUEYASO PUEYACUARA

Pablo sarhuatasacari Pueyaso pueya

¹ Janiyari Pabloni, Jesucristo seru. Nojuajaari cua saquiriojoquiaari saa neraja cua poonijionura. Nojuajaari cua jiyatequiaari na jiyaramiquishano cua quiniuria, seetanu rupaajanaa cua pohuatanura pueya niquiara, Pueyaso pueyara nojori jatanishaanura. Janiyari cunora nio naajioteya niaacuarani.

² Pueyasocuaajaari tariucuaaanu na sequenu panishano caminiujuniaa pueya niishitiquiaari, nojori naajiotanura Pueyaso Rupaa, pa niishiniuria taa Neyanu na miiniutianiya pocuarani. ³ Pueyano na quiniuria mijiria, Neyanu Jesucristoori rasaaquiaari. Na supuetanaari quiquiaari Israel pueya jiyaniijia David. ⁴ Jesu sohuanuuri saniniuujia pueyaracaanu Pueyaso Niyanujuhanajaj. Paa cutaraari quiari naataja niishitishaaquiaarini, nojuajaari seetanujuanaa Pueyaso Niyanu. Paari quiarijia na niishiya seetanujuanaa cutarani, Pueyaso Sohuanu samitianiniuucua nojuaja macujiniji. Nojuajaari tari jiyatesaaquiaari Jiyaniijiajanaa na quiniuria, puetunu cumaacajanaa na jitianurajuhujaj. Nojuajaari pa Jiyaniijia Jesucristo.

⁵ Nocua canaa tiuuniuucua, Pueyasoori canaa jiyatequiaari na jiyaramiquishano pueya canaa quiniuria, Neyanujiniji canaa pohuatanura. Canaa cumaquiriiri puetunu jiyacajinijinio pueyajanaa canaa tiutiniuria Neyanuucua, na tojtiajaca nojori quiniuria. ⁶ Niajaniyajuhujaj, Roma tiacajinia quiniaa Pueyaso pueyanaa, Pueyasoori nia saquiriojoquiaari Jesucristo pueya nia quiniurajuhujaj. ⁷ Puetunu Pueyaso panishano pueyajanaa, canapue Pueyaso saquiriojoquiaari saa maninijaja nojori quiniuriacuajani, janiyari niaacuara naajioteyani. Pa Que Pueyaso, pa Jiyaniijia Jesucristojuhujaj, nojori cuara cumaquiiria niajaniya, maninia na tojjijaca nia quiniuria. Naajuhujaj, nojori cuara nioojiaca cajitiiria shuquiriaatia nia quiniuria pueyaracaanu.

Pablo naquerejosacari Roma tiacajiniara

⁸ Coteenu nia sequenu paniyanijia, janiyari nia timitiaquiaani, maninia niajaniyajiniji pueya pohuatanuucua puetunu jiyacajiniajanaa. Nojoriiri pohuataquiaa, niaanaari maninia tiuujijaca pa Jiyaniijia Jesucristoocua. Naa Jesucristo miiniuucua niajaniyatej, janiyari cua Pueyaso sequequiaani: “¡Paacarasho! Quiaari jiyanojua maninia”. ⁹ Janiyari pueyaracaanu cua Pueyasora poonijioquiaani puetunu cua cumaacatajanaa, Neyanujiniji cua pohuatanura. Pueyasocuaajaari niishiya, pueyaracaanu cua secojosacari nojuaja, janiyari niaacuara secojoquiaajuhujaj. ¹⁰ Naa cua secojosacari nojuajatej, janiyari na sequequiaani cuara cua tiuquitiiria niaacua, rupaquijia cua quiniuria niaata, nojuaja jaara naa paniri. ¹¹ Janiyari nia niquniuucua jiaatiaani, cua cumaquiniuria socua niajaniya na Sohuanu cumaacata, socua jiyanojua Pueyasocua tiuujijaca nia quiniuria. ¹² Majaari cua

cumaquiniu paniniu saa niajanijaja. Janiyari paniyani nia cumaquiniuria janiyajuhuj. Naacujitij, mariyata pa tiuushacari Jesucristoocua, paari mariyata cumaquitioojonutaniyani.

¹³ Cuarta Pueyaso muerasunaa, janiyarini nia sequenu paniyani nia niishiniuria, janiyarini sequeyarucua niaacua naquerejoquiaa juucuan. Majaari juhuanajuaja cua naata quianu niaacua. Janiyari Jesucristojinijini pohuatanu paniya tii Roma tiacajiniani, tee nia quiyacuajani, cuno taucuaa tiuuniuria Jesuucujuhuj. Tamonu jiyacajinia taucuaari tari Jesucristoocua tiuujiaa quiyacuaa, cua pohuatanuucua Jesucristojinijini nojori niqiuara. Janiyari naa miiniu paniya nia tajinijuhuj. ¹⁴ Cua Jiyaniijiaari cua jiyatequiaari na rupaa pohuatanara. Janiyari cunora na rupaa pohuataquiaani. Majaari na tojiyashijia cua quiniu paniniu. Naaratej, janiya cuara pohuataara na rupaa puereetuaa tiacajinia pueya niqiuara, mariyata tiqiyocua quijiaa pueya niqiarajuhuj. Janiya cuara na rupaa pohuataara niishijiaa pueya, niishiyashijiaa pueyano. ¹⁵ Janiyari cunora quianu paniya Roma tiacajiniani, cua pohuatanura Jesucristojinijini niajanija.

Pueyaso Rupaari cumaacaraca na jataniniuria pajaniya

¹⁶ Maja cutaraari cua caririquiniu Jesucristojinijini cua pohuatanura. Jesucristo rupaacuaajaari Pueyaso cumaacaraca, pueya na jataniniuria Pueyaso muerasu nojori quiniuria, nocua nojori tiuushacari. Puetunu Jesuucua tiuunaa pueyapuejanaari Pueyaso pueyara jatanishaanutaniya, taa Judiucuaa jatanishaaquiaa Pueyaso pueyaracaani. ¹⁷ Jesucristo pohuatasanojinijini paari niishiyani, Pueyasoori pa jiyanooquiaa sesa pa miishanojinijini, saaja Jesucristoocua pa tiuushacari. Saaja nocua pa tiuuniuucua, paari Pueyaso pueyara jatanishaaquiaani. Cunora, naa naajiotasano quiyacuajaari tariucuaaanu Pueyaso Rupaajinia:

“Pueyaso jiyanooshano pueyanoori pueyaracaanu shuquiriaatia quijia quiniutianiya, saaja Pueyasooocua na tiuushacari”.

Pueyasora, puetunu pueyajanaari sesa miijiaa

¹⁸ Pueyasoori jiyocuacaanuji na tojiyashijiaa pueya saniitioquiaa. Naa nojori na saniitosacaritij, Pueyasoori nojori numootequiaa, nojuajaari puetunu na tojiyashijiaa pueyajanaa saniitionutaniya jiyanohua na juaaniutia. Naa saniitosaanutaniyajaariuhuj, puetunu sesa miijiaa pueyajanaa. Naa sesa miijiaa pueya quishacaritij, nojoriiri Pueyasojinijini niishishano ruuretaquiaa saaja. ¹⁹ Nojori jaara Pueyaso niishiniuucua jiaatariquia, nojori maara na niishirij. Pueyasocuaajaari tari nojori niishitiquiaari taamuecate nojuajani. Nojoricuaajaari tari maninia nojuajinijini niishiya. ²⁰ Majaari pa naata Pueyaso niqiniu pa namijata, pa niishiniuria taamuecate nojuajani. Naajaa, Pueyaso shipininiuucua jiya, maatia niishishiyacuajaari nojuajaari Pueyaso, pa niqishacari puetunu na shipinishanojuanaa. Na shipinishanojinijini niishishiyajaariuhuj, majaari na cumaaca puequenu quiniutianiya. Pueyaracaanu quiriquianoori. Naacuajitij, Pueyaso saniitionu panishacari na tojiyashijiaa pueya, nojoriiri maja na naata sequenu quiniutianiya Pueyaso: “Maja canaa niishiniu quijia quiajanijajinijini”.

²¹ Nojoricuaajaari Pueyaso niishijia najuhanaj. Na niishijiaa nojori

quishacari, nojoriiri saaja na rerequeteja. Nojoriiri na tojitiaaquiQUIIAA-juhuaj. Pueyaso miiniuucua maninia pueyaracaanu nojori, nojoriiri maja quenaaja na sequetunu quiJIA: “Paacarasho Pueyasonaa”. Tama nojoriijaarijia jiyanoHua cushitiiQUIIAA sesa nojori niishiriojonuusacari najuhuanaj. Naa mosanucua nojori quishacaritij, nojori jiuujiaari juhua ninishiquiria quiQUIIAA. ²² Nojori jyanishacari nojori cutaraari seetanujuanaa niishijiaca, naacuajitij nojoriiri socua niishiyashijiacara quiQUIIAA. ²³ Nojoriiri Pueyaso shuquiritiaaquiQUIIAA tama nojori shipinishano casaajaaja nojori shuquiritianura. Pa shipininia Pueyaso cutaraari jyanohua cumaacaraca, pueyaracaanu quiJIAjuhuanaj. Nojoriiri Pueyaso niti shuquiritiaQUIIAA tama nojori shipinijosanojuaja. Cuno, nojori shipinijosano Pueyaso niti na shuquiritiasocoriquianoni, cunoori quiQUIIAA juhua shaajeja pueya niquishano, juhua jaacuatujuaca niquishanojuhuaj, juhua nacujiniaaco canujuucuatujuaca niquishanojuhuaj, juhua roshiyocuatujuaca niquishanonio.

²⁴ Naaratej, Pueyasoori nojori tarinitiaQUIIAA sacuaraatia casaa nojori miiniuria tama na cuaqueyatajaaja, taa nojori miiniu paniquiaacuajani. Nojoriiri socua jiyateQUIIAA sesa miiniuria. Naacuajitij, pueyari narta na cuaqueyajaaja miiquiaa sesa, cararaatia nojori miitiosacari narta pueyanota. ²⁵ Naa sesa miijiaca nojori quishacaritij, pueyari seetanu casaajanaa Pueyasojiniji niishishano ruuretaQUIIAA, sapojonuunu nojori tojiniuria saniniuujia. Naaratej, pueyari Pueyaso shipinijosano casami shuquiritiaQUIIAA, saniya na Shipininia niti. Nojuajaari pa Pueyasojuaanaa cutara. Nojuaja cuaara shuquiritiasaaria pueyaracaanu cutara.

²⁶ Pueya jaara Pueyaso carteQUIIAA, Pueyasoori nojori tarinitiaQUIIAA-juhuaj, cararaatia casaa nojori miiniuria, taa nojori jiaatiaQUIIAA miiniuriacuajani. Naacuajitij, maajipohuari maja na caminiu paniniu quiQUIIAA. Saaja narta maajipohuata cararaatia casaa miiquiaari juhua canuu. ²⁷ Naajuhuj, canuuri maajitia quiniu paniyaquiQUIIAA, sacuaraatia na jiaatiasacari narta canuucua. Canuuri jyanohua cararaatia miitiooQUIIAA. Naa nojori miiniuucuatej, nojoriiri tama na cuaqueyajaaja miitiaQUIIAA naQUIYA na miishaanura.

²⁸ Nojori niishiniu paniyaquiniuucua Pueyaso, Pueyasoori nojori tarinitiaQUIIAA nojori miiniuria tama nojori niishiriojosano sesajaaja. Nojoricuaajari niishiya, nojori miishanoori sesa. Naajaa, nojoriiri saaja na miijiaca quiQUIIAA, cararaatia miiniu niishiriojonuujuaca nojori quiniuucua. ²⁹ Naacuajitij, nojoriiri puetunu tamaatia sesa miishanojuanaa miiniu niishijiaca. Jaara sesa miiri, timiquioyari. Nojoriiri nio miijiaca: puera casamiriaca quiniuucua jiaatiajaca. Sesa miiquiaari na panishano nojori jitianura. Nojoriiri tamasaca pueya jitianasano casamiicua jiaatiajaca. Nojoriiri pueya puecoojuaca. Nojoriiri pueya ruutaqueja. Nojoriiri na panishano casami nohuasenuujuaca jiyasohua. Nojoriiri narta pueya miitianu panijiaca. Rimiaacatujurijaariuhuj. ³⁰ Nojoriiri sacuaraatia sequejoju narta pueya. Nojoriiri Pueyaso niquiniu paniyashijiaca. Nojoriiri tamasaca soojeaca. Nojoriiri tama na cuaqueyajaaja jiyateQUIIAA juhua socua maninia pueyara tamasacajiniji. Nojoriiri najuhuaana sequeja: “Janiya maninia miijiani”. Nojoriiri jyanohua niishijiaca, niishishoo sesa casaa na miiniuria. Nojoriiri na queya tojiyashijiaca. ³¹ Nojoriiri seetanujuanaa mosanucua Pueyaso na tojitiaaquiQUINIUCUA. Nojoriiri saaja tama na rupaaajaaja jataja. Majaari

na sequesano na miiniu. Nojoriiri narta pueya paniyashijiaca. Majaari nojori niishiniu jiyanooniu. Majaari nojori niishiniu taraajenu narta pueyacua. ³² Nojoricuaajaari tariucuacaanu naa Pueyaso sequesano niishiya: “Cante naa sesa miijiacani, cuara puecoosaaria”. Naajaa, nojoriiri saaja sesa miiquiaa juhuajaniya. Majaari nojori quiniu shuquiriaatia saaja tama nojori miishacarijiaaja sesa, nojoriiri shuquiriquiaa juhuaj tamasa jaara sesa miiri juhua nojori.

2

Pueyasoori sesa miijiacani saniitionutaniya sesa nojori miiniuucua

¹ Naacuaajitij pueyanaa, niaa jaara tamonuucua tonujujua quiriquia, majaari nia jyaniniu niaari sesa miyashijiaca cutara. Niaa jaara tamonuucua tonujure sesa na miishano, niaari tama niaacuarajaaja tonujiya naa sesa miiniu niishijiaca nia quishacarijuhuaj. ² Paacuaajaari niishiyani, Pueyasoori puetunu sesa miijiacajanaa saniitionutaniya, maninia na niishishacari nojori miijiosano. ³ Quiajaniya saniniuujia, quiarta pueyacuara tonujujanaa, majaari quenaaja quia jyaniniu quiaa saniitioyaquishaanutaniya. Quiaari saniitiosaanutaniyajuhua. Quiaacuaajaari juhua nojori, sesa miijiajuhuaj. ⁴ ¿Majateeri quia niishiniu, Pueyasocuaajaari pueyaracaanu quia sashiquiaa juucua, quioojia quia tacatonuhua nocua? Naaratej, nojuajaari pueyaracaanu maninia quia miiquiaa. Quia rejeretaquiaajaariuhua. ¿Quiaateeri jyaniquiaa Pueyasoori naa maninia quia miiquiaa, maninia quia quiniuucua na niquiara? ¡Maja! ⁵ Quiaari quioojia tacatonu paniyaquiquiaa, sesa quia miishanojiniji quia taraajeyaquishacari. Cunora, quiaari puetunu sesa quia miishanojinijijianaa saniitiosaanutaniya jiya puequesacari. Jiyacaritij niishishaanutaniyari, Pueyasoori seetanujanaa maninia saniitiojua. ⁶ Pueyasoori puetunu pueyajanaa miiniutianiya taa nojori miishano quiquiaari mijiriacuajani. ⁷ Naacuaajitij, Pueyasoori maninia miijiacani jiyatenutaniya pueyaracaanu rishijiacara. Nojoriiri pueyaracaanu maninia miijiacani quiquiaari mijiria, Pueyaso timitiasano nojori quiniuria, shaajeyashijiaca nojori quiniuriajuhuaj. ⁸ Saniniuujia, Pueyasoori na tojiyashijiaca saniitionutaniya jyanohua na juaaniutia. Naa saniitiosaanutaniyajaariuhua noo pojori, canapuate saaja sesa miiniu panijiaca quiquiaarini. ⁹ Puetunu sesa miijiacani pueyapuejanaari naquiya miishaanutaniya, taa Pueyaso tojiyashijiaca cuarta Judiocuaca miishaanutaniyacuaani. ¹⁰ Saniniuujia, Pueyasoori puetunu maninia miijiacani pueyapuejanaa miiniutianiya maninia, taa maninia miijiacani Judiocuaca miishaanutaniyacuaani. Pueyaso timitiasano pueya nojori quiniuucua, nojoriiri jyanohua shuquiriaatia quiijiacani quiniutianiya pueyaracaanu. Naacuaajitij, nojoriiri juhuajaniya quiniutianiya Pueyasota pueyaracaanu.

¹¹ Pueyasoori maja rimiajata na miiniu quiniutianiya taucuaca, Judiocuacanio. Puetunu maninia pueyajanaari maninia miishaanutaniya. Sesa pueyari saniitiosaanutaniyacujua. ¹² Naacuaajitij, pueya jaara Pueyaso rootasano Moisés niishiyashijiaca quiriquia, naajaa, nojori jaara sesa miijiacani quiri, nojoriiri saniitiosocoriquiano. Naajuhua, pueya jaara Pueyaso rootasano Moisés niishijiaca quiriquia, nojori jaara na tojiyashijiaca quiquiaarijuhuaj, nojoriiri cuno Moisés Naajioneejiniji nequesoreesaanutaniya na tojitiaaquiniuucua. ¹³ Majaari nia

jiyaniniu niaari jiyanooshaanutaniya sesa nia miishanojiniji nareja najuhua nia tojishacari Moisés Rootasano. Niaari jiyanoaquishaanutaniya maja seetanujuanaa na tojjiaca nia quiniuucua. Noo pojori cutaraari jiyanooshaanutaniya, canapue teetanujuanaa na tojjiacacaujani. ¹⁴ Moisés Rootasano jiitiaashijiaca pueya jaara tamajaaja maninia miiniu niishijiaca quiriquia, naacujitij, niishishiyari, nojoriiri tamajaaja maninia miiniu niishijiaca cutara. ¹⁵ Naa maninia miiniu niishijiaca nojori quiniuucuatej, niishishiyari, Pueyaso rootasano Moisésri juhua nojori jiuujiajinia naajiotasano quiya. Naaratej, nojori jaara sesa miiri, tama nojori jiuujiajaarijia nojori niishitiya: “Sesa miiriinjia”. Naajuhuj, nojori jaara maninia miiri, tama nojori jiuujiajaarijia nojori niishitiya: “Maninia miiriinjia”. ¹⁶ Naacujitij, cuno juuca, Pueyaso nequesoreetesacari Neyanu Jesucristo puetunu mijiria quiniaa pueyajaanaani, jiyacaritij, tama pueya jiuujiaari nojoriicua tonujunutaniya sesa nojori miishanojiniji jiyasohua. Naaratej, janiyari pueyaracaanu pueya numootequiaacujani cua pahuatasacari Pueyaso rupaa Jesucristojiniji.

Pablo nacasusacari Judiocuaca nojori tojitiaaquiniuucua Moisés Rootasano

¹⁷ Cuarta Judio pueyanonaa, quiaari jiyaniya quiaa Pueyaso pueyano cutara, na saquiriojosano Israel pueyajinijinio quia quishacari, Moisés Rootasano niishijia quia quishacarijuhuaj. Cunora, quiaari sequequia: “Janiya cutaraari Pueyaso pueyanoni. ¹⁸ Janiyari niishiyani casaa Pueyaso paniya cua miiniuriani. Moisés Rootasano niishijia cua quishacari, janiyari niishiyani teyano casaate socua tojishocoriquiano rootasanoni Pueyaso cua shuquiritiniuria”. ¹⁹ Quiaari sequequiaajuhuj: “Janiyacuaajaari seetanu rupaaajanaa niishiyashijiaca pueya niishitiojonani. Janiyari juhua ninishiqui quijiaca pueya cuhuatanani. ²⁰ Janiyari niishiyashijiaca niishitiojuani, naatujoorinio, maninia cua niishishacari seetanu rupaaajanaa Moisés Naajioneejiniji”. ²¹ Naa tamasaca niishitiojona quia quishacaritij, tama quia cuaqueyajaaja quia niishitiojore coteenu, maninia miijia quia quiniuria. Quiaa jaara tamasaca niishitiojoquiaa maja na nohuasenuunura, ¿casaara nohuasejojua quia quiyacuaraarini? ²² Quia rootasacari tamasaca, maja nojori numuetucunura niyacaraca maaji, ¿casaara saniniuujia naa quia miiquiaacuaraarini? Quiaacuajaari sequeja: “Janiyari pueya shipinijosano casaa soojeani, nojori shipinijosano na secojonuusocoriquiano juhua Pueyasoni”. Naa quia soosacari nojori shipinijosano casaatej, ¿casaara quia nohuasejoquiaa cuno casaa nojori secojonuujua tiacajinijicuaaraarini? ²³ Quiaari sequequiaajuhuj: “Moisés Rootasanoori jiyanohua maninia. Na timitiaanjia”. Naajaa, quiaari Pueyaso rerequetequiaa quia tojiyaquishacari Moisés Rootasano. ²⁴ Cunora, tariucuacaanu Pueyaso Rupaajinia naajiotasanoori seetanujuanaa naa sequeya:

“Pueyaso niishiyashijiaca taucuacaari Pueyasoocua rimiaaquequiaa sacuaaraatia, Pueyaso tojiyashijiaca nia quiniuucua nojori niqiuara”.

²⁵ Cuarta Judiocuacanaa, Pueyasocuaajaari pa supuetanaa rootaquiiaari pa cararaatiuuquia co cuaraa miatesano quiiria, na saquiriojosano pueya pa quiniuucua. Naacujitij, nia cararaatiuuquia

co jaara miatesano quiri, cunoori maniniacuaja, niaa jaara seetanujuanaa Moisés Rootasano tojijiaca quiri. Saniniuujia, niaa jaara Moisés Rootasano tojiyashijiaca quiriquia, niaari juhua miatesoo quiyajaa Pueyaso niquiara. Nia cararaatiuuquia coori najuhua miatesano quiya. ²⁶ Saniniuujia, taucuaca jaara maninia miijiaca quiri taa Moisés rootasano sequeyacuajani, miatesoo nojori cararaatiuuquia co quishacari, naajaa. Pueyasora, nojoriiri juhua miatesano quiya, na muerasu nojori quiniuria. ²⁷ Naacuajitij, na cararaatiuuquia co miatesoo tahue jaara maninia miijia quiri, taa Moisés Rootasano sequeyacuajani, nojuajaari jiyanooshaanutaniya, Pueyaso muerasu na quiniuria. Quijaniya saniniuujia Judio pueyanonaa, quiaari Moisés Rootasano niishijiacuaja. Quiaacuajaari quia cararaatiuuquia co miatesanoraca. Naajaa, quiaa cutaraari saniitiosaanutaniya quia tojiyaquiniuucua Moisés Rootasano. Naacuajitij, cuno tahueri quiocuara tonujuriquiano saniya, Judio pueyanonaa. ²⁸ Pueyasocujaari Judiocuaca saquiriojoquiaari na muerasu nojori quiniuria juucua. ¿Cante seetanujuanaa Judio pueyano Pueyasarani? ¿Na cararaatiuuquia co miatesano pueyanotee, Judio pueyacuajinio supueno pueyanotejuhuaj? Maja. ²⁹ Noo pojori cutaraari seetanujuanaa Judio pueyano Pueyasora, noojia jatanishano pueyanotej. Pueyaso Sohuanu jaara pueyano jiuujia jataniri Pueyaso tojijia na quiniuria, cunoori juhua na cararaatiuuquia co miatesano cutara, seetanujuanaa Pueyaso muerasu na quiniuria. Jiyano pueyatej, nojori cutaraari Pueyaso timitiasano, maja narta pueya timitiasano. Pueyanoori maja na naata pueyano jiyatenu Pueyaso pueyano na quiniuria. Saaja Pueyaso Sohuanu cutaraari na naata.

3

¹ Naa cua sequesacari nijaniyatej, niaa naasucuaari sequeya: “Taucuaca jaara naa maninia miishaanutaniya nojori quiyaquishacari Pueyaso saquiriojosano Judiocuaca, naatej, taa pajaniyacuaani, ¿casaara pa cararaatiuuquia co miatejosaaquiaaricuaarini? ¿Paateeri najuhua Pueyaso saquiriojosano Judiocuacani?” ² Maja, Judiocuacanaa. Maniniacuajaari pa quishacari Judiocuaca. Pueyasocujaari Judiocuacaacua tiuuquiaari nojori jitianura na rupaa. ³ Noojiaqueya Judiocuacajinijinio jaara Pueyaso Rupaacua tiuyashijiaca quiya, ¿Pueyasoteeri cunora na rupaa jatanutaniyajuhua? ¡Maja! ⁴ Puetunu pueyajanaa jaara sapojonuujua quiriquia, naajaa, Pueyaso cutaraari tojetaarucujanaa sapojiyashijia. Naaratej, nojuajiniijiri naa naajiotasano quiya tariucuaaanu na Rupaajinia:

“Puetunu pueyajanaari niishiniutianiya puetunu quia sequesanojuanaari seetanujuanaa cutara. Naajuhua, pueya jaara quiocuara tonujure juucua, puetunu nojorijianaari sanaajasaanutaniya, saa maniniaja quia miiniuucua pueyaracaanu”.

⁵ Pa supuetanaa tiyaquiniuucua seetanu Pueyaso rupaacujanaa, naacuajitij, mijiria quiniaa pueyari niishiya, Pueyasoori socua jiyanohua maninia pueyajiniji. Sesa pa miiniujiniji, paari niishiyani Pueyaso cutaraari jiyanohua maninia. Naacuajitij, nojuaja jaara pa saniitiore sesa pa miiniuucua, ¿taa nia sequeyani? ¿Nojuajate sesa, jaara pa saniitiore sesa pa miiniuucua? ¡juaj! Juhua niishiyashijia

pocuareenijia. ⁶ ¡Seetanujuanaa, Pueyasoori sesa miyashijia! Nojuaja jaara sesa miijia quiriquiajuhuaj, ¿maatucua taa mijiria quiniaa nequesereereni?

⁷ Tamasaca naasucuaari sequequiaa: “Sapojoua cua quishacari, pueyari Pueyaso timitiaquiaa socua, nojori niishishacari saaja nojuaja cutaraari seetanu rupaajanaa jiitiaja. Naaratej, ¿Pueyasotucua casaara cua saniitioreni?” ⁸ Teyano pueyanote naa sequejani, nojuaja naasucuaari naa sequejajuhuj: “Socua sesa pa miiri, Pueyaso jiyanooniuria pajaniya. Naacujitij, pocua Pueyaso shuquiritiare socuani, nojuaja jaara pa jiyanoori”. Tamasacaari canaacuara tonujuquiaa najuhanaj, canaanaari naa niishitioquiaani. Canapuete naa sapojonuuquiaa canaacuarani, nojoriiri saniitiosaanutaniya, nojori sesacanuucua canaa.

Pueyasora, puetunu pajaniyajanaari sesa miijiacani

⁹ Quiarijia, jaara naa quriritij cuarta Judiocuacanaa, ¿paateeri socua maninia miijiaa taucuaacajiniji Pueyasorani? Maja. Janiyacuajaari shusha nia pohuatariquiaani, puetunu mijiria quiniaa pueyajanaari sesa miijiaa; Judiocuaca, taucuaacanio. ¹⁰ Tariucuacaanu Pueyaso Rupaajiniacuajaari naa naajiotasano quiya:

“Majaari quenaaja niquiriyatu maninia miijia quiniu. Shaaqui tojetaarucujanaa. ¹¹ Majaari quenaaja maninia niishiriojua pueyano quiniu. Majaari quenaaja Pueyasocua jiaatiaja pueyano quiniujuhuaj. ¹² Puetunu pueyajanaari Pueyasocujaj tashuquoorucuaa. Puetunu nojorijianaari seserucuaa. ¿Cante maninia miijiani? Shaaqui. Shaaqui tojetaarucujanaa. ¹³ Nojoriiri miananajonu maniniu. Nojori rupaari saa monujua. Nojoriiri na niti taquiriocateja saa sapojonuraja. Cuno pojoriiri juhua soconu noonacu jiitiaa na rupaama, rimiaacaturaji nojori quiniuucua. ¹⁴ Nojori jaara pocuare, saaja tamasaca sesacaquiaari, puer juaajia nojori quishacari. ¹⁵ Nojoriiri puecojuaca. Puereeta nanaca shootejaca. ¹⁶ Puetunu mijiria nojori miishanojuanaari casaa sesojua, narta pueya taraajetejajuhuj. ¹⁷ Majaari nojori niishiniu jiyanooni. ¹⁸ Nojoriiri juhuajaniya miiquiaa sesa saaja. Majaari na pueretunu Pueyaso”.

¹⁹ Paacuajaari niishiyani, puetunu Pueyaso Rupaajinia naajiotasanojuanaari Pueyaso saquiriojosano Judiocuacara quiquiaari, nojori niishiniuria, puetunu pueyajanaari sesa miijiaa. Naacujitij, puetunu mijiria quiniaajanaari sanaajetanutaniya, nojori niishishacari puetunu nojorijianaari sesa miijiaa; Judiocuaca, taucuaacanio. ²⁰ Naacujitij, pueya tojishacari Moisés Rootasano juucua, cuno rootasanoori maja na naata nojori na jiyatenu sesa miyashijia. Moisés Rootasanojiniji, paari saaja cunojiniji niishiyani, puetunu pajaniyajanaari sesa miijiacani.

Paari Pueyaso jiyanooshano cutarani, Jesuucua pa tiuushacari

²¹ Pueyasoori quiari naataja pa niishitiquianu cutara, taate pa naata maninia miijiaa pa jatanishaanuni. Moisés Rootasanojinia, tariucuacaanu Pueyaso sequenu panishano caminiujiuniaa naajionuutasanojiniaari naa sequeyajuhuj. Tiiri maatia sequeya taa Pueyaso jiyanooniutianiya pueyani, naajaa, pueya jaara Moisés Rootasano tojyashijiaa quiiri. ²² Quiarijiani, Pueyasoori pa jiyanooquiaa cutara, saaja Neyanu

Jesucristoocua pa tiuushacari. Judiocuaca, taucuacajuhuaaj, Pueya-soori puetunujuanaa jiyanooquiaa Neyanuucua nojori tiuushacari. Majaari rimiajata na jiyanooniu. ²³ Puetunu pueyajanaari sesa miijiaca; Judiocuaca, taucacanio. Naacuajitij, nojoriiri juhua tucua-caanu quiya Pueyasojiniji. Sesa miijiaca pueya quiniuucua, nojoriiri soosano pueyara jataquiaari. Naacuajitij, pueyari Pueyaso timitiasoo quiquiaari. ²⁴ Naajaa, jiyanoohua panijia Pueyaso quiniuucua, nojuajaari pa jiyanooquiaari Jesucristo cusuucua pocuara. Naacuajitij, Pueya-soori pa jiyatequiaari juhua sesa miyashijiara. ²⁵ Pueyasoori Neyanu Jesucristo jiyatequiaari pueyacuaji Tacuna na quiniuria, Neyanu nanaca shoonuucua niyacutesanojinia. Naacuajitij, pueya jaara niishiriquia Jesucristo nojori niti cusoquiaari, saaja naa nojori tiuushacari nocuatej, nojuajaari na Que Pueyaso jiyanootiquiaa pueya. Naajuhuaaj, Pueyaso saniitioyaquishacari tariucuacaanu nocua tiuujiaca pueya Jesu cusoyaquishacarijia, majaari najuhuaana puera jiuujiaajia na quiniu quiquiaari. ²⁶ Pueyasoori niishiquiaari Neyanu Jesucristoori nojori-icuaa mosocoriquiano, sesa nojori miijosano tuujusaanura setanujuanaa. Naaratej, nojuajaari pueyaracaanu sesa nojori miijosano rejeretaquiaari saaja. Jesucristo cusuucua quiari naataja pocuara, paari niishiyani, Pueyasoori setanujuanaa maninia miijia. Nojuajaari maja najuhuaana na jiyanooniu pajaniya. ¡Neyanu motequiaari pocuaraari!

²⁷ ¿Teyano niajanijiniote tojetaarucujanaa saaja maninia miijiani? Shaaqui. Naacuajitij, maninia miyashijiaca pa quishacari, puetunu pueyajanaari sanaajasaanutaniya Pueyaso nequesoreesacari pueya. Saniniuujia, paa jaara puetunu Moisés Rootasanojuanaa tojitiajaca quiriquia maniniani, paa maara tama pa cuaqueyajaaja shuquiritijajaca quiriquia cutarani. Saniniuujia, Pueyasoori pa jiyanooquiaa saaja pa tiuushacari Jesucristoocua. Naacuajitij, majaari pa jiitianu tama pa miishanojuajaaja pa shuquiritiasocoriquiano. ²⁸ Naacuajiti paari niishiyani, Pueyasoori pa jiyanoojia puetunu sesa pa miishanojinijijianaa saaja Jesucristoocua pa tiuushacari. Majaari na jiyanooniu pajaniya, Moisés Rootasano pa tojishacari.

²⁹ ¿Niaateeri jiyaniya, Pueyasoori saaja Judiocuaca Jiyano? ¡Maja! Pueyasocujaari puetunu mijiria quiniaa pueyapuejanaa Jiyano. ³⁰ Pueyasoori maja caapiqui. Nojuajaari saaja niquiriyatu. Naacuajitij, majaari niquiriyatu Pueyaso quiniu Judiocuacaa, socua tamonu Pueyaso taucuacaa. Naaratej, puetunu pueyapuejanaari jiyanooshaaquiaa saaja Jesucristoocua nojori tiuushacari; tariucuacaanu na saquiriojosano Judiocuaca, taucacanio. ³¹ Pueyaso muerasu pa quishacari saaja Jesuucua pa tiuushacari, ¿paateeri Moisés Rootasano shocoteyani? Maja. Paacuajaari Moisés Rootasanojiniji niishiyani, paari sesa miijiacani. Naacuajitij, Moisés Rootasanoori panishiya, pa niishiniuria paa cuaara Jesucristoocua tiuuria, jiyanooshano pa quiniuria.

4

Pueyaso jiyatesacari Abraham juhua sesa miyashijiara

¹ Naaratej cuarta Judiocuacanaa, ¿taa nia sequeya pa supuetana Abrahamjinijini? ² ¿Casaara Pueyaso jiyatequiaari nojuaja juhua sesa

miyashijiarani? Abrahamri maja na jiyanooshaanu quiquiaari maninia na miiniuucua. Pueyaso jaara nojuaja jiyanooquiaari maninia na miiniuucua, nojuaja maara tama na cuaqueyajaaja timitiaja quiquiaari. ³ Saniniuujia, tariucuacaanu Pueyaso Rupaajinia naa naajiotasano quiyari Abrahamjiniji:

“Abrahamri Pueyasocua tiuquiaari. Naaratej, Pueyasoori na jiyatequiaari juhua sesa miyashijiaara”.

⁴ Cua tojiri pueyanaa. Pueyano jaara poonijiore tamonura, na poonijiotenaari na poonijionujiniji na cumaneeca niqutiojua. Jaara niqutioosaare, cuno cumaneecaari maja nareja niqutiosano. Cunoori seetanujuanaa na poonijosanojiniji. ⁵ Saniniuujia, maninia miyashijia jaara Pueyasocua tiuuri, Pueyasoori na jiyatenutaniya juhua sesa miyashijiaara saaja nocua na tiuuniuucua. ⁶ Pa supuetanaa jiyaniijia Davidcuajaari naa pohuataquiaari taa shuquiriaatia pa quiyani, Pueyaso jaara pa jiyatere juhua sesa miyashijiaa pa quiniuria na niqiara, maninia miyashijia pa quishacarijia. Naa naajiotasaaquiaari-iri David sequesano:

⁷ “Shuquiriaatia quijiaca cutaraari noo pueya, canapue Pueyaso jiyanoya sesa na miijosanojinijicuaajani, Pueyaso jaara tuujure sesa nojori miijosanojuhuaj. ⁸ Shuquiriaatia quijiacaari noo pueyajuhuj, puetunu sesa nojori miishanojuanaa Pueyaso saneyaquishootej”.

⁹ Janiyacuajaari tari sequereeni, Pueyasoori Abraham jiyatequiaari juhua sesa miyashijia na quiniuria, saaja nocua na tiushacari. Pueyaso jaara naa jiyanooquiaaricuaa Abrahamtej, ¿Pueyasote saaja Judiocuaca jiyanooni panijia, noo pojori canapuate na cararaatiuuquia co miatesano jiiitaani, taa nojori supuetana Abrahamcuaani? ¿Taa nia sequeyani? ¿Taucuacaarijiataj? ¿Nojoriti jiyanooshiyajuhuj? ¿Taaquiririnij! ¹⁰ ¿Taa nia sequeyanijia? ¿Abrahamte tari na cararaatiuuquia co miatesano quiquiaari Pueyaso jiyanooshacari nojuaja? Maja. Pueyasocua-jaari na jiyanooquiaari miatesoojua na quishacari. ¹¹ Na tiuuniu nuhuaji Pueyasocua, Pueyasoori shusha jiyacari na niishitiquiaari na cararaatiuuquia co na miatenura. Cunoori quiquiaari na niyajetaaquishaanura, saaja Pueyasocua na tiushacari, Pueyasoori na jiyatequiaari juhua sesa miyashijiaara, miatesoojua na quishacari. Naacuaajitij, miatesoo taucuaca tiushacari Jesucristoocua, taa Abraham tiuquiaaricuaani, Pueyasoori nojori jiyateya juhua sesa miyashijiaa nojori quiniuriajuhuaj, mariyata juhua Abraham niqiohua nojori quiniuria. Naacuaajitij, puetunu Pueyaso sequesano Abrahamjanaani, cunoori nojoririjuhuj. ¹² Naajuhuj, pueya jaara na cararaatiuuquia co miatesano qui Judiocuaca nojori quiniuria, naajaa. Nojori jaara Jesucristoocua tiuuri taa Abraham tiuquiaaricuaani miatesoo na quishacarijia, Pueyasoori nojori jiyateya juhua Abraham niqiohua nojori quiniuriajuhuaj.

Pueyaso sequesano Abrahamni, cunoori Jesucristoocua tiuujiacara-juhuaj

¹³ Pueyasocuaajaari Abraham sequequiaari, nojuajaari nio jiya camaru quiniutianiya, puetunu necohuatajanaa. Pueyasoori naa sequequiaari Abrahamtej, saaja nocua na tiushacari. Majaari naa Abraham

sequesaanu quiquiaari Moisés Rootasano tojjija na quiniuucua. Jiyacaritij, Moisés Rootasanoori maja na quiniu quiquiaari juhuanojuaja. ¹⁴ Pueyaso sequesano Abraham jaara saaja Moisés Rootasano tojjiiacara quiriquia, na sequesano maara najuhuana quiri Pueyasooocua tiuujiaaca pueyara. Naajuhuj, pueya maara najuhuana Pueyasooocua tiuujiaaca quiriquiajuhuaj. Seetanujuanaa Pueyaso sequesano Abrahamni, cunoori puetunu Pueyasooocua tiuujiiacarajanaa. ¹⁵ Cunoori maja saaja Moisés Rootasano tojjiiacara. Pueyasocuaajaari niishiquiaari, pueyari maja na naata Moisés Rootasano tojiniu quiniutianiya puetunujuanaa. Moisés Rootasanojiniji, paari niishiyani, paari saniitiosaanutaniyani pa tojtiaaquiniuucua cuno rootasano. Saniniuujia, Moisés Rootasano jaara quiyaquiriquia, pueya maara sequeyaquishaare: “Niaari sesa miijiaca”.

¹⁶ Pueyasoori tariucuacaanu na sequesano Abraham nareja niquitionu paniquiaari, puetunu necohuarajanaanio. Naaratej, seetanujuanaa pa masenura na sequesano Abraham, Pueyasoori sequequiaari, nojuajaari nareja na niquitionutaniya nocua tiuujiaaca. Naacujitij, Pueyaso sequesanoori maja saaja Moisés Rootasano tojjiiacara. Cuno sequesanoori puetunu pueyapuerajanaa, canapuate Pueyasooocua tiuujiaaca quiyani, taa Abraham quiquiaari Pueyasooocua tiuujiaacuaani. Naa Pueyasooocua tiuujiaaca pa quishacari taa Abraham tiuquuiaari Pueyasooocuaacuaani, paari Abraham niquiohuani. Naaratej, Pueyasora, Abrahamri pa que. ¹⁷ Pueyasocuaajaari naa sequequiaari Abrahamtej nojuajaari queraatia niquiohuaraca quiriquiano. Naacujitij, Pueyaso sequesanoori naa naajiotasano quiya:

“Abrahamnaa, janiyari quiarijia quia jiyateree queraatia tamaatia rupaaca pocuajaca que quia quiniuriani”.

Abrahamri Pueyaso sequesanoocua tiuquuiaari. Nojuajaari niishiquiaari Pueyasoori macunucua samiitianijia. Niishiquiaariji-aariuhuj, Pueyasoori cumaacaraca na panishano na shipininiuria shaaquijinjiji.

¹⁸ Abrahamri niishiquiaari, nojuajaari maja na naata necocua na muetutenu, puera saaquiano na quishacari tari. Naajaa, Abrahamri saaja Pueyaso sequesanoocua tiuquuiaari. Naacujitij, nojuajaari seetanujuanaa queraatia tamaatia rupaaca pocuajaca pueyapue que, taa Pueyaso sequequiaari nojuacuajani. Pueyasoori naa na sequequiaari:

“Quia niquiohuari tojetaarucujanaa queraatia quiriquiano”.

¹⁹ Naa Pueyaso sequesacari nojuajatej, nojuajaari tari cien marijia shocotejoquiaari. Naa saaquiano na quishacaritij, necocua Saarajuhuj, naajaa, majaari na tarinitianu quiquiaari Pueyaso sequesanoocua tiuuniu. ²⁰ Saaja Pueyaso sequesanoocua na tiuushacari, nojuajaari maja noojia na niquijiotenu quiquiaari. Majaari Pueyaso sequesanojiniji na taacanuunu quiquiaarijuhuaj. Saaja Pueyasooocua na tiuushacari, nojuajaari noojia cumaquiquiaari socua. Naacujitij, nojuajaari naa maniniuhuaqueetaquiaari Pueyaso: “Paacarasho cua Pueyasonaa. Niishiyani quiaari canaa muetutenutaniya taa quia sequecanu janiyacujani. ²¹ Quiaacuajaari cumaacaraca quia miiniuria puetunu quia sequesanojuanaa”. ²² Naa Abraham tiuuniuucua Pueyasooocuatej, Pueyasoori na jiyatequiaari juhua sesa miyashijia pueyanora.

²³ Jaara naa naajiotasaaquiaari Abrahamjiniji: “Pueyasoori na jiyatequiaari juhua sesa miyashijia”, cunoori maja saaja Abrahamra

sequesano. ²⁴ Cunoori pajaniyara sequesanojuhuaj. Cunora, Pueyasoori pa jiyateya juhua sesa miyashijarajuhua, nocua pa tiuushacari, pa niishishacarijuhuaj nojuacuajaari pa Jiyaniijia Jesucristo samiitian-iqiaariuhua macujiniji. ²⁵ Pueyasocuaajaari mijiria na jiyaroquiaari sesa pa miishanoocuaa mosocoriquiano. Nojuajaari na samiitian-iqiaariuhua, Jesu jaatianura nocua pajaniya, juhua tariucua sesa miyashijaca.

5

Jesuucua tiuunaa pueyari jiyanooshano

¹ Naacuajitij, paa jaara tari jiyanooshano quiyani Jesucristoocua pa tiuushacari, paari juhuajaniya quiya Pueyaso niquiarani. Jesucristoori na Que pa jyanootiquiaari, pocuara na cusosacari. ² Jesucristoocua tiuujiaa pa quishacari, Pueyasoori pa timitiaquiaa. Pa cumaquiquiaajaariuhua maninia necohua pa quiniuria. Paari shuquiriyajaacuhua, pa niishishacari paari jatanishaanutaniyani, shacantuuca quijiaca pa quiniuria juhua nojuajuhua. ³ Majaari saa cunojua. Paari shuquiriquiaajuhua, paa jaara naquiya miishaareni, paari socua juhuajaniya rejeretajaca quiniutianiyan. ⁴ Naa rejeretajaca pa quishacaritij, paari cumueeca Pueyaso muerasu quiniutianiyan. Naa cumueeca Pueyaso muerasu pa quishacaritij, paari juhuajaniya sashijiaa quiniutianiyan, pa niishishacari Pueyasoori seetanujuanaa maninia miiniutianiya pajaniya, taa na sequequiaaricuaajani. ⁵ Naa pa niishishacaritij, majaari sapojosano pa quiniu quiniutianiya. Pueyasocuaajaari tari jiyaroquiaari na Sohuanu, poojiajinia quiriquiano, seetanujuanaa Pueyaso paniniu pa jiitianura poojiajinia.

⁶ Pueyaso tojiyashijiaa pa quishacarijia, majaari pa naata quiquiaari Pueyaso jyanootiniu tama pa cuaqueyajaaja. Jesucristoori jiyacari namitia pocuara cusoquiaari na Que na jyanootiniuria pajaniya. ⁷ Sesa miyashijia pueyano jaara monu panishiya juucua, *¿tamonu maninia pueyanoteeri quiya na sequenura*: “Janiya cuaara mosaaria juhuari cuno pueyano niti”? Majaruhua. Monu panishano pueyano jaara seetanujuanaa maninia pueyano quiri, na rupuena pueyano jaara jyanohua na panijia quiri, nojuaja maara sequere: “Janiya cuaara na niti mosaaria juhuari”. ⁸ Saniniuujia, sesa miijiaa pa quishacarijia, Jesucristoori pa niti cusoquiaari cutara. Naacuajitij, paari niishiyani, Pueyasoori jyanohua pa panijia. ⁹ Quiarijia, paari sesa miyashijiaa quiya Pueyaso niquiarani, Jesucristo cusunucua pocuara. Naacuajitij, paa cutaraari niishiyani, Pueyaso saniitiosacari na tojiyashijiaa pueya, Cristoori pocuaji tacanutaniya cutara, tariucua na jatanishano pueya pa quiniuucua. ¹⁰ Na paraa pa quishacarijia, Pueyasocuaajaari pa jyanooquiaari, Neyanu cusunucua pocuara. Quiarijia, nata jeca-tono pa quishacari, Neyanuuri saminio quiya pueyacaanu pocuaji na tacunura. ¹¹ Majaari saaja cunora shuquiriaatia pa quiniu. Paari shuquiriyajuhua, pa Jiyaniijia Jesucristo rupuetootenuucua pajaniya na Que Pueyasota.

Pa supuetana Adánri maja juhua pa Jiyano Cristo

¹² ¿Casaara pa cusunuuquiaani? Juhucatecara pa supuetana Adán miiniucua sesa, naaratej puetunu pueyajanaari sesa

miijiacajuhuaaj. Pueyasocuaajaari tari sequequiaari: “Cante sesa miijiani, cuaara shaajeera”. Seetanujuanaa naari. Puetunu pajaniyajaanari shaajeriquianoni, sesa miijiaa pa quiniuucua. ¹³ Moisés Rootasano quiyacuishacarijia, pueyari tari sesa miiniu niishijiaca quiquiaari. Jiyacaritij, pueya miishacari sesa, majaari nojoriicuara saquiriojotasaanu quijia sesa nojori miishacari. ¹⁴ Cuno pojori, Moisés niyacari quiquiaarini, nojoriiri maja na tojiyaquiniu quiquiaari Pueyaso sequesano taa Adán tojiyaquiquiaari Pueyaso sequesano cuani. Naajaa, puetunu nojorijianaari cusonuquiaarijiuhuaaj sesa miijiaa nojori quiniuucua, sesa miijia Adáncuajinio nojori supenuucua. Quiarijia saniniuujia, nia pohuatareera Adán miishanojiniji, Jesucristo miishanojinijinio.

¹⁵ Adán miishanoori jiyanohua tamaatia Jesu miishanojiniji. Coteenu shipinishano pueyano miiniuucua sesa, puetunu pueyajaanari shaajenu niishiya. Saniniuujia, Jesucristo miiniuucua maninia, Pueyasoori queraatia pueya jiyatequiaa pueyaracaanu rishijiaca nojori quiniuria cutara. ¹⁶ Pueyaso miishano maninia pajaniyarani, cunoori sesa Adán miishano shocotaa jiyanohua cutara. Naa niquiriyatu sesa casaa Adán miiniuucuatej, puetunu pueyajaanari saniitiosocoriquiano. Saniniuujia, maninia Jesucristo miiniuucua pajaniyarani, Pueyasoori pa jiyanoocquiaa puetunu sesa pa miishanojinijijianaa. ¹⁷ Niquiriyatu pueyano miiniuucua sesa, puetunu pueyajaanari cusonuquiacara quiquiaari. Saniniuujia, niquiriyatu pueyano miiniuucua maninia pajaniyara, cunora, Pueyasoori pa jiyateya juhua sesa miyashijiaca pa quiniuria. Cunoori, Jesucristoocua pa tiuushacari. Majaari saaja cuno, naajuhuaaj, paari shuquiriaatia quijia jiyaniijianucua quiniutianiya maniniushiquini, Jesucristo rupuesano pa quishacari.

¹⁸ Naa Adán miiniuucua sesatej, nojuajaari puetunu nocuajinio supenu pueyajaanaa jiyatequiaari sesa miijiacara, saniitiosano nojori quiniuria. Naajuhuaaj, Jesucristo miiniuucua maninia, puetunu pueyajaanari na naata jiyanooshaanu, nojori saniitioyaquishaanuu cuaji, pueyaracaanu quijiaa nojori quiniuria. ¹⁹ Adán tojiyaquiniuucua Pueyaso sequesano, puetunu pueyajaanari sesa miijiacara jiyate-saaquiaarijiuhuaaj. Saniniuujia, Jesucristo tojiniuucua Pueyaso sequesano, puetunu nocua tiuujiacajanaari juhua sesa miyashijianucua jiyatesaaquiohua.

²⁰ Moisés Rootasano jaara niishishaaquiaari, pueyari socua sesa miijiacara jiyacatequiaari. Naa socua sesa miijiacara pa quishacaritij, naajuhuaaj, Pueyasoori socua jiyacatequiaari pocua taraajenujuhuaaj. ²¹ Sesa miiniu tarinitianu niishiyashijia pa quiniuucua, puetunu pueyajaanari cusonuuriquiano quiquiaari. Saniniuujia, Pueyaso taraajenuucua pocua, nojuajaari Neyanu Jesucristo motequiaari pa niti, pa jiyanooshaanura. Naacuajitij, nojuajaari juhua pa samiitianiijioquiaariuhua, pueyaracaanu rishijiaca pa quiniuria pa jiyaniijia Jesucristota.

6

Pablo niishitiojosano moojinia tiuquinijionujiniji

¹ Pueyaso jaara naa pa jiyanoocquiaa pocua na taraajesacari, ¿taania sequeyani pueyanaa? ¿Paate socua pueyaracaanu sesa miijia quiniutianiyani, pueyaracaanu Pueyaso jiyanooniuria pajaniya, pueya

niishiniuria, Pueyasocuaajaqui jiyanoohua maninia na jiyanooniuria pajaniya? ² ¡Maja pueyanaa! ¡Maja naa nia niishiriojonu! Pueyaso jaara tari poojia sesoriquia seque jataniquiaari Neyanu Jesucristo na rupuetesacari pajaniya, ¿paatucua casaara socua sesa miijia quirini? Pueyasora, paacuaajaari tari cusonuuquiaari Jesutani. ³ ¿Niaateeri cuno niishiyaquiyajaa? Naajuhuaaj, paa jaara moojinia tiuquinishaare Jesucristoocua pa tiuushacarini, Pueyaso niquiara, paari Jesu rupuequiaari niyacutesanojiniani. Nojuacuajaari pa niti saniitiosaaquiaari. ⁴ Naacuajitij, paa jaara moo cariquimia shishaareni, jiyacaritij, paari juhua Jesuta jamoshiyajuhuaaj. Naa juhua macu pa quishacaritij, paari samiitianijosanohuani, taa Jesucristo samiitianishaaquiaariuhua macujiniji jiyanoohua Pueyaso cumaacatacuaani. Naa samiitianijosanohua pa quishacaritij, maninia miijia pa quiri juhua quiarinio pueya.

⁵ Paa jaara Jesucristo rupuetesaaquiaari sesa pa miishanoocuara na cusosacarini, naajuhuaaj, paa cutaraari tari samiitianijosanohua juhua nojuajani, maninia quijia pa quiniuria. ⁶ Tariija, majaari pa naata tarinitianu quijia sesa pa miiniu, sesa jiuujaraca pa quishacarijia. Sesoriquia poojia sequeeri Jesuta cojiritiasaaquiaari monu, nocua pa tiuushacari, maja socua cumaaca na jitianura, sesa na miitiniuria pajaniya. ⁷ Naacuajitij, sesoriquia poojia seque jaara tari jatanishano quiya, majaari tari sesa miijia pa quiniu. ⁸ Paa jaara tari naa cojiritiasaaquiaari monu Jesuta nocua pa tiuushacarini, paari quiarijia niishiya cutarani, paari pueyaracaanu nata quiriquiano saminioni. ⁹ Cristocuaajaari samiitiaquiaariuhua. Paari niishiyajuhuaaj, majaari socua na pacutenu quiniutianihua cusonu. Nojuacuajaari tari cusoquiaari puetunu sesa pa miishanoocuarajanaa. Naaratej, nojuajaari maja na naata socua cusojuasaanuhua. ¹⁰ Majaari socua Jesucristo pacutenu quiniutianihua cusonu, sesa pa miishanoocuara. Nojuacuajaari tari cusoquiaari, Pueyaso jiyanooniuria puetunu mijiria quiniaa sesa miishanojuanaa. Nojuaja jaara samiitiaquiaariuhua, nojuajaari seetanujuanaa pueyaracaanu rishiriquiano Pueyasora cutara. ¹¹ Naajuhuaaj pueyanaa, tama nia cuaqueyajaaja nia jiyatere juhua macura, maja socua nia miiniuria sesa. Nia niishirijuhuaaj, niaacuajaari Jesucristota samiitiaconohua, Pueyaso tojjijia nia quiniuria.

¹² Naaratej pueyanaa, majaari nia shanacunu sacuaraatia nioojia seque niishiriojosano nia miiniuria. Seetanujuanaa nia niyajetare tama nia cuaqueya panishanojuajaaja nia miyaquiniuria. ¹³ Majaari nia cuaqueya nia panitianu sesa nia miiniuria, taa na paniya nia miiniuria juucuacuajani. Saniniuujia, nia cuaqueya nia jiyatere cutara saaja Pueyaso panishano miijia na quiniuria. Niaacuajaari tari samiitiacoquiaariuhua juhua macunucua nia quiniujiniji. Naacuajitij, nia cuaqueya nia jiyatere saa maninia miijia na quiniuriaja. ¹⁴ Niaa jaara nioojiajinia cuno sesa niishiriojosano ruuretajaca quiri, niaari na shocotanutaniya, Pueyaso cumaquishacari niajaniya. Nia niishiri, niaari quiarijia Pueyaso tojtiajaca cutara, maja tari Moisés Rootasano tojjijia.

Pueyaso tojijashijia pueyani, nojoriiri Sesaaca pueya

¹⁵ Cua sequesacari niajaniya, pajaniya maja tari Moisés Rootasano tojjiacani, ¿niaateeri cunora sesa miiniutianiya, Pueyaso quishacari pa

jiyanoojia? ¡Maja naa nia miiniu pueyanaa! ¹⁶ Niaacuaajaari niishiya, paa jaara tama pa cuaqueyajaaja jiyatere tamonu camarnu seru pa quiniuriani, naacuaajitij, paari pueyaracaanu na tojjia quiniutianiyani. Naajuhuaaj, niaa jaara sesa miijiaca quiriohua, niaari Sesaaca tojjia. Naa sesa miijiaca nia quishacaritij, niaari cusonutaniya. Saniniuujia, niaa jaara Pueyaso tojjiacara quiri, niaari sesa miyashijiaca quiniutianiya. ¹⁷ Tarijia, niaari Sesaaca tojjia quijia, juhua na seya, sesa miijiaca nia quishacari. Quiarijia, janiyari Pueyaso timitiaani nia tojjinuucua Jesucristo rootasano puetunu nioojiatajanaa, taa nia niishitiojosaaquiaaricuaajani. ¹⁸ Jesucristo rupaa nia tojjishacari, Pueyasoori nia jiyatequiaari na muerasu nia quiniuria, maja Sesaaca seya nia quiniuria socua. Naacuaajitij, niaari Pueyaso tojjiacara jatanishano, saaja maninia miijiaca nia quiniuria. ¹⁹ Janiyari naa pohuataa serujiniji niajanianiyani, maatia nia tojjiniuria cua niishitiojosano. Majaari juhuanajuaja nia naata puera jiyajeneta niishitiojosano niishiniu, cumueeca Pueyaso muerasu nia quiyaquishacarijia. Tarijia, niaari tama nia cuaqueyajaaja jiyatequiaari Sesaaca panishano nia miiniuria. Naacuaajitij, niaari jiyanohua sesa miijiacara jiyacatequiaari. Naajuhuaaj, quiarijia saniniuujia, tama nia cuaqueyajaaja nia jiyatere Pueyaso panishano nia miiniuria. Niaa jaara naa miiri, niaari tojetaarucujajanaa maninia miijiaca quiniutianiya Pueyasora.

²⁰ Niaa jaara sesa miijiaca quiquiaarijia Sesaaca tojjia nia quishacarijia, niaari juhuajaniana Pueyaso tojjiyashijiaca quiquiaari. ²¹ ¿Sesaacate maninia nia miiquiaari sesa nia miiniuucua nera? ¡Maja! Naa cutaraari saaja caririquiquiaa sacuaraatia casaa nia miiniuucua tarijia. Niaari quiarijia niishiyajuhuaaj, cante sesa miijiaca quiquiaani, nojoriiri shaajasaariquiano. ²² Naa sesa miyashijiaca nia quishacari quiarijia saniniuujia, niaari Pueyaso tojjiacara jiyatesaaquiaari, saaja na panishano nia miiniuria cutara. Naa Pueyaso tojjia nia quishacaritij, nojuajaari nia jiyatenutaniya seetanajuanaa maninia miijiaca nia quiniuria. Naacuaajitij, niaari pueyaracaanu shuquiriaatia rishijiaca quiniutianiyajuhuaaj. ²³ Saniniuujia, sesoriquia pueya miiniuucua sesa saaja, nojoriiri naa na miiniuucua shaajasaanutaniya. Saniniuujia, saaja Jesucristoocua tiuujia pa quishacari, Pueyasoori saa cunoraja pa jiyatequiaa pueyaracaanu rishijiaca pa quiniuria, pa Jiyaniijia Jesucristo rupuejaca pa quishacari.

7

Paari juhua camishanoni

¹ Pueyanaa, niaacuaajaari Moisés Rootasano niishijiaca. Niaari niishiyajuhuaaj, paa jaara shaajequeeni, paari jiyacari Moisés Rootasano carteeque shushani. ² Naajuhuaaj, paacuaajaari rootasaaquiarini, maaji jaara camishano quiri, cuara tamonu cayata quiyaquiriia, neyaca jaara saminio quiyajaa. Neyaca jaara cusoyare, camino pueyara Moisés rootasanoori maja tari na quiniu cuno mashiquio tojjishocoriquiano. ³ Saniniuujia, maaji jaara tamonu pueyanota quiriquia neyaca quishacarijia saminio, cuno maajiiri sequeshiya paanatuta, naa na quiniuucua tamonu pueyanota. Saniniuujia, neyaca jaara cusoyare, mashiquio camishacari tamonu pueyanota, naajaa, majaari Moisés

Rootasano tojiyashijia na quiniu cunora. Nojuajaari maja paanatu, naa na miishacari.

⁴ Niaari naajuhuaaj pueyanaa. Jesucristo cusonuucua pa niti, niaari juhua cusonuucuaarijiuhuaaj, maja Moisés Rootasano tojiijia nia quiniuria socua. Naacujitij, niaari tamonu tojiijia quiya cutara. Nojuajaari pa Jiyaniijia Jesucristo, nooj, macujiniji samiitiaquiaariuhuatej. Naacujitij, quiarijia pa Jiyaniijia Jesucristo tojiijia pa quishacari, paari maninia miijia Pueyasorani. ⁵ Tarijia, Pueyaso tojiyashijia pa quishacarijia, Moisés Rootasano pa niishishacari maja quenaaja pa miiniuria sesa casaa, cuno rootasanoori saaja juhua socua pa shiniujiuquiaari sesa pa miiniuria. Naacujitij, tama sesa pa miishacarijiaaja, paari tama pa cuaqueyajaaja jiyateriquiaa saniitiosano pa quiniuria maquesaashijia mani quiquiojiniani. ⁶ Tarijia, paari juhua quioosano pueya Moisés Rootasano tojitishaquiaarini. Saniniuujia, Jesucristota pa cusonuucua, nojuaja jaara pocuara cusoquiaari, paari tari Moisés Rootasano tojinu cartequiaarini. Moisés Rootasano pa tojiyaquishacari quiarijia, naacujiti pa naata Pueyasojuanaa tojinu shitimia cutara, na Sohuanu cumaquishacari pajaniya. Majaari juhua tarijia pueya miishano. Tarijia, paari Moisés Rootasano tojitiajaca quiquiaari maniniani, pa puerenuta paa mariqui saniitiosaareeri pa tojiyaquiniuucua niqiriyatu queraatia na rootasanojiniji.

Poojiaari saa sesa miiniu niishijiaja

⁷ Tamasaca naasucuaari jiyaniya janiyari Moisés Rootasano soojeani. Maja. Quiria, jyanohua maniniacujaari Moisés Rootasano. Moisés Rootasanojiniji, paacujaari niishiyani paari sesa miijiacani. Moisés Rootasano jaara quiaquiriquia, janiya maara niishiyaquiquiaarini, cua jiaatiasacari tamasaca jiiitasano casamiicua, cunoori sesa Pueyasora. ⁸ Saniniuujia, Moisés Rootasanojiniji cua niishishacari maja tamasaca casamiicua cua jiaatianura, janiyari saaja juhua shiniujiushaquiaarini casamiicua jiaatiaja cua quiniuria socuani. Naacujitij, Moisés Rootasano cua niishiyaquishacarijia, coojiaari juhuajaniya quiquiaari juhua maqueja. Saniniuujia, janiya jaara Moisés Rootasano niishiquiaarini, coojia sequeeri juhua niucuaquiaari, puetunu sesa casaajanaa na miiniu paniniuria. ⁹ Moisés Rootasano cua niishiyaquishacarijia, janiyari juhuajaniya quijia quiquiaarini. Saniniuujia, Moisés Rootasano cua niishishacari, janiyari jyanohua taraajequiaarini, cua niishishacari janiyari jyanohua sesa miijia Pueyaso niqiarani. ¹⁰ Naa sesa miijia cua quishacaritij, janiyari niishiquiaarini, janiyari quera jatashiya saniitiosocoriquianoni. Janiya jaara Moisés Rootasano tojiquiaari shushajanaani, janiyari jyaniquiaarini, janiya jaara cuno rootasano tojirini, janiya naasucuaari pueyaracaanu rishijia quiniutianiyani. Saniniuujia, Moisés Rootasanoori saaja cucuara tonujuquiaari puetunu sesa cua miishanojinijianaa. ¹¹ Naacujitij, janiyari jyanohua jiyajenequiaarini, cua jyanishacari cua naatacujia Moisés Rootasano tojinu maninia, Pueyaso jyanooniuria janiya. Jaara maja cua naata quiquiaari Moisés Rootasano cua tojinuria maninia, janiyari niishiquiaarini Pueyasoori cua jyanoyaquiniutianiya.

¹² Seetanujuanaa nia sequeyanijia pueyanaa, Moisés Rootasanoori jyanohua maninia. Tojetaarucujanaa maninia rootasano. Cunoori

seetanujuanaa rupaa maniniu Pueyasojiniji. ¹³ Moisés Rootasano jaara naa maninia quiri, ¿janiyateeri nia sequeyani cuno na rootasanoori pa cusojuaja? Maja. Janiyari nia sequeyani, Moisés Rootasanojiniji, paari niishiyani sesa pa miishano cutaraari jiyanoohua sesa Pueyasora. Naacuajitij, paari Moisés Rootasanojiniji niishijiani, paari puetunujuaanaa jatasocoriquiano quijia juucuani, seetanujuanaa sesa miijiaca pa quiniuucua.

¹⁴ Paacuaajaari niishiyani, Moisés Rootasanoni, cunoori maja nareja pueyano niishitiojosano. Pueyaso niishitiojosanocuaajaari pa tojishocoriquiano puetunu poojiatajanaa. Saniniuujia, coojiaari Pueyaso tojiyashijia. Janiyari tamajaaja juhua coojia seruni, na panishano cua miiniuria. Naa sesa jiuujiaraca cua quishacaritij, majaari cua naata Moisés Rootasano tojinuu. ¹⁵ ¿Casaara naa sesa cua miiquiaani? Janiyari saaja cua niishishano sesa casaa miiquiaani. Majaari maninia cua miiniu quiquiaa, taa cua paniyacuajani. ¹⁶ Janiya jaara cua panishoo sesa casaa miirini, naacuajitij, janiyari sequequiaani, Moisés Rootasanoori seetanujuanaa maninia. ¹⁷ Naa cua panishoo sesa casaa cua miishacaritij, cunoori maja tama cua miishanojuaja. Cuno sesa cua miishanoori coojiajiniji supueno tamajaaja. ¹⁸ Quiarijia niishiya cutaranijia, coojiaari tojetaarucujanaa sesa miiniu niishijia. Naacuajitij, janiyari juucua maninia miiniuucua jiaatiaquiaani. Naajaa, majaari cua naata quiquiaa maninia cua miiniuria tamajaaja. ¹⁹ Naacuajitij, cua miishanoori maja maninia, taa cua miiniu paniquiaa juucuacuajani. Cua miishanoori saaja cua miiniu paniaquishoo quiquiaa. ²⁰ Naacuajitij, janiya jaara cua panishoo sesa casaa miirini, janiyari niishiyani, cunoori tama coojiajiniji supuenojuaja, majaari tama cua miiniu panishanojuaja.

²¹ Quiarijia niishiya cutaranijia, janiyari naa sesa miijiani: janiya jaara maninia casaa miiniu paniyani, janiyari saaja sesa miiquiaani. ²² Janiya cutaraari niishiyani Pueyaso rootasano Moisésri seetanujuanaa maninia cua tojishocoriquiano. Na tojinuuucua jiaatiaquiaa juucuanijia. ²³ Janiyari niishiyajaanihuuaj, coojiaari juhua cua niishitiaja paraca quiya. Naacuajitij, cua niishiriojosacari, “Maninia miiniutianianijia”, coojiaari saaja sesa cua miitiquiaa. Naacuajitij, tama janiyajaarijia juhua coojia seruni, cua miishacari puetunu sesa na panishanojuanaa.

²⁴ ¿Taa cua miiniutianiya socuaarini? ¡Tojetaarucujanaa taraatia quijianijia! Pueyaracaanu sesa miijianijia. Majaari cua naata tamajaaja maninia miijia cua quiniu. Naa sesa miijia cua quishacaritij, cua cuaqueyari macu quiriquiano. ¿Cante na naata cua jataniniuni, naa sesa miijia cua quishacaritij? ²⁵ ¡Pueyaso shuquiritiaanijia cua niishishacari, nojuacuajaari cua Jiyaniijia Jesucristota cua jataniniutianiya tojetaarucujanaa maninia miijia cua quiniuria! Naacuajitij, mijiria cua quishacarijia, janiyari Pueyaso tojjia quiniu paniyani. Saniniuujia, naa coojia quiniuucua sesatej, saaja sesa cua miitiniu paniquiaari.

8

Pueyaso Sohuanu pa tojishacari, paari maninia miijia quiniutianiyani

¹ Pa rupuesacari Jesucristo, nocua pa tiuushacari, Pueyasoori pa jiyanooquiaa. Naacuajitij, paari tojetaarucujanaa jiyanooshano quiyani. ² Puetunu pueyajanaari csonuuriquiano quijia, sesa miijiaca

nojori quishacari. Saniniuujia, Jesucristo pa rupuesacari, Pueyaso Sohuanuuri pa jiyatequiaa saaja maninia miijiaca pa quiniuria. Naacuajitij, majaari tari sesa miijiaca pa quiniu pa saniitiosaanura. ³ Moisés Rootasano pa tojishacari juucua, majaari pa naata quiniu jiyanooshano. Cunoori saaja sesa miijiaca pa quiniuucua. Naaratej, Pueyasoori Neyanujanaa jiyaroquiaari mijiria, pueyano na quiniuria juhua pajaniya, pa niti na mosaanura. Naacuajitij, Jesucristo jiiiasacari juhua pa cuaqueyajuhaaj, Pueyasoori juhua sesa miijiara na jiyatequiaari, pa niti na saniitiosocoriquiano. ⁴ Naacuajitij, Pueyaso Sohuanu pa jiiiasacari quiarijia, pa naata maninia miijiaca quiniu, taa Moisés Rootasano sequeyacuajani. Pueyaso Sohuanu tojijiaaca pa quishacari, majaari tari pa quiniu sesa miijiaca, taa pa quiquiaari tarijiacuajani.

⁵ Canapuate tama na panishanojuaaja miiquiaani, nojoriiri tama na cuaqueyajaaja shuquiritiniuria jiaatiaquiaa. Saniniuujia, canapuate Pueyaso Sohuanu tojijiaaca cutarani, nojoriiri saaja Pueyaso shuquiritiniuria jiaatiaquiaa. ⁶ Tama na cuaqueyajaaja shuquiritiniuria jiaatiajacaari saaja shaajecoriquiano cutara. Saniniuujia, Pueyaso shuquiritiniuria jiaatiajacaari pueyaracaanu rishiriquiano cutara. Nojoriiri juhuajaniya shuquiriaatia quijiacajuhuaaj. ⁷ Cante tama na cuaqueyajaaja shuquiritiniuria jiaatiaquiaani, nojuajaari Pueyaso paraca. Majaari Pueyaso tojijia na quiniu paniniu. Seetanujanaa majaari na naata Pueyaso tojijia na quiniuujihuaaj. ⁸ Naacuajitij, canapuate saaja tama na cuaqueyajaaja shuquiritiniuria jiaatiaquiaani, cuno pojoriiri maja na naata Pueyaso shuquiritiniu.

⁹ Niajaniya cutaraari maja nia quiniu juhua cuno pojorijia, tama na cuaqueyajaaja shuquiritiniuria jiaatiajacani. Niaa cutaraari Pueyaso shuquiritijiaaca, Pueyaso Sohuanu cumaquishacari niajaniya, nojuaja jaara seetanujanaa nioojiajinia quiya. Cante Pueyaso Sohuanu jiiitaaquiyani, nojuajaari maja Pueyaso pueyano. ¹⁰ Cristo quishacari poojiajinia, pa sohuanuuri tari jatanishano quiya maninia miijiaca pa quiniuria, pueyaracaanu rishijiaaca pa quiniuriajuhuaaj. Pa cuaqueya cutaraari shaajasocoriquiano, sesa miijiaca pa quiniuucua. ¹¹ Naajaa, Pueyaso Sohuanu jaara poojiajinia quiya, nojuajaari pa cuaqueya samiitianijionutaniuhua, taa na samiitianiquiaariuhua macujiniji Jesucuaani.

¹² Naa Pueyaso miishacari maninia pajaniyatej, maninia miijiaca pa quiri Pueyaso Sohuanu cumaquishacari pajaniya. Maja cumaati tama pa cuaqueyajaaja pa shuquiritiniuria pa jiaatianu tari, taa pa miiquiaari tarijiacuajani. ¹³ Cante naa miijiaca quiyajaani, nojoriiri shaajasaariquiano. Saniniuujia, niaa jaara Pueyaso Sohuanu cumaacata rejeretariquia saaja tama sesa nia cuaqueya miiniu panishanojuaaja, niaa cutaraari pueyaracaanu shuquiriaatia quijiaca quiniutianiya.

¹⁴ Canapuate Pueyaso Sohuanu tojitiajacani, nojoriiri Pueyaso niqiuohua cutara. ¹⁵ Pueyaso Sohuanucuaajaari pa jiyatequiaari Pueyaso muerasuniyojua pa quiniuria. Naacuajitij, cuno pa jiiitasano Sohuanuuri Pueyaso pa sequetequiaa, “cua Quenaa”. Naa Pueyaso muerasuniyojua pa quishacaritij, majaari tari pa puerenu paari saniitiosaanutaniyani, Moisés Rootasano pa tojiyaquiniuucua. ¹⁶ Pueyaso Sohuanuuri pa sohuanu rupuequiaa, na niishitiniuria pajaniya, paari

Pueyaso muerasuni. ¹⁷ Naa Pueyaso muerasu pa quishacaritij, puetunu Pueyaso jiiitasanojuanaari pa jiiitasano quiniutianiyajuhua. Pueyasoori Neyanu Jesucristota pa cojiritianutaniya naa maninia na miiniuria pajaniya, paa jaara naquiya miiniu rejeretajaca quirini, Jesucristoocua tiuujia pa quiniuucua. Paa jaara naquiya miishaare nocuara mijiriani, paari jiyanoehua maninia quijiacara jiyatesaanutaniyani juhua nojuajuhua.

Pueyasoori maninia miiniutianiya na muerasu

¹⁸ Quiarijia mijiria naquiya pa miiniuni, cunoori saaja rupaquiija. Janiyara, naajaa, cua niishishacari naa naquiya pa miiniu nuhujitij, paari jiyanoehua maninia miishaanutaniyani, pueyaracaanu shuquiriaatia pa quiniuria. ¹⁹ Quiarijiani, puetunu Pueyaso shipinishano casaajanaari pa niquiniuucua jiaatiaa paa jaara quiariniora jatanishaareni. Na niishiniu paniyari taamueca quijiacara Pueyaso jataniniutianiya pajaniya na cumaacatani, tojetaarucujanaa maninia jeenucuasano na muerasu pa quiniuria. ²⁰ Coteenujuanaa pa supuetana pueyano jaara juhuacatecara sesequiaari, jiyacaritij, puetunu Pueyaso shipinijosano casaajanaari sesequiaarijuhua. Majaari na sesenu quiquiaari tama na panishacarijaaja. Pueyasocuajaari naa paniquiaari sesa na quiniuria, na shipinishano pueya sesenucujuhua. Naajaa, majaari pueyaracaanu sesa na quiniu quiniutianiya. ²¹ Pueyaso muerasu jaara jatanishaare shacantuuca quijiaca pa quiniuria, jiyacaritij, puetunu Pueyaso shipinijosano casaajanaari pata cojiritiasaanutaniya jeecanujuhua. Naacuajitij, puetunu Pueyaso shipinijosano casaajanaari maniniara quiniutianihua, maja na sesenura socua. ²² Quiarijiani, puetunu Pueyaso shipinijosanojuanaari jiyanoehua noojia niojiya taraatia na quishacari. Quiatojiyari juhua maaji noyano, cuaara quiariniora jatanishaarejaatijia. ²³ Majaari saaja puetunu Pueyaso shipinishano casaajanaa quiatojonu, poojiaari juhua quiatojiyajuhua, na panishacari tojetaarucujanaa jatanishano quijiaca pa quiniuria. Paacuajaari tari jiiitiaa Pueyaso Sohanu poojiajiniani, pa niishiniuria, paari seetanjuanaa Pueyaso muerasuni. Saaja pa cuaqueya cutaraari juhuanojua jatanishoojua. Paari cunora quiatojiyajaani. ²⁴ Paacuajaari tari Pueyaso muerasu quiyani. Jesucristo cutaraari pa saquiriojoquiaari shacantuuca quijiacara pa jatanishaanura. Paari naa na jataniniuria pajaniya sashiyajaani. Pa cuaqueya jaara tari jatanishano quiriquia, paa maara na jataniniuucua jiaatiaaquirini. Paa jaara tari jiiitariquia pa panishanoni, ¿paatucua casaara nocua jiaatiare socuani? Pa cuaqueya cutaraari juhuanojua jatanishoojua. ²⁵ Naajaa, paacuajaari niishiyani pa cuaqueyari jatanishaanutaniya, jiyocuacaanu pa rupuenura pa Jiyaniijia. Cunora, paari mijiria taraatia pa quishacari juhujaniya rejere-taquiiaani pueyaracaanu pa sashishacari.

²⁶ Naa rejeretajaca pa quishacari mijiria pa sashishacari pueyaracaanutej, Pueyaso Sohanuuri pa cumaquiquiaa, cumueeca pa quiyaquishacari. Naacuajitij, Pueyaso pa secojosacari, pa niishiyaquishacari casaacuara pa secojonutaniyani, Pueyaso Sohanucuajaari poojiajiniji Pueyaso secojoquiaa pocuara. Jiyanoehua na secojosacari pocuara, jiyasohua quiatojiya poojiajiniaari. ²⁷ Poojia niishijia Pueyasoni, nojuajaari niishiyacuaja casa na Sohanu secojiya

nojuaja pocuarani. Na Sohuanucuaajaari maninia secojojua cutara, taa Pueyaso miiniu paniya na muerasuracuajani.

Jesucristo pa shocotanjia cutara

²⁸ Paacuajaari niishiyani, paa jaara maninia miishaareni, paa jaara sesa miishaarejuhuaj, Pueyasoori puetunu cuno miishanojuanaa jiyatequiaa saaja maninia na quiniuria na panijacara. Nojuacuajaari pa saquiriojoquiaari na muerasuniyojua pa quiniuria. ²⁹ Naajuhuj, jiya shipiniyaquishacarijia, Pueyasoori tari niishiquiaari na panishano pueyarano. Pueyasoori jiyacari sequequiaari cuno pojoriiri juhua Neyanu Jesucristo quiriquianojuhuaj. Naa sequequiaariiri Jesucristo quiniuria pa puerana, queraatia tapueyocuacaraca na quiniuria. ³⁰ Naacuajitij, canapue Pueyaso saquiriojoquiaari na muerasu nojori quiniuriacuajani, juhua Jesucristo nojori quiniuriajuhuaj, Pueyasoori cuno pojori niishitiquiaa nojori tiuniuria Neyanuucua. Jesucristoocua nojori tiuushacari, Pueyasoori nojori jiyatequiaa juhua sesa miyashijiacara. Jiyanoshano nojori quishacari, Pueyasoori nojori niquitioquiaa na Sohuanu, na Sohuanu jataniniuria nojori shacantuuca quijiaca nojori quiniuria juhua Neyanu.

³¹ Naa Pueyaso miishacari maninia pajaniyaratej, ¿taa pa sequeyani? Pueyaso jaara pa jiyano quiya, ¿tamonute na naata sesonu pajaniya? ¡Maja! ³² Pueyasoori jiyanojua pa panijia. Nojuajaari Neyanuniyojua jiyaroquiaari pocuara mosocoriquiano. Nojuaja jaara Neyanu jamueyaquiquiaaricuaa, ¿maatucua casaara quiarjia niquitioyaquiri puetunu pa panishanojuanaani? ³³ ¿Cantucua Pueyaso saquiriojosano pueyacuara saquiriojotare sesa nojori miishanoni? Pueyasojuanaacuajaari pa jiyatequiaari juhua sesa miyashijiaca pa quiniuria. ³⁴ Jesucristocuaajaari tari cusoquiaari pa niti. ¿Cantucua saniniuuja quiarjia Pueyaso sequeriquia pocuarani: “Cuno pojori quia shaajare”? Pocuaji Tacunacuajaari samiitiaquiaariuhua. Quiarjia na Que Pueyaso miaquetajara cajiari, pocuara na Que na secojonura pueyaracaanu. ³⁵ Nojuajaari jiyanojua pa panijia. ¿Tamonu casaate na naata Cristo tarinitiniu maja na paniniuria pajaniya? ¡Majaari quenaaja casaa quiniu na tarinitiniuria nojuaja! Naaratej, majaari nia jiyaniniu Cristo pa paniyaquiya, paa jaara taraatia miishiyani, paa jaara casaacua tacayani, tamasaca jaara naquiya miya pajaniyani. Naajuhuj, paa jaara quera titiacoya pa miaajenutani, majaari nia jiyaniniu Cristo pa paniyaquiyani, naajuhuj, paa jaara toqueeju quiyani, paa jaara cocuaatia miyani, paa jaara miananajoshiya monurajaniuhuj. Puetunu niojuanaari maja na tarinitiniu Jesucristo, na paniyaquiniuria pajaniya. ³⁶ Paacuajaari taraatia miishocoriquianoni, naatej, taa tariucuaaanu Pueyaso Rupaajinia naajiotasano quiyacuajani. Naa sequeyari:

“Canaa Pueyasonaa, canaari puecooshiya pueyaracaanuni, quia toji-tiajaca canaa quiniuucua. Nojoriiri juhua miaquesocoriquiano borregohua canaa puecooquiaa juhuajaniya”.

³⁷ Paari naa miishaaquiaajaaniuhuj. Naajaa, naa taraatia pa miishacarijij, Jesucristo panishacari pajaniya, nojuajaari shocotajacara pa jiyatequiaa. Naacuajitij, majaari saaja pa rejeretanu naquiya pa miishacari. Jesucristoori seetanujuanaa cuno naquiya pa miiniu jiyatequiaa maninia na jeecanura pajaniya, juhua nojuaja pa

quiniuria socua. ³⁸ Seetanujuanaa niishiyaniija, Pueyaso panishacari jiyanoehua pajaniya, majaari quenaaja tamonu casaa na naata rupatanu pajaniya Nojuajiniiji. Paa jaara quiri saminiojuani, macu soj, naajaa, pa panijia Pueyasocuaajaari pata quiyajaa. Naajuhuaaj, Pueyaso seya, samaruhanio, puetunu cunojuanaari maja na naata pa rupatanu Pueyasocuaaji. Naajuhuaaj, majaari quenaaja tamonu cumaacaraca quijiaca na naata pa rupatanu Pueyasocuaaji. Pueyaso paniniu pajaniyani, cunoori maja na puequenu quiniutianiya quiarijia, tamacarinio. ³⁹ Naajaariuhuaaj, tee pa quiyani, jiyocuaaanu, jiya cariquimia soj, naajaa. Pa panijia Pueyasoori tii quiya patajuhuaaj. Naacuaajitij, pa Jiyaniijia Jesucristota rupuetootesano pa quishacari, puetunu Pueyaso shipinijosano casaajanaari maja na naata pa rupatanu Pueyasojiniiji.

9

Pueyasojuaanaari pueya saquiriojojua na pueyara

¹⁻³ Naa Pueyaso pueyano cua quishacaritij, janiyari jiyanoehua cuarta Israel pueyacu taraajequiaani, nojori tiuyaquiniucua pa Jiyaniijia Jesucristoocua. Janiyari pueyaracaanu nojoriicua taraajequiaa jiyanoehuaani, maja cua naata quishacari cuarta Israel pueya tiuutiniu Jesucristoocua. Seetanujuanaa nia sequeyanijia, Pueyaso jaara na naata quiri mani quiquiojinia na jatanura janiya nojori niti, janiya maara sequereni, maniniacuajaari naa cua miishaanura. Nojori jaara na naata quiri Jesucristoocua rupuetesaanu cua niti, janiya maara Pueyaso sequereni: “Cua rupatare cutara Jesucristojiniiji, saniya cuarta Israel pueya jiyatesaanura Pueyaso muerasura cutara”. Naa cua sequesacari niajaniyatej, janiyari coojiajinia niishiyani, seetanujuanaari cua sequesano. Pueyaso Sohuanuuri cua niishitijuhuaaj majaari cua sapojonu. ⁴ Cuarta Judiocuacaari pa supuetana Israel niquihuacuajinio supueno pueyacuaja. Pueyasoori nojori jiyatequiaari na muerasu nojori quiniuria, nocua nojori tiuushacari. Pueyasoori nojori niqitiquiaari shacantuuca na cumaaca, tariucuaaanu nojoritia na quishacari. Pueyasoori nojori sequequiaari: “Janiyacuajaari Pueyasoni. Niaari cua pueya quiniutianiya niaa jaara cucua tiuuri”. Naajuhuaaj, Pueyasoori Moisés niqitioquiaari caapiqui saajianeecua na naajiosano, saniniuujia Moisés niishitiojonura tiji nojori. Pueyasoori nojori niishitiquiaarijiuhuaaj taa nojori miiniutianiyani, tariucua jiyanooshano nojori rerejonura na niquiara. Pueyasoori nojori sequequiaarijiuhuaaj, nojuajaari puetunujuanaa na sequesano Abraham tohuateenutaniya nojoriria. ⁵ Israel pueya supuetanaari quiquiaari Abraham, Isaac, Jacobonio. Pa Jiyaniijia Cristoori cuno pojori niquihuacuajinio supuequiaari. Nojuajaari tari jiyatesaaquiaari Jiyaniijiajanaa na quiniuria, puetunu casamijianaa jiiitiana na quiniuriajuhuaaj. Nojuajaari Pueyasojuhuanajaj, juhua na Quejuhuaaj. ¡Nojuaja cuara pueyaracaanu maniniuhuaqueetasano quiiria! ¡Cuara naa quiiria pueyaracaanutej!

⁶ Quiarijiani, queraatia parta Israel pueyajiniijinio pueyari maja Pueyaso muerasu. Naa cua sequesacari niajaniyatej, majaari nia jiyaniniu tariucuaaanu Pueyaso sequesano pa supuetanaari tohuateyaquiniutianiya. Maja pueyanaa. Tohuateenutaniyanocuaaja. Jaara naa quiritij, ¿casaara puetunu Israel pueyajanaa maseyaquiniutianiya

Pueyaso sequesano nojoririarini? Cua tojitiare pueyanaa. Puetunu pa supuetana Israel niquiohuacuajinio supueno pueyajanaari maja seetanujuanaa Israel pueya Pueyasora. ⁷ Naajaariuhua Abraham niquiohua. Puetunu Abraham niquiohuajanaari maja seetanujuanaa Abraham niquiohua na quiniu quiquiaari Pueyasora. Pueyasocuaajaari naa sequequiaari Abraham:

“Cua sequesano quiajanitari saaja quia niyanu Isaaccuajinio supueno pueyarano quiniutianiya cutara”.

⁸ Naa Pueyaso sequesacari Abrahamtej, naacuajiti paari niishiyani, majaari puetunu Pueyaso saquiriojosano pueyacuajinio supueno pueyajanaa seetanujuanaa Pueyaso muerasu. Saniniuujia, seetanujuanaa Pueyaso muerasu cutaraari noo pojori, Pueyaso sequesanoocua tiuujiacatej, taa pa supuetana Abraham tiuuquiaari Pueyaso sequesanoocuaaani. Pueyasora, nojori cutaraari Abrahamcuajinio supueno pueya. ⁹ Abrahamri Pueyaso sequesanoocua tiuuquiaari, Pueyaso jaara naa na sequequiaari:

“Abrahamnaa, janiyari quiocua tacatenutaniuhua tamacarini. Janiyari jiyacari quia niquio Saara riuritanutaniuhua tariucua mueyarcani”.

Naacuajitij, Isaac jaara rasaanquiaari, Pueyaso sequesanoori tohuateequiaari. Naacuajitij, puetunu Abraham niquiohuajiniujinijuanani, saaja Isaacri Pueyaso saquiriojosano pueyano quiquiaari.

¹⁰ Naa quiquiaariijaariuhua Isaac niquiohua. Isaac jaara neco Rebeca manajoquiaari, Rebecaari caapueya manajequiaari. ¹¹⁻¹³ Cuno caapueya royaquishacarijia, juhuanajuaja nojori niishiyaquishacari maninia miiniu, sesa soj, jiyacariti Pueyasoori na nucua sequequiaari:

“Janiyari quia jiyapueranu jiyatenutaniya na nuhuajishana tojijiarani”. Naa Pueyaso sequesacaritij, cunoori juhua Pueyaso sequesano tariucuaaananu. Naa sequequiaari cuno royaquishoojua caapueyajiniijiri:

“Jacoboori cua panishano quiniutianiya. Esauuri saniniuujia cua soosano quiniutianiyacujua”.

Naa Pueyaso sequesacaritij, paari niishiyani, Pueyasoori saquiriojoquiaa cana na saquiriojonu paniyacuajani, tama na miiniu panishanojuaaja na tohuateenura. Naacuajitij, Pueyaso jaara saquiriojore pueya, nojuajaari maja na niishiriojonu nojori miishanojiniji; maninia, sesa soj.

¹⁴ Naa Pueyaso miishacari tama na panishanojuajatej, ¿taa pa sequeyani? ¿Pueyasote sesa miya, naa rimiajata na saquiriojosacari pueyatej? Maja. ¹⁵ Pueyasocuaajaari naa Moisés sequequiaari:

“Janiyari pueya jiyanooniutianiyanu teyano pueyano cua jiyanooni paniyacuajani. Naajuhuaaj, janiyari pueyanoocua taraajenu-taniyani, teyano pueyanoocua cua taraajenu paniyacuajani”.

¹⁶ Naacuajitij paari niishiyani, pueyano maja na naata tama na cuaqueyajaaja jiyatenu Pueyaso pueyano na quiniuria. Pueyasocuaajaari tama saquiriojoquiaajaaja cana na jiyanooni paniyani. ¹⁷ Naajuhuaaj, tariucuaaanu Pueyaso sequesano Egipto jiyaniijiaari naa naajiotasano quiyajuhuaaj:

“Faraónnaa, janiyari quia jiyatequiaari Egipto pueya jiyaniijia quia quiniuriani, cua cumaacata cua mijiosano cua niqitiniuria

quiajaniya. Naacuajitij, puetunu jiyacajinia quiniaa pueyapuejanaari niishiniutianiya, janiyari Pueyasajuanaa cutarani”.

¹⁸ Naacuajitij, paari niishiyani, Pueyasoori taraajeja teyanooocua na taraajenu paniyani. Naajaarihuaj, nojuajaari na tojiyashijia pueyano jiuujia jiyateja cumajiuujiaacara, teyano pueyano jiuujia na jiyatenu paniya naaracuajani.

¹⁹ Naa cua sequesacari niajanियatej, tamonu naasucuaari sequenutaniya: “Pueyaso jaara naa miiquiaa taa na miiniu paniquiaacuajani, ¿maatucua casaara sesa pa miiniuucua pa saniitioereni? ¿Canteeri na naata Pueyaso tarinitiniu na miiniu panishanoinijini?” ²⁰ Majaari naa sequenu pueyanonaa. ¿Canteeri quiajaniani, naa quia juaanuria Pueyasotej? Paacuajaari na shipinishano pueyani. ¿Taa nia sequeyani? Marau jaara pocuanu niishiriquia, ¿nojuajate na naata na paninia juaaniu: “Juaashiquiaracanaa, ¿casaara quia panirii conatura janiyani?”” ²¹ Paniyojuacuajaari na naata paniniu maraujiniji na panishano casaa, shanohua pataconiyojua, mashaca quiquiora manijinia cajitiariquiano conatunio.

²² Naajuhuj, ¿taa pa sequenutaniyani, Pueyaso jaara niishitiniu paniya na juaaniu, na cumaacanio, na saniitiosacari sesa miijiaca? Naajaa, Pueyasoori jiyanoohua rejeretaquiaa sesa miijiaca, cante tari saniitiosocoriquiano quiyacuajani. ²³ Pueyasoori naa tarishiyajaara na saniitionura na tojtiaashijia pueya. Naa na tarishishacaritij, nojuajaari pueya niishitiquiaa na shacantuuca cumaaca, maninia na miishacari na jiyanooshano pueya, cante tari saquiriojosano quiya na shuriucua quiriquianocuajani. ²⁴ Paacuajaari cuno jiyanooshano pueyani, canapue tari Pueyaso saquiriojoquiaaricuajani Judiocuacajinijinio, taucuacajinijinionio. ²⁵ Naa naajiotasano quiyacuajaari Pueyaso sequesano supuetana Oseas naajioneejinia:

“Cante cua pueya quiyaquiaarini, janiyari nojori sequenutaniyani: ‘Niaari cua quiquiohuanijojua’. Naajuhuj, cante cua shuquiriasoo pueya quiquiaarini, nojoriiri cua timitiasano pueyara quiniutianiya”.

²⁶ Naa naajiotasanoori quiyajuhuj:

“Tee cuniqui naa pueya sequesaaquiaaricuajani: ‘Niaari maja cua pueya’, nojoriiri cuniquijia jiyaniquishaanutaniya: ‘Niaari Pueyaso niquiohuajanaa cutara’”.

²⁷ Saniniuujia, supuetana Isaíasri naa sequequiaari Jacobo niquiohuacuajinio supueno pueyajiniji:

“Israel pueyari jiyanoohua canenutaniya, juhua shoniniacu caminia shuriuquioco paajia jaaquia, serojosoo. Saniniuujia, saaja secaja nojorijinijinoori Pueyaso pueyara jatanishaanutaniya.

²⁸ Pueyasoori mijiriara na sequesano tohuateenutaniya. Majaari na tarishiniu quiniutianiya”.

²⁹ Supuetana Isaíascuajaari naa sequequiaari tarijiajuhuaj:

“Pa Jiyaniiija Pueyaso jaara Israel pueya niquiohua jiyanoayaquiquiaari, Israel pueya maara quiarijia quiyaquiri. Maara tari shaajasaacanu tojetaarucujanaa, naatej, taa Sodoma tiacajinia quiniaa pueya puecoosaquiaaricuaani, Gomorra tiacajinia quiniaa pueyano”.

Judiocuacaari Pueyaso rupaacua tiyashijia saaja

³⁰ Naa cua pohuatasacari niajaniya tariucuacaanu Pueyaso Rupaa-jinijitij, paari quiarjia nio niishiyani: taucuacaari maja quenaaja na tacaaniu quijia taate nojori naata Pueyaso jiyanooshano quiniuni. Nojoriiri juhuajaniya quijia saaja. Naajaa, quiarjia, Pueyasoori nojori jiyatequiaa juhua sesa miyashijiacara, saaja Jesucristoocua nojori tiuushacari. ³¹ Israel pueyari saniniuujia jiyanhua Moisés Rootasano tojjijaca juucua, nojori jyanishacari Pueyaso naasucuaari naa nojori miishacari nojori jyanooniutianiya. Majaari Pueyaso jyanooniu quijia nojori. ³² ¿Niaate niishiya casaara Pueyaso jyanoyaquiquiaari nojorini? Pueyasoori nojori jyanoyaquiquiaari nojori tiuyaquiniuucua nocua. Nojoriiri jyaniquiaari tama nojorijiaarjia na naata tama nojori cuaqueyajaaja jiyatenu juhua sesa miyashijiacara, Moisés Rootasano nojori tojjishacari. Naaratej, majaari nojori tiuuniu quiquiaa Jesucristoocua. Nojoriiri saaja na sooquiaa. Naacuajitij, Jesucristoori juhua saajia nojoriria, nocua nojori tiuriiniuria. ³³ Jesucristojiniji miriqui Pueyaso sequesanojuaari naa naajiotasaaquiaari tariucuacaanu, Jesucristo niyacarijia:

“Cua tojjitiare. Janiyari Sión tuhuananuucua nianutaniya saajiani, pueya tiuriiniuria nocua. Saniniuujia, cante nocua tiuyani, nojoriiri puetunu Pueyaso sequesanojuanaa na muerasurano masenutaniya”.

10

¹ Cuarta Pueyaso muerasunaa, janiyari jyanohua Pueyaso secojoquiaani parta Israel pueyacuara, Jesucristoocua nojori tiuuniuria, Pueyaso pueya nojori quiniurijahuaj. Janiyari jyanohua nojoriicua tacayani. ² Janiyacuajaari seetanujuanaa niishiyani, Israel pueyari seetanujuanaa Pueyaso panishano miiniu panijiaa juucua, na muerasu nojori quiniuria. Nojoriiri naa miiquiaa najuhuanaj, nojori niishiyaquishacari maninia. ³ Nojoriiri saaja sequequiaa, majana Pueyaso naata pueya jyanooniu saaja nojori tiuushacari nocua. Naaratej, nojoriiri jyanohua saniniuujia maninia nojori quiniuria Pueyaso niqiuara tama nojori miishanotajaaja. Naacuajitij, nojoriiri Jesucristoocua tiuyaquiquiaa Pueyaso jyanooniuria nojori. Pueyasojuanaari Cristo jiyatequiaari pa niti mosocoriquiano. ⁴ Naacuajitij, Cristo jaara mosaaquiaari, nojuajaari Moisés Rootasano tojiniu tohuateequiaari cutara. Naacuajitij, Pueyasoori puetunu nocua tiuniaajanaa jiyatequiaa juhua sesa miyashijiacara. ⁵ Moisés cuajaari naajioquiaari taa na rootasano tojjijaca miiniutianiyani, juhua sesa miyashijiaa nojori quiniuria. Nojuajaari naa naajioquiaari:

“Cante puetunu cua rootasanojuanaa tojjiani, nojuajaari pueyaracaanu rishijiaa jiyatesaanutaniya”.

⁶ Saniniuujia, saaja Jesucristoocua pa tiuushacari, paari juhua sesa miyashijiacara jiyatesaaquiaani, pueyaracaanu rishijiaa pa quiniuria. Naacuajitij, majaari naa nia niishiriojonu nioojajinia nia taacanusacari: “¿Cante na naata jiyocuacaanu tacanu Jesucristo na roshiniuria Pueyaso pueyara na jataniniuria pajaniyani?” ⁷ Naajuhuaaj, majaari naa nia niishiriojonu: “¿Cante na naata macunucua quiquiojinia quianu, Jesucristo na tacaniniuria pocuani?” ¡Pueyanaa, majaari quenaaja naa nia

niishiriojonutej! ⁸ Pueyaso Rupaacuajaari tari naa naajiotasaaquiaari pajaniyara:

“Niaacuajaari cua rupaa jiiitiaa. Niaari na niishiyajuhuj. Nioojiajinia quiyacuajaari”.

Cuno rupaa canaa na pohuataquiaa nijaniyani, cunocuajaari Jesucristoocua nia tiuuniuria. ⁹ Naacuajitij, Pueyasoori pueya jiyatequiaa na pueya nojori quiniuria, Jesucristoocua tiuujia jaara pueya niquiara pohuatare: “Jesucristoori seetanujanaa Jiyaniijajanaa cutara”, noojiajinia na niishishacarijuhuaj Pueyasoori Jesu samiitianiquiaariuhua macujiniji. ¹⁰ Seetanujanaa naari: poojiata pa tiuushacari Neyanucua, Pueyasoori pa jiyateya juhua sesa miyashijia pa quiniuria. Naajuhuj, pa rupaata pa pohuatasacari: “Janiya Jesucristoocua tiuujiani”, jiyacaritij, Pueyasoori pa jataniquiaa na pueya pa quiniuria cutara.

¹¹ Tariucuacaanu Neyanujiniji Pueyaso sequesanoori naa naajiotasano quiyajuhuj:

“Puetunu nocua tiuuniaajanaari puetunu cua sequesanojuanaa cua muerasurano masenutaniya”.

¹² Naacuajitij Judiocuaca, mariyata taucuacanio, nojori jiyanooshaanutaniya nojori jaara sequere: “Jiyaniijianaa, cua jiyanoori”. Pa Jiyaniijaari maja rimiajata na jyanooniu nocua tiuujia pueya. Nojuajaari jyanohua capora. Jiyaniijajanaa cutaraari. ¹³ Tariucuacaanu Pueyaso Rupaajiniaari naa naajiotasano quiyajuhuj:

“Puetunu pueyajanaari Pueyaso pueyara jatanishaanutaniya nojori jaara Jiyaniija sequere: ‘Jiyaniijianaa, cua jiyanoori’ ”.

¹⁴ Jaara naa quiriritij, ¿pueyatucua taa Jiyaniija secojonuureni, nojori jaara nocua tiuyaquiyajaa? Naajuhuj, ¿pueyatucua taa nocua tiuurini, nojori jaara nojuajiniji pohuataaquishoo quiyajaa? ¿Nojoritucua taa nojuajiniji niishijia quirini, tamasaca jaara quenaaja nojori pohuataaquiri?

¹⁵ ¿Pueyaso Rupaa pohuatanaatucua taa cuno pojoriicua quiaareni, nojori jaara jiyaramiquiyaquishaare? ¿Pueyaso rupaa pohuatanaate jiyaramiquiyaquishaaquiaari? ¡Maja! Jiyaramiquishaaquiaaricua. Naaratej, naa naajiotasano quiyari tariucuacaanu Pueyaso Rupaajinia:

“Jyanohua timitiasano pueya cutaraari, noo pojori canapuee tamasacaacua quiajani, nojori na pohuatanura Pueyaso rupaa”.

¹⁶ Naajaa, majaari puetunu pueyajanaa tojiniu quiquiaa, Pueyaso Rupaa jaara nojori niquiara pohuataasaare. Naacuajitij, supuetana Isaíasri naa sequequiaari na taraajenuta:

“Jiyaniijianaa, majaari pueya tojiniu paniniu canaa pohuatasano quiajanijajiniji”.

¹⁷ Naacuajitij pueyanaa, paa jaara Jesucristo rupaa pohuataasaareni, paari pa numaata na tojiyani. Paa jaara pa tojishanoocua tiuurini, Pueyasoori pa jiyatenutaniya na pueya pa quiniuria.

¹⁸ Pa jaara Pueyaso pueyara jiyatesaaquiaa saaja pa tiuushacari Pueyaso rupaacua, jaara naa quiriritij, ¿casaara puetunu Israel pueyajanaa Pueyaso pueyara jiyateyaquishaaquiaariirini? ¿Cristo rupaateeri nojori niquiara pohuataaquishaaquiaari? Maja. Nojori niquiaracuajaari pohuataasaquiaari. Naa naajiotasano quiyacuajaari tariucuacaanu Pueyaso Rupaajinia:

“Pueyaso Rupaacuaajaari puetunu jiyacajiniajanaa pohuatasaquiaari. Na rupaari tojishaquiaari puetunu tiquiyocujanaa, jiya puequetujinia”.

¹⁹ Jaara naa pohuatasaquiaariti, ¿Israel pueyateeri Pueyaso rupaa niishiyaquiaari nojori tojishacari? Maja. Nojoricuaajaari na niishijia quiquiaari. Nojoriiri saaja na ruuretajaca quiquiaari. Supuetana Moisésuaajaari naa naajiotajacuaari Pueyaso sequesano Israel pueyara, tariucua na tojiyashijia nojori quishacari:

“Maninia cua miishacari tiquiyocua quijiaca taucuaca nia niti, janiyari nia juaatiniutianiyani. Niaari jiyanohua juaaniutianiya cua jiyanooshacari mosanucua taucuaca”.

²⁰ Na nuhuaji, supuetana Isaíasri naa maatia sequequiaari Pueyaso niishitosano nojuaja:

“Cucua jiaatiaashijia taucuaca cutaraari cua riuriataquiaa, cua tojijia nojori quiniuria cutara. Naajuhuj, janiyari cua pajeyashijia taucuacaacua muetaquiaani”.

²¹ Saniniuujia, Isaíasri naa Pueyaso sequesano Israel pueyajiniji naajiotajacuaari:

“Janiyari puetunu juucujanaa Israel pueyacuaji masequiaa juucuan, maninia cua miiniu panishacari nojori. Nojoriiri saaja cua shocotequiaa, cua tojiyashijia pueya nojori quishacari”.

11

Israel pueyajiniji cureenoori Pueyaso saquiriojosano

¹ Israel pueya jaara naa Pueyaso tojiyashijia quia, ¿Pueyasote seetanujuanaa nojori tarinitianu, na tojiyashijia nojori quiniucua? ¡Maja pueyanaa! Janiyacuajaari Israel pueyanojaniuhuj. Abrahamri cua supuetana. Janiyari na jianianu Jacobo niyanu Benjamíncuajinio supuenoni. ² Naacuaajiti, janiyari niishiyani, Pueyasoori maja na cartenu quiquianu puetunu tariucuaaanu na saquiriojosano Israel pueyajanaa. ¿Niaateeri supuetana Elíasjiniji naajiotasano niishiyaquia? Tariucuaaanu Pueyaso Rupaajinia naa naajiotasano quiyacuajaari Elías sequesano Pueyaso, na tacaashacari Israel pueya quiniucua sesa:

³ “¡Cua Jiyaniijianaa, cuarta Israel pueyari puetunu quia sequesano caminiujuniana pueyajanaa puecoorucuaa! ¡Saa janiyajaari cureyani! Naajuhuj, nojoriiri puetunu juhuaacutucujanaa niyarequetarucuaa, tee quia tojitiajaca pueya catijiaquiaa na seya quiocuaracujani. ¡Nojoriiri quiarijia cua pajenuyajuhuj, na motunura janiya!”

⁴ Pueyasoori naa Elías riucuaquiaari saaja:

“Janiyari siete mil pueya jiiitiajaani. Nojoriiri cua tojitiajaca. Nojoriiri maja na mojoquetaconu quiquiaa cuno sacaraatia shipinishano Baalcuara cua niti, taa narta Israel pueya miiquiaacuaani”.

⁵ Quiarijiaari naajuhuj, Pueyasoori secaja na saquiriojosano Israel pueyajinijinio jiiitia, jiyanootio na quiniucua. ⁶ Naa Pueyaso muerasu nojori quishacari saaja Pueyaso jiyanooniucua nojori, naacuaajiti paari niishiyani, majaari Pueyaso saquiriojonu quiquiaari nojori, maninia nojori quiniucua. Nojori jaara maninia miijia quiriquia, nojori maara paniaquiri na jiyanooshaanura.

⁷ Naacuajitij, paari niishiyani, Pueyasoori saaja na saquiriojosano pueya jiyatequiaa na muerasura. Israel pueya saniniuujia, nojoriiri saaja maninia quiniuria saniniuujia juucua. Naajaa, majaari nojori naata tama na cuaqueyajaaja jiyatenu quiquiaari Pueyaso muerasu nojori quiniuria. Cuno pojori jiuujiaari saaja cumajiuujiaacara quiquiaari, tojetaarucujanaa niishiyashijiaca nojori quiniuria. ⁸ Tariucuaaanu Pueyaso Rupaajiniacujaari naa naajiotasano quiya:

“Pueyasoori nojori jiyatequiaari niishiyashijiacara, maja nojori niishiniuria nojuaja. Naaratej, majaari nojori niishiniu quiija, nojori niquishacari Pueyaso miishano. Majaari nojori niishiniu quiijajuhuj, nojori tojishacari na rupaa. Israel pueyari naa Pueyaso tojiyashijiaca quiyajaa quiarijiani”.

⁹ Supuetana David sequesanoori nojorijiniji naa naajiotasano quiyajuhaaj:

“Pueyasonaa, Israel pueyari puetunu nojori panishanojuanaa jiiitaa, maninia quia miishacari nojori. Saniniuujia, nojori tojiyaquini-uucua quiajaniya, nojori shuquiritiasano casaa cuaara quiria juhua norijia tama nojoririaajaaja, nojori saniitiosaanura. ¹⁰ Nojori jiuujia cuaara jataara juhua cariyoujuarujuriria, maja nojori niishiniuria seetanu Pueyaso rupaajanaa. Nojori cuaara porequetacoora socua, pueyaracaanu taraatia nojori miishacari”.

Pueyaso jiyanooshacari taucuaca, Israel pueya niti

¹¹ ¿Niaateeri jiyaniya Pueyasoori Israel pueya cartequiaarijanaa, tojiyashijiaca nojori quiniuucua? Maja. Pueyaso tojiyashijiaca nojori quiniuucua, taucuacaari saniniuujia Pueyaso muerasura quiquiaa, nojori tiuushacari Jesucristoocua. Cunoori Israel pueya jiaatianiquiaa taucuacaacua, Pueyaso muerasu nojori quiniuriajuhuaj.

¹² Quiarijia, puetunu jiyacajiniajanaa taucuacaari shuquiriaatia quiya, Pueyaso muerasu nojori quishacari Israel pueya tiuyaquiniuucua Jesucristoocua. Saniniuujia, Israel pueya jaara Pueyaso muerasura quiriohua Jesucristoocua nojori tiuushacari, jiyacaritij, socua jiyanoohua maninia quiniutianiyari puetunu pueyapuerajanaa, puetunu jiyacajiniajanaa.

¹³ Taucuacajinijinio cuarta Pueyaso muerasunaa, cua tojiri. Nia sequenu paniyanijia. Janiyari seetanujanaa jiyaramiquishaaquiaari Jesucristo rupaa cua pohuatanura taucuaca niquiarani. Naaratej, janiyari puetunu cua cumaacatajanaa pohuataquiaa Jesucristojiniji taucuaca niquiarani, nojori quiniuria Pueyaso muerasujuhuaj. ¹⁴ Janiyari seetanujanaa naa miiquiaani cuarta Israel pueya jiaatianura niaacua, nojori tiuniuria Jesucristoocujahuaj, noojiaqueya nojorijinijinio Pueyaso jiyatenura na pueyara. ¹⁵ Pueyasoori juhua taanuquiaari Israel pueya nocuaji, nojori tiuyaquishacari Neyanuucua. Naajaa, naacuajiti Pueyasoori puetunu mijiria quiniaa pueyapuejanaa jiyanooquiaa, na muerasu nojori quiniuria. Saniniuujia, Israel pueya jaara jiyanooshaarohua, jiyacaritij, jiyanoohua maninia quiniutianiyari puetunu pueyapuerajanaa. Israel pueya tiuushacari Jesucristoocua, nojoriiri juhua macujiniji samiitiaconutaniuhua. ¹⁶ Seetanujanaa maninia nia niishiniuria nio miriqui cua pohuatasani, maatia nia pohuatareeraj. Nia tojiri. Coteenujanaa pa junicototano neecaruu jaara maninia quiri Pueyasoori naa niqutiosocoriquiano, tariquiaari

puetunujuanaa maniniajuhua Pueyasora. Naajuhuaaj, naana nujuaca jaara maninia quiri puetunujuanaa, na cashacucuaari maniniuquiucuaajuhuaaj. Nio miriqui cua pohuatasanoori nia niishitiya cutara Israel pueyajiniji. Naacuajitij, Pueyaso jaara Abraham jiyanooquiiaaricuaa nocua na tiuushacari, naacuajiti paari niishiyani, Pueyasoori puetunu Israel pueyajanaa jiyanooniutianiyajuhuaaj, nojori jaara tiuuriquia Jesucristoocua.

¹⁷ Supuetana Abrahamri juhua Pueyaso panishano olivo naana nujuaca. Saniniuujia, na jinianuucuajinio supueno Israel pueyari juhua na cashacucua. Cuno na cashacucuaajininio jaara Jesucristoocua tiuyaquiquiaari, Pueyasoori na piyotaquiaari. Niajaniya saniniuujia taucucanaa, niaari panishoo quiquiaari, juhua nacujiniaacoji olivo naana cama, maja natau. Naajaa, Jesucristoocua nia tiuushacari, Pueyasoori nia rupotaquiaari na panishano naanaacua nia moritianura. Naa Pueyaso panishano naanaacua nia moritiasacaritij, cuno naana nujuacaari nia nujuacajuhuaaj. Naacuajitij, niaacuajaari puetunu Pueyaso sequesanojuanaa supuetana Abrahamra masequiaa tari. ¹⁸ Naa Pueyaso rupotanuucua niajaniya na panishano naanaacuatej, majaari tama nia cuaqueyajaaja nia shuquiritianu. Majaari nia jiyaniinu niaa cutaraari socua maninia pueya, Pueyaso cartesano Israel pueyajiniji. Naa jaara jiyaniya niaari socua maninia pueya nojorijiniji, nia niishiri, niaari maja nia nujuaca rishitijia. Naa nujuaca cutaraari nia rishitiya.

¹⁹ Naa naasucuaari sequeya: “Taaquiriirinij. Cuno olivo cashacucuaajaari canacuajij piyotasaquiaari, saniniuujia canaa rupotasaa-nura nocua nojori niti”. ²⁰ Taaquiriirinij, seetanujuanaacuaaquini-ateja nia sequesanojuaj. Saniniuujia nia niishiri, nojoriiri Pueyaso panishano naanajiniji piyotasaquiaari, nojori tiuyaquiniuucua Jesucristoocua. Naaari saniniuujia cuno naanaacua rupotasano quiya, saaja Jesucristoocua nia tiuuniuucua. Naacuajitij, maja tama nia cuaqueyajaaja nia shuquiritianu nia jyanishacari niaari socua maninia pueya cuno Israel pueyajiniji. Saaja puerejaca nia quiri cutara, cua panishano taucucanaa, niaa mariqui piyotasaarohuari, niaa jaara Pueyaso tojiyashijiacara quiriohua. ²¹ Pueyaso jaara jyanoyaquiquiaari na saquiriojosano pueyacuaa, nojori tiuyaquiniuucua nocua, ¿maatucua casaara jyanoori niajaniyanijia? Niacuajaari taucua. Niacuajaari maja na saquiriojosano Israel pueyacuaajininio. ²² Naacuajiti pueyanaa, nia niishiri. Pueyasoori jyanohua maninia. Naajuhuaaj, nojuajaari saniitionu niishijia cutara. Naaratej, nojuajaari na tojtiaashijiaa Israel pueya jyanoyaquiquiaari. Saniniuujia, nojuajaari jyanohua maninia miiquiaa niajaniya na jyanoooshano pueya nia quishacari, niaa jaara pueyaracaanu nocua tiuujiaa quiriquia. Niajaniya taucucanaa, niaa jaara nocua tiuyashijiacara quiriohua, niaari nocuaji rupertasaanutaniuhua. ²³ Saniniuujia, Israel pueya jaara Jesucristoocua tiuujiacara quiriohua, Pueyasoori nojori rupotanutaniuhua na panishano olivo naanaacua. Pueyasoori jyanohua cumaacaracacuaaja na rupotanuuhua na panishano naanaacua. ²⁴ Niajaniya taucucanaa, niaari maja seetanujuanaa Pueyaso saquiriojosano Israel pueya. Naaari juhua nacujiniaacoji olivo naana cashacucua. Naajaa, nia tiuushacari Cristoocua, Pueyasoori nia rupotaquiaari na panishano olivo naanaacujanaa. Naaratej, majaari jiyajeneta Pueyasora, na piyotasano

olivo cashacucua na rupotanuhuaa tama neyonaacuajaaja, nojori jaara Jesucristoocua tiuujiacara quiriohua.

Pueyaso jatanishacari puetunu Israel pueyajanaa na pueyara

²⁵ Taucuacajinijinio cuarta Pueyaso pueyanaa, tariucuacaanu pueyari niishiyaquijia taa Pueyaso miiniutianiya Israel pueyani. Quiarijia cutara nia niishiri Pueyaso niishitishano janiya, maja nia jiyaniuria Pueyasoori nia paniya socua Israel pueyajiniji. Naarate cua tojitiare. Quera puetunu Israel pueyajanaari Pueyaso tojiyashijiaca quiya. Nojoriiri naa quiniutianiya, puetunu Pueyaso saquiriojosano taucacajinijinio pueyajanaa cuaara Jesucristoocua tiuuriijaatijia. ²⁶ Jiyacaritij, puetunu Israel pueyajanaari jiyatesaanutaniya Pueyaso pueyarajuhuj, taa tariucuacaanu Pueyaso Rupaajinia naajiotasaaquiaaricujani. Naa sequeyari:

“Sión tiacajinia supenuutaniyari pueyacuaji Tacuriquiano. Nojuajaari puetunu sesa casaajanaa jaariutianutaniya Jacobo niqiuohuacajinijo supueno pueya jiuujiajiniji. ²⁷ Naa cua jiyanooshacari puetunu sesa nojori miishanojuanaatej, janiyari jiyacari tohua-teenutaniya tariucuacaanu cua sequesano nojori supuetanaani”.

²⁸ Quiarijia Israel pueya tiuyaquishacari Jesucristo rupaacua saniniuujia, nojoriiri juhua Pueyaso paraa, Pueyaso jiyanooniuria nia-janiya saniniuujia, taucacanaa. Naajaa, Pueyasoori cuno Israel pueya panijajaa, nojori supuetanaa quiniuucua na saquiriojosano pueya. ²⁹ Pueyasoori maja na jaariutianu quijia na niqitiosano. Na saquiriojosano pueya jiyanoojaari. Majaari nojori na ruuretanu. Pueyasocujajari Israel pueya saquiriojoquiaari na pueya nojori quiniuria, maninia na miiniuria nojori. ³⁰ Maniniushiquiari, niajaniya taucacanaa, niaari Pueyaso tojiyashijiaca quijia. Israel pueya tojiyaquiniuucua Pueyaso quiarijia saniniuujia, Pueyasoori niaacua taraajequiaa. ³¹ Nojoriiri Pueyaso tojiyashijiaca quiya quiarijia, Pueyaso taraajenura nojoriicua taa na taraajeya niaacuacuaani. ³² Naacujitij, Pueyasora, puetunu pueyajanaari na tojiyashijiaca quiya, Israel pueya, taucacano. Naacujitij, Pueyasoori na naata jiyanooni nojoriijuhuj, nojori tiushacari Jesucristoocua. Pueyasoori maja rimiajata na jiyanooni.

³³ ¡Pa Pueyasoori jiyanohua niishijia, maninia na miiniuria! ¡Nojuajaari puetunu niishijiajanaa cutara! ¿Cante niishiquiaarini casaa Pueyaso miiniutianiya? Na miishanoori jiyanohua jiyajeneta. ¿Cante na naata na niishiniuni? Shaaqui. ³⁴ Naaratej, seetanujanaari nio tariucuacaanu sequesano:

“¿Cante na naata Pueyaso niishiriojosano niishiniuni? ¿Tamonuteeri na naata Pueyaso rootanu, maninia na miiniuria? ¡Maja!

³⁵ ¿Pueyasoteeri na panishano jiiitiaquiquiaari tamonu niqitionura nojuaja na panishano, na nuhuaji na niqitionuhua? ¡Maja!”.

³⁶ Seetanujanaa puetunu casaajanaacuajaari Pueyaso shipinishano. Na camaruuri na rishitiquiaa na cumaacata. Puetunu cunojuanaari nerano. ¡Pueyaracaanu pa shuquiritiare pa Que Pueyaso! ¡Nojuajaari jiyanohua maninia! ¡Cuaara naa quiiriatej!

12

Saaja Pueyasora pa quirij

¹ Cuarta Pueyaso niqiuohuanaa, jiyanoohua maninia Pueyaso jiyanooshacari pajaniya, tama nia cuaqueyajaaja nia jiyatere tojetaarucujanaa saa neraja nia quiniuria. Naacujitij, niaari Pueyaso shuquiritiniutianiya, pueyaracaanu na tojjijaca nia quishacari.

² Majaari socua nia quiniu taa Pueyaso tojjiyashijiacua quiquiaacuaani. Saniya Pueyaso Sohuanu tojjijaca nia quiri cutara, seetanujuanaa quiariniora jatanishano pueya nia quiniuria. Naacujitij, niaari niishiniutianiya casaa Pueyaso paniya nia miiniuriani. Nia niishitiaja jaara jatanishano quiri, naacujiti niaari niishiniutianiya casaate maninia nia miiniuriani, Pueyaso nia shuquiritiniuria. Naa nia miishacari Pueyaso panishanotej, niaari niishiniutianiya, cunoori tojetaarucujanaa jiyanoohua maninia.

³ Jiyanoojia Pueyaso quiniuucua, nojuajaari cua jiyatequiaari Neyanujiniji pohuatana cua quiniuria. Naaratej, puetunu niajanijajanaa cua tojjitiare quiarijia. Naa jaara Pueyaso cumaaca masequiaari nocua nia tiuushacari, nojuajaari puetunu niajanijajanaa jiyatequiaari tamaatia poonijiosano miijiaca nia quiniuria. Naaratej, majaari tama nia cuaqueyajaaja nia jiyatenu paniniu socua maninia quijiaca nia quiniuria tamasacajiniji. Saaja jacaria niishiriojojuaca nia quiri, maninia nia miiniuria nia poonijiosano, teyano Pueyaso sequequiaari nia miiniuriacuajani. ⁴ Pa cuaqueyajiniacuma, paari queraatia tamaatia casaa jitiaani. Puetunu cunajuanaari tamaatia miiniu niishijia, maninia pa quiniuria. ⁵ Paari naajuhuaaj, taa pa jiniacuma casaacuaani. Queraatia Pueyaso muerasu pa quishacari, naajaa, paari juhua niqiriyatu cuaqueyani, Cristota rupuetootesano pa quishacari, maninia pa miitioonura.

⁶ Naatej, taa pa cuaqueyajiniacuma casaa tamaatia poonijiosano miiniu niishiyacuaani, naajuhuaaj, Pueyasoori puetunu na muerasujuanaa na cumaaca niqutioquiaa, tamaatia miiniu niishijiacua pa quiniuria. Naaratej, cante Pueyaso cumaaca jitiaani, Pueyaso niishitishano nojuaja na pohuatanurani, nojuaja cuaara seetanujuanaa pueya niqiuara pohuataara na taacanuyaquiniutia. ⁷ Naajuhuaaj, cante Pueyaso cumaaca jitiaa pueya na naacunurani, nojuaja cuaara maninia naacuura pueya. Naajuhuaaj, cante Pueyaso cumaaca jitiaa Pueyaso rupaa niishitiojona na quiniuriani, nojuaja cuaara maninia niishitiojoora Pueyaso rupaa pueya niqiuara. ⁸ Cante Pueyaso cumaaca jitiaa pueya na shiniujiuniuriani, nojuaja cuaara pueya shiniujiuuria, maja pueya cartenura Pueyaso rupaa. Cante na jitiisanonijiniji nareja niqutiojojua casamijiuuniucua pueyani, nojuaja cuaara juhujaniya niqutiojoora nareja, nojori na paniniutia. Naajuhuaaj, cante Pueyaso pueya jitianani, nojuaja cuaara jitiaara Pueyaso pueya nojoriicua na tacaaniutia. Cante taraatia miishano pueya naacujani, nojuaja cuaara shuquiriaatia na naacuuranonj.

Pueyaso tojjijaca nia quiri, taa Pablo rootaacujani

⁹ Seetanujuanaa panitioojua nia quiri. Puetunu sesa casaajanaa sojea nia quiri. Majaari maninia miiniu nia tarinitianu cutara. ¹⁰ Jiyanoohua panitioojua nia quiri, taa nia paniquiaa nia tarajanucuaani. Niarta Pueyaso muerasu nia jiyatere juhua socua maninia pueya niajanijajiniji. Majaari nojori nia rerequetenu.

¹¹ Tama nia cuaqueyajaaja nia cumaquiri maninia nia poonijionura pa Jiyaniijia. Majaari taajecori nia quiniu.

¹² Shuquiriaatia nia quiri pueyaracaanu, nia niishishacari taa Pueyaso miiniutianiya jiyanohua maninia na muerasuni. Saaja juhuajaniya nia rejeretare niaa jaara naquiya miishaare. Pueyaracaanu Pueyaso nia secojore. Majaari quenaaja nia tarinitianu na secojonu.

¹³ Niarta Pueyaso pueya jaara na panishano jiiitiaaquiri, nareja nia niqutiore nojori nia jiiitiasanojiniji. Naacuajitij, nojori jaara rucoonaa quiri, nojori nia masuure nia tiacora.

¹⁴ Niaa jaara naquiya miishaariquia, majaari nia miitianaa nia sesacanu. Saaja nia secojore Pueyaso nojoriicuara, Pueyaso taraajenura nojoriicua.

¹⁵ Cante shuquiriaatia quiyacuaani, nojoritia nia shuquiririjuhuj. Saniniuujia, cante nujuqueyacuani, nojoritia nia nujuquerejuhuj.

¹⁶ Jiyanoootoojuaca nia quiriqvia, jatiqvi nia quiniuria maninia. Majaari tama nia cuaqueyajaaja nia jiyatenu juhua socua maninia quijiaca pueya tamasacajiniji. Majaari pueya rerequeteja nia quiniu. Saniniuujia, tama nia cuaqueyajaaja nia mueyashitiri cutara, maninia nia rupuenura paniaquishoo pueyajuhuj. Majaari tama nia cuaqueyajaaja nia jiyatenu juhua socua niishijiaca pueya nia quiniuria tamasacajiniji.

¹⁷ Niaa jaara sesa miishaariquia, majaari nia paraa nia naminiu saniniuujia. Puetunu nia miishanojuanaa cuara quiri maninia puetunu pueya niqiarajanaa. ¹⁸ Maninia nia quiri puetunu puey-atajanaa, majaari nojori ruutaquenu niaacuara. ¹⁹ Socua cua tojitiare cua panishano cuarta Pueyaso pueyanaa. Niaa jaara sesa miishaariquia, majaari nojori nia naminiu. Juhujaniya nia rejeretare saaja. Pueyasocuaajaari niaacua naminiutianiya nojori. Pueyaso sequesano- cuajaari naa naajiotasano quiya na rupaaajinia:

“Quiria nia tarinitiare puetunu sesa nojori miishanojuanaa niajaniya. Janiyacuaajaari nojori naminiutianiya niaacuani”.

Cua tojiri. Pueyasojunaacuajaari naa sequequiaari. ²⁰ Naaratej pueyanaa, majaari nia paraca nia naminiu. Saaja maninia nia miiri nojori taa tariucuacaanu Pueyaso Rupaaajinia naajiotasaaquiaaricuaajani. Naa sequeyari:

“Quia paraca jaara miaajeya, quia miaqueterenoj. Jaara jiyamueyaju-
juhuj, quia raatorenoj. Quiaa jaara naa na miiritij, tama noju-
jaarijia jiyanohua caririqviutianiya noojiajinia”.

²¹ Naacuajitij, niaa jaara sesa miishaariquia, majaari nia juaaniu, niaa mariqui sesa miijia quiriariuhuj. Saaja maninia nia miiriqvia nia paraca. Naacuajitij, niaari Sesaaca shocotanutaniya.

13

Pa jiya jiyaniijianucua tojijia pa quiri

¹ Pueyanaa, mijiria nia jiyaniijianucua tojitiajaca nia quiri. Nojoricuaajaari Pueyaso jiyatesano, nia jiya jiyaniijianucua nojori quiniuria. Majaari pueyano na naata jiyatesaanu jiyaniijia na quiniuria, Pueyaso jaara paniaquiri. ² Naacuajitij, cante mijiria jiyaniijianucua tojiyashijiani, nojuajaari jiyaniijia Pueyaso jiyatesano tojiyashijia. Cante naa mijiria jiyaniijianucua tojiyashijiani, nojuajaari

saniitiosaanutaniya. ³ Paa jaara maninia miijiaca quirini, ꞥpaatucua casaara pa jiyaniijianucua puereriquiani? Jiyaniijianucuaari maja na pueretenu maninia miijiaca. Sesa miijiaca cuaara na puereera cutara, sesa miijiaca nojori quiniuucua. Saaja maninia miijiaca nia quiri. Naacuaajitij, nia jiyaniijianucuaari maninia poojotanutaniya nijaniyajiiniji. ⁴ Nojoricuajaari Pueyasora poonijionaa, maninia nojori jiiitianura nijaniya. Saniniuujia, niaa jaara sesa miiri, nia puerere cutara. Jiyaniijianucua pueyari maja najuhuanaj. Nojoricuajaari jiyaniijianucua cumaacaraca, sesa miijiaca nojori saniitionura. ⁵ Naacuaajitij, nia jiyaniijianucua tojijiaca nia quiri maja nia saniitiosaanura, naajuhuj, maja Pueyaso tojiyashijiaca nia quiniuria. ⁶ Naajuhuj, nia cumaneecajiniji nia niquitiore nia jiyaniijianucua, taa nojori sequequiaa nia niqutionuracuajani. Nojoricuajaari Pueyasora poonijioquiaa pueyaracaanu, maninia nojori jiiitianura nijaniya. Naaratej, nojoriiri cumaneeca masequiaa nijaniyajiiniji.

⁷ Naaratej, puetunu nojorijianaa nia niquitiore, taa nojori sequequiaa nia niqutionuracuajani. Naacuaajitij, niaa jaara sequesaa nia cumaneecajiniji nia niqutionura nia jiya jiyaniijiaara, nareja nia niquitiore. Naajuhuj, cumaneeca jaara jiya jiyaniijiaara masenu cojiritiasaare, casami nia masesacari, majaari nia juaaniu. Naajuhuj, majaari nia jiyaniijia nia sesacanu, jiyaniijianucua nia jiyatesano pueyano. Majaari nojori nia rerequetenu. Naajuhuj, nia jiyaniijianucua tojijiaca nia quiri, nojori quiniuucua Pueyaso jiyatesano nia jiyaniijianucua.

⁸ Pueyanaa, majaari najuhuaana casami nia poonu, niaa jaara cumaneecaaju quiri. Saniniuujia pueyanaa, maja cutaraari niarta pueya paniniu nia puecanu. Pueyaracaanu nojori panijiaca nia quiri cutara. Naacuaajitij, cante narta pueya panijiani, nojuajaari Moisés Rootasano tojijia cutara. ⁹ Supuetana Moisés cuajaari naa naajiotaquiaari puera, Pueyaso sequesano nojuaja:

“Maja niyacaraca maaji numuetucunu. Maja pueyano monu. Maja nohuasejonu. Maja tamasaca jiiitasano casamiicua jiaatija nia quiniu”.

Socua queraatia na rootasanoori quiya. Niocuajaari socua pa tojishocoriquiano na rootasano:

“Quiarta pueyano panijia quia quiri, taa quia paniya tama quia cuaqueyacuanaani”.

Paa jaara saaja nio Moisés rootasano tojijia quirini, paari tari puetunu na rootasanojuanaa tojijia quiyani. ¹⁰ Cante seetanujuanaa pueyano panijiani, nojuajaari maja sesa na miiniu narta pueyano. Naaratej, paa jaara panijia quiri quiani, paari puetunu Moisés Rootasano tojijia cutarani.

¹¹ Pueyanaa, nio nia niishiri. Pa Jiyaniijia rijionu juuca pajaniyari tari quenaacoya. Cuno juucaari quiarijia socua cateca quiya paa jaara nocua tiuquiarini. Naaratej, cante juhua maqueyajaani, nojuaja cuaara niucuaara, pa Jiyaniijiaara na poonijionura. ¹² Mijiria pa quishacari juhua ninishiqui. Paari juhua quera juhuaqueya tarini. Janiyari naa nia sequeyani, pa Jiyaniijiaari quera tiuquihua. Nojuaja cutaraari na cumaacata pa cuhuatanutaniya. Naaratej, puetunu sesa pa miinujianaa pa cartere. Majaari juhua ninishiqui quijiaca pa quiniu socua. Taa pueya cushiquiaa na toque tariquicuaji na poonijionuracuanaani,

naa nia cushiri Pueyaso cumaacajuhuj. Naa nia miiritij, nera nia poonijionura, puetunu mijiria sesa casaajanaa rejeretajaca nia quiniuriajuhuaj. ¹³ Seetanujuanaa juhua Pueyaso pueya nia quiri. Majaari juhua ninishiqui quijiaca pueya nia quiniu. Niaacuajaari cuhuashiqui quijiaca. Naaratej, majaari mashaasequenuujuaca nia quiniu. Majaari nia queranacunuunu, cararaatia casaa nia miiniuria. Majaari nia camishoo maaji numuetucunuucua jiaatiajaca nia quiniu. Majaari sacuaraatia casaa miiniuucua nia jiiitiniu. Majaari juayonuujutajaca nia quiniujuhuaj. Naajuhuj, majaari tamonu pueyano jiiitasano casaacua nia jiaatianu. Naajuhuj, majaari nia juaaniu tamonu jaara nia shocotare. ¹⁴ Naacujiti pueyanaa, majaari nia niishiriojonu nia cuaqueya nia shuquiritiniuria taa nia paniya sacuaraatia nia miiniuriacuajani. Saniniuujia, maninia cutaraari Jiyaniijia Jesucristo niishitiaja nia jiiitanura, na cumaacanio. Naa nia miishacaritij, niaari juhua soldadohua miaquetoojotaja toque cushiyojua, maja Sesaaca miitiniuria sesa nijaniya.

14

Maja quiarta Pueyaso pueyacuara nia rimiaaquenu sacuaraatia

¹ Pueyaso pueyajinijinio pueyano jaara Pueyaso rootasanojiniji taacanuujua quiriquia pueyaracaanu, naajaa, na rupuejaca nia quiri. Majaari nata nia juayonuujutanu tamaatia na niishiriojosacari Pueyaso rootasanojiniji. ² Naacujitij, Pueyaso rootasano niishijia nia quishacari cutara, niaa naasucuaari niishiya nia naata puetunu miaquesanojuanaa miaquenu cutara. Saniniuujia, cante Pueyaso rootasanojiniji taacanuujuanu, nojuaja naasucuaari jiyaniya na naata saaja na natau miaquenu, na shuquiritiniuria Pueyaso. ³ Cante puetunu casaajanaa miaqueja cutarani, nojuaja cuaara soyaquiiria narta Pueyaso pueyano, cante na miaquesano miaqueyashijia saniniunijia. Naajuhuj, cante puetunu casaajanaa miaqueyashijiani, nojuaja cuaara sesacaquiiria puetunu casaa miaquejacajanaa. Cuno pojori, shu miaquejaca cutarani, nojoricuajaari Pueyaso jiyatesano na muerasu nojori quiniuriajuhuaj. ⁴ ¿Canteeri pajaniyani, tamonu pueyanora poonijionaa pueya sesacaja pa quiniuriani? Tama nojori camarnucuajaari nojori sequenutaniya, nojori miishanote maninia, sesa soj. Naajuhuj, pa Jiyaniijia Jesucristocuajaari cumaacaraca, na muerasu na jiyatenura maninia quijiaca nojori quiniuria.

⁵ Cua tojiri pueyanaa, noojiaqueya Pueyaso muerasujinijinioori niquiriyatu juuca semaanajiniji jiyatequiaa nojori maniniuhuaqueetanura Pueyaso. Tamasacaari saniniuujia sequequiaa, puetunu juucajanaanaari maninia, Pueyaso pa maniniuhuaqueetanura. Puetunu nijaniyajanaa cuaara taacanuyaquiiria tama nia miishanojinijijiaaja, maja nia macuhajetenura nioojia. ⁶ Cante niquiriyatu juuca semaanajinia jiyatequiaa samaatenu juucara Pueyaso na maniniuhuaqueetanurani, maniniacuajaari. Nojuajaari naa miiquiaa Pueyaso na shuquiritiniuria. Naajuhuj, cante puetunu casaa miaquejajanaani, maniniacuajaari. Pueyaso na shuquiritiniuria, nojuajaari na miaquequiaa nocuara na secojonu nuhuaji. Naajuhuj, cante shu miaqueyaquijia Pueyaso na shuquiritiniuriani, cuaara naa miiria. Nojuajaari Pueyaso shuquiritijuhuj na secojosacari Pueyaso, na natau na miaquenura.

⁷ Seetanujuanaa pueyanaa, majaari pa quiniu tama pajaniyarajaaja. Naajuhuj, majaari quenaaja pa shaajenu tama pajaniyarajaaja. ⁸ Paa jaara mijiria quiyani, paari pa Jiyaniijia rishiquiaani. Paa jaara cusoyareni, paari pa Jiyaniijia cusoqueeni. Naaratej, paa jaara saminio quiyajaani, naajuhuj, paa jaara tariucua macu quiyani, paari pa Jiyaniijia jii-tiasanoni. ⁹ Jesucristocujaari cunora cusoquiaari, macunucua Jiyaniijia na quiniuria. Nojuajaari samiitiaquiaariuhua saminiucua Jiyaniijia na quiniuriajuhuaj. Naacuajitij, nojuajaari pa Jiyaniijiajanaa cutara.

¹⁰ Naaratej, saaja niquiriyatu Jiyaniijia pa jii-tiasacari, ¿paatucua casaara parta Pueyaso muerasu sojeaca quirini, nojori miaqueyaquini-uucua shuni? Naajuhuj, ¿paatucua casaara parta Pueyaso pueya sesacajaca quirini, nojori miaquenuucua puetunu casaajanaani? Nia niishiri pueyanaa. Puetunu pajaniyajanaari nujuatejosaanutaniya Pueyaso tacobini, Pueyaso nequesoreenura pajaniya. ¹¹ Tariucuaaanu pa Jiyaniijia sequesanoori naa naajiotasano quiya na rupaajinia:

“Seetanujuanaa sequeyanijia, puetunu pueyajanaari cucuara moju-quetaconutaniya, nojori niishishacari janiyari seetanujuanaa Jiyaniijiajanaa cutarani. Puetunu nojorijianaari sequenutaniya: ‘Jiyaniijianaa, quiaari Pueyasojuanaa cutara! Puetunu quia miishanojuanaari maninia’ ”.

¹² Naacuajitij, paari niishiyani, puetunu pajaniyajanaari Pueyaso rihuanenutaniya tamajaajani, na nequesoreesacari pajaniya.

Maja sesa pa miitiniu parta Pueyaso pueya

¹³ Naacuajitij cuarta Pueyaso pueyanaa, maja cumaati pa sesacatoonu, paa jaara tamaatia miiniu niishijiaca quiri parta Pueyaso pueyajiniji saniniunijia. Tama nia cuaqueyajaaja nia cojuare maja niarta Pueyaso pueya niqiuara nia miiniuria nojori jyanishano sesa casa. Nojori jaara saniri miiniu nia miishanocuaa, naacuajitij, niaari tari sesa miitirii nojori Pueyaso niqiuara. ¹⁴ Janiyacujaari niishiyani, majaari quenaaja tamonu sumatuu quiniu pa miaquesacari sesa miijiacara na jiyatenura pajaniya Pueyaso niqiuara. Janiyari naa niishiyani cua Jiyaniijia Jesu rupaacua tiuujia cua quiniuucua. Saniniuujia, cante jiyaniyanijia tamonu sumatuu na naata na jiyatenu sesa miijiaara nojuaja jaara na miaquere, nojuaja cuaara miaqueyaquiiranoj. Jaara na pueresano saniri miaquenu, nojuajaari tama noojiaaja macuhuanutaniya. ¹⁵ Naacuajitij, paa jaara parta Pueyaso pueyano macuhajetere pa miaquenuucua na miaqueyaquishoo casaani, majaari seetanujuanaa parta Pueyaso pueyano panijia pa quiniu. Jesucristocujaari tama na cuaqueyajaaja panitiaquiaari nocuaji na ritianura Sesaaca. ¿Paateeri na sesonutaniya saniniunijia, na miaquesoo casa pa miaquesacari na niqiarani? ¹⁶ Naacuajitij, majaari nia shanacunu Pueyaso tojiyashijiacua pueya sesacanura Pueyaso rupaa, nia miaquesano casaacua nia juayonuujutanuucua niarta Pueyaso pueyata. ¹⁷ Seetanujuanaa nia sequeyanijia, majaari Pueyaso muerasu pa quiniu casa pa miaqueyaquiniuucua, casa pa ratuyaquiniuucuanio. Pueyaso muerasu pa quishacari, nojuaja cutaraari paniya maninia miijiacua pa quiniuria, jatiqii pa quiniuria juhuajaniya. Pa panitiaajaariuhua shuquiriaatia quijiacua pa quiniuria. Paacuajaari na Sohuanu jii-tiaani, naa maninia

pa quiniuria. ¹⁸ Paa jaara naa quijiaca quiriquiani Cristora pa poonijosacari, Pueyasoori pa shuquiritiaa. Naacuajitij, Pueyaso tojiyashijiaca pueyari maja na rerequetenu quiniutianiya pajaniya.

¹⁹ Naarate cuarta Pueyaso pueyanaa, jiyanoehua nia saniniuujuri taate nia naata maninia rupuetosano quiniu puetunu niarta Pueyaso pueyatajanaani. Naacuajiti nia naata tama cumaquitioonujuaaja maninia Pueyaso muerasu nia quiniuria. ²⁰ Majaari nia sesonu Pueyaso miishano niarta Pueyaso pueya jiuujiajinia, saaja nia miaquenuucua nojori niquiara nojori pueresano casaa. Seetanujuanaa, Pueyasora, puetunu miaquesano casaajanaari maninia pa miaquesocoriquiano. Saniniuujia, tama nia cuaqueyajaaja nia cojuare cutara, maja niarta Pueyaso pueya niquiara nia miaquenura nojori miaquesoo casaa, niaa mariqui nojori cushitioereeri. Naacuajitij, majaari nia naata maninia rupuetosano quiniu niaa jaara nia miishanota taraajoriquia niarta Pueyaso pueya. ²¹ Naacuajitij, socua maninia juhuari maja pa miaquenura parta Pueyaso pueya pueresano casaa. Naajuhuj, majaari pa ratunu jereeca mashaca nojori niquiara, cuno naa pa miishano jaara quiri nojori shiniuujuniuria sesa nojori miiniuria. Naajuhuj, pa cartere puetunu parta Pueyaso pueya jiyanishano sesa miiniu casaajanaa, maja nojori pa taraajonura nojori ruparetanura pocuaji. ²² Naacuajitij, Pueyaso Rupaacua nia tiuushacari seetanujuanaa, niaa jaara niishiya nia miishanoori maja sesa, tamajaaja nia miirinioj saaja Pueyaso niquiara. Shuquiriaatia quijia cutaraari noo pueyano, cante niishiyani na miishocoriquiano casaari maninia Pueyasora, maja noojia na macuhuajetenura na miiniu nuhuaji. ²³ Saniniuujia, cante niishiriojiyani na miaquenu panishano casaa naasucuaari sesa quiniutianiya Pueyasora, jaara naa niishiriojiya, seetanujuanaa naa sesa quiniutianiyari taa na niishiriojiyacuaajani. Paa jaara casaa miaquere seetanujuanaa pa tiuyaquiniutia Pueyasoo cuani, pa miaquesacari, paari tari sesa miirii Pueyaso niquiarani. Seetanujuanaa, puetunu pa miishanojuanaari sesa, paa jaara pa taacanuunuta na miiriquiani. Naaratej poojiaari macuhuajenutaniya.

15

Parta Pueyaso pueya pa shuquiritiri, maja tama pa cuaqueyajaaja

¹ Noojiaqueya parta Pueyaso muerasuuri juhuanojuaja seetanujuanaa Pueyaso Rupaacua tiyashijiaca. Naacuajitij cuarta Pueyaso pueyanaa, pajaniya, cante tari seetanujuanaa Pueyaso Rupaa tojijiacacuaani, pajaniya cuaara nojori rejeretaara juhuajaniya. Paa jaara socua Pueyaso Rupaa niishijiacacuaani, nojori pa cumaquiri. Majaari pa niishiriojonu tama pa cuaqueyajaaja pa shuquiritiniuria tamajaaja. ² Puetunu pajaniyajanaa cuaara niishiriojora taate pa naata parta Pueyaso pueyano cumaquiniuni, shuquiriaatia na quiniuria, maninia Pueyaso tojijia na quiniurijuhuj. ³ Paacuaajaari niishiyani, majaari quenaaja pa Jiyaniijia Jesucristo niishiriojonu quijia tama na cuaqueyajaaja na shuquiritiniuria. Saniniuujia, nojuaja cutaraari taraatia miiniu rejeretaquiaari na rupuenura mijiria quiniaa pueya, nojori na jaariuutianura Sesaaca. Naacuajitij, nojuajaari nio tariucuaaanu tama nojuajiniijiaaja naajiotasano tohuateequiaari:

“Cua Quenaa, cuno pojori, canapuate quia sesacajacani, nojoriiri cua sesacajuhuaaj, cua miiniucua quia panishano”.

⁴ Seetanujuanaari pueyanaa, puetunu tariucuacaanu Pueyaso Rupaajinia naajiotasanojuanaani, cunoori pajaniyara naajiotasaaquiaari. Cunoori pa niishitiojiya maninia pa rejeretanura puetunu sesa casaajanaa. Pa cumanijiaajaariuhuaaj. Naacuaajitij, paari juhuajaniya sashiya pa Jiyaniijiani. ⁵ Pueyasocuaajaari pa cumaquinia, maninia rejeretajaca pa quiniuria, cumanijiasano pa quiniuriajuhuaaj. Nojuaja cuara nia jiyateera jiyanoojiaca nia quiniuria taa Cristo quiquiaari jiyanoojiacuaani, rupuetoojuaca nia quiniuria niarta Pueyaso pueyata. ⁶ Naacuaajitij nia naata pa Que Pueyaso, mariyata pa Jiyaniijia Jesucristo maniniuhuaqueetanu, juhua niquiriyatu pueyano, maninia rupuetoojuaca nia quishacari.

Pueyaso rupaari maja saaja Judiocuacara

⁷ Pueyanaa, jyanootiojuaca nia quiriqia, taa Jesucristo jiyanooquiaa pajaniyacuaani, maninia rupuetosano nia quiniuria. Naacuaajitij, pueyari Pueyaso timitianutaniya nojori niqishacari Judiocuaca taucucata Pueyaso maniniuhuaqueetaano jatiqii. ⁸ Janiyari seetanujuanaa nia sequeyani, Cristoori mijiria niqiaari Judiocuacaana, na tohuateenura Pueyaso sequesano nojori supuetanaa. Tariucuacaanu Pueyaso sequesanoori seetanujuanaa. Nojuajaari maja na sequesano na jatanu. ⁹ Judiocuacara Cristo miishanoori taucucara quiqiaarijuhuaaj, nojori maniniuhuaqueetanura Pueyaso, na jiyanooniucua nojoriujuhuaaj. Tariucuacaanu Pueyaso Rupaajinia supuetana David naajiotasanoori naa quiyajuhuaaj:

“Maninia quia miiniucua janiya Pueyasonaa, janiyari quiajaniyajiniji poojotanutaniya maniniani taucucaca jiyacajinia. Maninia quia miiniucua janiya, janiyari quia timitianutaniya cua jaaquequejosanotani”.

¹⁰ Tamaqui Pueyaso Rupaajinia naa naajiotasanoori quiyajuhuaaj:

“Pueyaso niishiyashijaca taucucanaa, Pueyaso saquiriojosano pueya nia cojiri, mariyata jatiqii nia shuquiritianura pa Pueyaso”.

¹¹ Pueyaso Rupaajinia, supuetana David naajiotasanoori naa sequeyajuhaaj:

“Pa Jiyaniijia Pueyaso nia maniniuhuaqueetare, puetunu niajaniyajanaa, tamaatia rupaaca pocujaca taucucanaa. Pueyasora nia jaaquequenuure puetunu jiyacajinia quiniaa pueyajanaanaa, maninia na miiniucua pajaniya”.

¹² Supuetana Isaías naajiotasanojinijjuhuaaj, paari niishiyani Pueyasoori taucucaca jitianu panijia pueyaracaanu, maja saaja Judiocuaca. Naaratej, Isaíasri naa naajiotaaquiaari:

“Supuetana Isai niyanujiniji supuenutaniyari pueya Jitiana. Nojuajaari puetunu mijiria quiniaajanaa jiyaniijia quiriqiano. Puetunu jiyacajinijinio taucucajanaari nocua tiuujiaca quiniutianiya”.

¹³ Pueyasocuaajaari poojajinia poonijiojua, juhuajaniya pa sashiniuria pueyaracaanu, nojuaja cuara miirijaatijia puetunu na sequesanojuanaa pajaniyara. Pueyanaa, Pueyaso cuara nia timitiiria jiyanojua. Naajuhuaaj, nojuaja cuara nia jitiara juhuajaniya, canapuate nocua

tiuujiacacuajani. Naacuaajitij, mijiria nia sashishacari, niaari shuquiriaatia rejeretajaca quiniutianiya Pueyaso Sohuanu cumaquishacari niajaniya, seetanujuanaa nia niishishacari pa Jiyaniijaari pa rijionuucua tacatenutaniuhua.

¹⁴ Cua panishano Pueyaso niqiuojuanaa, naa cua naajiojinia cua nacasusacari jiyanojua niajanijatej, majaari nia jiyaniini janiyari niaacuaji taacanuyajaani. Maja. Janiyacuajaari niaacua tiuyani niaacuajaari seetanujuanaa maninia quijiaca. Niaacuajaari Pueyaso rupaa niishijiacajuhuj. Naacuaajitij, nia naata tama nacasutoojonujuaaja maninia, maninia rupuetoojuaca nia quiniuria Pueyaso niqiuara. ¹⁵ Naajaa, quiarijia janiyari niaacuara naajiyani cua niishitiniuhua niajanija tarijia nia niishishano. Cua jyanootiuri, nio cua naajiojinia jiyanojua cua nacasunuucua niajanija. Naa nia rootaanijia Pueyaso jiyatenuucua janiya Neyanu Jesucristo jiyaramiquishano, taucuaca cua pohuatanura na rupaa. ¹⁶ Pueyaso jiyatenuucua janiya nera poonijionara, janiyari cunora Jesucristo rupaa pohuataquiaa taucucani. Naacuaajitij, Pueyaso Sohuanu poonijionuucua nojori jiuujiajinia, nojoriiri Pueyaso shuquiritasano muerasu quiniutianiyajuhuj.

¹⁷ Pueyasora cua poonijosacari, janiyari jiyanojua timitiaa Jesucristoni, cua niquishacari taa taucuaca tiuquuaa na rupaacuan. ¹⁸ Majaari cua timitianu tama cua miishanojuaaja. Janiya cutaraari Jesucristo miishano timitiaani. Nojuacuajaari taucuaca tiuutiquiaa na rupaacua. Nojoriiri nocua tiuquuaa nojori niqiuara cua pohuatasacari na rupaa, naajuhuj, Pueyaso Sohuanu cumaacata cua miniuucua nojori niqiuara. ¹⁹ Nojori niquishacari Pueyaso Sohuanu cumaacata cua miijosano, nojoriiri niishiquiaa cua pohuatasanoori seetanu rupaaajanaa. Janiyari pocuaji Tacuna Jesucristojiniji tari pohuataquiaari puetunu tiqiyocuaajanaani, Jerusalén tiacajiniji, puetunu Iliria jiyajinarajanaano. ²⁰ Naa cua pohuatasacari pa Jiyano Jesucristojiniji puetunu cuno jiyacajiniajanaatej, janiyari pueyaracaanu pohuataquiaari cuniquini, tee Jesucristojiniji tojiyaquishaaquiaari juhuanojuaacuajani. Majaari cua pohuatanu paniniu quiquiaari tee tamasaca pohuataquiaari tari Jesucristojiniji. ²¹ Naa cua pohuatasacari Jesucristojiniji cuno pueya niquiaratej, janiyari nio tariucuaaanu Pueyaso Rupaajinia naajiotasano tohuateeriquiaani. Naa sequeya Jesucristojiniji:

“Nojuajiniji pohuatasoojua pueyari nojuajiniji pohuatasaanutaniya. Nojoriiri jiyacari niishiniutianiya cante nojuajani”.

Pablo naquerejosacari Roma tiacajiniara

²² Pueyaracaanu nio jiyacajinia cua pohuatasacari Jesucristojiniji, majaari jeya cua quiniu quiriquiaa nia niquniuucua cua quianura. ²³ Quiarijia cutara, janiyari Jesucristojiniji pohuatanu tucatarucuaa tarini, tee Jesucristo rupaa tojiyaquishaaquiaari juhuanojuaacuajani. Janiyari Espania jiyajinia pohuatanu paniya Jesucristojinijihuhuj. Queraatia marijiaari tari cua shocojocanu pueyaracaanu cua naquerejosacari niaacua cua quianura. ²⁴ Naacuaajitij, Espania jiyajiniara cua quiasacari, janiyacu nia tiacajinia jateemani. Janiya jaara pasaja camueenujusee niaata shuquiriaatiani, na nuhuaji, janiyari paniniutianiyani nia naacunara janiya, cua quianura Espania jiyajiniara. ²⁵ Janiyari coteenu Jerusalén tiacajinia tacatenutaniuhua ti

quiniaa parta Pueyaso muerasu cua niqutionuhuaa cumaneecani, niya quiniaa parta Pueyaso pueya niqutiojosano nojoriria. ²⁶ Puetunu parta Pueyaso pueya maapuejanaa Macedonia jiyajinia, mariyata niya Acaya jiyajiniani, nojoriiri jiyanhua maninia miya. Nojoriiri tama ni-shiriojonuucanujuaaja nareja na cumaneeca niqutiojonura Jerusalén tiacajinia quiniaa casamijiuniucua Pueyaso pueyara. Cunora, nojoriiri quiarijia na rerateya cuata na jiyarosocoriquiano. ²⁷ Nojoriiri naa miya nojori niishiriojosacari, maniniacuajaari nojori naacunura narta Pueyaso pueya. Seetanujuanaa maniniacuajaari nojori miishano. Judiocuacaari maja na jamuenu quiquiaari Pueyaso rupaa pohu-ataasaanura taucuaca niqiuara. Naaratej, taucuaca cuara saniniuujia quiarijia naacuura casamijiuniucua Judiocuaca, nojori jiiitasano cumaneecata. ²⁸ Naacujitij pueyanaa, janiyari nojori jiyarosocoriquiano cumaneeca niqutionutaniya Jerusalén tiacajinia parta Pueyaso pueya jiiitianaani. Na nuhuaji, janiyari Espania jiyajiniara quianutaniya cutarani. Cua quiasacari, janiyari nia tiacajinia tacanutaniyani cua niquniuria nijaniya. ²⁹ Janiyari seetanujuanaa niishiyani, Cristoori cua naacunutaniya maninia pa shuquiriniuria jatiqui, niaacua cua tiuquishacari.

³⁰ Cuarta Pueyaso pueyanaa, cua Jiyaniijia Jesucristo nia jiiitanuu-cuajuhuj, mariyata Pueyaso Sohanu panitiootesacari pajaniya, janiyari jiyanhua paniyani nia cojiniuria janiya, Pueyaso nia secojonuta cucuara. ³¹ Cucuara nia secojore Pueyaso, na cojuanura janiya Jesucristo rupaa paraa Judiocuacaacuaji, Jerusalén tiacajinia cua quiasacari. Naajuhuj, nia secojore Pueyaso, Jerusalén tiacajinia quiniaa Pueyaso pueyacuara. Nojoriicuara nia secojore, nojori masenura shuquiriaatia narta Pueyaso pueya taucuaca jiyarosocoriquiano cumaneeca nojoriria. ³² Naajuhuj, quiria nia secojore, niaacua Pueyaso tiuquitiniuria shuquiriaatia janiya, nojuaja jaara naa paniri. Tii cua quishacari niaata, janiyacua tii samaatesee nia shuriucuan. ³³ Pa jiyanoojia Pueyaso cuara maninia jiiitiaara puetunu nijaniyajanaa. Cuara naa quiiriatej.

16

Nata quiniaata Pablo saruhuatasacari nojori niishishano pueya

¹ Cuarta Pueyaso pueyanaa, nio maaji niaacua tiuquiniutaniyani, nojuajaari maninia maaji, Pueyaso tojjijia. Na sesaari Febe. Nojuajaari Cencrea tiacajinia Pueyaso pueya maanu naacujua maninia. ² Pa Jiyaniijia panijiaca nia quishacari, nia paniniutia nia masuure nia tiacora nio parta Pueyaso muerasu naacuna maaji. Niocua nia tiaco jiiitiarenoj, taa nia jiiitiaquiaacuaa parta Pueyaso muerasuni, maninia na quiniuria na camueenujusacari nia tiacajinia. Nojuaja nia naacure maninia, puetunu na panishanotajanaa. Nojuajaari queraatia parta Pueyaso pueya naacujuacuua. Cua naacujuajaariuhuj.

³ Quiria nia saruhuatare Priscila, neyaca Aquilanio. Nojoriiri cua cojiniaa pa Jiyaniijia Jesucristora poonijionura. ⁴ Nojoriiri tama nojori cuaqueyajaaja panitiaquiaari cucuara, nojori tacunura cucuaji cua moyaquishaanura. Janiyari cunora jiyanhua nojori timitiaani, naa nojori jiyanootiuniucua cucuatej. Majaari saa janiyaja nojori cua timitianu. Seetanujuanaa puetunu parta Pueyaso muerasu taucuacajinijiniojuanaari nojori timitiaajuhuj, naa nojori miiniucua. ⁵ Quiria

nia sarhuatatejuhua parta Pueyaso pueya, noo pojori Priscila, Aquila tiajinia rerejoquiaa Pueyaso secojonuunuratej. Quiria nia sarhuatatejuhua cua rupuenta Epéneto. Nojuajaari coteenujuanaa Jesucristoocua tiuuquiaari Asia jiyajinia. ⁶ María nia sarhuatatejuhua quiriajuhuaj. Nojuajaari jiyanoehua poonijioquiaari niaara. ⁷ Quiria nia sarhuatatejuhua Andrónico, Juniasnio. Nojoriiri cuarta Judiocuaca. Nojoriiri cuata nujuatejosaaquiaari nujuatejojuajinia, canaa pohuatanuucua Jesucristojiniji. Puetunu cuarta Jesucristo jiyaramiquishano pueyajanaari nojori panijiacajuhua. Andrónico, Junias, nojoriiri socua coteenu janiyajiniji tiuuquiaari Jesucristoocua.

⁸ Nia sarhuatatejuhua Ampliato. Nojuajaari cua panishano pueyano, Jesucristoocua na tiuuniuucua. ⁹ Naajuhua, quiria nia sarhuatate Urbano. Nojuajaari pa Jiyaniijia Cristora poonijionajuhua. Cua rupuenta Estaquis nia sarhuatatejuhua. ¹⁰ Apeles nia sarhuatate quiriajuhuaj. Nojuajaari puetunu casaajanaa rejeretaja cutara, Jesucristoocua tiujia na quiniuucua. Aristóbulo tiajinia quiniaa pueya nia sarhuatate quiriajuhuaj. ¹¹ Naajuhua, quiria nia sarhuatate Herodión, parta Judio pueyano. Naajuhua, Narciso tiajinia quiniaa pueya nia sarhuatate quiria, noo pojori pa Jiyaniijiaacua tiuujiaca pueyatej. ¹² Trifena nia sarhuatate quiria, Trifosajuhua. Cuno maajipohuari pa Jiyaniijia poonijionuujuaca. Naajuhua, pa panishano maaji Pérsida nia sarhuatate quiria. Nojuajaari jiyanoehua poonijiojua pa Jiyaniijia. ¹³ Rufo nia sarhuatatejuhua. Nojuajaari maninia tojijia pa Jiyaniijia. Na nucua nia sarhuatatejuhua. Nojuajaari juhua cua nucua quiquiaari quiria. ¹⁴ Nio pojori quiria nia sarhuatatejuhua, Asíncrito, Flegonte, Hermes, Patrobas, Hermasnio, mariyata nojoritia quiniaa parta Pueyaso pueyano. ¹⁵ Naajuhua, nio pojori nia sarhuatate quiria, Filólogo, necocua Julianio, Nereo, na rimiatunio, Olimpasjuhuaj, mariyata nojoritia quiniaa parta Pueyaso muerasunio.

¹⁶ Niarta Pueyaso pueya nia sarhuatate seetanujuanaa nia paniniutia nojori. Puetunu niiquijinio parta Pueyaso pueya maapuejanaari cua sequecanuni cua sarhuatanura niajaniya.

¹⁷ Cuarta Pueyaso pueyanaa, nia numooteyanijia, jiyanoehua nia cojuare tama nia cuaqueyajaaja najuhuaana tamaatia niishitiojonuujuaca pueyacuaji. Nojoriiri Pueyaso pueya maapue cushitiojoquiaa, sesa nojori niishitiojosanota. Naacuajitij, Pueyaso pueyari juaatioquiaa. Majaari nojori niishitiojonu pueya taa coteenujuanaa nia niishitiojosaaquiaari seetanu rupaajanaa cutarani. Naa sesa niishitiojonuujuacaacuaji nia rupertere. ¹⁸ Nojoriiri maja seetanujuanaa na poonijionu pa Jiyaniijia Jesucristora. Nojoriiri poonijioquiaa tama nojori panishanojuaaja nojori masenura. Najuhuaana shanohua nojori pohuatasanota, nojoriiri niishiyashijia pueya sapojoquiaa. ¹⁹ Puetunu tamonu jiyacajinijinio parta Pueyaso pueyajanaari niishiya, niaari seetanujuanaa Jesucristo rupaa tojtiajaca cutara. Naaratej, janiyari jiyanoehua nia timitiaani. Naajuhua, janiyari paniyani niishijia nia quiniuria, saaja seetanu rupaajanaa tojijia nia quiniuria, maninia miijia nia quiniurijuhua. Saniniuuja, sesa niishitiojosano niishiyashijia nia quitiriquiani, maja sesa miijia nia quiniuria. ²⁰ Naacuajitij, poojia cajitijia Pueyasoori nia cumaquiniutianiya, Satanás nia shocotanura na sapojosacari niajaniya juucua. Niaari juhua na tanacunutianiya

jiyocuara, Pueyaso tojjiaca nia quiniucua. Pa Jiyaniijia Jesu cuaara nia cumaquiiria, shuquiriaatia nia quiniuria.

²¹ Timoteo, cuata poonijiona Jesucristorani, nojuajaari cua sequeya nera cua saruhuatanura nijaniya. Cuarta Judiocuaca Lucio, Jasón, Sosípater, nojoriiri nia saruhuataajuhujaj.

²² Cuarta Pueyaso pueyanaa, janiyari Tercioni. Janiyari Pablora nio naajiyani, niaacua jiyarosocoriquiano. Janiyari nia saruhuataajaani-uhuj Cristoocua tiujia cua quishacarijihuaj. Niojuanaa, pueyanaa.

²³ Parta Pueyaso pueyano Gayoori nia saruhuataajuhujaj. Nojuajaari na tiajinia cua quiniuria cua masuucanu. Nojuajaari puetunu parta Pueyaso pueyajanaa masuujua, na tiajinia nojori maquenura, nojori tiuquijiosacari nio tiacajinia. Parta Pueyaso pueyano Erastoori nia saruhuataajuhujaj. Nojuajaari jiyatesaacanu nio tiacajinia jiyaniijia cumaneeca cojuana na quiniuria. Parta Pueyaso pueyano Cuartoori nia saruhuataajuhujaj.

²⁴ Pa Jiyaniijia Jesucristo cuaara cumaquiiria puetunu nijaniyajanaa.

Pablo maniniuhuaqueetasacari Pueyaso, quera na tucuatasaacari na naajio

²⁵ ¡Pueyanaa, jiyanoehua pa maniniuhuaqueetare pa Pueyaso! Nojuajaari na naata cumaquiniu nijaniya, seetanujuanaa na muerasu nia quiniuria na rupaacua nia tiuushacari. Janiyari naa rootaquiaa nijaniyacujani, cua pohuatasacari Jesucristojiniji. Pueyasojuanaacuajaari tarijia cua niishitiquiaari Neyanu Jesucristojiniji cua pohuatanura. Jiya shipiniyaquishaacarijijojua, Pueyasoori jiyasohua tamajaaja na niishishano jiiitaja Neyanu Jesucristojiniji. ²⁶ Saniniuujia, quiari naataja, paari niishiquiaarini, Jesucristocuajaari mijiria niqiaari puetunu pueyajanaa na jaariuutianura Sesaaca. Tariucuacaanu Pueyaso sequesano caminiujiuniaa naajionuutasanojiniji paari quiarijia seetanujuanaa na niishiya cutarani. Pueyaracaanu Quijia Pueyasocuajaari naa paniquiaari quiarijia pa niishiniuria Neyanujiniji. Quiarijiani, Pueyasoori Neyanujiniji pohuataniquiaa puetunu jiyacajinijinio pueya niquiarajanaa, Neyanuucua nojori tiuuniuria. Naa na pohuataniquiaariiri Neyanu Jesu tojjiaca nojori quiniuria, Judiocuaca, taucuacanio.

²⁷ Pa Pueyasoori jiyanoehua niishijia cutara. ¡Pueyaracaanu pa maniniuhuaqueetare nojuaja, maninia na miiniucua pajaniya, Neyanu Jesucristoocua pa tiuushacari! Cuaara naa shuquiritiasaaria pueyaracaanutej.

COTEENU PABLO NAAJIONEE CORINTO TIACAJINIA QUINIAA PUEYASO PUEYACUARA

Pablo saruhuatasacari Corinto pueya

¹⁻² Corinto tiacajinia quiniaa Pueyaso muerasunaa, ¿niaate quiyajaa? Janiya, pa tarajanu Sóstenesjuhuaj, canaari nia saruhuataani. Janiya Pablóni, Jesucristo jiyarosano na rupaa cua pohuatanura taa Pueyaso paniquiaaricujani. Canaa niaacuara naajiyani, socua canaa niishitiojonura niajanía, Pueyaso saquiriojosano pueya nia quiniuucua. Niaari maninia quíya Pueyaso níquiara, Jesucristo nia rupuesacari. Niaari seetanujuanaa Pueyaso muerasu, puetunu jiyacajinia pueyatajanaa, canapute Jesucristoocua tiuujiacacuajani. Jesucristocuajaari nojori Jiyaniijia, pa Jiyaniijiajuhuaj. ³ Pa Que Pueyaso, pa Jiyaniijia Jesucristo cuaara cumaquiiria niajanía, juhuajaniya nia quiniuria.

Paari maninia miishaaquiaani Cristo pa rupuesacari

⁴ Maninia nia quiniuucua, janiyari pueyaracaanu Pueyaso sequequiaani “Paacarasho”. Pueyasocuajaari jiyano hua maninia miiquiaari niajanía, nia rupuesacari Jesucristo. ⁵ Nia rupuesacari Jesucristo, Pueyasoori puetunu cumaquiiaarijianaa niajanía na cumaacata, nia poojotanura puetunu na rupaajanaa, puetunu na rupaajanaa nia niishiniuríajuhua. ⁶ Maninia nia tojitiasacari Cristojiníji pohuatasano, niaari maninia miishaaquiaari taa canaa sequequiaari niajaníyacujani. ⁷ Naacuajitij, niaari tari masequiaari puetunu Pueyaso níquitíonu panishanojuanaa, maninia na muerasu nia quiniuria, nocua nia jiaatianuta nia sashishacari pa Jiyaniijia Jesucristo tiuquishacariuhua. ⁸ Pueyasoori nia cumaquiniutianía pueyaracaanu, maja quenaaja niaacua casaa tiuutiasoo quiniuria, sesa nia miishanojiníji. Naacuajitij, pa Jiyaniijia Jesucristo jaara tiuquiríohua na ruuretajaca na saniitíonura, niaa cutaraari juhuajaniya quiniutianía. ⁹ Pueyasocuajaari maninia tohuateequiaa na sequesano. Nojuacuajaari pa sequequiaari pa cojiniuria Neyanu, maninia pa miishaanura Neyanutajuhua. Cuno Neyanuni, nojuacuajaari pa Jiyaniijia Jesucristo.

Pueyaso muerasu juhua tamasaca níquitíooquiaari

¹⁰ Cuarta Jesuucua tiuuniaanaa, cua tojitiare. Pa Jiyaniijia Jesucristoori cua sequeteya nio. Maninia nia niishiríojore. Maja juhua tamasaca nia níquitíoonu. Maja tamasaca niajanía. Maninia nia niishiríojore, maja tamaatia. Nia jiuujiaatioorejuhua. ¹¹ Naa nia sequeyaníjia cuarta Jesuucua tiuuniaanaa, Cloe níquiuhua pohuatanuucua janiya niajaníyajiníji. Nojoriiri cua sequerucuaa niaana juayonuujutaquiaa. ¹² Naa pohuatasaarucuaa niajaníyajiníjijia: puetunu pueyajanaana tama sequequiaajaaja: “Canaari Pablo pueyani”. Tamasacanaari saníniuujia sequequiaacuaja: “Canaari Apolo pueyani”. Tamasacanaari sequequiaajaacuhua: “Canaari Pedro pueyani”. Tamasacanaari sequequiaajuhua: “Canaari Cristo pueyani”. ¿Naatee pueyanaa? ¿Casaara tamajaaja naa nia raquíitíiquianuni? ¹³ ¿Majateeri nia niishíniu? Paari Jesucristo cuaqueyani. ¿Pa Jiyaniijia

cuaqueyateeri neequeresetanocuaa? ¿Janiyateeri niaacuara cusoquiaari niyacutesanojiniani, cua pueya na quiniuria? ¿Niaateeri cua sesajinia tiuquinijosaaquiaari moojiniajuhuaj? ¡Maja, cuarta Pueyaso pueyanaa! ¹⁴Janiyaquiiri namitia nia tiuquinijiyacuiquiaari moojiniani. Naacuajitij, majaari nia naata sequenu niaa cua sesajinia tiuquinijosaaquiaari. Janiyari niishiya cutarani, janiyari saaja Crispo tiuquiniquiaarini, Gayonio. ¹⁵Naacuajitij, majaari quenaaja tamonu na naata sequenu janiyari na tiuquiniquiaarini. ¹⁶Quera niyajetaanijia. Janiyari Estéfanas tiuquinijioquiaarijuhua necohuatajani. Majaruhua socua pueya cua tiuquinijionu quiquiaari.

¹⁷Jesucristoori maja na jiyaronu quiquiaari janiya pueya cua tiuquinijionura. Cristo cutaraari cua jiyaroquiaari na rupaa cua pohuata-nura. Majaari cua maniniushitiniu na rupaa cua pohuatasacari, pueya mariqui shanohua cua pohuatasanoocua tiuuri najuhuanaari. Cuaara tiuutiuria cutara Jesucristoocua, na miiniuucua maninia pocuara. Pueyasoori pa jiyanoocua saaja Jesucristo cusuucua niyacutesano-jinia pocuara.

Cristoori Pueyaso cumaaca jiiitaa, Pueyaso niishitiajajuhua

¹⁸Canaa pohuatasano Cristo cusunujiniji niyacutesanojinia pocuarani, cunoori juhua mosanucua pohuatasano shaajecoriquiano pueyara. Naajaa, Jesucristo rupaari Pueyaso cumaacaracacua na tojitianaara, Pueyaso muerasura na jataniniuria pajaniya. ¹⁹Pueyaso sequesanoocuaaari naa naajiotasaaquiaaritij:

“Janiyari niishijiaa niishishano cushitionutaniyani. Mijiria pueya niishishano jiyatenutaniya najuhuanaranijia”.

Naacuajitij, cante mijiria pueya niishishanoocua tiuyani, nojuajaari maja na jiyanooshaanu quiniutianiya.

²⁰¿Pueyanoteeri jiyanoohua niishitiajaraca Pueyaso muerasura na jataniniuria pajaniya? ¡Maja! Niishijiajanaa jaara jiyanoohua niishiriojore, ¿pa naatate na sequesanoocua tiuuniu, Pueyaso na jiyanootiniuria pajaniya? Maja. ¿Niishitiojona rootasanote na naata Pueyaso pueyara jiyatenu pajaniya nocua pa tiuushacari? Maja. Naacuajitij, puetunu mijiria niishishanojuanaari najuhuana quiya Pueyasora. ²¹Pueyari maja na naata Pueyaso niishiniu quiquiaari tama nojori niishitiajataaja. Pueyasoori tama sequequiaarijaa na niishitiajata cutara:

“Jaaja. Maninia naatej. Pueya jiyanooriiria saaja nojori tiuushacari cua Niyanuucua”.

Pueyari saniniuujia jiyaniya Jesucristo rupaari nareja sequesanojuhuanajaj, tojishoo. ²²⁻²³Naaratej, cuarta Judiocuacaari maja Jesucristoocua tiuuniaara na quiniu ritia. Nojoriiri Pueyaso cumaacata miishano niquiniu paniquiaa coteenu saaja. Cunora, nojoriiri canaa tojitiaaquiquiaa canaa pohuatasacari Jesucristo mosaanujiniji niyacutesanojinia teetesano. Nojoriiri saaja sequequiaa: “¿Pa Jiyaniijaranotucua casaara naa cararaatia mosaareni?” Griego pueyari naajuhua. Majaari ritia nojori quiniu paniniu Jesucristoocua tiuuniaara. Nojoriiri saaja niishiniuucua jiaatiajaca. Nojoriiri jiyaniya Jesucristoori najuhuana cusoquiaari juhua moseca. Naacuajitij, canaa pohuatasacari Jesucristo niyacutesanojinia mosaaquiaari, Judiocuacaari jiyaniya Jesucristoori cumaacaaju quiquiaari. Nojoriiri jiyaniyajuhuaj Pueyaso Jiyarosocoriquianoori ritia Judiocuaca jiyaniijia quiniutianiya cutara.

Majaari na niishitiuniu quijia Cristo cuaara coteenu miishaaria naquiya, jiyanooshano nojori quiniuria sesa nojori miijosanojiniji. Griego pueyari canaa pohuatasano tojiyaquiquiaajuhuaaj. Nojoriiri jiyaniya Pueyasoori niishiyashijia quiquiaari na motenura. ²⁴ Paa cutaraari niishiyani Cristoori pocuara cusoquiaari. Naacujitij, Pueyasoori cumaacaraca cutara na saquiriojosano pueya na jaariutianura Sesaaca, na muerasura na jataniniuria pajaniya, Judiocuaca, Griego-huano. ¡Pueyasoori jiyanoohua niishijia cutara! ²⁵ Pueyari jiyaniya Pueyasoori niishiyashijia quiquiaari. Cunora Neyanu cusojuaquiaari niyacutesanojiniaari. Naajaa, naacujiti Pueyasoori pa jiyanooquiaari. Pueyasoori jiyanoohua socua niishijia cutara mijiria niishijiacajiniji. Pueyari jiyaniyajuhuaaj, Pueyasoori cumueecaaju quiquiaari Cristo cusosacari niyacutesanojinia. Naajaa, naacujitij, ¡Cristoori Sesaaca shocotaquiaaricuaaja! Pueyasoori jiyanoohua socua cumueeca pajaniyajiniji.

²⁶ Cuarta Jesuucua tiunianaana, niaacuajaari niishiya taamueca pueya nia quiquiaari pueya niqiiarani, Pueyaso sequesacari niajaniya na muerasu nia quiniuria. Saaja secaja niajaniyajinijinioori niishijia quiriqiaa. Saaja secaja niajaniyajinijinioori tojishano pueya quiriqiaaajuhuaaj. Saaja secaja niajaniyajinijinioori jiyaniijianucua niqiuoacuajinio supueno quiriqiaa. ²⁷ Mijiria quiniaa pueyara, Pueyasoori socua niishiyashijia pueya saquiriojoquiaari, na muerasu nojori quiniuria. Naacujitij, mijiria niishijiaaari tamajaaja caririqiniutianiya nojori jaara saquiriojiyaquishaare. Pueyasoori tojishoo pueya saquiriojoquiaarijuhuaaj, na muerasu nojori quiniuria, mijiria tojishano pueya caririqiniuria nojori jaara saquiriojiyaquishaare. ²⁸ Pueyasoori soosano pueya saquiriojoquiaarijuhuaaj, tojishoo pueyano.

Pueyasoori naa saquiriojoquiaari najuhuaana quijiaa. Canapute tama na cuaqueyajaaja jiyaniya cutara pueyanoni, cuno pojoriiri saniniuujia quejooaanutaniya. ²⁹ Naacujitij, majaari quenaaja jiyanoohua pocuaja cureenu quiniutianiya Pueyaso niqiiara. Tojetaarucujanaa shaaquiiri pocuajaca quiniutianiya. ³⁰ Pueyasojunaacuajaari nia rupuetequiaari Jesucristo. Naacujitij, niaari Pueyaso niishitaja jiiitiaa. Nia rupuesacari Jesucristo, niaari maninia miijia quiya Pueyasora. Pueyasoori nia jataniya saa na tojijiacaraja nia quiniuria, juhua Neyanu nia quiniuriajuhuaaj. Niajaniyari puetunu jecasaanutaniyajanaa. Paari naa miishiyani Jesucristo pa rupuesacari. ³¹ Seetanujanaari nio sequesano tariucuaaanu Pueyaso Rupaajiniji:

“Cante shuquiriaatia quiniu paniyani, nojuaja cuaara shuquiritiaara pa Jiyaniijia”.

2

Jesucristo mosaanujiniji pohuatasano

¹ Cuarta Jesuucua tiuniana pueyanaa, janiya jaara niaacua tiuquiquiaarini, niaacuajaari niishiya taa cua pohuataquiaari Pueyasojiniji Jesucristo rupaa niajaniyani. Majaari jiyajeneta cua pohuatanu quiquiaari niishijia niishishano rupaacata. Cua pohuatasanoori niishishaatia quiquiaarijia, maja juhua cutara pueyano pohuatasano. Janiyari jacaria pohuataquiaari Pueyaso rupaa niajaniyani. ² Janiyari tari tama sequequiaarijiaanijia: “Janiyari

saaja Jesucristojiniji pohuatanu paniya Corinto pueya niquiarani, naajuhuj, taa na cusoquiaari pocuara niyacutesanojiniani”.³ Cua pohuatasacari Jesucristo rupaa nia niquiara, janiyari sasaca quiriquiaa cua puerenutani. Janiyari tetecariquiaani.⁴ Majaari cua paniniu quiquiaari cua tiutiniuria nijaniya Jesucristoocua tama cua niishitijatajaaja. Naaratej, majaari cua pohuatasano quiniu quiquiaari juhua shanohua pahuataja sequesano. Naacuajitij, cua pohuatasacari Jesucristo rupaa nia niquiara, Pueyaso Sohuanu cutaraari nioojiacajinia poonijioquiaari Pueyaso cumaacata cutara.⁵ Naacuajitij, niaari Jesucristoocua tiuquiaari Pueyaso cumaaca miishacari maninia nioojiajinia. Maja cutaraari nia tiuuniu quiquiaari saaja pueya niishishanoocua.

Pueyaso Sohuanucuajaari pa niishitiya Pueyaso

⁶ Naajaa, canapuate Pueyasoocua tiuujia seetanujuanaa cutarani, nojoriiri niishiya canaa pohuatasano Jesucristojinijiiri seetanu niishishanojuanaa cutara. Nio niishishanoori maja saa pueya niishishanojua. Maja mijiria jiyaniijianucua niishishano. Mijiria niishijiacaari shaajecanutaniya. Nojori niishishanoori najuhuana quiniutianiya.⁷ Canaa pohuatasano cutaraari Pueyaso niishishano tarijia, jiya shipinishaacar-ijiyojua. Pueyasoori jiyacari niishiriojoquiaari jiyanohua maninia na miiniuria pajaniya, shuquiriaatia pa quiniuria pueyaracaanu pa Jiyani-ijia Jesucristo shuriucua. Nio rupaari maja pueya niishishano tari. Pueyasoori maja nio na niishitionu quiquiaari pueya tari.⁸ Mijiria jiyaniijianucuaari nio niishiyaquiaari. Nojori jaara na niishiquiaari tarijia, nojori maara pa Jiyaniijia moyaquiquiaari niyacutesanojinia. ¡Na Shipinia motuquiaarijiaari, pueyaracaanu shacantuca quijia! ⁹ Naa naajiotasano quiyacuajaari tariucuaanu Pueyaso Rupaajinia:

“Pueyasoori jiyasohuaja casaa jeenucuasano jiiitaa na panijica pueyara. Cunoori maja pueya niquishano quenaaja. Majaari cunojiniji nojori tojishano quenaajuhuj. Majaari quenaaja pueya niishiriojonu quiquiaari jiyano casaate na naata quiniu nojoriria”.

Quiarijiani, canaari saniniuujia pueya niquiara na pahuataani.¹⁰ Pueyasocujaari quiarjia canaa niishitiquiaari canaa jiuujiajinia na miiniu panishano pajaniyara. Canaa niishitiquiaariiri na Sohuanuta. Na Sohuanuuri puetunu Pueyaso niishiriojosanojuanaa noojiajinia niishiya.¹¹ ¿Cante pueyano niishiriojosano noojiajinia niishiya?

¿Majate saa na camaru sohuanujua niishiniu? Taaquiriirinij. Naajuhuj, saaja Pueyaso Sohuanuuri Pueyaso niishiriojosano noojiajinia niishiya.

¹² Naaratej, Pueyasoori na Sohuanu niquitioquiaari pajaniya, pa niishiniuria Pueyaso niishishano. Naacuajitij, majaari pa jitianu saaja tama pa sohuanujuaaja Pueyaso niishishano pa niishiniuria. Paa cutaraari Pueyaso Sohuanuracajaniuhuj. Naacuajitij, Pueyaso Sohuanu cumaquishacari pajaniya, pa naata puetunu Pueyaso niquitiosano pajaniyarajanaa niishiniu. ¡Jiyanohua capora Pueyaso!

¹³ Naacuajitij, canaa pohuatasanoori maja saaja mijiria pueya niishishano. Pueyaso Sohuanujuanaari canaa niishitiojoquiaari Pueyaso rupaa canaa niishiniuria canaa jiuujiajinia. Naacuajitij, canaa naata Pueyaso Sohuanu jiiitanaa niishitiojonu seetanu

Pueyaso rupaajanaa, mariyata taa Pueyaso Sohuanu niishitiojoquiaa canaacuaani.

¹⁴ Mijiria quiniaa pueyari Pueyaso Sohuanu niishitiojosano niishiniu paniyaquiquiaa. Nojoriiri saaja juhua tama mijiria niishiriojosanojuaaja na jiyatequiaa. Seetanujuanaa, nojoriiri maja na naata na niishiniu. Saa Pueyaso Sohuanutaja pa naata Pueyaso Sohuanu niishitiojosano niishiniu. ¹⁵ Cante Pueyaso Sohuanu jiiitiaani, nojuajaari na naata puetunu niishishanojuanaa saniniuuniu. Saniniuujia, tamasaca pueyari maja na naata Pueyaso Sohuanu jiiitiana miishano niishiniu nocuara na rimiaaquenura. ¹⁶ Tariucuacaanu Pueyaso Rupaajinia naa naajiotasaaquiaarijiuhuj:

“¿Cante pa Jiyaniijia jiuujiajina na niishiriojosano niishiyani, socua na niishitiojonura nojuajani? Shaaqui”.

Paa cutaraari Jesucristo niishishano niishiyani Pueyaso Sohuanuraca pa quishacari. Naacuajitij, majaari pa niishiniu saa mijiria pueya niishishanojua.

3

Pueyasora poonijionaa pueya cuaara poonijionuuriquia nojori panitioonuta

¹ Cuarta Jesucua tiuuniaanaa, cua quishacari niaata, majaari cua naata jiyajeneta Pueyaso niishishano cua niishitiojonu quiquiaari niajaniya. Niaari quera juhua Pueyaso Sohuanuuju quiriquiaajaa. Niaari juhua Cristo conaaja quiriquiaajaa, maja Pueyaso tojjiaa seetanujuanaa. Nocuaji, janiyari nia niishitiojoriquiaa jacariani, juhua Pueyaso niishiyashijiaa pueya nia quishacarijia. ² Cua niishitiojosano niajaniryari niishishaatia quiquiaarijia, maja jiyajeneta. Majaari cua naata Pueyaso cutara niishishano cua pohuatanu quiquiaari niajaniya. Cuno niishishanoori cumueeca Pueyaso pueyara, naatej, taa shu quiya tariucua puereetuuca pueyaracuaani. Juhua naatujoori nia quishacarijia, majaari nia naata na tojiniu quiquiaari. Juhuanujuajaari maja nia naata na tojiniu quiarijiani. ³ Niaari juhua Pueyaso Sohuanuuju quiyajaa, juhua Pueyaso niishiyashijiaa pueya. ¿Naatejaaratej? Niaana niarta Pueyaso muerasu shocotanu paniquiaa juucua. Niaanaari juayonuu-jutaquiaa. Naa nia quishacaritij, niaari juhua Pueyaso Sohuanuuju quiyajaa pueyaracaanu, juhua Pueyaso niishiyashijiaa pueya. ⁴ Niaana sequequiaa: “Canaari Pablo pueyani”. Tamasacanaari sequequiaa-juhuj: “Canaari Apolo pueyani”. Naacuajitij, puetunu niajanijajanaari saaja juhua Pueyaso niishiyashijiaa pueya quiyajaa.

⁵ Nia sequeretoj: ¿casaate Apoloni? ¿Casaate janiyani? Canaari nareja Pueyasora poonijionaajuhuanani. Canaari saa Pueyaso panishano miiquiaajaani, Jesucristo rupaa nia tojitianura. Canaari Jesucristo panishano miiquiaarini taa na sequequiaari canaa miiniuriacuajani.

⁶ Naacuajitij, janiyari Pueyaso rupaa nia pohuataquiaarini, naatej, taa casaa jajau pueyano natojojoquiaacuaani. Apoloori saniniuujia socua Pueyaso rupaa nia niishitiojoquiaari na cumaquiniuria niajaniya, naatej, taa pueyano na natau shiijioya mohuacatacuaani, maninia na maashiniuria. Pueyaso cutaraari na rupaa maashitiquiaari nioojiacajinia, na muerasu nia quiniuria cutara. ⁷ Naaratej, ¿casaateeri canaani; Apolo, janiyano? Canaari Pueyasora poonijionaa narejani. Saa Pueyasojua cutaraari cumaacaraca. Saaja nojuaja cutara na naata pa tojitiiniu

na rupaa, seetanujuanaa na muerasu pa quiniuria. ⁸ Naacujitij, paari niishiyani, cante natoojonani, cante mohuaca shiijiotanani, canaari mariyata saaja Pueyaso poonitijiosanoni. Pueyasocuaajaari canaa niq-
 uitionutaniya na jiiiasano, nera canaa poonijionuucua. Cante socua
 poonijioreeni, Pueyasoori socua na jiiiasanojiniji na niqutionutaniya
 taajecori pueyajiniji. ⁹ Canaari mariyata Pueyasora poonijionaani. Ni-
 aari juhua Pueyaso nataacuaca nera. Niaari na muerasu cutara, maja
 canaa muerasu. Naajuhua, Pueyasoori juhua nia tiaa saitia, na quiquio-
 rano. Saitia tiasacari, sairi coteenu cumaatia niojoshiya na morijiuria,
 maja tia matanura. ¹⁰ Pueyaso jaara jiyaroquiaari janiya, janiyari
 Jesucristo rupaa pohuatanu coteequiaari maninia niajaniyani, Pueyaso
 muerasu nia quiniuria nia tiuushacari cua pohuatasanoocua. Naacua-
 jitij, janiyari juhua Pueyaso tiara shipininiu coteequiaarini. Cua niishi-
 tiojosano niajaniyani, cunoori juhua morijii nujuatejosano quiquiaari.
 Cua nuhuaji, tamasaacari nia niishitiojoriquiaa socua Jesucristo rupaa,
 juhua Pueyaso tia tucuatasaanura. Nojori cuaara niishiiria maninia,
 maninia nojori niishitiojonura niajaniya, juhua maninia tiasano nia
 quiniuria.

¹¹ Majaari socua tamonu rupaa quiniu nocua pa tiuuniuria Pueyaso
 pueya pa quiniuria. Saaja Jesucristo rupaa cutaraari pa jatanijia
 Pueyaso pueya pa quiniuria. Janiyacuajaari na rupaa pohuataquiaari
 niajaniyani. Saa na rupaacuaja nia tiuushacari, niocua maninia
 quiri, juhua maninia morijiuacuaacua tiasano tia, maja na matanura.
¹²⁻¹³ Cante socua Jesucristo rupaa niishitiojiya niajaniyani, cuno cuaara
 niishitiojora jiyanoohua maninia. Cuaara niyajetaaquiiria cutara, no-
 juajaari na niishitiojosanojiniji nequesoreesanutaniya Jesucristo mue-
 tasacarihua pocua, pa miishano na saniniuujuniuria juhua manitia.
 Puetunu niishishaanutaniyajanaari taa canaa niishitiojoriquiaa Jesu-
 cristo rupaani, maninia, sesa soj. Pa naata sequenu, canaa niishitio-
 josanoori juhua pueyano tiasano. Pueya jaara tiare orota, platatanio,
 shanohua saitiano, maniiri maja na naata na catijianu. Cante sanini-
 uujia tiare macacatani, tucurutajuhua, turequenacotanio, cunoori
 taraatia quiniutianiya na tia jaara sanishaare catijianu. Naaratej, pa
 niishiriojore, ¿pa rootasanote seetanujuanaa maninia? ¹⁴ Tamonu jaara
 maninia miiija quiquiaari Pueyaso cumaacata, na miishanoori maja
 najuhuana quiniutianiya Pueyasora. Pueyasoori cuno pueyano niq-
 uitionutaniya na jiiiasanojiniji. Cuno pueyanoori niishijia quiquiaari,
 juhua maninia tiana pueyano. Maninia casaata tiaquiaariiri, maja na
 tia catenura jaara sanishaare senu. ¹⁵ Cante saniniuujia tiaquiaari cateja
 casaatani, na tiasanoori catenutaniya. Puetunu na jiiiasanojuanaari ju-
 urequenutaniya. Saaja nojuajaari Sesaaca jaariutiasaanutaniya juhua
 manijiniji jaashano. Naa miishaanutaniyari Jesuucua tiuunaa, cana-
 pueete maninia miyashijia quiquiaari mijiriani. Nojuajaari jatarinitiaja
 Sesaaca jaariutiasaanutaniya, juhua manijiniji jaashano.

¹⁶ ¿Majateeri nia niishiniu pueyanaa? Niaacuajaari Pueyaso quiquio,
 juhua na tia. Na Sohuanuuri nioojiacajinia quijia. ¹⁷ Tamonu jaara
 Pueyaso quiquio sesore, Pueyasoori cuno pueyano saniitionutaniya
 saniniuujia. Puetunu Pueyaso muerasujuanaari juhua na tia quiya.
 Pueyaso quiquio cuaara quiiria tojetaarucujanaa maninia, saa neraja,
 maja raquiriojotasano. Niaacuajaari na quiquio.

¹⁸ Tama nia cuaqueyajaaja nia cojuare tamonu mariqui nia sapojoreeri. Cante tama na cuaqueyajaaja jiyaniya niishijiani, nojuaja naasucuaari niishijia saaja Pueyaso niishiyashijia niquiara. Cuno pueyano cuara jataara cuno na niishishano juhua niishiyashijia na quiniuria narta pueya niquiara. Na nuhuaji, cuara maseera Pueyaso niishitiaja, seetanu niishijia na quiniurijanaa. ¹⁹ Mijiria pueya niishishanoori juhua paateca sequesano Pueyasora. Tariucuacaanu Pueyaso Rupaajinia naa naajiotasanoori quiya:

“Pueyasoori mijiria quiniaa pueya cushiriquitianiutianiya, tama nojori niishitiushanoocujaaja nojori tiushacari najuhuanaj”.

²⁰ Naa naajiotasanoori quiyajuhuj:

“Pueyasocujaari mijiria niishijia niishiriojosano niishiya. Naa sequesari: ‘Najuhuaari cuno pojori niishiriojonuusano’ ”.

²¹ Naaratej, maja shuquiriaatia nia quiniu saaja niquiriyatu Pueyaso rupaa pohuatana nia tojishacari. Pueyasoori tamasaca pueya jiyaramiquiquiaa nia cumaquiniurijuhuj, maja saa niquiriyatu niishitiojonaja. Puetunu casaajanaari niaara, maninia nia quiniuria. Naaratej, majaari saa niquiriyatu pueyanocuja nia jiatianu. ²² Pueyasoori canaa jiyaramiquiquiaari canaa cumaquiniuria nijaniya. Naacuajitij, janiya, Apolo, Pedro, canaari niaara quiyani, maninia canaa miiniuria nijaniya Pueyaso rupaata. Nio jiyari niaara quiyajuhuj. Pueyaso shipinishanocujaari niaara. Naajuhuj, mijiria nia quishacari, cunoori niaara quiya, socua maninia quijira nia quiniuhua. Taa nia miishiya quarijiacuajani, taa nia miishaanutaniyani, puetunu cunojuanaari niaara, cumueca Pueyaso muerasu nia quiniuria. Nia shaajesacariiri maninia quiniutianiya niaarajuhuj. Pueyasoori nia shaajeteya na shuriucua nia quianura. Naacuajitij, puetunu casaajanaari niaara quiya. ²³ Nijaniyari Cristora quiya saniniuujia. Cristoori saniniuujia Pueyasora quiyacujua.

4

Jesucristo jiyaramiquishano poonijosano

¹ Naaratej pueyanaa, nijaniya cuara niishiiria canaari saaja Jesucristo seyani. Canaari maja cutara pueyani. Pueyasoori canaa jiyatequiaari na rupaa canaa niishitiojonura nijaniya, Pueyaso niishitiojosano canaa. Cunoori tarijia pa niishishoo. ² Cante Pueyaso niishitiaja jitiaani, cuno cuara quiiria seetanujanaa Pueyaso miiniu panishano panijia, na rupaa na pohuatanura puetunu maninijanaa. ³ Nijaniya, tamasaca pueyajuhuj jaara sequenu paniya taamueca pohuatanate janiyani, quiria, naajaa. Mijiria nequesoreena jaara cua nequesoreere cua niishitiojonujiniji, naajaa. ¿Janiyate sesa niishitiojoquiaani? Johuaj. Maja cua niishiniu. ⁴ Janiya jaara sesa miiriquiaa cua Jiyaniijira cua poonijosacarini, majaari cua niishiniu. Majaari coojia macuhua-jenu quijia. Naajaa, maja cua naata tama cua cuaqueyajaaja sequenu janiya cutara maniniani. Saa cua Jiyaniijia na naata sequenu taa cua quiquiaarini. ⁵ Naaratej, maja nia rimiaaquenu tamonuucua, Jesucristo tiuquiyaquishacariuhua pocua. Nia sashiri. Pa Jiyaniijia jaara tiuquirohua, puetunu jiyasohua pa miishanojuanaari niishishaanutaniya. Niishishaanutaniyajaariuhuj casaara pa miiquiaari puetunu

queni. Nia tojtiasacari Jesucristo rupaa cua pohuatasacari niajaniya, niaari Pueyaso muerasura quiquiaari. ¹⁶ Juhua nia que cua quishacari, nia nacasureenijia pueyanaa. Naate taa maninia muerasu na queecua jiaatiaacuaani, naa cucua nia jiaatiarejuhuaj, juhua janiya nia quiniurijahuaj.

¹⁷ Naaratej, janiyari niaacua jiyaroya cua panishano Timoteoni. Nojuajaari juhua cua niyanura quiquiaari na tojishacari Jesucristo rupaa. Timoteori pa Jiyaniijia Jesucristo tojiquiaa maninia. Nojuajaari nia niishitiojonutaniuha taa cua niishitiojoquiaacuaa puetunu Pueyaso maapuejanaa puetunu jiyacajiniajanaacuaani. Naa nia rootanutaniyari nia niishiniuhua maninia cua niishitiojosano niajaniya tarijia. Nojuajaari nia pohuatanutaniyajuhaaj taa quijia cua quiyani cua tojishacari pa Jiyaniijia Jesucristo, naa maninia nia miiniurijahuaj.

¹⁸ Noojiaqueya niajanijajiniioori shuquiriaatia quiya, juhua jiyaniijianucua nojori jiyatesacari tama na cuaqueyajaaja. Nojoriiri naa miiriqui nojori jiyaniishacari maja naasucuaari cua tacatenu quiniutianihua, cua niquiniuhua niajaniya socua. ¹⁹ Janiyacuajaari niaacua naquerejiya tarini, cua Jiyaniijia Jesucristo jaara paniri niaacua cua quianura. Cua tiuquishacari niaacua, janiyari cuno niishijiaca pueya saniniujiunianiyani, cua niishiniuria casaate nojorini, maja naa sacaraatia nojori quiniuriatej. ¿Cumaacaracate nojori, saaja pocujajaca soj? ²⁰ ¿Canteeri seetanujuanaa Pueyaso pueyanoni? ¿Saaja pocujatej? ¡Maja pocujaja! Cante Pueyaso Sohuanu jiiitiaa na cumaquiriquiano Jesucristo na tojiniuriani, cunoori seetanujuanaa Pueyaso pueyano cutara. ²¹ Nia niishiriojore, cuarta Jesuucua tiunianaana. ¿Taa nia paniya cua miiniuria niajaniya cua quiasacari niaacuani? ¿Niaateeri paniya cua sanitionura niajaniya, jacaria cua niishitiojonura niajaniya cua paniniutia soj? ¿Taa nia paniyani?

5

Na que niquiocuata quijijajiniji pohuatasano

¹ Nijaniyajiniji pohuatasaarucuaa taraatianijia. Tamonu niajanijajiniijionaaari jyanohua sesa miya. ¡Na que niquiocuata quiyaquinaaari! ¡Pueyanaa, cuno miishanoori socua jyanohua cararaatia Pueyaso niishiyashijiaca miishanojiniji! Pueyaso niishiyashijiaca pueyani, maajaari quenaaja nojori naa sesa miiniu niishiniutij. ² Naa cuno pueyano miishacari sesa nia tajinatej, ¿niaateeri saaja juhuajaniya cuniqui na jiiitiaruhua? ¡Niaa cuaara na tacaatiaara! Cuno sesa miijia cuaara taanuusaaria nia tajiniji, maja na cojiniuria socua niajaniya nia rerejosacari. ³ Cua tojiri taa pa miiniutianiyani. Janiyari maja cua quiniu niaata. Naajaa, coojiaari niaata quiya cua niishiriojosacari niajaniya. Naacuajitij, janiyari juhua nia tajinia quiyani. Naacuajitij, janiyari tari cuno sesa miijia saniniujiurini. ⁴⁻⁵ Naaratej pueyanaa, cua tojitiare. Nia rerejore cuno sesa miijia nia tarinitianura Sesaacara. Coojiaari niaata quiniutianiya naa nia miishacari pa Jiyaniijia Jesucristo cumaquishacari niajaniya. Naacuajitij, Sesaacaari naquiya na miiniutianiya; na cusojuanura naasucua, maja soj. Naajaa, na cuaqueyari naa naquiya miishaanutaniya noojia na tacatonuhua, Pueyaso tojijara na quiniuhua. Naacuajitij, pa Jiyaniijia Jesucristo muetasacariuhua

pocua, nojuajaari samiitianishaanutaniuhajuhua puetunu Pueyaso muerasutajanaa.

⁶ Cuarta Jesuucua tiuuniaanaa, ¿taate nia naata shuquiriaatia quiniu tamajaajani, naa sesa miijia quishacari nia tajiniatej? ¿Majateeri nia niishiniu? ¡Niaa jaara cojiya sesa miijia saniniujiushoojua, socua pueyari mariyata naa sesa miiniutianiyaquij! Sesa miijia niishishanoori tamasacaacua paaquenutaniya. Niaacuajaari niishiya, shiitianiyojua pan poreeteja jaara niasaare cashojuajinia, ritia poreeteja puetunu cashojua miniquiootasanojuanaari. Naajuhuj, sesa miijia jaara sequeyaquishaare na miishano, sesa na miishanoori socua paaquenu-taniya.

⁷ Tariija, Pueyasoori pa supuetanaa Judiocuaca rootaquiaari puetunu na pan poreetejajanaa nojori jatanura puetunu marijarajanaa. Nojoriiri naa rootasaaquiaari saaja poreetesoo pan nojori miaquenura siete juuca, shuquiriaatia nojori quiniuria Pueyaso niquiara. Pueyasoori naa nojori niishitiojoquiaari miriqitij, nojori cartenura puetunu sesa nojori miitiushanojuanaa, nojori rupuenura Pueyaso. Naajuhuj quiarijiani, nia taanuure cuno sesa miijia nia tajiniji, seetanujuanaa sesa miyashijiaca nia quiniuria Pueyaso niquiara. Pueyaso jiyanooniuria pajaniya, Cristoori tari mosaaquiaari pocuara, taa borregohua puecoosaaquiaari Pascua juucacuaani. Tariucuacaanuuri naa miishano quijia, Pueyaso jiyanooniuria pa supuetanaa Judiocuaca, sesa nojori miishanojiniji. ⁸ Naa Pueyaso pa cojishacari quiarijiatej, tojetaarucujajanaa sesa miyashijiaca pa quirij, shuquiriaatia pa quiniuria pa Jiyanoonia niquiara. Pueyaso pueya maanu pa cojuare puetunu maninijajanaa, maja sesa miijiacata cojitishano. Seetanujuanaa maninia pa quiri puetunu pajaniyajanaa.

⁹ Pueyanaa, janiyari tari niaacuara naajiocanuni cua sequenura nianianiya, maja nia cojiniuria sesoriquia pueya, cuno pojori canapuate na camishoo maaji numuetucuquiaani. ¹⁰ Naa cua sequesacari nianianiyatej, majaari cua sequenu nia rupueyaquiniuria puetunu sesoriquia pueya sequejanaa mijiria. Saa nia shaajesacarijia cutara nia naata puetunu sesoriquia pueyacuajijianaa rupertenu. Nio jiyacua, pueyari naa sesa miijiacua quiya: nojoriiri sesa miiquiaa tama na niishiriojosantotajaaja. Nojoriiri tama nerajaaja paniquiaa socua casami pueyaraacaanu. Nojoriiri nohuasenuquiaa. Nojoriiri tama na panishanoocuaajaaja jiaatiaquiaa puera, maja Pueyasoocua. ¹¹ Cua tojitiare casaa cua sequecanu tari nianianiyani. Cante tama na cuaqueyajaaja sequejani: “Janiya Pueyaso muerasuni”, maja cunota nia cojitianu, cuno jaara na camishoo maaji numuetucuquiaa. Naajuhuj, majaari nia cojiniu nooj cante casamiriacara quiniucua jiaatiaquiaani. Majaari nia cojiniu nooj cante tama na panishanoocuaajaaja jiaatiaquiaaaniuhuj, maja Pueyasoocua. Majaari nia cojiniu narta pueya sesacaja. Majaari nia cojiniu mashaasequejojua. Majaari nia cojiniu nooj, cante tamonu casami nohuasejoquiaa na sapojonutani. Janiyacuajaari tari naa nia sequecanuni maja jiyano pueyata nia cojitianura. Majaari jiyano pueyanota nia miaquenu quenaaja. ¹²⁻¹³ Naa cua sequesacari nianianiyatej, majaari cua sequenu quiriquiaa tamasaca pueyajiniji, canapuetucaja maja Pueyaso muerasuni. ¿Paate nojori nequesoreenaani? Maja. Pueyasocuaajaari nojori saniniujiuniutianiya. Pajaniya cumaati parta

Pueyaso pueya saniniujuquiaani, nojori jaara sesa miiriquia. Naaratej, nia jatare cuno sesa miijia nia tajiniji, noo cante sacuaraatia na que niquiocuata quiyacuajani.

6

Sesa miijia cuaara nequesoreesaaria narta Pueyaso muerasu niquiara

¹ ¿Seetanutejanaa naa niajaniyajiniji pueya pohuatasanojuhuaj? Niarta Jesuucua tiunua jaara sesa miiri niajaniya, niaanaari Pueyaso niishiyashijiaca nequesoreena tonujuquiaa nocuara. ¿Casaara tamajaaja niarta Pueyaso muerasu niquiara nia jecatoyaquiquiaani? ² ¿Niaate niishiyaquiya, Pueyaso muerasuuri Pueyaso niishiyashijiaca nequesoreeriquianocuaja, Pueyaso saniniujiushacari nojori? Pueyaso jaara naa nia nequesoreetenutaniya na ruuretajaca, ¿majate nia naata quiar-ijia niarta Pueyaso muerasu nequesoreenu tamajaaja, nojori jaara sesa miiri shiitianiyojua? ³ ¿Majate nia niishiniujuhuaj, paari Pueyaso seya nequesoreeriquianojuhuaj? Pueyaso jaara pa nequesoreetenutaniya na seya na tojiyashijiaca, ¿majate quiarijia nia naata maninia nequesoreenu niarta Pueyaso muerasu mijiria? ⁴ Naa jaara nia tapueyocuacaacuara tonujunu paniya sesa na miishacari, ¿niaateeri Pueyaso ruuretajaca tonujunutaniya nojoriicuara? ¡Maja maninia naatej! Cuno pojoriiri maja Pueyaso muerasu jiitianaa. ⁵ Naa nia sequeyanijia cua cararonura que-naaja niajaniya, cua niishiriojotenura niajaniyajuhuaaj. ¿Seetanujuanaa tojetaarucuajanaa shaaquiti niishijia niajaniyajinijinio, cante na naata nia tonujutoosacari nequesoreenu niajaniya maniniani? ¡Quiya jiyotucuaaajari! ⁶ Niajaniyanaari tama niarta Jesuucua tiunuaacuarajaaja tonujutoojoquiaa Pueyaso niishiyashijiaca nequesoreena niquiara. Naa nia miishacaritij, ¡niaari sesa miiquiaa pueyanaa!

⁷ Niaari jiyanojua jiyajeneya nia juayonuujutasacari. Naa jaara sesa miishaare, niaa cuaara jiyanojootoora saniniuuja, nia casami jaara nohuasesaarejuhuaj. ⁸ Niajaniyarijiataj, ¡niaari saaja sesa miiquiaacujua! ¡Niaanaari niarta Pueyaso muerasu miiquiaa sesa! Niaanaari tama niarta Jesuucua tiunuaajaaja nohuasejoquiaa, sesa miijia nia quiniuucua.

⁹⁻¹⁰ Maja tama nia cuaqueyajaaja nia sapojonu, pueyanaa. ¿Niaateeri niishiyaquiya Pueyasoori maja na rijionu quiniutianiya sesa miijia na shuriucua nojori quiniuria? Jiyano pueyari puetunu quejoosaanutaniyanaa. Quejoosaanutaniyari noo pojori canapuate na camishoo maajipohua numuetucujuquiaani, naajuhuaaj, noo pojori, canapuate tama na panishanoocuajaaja jiaatiaquiaani, maja Pueyasoo-ua. Quejoosaanutaniyajaariuhua noo pojori, canapuate narta pueyano niquiocua numuetucujujuani, naajuhuaaj, canapuate maajishuriutia quijia juhua maajitiani. Nohuasenuujuacaari quejoosaanutaniyajuhuaaj, noo pojorijuhuaaj canapuate pueyaracaanu socua casami paniquiaa tama nerajaajani. Mashaasequenujuacaari puetunu quejoosaanutaniyajuhuaaj, tamasaca sesacajacanio, tamasacaacuara rimi-aaquejacajuhuaaj. Naa quejoosaanutaniyajaariuhua noo pojori, canapuate nohuasejoquiaa na sapojonutani. Puetunu jiyano pueyajanaari maja Pueyaso muerasu na quiniu quiniutianiya, Pueyasota nojori quiniuria shuquiriaatia pueyaracaanu. ¹¹ Noojiaqueya niajaniyajinijinoori

jiyano sesa miijiaca pueya quiquiaari tarijia. Na nuhuaji, sesa nia miishanoori jeequesaaquiaari Jesucristoocua nia tiuushacari. Pueyaso Sohuanuuri nioojiajinia tiuquiquiaari, Pueyaso na tojitiniuria niajaniya. Naacuajitij, nia rupuesacari Jesucristo, Pueyasoori nia jiyanooquiaari. Nia sequereeri: “Niaari saa maniniaja quiya cua niqiuara”.

Pa cuaqueya cuaara quiiria saa Pueyasoraja

¹² Queraatia pueyari sequequiaa: “Pueyaso jiyanooshacari pajaniya, paari tarinitiasaaree puetunu pa miiniu panishanojuanaa pa miiniuriani”. Seetanujuanaa naacuj. Saniniuujia, majaari puetunu pa miiniu panishanojuanaa maninia na quiniu pajaniyara. Seetanujuaanaa cua naata miiniu puetunu cua miiniu panishanojuanaa. Naajaa, maja cutaraari cua miiniu puetunu cua miiniu panishanojuanaa, janiya mariqui puera nocua jiyartuureeri. Naa pa jiyartuusacaritij, na nuhuaji majaari pa naata pa jiiitishano casaa pa tarinitianu. ¹³ Pueyari sequequiaa: “Pueyasoori miaquesano shipiniquiaari pa seecora. Pa seeco shipiniquiaari sumatuucuaaji saniniuujia, shuquiriaatia pa quiniuria”. Seetanujuanaari cuno sequesano. Naajaa, majaari nio pa niyajetanu, na nuhuaji, Pueyasoori na shaajanutaniya puetunujuanaa. ¿Pa cuaqueyariuhuaaj? ¿Pueyasoteeri pa cuaqueya shipiniquiaari pa numuetucunura pa camishoo maajipohua? ¡Maja! Pa cuaqueya cutaraari shipinishaaquiaari pa Jiyaniijiaara, na panishano pa miiniuria. Naajuhuaaj, pa Jiyaniijiaari pa cuaqueyara quiyacujua, na cumaquiniuria pajaniya, maninia pa quiniuria pueyaracaanu. ¹⁴ Naajuhuaaj, taa Pueyaso samitiani quiaaricuaa pa Jiyaniijia Jesu na cuaqueyatani, nojuajaari macujiniji naa pa samiitianiniutianiuhua na cumaacatajuhuaaj.

¹⁵ ¿Niaateeri niishiyaquiyajuhuaaj, Pueyaso Sohuanu quiniuucua poojiajinia, pa cuaqueyari seetanujuanaa pa Jiyaniijia cuaqueya quiya? Naaratej, Jesucristo cuaqueya pa quishacari, maja cumaati pa curushojonu pa cuaqueya, maaji paanatu pa numuetucunuta. ¡Cunoori jiyanoohua sesa! ¹⁶ Pueyasocuaajaari coteenujuanaa na shipinishano pueyano sequequiaari:

“Quia camishacari maaji, niaari niquiriyatu cuaqueyara quiniutianiya”. ¿Niaateeri nio niishiyaquiya, cante paanatu numuetucureeni, Pueyasora, nojoriiri niquiriyatu cuaqueyaracara quiquii? ¹⁷ Naajuhuaaj, paa jaara Jesucristo rupuereni, pa sohuanuuri rupuetooree na Sohuanuta, niquiriyatu sohuanuraca pa quiniuria Jesucristota.

¹⁸ Naaratej, nioojia nia tacatore maja nia numuetucunura tamasaca, cante quia camishoo maajini. Puetunu tamaatia sesa pa miishanojuanaani, cunoori maja pa cuaqueya sesojua. Saniniuujia, cante na camishoo maajipohua numuetucujuani, nojuaja cutaraari tama na cuaqueyajaaja sesoya. ¹⁹⁻²⁰ ¿Majateeri nia niishiniu, nia cuaqueyari Pueyaso Sohuanu quiquio? Pueyasoori na Sohuanu jiyaroquiaari poojiajinia na quiniuria. Pueyasoori nia masequiaari tama nerajaaja nia quiniuria. ¡Jiyanoohua naquiya na miiniutia nia masereeri Neyanu na motesacari pocuara! Naacuajitij, Pueyasoori quiarijia pa camarnu quiya. Naaratej, quiarijia maja pa quiniu tama pa cuaqueya camarujaaja. Naaratej, pa shuquiritiri pa Pueyaso pa cuaqueyata, pa sohuanutajuhuaaj. Nojuacuajaari pa cuaqueya camaru, pa sohuanu camarujuhuaaj.

7

Pablo rootasano pa caminiuria, camiojua pa quiniuria soj

¹ Quiarijiani pueyanaa, cucuara nia naajiosanojinia nia nequeso-tasano riucuareraj. Cante niquiriyatu quiniu paniya tamajaajani, cuno pueyanoori maninia miya, maaji na camiyaquishacari. ² Saniniuujia, quiarijiani, pueyari puera sesa miiniu niishiquiaa. Nocuaji pueya cuaara camiiria. Maajipohua cuaara camiirijuhuj. ³ Pueyano jaara camiri, necocua cuaara na cuaqueya jamueyaquiiria neyaca numuetucunu panishacari. Naajuhuj, neyaca cuaara na cuaqueya jamueyaquiiria necocua panishacari na numuetucusaanura. ⁴ Necocuaari maja tari tama na cuaqueya camarujuaaja na quiniu. Neyacaari na cuaqueya camaru cutara. Naajuhuj, neyacaari maja tama na cuaqueya camarujuaaja na quiniujihuj. Necocuaari neyaca cuaqueya camaru cutara. ⁵ Naacuajiti maajipohuanaa, maja nia niyacaacuaji nia jamuenu nia cuaqueya, na panishacari numuetucunu niajaniya. Naajuhua niajaniya canuunaa, maja nia niquiocua nia tarijonu na panishacari na numuetucusaanura. Saniniuujia, jiyanojua Pueyaso nia secojonu panishacari, jiyacari cutara nia naata tarinitianu numuetucunu rupaquiija, Pueyaso nia secojonura, niaa jaara mariyata naa miiniu paniri. Na nuhuaji cutara, nia numuetucurohua nia niquiocua, Sesaaca mariqui sesa nia miitiriiri tamonu maaji nia paniniuria, nia camueenujacari puera. ⁶ Nioori quiarijia maja niara Pueyaso rootasano janiya. Janiyari nareja naa sequeya niajaniyani socua panaatia nia quiniuria. ⁷ Naaratej, nia jiyateriquiani taa cua quiyacuaani, niquiocuaaju. Naajaa, Pueyasoori puetunu pa cumaquiiaajanaa tamaatia pa quiniuria, taa Pueyaso paniyacuajani. Camishoo, camishano soj, naajaa. Taa pa quiyani, paari shuquiriaatia quiquiaa Pueyaso cumaquishacari pajaniyani.

⁸ Camiojua pueyanaa, mashiquiopuena, cua tojitiare: niaa jaara juhuajaniya quiya taa camiojua cua quiyacuaani, niaari maninia quiniutianiya. ⁹ Cante saniniuujia maja na naata tama na cuaqueya panishanojuaaja rejetenu maninia tamajaajani, cuno cuaara camiiria. Socua maninia cutaraari nia caminiuria, maja maajicua nia jiaatianura pueyaracaanu. ¹⁰ Camiyono pueyanaa, nio nia tojitiare cutara. Nioori pa Jiyaniijia Jesucristo sequesano cutara, maja saa cua sequesanojua. Maajipohuanaa, maja nia cartenu nia niyaca. ¹¹ Cante neyaca carteyani, nojori cuaara jiyanojooora, na rupuetoonuhua. Jaara maja na naata jiyanojooonu, cuaara quiiria tamajaaja pueyaracaanu. Cuaara camiyaquiiria socua. Canuunaa, pa Jiyaniijia Jesucristo sequesanoori mariyata niaarajuhuj. Naa sequeyari: "Maja nia cartenu nia niquiocua".

¹² Quiarijiani, socua nia niishitiojoreeraj. Nioori tama cua niishitiojosanojuaaja, maja niara Jesucristo rootasano. Pueyano jaara Pueyaso tojiyashijia niquiocaraca quiri, cuaara jiitiaara maninianoj. Quia niquiocua jaara quiata quiniu panijajaa, majaari na cartenu. ¹³ Naajuhuj, maaji jaara Pueyaso tojiyashijia niyacaraca quiri, cuaara maninia jiitiaara neyaca. Majaari na cartenu, quia niyaca jaara quiata quiniu panirijia. ¹⁴ Cuarta Pueyaso muerasunaa, Pueyaso tojiyashijia pueya nia jiyanoori, nojori jaara Jesuucua tiunuaata caminio quiya. Nojoriiri seetanujuaanaa maja Pueyaso muerasu. Naajaa, necocuaari Pueyaso pueyano quiya cutara. Naaratej, niajaniya cuaara neyaca

jiyanooria necocua quiniuucua niarta Pueyaso pueyano. Nareja nia niquirinioj, niaata na rerejonu panishacari. Naajuhuj, nia jiyanoori niarta Pueyaso pueyano niquiocua, naajaa, Jesuucua tiuyashijia na quishacarijia. Naa Pueyaso pueyano neyaca quishacarij, necocua cuaara nareja niquishaariajuhuaj, na rerejosacari niaata. Naajuhuj, maja rimiajata nia niquiniu necohua. Necohuari maniniacuaja Pueyasora, maja juhua tama maaji muetusanojuuaja. ¹⁵⁻¹⁶ Pueyaso muerasunaa, canuu, maajipohuanio, Pueyaso tojiyashijia jaara nia cartenu paniri, nia tarinitiare. Pueyaso tojiyashijia cartesacari niajaniya, niaari juhua camishoo quiriohua. Majaari socua nia tojiniu coteenu nia niyaca, coteenu nia niquiocuanio. ¡Maja cutaraari nia cartenunoj! Nia niishiriojore pueyanaa, nia niquiocua jaara Pueyaso tojiyashijia quiri, ¿nia naatate na tojitiniu Pueyaso rupaa, Pueyaso muerasu na quiniuria, jaara quiata quiyajaa? Maja pa niishiniu. Naajuhuj, maja niishishano quia naatate quia niyaca quia tojitiniu Pueyaso rupaa. Naaratej, maja nia cartenu Pueyaso tojiyashijia. Nareja carteshiya cutaraari tama na panishacarijiaaja na cartenura quiajaniya. Naatej, Pueyasoori paniquiaa juhuajaniya pa quiniuria, camishano, cartesano soj.

¹⁷ Cuarta Jesuucua tiuuniaanaa, taa nia quiquiaari Pueyaso sequesacari niajaniya na muerasu nia quiniuriacuajani, naajaa, naa nia quiri Pueyasora. Janiyari naa nia sequeyani, taa cua rootaquiaacuaja puetunu Pueyaso pueya maapuerajanaani. Taa nia quiquiaarini, naajuhuj casaate quia poonijosano quiquiaarini, cunocuajaari Pueyaso panishano quiquiaari niaara. ¹⁸ Naacuajitij, cante tarijia na cararaatiuquia co mialesano quiquiaari Judio pueyano na quiniuriani, naajaa, cuno pueyano cuaara naa quiiria pueyaracaanutej, Jesucristoocua na tiuushacari quiarijia. Naajuhuj, cante mialesoo quiquiaari Pueyaso sequesacari na pueyano na quiniuriani, cuno cuaara quiiria naajuhuj. ¹⁹ Cante Judio pueyano na quiniuria mialesaaquiaarini, naajaa. Cante mialesoo quiyani, naajaa. Saaja maninia cutaraari pa tojtianura Pueyaso niishitiojosano pajaniya. ²⁰ Naarate nia sequeyanijia, nia quiri taa nia quiquiaaricuajani shushajanaa Pueyaso sequesacari na muerasu nia quiniuria. ²¹ Cante poonitijiotasusano pueyano quiquiaari Pueyaso sequesacari na muerasu nia quiniuriani, naajaa, maja nia niishiriojonu nocua. Juhujaniya nia poonijiore saaja. Saniniuujia, jaara nia naata quiriquia cartesano pueyano nia camarnujiniji, maniniacuajaari. ²² Cante poonitijiotasusano pueyano quiquiaari Pueyaso sequesacari niajaniya na muerasu nia quiniuriani, naajaa, niaari seetanujuanaa cartesano pueya quiya pa Jiyanijia. Naajuhuj, cante camarnuju quijia quiquiaari Pueyaso sequeyaquishacarijia na muerasu nia quiniuriani, quiarijiani, niaari pa Jiyanijia poonitijosano pueya quiya cutara. ²³ Pueyasoori jiyanoohua naquiya miiquiaari na cusojuasacari Neyanuniyojua, na masenura niajaniya, na muerasu nia quiniuria. Nia masequiaariiri tama nerajaaja nia quiniuria. Naaratej, majaari juhua tamonu camarnu poonitijosano nia quiniu socua. Quiarijia saa Pueyasoraja nia quiri maninia. ²⁴ Naaratej cuarta Pueyaso muerasunaa, taa nia quiquiaari tarijia Pueyaso muerasu nia quiyaquishacarijiani, naa nia quiri quiarijia Pueyaso cumaquishacari pueyaracaanu niajaniya.

²⁵ Quiarijia nia sequereera cua niishiriojosano, taa camishoo pueya miiniutianiyani. Nioori maja pa Jiyanijia rootasano janiya. Majaari na

sequenu quiquiaari cunojiniji. Naajaa, pa Jiyaniijaari cucua tiuuquiaa na sequenu panishano cua caminiujiuniuria nijaniya, na Sohanu cumaquishacari janiya. ²⁶ Naacuaajitij, naa nia sequeyanija: niaacua-jaari niishiya, quiarijiani, jiyanohua puereeta quishacari. Nocuaji nijaniya cuaara quiiria taa nia quiyacujani. ²⁷ Cante niquiocuaracani, maja nia paniniu na cartenu. Cante niquiocuaaju quiyani, majaari nia niquiocuaaniu paniniu. ²⁸ Naajaa, mashaja jaara camiri, cunoori maja sesa. Naajuhuj, niyaco jaara camiri, majaari sesa na miishano. Saniniuujia, camishano pueyari socua taraatia miishaanutaniya camishoo pueyajiniji, puereeta quishacari quiniuucua mijiria quiarijiani. Majaari cua paniniu taraatia nia miishaanura. Nocuaji janiyari naa nia niishitiojiyani puera sesa quishacari quiniuucua quiarijiani.

²⁹ Cuarta Pueyaso muerasunaa, nijaniya cuaara niishiiria nio jiyari puequenutaniya. Majaari mijiria pa quiniu quiniutianiya pueyara-caanu. ¿Taariquitijia mijiria pa tarishiniutianiya socuatejaj? Maja pa niishiniu. Majaruhua puera pa tarishiniu quiniutianiya. Naaratej mijiria pa quishacarijia, jiyanohua pa tojitiare pa Jiyaniija. Naacuaajitij, cante niquiocuaraca quiyani, majaari nocua nia niishiriojonu puera. ³⁰ Cante na shaajasanoocua sapueyani, naajaa, majaari nia tarinitianu Pueyasora nia poonijionu. Cante queranacuyani, naajaa, Pueyasora pa poonijiorejuhuj. Cante casami niquitiojojua quiquiaani, naajaa, maja casamiicua nia niishiriojonu puera. Socua nia niishiriojore cutara Pueyasocua. ³¹ Canapuate niishijiacani, queraatia casami na masejonura mijiriani, nojori cuaara niishiiria maja casami panijiacanojori quiniuria puera. Nio jiyari tari puequeya puetunu pa niqishano casaatajanaa. Naaratej, maja casamiicua nia niishiriojonu. Saaja Pueyaso nia tojiri cutara.

³² Janiyari paniyani mijiria casaacua tacayashijiacua nia quiniuria. Pueyaso nia tojitiare juhujaniya cutara. Camishoo pueyano na naata saaja pa Jiyaniijaacua niishiriojonu na tojiniuria maninia, pa Jiyaniija na shuquiritiniuria. ³³ Cante niquiocuaraca saniniunijia, nojuajaari niishiriojoquiaa mijiria casaacua, necocua na shuquiritiniuria. ³⁴ Naacuaajitij, noojia niquijioteyari. Naajuhuj, camishoo maa-jiiri pa Jiyaniijaacua niishiriojoquiaa maninia, tama na cuaqueya na cojuasacarijaaja Jesucristora, nera na poonijionura puetunu noojiatjanaa. Saniniuujia, cante niyacaraca quiyani, nojuajaari mijiria casaacua niishiriojoquiaa neyaca na shuquiritiniuria. Naacuaajitij, majaari puera jeya na quiniu Pueyaso panishano na miiniuria.

³⁵ Janiyari naa nia sequeyani socua shuquiriaatia nia quiniuria. Maja cua taajetenu paniniu nijaniya puera cua rootasanota. Janiyari nareja naa nia niishitiojiyani, maninia nia quiniuria, pa Jiyaniija nia tojitianura maninia. Niaa jaara cua niishitiojosano tojiri, nia naata pa Jiyaniija tojinu maninia. Naacuaajitij, niaari nioojia niquijioteyaquiniutianiya.

³⁶ Pueyano jaara naa niishiriojore: “Majaari maninia cua miiniu cua jamuesacari cua niyatu pueyaracaanu na camiyaquiniuria”, cuno pueyano cuaara miiria taa na miiniu paniyacuajani. Camishocoriguiano maaraja, cuaara camitioora. Quia niyatu jaara camiri, majaari sesa. ³⁷ Cante saniniuujia maja noojia niquijioteyaquiya na niishiriojosacari neyatuucuanu, cunoori maninia miiniutianiya

na camitiyaquishacari, jaara na naata neyatu cojuanu maninia. ³⁸ Naacujitij, cante neyatu camitiriini, maninia miyari. Cante neyatu camitiyaquiyajaaniuhuaaj, nojuajaari socua maninia miya. Naacujitij, cuno neyatuuuri na naata Pueyaso panishano miiniu socua, camishoo na quishacari.

³⁹ Camishano maaji cuaara carteyaquiiria neyaca, saminio neyaca quishacarijia. Pueyasoori naa sequequiaaritij. Neyaca jaara cusoyare, na mashiquioori maja tari na quiniu juhua camishano. Na panishacari, cuaara camiiria cana na caminiu paniyacuajani. Jaara caminiu paniri, cuaara camiiria Pueyasocua tiuujia pueyanota cutara. ⁴⁰ Naajaa, mashiquio jaara camiyaquiriohua, socua shuquiriaatia quiniutianiyari, Pueyaso panishano na miiniuria. Janiyari naa niishiriojiyani pueyanaa. Pueyaso Sohuanu naasucuaari cua sequeteree nio.

8

¿Maninate cuno shu pa miaquenura, seya jaara puecoosano quiri nareja shipinishano casaacuara, juhua Pueyasocuarajanaa?

¹ Cuarta Jesuucua tiuunias pueyanaa, janiya quiarjia nia niishitiojonutaniyani teyano pa miaquesanojinijiti puereshiyani. Pueyaso niishiyashijiaaari na miaquesocoriquiano seya puecoonu niishijia shipinishano casaacuara juhua Pueyasocuara. Pueyari nequesotaquiaa, ¿maninate cuno shu, Pueyaso muerasu miaquesocoriquianojuhuaaj, cuno seru jaara taucuaca jyanishano cumaacaraca quijiaacuara mosano quiri? ¡Janiya cutaraari maja cua miaquenunoj! Nia pohuatareera casaara cua miaqueyaquiquiaanoj. Cua tojitiare. Paacuajaari niishiyani cuno shipinishano casaari nareja pueyano shipinishano najuhanaj, nojori jyanitiushano na pueyasoni. Naa pa niishishacari, paari maninia niishijiani. Naajaa, maja cutaraari maninia pa niishiriojonu paa jaara nocuara puecoosano miaqueriquiani. Naa niishijiaari shuquiriaatia quiya tamajaaja. Saniniuujia, majaari na niishiriojonu narta Pueyaso pueyanoocua. Cante narta pueya paniquiaani, cunoori narta pueyacuua niishiriojoquiaa cutara, nojori jiuujia na cumaquiniuria maninia. Jiyano pueyanoori cumueeca Pueyaso pueyano quiniutianiya. ² Naacujitij, cante tama na cuaqueyajaaja jyaniya niishijiani, cunoori juhuanajuaja maja niishijia seetanujuanaa. ³ Cante Pueyaso panijia saniniunijia, cunoori narta Pueyaso muerasuucua niishiriojoquiaa. Cunoori Pueyaso panishano pueyano cutara. Seetanujuanaa niishijia cutaraari cuno.

⁴ Juhuanajuajaari maja cua riucuanu nia niishiniu panishano: “¿Maninatenaari cuno shu pa miaquenu, seru jaara pueya jyanishano pueyasocuara mosano quiri?” ¿Casaatejaara cuno nojori jyanishano pueyasoni? Paacuajaari niishiyani cuno shipinishano casaari maja saminio. Pueyano shipinishano casaari maja cumaacaraca quijia. Naaratej, nojori jyanishano pueyasoni, cunoori maja seetanujuanaa Pueyaso. Niquiriyatu Pueyasoori quiya cutara. Jiyocuacaanu Quijia. Maja socua tamonu quiniu juhua nojuaja. ⁵ Tamasaca pueyari jyaniya queraatia cumaacaraca quijiaaari quiya juhua Pueyaso, jija cajiniocua, mijiriano. Nojoriiri na jiyatequiaa nojori cojuanara, nojori cumaquiriquianojuhuaaj. ⁶ Naajaa, paari niishiyani saa niquiriyatu Pueyasojuaari quiya. Nojuacuajaari pa Que Pueyaso, pa shipinina.

Puetunu casaajanaa shipiniquiaariiri. Pa shipiniquiaariiri tama nerajaaja pa quiniuria. Niquiriyatujua Jiyaniijaari quiyajuhua. Cunoori pa Jiyaniija Jesucristo. Na Queeri na shipiniquiaari puetunu na shipinishanojuanaa. Pajaniyajuhua, paari rishiyani saaja na cumaquishacari pajaniya.

⁷ Noojiaqueya Pueyaso pueyari saniniuujia jiyaniyajaa taucuaca shipinijosano casaari seetanujuanaa cumaacaraca quijiaca juhua Pueyasojuhua. Nojoriiri najuhuaana sesa niishiriojonuujuaca. Jiyano pueya jaara Pueyaso muerasura quiri, juhuanajuaja maja na niishiniu maninia. Majaari tarijia na niishishano na tarinitianu juhuanajuaja. Naacuajitij, nojori jaara shu miaquere teyanote mosaaree nojori jyanishano cumaacaraca quijiaccuarani, nojori miaquenu nuhuaji, noojia niquijioteyari. Nojoriiri tama sequeyajaaja: “Janiya naasucuaari sesa miirii Pueyaso niquiarani!” Naacuajitij, nojoriiri noojia macuhujatequiaa. ⁸ Pueyanaa, paacuaajari niishiyani, casaa pa miaquequiaani, naajaa. Pa miaquesanoori maja na naata Pueyaso jyanootiniu pajaniya. Cante cuno shu miaqueyaquiquiaani, naajaa, majaari socua maninia pueyanora na quiniu Pueyasora. Naajuhua, cante na miaquequiaani, majaari socua sesa pueyanora na quiniujuhua. ⁹⁻¹¹ Niaacuajaari jyanohua tiuquiaa Pueyasoocua. Naacuajitij, niaa naasucuaari na naata juhuananiya tiuquiniu cuno shu miaquenura nojori jyanishano pueyaso quiquiojinia. Niaacuajaari niishiya, cuno, nojori sequesano pueyasoni, majaari seetanujuanaa Pueyaso cuno. Naacuajitij, nia naata nocuara mosano seru miaquenu juhuananiya. Saniniuujia, nia cajishacari cuno miaquenuujajinia, niarta Pueyaso pueyanoori nia niquiniutianiya na pueresano shu miaquenuyano. Na niquishacari nijaniya, tamajaaja sequenutaniyari: “Jaj! jNojoriqui cuno shu miaquenuyacuaa! Saniriirijataj”. Naa sequejatej, nojuajaari jiyaniyajaa cuno miaquesanoori mosaaree seetanujuanaa tamono cumaacaraca quijiaccuara. Naacuajitij, na sanishacariuhua cuno shu miaquenu, tamajaaja noojia macuhujanutaniyari. Naacuajitij, niaari niarta Pueyaso pueyano sesoya, na niquiara nia miaquesacari cuno shu. Na niquiniuucua nijaniya cuno shu miaquenuyano, nojuajaari cunora na miaquereehuhua. Saniniuujia, nojuajaari juhuanajuaja maja jyanohua Cristoocua tiuuniu na niishiniu. Cristo cutaraari nocuara cusoquiaari, sesa na miishanojiniji na jyanoooshaanura. Nijaniyari saniniuujia quiarijia na sesorohuacuhua nia niishishanota. Nocuaji janiyari nia sequeyani, maja socua nia miaquenu cuno shu, cuno shu miaqueyaquijia mariqui na pueresano shu miaquerohuariuhua, na rupesacari nijaniya. ¹² Nia miaquesacari, niaari na pueresano shu na miaqueteya. Naacuajitij, noojaari macuhujenutaniya. Naacuajitij, niaari sesa miya niarta Pueyaso pueyano. Niaari pa Jiyaniija Cristo miya sesajuhua, naa nia sesosacari tama na pueyanoujaaja. ¹³ ¿Taa nia sequeyani pueyanaa? ¿Maninate shu pa miaquenu, seya jaara taucuaca jyanishano pueyasoocua puecosano quiri? Janiya cutaraari maja socua cuno shu cua miaquenu quiniutianiya, cuarta Pueyaso pueyano mariqui sesereeri cua miishanojiniji. Saaja maninia miijacara nia jiyateriquiani, taa cua miiquiaa saaja maniacuaani.

Taa quijia Pablo quiquiaarini, Jesucristo jiyaramiquishano na quishacari

¹ Janiya jaara cuno shu miaquenu paniyani, cua naata miaquenu cua panishano. Naajuhuaaj cua naata puetunu cua panishanojuanaa miiniu taa cua Jiyaniijia sequequiaari na jiyaramiquishano pueyacuajani. Janiyacuajaari Jesucristo jiyaramiquishanojaaniuhuaaj. Seetanujuanaa cua namijjata Jesucristo niqiquiaarinijia. Nojuajaari cua jiyatequiaari na jiyaramiquishano cua quiniuria. Naajuhuaaj, cua pohuatasacari Jesucristojiniji nia niquiara, niaari na muerasura quiquiaari cua pohuatasanoocua nia tiuushacari. Naacuajitij niishishiyari janiyari Jesucristo jiyaramiquishanojaaniuhuaaj. ² Tamasaca jaara jiyaniya janiya maja Jesucristo jiyaramiquishanoni, naajaa. Niaacuajaari na niishiya. Niaacuajaari Jesuucua tiuquiaari nia tojishacari cua pohuatasano nojuajiniji. Naacuajitij, niaacuajaari niishiya janiyari Jesucristo jiyaramiquishanoni. Na jiyaramiquishano cua quiniucua, cua naata miiniujiuhuaaj taa cuarta Jesu jiyaramiquishano pueya miiquiaacuaani.

³ Tamonu jaara cua nequesoreere taa cua miiquiaani, janiyari saaja naa na riucuaquiaani: ⁴ “Pueyasoori sequequiaari, na jiyaramiquishano pueya cuaara niqutiosaaria na miaquesocoriquiano”. Naaratej, canaa jaara naa miiniu paniriquiani, canaa maara nia sequereni canaa nia niqutiojonura canaa panishano. Naajaa, majaari canaa masenu quiquiaa canaa panishano niajaniyajiniji, janiya, Bernabeenio. ⁵ Naajuhuaaj, canaa jaara niquiocuaraca quiriquiani, canaa maara canaa niquiocua rupojoriquia canaacuani, taa cuarta Jesucristo jiyaramiquishano pueya miiquiaacuaani. Pa Jiyaniijia Jesu tapueyocuaacari naa miiquiaajuhuaaj. Pedrojuanaari necocuata rucuanajoquiaajuhuaaj, Jesucristo rupaa na poojotasacari. Naajaa, majaari naa canaa miiniu quiquiaaquij. ⁶ Jesucristoori sequequiaarijuhuaaj: “Cua jiyaramiquishano pueya cuaara niqutiosaaria cumaneeca, na panishano nojori masetajara”. ¿Niaateeri jiyaniya cuno sequesano maja quiria, maja Bernabeerajuhuaaj? ¿Cunocuaajaari naa sequesaaquiaari canaarajuhuaaj! Naaratej, canaa jaara naa paniriquiani, canaa maara canaa panishano masere niajaniyajiniji, canaa niishitiojonuucua niajaniya. Naajaa, canaari tama canaa juaashiquiatajaaja poonijioquiaani, canaa panishano canaa masetajara.

⁷ ¿Soldadoteeri tamonu poonijosano jiitiaja, na miaquesano na masetajara? ¡Maja! Soldadohua jiyaniijaari na niqutiojua puetunu na miaquesanojuanaa. ¿Pueyanoteeri na cuhuariquia nataja najuhuanaj? ¡Maja! Na nuhuaji na natau mianutaniyari na poonijosanojiniji. ¿Majateeri seru juunu camaru ratunu na seru quitiaaca, jaara na paniri? ¡Taaquiriinij! Na ratuyacuaaquinatejaj. ¿Maatucua casaara najuhuaana seesaareerini? ¿Canaarijataj? Canaa jaara naa paniriquiani, canaa naata nia masenu canaa panishano niajaniyajiniji. Naajaa, majaari canaa mashiniquijionu quiquiaa quenaaja canaa panishano niajaniyajiniji. Canaari nareja poonijioquiaa tama canaa juaashiquiatajanijia, Jesucristo rupaa canaa pohuatasacari niajaniya.

⁸ Nio cua pohuatasano niajaniyani, majaari tama canaa niishiriojosanojuaaja. Nio niishitiojosanoori tariucuaaanu Pueyaso Rupaa naajiosanoinia quiyajuhuaaj, taa cua sequeriquiaacuajani. ⁹ Supuetana Moisés caminiujiushano Pueyasojinijiri naa naajiotasaaquiaaritij:

“Maja quia juunu rupaa quia seecutanu maja na miaquenura quia carojotasano, quiaa jaara na rapijioteya na coreetanura”.

¿Pueyasoteeri saa juyacaacua niishiriojoriquiaajaa naa na sequenuratej? ¡Maja! ¹⁰ Pueyasoori naa sequeriquiaaqui na niishitiojonura puetunu pajaniyajanaa. Naaratej, Pueyasora poonijionaani, na niishitiojosano pueya cuara nojori niqutiojoora na panishano. ¿Taa nia sequeyani? ¿Pueyanote shuquiriaatia cuhuataja na cuhuariquiara? Taaquiririnij. Na camaruuri niishiya na poonijosanojiniji mianutaniya na nuhuajiri. ¿Majateeri pueyano carojotanu shuquiriaatia na nataujuhua? Jaa. Niishiyacuajaari na mianutaniyari. ¹¹ Naajaa, niaata cua quishacari, canaari naa poonijoriquiaa Pueyasorani, nioojiaca canaa cumaquiniuria maninia. Naacuajitij, canaa cuara niqutiojosaaria saniniuuja canaa panishano. Naajaa, majaari canaa paniniu canaa panishano nia niqutionura canaa. ¹² Tamasaca pueya niishitiojosacari niajaniya, niaa cutaraari nojori niqutiojoquiaa nojori panishano. Canaari saniya coteenujanaa pohuataquiaari Jesucristo rupaa niajaniyani. ¿Majateeri coteenu canaa niqutiojaanu canaa panishanojuhua? Naajaa, majaari canaa masenu quijia nia casami. Niaata canaa quishacari, canaari sanaa poonijiojua tamajaajani, canaa masetajara canaa panishano. Canaa jiiitiaaquishacari canaa panishano, canaari sanaa rejeretaja saajani. Majaari canaa taajetenu paniniu quijia niajaniya, canaa jiiitiaaquishacari canaa panishano. Canaari naa miiquiaaritij, niaa mariqui Jesucristo rupaa tojiniu paniyaquiriiri canaa taajetesacari niajaniya, pueyaracaanu canaa mashiniquijosacari canaa panishano niajaniyajiniji.

¹³ Niaacuajaari niishiyajuhua, Jerusalén tiacajinia Pueyaso Secojua tiajinia, cuarta Judiocuaca miaquesocoriquianoori puecoosaquiaa Pueyasocuara, taa Pueyaso rootaquiaari canaa supuetanaacuajani. ¿Niaateeri niishiyaquiyajuhua, shu camaruuri secojojuajinia poonijionaa niqutioquiaa nojori miaquesocoriquianojuhua? Naacuajitij, Pueyaso secojojuua tiajinia poonijionaari miaquesonoraca quiquiaajuhua. ¹⁴ Pa Jiyaniijia Jesucristoori na rupaa pohuatanaara naa sequequiaarijuhua: “Cua rupaa pohuatanaa cuara niqutiojosaaria na panishano pueyaracaanu”. ¹⁵ Naacuajitij, cua naata puetunu cua panishanojuanaa sequenu nia niqutiojonura janiya, juhuajaniya cua quiniuria, taa cuarta Jesucristo jiyaramiquishano pueya miiquiaacuani. Naajaa, majaari cua masenu quijia niajaniya cua panishano cua masetajara. Niaa naasucuaari jiyaniya janiyari quiarijia niaacuara naajioree nioni, cua shiniujiuniuria niajaniya nia niqutiojonura janiya cua panishano. ¡Maja! Majaari cua paniniu nia niqutionura janiya cua panishano. Janiya jaara titiare cua miaajenutani, naajaa. Janiyari tama cua juaashiquiatajaaja poonijionu paniyani, Jesucristo rupaa nia tojitianura, cua panishano cua maseyaquiniutia niajaniyajiniji. Naacuajitij, janiyari tamajaaja shuquiriaatia quia Pueyaso niquiarani.

¹⁶ Cua tojitianaa jaara niqutiore janiya cua panishano, maja cua naata shuquiriaatia quiniu tamajaaja, cua pohuatasacari Jesucristo rupaa. Janiya jaara pohuataaquiri Jesucristo rupaani, cua Jiyaniijia mariqui cua saniitioreeri cua tojiyaquiniucua nojuaja. Cua pohuatasacari na rupaa, janiyari saaja na tojiyani. Nojuacuajaari cua jiyaroquiaari na rupaa cua pohuatanura. Cunoori maja tama cua niishiriojosano cua miiniurijaaja. ¹⁷ Majaari cua sequenu quiquiaari cua Jiyaniijia: “Cua

Jiyaniijanaa, quia rupaa pohuatareera quiajaniyara". Janiya jaara naa na sequequiaarini, cua Jiyaniijia maara cua niquitiore cua poonijiosanojiniji nera, na shuquiritiasacari janiya. Saniniuujia, tama na panishacarijiaaja cua Jiyaniijijanaacuajaari cua jiyaroquiaari na rupaa cua pohuatanura. Cunora, majaari cua naata na tarijionu. Janiyacuajaari na seruni. ¹⁸ Naacuajitij, ¿taa cua miya socuani, cua Jiyaniijia cua shuquiritiniuria socuani? Naa miiquiaacuajanijia, nareja poonijioquiaanijia tama cua juaashiquiatajaaja cua panishano cua jiitianura, na rupaa cua pohuatasacari. Naaratej, majaari cua sequenu quiquiaa cua tojitiaanaa, nojori niqutiojonura janiya cua panishano. Jesucristocuajaari sequequiaari na rupaa pohuataanaa cuaara niqutiosaria na panishano. Naajaa, majaari naa cua sequenu quiquiaa niajanija. Naacuajiti cua naata pa Jiyaniijia shuquiritiniu socua, cua pohuatasacari na rupaa cua maseyaquishacari cua panishano cua tojitianaajiniji. Naacuajitij, janiyari shuquiriaatia pohuataquiaa Pueyaso rupaa pa Jiyaniijiarani.

¹⁹ Majaari pueya niqutionu quiquiaa janiya na jiitiasanojiniji cua niishitiojonuucua nojori. Naacuajitij, janiyari maja juhua nojori seruni. Pueyanoori maja cua jiyarona. Naajaa, janiyari tama cua cuaqueyajaaja jiyatequiaari juhua puetunu pueya serujanaa cua quiniuriani, socua pueya quiniuria pa Jiyaniijia Jesucristo tojitianaara. ²⁰ Jesucristo rupaa cua pohuatasacari cuarta Judiocuaca niquiara, janiyari juhua Judio pueyanora quiquiaani. Janiyari naa miiquiaani nojori mariqui cua tojiyaquiriiri, janiya jaara juhua tahue quiri nojori niquiarani. Naacuajitij, socua Judiocuacaari Jesucristo rupaa tojitiaa. Jesucristoocua cua tiuushacari, janiyari maja socua cua quiniu juhua cua supuetanaa Judiocuaca rootasano tojijia. Naajaa, na tojiquiaajaanijia cua quishacari cuarta Judiocuacata, noo pojoritiatej cante cuno rootasano tojitiaajani. Naacuajitij, cua quishacari juhua nojori, nojoriiri socua cua tojitiaa cua pohuatasacari Jesucristojiniji. ²¹ Naajuhua, cua quishacari tamasaca pueyata, janiyari juhua nojori quiquiaani, nojori tojinijuria maninia janiya. Nojoriiri maja Judiocuaca supuetanaa rootasano tojinu niishiniu. Naaratej, janiyari na tojiyaquiquiaajuhua, nojoritia cua quishacari. Janiyari naa miiquiaani nojori mariqui cua sooreeri, janiya jaara juhua tamaatia quijia quiri nojori niquiarani. Naajaa, Pueyaso rootasano tojiquiaa pueyaracaanu cutaranijia. Naajuhua, puetunu Jesucristo niishitiojosanojuanaa tojiquiaanijia. ²² Noojiaqueya Pueyaso muerasuuri maja na naata tarinitianu najuhuana na supuetanaa rootasano. Cuaara tarinitiaara najuhuana na supuetanaa rootasano. Naajaa, janiyari mariyata cuno najuhuana rootasano tojiquiaajuhua nojoritia cua quishacari. Nojori jyanishacari tamonu casaa sesa quiya, janiyari mariyata maja cua miiniu nojori pueresano casaa. Naacuajitij, cua naata nojori cumaquiniu maninia Pueyaso rupaata, nojori tojitiasacari janiya, juhua nojori cua quishacari. ²³ Janiyari puetunu naa miiquiaajaanani, socua pueya cua tojitiniuria Jesucristo rupaa. Naa maninia poonijioquiaa cua Jiyaniijiaranijia, cua masenura puetunu maninia na sequesanojuanaa na muerasura.

²⁴ Niaacuajaari niishiya taa pueya tacuarishiyajoquiaacuajani. Pueya netecuatusacari, puetunu pueyajanaari jyanohua netecuatujuja jaaraaja. Cante narta netecuatonaa shocotajani, shanohua casaa niquitioshiyari. Rituuquia pueyanoori jyanohua shuquiriaatia qui-

jia na shocotanujiniji na masesacari casaa. Naajuhuaq pueyanaa, jiyano hua nia poonijiore Pueyasora mijiria, shuquiriaatia nia masenura nia poonijosanojiniji na jiiiasanojiniji jiyocuaaanu. ²⁵ Naajuhuaq, pueya jaara tacuarishijionu paniri, cante shocotanu paniyani, cuno pueyanoori puetunu najuhuana na miiniu panishanojuanaa tarinitiaja, na cuaqueya quiniuria cumueeca. Naa miiquiaari narta pueya na shocotanura, shuquiriaatia na quiniuria. Saniniuujia, na masesano na shocotanuucuanu, cunoori saaja shanohua nacaque jaamasujiniji shitiasano. Majaari na rishiniu. Pajaniyari saniniuujia pueyaracaanu shuquiriaatia quiniutianiyani Pueyaso niqutiosanota pajaniya, paa jaara maninia miiri mijiria pa quishacarini. Naaratej, pa tarinitiare puetunu najuhuana tama pa miiniu panishanojuanaa, pa shuquiritiniuria pa Pueyaso.

²⁶ Pueya netecuatusacari, netecuatumaa cuaara niishiiria tee netenu puequeetu quiyani. Majaari najuhuana na camarucuneejonu. Naajuhuaq, cua poonijosacari Pueyasora, majaari cua niquijiotenu coojia.

Mocoritia piyotoosacari, pueyanoori namitia piquiquiaa narta pueyano. Majaari najuhuana na piquiniu capa. Naajuhuaq, pa cartere najuhuana pa miiijosano. Saaja pa niishiriojore Pueyasocua, maninia pa tojiniuria nojuaja. ²⁷ Janiyari jiyano hua saniniuujia quiaa maja cua miiniuria tama cua cuaqueya miiniu panishanojuaaani. Janiyari cua cuaqueya jiyartuutenu paniquiaani saa Pueyaso cua tojiniuriaja. Janiyari tari queraatia pueya niishitiojoquiaari Pueyaso rupaani. Janiya jaara tama cua niishitiojosanojuaja tojiyaquirini, Pueyaso mariqui cua cartereeri, maja na rupaa cua pohuatanura socua.

10

Supuetanaa Israel pueya miishanoori pajaniyara naajiotasaaquiaari pa niishiniuria maninia

¹ Cuarta Pueyaso pueyanaa, nia niishiri taa pa supuetanaa Judiocuaca miishaaquiaaricuaani nojori rucuanijosacari pueyaracaanu cariiquia jiyajinia. Majaari nia niyajetanu niaa mariqui Pueyaso tojiyashijia quiriouhujuhuaq. Nojori mashishacari Egipto jiyajiniji, Pueyasoori cohuaja najaca shipiniquiaari nojori na cojuanura, nojori puetariquianojuhuaq. Pueyasoori puereetuca shoniniacu caminia raquitiaquiaari nojori nuura caminia cajiniocua. Naacuajitij, puetunu pueyajanaari niuutiaquiaari joojuashiquio. ² Naaratej, puetunu nojorijianaari juhua Moisés muerasura jiyatesaaquiaari, nojori nuhuajishacari Moisés puereetuca caminia tajiniaaco, cohuaja najaca cariquiaconio. Majaari socua na qutiuniu quiquiaari Egipto pueya seya. ³ Puetunu nojorijianaari jiya cajiniocuaji casaa miaquenuujua, Pueyaso tinishano nojori miaquesocoriquiano pueyaracaanu cuno cariiquia jiyajinia nojori rucuanijosacari. ⁴ Naajuhuaq, nojori jiyamuetusacari, Pueyasoori mohuaca pojuartaniquiaari saajijiniji. Puetunu pueyajanaari cuno mohuaca ratuquiaari. Pueyasoori cuno saajijiniji naa raatequiaari nojoritij, na niishitiojonura cuno pueya, nojuajaari nojori nuhuajiriquiaa jiyasohuaja, pueyaracaanu nojori na cojuanura. ¡Nojuacuajaari pa Jiyaniijia Cristo quiquiaari! ⁵ Puetunu cuno supuetanaa Israel pueyajanaari naa maninia cojuasano quiquiaari cariiquia jiyajinia. Naajaa, quera

puetunu nojorijianaari Pueyaso tojtiaashijia quiquiaari saaja. Pueyasoori cunora nojori shuquiritiaaquiuaari. Naaratej nojori cusojuanuuriquiaari cuno cariiquia jiyajinia nojori camarucuneetasacari pueyaracaanu, cuaara puequequiaarijiaatijia puetunu cuno tojiyashijiacajanaa.

⁶ Naa miishaaquiaariti cua supuetanaa Judiocuaca, sesa casaacua nojori jiaatianuucua. Nojorijiniijiri puetunu naajiotasaaquiaarijianaa pajaniyara, pa niishiniuria maja sesa casaacua pa jiaatianurajuhuj.

⁷ Shushajanaa nojori coteesacari rucuanenu cariiquia jiyaco, nojiaqueya nojorijinijinioori caapiqui casaa shipiniquiaari orojiniji juhua juunu niqushano. Nojoriiri tama nojori shipinijosano casaajaaja sequequiaari: “Nioori pa Pueyasohua, pa mashiquiniaa Egipto jiyajinia pa camarucuaacujaji”. Naacuajitij, nojoriiri na shipinishano casaa shuquiritiaquiaari sacuaraatia. Jiyacari nojori miishanoori naa naajiotasaaquiaaritij:

“Pueyari cajituriij queranacunura. Na nuhuaji, nujuatuquiaariiri na shipinishano juyaca tacoji na jiareyocuatunura. Socua sacuaraatia casaa miituquiaariiri”.

¡Maja naa pa miiniuti pueyanaa! Maja pa timitianu tamonu casaa Pueyaso niti. Saaja Pueyaso pa timitiare cutara.

⁸ Na nuhuaji, tamacari, noojiaqueya nojorijinijinioori sesa miiquiaari taaturitia, cararaatia taucuaca miishacari nojori shuquirishacari na shipinishano casaa tacoji. Pueyasoori nocuaji naa sequequiaari: “¡Cuaara puecoosaaria cuno sesa miijiaca!” Cunora, veintitrés mil Judiocuacaari puecoosaaquiaari cuno juuca. Cunojiniji pa niishiri maja pa miiniuria sesajuhuj, taa nojori miiquiaaricuaa taaturitiani.

⁹ Na nuhuaji, noojiaqueya nojorijinijinioori Pueyasota juaaquiouquiaari, tamonu miaquesanoocua nojori jiaatiasacari, puera nojori jishacari nojori miaquesano. Nocuaji Pueyasoori sacocua satejoquiaari cuno pueya. Queraatia pueyari cusonuuquiaari. Naaratej pueyanaa, maja cumaati pa juaaniu, Pueyaso jaara pa saniniujiuri. Maja naa pa miiniutij paa mariqui Pueyaso juaatiriiri.

¹⁰ Tamacari, noojiaqueya cuno pueyajinijinioori Moisésta juayonuutaquiaari. Moiséscajiaari nojori jiitianara Pueyaso jiyatesano quiquiaari. Nocuaji Pueyasoori na seru jiyaroquiaari cuno juaajiaca na cusojuanura. Queraatia pueyari cusonuuquiaari jiyacari. Naaratej pueyanaa, majaari pa juaatianu pa jiyaniijianucua.

¹¹ Puetunu pa supuetanaajiniji naajiotasanojuanaari tariucuacaanu naajiotasaaquiaari, pa numootesaanura quiarijiani, quera pa Jiyaniijia muetasacariuhua. ¹² Naaratej pueyanaa, tama nia cuaqueyajaaja nia cojuare nia jiyaniushacari niaari Pueyaso tojjia seetanu cutarajanaa, niaa mariqui sesa miiriiri, juhujajaniya nia quishacari tamajaaja. ¹³ Niaari mariyata saniniujiushaaquiaajuhuj, taa puetunu parta Pueyaso pueyanaa saniniujiushaaquiaacuaani. Naajaa, nia naata Pueyasocua tiuniu maja puera nia saniniujiushaanura. Pueyasocujiaari niishiya taate nia naata rejeretanuni. Majaari puera pa saniniujiushaanu quiniutianiya. Pueyasocua nia niishitiojore taate nia naata cartesano quiniuhuanu taraatia nia miiniuucujaji. Naacuajiti pa naata rejeretanu, Pueyaso jaara Sesaaca saniniujiutiri pajaniya.

Maja pa cojiniu tamasaca, na miaquenuusacari na jiyanitiushano na pueyasooacara na puecootusano

¹⁴ Cua panishano Pueyaso muerasunaa, maja nia tiuquitianu tamasaca pueya jiyanitiushano pueyaso quiquiojinia, na tojitianaa nia cojiniuria, nojori shuquiritiasacari juaashiquiata shipinishano casaa Pueyaso niti. Maja nojori cojiniu, niaa mariqui saniitiosaareeri.

¹⁵ Niaacuajaari niishijiaca. Naaratej, nia niishiriojore cua sequesanoocua.

¹⁶ Paa jaara rerejore pa Jiyaniijia cusonu juuca pa niishiniuriani, pa ratunu panishacari, paari sequequiaani: “Paacarasho canaa Jiyaniijiana, quia nanacaari puetunu canaacuarajanaa shooquiaari”. Naa pa ratusacari cuarta Pueyaso muerasunaa, puetunu pajaniyajanaari pa Jiyaniijia rupesano quiquiaani, na nanaca shoonuucua puetunu pocuarajanaa. Naajuhuj, pa miaquesacari, paari sequequiaani: “Canaa Jiyaniijiana, quiaari quia cuaqueya nootunequiaari puetunu canaacuarajanaa”. Naa pa miaquesacari, puetunu pajaniyajanaari jatiqii pa Jiyaniijia cojiquiaani, na cuaqueya cusonuucua pocuara.

¹⁷ Cuno pan pa miaquesacari, puetunu pajaniyajanaari niquiriyatu panjini nia neecasequiaani. Naacuajitij, paari niishiyani puetunu pajaniyajanaari rupuetoono quia pa Jiyaniijiatani, juhua niquiriyatu cuaqueyaja.

¹⁸ Nia niishiriojoriquia taa Israel pueya miiquiaacuaani. Nojori miaquesacari Pueyasooacara na mosano Pueyaso niquiara, na niti nojori mosano seruuri juhua tama nojorijiaaja, Pueyaso jiyanooniuria nojori. Naacuajitij, nojoriiri na naata Pueyaso rupueno, nojori secojonura nojuaja.

¹⁹ Jaara naa quiritij, ¿taateerini, pueya jaara shipinijosano casaacuara mosano shu miaquere? ¿Casaate pueya jiyanishano pueyasooacara mosano shuni? Nareja shucuaajaari. ¿Cumaacaraca quiijate cuno, pueya shipinishano casaa juhua Pueyasorani? ¡Maja! ²⁰ Naajaa, nia tojitiare casaa cua sequenutaniyani. ¡Pueyaso niishiyashijiaca pueyari na miaquesocoriquiano na seya puecooquiaa samarhuacuara! Naa nojori miishanoniquitij, cunoori maja Pueyasora. Naacuajitij, nojoriiri samarhuhua rupuequiaa, maja Pueyaso. ¡Majaari cua paniniu nia rupuenura samarhuhua! Nocuaji, maja Pueyaso niishiyashijiaca nia cojiniu cuno shu nia miaquenura. ²¹ Majaari pa naata pa Jiyaniijiatata rupuetoono, samarhuata pa rupuetooacarijuhuaj. ¿Pueyasote samarhuata cojitishiya? Pa Jiyaniijia cusonu juuca pa niishiniuria, ¿paateeri na sequesano miaquenutaniyani, samarhuacuara mosano casaajuhuj? ¿Cojitishiyate? ¡Maja pueyanaa! ²² ¿Paateeri pa Jiyaniijia paraca cojiniu paniyani, pa Jiyaniijia pa juaatiniuriani? ¿Pajaniyate socua cumueeca pa Jiyaniijiajinijini? ¿Majateeri nia puerenu pa Jiyaniijia saniitionu?

Taa pa miiniutianiyani

²³ Tari sequereecujanijia, pa naata miiniu puetunu pa miiniu panishanojuanaa. Naajaa, majaari puetunu pa miiniu panishanojuanaa maninia pajaniyara. Puetunu pa miiniu panishanojuanaari maja na cumaquiniu quiniutianiya parta Pueyaso pueya. ²⁴ Naaratej, majaari pa niishiriojonu saaja maninia pa quiniuria tamajaaja. Pa niishiriojore parta pueyacua, maninia nojori quiniuriajuhuaj. ²⁵⁻²⁶ Seetanujuanaari

nio naajosano: “Nio jiyari pa Jiyaniijia jiya, puetunu tii quijia casaajanaano”. Naaratej, niaa jaara shu masere shu niqutiojosaquiji cumaneecata, majaari nia nequesotanu: “¿Nio shujiyo casaacuara mosano?” Maja naa nia nequesotanutej. Nia panishano nia masere nareja, nia miaquesocoriquiano juhuajaniya. Pa Jiyaniijia shipinishanocuaajaari. Pa miaquesanoori maja na naata na sesonu pajaniya Pueyasora.

²⁷ Pueyaso niishiyashijia jaara nia masuure nata nia miaquenura, nia quiaare, niaa jaara quianu paniri. Juhuajaniya nia miaquere na rupojosano niaara. Majaari nia nequesotanunoj: “¿Nio shuti casaacuara mosaarucuaa?” Majaari naa nia nequesotanu niaa mariqui nioojia macuhajetereeri niaa jaara niishiri nia miaquesanoori shipinishano casaacuara mosano juhua Pueyasooacara. Juhuajaniya nia miaquere nareja. Puetunujuanaari pa Jiyaniijia shipinishanocuaaja. ²⁸ Saniniuujia, nia cojinia jaara numootere niajaniya: “Nio shuuri mosaaree shipinishano casaacuara juhua Pueyasooacara”, majaari nia miaquenunoj, niaa jaara naa sequesare. Maja nia miaquenunoj, nia cojinia mariqui na miaquerejaarihuaj na cojishacari niajaniya. Nia tarajana jiyoteeri jiyaniyajaa cuno shipinishano casaari seetanujuanaa cumaacaraca quijia. Naacuajitij, nia miaquesacari nocuara mosano shu, noojia macuhujanutaniyari. ²⁹ Majaari nio cua sequenu niaara. Niaacuajaari tari niishiya nia naata cuno shu miaquenu. Nia sequeya nio cutaranijia nia cojiniaa pueyara, maja nia miaquenura cuno shu nojori niquiara, nia cojinia mariqui noojia macuhajareeri cuno shu na miaquesacari niaata.

Niaa naasucuaari cua nequesotanu paniya: “¿Paatucua pa panishano shu miaqueyaquirini saaja tamonu pueyano pueresacari pa miacquenu panishano shu? ³⁰ Paa jaara Pueyaso sequeneri ‘paacarasho’ cuno sumatuurani, ¿majateeri maninia pa miaquenura? ¿Tamasacatucua casaara pa sesacare cuno miaquesano pa miaquesacari?” ³¹ Cua tojitiare quenaaja cuarta Pueyaso muerasunaa. Nia miaquesacari, nia ratusacari, casaa nia miishacarinio, pueyaracaanu puetunu maninia nia miirijianaa Pueyaso nia shuquiritiniuria. ³² Puetunu nia miishanojuanaa cuara quiria maninia Judiocuaca niquiara, taucuaca niquiarajuhaj, parta Pueyaso pueya niquiaranio. Jiyanojia taraatia cutaraari, pueya jaara tojiyaquiya Pueyaso, juhuajaniya pa miishacari nojori jiyanitiushano sacuaraatia casaa. ³³ Naaratej, janiyari pueyaracaanu maninia miiniu paniquiaa puetunu pueya niquiarajanaani, nojori cuara tojitiara Pueyaso, Pueyaso pueyara nojori jiyatesaanura. Majaari cua niishiriojonu tama cua panishanojuaja cua miiniuria. Janiyari socua niishiriojoquiaa tamasaacuani, maninia cua miiniuria nojori niquiara.

11

¹ Naaratej cucua nia jiaatiare, juhua janiya nia miiniuria maninia saaja, naatej, taa Cristoocua cua jiaatiaquiaacuani, juhua nojuaja cua quiniuria. Mijiria na quishacari, nojuacuajaari pueyaracaanu maninia miiquiaari pueyacuaa.

Maajipohuatucua taa quiriqiani Pueyaso pueya rerejosacari

² Cuarta Jesuucua tiuuniaanaa, janiyari nia shuquiritiaani, pueyaracaanu nia niishishacari janiya, naajuhaj, maninia nia tojitiyacari

puetunu cua niishitiojosanojuanaa Pueyasojiniji. ³ Janiyari paniya cutarani socua nio nia niishiniuria: Cristocuajaari caya camarnu. Cayari saniniuujia necocua camarnu, taa pa Que Pueyaso pa Jiyaniijia Cristo camarnu quiyacuaani. ⁴⁻⁵ Naaratej, nia secojosacari Pueyaso, nia caminiujiushacari Pueyaso sequenu panishano Pueyaso pueya maanu niquiara-juhuaj, jiyacaritij, canuu cuaara jocuaara na nacaque na pocuasacari. Saniniuujia, maajipohua pocuanura, nojori cuaara mishiquioora na naca toquerauta. Cararaatia cutaraari caya jaara pocuare Pueyasora, Pueyasotajuhuaaj, na naca mishiquiosano. Cararaatijaariuhuaaj, maaji pocuasacari Pueyasota, Pueyasorano, na naca mishiquiosoo. Maaji jaara caririqiyashijia quiri, ¿casaara na naca na tuqueteyaquiya pueturunuanaacuaraarini? ¿Maajiti juhua cayara quiniu paniya? Maja naasucua. ⁶ Maaji jaara na naca mishiquionu paniyaquiri pueya niquiara na pocuanura Pueyasora, Pueyaso na secojonurano, cuno tojiyashijia cuaara tuqueteera na naca. ¿Cararaatiatee, maaji jaara na naca tuquesano quiri juhua caya? Taaquiriirinij. Cararaatia quiyajaariuhuaaj, na secojosacari Pueyaso, na caminiujiushacari Pueyaso sequenu panishano pueya niquiarajuhuaaj, mishiquiosoo na naca quishacari. ⁷ Maajiiri neyaca shuquiritiya na tojijia na quishacari. Naacuajitij, neyacaari narta pueya shuquiritiasano quiyajuhuaaj. Naaratej, maaji cuaara mishiquioora na naca na secojosacari Pueyaso, pueya niquiara, maja neyaca na rerequetenura. Canuuri shipinishaaquiaari juhua Pueyaso na quiniuria, Pueyaso shipinishano casami camarnura na quiniurajuhuaaj. Cayari Pueyaso shuquiritiya Pueyaso tojijia na quishacari. Naaratej, nia rerejosacari, canuuri maja nacaque na cushiniu na caminiujiushacari Pueyaso rupaa, na secojosacari Pueyasojuhuaaj.

⁸ Pueyaso jaara coteenujuanaa caya shipiniquiaari, majaari maajijiniji na shipininiu quiquiaari caya. Maaji cutaraari caya riuquiocujajiniji shipinishaaquiaari. ⁹ Naacuajitij, maajiiri cayara shipinishaaquiaari. Majaari caya shipinishaanu quiquiaari maajiria. Naaratej, maaji cuaara caya tojiiria cutara. ¹⁰ Naacuajitij, maaji secojosacari Pueyaso, na caminiujiushacari Pueyaso sequenu panishano pueya niquiara, cuno maaji cuaara mishiquioora na naca. Naacuajitij, pueyari niishiniutianiya cuno maajiiri maja neyaca rerequeteja. Naa maninia quiya Pueyaso seya niquiarajaariuhuaaj. ¹¹ Naajaa, pueturunu pajaniyajanaari mariyata Pueyaso muerasuni, Jesucristocua pa tiushacari, canuu, maajipohuanio. Naaratej maja pa rerequetenu tamonu. Caya, maaji, nojoriiri mariyata panishano. Maajiiri maja na naata tamajaaja supueno cayaju. Naajuhuaaj, cayari maja na naata supueno tamajaaja maajiji. ¹² Seetanujuanaari, maajiiri coteenu shipinishaaquiaari caya cuaqueyajiniji. Na nuhuaji, pueturunu canujuanaari saniniuujia supuequiaa maajijiniji. Naajaa, pueturunu pajaniyajanaari Pueyasojiniji supuequiaani. Naacuajitij, caya, maajinio, nojoriiri mariyata panishano pa naacutoojonura.

¹³ ¿Taa nia sequeyani pueyanaa? ¿Maniateeri, maaji jaara Pueyaso secojore na naca mishiquiosoo pueya niquiara? Maja maninia. ¹⁴ Naajuhuaaj, quera pueturunu pueyajanaari sequeja, cararaatia niquishanoori caya jaara tucamuejaru quiya juhua maaji. ¹⁵ ¿Maajiirijiataj? Jaara tucamuejaru quiri, cunoori maninia niquishano cutara. Pueyasoori naa maninia shipiniquiaari maaji, tucamuejaru na quiniuria,

na naca mishiquirequiano na muecacata. ¹⁶ Tamonu jaara nacoonu panyajaa socua pa muesujiniji, niocua na sequere: “Pablocuajaari tari pa niishitiojoree puetunu na niishishanojuanaa. Naajuhuj, puetunu Pueyaso pueya maapuejanaari tamaquicua naa miiquiaa taa Pablo pohuataree pajaniyacujani. Majaari socua pa niishiniu tamaatia quiniu”. Niojuanaari cua rootasano cunojiniji, pueyanaa.

Corinto pueyari sesa miiquiaari na miaquenuujuajinia, pa Jiyaniijia cusonu nojori niishishacari

¹⁷ Cuarta Jesucua tiuuniaanaa, nio, janiya niaacuara na naajiyani, nioori maja cua shuqiritianura nijaniya. Nia rerejosacari pa Jiyaniijia cusosacari nia niishiniuria, niaanaari saaja sesa miiquiaa. Nia rerejonuni, cunoori nia cumaquitioonura juucua. Nia rerejosacari saniniuujia, niaari saaja socua seseyaree. ¹⁸ Janiyari naa pohuatasaru-cuaa nijaniyajinijini: “Corinto pueyari sesa na niishiriojonuta nojori jiuujiajinia raquirijitiaquiaa nojori rerejosacari”. ¿Seetanutejanaa nio pohuatasano nijaniyajiniji? Naa naasucuj. ¿Casaate cua toyani? ¹⁹⁻²⁰ Seetanu naasucujanaa niaari nioojiajinia naa niaaquejoquiaaquij. Paacuajaari tari niishiquiaarini noojiaqueya pueyari Pueyaso pueya maapueecuaji rupatenutaniya. Naa niishishanote canapue te maja Pueyaso muerasuni. Cante seetanujuanaa Pueyasocua tiuujiani, majaari na rupatenu quiniutianiya narta Pueyaso muerasuucuj. Cuarta Pueyaso muerasunaa, niaacuajaari Pueyaso pueya maanu. Naaratej, niaa jaara rerejore nia miaquenura pa Jiyaniijia cusonu nia niishiniuria, maja sesa nia niishiriojonu juhua niaaquejono nia quiniuria. Niaa jaara naa niaaquejoriquiatej, majaari pa Jiyaniijia cusonu nia niishiniu quiquiaa seetanujuanaa. ²¹ Nijaniyanaari tama nia patasanojuaja coteetaquiaa miaquenu. Niaanaari nia miaquesano serotaaquiquiaa. Naacujitij, casamijuniucuaanaari miaajecocuaacuajua. ¡Saniniuujia casamiriacanaari juhuajaniya mashaasequenu-uquiaacuajua! ²² ¡Jiyanhua cararaatiaari naa nia miishanotej! Niaa jaara naa jamuejaca quiriquiatej, ¿majate nia naata tama nia tiajinia-jaaja nia miaquenuunu, ratunonio? ¿Niaateeri niarta Pueyaso muerasu sooquiaa? Naa nia miishacari casamijuniucuatej, niaacuajaari nojori cararoquiaa, casamijuniucua nojori quiniuucua. ¿Taa nia sequeyani pueyanaa? ¿Janiyate nia maniniuhuaqueetaani? ¡Maja! Jiyanhua tacayanijia. Majaari cunora cua shuqiritianu nijaniya.

Pa Jiyaniijia rootasano na cusonu pa niishiniuria

²³ Janiyacuajaari nia rootacanu tari pa Jiyaniijia Jesu pohuatasano janiyani, taa na miaquequiaari na saquiriojosano pueyatani. Cuno niucujaja, Judasri pa Jiyaniijia quiateriquiano quiriquiaa taucuaa mosocoriquiano. Cua tojtiarohuacuara pueyanaa. ²⁴ Judas quiateyaquishacarijia nojuaja, pa Jiyaniijia Jesucristoori pan riquiaari. Na Que Pueyaso sequereeri: “Paacarasho cua Quenaa”. Na nuhuaji, na necaserohuari na serotanura na pueya. Nojori sequereeri: “Nioori cua cuaqueya, niaacuara cua panitiaca nia jiyanooshaanura. Nia miaquere. Niocua naa miiriquia pueyaracaanutej, nia niishiniuria cua miishano niaacuara”.

²⁵ Naajuhuj, nojori miaquenu nuhuaji, Jesuuri raatonuque pataquiaari na pueya na serotanura. Coteenu na Que secojoreeri. Na nuhuaji, na pueya sequerohuari: “Pueyaracaanu nia ratusacari nio, nia

niishiriquia, cua Queeri cua nanaca seera nia jiyanooquiaa, na muerasu nia quiniuria. Seyari maja socua niaacuara na moonu quishaanutaniya, sesa nia miiniu jiyanooshaanura juucua. Janiya cutaraari nia niti mosaanutaniyani". Pa Jiyaniijaari naa sequequiaari. ²⁶ Naa nia miaquesacariitij, nia ratusacarijuhuaj, pueyari niishiniutianiya niaari Pueyaso jiyanooshano pueya, pa Jiyaniija Jesu cusonuucua pa niti. Naa nia miaqueriquia pueyaracaanu na sequesano pan, pa Jiyaniija cuara tiuquiriohuaatijia.

Nia niishiri taate pa naata miaquenu pa Jiyaniija cusonu pa niishiniuriani

²⁷ Naaratej, niaa jaara sesa miiri, Pueyaso nia secojore ritia na jiyanooniuhua niajaniya, nia miaquenuhua pa Jiyaniija cusonu nia niishiniuria. Niaa jaara pa Jiyaniija pan miaquere jiyanooshoo nia quishacariija, niaa jaara na cusonu mashaca rature jiyanooshoo nia quishacarijuhuaj, niaari na cusonu rerequeteya! Niaari juhua sequeyaruhua, pa Jiyaniija najuhua cusoquiaari. Naa nia miishacariitij, niaa cutaraari saniitiosaanutaniya.

²⁸ Naaratej, tama nioojiajiniaaja nia niishiriojore taa nia quiquiaani, casaa nia miiquianu sesani. Naa nia miiri coteenu, niaa mariqui sesa nia miishano miaquetareeri Pueyaso jiyanoaquishacariija niajaniya. Naa nia miiniu nuhuajitij, niocua shuquiriaatia juhuajaniya miaquerohua pa Jiyaniija pan. Niocua juhuajaniya raturuhua pa Jiyaniija raatonuquejiniji cutara. ²⁹ Cante juhuajaniya miaquereeni, cante juhuajaniya raturee najuhuanani, jiyanooshoo na quishacariija, cuno pueyanoori Pueyaso saniitiotenutaniya tama na cuaqueyajaaja. ³⁰ Naacuajitij, jiyanooshoo nia quishacariija nia miaquesacari, queraatia niajanijajinijinooori cunora cusosuhua quiya. Noojiaqueya niajanijajinijinio cutaraari tari cusonuucanujuhua, Pueyaso saniitiosacari nojori. ³¹ Nocujia tama nia cuaqueyajaaja nia jecare suraatia, pa Jiyaniija mariqui saniniuujia nia saniitioreeri. ³² Pa Jiyaniija jaara pa saniniuujiri, canapute sesa quiyani, Pueyaso nia saniitioquiaa na muerasu nojori quiniucua, maninia nojori quiniuhua juhua maninia na muerasu. Naacuajitij, juhuacariija na saniitiosacari na muerasu, majaari pa saniitiosaanu quiniutianiya na ruuretajacata jiya puequesacari, Pueyaso jaqueroosacari na tojiyashijiaca.

³³ Naaratej cuarta Jesuucua tiunianaanaa, niaa jaara pa Jiyaniija pan sanu paniriquia na cusonu niishiniuria, nia sashiri niarta Pueyaso muerasu, jatiqui nia miaquenura maninia. ³⁴ Miaajeyano maaraja, cuara miaqueera coteenu tama na tiajiniaaja, Pueyaso mariqui nia saniitioreeri, sesa nia miiniuucua nia rerejosacari nia jamuenuta.

Socua nia nequesotasanojiniji janiya, janiyari nia sequenutaniyani cua tiuquishacari niaacua.

12

Pueyaso Sohuanu cumaquishacari puetunu Pueyaso muerasujuaanaa

¹ Cuarta Pueyaso muerasunaa, niaacuajaari tari niishiya Pueyaso nia Sohuanu niqutioquiaa puetunu pajaniyajanaa, na cumaaca pa jitianura. Quiarijiani, socua nia niishitiojonu paniya cunojinijiniija.

² Niaacuajaari niishiya taa nia quiquiaari tarini, Pueyaso niishiyashijiaca nia quishacariija. Niaari puetunu sapojosaaquiaarijanaa, pueya

shipinishanoocua nia tiuuniucua najuhuanaj. Sesaacaari naa nia tojitiqiaari najuhuaana pueya shipinishano, nia jiyanishano pueyasohuani. ³ Naaratej cua pueyanaa, maja sapojosano nia quiniu socua. ¿Taate pa naata niishiniuni, cante seetanujanaa Pueyaso Sohuanu cumaacata pohuataa Pueyasojinijini? Naa nia saniniujiuritij: Pueyaso Sohuanu pohuatesacari pueyano, nojuajaari maja na naata Jesucristo sesacanu. Naajuhuj, saaja Pueyaso Sohuanu cumaquishacari pueyano na naata sequenu: “Jesucuaajaari Jiyaniijiajanaa”. Naacuajitij, maja nia tojiniu na rupaa, cante Jesucristo sesacajani.

⁴ Pueyaso Sohuanuuri niquiriyatujua. Naajaa, Pueyaso Sohuanuuri puetunu Pueyaso muerasujanaa cumaquiquiaa tamaatia miishano pa miiniuria na cumaacata. ⁵ Queraatia tamaatia poonijiosanoori Pueyasora quiya. Naajaa, puetunu pajaniyajanaari niquiriyatujua Jiyaniijiaara poonijioquiaani. ⁶ Puetunu pajaniyajanaari tamaatia miiquiaa pa poonijiosanoni. Saniniuuja, Pueyasojuanaari na panishano miiquiaa puetunu pueya jiuujiajiniajanaa. ⁷ Pueyasoori puetunu na muerasujanaa cumaquiquiaa na Sohuanuta, maninia pa miitioonura, Pueyaso muerasu maapue cumaquishaanura puetunujanaa. ⁸ Pueyasoori pa cumaquiquiaa tamaatia miishano pa miiniuria. Naacuajitij, Pueyaso Sohuanuuri tamonu pueyano pohuataniquiaa Pueyaso niishishano na muerasura. Pueyaso Sohuanuuri tamonu pueyano niishitiquiaajuhua Pueyaso sequenu panishano pajaniya. ⁹ Pueyaso Sohuanuuri tamonu cumaquiquiaa Pueyasocua na tiuuniuria jiyanoehua, na shiniujiuniuria Pueyaso miiniu panishano pa miiniuria. Pueyaso Sohuanuuri tamonu cumaquiquiaajuhuj cusosuhua na naatanijionura Pueyaso cumaacata. ¹⁰ Pueyaso Sohuanuuri tamonu pueyano jiyajeneta miishano miitiyajuhuj Pueyaso cumaacata. Tamonuuri niishitishaquiaa Pueyaso sequenu panishano na pohuatanura pueya niqiuara. Pueyaso Sohuanuuri tamonu niishitiquiaa teyano sohanute tamonu pueyano cumaquiyani, Pueyaso Sohuanu, sapojona samaru soj. Pueyaso Sohuanuuri tamonu pueyano pocuatequiaa tamaatia rupaaca, na niishishoo rupaa. Pueyaso Sohuanuuri tamonu pueyano niishitiojoquiaa tamaatia rupaajinia sequesano na pacunura pueya rupaajiniajuhuj, pueya tojiniuria maninia tama nojori rupaajiniaaja. ¹¹ Naacuajitij, Pueyaso Sohuanujanaari puetunu pa cumaquiquiaajanaa, tamaatia pa miiniuria. Naa pa poonitijioquiaari taa na paniyacuajani, cana na paniyajaaniuhuj.

Puetunu Pueyaso pueyajanaari juhua niquiriyatu cuaqueya quiya

¹² Tamaatia poonijiosano puetunu pajaniyajanaa jittiasacari, paari juhua niquiriyatu cuaqueya quiyani. Mijiria pa cuaqueyari jiyanoehua maninia shipinishano jiyanoehua Pueyaso niishitiajata. Pa cuaqueyari maja saaja shu na quiniu. Pa cuaqueyari queraatia tamaatia casaaraca. Puetunu pa cuaqueya casaajanaari jatiqui poonijioquiaa pa cuaqueyajinia, maninia pa quiniuria. Puetunu pa cuaqueya casaajanaari saa niquiriyatu cuaqueyaja quiya. Jiyano pa cuaqueyatej, Pueyaso muerasuuri naa quiyajuhuj. Naacuajitij, Cristota rupetootesano pa quishacari, puetunu pajaniyajanaari juhua niquiriyatu cuaqueyaja quiyani, pa Jiyaniijiaara pa poonijionura jatiqui. ¹³ Pueyasoori pa rupetootequiaa na Sohuanuta, puetunu jatiqui pa quiniurijanaa. Pueyasoori puetunu na muerasujanaa samiitianiquiaari na Sohuanuta. Pueyaso Sohuanu pa jittiasacari, puetunu pajaniyajanaari

rupuetootesano quiya niquiriyatu Sohuanutani. Naacujitij, paari juhua niquiriyatu cuaqueya quiyani: Judiocuaca, taucucanio, poonitijiosano pueyajuhuaaj, camarnuuju pueyano.

¹⁴ Pa cuaqueyajiniji pohuatareeraj. Pa cuaqueyajinia, majaari saa niquiriyatu casaaja quiniu. Queraatia casaari quiya pa cuaqueyajinia. ¹⁵ ¿Taa nia sequeyani pueyanaa? Pa niohuaca jaara sequere: “Janiyari maja juaashiquiani. Naaratej, janiyari maja pueyano cuaqueyajinijini”. ¿Taa nia sequeyani cuarta Pueyaso muerasunaa? ¿Pa niohuacate maja pa cuaqueyajiniji, maja juaashiquia na quiniuucua? Maja. Naajuhuaaj, majaari pa soonu tamaatia poonijiosano pa jiiτίαςacari Pueyasora. ¹⁶ Naajuhuaaj, pa numaa jaara sequere: “Janiyari maja namijiani. Naaratej, janiyari maja pueyano cuaqueyajinijini”. ¿Taa nia sequeyani pueyanaa? ¿Pa numaate maja pa cuaqueyajiniji, maja namijia na quishacari? ¿Sooshiyatee? Maja. ¹⁷ Paa jaara saaja puereetuuca namijia quirini, shaaqui pa cuaqueya, ¿paatucua tojirini? Maja pa naata. Paa jaara saaja numaa quirini, shaaqui pa najuhua, ¿paatucua nujuuriquiani? Maja pa naata.

¹⁸ Pueyasoori namitia pa cuaqueya shipiniquiaari puetunu pa panishano casaatajanaa. Puetunu pa cuaqueya casaajanaari rupuetoote-saaquiaari tee Pueyaso paniquiaari nianucujani. Naajuhuaaj, Pueyasoori puetunu na muerasujanaa cumaquiquiaa mariyata, tamaatia poonijiosano pa jiiťianura taa na paniyacujani. ¹⁹ Pa cuaqueya jaara quiriquia saa namijiaja puetunujanaa, ¿pa cuaqueyatuma tee quiriquia socuani? ²⁰ Puetunu pa cuaqueya casaajanaari namitia saaja niquiriyatu cuaqueya quiya.

²¹ ¿Taa nia sequeyani pueyanaa? Pa namijia jaara pa juaashiquia sequere: “Juaashiquianaa, niaari najuhuaana quijiaca. Maja nia naata niquiniu”, ¿majate pa juaashiquia pa panishanojuhuaaj? Taaquiririnij. Naajuhuaaj, pa naca jaara pa niohuaca sequere: “Niohuacanaa, niaari najuhuaana quijiaca. Maja cua paniniu niya nijaniya”, ¿majate pa niohuaca pa panishanojuhuaaj pa rucuanejotajara? Taaquiririnij. Pueyanaa, naa pa quiri jatiquijihua puetunu parta Pueyaso muerasutajanaa, taa puetunu pa cuaqueyajinia pa jiiťiasano casaajanaa quiya jatiquicuaani. Naaratej, puetunu parta Pueyaso muerasujanaari pa panishano quiya, pa cumaquitioonura maninia. ²² Teyano casaate pa cuaqueyajinia socua sasaca quiya pa niquiarani, cunoori socua pa panishano. Maja pa naata rishiniu cunooju. ²³ Naajuhuaaj, teyanote maja puera maninia niquishano pa cuaqueyajiniani, paari toque cushiquiaani pa cararaatiuuquia pa mishiquionura, maninia pa niquishaanura. Paari caririquijia cutarani, juhuaasu pa quishacari. ²⁴ Saniniuujia, maninia niquishano casaa pa cuaqueyajiniani, majaari cuno pa mishiquionu quiquiaa toqueta. Pueyasoori naa puetunu pa cuaqueya casaajanaa shipiniquiaari maninia pa cojuanurajuhua teyanote maja maninia niquishano pa cuaqueyajiniani. ²⁵ Naacujitij, pa cuaqueya casaari maja rimiajata cojuasano na quiniu. Puetunu pa cuaqueya casaajanaari maninia miitiooquiaa, puetunu maninia pa cuaqueya quiniurijanaa. Naatej, taa pa tacaquiaa pa cuaqueyarcuaani, naa pa miiri parta Pueyaso muerasujuhuaaj. ²⁶ Pa niohuaca jaara noore, puetunu pa cuaqueyajanaari na tacaatiaa. Pa niohuaca jaara shaaterohua, pa cuaqueyari jaarajaaja puetunujanaa shuquiri-

aatia quiriohua. Naajuhuj, parta Pueyaso muerasu jaara taraatia miishaare, naa nojori pa taraajetarejuhuaj. Naajuhuj, parta Pueyaso muerasu jaara maninia miishaare, nojoritia pa timirijjuhuaj.

²⁷ Puetunu pamanijajanaari juhua Cristo cuaqueya quiyani. Naaratej, Pueyasoori puetunu na muerasujanaa rupueteya Cristo cuaqueyajinia, saa niquiriyatu cuaqueyaja pa quiniuria, pa camarnura pa poonijionura. ²⁸ Cristo cuaqueya pa quishacari, Pueyasoori coteenujanaa canaa jiyatequiaari Jesucristo jiyaramiquishano pueya canaa quiniuria. Na nuhuaji, Pueyasoori tamasaca jiyatequiaari na rupaa pohuatanaa nojori quiniuria, nojori caminiujiuniuria Pueyaso sequenu panishano pueya niquiarajuhuj. Naajuhuj, Pueyasoori tamasaca jiyatequiaari na rupaa niishitiojonaa nojori quiniuria. Pueyasoori tamasaca jiyatequiaari jiyajeneta casaa nojori miijionura na cumaacata. Tamasacaari jiyatesaaquiaari cusosuhua naatanijionaa nojori quiniuriajuhuaj, Pueyaso Sohuanu cumaquishacari nojori. Tamasacaari jiyatesaaquiaarijuhuaj Pueyaso muerasu naacunaara nojori quiniuria. Tamasacaari jiyatesaaquiaarijuhuaj Pueyaso muerasu jitianaa nojori quiniuria. Tamasacaari pohuatesaaquiaari tamaatia rupaacajuhuj. Naacujitij, queraatia tamaatia poonijosanoori quiya. ²⁹ ¿Puetunu Pueyaso muerasujanaateeri jiyaramiquishaquiaari Jesucristojiniji nojori pohuatanura tamasaca niquiara? Maja. ¿Puetunu Pueyaso muerasujanaateeri Pueyaso rupaa pohuatanaa? Maja. ¿Puetunu Pueyaso muerasujanaateeri Pueyaso rupaa niishitiojonaa? Maja. ¿Puetunu Pueyaso muerasujanaateeri jiyajeneta miishano miijiaca? Maja. ³⁰ ¿Puetunu Pueyaso muerasujanaateeri cusosuhua naatanijionaa? Maja. ¿Puetunu Pueyaso muerasujanaateeri tamaatia rupaaca pocujaca? Maja. Tamaatia rupaajinia pohuatasano jaara quiriquia, ¿puetunu Pueyaso muerasujanaateeri na naata na pacunu tama nojori rupaajiniaaja? Maja. ³¹ Naaratej, nijaniya cuara jiaatiara socua maninia poonijosano nia jitianura Pueyaso Sohuanujiniji, niarta Pueyaso muerasu nia cumaquiniuria maninia.

Cuarta Jesucua tiunianaana, quiarijiani nia niishitiojoreera casaate socua panishanoni, Pueyaso shuquiritianura pajaniya.

13

Panijiaca pa quirij

¹ Pueyaso Sohuanu jaara cua pohuatero queraatia cua niishishoo rupaaca, Pueyaso seya rupaajuhuj, naajaa, janiya jaara pueya paniyashijia quirini, janiya maara saaja cojuatuneja quiri Pueyasorani.

² Naajuhuj, janiya jaara Pueyaso cumaacaraca quirini Pueyaso sequenu panishano cua caminiujiuniuria, naajaa, cua paniaquishacari pueya, janiya maara najuhuaana quijia quirini. Naajuhuj, janiya jaara niishiri puetunu Pueyaso miiniu panishanojuanaani, puetunu Pueyaso niishishanojuanaanio, naajaa, janiya jaara pueya paniyashijia quirini, janiya maara najuhuaana quijia quiri Pueyasorani. Naajuhuj, janiya jaara Pueyaso cumaacaraca quirini, tuhuananuhua cua jatanura tamocora Pueyasocua cua tiuuniucua jiyanohuani, naajaa. Cua paniaquishacari pueya, janiya maara najuhuaana quijia quiriquia Pueyasorani. ³ Naajuhuj, janiya jaara puetunu cua casamijianaa nareja niqitiore casamijiniucua cua paniaquiniutiani, cua Jiyaniijia maara

cua shuquiritiaaquiri. Naajuhuaaj, janiya jaara tama cua cuaqueyajaaja panitiare Pueyaso rupaa cua pohuatanurani, naajaa, cua Jiyaniijia maara cua shuquiritiaaquiri, janiya jaara pueya paniyashijia quirini. Naajuhuaaj, janiya jaara mosaare Pueyaso rupaa cua pohuatanuucuan, naajaa, cua Jiyaniijia maara cua shuquiritiaaquiri, janiya jaara pueya paniyashijia quirini.

⁴ Cante pueya panijiani, nojuajaari panaatia sashijia. Cante pueya panijiani, nojuajaari maninia miijia puetunu pueyarajanaa. Cante pueya panijiani, nojuajaari tamonu pueya jii-tiasanoocua jiaatiaashijia. Cante pueya panijiani, majaari tama na cuaqueyajaaja na jiyatenu juhua cutara pueyanora. Naajuhuaaj, cante pueya panijiani, majaari pueya rerequeteja na quiniu. ⁵ Cante pueya panijiani, majaari pueya na cararojonu. Cante pueya panijiani, majaari saaja nera niishiriojojua tamajaaja. Cante pueya panijiani, majaari ritia juaajia. Majaari na niishiniu naminiujiuhuaaj, tamonu jaara sesa na miiri. ⁶ Cante pueya panijiani, nojuajaari pueyacua taraajeja, nojori miishacari sesa. Sanini-uujia, nojuajaari shuquiriaatia quiya pueya miishacari Pueyaso panishano. ⁷ Cante pueya panijiani, juhuajaniya pueyaracaanu rejeretaari, tamasaca miishacari sesa nojuaja. Majaari na taacanuunu Pueyaso sequesanojiniji, tamonu sequesanojinijinio. Naajuhuaaj, majaari na tarinitianu maninia miiniu pueyaracaanu. Pueya panijaari naa puetunu rejeretajajanaa, taraatia na miishacari.

⁸ Panijia pa quiniuni, cunoori pueyaracaanu panishaanutaniya, maja saa mijiria pa quishacarijia. Naaratej, socua cutara panijiaara pa quirij. Mijiria pa quishacari, Pueyaso Sohuanuuri pa cumaquia Pueyaso sequenu panishano pa caminiujiuniuria, pa niishishoo rupaaca pa pocuanurajuhuaaj, Pueyaso niishitishano pajaniya pa pohuatanurario. Puetunu nio niishishanojuanaari puequenutaniya Jesucristo tiuquishacariuhua pocua. Paniniu cutaraari puequeyaquiniutianiya. ⁹ Mijiria pa quishacari, paari saaja shiitianiyojua Pueyaso niishishano jii-tiaani. Pa niishishano Pueyasojiniji pa pohuatasanon, cunoori saaja shiitianiyojua Pueyaso niishishanojiniji. ¹⁰ Naacujitij, mijiria pa niishishanoori najuhuaana quiniutianiya paa jaara Pueyaso shuriucua quirini. Pueyasoori jiyacari pa niishitiojonutaniya maninia cutara. Paari jiyacari puetunu maninia niishiniutianiyajanaani.

¹¹ Janiya jaara naatujua quiquiaarini, juhua naatujua pocuaquiaarini-jia. Juhua naatujua niishiriojoquiaarini-jia. Saaja naatujua niishitiaja jii-tiaquiaarini-jia. Sanini-uujia, janiya jaara cumantumaca quiquiaarini, janiyari cua naatujua quiniu niyajetaquiaarini. Naajuhuaaj mijiria pa quishacari, paari juhua naatujoori quiyajaa Pueyaso niquiarani. Pa Jiyaniijia tiuquishacariuhua, paa cutaraari cumueeca Pueyaso pueya quiniutianiyani. ¹² Mijiria pa quishacarijia, paari shiitianiyojua niishiyani. Paari juhua ninitia ni-quiya jariyani, juhua sesarunee niqutiujinia. Pueyaso shuriucua pa quishacari, paari maatia niishiniutianiyani. Quiarijiani, saa shiitianiyojuaajaari pa niishishano. Na nuhuaji, Pueyasota pa quishacari, paari puetunu manijajanaa niishiniutianiyani, naatej, taa Pueyaso niishiya puetunu pajaniyajanaacuaani. ¹³ Quiarijiani, paari Pueyaso rupaacua tiuuni niishiyani. Naajuhuaaj, paari juhuajaniya sashiniu niishiyani, maatia pa niishishacari nojuajaari maninia miiniutianiya pajaniya. Nioori

maniniacuaja. Naajaa, pa panishacari Pueyaso, pueyano, cunoori socua maninia cutara Pueyasora, puetunu tamonu casaajinijinojuanaa.

14

Niishishoo rupaaca pocuanujiniji niishitiojosano

¹ Naarate cua panishano Pueyaso muerasunaa, nia jiaatiare socua jiyanohua pueya panijiaca nia quiniuria, Pueyaso panijiacajuhuj. Naajuhuj, nia jiaatiare Pueyaso Sohuanu cumaaca nia jiitianura maninia nia miiniuria. Panishano cutaraari Pueyaso Sohuanu niishitiaja nia jiitianura, Pueyaso sequenu panishano nia caminiujiuniuria Pueyaso pueyara. ² Cante niishishoo rupaa pocuaa pueya niquiara Pueyaso Sohuanu cumaacatani, cuno pueyanoori maja na cumaquiniu narta Pueyaso pueya. Na pohuatasanoori saaja Pueyaso tojishano, maja pueya tojishano. Cuno pueyanoori jiyasohuaja Pueyaso Sohuanu niishitishano pohuataa pueya niquiara najuhuanaj. Majaari pueya niishiniu casaa na sequeyani. ³ Saniniuujia, cante Pueyaso sequenu panishano caminiujijia pueya rupaajiniani, cunoori narta Pueyaso muerasu cumaquiya. Na numooteyari. Na cumanijiaajaariuhuj. ⁴ Na pohuatasanoori maja najuhuaana na quiniu pueyara. Pueyaso pueya maanu tojishacari na pohuatasano, nojoriiri socua cumaquishaanutaniya. Saniniuujia, cante niishishoo rupaajinia pocuaa Pueyaso pueya maanu tajiniani, najuhuaana pocuaari. Saa tama noojia cumaquiyajaarijia. ⁵ Puetunu niajanijajanaa jaara niishishoo rupaaca pocuanu niishijiaca quiriquia, janiya maara shuquiriaatia quirini. Naajaa, janiya maara socua shuquiriaatia quirini puetunu niajanijajanaa jaara Pueyaso sequenu panishano caminiujiunaa quiriquia Pueyaso cumaacata. Cante Pueyaso rupaa pohuatanani, cuno pueyanoori socua tojishano pueyano niishishoo rupaa pocuanajiniji. Naajaa, niishishoo rupaa pocuaanari mariyata panishano quiya, na sequesano jaara pueya rupaajinia pacusaare pueya tojishocoriquiano. Naacuajitij, Pueyaso maapueeri cumaquishaanutaniyajuhuj, maatia Pueyaso sequesano nojori tojishacari.

⁶ Cuarta Pueyaso muerasunaa, ¿niaatucua taa sequerene, janiya jaara Pueyaso rupaa pohuatasee niajanijajanaa nia niishishoo rupaajiniani? ¿Niaatucua cumaquishaare cua pocuasacari najuhuaana naa nia niquiaratej? Maja. Niaa cutaraari cumaquishano quiniutianiya, janiya jaara nia pohuatare nia rupaajinijajanaa Pueyaso niishitiojosano janiyani. Maninijaariuhuj janiya jaara nia niishitiojore Pueyaso rupaa nia rupaajiniani. ⁷ Nia niishiriojore. Jiuujiaaju casamiiri rupaaracajuhuj. Naaratej, paari shuquiriaatia tojitiaa naajua jonesesarini, jaaquequejotaja taquinosacarijuhuaj. Saniniuujia, pueyano jaara naajua jonenejonu saniniujiya na niishiyaquishacarijia, saaja nareja cojuatuneyari. Naacuajitij, cante na tojiyani, majaari na niishiniu casaa na jonenu paniya juucuanu. ⁸ Naajuhuj, trompeta jaara sesa jonesesaare, ¿soldadohuate na naata niishiniu casaa na miiniutianiyani? Maja. ⁹ Mariyata naajaariuhuj, niaa jaara niishishoo rupaa pocuaa pueya niquiara, ¿pueyatucua taa niishirini casaa nia sequeyani? Niaari saaja nia niti taquiriocateya najuhuaana nojori niquiara. ¹⁰ Niaacuajaari niishiya queraatia rupaacaari mijiria quiya. Puetunu maninijajanaa cutaraari na niishiniaara. ¹¹ Saniniuujia, janiya jaara niishiyaquiya tamonu rupaani, janiyari tahue quiya cuno rupaa pocuanarani. Cuno rupaa

pocuaanaari tahue quiya quiriājuhuaj. ¹² Cuarta Jesuucua tiuuniaanaa, niaacuajaari Pueyaso Sohuanuucua jiaatiaquiaa, na cumaaca nia jitianura. Maniniacuaja. Naajaa, nijaniya cuaara jiaatiaara Pueyaso Sohuanu cumaquiniuria nijaniya, puetunu tamaatia poonijosanojuanaa nia miiniuriajuhuaj, maja saaja tamaatia rupaacajinia nia pocuanura. Naacujitij, nia naata niarta Pueyaso pueya cumaquiniu maninia puetunu nia miishanotajanaa, Pueyaso Sohuanu cumaquishacari nijaniya.

¹³ Naaratej, cante niishishoo rupaajinia pocuaquiaa pueya niqiuara Pueyaso Sohuanu cumaacatani, cuno cuaara secojooora Pueyaso, Pueyaso Sohuanu cumaquiniuria nojuaja, na sequesano na pacutenura pueya rupaajiniajuhuaj. ¹⁴ Pa secojosacari Pueyaso pa niishishoo rupaajinia, Pueyaso Sohuanuuri pa sohuanu secojoteya Pueyaso. Majaari pa niishitiaja niishiniu cutara casaa pa sequeyani. ¹⁵ Cunora, ¿casaa pa miiniutianiya Pueyaso pueya maapue tajiniani? Naa pa miiritij: pa sohuanu cuaara secojooora Pueyaso pa niishishoo rupaajinia. Pueyaso pa secojorejuhua tama pa rupaajiniajaaja. Naajuahuaj, pa sohuanu cuaara jaaquequejooora Pueyaso niqiuara pa niishishoo rupaajinia. Pa jaaquequejorejuhua tama pa rupaajiniajaaja. ¹⁶ Pueyaso Sohuanu jaara nia sohuanu secojotere niishishoo rupaajinia, nia tojitianaari maja na naata sequenu: “Jaa, cuaara naa quiiriatej”. Majaari nojori niishiniu tamaatia rupaajinia nia secojosano. ¹⁷ Niaa naasucuaari jiyanhua maninia secojiya Pueyaso. Naajaa, saaja najuhuana quiyari tamasacara, nojori niishiyaquishacari cuno rupaa. Cuno niishishoo rupaajinia secojosanoori maja na naacunu tamasaca. ¹⁸ Pueyanaa, shuquiriaatia quiyanijia Pueyaso niqiuara, Pueyaso Sohuanu pocuatesacari janiya cua niishishoo rupaacajinia, tamajaaja cua quishacari. Janiyari tamaatia rupaacajinia pocuaja socua nijaniyajiniji cutarani. ¹⁹ Naajaa, janiya jaara pueyaracaanu pocuariquia niishishoo rupaajinia Pueyaso pueya maapue niquiarani, cuno maara najuhuana quiriqiaj. Rupaquijia pohuatasano tama pueya rupaajiniajaajani, cunoori jiyanhua socua maninia tucuyocua pohuatasanojiniji niishishoo rupaajinia. Saaja pueya niishishano rupaajinia cutara cua naata nojori cumaquiniu.

²⁰ Cuarta Pueyaso muerasunaa, niaari najuhuana shuquiriya niishishoo rupaajinia nia pocuasacari pueya niqiuara, naatej, taa naatujoori shuquiritiaquiaa quiarinio tacuarishijiotajacuaani. Niaa jaara juhua naatujoori quiniu paniyajaa, sesa niishiriojiyashijiaca nia quiri, taa naatujoori quiyacuaani. Saniniuujia, majaari seetanujuanaa naatujoori nijaniya. Naaratej, cumantumaca nia quishacari, nia niishiriojore maninia nia cumaquitioonura nia rerejosacari. ²¹ Tariucuaaanu, tama Pueyaso sequesanojaarijia naajiotasaaquiaari. Naa sequeyari:

“Janiyari taucuaca jiyaramiquiniutianiya cua saquirojosano Israel pueyacuaani, cua sequenu panishano nojori pohuatanura cua pueya. Cua pueya niishiyaquishoo rupaacajinia pohuatanutaniyari. Naajaa, niishiyanijia, tahua pohuatasacari cua rupaa, cua pueyari saa cua ruuretanutaniyajaa, taa nojori ruuretaquiaa cua rupaacuaani jaara tama nojori rupaajiniajaaja pohuataaariquiaa”.

²² Naa Pueyaso sequesacaritij, paari niishiyani, Pueyasoori tamaatia rupaacata na tojiyashijiaca tojitiniu saniniujuquiaa na rupaa juucua. Paari saniniuujia tari na rupaa tojitiajaca cutarani. Naaratej, majaari socua panishano Pueyaso sequenura pajaniya pa niishishoo rupaa-jinia, na tojitiniuria pajaniya nojuaja. Pueyaso sequenu panishano caminiuujushano cutaraari pajaniyara. Cunocuaajaari tama pa rupaa-jiniajaaja. Cunoori maja Pueyasocua tiuyashijiacara. ²³ Naaratej, Pueyaso pueya maapue rerejosacari, saaja secaja niajanijajinijinio cuaara pocuaara niishishoo rupaacajinia. Naa pocuanu nia tarinitiare quenaaja, tamasaca Jesuucua tiuyashijiaca quishacari nia rerejojua-jinia, nojori mariqui jiyaniiri: “¡Nio pueyaqui puetunu paatecoorijiuhanajaj!” ²⁴ Saniniuujia, puetunu niajanijajanaa jaara Pueyaso sequenu panishano caminiuujia tama nia rupaa-jiniajaaja, tamonu pueyano jaara niaacua tiuquiri, nojuajaari maninia niishiniutianiya nia pohuatasano. Puetunu nia pohuatasanojuanaari noojia tacaatiniutianiya sesa miijia na quiniucua. Tama nojuajaarijia niishiniutianiya: “¡Janiyaqui sesa miijia Pueyaso niquiarani!” ²⁵ Nia pohuatasano Pueyasojiniijiiri puetunu sesa na miishanojuanaa na niishitiniutianiya noojia-jinia. Nocuaji, nojuajaari Pueyaso tojijiaara quiniutianiya. Sequenutaniyari: “¡Pueyasoqui seetanujuanaa nia tajinia niya quiya!”

Puetunu nia miirijianaa maninia. Majaari nia riutiocojonu tamonu pocuasacari

²⁶ Naaratej, cua tojitiare taa nia miiniutianiyani cuarta Pueyaso muerasunaa. Naa nia miiri nia rerejosacari. Puetunu nia miishanojuanaa cuaara quiiria nia cumaquitioonura, socua maninia Pueyaso tojitianaara nia quiniuria. Naacuajitij, Pueyaso Sohuanu cumaacata, tamonu naasucuaari jaaquequejonutaniya. Tamonu naasucuaari Pueyaso rupaa niishitiojonutaniya. Tamonu naasucuaari Pueyaso Sohuanu niishitiojosano noojiajinia caminiuujiniutianiya. Tamonu naasucuaari niishishoo rupaa-jinia pocuanutaniya. Na nuhuaji, tamonu cuaara na pacuura nia rupaa-jinia, maninia nia tojiniuria. Naa nia miiri maninia. Niquiriyatujua cuaara pocuaara coteenu, na nuhuaji tamonu, na nuhuaji socua tamonu. Naate nia miiri. Majaari nia riutioconu tamonu pohuatasacari. ²⁷ Naa jaara niishishoo rupaa-jinia pocuanu paniri, cuaara pocuaara saa querajaa pueyaja, maja socua. Cuaara pocuaara niquiriyatujua, na nuhuaji tarajanu, na nuhuaji socua tarajanu. Naate maninia. Maja nia pocuanu tamonu pocuasacari. Na nuhuaji, tamonu cuaara pacuura pueya rupaa-jinia, niishishoo rupaa-jinia nia sequesano, pueya tojiniuria maninia. ²⁸ Niishishoo rupaa pacuna quiyaquishacari, cuaara pocuaaquiiria cante tamaatia rupaa-jinia pocuanu paniriquiaa nia niquiarani. Na naata sanaa pocuanu noojiajinia tamajaaja, saa Pueyaso niquiaraja.

²⁹ Naajuhuj, niaa jaara Pueyaso Sohuanu niishitiojosano nioojiajinia pohuatanu paniri, cuaara pocuaara saa querajaa pueyaja, maja socua. Na nuhuaji, Pueyaso Sohuanu cumaaca jiiianaa cuaara saniniujuuria nia pohuatasano, nia niishiniuria, cunote seetanujuanaa Pueyaso Sohuanu niishitiojosano, maja soj. ³⁰ Nia pohuatasacari Pueyaso rupaa, tamonu jaara pohuatanu paniya shusha Pueyaso Sohuanu niishitiojosano noojiajinia, cante pohuataajaani cuaara sanaajeera, na tarajana

pocuanura. ³¹ Naacuaajitij, puetunu Pueyaso niishitiojosano jiiitanaa-janaari na naata na pohuatanu. Naaratej, niquiriyatujua cuaara pohuataara, na nuhuaji tamonu, na nuhuaji socua tamonu. Naacuaajitij, puetunu niajanijajanaa na naata pohuatanu nia niishishano Pueyaso-jiniji. Naacuaajitij, puetunu Pueyaso muerasujuaanaari maninia niishitiojosano quiniutianiya, maninia cumaquishanojuhuaj, maninia nia miini-uria. ³² Maja timia pocuanu jaarajaaja tamonu pocuasacari. Majaari Pueyaso Sohuanu pocuatenu tari niajaniya, tari tamonu pocuasacar-icuaa. Nia naata cutaraari sashiniu nia pocuanura. ³³ Pa Pueyaso cutaraari maninia miijiajanaa. Maja cushitiojojua. Naarate pueyanaa, maja tamasa pocuasacari pa riutiocojonu. Saaja maninia pa miiriquia pueyaracaanu.

Cua tojitiare socua. Puetunu Pueyaso pueya maapuejanaa cuaara naa miiria na rerejosacari. ³⁴ Maajipohua cuaara sanaa tojtiaara Pueyaso rupaa pohuatasacari. Maajipohua cuaara niishitiojiyaquiiria pueya niquiara. Maajipohua cuaara tojjiara quiiria, taa pa niishitiojosaaquiaari Moisés Rootasanojinijicuaajani. ³⁵ Maajipohua jaara niishiniu paniya socua pohuatana niishitiosanojiniji, nojori cuaara nequesotohuara neyaca tama na tiajiniajaaja, na que maaraja. Cararaatia cutaraari maaji jaara nequesoretare caya pohuatasacari, Pueyaso muerasu rerejojuajinia. ³⁶ Nia tojiri nio cua rootasano pueyanaa. Niaacuaajaari niishiya, Pueyaso rupaari supueyaquiiquiaari niajanijajiniji. Naajuhuaaj, majaari Pueyaso rupaa pohuatanaa jiyaramiquiniu quishaaquiaari saa niaacuaja. Tamonu jiyacajinia, queraatia Pueyaso pueya maapueeri cua niishitiojosano tojtiaquiaa maninia cutara. ³⁷ Niajanijajinijinio, noojiaqueya pueyari Pueyaso Sohuanu cumaaca jiiitaa, nia niishiniuria cana cumaacata tamonu pueyano niishitiojiyani. Naacuaajitij, ¿taa nia sequeyani? ¿Majate Pueyaso Sohuanu niishitiojosano cua sequesano niajanija? ³⁸ Cante nio niishiniu paniyaquiiani, cuno jiyoteeri maja Pueyaso Sohuanu cumaacaraca quiija. Cuno pueyano cuaara tojiyaquishaaria saniniuujia.

³⁹ Naacuaajitij cuarta Pueyaso muerasunaa, nia jiaatiare Pueyaso Sohuanu cumaaca nia jiiitanura, pueya niquiara nia pohuatanura Pueyaso Sohuanu niishitishano niajanija. Naajuhuaaj, majaari nia tenujunu noo pojori, canapuate niishishoo rupaacajinia pocuanu paniyani, Pueyaso Sohuanu cumaquishacari nojori. ⁴⁰ Nareja maninia nia miiriquia puetunujuaanaa. Naacuaajitij, niquiriyatu cuaara pocuara coteenu, na nuhuaji tamonu, na nuhuaji socua tamonu.

15

Cristo samiitiasacariuhua

¹ Cuarta Jesuucua tiunianaana, Jesucristo rupaa nia niishiriohua, tarijia cua pohuatasano niajanija, nia jiyanooshaanurani. Niaari nocua tiuquuaari maninia. Niaari quiarijia maninia na tojtiaajaa. ² Naacuaajitij, Jesucristoori niaacuaji tacuquiaa quiarijia, maninia nia tojtiasacari na rupaa, taa cua pohuataquiaari niajanijacuajani. Niaacuajaari Pueyaso pueyara jatanishano quiya niaa jaara maja najuhuaana na rupaa tojiyaquiiquiaari. ³ Janiyari niaara caminiujuiquiaari Jesucristo rupaani, taa cua tojiquiaaricuaani. Nio cutara rupaa nia

coteetaquiaari pohuatanunijia: Cristoori pocuara cusoquiaari niyacutesanojinia, sesa pa miiniuucua. Tariucuacaanu Pueyaso sequenu panishano caminiujiuniaari naa naajiotaquiaari, taa Cristo miishaanutaniya naquiyani. Seetanujuanaa naa miishaaquiaariiri. ⁴ Jesucristo cusonu nuhuaji, raaco niasaaquiaariiri. Jiuujianaraca juuca jaara na shoconujuquiaari macu na quishacari, na raaco samiitiaquiaariuhuari. Naa tohuateequiaariiri puetunu tariucuacaanu Pueyaso Rupaajanaa, taa nojuajiniji naajiotasaaquiaaricujani. ⁵ Na nuhuaji, Jesucristoori Pedroocua muetaquiaariuhua. Na nuhuaji, na jiyaramiquishocoriquiano pueyacia muetaquiaarijiaariuhua. ⁶ Na nuhuaji, muetaquiaarijiuhua na tojitianaa rerejosaquiiri. Socua quiniento pueyari na niquitiaquiaari jiyacari. Queraatia jiyacari na niquniaajinijinio pueyari saminio quiyaja. Noojiaqueyari tari shaajecocanu. ⁷ Na nuhuaji, pa Jiyaniijiaari Santiagoocua muetaquiaarijiuhua. Na nuhuaji, muetanu pacutequiaariuhua na doce jiyaramiquishocoriquiano pueyacuari.

⁸ Puetunu cuno pojori nuhuaji, Jesucristoori socua cucua muetaquiaarijiuhua, nocua tiujia cua quiyaquishacarijia. Naa na paraca cua quishacarijiatej, Jesucristoori cucua muetaquiaari na jiyanooniuria janiya. Ritia cua jiyatequiaariiri na jiyaramiquishano cua quiniuriajuhuaj. ⁹ ¿Casaaraqitijia na saquiriojoquiaari janiyatejaj, na jiyaramiquishano cua quiniuriajuhuaj? Janiyari puera sesa miijia quiquiaarini cua niishiyaquishacari Jesucristo. Cucua na muetaquishacarijia, janiyari Pueyaso saquiriojosano pueya miitiaquiaarini. Cuarta Jesucristo jiyaramiquishano pueyari maja naa sesa miijia na quituniu quiquiaari. ¹⁰ ¡Pueyasoori jiyanohua maninia! Cua jiyanooquiaariiri Jesucristo jiyaramiquishano cua quiniuriajuhuaj, taa cua quiya quiarijiacuajani. Naa quiyanijia Pueyaso jiyanooniucua janiya. Majaari najuhua na jiyanooni quiquiaari janiya. Na jiyanooshacari janiya, janiyari socua jiyanohua nera poonijiocanu cuarta Jesucristo jiyaramiquishano pueyajinijini. Naajaa, maninia cua poonijosanoori maja tama cua miishanojuaja na quiniu. Pueyasocujiaari cua cumaquiquiaa na Sohuanuta, maninia cua miiniuria na panishano.

¹¹ Naacuajitij, naa sequeriquiaa nijaniyanijia: cante nia pohuataquiaari Jesucristo rupaani, naajaa. Janiyari Jesucristo rupaa pohuataquiaajaacuhua, mariyata taa cuarta Jesucristo jiyaramiquishano pueya pohuataquiaacuaani. Majaari rimiajata canaa pohuatasano. Niaari cuno rupaacua tiuquiquiaari maninia.

Pueyaso muerasu macunucua samiitiasacariuhua

¹² Cuarta Jesucristo tiuuniaanaa, canaa jaara pohuatariquiaa taa Cristo samiitiaquiaariuhua macujinijini, ¿casaara noojiaqueya nijaniyajinijinio sequequiaani: “Macunucua maja na samiitiaconu quiniutianihua?” ¹³ Macunucua jaara samiitianiyaquishaanutaniya taa nia sequequiaacuajani, Jesucristo jiyoteeri macu quiyajaacuhua. ¿Cristoteeri macu quiyaja? ¡Maja! ¹⁴ Cristo jaara macu quiriquiaja, canaa maara najuhua pohuataa na rupaani. Naajuhua, niaa maara najuhua Jesucristoocua tiuya, na pueya nia quiniu paniniuria juucua. ¹⁵ Canaacujiaari pohuatanuquiaani Pueyasoori Jesucristo samitianiquiaariuhua. Macunucua jaara samiitianiyaquishaanutaniya taa

nia jiyaniquiaacuajani, canaa jiyoteeri sapojonuujua Pueyaso jiyaramiquishano pueyani. Naacuajitij, nia sequesano jaara seetanujuanaa quiri, maja jiyoteeri Pueyaso samiitianiniu quiquiaariuhua Jesu. Saniniuujia, jniaari jiyajeneya cutara! ¡Pueyasocuaajaari seetanujuanaa Jesu samiitianiquiaariuhua! ¹⁶ Macunucua jaara samiitianiyaquishaanutaniya taa nia sequequiaacuajani, Cristo maara samiitiaaquiquiaariuhua. ¹⁷ Cristo jaara samiitiaaquiquiaari, niaa jiyoteeri Cristoocua tiuya najuhanaj, Pueyaso na jiyanootiniuria juucua niajaniya. ¿Macuteeri na naata pocuaji tacunu? Maja na naata. Niaa jiyoteeri jiyanooshoojua quiya. Sesa nia miishano jiyoteeri tuujusoojua quiyajuhua. ¿Naatejaaratej? ¹⁸ Cristo jaara macu quiriquiaja, tariucua shaajecono nocua tiuniaa pueya maara taraatia quiriquiaj. Nojori maara taraatia shaajecanu puetunurajanaa, maja quenaaja nojori samiitiaconuhua. ¹⁹ Pajaniyajuhua, canapuede saminio quiyajaani, paa maara jiyanoohua taraatia quiyani, pueyaracaanu najuhua naquiya pa miishacari mijiria. Jaara naa quiritij, pa Jiyaniijia Jesucristo jaara macu quiriquiaja, paa maara najuhua poonijioriquia pa shuquiritiniuria nojuaja juucuanu.

²⁰ Namitia naa quiyaquiyari! ¡Cristoori seetanujuanaa samiitianishaaquiariauhua! ¡Canaari na niqutiaquiaarini! Naacuajitij canaari niishiyani Jesucristoori saminio quiyacuaja. Pueyaracaanu saminio quiniutianiyari. Naa pa Jiyaniijia Jesu samiitiasacariuhua coteenu pocuajicuaatej, naacuajitij paari niishiyani puetunu shaajecono nocua tiuniaajanaari samiitianishaanutaniuhuaacuuhua. ²¹⁻²² Paacuajaari niishiyani, pa supuetana Adánri coteenujuanaa shaajequiaari, Pueyaso na tojiyaquiniucua. Naacuajitij, puetunu nojuajiniji supuenaajanaari shaajecoquiaajuhua. Adán nuhaji, parta pueyano Jesucristoori saniniuujia Pueyaso tojijia quiquiaari cutara. Naacuajitij, nojuajaari samiitiaquiaariuhua. Naaratej, puetunu nocua tiuniaajanaari samiitianishaanutaniuhua, pueyaracaanu saminio pa quiniuhua pa Jiyaniijia. ²³ Pa Jiyaniijia Jesucristoori coteenu samiitiaquiaariuhua. Cristo nuhaji, puetunu nocua tiuniaajanaari samiitiaconutaniuhua, pa naacuneetonura nata, na nishacariuhua pocua. Paari naa samiitiaconutaniuhua Pueyaso panishacarini. ²⁴⁻²⁶ Na nuhaji, nio jiya puequesacariiri quiniutianiya. Pa Jiyaniijia Jesucristoori mijiria tiuquiniutianiuhua, na tucuataniuhua puetunu na Que panishanojuanaa. Na Queeri na jiyaronutaniya puetunu na paraajanaa na puecoonura. Jesucristoori Jiyaniijiajanaa quiniutianiya, na Que cuara puecoorejaatijia puetunu Neyanu paraajanaa. Jesuuri puetunu mijiria jiyaniijianucua quejoonutaniyajanaa, mariyata puetunu jiya cajiniocua cumaacaraca quijiacajanaano. Sesaacaari jataaanutaniyajuhua, puetunu na seyatajanaa. Majaari tamonu Pueyaso ruuretaja cureenu quiniutianiya quenaaja. Pa Jiyaniijia jatanu nuhaji puetunu na paraajanaa, jiyacari pueya cusojuana shaajanutaniyajariuhua. Majaari cusun niishishaanu quiniutianiya socua, shaajenunio. Puetunu casaajanaa jaara maninia jiiitasano quiriohua, Jesucristoori na Que na niqutionutaniuhua, na Que jiiitanuhua puetunujuanaa.

²⁷ Na Que Pueyasoori Jesu jiyatequiaari Jiyaniijia na quiniuria jiyanoohua na cumaacata. Naacuajitij, nojuajaari na naata puetunu casaajanaa na tojtianiniu. Nojuajaari Jiyaniijiajanaa. Saa na Que

Pueyasojuuari socua Jiyaniijajanaa, maja tamonu. Pueyasojuanaari Neyanu jiyaroquiaari puetunu na shipinishanojuanaa na jeenucuanura na cumaacata. ²⁸ Na tucuatascari, pa Jiyaniijia Jesucristoori na Que sequenutaniya: “Cua Quenaa, tari tucuatatee quia panishanonijia. Puetunu quia paraajanaa quejooree tarinijia. Majaari socua sesa na miiniu quiniutianiya. Saa quiajaniyajaari pueyaracaanu Jiyaniijajanaa quiniutianiya cutara, maja socua tamonu”. Naacuajitij, pa Que Pueyasoori Jiyaniijajanaa quiniutianiya pueyaracaanu, puetunu na shipinishanojuanaa na jitianura maninia.

²⁹ Socua nia niishiriojore pueyanaa. Niaa jaara jiyaniyajaa macunucuaari maja na samiitianishaanu quiniutianihua, ¿casaara pueya tiuquinijosaaquiaa moojinia macu nitini, cuno macu jaara na shaajeyaquishacarijia Jesucristoocua tiuuri? Paa jaara tiuquinijosaaquiaa Jesucristoocua pa tiuushacarini, paari miriqui miyani taa pa Jiyaniijia Jesucristo miishaaquiaaricuaani. Nojuajaari raaco niasaaquiaari na cusosacari. Na nuhuaji samiitiaquiaariuhuari. Naajuhuj, paari mariyata samiitianishaanutaniuhuan. Niaari sequeya macunucuaari maja na samiitianishaanu quiniutianihua. ¿Naatejaaratej? Macunucua jaara samiitianijiyaquishaanutaniuhua taa nia jiyaniyacujani, ¿casaara pueya tiuquinijosaaquiaa shusha shaajeno macu niticuaraarini?

³⁰ Paa jaara samiitianiyaquishaanutaniyani taa nia sequequiaacuajani, canaaquiiri najuhuana tama canaa cuaqueyajaaja panitiaquiaani, pueyaracaanu canaa poonijiosacari pa Jiyaniijia. ³¹ Seetanujuanaa nia sequeyanijia, janiyari jiyanohua shuquiriaatia quiyani, Jesucristoocua nia tiuushacari, cua pohuatanuucua na rupaa nijaniya. Seetanujanaajaariuhuj, pueyari cua monu paniquiaa pueyaracaanuni, maja socua cua pohuatanura Jesujiniji. Naajaa, janiyari tama cua cuaqueyajaaja panitiaquiaa puetunu juucajanaani, cua niishishacari janiyari samiitianishaanutaniuhuan. ³² Pa Jiyaniijia jaara macu quiya taa nia sequequiaacuajani, janiyaqui najuhuana Jesucristo rupaacuaji tacuriquiaani nio sesaaca pueya tajinia cua quishacari niya Éfeso tiacajiniani. Nojoriiri juhua puereeta sayoru quiriquiaa cucuaji. Janiyaqui najuhuana Jesucristo shuquiritiriquiaa juucuan, nojuaja jaara samiitianiyaquishaanutaniyani, pa miiriqui taa Pueyaso tojiyashijiaca sequequiaacuajani: “Pa shuquiriri saminio pa quishacarijia. Pa queranacunuure. Pa mashaasequenuurejuhuj. Naajaa, pa shaajesacari, pocua puetunu shaajequeejanaani”. Naa sesa miiquioquiaari noo pojori, canapuate jiyaniyani macunucuaari maja na samiitianishaanu quiniutianiya.

³³ Pueyanaa, tama nia cuaqueyajaaja nia cojuare, niaa mariqui sapojosaareeri naa sesa nia niishiriojonurajuhuj. Tamonu pueyanoori naa sequequiaari seetanujanaatej: “Maninia miijiaari sesa miijiaa jatanishaaree na cojiniuucua sesa miijiaa”. Naaratej, majaari nia cojiniu sesoriquia pueya, niaa mariqui seserejaariuhuj. ³⁴ Niishiriojuuara nia quiri. Sesa nia miiniu nia cartere. Noojiaqueya nijaniyajinijinioori Pueyaso niishiyashijiaca quiyajaa. Naa nia sequereenijia pueyanaa, quenaaja nia caririquiniuria.

Taamueca pa quiniutianihuan pa samiitiasacariuhua

³⁵ Tamonu niajanijajinjinio naasucuaari niishiriojiya: “¿Taa macunucua samiitianijiosaanutaniuhuaajarani? ¿Taamuecate na cuaqueya quiniutianiyani?” ³⁶ Maninia nia niishiriojore pueyanaa. Maja niishiyashijia nia quiniu. ¿Majateeri nia jamosano naana jajau co moquenu, neyona moritianura? Naacuaaquinatejaj. Saa na co moquesacarijia na naata moritianu. ³⁷ Naajuhuj, niaa jaara saaco natare, tamaatia jajaujuhuj, nia natasano jajauri maja juhua neyonarano niquishano. Nia natasanoori saaja shiitianiyojua jajau quiya. Na moritiasacari, jiyanojua tamaatia niquishiyari. ³⁸ Pueyasoori na maashitiya puetunu na jaamasucuatjanaa, taa na paniyacuajani. Pueyasoori puetunu jajaujanaa moritianijia tamaatia niquishano na quiniuria. Naa quiniutianiyajaariuhua macunucua samiitiacosacariuhua. Majaari pa cuaqueya quiniutianiya taa na quiya quiarijiacuajani. ¡Pa cuaqueyari jiyanojua maninia quiniutianiuha!

³⁹ Majaari puetunu cuaqueyaraca casaajanaa mariyata na quiniu. Naacuajitij, pueyano cuaqueyari tamaatia quiya casaa cuaqueyajiniji. Shuhua cuaqueyari tamaatia quiyajuhuj. Sapitiaaja cuaqueyari tamaatia quiyajuhuj, moojinia na quiniuria. ⁴⁰ Jiyocuacaanu quijiacaaari tamaatia cuaqueyaraca, maja juhua mijiria quiniaa cuaqueya. Pueyaso seya cuaqueyari shanohua niquishano. Nojori cuaqueyari tamaatia niquishano mijiria quiniaa cuaqueyajiniji. ⁴¹ Naajuhuj, pananuuri jiyanojua shacantuuca quijia. Raca shacantuucaari tamaatia niquishano pananu shacantuucaginiji. Riya shacantuucaari socua tamaatia niquishano. Naajuhuj, puetunu riyajanaari tamaatia niquishano narta riyajiniji. Puetunu Pueyaso shipinishanojuanaari naa tamaatia quiya.

⁴² Naajuhuj, Pueyaso muerasuuri samiitianishaanutaniya tamaatia cuaqueyata. Moquejacaari jamojosaanutaniya. Moqueyashijiacaaari saniniuujia samiitianishaanutaniuhua, pueyaracaanu na quiniuria. ⁴³ Jamosano pa quete sequeeri samiitianishaanutaniuhua, jiyanojua shanohua niquishano na quiniuria. Cumaacaaju jamosanoori samiitianishaanutaniuhua jiyanojua cumaacaraca na quiniuria. ⁴⁴ Pa cuaqueya jamosanoori saaja jiyacua rucanejaca quiquiaari. Paari samiitianishaanutaniuhuaani tamaatia cuaqueyata, jiyocuacaanu quijia pa quiniuria. Naaratej, Pueyaso jaara maninia cuaqueya shipiniquiaari pajaniyara, mijiria pa rucanejonura, ¿majateeri Pueyaso niishiniu tamaatia cuaqueya shipininiu na muerasura, na shuriucua pa quiniuria? Taaquiriirinij.

⁴⁵ Pueyasoori coteenu pa supuetana shipiniquiaari marajiniji. Na nuhuaji, na samiitiani quiaariiri. Moisés Naajioneejiniaari naa naajio-tasaaquiaritij:

“Adánri saminiora quiquiaari Pueyaso nooshacari na jiquioco”.

Jesucristoori saniniuujia jiyatesaaquiaari juhua pa supuetanara na quiniuria pa supuetana Adán niti. ¡Jesucristoori jiyanojua socua cutara Adánjiniji! Adánri samiitianishaquiaari saminio na quiniuria. Jesucristo cutaraari pa samiitianijajanaa na Sohuanuta. ⁴⁶ Coteenujuanaa pa supuetanani, majaari na shipinishaanu quiquiaari jiyocuacaanu quijiarano. Cunora, coteenu pa cuaqueyari saaja mijiria quijia. Na nuhuaji, pa cuaqueyari jiyocuacaanu quijiaara jatanishaanutaniya mariyata juhua Jesucristo cuaqueyara. ⁴⁷ Adánri

saaja mijiria quiriquiano quiquiaari. Marajiniji shipinishaaquiaariiri. Jesucristoori saniniuuja jiyocuacaanujinio. ⁴⁸ Puetunu Adáncuajinio supuenojuanaari saaja mijiria quijiaca. Naaratej, puetunu pajaniyajanaari saaja cusonuujucani, juhua pa supuetana Adánjuhuaj. Jesucristo muerasuuri saniniuuja juhua pa Jiyaniijia Jesucristo quiniutianiya, jiyocuacaanu quijiaca pa quiniuria. ⁴⁹ Mijiria pa quishacari, pa cuaqueyari juhua pa supuetana Adán cuaqueya quiya, marajiniji shipinishano. Majaari pa cuaqueya quiarijia socua maninia Adán cuaqueyajiniji. Pa samiitiasacariuhua, pa cuaqueya cutaraari quiniutianiya mariyata juhua cuno jiyocuacaanu Quijia cuaqueya. Nojuacajaari pa samiitianinia Jesucristo.

⁵⁰ Cuarta Pueyaso muerasunaa, maja pa naata Pueyaso rupeunu nio pa cuaqueyataja. Pa rishiyashijia cuaqueyari maja na naata cuno pueyaracaanu Quijia rupeunu. ⁵¹ Naajaa, cua tojitiare. Nia pohuatareera pueya niishishoo. Majaari puetunu pajaniyajanaa cusonuuriquianoni. Puetunu pa cuaqueyajanaa cutaraari jatanishaanutaniyani, maninia cuaqueya pa jiitianura, juhua Jesucristo cuaqueyajuahuaj. ⁵² Jiyocuacaanuji trompeta jonesesacari, pa cuaqueyari ritia jatanishaanutaniya, naatej, taa pa nimishiniuquiya ritiacuaani. Pa Jiyaniijia naacuneetoonu panishacari pajaniyata, Pueyaso trompetaari tojishaanutaniya joneseshiyano, na muerasu na jiiquioonura. Canapute macu quiyani, quiarinio cuaqueyata ritia samiitianutaniuhuari. Pajaniyajuahuaj, canapute saminio quiyajaani, pa cuaqueyari ritia jatanishaanutaniyajuahuaj, quiarinio cuaqueya pa jiitianurajuahuaj, shaajeyashijiaca pa quiniuria. ⁵³ Cusonuuja cuaqueya cuara jatanishaaria, rishijia cuaqueya pa jiitianura saniniuuja. Nio moqueja pa cuaqueyani, jataniniu panishiyari, maninia cuaqueya pa jiitianura, pueyaracaanu pa quiniuria Pueyasota.

⁵⁴ Moqueja pa cuaqueya jaara maninia cuaqueyara jatanishaarohua; pa rishiyashijia cuaqueya jaara rishijia cuaqueyara jatanishaarohua; jiyacaritij pocua niishirini tariucuacaanu sequesanoori tari tohuateeree. Naa naajiotasaaquiaari tariucuacaanu Pueyaso Rupaajiniatej:

“¡Jejee! ¡Pa Jiyaniijiaari na muerasu mashiquirii macunucua quiquojiniji! ⁵⁵ Cusojuananaa, ¡quiaaqui tari shocotasaaree! ¡Quiaari shocotasaaree! Sesaacanaa, quia cusojutajaari juhua mohuacara quiquii cumaacaaju. ¡Shaajeconoori samiitiacoree!”

⁵⁶ Pueyanaa, puetunu pajaniyajanaari cusonuuquiaa sesa miijiaca pa quiniucua mijiriani. Paari sesa quiquiaani pa tojiyaquishacari tariucuacaanu Moisés Rootasano Pueyasojiniji. Naaratej, puetunu pueyajanaari cusonu niishiya. ⁵⁷ Naajaa, pa Jiyaniijia Jesucristo miishanota pocuara, Pueyasoori pa mashiquiquiaa pa cusoyaquiniuu-cuaji. Naaratej, paari Pueyaso sequequiaani: “¡Paacarasho canaa Pueyasonaa! Quiaacuajaari canaa shocotaniniutianiya cusonu, quia Niyanu cusonuucua canaacuara, pueyaracaanu canaa quiniuria quia shuriucua. ¡Jiyanoehua paacarasho!” Paari naa maniniuhuaqueetaa pa Que Pueyasoni.

⁵⁸ Naaratej cua panishano pueyanaa, nia numaama nia racatare cua niishitiojosano niajaniya. Saa Pueyaso rupaaja nia tojitiare, maja tamaatia niishitiojosano. Pa Jiyaniijia nia poonijiore socua jiyanoehua,

na panishano nia miiniuria saaja. Pa Jiyaniijiara pa poonijiosanoori maja najuhuana na quiniu.

16

Casamiijiuniucua Pueyaso pueyara cumaneeca reratesacari

¹ Quiarijiani, nia riucuaereera taa nia miiniutianiyani, cumaneeca nia reratenura casamiijiuniucua. Cuno cumaneecani, paari na jiyaronutaniya parta Pueyaso muerasura Jerusalén tiacajiniani. Niaa cuaara maninia miiria, mariyata taa cua rootacanucuaaja Pueyaso pueya maapue Galacia jiyajiniani. ² Naa nia miiritij. Puetunu domingo jucajanaa, puetunu pueyajanaa cuaara racataara tama na niquitiosocoriquiano cumaneeca, teyano nia niqutionutaniya niarta Pueyaso muerasuracuajani. Naa nia racatare juhuataja nia niquitiosocoriquiano cumaneeca puetunu semaanajanaa, maja na reratesaanura shusha cua tiuquishacari niaacua. ³ Niocua maninia pueya saquiriojore, nia niqutiojosano cumaneeca nojori patanura Jerusalén tiacajinia. Naacujitij, cua tiuquishacari niaacua, janiyari cua naajioneeca jiyarotanutaniya nojorini. Naajioreera parta Jesuucua tiunuaa pueyacuara Jerusalén tiacajinia, nojori cuaara shuquiriaatia maseera cumaneecata nia jiyarotasano pueya. ⁴ Janiya jaara Jerusalén tiacajinia quianu panirini, cumaneeca jiyatanaari na naata cuata quianujuhuaj.

Pablo naquerejosacari

⁵ Cua quiasacari niaacua, janiyari Macedonia jiya tajiniu paniyani. Na nuhuaji, janiyari niaacua tiuquiniutianiyani. ⁶⁻⁷ Janiyari maja ritia cua tajiniu paniniu niajaniya. Niaata camueenujunu paniya pueyara-caanunijia, pa Jiyaniijia jaara naa paniyajuhaaj. Janiyari shuniya shocotenu paniya niaatani. Na nuhuaji, nia naata cua naacunu cua jiiitanura cua panishano, cua pasocoriquiano tee Pueyaso jiyaronu paniya janiyacuajani. ⁸⁻⁹ Janiyari niya Éfeso tiacajinia camueenujiyajaarani, Pentecostés juuca cua sashishacari. Queraatia pueyari Jesucristo rupaa tojitianu paniya niya. Naajuhuj, queraatia pueyari Jesucristo rupaa ruuretaa saniniuujia. Naaratej, janiyari jiyanohua socua Jesucristo rupaa pohuatanu paniyajaa Éfeso pueya niquiarani. Naajaa, janiyari niaacua quianutaniyani Pentecostés juucara queranacunuunu nuhuaji.

¹⁰ Timoteo jaara niaacua tiuquishii, niocua na cumaquiri Pueyaso rupaa na pohuatanura na puereyaquiniutia. Timoteocuajaari pa Jiyaniijiara poonijioquiaa mariyata taa cua poonijioquiaacuaani. ¹¹ Naaratej, maja Timoteo nia rerequetenu. Niocua na naacue saniniuujia, cucua na tiuquiniuhuara shuquiriaatia, maninia nia miiniuucua nera. Janiyari niya na sashiya parta Pueyaso muerasutani. ¹² Janiyari Apolota pocoojoriquiaani. Janiyacuajaari na nenecojoriquiaa juucuaani, niaacua na quianura parta Pueyaso muerasuta quiarijiani. Nojuajaari saaja cua sequeree majana na quianu paniniu quiarijiani. Tamacari niaacua quianutaniyaquiniaari, jaara na naata quiri.

Pablo sequesano, naajionu na puecasacari

¹³ Cuarta Jesuucua tiunuaanaa, niishiriojuuca nia quiri. Jesucristo rupaa nia niishiri maninia, seetanujanaa na tojitianaara nia quiniuria. Juhua cumueeca mashaja nia quiri Pueyaso Sohuanu cumaacata, pa

Jiyaniijia panishano nia miiniuria. ¹⁴ Puetunu nia miishanojuanaa cuaara quiiria seetanujuanaa nia paniniutia.

¹⁵ Pueyanaa, niaari niishiya Estéfanasri necohuata coteenu Jesucristo tojitianaara quiquiaari cuniqui Acaya jiyajiniani. Nojoriiri Pueyaso muerasu naacuquiaa pueyaracaanu nojori paniniutia. ¹⁶ Naarate nia sequenu paniyanijia, niajaniya cuaara quiiria juhua nojori seya, nia cumaquiniuria nojori, maninia nojori miishacari. Naa nia cumaquiriti puetunu jiyano pueyjanaa, noo pojori canapuate naa maninia mi- quiaa Pueyaso muerasucujani.

¹⁷ Jiyanohua shuquiririucuaanijia Estéfanas tiuquishacari niajaniya- jiniji Fortunatota, Acaicotajuhuj. Nojoriiri cua shuquiriritiucuaa nia niti, cua jiaatiasacari cua niquiniuria niajaniya juucua. ¹⁸ Nojoriiri coojia cajitiriucuaa puera cua niishiriojiyaquiniuucujani niaacua. Nojori naasucuaari nioojia cajitiquianujuhuj, nojori pohuatasacari niajaniya janiyajiniji. Nijaniya cuaara shuquiritiaara nojori, naa nojori mi- ishacari maniatej.

¹⁹ Pueyaso muerasu maapue niya Asia jiyajiniaari cua sequerucuaa, cua saruhuatanura niajaniya. Aquila, Priscilano, nojoriiri jiyanohua nia saruhuataajuhuj, narta Jiyaniijia muerasu nia quiniuucujuhuj. Pueyaso pueya maanuuri nia saruhuataajuhuj, nooj, teyanote Aquila tiajinia rerejoquiaacujani. ²⁰ Puetunu parta Pueyaso muerasujanaari niya nia saruhuataajuhuj. Nia sarhuatatoosacari, nia sarhuatatoore seetanujuanaa Pueyaso paniniutia.

²¹ Quiarijiani, tama cua juaashiquiataaja saaja nioniyojua naa- jioreeraj, cua saruhuatanura niajaniya. Naacujitij, niocua niishiri nio naajioneeri seetanujuanaa janiyajiniji.

²² Cante maja pa Jiyaniijia panijia quiyani, Pueyaso cuaara jataara cuno, saniitosocoriquiano.

Jiyaniijianaa, quia nimiohua!

²³ Pa Jiyaniijia Jesu cuaara cumaquiiria niajaniya na Sohuanuta. ²⁴ Janiyari puetunu niajanijanaa paniyani Jesucristo paniniutia. Tar- iucujani, cua panishano pueyanaa.

TANEE PABLO NAAJIONEE CORINTO TIACAJINIA QUINIAA PUEYASO PUEYACUARA

Pablo saruhuatasacari Pueyaso pueya maanu Corinto tiacajinia

¹ Janiyari Pabloni. Pueyaso panishacari, janiyari Jesucristo jiyaramiquishanora jiyatesaaquiaari na rupaa cua poojotanurani. Janiyari Timoteota naajiya nio niaacuarani. Nojuajaari parta Pueyaso pueyano. Canaari Corinto tiacajinia quiniaa Pueyaso pueya maanucuarara naajiyani, puetunu Acaya jiyajinia Pueyaso tojitiajaca pueyacuaraajanaanio. ² Pa Que Pueyaso, mariyata pa Jiyaniijia Jesucristo cuaara cumaquiiria niajaniya. Nojori cuaara jiyateera niajaniya juhujaniya quijiaca nia quiniuria.

Pablo miishacari naquiya

³ Pa Jiyaniijia Jesucristo Que pa shuquiritiare. Nojuajaari pa Quejuhuaj, pocua taraajeja cutara. Nojuajaari pa Pueyaso, pueyaracaanu pa cumaniijiana. ⁴ Nojuajaari pueyaracaanu pa cumaniijaquiaa naquiya pa miishacari. Naacuajiti pa naata cumaniijianu tamasacajuahuaj, naquiya nojori miishacari, taa Pueyaso cumaniijaquiaa pajaniyacuaani. ⁵ Seetanujuanaa, Cristo rupuejaca pa quishacari, paari naquiya miishaaquiaajuhuj, taa naquiya na miishaaquiaaricuaani. Naajaa, nojuajaari pa cumaniijaquiaa shuquiriaatia pa quiniuria. ⁶ Naacuajitij, canaa jaara naquiya miishaaquiaa Cristojiniji canaa pohuatanuucuanu, Pueyasoori canaa cumaquiiciaa saaja canaa rejeretanura. Naacuajitij, majaari canaa tarinitianu Pueyaso Rupaa pohuatanu nia niquiara, seetanujuanaa Pueyaso pueya nia quiniuria, nia cumaniijiasaanurajuhuj. Naajuhuj, Pueyaso jaara canaa cumaniijaiecuaa, naacuajitij, canaa naata nia cumaniijanujuhuj. Canaari nia cumaniijaani, maninia rejeretajaca nia quiniuria naquiya nia miishacari, taa canaa rejere-taquiaacuaani naquiya canaa miishacari. ⁷ Canaari seetanujuanaa niaacua tiuyani, niaari cumaniijiasaanutaniya, maninia rejeretajaca nia quiniuria. Niaari naquiya miiquiaa Pueyaso muerasu nia quiniuucua-juhuj, taa canaa miiquiaa naquiycuaani. Naacuajitij, Pueyasoori nia cumaniijanutanijuhuj, taa na cumaniijaquiaa canaacuaani.

⁸ Canaa panishano Pueyaso pueyanaa, canaari paniyani nia niishiniuria taa canaa tacaquianuni, jiyano-hua naquiya canaa miishacari Asia jiyajinia. Canaari puera jiyano-hua taraatia miiquianuni. Jiyacari, majaari tari canaa jitianu quiriquiaa cumaaca canaa rejeretanura socua. Canaari jyaniriquiaani maja naasucua tari canaa rishiniu quiniutianiya. ⁹ Seetanujuanaa, canaari jyanijiani Pueyaso naasucuaari nareja canaa shanacunutaniya canaa cusonuunura. Naajaa, naacuajitij, Pueyasoori jiyacari canaa niishitiriquiaa maja canaa tiuuniuria tama canaacuaajaaja, saaja nocua canaa tiuuniuria cutara. Nojuacuajaari macunucua samiitianijiojua. ¹⁰ Nojuajaari canaacua taraajecanu. Cocuaatia canaa miishacari, canaa cojuacanuuri maja canaa cusonuunura. Nojuacuajaari socua canaa cojanutaniya nocua canaa tiuuniucua, niaa jaara canaacuara secojorejuhuaj. ¹¹ Naacuajitij, Pueyaso miishacari

maninia canaa, queraatia pueya secojonuucua canaacuarajuhuaaj, queraatia pueyari Pueyaso sequenutaniya, “paacarasho”.

Pablo pohuatasano casaara na quiaaquiquiaari Corinto pueyacuani

¹² Canaari shuquiriaatia quiyani canaa niishishacari canaari maninia quijiaca quiquiaari canaa quishacari niaatani, Pueyaso niishiyashijia niquiaranio. Majaari canaa sapojonu quiija niajaniya. Canaari seetanujuanaa niaacua taraajejani Pueyaso jiyatenuucua canaa nia panijia canaa quiniuria. Canaari naa maninia quiquiaari niaatani, saaja Pueyaso cumaquishacari canaa, maja tama canaa niishitiajatajaaja. ¹³ Cunora, janiyari nia nequesotaani, ¿casaara nia cushitiquianu canaa naajione nia serojosacarini? Puetunu canaa naajioneecajiniajanaa majaari canaa naajionu quiquiaa jiyajeneta casaa, nia cushitiinuria. Puetunujuanaacuajaari maatia niishishaatia quiquiaa nia serojosocoriquiano. ¹⁴ Niaacuajaari tari secaja niishiya taa canaa paniya jiyanohua niajaniyani. Pa Jiyaniijia Jesucristo tiuquishacariuhua, niaari jiyacari seetanujuanaa canaa timitianutaniya, maatia nia niishishacari canaari seetanujuanaa nia panijia quiquiaarini. Naajuhuaaj, niajanitari canaa timitiasano quiniutianiyajuhuaaj.

¹⁵⁻¹⁶ Cua jyanishacari niaa naasucuaari seetanujuanaa cua panijia, taa cua paniquiaa niajanियacuani, janiyari cunora naquerejocanu niaacua juucuan. Niiquiji cua quiasacari Macedonia jiyajiniara, janiyari nia niquiniu paniriquiaa juucua nia tiacajiniani. Janiyari Pueyaso rupaata nia cumaquiniu paniriquiaa juucua cunoco cua tajishacarini. Naacuajitij, janiyari niishiriojoriquiaani cua naata naasucua nia shuquiritiniu Pueyaso rupaata, cua quiasacari Macedonia jiyajiniara, naajuhuaaj, cua tacatesacariuhua cunocojiuhua. Janiyari niishiriojoriquiaani nia naata naasucua cua naacunu cua panishano-tajuhuaaj, Judea jiyajinia cua quianuhuaa. ¹⁷ ¿Niaateeri jyaniquianu janiyari nareya nia sequecanuni, naa cua sequesacari coteenujanaa cua naajiojiniatej? ¿Niaateeri jyaniya, naa cua naquerejosacaritij, janiyari tama cua panishanojuaja miiniu paniquianuni, maja Pueyaso panishano? Seetanujuanaa, majaari coojia cua niquijiotenu quiqianu naa cua sequesacari niajaniyatej. ¹⁸ ¿Janiyateeri coojia niquijiotejani? Maja. Canaa pohuatasacari Pueyaso rupaa nia niquiara, ¿canaateeri na jataniquiaani? Pueyasocujaari niishiya, na rupaa canaa pohuatasacari, majaari canaa jataniniu quiquiaa. Pueyaso rupaacuajaari seetanujuanaa. ¹⁹ Naajuhuaaj, Neyanu Jesucristoori jataashijia. Silvano, Timoteo, janiyajuhuaaj, canaari nojuajiniji nia niquiara pohuataanaani. Paari nojuajiniji niishiyani puetunu Pueyaso sequesanojuanaari seetanu rupaajanaa cutara. ²⁰ Jesucristocujaari tari tohuateequiaari puetunu tariucuaaanu Pueyaso sequesanojuanaa pajaniyara. Naacuajitij, pa tiuushacari Jesucristoocua, paari niishiyani, Pueyaso sequesanoori seetanujuanaa. Naaratej, pa shuquiritiasacari Pueyaso, paari na sequequiaani: “Seetanujuanaari canaa quia sequesano, Pueyasonaa”. ²¹ Jesucristo rupuejaca pa quishacari, Pueyasocujaari pa cumaquiquiaa, socua maninia na tojijia canaa quiniuria, niajanijuhuaaj. Pueyasoori pa niquitioquiaari na Sohanu, seetanujuanaa na muerasu pa quiniuria. ²² Pueyaso Sohanu pa jittiasacari poojajinia,

naacuaajitij, paari tari Pueyaso sesa jiiitiaa juhua naajiotasano poojia-jiniani, saa neraja pa quiniuria. Na Sohanu pa jiiitiasacari poojiajinia, paari niishiyani, paari puetunu na sequesanojuanaa maseriquianoni.

²³ Niaari cua jiyaniquianu janiyari najuhuana coojia niquijotejani, niaacua cua quiaaquiniuucua taa cua sequecanu coteenu niajanijacua-jani. Pueyasocuajaari niishiya, majaari cua quianu quiquianu niaacua Corinto tiacajinia, maja cua tacaatiniuria niajaniya, janiya jaara nia nacasusee jiyanoahuani. ²⁴ Canaari maja nia jiyaniijiani canaa shiniujiuniuria puera niajaniya, Jesuucua nia tiuuniuria. Niaacuajaari tari maninia Jesuucua tiuujiaca. Canaari saaja niarta Pueyaso pueyani, canaa cumaquiniuria niajaniya, socua pa Jiyaniijia tojijiaca nia quiniuria, seetanujuanaa shuquiriaatia quijiaca nia quiniuria.

2

¹ Janiyari tama sequecanujuaanijia, maja juhuari niaacua cua quianu quiniutianiya, maja cua taraajetenura niajaniya. ² Janiya jaara nia taraajetere cua nacasusacari niajanijani, ¿cantucua cua timitiri quenaajani? ¿Cua taraajetesano pueyateeri cua shuquiritiniutianiya? Maja. ³ Naaratej, janiyari niaacuara naajiocanuni, cua nacasunura juhuacarijia niajaniya, cua taraajeyaquiniuria niaacua cua tiuquishacari. Janiya jaara sashiri cua nacasunura niajaniya cua tiuquishacari niaacuani, janiya maara jyanohua nia taraajetereni, jecatoojua nia quishacari. Saniniujia, niaa jaara juhuacarijia jecare puetunu sesa nia miishanojuanaa, naacuaajitij, cua tiuquishacari niaacua, niaari cua cunjiniutianiya maninia, shuquiriaatia pa quiniuria jatiqiu. ⁴ Janiya jaara niaacuara naajiocanu coteenu cua naajioneeni, janiyari jiyacari jyanohua tacaariquiaa niaacuani. Coojiaari jyanohua taraajeriquiaa. Janiyari jiyacari nujuqueriquiaajaaniuhuj. Majaari cua naajionu quiquianu cuno naajionee cua taraajonura niajaniya. Cunoori seetanujuanaa quiquianu cutara cua niishitiniuria niajaniya, taa cua paniya jyanohua niajanijani.

Cuno sesa miijia cuaara jiyanooshaaria jaara tari pishirii sesa na miiniujiniji

⁵ Cuno sesa miijiaari maja na taraajetenu quiquianu saa janiyaja. Quera puetunu niajanijajanaa naasucuaari taraajecanu cuno pueyano miiniuucua sesa. Seetanujuanaa, majaari puetunu niajanijajanaa taraajenu quiquianu. Janiya jaara sequereni: “Puetunu niajanijajanaari taraajecanu”, janiya maara puera na maateyani. ⁶ Puetunu niajanijajanaa jyatenuucua nojuaja saniitiosano na quiniuria, nojuajaari tari noojia tacatorohua sesa na miiniujiniji. Tariucuja. Majaari socua na saniitionu. ⁷ Quiarijiani nojuaja nia jyanooriohua. Nia cumanijiarohua, nojuaja mariqiu puera tacaariiri jyanohua na taraajesacari. ⁸ Nocuaij janiyari jyanohua nia rootaani, maninia nia miiriohua cuno pueyano, na niishiniuria niaaqui na paniyajaa. ⁹ Janiyacuajaari cunora niaacuara naajiocanu tarini, taa nia miiniutianiya cuno pueyanoni, cua niishiniuria niaate seetanujuanaa pa Jiyaniijiajiniji cua rootasano tojtiajaca. ¹⁰ Cua tojitiare, cana nia jyanooriicuaani, janiyari na jyanoyajuhuj. Naacuaajitij, pueyano jaara sesa miiriquia, janiyari Cristo niqiara na jyanooquiaajuhuj, jatiqiu nia quiniuhua. ¹¹ Naaratej,

niarta Pueyaso pueya nia jiyanooriquia, Sesaaca mariqui pocua riuti-ocoreeri, juaajara na jiyatenura pajaniya, pa jiyanootioyaquiniuucua. Paacuaajaari maninia niishiyani taa Sesaaca niishiriojoquiaa sesa miiji-acara na jiyatenura pajaniyani, paa jaara jiyanoyashijia quiriquiani.

Pablo tacaashacari Troas tiacajinia na quishacari

¹² Janiya jaara Troas tiacajinia tiuquiquianu Jesujiniji cua pohuata-nurani, cuno pueyari jiyanohua tojtianu paniriquiaa Jesujiniji cua pohuatanura juucua. Jiyacaritij, seetanujuanaa nojori niquiara pohu-ataasaatia quiriquiaari. Pa Jiyaniijia Jesuuri juhua tiotiu riatacanu cucuaji juucua, cua pohuatanura nojuajiniji tii. ¹³ Janiyari saaja nojori tiujiacanuhuanu puera cua tacaashacari, cua riuriataaquiniuucua pa tarajanu Tito. Janiyari juucua paniriquiaani cua pohuataasaanura nijajaniyajiniji. Janiyari cunora tacaariquiaa jiyanohuani. Naaratej, janiyari Macedonia jiyajinia quiaarohuani, Tito cua pajenuhuara tii.

Pa Jiyaniijia Cristoori pa paraa pa shocotanjia

¹⁴ Janiyari jiyanohua shuquiritiaa Pueyasoni. Nojuajaari pueyaracaanu pa shocotaniquiaa pa paraca seque, pueyaracaanu pa sacuanuucua pa Jiyaniijia Cristoocua. Pueyasoori na rupaa pohuataniquiaa canaa. Naacuajitij, canaa niishishano Jesucristojinijiiri juhua shanohua jaanutaja jaanujuquiaa pueya tajinia puetunu tiquiyocujanaa. ¹⁵ Pueyasora, canaari juhua shanohua jaanutajani, Cristo quishacari canaa jiuujajinia. Nojuajiniji canaa pohuatanu-usacari, canaari puetunu pueyarajanaa jaanuquiaani: Pueyaso muerasurano, saniitiosaariquiano pueyaranio. ¹⁶ Saniitiosaariquiano pueyara, Jesucristo rupaari mocuaatia jaanujua saniniuujia. Naa nojori soonuucua Jesucristo rupaatej, nojoriiri shaajasaariquiano cutara. Pueyaso jiyanooshocoriquiano pueyara saniniuujia, Jesucristo rupaari shanohua jaanuquiaa. Naa nojori paniniuucua Jesucristo rupaatej, nojori cutaraari pueyaracaanu quijiacara jiyatesaanutaniya. ¿Canapueeteeri seetanujuanaa Pueyaso jiyaramiquishanoni, na rupaa nojori pohuatanura, pueya na tiutiniuria Jesucristoocuanu? ¹⁷ ¿Noo pojoritii, najuhuana Pueyaso rupaa pohuatanuuquiaa, pueyajiniji na masejonura cumaneeca na sajonuunutatej? Maja. Majaari canaa pohuatanu quiquiaa Pueyaso rupaani, pueyajiniji canaa masejonura cumaneeca. Canaa cutaraari seetanujuanaa Pueyaso jiyaramiquishano pueyani, na rupaa canaa pohuatanura. Canaari seetanujuanaa pa Jiyaniijia rupaa pohuataquiaa Pueyaso niquiarani, Cristo rupuesano canaa quishacari.

3

Quiarinio rupaa Jesucristojiniji

¹ Naa canaa naajiosacari niaacuaratej, niaa naasucuaari jiyaniya canaari tama canaa cuaqueyajinijiaaja nia pohuathuaniuhuj, canaacua nia tiuuniuria. ¿Niaateeri pa niishishano pueyanojiniji naajione paniya, canaajiniji na pohuatanura coteenu nijajaniya, canaacua nia tiuuniuria cutara? Tamasaca cutaraari naa miiquiaa. Niaacuaajaari canaa niishijaca cutara. Puetunu tiquiyocujanaa quijiaca pueyari canaajiniji niishiyacuaaja, canaari seetanujuanaa Pueyaso jiyaramiquishano pueyani, na rupaa canaa pohuatanura.

Naacujitij, majaari quenaaja canaa paniniu, canaa nia niqutionura nia naajione, canaa patasocorigiano, tamasaca tiuuniuria canaacua. ² ¿Naajioneetucua casaara panishaareni? Puetunu pueyajanaari na naata niishiniucuaaja canaari seetanujuanaa Pueyaso jiyaramiquishano pueyani, nojori niishishacari taa canaa paniya jiyanohua nijaniyani. ³ Cristocuajaari nioojiajinia naajiotaquiaari na rupaa, nojuajiniji canaa pohuatanuucua nia niquiara. Majaari na rupaa na naajiotanu quiquiaari nioojiajinia minianata. Seetanujuanaa na Sohuanuta na naajiotaquiaariiri. Majaari na naajiotanu quiquiaari saajianeecua. Seetanujuanaa nioojiajiniajanaa naajiotaquiaari na rupaari. Naa jatanishano pueya nia quishacaritij, puetunu pueyajanaari niishiya niaari seetanujuanaa Pueyaso pueya, nojuajiniji canaa pohuatanuucua nijaniya.

⁴ Naacujitij, canaari seetanujuanaa niishiyani canaari Pueyaso jiyaramiquishanoni. Cristocuajaari naa canaa niishitiquiaa maninia. ⁵ Majaari canaa niishiriojonu canaa miijiosanoori tama canaa cumaacata canaa miishanojuaja. Maja. Canaari saaja Pueyaso cumaacata poonijioquiaani. ⁶ Na cumaacata, nojuajaari canaa jataniquiaari quiarinio na rupaa pohuatanaa canaa quiniuria. Quiarinio na rupaari seetanujuanaa Pueyaso Sohuanu cumaacaraca cutara, pueya na jataniniuria seetanujuanaa Pueyaso niquiohua nojori quiniuria. Tariucuacaanu, Pueyaso rupaari naajiotasano quiquiaari pueya tojishocorigiano juucua. Cuno rootasanojiniji, pueyari niishiquiaari nojoriiri shaajeriquiano na numaa shama nojori tojiniucua saaja. ⁷ Naajaa, cuno rootasano saajianeecaacua quejasanoni, cunoori jiyanohua maninia quiquiaari. Naacujitij, Moisés jaara cuno rootasano niishitiojosaariquiaa Sinaí tuhuananuucua, Pueyaso shacantuucaari nocua pacuriquiaa. Naacujitij, na rosesacariuhua Israel pueyacu, na jiquiocoori puera shacantuuca quiquiaariija. Naaratej, narta Israel pueyari maja na naata na jiquioco niquiniu quiquiaari. Na nuhuaji, cuno shacantuucaari jacaria maquesaquiariuhua. ⁸ Quiarijiani, Pueyaso Sohuanuuri poonijioquiaa pueya jiuujiajinia saniniuujia, nojori tiuuniucua canaa pohuatasanoocua. Cunoori socua shanohua shacantuuca cutara Moisés jiquiocojiniji. ⁹ Moisés pohuatasano Pueyaso rootasano nojuajani, cunoori seetanujuanaa jiyanohua maninia quiquiaari. Naaratej, Moisés jiquiocoori shacantuuca quiquiaari. Naajaa, na pohuatasanojiniji, Israel pueyari saaja niishiquiaari, Pueyasora, nojoriiri sesa miijiaca quiquiaari. Saniniuujia, quiarijiaari socua jiyanohua maninia. Canaa pohuatanuucua quiarinio Pueyaso rupaa Jesucristojiniji, pueyari nocua tiuquiaa seetanujuanaa sesa miyashijiacara nojori jiyatesaanura Pueyasora. ¹⁰ Pueyaso jiyatenuucua Moisés tariucuacaanu na rupaa pohuatana na quiniuria, Moisésri shacantuucara jataquiaari. Quiari naataja saniniuujia, Pueyasoori canaa niishitiquiaari socua jiyanohua maninia rupaa canaa pohuatana Moisés pohuatasanojiniji. ¹¹ Moisés shacantuuca maquesaquiariuhua, cunoori maja na jataniniu quiquiaari Israel pueya. Quiarijia saniniuujia, Pueyaso Sohuanu cutaraari pa jataniquiaa seetanujuanaa pueyaracaanu shacantuuca quijiaa pa quiniuria.

¹² Quiarijiani, canaari niishiyani paari pueyaracaanu shacantuuca

quijiacarano cutarani. Canaari cunora canaa timiniutia pohuataquiaa Pueyaso rupaa canaa puereyaquiniutiani. ¹³ Majaari canaa miiniu taa Moisés miiquiaaricuaani. Nojuajaari quenaarue toqueta na jiquioco mishiquioquiaari narta Israel pueya niqiuayaquiniuria na shacantuuca maquesaano. ¹⁴ Israel pueya jiuujiaaari juhua toqueta mishiquiosano quiquiaarijuhuaj. Cumajiuujiaaca nojori quiniuucua, majaari Israel pueya niishiniu quijia Moisés caminiujiushano nojoriria. Cuarta Israel pueyari naa quiyajaa. Majaari nojori niishiniu quiquiaa nojori serojosacari tariucuacaanu Pueyaso sequesano nojoriria. Cuno, juhua toque nojori jiuujia mishiquioyajaani, cunoori juhuanajuaja tii quiyajaa. Saaja Jesucristo cutaraari na naata pueya jiuujia riatanu, pueya niishiniuria maninia na rupaa cutara. ¹⁵ Quiarijiaari naajuhuj. Moisés naajioneeca jaara serojosaariquia Israel pueya niquiara, nojori niishitijaari juhua toqueta mishiquiosano quiyajaa, maja nojori niishiniuria nojori tojishano. ¹⁶ Quiarijiani, pueyano jaara pa Jiyaniijiaacua tiuuri, cuno toqueeri juhua na niishitijajiniji jaariutiasaaquiaa, maninia na niishiniuria Pueyaso Rupaa. ¹⁷ Pa Jiyaniijiaari Pueyaso Sohuanujuhuanajaj. Pa Jiyaniijia Sohuanu jaara poojiajinia quiya, paari Sesaacajiniji jaariutiasanoni, maja pa camarnu na quiniuria socua. Naajuhuj, majaari tari poojia quiniu juhua toqueta mishiquiosano. ¹⁸ Naacuajitij, puetunu pajaniyajanaari juhua niquitiu nenecuaquiaani, pa Jiyaniijia shacantuuca pacusacari pocua. Cunoori pa sohuanu rupuetosacari nata. Naacuajitij, nojuajaari pueyaracaanu pa jataniquiaa jacaria, socua shacantuuca quijiaa pa quiniuria juhua nojuaja, na Sohuanu poonijosacari poojiajinia.

4

¹ Naa pa Jiyaniijia poonijosacari canaa jiuujiajiniatej, majaari canaa pishiniu quiquiaa canaa poonijosacari nera. Pueyaso jiyanooniucua canaa, nojuajaari canaa jiyatequiaari na rupaa pohuatanaa canaa quiniuria. ² Majaari canaa miiniu quiquiaa cararaatia casaa, taa tamasaca miiquiaacuaa jiyasohuani. Majaari canaa pohuatanu quiquiaa Pueyaso rupaa canaa cuaracashiniutia. Naajuhuj, canaa pohuatasacari, majaari canaa jataniniu quiquiaa Pueyaso rupaa. Canaari seetanujuaanaa maatia pohuataquiaa Pueyaso Rupaani, puetunu pueyajanaa niishiniuria nojoriiri na naata canaacua tiuuniu. ³ Teyano pueyate canaa pohuatasano Jesucristojiniji niishiyaquiyani, cuno pojoriiri shajasaariquiano. Nojoriiri niishiyaquiya, juhua toqueta mishiquiosano nojori jiuujia quishacari. ⁴ Pueyaso rupaacua tiuyashijiaca nojori quishacari, nojori jiyaniijia Sesaacaari nojori jiuujia jiyatequiaa juhua cariyojuarura, Pueyaso Rupaa mariqui nojori jiuujia cuhuatareeri. Nojori jaara Pueyaso rupaacua tiuuriquia, nojori maara niishiri, Cristoori seetanujuaanaa shacantuuca quijia cutara, juhua na Que Pueyasojuhuaj. ⁵ Canaa pohuatasacari Pueyaso rupaa nijaniya, majaari tama canaajiniijiaaja canaa pohuatanu quiquiaa nia timitianura canaa. Canaari saaja nia pohuataquiaa cutarani, Jesucristoori seetanujuaanaa Jiyaniijiajanaa cutara. Canaari tama canaa cuaqueyajaaja jiyatequiaa juhua nia seya canaa quiniuriani, canaa panishacari pa Jiyaniijia Jesu. ⁶ Canaari naa maninia miijiacani, Pueyaso cuhuatanuucua canaa jiuujia. Jiya shipinishacari, nojuajaari sequequiaari:

“Cuhuashiqui cuaara coretaara ninishiquiji”.

Quiarijiaari naajuhuaaj, nojuajaari poojia cuhuataquiaajuhuaaj, pa niishiniuria nojuajaari tojetaarucuaajanaa maninia quijia. Paari cuno niishiyani, Jesucristojiniji pa niishishacari. Nojuajaari seetanujuanaa shacantuuca quijia cutara, Pueyaso Niyanu na quiniuucua.

Paari maninia quijiaa quiniutianiyani saaja Pueyaso rupaacua pa tiuushacari

⁷ Cuno cumaaca canaa na jiiitiaani, cunoori Pueyaso cumaaca cutara. Saniniuujia, canaa cuaqueyari cumaacaaju, saaja juhua marajiniji panishano pataco. Naacuajiti niishishiyari, cuno cumaaca pueya jatanijiani, cunoori seetanujuanaa Pueyaso cumaaca, maja tama canaa cumaacajaaja. ⁸ Naacuajitij, canaa paraa cosejosacari canaa, majaari canaa tarinitianu quiquiaa Pueyaso rupaa pohuatanu, cuno cumaaca canaa jiiτίαςacari. Jiyanojua canaa tacaashacari, naajaa, majaari canaa tarinitianu quiquiaa Pueyasora poonijionu. ⁹ Canaari naquiya miishaaquiaaaniuhuaaj. Naajaa, majaari Pueyaso cartenu quiquiaa canaa. Naajuhuaaj, canaari juhua quiaquesano jiyocuara jaqueroosaaquiaaaniuhuaaj. Naajaa, majaari canaa cusojuasaanu quiquiaani. ¹⁰ Puetunu tiqiyocuajanaa canaa quishacari, canaari pueyaracaanu tama canaa cuaqueyajaaja panitiaquiaani, taa pa Jiyaniijia Jesu panitiaquiaari tama na cuaqueyajaaja pocuaracuaani. Naacuajitij, canaa na niquitiosano cumaaca poonijosacari canaa rishiyashijia cuaqueyajinia, pueyari niishiquiaa, Jesuuri seetanujuanaa saminiio. ¹¹ Mijiria canaa quishacarijia, pueyari pueyaracaanu canaa puecoonu paniquiaani, Jesujiniji canaa pohuatanuucua. Naacuajitij, saminiio na jiiτίαςacari canaa, Jesu cumaacaari niqishaaquiaa rishiyashijia canaa cuaqueyajinia. ¹² Canaari juhua piriuquiuniuquuaani, canaa pohuatanuucua Pueyaso rupaa nia niqiuara. Niaari pueyaracaanu rishijiacara quiriquiano saniniuujia, canaa pohuatasanoocua nia tiuuniuucua.

¹³ Tariucuacaanu Pueyaso Rupaajinia, supuetana David naajiotasanoori naa sequeya:

“Pueyasooqua cua tiuuniuucua, janiyari pocuareeni”.

Canaari naajuhuaaj. Pueyasooqua canaa tiuuniuucua, canaari na rupaa pohuataquiaani. ¹⁴ Canaa jaara puecoosaariquia na rupaa canaa pohuatanuucuaani, naajaa. Canaacuaajaari niishiyani, pa Jiyaniijia Jesu Samiitianiacuaajaari canaa samiitianijionutaniuhuaajuhuaaj, Neyanu Jesu rupuesano canaa quiniuucua. Pueyasoori canaa rijionutaniya puetunu nijaniyatajanaa, pueyaracaanu na shuriucua pa quiniuria. ¹⁵ Naacuajitij, canaa jaara rejeretaquiaa naquiya canaa miishaanu Pueyaso rupaa canaa pohuatanuucuaani, puetunu cunojuanaari niaacuara, maninia nia quiniuria Pueyasora. Naa Pueyaso jiyanooniucua nijaniyacuaatej, socua queraatia pueyari na timiniutia na sequenutaniya, “paacarasho”. Pueyasoori jiyanojua shuquiritiasaanutaniya, queraatia pueya na jiyanooniucua.

¹⁶ Naaratej, majaari canaa pishiniu na rupaa canaa pohuatanura. Canaa cuaqueyari saaquianoshiya. Naajaa, canaa jiuujiaari saniniuujia puetunu juucajanaa socua mashajashiyacujua. ¹⁷ Janiyara, puetunu naquiya canaa miishacarijanaa mijiria, cunoori secaja, rupaquijiajuhuaaj. Cuno naquiya miiniu canaa rejeretanuucua, jPueyasoori cunora

jiyanohua maninia miiniutianiya canaa! Cunora, canaari shacantuuca quijiacara jatanishaanutaniyani, pueyaracaanu rishijiaca canaa quiniuria. ¹⁸ Naaratej, majaari canaa jiaatianu quiquiaa canaa jitianura mijiria canaa niquishano casaa. Canaa cutaraari Pueyaso jiiitasano niquishoo casaacua jiaatiaquiaani. Mijiria niquishano casaari saaja shaajeja casaa. Pueyaso jiiitasano pa niquishoo casaa saniniunijia, cuno cutaraari shaajeyashijia.

5

¹ Mijiria pa quishacarijia, nio pa cuaqueyari saaja juhua suhuorotu quiya pa sohuanura, nareja juhua rucoonaa pa quishacari mijiria. Mijiria pa jiiitasano pa shoque jaara cusoquee, paacuajaari niishiyani, paari tari jiiitaa tamonu cuaqueya jiyocuacaanuni. Cuno cuaqueyari juhua shanohua tia, Pueyaso shipinishano pajaniyara. Cuno cuaqueyari pueyaracaanu rishiniutianiya pa sohuanu quiquiora. Cunoori maja pueyano shipinishano. ² Mijiria canaa quishacarijia nio canaa sohuanu suhuorotujiniani, canaari taraatia miishaquiaani. Cunora, canaari juhua quietojoquiaani, canaa jiaatiasacari canaa sohuanu pacusaanura jiyocuacaanu. Tii quiyacuajaari canaa sohuanuucuaaji tiasano quiquio. ³ Canaari cuno quiarinio cuaqueya cushiyonutaniya juhua toqueni, maja juhuasu canaa sohuanu quiniuria. ⁴ Nio cuaqueyajiniija canaa quishacari mijiria juhua suhuorotujinia, canaari quietojoquiaani taraatia canaa miishacari mijiria. Maja cutaraari canaa quiniu paniniu cuaqueyaju, juhua juhuasunucua. Canaa cutaraari canaa quiarinio cuaqueya cushiniu paniyani, Pueyaso shipinishano canaarani. Naacujitij, nio shaajeja canaa cuaqueyari puetunu maninia jatanishaanutaniyajanaa Pueyaso cumaacata, pueyaracaanu rishijia cuaqueyaraca canaa quiniuria. ⁵ Pueyasojuanaacuajaari na muerasura pa saquiriojoquiaari, naa na jataniniuria pajaniyatej. Naaratej, nojuajaari na muerasu niqutioquiaa na Sohuanu, pa niishiniuria nojuajaari seetanujanaa naa pa miiniutianiya.

⁶ Naa canaa niishishacaritij, majaari canaa tacaaniu quiquiaa. Canaacuajaari niishiyani nio cuaqueyajinia canaa quishacarijia, majaari juhuanujuaja pa quiniu pa Jiyaniijia shuriucua. Naacujitij, paari tucuacaanu quiyajaani pueyaracaanu pa quijarano quiquojiniji. ⁷ Cunora, mijiria canaa quishacarijia, majaari canaa quiniu tama canaa niishitiajataaja. Canaa cutaraari canaa Jiyaniijiaacua canaa tiuniutia quiquiaani. ⁸ Naacujitij, canaari shuquiriaatia quiya mijiriani, nocua canaa tiushacari. Naajaa, canaari nio canaa cuaqueya tarinitianuucua jiaatiaani, canaa pacunura pa Jiyaniijia shuriucua, tii canaa quiniuria nata. ⁹ Naacujitij, canaa jaara nio cuaqueyajinia quiyajaa mijiriani, naajuhuj canaa jaara na cartequeeni, canaari saaja pa Jiyaniijia shuquiritiniucua jiaatiaani. ¹⁰ Puetunu pajaniyajanaacuajaari Jesucristo taccoji na nequesoreesaqui nujuatejosaariquianoni. Cuniqiu, puetunu mijiria pueya miishanojuanaari maatia niishishaanutaniya, maninia pa miishano, sesa pa miishanonio. Na nuhuaji, pa Jiyaniijiaari maninia miiniutianiya maninia miijia. Saniniuuja, sesa miijiaacari taraatia miishaanutaniyacujua.

Pueyasoori pueya jiyanooniu panijia cutara

¹¹ Naaratej, canaa niishishacari jiyanoohua puereeta quiniutianiyari pa Jiyaniijia saniitiosacari na tojitiaashijiaca, canaari cunora saniniujuquiaa pueya tojitiniuria Pueyaso Rupaani. Pueyasocuaajari niishiya canaari seetanujuanaa nera poonijionaani. ¡Seetanujuanaa naa nia ni-shitiriquiajaaniuhua! ¹² Majaari nia jiyaniinu canaari tama canaa-jiniijiaaja nia pohuatanu coteerohuanihua, canaacua nia tiuuniuria. Canaari saaja naa nia pohuataani nia niishiniuria casaarate nia naata timitianu canaani. Canaa nia timitiare cutara, seetanujuanaa Pueyasora poonijionaa canaa quiniuucua. Naacuajiti nia naata cuno pueya tacunu canacuaji, cuno pojori canapuete sapuenu juhua maninia quijiaca niquishano pueya najuhuanacuajani. Majaari nojori niishiniu tacaaniu taamueca jiuujiaracateja nojorini. ¹³ Noojiaqueya nijaniyajiinijinio naasucuaari jiyaniya canaari juhua paateca pocuaquiaani. Naajaa, canaa jaara seetanujuanaa paateca quirini, canaari paateca quiya Pueyasorani. Saniniuuja, canaa jaara maninia niishiriojuaca quiriqiuani, canaari naa quiya niaarani, maninia canaa niishitiojonura nijaniya. ¹⁴ Cristo paniniuucua canaa, cuno na paniniuuri canaa shiniujuquiaa nera canaa poonijionura. Naaratej, canaari pueyaracaanu nojuajiniji pohuataquiaani. Canacuajaari niishiyani, nojuajaari puetunu pueyacuarajanaa cusoquiaari. Naa na cusonuucua puetunu pueya nitijianaatej, Pueyasora, puetunu pueyajanaari tari cusonuquiaari Cristota. Naacuajitij, Pueyasoori na naata jiyanooni puetunu Neyanuucua tiuuniaajanaa. ¹⁵ Cristocuaajari puetunu pueyacuarajanaa cusoquiaari, na samiitianishano pueya quiniuria saa neraja. Pocuara cusoquiaariiri. Nojuajaari pocuara samiitiaquiaariuhujuhua. Naaratej, paa cuaara miiria saa na panishanojua. Majaari socua pa miiniu tama pa panishanojuaaja. ¹⁶ Tarijia, canaari saaja canaa panishano pueyaca taraajejani. Quiarijia saniniuuja, Pueyaso jatanishano pueya canaa quishacari, majaari rimiajata canaa paniniu pueya. Tarijia, canaari Cristo jiyaniijiani nojuaja naasucuaari nareja pueyano, juhua pajaniyajuhua. Quiarijia cutara, majaari naa canaa niishiriojonu nojuajiniji. ¹⁷ Naajuhua, cante Cristo rupuesanoni, nojuajaari quiariniora jatanishano pueyano. Tariucuaaanu sesa na quiniuuri tari jatasanocuaaja. Saniniuuja, puetunujuanaari quiarinio quiya.

¹⁸ Puetunu cunojuanaari Pueyaso miishano. Nojuajaari Neyanu Cristo cusojuaciaari pocuara, na jiyanooshano pueya pa quiniuria. Na nuhuaji, nojuajaari canaa jiyaramiquiquiaari puetunu pueyajanaa canaa pohuatanura, nojori jiyanooshaanurajuhua. ¹⁹ Naacuajitij, Pueyasoori mijiria quiniaa jiyanoocua saaja Neyanu Cristoocua nojori tiuushacari. Naa na jiyanooshacari pueyatej, majaari quenaaja sesa nojori miishano na saneenu quiniutianihua socua. Nojuajaari canaa jiyatequiaari na rupaa pohuataanaa canaa quiniuria, pueya canaa tiuutiniuria Neyanu Jesucristoocua, jiyanooshano nojori quiniurajuhua. ²⁰ Naacuajitij, canaari Jesucristo jiyaramiquishanoni, canaa caminiujiuniuria niaara na sequesano canaa. Naa canaa caminiujiushacari Jesucristo rupaatej, Pueyasojuanaari nia masuya na muerasu nia quiniuria, Neyanuucua nia tiuushacari. Naacuajitij, canaari Cristo niti nia secojiyani, ¡tama nia cuaqueyajaaja nia jiyanootiri Pueyaso! ²¹ Pa Jiyaniijiarano Jesucristoni, nojuajaari tojetaarucuaajanaa sesa miyashijijuhuanajaj. Naajaa, na Que Pueyasoori nocua tiutiaquiaari puetunu

sesa pa miishanojuanaa, pa niti na saniitiosocoriguiano. Naacuaijij, Neyanuucua pa tiuushacari, Pueyasoori pa jiyatequiaa juhua sesa miyashijia pa quiniuria.

6

¹ Naa Pueyasora poonijionaa canaa quiniuucuatej, canaari jiyanohua nia secojiyani cuarta Pueyaso muerasunaa, saa Pueyasoraja nia quiri, nia jiyanoojia na quiniuucua. Maninia na muerasu nia quiri. ² Tariucuacaanu na sequesnocuajaari naa naajiotasano quiya na rupaajinia:

“Quiaari namitia cua secojocanu, pueya cua naacunu panishacari.

Pueya cua jiyanooshacaricuaa, janiyari quia naacucanujuhuaaj”. Cua panishano pueyanaa, quiarijiaari Pueyaso jiyanooshacari pueya. Nojuajaari quiarijia pueya jiyatequiaa na muerasu nojori quiniuria.

³ Cunora, canaari tama canaa cuaqueyajaaja cojuaquiaani, maja canaa miiniuria sesa tamasa niquiara. Canaari naa maninia miiquiaani, nojori mariqui Jesucristoocua tiuyaquiriiri, nojori mariqui Pueyasora canaa poonijosano sesacarejaariuhuaaj. ⁴ Canaa cutaraari saaja maninia miiquiaa pueya niquiarani, puetunu pueya niishiniurijanaa canaari seetanujuanaa Pueyasora poonijionaani. Naaratej, canaari juhuajaniya rejeretaquiaa naquiya canaa miiniuni, canaa panishano canaa jiiitiaquishacarijihuaj. Naajuhuaaj, canaari rejere-taquiaani puera canaa tacaashacari, canaa niishiyaquishacari taa canaa miiniutianiya socuani. ⁵ Naajuhuaaj, canaari juhuajaniya rejeretaquiaa canaa jaara majacujusaquiaani, canaa jaara nujuatejojuajinia nujuatejosaaquiaajaaniuhuaaj. Nasojosano pueya jaara miitianu paniquiaa canaani, canaari na rejeretaquiaajuhuaaj, pueya tiuuniuria canaa pohu-atasanooocua. Naa Pueyaso jiyaramiquishano pueya canaa quishacar-itij, canaari jiyanohua poonijioquiaa nerani. Canaari sequeyarucua sutequiaani. Canaari miaaajequiaajuhuaaj. ⁶ Naajuhuaaj, pueyari na naata niishiniu canaari seetanujuanaa Pueyaso seyani, sesa miyashijia canaa quiniuucua, maninia canaa niishiniuucua Pueyaso rupaajuhuaaj. Niishishaatiacuajaari, canaari Pueyaso seyani, jacaria pocua-jaca canaa quishacari juaajiacua pueyata, naajuhuaaj, maninia canaa mi-shacari puetunu pueyajanaanio. Naa niishishaatiajaariuhua canaari Pueyaso seyani Pueyaso Sohanu cumaquishacari canaa, seetanujua-naa canaa panishacari pueyajuhuaaj. ⁷ Niishishaatiajaariuhua canaari Pueyaso seyani seetanu rupaajanaa canaa pohuatanuucua pueya, naajuhuaaj, casaa canaa miiniuucua Pueyaso cumaacata. Canaari Sesaaca nujuataquiaa cumaatiani, Pueyaso jiyanooshano pueya canaa quini-uucua. Pueyaso rupaata, canaa cutaraari saaja Sesaaca jiyatequiaa canaacuajini. ⁸ Naa Pueyasora canaa poonijosacaritij, noojiaqueya pueyari canaa shuquiritiaquiaani. Tamasacaari canaa rerequetequiaa saniniuujia. Naajuhuaaj, noojiaqueya pueyari maninia pohuatanu-uquiaa tamasa niquiara canaajiniji. Tamasacaari canaa sesacaquiaa saniniuujia. Noojiaqueya pueyari canaa sequequiaa sajonuujua-catani. Tamasacaari saniniuujia maninia tojitiaquiaa canaa, see-tanu rupaajanaa canaa pohuatasacari. ⁹ Noojiaqueya pueyari canaa niquiquiaa juhua najuhuaa quijiacua pueyani. Tamasacara saniniu-ujia, canaari tojishano pueya cutarani. Canaari sequeyarucua quera puecoosaaquiaani. Naajaa, canaari saminio quiyajaani. Canaari

jiyanohua miitiasaaquiaani. Naajaa, majaari canaa puecoosaanu quiquiaani. ¹⁰ Taraatia canaa quishacari, naajaa, canaari pueyara-caanu shuquiriaatia quiquiaani, Pueyaso pueya canaa quiniuucua. Canaari seetanujuanaa casamiijiuniucujuhuj. Naajaa, canaari queraatia pueya jiyatequiaa queraatia casamiriaca nojori quiniuria Pueyaso casaatani. Canaari juhua casamiijiuniucua niquishanoni. Naajaa, canaari puetunu canaa panishanojuanaa jiitiaacuajani.

¹¹ Corinto tiacajinia quiniaa cuarta Pueyaso pueyanaa, canaa nia tojitiare. Canaa jiaatiasacari niaacua, canaari seetanujuanaa puetunu canaa jiuujiajania canaa niishiriojosanojuanaa nia sequereeni.

¹² Majaari canaa tarinitianu canaa paniniu jiyanoehua nijaniya. Nijaniya sajaraj, majaari nia paniniu canaa, taa canaa paniya nijaniyacuaani. ¹³ Janiyari nia nenecojiyani, naatej, taa pueyano nenecojoquiaa necohuacuaani, ¡majaari canacuaji nia taacanuunu! Seetanujuanaa canaa nia paniri, taa canaa paniquiaa nijaniyacuaani, seetanujuanaa panitiojuaca pa quiniuria.

Paari Pueyaso quiquioni

¹⁴ Saniniuujia, maja Pueyaso tojiyashijiaca pueya nia paniniu, nojori nia kojiniuria. Naajuhuj, maja cutaraari nia caminiu Pueyaso tojiyashijiata, niaa mariqui rimiajata quijiaca quiriiri. ¿Maninia miijiatucua shuquiriaatia quijia quiriquia, sesa miijiatu na quishacari? Maja. Cua riuquareto pueyanaa. ¿Cuhuashiqui quijiateeri na naata juhuajaniya jatiqui quiniu ninishiqui quijiatu? Maja na naata. ¹⁵ Seetanujuanaa pueyanaa, Cristoori maja Sesaaca rupuena. Naajuhuj, Pueyasocua tiuujia pueyanoori maja na naata maninia rupuetoonu Pueyasocua tiuyashijia pueyanota. ¹⁶ Paa jaara Pueyaso quiquio quirini, ¿paateeri Pueyaso quiquiojinia shanacunutaniya samaruhua tiuquitianura tiini? ¡Maja! Paacuaajari pueyaracaanu Quijia Pueyaso quiquioni. Na pueyara na sequesanoajajari naa naajiotasano quiya:

“Janiyari nojorijinia quiriqianoni. Janiyari nojori tajinia rucanejonutaniyani. Janiyari nojori Jiyaniijiajanaa quiniutianiyani. Nojoriiri cua pueya quiniutianiyacujua”.

¹⁷ Cunora, pa Jiyaniijiaari na pueya sequeya:

“¡Cua tojitiaashijiaca pueya tajiniji nia pacure! Nia shiriquiri tamo-cora nojoriicujaj. Majaari sesa casaa nia saniniu paniniu. Niaa jaara cua tojijiaca quiri, janiyari nia jiyatenutaniya quirianoni. ¹⁸ Janiyari nia Que quiniutianiyani. Naacuajitij, niaari cua niqiohuhua quiniutianiya. Naa sequeyanijia, puetunu cumaacaracajanaa cua quiniuucua”.

7

¹ Naacuajiti canaa panishano pueyanaa, paacuajari naa seetanujuanaa pa Jiyaniijia sequesano pajaniyarano jiitiaani. Naaratej, pueyaracaanu tama pa cuaqueyajaaja juhua jeequesano pa jiitariquia, poojiajuhuaj. Majaari pa shanacunu juhua curuushojosano pa quiniuria sesa pa miishanota. Pueyaso puerejaca pa quiriquia, tojetaarucujanaa sesa miyashijiaca pa quiniuria, saa neraja pa quiniurijuhuj.

Corinto pueya tacatosacari nojori jiuujia, maninia nojori quiniuhua

² Pueyanaa, ¿taa nia miiquianuni? ¡Canaa panijiaca nia quiriohua! Majaari canaa miiniu quiquianu sesa nijaniya. Majaari quenaaja niquiriyatu nijaniyajinijinio canaa sesonu quiquianu canaa niishitiojosanota. Majaari canaa sapojonu quijia nijaniya. ³ Naa cua sequesacari nijaniyatej, majaari cua sequenu cua cararonura nijaniya. Janiyacua jaari tari nia sequereeni, canaari jiyanohua nia paniyani. Naacua-jitij, canaari shuquiriaatia quiniutianiyani canaa jaara puecoosaare canaa cumaquiniuucua nijaniyani, seetanujuanaa Pueyaso muerasu nia quiniuria. Naacua-jitij, niaa jaara shaajerejuhuaj, paari pueyara-caanu jatiqui quijiaca quiniutianiya Pueyasotani. ⁴ Janiyari seetanujuanaa naa nia sequeyani cua panishacari nijaniya. Quiarijiani, janiyari jiyanohua nia timitiaani, maninia cua tojiniuucua nijaniyajiniji. Canaari seetanujuanaa naquiya miiquiaani. Naajaa, maninia canaa tojiniuushacari nijaniyajiniji, cunoori cua cumanijiacan. Cunora, janiyari jiyanohua nia shuquiritiaani.

⁵ Canaa jaara tiuquiquianu niya Macedonia jiyajiniani, majaari quenaaja rupaquijia canaa quiniu quiquianu juhuajaniya. Canaari puetunu taraatia miishaacanujuanaani. Pueyasooqua tiuyashijiacaari canaa juaariquiaa. Canaa jiuujiaari niaacua tacaariquiaa saniniuujia. ⁶ Jiyacaritij, Pueyasoori canaa cumanijiacan Tito tiuquishacarihua canaacua. ¡Pa Pueyasocua jaari tacaajiaa cumanijiana! ⁷ Canaa jiuujia canaa cajitishacarini, cunoori maja saaja canaa niquishacari Tito canaacua tiuquihuano. Canaa cutaraari canaa jiuujia cajitiquianuni, nojuaja jaara canaa pohuatacanu nijaniyajiniji jiyanohua na timiniutia. Nojuajaari canaa pohuatacanu, niaanaari canaa niquiniuucua jiaatia. Niaanaari cucua taraajeya, jiyanohua nia taraajetenuucua janiya. Niaanaari cucua tacaya jiyanohua, cua rootasano tojijiaca nia quiniuria quiarijia cutara. Naa cua tojishacari niaacua-jitij, janiyari jiyanohua shuquiriquianuni.

⁸ Niaacuara cua naajioneeri nia taraajetecanu. Janiyari taraajecanujuhuaj, naa cua taraajetenuucua nijaniyatej. Quiarijia cutaraari maja cua taraajenu. Cua naajioneecuajaari saaja rupaquijia nia taraajocanu. ⁹ Quiarijiani, ¡shuquiriaatia quiyani! Majaari nia jiyaniniu janiyari shuquiriaatia quiyani naa cua taraajonuucua nijaniyatej. Shuquiriaatia quiya cutaranijia, cua niishishacari, naa cua taraajonuucua nijaniyatej, niaari nioojia tacatorohuacuaa Pueyasooqua, Pueyaso tojitiajaca nia quiniuhuara. Naacua-jitij, janiyari quiarijia niishiyani, majaquiri cua sesonu quiquianu nijaniya, naa cua taraajonuucua nijaniyatej. Pueyasocua jaquiiri maninia poonijioriquiaa nioojiacajinia, naa nia taraajesacaritij. ¹⁰ Pueyasojuanaa jaara pa taraajetere, cunoori maninia, poojia pa tacatonuhuara nocua, na jiyanooniuria pajaniya. Na nuhuaji, paari shuquiriaatia quiya cutarani. Saniniuujia, tama pa taraajesacarijiaaja, cunoori tama poojia pa shaajanurajaaja. ¹¹ Nia taraajesacari cua nacasusacari nijaniya cua naajioneejiniani, cunoori seetanujuanaa Pueyaso taraajetesano quiquianu nijaniya. Naa nia taraajenuucuatej, nia niquishuriirij, majaari nia tarishiniu quiquianu maninia nia miiniuria. Niaari ritia cua niishitiniu paniriquiaa juucua, maja niaacua na tiutiasaanura cuno pueyano miishano sesa. Niaacua jaari maninia miiquianu nia juaashacari cuno sesa miijia. Niaari na naaqui puerecanujuhuaj, niaa mariqui nata cojiritiasaare saniitionu-

uri. Niaari cua jaqueroojocanu. Niaari ritia miiquianu cua naajiojinia cua sequesano niajaniya. Naacuajitij, niaari ritia cuno sesa miihia taanuucanu nia tajiniji, maja socua nia rupuesano na quiniuria. Naa nia miiniucua puetunu maninajanaatej, janiyari quiaritia niishiyani, majaquiiri nia maniniucuanu quiquianu naa sacuraatia cuno pueyano miishanotej. ¹² Pueyanaa, niaari maninia canaa tojjijaca. Seetanujuanaa, cua naajiosacari niaacuara, majaari cua naajionu quiquianu saaja cuno sesa miihia pueyanojiniji, sesa miishano pueyanojinijinio. Janiya cutaraari niaacuara naajiocanuni tamajaaja nio nia niishiniuria Pueyaso niquiara: niaacuajaari seetanujuanaa canaa panijijaca quiyaja, nia tojishacari canaa. ¹³ Naaratej, canaari canaa jiuujia cajitiquianuni, canaa tojishacari Tito pohuatasano niajaniyajiniji.

Majaari saaja Tito pohuatasano cumanijianu quiquianu canaa. Canaari Tito timitiacanujuhuj, canaa niquishacari nojuajaari shuquiriaatia tiuquiriohua canaacua. Puetunu niajaniyajanaari na naacucanu, noojia na cajitiniuhuara, najuhuana na tacaaniucua niaacuajuhuj. ¹⁴ Tito quiaaquishacari niaacuara, janiyacujaari juhuacari nia pohuatacanu niajaniyajinijini, maja puera na taacanunura niaacuaji. Naa maninia nia quishacari Tito tiuquishacari niaacuatej, majaari cua caririquiniu quiquianu niajaniyajiniji. Puetunu cua pohuatasanojuanaa Tito niajaniyajiniji seetanujuanaa quiquianu Titora. Naajuhuj, puetunu cua pohuatasano niajaniyajanaari pueyaracaanu seetanu rupaajanaa quijia. ¹⁵ Quiaritia Tito niishirojosacari niajaniya, nojuajaari socua jiyanohua nia panijia quiya, nia tojinuucua maninia nojuaja. Niaacuajaari tetecatucanu nia puerenuta na tiuquishacari niaacuara. Majaari nia rerequetenu quiquianu nojuaja. ¹⁶ Janiyajuhuj, jiyanohua shuquiriaatia quiyanijia, cua niishishacari quiaritia cutara cua naata niaacuara tiuuni seetanujuanaa.

8

Capora pa quiriqiaj

¹ Quiarijiani pueyanaa, canaari nia pohuatanu paniyani, taa Pueyaso cumaquiya jiyanohua na muerasu maapue niya Macedonia jiyajiniani. ² Nojoriiri jiyanohua taraatia miiquioquiaa. Naajaa, nojoriiri saaja jiyanohua shuquiriaatia quiya. Naajuhuj, casamijiuniucua nojori quishacari, naajaa, nojoriiri caporaturjuri. Nojoriiri na cumaneecajiniji nareja niqutiojoquiaa queraatia, Judea jiyajinia casamijiuniucua Pueyaso pueyara. Nojori niqutiojosanoori juhua casamiriaca pueya niqutiojosano. ³ Seetanujuanaa narta Pueyaso pueyacua nojori taraajenuta, nojoriiri naa na cumaneecajiniji niqutiojocanu queraatia. Nojoriiri puetunu na jittiasano cumaneecajanaa niqutiojonuucanu. Naacuajitij, janiyari jiyaniquianuni, maja naasucuaari nojori naata niqutiojonu quiniutianiya socua. Naajaa, na nuhuaji, jnojoriiri socua niqutiojocanu! Seetanujuanaari cua sequesano niajaniya. Janiyacujaari nojori miishano niquiniani. ⁴ Niya Macedonia jiyajinia quiniaa parta Pueyaso pueyani, nojoriiri niajaniyajiniji tojiquianu. Niaanaari cumaneeca reratenu paniriqiaacuara, nia jiyarosocoriquiano Judea jiyajinia quiniaa casamijiuniucua parta Pueyaso pueyara. Naaratej, nojoriiri

jijyanohua canaa nenecojocanu canaa masenura nojori niqutionu panishano cumaneecajuhuaaj, parta Pueyaso muerasura. ⁵ Seetanujuanaa Pueyaso tojjijaca nojori quiniuucua, nojoriiri maja saaja na cumaneeca na niqutiojonu quiqianu. Nojoriiri coteenu tama nojori cuaqueyajaaja jiyatecanu seetanujuanaa nojori quiniuria saaja pa Jiyaniijara, taa Pueyaso paniya pa miiniuriacuajani. Naajuhuaaj, nojoriiri tama na cuaqueyajaaja jiyatecanu canaa tojjijaca nojori quiniuriajuhuaaj. Cunora, canaari nojoriicuaji jiuujiatecanuni. ⁶ Naa capora niqutiononaa nojori quiniuucuatej, canaari Tito sequerucuaani, niaacua na quianuhuara quiarijia. Nojuacuajaari tarijia naacucanu nijaniya, nia ratenura nia niqutionu panishano cumaneeca. Niaacuajaari maninia niqutiojocanu juhua capora pueya. Naaratej, nojuaja cuara nia naacuura, nia tucuatnura reratenu puetunu nia niqutionu panishano cumaneecajanaa. ⁷ Nijaniya, Corinto tiacajinia quiniaanaa, niaacuajaari jijyanohua maninia Pueyaso muerasu. Niaari Pueyasocua tiuujiaca jijyanohua. Naajuhuaaj, niaari jijyanohua maninia Pueyaso rupaa niishitiojonuujuaca. Niaari Pueyaso niishitiaja jiiitiaajuhuaaj. Niaari mariyata shitimia poonijionuujuaca, tamasa nia naacunura. Naajuhuaaj, niaari canaa panijiacuaja jijyanohua. Naatej, taa maninia miijiacatucuaaja nijaniyani, capora nia quirijihuaaj, nia cumaneeca nia niqutiojonura nareja parta Pueyaso pueyara.

⁸ Majaari juhua nia jijyaniijia cua sequenu nijaniya, nia cumaneeca cua niqutiojotenura nijaniya. Janiyari nareja nia pohuatariquiaa capora Macedonia pueyajiniijini, tama nia niishiniuriajaaja, niaate seetanujuanaa canaa panijiacajuhuaaj, taa Macedonia jijyajiniijinio pueya paniya canaacuaani. ⁹ Niaacuajaari pa Jiyaniijia Jesucristojiniijini niishiya; na Que Pueyaso shuriucua na quishacarijia, nojuajaari puetunu maninia casaajanaa jiiitiaja quiqiaari. Naajaa, nojuajaari juhua casamiiijuria quiqiaari, mijiria na rosesacari pocua. Nojuajaari naa taraatia quiqia quiqiaari, saniniuujia jijyanohua shuquiriaatia quijiaca na jiyatenura pajaniya, juhua jijyanohua queraatia casamiriaca pueya pa quiniuria. Naa jaara seetanujuanaa panijiacuaja quiqia, naa nia miirijihuaaj, taa pa Jiyaniijia miiqiaaricuaani.

¹⁰ Janiyari niishiriojoriqiaani, taate socua maninia nia naata miiniu parta casamiiijuniucua Pueyaso pueyarani, shuquiriaatia nia quiniuriajuhuaaj. Cua tojjiri. Niaacuajaari niishiya, noo marijia pa shococanutej, niaacuajaari juhuacatecara cumaneeca reratejonu coteecanu. Niaari naa maninia miiqianu tama nia tacaashacarijiaaja niarta Pueyaso pueyacu. ¹¹ Niaari shitimia juhuacatecara nia cumaneeca niqutiojonu coteecanucuaaja. Naaratej, quiarijia nia sequyanijia, niaa cuara naa shitimia niqutiojonu tucataara puetunu nia niqutionu panishano cumaneecajanaa. Naa jiiiasano cumaneecajiniijini nia niqutiojore, taa cumaneeca nia niqutionu paniyacuajani. ¹² Naa tojjiri. Paa jaara seetanujuanaa nareja niqutionu paniriquia pa cumaneecajiniijini, Pueyasoori pa niqutiojore shuquiritiaja, paa jaara juhua capora niqutiojore pa jiiitiasojiniijini. Maja cutaraari Pueyaso paniniu pa niqutionura, pa jaara na jiiitaaquiyani.

¹³ Majaari Pueyaso paniniu cutara puera nia niqutiojonura nia cumaneeca, tamasa quiniuria casamiriaca, saniniuujia nia jiiitaaquiniuria nia panishano. ¹⁴ Maninia cutaraari puetunu Pueyaso muera-

sujuanaa jiitianura na panishano. Naaratej, quiarijiani, niaa cuaara niqutiojoora nia jiitiasanojiniji, nojori jiitianura na panishanojuhuaj. Tamacari saniniuujia, nojoriiri saniniuujia nia jiitiaaquishoo casaa nia niqutionutaniyacujua, niaa jaara na jiitiaaquiri. Naacujitij, puetunu Pueyaso muerasujuanaari na panishano jiitianutaniya mariyata, maja rimiajata. ¹⁵ Naajuhuj, tariucuacaanu Pueyaso Rupaajiniani, jiyocuaaanuji Pueyaso tinishano Israel pueya miaquesocoriquiano panjinijiiri naa naajiotasano quiya:

“Cante queraatia reratequiaarini, majaari quenaaja na cureenu quiquiaari. Naajuhuj, cante secaja reratequiaarini, majaari nojoriria na puetanu quiquiaari”.

Naaratej, Pueyasocua tiuujiaca nia quiri. Nia jiitiasanojiniji nia niqutiojore nareja, nia jamueyaquiniutia.

Pablo pahuatasano Titojiniji, Tito cojiniaajinijinio

¹⁶ Titoori jiyanohua niaacua jiaatiaja, taa cua jiaatiaa niaacuacuaani. Pueyasocuaajaari na jiyatequiaari nia panijia na quiniuria. Janiyari cunora Pueyaso sequequiaani: “¡Paacarasho Pueyasonaa!” ¹⁷ Naacujitij, janiya jaara Tito sequerucuaani nia niquniuucua na quianura, nojuajaari cua timitiriucuaa. Tama nojuajaari nia niquniuucua jiaatiaa. Naacujitij, nojuajaari quiarijia quianutaniya niaacua.

¹⁸ Canaari tamonu parta Pueyaso pueyano jiyaroya Titotani, na tarajariquiano. Cuno pueyanoori puetunu Pueyaso muerasu maapuejanaa shuquiritiasano pueyano, maninia na pahuatanuucua pa Jiyaniijia Jesucristojiniji. ¹⁹ Macedonia jiyajinia quiniaa Pueyaso muerasu maapueeri tari na saquiriojocanu na tarajanura canaa, pa niqutiojosano cumaneeca canaa jiyatanura nata, Judea jiyajiniara. Naa pa niqutiojonuucua pa cumaneeca parta Pueyaso muerasuratej, queraatia pueyari pa Jiyaniijia timitianutaniya socua. Naajuhuj, parta Pueyaso pueya Judiocuaaari niishiniutianiya, narta Pueyaso pueya taucuacaquiiri nojoriicua taraajejacajuhuj. ²⁰ Maniniacuajaari parta Pueyaso pueya maapue saquiriojosano pueyano quianura canaata. Naacujitij, majaari pueya jiyaniinu quiniutianiya canaari nio queraatia canaa reratesocoriquiano cumaneecajiniji nohuasenuutaniyani. ²¹ Canaari pueyaracaanu maninia miiniu paniquiaani puetunu pueya niquiarajanaa, maja saaja Pueyaso niquiara.

²² Quiarijiani, niaacua canaa jiyarosocoriquiano pueyata, canaari niquijinio tamonu parta Pueyaso pueyano jiyaronutaniyani. Pueyaraacaanu na poonijosacari pa Jiyaniijia, janiyajanaari na niquiquianuni. Nojuajaari seetanujanaa pueya panijia, Pueyaso panijia na quiniuucua. Quiarijia cutara, seetanujanaa niaacua na tiuushacari, janiyari niishiyani, nojuajaari jiyanohua maninia Pueyaso pueyano. ²³ Tamonu jaara nia nequesotare cante Titoni, niocua na riucua: “Nojuacuajaari Pablota poonijiona, na cumaquiniuria pajaniya”. Naajuhuj, Tito cojiniaari niquiji Pueyaso muerasu maapue jiyarosano niaacuajuhuj. Pa Jiyaniijia Jesucristoori socua maninuhuaqueetasano, maninia na tojtiajaca nojori quiniuucua. ²⁴ Naaratej, nio pojori jaara niaacua tiuquijiosee, niocua puetunujuanaa maninia miiri nojoriria, nia paniniutia nojori. Naacujitij, puetunu Pueyaso muerasu maapuejanaari niishiniutianiya niaaqui seetanujanaa panijia. Naajuhuj,

puetunu Pueyaso pueyajanaari niishiniutianiya, majaari cua sapojonu quiquianu, maninia cua pohuatasacari nojori niajaniyajiniji.

9

Pablo shiniujiushacari pueya, cumaneeca nojori reratenura narta Pueyaso pueyara

¹ Janiyaruhua najuhuaana niaacuara naajiyani, cua sequenura nia-janiya, nia cumaneecata nia naacunura Judea jiyajinia quiniaa parta Pueyaso pueya. ² Janiyacuajaari niishiyani, niaari tarijia na naacunu paniquianucuaaja. Cua shuquiritasacari cunora niajaniya, janiyari pueyaracaanu niya Macedonia jiyajinia quiniaa parta Pueyaso pueya niquiara pohuataquiaa niajaniyajinijini. Janiyacuajaari nojori pohu-ataquiaani, niajaniya Acaya jiyajinia quiniaa pueyani, niaari nia cuma-neeca niqutionu paniquianu noo marijiara pa shococanutej. Naaratej, queraatia niya Macedonia jiyajinia quiniaa Pueyaso pueyari cunora jaaraaja na cumaneeca niqutionu panijahuaj, naa nojori cua pohuatanuucua niajaniyajinijitij. ³ Janiyari niaacua tiuya seetanujua-naani, niaacuajaari canaacuaji tariucua reratesano jiiitanutaniya nia cumaneeca, taa cua pohuataquiaa niya niajaniyajinijicuaajani. Naajaa, janiyari nio parta Pueyaso pueya jiyaronutaniya niaacuani, seetanujua-naa juhuacarijia nia reratenura nia niqutiojosocoriquiano cumaneeca. Majaari cua paniniu cutara cua pohuatasano niajaniyajiniji cuara-cashitishaanura. ⁴ Macedonia jiyajinijinio parta Pueyaso pueya naasu-cuaari cuata tiuquiniutianiya niaacua. Nojori jaara cuata tiuquishii niaacua, canaa jaara nia riuriatasee nia cumaneeca rerateyojuani, canaari caririquiniutianiya. Niaari caririquiniutianiyajuhaj. ⁵ Naaratej, janiyari Tito sequereeni, parta Pueyaso muerasuta na quianura coteenu niaacua cucuaji, nia niqutiojonu panishano cumaneeca cuara tari reratesano quiiria canaacuaji. Naacuajitij, nia niqutiojosano cuma-neecaari seetanujuaanaa nareja nia niqutionu panishano quiniutianiya, maja canaa niqutiojotesano niajaniya.

⁶ Pueyanaa, nio sequesano nia niishiriquia. Naa sequeyari: “Cante secaja natajani, secaja senoonutaniyajaariuhaj. Saniniuujia, cante queraatia natajani, queraatia senoonutaniyajaariuhaj”. Naajuhaj, paa jaara capora quiriquiani, Pueyasoori saniniuujia socua queraatia pa niqutionutaniya pa niqutiosanojiniji. ⁷ Naaratej, puetunu niajaniya-janaa cuara niqutioora taa nioojiajinia nia niishiriojoree nia niqutiojonuracuajani. Majaari nia cumaneeca nia niqutiojonu nia jamuenuta, nocua nia taraajenutanio. Naajuhaj, majaari nia niqutionu nia cuma-neeca saaja tamasaca shiniujiushacari niajaniya. Pueyaso cutaraari shuquiriaatia niqutiojuaca timitaja. ⁸ Pueyasocuaajaari cumaacaraca na niqutionura niajaniya puetunu nia panishanojuanaa nia jiiitaso-coriquiano pueyaracaanu. Naacuajitij, niaari pueyaracaanu socua queraatia jiiitajaca quiniutianiya, tamasaca nia niqutiojonurajuhaj, nojori jaara jiiitaaquiriquia nojori panishano. ⁹ Naa jaara naa capora quiriquiatej, niaari nio tariucuaacaanu Pueyaso Rupaa naajiotasano to-huateenutaniya. Naa sequeyari:

“Maninia pueyanoori juha capora nareja niqutiojojuua na casamijiniji casamijiuniucua pueya. Na miishanoori pueyaracaanu maninia

quiniutianiya Pueyasora. Majaari Pueyaso niyajetanu quiniutianiya”.

¹⁰ Pueyano natasacari casaa jajau na cuhuariquiajinia, Pueyasoori na canijiaquiaa. Naacujitij, na camaruuri socua jiitianutaniya tamacari na natasocoriquianohua, na miaquesocoriquianonio. Naajuhuj, juhua capora nia niqutiojosacari nia jiitiasanojiniji, niaari juhua nia cuhuariquiajinia nataa. Naacujitij, Pueyasoori nia jiyatenu-taniya socua queraatia jiitajaca nia quiniuria, pueyaracaanu maninia nia miiniuria tamasacarahujaj. ¹¹ Naa capora nia quiniucua nia casaatatej, Pueyasoori juhua capora nia niqutiojonutaniya puetunu na jiitiasanojinijijianaa, queraatia nia jiitianura, tamasaca nia niqutiojonura pueyaracaanu. Naacujitij, canaa jaara nia niqutiojosano cumaneeca tiuquitiasee Judea jiyajiniani, parta Pueyaso pueyari Pueyaso timitianutaniya. Capora nia quiniucua, nojoriiri Pueyaso sequenu-taniya, “paacarasho”. ¹² Naacujitij, nojori jaara masere nojoririano nia jiyarosano cumaneeca, majaari saaja nojori jiitanu quiniutianiya nojori panishano. Cunoori saniya nojori shiniujiuniutianiya nojori shuquiritiniuria Pueyaso, queraatia nojori sequesacari: “Paacarasho Pueyasonaa”. ¹³ Nojori jiitiasacari puetunu nojori panishanojuanaa, nojoriiri Pueyaso maniniuhuaqueetanutaniya jiyanoehua. Nojoriiri naa maniniuhuaqueetanutaniya Pueyaso, nojori niishishacari niaaqui seetanujuanaa Jesucristo Rupaa tojitiajacajuhuj, naajaa, taucua nia quishacari nojoriria. Nojoriiri Pueyaso maniniuhuaqueetanutaniya-juhuj jiyanoehua capora nia quiniucua nojoriria, tamasacaranio. ¹⁴ Nojoriiri Pueyaso secojonutaniya niaacuarajuhuj, jiyanoehua nojori paniniutia niajaniya, Pueyaso jiyatenuucua niajaniya nojori panijaca nia quiniuria. ¹⁵ Naajuhuj, janiyari jiyanoehua Pueyaso sequeyani, “paacarasho”, jiyanoehua maninia na miiniucua niajaniya, Neyanu Jesucristo jataniniucua niooja.

10

Pablo cuara tojishaaria, Jesucristo jiyatenuucua nojuaja na rupaa pohuatanara

¹ Janiyacuajaari Pabloni. Quenaaja cua tojitiare. Cua Jiyaniijia Cristoori jiyanooja quiquiaaricuaa, jacaria pocuajajuhuj. Janiyari naa quiniu panijajuhuj. Naaratej, janiyari quiarijia nia nenecojiyani, cua tojitiare quenaaja. Tamasacanaari cua pocuquiaa, janiyanaari jacaria pocuaja quiquiaa juhua puerejani, nia tajinia cua quishacari. Saniniuujia, tucuaaanu cua quishacari, janiyanaari jiyanoehua nia nacasuquiaa cua naajioneejiniani, juhua nia pueresano jiyaniijia. ² ¿Seetanutejanaa, janiyate naani? Janiya jaara naa quiya niaarani, naajaa. Quiarijia tucuaaanu cua quishacarijia, janiyari nio cua naajiojinia nia nenecojiyani, nia tojiniuria janiya. Saniniuujia, niaacua cua tiuquishacari, janiyari noo pojori nacasunutaniya jiyanoehua, sacuaraatia cucuara rimiaaquenuquiaani. Janiyari naa miiniutianiya nojorini, nojori jaara tarinitiaaquiyajaa naa sacuaraatia na pocoojonutej. Cuno pojoriiri jiyaniya canaari saaja juhua mijiria quiniaa pueya miiquiaani, maninia canaa quiniuria nia niqiara. ³ Seetanujuanaacuaquiniatejaj, canaari nareja pueyani. Naajaa, majaari canaa miaquejonu quiquiaa canaa paraa, taa pueya miaquetojoquiaacuaani. ⁴ Mijiria quiniaa pueyari

miaquetojoquiaa cutara tama nojori shipinishano casaatajaaja. Canaa miaquetojotaja saniniuujia, cunoori Pueyaso cumaacajanaa cutara. Naacujitij, canaa naata Sesaaca niishishano shocotanu. ⁵ Pueyaso cumaacata, canaari mijiria niishijiaca niishishano shocotaquiaani. Cuno niishishanoori Pueyasojiniji niishishano jataniquiaa juucua, maja pueya niishiniuria Pueyaso. Naajaa, Pueyaso cumaacata, canaari puetunujuanaa najuhuana pueya niishiriojosano jataniquiaani, Cristo tojijiaca nojori quiniuriajuhuaj. ⁶ Canaacujaari Pueyaso jeenucuasano pueyani, canaa nacasunura puetunu tojiyashijiacajanaa. Naacujitij, niaa jaara puetunu Pueyasojiniji canaa niishitiojosanojuanaa tojtiajacara quiriohua, na nuhuaji cutara canaa naata puetunu cureeno tojiyashijiacajanaa saniitionu.

⁷ Niaari tama cushitiiquiaajaacujua nia tiushacari cuno sapojonuujuaca pohuatasanoocua. Nojoriiri sapuenu juhua Jesucristo jiyaramiquishano niquishiya najuhanaj. Maninia nia niishiriojore pueyanaa, nijaniya cante sapojosaacanucujani. Niaa jaara niishiri niaari seetanjuanaa Cristo saquiriojosano pueya, naacujitij, nijaniya cuaara niishiiria canaari Cristo saquiriojosano pueyajaniuhuj. ⁸ Niaa jaara jiyaniya janiyari juhua pueya shocotaja nia sequeyani: “Canaari nia jiitianaani”, naajaa, majaari cua caririquiniu naa cua sequesacari nijaniyatej. Pa Jiyaniijia Cristojuanaacujaari canaa jiyatequiaari nia jiitianaa canaa quiniuria. Canaari naa jiyatesaaquiaarini, canaa cumaquiniuria nijaniya na rupaata, seetanjuanaa Cristo pueya nia quiniuria. Majaari canaa jiitianu najuhuana na cumaaca, canaa sesonura nijaniya. ⁹ Naa cua naajiosacari niaacuaratej, majaari nia jiyaniniu janiyari nia piriyojijani nia puerenura janiya. ¹⁰ Tamasaca nijaniyajinijinio pueyanaari cua sequequiaajuhuj: “Pabloori puera jiyanohua pa nacasuquiaa na naajioneejinia. Naajaa, pa tajinia na quishacari, nojuajaari juhua tojishoo pueyano niquishano quiquiaa. Naajuhuj, na pohuatasacari pa niquiara, na pohuatasanoori maja shanohua tojishano”. ¹¹ ¿Seetanutejanaa? Cante naa pocuaquiaani, nojuaja cuaara niishiiria quiarijia, taa canaa naajiocanu niaacuaracujaja tucacaanu canaa quishacarijiani, canaari naa miiniutianiyani niaacua canaa tiuquishacari.

¹² Cuniqiu niaata quiyajaariuhua tamasaca pueya, canapute nia sequequiaacujani, nojoriniaari socua maninia Pueyaso rupaa pohuatanaa tamasacajiniji, canaajinijijuhuj. ¿Nojoriitiri seetanjuanaa socua maninia Pueyaso rupaa pohuatanaa canaajiniji? Johuj. Naajaa. Majaari canaa tacaaniu quiquiaa juhua nojori canaa quiniuria. Cuno pojoriiri tama na cuaqueya timitiacoquiaajaacujua, nojori soosacari narta Pueyaso rupaa pohuatanaa. Nojoriiri naa quijiacatej, nojori jiyaniishacari nojori cutaraari socua tojishano pueya tamasacajiniji. Naa nojori miishacaritij, nojori cutaraari seetanjuanaa mosanucua. ¹³ Canaa cutara, majaari tamasaca poonijiosano canaa jiyatenu quiquiaa juhua canaa poonijiosano Pueyasora. Canaa cutaraari saaja canaa miishano shuquiritiaquiaani, tee Pueyaso jiyaroquiaari canaacujani. Nojuacuajaari canaa jiyaramiquiquiaari niaacua Corinto tiacajinia, nia niquiara canaa pohuatanura na rupaa. Naacujitij, niaari na muerasura quiquiaari. ¹⁴ Majaari najuhuana canaa timitianu nijaniya, Pueyaso muerasu nia quiniuucua. Niaacuajaari Pueyaso muerasura

quiquiaari canaa pahuatanuucua nia niqiuara seetanu rupaajanaa Jesucristojiniji. Canaa cutaraari seetanujuanaa Pueyaso rupaa pahuatanu coteetanaa nia niqiuarani. ¹⁵ Majaari canaa shuquiritianu najuhua niajanaya. Canaa cutaraari nia tiuutiquiaari Jesucristoocuaani, niaacua Pueyaso jiyaronuucua canaa. Naajaa, canaari socua nia pahuatanu paniya Pueyaso rupaani, seetanujuanaa Jesucristo rupaacua tiuujiaca nia quiniuria. Naacuaajitij, niaa jaara seetanujuanaa Pueyaso rupaa tojijiaca quiri, niaari saniniuujia na naata canaa cumaquiniu. ¹⁶ Niocua canaa cumaquiri canaa quianura tamaqui, tee Jesucristojiniji pahuata-soojua quiyacuajani, tii canaa pahuatanura nojuajinijijiuhuaj. Majaari canaa quiniu paniniu pootia tamasaca poonijiosaqui, taa cuno rimiaacoori quiquioya shuquiriaatia canaa poonijiosaquicuaani. ¿Nojori shuquiritiasanoteeri tama nojori poonijosanojuaja? Maja. Niaacuajaari Pueyaso muerasura quiquiaari canaa nia tojtianuucua.

¹⁷ Pueyanaa, nio tariucuacaanu naajiotasanoori niaara, nia niishihocoriquiano. Naa sequeyari: “Cante shuquiriaatia quijia quiniu paniani, nojuaja cuara pa Jiyaniijia shuqiritiaara cutara”. ¹⁸ ¿Taa nia sequeyani pueyanaa? ¿Cana Pueyaso sequenutaniya socuarini: “Quiaa cutara maninia cua pueyanoniyojua”? ¿Cunotee, tama na cuaqueyajaaja sequejani: “Janija cutaraari maninia Pueyaso pueyanoni”? Maja. Pueyaso shuqiritiasano cutaraari noo pueyano, cana pa Jiyaniijiajanaa sequenutaniyacujani: “Quiaa cutaraari maninia cua pueyanoniyojua”.

11

Pablo pahuatasano na paraajiniji

¹ Pueyanaa, cua tojitiuri nareja. Juhua paateca tama cua cuaqueyajinijijiaaja nia pahuatanu paniyanijia. Naajaa, quenaaja nia rejeretare janiya. ² Janiyari jiyanohua nia tacaatiaquiaani, saaja Jesucristora nia quiniuria. Niaacuajaari niishiya, naatej, taa pueyano cojuacuua neyatunioyua canuucujini, saaja na camiriquiano pueyanora na quiniuria, naajuhuj, janiyari nia cojuanu paniani sesosoo nia quiniuria nia Jiyaniijiaara. Cristocujaari juhua nia niyacarano. Nia jitiana cua quishacari, janiyari juhua nia queni. ³ Tarijia, niaacuajaari saaja Cristo tojtiajaca quiquiaari, na panijia nia quishacari. Quiarijia saniniuujia, janiyari Sesaaca nia pueretaani, nojuaja mariqui nia sapojoreeri Cristoocujani nia rupatenura, taa cuno Susanacu sapojoquiaari Eva tariucuacaanucuaani. ⁴ Cuno sapojonuujuaa tiuquijiosacari niaacua, tamaatia nojori pahuatanura Jesujiniji niajanaya, niaari jaara-jaaja ritia na tojiquiaa. Nojori niishitiojosanoori tojetaarucujanaa tamaatia canaa niishitiojosanojiniji niajanaya. Nojori nia tojishacari, niaari juhuajaniya samaruhua niishishano tojtiaquiaajuhuj. Niaacuajaari tari tiuquiaari Jesucristoocua, Pueyaso jiyanooniuria niajanaya. Saniniuujia, cuno pojori pahuatasacari tamaatia, taa nia miintiutianiya Pueyaso pueya nia quiniuriani, niaari jaarajaaja ritia nojori tojiquiaajuhuj. ⁵ ¿Cuno sapojonuujucateeri socua tojishocoriquiano janiyajiniji, niaa na jiyatecanu juhua seetanujuanaa Pueyaso jiyaramiquishano pueyarani? ¡Janiyara maja! ⁶ Seetanujuanaa, majaari cua niishiniu maniniuuaqueenu cua pahuatasacari Pueyaso rupaa, taa cuno pojoricuaani. Naajaa, Pueyasojiniji cua niishishano cutaraari seetanu rupaajanaa, tojishocoriquiano cutara. Maja najuhuanaj. Niaacuajaari

cuno niishiya, pueyaracaanu saaja maninia cua miishacari nia niquiara, cua pohuatasanojinijinio.

⁷ ¿Casaara nia tojitiaa cuno pojori quiarijianijia, majaari saniniuujia nia tojitianu janiya? ¿Janiyateeri sesa miiquianu niajaniyani, cua masejyoaquinuucua nia cumaneeca cua pohuatanuucua Pueyaso rupaa, Pueyaso pueyara nia jatanishaanura? Janiyacuajaari tama cua cuaqueyajaaja mueyashitiquiaarini cua cumaquiniuria niajaniya. Naa cua miiniuucuatej, ¿cunoteeri sesa niaara? ⁸ Janiyari tamonu jiyacajinia Pueyaso pueya maapuejiniji masejoquiaari cumaneecani, cuno cumaneecata cua quianura niaacua, nia niquiara cua pohuatanura Pueyaso Rupaa. ⁹ Saniniuujia, nia tajinia cua quishacari, cua jittiaaquishacari cua panishano, naajaa, maja cutaraari cua mashiniquijionu quijia nia cumaneeca. Naa cua jittiaaquishacari cua panishanotej, Macedonia jiyajinijinio parta Pueyaso pueyari namitia tiuquiijoquiaari. Nojori cutaraari cumaneeca cua niquitioquiaari, cua panishano cua masetajara. Janiyari naa pueyaracaanu tama cua cuaqueyajaaja cojuaquiaani, maja cua taajetenura niajaniya cua panishano cua jittiaaquishacari. Janiyari naa miiniutianiya pueyaracaanuni. ¹⁰ Cua Jiyaniijia Cristocuaajaari niishiya, majaari quenaaja cumaneeca cua masejonu quiquiaari Acaya jiyajinia quiniaa parta Pueyaso pueyajiniji. Naacuajitij, majaari quenaaja niquiriyatu pueyano Acaya jiyajinijinio naata sequenu janiya: “Pablocuaajaari cumaneeca mashiniquijiojua canaajiniji”. ¹¹ Pueyanaa, ¿niaate niishiya casaara pueyaracaanu cua sequequiaani, maja cumaneeca cua masejonu quiquiaa Acaya jiyajinia quiniaa Pueyaso pueyajiniji? Naa cua sequesacaritij, ¿janiyateeri nia paniyaquiiani? ¡Maja! Pueyasocuaajaari niishiya, janiyari jiyanohua nia panijiani.

¹² Nia sequereera casaara cua mashiniquijiaquiquiaa nia cumaneecani, cua pohuatasacari Pueyaso rupaa nia niquiara. Cuno pojori, nia jyanishano Pueyaso jiyaramiquishano pueyani, nojoriiri nia jiyajenetenu paniquiaa. Nojoriniiaari seetanujuanaa Cristo jiyaramiquishanojuhuj, taa canaacuaani. Saniniuujia, nojori mashiniquijiosacari nia cumaneeca, nojori nia niquitiojonura nareja, naacuajiti maatia niishishiyari, ¡nojoriiri jiyanohua tamaatia canaajiniji! Naaratej, majaari quenaaja canaa mashiniquiniu quiniutianiya nia cumaneeca, canaa pohuatanuucua Pueyaso rupaa niajaniya. ¹³ Seetanujuanaari, ¡nojoriiri maja Cristo jiyaramiquishano pueya! Nojoriiri tama nojori cuaqueyajaaja jiyatecanu sapuenu juhua Cristo jiyaramiquishano pueya nojori quiniuria. Naacuajitij, nojoriiri nia sapojiya. Nojoriiri sapuenu juhua Cristo jiyaramiquishano pueya niquishano najuhuanaj. ¹⁴ Cunoori maja jiyajeneta naa nojori miiniuriatej. Satanáscuaajaari tama na cuaqueyajaaja jatanijia shacantuucara, juhua Pueyaso seru na niquishaanura, pueya na sapojonura. ¹⁵ Naaratej, majaari cua jiuujiatenu cuno pojori jaara tama na cuaqueyajaaja jiyatecanu juhua seetanujuanaa maninia miijiaa pueya nojori quiniuria. Nojoriiri naa miiquiaa, Satanás seya nojori quiniuucua. Naajaa, ¡nojoriiri saniitiosaanutaniya sesa nojori miiniuucua!

Pablo pohuatasacari naquiya na miiniujiniji, Cristo jiyaramiquishano na quiniuucua

¹⁶ Socua nia sequenu pacuteyanijia, majaari nia jyaniniu janiyari paatecani cua pohuatasacari tama janiyajinijiaaja. Niaa jaara jiyaniya

janiyari seetanujuanaa paatecani, naajaa, rupaquijia cua tojitiare que-naaja. Janiyari juhua paateca tama janiyajiniijijiaaja niaara pohuatanu paniyajaaniuhuj, taa nia tojishano pueya miiquiaacuaani. ¹⁷ Naa cua pohuatasacari tama janiyajiniijijiaajatej, cunoori maja cua Jiyanijia Cristo pohuatasano janiya. Cunoori tama cua pohuatasanojuaaja, juhua paateca cua quishacari. ¹⁸ Naatej, taa queraatia Pueyaso rupaa pohu-atanaa tama nojorijiniijijiaaja pohuatanuuquiaacuaani, janiyari quiar-ijia naa tama janiyajiniijijiaaja pohuatanu paniyajuhuj. ¹⁹ Jiyanohua niishijiaca nia quishacari, niaari cuno paatecoori tojitiaquiaa juhua-janiya. Naatej, taa nia tojitiaquiaa cuno pojoricuaani, quiarijia cua tojitiarejuhuj. ²⁰ Naajuhuj, niaanaari juhujaniya rejeretaquiaa cuno pojori, nojori jaara nia poonijiotequiaa juhua nojori seya. Niaanaari nojori rejeretaquiaa nojori jaara nia jiiitasano casami riutiocojoquiaa niaacuaji. Juhua nia jiyanijia nojori quishacari, niaanaari nojoriicua shiiniuquiuquiaa saaja, naajaa, nojori soosacari niajaniya. Niaanaari juhujaniya nojori rejeretaquiaajuhuj, nojori jaara nia jiquioco mase-teriquia. ²¹ ¡Nojoriquiri jiyanijianucujanaa cutara! Saniniuujia, jani-yari nojori naaqui caririquiyani juhua nojori cua quiyacuiniuucua, maja naa canaa miiniuucua niajaniya, taa nojori miiquiaa sesa niajanij-acaani.

Naajaa, quiarijia cutara, janiyari tama janiyajiniijijiaaja pohuatanu-taniyani, taa nojori pohuataquiaa juhua paateca tama nojorijiniijijiaa-jacuaani. ²² ¿Taa nojori sequequiaani? ¿Nojoritiniaari Hebreo pueya, He-breo rupaa pocuajacajuhuj? Janiyajuhuj. Janiyari Hebreo pueyano-pueyajuaj, Hebreo rupaa pocuajani. ¿Nojoritiniaari Pueyaso saquiri-ojosano Israel pueyajinijinio? Janiyacujaniari Israel pueyacujani supuenojuhuj. ¿Abrahamtenaari nojori supuetana? Abrahamcujaniari cua supuetanajuhuj. ²³ ¿Nojoritiniaari Cristo jiyaramiquishano pueya? Janiya cutaraari seetanujuanaa Cristo seruni. Janiyari jiyanohua soy-ani, juhua paateca naa cua pohuatasacari tama janiyajiniijijiaajatej. Naajaa, janiyari seetanujuanaa nia sequeyani. Janiya cutaraari socua jiyanohua nojorijini poonijioquiaari Cristorani. Janiya cutaraari pueyaracaanu caminiujiushaaquiaari nujuatejojuajinia nujuatejonuni, Jesucristojini cua pohuatanuucua. Naajuhuj, janiyari pueyaracaanu caminiujiushaaquiaari majacununi. Naajuhuj, janiyari pueyaracaanu cocuaatia miiquiaarini, pueya monu panishacari janiya. ²⁴ Cuarta Judiocuacari cua caminiujiuquiaari majacunu puetunu niquiriyatu pa juaashiquiajanaa. Cuarta Judiocuaca majacusacari, nojoriiri na majanu serojoua. Nojori majasano jaara treinta y nueve quiri, nojoriiri jiyacari cartea na majacusano pueyano. ²⁵ Naajuhuj, janiyari jiuujianaraca caminiujiushaaquiaari macata piquiniuni. Tamacari, janiyari saitia jacusaaquiaarini. Shoniacu caminiajinia cua jaaretasacari buque-jinia, jiuujianaraca buqueeri tiuquitiaquiaari. Naa tamacari buque tiuquitiasacarijuhuaj, janiyari na raucua cuataquiaarini puetunu niu-cujanaa, niquiriyatu juucanio. Cunoori quiquiaari puereeta shonini-acu caminia jiuujiajinia. ²⁶ Janiyari pueyaracaanu tiquiyocua rucuan-jojua quiquiaarini. Naacuajitij, moocua cua niuuniujiushacari, janiyari cocuaatia miiquiaarini. Naa cua rucuanajosacaritij, janiyari pueyara-caanu puereeta nohuasenujuaca quishaqui shocoquiaarini. Naa-juhuj, tama cuarta Judiocuacajarijia pueyaracaanu cua miitianu pani-

jia, taucuacanio. Puereetaari quiquiaarijiuhua cua rucuanajosacari tiacajinia, tiqiyocua pueya quiyaquishaqui, shoniniacu caminiajiniano. Naajuhuaaj, puereetaari quiquiaari janiyara, cua jyanishacari janiyari cuarta Pueyaso muerasu tajinia quiyani, saaja cua paraa nojori quishacari. ²⁷ Jiyanoehua cua poonijosacari cua Jiyaniijiaara cua samareenuta, janiyari pueyaracaanu sutequiaarini. Janiyari miaajequiaarini. Janiyari jiyamuequiaarijiuhuaaj. Janiyari noojiaqueya mi- aqueyaquiquiaarijiuhuaaj, jeya cua quiyaquishacari. Janiyari naquiya miiquiaari cua rucuanajosacari shiniquiajiniajuhuaaj, toqueeju cua quishacarijiuhuaaj.

²⁸ Janiyari naa naquiya miishaaquiaarini, mariyata tamaatia naquiya miiniujiuhuaaj. Naajuhuaaj, janiyari puetunu juucajanaa niishiriojo- quiaani, taariquitijia Pueyaso muerasu maapue quiya puetunu jiyaca- jiniajanaatej. Janiyari jiyanoehua nojoriicua tacaquiaani. ²⁹ Naacuajitij, tamonu cuarta Pueyaso pueyano jaara rejeretaaquiriquia Sesaaca saniniujiushacari nojuaja, janiyari jiyanoehua taraajeja nocuani. Tamonu jaara sesa miitishaare, janiyari na naaqui caririquiyajuhuaaj. ³⁰ Niaa jaara paniya socua cua pohuatanura nijaniya tama janiya- jinijiaaja, nia pohuatareeraqui pueyaracaanu taraatia cua miishaanu- jiniji. Tama janiyajaaja, janiyari maja cumueecani. ³¹ Pa Jiyaniijia Que Pueyasocujaari niishiya janiyari seetanujuanaa sequeyani. No- juajanaa cuaara pueyaracaanu maniniuhaaqueetasaaria cutara, maja nojuajiniji pohuataanaa. ³² Tarijia, Damasco tiacajinia cua quishacari, tamonu pueyanoori Damasco tiaca jiyaniijia quiriquiaa. Nojuajaari cuno jiya jiyaniijia Aretas jiyatesano quiquiaari, Damasco tiaca jiyaniijia na quiniuria. Cuno jiyaniijiaari na soldadoehua nujuatejoquiaari tiaca shocua sohuaca tohuateyaji, nojori quianura juucua janiya. Nojoriiri cua quietunu paniriquiaa Jesucristojiniji cua pohuatanuucua. ³³ Naajaa, cuarta Pueyaso pueyari namitia cua roshinitiaquiaari shuquiriaatia, puereetuca canaasatujinia, cuno tiaca sohuaca tacuhua shuucuaji. Janiyari naa mashiquishaaquiaari cua paraacuajini.

12

Pablo pohuatasano Pueyaso niqutishanojiniji nojuaja

¹ Paa jaara tama pajaniyajiniji pohuatariquia juhua paatecani, cunoori najuhuanaj. Naajaa, socua nia pohuatareeraj. Nia pohuata- reera taa cua niqutishaaquiaari pa Jiyaniijia casaa jiyocuacaanuni. ² Tariucua Jesucristoocua tiuujia cua quishacari, janiyari jiya cajiniocua cacojiria tacanishaaquiaari Pueyaso quiquiojiniarani. Naa cua tacanishaanujinijitij, tari shocojorucuaari catorce marijia. Majaari cua niishiniu taariquitijia cua tacanishaaquiaaritij, puetunu cua cuaqueyatajanaa, saaja cua sohuanu soj. Johuaaj. Saaja Pueyasocujaari na niishiya. ³ Cua tojitiare, seetanujuanaa majaari cua niishiniu taariquitijia cua tacanishaaquiaaritij, puetunu cua cuaqueyatajanaa, saaja cua sohuanu soj. Pueyasocujaari na niishiya. ⁴ Janiyari saaja niishiya cutarani, janiyari shuquiriaatia quishaqui Pueyaso shuriucua tiuquinishaaquiaarini. Janiyari tii casaa tojiquiaarini. Cunoori maja quenaaja na naata pohuatasaanu mijiria quiniaa rupaajinia. Pueyasoori cua tenujuquiaari maja cua caminiujiuniuria jiyocuacaanu cua tojishano mijiria quiniaa

pueyara. ⁵ Naa Pueyaso niqutiniuucua janiyatej, janiya maara tama janiyajiniijiaaja poojotariquia cua timiniutiani, juhua tamasaca shocotaja cua quishacari. Naajaa, majaari cua timitianu tama cua cuaqueyajaaja. Saaja shuquiriaatia quiya cutaranijia, cua niishishacari majaari cua naata tama cua cumaacatajaaja rejeretanu taraatia cua miiniu. ⁶ Naajuhuaaj, janiya jaara tama janiyajiniijiaaja pohuatanu paniriquiani, cuno maara seetanujuanaa pohuatasano quiriquia, maja juhua paateca pohuatasano. Seetanujuanaa majaari naa cua pohuatanu paniniu, pueya mariqui cua pohuatasanojiniji cua jiyaniiriri janiya jiyanoehua maninia pueyanoni. Pueya cuara niishiiria cutara taamueca pueyanote janiyani, saaja nojori namijiata nojori niquishacari cua miishano, tama nojori numaatajaaja nojori tojishacari cua niishitiojosanojuhuaaj. ⁷ Pueyaso niqutishano janiyani, na niishitishano janiyajuhuaaj, cunoori puera jiyanoehua maninia quiquiaari. ¡Cunoori jiyanoehua cua timitiquiaari! Naaratej, janiyari cua cuaqueyajinia nootusaaguiaari juhua jiohuacatani, janiya mariqui pueya shocotajara quiriiri. Cuno taajeta noonuuri Satanás miishano quiquiaari, na tacaatiniuria janiya. ⁸ Janiyari jiyanoehua secojoquiaari pa Jiyaniijiani, nojuaja cuara shaataara cua nootunenu. Janiyari jiuujianaraca pacutejoquiaari secojonuni. ⁹ Cua Jiyaniijaari saaja cua sequequiaari: “Janiyacuaajaari quia cumaquiniutianiyani, cua panishano pueyano quia quiniuucua. Saaja cunocuaajaari quiara. Cua naatacuaajaari socua jiyanoehua poonijiotenu cua cumaaca sasaca cua pueyajinia, tamasaca niishiniuria cunoori seetanujuanaa cua cumaaca, maja pueyano cumaaca”. Naa cua Jiyaniija riucuasacari janiyatej, janiyari shuquiriaatia quiyani cumaacaaju pueyano cua quiniuucua pueyaracaanu. Naacuajitij, Cristo cumaacaari socua janiyajinia niquishaaquiaa poonijiyano. ¹⁰ Naacuajitij, janiyari shuquiriquiaani cumaacaaju pueyano cua quiniuucua, Pueyaso cumaquiniuria janiya. Naacuajitij, tamasaca jaara sacuaraatia casaa sequeriquia janiya na juaashacari, janiyari Pueyaso cumaacata juhuajaniya na rejeretaquiaani. Naajuhuaaj, janiya jaara cua panishano jiiitaaquiriquiani, naajaa. Pueyaso cumaquishacari janiya, janiyari juhuajaniya rejeretaquiaani. Naajuhuaaj, janiya jaara naquiya miitiasaquiaani, taraatia cua miishacarijuhua Cristora cua poonijionuucua, naajaa. Pueyaso cumaacata, janiyari juhuajaniya rejeretaquiaa saajani. Naacuajitij, janiya jaara tojetaarucujanaa cumaacaaju quiquiaani, janiyari jiyacari socua jiyanoehua cumaacaraca quiquiaani, Pueyaso cumaquiniuucua janiya.

Pablo tacaashacari Corinto tiacajinia quiniaa Pueyaso muerasu maanuucua

¹¹ Janiyari seetanujuanaa juhua paateca tama janiyajiniijiaaja pohuatareeni, juhua pueya shocotaja. Niaacuajaari naa cua pohuataree, niaacuaja naara cucuaji tacuyaquiquianu cua sesacaja pueyatej. Janiyanaari najuhuana quijia pueyanoni. Naajaa, niaacuajaari niishiya, janiyari maja socua najuhuana quijia cuno pojorijiniijini. Cuno pojori nia tojishano pueyani, nojoriiri tama na cuaqueyajaaja jiyatecanu juhua seetanujuanaa Jesucristo jiyaramiquishano pueyara cutara. ¹² Juhuaajaniya cua rejeretasacari naquiya cua miiniu nia tajinia

cua quishacari, naajaa, janiyari pueyaracaanu jiyajeneta casaa mijioquiaari Pueyaso cumaacata nia niquiarani. Niaari nocuaji jiuujiatecoquiaari. Naacujitij, niaa cutaraari niishiquiaari janiyari seetanjuanaa Cristo jiyaramiquishano pueyano cutarani. ¹³ ¿Janiyateeri sesa nia jiiatiaquiaarini, Pueyaso rupaa cua niishitiojosacari nijaniya? ¡Maja! Janiyari nia miiquiaari maniniani, naajuhua, taa cua miiquiaari tamasaca jiyacajinia quiniaa Pueyaso pueya maapuecuaani. Majaari rimiajata cua miiniu quiquiaari nijaniya, niaata cua quishacari. Maja cutaraari cua mashiniquijionu quiquiaari cumaneeca nijaniyajiniji. ¡Cua jiyanoori cunora, jaara sesa quiquiaari nijaniyara!

¹⁴ Quiarrijiani, janiyacuaajaari quera quiaa niaacuani. Janiya jaara niaacua quiaareni, cunota quiniutianiyari jiuujianaraca cua pacutenu niaacua cua quianu. Majaari nia jyaniniu janiyari nia cumaneeca mashiniquijionuucua quianutaniyani. Janiya cutaraari maja cua jiaatianu nia jiiatiasano casamiicua. ¡Janiyari saaja niaacua jiaatiaa cutarani! Niaacuaajaari juhua cua muerasuniyosua. Niaacuaajaari maninia niishiya, muerasuuri maja na reratenu cumaneeca na quera. Na que cutaraari saniya cumaneeca rerateja necohuara. Naacujitij, cua mashiniquijiyacquishacari cumaneeca nijaniyajiniji, janiyari seetanjuanaa juhua nia queni. ¹⁵ Janiyari shuquiriaatia tama cua cumaneecajaaja puecanutaniyani cua quishacari niaata, socua cua niishitiojonura nijaniya. Naacujitij, janiyari tama cua cumaacajaaja puecanutaniyajuhua, nioojia cua cumaquiniuria. Janiyara, nioori taraatia: janiya jaara socua nia paniquiaani, niaari socua jiyacatequiaa secaja nia paniniuria janiya.

¹⁶ Niaacuaajaari niishiya, majaari quenaaja nia niquitionu quijia nia cumaneeca janiya. Naajaa, tamasaca nijaniyajinijinionaari soquecuya, janiya naasucuaaari jiyasohuaja nia cumaneeca nohuasejoquiaani, cua sapojonuta nijaniya. ¹⁷ ¿Seetanutejanaa pueyanaa? ¿Janiyateeri nia sapojoquiaari niaacua cua jiyaramiquishano pueyatani? ¿Nojoritii nia cumaneeca masequiaari? ¡Maja! ¹⁸ Janiyacuajaari Tito jiyaroquiaari niaacua na quianurani, na cumaquiniuria nijaniya. Janiyari nata jiyaroquiaari tamonu Pueyaso pueyanojuhua. ¿Titoteeri jiyacari nia cumaneeca mashiniquiaari? ¡Majaruhua! Niaacuaajaari niishiya, Titocuaajaari cumaneecaacua jiaatiaashijia, juhua janiyajuhua. Janiya Titota, canaacuaajaari jyanohua nia paniquiaani.

¹⁹ Sacuaraatia canaacuara nia rimiaaquenuucua pueyanaa, naajaa, majaari nia jyaniniu canaa tama canaacuajijiaaja tacuyani, juhua canaa nequesoreenaa nia quishacari. Saniniuujia, canaari niya Pueyaso niquiara nio naajiya niaacuarani, Cristo pueya canaa quiniuucua. Naajuhua, puetunu cua sequesanojuanaa nijaniya nio cua naajiojiniani, cunoori cua cumaquiniuria nijaniya cua panishano pueyanaa. Janiyari naa nia nacasuyani, seetanjuanaa Jesucristo tojijica nia quiniuria. ²⁰ Janiyari puereyani, niaacua cua tiuquishacari, janiyari niaacua taraajenutaniyani cua riuriatasacari nijaniya sesa quiyanojua, maja maninia taa cua paniriquiaacuajani. Janiya jaara nia riuriatasee naa sesa quiyanojuani, jeecatoojua, niaari saniniuujia taraajenutaniya nia niishishacari taa cua miiniutianiya nijaniyani. Janiyari puereyani niaa naasucuaari juayonuujutaajaa. Niaa naasucuaari niarta pueyano jiiatiasanoocua jiaatiajaca quiyajaa. Niaa naasucuaari juaaniu porocua

quiyajaa. Niaa naasucuaari tama nia panishanojuaaja miijiaca quiyajaa. Niaa naasucuaari niarta pueyacuara coriaacojuuaca quiyajuhua. Naajuhua, niaa naasucuaari niarta pueyacuara rimiaaquentuujuaca quiyajaa. Naajuhua, niaa naasucuaari tama nia cuaqueyajaaja jiyaniya niaa socua maninia pueya tamasa pueyajiniji. Niaa naasucuaari jatiqui quiyashijiacajuhua, pueyaracaanu nia juayonuujutanuucua. ²¹ Naacuajitij, janiyari puereyani janiya naasucuaari Pueyaso niquiara caririquiniutianiya nia naaquini, niaa jaara naa sesa miijiaca quiyajaa. Janiyari puereyajaaniuhua, janiya naasucuaari nujuquenutianiya cua taraajenuta noo sesa miijiaca pueyacuani, cuno pojori jaara sesa na miishano tarinitiaaquiuanujua. Noojiaqueya niajanijajinijioori sacuaraatia miijiaca quiqianujua: cararaatia miijiaca sacuaraatia, na camishoo maaji numuetucunu porocujuhua, naajuhua, majaari tama nojori cuaqueya panishanojuaaja nojori rejetenu quiquiaa.

13

Socua Pablo nacasusacari Pueyaso pueya

¹ Niiori quiniutianiya jiuujianaraca cua pacutesacari quianu niaacua. Tariucuaaanu Pueyaso rupaajinia, paari nio niishitiojosaaquiaarini: querajaa pueya jaara mariyata pohuatate nojori niqishanojiniji, pa naata seetanujuanaa na pohuatasanoocua tiuuniu cutara. Naajuhua, niaacua cua tiuquishacari, janiyari naa miiniutianiyani cua nequesoreesacari cuno sesa miijiaca. ² Pueyanaa, janiya jaara pacutequiaariuhua niaacua quiantej, janiyacuaajaari puetunu niajanijajinijinio cuno sesa miijiacajanaa piriyojoquiaarini. Quiarijiani, tucuaaanu cua quishacarijia, janiyari puetunu cuno sesa miijiacajanaa socua piriyojijiani. Naacuajitij, janiya jaara niaacua tiuquishiini, cuno pojori jaara noojia tacatoyaquiyajaa, majaari nojori cua jiuujiaaniu quiniutianiya, narta sesa miijiacanio. ³ Cua nequesoreesacari cuno sesa miijiaca, niaari jiyacari niishiniutianiya janiyari seetanujuanaa Cristo sequesano caminiujuniani, taa nia niishiniu paniriquiaacuajani. Niaacuajaari tari niishiya, pa Jiyaniijia Cristoori maja na jitianu niajanijia juhua cumaacaaju pueyano. Niaacuajaari na cumaaca niqiquiaa tama niajanijajiniaaja na saniitosacari niajanijia. ⁴ Seetanujuanaa, Cristoori juhua cumaacaaju quiquiaari jaara niyacutesanojinia teetesaaquiaari. Saniniuujia, Pueyaso samiitianishacari nojuaja, nojuajaari quiarijia puetunu Pueyaso cumaacajanaa jitiaa. Naajuhua, canaa, na rupaa pohuatanaani, canaari naquiya miishaaquiaajaaniuhua saaja mijiria quiniaa canaa quiniuucua, taa nojuaja quiquiaaricuaani. Saniniuujia, Cristo rupuesano canaa quishacari quiarijiani, canaa cutaraari Pueyaso cumaacaracani, maninia canaa jitianura niajanijia.

⁵ Naarate pueyanaa, jacaria nia niishiriojore, ¿niaate seetanujuanaa Jesucristoocua tiuujia, maja soj? ¿Niaate maninia miijiaca taa Pueyaso muerasu miiquiaacuani? ¿Majateeri nia niishiniu, niaa jaara seetanujuanaa Jesucristoocua tiuujia qui, nojuajaari nioojiajinia quiya? ⁶ Naajuhua, jacaria nia niishiriojore canaajiniji. Nia niishitiriquiani, canaari seetanujuanaa Jesucristo jiyaramiquishano pueyani, maja sapojonuujua. ⁷ Canaari Pueyaso secojoquiaa niaacuarani, tojetaarucujanaa sesa miyashijia nia quiniuria, maninia Pueyaso muerasu nia quiniuria. Majaari naa canaa secojonu quiquiaa saaja

pueya niishiniuria canaa seetanujuanaa Jesucristo jiyaramiquishano pueyani. Canaari saaja nia panitiaa cutarani, maninia miijiaca nia quiniuria Pueyasora. Naa jaara naa maninia miijiacara quiriohua, majaari canaa saniitionu quiniutianiya niajaniya Pueyaso cumaacata. Naacuajitij, majaari pueya niquniu quiniutianiya Pueyaso cumaaca canaa jiiitasano. Naajaa, pueya jaara jiyaniya canaa najuhua quijiaca pueyani, naajaa. ⁸ Canaa jiiitasano cumaacaari maja canaa saniitionu-tajara seetanujuanaa Pueyaso rupaa tojitiajaca. Canaa cumaaca cutaraari canaa cumaquiniuria niajaniya, socua maninia Pueyaso Rupaa tojitiajaca nia quiniuria. ⁹ Naacuajitij, canaari shuquiriquiaani niaacua canaa paaretaaquishacari canaa cumaaca, canaa saniitionura niajaniya niaa jaara Pueyaso tojitiaashijiaca quiriquia. Naacuajitij, canaari juhua cumaacaaju pueya niquishano quiniutianiya, cumueca Pueyaso muerasu nia quishacari saniniuujia. Canaari cunora Pueyaso secojoquiaani, tojetaarucujanaa maninia miijiaca Pueyaso muerasu nia quiniuria seetanujuanaa. ¹⁰ Janiyari nio cua naajioneejinia jiyanohua nia nacasuyani tucuacaanu cua quishacarijia, maja jiyanohua cua nacasunura niajaniya, niaacua cua tiuquishacari. Pa Jiyaniijiacuajaari cua jiyatequiaari juhua nia jiyaniijia cua quiniuria, na cumaacata cua canashitijionura niajaniya, seetanujuanaa cumueca na muerasu nia quiniuria. Pueyaso niquitiosano na cumaaca janiyari maja cua sesonura niajaniya.

¹¹ Cua tucuatana nio cua naajioni cua panishano pueyanaa, janiyari nia panitiaani shuquiriaatia nia quiniuria pueyaracaanu. Saaja maninia quiniucua jiaatiajaca nia quiri. Nioojia nia cumaquiri, maninia cua rootasanota. Naajuhua, nia jyanootiooriquia maninia rupueotesano nia quiniuria. Naa nia quishacaritij, Pueyasoori nia rupueja quiniutianiya. Nojuajaari pa panijia, pa jyanoojia-juhuaj. ¹² Pueyanaa, Pueyaso tojijia nia quiniucua, nia saruhua-jotooriquia nujuunuta, seetanujuanaa nia paniniutia niarta Pueyaso pueya. ¹³ Puetunu niiquijinio parta Pueyaso muerasujuaanaari cua sequeya cua saruhuatanura niajaniya.

¹⁴ Pa Jiyaniijia Jesucristo cuara cumaquiiria niajaniya pueyaracaanu. Niajaniya cuara quiiria pa Que Pueyaso panishano pueyaracaanujuhuaj. Naajuhua, niaa cuara quiiria Pueyaso Sohuano rupuesano pueyaracaanu. Puetunu niajanijajanaa cuara naa quiiria.

PABLO NAAJIONEE GÁLATA JIYAJINIA QUINIAA PUEYASO PUEYACUARA

Gálata pueyacuara naajionee

¹ ¿Niaate quiyajaa pueyanaa? Janiyari Pablóni, pa Que Pueyaso jiyaramiquishano. Janiyari maja nareja pueyano jiyaramiquishanoni. Mijiria quiniaa pueyari maja na jiyatenu quiquiaari janiya Pueyaso jiyaramiquishano cua quiniuria. Jesucristojuanaacuajaari cua jiyatequiaari na jiyaramiquishano cua quiniuria. Nojuacuajaari na Que samiitianishanohua macujiniji. ² Niya cuata quiniaa parta Pueyaso pueyatani, janiyari nio naajiyani. Nio cua naajioneeri puetunu Galacia jiyajinia quiniaa Pueyaso pueya maapuerajanaa. ³ Pa Que Pueyaso, mariyata pa Jiyaniijia Jesucristoni, nojori cuara cumaquiria nijaniya, nioojia cajitishano nia quiniurajuhuj. ⁴ Jesucristoori tama na cuaqueyajaaja panitiaquiaari pocuara na mosaanura. Naacuajitij, nojuajaari pa jeequequiaari puetunu sesa pa miishanojinijijianaa. Nojuajaari naa miiquiaari sesa miiniuucua jiaatianu pa cartenura. Nojuajaari naa cusoquiaari pocuaratej, taa pa Que Pueyaso paniquiaaricuajani, na muerasu pa quiniuria. ⁵ Naaratej, pa Que Pueyaso cuara maniniuhuaqueetasano quiiria. Cuaara naa quiiria pueyaracaanutej.

Maja tamonu maninia rupaa quiniu socua Jesucristo rupaajiniji

⁶ ¿Taa nia miiquianuni pueyanaa? Quiarijiani, janiyari jiyanohua tacaya niaacuani. ¿Niaateeri ritia cartecanu Jesucristo rupaa, tamaatia niishitiojosano tojitiajaca nia quiniuria? Pueyasocuajaari Neyanutaja nia cojiritiaquiaari paniniu, Jesucristo miiniuucua maninia niaara, na panishano pueya nia quiniuria. ⁷ Seetanujanaa, majaari socua tamonu rupaa quiniu Pueyaso pueyara pa jatanishaanura. Noo juhuari nia cushitiojoquiaa saajatejaj, najuhuana tamaatia nia niishitiojonuquiaatej. Nojoriiri Jesucristo rupaa cushitiojoquiaa niaara, nojori tacarajosacari najuhuanaj, mariyateyacato nojori quiniuucua. ⁸ Cua tojiri pueyanaa, tamonu pueyano jaara pocuaji Tacuna rupaa niishitiojoriquia nijaniya tamaatia canaa niishitiojosanojiniji nijaniya, Pueyasoori na saniitionutaniya. Naajuhuj, janiya jaara tamaatia pohuatare Jesucristojiniji nijaniyani, jiyocuacaanuji roseno Pueyaso serujuhuaj, Pueyasojuanaari canaa saniitionutaniya. ⁹ Janiyacuajaari naa sequeja nijaniyani. Quiarijia socua pacuterohuacuara sequenu nia niishishocoriquiano. Cua tojiri pueyanaa. Niaa jaara tamaatia pohuataaariquia Jesucristojiniji, maja naate taa tari cua pahuataquiaari nijaniyacujani, Pueyaso cuara saniitiooranoj.

¹⁰ ¿Niaateeri jiyaniya janiya pueya timitiasano quiniu paniyani? Maja. Janiya cutaraari Pueyaso timitiasano quiniu paniyani. Janiya jaara saaja pueya timitiasano quiniu paniriquiani, janiya maara pa Jiyaniijia Jesucristo seru quiyacuirini.

Taa Pablo jatanishaaquiaari Jesucristo jiyaramiquishano na quiniuriani

¹¹ Cuarta Pueyaso pueyanaa, nia pahuatareera cante cua niishitiojoquiaari Jesucristo rupaani, cua pahuatasano nijaniyani. Pueyanaa,

nio rupaa janiya na pahuataa nijaniyani, nioori maja mijiria quiniaa pueya niishitiojosano janiya. ¹² Taa cua sequeya nijaniyacuaajani, majaari nio rupaa cua niishiniu quiquiaari tamasa pueyajiniji. Jesu-cristojuanaacuajaari na rupaa cua niishitiquiaari.

¹³ Naa naasucuaari janiyajiniji tojinuujiacuaja tarijia. Seetanujuanaa cuarta Judiocuaca miishano miijia cua quishacarijia, janiyari Pueyaso saquiriojosano pueya puecoonu panijia puetunujuanaani. Janiyari jiyanojua paracaajia nojorini. ¹⁴ Janiyari seetanujuanaa canaa supuetanaa niishitiojosano tojjia quijia cutarani, socua cuarta Judiocuaca mashiquiorijiniji. ¹⁵ Naajaa, jiyanojua panijia Pueyaso quiniuucua, cua supueyaquishacarijia, inojuajaquiiri tari cua saquiriojoquiaari na pueyano cua quiniuria! ¹⁶ Naacuajitij, tama na panishacarijiaaja, nojuajanaari Neyanu cua niishitiquiaari, Neyanujiniji cua pahuatanura taucuaca. Neyanu na niishitiniu nuhuaji janiya, majaari quenaaja tamasa nequesotanuucua cua quianu quiquiaari, cua niishiniuria seetanutejanaa na niishitishano janiya. Pueyasocuaajari maninia cua niishitiquiaari puetunujuanaa Neyanujiniji. ¹⁷ Naajuhua, majaari cua quianu quiquiaari Jerusalén tiacajinia, tii cua niquiniuria cuarta Jesu jiyaramiquishano pueya. Nojoriiri coteenujanaa Jesu jiyaramiquishano pueya quijia. Jiyacaritij, majaari quenaaja cua tarishiniu quiquiaari Damasco tiacajinia. Janiyari ritia quiaquiaari pueya quiaquiaaqui Arabia jiyajiniani. Na nuhuaji, janiyari tacatequiaariuhua Damasco tiacajiniuhua.

¹⁸ Jiuujanaraca marijia cua shocotejonu nuhuaji Damasco tiacajinia, janiyari shusha jiyacari quiaquiaari Jerusalén tiacajiniani, Pedro cua niishiniuria shushajanaa. Nata cua quishacari, quince juucaari cua shocojoquiaari tiini. ¹⁹ Jiyacaritij, majaari socua Jesu saquiriojosano pueya cua niquiniu quiquiaari. Janiyari saaja Santiago niquiquiaari cutarani. Nojuacuajaari pa Jiyaniijia Jesu tarajanu. ²⁰ Pueyanaa, Pueyasocuaajari niishiya, janiyari nio cua naajiojinia seetanujuanaa nia pahuataani.

²¹ Na nuhuaji, janiyari quiaquiaari Siria jiyajiniani, Cilicia jiyajiniano. ²² Saniniuujia, Judea jiyajinia Jesu tojtiajaca maapueeri juhuanojuaaja maja na niishitiniuni quijia janiya. ²³ Nojoriiri saaja naa poojotasaquiaari janiyajinijitij: “Noo pueyano tarijia pa miitiaja naquiya Jesujiniji pa pahuatasacaritij, nojuajanaari quiarjia pa Jiyaniijiajiniji pahuataa pueya niquiarajuhua”. ²⁴ Naa nojori tojinuuushacari janiyajinijitij, nojoriiri Pueyaso maninuhuaqueetaquiaari nojori paraca na jataniniuucua Jesu rupaa pahuatana na quiniuria.

2

Jesu jiyaramiquishano pueya niishishacari, Pablo seetanujuanaa Jesu jiyaramiquishano pueyanojuhua

¹ Catorce marijia jaara shocojoquiaari, janiyari Bernabeeta Jerusalén tiacajinia pacutequiaariuhua quianuni. Janiyari jiyacari Tito rupoquiaari cucuajuhua. ² Pueyasocuaajari cua toquiaari cua quianura Jerusalén tiacajinia. Janiyari cunora quiaquiaarini. Tii cua quishacari, janiyari Jesu tojtiajaca jütianaa pueyata rejejoquiaarini. Maja seetanu puetunu nojoritajanaa, saaja nio pojoritia: Santiago, Pedro, Juannio.

Janiyari saaja cuno pojori niquiara pohuataquiaarini taa cua pohuataquiaa Jesujiniji puetunu taucuacajanaacuajani. Na nuhuaji, janiyari nojori nequesotareeni: “¿Taa nia sequeyani pueyanaa? ¿Janiyate najuhuana sesa niishitiojiya taucuacani?” Cua sequetureeri: “Maja. Quiaacuaja seetanu rupaajanaa niishitiojiya taucuaca, naa Jesucristojiniji quia pohuatasacari nojori”. ³ Naajuhuaaj, parta Pueyaso pueyano Titoni, cuata quiquiaari tiini, nojuajaari Grecia jiyajinijinio tahue. Naajaa, majaari na sequesaanu quiquiaari na cararaatiuuquia co miatesaanura, seetanujuanaa Pueyaso pueyano na quiniuria. Nojuajaari maja naa na sequesaanu quiquiaari. Canaa rerejosacari Pueyaso pueya jiiitanaata, nojoriiri Tito niqiquiaari nareja, nojori na rupenu-rajuhuaaj. Nojoriiri niishiquiaari nojuajaari seetanujuanaa Pueyaso pueyanojuhuaaj, saaja Jesucristoocua na tiuuniucua. ⁴ Saniniuujia, nojiaqueya canaa Judiocuacajinijinoori tama nojori cuaqueyajaaja jiyatequiaari juhua Jesu tojiijaca pueyara, nojori cojinuria canaa. Nojoriiri naa canaa rupuequiaari na sapojonuta. Canaata nojori quishacari, nojoriiri canaa shanacutaja nojori niishiniuria canaate seetanujuanaa Pueyaso muerasuni, saaja Jesuucua canaa tiuushacari. Nojoriiri juucua canaa jiyatenu paniquiaari tariucuacaanu Moisés Rootasano tojiijaca canaa quiniuhuaa. ⁵ Canaari nojori niishitiojosano pataquiaari saajani. Majaari quenaaja shiitaniyoyua nojori rootasano canaa tojiniiu quiquiaari. Canaari naa miiquiaarini seetanu Jesucristo rupaajanaa canaa cojuanura niaara, seetanujuanaa Pueyaso muerasu nia quiniuria saaja Jesucristoocua nia tiuuniucua. Majaari canaa cojitiiniu paniniu quiquiaari Jesucristo rupaa, tariucuacaanu niishitiojosanota.

⁶ Cuno pojori Pueyaso pueya maapue jiiitanaa Jerusalén tiacajiniani, nojoriiri jiyanohua tojishano pueya quijia. Janiyara naajaa. Pueyasocujaari najuhuana quijiaa jiyanooquiaajuhuaaj, taa na jiyanooquiaa tojishano pueyacuaani. Naajaa, cuno tojishano pueya jaara tojiquiaari taa cua pohuataquiaa Jesucristo rupaani, majaari quenaaja niqiriyaat ruupaa nojori sequenu quiquiaari, nojori niishitiojonura janiya socua. ⁷ Nojori cutaraari niishiquiaari Pueyasocujaari seetanujuanaa cua jiyatequiaari na rupaa pohuatana cua quiniuria taucuacaa, taa Pedro na jiyatequiaari Judiocuaca niquiara pohuatana na quiniuriacuaani. ⁸ Pedro jiyatena Judiocuaca niquiara Jesucristojiniji pohuatariquianoni, cuno Pueyasojuaanaacuajaari cua jiyatequiaarijuhua taucuaca niquiara pohuatana cua quiniuria. Naacuajitij, canaari mariyata Pueyaso jiyaramiquishano pueyani.

⁹ Santiago, Pedro, Juannio, nojoriiri socua tojishano quijia puetunu Jesuucua tiuunaa cuarta Judiocuacajinijinojuanaa. Nojoriiri seetanujuanaa puetunu Pueyaso muerasu jiyaniijianucujanaa quijia. Naajaa, nojoriiri seetanujuanaa niishiquiaari Pueyasoori maninia cua jiyanooquiaari, na jiyatenura janiya Neyanujiniji pohuatana cua quiniuria taucuaca niquiara. Naaratej, nojoriiri na juaashiquia niqutiojiquiaari canaani, janiya, Bernabeenio. Nojoriiri cunota juhua canaa sequeturiquiaa canaari seetanujuanaa nojori cojiniaani. Naa canaa sequetuquiaarijuhuaaj: “Maniniacuaja. Nia quiojiyare taucua-caacua tii nia pohuatana Jesujiniji nojoriijuhuaaj. Canaari saniniuujia parta Judiocuaca tajinia poonijionutanianijia, nojori niquiara canaa pohuatana Jesujinijijuhuaaj”. ¹⁰ Nojoriiri canaa sequetuararijuhuaaj:

“Canaa panishano pueyanaa, majaari nia niyajetanu casamiijiuniucua pueya naacunu”. Naaratej cuarta Pueyaso pueyanaa, puetunu tiqiy-ocuajanaa cua rucuanesacari, janiyari naa miiquiaa seetanujuanaani.

Antioquiya tiacajinia Pedro nacasusaanujiniji pohuatasano

¹¹ Tamacari, canaa quishacari Antioquiya tiacajinia, Pedroori canaacua niqiaarijuhua, canaata na quiniuria tii. Tii na quishacari canaata, Pedroori sesa miiquiaari cua niqiaara. Cunora, janiyari jiyanoohua na nacasuquiaarini. Cuno na miishanoni, cunoori seetanujuanaa sesa quiquiaari Pueyasora. Naa na miishacaritij, tamajaaja miiriquiaa cocuaatiaari. ¹² Pedroori naa miiquiaaritij. Coteenu canaa cojiqiaari maniniaari tariucua Jesuucua tiuuijaca taucucata, canaata na miaquejonura jatiqui. Jiyacaritij, canaacua tiuuijioquiaariiri socua cuarta Judiocuaca Jerusalén tiacajiniji. Nojoriiri Santiago jiyarosano pueya quiquiaari. Cuno Judiocuaca quishacari tii canaata, Pedroori canaacuaji rupatequiaari. Majaari tari na miaquenu paniniu quijia canaata, tariucua Jesuucua tiuuijaca taucucata. Narta Judiocuaca puerequiaariiri maja na sequesaaanura: “Cunoqui sacuaraatia miaquejojuu taucucata”. ¹³ Tii quiniaa Jesuucua tiuuijaca Judiocuaca jaara niqiuquiaari naa Pedro miishanocuaatej, nojoriiri jaarajaaja canaacuaji rupatequiaarijuhua, Pedro na cojitiuniuria. Naajuhua, ¡Bernabeeri jaarajaaja canaacuaji rupatequiaarijuhuaj cuno mosanucua na cojiniuria! ¹⁴ Naaratej, janiya jaara naa nojori niqiuquiaari tariucua Jesuucua tiuunio taucucata tamacatiuyanoni, janiyari niishiquiini, cuno pojoriiri maja maninia na miitiuniu quiriquiaa. Cunoori maja na quiniu quiriquiaa taa nojori rootasaaquiaari Pueyaso rupaacuajani. Cunora, janiyari puetunu Pueyaso pueya maanu niquiarajanaa naa sequequiaari Pedroni: “Quiaari Judio pueyano. Naajaa, majaari seetanujuanaa juhua Judio pueyano quia quiniu quiquiaa. Quiarijia saniniuujia, quiaari Jesuucua tiuunio taucucata shiniujiya nojori quiniuria seetanujuanaa juhua Judiocuaca, nojori rupenura pajaniya. ¿Casaara naa quia shiniujiya nojoriirini? ¹⁵ Paacuajaari Moisés Rootasano tojjijaca cutarani, Judiocuaca pa quiniuucua. Paari maja tahuani, Pueyaso tojjiyashijia. ¹⁶ Naajaa, paacuajaari niishiyani, majaari Pueyaso jiyanooni pajaniya Moisés Rootasano tojjijaca pa quiniuucua. Maja. Pueyaso cutaraari pa jiyanoojia, Neyanu Jesucristoocua pa tiushacari. Paari cunora Jesucristoocua tiuquiaani, nojuaja jiyanooniuria pajaniya puetunu sesa pa miishanojinijijianaa. Sesa pa miishanoori maja na jiyanooshaanu quiquiaa Moisés Rootasano pa tojjishacari. Maja. Naajuhua, majaari quenaaja niquiriyatu pueyano jiyanooshaanu quiniutianiya Moisés Rootasano tojjia na quiniuucua. Maja.

¹⁷ Paacuajaari Jesucristoocua tiuquiaarini, jiyanooshano pa quiniuria, maja socua Moisés Rootasano tojjijaca pa quiniuria. Na nuhuaji, paa jaara jiyaniyani paa sesa miijiaa quiriohuani Moisés Rootasano pa tojiaquishacari tarini, saaja Jesucristoocua pa tiushacari, paari jiyanoohua jiyajeneyani. Naa pa jyanishacaritij, paari juhua sequeyani Cristoori pa jiyaterohua sesa miijiaa pa quiniuhuara nocua pa tiuuniucua. ¿Quiaateeri naa sequenu paniya Pedronaa? ¡Maja! ¹⁸ Paacuajaari maninia miiquiaarini pa tarinitiasacari tojinu Moisés Rootasano, jiyanooshano pa quiniuria saaja Jesucristo rupaacua pa

tiuushacari. ¿Paateeri socua maninia miijiaca quiniutianiya Pueyaso niquiarani, paa jaara Moisés Rootasano tojijiaca quiriohuani? ¡Maja! Paa jaara naa niishiriojiyani, paari jiyanoohua jiyajenyani. Paacuaaari seetanujuanaa pohuatanuuquiaa puetunu pueya niquiarajanaani, nojoriiri jiyanooshaanutaniya saaja Jesucua nojori tiuushacari. Naa pa pohuatanuusano jaara sapojosano quiriquia, paa maara jiyanoohua sesa miijiaca quiriquiani. Saniniuujia, Pueyaso cutaraari seetanujuanaa pa jiyanooquiaa saaja Neyanuucua pa tiuushacari”.

Janiyari naa nacasuquiaari Pedroni puetunu tii quiniaa Pueyaso pueya niquiarajanaa. ¹⁹ Pueyanaa, cua niishishacari maja cua naata Moisés Rootasano tojiniu maninia puetunujuanaa, janiyari niishiquiaarini Pueyasoori cua shaajanutaniya na shuriucuaji. Naaratej, janiyari tama cua cuaqueyajaaja jiyatequiaari juhua tariucua macuni, maja Moisés Rootasano tojijia cua quiniuria socua. Naacujitij, janiyari quiarijia saaja Pueyasora quiya cutarani. Janiyara, janiyari tari cojiritiasaaquiaari monu Cristota niyacutesanojiniani. ²⁰ Naacujitij, quiarijiani, majaari nio janiya quiyani. Jesucristocuaaari nio, coojiajinia quiyani. Majaari tamajaaja saminio cua quiniu. Jesucristo cua rupesacari, naacujiti janiyari saminio quiyani. Naa saminio cua quishacari puetunu cua cuaqueyatajanaatej, janiyari rishiyani Pueyaso Niyanuucua tiuujia cua quishacari. Nojuajaari cua paniquiaari. Naaratej, tama na cuaqueyajaaja tarinitiaquiaariiri cucuara na mosaanura. ²¹ Majaari cua ruuretano Pueyaso jiyanooniu panishacari janiya. Jaara pa naata quiriquia tama pa cuaqueyajaaja jiyanooniu Pueyaso, Moisés Rootasano tojijiaca pa quiniuucua, Jesucristo maara najuhuana cusoquiaari pocuara.

3

¿Teyano tojijia pa quishacari pa jiyanooshaaquiaani, Moisés Rootasano, Jesucristoocua tiuuniu soj?

¹ Mosanucua Gálata pueyanaa, ¿cante nia shimiojocanuni, naa pa jiyaniijia Jesucua tiuuniu nia tarinitianuratej? Canaa jaara shushajanaa nia niquiara pohuataquiaari Jesucristojinijitij, canaacuaaari maatia nia niishitiquiaarini, nojuajaari pocuara mosaaquiaari pa jiyanooshaanura. ¿Quiarijaariuhuaj, cante tari nia sapojocanuni, Jesucristoocua tiuuniujiniji nia pishiniuriani? Naa nia miishacaritij, ¿niaateeri jiyaniya niaa tama nia cuaqueyajaaja jiyanooniuutianiya Pueyaso? Maja nia naata pueyanaa. ² Quiarijiani pueyanaa, janiya saaja nio nia nequesotanu paniyani. Cua riucature. ¿Niaateeri Pueyaso Sohuanu tiuquiniquiaari nioojiajinia Moisés Rootasano nia tojiniuucua, Jesucristo rupaacua nia tiuuniuucua soj? ¿Taa nia sequeyani? Niaacuaaari niishiya, niaari Pueyaso Sohuanu tiuquiniquiaari nioojiajinia Jesucristoocua nia tiuushacari, niaa jaara na rupaa tojiquiaari. ³ ¡Niaaquiiri tojetaarucujanaa mosanucujuhuanajaj! Nia niquishuriiraj, niaacuaaari Pueyaso muerasura quiquiaari Pueyaso Sohuanu nia shanacunuuca nioojiajinia na tiuquiniuria, Jesucristoocua nia tiuushacari. Quiarijia saniniuujia, ¿niaateeri jiyaniya nia naata Pueyaso jiyanooniu tama nia cuaqueyajaaja Moisés Rootasano nia tojishacariuhua juucua, tama

nia cumaacatajaaja? ¡Maja! ⁴ Pueyasocuaajaari jiyanohua maninia mii-riquiaa nijaniya, saaja Neyanuucua nia tiuushacari. Naa Pueyaso mi-shano niaarani, ¿cunoteeri najuhuana quiquiaarijiuhua? ⁵ Pueyanaa, Pueyaso jaara na Sohanu niqutioquiaa nijaniya, na nuhuaji na cumaacata miiquiaa nia niishishoo casaari, nia sequeretoj, ¿casaara naa na miiquiaarini? ¿Pueyasoteeri naa maninia miiquiaa nijaniyatej, Moisés Rootasano tojjijaca nia quiniuucua? Maja. Nojuajaari naa maninia miiquiaa nijaniyatej, saaja na rupaacua tiuujiaca nia quiniuucua, canaa pohuatasano nijaniyani.

⁶ ¿Niaate niishiya, casaara Pueyaso jiyanooquiaari canaa supuetana Abrahamni? Abrahamcuaajaari Pueyaso sequesanoocua tiuquiaari. Naaratej, Pueyasoori na jiyatequiaari juhua tojetaarucujanaa sesa miyashijia pueyanora. Naa na jiyatequiaariiri saaja nocua na tiuuniuucua. ⁷ Naacuajitij pueyanaa, quiarjia nia niishiri cutara, cante Pueyasooocua tiuujiani taa supuetana Abraham tiuquiaaricuaani, nojoriiri seetanujuanaa canaa supuetana Abraham niqiohuajanaa cutara. ⁸ Pueyaso jaara na sequenu panishano naajiotaniquiaari tariucuacaanu, nojuajaari tari niishiquiaari taa taucuaca na jiyanooniutianiyajaniuhua, nojori jaara nocua tiuuri. Naaratej, nojuajaari naa sequequiaari supuetana Abrahamtej: “Quiaacuajaari cua sequesanoocua tiuuri, Abrahamnaa. Naaratej, quia jiniuanucujajinio supueno pueyanoori jiyanohua maninia miiniutianiya puetunu pueyapuerajanaa. Noo pojori shuquiritiniutianiyari, puetunu jiyacajinijinijuanaa nocua tiuuriquiano pueyatej”. ⁹ Naaratej, cante Jesucristooocua tiuujiani, Pueyasoori na jiyanooniutianiyajuhua, taa supuetana Abraham na jiyanooquiaaricuaani, na sequesanoocua Abraham tiuushacari. Cunora, Pueyasoori maninia miiquiaa Jesucristooocua tiuujiaca, taa na miiquiaari Abrahamcuaani.

¹⁰ Saniniuujia, cante jiyaniyani Pueyasoori na jiyanooniutianiya Moisés Rootasano tojjijia na quiniuucua, nojuajaari pueyaracaanu saniitiosaanutaniya. Naa naajiotasano quiyacuajaari tariucuacaanu Pueyaso Rupaajinia:

“Moisés Rootasano tojjijia cuara tojiiria puetunu Pueyaso naajiotanishanojuanaa. Cante niquiriyatu na sequesano tojiyaquijiani, nojuajaari pueyaracaanu saniitiosocoriquiano”.

¹¹ Naacuajitij, niaari niishiyacuaja, majaari quenaaja niquiriyatu pueyano jiyanooshaanu quiniutianiya, Moisés Rootasano na tojiniuucua. Saniniuujia, naa naajiotasano quiyacuajaari Pueyaso Rupaajinia:

“Pueyaso jiyanooshano pueyanoori pueyaracaanu rishiriquiano cutara, Pueyasooocua na tiuuniuucua”.

¹² Saniniuujia, Moisés Rootasani, cunoori maja na niishitiojonu Pueyasooocua pa tiuuniuria, jiyanooshano pa quiniuria. Maja. Saaja naa sequeyari:

“Cante puetunu nio naajioneejinia rootasanojuanaa tojjijiani, nojuajaari cuno na tojiniuucua rishiniutianiya”.

¹³ Maja maninia pa tojiyaquiniuucua Moisés Rootasano, paari Pueyaso puecosocoriquiano quiquiaarini. Naajaa, Pueyasoori pa Jiyaniijia Jesucristo jiyatequiaari na sesacasano pueyanora pa niti, pocuara na cusonura. Naa sequeyajaariuhua tariucuacaanu Pueyaso Rupaajinia:

“Pueyaso sesacasanoori cuno, niyacutesanojinia teetesanoni”.

¹⁴ Naa Jesucristo cusunuucua pocuaratej, saaja nocua nia tiuushacari, Pueyasoori na naata shuquiritiniu niajaniya taucuaacajuhuaaj, puetunu na sequesanoatajanaa canaa supuetana Abraham. Naajuhuaaj, saaja pa tiuniuucua Jesuucua, puetunu pajaniyajanaari Pueyaso Sohuanu masequiaani, taa seetanujuanaa Pueyaso sequequiaari tariucuacaanu-cuajani.

Moisés Rootasanoori maja na naata Pueyaso sequesano Abraham jataniniu

¹⁵ Cuarta Pueyaso pueyanaa, maatia nia pohuatারেera maninia nia niishiniuria cua pohuatasano. Cua tojiri. Pueyano jaara maninia miiniu paniri narta pueyanora, naa miijiaari: na sesa naajiotajaari naajioneejinia, tee cuniqui na miishocoriquiano naajiotasano quiyacuajani. Jaara naa miiritij, majaari quenaaja tamonu na naata cuno naajioneejinia naajiotasano jataniniu, socua na maatenunio. ¹⁶ Tariucuacaanu, Pueyasoori naa sequequiaari Abrahamtej:

“Janiyari seetanujuanaa maninia quia miiniutianiyani, quia jinianuucujinio supueriquiano pueyanonio”.

Nia niishiri pueyanaa, tariucuacaanu Pueyaso Rupaajinia naajiotasanoori maja na sequenu: “Abraham jinianuucujinio supueno pueyara”. Maatia sequeyacuajaari: “Abraham jinianuucujinio supueno pueyanora”. Niquiriyatu pueyano sequeyari, maja queraatia. Nojuajaari pa Jiyaniijia Cristocuaja. ¹⁷ Cunora pueyanaa, janiyari seetanujuanaa nia sequeyacuajani, Pueyasoori seetanujuanaa sequequiaari Abraham taa nera na miiniutianiyani. Seetanujuanaa Pueyaso sequesanoori maja na naata jatanishaanu. Naacuajitij, Moisés Rootasanoori maja na naata Pueyaso sequesano Abraham jataniniujuhuaaj. Seetanujuanaa Pueyaso sequenu nuhuaaj Abraham, taa nera na miiniutianiyani, cuno nuhuaaj, shocojoquiaariijaaraari cuatrociento treinta marijia. Cuatrociento treinta marijia shocojonu nuhuaaj, Pueyasoori jiyacari shusha Moisés niqutioquiaari na rootasano, saajianeecaacua na quejasano. Moisésri saniniuujia pueya na niishitiojoquiaari. Naacuajitij, Moisés Rootasanoori maja na naata Pueyaso sequesano Abraham jataniniu, najuhuaana na quiniuria pajaniyara. ¹⁸ Pueyaso niqutionu panishano pajaniya jaara pa niqutiosariquia saaja pa tojiniuucua Moisés Rootasano, na niqutiosocoriquiano pajaniya maara nareja niqutiosoo quiri. Saniniuujia, Pueyasocuajaari seetanujuanaa naa Abraham sequequiaari:

“Janiyari nareja quia niqutionutaniya cua sequesanooni”.

¹⁹ Naaa naasucuaari sequeya: “Jaara naa quiriritij, ¿casaarano socuateeri Moisés Rootasano?” Nia sequereera pueyanaa. Jiyanohua Abraham nuhuaaj, Pueyasoori Moisés caminiujiutiquiaari na rootasano, pueya niishiniuria nojoriiri seetanujuanaa Pueyaso tojiyashijia. Cunora quiquiaariiri Moisés Rootasano. Cuno Rootasanoori quiquiaari Abraham jinianuucujinio supueno pueyano cuara tiuquiquiaariijaatijia, taa Pueyaso sequequiaari Abrahamcuajani. Nojuajaari pa Jiyaniijia Jesucristocuaja. Naacuajitij, Jesucristocuajaari Pueyaso jiyaniquis-hano quiquiaari, na sequesacari Abraham, “quia jinianuucujinio supueriquiano pueyano”. Cristocuajaari puetunu Pueyaso sequesano

Abrahamjanaa masequiaari pajaniyarajuhuaaj, taa Pueyasojuanaa sequequiaari Abrahamcuajani. Saniniuujia, Moisésri saaja pueya ni-shitiojoquiaari Pueyaso seya caminiujiushano nojuaja. ²⁰ Abrahamra saniniuujia, majaari quenaaja tamonu pueyano quiniu quiquiaari nera na caminiujiuriquiano. Pueyasojuanaacuajaari nocua muetaquiaari, na sequenura seetanujuanaa taa Neyanuucua tiuujiaa na miiniu-tianiya maniniani. Cunora, Pueyaso rupaa Jesucristojiniji pa tojishanoni, cuno cutaraari socua pa tojishocoriquiano Moisés Rootasanoniji.

Casaaranote Moisés Rootasanoni

²¹ Naa cua sequesacariitij, ¿niaateeri jiyaniya, Moisés Rootasano naacuuaari pajaniyarano Pueyaso sequesano paraca? Majaari naa cua sequenutej. Janiyari saaja sequeyani, Moisés Rootasano jaara na naata quiriquia Pueyaso jiyanootiniu pajaniya, paa maara Moisés Rootasano tojtiajaca quiriquiani, Pueyaso jiyanooniuria pajaniya. ²² Saniniuujia, tariucuacaanu Pueyaso Rupaajinijini, paari niishiyani puetunu pueyapuejanaari Sesaaca pueya. Naaratej, majaari pa naata tarinitianu quiquiaari sesa miiniu. Naacuajitij, paari maatia niishiyani, puetunu pueyajanaa cuaara tiuuria Jesucristoocua, Pueyaso sequesano Abraham nojori masenura.

²³ Pa niishiyaquishacarijia Jesucristoocua pa tiuuniuria, paari juhua Moisés Rootasano jiiťasano pueya quijiani. Paari naa quijia taraatia pueyacuaaani, paa jaara tojiquiaari Jesucristojinijiaatijia, nocua pa tiuuniuria. ²⁴ Naacuajitij, Moisés Rootasanoori juhua pa jiiťiana quiquiaari. Juhua naatujooriniyojua pa pueratejojua Jesuucuaari. Naa na miishacari pajaniyatej, juhuacarijia Jesujiniji pa niishitiojojuuari. Naacuajitij, paa jaara Jesuucua tiuquiarini, paari puetunu sesa pa miishanojinijijianaa jiyanooshaaquiaarini. ²⁵ Naa Jesuucua tiuujiaa pueya pa quishacari quiarijiatej, majaari socua pa tojiniu tariucuacaanu pa canashitijiona. Moisés Rootasanoori juhua pataaco seru quiquiaari, Pueyasora na canashitijionura pajaniya, juhua naatujoori pa quishacarijia. ²⁶ Quiarijia cutara, puetunu nijaniyajanaari Pueyaso pueya, Jesuucua nia tiuuniucua. ²⁷ Naacuajiti pueyanaa, niaa jaara moojinia tiuquinishaacanu, seetanujuanaa nioojiata nia tiuushacari Jesuucua, niaari na coquetesaaquiaa. Naa nia quishacari natatej, na Que niquiara, niaari juhua nojuaja niquishano, na panishano muerasuniyojua nia quiniuucuaajuhuaaj. ²⁸ Naa Pueyaso muerasu pa quiniuucuatej, majaari Pueyaso niquiniu rimiajata pajaniya. Tamonu jaara Judio pueyano quiri, naajaa. Tamonu jaara tahue quirijiuhuaaj, naajaa. Poonijotesano pueyano maaraja, camarnuuju pueyanonio, cunoori maja rimiajata Pueyasora. Naajuhuaaj, caya, maaji, cunoori maja rimiajata Pueyasora. Jesucristoocua tiuujiaa pa quishacari, Pueyasora, puetunu pajaniyajanaari juhua niquiriyatu pueyanoni. ²⁹ Naajuhuaaj, niaa jaara seetanujuanaa Jesucristo pueya quiri, niaari seetanujuanaa canaa supuetana Abraham jihuacuajinio supueno pueya cutara. Naacuajitij, niaari Pueyaso sequesano Abrahamrano maseriquianojuhuaaj.

4

¹ Nia sequenu paniya socuanijia pueyanaa. Cua tojiri. Mijiria, pueyano jaara jiyaniijia quiri, na shaajesacari, neyanuuri camarnura

jiyatesano na que niti. Shaajeno pueyano niyanu jaara naatujua quirijia, neyanuuri juhuanojuaja maja na naata na que casami jiitianu. Nojuajaari saaja juhua pataaco seru, naatujua na quishacarijia. ² Naacuajitij, tamasaacari cuno mueya canashitijia, cuaara mashajara quirijiaatijia, jiyaniijara jiyatesocoriquiiano, taa na shipininio sequequiaaricujani. Juhucarijia niishitiojoshiyajaariuhuj, maninia na jiitianura nerano na que riuriotaca. ³ Paari naajuhuj. Pueyaso pueya pa quiaquishacarijia, paari juhua naatujoori quiquiaarini. Paari mijiria niishishano tojitishaacuaarini, pa supuetanaa niishishanonio. Paari naa taraatia jiitiasaacuaarini. ⁴ Na nuhuaji, Pueyaso jaara tari na sequesano tohuateenu paniquiaari, nojuajaari Neyanu jiyaroquiaari pocua, mijiria na rasaanura maninia maajijinijijianaa, pueyano na quiniuria. Mijiria na quishacari, nojuajaari puetunu Moisés Rootasanojuanaa tojiquiaari pa niti. ⁵ Naacuajitij, nojuajaari na naata Moisés Rootasano tojiijaca jiyanooni, maja socua pa tojitishaanura Moisés Rootasano. Naaratej, Pueyasoori na naata pa jiyatenu na muerasu pa quiniuria cutara. ⁶ Seetanujuanaa na niishitiniuria pajaniya paari necohuani, nojuajaari Neyanu Sohuanu jiyaroquiaari pocua, poojiajinia na quiniuria. Naa poojiajinia na quishacarijia, nojuajaari Pueyaso pa sequequiaa, “cua Quenaa”. ⁷ Naacuajitij pueyanaa, majaari tari nia quiniu Moisés Rootasano tojiijaca, juhua pataaco seru. Niaacuajaari seetanujuanaa Pueyaso niqiohua cutara. Naa na muerasu nia quishacarijia, niaari tariucuaaanu Pueyaso sequesano Abrahamrano maseriquianojuhuaj, taa na muerasurano niqitionu na sequequiaaricujani.

Pablo tacaashacari Galacia jiyajinia quiniaa Pueyaso pueyacua

⁸ Pueyaso nia niishiyaquishacarijia pueyanaa, niaari juaashiquiata shipinijosano nia pueyasohua tojiijaca quiquiaari taraatia. Cuno casaari maja seetanujuanaa Pueyaso. ⁹ Quiarijia saniniuujia, niaari Pueyasajuanaa niishiya. Pueyasajuanaa cutaraari saniya nia niishiya. Naa Pueyaso panishano muerasu nia quishacarijia, ¿casaara najuhuana supuetanaa pueya niishishano miiniuria nia panihua socuani? Cuno, canaa supuetanaa Judiocuaca rootasanoni, cunoori maja na naata cumaquiniu nijaniya. Niaari najuhuana na tojiijaca quiniutianiya. ¹⁰ Niaanaari puetunu juucajanaa niishijaca quia, juhua canaa supuetanaa Judiocuaca. Niaanaari sequetuquiaa: “Cuno juuca, majaari pa miaquenu quiniutianiya. Cunoori pueresano juuca, Pueyaso jiyanooniuria pajaniya”. Niaanaari naa miiquiaa puetunu shuniyarananaa, puetunu marijijarananao. ¿Casaara naa miijiacara nia quiohuacuaarini cuarta Pueyaso pueyanaa? ¹¹ Naa nia miiniuucuatej, janiyari jiyanohua tacaya quiarijia niaacuani. Janiyari tama sequequiaajaacujua: “Cuno pueya tajinia Pueyaso rupaa cua pohuatasanoquiiri najuhuana quiquiaari”.

¹² Cuarta Pueyaso pueyanaa, janiyari seetanujuanaa nia sequenu paniyani. Nia miiriohuarohua taa cua miiquiaaricuaani, shusha cua tiuquishacari niaacua. Moisés Rootasano niishiyashijiacua nia quishacari, janiyari na tarinitiaquiaari tojiniiuni, juhua nijaniya cua quiniuriajuhuaj. Saaja Jesucristo rupaa nia tojiriohua cutara taa cua miiquiaaricuaani. Cua panishano pueyanaa, niaari maninia cua jiitiquiaari niaata cua quishacari. ¹³ Niaacuajaari niishiya, cusosu cua quiniuucua, janiyari shushajanaa Jesucristojiniji pohuataquiaari nia

niquiarani. ¹⁴ Naa cusosu cua quishacari niaatatej, naajaa, majaari na ruuretanu quiquiaari janiya, naa sacuaaraatia cusosu cua quishacari-tij. Majaari quenaaja nia soonu quiquiaari janiya. Saniniuujia, niaari cua tojtiaquiaari juhua Pueyaso serujuanaa, nia niquiara cua pohuatasacari Jesucristojiniji. Naa cutaraari seetanujuanaa cua tojiquiaari juhua Jesucristojuanaa. Naaari naa timitiaquiaari janiyatej, Jesujiniji cua pohuatanuucua niajaniya. ¹⁵ Quiarijiaariuhua pueyanaa, ¿casaa nia tojetacanuni? ¿Casaara nia tarinitiarohuacuaa shuquiriaatia nia quiniuurini, taa nia quiquiaari coteenucujani? Janiyacuajaari niishiquiaarini, jiyanoohua nia paniniuucua janiya, jaara nia naata quiquiaari, niaa maara nia namijia samiriootaquiaari nia niquticoso-coriquiano janiya, cucua nia taraajesacari. ¹⁶ Quiarijia naa cua sequesacari seetanujuanaa niajaniyatej, ¿niaateeri cunora cua niquiniutianiya juhua nia paraca? ¹⁷ Cuno pueya, najuhuaana tamaatia nia niishitiojo-quiaa Pueyaso rupaani, quiarijia nojoriiri maninia miiquiaa niajaniya na sapojonuta. Nojoriiri nia shuquiritiya, nojoriicua nia tiuniuria. Nojoriiri naa miya, canaa nia cartenura, saniniuujia nojori tojijiaca nia quiniuria. Naacuajitij, majaari tari cua rootasano tojtiajaca nia quiniu quiniutianiya. Naaari cua cartenutaniyajuhuaaj. ¹⁸ Quiarijiani, cuno pojoriiri nia shuquiritiyacuaaja. Majaari nia jiyaniniu janiya nia sequeyani, maja maninia parta pueya pa shuquiritiniuria. Taaquiri-irini, maniniacuajaari parta pueya pa shuquiritiniuria, seetanujua-naa pa naacunura nojori. Naaacuajaari niishiya pueyanaa, jani-yari jiyanoohua nia tojishano pueyano quiquiaarini, Jesucristojiniji cua pohuatanuucua nia niquiara. ¡Naa seetanujuanaa pueyaracaanu cua panijiacara nia jiyateriquiani, maja saaja nia shuriucua cua quishacari! ¹⁹ Quiquihuaniojuanaa, jiyanoohua cua tacaashacari nia-acua, coojiaari jiyanoohua noonu pacuterohuacuhuaaj, naatej, taa maaji nooquiaacuaa na manajani, quera na ranu panishacari. Naajuhuaaj, janiyari naa pueyaracaanu miiijionutaniya naquiya niaacuani, niaa cuaara jatanishaarejaatijia, quiarinio pueya nia quiniuria. Naaari naa quiniutianiyaquij, seetanujuanaa Jesucristo quishacari nioojiaca-jinia, juhua nojuaja nia quiniuria. ²⁰ ¡Seetanujuanaa nia shuriucua cua jatariquiani, maninia cua niishitiojonura niajaniya! Naa cua quishacari tucuaaanu niajanijajinijitij, majaari cua niishiniu taa nia quiya seetanujuanaani. Naaanaari Moisés Rootasano tojijiacara quiriohuacuaa. ¿Niaateeri seetanujuanaa Jesucristo rupaa cartecanu, maja soj?

Miriqui pohuatasano Agarjiniji, Saarajinijinio

²¹ Moisés Rootasano tojtiajacanaa, cua tojiri. ¿Majateeri tariucuaaanu Pueyaso Rupaajinia nia serojonu quiquiaacuaja, taa Abrahamjiniji na pohuataani? ²² Moisés Rootasanocuajaari Abrahamjiniji sequeya, nojuajaari caapiqui niyanuraca quiquiaari, caapiqui nucuaacuajinio-juhuaaj. Abrahamri neco seru muetutequiaari. Na sesojoquiaariiri Ismael. Na nuhuaji, saniya necojuanaari nera muetuquiaarijuhuaaj. Na sesojoquiaariiri Isaac. ²³ Pueyanaa, Agar jaara Abrahamra muetuquiaari, cunoori tama Abraham miishanojuajaaj quiquiaari, mueya na panishacari. Maja cutaraari Pueyaso panishano. Saniniuujia, saniya necocujanaa jaara nera muetuquiaari na nuhuaji, cunoori Pueyaso panishano quiquiaari cutara, na camishano maajijianaa mue-tusacari nera. Naacuajitij, Pueyasoori tarijia na sequesano Abra-

ham tohuateequiaari. Naa na sequequiaariiri: “Abrahamnaa, quiaari niyanuraca quiniutianiya”. Naa Pueyaso sequenuucutej, necoca Saaraari muetquiaari, motaja na quishacari. Cunoori maja tama nojori cumaacatajaaja. Cunora, Isaacri Pueyaso sequesanojuanaa mueya cutara, maja juhua Ismael, seru mueya. ²⁴ Nio caapiqui maajipohuani, Agar, Saaranio, nojoriiri juhua caapiqui seetanujuanaa Pueyaso sequesano na pueyara. Naacujitij, Agarr miriqui juhua Moisés Rootasano, Sinaí tuhuananujinia Pueyaso niishitiojosano Moisés. Naaratej, Moisés Rootasano tojtiajacaari juhua seya quiquiaa, taa Agar quiquiaari serucuaani. ²⁵ Seetanujuanaari, Agarr miriqui juhua Sinaí tuhuananu Arabia jiyajinia. Saniniuujia, nio pa quishacari, Jerusalén tiacaari juhua Sinaí tuhuananu, cuno tiacajinia quiniaa pueya quiniucua Moisés Rootasano tojjiaca. Cunora, Moisés Rootasanoori juhua nojori jiiitiana quia, juhua poonijotesano seya nojori quiniuria. ²⁶ Saniniuujia, quiarinio Jerusalén tiacani, jiyocuacaanu Pueyaso racatasano pa quiquioranoni, cunoori seetanujuanaa Pueyaso muerasurano cutara. Cunoori maja Moisés Rootasano tojjiacara. Cuno tiacaari miriqui juhua Saara. Paacujajaari juhua Saara niquiohua cutarani. Majaari tari pa quiniu seru niquiohua. ²⁷ Tariucuacaanu Pueyaso sequesano cuajaari naa naajiotasano quiyajuhuj:

“Niyajaru maajiniaa, shuquiriaatia quia quiri. Quiaacuajaari mueya noonu saniyashijia. Naajaa, majaari quia taraajenu. Quia shuquiriniutia quia jaaquequejore cutara. Quiaacuajaari cartesaaquiaari niyajaru quia quiniucua. Naajaa, quiaacuajaari socua queraatia niquiohuaraca quiri quiano cuno niyacaraca maajijiniji”.

²⁸ Cuarta Pueyaso pueyanaa, paacuajaari juhua Isaacni. Na nuclarano Saara tiuuniucua Pueyaso sequesanoocua, taa na muetnutaniyani, naacujiti nojuajaari neyanu Isaac raquiaari. Quiarijiani, paari naajuhuj. Jesucristo rupaacua pa tiuushacari, Pueyasoori na cumaacata pa jataniquiaari seetanujuanaa na muerasu pa quiniuria. ²⁹ Maninia nia niishiri nio pohuatasano, pueyanaa. Abraham jaara mueya paniquiaari, nojuajaari neco seru manajoquiaari tamajaaja. Saniniuujia, saniya necocuajanaa jaara nera muetquiaari, cunoori Pueyaso Sohuanu cumaacata rasaaquiaari cutara. Na nuhuaji, seru niyanuuri Pueyaso Sohuanu cumaacata rasano miitiaja quiquiaari. Quiarijiaari naajuhuj, Pueyaso ruuretajaca pueyari Pueyaso Sohuanu jatanishano pueya miitiaquiaa. ³⁰ Quiarijia nia niishiri cutara, naa naajiotasaaquiaaricujaari tariucuacaanu Pueyaso sequesano Abraham:

“Quia niquiocua seru quia taanuure neyanuta puetunujuanaa. Cuno, janiya seetanujuanaa quia sequequiaari niquitionuni, cunoori maja Agar niyanurano. Cunoori seetanujuanaa quia niquiocua muetusanorano, cua Sohuanu cumaacata rasano mueyaranotuhuj”.

³¹ Paari naajuhuj, cuarta Pueyaso pueyanaa. Paari maja seru niquiohuani. Paari Jiyaniijia niquiohuajanaa cutarani.

5

Saaja Jesucristoocua tiuujiaa pa quiri

¹ Jesucristo cusonuucua pocuara, nojuajaari Pueyaso niquiohuara pa jiyatequiaari, maja socua Moisés Rootasano tojjiaca pa quiniuria. Naarate pueyanaa, jiyanohua nia cojuare tama nia cuaqueyajaaja saaja Jesucristoocua nia tiuuniuria, Pueyaso jiyanooshano pueya nia quishacari tari. Majaari supuetanaa rootasano tojjiacara nia quiniuhua. ¿Moisés Rootasano tojjiacateeri jiyanooshaanutaniya? ¡Maja! Maja pa naata tama pa cuaqueyajaaja jiyanootiniu Pueyaso, Moisés Rootasano pa tojiniuucua. ² Cua tojitiare pueyanaa. Janiyari Pablóni. Janiyajanaari seetanujuanaa nia sequeyani, niaacuajaari Jesucristoocua tiuujia, Gálata jiyajinia quiniua pueyanaa. Cunora, Pueyasoori nia jiyatequiaari na muerasu nia quiniuria. ¿Niaateeri jiyaniya niaa seetanujuanaa Pueyaso pueyara quiniutianiya cutara, nia cararaatiuuquia co miatejosaanuucua? ¡Maja! Niaa jaara naa niishiri-ojija, niaari Jesucristo cusonu jiyatenutaniya najuhua na quiniuria niajaniyara. ¡Pueyanaa, majaari nia tojiniu cuno Judiocuaca, canapueete nia shiniujuquia nia cararaatiuuquia co miatejosaanuracujani, seetanujuanaa Pueyaso pueya nia quiniuria! ³ Janiyari socua sequenu paniya noo pojoririani, cararaatiuuquia co miatejonuujuacatej, nojori jiyaniuuucua naa nojori miishacaritij, nojori cutaraari seetanujuanaa Pueyaso muerasu. Cante naa miijiani, nojuaja cuara tojiiria puetunu Moisés Rootasanojuanaa. ¿Niaateeri jiyaniya nia naata puetunu Moisés Rootasanojuanaa tojiniu, Pueyaso jiyanooniuria niajaniya? ¡Maja! ⁴ Naa tama nia cuaqueyajaaja nia jiyanootiniu panishacari Pueyasotej, Moisés Rootasano nia tojiniuucua, niaari Jesucristojiniji carejerucuaa. Majaari Pueyaso naata maninia miiniu niajaniya socua, taa maninia na miiquiaacuaa na panishano muerasuni. ⁵ Pajaniya saniniuuja, paari Pueyaso Sohanuraca cutarani, Jesucristoocua pa tiuuniuucua. Naacujitij, paari niishiyani paari tojetaarucujanaa sesa miyashijiacara jiyatesaanutaniyani. ⁶ Quiarrijiani, Jesucristo rupaesano pa quishacari nocua pa tiuuniuucua, paa jaara pa cararaatiuuquia co mialesano quirini, maja soj, naajaa. Cunoori najuhanaj. Socua maninia cutaraari Jesuucua tiuuniu, Pueyaso panijia pa quiniuria, parta pueya pa paniniurijuhuj.

⁷ Cuarta Pueyaso pueyanaa, niaacuajaruhua Jesuucua tiuujia quijia seetanujuanaa. ¿Quiarjiaariuhuj, cante nia tarinitiriohuacuaa seetanu rupaacuajanaa nia tiuyaquiniuriani? ⁸ Cuno pojori niishitiojosano Jesuucua tiuuniu nia tarinitianurani, cunoori maja Pueyaso niishitishano nojori. ⁹ Cunora, seetanujuanaari nio sequesano: “Shiitianiyojua jereeca mashaca jaara shoqueeca mashacajinia shuushaare, cuno shiitianiyojuaari puetunu cuno mashacajanaa jereteja”. Naajaariuhuj, shiitianiyojua sesa niishitiojosanoori puetunujuanaa pa sesojuajuhuj. ¹⁰ Naajaa, janiyacujaari pa Jiyaniijaacua tiuya seetanujuanaani, majaari nia tojiniu quiniutianiya tamaatia cuno pojori niishitiojosano. Saniniuuja, Pueyasoori noo pojori saniitioriquiano, tamaatia na niishitiojonuusanota nia cushitioquiana. Cante nia niishitiojija sesani, jaara quiri cuarta Jesucristo jiyaramiquishano pueyano, tama janiyajaaja soj, naajaa, nojoriiri saniitiosaariquiano.

¹¹ Cuarta Pueyaso pueyanaa, majaari cua niishitiojonu quiquiaa taucacajinijinio Jesucristoocua tiuujia, nojori miatejonura na cararaatiuuquia co, seetanujuanaa Pueyaso muerasu nojori

quiniuria. Janiya jaara naa seetanujuanaa niishitiojoriquiaani, cuarta Judiocuaca maara naquiya cua miitiaquiriquiani. Saniniuujia, Jesucristo cusonuucua niyacutesanojinia pocuara, paari saaja naacua jiyanooshaaquiaani. Naa cua niishitiojonuucuatej, Judiocuacaari jiyanooshaaquiaani. ¹² Majaari nojori nia tojiniu, nojori niishitiojosacari nia cararaatiuuquia co miatejosaanura. Maninia juhuari cuno miatejonuunu porocua jayosaanura nia tajiniji, maja socua nojori cushitiojonura niajanija.

¹³ Cuarta Pueyaso pueyanaa, Pueyasocuaajaari nia sequequiaari na muerasuniyojua nia quiniuria, Neyanu Jesucristoocua nia tiuuniuucua. Naacuajitij, majaari tari nia quiniu juhua poonijotesano pueya, taa nia quiquiaaricuaani Moisés Rootasano nia tojishacari pueyaracaanu. Naa Moisés Rootasano tojjijaca nia quiyaquishacari taritij, naajaa, majaari nia jyaniniu nia naata miiniu puetunu nia cuaqueya miiniu panishanojuanaa. Maja. Maninia cutaraari niarta Pueyaso pueyata nia cumaquitioojonura, seetanujuanaa nia panitioonuta. ¹⁴ Niaa jaara naa miijjaca quiriquiatej, niaari puetunu Moisés Rootasanojuanaa tojijacuaaja, taa na rootasanojinia naajiotasano quiyacuajani. Naa sequeyari: “Panijia quia quiriquia, taa quia paniyacuaa tama quia cuaqueyajaajani”.

¹⁵ Naarate pueyanaa, tama nia cuaqueyajaaja nia cojuare. Majaari pueyaracaanu nia juayonuujutanu, naatej, taa sareya sayonuujutaquiaacuaani. Niaa jaara naa quiriquiatej, niaari socua puecootonutaniyaquij.

Taa quijiate tama na panishanojuaaja miijja pueyanoni, Pueyaso Sohuanu tojjijia pueyanonio

¹⁶ Janiya nia sequeya cutarani pueyanaa. Cua tojjiri. Pueyaso Sohuanu tojjijaca nia quiri pueyaracaanu. Naacuajitij, majaari sacuaraatia tama nia panishanojuaaja nia miiniu quiniutianiya. ¹⁷ Nio nia niishiri cutara. Cuno, poojiajinia sesa casaa pa panishanoni, cunoori Pueyaso Sohuanu paraca. Naajuhuj, Pueyaso Sohuanuuri poojiajinia sesa casaa pa panishano paracajuhuj. Naacuajitij, cuno pojori miaquetojosacari poojiajinia, cunora, majaari pa naata miiniu taa pa miiniu paniyacuajani. ¹⁸ Saniniuujia, Pueyaso Sohuanu jaara nia cumaquiquiaacuaaja saaja Pueyaso nia tojiniuria maninia, cunora, Moisés Rootasanoori tojiniu paniyacuishaanutaniya tari. Naacuajitij, niaacuajaari maninia miiniutianiya saa Pueyaso Sohuanutaja.

¹⁹ Maatia niquishanocuaajaari taa pueya miiquiaani, noo pojori, canapete tama na panishanojuaaja miijiacani. Nojoriiri juhuajaniya na camishoo maajipohua numuetucunuujuaa, sacuaraatia miitioojua narta canuutajaariuhuj. Maajipohuari naa sacuaraatia miitioojua narta maajipohuatajuhuaj. Pueyari saaja naa miiniuucua jiaatiajaca sacuaraatiatej. ²⁰ Naajuhuj, nojoriiri tama nojori pueyasorajaaja nojori shipinishano casaa secojonuujuaa. Nojoriiri shimiicurijjuhuaj, narta pueyano shimiojonuujuaa. Narta pueyano niquiniu paniyashijiacajaariuhuj. Nojoriiri juaatioojuaajuhuj. Nojoriiri narta pueyano jiitiasanoocua jiaatiajacaajuhuj. Cunora, nojori niquiniu paniyacuujiaari. Nojoriiri maja na niishiniu rejetenu na juaaquiaca. Rítia juaajiacari. Pueya nasojoua narta pueyanoocuarajaariuhuj. Naacuajitij, nojoriiri narta pueya raquiriojotaquiaa narta pueyajiniji. Nojoriiri saaja tama

nojori panishano pueyajaaja panijiaca, canapuete maninia miiquiaa nojoricuajani. ²¹ Cuno pojori, naa sacuaraatia miijiaca pueyaracaanu Pueyaso niquiarani, nojoriiri maja na niquiniu paniniu quijia narta pueyano, cante taquiya maninia miishaaree nocuajicuaani. Nojoriiri sacuaraatia mashaasequenuujuacajuhuj. Nojori mashaasequenuusacari, puetunu sacuaraatia casaa miijioquiaajanaari. Jiyanohua miaguenu porocua. Nojori queranacusacari, nojoriiri socua tamaatia sesa casaa miiniu niishijiacajuhuj. Niajaniya saniniuujia cuarta Pueyaso pueyanaa, cua tojiri. Cante naa sacuaraatia casaa miijiojuani, nojuajaari maja Pueyaso jiiitasano na quiniu quiniutianiya, pueyaracaanu rishijia na quiniuria shuquiriaatia.

²² Saniniuujia, paa jaara Pueyaso Sohuanu shanacure poojiajania na poonijionurani, nojuajaari parta pueya panijara pa jiyateja. Poojia jiyateya shuquiriaatia quijaraari. Poojia cajitijajaariuhuj. Jacaria pocujara pa jiyateyajaariuhuj, juhuajaniya sashijiano. Pueyaso Sohuanuuri maninia pueyanora pa jiyatequiaa, jiyanoojiano. Pa sequesano miijara pa jiyatejajaariuhuj, pueya tiuuniuria pocua. ²³ Pueyaso Sohuanuuri pa jiyateja pueya shocoteyashijiarajuhuj. Pa niishitiquiaajaariuhua tama sesa casaa pa cuaqueya panishanojuaaja pa rejetenura. Paa jaara naa miijiaca quiriquia Pueyaso Sohuanu cumaacatani, majaari quenaaja niquiriyatu Moisés Rootasanojinijinio sesacanu quiniutianiya pajaniya. ²⁴ Seetanujuanaari, paa jaara Jesucristo pueyanora quiquiaarini, pa rupesacari nojuaja, paari tari poojia sesoriquia seque cusojuaquiaari Cristotani, puetunu sesa pa jiaatianujuanaanio. ²⁵ Pueyaso Sohuanu jaara nia samiitianijioquiaari Pueyaso muerasu nia quiniuria, quiarijia seetanujuanaa pueyaracaanu na tojijia nia quiri cutara. ²⁶ Majaari tama pa cuaqueyajaaja pa jiyaniuni, paa socua maninia pueyano parta pueyajinijini. Paa jaara pueya shocotejaca quiriquiani, paari parta Pueyaso pueya juaatiniutianiyan. Maja maninia, paa jaara juaatishaareni tamonu jaara socua tojishano pueyano quiri pajaniyajiniji, naajuhuj, tamonu jaara socua maninia miishaare pajaniyajiniji. Majaari naa miijiaca nia quiniu Pueyaso pueyanaa. Saaja maninia quijia pa quiri cutara.

6

Niarta Pueyaso pueyata nia cumaquitioojoriquia

¹ Cuarta Pueyaso pueyanaa, niaa jaara parta Pueyaso pueyano niquiriquia sesa miyano, jacaria nia nacasure. Cuno niajanijajinijinio canapuete Pueyaso Sohuanu niishitijaraca cutarani, nojori cuara jacaria na nacasuuranon, sesa miiniu na tarinitianuhua. Cante cuno sesa miijia nacasuyani, nojuaja cuara na nacasuura seetanujuanaa na paniniutia narta pueyano. Naajuhuj, jiyanohua nia cojuare tama nia cuaqueyajaaja Sesaaca mariqui nia saniniuujurijaariuhuj, sesa nia miiniurajuhuj. ² Maninia cutaraari nia cumaquitioojonura niarta Pueyaso pueyata, niaa jaara taraatia miishaare. Naa pa cumaquishacari parta Pueyaso pueyatej, paari naa pa Jiyaniijia Cristo rootasano pajaniyarano tohuateenutianiyan.

³ Najuhua quijia jaara jiyaniya nojuaja cutara niishijia pueyano, pueya tojishano pueyanotuhuj, naa niishiriojuaari tama na cuaqueya sapojijajaacujua. ⁴ Puetunu niajanijajanaa cumaati tama

niishiriojoquiaajaacujua, taamueca pueyanote nijaniyani, maninia miiija, sesa miiija soj. Niaa jaara seetanujuanaa maninia miijiaca quiriquia, tama maninia nia miishanojuaaja nia timitiare. Niarta Pueyaso pueyano jaara socua maninia miiija quiri nijaniyajiniji, socua sesa miiija soj, niaara, naajaa. Maja cunora taraajenu, maja cunora shuquiriaatia quiniujiuhuj. Saaja shuquiriaatia nia quiri, niaa jaara maninia miiquiaa taate nia naata miiniucujani. ⁵ Puetunu pajaniyajanaari tamaatia poonijosano jiitiaani. Tama nijaniyajaja cumaati na miiquiaa maninia, Pueyaso shuquiritianura nijaniya, seetanujuanaa shuquiriaatia nia quiniuria.

⁶ Canapuate Pueyaso rupaa niishitiojosaaquiaani, cuno pojori cuaara na niishitiojonaa niqutiojooora nojori casamijiniji saniniuujia, nojori niishitiojonaa jiitianura nojori panishanojuhuj.

⁷ Pueyanaa, maja tama nia cuaqueyajaaja nia sapojonu nia jyanishacari niaari saniitioyaquishaanutaniya sesa nia miiniucua. Majaari quenaaja tamonu pueyano na naata Pueyaso rerequetenu. Pueyasoori saniitiojua cutara. Naaratej, nio miriqui sequesano nia niishiri: “Casa jajau pa natareeni, paari juhua cuno jajau senoonutaniyajaa-niuhuj”. Nio miriqui sequesanoori nio niishitiojiya: cante maninia miiijiani, nojuajaari maninia miishaanutaniyajaacuhuj. Naajuhuj, cante sesa miiijiani, nojuajaari sesa miishaanutaniyajaacuhuj sesa na miiniucua. Cunoori maja rimiajata. ⁸ Naacuajitij, canapuate tama na cuaqueyajaaja shuquiritijiaca sacuaraatia casaa na miishacari mijiriani, Pueyasoori cuno pojori quejoonutaniya cutara, pueyaracaanu na saniitiosocoriquiano. Saniniuujia, cante Pueyaso Sohuanu tojjiani, Pueyaso panishano na miiniuria puetunujuanaa, nojuajaari pueyaracaanu rishijiaara jiyatesaanutaniya cutara. Nojuajaari shuquiriaatia quiniutianiya pueyaracaanu. ⁹ Cunora pueyanaa, niaa jaara maninia miijiaca quiri, majaari maninia miiniuria nia taajenu. Pueyaracaanu maninia miijiaca nia quiri. Niaacuajaari niishiya, pueyano jaara na cuhuariquia natate, nojuajaari na sashijia. Majaari ritia na senoonu. Nio miriqui sequesanoori pa niishitiya, paa jaara Pueyaso Sohuanu tojiniu tarinitiaaquirini, paa cuaara sashiirajuhuj. Na nuhuaji cutara paari jyanohua shuquiriaatia quijiacara jiyatesaanutaniyani, maninia pa miiniucua. ¹⁰ Naacuajitij, jaara pa naata quiriquia, maninia pa miiriquia puetunu pueyajanaa. Saniya maninia cutaraari puetunu parta Pueyaso pueyajanaa pa miiniuria maninia.

Pablo nacasusacari pueya, quera na tucuatasaacari na naajio

¹¹ Nia niquiri cua naajio pueyanaa. Naa quera namijiaaca cua naajiosacari niaacuaratej, nia niishiri janiyajanaari nio naajiya tama cua juaashiquiatajaajani. ¹² Socua cua tojiri pueyanaa. Cuno pojori, nia shiniujuquiaa nia cararaatuuquia co nia miatejonurani, nojori-iri naa nia miitiniu paniya saaja narta Judiocuaca timitianura nojori. Nojoriiri narta Judiocuaca puerequiaa. Nojoriiri niishiya narta Judiocuacaari nojori miiniutianiya naquiya, miatesoo nia cararaatuuquia co quiniucua. Majaari nojori tiuuniu quiquiaa saaja Jesucristoocua, Pueyaso pueya nojori quiniuria. Cunora, nojoriiri jyanohua paniya nia cararaatuuquia co miatesano pueya nia quiniurajuhuj, taa puetunu Judiocuacajanaacuaani. ¹³ Cuno pojori, canapuate na cararaatuuquia co miatesanocuaani, nojorijianaari maja nojori tojiniu

quiquiaa puetunu Moisés Rootasanojuanaa. Naajaa, nojoriiri nia panitiaa nia cararaatiuuquia co miatesano nia quiniuriajuhuaj. Niaa jaara miatejosaare, nojoriiri tama timiquionutaniyajaaja, nojori tojitiajaca nia quiniuucua. ¹⁴ Janiya saniniuujia, Pueyaso cuaara cojuaara janiya maja cua shuquiritianura tama cua miishanojuaja. Janiyari saaja pa Jiyaniijia Jesucristo shuquiritianu paniquiaani, pocuara na cusonuucua niyacutesanojinia. Naacuaajitij, janiyari mijiria niishishanoocua jiaati-aashijiara jatanishaaquiaarini. Mijiria casaari maja na naata shiniuujuniu janiya, nocua cua jiaatianura socua. ¹⁵ Pueyanaa, pa cararaatiuuquia co jaara miatesano quiri, naajaa. Naajuhuj, pa cararaatiuuquia co jaara miatesoo quiri, naajaa. Majaari rimiajata pa quiniu Pueyaso niqiuara cunora. Saaja panishano cutaraari, quiarinio pueyanora pa jatanishaanura Pueyaso Sohanu cumaacata. ¹⁶ Puetunu nio sequesanoocua tiuujiacajanaani, Pueyasoori nojori jiuujia cajitiquiaa, na jiyanooshacari nojori. Cuno pojoriiri seetanujuanaa Pueyaso saquiriojosano pueya.

¹⁷ Tariucuaajaari cua rootasano nio naajioneejinia. Quiarijiani, tamonu cuaara socua cua taajeteyaquiiria sesa na niishitiojosanota niajaniya. Janiya cutaraari pa Jiyaniijia Jesucristojiniji niishitiojonani. Cua cuaqueyajinia nio majacuyashiquiajinijini, cunojiniji maatia niishishiyari, janiya seetanujuanaa Jesu seruni.

¹⁸ Cua panishano cuarta Pueyaso pueyanaa, nioojia cuaara jiitiaara pa Jiyaniijia Jesucristo cumaaca, na niishitiajanio. Cuaara naa quiiriatej.

PABLO NAAJIONEE ÉFESO TIACAJINIA QUINIAA PUEYASO PUEYACUARA

Pablo saruhatasacari Jesucristo tojtiajaca

¹ ¿Niaate quiyajaa cuarta Pueyaso pueyanaa? Janiyari Pablóni, Jesucristo jiyaramiquishano na rupaa cua pohuatanura, taa na Que Pueyaso paniquiaaricujani. Niaacuara naajiyaniija, canapue Pueyaso saquiriojoquiaari tama neracuajani, canapueete Jesucristo tojtianaacuajani. ² Pa Que Pueyaso, mariyata pa Jiyaniijia Jesucristo cuara taraajeera niaacua, maninia na miiniuria njajaniya. Nojori cuara cajitiiria nioojia pueyaracaanujuhaj.

Taa Pueyaso miiquiaa pajaniyani Cristo rupuesano pa quishacari

³ Pa Jiyaniijia Jesucristo Queeri Pueyaso. Nojuaja pa shuquiritiare. Neyanu Jesucristo pa rupenuucua, Pueyasoori capora pajaniyara. Nojuajaari jyanohua maninia miiquiaa pajaniya, puetunu jiyocuacaanu na jiiatiasano cumaacatajanaa. ⁴ Pueyaso niishishacari taa Neyanu miiniutianiya pocuarani, jiya shipiniyaquishacariija, nojuajaari tari pa saquiriojoquiaari na shuriucua quijiaca pa quiniuria. Pa saquiriojoquiaariijaariuhua na tojjiaca pa quiniuria, tojetaarucujanaa sesa miyashijia pa quiniuriajuhuaj. ⁵ Panijia na quiniuucua, nojuajaari pa saquiriojoquiaari na muerasura na jiyatenura pajaniya, Jesucristo jaara maninia miiri pajaniyara. Pueyasoori naa miiquiaa pajaniyatej, taa tariucuaaanu na niishiriojoquiaari na miiniuria pajaniyacuajani. ⁶ Jyanohua maninia na panishano Niyanuniyojua miiniuucua pocuara, nojuajaari pueyaracaanu jyanooquiaa pajaniya. Nojuajaari jyanohua capora. Naa maninia na miiniuucua pajaniyatej, paari cunora pueyaracaanu na maniniuhuaqueetaquiaani. ⁷ Niyacutesanojinia Neyanu shootenuucua na nanaca pocuara, Pueyasoori pa jyanooquiaari na muerasu pa quiniuria. Naaratej, majaari Pueyaso saniitionu quiniutianiya pajaniya. Puetunu sesa pa miishanojinijijianaa pa jyanooquiaariiri. ⁸ Pueyasoori na paniniu niishitiquiaari pajaniya, na niqitiosacari na niishitiaja pajaniya, puetunu casaa niishijiajanaa pa quiniuria. ⁹ Nojuajaari jyanohua tariucuaaanu niishiriojoquiaari taa na miiniutianiya puetunu na shipinishanoocuarajanaani. Quiari naataja saniniuujia, nojuajaari jiyasohua na miiniu panishano niishitiquiaari pajaniya. ¹⁰ Pueyanaa, nia niishiri casaa Pueyaso miiniutianiyan. Nojuajaari Cristo jiyatenutaniya Jiyaniijiajanaa na quiniuria. Naacuajitij, puetunu jiyocuacaanu quijiacajanaa, mariyata puetunu mijiria quijiacajanaari na tojjiacara quiniutianiya. Nojuajaari naa tohuateenutaniya tamacari, taa tamajaaja na niishiriojoquiaaricujani.

¹¹ Pueyasoori tariucuaaanu pa saquiriojoquiaari Neyanutaja na cójiritianura pajaniya, maninia na miiniuria pajaniya. Pueyasojuaanari tariucuaaanu naa niishiriojoquiaari maninia na miiniuria pajaniya. Nojuajaari pueyaracaanu tohuateequiaa taa na miiniu paniquiaaricujani, niishijia na quiniuucua. ¹² Nojuajaari pa saquiriojoquiaari maninia quijiacara na jataniniuria pajaniya. Cuarta Judiocuacajinijinio pueyani, canaari coteenujanaa Jesucristoocua tiuuquiaarini. Naa jyanohua

maninia Pueyaso miiniuucua canaa, nojuaja cuaara maniniuhuaque-
etasaaria jiyanoehua. ¹³ Quiari naataja nia tojishacari Jesucristo ru-
paa, niaari cuno seetanu rupaacuajanaa tiuuguaarijuhuaj, Pueyaso
muerasura jatanishano nia quiniuria. Naa nocua nia tiuuniuucu-
atej, Pueyasoori Neyanu nia ruquetequiaari. Na Sohuanu niqutio-
quiaari niajanijajaariuhuaaj taa na sequequiaaricuajani. Naacuaji ni-
ishishaaquiaari, niaari seetanujuanaa Pueyaso muerasu. ¹⁴ Pueyaso
Sohuanuraca pa quishacari, paacuajaari niishiyani, paari puetunu
Pueyaso sequesano Neyanuranujuanaa masenutaniya Neyanutajuhuaaj.
Pueyaso Sohuanu pa jiiiasacari, paari niishiyani, Pueyasoori pa rijionu-
taniya puetunu na saquiriojosano pueyatajanaa, na muerasu pa quini-
uria na shuriucua. Jiyacaritij, paari tojetaarucuajanaa jatanishaanu-
taniya juhua Neyanu pa niquishaanurajuhuaaj. Cunora, Pueyasoori
jiyanohua maniniuhuaqueetasano quiniutianiya, jiyanoehua maninia
na miiniuucua pajaniya.

Taa Pablo secojoquiaari Pueyaso pueyacuarani

¹⁵ Janiyari niajanijajiniiji tojiriucuaani, taa pa Jiyaniijia Jesuucua tiu-
ujiaca nia quiyani, taa parta Pueyaso pueya panijiacaa nia quiyajaani-
uhuaaj. ¹⁶ Cunora, pueyaracaanu cua secojosacari niaacuara, majaari
cua tarinitianu quiquiaa Pueyaso cua sequenura “paacarasho”, maninia
na muerasu nia quiniuucua. ¹⁷ Pa Jiyaniijia Jesucristo Queeri shacan-
tushiqui quijia na cumaacajinia. Janiyari niaacuara na secojoquiaani,
nojuaja niqutionura niajanijia jiyocuaaanuji niishitiaja. Naacuaji
nia naata niishiniu na niishitiniu panishano niajanijia, maninia nia
niishiniuria nojuajuhuaaj. ¹⁸ Janiyari niaacuara secojoquiaajaaniuhuaaj,
Pueyaso cuaara cuhuataara nioojia, maninia nia niishiniuria casaara
Pueyaso saquiriojoquiaari niajanijiani, casaa na miiniutianiya niaara-
janijuhuaaj. Janiyari niaacuara secojoquiaajuhuaaj, maninia nia niishini-
uria taa Pueyaso muerasu jiyatesaanutaniya shacantuuca quijiacaa no-
jori quiniuriani. ¹⁹ Janiyari secojoquiaajuhuaaj, Pueyaso cuaara ni-
ishitiriia na cumaaca niajanijia, cuno, nioojiajinia poonijiyani. Na
cumaacaari jiyanoehua, puequeyashijia. ²⁰ Pueyasocujaari cuno na
cumaaca poonitijioquiaari Cristo quetejinia, nojuaja jaara na samiitiani-
iquiaariuhua macujiniiji. Jaara na samiitianiquiaari, cuno na cumaacata
na cajitiquiaariiri Jiyaniijiajanaa cajitijiniia na miaquetajara jiyocua-
caanu. ²¹ Tii na cajitiquiaariiri puetunu tamasa cumaacaraca quiji-
aca Jiyaniijiajanaa na quiniuria. Majaari tamonu socua cumaacaraca
quijia quiniu pa Jiyaniijiajinijia. Nojuajaari puetunu tamasa jiyani-
ijianucuajanaa Jiyaniijia. Puetunu mijiria quijiacaa jiiitasanojuanaari na
casaa. Nojuajaari puetunu casaajanaa camaru. Pueyaso jaara quiarinio
jiya shipinirioehua, Jesucristoori jiyacari Jiyaniijiajanaa quiniutianiya-
juhuaaj, taa quiarijia na quiyacuajani. ²² Naacuajitij, Pueyasoori puetunu
na shipinishanojuanaa jiyatequiaari Jesucristo jiiitasocoriqiano. Naa-
juhuaaj, Pueyasoori Jesucristo jiyatequiaari na saquiriojosano pueya
jiiitariqiano, canapute nocua tiuujiacacuajani. ²³ Pueyaso saquiri-
ojosano pueyari juhua Jesucristo cuaqueya. Nojuajaari juhua poojia
saniniuuja, pa jiiitiana na quishacari. Puetunu Pueyaso saquiriojosano
pueyajanaa jaara Cristo cuaqueyajinia rupuetesaare, Cristo cuaqueyari
tucuateenutaniya seetanujuanaa maninia jeeccanamitishano na quini-
uria. Na cuaqueya pa quishacari, nojuajaari puetunu poojiajiniajanaa

quiya. Naajuhuaaj, nojuajaari puetunu tiqiyocujanaa quijiajuhuanaajaj.

2

Panijia Pueyaso quiniuucua, nojuajaari pa jiyanooquiaari

¹ Sesa miijiaca nia quiniuucua tarijia, Pueyaso tojiyashijiaca juhuaj, niaari macunucua quijia Pueyasora. ² Naa jaara naa sesa miijiaca quiquiaariti, niaari juhua puetunu mijiria quiniaa Pueyaso tojiyashiji-acajanaa quiquiaari. Niaari samaruhua jiyaniijia tojijia quiquiaari, cuno, paratu piyarojosaqui quijiani. Nojuajaari Pueyaso tojiyashijiaca shiniujujia, nojori miiniuria sesa, taa Sesaaca seque panyacuajani. ³ Tarijia, puetunu pajaniyajanaari Pueyaso tojiyashijiaca quiquiaarini. Paari tama pa miiniu panishanojuaja miijiaca quiquiaarini. Naacua-jitij, paari puetunu pa cuaqueya miiniu panishanojuanaa miijiaca quiquiaarini, puetunu sacuaraatia pa niishiriojosanojuhuaj. Naa sesa miijiaca pa quiniuucuatej, paari tojetaarucujanaa jiyanohua Pueyaso saniitiosocoriquiano quiquiaari juucuan, juhua tamasa-juhuaj. ⁴ Saniniuujia, Pueyasoori pocua taraajeja cutara. Jiyanohua pa paniquiaariiri. ⁵ Cunora, macunucua pa quishacarijia nera, sesa miijiaca pa quiniuucua, nojuajaari Jesucristota pa cojiritiaquiaari samiitianijionu. Jyanootio Pueyaso quiniuucua, nojuajaari nia jiyanooquiaari. ⁶ Naa na samiitianijionuucua pajaniya Cristoocua pa tiuuniucuatej, Pueyasoori tari pa tacanijioquiaari Cristota jiyocuaaanu, tii Cristo cajitianura pajaniya. ⁷ Naa Cristota na cojiritianuucua maninia miiniu pajaniyatej, cunoori jiyanohua maninia! Nojuajaari naa pa miiquiaariti, puetunu quijiacajanaa nio pa quishacari nuhuaji niishiniuria maatia, Pueyasoori jiyanohua pa panijia. Maatia niishishaanutaniyari Pueyasoori tojetaarucujanaa jyanootio cutara, na jiyanooniucua pajaniya, Neyanuucua pa tiuuniucua. ⁸ Naa Pueyaso quiniuucua jyanootiatej, nojuajaari nia jiyanooquiaari saaja Jesuucua nia tiuushacari. Majaari tama nia miishanotajaaja Pueyaso nia jyanootiniu quiquiaari tama niajaniyajaaja. Pueyasojuaacuajaari nia jiyanooquiaari niaacua na taraajenuucua. Naajuhuaaj, nojuacuajaari nia tiutiquiaari Neyanuucua. ⁹ Majaari Pueyaso jyanooniu quiquiaari pajaniya, maninia miijiaca pa quiniuucua. Paa jaara maninia pa miiniuucua Pueyaso jyanootiquiaari tama pa cuaqueyajaajani, paa maara tama pa cuaqueyajaaja timitiareni juhua najuhuana pocuaja. ¹⁰ Shushajanaa Jesucristoocua pa tiuushacari, Pueyasoori jiyacari pa jataniquiaari quiarinio pueyano pa quiniuria, maninia miijiaca pa quiniuria. Nojuacuajaari tari naa niishirioquiaari, maninia miijiacara na jataniniuria pajaniya.

Jesucristoori pa jiyateja jyanootiojuacara

¹¹ Éfeso tiacajinia quiniaa pueyanaa, quiarijia nia niishiriohua taa nia quiquiaari tariucuaaanuni, Pueyaso muerasu nia quiyaquishacarijia. Niaari cuarta Judiocuaca soosano taucuaa quiquiaari, nia cararaatiuquia co miatesoo quiyaquiniuucua. Canaa cutaraari canaa cararaatiuquia co miatesonani. ¹² Naa niishirijuhuaaj, naa nia quishacariti, niaari Cristooju quiquiaari. Majaari nia naata rupeenu quijia Pueyaso

saquiriojosano Israel pueya. Puetunu Pueyaso sequesanojuanaa Israel pueyaranoni, cunoori maja niaarano quiquiaari. Majaari nia niishiniu quiquiaari Pueyasoori pueyacuaji Tacuriquiano jiyaronutaniya mijiria. Majaari quenaaja tamonu quiniu quiquiaari nocua nia tiuuniuria, Pueyaso na jiyanoootiniuria nijaniya. Niaari saaja taraatia shaajeriquiano quiquiaari. ¿Cantucua niaacua taraajereni? Niaari seetanujuanaa tojetaarucujanaa Pueyasooju quiquiaari mijiria. ¹³ Tariija, niaari seetanujuanaa tucuacaanu quijiaca quiquiaari Pueyasojiniji. Quiariija saniniuujia, Jesucristo shootenuucua na nanaca niyacutesanojinia, niaari nata rupuetootesaaquiaari, nocua nia tiuushacari. Naacuajitij, niaari canaa rupuejacajuhuj. ¹⁴ Cristocuaajaari pa jiyanoootiootequiaari. Moisés Rootasanoni, cunoori juhua jiyaconaja sohuaca quiquiaari pa tajinia, maja nia cojiniuria canaa, maja nia rupuenura canaajuhuj, taucuaca nia quiniuucua. Jesucristocuaajaari cunora tama na cuaqueyajaaja tarinitiaquiaari na mosaanura pa niti, cunoo jiyaconaja sohuaca niyartasaanura, pa juaaquiaa tajiyaatenura. Naacuajitij, nojuajaari pa jiyatequiaari juhua niquiriyatu queecuajinio supueno pueya, Judiocuaca, nijaniya taucuacanio. ¹⁵ Naa pa niti Jesucristo cusonuucatej, nojuajaari puetunu Moisés Rootasanojuanaa sanaajaquiaari, maja socua na sesacanura pajaniya. Tariija, paari juhua caapiqui tiaca quiquiarini. Paari pueyaracaanu paracaatioojua quiijiani. Quiariija saniniuujia, Jesucristo cusonuucua, nojuajaari pa jiyanoootiootequiaari jatiqui pa quiniuria juhua niquiriyatu tiaca, mariyata na rupuejaca pa quishacari. ¹⁶ Naaratej, janiyari socua camiya nia sequenuni. Cristo cusonuucua niyacutesanojinia, nojuajaari Pueyaso jiyanootiquiaari pajaniya, na panishano muerasu pa quiniuria puetunujuanaa, nijaniya taucuaca, canaajuhuj. Naacuajitij, Jesucristocua pa tiuushacari, paari juhua niquiriyatu tiaca nerani.

¹⁷ Nijaniya taucuacanaa, niaari juhua tucuacaanu quijiaca quiquiaari Pueyasojiniji. Canaa cutaraari juhua cateca quiija nojuajinjini. Jesucristoori mijiria niquiaari, na niishitiniuria puetunu pajaniyajanaa taa Pueyaso jiyanooni paniiya pajaniyani. ¹⁸ Cristo jiyanoootiniucua na Que Pueyaso pajaniya, naacuajitij, pa naata pa Que Pueyaso rupueno pa secojosacari nojuaja, mariyata na Sohuanuraca pa quishacari, nijaniya, canaajuhuj. ¹⁹ Jesuucua tiuujiaca nia quishacari quiariija cua panishano pueyanaa, majaari tari nia quiniu tahue canaara. Majaari nia quiniu juhua tamonu tiacajinjini rucoanaa. Quiariijiani, niaari seetanujuanaa Pueyaso pueya cutara. Pueyasoori maninia nia jiitiaajuhuj, taa na jiitiaquiaa puetunu na saquiriojosano pueyacuani. ²⁰ Pueyaso pueya nia quiniuucua, niaari rupuetesano puetunu Pueyaso muerasutajanaa, juhua shanohua tia pa quiniuria Pueyaso quiqiora. Jesucristo jiyaramiquishano pueya na rupaa pohuatariquianoni, mariyata na sequenu panishano caminiujunaa pueyani, nojoriiri juhua cunoo tia pacaariana. Saniniuujia, Jesucristoori juhua cunoo tia morijujiana cutara, cunoo tia nujuatana. ²¹ Pueyasoori naa saquiriojoquiaa Neyanuucua tiuuriquiano pueya, na quiqiorano na tucuatana. Cuno tia tucuatesacari, tojetaarucujanaa maninia jeenucasano quiniutianiya pa Jiyaniijaraari. ²² Niaari naajuhuj, Cristo nia rupuesacari, niarta Pueyaso pueya nia rupuesacarijuhuaj, Pueyasora,

niaari juhua rianaa, tucurunio. Nojuajaari nia morojotaquiaa na tia na tucuatatura, na Sohuanu quiquiorano.

3

Pabloori Pueyaso jiyaramiquishano taucuacaacua

¹ Jesucristojiniji cua pohuatanuucua niarta taucuaca, janiyari cunora nujuatesano quiya nujuatejojuajiniani. ² Niaa naasucuaari niishiyacuaja Pueyasoori cua jiyaramiquiquiaari Jesucristojiniji cua pohuata-nura taucuaca, jiyanooshano nojori quiniuriajuhuaj. ³ Tariucuacaanu, majaari pueya niishiniu quijia, Pueyasoori taucuaca jiyanooniutianiya-juhuaj, taa na jiyanooquiaacuaa Judiocuacani. Pueyasojuanaacuajaari naa jiyasohuaja na miiniu panishano cua niishitiquiaaritij, taa shusha nio cua naajio coteejajinia cua pohuataa nijaniyacujani. ⁴ Niaa jaara cua naajionee serojore, niaari jiyacari seetanujanaa niishiniu-tianiya, janiya cutaraari Jesucristo rupaa niishijiani. Naacujitij, jani-yari niishiyani taa jiyanohua maninia nia miishaanutaniyani nocua nia tiuushacari. ⁵ Tariucuacaanu, majaari quenaaja tamonu pueyano niishiniu quijia nio jiyasohuaja Pueyaso miiniu panishano. Quiari naataja saniniuujia, Pueyasoori na jiyaramiquishano pueya niishi-tiquiaari cuno, jiyasohuaja na miiniu panishano taucuacani. Na se-quenu panishano caminiujunia pueya na niishitiquiaariijaarijuhuaj. Pueyaso Sohuanucuajaari cuno canaa niishitiquiaari. ⁶ Nijaniya tau-cuacanaa, niocuajaari Pueyaso miiniu panishano jiyasohuaja nijaniya: Jesucristoocua nia tiuuniuucua, Pueyasoori puetunu Judiocuacaranu na sequesanojuanaa jiyatenutaniya niaarajuhuj. Canaari Judiocuacani. Naajaa, Jesucristoocua nia tiuuniuucua, Pueyasoori canaa rpuete-quiaa nijaniya, juhua niquiriyatu pueyano pa quiniuria nera. Naajuhuj, cunora, Pueyasoori nia niquitioquiaa na Sohuanujuhuj, taa na sequequiaari Neyanu Jesucristoocua tiuujiacacujani.

⁷ Janiyari Jesucristo ruuretaja quiquiaarini. Naajaa, jiyanohua cumaacaraca Pueyaso quiniuucua, nojuajaari cua jataniquiaari Neyanu Jesucristojiniji pohuatana cua quiniuria. ⁸ Jesucristo paraca cua quiniu-ucua tarijia, janiyara, janiya cuaara socua rerequetesano pueyano qui-ria puetunu cuarta Pueyaso pueyajinijijianaa. Saniniuujia, jiyanohua jiyanootio Pueyaso quiniuucua, nojuajaari cua jiyanooquiaari. Cua jiyatequiaariiri seetanu rupaaanaa Neyanu Jesucristojiniji pohuatana cua quiniuria taucuacara. Janiyari cunora Pueyaso shuquiritiaa jiyanohuani. Cristo jittiasano pajaniyaranoni, puetunu cuno casaa-janaari pa niishishoojua. ⁹ Tariucuacaanu, Pueyasoori puetunu casaa-janaa shipiniquiaari. Na shipiniyaquishacarijia, Pueyasoori tari ni-shiriojoquiaari casaa na miiniutianiya puetunu pajaniyarajanaani. Naajaa, tariucuacaanu, majaari na niishitiniu quiquiaari pueya. Nio pa quishacari saniniuujia, nojuajaari cua seerataquiaari puetunu pueya-janaa cua niishitiniuria jiyasohuaja na miiniu panishano. ¹⁰ Pueyasoori tariucuacaanu pajaniyara na niishiriojosano racataquiaari pueyara-caanu tama na niishitajajinijaaaja. Saniniuujia, nio pa quishacarini, nojuajaari na niishitiquiaari. Quiarijiani, jiyanohua maninia Pueyaso miishacari puetunu na saquiriojosano pueyajanaa, puetunu jiyocua-caanu cumaacaraca quijiacajanaari niishiya, Pueyasoori seetanujanaa jiyanohua niishijia cutara. Naacujitij, Pueyaso seya, Satanás,

samaruhuanio, nojoriiri tacuriitia shootiaquiaa pajaniya, Pueyaso miiniuucua maninia pajaniya, niishijia na quiniuucua. ¹¹ Quiari naataja, Pueyasoori tariucuacaanu na miishocoriquiano na niishiriojosano tohuateequiaari pa Jiyaniijia Jesucristo cusosacari niyacutesanojinia. ¹² Naacuaajitij, Jesucristoocua pa tiuuniuucua, pa naata juhuajaniya rupuenu na Que Pueyaso pa puereyaquiniutia. ¹³ Naa Pueyaso miiniuucua pajaniyaratej, majaari nioojia nia niquijiotenu Pueyasoo cuaji nia puerenuta naquiya cua miishacari. Naa naquiya cua miishacari Jesucristojiniji cua pohuatanuucua niajaniyatej, shuquiriaatia nia quiri juhuari. Naa naquiya cua miishacaritij, cuno cuara shiniujiuuria niajaniya, socua pa Jiyaniijia tojijiaca nia quiniuria.

Pablo secojosano Éfeso tiacajinia quiniaa Pueyaso pueyacuara

¹⁴ Naa Pueyaso muerasu nia quiniuucujuhujaj, janiyari mojoquetaciaani pa Que Pueyaso cua secojonura niaacuara. ¹⁵ Nojuacuajaari Que cutara. Puetunu queyajanaari na sesaatiaacuaja. Nojuajaari puetunu parta Pueyaso muerasujanaa Que, mijiria quiniaa, tariucua jiyocuacaanu quiniaa Pueyaso muerasunio. ¹⁶ Naa nia Que na quiniuucujuhujaj, janiyari niaacuara secojoquiaani, nojuaja cuara cumaquiria jiyanhua niajaniya na Sohuanuta nioojiajinia. Na Sohuanuuri puetunu pa panishanojuanaa jiiitiana. ¹⁷ Naajuhujaj, niaacuara secojoquiaanijia, seetanujanaa nia niishiniuria Jesucristojuanaacuajaari nioojiajinia quijia. Nojuajaari nioojiajinia quiya quiarinio pueyara na jataniniuria niajaniya, nocua tiuujia nia quishacari. Naacuaajitij, niocua niishiri taa Jesucristo paniya jiyanhua niajaniyani. Naacuaajitij, majaari nioojia nia niquijiotenu quiniutianiya socua. ¹⁸ Naa Jesucristo paniniu nia niishishacari taritij, niaari puetunu Pueyaso pueyatajanaa niishiniutianiya taamuecate Cristo paniniuni. Naajuhujaj, niaari seetanujanaa niishiniutianiya tee na paniniu pueetaani. Jesucristo paniniu jaara shanacujusaatia quiri shanacujutajata, paa maara nocua puequeetejore najuhuanani. Seetanujanaa, majaari pa naata shanacujunuj. Paa jaara na jamatu, na tucuanee, na queroni, na jiyaconaja shanacujunu paniriquiani, majaari na puequeeja pa riuritanu quiniutianiya. ¹⁹ Seetanujanaa, majaari pa naata niishiniu taa jiyanhua na paniya pajaniyani. Naajaa, janiyari niaacuara secojoquiaa Pueyasoni, seetanujanaa nioojiata nia niishiniuria cuno, na paniniuni. Naa jaara na paniniu niishiri, Pueyasojuanaari nioojiajinia quiniutianiya. Naacuaajitij, niaari tojetaarucujanaa panijia quiniutianiya taa Pueyasocuaani.

²⁰ Naa Pueyaso miiniuucua maninatej, nojuaja cuara shuquiriti-asaaria. Naa jiyanhua na cumaacata na poonijiosacari poojiajiniatej, nojuajaari na naata miiniu socua jiyanhua queraatia pa masesanojiniji nojuaja, pa niishiriojosanojinijinio. ²¹ Puetunu quijiacajanaa cuara niishiiria Pueyasoori jiyanhua maninia. Nojori cuara naa niishiiria nojori niquishacari Pueyaso jatanishano na saquiriojosano pueya, Jesucristo miishanonio. ¡Cuara naa shuquiritiasaaria pueyaracaanutej!

4

Pueyaso Sohuanu pa jiiitiasacari, paari rupuetootesano quijiani

¹ Janyari niya nujuatesano quiyani pa Jiyaniijajiniji cua poojotanuucua. Cunora, cua tojitiare. Janyari nia sequeyani, saaja pa Jiyaniijia tojijiaca nia quiri, seetanujuanaa maninia na muerasu nia quiniuria. Pueyasocuaajaari nia saquirojoquiaari naa maninia na muerasu nia quiniuria. ² Majaari niarta Pueyaso pueya rerequetejaca nia quiniu. Maninia miitiojuaca nia quiriquia. Puetunu casaajanaa rejeretajaca nia quirijiuhuaaj. Naa jiuujiaatoojuaca nia quiri nia panitioosacari. ³ Naa Pueyaso jyanootiootesacari niajanijatej, pueyaracaanu nia jyanootioore, juhuajaniya nioojia quiniuria juhua rupuetootesano. Pueyaracaanu naa nia miiri Pueyaso Sohuanu cumaquishacari niajaninya. ⁴ Naa quijiaca nia quiri pueyanaa, niquiriyatu cuaqueyaraca pa quishacari pa Jiyaniijara, mariyata niquiriyatu Sohuanuraca pa quishacarijuhuaj. Naa Jesucristoocua tiuujia pa quishacaritij, Pueyasoori puetunu pajaniyajanaa rijionutaniya, pueyaracaanu na shuriucua pa quiniuria. ⁵ Puetunu pajaniyajanaari niquiriyatu Jiyaniijiaracani. Nojuajaari Jesucristo. Naajuhuaaj, puetunu pajaniyajanaari saaja Jesucristo rupaacua tiuujiacani, maja tamonu rupaacua. Naajuhuaaj, puetunu pajaniyajanaari moojinia tiuquinijiosaaquiaarini, Jesucristo pa jiyatesacari pa Jiyaniijara. ⁶ Naajuhuaaj, saa niquiriyatujua Pueyasoori quiya. Nojuajaari puetunu Neyanuucua tiuujiacajanaa Que. Nojuajaari puetunu na tojijiacajanaa Jiyaniijia. Nojuajaari puetunu na pueyajanaa poonijioteya na panishano nojori miiniuria. Puetunu na muerasu jiuujiaajanaari na quiquio.

⁷ Saniniuujia pueyanaa, puetunu pajaniyacuaajaari tari jitiiaa tamaatia poonijosano pa miiniuriani, tevano Cristo niqutionu paniquiaari pajaniyacujani. Naacuajitij, puetunu pajaniyajanaari maja pa niishiniu miiniu saa niquiriyatu casaaja. ⁸ Tariucuaacaanu Pueyaso Rupaa naajiotasanojiniji, paari niishiyani Pueyasoori na Sohuanu niqutionu paniquiaari na pueya. Cunora naa sequeya Jesucristojiniijiri:

“Na quioosano pueya tacataquiaariuhua jiyocuaacaanuuri. Nareja na niqutionu panishano casaa serotaquiaari na pueyari”.

⁹ Jaara sequeya “tacaquiaariuhua”, cunojiniji paari niishiyani nojuaja jiyocuaacaanuji rosequiaari coteenu, taraatia mijiria na mosaanura pocuara. ¹⁰ Nojuajani, jiyocuaacaanuji rosequiaarini, nojuajaari tojetaarucujanaa jiyocuaacaanu tacaquiaariuhua, Jiyaniijajanaa na quiniuria na Que shuriucua. Tacaquiaariiri puetunu jiya cajiniocujanaa na mishininiuria na cumaacata, puetunu jiyajanaano. Naacuajitij, nojuajaari puetunu tiquiyocujanaa quijia. ¹¹ Nojuacuajaari noojiaqueya na saquirojosano pueyajinijinio jiyatequiaari na jiyaramiquishano pueya nojori quiniuria. Saniniuujia, tamasaca jiyatequiaariiri Pueyaso sequenu panishano caminiujiuniaa nojori quiniuria. Saniniuujia, tamasaca jiyatequiaariiri Jesucristo niishiyashijiaca niqiara poojotanaa nojori quiniuria, Pueyaso jyanooniuria nojorijuhuaaj, Jesuucua nojori tiushacari. Tamasaca jiyatequiaariiri na tojitiajaca pueya jiiitianaa nojori quiniuria. Tamasaca jiyatequiaariiri na rupaa niishitiojonaa nojori quiniuria narta Pueyaso pueyara. ¹² Naacuajitij, Jesucristoori na Sohuanuta cumaquiquiaa cana na paniyani, puetunu tamaatia na miiniu panishanojuanaa nojori miiniuria. Naa na pueya cumaquiquiaa na Sohuanutaari na saquirojosano pueya tiuuniuria nocua, nojori cumaquishaanurajuhuaaj. Naa Jesucristoocua tiuu-

jiaca pueya canesacari socuatej, Jesucristo cuaqueyari canequiaa. ¹³ Jesucristora poonijionaa pueyari naa poonijioquiaatej, paa cuaara tojetaarucujanaa pa Jiyaniijia tojijiaca quirijiaatijia, juhua rupuetote-sano pa quiniuria. Cristo pueyari naa poonijioquiaa Pueyaso Sohuano cumaacata, paa cuaara seetanujuanaa Pueyaso Niyanu niishijiaca quirijiaatijia. Naacujitij, paari tojetaarucujanaa jeenucuasano quiniutianiyani, seetanujuanaa juhua Jesucristo pa quiniuria. ¹⁴ Naacujitij, majaari tari pa quiniu quiniutianiya juhua naatujua. Niaacuajaari niishiya naatujooriiri na niishiriojosano jatanijia ritia. Noojia niqijotejajaariuhuj. Naa juhua tariucua cumueeca mashaja pa quishacari-tij, majaari quenaaja tamasaca naata sapojonu quiniutianiya pajaniya, tamaatia nojori niishitiojosanota. Cuno pojori naa tamaatia niishitiojonujuuca tariucua pa niishishanojinijini, nojoriiri jiyanohua sapojonu niishijiaca, nojori tojitajaca na tashuquiootenura Pueyasojiniji. ¹⁵ Nocuaji pueyanaa, Pueyaso Rupaata pa cumaquitiojore seetanujua-naa pa panitioonuta, Cristo rupuejaca pa quiniuria socua. Nojuacuajaari juhua poojia. ¹⁶ Pueyanaa, niaacuajaari niishiya, puetunu pa cuaqueyajiniacuma casaa pa jiitiasanojuanaari maninia rupuetote-sano. Puetunu cunojuanaa jaara maninia poonijioquiaa jatiqiu, paari maninia quiyani. Pueyaso muerasuuri juhua pa cuaqueya jiitiasano casaa. Naacujitij, puetunu Pueyaso muerasujanaa jaara tama na poonijosanojuaja miiquiaa maninia taa pa Jiyaniijia paniyacuajani, pa Jiyaniijia cuaqueyari maninia canenutaniya, jatiqiu rupuetesano pa quishacari, seetanujuanaa panitiojuuca pa quiniuria.

Cristoocua tiuujiaaari quiarinio pueya

¹⁷ Jesucristo jiyaramiquishano pueyano cua quiniuucua, cua tojiri pueyanaa. Pueyaso saquiriojosano pueya nia quishacari, maja socua nia quiniu taa Pueyaso niishiyashijiaca pueya quiyacuaani. Nojoriiri najuhuana quijiaca, najuhuana nojori niishiriojonuucua. Naajuhuj, nojoriiri tama na panishanojuaja miijiaca, najuhuana casaacua nojori jiaatianuucua. ¹⁸ Nojoriiri naa quijiacatej, juhua ninishiqui nojori niishitiaja quiniuucua. Nojoriiri seetanujuanaa niishiyashijiaca, nojori tojiyaquiniuucua Pueyaso, juhua cumueeca jiuujiaraca nojori quishacari. Majaari nojori jiyatesaanu quiniutianiya Pueyaso muerasura, pueyaracaanu shuquiriaatia quijiaca nojori quiniuria. ¹⁹ Naa pueyaracaanu sesa nojori mijionuucuatej, nojoriiri maja tari na niishiniu caririquiniu, sesa nojori miishacari. Nojoriiri puetunu tama na miiniu panishanojuaja miijiaca. Nojoriiri puetunu sacuaraatia casaajanaa miiniuucua jiyartuucono. ²⁰ Niajaniya saniniuujia, majaari naa nia niishitiojosaanu quiquiaari Cristojiniji, naa sacuaraatia miijiaca nia quiniuria. ²¹ Naa jaara Jesujiniji tojiquiaari, niaacuajaari niishiquiaari na rupaari seetanu rupaajanaa cutara. Niaacuajaari na rupaajiniji niishitiojosaaquiaari maninia miijiaca nia quiniuria, sesa nia miiniu nia tarinitianurajuhuj. ²² Pueyanaa, pa toque mocua jaara mocuaatia jaanure, paari ritia na jocujani. Naa nia jatarejuhua sacuaraatia miiniu nia niishishano. Sesa nia miiniu panishanoori tama nia sapojoquiaari-jaaja naa sesa miijiaca nia quiniuriatej. ²³ Quiarijia saniniuujia, sesa nia niishitiaja nia jatare, maninia niishitijaraca nia quiniuria, maninia jiuujiaracanio. ²⁴ Seetanujuanaa juhua quiarinio pueyano nia quiri, quiarinio jiuujiaraca, Pueyaso niquitiosano niajaniya. Naa quiarinio

jiuujiaraca nia quishacaritij, seetanujuanaa juhua Pueyaso pueya nia quiriquia, maninia miijiaca, tojetaarucujanaa sesa miyashijia. Naa maninia nia quiniuni, cunoori seetanujuanaa Pueyaso Rupaa nia tojini-uucua.

²⁵ Naacujitij pueyanaa, majaari socua cuaracashijionuujuaca nia quiniu. Pueyaso pueya pa quishacari, puetunu pajaniyajanaari juhua pa Jiyaniijia cuaqueyani. Cunora, puetunu nia sequesanojuanaa niarta Pueyaso pueyano cuaara quiiria seetanujuanaa.

²⁶ Niaa jaara juaatishaare, tama nia cuaqueyajaaja nia cojuare maja nia juaaniutia sesa nia miiniuria niarta pueyano. Naajuhuj, nia jaara juaari, majaari nia juaaquiaca nia ninitianu. ²⁷ Ritia nia jecatoore, Sesaaca mariqui sesa nia miitiriiri nia jiyanoyaquishacari.

²⁸ Nio nia tojirijuhuj. Cante nohuasejowa quiyajaani, cuaara tarinitiaara nohuasejonu. Saniniuujia cuaara poonijioora tama na numatucutajaaja cutara. Naacujitij, nojuaja na naata na jiiatasanojiniji nareja niqutionu tamasaca, cante na panishano jiiitiaquiyani.

²⁹ Naajuhuj pueyanaa, majaari sacuaraatia casaa nia pocuanu quenaaja. Majaari cararaatia nia puenujutoonuhuj. Saaja maninia pocujaca nia quiri cutara. Naacujitij, nia naata niarta Pueyaso pueya niishitiojonu. Nia naata nojori cumaquiniu. Nia naata nojori nacasunujuhuj. Naacujitij, nia naata nojori shiniujiuni saaja Pueyaso tojijia nojori quiniuria. ³⁰ Majaari sesa miijiaca nia quiniu, niaa mariqui nioojiajinia quijia Pueyaso Sohanu taraajoreeri. Pueyasocujaaari juhua na sesa naajiotaquiaari poojiajinia na Sohanuta. Naacujitij, na rijionu juuca pajaniya, nojuajaari niishiniutianiya paari na saquiriojosano pueyani.

³¹ Pueyanaa, majaari jiyanoyashijia nia quiniu. Seetanujuanaa jiyanoojiaca nia quiri cutara. Majaari tamasaca shanacunu niaacua, na nasojonura nijaniya. Majaari nia juayonuujutanu. Majaari nia juaaniutia nia nacajonu. Majaari niarta pueyano paracaajia nia quiniu, nia juaaniutia nia sesacanura nojuaja. Naacujitij, puetunu juaanijiana nia tarinitiare, puetunu sesa nia miiniujianaanio. ³² Saniniuujia, maninia miitiojuaca nia quiri. Taraajetoojuaca nia quirijuhuj. Naajuhuj, jiyanootiojuaca nia quirijuhuj, taa Pueyaso jiyanooquiaari pajaniyacuaani, Neyanuucua pa tiuushacari.

5

Seetanujuanaa juhua Pueyaso pueya nia quiri

¹ Pueyanaa, niaacujaaari Pueyaso panishano muerasuniyowa. Cunora, pueyaracaanu juhua nojuaja nia quiniuria nia saniniujiiri.

² Puetunu nia miishanojuanaa nia miiri nia paniniutia, taa Jesucristo paniquiaari pajaniyacuaani. Jiyanohua na paniniuucua pajaniya, nojuajaari tama na cuaqueyajaaja tarinitiaquiaari pa niti na mosaanura. Naa na miiniuucuatej, nojuajaari Pueyaso shuquiritiquiaari jiyanohua. Na miishanoori juhua shanohua jaanutaja quiquiaari Pueyasora.

³ Pueyaso pueya maanujinijinio nia quiniuucua, majaari nia camishoo maaji nia numuetucunu, maajishuriu, casaanio. Cunoori jiyanohua

sacuraatia Pueyasora. Majaari quenaaja jiyano sacuraatia casaa-jiniji nia pocoojonu. Naajuhuj, majaari tamasa jiiťiasanoocua jiaťiatajaca nia quiniu. ⁴ Majaari najuhuana sacuraatia pocuajaca nia quiniujuhuj. Majaari najuhuana nia niti nia taquiriocuatenu juhua maninia pocuaja. Naajuhuj, majaari sacuraatia puenujunuujuaca nia quiniu. Puetunu cuno sesa pocuanujuanaari sesa Pueyaso pueyara. Saniya nia pocoojore cutara Pueyaso miishanojiniji, socua pueya maniniuhaqueetanura Pueyaso. ⁵ Niaacuajaari tari niishiya, cante juhujaniya na camishoo maajipohua numuetucujuuani, maa-jishurihuanio, nojoriiri jiyanojua taraatia quiniutianiya. Pueyaso jiiťiasano na tojijiacua pueyanoni, majaari na quiniu quiniutianiya naa miijiacua pueyara. Naa taraatia miishaanutaniyajaariuhua puetunu tamasa jiiťiasanoocua jiaťiatajacajanaa. Pueyasora, jiyano pueyari jiyanojua sesa, juhua juaashiquiata shipinijosano pueyasohua secoujuuaca. ⁶ Naacuajitij pueyanaa, majaari nia shanacunu tamasa sapojonura najarani na sequesacari naa sacuraatia miishanoori maja sesa, sacuraatia pocuanunio. Naa pueya miiniuucua sesatej, Pueyasocujaaari juaatishaare. Tari saniitioya na tojiyashijiacua pueyari. ⁷ Cunora pueyanaa, majaari quenaaja naa sacuraatia miijiacua nia cojiniu.

⁸ Pueyaso niishiyashijiacua nia quishacarijia tarijia pueyanaa, niaari ninishiqui quijiacua quiquiaari. Quiarijia saniniuujia, pa Jiyaniijia rupuejaca nia quishacari, Pueyasoori nia jiyatequiaari cuhuashiqui quijiacua nia quiniuria. Cunora, seetanujuanaa maninia miijiacua nia quiri, juhua cuhuashiqui quijiacua. ⁹ Paa jaara seetanujuanaa cuhuashiqui quijiacua quirini, paari maninia miijiacua quiniutianiyani. Naajuhuj, paari tojetaarucujanaa sesa miyashijiacua quiniutianiyani. Paari seetanujuanaa Pueyaso Rupaa tojijiacua quiniutianiyajuhuj. ¹⁰ Naajuhuj pueyanaa, niaa cumaati niishiya, ¿puetunu nia miishanojuanaate pa Jiyaniijia maniniuucuasano, maja soj? ¹¹ Majaari ninishiqui quijiacua nia cojiniu, nojori jaara sesa miya. Saniya nojori nia nacasure juhuari. Maninia nia miishanojiniji, nojoriiri niishiniutianiya nojori miishanoori tojetaarucujanaa sesa. ¹² Jiyasohua nojori mijijosano sacuraatiaari tojetaarucujanaa jiyanojua cararaatia. Pohuataaquishoo. ¹³ Saniniuujia, pa nacasusacari nojori Pueyaso Rupaata, paari nojori jiuujia cuhuataquiaani, nojori niishiniuria nojori miishanoori seetanujuanaa sesa. ¹⁴ Pueyaso Rupaacuajaari nojori jiuujia cuhuataquiaa na cumaacata, cuhuashiqui quijiacara nojori na jataniniuria. Cunora, naa naajiotasano quiyari tariucuaaanu Pueyaso Rupaajinia:

“¡Maqueyanonaa, quia niucuaire! ¡Macunucua tajiniji quia sanere, Pueyaso Jiyarosano cuhuatanura quiajaniya!”

¹⁵ Naacuajitij cua panishano pueyanaa, tama nia cuaqueyajaaja nia cojuare jiyanojua, seetanujuanaa maninia miijiacua nia quiniuria. Majaari juhua niishiyashijiacua nia quiniu juhujaniya. Seetanujuanaa niishijiacua nia quiri, maninia miijiacua nia quiniuria. ¹⁶ Nio pa quishacarini, sesa miiniuuri socua caneya puetunu juucajanaa. Majaari pa niishiniu taate tariqui quiniutianiyani. Naaratej, jaara pa naata quiriqia maninia pa miiniuria, maninia pa miiri puetunu juucajanaa. ¹⁷ Majaari moseeca nia quiniu. Maninia nia niishiri casaa pa

Jiyaniijia paniya nia miiniuriani. ¹⁸ Naajuhuj, majaari nia mashaasequejonuunu. Naa jaara mashaaseca quiriquia, majaari nia rejetenu quiniutianiya sesa nia miiniu panishacari. Saniya Pueyaso Sohanu nia shanacure niaacua cutara, nioojia na mishininiuria na cumaacata, seetanujanaa cumaacaraca nia quiniuria, shuquiriaatia quijiaca nia quiniurijuhuj. ¹⁹ Naa Pueyaso Sohanuraca nia quishacaritij, tariucuacaanu Pueyaso Rupaajinia naajiotasanojiniji jaaquequejonu nia naminiujiutoore. Naajuhuj, quiari naataja Pueyaso Sohanu niishitiojosano nia jaaquequejotoore. Nia jaaquequejosacari, pa Jiyaniijia nia shuquiritiare puetunu nioojiatajanaa. ²⁰ Pueyaracaanu puetunu casaarajanaa pa Que Pueyaso nia sequere “paacarasho” pa Jiyaniijia Jesucristoocua tiuujia nia quiniucua.

Taa quijia pa quiyani Pueyaso tojjia pa quishacari

²¹ Pueyanaa, maninia tojtioojuaca nia quiri, taa pa Jiyaniijia Cristo paniyacujani. Nojuajaari pa Jiyaniijia cutara.

²² Maajipohuanaa, nia niyaca tojjia nia quiri, taa pa tojiquiaa pa Jiyaniijiacuaani. ²³ Nia niyacaari juhua nioojia quiya niaara, taa Jesucristo quiya na saquiriojosano pueya jiuujiacuaani. Nojuajaari pocuaji Tacuna, juhua na cuaqueya pa quiniucua nera. ²⁴ Naacuajitij, taa Jesucristo saquiriojosano pueya na tojtiajaca quiyacuaani, maajipohua cuaara naa pueyaracaanu neyaca tojtiajaca quiirijuhuj.

²⁵ Canuunaa, nia niquiocohua nia paniri taa Jesucristo na saquiriojosano pueyano paniquiaaricuaa jyanohuani. Nojuajaari cunora tama na cuaqueyajaaja tarinitiaquiaari na mosaanura. ²⁶ Nojuajaari naa miiquiaariti seetanujanaa nerano pa quiniuria. Tojetaarucujanaa maninia pa quiniuria, nojuajaari poojia jeequequiaa na rupaata, naatej, taa pa jeequequiaacuaa pa cuaqueyani. ²⁷ Paa jaara tojetaarucujanaa tari jeequejosano quirini, pa Jiyaniijiajanaari pa tiuquinitianutianiya tama nocuajaaja, tariucua jatanishano shacantuucara. Jiyacaritij, paari tojetaarucujanaa sesa miyashijia quiniutianiyan. Paari seetanujanaa shanohua niquishano quiniutianiyan, juhua camishocoriquiano maniniushitishano niyacoo, tojetaarucujanaa jyanohua cohuaaque toqueraca. ²⁸ Pueyanaa, taa nia paniyacuaa tama nia cuaqueyajaajani, naa nia paniri nia niquiocuajuhuj. Cante necocua panijiani, nojuajaari juhua tama na cuaqueyajaaja paniya. ²⁹ Majaari quenaaja tamonu pueyano quiniu tama na cuaqueya soojeajaaja. Paacuajaari maninia cojuaja pa cuaqueyani. Paari maninia na mianuutequiaani, naatej, taa Jesucristo cojuaquiaa na saquiriojosano pueyacuaani. ³⁰ Puetunu na saquiriojosano pueyajanaari juhua na cuaqueya nera. Paacuajaari na cuaqueyajininioni. Naaratej, nojuajaari maninia pa cojuaquiaa. ³¹ Cunora naa naajiotasano quiyari tariucuacaanu Pueyaso Rupaajinia. Naa sequeyari:

“Pueyano jaara camiri, nojuaja cuara shiriquiiria na que, na nucua shuriucujaji, necocuata na quiniuria. Jaara camiri, nojoriiri juhua niquiriyatu cuaqueyaraca quiniutianiya”.

³² Pueyasojuanaacuajaari pa niishitiojoquiaari, pueyanoori juhua niquiriyatu cuaqueyaraca quijia jaara camiri necocuara. Cunoori miriqui pa niishitiojia, puetunu Pueyaso saquiriojosano pueya maanujanaari juhua pa Jiyaniijia niquiorano quiya, juhua niquiriyatu cuaqueyaraca pa quiniuria nata. ³³ Pueyanaa, cunojuanaari cua

po huatasano pa Jiyaniijia cuaqueyajiniji. Saniniuujia, puetunu cuarta Pueyaso pueyanaa, nia niquiocua panijiaca nia quiri juhua tama nia cuaqueyajaaja. Naajuhuj, puetunu maajipohuajanaa cuaara neyaca tojiijia quiriia.

6

¹ Muerasunaa, pa Jiyaniijia tojiijia nia quishacari, nia queya tojiijia nia quirijuhuj. Naa jaara naa miiritij, cunoori jiyano hua maninia Pueyasora. ² Tariucuacaanu Pueyaso Rootasanojiniji Moisésni, naa sequeyajaariuhua tamonu rootasano:

“Nia que tojiijia nia quiri, nia nucuanio. ³ Naa nia miiritij, pueyaraacaanu shuquiriaatia nia quiniuria, pueyaracaanu nia rishiniuria mijiria, niaa cuaara saaquianoshirijiaatijia”.

Nio rootasanoori coteenujuanaa rootasano tee Pueyaso sequeyacuajani taa na tojitajaca na miiniutianiya maniniani.

⁴ Niajaniya saniniuujia pueyanaa, majaari nia niquiohua nia juaatijionu najuhuanaj. Nojori nia canashitijiore maninia. Naa niishitiojore maniniajuhuj. Nojori nia nacasurejuhuj. Jaara nia tojitiaaquiri, na pishiniuria, nia majacuriquianoj nojori nia paniniutia, maja nia juaaniutia. Naa nia miiritij taa pa Jiyaniijia paniyacuajani.

⁵ Niajaniya poonitijosano pueyanaa, mijiria nia camaruhua tojitiajaca nia quiri. Majaari nojori nia rerequetenu. Puetunu nojori sequesanojuanaa niajaniya nia miiri nia puerenuta, niaa mariqui sanitiosaareeri nojori sequesano nia miyaquiniuucua maninia. Nojori sequesano nia miiriquia maninia, juhua pa Jiyaniijia Jesucristora.

⁶ Majaari maninia nia poonijionu saaja nojori niquishacari niajaniya, nojori shuquiritianura niajaniya. Maninia nia poonijiore pueyaracaanu puetunu nioojiatajanaa, seetanujuanaa juhua Cristora. Naa jaara naa maninia poonijionuujuaca quiriquiatej, niaari Pueyaso panishano miyajuhuj. ⁷ Puetunu nia poonijosanojuanaa nia poonijiore shitimia, juhua Pueyasora. Majaari nia miishano nia poonijionu nia taajenuta, juhua niarta pueyanora. ⁸ Niaacuajaari tari niishiya, pa Jiyaniijia Jesucristoori puetunu pajaniyajanaa niqutionutaniya maninia pa miiniuucua mijiria, poonijiotasano pueya, camarnuuju pueyanio.

⁹ Niajanijajuhuj seya jiitajacanaa, nio sequesano nia tojiri. Maninia nia jiitiare nia poonitijosano pueya. Majaari na miananajonu. Naa niishirijuhuj, niaari mariyata niquiriyatu Jiyaniijiaraca, niajaniya, nojorijuhuj. Nojuajaari jiyocuacaanu quijia. Naaratej, tamonu pueyanoori maja rimiajata nera, niarta pueyanojiniji.

Taate pa naata Sesaaca nujuatanuni

¹⁰ Quiarijia cua panishano cuarta Pueyaso pueyanaa, seetanujuanaa pa Jiyaniijia rupuejaca nia quiri, jiyano hua cumueeca nioojia quiniuria jiyano hua na cumaacata. ¹¹ Puetunu Pueyaso niqitiosano casaajanaa nia cushiyore juhua toqueya, Sesaaca sapojiaquiniuucujaji niajaniya. ¹² Pueyaso pueya pa quishacari mijiria, majaari pa quiaquetoojonu quiquiaa pueyanota. Pa coopueeri maja pueya. Nojoriiri cumaacaraca quijia nia jiya cajiniocua. Sesaacaari cuno na samaruhua jiyatequaaari jiyaniijnianuca nojori quiniuria mijiria. Naacuaajitij, nojoriiri cumaacaraca, nishiqui quijia nia pueya nojori jiitianura. Nojoriiri Pueyaso paraajuhuj. ¹³ Naaratej Pueyaso pueyanaa, puetunu Pueyaso

niqutiojosanojuanaa nia paracata nia miaquetoojotaqueya nia cushiyore. Naacujitij, sesashiquiari niocua na nujuatare, Sesaaca saniniujiushacari niajaniya. Niaa jaara naa nioojia jeenucuare juhuacarijia puetunu Pueyaso casaatajanaatej, niaari nia paraa nujuatajaca quiniutianiya.

¹⁴ Pueyanaa, niaacujajaari niishiya taa miaquetoojojuate pueyani. Na miaquetoonu panishacari, nojoriiri shoquejiniji casaa na cajiniocua morotaja. Na turtuconee cushiyonuujuaari, puetunu na jiriquiajanaa na mishiquiojonura cashiicujaji. Naajuhuj, na sapatuhua cushiyonuujuaariuhuj. Na nareenee pootujuaari, nocuaji na nujutajara cashi. Naajuhuj, na naca na cojuatajara, cumoco casaa cushiyonuujuaari. Na nijiniaquetucujaja mueruu pootujuaariuhuj.

Pueyaso pueya pa quishacari saniniujia, tama nia cuaqueyajaaja nia jeenucuare Pueyaso casaata. Naacujitij, seetanujuanaa Pueyaso Rupaa niishijica nia quiri maja nia sapojosaanura. Cunoori juhua pa cajiniocua camarucujua casaa saniniujia. Pueyaracaanu maninia mijica nia quiri, nioojia nia cojuanura Sesaacaacujaji, nojuaja mariqui nia cararoreeri niaa jaara sesa miiri. Cunoori juhua nia turtuconee nia cushishano. ¹⁵ Pueyaracaanu jeenucuasano nia quiriqia juhua tariucua sapatu cushinio. Naa tariucua pueca nia quiriqia nia quianura, pueya nia pohuatanura Jesujiniji. Naa nia pohuataretej nojori niishiniuria Pueyasoori nojori jiyanooniu paniyajuhuj. ¹⁶ Naajuhuj, pueyaracaanu nia tiuri Jesucristoocua. Naa Jesucristoocua nia tiuuniuni, cunoori juhua nia nareenee Sesaaca cashi nishitiumiacaca nia nujutajara niaacujaji. ¹⁷ Nia niishishacari niaacujajaari Pueyaso jiyanooshano pueya, cunoori seetanujuanaa juhua cumoco nia cushishano nacaque, maja nioojia nia niqijiotenura Pueyasoocujaji. Naajuhuj, Pueyaso Rupaa nia niishiri maninia. Cunocujajaari Pueyaso Sohuanu nijiniaquetucujaja mueruu, pueya jiuujiajinia na poonijionura. ¹⁸ Naajuhuj Pueyaso pueyanaa, majaari nia tarinitianu Pueyaso secojonuunu. Na Sohuanu cumaacata Pueyaso nia secojonuuriqia pueyaracaanu, naajuhuj, na Sohuanu niishitishacari niajaniya casaacura nia secojonutaniyani. Majaari secojonu nia tarinitianu nia taajenuta. Juhua sutejaca pueyaracaanu nia secojonuuriqia puetunu niarta Pueyaso pueyacuarajanaa. ¹⁹ Naajuhuj, cucuara nia secojonuure, Pueyaso niqutionura janiya na niishitajaja, maninia cua pohuatanura Jesujiniji cua puereyaquiniutia. Cucuara nia secojorejuhuj, maatia cua niishitiniuria pueya, Pueyasoori puetunu pueyajanaa jiyanooniu paniya saaja Jesucristoocua nojori tiushacari. ²⁰ Pueyasojuanaari cua jiyatequiaari na jiyaramiquishano cua quiniuria, na niti cua pohuatanura na rupaa pueya niqiuara. Janiyari cunora niya nujuatejojuajinia morotasano quiyani. Naaratej, cucuara nia secojore seetanujuanaa, Jesucristojiniji cua pohuatanura cua puereyaquiniutia.

Pablo pohuatasano Tíquicojiniji

²¹ Pa panishano Tíquicocujajaari niaacua quianutaniya, puetunujuanaa na pohuatanura janiyajiniji, naajuhuj, casaa cua miyani. Nojuacujajaari shamaatia poonijiojua pa Jiyaniijia. ²² Janiyacujajaari cunora niaacua na jiyaroyani, nioojia nia cumanjianura canaajiniji nia tojishacari, taa canaa quiya niyani.

²³ Pa Que Pueyaso, mariyata pa Jiyaniijia Jesucristota, nojori cuaara cuniqui quiniaa parta Pueyaso pueya jiuujia cajitiiria, juhuajaniya nia quiniuria. Nojori cuaara nia jiyateera panitiojuacarajuhuj, see-tanujuanaa Jesucristoocua tiuujia nia quiniuriajuhuaj. ²⁴ Naajuhuj, Pueyaso cuaara puetunu pa Jiyaniijia panijiacajanaa cumaquiiria na Sohuanuta, shuquiriaatia nojori quiniuria, cuno pojori, canapuatee see-tanujuanaa Jesucristo panijiacacuajani.

PABLO NAAJIONEE FILIPO TIACAJINIA QUINIAA PUEYASO PUEYACUARA

Pablo saruhuatasacari Pueyaso pueya

¹ Janiyari Pabloni. Janiyari Timoteota nia saruhuataani, Filipino tiacajinia quiniaa Pueyaso pueyanaa. Canaari Jesucristo poonitijiosano pueyajuhuj. Canaari nio naajiyani puetunu Pueyaso jatanishano pueyacuarajanaa, nojori tiuuniuucua Neyanu Jesuucua. Canaari cuniqui nia jiiitianaa pueyacuara naajiyajuhuj, nia cumaquiniaa pueyacuarano. ¿Niaate maninia quiyajaa pueyanaa? ² Pa Que Pueyaso, pa Jiyaniijia Jesucristonio, nojori cuaara cumaquiiria niajaniya na Sohuanuta. Nojori cuaara cajitiiria nioojiajuhuj.

Pablo secojosano, Filipino tiacajinia quiniaa Pueyaso pueyacuara

³ Pueyaracaanu cua niishiriojosacari niajaniya, janiyari pa Pueyaso sequequiaani “paacarasho”, maninia na muerasu nia quiniuucua. ⁴ Cua secojosacari, janiyari pueyaracaanu puetunu niaacuarajanaa cua shuquiriniutia masequiaa Pueyasoni. ⁵ Niaa jaara shushajanaa Jesucristoocua tiuquiaari, niaari jiyacari coteequiaari cua naacunura, Jesucristojiniji cua poojotanura tamaquiicua. Quiarijiani, niaari naa cua naacuyajaaquij. Janiyari cunora nia timitiaani. ⁶ Majaari cua taacanuunu niaacuaji. Naatej, taa Pueyaso coteequiaari maninia na miiniuria nioojiajiniaacuaani, nojuajaari naa nia jeenucuanu tucatanutaniya, Jesucristota pa naacuneetoosacariuhua. ⁷ Majaari cua jiyajenenu naa cua taacanuyaquishacari niaacuaji. Janiyacuajaari tari naa niishiyani, jiyanohua cua paniniuucua niajaniya. Naajuhuj, niaari cua cojiritiasaaquiaa cumaaca niquitiosaanujuhuj. Naacuajiti cua naata Jesucristojiniji pohuatanu niya nio nujuatejojuajinia, naajuhuj, janiya jaara jiyaniijianucua tacoji nequesoreesaareni. Naa Pueyaso cumaquishacari janiyatej, cua naata Pueyaso Rupaacuaji tacunu na cuarachashitijiaca. Pueyaso Rupaacuajiiri naa tacusano maatia, nojori niishiniuria, Jesucristoocua nojori tiuushacari, Pueyasoori na naata nojori jiyanooniujuhuj. Naa nioojia rupuesacari cojiatej, cunoori jiyanohua cua shiniujuquiaa Jesucristojiniji cua pohuatanura. ⁸ Pueyasocujaari niishiya taa cua paniya jiyanohua niajaniyani, Jesucristo paniniu cua jiiitasacari coojiajinia. ⁹ Janiyari niaacuara secojoquiaa Pueyasoni, socua niishijiaca nia quiniuria, socua Pueyaso niishitiaja nia jiiitanurajuhuj, seetanujuanaa maninia panitiojuaca nia quiniuria. ¹⁰ Naacuajitij, niaari niishiniutianiya teyano casaate seetanujuanaa maninia niaarani, saniniuujia, teyano casaate sesani. Naacuajitij, pa Jiyaniijia Cristo jaara tiuquiriohua, niaari seetanujuanaa maninia miijiaca quiniutianiya, tojetaarucujanaa sesa miyashijiaca. ¹¹ Naacuajitij, puetunu maninia nia miishanojuanaa Jesucristo cumaquishacari niajaniyani, cunoori juhua queraatia nia senosano quiniutianiya, Pueyaso shuqiritiasaanura. Naacuajitij, maninia nia miiniuucua, pueyari Pueyaso timitianutaniya.

Pabloori saaja Jesucristora quiniu panijia

¹² Cuarta Pueyaso pueyanaa, majaari cucua nia taraajenu nujuate-jojuajinia taraatia cua miishacari. Nio nia niishiri cutara: nujuate-jojuajinia nujuatesocoriquiano cua quiasaanuucua, naquiya cua miishacarijuhuaj, cunoori seetanujuanaa pueya naacuya Jesucristojiniji tojishaanura socua. ¹³ Naacujitij, puetunu jiyaniijia César tiajinia quiniaa soldadohuajanaari niishiya, janiyari cumayocua casaata morotasano quiya niyani, Jesucristojiniji cua pohuatanuucua. Majaari saaja soldadohua niishiniu cuno, mariyata puetunu pueyajanaari na niishiyajuhua. ¹⁴ Parta Pueyaso pueyari namitia niishiyajuhua, janiyari cumayocua casaata morotasaarucuaani. Naacujitij, cunoori quera puetunu nojorijianaa shiniujiuriucuaa Jesucristojiniji nojori pohuata-nura na puereyaquiniutia, pa Jiyaniijiaacua nojori tiuushacari socua.

¹⁵ Seetanujuanaa, noojiaqueya nojorijinijinioori Cristojiniji pohu-atanuuquiaa socua tojishano pueya nojori quiniuria janiyajiniji, nojori shocotanura janiya. Janiyara, naajaa. Tamasaca saniniuujia, nojori cu-taraari seetanujuanaa Cristojiniji pohuatanuuquiaa nojori shuquiritini-uria Pueyaso. ¹⁶ Nojoriiri naa pohuatanuuquiaaquij, Jesucristo paniji-aca nojori quiniuucua. Nojoricuajaari niishiya, Pueyasojuanaacuajaari niya cua niacanu, cua tacunura Jesucristo rupaacuaji. ¹⁷ Tamasacaari saniniuujia Jesucristojiniji pohuatanuuquiaacujua nojori shocotanu paniniutia janiya. Naa nojori miishacaritij, nojoriiri socua cua taca-tiniu paniya juucua. Majaari nojori pohuatanuunu quiquiaa see-tanujuanaa nojori paniniutia pa Jiyaniijia Jesucristo. ¹⁸ Naa nojori pohuatanuusacari seetanujuanaa nojori paniyaquiniutia pa Jiyaniiji-atej, naajaa. Nojoricuajaari Jesucristojiniji pohuatanuuquiaa. Janiyari cunora shuquiriaatia quiyani.

¹⁹ Socua shuquiriniutianianijia cua niishishacari Pueyasoori puetunu cuno pojori miishanojuanaa jataniniutianiya quiria saa maninaraja. Naa miiniutianiyari nia secojonuunuucua cucuara, naajuhua, Jesucristo Sohuanu cumaquiniuucua janiya. ²⁰ Naacujitij, janiyacujaari Pueyasocua tiuyani, nojuajaari cua cojuanutaniya maja cua cararoyaquishaanura janiya jaara nequesoreesaareni. Janiyari Pueyasocua tiyajaaniuhua na cumaquiniuria janiya, cua puereyaquiniutia cua pohuatanura Jesucristojiniji puetunu pueya niquiarajanaa, taa cua miiquiaacuajani. Janiya jaara rishiriquiani, janiya jaara mosaariquiajuhuaj, naajaa, janiyari jyanohua paniyani cua Jiyaniijia Jesucristo timitiasaanura. ²¹ Mijiria cua quishacarijia, janiyari saaja Jesucristora quiyani. Saniniuujia, janiya jaara mosaareni, cunoori socua maninia janiyara, na shuriucua cua quianura, nata cua quiniuria shuquiriaatia. ²² Naajaa, janiya jaara mijiria rishiriquiajani, cua naata socua poonijionu cua Jiyaniijia. Naacujitij, quiarijia, majaari cua naata saquiriojonu; rishiniu, shaajenu soj. ²³ Naaratej, janiyari coojia niquijioteyajaani. Majaari cua niishiniu teyano cua saquiriojonutaniyani. Janiyara maara socua maninia quiri janiya jaara cusoqueeni, Cristo shuriucua cua quianura nata cua quiniuria. ²⁴ Saniniuujia, socua maniniruhua mijiria cua rishiniurija, pa Jiyaniijiaacua cua shiniujiuniuria socua niajaniya. ²⁵ Naa cua niishiriojosacaritij, janiyacujaari tari seetanujuanaa niishiyani, janiyari juhuanouaja mijiria niaata rishiniutianiyani. Naacujitij, cua naata socua nia naacunu, socua pa Jiyaniijiaacua nia tiuuniuria.

Cua naata nia naacunujuhuaj, socua shuquiriaatia quijiaca nia quiniuria nocua nia tiuushacari. ²⁶ Naa cua rishishacari mijiriatej, janiyari niaacua quianutaniyani cua niquiniuria niajaniya. Naa cua quishacariuhua niaatatej, niaari Jesucristo timitianutaniya maninia na miiniucua janiya.

²⁷ Pueyaso pueyanaa, nio nia sequenu panianijia, seetanujuaanaa maninia miijiaca nia quiri taa Jesucristo rootaacuajani. Janiya jaara niaacua quiaareni, janiya jaara quiaaquiarejuhuaj, naajaa. Saaja niajanijajiniji pohuataaariquiani, taa jiyanoehua Jesucristo tojijiaca nia quiyajaani, jiyanoehua panitioojuacajuahuaj. Naajuhuj, jatiqiu Jesucristora nia poonijioteriquiani, na rupaa nia pohuatanucua. ²⁸ Naajuhuj, Jesucristo Rupaa paraa puereyashijiacara nia jiyateriquiani. Nojori piriyojosacari niajaniya, majaari nojori puereu quenaaja. Naa jaara naa nojori puereyashijiacara quiritij, nojoriiri cunojiniji niishiniutianiya, nojoriiri seetanujuaanaa saniitiosocoriquiano taa nia pohuatanuquiaa nojori niquiaracuajani. Saniniuujia, Pueyaso cajitishacari nioojia, nojori miananajosacari puecoonu niajaniya, niaari cunojiniji niishiniutianiya, niaaqui Pueyaso rijiosocoriquiano cutara. Pueyasocuaajaari naa cumaquijia na pueyatej, puereyashijianucua nojori quiniuria. ²⁹ Pueyasocuaajaari nia tiuutiquiaari Neyanuucua, na muerasu nia quiniuria. Naajuhuj, Neyanu rupuejaca nia quishacari quiarijia, Pueyasoori nia jiyatequiaari Neyanuucua naquiya nia miitishaanurajuahuaj, taa Neyanu miiquiaari naquiya pocuaracuaani. ³⁰ Nia niishiri, janiya, niajanijajuhuj, paari mariyata naquiya miiniu rejeretaquiaani, pa Jiyaniijiaara pa poonijosacari. Naaacuaajaari tari niquiquiaari naquiya cua miiniu. Majaari cua tarinitianu quiquiaari Jesucristojiniji pohuatanu. Quiarijiani, niaari janiyajiniji tojiniutianiya-juhuj, taa cua tarinitiaaquiya Jesucristojiniji pohuatanuni, naajaa naquiya cua miishacari.

2

Juhua Cristo pa quirij, taa na quiquiaaricuaani

¹ Naacuajitij pueyanaa, naquiya nia miishacari, nia niishiri taa Cristo shiniuujiquiaa pueyaracaanu niajaniani, maja nia tacaaniuria. Nia niishirijuhuj taa na paniniu cumanjiaquiaa niajaniani, naajuhuj, taa Pueyaso Sohanu jiuujiaatioequiaa niajaniani. Nia niishirijuhuj taa Cristo taraajequiaa jiyanoehua niaacuani. Naa panitioojuaca nia quirijuhuj. ² Jiuujiaatioojuaca nia quirijuhuj, seetanujuaana panitioojuaca nia quishacari. Naajuhuj, nareja nia shanacure Pueyaso Sohanu niaacua, nojuaja cuaara puetunu niajanijajanaa rupeteera, jatiqiu nia poonijionura pa Jiyaniijiaara. Naa jaara naa puetunu nio cua sequesanojuanaa miijia quiritij, niaari tojetaarucujanaa shuquiriaatia quijiara cua jiyatenutaniya. ³ Maninia nia miishacari, majaari na miiniu juhua tamasa nia shocotanura, nia jiyaniishacari niaa naasucuaari socua maninia miijiaca tamasacajiniji. Puetunu maninia nia miishanojuanaa nia miiri tamasa nia rerequeteyaquiniutia. Puetunu niarta Pueyaso pueyajanaa nia jiyatere juhua socua maninia miijiaca niajanijajiniji. ⁴ Naa jaara maninia miijiaca quiriquiacuaa, majaari tama maninia miijiacajaaja nia quiniu. Niarta Pueyaso pueyacu nia taraajerejuhuaj, maninia quijiaca nojori quiniurijuhuj.

⁵ Tama nia cuaqueyajaaja nia tarinitiare niarta pueyacia nia taraajesacari, taa Jesucristo tarinitiaquiaari tama na cuaqueyajaaja pocuaracuaani. ⁶ Nojuajaari naa miiquiaariti: tariucuacaanu, nojuacuajaari Pueyaso quijiajuhanajaj, juhua na Que. Naajaa, nojuajaari maja na cuaqueya na jiyatenu quiquiaari seetanujuanaa juhua na Que Pueyaso na quiniuria. ⁷ Nojuajaari jiyanoehua cumaacaraca Jiyaniijia na quiniu tarinitiaquiaari, juhua nareja poonijjotesano pueyano na quiniuria. Naaratej, mijiria rasaaquiaariiri seetanujuanaa pueyano na quiniuria. ⁸ Naa pueyano na quishacari mijiriatej, nojuajaari juhua nareja pueyanora tama na cuaqueyajaaja jiyatequiaari. Pueyaracaanu na Que tojjia na quishacari, nojuajaari tama na cuaqueyajaaja tarinitiaquiaari na mosaanura. Seetanujuanaa cararaatia cusoquiaariiri niyacutesanojinia teetesano, juhua sesa miijia pueyano. ⁹ Naaratej, Pueyasoori seetanujuanaa Jiyaniijiarajanaa na jiyatequiaari puetunu jiyaniijianucujajiniijianaa. Na sesojoquiaarijiaariuhujaj “Jesu”. Nioori sequeya “pocuaaji Tacuna”. Majaari socua tamonu pocuaaji tacuna quiniu mijiria, jiyocuacaanunio. ¹⁰ Puetunu pueyajanaari niishiniutianiya Jesuuri Jiyaniijiajanaa. Maja tamonu. Cunora, nocuara mojuquetaconutaniyari puetunu jiyocuacaanu quijiacajanaa, puetunu mijiria quijiacajanaajuhujaj, puetunu jiya cariquimia quijiacajanaanio. ¹¹ Puetunu tamaatia rupaaca pocujacajanaari niishiniutianiya Jesucristoori Jiyaniijiajanaa cutara. Naa Pueyaso miiniuucua Neyanutej, puetunu nojorijianaari niishiniutianiya, Pueyasoori tojetaarucujajanaa maninia miijia.

Pueyaso pueyari juhua ninishiqui cuhuataja mijiria

¹² Quiarijiani cua panishano cuarta Pueyaso pueyanaa, cua rootasano tojjitajaca nia quiri. Naatej, taa pueyaracaanu cua tojjitajaca nia quiquiaaricujajani niaata cua quishacari, quiarijia socua cua tojjitajaca nia quiri, tucuacaanu cua quishacari niajanijajini. Naacujajitij, seetanujuanaa pa Jiyaniijia tojjitajaca nia quiri nia niishiniuria niaari seetanujuanaa Pueyaso pueya. Majaari na rupaa ruretanu. Jiyanoehua puereeta quiniutianiyaari na tojjiyashijianucua. ¹³ Pueyasojanaacujajari nioojiajinia poonijioquiaa maninia nia miiniu paniniuria. Na cumaaca nia niqutioquiaaariuhujaj maninia nia miiniuria nera nia panishano, taa na panijacujajani.

¹⁴ Cunora, puetunu nera nia miishanojuanaa nia miiri shitimia, maja nia ririjiotanuta. Majaari nocua juayonuujutanujuhujaj. ¹⁵ Naa jaara naa maninia miijiaa quiritij, majaari Pueyaso niishiyashijiaa pueya naata quiniutianiya sesa na saquiriojotanura niaacuara. Naaratej, tojetaarucujajanaa sesa miyashijiaa Pueyaso niqiohua nia quiri, mijiria sesa miijiaa pueya niqiuara. Nojoriiri seetanujuanaa sacuaratia, Pueyaso tojjiyashijiaa. Cuno juhua ninishiqui quijiaa pueya tajinia nia quishacari, niaari juhua riya nojoriria, naatej, taa riya cuhuataquiaa ninishiquicuaani. ¹⁶ Pa samiitianiijia rupaa Jesucristojiniji nia jiiitianoni, niaari cunota cuhuataquiaa mijiria quiniaa. Naa maninia Pueyaso pueya nia quiniuucuatej, Cristo jaara tiuquiriohua na rijionuhuaa pajaniya, janiyari jiyanoehua nia timitianutaniyani. Janiyari naa nia timitianutaniya cua niishishacari puetunu cua poonijiosanojuanaari maja najuhuaa na quiniu quiquiaari. Naajuhujaj, majaari najuhuaa naquiya cua miiniu quiquiaarijuhuaj. ¹⁷ Naaacuajaari

maninia miijiaca Pueyasocua tiuujia nia quiniuucua, Jesucristojiniji cua pohuatanuucua nijaniya. Cuno maninia nia miishanoni, cunoori juhua shanohua jaanutaja Pueyasora. Janiya jaara nacatasaare Jesucristojiniji cua pohuatanuucua nijaniyani, cua nanacaari shoontaniya juhua Pueyasora niqutiosocoriquiano. Janiya jaara naa miishaareni, janiyari cua nanacata tucuatantaniya puetunu cua miishanojuanaa Pueyasorani. Janiya jaara naa miishaareni, janiyari seetanujuanaa shuquiriaatia quiniutianiyani. Janiyari puetunu nijaniyatjanaa jiyanoehua timiniutianiyani. ¹⁸ Shuquiriaatia nia quirijiuhuaj, janiya jaara mosaareni, cua Jiyaniijia tojjia cua quiniuucua. Cua cojitiuri shuquiriniujuhuaj.

Pablo pohuatasano Timoteojiniji, Epafroditojinijinio

¹⁹ Janiyari niaacuaji tojiniu paniyani taa nia quiyani, shuquiriaatia cua quiniurajuhua janiya jaara niaacuaji tojirini. Janiyari cunora Timoteo jiyaronutaniya niaacuani. Naacuajitij, cuniquiji na tacatesacariuhua, nojuajacua cua pohuatasuhua nijaniyajiniji saniniuuja. Janiyari cua Jiyaniijia Jesuucua tiuyani na rishitiniuria janiya, nijaniyajiniji cua tojiniuria. ²⁰ Janiyari Timoteo jiyaronutaniya niaacuani. Saa nojuaja cutaraari seetanujuanaa niaacua tacaajia juhua janiyajuahuaj, na naacunura nijaniya, maninia nia quiniuria. ²¹ Tamasacaari saniniuuja saaja tama nojori panishano casaacuaajaaja tacaajia, maja Jesucristo casaacua. ²² Niaacuajaari tari na niishiya, taamuecate Timoteoni. Nojuajaari pueyaracaanu cuata poonijioquiaa juhua quiyanu, Jesucristojiniji mariyata canaa pohuatanura. ²³ Janiya jaara niishirini taa cua miishaanutaniyani, janiyari Timoteo jiyaronutaniya ritia niaacuani. ²⁴ Naajaa, janiyacuaajaari cua Jiyaniijiaacua tiuyani cua cartesaanura niquiji, niaacua cua quianura ritiajuhuaj.

²⁵ Cua sashishacari Timoteo cua jiyaronura niaacua, maniacuajaruhua ritia cua jiyaronura niaacua Epafrodito, parta Pueyaso pueyano. Niaacuajaari nojuaja jiyarotaquiaari cumaneeca quiriano, nojuaja cumaquiniuria janiyajuahuaj. Nojuajaari maninia cua naacuquiaa. Cuata miiquiaa naquiya jaarajaarijia Jesucristojiniji cua pohuatanura. ²⁶ Nojuajaari puetunu nijaniyatjanaa niquiniuucua jiaatiaa. Na niishishacari niaari jiyanoehua nocua tacaquiyoa nia niishiniuucua nojuaja cusosu quiquianu, cunora, nojuajaari ritia nia niquiniuria tacaya. ²⁷ Seetanujuanaa nojuajaari cusosu quiquianu. Quera cusocanjuanaari. Pueyaso cutaraari nocua taraajecanu. Cucua taraajecanjuariuhua, maja cua taraajenu jiyacatenura socua. ²⁸ Janiyari cunora ritia niaacua na jiyaroyani, nia shuquiriniuria nia niquishacari nojuaja niaacua tiuquihuano. Naa shuquiriaatia nia quishacariuhuatej, janiyari coojia cajitiniutianiyajaacuhua. ²⁹ Niarta Pueyaso pueyano na quiniuucua, seetanujuanaa juhua nia tarajanu nia timitiarenoj, niaacua na tiuquishacariuhua. Puetunu jiyano pueyajanaa panijia nia quiri, noo pojori pa Jiyaniijiaara poonijionuujuacatej taa Epafroditocuaani. ³⁰ Nojuacuajaari quera shaajeyarucuaa Cristora na poonijosacari. Cocuaatia miijiocanjuariuhua. Nojuajaari tama na cuaqueyajaaja tariniacanu, na naacunura janiya nia niti. Tucuaanu nia quiniuucua janiyajiniji, majaari nia naata naacunu janiya.

3

Nio rootasano tojjiaca pa quiri cutara

¹ Quiarjia saniniuujia, cuarta Pueyaso pueyanaa, pa Jiyaniijia nia shuquiritiare, pocuaji Tacuna na quiniuucua. Janiyara, maja taajeta cua pacutenuhuara socua cua sequenura niajaniya tari cua sequesano niajaniya. Cunoori seetanujuanaa maninia niaara. ² Tama nia cuaqueyajaaja nia cojuare cuno sacuaraatia niishitiojonuujuaca pueyacuaji, cuno pojoriicuaji, sesa miijiacani. Nojoriiri pueya cararaatiuuquia co miatejonuujuaca najuhuanaj, nojori jyanishacari nojori miatesano pueyari seetanujuanaa Pueyaso pueya. ³ Paa cutaraari seetanujuanaa Pueyaso pueyani, Pueyaso Sohanu jyatenuucua pajaniya Pueyaso tojjiaca pa quiniuria. Paari timiquiaajaaniuhuj Jesucristo rupuesano pa quishacari. Taa pa cararaatiuuquia casaa quiyani, naajaa. Jesucristoocua pa tiuushacari, paari seetanujuanaa Pueyaso pueyani. ⁴ Tamasaca jaara tama na cuaqueyajaaja jiyaniya nojuaja seetanujuanaa Pueyaso pueyano, maninia Judio pueyano na quiniuucua, janiya cutaraari nojori shocotaani. Janiyari tari naa jyaniquiaarjiiuhuj. ⁵ Naatej, janiya jaara rasaaquiaarini, ocho juuca jaara cua shocoquiaarini, cua cararaatiuuquia coori mialesaaquiaari. Janiyari naa miishaaquiaarini taa canaa rootasaaquiaari Moisés Rootasanojinijicuajani, seetanujuanaa Judio pueyano cua quiniuria. Naajuhuj, janiyari Israel pueyanoni, cua supuetana Benjamín jinianuucujajinio supueno pueyano. Na queeri quiquiaari Jacobo, Pueyaso saquiriojosano pueyano. Naa cua supuetanaa quiniuucua Pueyaso saquiriojosano pueyatej, janiyari naajuhuj, nojoriicujajinio cua supuenuucua. Naajuhuj, janiyari Hebreo rupaa pocuajani taa cua supuetanaacuaani. Cua que, cua nucuaari mariyata Hebreo rupaa pocuajaca quiquiaarjiiuhuj. Mashaja cua quishacari, janiyari Fariseo pueyanora quiquiaarini. Cuarta Fariseocuacaari socua jyanohua supuetana Moisés Rootasano tojjiaca puetunu cuarta Judiocuacajinjijiojuanaa. ⁶ Jiyacaritij, janiyari cua niishitiojonaa tojjiaca quiquiaari jyanohuani. Majaari cua taajenu quiquiaari nojori sequesano cua miiniuria. Naaratej, janiyari Jesucristo tojitajaca miijia naquiyani, cua jyanishacari nojori naasucuaari Pueyaso paraa. Naajuhuj, maninia cua tojiniuucua Moisés Rootasano, janiyari sesacasoo quiquiaarini Moisés Rootasano niishitiojonaara. ⁷ Puetunu nio cua sequesanojuanaani, janiyari jyanohua na timitiaquiaarini cua jyanishacari janiya naasucuaari naa seetanujuanaa Pueyaso pueyanoni. Quiarjia saniniuujia, Jesucristoocua cua tiuushacari, tarijia cua jyanishano maninia casaani, puetunu cuno casaajanaari quiarjia najuhuaana janiyara. ⁸ Quiarjiani, janiyari socua cua Jiyaniijia Jesucristo niishiniuria jiaatiaa jyanohuani. Naaratej, puetunu tariucuaaanu cua timitiasano casaajanaari najuhuaana janiyara quiarjia. Cristo pueyano cua quiniuucua, janiyari juhua taanuusaaquiaari puetunu cuarta Judiocuacajinjijianaani. Naa Cristo tojjiara cua quiniuucuatej, cua shipinijojiniji cua casaarano maseyaquiquiaarinijia. Naajaa, puetunu cuno casaajanaari juhua rucucua quiya janiyara. Janiyari seetanujuanaa saaja cua Jiyaniijia Jesucristo niishiniu paniya socuani, nata rupuetootesano cua quiniuria seetanujuanaa. ⁹ Majaari cua jyaniniu janiya sesa miyashijiani, Moisés Rootasano cua tojiniuucua. Saniniuujia, Jesucristoocua cua tiuushacari, Pueyasoori puetunu

sesa cua miishanojuanaa tuujuquiaa. Cua niishishacari Jesucristoori mosaaquiaari cua niti, Pueyasoori cua jiyanooquiaari, maja na sesacatura janiya, Neyanuucua cua tiuuniuucua. ¹⁰ Janiyari Jesucristo niishiniu paniya jiyanohua socuani, seetanujuanaa nata rupuetootesano cua quiniuria. Janiyari na samiitianitaja cumaaca paniyajaanihuaj, coojiajinia na poonijionura, seetanujuanaa quiarinio pueyanora cua jatanishaanura juhua Cristora. Nojuajaari jiyanohua taraatia miishaaquiaari mijiria na quishacari, na Que tojjia na quiniuucua. Janiya cuaara naa miishaariajuhuaj cua tojiniuucua nojuaja, juhua nojuaja cua quiniuria. Tama nojuajaarijia na cuaqueya tarinitiaquiaari na mosaanura. Naajuhuj, tama janiyajaarijia cua cuaqueya tarinitiaja quiniu paniyani, cua miiniuria puetunu cua Jiyaniijia sequesanojuanaa janiya. ¹¹ Janiyari tojetaarucujanaa maninia miiija quiniuucua jiaatiaquiaani, juhua quiarinio pueyano cua quiniuria, juhua tariucua macujinijinio samiitianishano pueyano.

Maninia pueya pa quirij, Pueyaso muerasu pa quishacari

¹² Juhuanujuaja majaari cua quiniu tojetaarucujanaa maninia miiija. Sesa miiniu niishiyajaanijia. Jeecasoojuaanijia. Naajaa, majaari cua tacaaniu. Jesucristocujaaari cua jiyatequiaari na pueyano cua quiniuria. Naaratej, janiyari jiyanohua saniniujuquiaani maninia na pueyano cua quiniuria. ¹³ Cua panishano cuarta Pueyaso muerasunaa, janiyari niishiyacuajani, juhuanujuaja maja maninia cua quiniu taa cua Jiyaniijia quiyacuaani. Naajaa, majaari cua tarininiu. Janiyari juhua ritia netena miiquiaani na shocotanura narta netecuatunaa pueya. Maninia netenaari na nijiniara niquiyashijia. Naajuhuj, majaari cua niishiriojonu maninia cua miishano tariucucuaa. Janiyari saaja cua tacoji niquiquiaani, socua maninia miiija cua quiniuria tari cua quiniujiniji. ¹⁴ Pueya tacuarishijosacari, netena jaara narta netecuatunaa shocotare, nojuajaari shanohua casaa niquitiosaaquiaa. Majaari najuhua na netenu jiyanohua. Janiyaraari naajuhuj. Majaari najuhua jiyanohua cua saniniujuuniu quiquiaa, maninia cua quiniuria juhua Cristojuhuj. Mijiria cua quiniu cua tucuatascari, Pueyasoori cua jataniniutianiya juhua Cristo cua quiniuria, Cristoocua tiujia cua quiniuucua.

¹⁵ Pueyanaa, niajaniya, cante seetanujuanaa Pueyaso tojjiaca quiyani, mariyata naa nia niishiriojore taa cua niishiriojiyacuaani. Naatej, jiyanohua nia saniniujiuri juhua Cristo nia quiniuriajuhuaj. Cante tama na cuaqueyajaaja jiyaniya nojuaja tariucua tojetaarucujanaa sesa miyashijiani, Pueyaso cuaara na niishitiriia maninia. ¹⁶ Paa jaara maninia miiniu niishijica quirini, majaari pa jiyacatenu saaja sesa miiniuucua. Saniya maninia miijiacara pa quiri socua.

¹⁷ Cuarta Pueyaso pueyanaa, maninia miijiaca nia quiri taa canaa nia niquiquiaari maninia miyanocuaani. Naajuhuj, maninia miijiaca nia niquiri, cante maninia miiquiaani taa canaa niishitiquiaari niajaniyacuajani, maninia canaa miishacari. Nojorijiniji nia niishiriquia, maninia nia miiniuriajuhuaj. ¹⁸ Jesucristocujaaari pocuara cusoquiaari niyacutesanojinia teetesano, maninia miijiacara pa jatanishaanura. Saniniuujia, queraatia pueyari juhujaniya miiquiaa sesa. Janiyacuajaari nojorijiniji pohuatanu pacutejoquiaari niajaniyani, maja juhua

nojori nia quiniuria. Quiarijia cua nujuquenuta, janiyari nia pohuatarohuanuhua jiyano sesa miijiacajini. Nojoriiri pa Jiyaniijia cusono soojeaca. Nojoriiri maja na paniniu naquiya na miishaanura Cristo toji-jiaa nojori quiniucua. ¹⁹ Nojoriiri puetunu quejoosanutaniyajanaa mani quiquiojinia. Nojoriiri tama nojori panishanojuaaja jiyatecanu juhua nojori pueyasora. Naa sesa miijiaa nojori quishacaritij, majaari nojori niishiniu caririquiniu. Saaja sesa na miitiushano timitiatiuyari. Nojoriiri saaja mijiria casaacua jiaatiajaca. ²⁰ Pajaniya saniniuujia, paa cutaraari tari jiyatesaaquiaari jiyocuacaanu quijiacaranoni. Paari cuniquiji pocuaji Tacuna niniuria sashiyani. Nojuacuajaari pa Jiyaniijia Jesucristo. ²¹ Jiyanhua na cumaacata, nojuajaari pa cuaqueya seque jataniniutianiya, shacantuuca quijia pa quiniuria juhua na cuaqueya-juhuj. Nojuajaari cumaacaraca puetunu casaajanaa na tojitiniuria nojuaja. Naacuajitij, nojuajaari na naata moqueja pa cuaqueya jataniniu, pueyaracaanu rishijiaa pa quiniuria.

4

Pueyaracaanu pa Jiyaniijia pa shuquiritiare

¹ Cunora, cua panishano cuarta Pueyaso pueyanaa, pueyaracaanu pa Jiyaniijia tojiijiaa nia quiri. Janiyari jiyanhua nia niquiniucua jiaatiaani. Nia niquiara cua pohuatanuucua Pueyaso rupaa, niaaquiiri seetanujanaa na tojiijiaa quiquiaari. Naa jiyanhua maninia Pueyaso muerasu nia quiniucuatej, cunoori jiyanhua cua timitiquiaa.

² Janiyari Evodia sequeya cutarani, narta maaji Sintiquenio, nojori cuara jyanootioora juhua seetanujanaa Pueyasocua tiuujiaa maa-jipohua. ³ Quiajaniya saniniuujia Sicigona, quiaacuajaari cuata poonijiojua jaarajaaja. Cunora, janiyari quia sequenu paniyani, cuno maa-jipohua quia jyanootiooterohua, nojori rupuetoonuhua. Cuno maa-jipohuacuajaari jaarajaaja cuata poonijionuuquiaari, Clementejuhuj, pa Jiyaniijiajiniji cua pohuatasacari. Naa cuata poonijionuuquiaar-ijiaariuhua tamasaca, canapuate cuata quiquiaaricujani. Nojori sesacacuajaari tari naajiotasano quiya Pueyaso nequesooretuneejinia, tee cuniqui pueyaracaanu rishijiacarano sesaca naajiotasano quiyacua-jani.

⁴ Cua panishano pueyanaa, pueyaracaanu pa Jiyaniijia nia timitiare. Nia sequerohuacuaraj, pueyaracaanu nia timiri. ⁵ Puetunu pueyajanaa cuara niishiiria niaari seetanujanaa maninia pueya, maja juaajiaa. Pa Jiyaniijiacuajaari quera tiuquihua.

⁶ Majaari quenaaja nia tacaaniu. Saniniuujia, nia tacaashacari, Pueyaso nia pohuatare puetunujuanaa, nia secojosacari nojuaja. Nia secojosacari, nojuaja nia masere nia panishano. Jiyacaritij, nojuaja nia sequerejuhuj "paacarasho". ⁷ Naa nia miishacaritij, Pueyasoori nioojia cajitiniutianiya. Naa Pueyaso cajitiniucua nioojiatej, majaari socua nioojiaa tacaaniu quiniutianiya, nia nishitiajanio. Naacuajitij, niocua juhuajaniya panaatia quiri Jesucristo kojishano nia quiniucua. Naa Pueyaso miishano pajaniyani, cunoori jyanohua jiyajeneta. Nocuaji jiuujiatesano.

Saaja maninia casaacua niishiriojuaca nia quiriquia

⁸ Naajuhua cuarta Pueyaso pueyanaa, nio tojiijiaa nia quiriji-uhuj. Pueyaracaanu saaja seetanujanaa rupaacua niishiriojuaca

nia quiriquia. Naajuhua, saaja rerequeteyaquishoo casaacua nia niishiriojore. Saaja maninia casaacua niishiriojonuujuaca nia quiri, maja cararaatia casaacua. Naajuhua, saaja Pueyaso shuquiritiasano casaacua nia niishiriojore, maja Pueyaso sesacasano casaacua. Naacua-jitij, puetunu maninia casaacujanaa nia niishiriojore, casaajiniijiti pueya naata Pueyaso shuquiritianuni.

⁹ Maninia nia miiriquia pueyaracaanu, taa cua niishitiojoquiaari niajanियacuajani. Niaacuajaari cua rootasano tojiqiaari. Naajuhua, niaacuajaari cua niqijia taa miijia cua quiquiaarini. Naa jaara naa miijiaa quirijiuhua, poojia cajitina Pueyasoori niaata quiniutianiyajuhua.

Pablo pahuatasano, Filipino tiacajinia quinia Pueyaso pueya jiyaronucua cumaneeca nera

¹⁰ Janiyari jiyanojuaa cua Jiyaniijia timitiaani juhua shusha nia niishiniuuquiohua janiya, cucua nia jiyaronucua nia reratesano cumaneeca. Naa cua sequesacari niajanियatej, majaari nia jyaniniu janiya nia sequeyani niaari cua niyajetacanu. Maja. Janiyacuajaari niishiyani, majaari tarijia nia naata cua naacunu quijia nia cumaneecata, nia juuretasacari niaatucua canta cucua na jiyaroriquiani. ¹¹ Majaari naa cua sequenu niajanियatej cua panishano cua jiiitaaquiniuucua. Maja. Janiyacuajaari tari jiyartuunoni, juhua janiya cua quiniuria cua jiiitasanoniyajuata. ¹² Naajuhua, janiyari niishiyani juhua janiya cua quiniuria cua panishano cua jiiitaaquishacari. Naajuhua, janiyari niishiyani taa quishanote puetunu cua panishanojuanaa cua jiiitiasacari. Janiyari tariucua saniniuujushanoni puetunu casaajanaa cua rejeretanura. Juhua janiya quiniu niishiyani maaajaaraca cua quishacari, maaajeeju cua quishacarijuhua. Cua naata juhua janiya quiniu casamiijiu cua quishacarijuhua, maja saaja casamiriaca cua quishacari. ¹³ Cua naata rejeretanu puetunujuanaa, Cristo cumaquishacari janiya. ¹⁴ Naajaa, niaari maninia miiriucaa nia cumaneeca nia jiyarosacari cucua, naquiya cua miishacari niya. Niaari niarta pueyanoojuaa taraajeja cutara.

¹⁵ Naajuhua, Macedonia jiyajiniji cua quiasacari nia shuriucujaji Filipino tiacajiniji, tamonu jiyacajinia cua pahuatanura Pueyaso rupaa, saaja niajanिया cutaraari cucua jyanooquiaari. Cunoori quiquiaari shushajanaa Jesucristoojuaa tiuujiaca nia quishacari. Jiyacaritij, niaari nia reratesano cumaneeca jiyaroquiaari cucua, shuquiriaatia nia quishacari cua pahuatanucua nia niqiuara Jesucristojiniji. ¹⁶ Juhuanoojuaa nia Macedonia jiyajinia cua quishacarijia, Tesalónica tiacajinia, niaari cucua pacutejoquiaari jiyaronu nia cumaneeca, cua panishano cua masetajara. ¹⁷ Majaari saaja cua paniniu pueyaracaanu nia niqutiojonura nia cumaneecajiniji janiya. Janiya cutaraari nia panitiaani capora pueya nia quiniuria. Naacua-jitij, Pueyasoori saniniuujia socua queraatia nia niqutionutaniyacuaja. ¹⁸ Epafroditojuaari puetunu nia jiyarosano cumaneecajanaa cucua tiuqitiaseecua. Janiyari cunota puetunu cua panishanojuanaa maserucuaa tarini. Cureyajaari nia jiyarosano cumaneecajiniji. Cuno cumaneeca cucua nia jiyarosani, cunoori juhua Pueyasora niqutiosano casaa. Nera, cunoori juhua shanohua jaanutaja catijiasano nocuara. Na shuquiritiriiri. ¹⁹ Naaratej, cua Jiyaniijia Pueyasoori puetunu nia jiiitaaquishoo casaajanaa nia niqutionutaniya.

¿Pueyasoteeri casamiijuu? ¡Maja! Nia rupuesacari Neyanu Jesucristo, puetunu na jiiitasanojuanaari niaaranojuhuaj. ²⁰ ¡Pa Que Pueyasoori jiyanoohua maninia! Saaja nojuaja pa shuquiritiare pueyaracaanu. Cuaara naa quiiriatej.

Nata quiniaata Pablo saruhuatasacari narta Pueyaso pueya

²¹ Quiria nia sarhuatatare puetunu Jesucristo jiyanooshano pueyanaa. Niya cuata quiniaa Pueyaso pueyari nia sarhuataajuhuaaj. ²² Naajuhuaaj, Jesucristoocua tiuujiaca jiyaniiija Césarra poonijionaa pueyari nia sarhuataajaacuhuaaj, puetunu niya Jesucristoocua tiuujiacajanaanio.

²³ Pa Jiyaniiija Jesucristo cuaara cumaquiiria puetunu nioojiajanaa. Tariucuaaja pueyanaa.

PABLO NAAJIONEER COLOSA TIACAJINIA QUINIAA PUEYASO PUEYACUARA

Pablo Colosa tiacajinia Pueyaso pueya maanuucuaru naajioquiaari

¹ ¿Niaate quiyajaa, Colosa tiacajinia quiniaa cuarta Pueyaso pueyanaa? Janiyari Pabloni, Jesucristo jiyaramiquishano na rupaa pohuatariquiano taa na Que Pueyaso paniquiaaricuajani. Pa tarajanu Timoteota naajiya nionijia. ² Niaacuara naajiyanjia, canapue Pueyaso saquiriojoquiaaricuajani tama nerajaaja nia quiniuria. Niajanuyacuajaari maninia tiuquuaa Pueyasocua, Cristo rupuesano nia quishacari. Pa Que Pueyaso cuara cumaquiiria niajanuya, shuquiriaatia nia quiniuria, juhuajaniya nioojia quiniuriajuhuaj.

Pablo secojosano Jesuucua tiuuniaa pueyacuara

³⁻⁴ Canaari pohuatasacaanuni taa nia tiuquuaa Jesucristoocua, naajuhuj, taa nia paniya puetunu niarta Pueyaso muerasujuanaani. Naaratej, pueyaracaanu canaa secojosacari Pueyaso niaacuara, canaari na sequequiaani: “Paacarasho canaa Quena”. ⁵ Niaari naa maninia quiyatej, nia niishishacari Pueyasoori jiyanojua maninia pa miiniutianiya na niqitiosacari pajaniya jiyocuaaanu na jiiitasanojiniji. Niaacuajaari naa pohuatasaaquiaari tarijiatej, shushajanaa nia tojishacari seetanu Pueyaso rupaaajanaa. ⁶ Cuno maninia rupaari puetunu jiyacajiniyajanaa paaqueyaree, mariyata taa na paaquecanucuaa na pohuatasacari nia tiacajiniacuuaani. Pueyaso Rupaari maninia caneyaree queraatia pueya jiuujiajinia, mariyata taa na caneya nioojiajiniacuuaani. Naa caneyari nia niishishacari Pueyasoori seetanujuanaa pa paniya, taa nia pohuatasaaquiaaricuajani. ⁷ Pa panishano Epafraasri naa pohuataquiaari niajanuyatej. Nojuajaari Pueyasora poonijiona, juhua canaa. Nojuajaari canaa niti poonijioriquiaa niaara. ⁸ Nojuajaari canaa pohuatarucuaa niajanuyajiniji, naajuhuj taa Pueyaso Sohuanu panitiooteya niajanuyani.

⁹ Naaratej, canaa jaara tojiquianu niajanuyajinijini, majaari canaa tarinitianu quiriquiaa Pueyaso secojonu niaacuara. Canaari Pueyaso secojoquiaani, nojuaja cuara nia jataniiria niishijia nia quiniuria na Sohuanu cumaacata. Canaari naa secojoquiaani, maninia nia niishiniuria taa Pueyaso paniya maninia nia quiniuriani, maninia nia miiniuriajuhuaj. ¹⁰ Naa jaara Pueyaso panishano niishijiaa quiri, naacuajitij, niaari maninia quiniutianiya taa pa Jiyaniijia paniya na pueya quiniuriacuajani, nojuaja shuqiritianura niajanuya, pueyaracaanu maninia nia quishacari. Niaari puetunu maninia casaajanaa miiniutianiya. Naajuhuj, niaari socua maninia niishiniutianiya Pueyaso. ¹¹ Canaari Pueyaso secojoquiaa niaacuarajuhuj, Pueyaso cumaquiniuria niajanuya puetunu na cumaacatajanaa. Jiyanojua maniniaari na cumaaca, shuquiriaatia nia rejeretanura juhuajaniya puetunu casaajanaa. ¹² Canaari Pueyaso secojoquiaajuhuj niaa cuara pueyaracaanu sequeera nia shuquiriniutia “paacarasho”, pa Que Pueyaso miishanojiniji. Nojuacuajaari pa jataniquiaari maninia na muerasu pa quiniuria, puetunu na muerasutajanaa pa masenura na jiiitasanojiniji pajaniyara,

cuhuashiqui quiquiojinia pa quishacari. ¹³ Pueyasoori ninishiquiji pa jayoquiaari, maja Sesaaca jiitianura socua pajaniya. Pa jiyatereeri cuhuashiqui quijiaca pa quiniuria, Neyanuniyojua jiitiasano pa quiniuria maninia cutara. ¹⁴ Tama Neyanu cusonutajaaja pa jiyanooriiri sesa pa miishanojiniji. Naacujitij, paari na pueyara jatanishaareeni.

Paari maninia quiya Pueyasotani, Cristo cusonuucua pa niti

¹⁵ Pueyasoori maja niquishano quiija. Cristo cutaraari niquishano. Nojuajaari mariyata juhua na Que Pueyaso. Nojuaja cutaraari coteenujuanaa quiquiaari Pueyaso shipiniyaquishacariija puetunu casaajanaa. ¹⁶ Na Que Pueyasoori na shipiniquiaari puetunu casaajanaa jiya cajiniocua, mijirianio; niquishano casaa, niquiyaquishoo casaanio. Naacujitij, Cristoori puetunu tamonu cumaacaraca quijiacajanaa shipiniquiaari tama nerajaaja. Nojori shipiniquiaariiri nojori jiitianura nera jiyocuacaanu casaa, jiyocuacaanu quijiacanio, mariyata mijiria casaa, mijiria quijiacanio. Nojuajaari puetunujuanaa shipiniquiaari. Tama nerajaaja na shipiniquiaariiri. ¹⁷ Puetunu shipinishano casaajanaa jaara shipinishoojua quiquiaari, Cristo cutaraari tari quiquiaari. Nojuajaari puetunu na shipinishanojuanaa cojuaa, maninia na quiniuria. ¹⁸ Cristoori Pueyaso muerasu Jiyaniijiajuhuaj, taa poojia quiya pa cuaqueya jiyaniijiacuaani. Puetunu Pueyaso muerasujuanaari juhua Cristo cuaqueya quiya, pa miiniuria na panishano mijiria. Nojuajaari juhua poojia. Nojuajaari pa samiitianijia, juhua na cuaqueya pa quishacari. Nojuajaari coteenu samiitiaquiaariuhua macujiniji, juhua Pueyaso jiyapueranu na quiniuria. Naacujitij, Cristoori coteenu quiija. Nojuajaari Jiyaniijiajuhuanajaj. ¹⁹ Pueyasoori paniquiaari Neyanu Cristo jiitianura puetunu tama na cumaacajanaa, juhua nojuaja na quiniuriajuhuaj. Naacujitij, Cristoori maja rimiajata quenaaja na quiniu na Quejiniji. ²⁰ Naajuhuj, Pueyasoori paniquiaari Cristo rupuetenuhuara nocua puetunu casaajanaa, maja socua tari juhua na paraa na quiniuria. Naaratej, Cristoori na Que Pueyaso jiyanootiquiaari puetunu casaajanaa tama na cusonutajaaja niyacutesanojinia. Na Que rupuetequiaariuhua puetunu casaajanaari, jiyocuacaanu casaa, mijiria casaanio.

²¹ Tariija, niaari Pueyaso paraa quiquiaari, juhua taanusano pueya Pueyasojiniji, sesa miijiaca nia quiniuucua. ²² Saniniuujia quiarijiani, Pueyasoori nia rupuetequiaariuhua nocua, Cristo cusonuucua pocuara, cuaqueyaraca na quishacari mijiria. Naacujitij, Pueyasoori na naata nia tiuquininiu nocua, tojetaarucujanaa jeequesano nia quishacari sesa nia miishanojiniji. Majaari niaacuara tonujusaanu quiniutianiya quenaaja sesa nia miishanojiniji. Majaari quenaaja shiitianiyojua sesa nia quiniu quiniutianiya na niquiara. ²³ Niaari naa quiniutianiya maninia, niaa jaara cumatia rupaquiaa Cristoocua, nocua nia tiuushacari, nioojia nia niquijioteyaquiniutia. Majaari nia niishiriojonu Pueyaso naasucuaari maja na miiniu quiniutianiya puetunu na sequesanojuanaa niaara, taa nia tojiquiaaricujani. Nia tojishano Pueyaso rupaacuajaari tari pohuatasaacanu puetunu jiyacajiniajanaa. Janiya, Pabloni, janiyari na pohuatanu naacutaajaniuhuj.

Pablo Pueyaso pueya maanu cumaquiniara jiyatesaaquiaari

²⁴ Cristoori naquiya miishaaquiaari pocuaji na tacunura. Juhua na cuaqueya pa quishacari, naquiya pa miiniu pa rejeretarejuhua na rupaa

pa pohuatasacari, puetunu na saquirojosano pueyajanaa tiuuniuria nocuajuhua. Naaratej, janiyari shuquiriaatia quiya niyani, naquiya cua miishacari niaacuara. Naa naquiya cua miishacari Cristojiniiji cua pohuatanuucua tiquiyocuatej, janiyari Cristo naquiya miiniu tucataa tama cua cuaqueyajiniaajani. ²⁵ Pueyasocujaari cua jiyatequiaari na saquirojosano pueya cua jitianura, cua cumaquiniuria niajaniya puetunu na rupaatajanaa. ²⁶ Cuno rupaari saaja Pueyaso jiyasohua niishishano quiquiaari tarijia. Majaari na pohuatanu quiquiaari supuetana pueya, tariucuacaanu quijiaca. Quiari naataja cutara, Pueyasoori jiyasohua na rupaa niishitiquiaari tama na saquirojosano pueyarajaaja. ²⁷ Pueyasoori pa niishitiniu paniquiaari taa jiyanhua shacantuuca na cumaaca quiya niajaninyarani, canapuate maja na saquirojosano Judiocuaca quiquiaaricujani. Niocujaari jiyasohua Pueyaso miiniu panishano tarijia: ¡Cristoori nioojiajinia quiya! Nia jiiiasacari Cristo, niaari niishiya niaari shacantuuca quijiaara jatanishaanutaniyajuhua.

²⁸ Naaratej, Cristocujaari canaa pohuatasano. Canaari puetunu pueyajanaa nacasuquiaani. Canaari nojori niishitiojoquiaani puetunu canaa niishishanotajanaa, maninia Pueyaso muerasu nojori quiniuria, juhua tojetaarucujanaa maninia canashitishano pueya, Cristo rupesano nojori quishacari. ²⁹ Naaratej, puetunu Cristo niqutiosano cumaacatajanaa jiyanhua poonijioquiaanijia, na cumaquishacari janiya.

2

¹ Pueyanaa, janiyari paniyani nia niishiniuria taa jiyanhua cua poonijioquiaa Pueyaso cua secojonuta niaacuarani, Pueyaso muerasuucua Laodicea tiacajiniajuhua, puetunu juhuanjuaja cua niquiyaquiniaa pueyacuaraajanaano. ² Jiyanhua secojoquiaa niaacuaranijia, nioojiaca cumaquishaanura, nioojiaca rupetoonura jatiqijijuhua, jiyanhua nia panitioosacari. Naajuhua, secojoquiaanijia maninia niishijiacara nia quiniuria, maninia nia niishiniuria tariucuacaanu Pueyaso niishishano tamajaaja, taa Neyanu seera maninia na miiniutianiya pajaniyani. ³ Neyanu Cristocujaari puetunu niishijiajanaa. Majaari tamonu niishijia quiniu juhua nojuaja. Jiyanhua maninia miiijia puetunu na niishishanotajanaari. ⁴ Janiyari nio sequeya niajaninyani, tamonu mariqui nia sapojoreeri najuhuaa tamaatia na pohuatasana. ⁵ Majaari cua quiniu quiquiaa niaata. Naajaa, cua sohuanuuri niaata quiquiaa. Nia shuquiritiaanijia, maninia jatiqui nia quishacari, mariyata seetanujanaa maninia nia tiuushacari Cristoocua, maja jatasano nia quiniuria.

⁶ Niaacuajaari pa Jiyaniijia Jesucristo masequiaari, nia jiyaniijia na quiniuria. Naaratej, pueyaracaanu maninia nia rupuerenoj, maninia nia quiniuria mijiria na cumaacata. ⁷ Maninia nia rupetoore Cristota, naatej, taa naana cumaatia nujuaacuaani, jaara tucamaaca nujuacaraca quiri. Naacujitij, majaari nia naata jatasano quiniu, maninia nia tiuushacari nocua, taa nia niishitiojosaaquiaricujani. Cunora, pueyaracaanu nia sequeriquia Pueyaso: “Paacarasho canaa Quena”.

Niaari quiarinio pueya, Cristo quishacari nioojiajinia

⁸ Tama nia cuaqueyajaaja nia cojuare, tamasaca mariqui nia sapojoreeri tamaatia nojori niishishanota najuhuanaj. Naa jaara nojori niishitiojosano tojtiri quia, niaari juhua nojori quioosano pueya quiniutianiya. Nojori niishishanoori maja Cristojini. Nojori niishishanoori saaja mijiria niishishano, supuetanaa pohuatasano najuhuanajuhuj.

⁹ Nocuaji saaja Cristo nia tojiri. Tama Cristo cutarajaari puetunu Pueyaso cumaacajanaa jitiata, puetunu na niishitiajanaano.

¹⁰ Naajuhuj, niaari Pueyaso cumaaca jitiata, na niishitiajanio, nia rupuesacari Cristo. Naacuajitij, niaari puetunu nia panishanojuanaa jitiata tari, maninia quijiaca nia quiniuria. Cristojuaari Jiyaniijajanaa. Cristo jaara na jiyarore, puetunu tamonu cumaacaraca quijiacajanaari na tojitiaa; jiyocuacaanu camarnu, mijiria camarnunio.

¹¹ Cristo nia rupuesacari, niaari seetanujuanaa jatanishaaree maja sesa nia quiniuria socua. Majaari nareja nia cararaatiuuquia co miatesaanu quiquiaari, taa Judiocuaca miiquiaacuaani. Nojoriiri miatesaquiata nojori niishiniuria nojori cuara quiriia saa Pueyasoraja, maja sesa mijia nojori quiniuria socua. Cuno, miatenuni, majaari pueyano na jataniniu sesa na miiniujini. Cristo cutaraari sesa niojia jataquiari, seetanujuanaa sesa nia quiniu jataaanura puetunujanaa.

¹² Puetunu sesa nia quiniujianaari juhua jamosaquiari Cristota, nia jaara moojinia tiuquiniujiosaare. Nia tohuatasacariuhua, niaari juhua samiitianishaarohua Cristota, Pueyaso cumaacacua nia tiushacari. Niaari samiitianishaarohua taa Pueyaso samiitianiquiaariuhua Cristocuaani.

¹³ Naaari juhua macu quiquiaari tarija, sesa miijiaca nia quishacarija, sesa jiuujiaraca nia quishacarijanio. Jiyacaritij, Pueyasoori nia samiitianiquiaari Cristota, na jiyanooshacari nijaniya puetunu sesa nia miishanojinijijianaa.

¹⁴ Pa tojiyaquishacari tariucuacaanu Pueyaso rootasano, paari puecoosoriquiano quiquiaari juucuan. Sesa pa miishanoori juhua naajiotasano quiquiaari Pueyasora. Pueyaso cutaraari sesa pa miishano naajiotasano tuujuquiaari puetunujanaa. Pueyasoori puetunu sesa pa miishanojuanaa tiutiaquiari Cristoocua. Cristo teetesacari niyacutesanojinia, puetunu sesa pa miishanojuanaari cuniqui puequequiari. Naa Cristo miishacari pocuaratej, majaari sesa pa miishano tiutiasaanu pocua.

¹⁵ Na cusosacari niyacutesanojinia, Cristoori puetunu tamasaca sesa cumaacaraca quijiacajanaa shocotaquiari. Nojori cumaaca jaariutiareeri. Nojori rerequetereeri, naatej, taa quioosano pueya jaatucunuusaaquiacaani, pueya niqiara macaatiishocoriquiano.

Saaja Pueyaso casaacua nia jiaatiariquia

¹⁶ Naaratej, majaari nia tojiniu noo pojori, canapuate nia tojitiniu saniniujia supuetana niishitiojosano cuajani. Nojoriiri najuhua niishitiojoquiaa casaa sumatuute puereshiyani, rusanonio. Nojoriiri niishitiojoquiaajuhuj teyano juucate poonijiaquishiyani, naajuhuj, Pueyaso niqiara pa queranacunuunura raca macura. Nojoriiri naa niishitiojonuuquiaa nojori jyanishacari paa jaara naa miyaquirini, Pueyaso mariqui pa saniitioreeri.

¹⁷ Puetunu cuno supuetanaa niishitiojosanojuanaari tariucuacaanu quiquiaari, miriqui na niishitiojonura pueya taate seetanujuanaa quiniutianiyan Niriqiano jaara tiuqiri. Cuno Niriqianocuaari Cristo. Tari tiuquiquiaariiri. Nojuajaari

pocujaji Tacuna. Naaratej, majaari socua pa tojiniu cuno miriqui niishitiojosano. Quiarijia saaja Cristo pa tojiri cutara. ¹⁸ Tama nia cuaqueyajaaja nia cojuare, tamonu niishitiojonaa mariqui nia sapojoreeri, niaa mariqui Pueyaso niqutionu panishano nijaniya maseyaquiriri. Nojoriiri tama na cuaqueyajaaja shuquiritiaquiaa na jiyanishacari nojori maja Pueyaso shocotaja na quiniu nojori secojosacari Pueyaso seya, maja Pueyasojuanaa. Nojoriiri tama na maquenujinia na niqishanoocujaja tiuujiaa, maja Pueyaso rupaacua. Naacuajitij, nojori tiuushacari tama na niishiriojosanoocujaja, nojoriiri seetanujuanaa pueya shocotajaca quiya. ¹⁹ Nojoriiri maja na rupuenu Cristo, juhua poojia Cristo quishacari, na cuaqueya pa quishacarijuhuaj. Paa jaara maninia rpuetesano quiri poojiatani, poojiaari maninia maashitiya puetunu pa cuaqueyajanaa, paa jaara maninia rpuetoonu quiya puetunu pa nucuhuatajanaani, pa cusorohuatanio. Pueyasoori naa pa maashitiniu panijajuhuj Cristota rpuetootesano pa quishacari.

²⁰ Niaari juhua tari cusoquiaari Cristota, maja socua juhua mijiria quijiaca nia quiniuria. ¿Macutucua taa supuetana rootasano tojirini? Maja na naata. ¿Nijaniyarijuhuaj? ¿Casaara nia tojitiaajaa cuno tariucuaacaanu rootasanoni? Niaari juhua nareja mijiria quiniaa quiyajaa, nia tojishacarijia cuno rootasano. ²¹ Supuetanaari naa piriyojoquiaaritij: “Maja pa quianu cuno. Maja pa miaquenu cunojuhuj. Maja cuno pa cooniu”. Pa supuetanaari naa sequejatej. ²² Naajaa, puetunu cuno pueresano casaajanaari saaja shaajeja pa seecojinia. Majaari poojia na miiniu sesa. Cuno tariucuaacaanu rootasanoori saaja tama pueya niishishanojuaja quiquiaari. ²³ Paa naasucuaari jiyaniyani cuno rootasanoori maninia quiya Pueyaso shuquiritianura pajaniya socua. ¿Paatucua socua maninia pueya quirini paa jaara casaa sumatuu puererene, naajuhuj, paa jaara naquiya miiri tama pa cuaqueyajaajani casaa pa puerenutani? Maja. Pa pueresacari casaa, cunoori najuhuaana Pueyasora. Cunoori maja na naacunu pajaniya sesa casaacua pa jiaatiaaquiniuria.

3

¹ Niaa jaara samiitianishaaquiaari Cristota, jiyocuacaanu Pueyaso jiiitiasanoocua nia jiaatiare, tee Cristo cajiya na Que Pueyaso miaquetajaracuajani. ² Pueyaso casaacua nia niishiriojore saaja, maja mijiria casaacua. ³ Puetunu tarijia sesa nia quiniujianaari tari juhua jamosaaquiaari, niaa jaara Cristo cusonu jiyatere tama nia nitijiaaja. Quiarijiani, niaari saminio quiya nia rupuesacari Pueyaso, Neyanu Cristota. Nojuacuajaari pa samiitianijia. Saniniuuja, juhuanujuaja maja niishishano taamueca quijiaca pa cuaqueya quiniutianiyani. ⁴ Cristo jaara muetarohua pocua mijiria, shacantuuca cumaacaraca quijia na quishacari, jiyacaritij, paari jatanishaanutaniyani shacantuuca cumaacaraca quijiaca pa quiniuria nata, juhua nojuajuhuj.

Maninia rootasano Pueyaso muerasura

⁵ Naaratej, nia cuaqueya cuara quiri juhua macu tama nia niquiarajaaja, nia cuaqueya nia ruuretanura na jiaatiasacari sesa miiniucua. Naaratej, maja nia numuetucunu nia camishoo maaji. Maja sesa nia miiniu niarta canuuta, niarta maajitianio. Nia cartere puetunu sesa miiniucua nia jiaatiasanojuanaa. Maja sesa casaacua nia jiaatianu. Maja puera casamiicua nia jiaatianu. Casaacua jiaatiajaari

juhua Pueyaso ruuretaja quiya, tama na jiitiasano casaacuaaja na tiuushacari juhua Pueyasoo cuaja. ⁶ Pueyasoori jiyano hua saniitionutaniya na tojiyashijiaca, canapuate naa sesa quiji acacuajani. ⁷ Pueyaso tojiyashijiaca nia quishacari tarijia, niaari naa sesa miijia quiquaari. ⁸ Quiarijiani, nia tarinitiare puetunu naa sesa nia quiniujianaa. Maja juaajia nia quiniu. Maja naseeca pueyano nia quiniu. Maja jiyano yashijia nia quiniu. Maja sesa miijia nia quiniu. Maja pueya sesacaja nia quiniu. Maja sacuaratia najuhuana nia niti taquiriocateja nia quiniu. ⁹ Maja nia cuaracashijiootonu. Niaari tari jatanishaa quiaari tarijia sesa nia quiniujiniji, sesa jiuujiaraca nia quishacarijia, sesa miniucua jitiinio nia quishacarijuhuaj. ¹⁰ Niaari quiarinio jiuujiaraca quijiaca tari. Quiarijiani, tama nia cuaqueyajaarijia tari jataa juhua nia Shipinina Pueyaso nia quiniuria, seetanujanaa Pueyaso niishijia nia quiniuria. ¹¹ Pueyaso jatanishano pueya pa quishacari quiarijiani, majaari tari rimiajata pa quiniu, paa jaara Judiocuaca quiyani, tamasaca pueyano; na cararaatiuuquia co miatesano pueya, miatesoo pueyano. Paa jaara tahue quiyani, juhua mococori, poonijiotasano pueya, camarnuuju pueyano, naajaa. Cristo pa rupuesacari, puetunu pajaniyajanaari mariyata na muerasu quiyani. Nojuajaari puetunu poojiajinia quiyajuhua.

¹² Pueyasoori nia saquiriojo quiaari saa maniniaja nia quiniuria nera. Niajanitari na panishano muerasu. Naaratej, pueyacu tاراajeja nia quiri. Maninia miijia nia quiri. Majaari nia jiyaniinu tama nia cuaqueyajaarijia socua maninia tamonujiniji. Maja juaajia nia quiniu. Jacaria pocuaja nia quiri. ¹³ Jacaria nacasutoojua nia quiri. Maninia nia jiyanoori cante sesa miirii niajanitari. Taa pa Jiyaniijia jiyanoo quiaari pajaniyacuaani, naa nia jiyanoootioorejuhuaj. ¹⁴ Seetanujanaa pueya panijiaca nia quiri juhuaj. Cunoori socua jiyano hua panishano. Panitiojuaca nia quishacari, puetunu nia miishanojanaari jiyano hua maninia quiniutianiya, jatiqui nia quiniuriajuhuaj. ¹⁵ Naajuhua, Pueyaso nia shanacure nioojia na cajitiniuria pueyaracaanu. Nojuacuaajari nia saquiriojo quiaari juhuajaniya quijiaca nia quiniuria, maninia rupuetootesano. Pueyaso muerasu cuara jatiqui poonijionuujuaca quiri, naatej, taa pa cuaqueyajiniacuma casaa puetunujuanaa jatiqui quiyacuaani. Majaari nia juaatiojonu. Naajuhua, Pueyaso nia shuquiritiare pueyaracaanu, puetunu maninia na miishanojinijijianaa niaara.

¹⁶ Nioojia cuara quiri mishaja Cristo rupaata, jiyano hua na tojiijia nia quiniuria. Pueyaso Rupaa nia niishitiojotoore nia jaaquequejosanota. Naa nia cumaquitiojore puetunu Cristo niishishanotajanaa. Naa jaaquequejonuure Pueyaso Rupaa naajiosanojiniji, pueya naajiosanojinijijuhua, Pueyaso Sohuanu niishitiojosano niajanitari. Naa nia jaaquequejore Pueyasora, nia shuquiritanuta nojuaja. ¹⁷ Jesucristocuaajari nia Jiyaniijia quiya. Naacujitij, niaari na sesaanucua. Naaratej, nia sequesano, nia miishanojuhuaj, puetunu cunujanaa cuara quiri maninia nera. Naa nia miiriquia pa Que Pueyaso nia sequenuta “paacarasho”, Neyanu cumaquiniucua niajanitari.

Maninia miijia pa quiri Pueyaso muerasu pa quishacari

¹⁸ Maajipohuanaa, nia niyaca tojitiajaca nia quiri. Pa Jiyaniijiaacua tiuujiaa cumaati naa miiquiaaquij. ¹⁹ Pueyanaa, nia niquiocua nia paniri. Majaari na juaaniu. ²⁰ Mueraasapuenaa, nia queya tojijiaa nia quiri, nia shuquiritiniuria pa Jiyaniijia. ²¹ Pueyanaa, maja nia juaatiniu nia niquiohua, nojori mariqui maninia miiniucuaaji pishiriiri, puera nia juaashacari nojori. ²² Poonitijosano pueyanaa, puetunu nia camarnu sequesanojuanaa nia tojiri. Maja na tojijia nia quiniu saaja na shootiasacari niajaniya, na shuquiritianura niajaniya. Majaari saaja na niquishacari nia poonijionu nia sapojonura nojuaja. Seetanujanaa maninia nia poonijiore pueyaracaanu nia puerenuta saniya nia camarnujuanaa Pueyaso. ²³ Puetunu nia miishanojuanaa nia miiri shitimia, juhua pa Jiyaniijia Cristora. Naa nia miiritij, maja juhua nareja pueyara. ²⁴ Maja nia niyajetanu, pa Jiyaniijiaari nia niquitionutaniya jiyocuacaanu niaara na jiiitasanojiniji. Mijiria camarnura nia poonijosacari, niaa cutaraari Cristora poonijiya. Nojuacuajaari nia camarnujuanaa. ²⁵ Pueyasoori sesa miijia saniitionutaniya cutara, sesa nojori miishanojiniji. Pueyasoori maja rimiajata saniniujujia. Mijiria camarucua, poonitijosano pueyano, naajaa, nojoriiri maja rimiajata Pueyasora.

4

¹ Camarucuaanaa, pueyaracaanu maninia nia miiriquia nia poonitijosano pueya. Majaari nojori nia miiniu sesa. Maja nia niyajetanu, niaari jiyocuacaanu Camarnuracajuhua.

² Pueyanaa, Pueyaso secojojua nia quiri pueyaracaanu. Nia secoriquia maninia nia niishiniutia. Pueyaracaanu Pueyaso nia secosacari, nia sequerenoj, “paacarasho”. ³ Naajuhuaaj, canaacuara nia secojore Pueyaso, nojuaja caara canaa pohuataniiria pueya niquiara na rupaa Cristojiniji. Majaari pueya niishiniu quiquiaari tarijia Pueyaso miiniu panishano pajaniyara Cristo seera. Cua pohuatanuucua Cristojiniji, cunora nujuatesano niya quiyanijia nio nujuatejojuajinia. ⁴ Pueyaso nia secojore cucuara, maninia cua pohuatanura Cristojiniji, pueya niishiniuria maninia cua pohuatasano, taa Pueyaso paniya cua pohuatanuracujani.

⁵ Maninia nia niishiriojore taa nia miiniutianiya noo pojorini, canapuetcuaja maja Pueyaso muerasuni. Maninia nia miiri nojori, mijiria nia quishacarijia. ⁶ Nia pocoojosacari nojoritia, maja najuhuaana nia pocuanu. Pueya nia cumaquiri nia sequesanta. Nia niishiriojore taa nia riucuanutaniya tamasa pueyani, nojori jaara nequesotariquia niajaniya Pueyasocua nia tiuuniujiniji.

Nata quiniaata Pablo saruhuatascari pueya, naajionu na puecanura

⁷ Pa panishano pa tarajanu Tiquicoori nia pohuatanutaniya janiyajiniji. Nojuacuajaari cua cumaquinia maninia. Nojuacuajaari cuarta Pueyaso seru, pa Jiyaniijiaara canaa poonijionura. ⁸ Niaacua na jiyaroyanijia na pohuatanura niajaniya taa canaa quiyani, naajuhuaaj, na cumanijianura niajaniya. ⁹ Pa panishano Onésimoori nata quianutaniyajuhuaaj. Nojuacuajaari niajanijajinijinio pueyano. Maninia poonijiojua Pueyasora. Nojoricuajaari nia pohuatanutaniya puetunu niiquijijianaa.

¹⁰ Aristarco, cuata nujuatesano pueyanoni, nojuajaari cua sequeya cua saruhuatanura niajaniya nera. Marcoori nia saruhuataajuhuaaj.

Nojuajaari Bernabé cuna. Niaacuajaari tari rootasaacanu Marcojiniji. Nojuaja jaara niaacua quiaare, niocua maninia na tiuquiniri na tiajinia. ¹¹ Jesu sesaanucua pueyanoori na saruhuataajuhuj. Na sesaari Justojuhuj. Saa nio pojorijia Judiocuacajinijinoori cuata poonijioquiaa Pueyasora, canaa niishitiojonura Cristojiniji pueya niquiara. Nojoriiri cua cumanijianaa quiquiaa. ¹² Epafasri nia saruhuataajuhuj. Nojuajaari Cristo seru niajanijajinijiojuhuj. Nojuajaari pueyaracaanu niaacuara secojoquiaa queraatia, jiyanoehua cumaatia Pueyasocua tiuujiaa nia quiniuria. Secojoquiaajaariuhua ritia Pueyaso tojjijiaa nia quiniuria, puetunu Pueyaso panishanojuanaa nia miiniuria maninia. ¹³ Seetanujuanaa, Epafasri jiyanoehua tacaquiaa niaacua, Laodicea tiacajinia quiniaa Pueyaso muerasuucujuhuj, Hierápolis tiacajinia Pueyaso muerasuucuanio. ¹⁴ Pa panishano naarajona Lucasri nia saruhuataa. Demas nia saruhuataajuhuj.

¹⁵ Canaara nia saruhuatere Laodicea tiacajinia quiniaa parta Pueyaso muerasu. Ninfas nia saruhuaterejuhuj, na tiajinia rerejonaa Pueyaso pueya maanujuhuj. ¹⁶ Niaa jaara nio naajione serojorecuaa nia rerejosacari, Laodicea tiacajinia nia jiyarotarejuhuj, cuaara serojosaaria Pueyaso pueya maanu niquiara tiijihuj. Naajuhuj, cua naajione Laodicea pueyacuara nia serojore, niaacua nojori jiyarotasacari Laodicea tiacajiniji. ¹⁷ Naa Arquipo nia sequere quiria: “Tama quia cuaqueyajaaja quia cojuare quia tucuatunura quia poonijosano pa Jiyaniijara. Nojuajaari quia jiyatequiaari nera poonijioriquiano”.

¹⁸ Janiyari Pabloni. Quiarijiani, tama cua juaashiquiatajaaja naajianijia saaja cua saruhuatunura niajanija. Nia niishiriquia, janiyari moronucua nujuatesano quiyani. Pueyaso cuaara cumaquiiria niajanija na cumaacata jiyanoehua. Tariucuaaja.

COTEENU PABLO NAAJIONEE TESALÓNICA TIACAJINIA QUINIAA PUEYASO PUEYACUARA

Pablo saruhuatascari Pueyaso pueya

¹ Janiyari Pabloni. Janiyari nio naajiya Tesalónica tiacajinia quiniaa Pueyaso pueya maanuucuarani. Niaacuajaari pa Que Pueyaso rupuejaca, pa Jiyaniijia Jesucristo rupuejacionio. Canaari mariyata nia saruhuataani, Silvano, Timoteonio. Pueyaso cuara maninia jitiiaara na cumaacata nijaniya, maninia nia quiniuria. Cuaara nioojia cajitiiriajuhuaj, juhuajaniya nia quiniuria.

Tesalónica pueyanaari Jesuucua tiuujica quiquiaari seetanujuanaa

² Maninia nia quiniucua, canaari pueyaracaanu Pueyaso sequequiaani, “paacarasho”. Canaa secojonuusacari, canaari pueyaracaanu niaacuara secojonuquiaani. ³ Pa Que Pueyaso canaa secojosacari, canaari pueyaracaanu niishiquiaa nijaniyani, taa pueyaracaanu nia poonijioquiaa Pueyasorani, Neyanuucua nia tiuuniucua. Canaari niishiquiaajuhuaaj taa nia paniniutia nia naacuquiaa niarta pueyani. Naajuhuaaj, niaari maninia rejeretaquiaa taraatia nia miiniu, nia niishiniucua pa Jiyaniijia Jesucristoori pocua niniutianihua. ⁴ Pueyaso panishano pueyanaa, canaacuajaari niishiyani, nojuajaari nia saquiriojoquiaari na panishano muerasu nia quiniuria. ⁵ Canaa jaara nia niqiara pohuataquiaari Pueyaso rupaa Jesucristojinijini, cunoori maja najuhuaa pohuatasano quiquiaari. Canaa pohuatasanoori jiyanhua Pueyaso cumaacaraca quiquiaari. Pueyaso Sohuanuuri jiyanhua poonijioriquiaa nioojiacajinia. Naacuajitij, niaari niishiquiaari canaa pohuatasanoori seetanu rupaaajanaa. Niaacuajaari niishiya taa quijiaca canaa quiquiaari canaa quishacari niaatani, maninia Pueyaso muerasu nia quiniuria.

⁶ Niaari canaacua jiaatiaquiaari, juhua canaa nia quiniuriajuhuaj, juhua pa Jiyaniijia Jesu nia quiniuriajuhuaj. Niaari seetanujuanaa naa miijacara quiquiaari, Pueyaso tojjijaca nia quiniuriajuhuaj taa canaacuaani. Pueyaso rupaa nia tojjishacari, niaari jiyanhua na timitiaquiaari. Cunora, niaari jiyanhua naquiya miishaaquiaari. Naajaa, Pueyaso Sohuanuuri nia cumaquiquiaari saaja, shuquiriaatia nia quiniuria. ⁷ Naa shuquiriaatia Pueyaso tojjijaca nia quiniuucuatej, niaari niarta Pueyaso pueya shiniujuquiaari, seetanujuanaa Pueyaso tojjijaca nojori quiniuriajuhuaj. Niaari naa shiniujuquiaari puetunu niarta Pueyaso pueyanaa Macedonia jiyajinia quiniaatej, Acaya jiyajinia quiniaanio. ⁸ Pa Jiyaniijia rupaari nijaniyajiniji tucuaaanu paaquequiaari, maja saaja Macedonia jiyajinia, Acaya jiyajinianio. Cuno rupaari puetunu tiqiyocujanaa poojotasaaquiaari. Naacuajitij, puetunu tiqiyocua quijiaca pueyanaari tari niishiya taa Pueyasooocua tiuujica nia quiya seetanujuanaani. Naacuajitij, ¿canaatucua casaara niishitiojore Jesujiniji socuani, tee cuniqui pueya niishiya tari nojuajinjicua-jani? ⁹ Tee cuniqui canaa tiuquiquiaani, pueyari canaajiniji poojotanuya

tari, taa Jesujiniji canaa pahuataquiaaricuaaja nijaniyani. Nojoriiri niishiyajuhuaaj taa canaa nia tiuquinitiaquiaari maninia nia tiacajiniaqueyani, canaa pahuatasano nia tojiniuria. Naajuhuaaj, niaanaari pueya shipinijosano nia jiyatesano nia pueyasora cartequiaari, pueyaracaanu rishijia seetanu Pueyasojunaan tojitajaca nia quiniuria. ¹⁰ Naajuhuaaj, niaanaari Neyanu sashiya, jiyocuacaanuji na tiuquiniuhuaa, tevano Pueyaso samiitiani quiaariuhua macujinijicuaajani. Pueyari nijaniyajiniji niishiyajaacuhuaaj, Jesuuri pocuaji Tacuna, maja mani quiquiojinia pa quejoosaanura, Pueyaso saniitiosacari na tojitiaashijiaca.

2

Pablo niishitiosacariuhua pueya, taa na quiquiaari nojoritiani

¹ Cuarta Pueyaso pueyanaa, niaacuajaari niishiya, majaari najuhuaana canaa quiniu quiquiaari, niaata canaa quishacari. ² Niaacuajaari niishiya, Filipino tiacajinia canaa quishacari, niaacua canaa tiuquiyaquishacarijia, canaari cuno tiacajinia sesacasaquiaarini. Canaari jiyano hua taraatia miishaaquiaarijihuhuaaj. Naajuhuaaj, nia tiacajinia canaa tiuquijiosacari, pueyari canaa pahuatasano ruuretaquiaari saaja. Naajaa, Pueyasoori canaa cumaquiquiaari juhua jiuujiaaju canaa pahuatanura Jesucristojiniji nia niquiarajuhuaaj. ³ Canaacuajaari niishiquiaarini canaa pahuatasanoori seetanu rupaaanaa. Majaari canaa pahuatanu quiquiaari canaa miiniuria sesa nijaniya, canaa sapojonura nijaniyajuhuaaj. ⁴ Pueyasojunaanari canaacua tiuquiaari. Cunora, canaa jiyatequiaariiri Neyanujiniji pahuatanaa canaa quiniuria. Naacuajaari taa canaa poojotaquiaa pueya tiuuniuria nocuacuajani, Pueyaso jiyanooniuria nojori. Canaari seetanujunaan Pueyaso timitiniu paniyani, maja saaja pueya. Pueyasocuaajaari canaa jiuujia niishijia. ⁵ Niaacuajaari niishiyajuhuaaj, majaari canaa sapojonu quiquiaari nijaniya shanohua canaa sequesanota, canaa nia maniniucuanura. Naajuhuaaj, majaari canaa cuaracashijionu quiquiaari nijaniya, canaa nia niqutiojonura nia cumaneecajiniji. Pueyasoori na niishiyacuaja. ⁶ Majaari quenaaja canaa niishiriojonu quijia pueya timitiasano canaa quiniuria, nia timitiasano pueya canaa quiniuriajuhuaaj. Maja. ⁷ Canaacuajaari seetanujunaan nia jiyaniijianucuanu, Jesucristo jiyaramiquishano pueya canaa quiniucua. Naajaa, niaata canaa quishacari, majaari naa canaa miiniu quiquiaari nijaniya, juhua canaa seya nia quiniuria. Saniniuujia, canaari tojetaarucuaajanaa juhua naatujoori quiquiaarini, niaata canaa quishacari. Naatej, taa maaji jiiitia maninia necohuacuaani, canaari naa nia jiiitiaquiaarijihuhuaaj. ⁸ Jiyano hua canaa paniniucua nijaniya, majaari saaja Pueyaso rupaa canaa pahuatanu quiquiaari nijaniya. Canaa cutaraari tama canaa cuaqueyajaaja panitiaquiaari niaacuarani, naajaa, canaa cuara puecoosaariaqui. Canaari naa jiiitiaquiaari nijaniyani, jiyano hua canaa paniniucua nijaniya. ⁹ Cuarta Pueyaso pueyanaa, niaacuajaari niishiya taa canaa poonijioquiaari jiyano huani, tama canaa panishanojuaaja canaa masetajara. Canaari naa poonijionu quiaarini juuca, niucuanio, canaa pahuatanura Pueyaso rupaa nijaniya. Canaari naa miiquiaarini maja canaa taajetenura nijaniya canaa mashiniquijionuta nia cumaneeca.

¹⁰ Naacuaajitij cuarta Pueyaso pueyanaa, niajaniya, Pueyasojuhuaaj, niaacuajaari niishiya canaari saaja maninia miiquiaarini, niaata canaa quishacari. Majaari quenaaja canaa miiniu quiquiaari sesa. Naacuaajitij, tamasacaari maja na naata canacuara saquiriojotanu, canaa jaara tojetaarucujanaa sesa miyaquiquiaarini. ¹¹ Niaari niishiyajuhuaaj taa canaa shiniujuquiaari niajanianya Pueyaso nia tojinuria. Niaari niishiyajuhuaaj taa canaa cumanijiaquiaari puetunu niajanianyanani taraatia nia quishacari, naatej, taa pueyano miiquiaa na panishano niquiohuacuaani. ¹² Naajuhuaaj, canacuajaari jiyanoahua nia nacasuquiaarini maninia miijiacaa nia quiniuria juhua seetanujanaa Pueyaso pueya. Pueyasocuaajaari nia saquiriojoquiaari pueyaracaanu nata nia quiniuria, jiyaniijianucua nia quiniuriajuhuaaj, juhua nojuajuhuaaj. Nojuacuajaari na shacantuuca cumaacajinia quijia.

¹³ Canaa jaara Pueyaso rupaa pohuataquiaari nia niquiarani, maajaari nia jiyaniiniu quiquiaari cunoori saaja pueyajiniji canaa tojinuuushano. Maja. Niaari seetanujanaa na tojtiajacara quiquiaari, nia niishishacari cunoori seetanujanaa Pueyaso rupaa cutara. Canaari cunora canaa timiniutia sequequiaa Pueyasoni, “paacarasho”. Canaa pohuatasanoori seetanujanaa Pueyaso rupaa. Naacuaajitij, na rupaari nioojiajinia poonijioquiaa, maninia miijiacara na jataniniuria niajanianya, Jesuucua tiuujiaca nia quiniuucua. ¹⁴ Naa Jesucristoocua tiuujiaca nia quiniuucuatej, niarta pueyari nia miiquiaari naquiya, taa Judea jiyajinia parta Pueyaso pueya maapue miishaaquiaaricuaani. Tama narta Judiocuacajaari nia nojori miiquiaari naquiya, Jesucristo tojijiacaa nojori quiniuucua. ¹⁵ Nio cuarta Judiocuacani, nojori supuetanaajuhuaaj, nojoricuajaari pa Jiyaniijia Jesucristo motuquiaari. Nojori supuetanaari naa tariucuacaanu puecooquiaarijuhua Pueyaso sequesano caminiujunaa pueyatej. Naajuhuaaj, Jesuucua tiuyashijiacaa cuarta Judiocuacari canaa taanuquiaari canaa Judea jiyajiniji. ¿Cuno pojoritiiri Pueyaso timitiasano? ¡Maja! Cuno pojoricuajaari juhua puetunu mijiria quiniaa paraajanaa. ¹⁶ Naacuaajitij, canaa jaara taucuaca pohuatanu paniriquia Jesucristojinijini, Pueyaso pueyara nojori jiyatesaanurajuhuaaj, Judiocuacari canaa tenujuquiaa juucuani. Naacuaajitij, Pueyasora, sesa Judiocuaca miijosanoori tari tojetaarucujanaa puera. Cunora, Pueyasoori nojori saniitioquiaa jiyanoahua.

Pablo naquerejosacari juucua Tesalónica tiacajinia quiniaa Pueyaso pueyacuua

¹⁷ Cua panishano pueyanaa, canacuajaari rupaquijia nia shuricuajia quiaquiaariuhuaani. Jiyacari canaa niquiaquishacari niajanianya, naajaa, canacuajaari juhua niaata quiquiaaani, pueyaracaanu canaa niishiriosacari niajanianya, niaacuara canaa secojosacari. Canaari juucua jiyanoahua nia niquiniu paniriquiaani. ¹⁸ Cunora, canaari niaacua naquerejoquiaari juucuani. Janiyari niaacua naquerejonu pacutejoquiaarini. Satanásri canaa cushitioquiaari saajani. ¹⁹ ¿Janiyatucua casaara nia niquiniu paniyaquiririni? Niaacuajaari jiyanoahua cua timitiasano pueya. Pa Jiyaniijia Jesucristo tiuquishacariuhua, janianya niishiyani, nojuajaari canaa shuquiritianutanianya maninia na tojijiacaa nia quishacari canaa niishitiojonuucua na rupaa niajanianya. Pa Jiyaniijia pa quishacari, jiyacaritij, canaari jiyanoahua nia timitianutanianya, maninia na tojtiajacaa nia quiniuucua mijiria. ²⁰ Taaquiririni,

canaacuaajaari tari shuquiriaatia quiyani, maninia na tojitiajaca nia quiniuucua. Niaacuaajaari seetanujuanaa canaa timitiasano pueya.

3

¹ Naa jiyanoehua canaa niishiniu panishacari juucua niajanijajiniitij, majaari socua canaa sashiniu paniniu quiriquiaa. Cunora, canaari niishiriojoquiaarini, maniniacuaajaari canaa jateenura tamajaaja Atenas tiacajinia. ² Naacuaajitij, canaari saaja parta Pueyaso pueyano Timoteo jiyaroquiaari niaacuani. Nojuacuajaari jaarajaaja cuata poonijona Pueyasora, Jesucristojiniji canaa pohuatanura. Janiyari niaacua na jiyaroquiaarini na cumaquiniuria niajaniya, mariyata socua na shiniujuniuria niajaniya Jesuucua nia tiuuniuria saaja. ³ Na jiyaroquiaarini nia cumaquiniuria niajaniya maja quenaaja niquiriyatu niajanijajiniitij pishiniuria Pueyasocuaaji, naquiya nia miishacari. Niaacuaajaari tari niishiquiaari, paari naquiya miishiyani Jesucristoocua pa tiuuniuucua. ⁴ Canaa quishacari niaataja, canaacuaajaari tari nia numootequiaarini, puetunu pajaniyajanaari naquiya miishaanutaniyani Jesucristo tojitiajaca pa quiniuucua. Niaacuaajaari niishiya, seetanujuanaa naa tohuatecanuuri cua sequesano. ⁵ Cua niishishacari niajanijajiniitij, niaanaari naquiya miishaaquiaa, janiyari puereriquiaani Sesaaca naasucua nia miitiriucuaa sesa. Jaara naa quiriritij, puetunu canaa miishanojuanaa niaara maara najuhuana quiquianu. Naa cua tacaashacaritij, majaari socua cua tarishiniu paniniu quiquianu, niajanijajiniitij cua niishiniuria. Cunora, janiyari ritia jiyarocanu niaacua Timoteoni, saniniujia nojuaja pohuatanuhuara janiya, niaate Jesuucua tiuyajaa.

⁶ Timoteocuaajaari tari niajanijajiniitij tiuquiriohuacuaa. Nojuajaari canaa pohuatasuhuacuaa, niaanaari Jesuucua tiuyajaa. Niaanaari panitioojuaca quiyajaa. Canaa pohuatasuhuacuaajaariuhuj, niaanaari canaa niishiriojoquiaa jiyanoehua nia paniniutia canaa. Niaanaari canaa niquiniuucua jiaatiaa, naatej, taa canaa jiaatiaa canaa niquiniuria niajanijajiniitij. ⁷ Cuarta Pueyaso pueyanaa, seetanujuanaa canaari taraatia miishiya niyani. Canaari tacayajuhuj. Naajaa, canaa niishishacari niaanaari seetanujuanaa Jesuucua tiuyajaa, canaari canaa jiuujia cajitiriucuaani. ⁸ Naa canaa tojishacari niaacuaajitij, canaari juhua samiitiacorohuani, pa Jiyaniijia tojitiajaca nia quiniuucuaaja. ⁹ Cunora, canaari jiyanoehua nia shuquiritiaa Pueyaso niquiarani. Naacuaajitij, majaari canaa niishiniu taate canaa naata sequenu nojuajani "paacarasho". Naa maninia nia quiniuucuatej, canaari jiyanoehua shuquiriaatia quiyani. ¹⁰ Naajuhuj, canaari juuca, niucua secojoquiaa Pueyasoni, nojuaja cuara canaa tiuquitihuara niaacua. Canaari maninia nia niishitiojonu tucuatanu paniyani, seetanujuanaa maninia jeenucuasano Pueyaso pueya nia quiniuria.

¹¹ Canaari paniyani pa Que Pueyasojuanaa, pa Jiyaniijia Jesucristonio, nojori cuara canaa naacuura niaacua canaa tiuquiniuria. ¹² Pa Jiyaniijia cuara nia jiyateera socua jiyanoehua panitioojuaca nia quiniuria, tamasa panijaca nia quiniuriajuhuaj, taa canaa paniya niajanijajiniitij. ¹³ Naa panijaca na jiyatesacari niajanijatej, niaari niojia niquijioteyashijaca quiniutianiya cutara. Naajuhuj, niaari toje-

taarucuajanaa sesa miyashijiaca quiniutianiya, pa Jiyaniijia Jesucristo tiuquishacariuhua puetunu na jiyanooshano pueyatajanaa.

4

Taate pa naata Pueyaso shuquiritiniuni

¹ Quiarijiani cuarta Pueyaso pueyanaa, pa Jiyaniijia Jesu jiyaramiquishano pueya canaa quiniuucua, canaa sequesano nia tojiri. Quiarijiani, canaari nia shiniujiyani socua maninia miijiaca nia quiniuria. Canaari nia niishitiojoquiaari maninia miijiaca nia quiniuriani, Pueyaso nia shuquiritiniuria. Niaacuajaari naa maninia miya.

² Niaacuajaari canaa rootasano pa Jiyaniijia Jesujiniji niishiya tari. ³ Canaacuajaari nia rootaquiaarini, Pueyasoori nia panitiaa saaja nera nia quiniuria, tojetaarucuajanaa maninia jeequesano nia quiniuria sesa nia miishanojiniji. Majaari nia numuetucunu nia camishoo maaji. ⁴ Puetunu mashiquiorijianaa cuaara niishiiria maninia na cojuanura necocuarano, maja ritia na numuetucunura, nata na camiyaquishacariija. Cuaara na cuaqueya panishano rejetenu niishiiria. ⁵ Majaari sacuaraatia nia miiniu taa Pueyaso niishiyashijiaca pueya miiquiaacuaani, jiyanoohua nojori jiaatiasacari maajiicua. ⁶ Naajuhuj, majaari quenaaja jiyasohuaja niarta pueyano niquiocua nia numuetucunu, neyaca nia sapojonuta. Cuno maajicuajaari saa neyacaraja, maja tamonura socua. Pueyasocuajaari naa miijiaca saniitionutaniya jiyanoohua, taa canaa numootequiaari tari nijaniyacujani. ⁷ Pueyasoori maja na saquiriojonu quiquiaari pajaniya sacuaraatia miijiaca pa quiniuria. Pa saquiriojoquiaariiri tojetaarucuajanaa sesa miyashijiaca pa quiniuria, saa neraja. ⁸ Naacuajitij, cante nio rootasano ruuretajani, nojuajaari maja saaja na rerequetenu nio rootasanojiniji pohuatana. Nojuajaari Pueyasajuanaa rerequeteya cutara, cante na Sohuanu niqutioquiaari nijaniyacujani.

⁹ Quiarijiani cuarta Pueyaso pueyanaa, janiyara, najuhuanaruhua niaacuara cua naajionura cua niishitiniuria nijaniya, panitiojuaca nia quiniuria. Pueyasocuajaari tari nioojiajinia nia niishitioquiaari panitiojuaca nia quiniuria. ¹⁰ Niaacuajaari seetanujuanaa puetunu Macedonia jiyajinia niarta Pueyaso pueya panijiaca quiyacuaja. Naa-jaa, cuarta Pueyaso pueyanaa, canaa nia tojiri. ¡Socua panijiaca nia quiri! ¹¹ Tama nia cuaqueyajaaja nia cumaquiriquia juhuajaniya quijiaca nia quiniuria. Tama nia poonijosanojiniajaaja nia cojeriquia, tama nia juaashiquiatajaaja nia poonijosacari, taa canaa rootaquiaari nijaniyacujani. ¹² Naacuajitij, Pueyaso niishiyashijiaca pueyari nia rerequeteyaquiniutianiya. Naajuhuj, niari puetunu nia panishanojuanaa jitianutaniya.

Taa pa Jiyaniijia tiuquishacariuhua quiniutianiyani

¹³ Cuarta Pueyaso pueyanaa, canaari juhuacariija nia tonu paniyani taa Jesuucua tiuujica shaajecono pueya miishaanutaniyani. Canaari nia niishitiniu paniyani maja nia taraajenura juhua Jesuucua tiuyashijiaca pueya. Nojoriiri maja na jitianu nojori Jiyano, nojori na samitianijionuhua. ¹⁴ Paacuajaari niishiyani Jesuuri cusoquiaari. Na nuhuaji samiitiaquiaariuhuari. Naajuhuj, paari niishiyani, Pueyasoori Jesuucua tiuujica shaajecono pueya samiitianijionutaniuhua, nojori na rijionura Jesuta, Jesu tiuquishacariuhua.

¹⁵ Canaajanaacuaajaari nia sequeyani, niocuajaari pa Jiyaniijia niishitishano canaa: pajaniya, canapueete pa Jiyaniijia tiuquishacariuhua saminiucua quiniutianiyajaani, majaari macunucua pa puetanu quiniutianiya pa Jiyaniijia pa naacuneetonura jiya cajiniocua. ¹⁶ Naa quiniutianiyari. Pa Jiyaniijia nacanuuuri tojishaanutaniya, Pueyaso seya jiyaniijia nacanujuhua, Pueyaso trompeta jonenenunio. Jiyacaritij, pa Jiyaniijiajanaari jiyocuacaanuji rosenutaniya cohuaja najacajiniara. Jiyacarijuhuaj, puetunujuanaa Jesuucua tiuujiaa shaajecono pueyari samiitiaconutaniuhua coteenu. ¹⁷ Na nuhuaji pajaniya, canapueete saminiucua quiyajaani, paari nojoritia ritia rijiosaanutaniya cohuaja najacajiniarani. Paari tii coquetonutaniya pa Jiyaniijiaata paratujiniani. Jiyacaritij, paari tari pueyaracaanu nata quijiacarano quiniutianiyani. ¹⁸ Cua panishano pueyanaa, nio cua pohuatasanota nia cumaniijia-tooriquia.

5

¹ Majaruhua maninia cua naajionura niaacuara cua niishitiniuria nijaniya socua, taacari pa Jiyaniijia tiuquiniutianihuanu. Niaacuaajaari tari na niishiya, naajuhua, taate mijiria quiniutianiyani na tiuquiyaquishacarijia. ² Niaacuaajaari maninia niishiya, pueya jyanishacari juhuanajuaja maja pa Jiyaniijia tiuquiniu quiniutianihua, nojuajaari jiyacari tiuquiniutianiya. Nojuajaari canashiyaquiji tiuquiniutianiya, taa nohuasejojua tiuquiquiaa niucua tiajiniaacocuaani, juhuaniani tia camaru maquesacari. ³ Naajuhua, quera pa Jiyaniijia tiuquishacariuhua, mijiria quiniaa pueyari naa sequejaca quiniutianiya: “Paacuaja maninia quiyani. Shaaquicuaja miaquetojonu”. Canashiyaquiji jiyacari, Pueyaso saniitiosacari na tojiyashijiacaari quiniutianiya. Naa quiniutianiyari taa maaji nooquiaa juhuacatecara canashiyaquiji na manajacuaani. Majaari quenaaja niquiriyatu curosaanu quiniutianiya saniitiosoo. ⁴ Nijaniya saniniuuja cuarta Pueyaso pueyanaa, niari maja juhua ninishiqui quijiaa, pa Jiyaniijia cariyatunura nijaniya. ⁵ Puetunu nijaniyajanaacuaajaari cuhuashiqui quijiaa. Pueyasojuaacuaajaari nioojiaa cuhuataquiaari. Majaari tari juhua ninishiqui quijiaa pueya pa quiniu. ⁶ Cunora, pa Jiyaniijia sashijiaca pa quirij. Maja juhua tamasaaja, juhuaniani quiquioyari. Nojoriiri juhua maquetiuya. Pajaniya saniniuuja cuarta Pueyaso pueyanaa, juhua sutejaca pa quirij, maninia niishiriojojuacajuhua. ⁷ Maquetujuacaari niucua maquetuquiaa. Naajuhua, mashaasequenujuacaari niucua mashaasequenuquiaa. Naa miijiaacari Pueyaso tojiyashijiaca. Majaari na maniniucuanu cuhuashiqui. ⁸ Pajaniya saniniuuja, paari cuhuashiqui quijiaa cutarani. Naaratej, pueyaracaanu maninia niishiriojojuaca pa quirij. Romano pueya miaquetoosacari, nojoriiri turtuco cushiyonuuja, nocuaji na nujutajara cashi. Cumueeca casaa cushiyonuujaariuhua, na naca na cojuatajara. Naajuhua, naa poojia pa cojuare, saaja Jesuucua pa tiuuniutia, seetanujuanaa panijiaa pa quishacarijuhuaj. Seetanujuanaa pa niishiri, Pueyasoori pa saquiriojoquiaari na muerasu pa quiniuria pueyaracaanura. Naacuajitij, pocua pa niishitiaja cojuareni, maja poojia pa niqijiotenura najuhuanaj. Naacuajitij, Sesaacaari maja na naata shocotanu quiniutianiya pajaniya. ⁹ Pueyasoori maja na saquiriojonu quiquiaari pajaniya na

saniitiosocoriquiano. Pa saquiriojoquiaari cutaraari na jiyanooniuria pajaniya, na muerasu pa quiniuria, Neyanu Jesucristoocua tiuujiaa pa quishacari. ¹⁰ Neyanucuaajaari pocuara cusoquiaari, nata rishijiaa pa quiniuria pueyaracaanu. Naacuaajitij, naajaa, paa jaara cuso-yareni, paa jaara saminiio quiyajuhuaaj, pa Jiyaniijia tiuquishacariuhua, puetunu nocua tiuujiacajanaari pueyaracaanu saminiio quiniutianiya nata. ¹¹ Naaratej, pueyaracaanu nia cumaquitioojoriquia Pueyaso ru-paata. Nia shiniujiutiooriquiajuhuaaj, seetanujuanaa pa Jiyaniijia tojjia-aca nia quiniuria, taa nia miiquiaacuaja tarini.

Socua Pablo rootasacari Pueyaso pueya

¹² Cuarta Pueyaso pueyanaa, canaa nia tojiri. Cuniqúi nia jiiitanaa to-jijiaa nia quiri. Majaari nojori rerequetenu. Nojoriiri jiyanohua poonijioquiaa pa Jiyaniijiaara nojori niishitiojonura niajaniya, na nacasunura niajanijajuhuaaj. ¹³ Cunora, jiyanohua nojori nia paniri. Majaari na rerequetenu. Nojoriiri pa Jiyaniijiaara poonijioquiaa na cumaquiniuria niajaniya. Maninia nia quiri pueyanaa. Majaari juayonuujutanu.

¹⁴ Nio nia tojirijuhuaaj cuarta Pueyaso pueyanaa. Taajecori nia naca-sure. Noojia niquijiojetejaca nia shiniujiuri, seetanujuanaa cumueeca Pueyaso pueya nojori quiniuria. Noo pojori nia cumaquiriquiajuhuaaj, Satanás saniniujiushacari na cuaqueya miiniu panishano rejeretaashijia-atej. Majaari cuno pojori cartenu. Nia juaaniu nia rejeteriquia, maja quenaaja nia juaaniuria tamasacata.

¹⁵ Naajuhuaaj, tama nia cuaqueyajaaja nia cojuariquia maja nia naminiuria niarta pueyano, nojuaja jaara sesa miiriquia niajaniya. Saniniujia, pueyaracaanu maninia nia miitiooriquia niarta Pueyaso pueyata. Naa nia miiriquia puetunu pueyajuhuaaj.

¹⁶ Pueyaracaanu nia shuquiririquia, Pueyaso pueya nia quiniucua. ¹⁷ Naajuhuaaj, pueyaracaanu nia secojoriquia Pueyaso. ¹⁸ Niaa jaara maninia miishaare, niaa jaara sesa miishaarejuhuaaj, naajaa, puetunu naa nia miishaanuucujanaa Pueyaso nia sequeriquia, “paacarasho”. Pueyasojuanaacuajaari naa paniya pa miiniuria, Jesucristo Sohuanu pa jiiitanuucua poojiajinia. ¹⁹ Majaari Pueyaso Sohuanu nia ruuret-anu, nojuaja jaara nioojiajinia nia shiniujiya maninia nia miiniuria. ²⁰ Naajuhuaaj, majaari nia soonu Pueyaso sequesano caminiujiuniaa pohuatasano. ²¹ Coteenu nia saniniujiuri cutara, nia niishiniuria see-tanutejanaa nojori pohuatasano. Teyano nojori pohuatasanojinijioote maniniani, cuno tojjiaa nia quiri. ²² Puetunu sesa niishishano casaa-janaa soojeaca nia quiri.

²³ Poojia cajitinia Pueyasojuanaa cuaara nia jeenucuaara juhuacarijia, tojetaarucujanaa sesa miyashijiaa nia quiniuria pa Jiyaniijiaacuaji. Nojuaja cuaara naa cojuara nia sohuanu, nioojia, nia cuaqueyano, tojetaarucujanaa soosoo nia quiniuria pa Jiyaniijia Jesucristo cuaara tiuquiriohuajaatijia. ²⁴ Cante nia saquiriojoquiaaricuaja na pueya nia quiniuriani, nojuajaari puetunu shusha cua sequesanojuanaa niajaniya miiniutianiya niaara. Nojuajaari maja na niishiniu na rupaa jatanu. Nojuaja cutaraari na sequesano miijia pueyaracaanu.

Pablo sequesano na naajione na tucuatasaacari

²⁵ Cuarta Pueyaso pueyanaa, Pueyaso nia secojonuuriquia canaacuarajuhuaaj.

²⁶ Canaara nia saruhuatare cuniqui quiniaa parta Pueyaso pueyaju-
juhua nojori nia nujuunuta, seetanujuanaa Pueyaso paniniutia.

²⁷ Pa Jiyaniijia jiyaramiquishano cua quiniuucua, cua tojitiare
pueyanaa. Nio cua naajionee nia serojore puetunu Pueyaso
pueyarajanaa.

²⁸ Pa Jiyaniijia Jesucristo cuaara cumaquiiria nioojia. Cuaara naa
quiiriatej.

TANEE PABLO NAAJIONEE TESALÓNICA TIACAJINIA QUINIAA PUEYASO PUEYACUARA

Pablo saruhuatasacari Jesucristoocua tiuujiaa

¹ Janiyari Pablóni. Silvano, Timoteonio, canaari nio naajiya niaacuarani, puetunu Tesalónica tiacajinia quiniaa parta Pueyaso pueyarajanaa. Nio naajioneeri niaara, canapueete pa Que Pueyaso rupuejacacuajani, pa Jiyaniijia Jesucristo rupuejancano. ² Pa Que Pueyaso, pa Jiyaniijia Jesucristojuhuaaj, nojori cuara nioojia cumaquiiria. Cuaara nia jiyateera juhuaajaniya quijiacarajuhuaaj.

Pueyasoori na tojitianu paniyashijiaca saniitioriquiano Jesucristo tiuquishacariuhua

³ Cuarta Pueyaso pueyanaa, canaari jiyanoehua nia timitiaani jiyanoehua Pueyasooocua tiuujiaa nia quiniuucua socua, panitioojuaa nia quiniuucua socuajuhuaaj. Cunora, canaa secojosacari Pueyaso, canaari pueyaracaanu na sequequiaani, “paacarasho”. ⁴ Naa maninia nia quiniuucuatej, canaari shuquiriaatia poojotaquiaa niajanijajiniijia Pueyaso pueya maapue niquiara tamaquiicua canaa rucuanesacari. Canaari nojori poojotaquiaani taa nia rejeretaquiaa juhuaajaniya naquiya nia miiniuni, taraatia nia miiniujihuaaj, Pueyasooocua tiuujiaa nia quiniuucua. ⁵ Pueyaso saquiriojonuucua niajanijia pueyaracaanu shuquiriaatia quijiaa nia quiniuria na shuriucua, cunoori maja najuhuaana quiquiaari. Niaacuajaari seetanujanaa na pueya. Cunoori maatia niishishiyacuaja juhuaajaniya nia rejeretasacari naquiya nia miiniu, Pueyasooocua nia tiuuniuucua. Pueyaso niishiyashijiaca pueyari naa naquiya miiquiaa niajanijatej, Jesucristoocua tiuujiaa nia quiniuucua.

⁶ Naajaa, Pueyasocujaari tojetaarucujanaa sesa miyashijia. Nojuajaari niaacua naminiutianiya noo pojori, naquiya miitiaajaca niajanijatej. ⁷ Niajanijia saniniuuja, naquiya miijiosaaquiaarini, niaari canaata samaraatasanutaniyajuhuaaj, Jesucristo tiuquishacariuhua pocua. Jiyacariitij, nojuajaari niquishaanutaniya mani rimi-anuqueyano tiuquitiuhuaano, jiyanoehua cumaacaraca na seyata jiyocuaaanuji. ⁸ Tiuquiniutianihuari na saniitionura noo pojori, canapueete Pueyaso niishiniu paniyaquiquiaani, noo pojorijihuaaj, pa Jiyaniijia Jesu rupaa ruuretajacatej. ⁹ Puetunu cuno pojorijianaari pueyaracaanu saniitiosocoriquiano jiyatesaanutaniya. Nojoriiri tucuaaanura quejoosanutaniya pa Jiyaniijia shuriucuaaji. Naacuaajitij, majaari nojori niquiniu quiniutianiya na jiquioco, shacantuuca na cumaacano, nojuaja jaara mijiria tiuquirioehua pa shuquiritianura nojuaja. ¹⁰ Jiyacariitij, puetunu na jeenucuasano pueyajanaari jiyanoehua na timitianutaniya. Puetunu nocua tiuujiaa pueyajanaari jiyanoehua jiuujiateconutaniya, pa Jiyaniijia na shootiatasacari. Niaari na niquiniutianiya-juhuaaj, nojuajiniijia canaa pohuatasanoocua nia tiuuniuucua.

¹¹ Canaari cunora pueyaracaanu niaacuara secojoquiaa Pueyasoni, maninia na pueya nia quiniuria, maja nojuaja caririqiniuria na

saquirojONUUCUA nIajaniya. Canaari nIaacuara secojoquiaaaniuhUaj, Pueyaso cuaara nIa tucuataniiria na cumaacata puetunu maninia casaa nIa miiniu panishanojuanaa. Cuaara nIa tucuataniiriajuhua puetunu nIa miishanojuanaa, cuno, PueyasooCua nIa tiuuniutia nIa poonijiosanoni. ¹² Naacuaajitij, pa Jiyaniijia Jesuuri socua timitiasaanutaniya naa nIa miiniuucua maninatej. NaajuhUaj, nojuajaari nIa timitianutaniyajuhUaj. Naa maninia quiniutianiyari pa Pueyaso pa Jiyaniijia Jesucristota na cumaquishacari nIajaniya.

2

Maatia pOHUATASANO, taate mijiria quiniutianiyani, pa Jiyaniijia tiuquishacariuhua

¹ Quiarijiani cuarta Pueyaso pueyanaa, socua nIa pOHUATAROHUACUARA pa Jiyaniijia tiuquiniujiniji, taa pa coquetoonutaniya natajaniuhUaj. ² Canaa sequesano nIajaniya nIa tojiri, pueyanaa. Majaari nIa niyajetanu tariucuacaanu canaa niishitijosano nIajaniya, nIa jiya-jeneyaquiniuucuaaji tamasaca sapojosacari nIajaniya. Majaari nIa shiri-iquiniu tamasaca jaara sequere nIajaniya: “Pueyaso Sohuanuuri cua niishitirii, pa Jiyaniijia tiuquishacariiri quiarijia”. Tamasaca jaara naa nIa pOHUATARE, majaari na sequesano tojiniu. NaajuhUaj, tamasaca jaara naajionuure tamajaaja, nIaara na jiyatesocoriquiano juhua canaa naajione, majaari nojori tojiniu. Nojoricuajaari nIa sapojiya. ³ Pueyanaa, majaari nIaacua nojori nIa shanacunu nojori sapojonura nIajaniya. Naa niishiri, pa Jiyaniijia tiuquiyaquishacariuhUaja, queraatia pueyari PueyasooCuaaji pishiniutaniya. JiyacarijiuhUaj, Pueyaso rootasano Ruretajajanaari supuenutaniya. Nojuacuajaari tariucua Pueyaso sanitiosocoriquiano na riuriotaca. ⁴ Nojuacuajaari Pueyaso paraca. Nojuajaari puetunu pueyajanaa tenujunutaniya maja nojori tojiniuria Pueyaso, pueya shipinijosano nojori pueyasohuara nojori tarinitianurajuhUaj. Nojuaja cutaraari tama na cuaqueyajaaja jiyatenutaniya juhua Pueyasora. Pueyaso Secojoua tiajinia cajiniutianiyari, Jiyaniijijajanaa cajitiujinia. Jiyacari sequenutaniyari: “Janiyacuaajaari Pueyasoni”.

⁵ Pueyanaa, ¿majateeri nio nIa niishiniucuaaja? Janiyacuajaari nojuajiniji nIa poojotajani nIaata cua quishacari. ⁶ NIIAA naasucuaari niishiyacuaja canteeri juhua na quiaajaani, maja juhuanouaja mijiria na miiniuria tama na panishanojuaja, Pueyaso paniyaquishacarijia. ⁷ Seetanujuanaa, Sesaaca cumaacaari tari mijiria poonijiya jiyasohuaja. Naajaa, Pueyaso paracaari juhuanouaja maja na naata muetanu, pueya niishiniuria nojuaja, na tenujuna cuaara niiquiji rishaarejaatijiaj. ⁸ Na tenujuna jaara rishaare niiquiji, jiyacaritij cuno sesaaca sequeeri muetanutaniya, jyanohua sesa na miiniuria. Naajaa, pa Jiyaniijia tiuquishacariuhua na shacantuuca cumaacajinia, nojuajaari cuno sesaaca seque monutaniya saaja na rupaata na nooniutia, na shaajanura puetunujanaa. ⁹ Cuno sesa miijia sequeeri muetanutaniya Satanás cumaquishacari nojuaja. Naacuaajitij, nojuajaari jyanohua cumaaca jiitianutaniya jiyajeneta casaa na miiniuria, pueya

jiuujiatenura nocuaji. Queraatia niishishoo casaa miiniutianiyajaari-
 uhuaj, pueya na sapojonura. ¹⁰ Nojuajaari puetunu tamaatia sesa mi-
 iniu niishishanojuanaa miiniutianiya na sapojonura noo pojori, cana-
 puete saniitiosocoriquiano pueyacuajani. Nojoriiri sapojosaanutaniya,
 Pueyaso Rupaa ruuretajaca nojori quiniuucua. Nojoriiri maja na to-
 jiniu paniniu quiquiaari seetanu rupaajanaa, Pueyaso jiyanooniuria no-
 jori. ¹¹ Naaratej, Pueyasoori nojori tarinitianutaniya nojori sapojosa-
 nura, nojori tiuuniuria seetanujuanaa sapojonuunuucua. ¹² Naacujitij,
 puetunu noo pojorijianaari saniitiosaanutaniya, canapuete seetanu ru-
 paacuajanaa tiuuniu paniyaquijiani, sesa miiniu maniniucuaajaca nojori
 quiniuucua.

Pueyaso muerasuranoori tariucuacaanujiniji saquiriojosano

¹³ Niajaniya saniniuujia, niaari pa Jiyaniijia panishano pueyacuaja.
 Jiya shipiniyaquishacarijia, niaacuajaari tariucua Pueyaso saquirio-
 josano pueya quiquiaari. Niaari Pueyaso pueyara quiquiaaricuaaja, na
 Sohuanu jataniniuucua niajaniya quiarinio pueya nia quiniuria, see-
 tanu rupaacuajanaa nia tiuuniuucua. Cunora, canaari pueyaracaanu
 Pueyaso sequequiaa niaacuarani, “paacarasho”. ¹⁴ Canaa pohuatasacari
 Pueyaso rupaa nia niquiara, niaari Jesucristoocua tiuququiaari. Naacua-
 jitij, Pueyasoori nia jiyatequiaari na pueya nia quiniuria, shacantuca
 quijiacara nia jatanishaanura, taa pa Jiyaniijia Jesucristo quiyacuani.

¹⁵ Naaratej cuarta Pueyaso pueyanaa, majaari nioojia nia niqijiotenu
 Pueyasocuaaji. Naajuhuj, nia numaama nia racatare canaa niishitio-
 josano niajaniya niaata canaa quishacari, canaa naajioneecajinia canaa
 rootasano niajaniyajuhuj. ¹⁶ Jiyanoojia pa Jiyaniijia Jesucristo quiniu-
 ucua, pa Que Pueyasojuhuaj, nojoriiri pa paniquiaa. Naajuhuj, poojia
 cajitiquiaa pueyaracaanuraari. Na rupaacua pa tiuutiquiaariiri, pa ni-
 ishiniuria paari jiyanojua maninia miishaanutaniya pueyaracaanuni.
¹⁷ Naajuhuj, nojori cuara nioojia shiniujiiria, maninia nojori tojtia-
 jaca nia quiniuria pueyaracaanu. Nojori cuara cumaquiiria niajaniya,
 tojetaarucuaajanaa maninia nia sequesano quiniuria, nia miishanonio.

3

Pueyaso rupaa pohuatanaacuara pa secojore

¹ Pueyanaa, socua nia sequerohuacuaraj. Canaacuara nia secojore,
 pa Jiyaniijia rupaa paaquetesaanura puetunu tiqiyocuajanaa. Nia
 secojorejuhuaj, cuno rupaa pueya tojishacari, nojori jatanishaanura,
 naatej, taa na jataniquiaari niajaniyacuaani. ² Canaacuara nia seco-
 jorejuhuaj, Pueyaso cojuanura canaa na tojyashijiaca pueyacuaji, maja
 nojori miiniuria sesa canaa. Niaacuajaari niishiya, puetunu pueya-
 janaari maja na tiuuniu Pueyasoocua. Cuno pojoricuajaari canaa para-
 caajiaca. ³ Naajaa, paacuajaari niishiyani pa Jiyaniijiacuajaari na se-
 quesano miiquiaa. Nojuacuajaari nia cumaquiniutianiya, maja nioojia
 nia niqijiotenura nocuaji. Sesaacaacuaji nia cojuanutaniyajaariuhuj.
⁴ Pa Jiyaniijiaacua canaa tiuushacari, majaari canaa taacanuunu niaa
 naasucuaari canaa rootasano tojtiaaquiniutianiya. Maja. Niaa naasu-
 cuaari na tojtiaacuaja. ⁵ Pa Jiyaniijia cuara niishitiiria nioojiajinia,
 panijia nia quiniuria taa Pueyaso paniyacuani. Naajuhuj, cuara
 nia niishitiiria naquiya miiniu rejeretajaca nia quiniuria, Jesucristo
 cumaquishacari niajaniya.

Poonijiojuaca pa quiri

⁶ Cuarta Pueyaso pueyanaa, pa Jiyaniijia Jesucristo jiyaramiquishano pueya canaa quiniuucua, canaa nia tojitiare. Majaari noo pojori nia rupenu: taajecoritij, noo pojorijihuahaj, canaa rootasano tojiyashijia-catej. ⁷ Niaacuajaari niishiya taa quijiaca canaa quiquiaari niaata canaa quishacarini. Naa quijiaca nia quirijihuahaj. Majaari canaa taajeyaca canaa matanu quijiani. ⁸ Majaari najuhuana canaa miaquenu quijia nia miaquesano. Canaa cutaraari pueyaracaanu canaa samareenuta poonijionuujuaca juucani, niucuanio. Canaari naa poonijionuuquiaarini canaa panishano canaa jiitianura, maja quenaaja canaa taajetenura nijaniya, maja nia tacaatianura canaajuhuj. ⁹ Pueyaso jiyaramiquishano pueya canaa quiniuucua, canaa naata quiquiaaricuajaari canaa panishano canaa mashiniquiniuria nijaniyajiniji. Naajaa, majaari naa canaa miiniu quiquiaari. Canaari tama canaa juaashiquiacatajaaja poonijioquiaarini, canaa niishitiojonura nijaniya, poonijionuujuaca nia quiniuria juhua canaajuhuj. ¹⁰ Canaa quishacari niaata jiyacarijihuhuj, canaari nio nia niishitiojoquiaarini: “Cante poonijionu paniyaquiyani, cuara miaqueteshiyaquiirijuhuj”. ¹¹ Canaari pohuatasaarucuaajaaniuhuj, noojiaqueya nijaniyajinijionaaari juhuanijaniya quiquiaa. Majanaari na poonijionuunu quiquiaa. Nojoriniaari noo pojori cushitiojoquiaa, poonijionuujuaca cutaratej. ¹² Pa Jiyaniijia Jesucristo jiyaramiquishano pueya canaa quiniuucua, canaari cuno taajecori sequeyani, nojori cuara poonijionuura, nojori panishano nojori jiitianura.

¹³ Cuarta Pueyaso pueyanaa, teyano nijaniyajinijiniote maninia miijiacacuaani, majaari maninia miiniu nia tarinitianu. ¹⁴ Saniniuujia, cante nio naajioneejinia canaa sequesano tojinu paniyaquiyani, nojuaja nia niishiri cantenononi. Majaari na rupenuroj, na caririquiniuria quenaaja. ¹⁵ Maja cutaraari nojuaja nia jiyatenu juhua nia paracara. Saaja nia nacasure cutara nojuaja, niarta Pueyaso pueyano na quiniuucua.

Pablo sequesano na naajio na tucuatascari

¹⁶ Poojia cajitijia pa Jiyaniijiani, nojuajanaa cuara nioojia cajitiiria pueyaracaanu, naajaa, niaa jaara taa miishaariquia. Pa Jiyaniijia cuara pueyaracaanu jiitiaara puetunu nijaniyajanaa.

¹⁷ Janiyari Pabloni. Cua saruhwatanura nijaniya, janiyari tama cua juaashiquiatajaaja nio naajiyani. Nia niquiri cua naajiosano, taamuecatenononi. Janiyari naa puetunu cua naajioneeajanaa tucuatatuaani, cua sesa cua naajionuta. ¹⁸ Pa Jiyaniijia Jesucristo cuara cumaquiiria puetunu nijaniyajanaa. Cuaara naa quiiriatej.

COTEENU PABLO NAAJIONEE TIMOTEOCUARA

Pablo saruhuatasacari Timoteo

¹ Janiyari Pablóni, Jesucristo jiyaramiquishano. Pa Jiyanoojia Pueyaso, pa Jiyaniijia Jesucristonio, nojoriiri nera poonijionara ca jiyatequiaari. Paari Jesucristoocua tiuujiacani, nojuaja jataniniuria pajaniya juhua nojuaja pa quiniuriajuhuaj. ² Timoteonaa, janiyari nio naajiya quiarani. Quiaari juhua quiyamura quiquiaari, Pueyaso pueyanora quia jatanuucua, quia niquiara cua pohuatasacari Pueyaso rupaa. Pa Que Pueyaso, pa Jiyaniijia Jesucristojuhua, nojori cuara cumaquiiria quiajaniya. Nojori cuara quiocua taraajeerajuhua. Nojori cuara pueyaracaanu quioojia cajitiiriajuhuaj.

Pablo sequesacari sesa niishitiojonuujuaa cuara sanaajasaaria

³ Janiya jaara Macedonia jiyajiniara quiaquiaarini, janiyacuaajaari quia sequequiaarini Éfeso tiacajiniaja quia jiyojenura. Janiyari naa quia sequequiaarini, quia tenujunura cuno pojori, najuhuna tamaatia niishitiojonuya pueyani. ⁴ Janiyari quia sequequiaarijuhuaj, nojori quia sequenura, maja nojori niishiriojonura najuhuna nojori supuetanaa pohuatanuusanojinia. Janiyari quia sequequiaarijuhuaj, maja nojori niishiriojonura nojori supuetanaa sesacajinia, cuno, najuhuna tucuyacuara naajionuutasanoni. Pueya niishiriojonuusacari pueyaracaanu cuno najuhuna casaajinia, nojoriiri cunoocua juayonuujutaquiaa saaja. Saniniuujia, nojori cuara Pueyaso rupacua niishiriojooora cutara. Nocua pa tiuushacari, paari cumaquishaanutaniyani Pueyasora pa poonijionura maninia.

⁵ Naa cua sequesacari Éfeso tiacajiniaja quia jiyojenuratej, janiyari quia sequenu paniriquiaani, pueya quia niishitiojonura panitioojuaca nojori quiniuria. Nojori cuara shitimia panitioojuaca quiriia, juhua jeequesano nojori jiuujia quishacari. Seetanujuanaa Pueyasooocua nojori tiuushacari, nojori cuara panitioora maja noojia macuhuajenuta sesa nojori miishanojiniji. ⁶ Noojiaqueya cuno pojorijinijinioori tari tarinitiacanu tojiniu nio maninia niishitiojosano. Nojoriiri cushitiquianu na pocoojonuucua, na nacojonuucua najuhuna tama nojori niishishanojinijiaaja. ⁷ Nojoriiri Moisés Rootasanojiniji niishitiojonaara quiniu paniya juucua. Majaari quenaaja nojori niishiniu tama nojori sequesanojuaaja, nojori shiniujiushacari pueya, pueya tojiniuria najuhuna capa nojori niishitiojosano.

⁸ Paacuaajaari niishiyani, Pueyaso rootasano Moisésni, cunoori maniniacuaja, paa jaara niishirini casaara naa Pueyaso rootaquiaari pa supuetanaani. ⁹ Paacuaajaari niishiyani, Moisés Rootasanoori maja na pueretenu maninia miijiaca pueya cutara. Pueyasoori maja na rootasano na niishitiniu quiquiaari maninia miijiacara. Na niishitiquiaari cutaraari na tojitiaashijiacara, tama na panishanojuaja miijiacara, Pueyaso soojeacarajuhua, sesa miijiacarano. Moisés Rootasanoori Pueyaso rerequetejacara, Pueyaso casaa rerequetejacarajuhua, noo pojorirajuhua, tama na que tacartaja monutej, na

nucuanio, pueya puecojuacarajuhua. ¹⁰ Moisés Rootasanoori na camishoo maajipohua numuetucunuujucara, maajishurihuara, na numuetucunuujucaranio. Moisés Rootasanoori pueya nohuasenuujucara juhua casami na niqutiojosocoriquiano tamasa seyara; sapojonuujucarajuhua; na sapojonuta na sequesano maatejaccaranio, nocua na tiuushaanura; puetunu noo pojoririajanaano, maninia niishitiojosano tojiyashijiatej. ¹¹ Cuno maninia niishitiojosanoni, cunocua-jaari cua pohuatasano Jesucristo rupaajiniji, pueya jatanura Pueyaso pueyara. Pueyasoori jyanohua maninia, cuno rupaa pohuatanara na jiyatenuucua janiya.

Pablo shuqiritiasacari Pueyaso, na rupaa pohuatanara na jiyatenuucua nojuaja

¹² Pa Jiyaniijia Jesucristoori cucua tiuquiaari nera cua poonijionura maninia. Cunora, na rupaa pohuatanara cua jiyatequiaari-iri. Nojuajaari cua cumaquiquiaa. Cunora, janiyari na sequequiaani, "paacarasho". ¹³ Tariucuaaanu, janiyari nocuara rimiaaqueja quiquiaari sacuaratiani. Janiyari naquiya na miiquiaarijuhuaj, nocua tiuujiaa cua miitiasacari. Janiyari jyanohua na paracaajia quiquiaarijuhuaj. Naajaa, Jesucristoori saaja cucua taraajequiaarini cua niishiyaquiniucua casaa cua miiriquiaani, nocua tiuyashijia cua quishacarijia. ¹⁴ Naa cucua na taraajenuucuatej, nojuajaari seetanujuanaa cua jyanooquiaari. Na jiyanooshacari janiya, nojuajaari cua jataniquiaari nocua tiuujia cua quiniuria, panijia cua quiniurijuhua.

¹⁵ Timoteonaa, nioori seetanujuanaa. Puetunu pueyajanaa cuaara niishiiria nio. Cua tojiri. Jesucristoori mijiria niquiaari na Que Pueyaso na jyanootiniuria sesa miijiaa. Janiyacuajaari tojetaarucujanaa cuno sesa miijiaa pueyajinijinio na jiyanooshanoni. ¹⁶ Janiyari naa jiyanooshaaquiaarini puetunu pueyajanaa niishiniuria taa jyanohua jyanootiote Jesucristoni, pueyaracaanu na rejeretanuucua cua juaani. Naa Jesucristo jyanooniucuaacuaa janiya, sesa miijiaa cua quishacarijiatej, Jesucristoocua tiuujiacarano cuaara niishiiria, nojoriiri na naata jiyanooshaanujuhua Jesucristoocua nojori tiuushacari. Naacuajitij, nojoricua pueyaracaanu quijiacara jiyatesaarejuhua. ¹⁷ Naa jyanootio pa Jiyaniijia quiniucuatej, nojuaja pa timitiare pueyaracaanu. Nojuajaari Jiyaniijiajuhuanajaj. Nojuajaari Pueyasocujaja, shaajeyashijia, namijiata niquiyaquishoo. ¡Jyanohua maniniaari pa Jiyaniijia! ¡Naa seetanujuanaari!

¹⁸ Timoteonaa, quiaacuajaari niishiya taa Pueyaso cumaquiquiaari quiajaniyacujani, nera quia poonijionura. Cunoori quiquiaari Pueyaso pueya jitianaa jaara caminiujuquiaari Pueyaso sequenu panishano quiaara, nera poonijiona quia quiniuria. Naacuajitij quianunaa, cua tojiri. Pueyaso cumaaca quia jittiasacari, quioojia quia cumaquiri maninia quia poonijionura Pueyasora. Seetanujuanaa juhua quiaquejojua pueyano quia quiri, senota samareyashijia. ¹⁹ Naa quia quiri Pueyaso rupaa quia pohuatasacari, seetanujuanaa na rupaacua tiuujia quia quishacari, seetanujuanaa na rupaa tojjia quia quishacarijuhuaj. Naa quijia quia quiritij, quioojia mariqui quia macuhajareeri quiaa jaara sesa miiriquia. Noojaqueya pueyari tari Pueyasocua tiuuniu tarinitiacanu nojori ruoretanuucua Pueyaso Sohuanu numotesacari

nojori jiuujiajinia, sesa nojori miishacari. ²⁰ Naa miitiuquianuuri Hime-neo, Alejandronio. Janiyari cunora Pueyaso secojorucuaani, Pueyaso cuaara nojori tarinitiaara Satanásra, Satanás miiniuria naquiya nojori. Naacujitij, nojori cuaara niishiiria maja socua sacuaraatia nojori rimi-aaquenura Pueyasocuara.

2

Secojonuunura niishitiojosano

¹ Cua tojiri Timoteonaa, niaa jaara Pueyaso secojonuuriquia, nia secojonuure puetunu pueyacuarajanaa. Nia panishano casaacuara nia secojoriquiajuhuaj. Naajuhuj, Pueyaso nia sequeriquia “paacarasho”, pueyaracaanu maninia na miiniuucua. ² Jiya jiyaniijianucuaacuara nia secojonuuriquiajuhuaj, puetunu pueya camarucuaacuara juhuaj. Nojoriicuara nia secojonuuriquia, juhuajaniya pa quiniuria panaatia, juhuajaniya pa tojiniuria Pueyaso, maninia pa quiniuria parta puey-atajuhuaj. ³ Pa Jiyanoojia Pueyasoori naa paniquiaa pa secojonu-ratej. Naa pa secojosano maniniucuaquiaari. ⁴ Nojuajaari paniya puetunu pueyajanaa tiuuniuria Neyanuucua, na pueyara nojori jatan-ishaanura, puetunu seetanu rupaajanaa niishijiaca nojori quiniuria-juhuaj. ⁵ Pa Que Pueyasoori niquiriyatujua. Majaari tamonu Pueyaso quiniu socua. Naajuhuj, niquiriyatujua pueyanoori quiya Pueyaso Jiyanootijia pueya. Nojuajaari Jesucristocuaaja. ⁶ Puetunu pueyajanaa quishacari saniitosocoriquiano, Jesucristoori tama na cuaqueyajaaja tarinitiaquiaari na mosaanura narta pueya niti. Naacujitij, na Que Pueyasoori na naata jiyanooni pajaniya saniniuujia. Quiarijiacuajaari Pueyaso panishacari Neyanujiniji pohuatasaanura pueya niquiara, nojori jiyanooshaanura. ⁷ Nio rupaa cua pohuatanurajuhuj, Pueyasojua-naari cua jiyatequiaari Jesucristojiniji pohuatana cua quiniuria. Cua jiyaramiquiquiaariiri taucuaca cua nishitiniuria Jesuucua nojori tiu-niuria, seetanu rupaajanaa nojori niishiniuriajuhuaj. Nio cua sequesanoori seetanujanaa. Majaari cua sapojonu.

⁸ Cunora, cua tojiri. Janiyari paniyani puetunu tiqiyocujanaa pueya secojonuunura Pueyaso. Jiyocuacaanu nojori shiitiosacari nojori juaashiquia nojori secojonura, nojori jiuujia cuaara quiiria jeequesano sesa nojori miishanojiniji. Naajuhuj, cuaara quiyacuiiria najiqitishano, maja sesa niishiriojonutajuhuj. ⁹ Naajuhuj, jani-yari paniyani maajipohua cuaara cushiyaquiiria puera maniniuquiya toqueya, narta maajipohua na shocotanura. Cuaara cushiyaqui-iria cararaatia niquishano toqueyajuhuj. Maniniacuajaari nojori maniniushiniuria. Sesa cutaraari nojori maniniushiniuria puera, pueya shootianura nojori. Nojori cuaara jiyaniyaquiiria nojoriiri seetanu-juanaa shanohua niquishano, nojori mucaca jeeecasano quishacari puera, nojori cushishacari orojiniji shipinishano casaanio. ¿Maajitiiri seetanujanaa shanohua niquishano maaji, na cushitianuucua queraa-tia cumaneecata masesano noturu shipinijosano sai tiujiau, queraatia cumaneecata masesano maniniuquiya toqueyano? Maja. ¹⁰ Nojori cuaara maniniucuaariquia cutara, maninia miijiaca maajipohua nojori quiniuucua. Nojori cuaara quiiria juhua noo maajipohuaja, cana-puetucuaaja tama nojori cuaqueyajaaja jiyatecanu Pueyasora na quini-uria seetanujanaani. ¹¹ Pueyaso rupaa niishitiojosacari, maajipohua

cuaara tojtiriqia sanaa, maja Pueyaso rupaa pohuatanaa na re-jetenuta. ¹² Maja cutaraari cua shanacunu maajipohua niishitiojonura Pueyaso rupaa pueya niqiaara. Naajuhuj, majaari cua shanacunu maajipohua jiyatesaanura narta Pueyaso pueya jiitiana na quiniuria. Nojori cuaara sanaa tojtiriqia cutara, narta Pueyaso pueya rere-josacari. ¹³ Quia niishiri Timoteonaa, casaara naa cua sequeyani. Pueyasocuaajaari coteenu Adán shipiniquiaari. Na nuhuaaji Adán niqio-rano Eva shipiniquiaariiri. ¹⁴ Quia niishirijuhuj, Soconurano jaara sapojoquiaari Evatej, majaari na sapojonu quiquiaari neyaca Adán. Eva cutaraari sapojosaaquiaari. Naacuajitij, na sapojosaanuucua, Evaari Pueyaso tojiyashijara quiquiaari. ¹⁵ Naaratej, maajipohua cuaara maninia canashitijooro necohua. Cuaara panijiaa quiirijuhuj. Cuaara maninia miijiaa quiirijuhuj, maninia niishiriojojuaca nojori quishacari. Naa maajipohua miishacarij, Pueyasoori nojori jiitianu-taniya maninia, Jesucristoocua tiuujiaca nojori quishacari.

3

Pueyaso pueya jiitianatucua taamueca pueyano quiriqiani

¹ Nio sequesanoori seetanujuanaa: cante Pueyaso pueya jiitanara quiniu paniyani, nojuajaari maninia poonijosano miiniuucua jiaa-tiaa. ² Naaratej, cante Pueyaso pueya jiitianani, nojuaja cuaara quiiria sesacasoo pueyano. Nojuaja cuaara quiiria saaja niquiriyatu maaji niyaca. Cuaara quiiria noojia niqijieteyashijia, maninia niishirio-jojuajuhuj, pueya rerequeteyaquishoonio. Cuaara quiiria maninia pueyano, rucojuaca pueya tiuquinitiaja na tiajina. Cuaara quiiria Pueyaso rupaa niishitiojojua maninia. ³ Naajuhuj, nojuaja cuaara quiyaquiiria mashaasequejoru. Cuaara quiyaquiiria ritia juaajia, pueya na piniuria. Cuaara quiiria pueya riuhuaneyashijia, pueya juaashacari nojuaja. Cuaara quiiria shiniquiajuhuj. Cuaara cumaneecaacua jiaa-tiaashijia quiirijuhuj. ⁴ Naajuhuj, nojuaja cuaara na tiajina quiniaa jiitiaja quiiria maninia. Cuaara necohua niishitiojojua quiiria manini-ajuhuj, tojtiajaca nojori quiniuria, pueya rerequeteyashijianio. ⁵ Naacuajitij, pueyano jaara maninia casaa necohua niishitiojiyashijia quiriqia, ¿maatucua taa maninia jiitiriqia Pueyaso pueya maanuni? ⁶ Naajuhuj, Pueyaso pueya maanu jiitiriqiano cuaara quiiria see-tanujuanaa Pueyaso tojijia pueyano cutara. Cuaara quiyaquiiria shusha Pueyasooocua tiuunio pueyano, nojuaja mariqui jiyaniiri nojuaja to-jishano pueyano cutara. Nojuaja jaara jiyaniiri nojuaja socua maninia pueyano narta Pueyaso pueyajiniji, nojuajaari cocuaatia miya taa Sa-tanás miiquiaaricuaani. Pueyaso panishano seru Satanás quishacarijia, nojuacuajaari taanusaaquiaari Pueyaso shuriucuaaji, na jiyanihacari nojuaja na naata na Jiyanijia Pueyaso shocotanu. ⁷ Naajuhuj, Pueyaso pueya maanu jiitiriqiano cuaara quiiria maninia miijia pueyano, Je-suucua tiyashijia pueya mariqui na sesacareeri maninia miyashijia na quishacari. Nojuaja jaara naa rerequetesano quirritij, nojuajaari juhua Sesaaca norijosano quiniutianiya. Naacuajitij, pueya tojiyaquis-hano quiniutianiyari.

Narta Pueyaso pueya naacunaatucua taamueca pueya quiriqiani

⁸ Naajuhuj, parta Pueyaso pueya naacuna cuaara quiiria tojishano pueya, rerequetesoo. Cuaara quiiria na sequesano miijiaa. Cuaara

quiyacquiria puera mashaca jereeca ratunuucua jiihinio. Cuaara quiria cumaneecaacua jiaatiaashijia, jiyasohuaja na nohuasejonura, na sapojonuta na masenurano. ⁹ Naajuhuaaj, nojori cuaara seetanujuanaa Pueyaso rupaa tojjijacia quiria, teyanooocua tiuujiaca pa quiyacuajani. Naacuajitij, nojori jaara naa miijiaca quiriritij, ¿nojoritiucua casaacua cararosaariquiani? ¹⁰ Cunora, pueya cuaara senota jiyateyaquishaaria Pueyaso pueya naacunaa nojori quiniuria. Cuaara coteenu maninia niishishiiria nojoriiri seetanujuanaa Pueyaso tojitiajaca. Nojori jaara maninia miijiaca pueya quiri, na nuhuaji cutara, nojori cuaara jiyatesaaria narta Pueyaso pueya naacunaa nojori quiniuria. ¹¹ Naajuhuaaj, Pueyaso pueya naacunaa niquiocohua cuaara quiria tojishano maa-jipohua, maja rimiaacatuajuri. Cuaara quiria niishiriojojuaca, na sequesano miijiaca pueyaracaanunio. ¹² Cante Pueyaso pueya naacunaani, nojori cuaara jiiitiaara saa niquiriyatu niquiocujaja. Cuaara quiria necohua niishitiojojua maninia casaa, na tojitiajaca necohua quiniuria. Naajuhuaaj, cuaara quiria maninia jiiitiaja na tiajinia quiniaa pueya. ¹³ Naacuajitij, Pueyaso pueya naacunaa jaara maninia poonijioquia na naacusacari narta Pueyaso pueya, nojoriiri seetanujuanaa pueya tojishano pueya quiniutianiya. Naajuhuaaj, nojoriiri socua jiyanohua Jesucristooocua tiuujiacara jatanutaniya, na puereyaquiniutia nojori poonijionura pa Jiyaniijiaara.

Jesucristojiniji Pueyaso niishitishano pueyani, paari nocua tiuujiacani

¹⁴⁻¹⁵ Timoteonaa, janiyari quiocua naquerejiyani. Naajaa, janiyari quiara naajiya nioni. Naacuajitij, janiya jaara tarishirini, janiyari paniyani juhuacarijia quia niishiniuria taa quijia quia quiniutianiya, Pueyaso pueya maanujinia quia quishacari. Pueyaso pueya maanucua-jaari pueyaracaanu rishijia Pueyaso quiquio. Na saquiriojosano pueya nojori quiniucua, nojoriiri na rupaa jiiitianaacujaja, nocuaji tacunaa-jaariuhuaaj. ¹⁶ Seetanujuanaa nocuaji jiuujiatesanoori Pueyaso niishitishano Jesucristojiniji pajaniya. Paari nio sequesanoocua tiuujiacani:

Pueyaso Niyanuuri pueyanora jataquiaari, na rupuenura pajaniya. Pueyaso Sohuanuuri pa niishitiquiaari, nojuajaari tojetaarucujanaa sesa miyashijia. Naajuhuaaj, Pueyaso seyacuajaari Jesu niquiquiaari na samiitiasacariuhua. Nojuajiniijiri pohu-atasaaquiaari Judiocua niquiara, taucua niquiarajuhuaaj. Pueyapueeri nocua tiuquiaari. Na Queeri na tacaniquiaariuhua Jiyaniijiajanaa na quiniuria.

4

Pueyaso Rupaa carteriquiano pueyajiniji pohuatasano

¹ Pueyaso Sohuanuuri maatia pa niishitiquiaa, nio pa quishacari nuhuaji noojiaqueya pueyari Pueyaso rupaa tarinitianutaniya tojinuu, tamaatia niishitiojosano nojori tojinuuucua. Nojoriiri seetanujuanaa sapojosaanutaniya naa nojori tojinuuucua samaruhua niishishano. ² Nojoriiri sapojonuujuaca pueya tojitiajacara quiniutianiya, noo pojori, sapuenu juhua maninia niquishano pueyatej. Cuno sapojonuujuacaari tariucua sesa miiniucua jiiitiquiono. Majaari tari na niishitiunio caririquiniu. ³ Cuno pojoriiri pueya niishitiojojua maja na caminiuria. Niishitiojonuuquiaajaariuhuaaj maja pueya miaquenura noojiaqueya miaquesanojuhuaaj, teyano Pueyaso shipiniquiaari Jesuucua

tiuujiacaracuajani, cante seetanu rupaajanaa niishijiacacuajani. Cuno miaquesanocuaajaari pa timitiasocoriquiano, Pueyaso pa sequenura, “paacarasho”. ⁴ Puetunu Pueyaso shipinishano casaajanaari maninia. Puetunu miaquesano casaajanaa cuaara puereyaquishaaria miaquenu, paa jaara coteenu nocuara Pueyaso sequereni, “paacarasho”. ⁵ Pueyaso rupaacua tiuujia pa quishacari, naacujitij, nocuara pa secojosacari, Pueyasoori na jiyatequiaa maninia na quiniuria pajaniyara.

Jesucristora poonijiona pueyanotucua taamueca pueyano quiriquiani

⁶ Pueyaracaanu parta Pueyaso pueya quia niishitiojoriquia nio cua rootasano quiajaniya. Naajuhujaj, pueyaracaanu tama quia cuaqueyajaaja quia cumaquiriquia Jesucristojiniji pa niishishano rupaata, tama Jesucristojuaaja rootasanotanio, taa quia tojiquiaacuajanoj. Quiaa jaara naa miijia quiritij, quiaari maninia poonijiona quiniutianiya Jesucristora.

⁷ Majaari najuhuana tariucuaaanu supuetanaa pohuatanuusano tojijia quia quiniu, najuhuana tama pueya niishishanojuaajano. Majaari cuno tojiniuucua quia cojenu najuhuanaj. Jiyanohua quia jiaatiare cutara, saaja Pueyaso tojijia quia quiniuria. Naa miiniu quia saniniujiuri jiyanohua, seetanujuanaa Pueyaso panijia quia quiniuria. ⁸ Pueyari queraatia casaa miiniu niishiya, cumueca pueya nojori quiniuria. Supuetanaari pueyaracaanu nanoojoquiaari na cuaqueya na jiyartuutenura, cumueca na quiniuria. Cunoori maniniacuaaja pa cuaqueyara, mijiria pa quishacari. Saniniuujia, socua jiyanohua maninia cutaraari Pueyaso panijia pa quiniuria seetanujuanaa. Cunoori jiyanohua maninia, mijiria pa quishacariria, Pueyaso shuriucua pa quishacaririjuhujaj. ⁹ Nio cua sequesanoori seetanujuanaa. Puetunu pueyajanaa cuaara na tojiiria. ¹⁰ Cunora, pueya jaara pa miitariquia, naajaa, paari jiyanohua poonijioquiaa pueya pa tojitiniuria Pueyaso rupaani. Majaari naa miiniu pa tarinitianu. Paacuaajaari niishiyani, paari pueyaracaanu rishijia Pueyasocua tiuyani. Nojuacuajaari puetunu pueyacuaji Tacunajanaa, canapue cutarate nocua tiuujiacacuajani.

¹¹ Nio cua sequesano quiajaniya quia niishitiojore pueya. Nojori quia nacasuriquia jiyanohua, na tojitianura quiajaniya. ¹² Majaari pueya shanacunu quiocua, nojori rerequetenura quiajaniya, mashaja quia quiniuucua. Saniya maninia quijia quia quiriquia cutara, pueya jiaatianura quiocua, juhua quiajaniya nojori quiniu paniniurijuhujaj. Naaratej, tama quia cuaqueyajaaja quia cojuare, taa quia pocuaani, taa quia quiyani. Naajuhujaj, seetanujuanaa panijia quia quiri, Pueyaso rupaacua tiuujiajuhujaj. Majaari rucujeejojua quia quiniu. Naa maninia miijia quia quiri, pueya jiaatianura quiocua. ¹³ Naacujitij, cua tiuquiyaquishacarijia quiocua, pueya niquiara maatia quia serojoriquia Pueyaso Rupaa. Parta Pueyaso pueya quia nacasuriquia jiyanohua, Pueyaso tojitiajaca nojori quiniuhuara seetanujuanaa. Seetanujuanaa nojori quia niishitiojoriquia maninia. ¹⁴ Pueyasocuaajaari na cumaaca niqutioquiaari quiajaniya. Pueyaso Sohuanucuaajaari naa pohuatequiaari Pueyaso pueya maanu jiitianaa pueyatej, nojori jaara niojoquiaari na juaashiquia quiocua, quia jiyatesaanura Pueyasora poonijiona quia quiniuria. Cuno cumaaca quiaa na jiitiaani, quia poonijiotere pueyaracaanu. Majaari najuhuana na jiitianu.

¹⁵ Puetunu niya cua rootasanojuanaa quiajaniyani, cuno tojjia quia quiriquia. Naa quia quiritij, puetunu pueyajanaa niquiniuria taa seetanujuanaa socua maninia Pueyaso tojjijara quia quiyareeni. ¹⁶ Naacuajitij, tama quioojiajaaja quia cojuare. Naajuhuj, tama quia cuaqueyajaaja quia cojuare seetanu rupaajanaa quia niishitiojonura pueya. Majaari quia tarinitianu miiniu cua sequesano quiajaniya. Naacuajitij, quiaa jaara naa maninia miijia quiri, quiaari tama quia cuaqueyajaaja jiyateya maninia Pueyaso pueyanora. Quia tojtiajaca pueyari Pueyaso pueyara quiniutianiyajuhuj.

5

Paatucua taa jiitariquia parta Pueyaso pueyani

¹ Majaari quia saaquiapue quia nacasunu quia juaaniutia, Pueyaso rupaa nojori tojiaquiniucua. Nojori quia nacasure jacaria, juhua quia que. Mashiquiori quia nacasure jacariajuhuj, juhua quia tapuey-ocuaca. ² Naajuhuj, motajoori quia nacasure juhua quia nucua. Niy-acojori quia nacasure juhua quia rimiatuhujuhuj, maja nojoriicua quia jiaatianuta.

³ Mashiquiopue jaara tojetaarucujanaa niquiohuaju quiri, jini-anuhujunio, Pueyaso pueya cuaara nojori naacuura. ⁴ Saniniuujia, mashiquio jaara niquiohuaraca quiriquia, jini-anuhuaraca soj, cuno pojori cuaara coteenu tama na nucuaajaaja cojuatunu niishiiria, na jijjuhuaj. Naacuajitij, necohua cuaara na queya cojuara, taa na queya cojuaquiaari nojoricuaani, naatujoori nojori quishacari. Pueyasoori naa na queyacua taraajeca timitiaja. ⁵ Noo mashiquio, cante seetanujuanaa jiyopueejuni, nojuajaari saaja Pueyasocua tiuquuaa. Majaari na tarinitianu secojonu juuca, niucuanio. ⁶ Noo mashiquio saniniuujia, tama na cuaqueyajaaja shuquiritijatej, nojuajaari tariucua juhua macu Pueyasora, saminio na quishacarija. ⁷ Parta Pueyaso pueya quia niishitiojore nio cua rootasanojuhuj, sesacasoo nojori quiniuria. ⁸ Canapuate na queecua, na nucuaacua taraajeyaquijiani, tama na tiajinia quijia pueyacuajuhuj, naa miijiacatej, nojoriiri Pueyaso Rupaa tojiyashiji-acara jiyaterohua tari tama nojori cuaqueyajaaja. Naacuajitij, nojoriiri socua tojetaarucujanaa sesa, Pueyasocua tiuyaquijia pueyajiniji.

⁹ Mashiquio jaara Pueyaso pueya jitianaa naacunara jiyatenu pan-ishaare, cuno mashiquiopue cuaara quiiria tariucua sesenta marijia shocotejono. Cuaara quiiria noo mashiquio, cante saaja na camishano pueyanota quiquiaari maninia pueyaracaanuni. ¹⁰ Cuno mashiquio cuaara niishishano maaji quiiria, maninia miijia na quiniucua. Cuaara quiiriajuhuj, cante maninia canashitioquiaari necohuani. Cuaara rucojuacaacua taraajeya quiiriajuhuj, na tiajinia na maquiojojua. Cuaara maninia miijia quiiriajuhuj, narta Pueyaso pueya niohuaca jee-quejojua. Cuaara taraatia miishano pueyacua taraajeya quiiriajuhuj, nojori cumanijanajuhuj. Cuaara puetunu maninia na miinujianaa tarinitiaaquijia quiiriajuhuj.

¹¹ Saniniuujia, noo mashiquio, teyanote juhuanujuaja maja na shocotejonu sesenta marijiani, nojori cuaara jiyateyaquishaaria Pueyaso pueya jitianaa naacunaara. Nojori na naata Cristo samiritianu, niyacaaniucua nojori jiaatiasacari. ¹² Naacuajitij, nojori camishacariuhua, nojoriiri tari sesa miirii, nojori jatanuucua nojori

sequesano saaja Jesucristora na poonijionura. ¹³ Naajuhuaaj, niyacoo naata mashiquio nojori quishacariija, nojoriiri saaja rucuanajonu maniniucuaaja, na tiuquiiijionura puetunu tiacojuanaa. Naa tama na poonijosanojuaaja na jiiitaaquishacariitij, nojoriiri taajecatujuriria quijia. Majaari saaja taajecara na quiniu, juura tojiyajaa pueya sequesanoori, tariucua na caminiujiuniu tamasararaj. Naajuhuaaj, sacuaraatia neteyocoyari juhua paateca, na taajetenura pueya, na caminiujiushacari jiyasohuaaja niishishano casaa. ¹⁴ Naaratej, janiyari cunora paniyani niyacoojori naata mashiquiopue cuaara camiyora neyacaara. Cuaara mueturajuhuaaj. Cuaara na tia camarucua quiquioora. Nojori jaara naa maninia miiritij, nojori miishanoori maja quenaaja na quiniu quiniutianiya pa paraa rimiaaquenura Pueyaso pueyacuara. ¹⁵ Noojiaqueya niyacoojori naata mashiquiopueeri Pueyaso tojiniu tarinitiacanu tari, Satanás tojijiaa nojori quiniuria saniniuuja.

¹⁶ Pa Jiyaniijaacua tiuujiaca maajipohuajinijinio jaara tama na pueyajiniijiojuaaja jiiitiare mashiquiopue, nojori cuaara na naacuura tamaajaaja. Naacuajitij, majaari Pueyaso pueya cojetanu quiniutianiya nojori, jiyopueraca nojori quishacari. Naacuajitij, Pueyaso pueyari na naata naacunu cutara noo mashiquiopue, canapuate tojetaarucujanaa jiyopueejuni.

¹⁷ Pueyaso pueya jiiitanaa, noo pojori canapuate maninia jiiitanaa narta Pueyaso pueyani, nojori cuaara narta Pueyaso pueya tojishano quiiria. Naajuhuaaj, nojori cuaara nareja niqutiosaaria, na panishano nojori jiiitanura. Pueyaso pueya maanu jiiitanaajinijinio, canapuate Pueyaso rupaa pohuatanaacuajani, Pueyaso rupaa niishitiojonaanio, nojori cutara cuaara socua queraatia niqutiosaaria, maninia poonijosano nojori miiniucua. ¹⁸ Tariucuaaanu Pueyaso Rupaajinia naajiotasanoori naa niishitiojiyajuhuaaj, naa na sequesacari miriqui:

“Majaari quia juunu rupaa mishiquionu na miaqueyaquiniuria quia casaa, quia rapijjotesacari quia natau, na jocuanura na sucujiniji”.

Naa sequeyajaariuhuaaj:

“Poonijjotesano pueyano cuaara niqutiosaaria na poonijionu sami”.

¹⁹ Pueyano jaara saquiriojotariquia Pueyaso pueya maanu jiiitanaacuara, majaari na tojiniu, jaara nocuara cojitiaaquiri saquiriojotanu. Querajaa pueya jaara nocuara cojitiare saquiriojotanu, cuno pojori sequesano cutaraari seetanujuanaa. ²⁰ Naacuajitij, Pueyaso pueya maanu jiiitanaajinijinio jaara sesa miiriquia, Pueyaso pueya maanu niqiuara quia nacasurenoj, puetunu narta Pueyaso pueyajanaa puerenura, maja sesa nojori miiniuriajuhuaaj. ²¹ Timoteonaa, janiyari nio quia sequeya Pueyaso niquiarani, Jesucristo niquiarajuhuaaj, na saquiriojosano seya niquiarani. Nio cua rootasano quia tojiri. Majaari maninia, paa jaara ritia nacasure parta Pueyaso pueyani, seetanujuanaa maninia pa niishiyaquishacari na miishano. Naajuhuaaj, majaari pa naata jiuujiaani pa panishano pueyano, nojuaja jaara sesa miiri. Naacuajitij, majaari rimiajata miijionu sacuaraatia. ²² Naajuhuaaj, majaari senota quia juaashiquia quia nianu quia niishishoo pueyanocua, nojuaja quia jiyatenura Pueyaso pueya jiiitanara. Maninia cutaraari coteenu quia niishiniuria taamueca

pueyanotenonjoni, maja sesa miijia pueyano quia jiyatenura Pueyaso pueya jiitianara. Quiaa jaara naa Pueyaso pueya jiitianara jiyatere quia niishiyaquishoo pueyanotej, Pueyasoori quiocua tiuutianutaniya cuno pueyano miishano sesa. Cunora quia sequeyanijia, tama quia cuaqueyajaaja quia cojuare, tojetaarucujanaa sesa miyaquijia quia quiniuria.

²³ Timoteonaa, naa quia seeco noojonuucuatej, majaari saaja mohuaca ratunu. Sequeyarucua cusosu quia quiniucua, secaja vino quia raturiquiajuhuaj quia jiniacuma na jecanura.

²⁴ Noojiaqueya pueya, sesa nojori miishanoori maatia niishishanocujaja, Pueyaso saniitionu juuca quiyaquishacarijia. Tamasacara saniniuujia, sesa nojori miishanoori maja na niishishaanu quiniutianiya juhuanajuaja, Pueyaso cuara nojori nujuatejore na tacojijiaatijia, na nequesoreesocoriquiano. ²⁵ Naajaarihuaj, maninia pa miishanoori maatia niishishano mijiria. Jiyasohuaja maninia pa miishanojuhuaj, cunoori na nuhuaji niishishaanutaniya maatiajuhuaj.

6

¹ Parta Pueyaso pueyajinijinio, canapuate poonijjotesano pueyani, nojori cuara na camarucua tojtiajaca quiiria. Nojori cuara rerequeteyaquiiria na camarucua, na camarucua mariqui Pueyaso sesacareeri, pa niishitiojosanonio, na tojiyashijia na seru quiniucua. ² Poonijjotesano pueyano camarnu jaara Pueyaso pueyano quiriquia, juhua na serujuhuaj, na seru cuara na tojjia quiiria. Cuara na rerequeteja quiyaquiiria, narta Pueyaso pueyano na camarnu quiniucua. Nojuaja cuara seetanujanaa maninia poonijjoora nera, na niishishacari na camarnucujajaari narta panishano Pueyaso pueyano.

Cante seetanujanaa shuquiriaatia quijiacani

Timoteonaa, nio cua sequesano quia niishitiojore pueya. Nojori quia shiniujiuri na tojtianurajuhuj. ³ Tamonu jaara tamaatia niishitiojoriguia cua niishitiojosanojiniji, nojuajaari tojetaarucujanaa moseeca. Pa Jiyaniijia Jesucristo rupaari jiyanohua maninia. Na niishitiojosano pa tojishacari, cunoori pa naacuquiaa juhua Pueyaso pa quiniuria socua. ⁴ Cante cuno niishitiojosano ruuretaja tama na niishishanojuaaja na niishitiojonurani, nojuajaari tama na cuaqueyajaaja jiyaniya nojuaja niishijia cutara. Nojuajaari juaatioonu porocujuhuj, Pueyaso rootasanojiniji na taacanuusacari. Naa quijiaca pueya quishacaritij, nojoriiri juaajiacara jataquiaa, nojoritia juayonuujutajaca shocotanucua nojori. Nojoriiri juhuacatecara ruutaquetooquiaa na juayonutanura. Sesacatooquiaajaarihuaj. Naajuhuj, nojoriiri najuhua soquequiaa, narta Pueyaso pueya naasucua sesa miiquiaa. ⁵ Nojoriiri juayonuujutanu tarinitiaquijia. Nojoriiri maja na naata maninia niishiriojonu socua. Nojoriiri maja na niishiniu seetanu rupaajanaa Pueyasojiniji. Nojoriiri Pueyaso pueya jiitiajacara quiniu paniya, nojori jiyanihacari nojoriiri naacujia jiyanohua casamiriacara quiniutianiya. ⁶ Taaquiririnij, Pueyasocua tiuujiaca pa quishacari, paacuaquinatejaj seetanujanaa juhua queraatia casamiriaca quijiacani. Paacuaajaari shuquiriaatia quijiaca Pueyaso rupaacua tiuujiaca pa quishacarini,

juhuajaniya quijiaca pa quishacarijuhuaj pa jiiitasano casaaniyojuata. ⁷ Paacuaajaari juhuasunucua roosaaquiaari mijiriani. Naajuhuaaj, paari juhuasunucua tacateriquianohuani. ⁸ Naaratej, paa jaara pa miaquesocoriquiano jiiitariquiajuhuaj, saa cunotaja shuquiriaatia pa quirij. ⁹ Saniniuujia, noo pojori, jiyanohua casamiriaca quiniuucua jiaatiajacatej, nojoriiri maja na niishiniu rejetenu, na panishano na miyaquiniuria. Naacua-jitij, nojoriiri cocuaatia miiquiaa. Nojoriiri juhua norijosaaquiaa, najuhuaana casamiicua nojori jiaatiasacari, sesa casaacuanio. Puetunu cuno sesa casaajanaari pueya sesoquiaa, nojori saniitiosaanura taraatia. ¹⁰ Cumaneeacaacia jiaatianu jiyanohuani, cuniquiji supuejaari puetunu sesa casaa pa miiniurijanaa. Naacuajitij, noojiaqueya parta Pueyaso pueyajiniiniori Pueyaso rupaa tojiniu tarinitiacanu tari. Nojoriiri tama nojori cuaqueyajaaja miitiquiaa naquiya, naa cumaneecaacia jiaatiajaca nojori quishacaritij. Naaratej Timoteonaa, majaari cumaneecaacia jiaatiaja quia quiniu.

Pablo shiniujiushacari Timoteo, Pueyaso tojijia na quiniuria pueyaracaanu

¹¹ Quiajaniya Timoteonaa, quiaacuaajaari Pueyaso saquiriojosano pueyano. Naaratej, puetunu sesa casaajanaa miyashijia quia quiri. Tojetaarucuaajanaa saaja maninia miijia quia quiri, juhua pa Jiyaniijiaja. Pueyasooocua tiuujia quia quiri socua. Socua panijia quia quirijiuhuaj. Puetunu casaajanaa rejeretaja quia quirijiuhuaj. Jacaria pocuaja quia quirijiuhuaj, maja pueya rerequeteja. ¹² Pa paraca nojuataja quia quiriquia, jiyanohua quia tiuuniutia Pueyaso rupaacua. Pueyasocuaajaari quia saquiriojoquiaari na pueyano quia quiniuria. Cunora, quiaari queraatia pueya niquiara pohuataquiaari Jesucristoocua quia tiuuniujiniji. Naa pueyaracaanu rishijiarano quia quishacaritij, cunora, majaari Pueyaso niqutiojonu panishano quiajaniya jaaretenu. ¹³ Quiaacuaajaari niishiya taa Jesucristo seetanujuanaa pohuataquiaari Poncio Pilato niquiaracuajani, nojuajaari seetanujuanaa Pueyaso Niyanu. Naajaa, nojuajaari niishiquiaari nojuajaari cunora mosaanutaniya. Na Que Pueyasocuaajaari na samiitianiquiaariuhua. Pueyasocuaajaari saminiora jiyateja puetunu saminio casaajanaa. Naa quia niishishacaritij Timoteonaa, janiyari nio quia sequeya Pueyaso niquiarani, pa Jiyaniijia niquiarajuhua. Cua tojiri. ¹⁴ Puetunu cua rootasano quiajaniyajanaa quia tojiri. Majaari na jataniniu quenaaja, pa Jiyaniijia mariqui quia niishitiojosano tamacareeri. Taa cua rootaa quiajaniyacuaajani, na tojijia quia quiri pueyaracaanu, pa Jiyaniijia Jesucristo cuara tiuquiriohuajaatijia, Jiyaniijiajanaa na quiniuria. ¹⁵ Na Que Pueyasoori na tiuquitiniutianiya na panishacari, taa na sequequiaaricuajani. Pueyasocuaajaari jiyanohua pa timitiasano, saaja maninia na quiniuucua. Nojuajanaari Jiyaniijia. Nojuajaari puetunu tamasaca jiyaniijianucuaajanaa Jiyaniijia. Nojuajaari camarucuaajiniji Camarnujuanaa cutara. ¹⁶ Saaja nojuajaari pueyaracaanu quijiajuhanajaj. Majaari na supueni quiquiaari. Majaari na shaajenu quiniutianiyajuhua. Nojuajaari jiyanohua na shacantuuca cumaacajinia quijiajuhanajaj. Cunora, majaari quenaaja tamonu pueyano na naata nocua catecanonu. ¿Canteeri na niquiquiaari

quenaajani? Shaaqui. Pueyanoori maja na naata na niquniu. ¡Nojuaja cuaara pueyaracaanu timitiasaaria! ¡Nojuajaari namitia na cumaaca jiiitianajuhuanajaj! Cuaara naa quiiria pueyaracaanutej.

¹⁷ Timoteonaa, parta Pueyaso pueya quia tojitiri nio, noo pojori, queraatia casamiriacatej. Nojori cuaara niishiiria maja pueya shocotejaca nojori quiniuria, casamiriaca nojori quiniuucua. Nojori cuaara niishiirijuhuaaj, maja na casamiicua nojori tiuniuria, nojori jyanishacari nojoriiri pueyaracaanu shuquiriaatia quijiaca quiniutianiya casamiriaca nojori quiniuucua. Pa jiiitasano casamiiri shaajeriquiano. Nojori cuaara Pueyasocuaa tiuuria cutara. Nojuajaari capora cutara, na niqutionura puetunu pa panishano casaajanaa, shuquiriaatia pa quiniuria. ¹⁸ Cunora, nojori quia niishitiojore, pueyaracaanu maninia miijiaca nojori quiniuria. Naatej, taa queraatia casamiriacatucuaa nojorini, maninia nojori miishano cuaara naa queraatia quiirijuhuaaj. Nojori cuaara ritia niqutiojojuaca quiiria nojori jiiitasanojiniji, narta Pueyaso pueyano jiiitaaquishacari na panishano. ¹⁹ Naa capora nojori quishacariitij, nojoriiri juhua tari jiyocuacaanu racataa nojori casaa. Naacuajitij, nojoriiri seetanjuanaa shuquiriaatia quijiaca quiniutianiya pueyaracaanu, mijiria, jiyocuacaanunio.

Pablo rootasano Timoteo, naajionu na tucuatascari

²⁰ Timoteonaa, Pueyasocuaajaari quia jiyatequiaari na rupaajiniji puhuatana quia quiniuria. Maninia quia cojuare seetanu Pueyaso rupaa-janaa. Majaari najuhuaana tama pueya niishitiojosanojuaja tojjia quia quiniu. Noo niishishanojuhuaaj, pueya sequesano: “Seetanu niishijia-janaa niishishano cutaratej”, majaari cuno tojiniu. Cuno niishishanoori seetanu niishishanojuanaa paraca, najuhuaanaari. ²¹ Noojiaqueya parta Pueyaso pueyari Pueyaso rupaa tojiniu tariniticanu tari, cuno najuhuaana niishishanoocua nojori tiuniuucua. Niojuanaa Timoteonaa.

Pa Jiyaniijia cuaara quia cumaquiiria.

TANEE PABLO NAAJIONEE TIMOTEOCUARA

Pablo saruhuatascari Timoteo

¹ Janiyari Pabloni, Jesucristo jiyaramiquishano, taa Pueyaso paniquiaaricujani. Naacujitij, janiyari Jesucristojiniji pohuatanara jiyatesaaquiaarini, pueya niishiniuria seetanujuanaa, nojoriiri pueyaracaanu rishijiacara jiyatesaanutaniya Jesucristoocua nojori tiuushacari. ² Naaratej quiyanu Timoteonaa, janiyari nio naajiya quiarani. Janiyari quia panitiaani pa Que Pueyaso, pa Jiyaniijia Jesucristojuhuj, nojori cuara cumaquiiria quiajaniya. Naajuhuj, nojori cuara taraajeera quiocua, nojori cuara pueyaracaanu quioojia cajitiirijuhuj shuquiriaatia quia quiniuria.

Jesucristojiniji quia pohuatariquia tamasaca

³ Pueyaso cua secojosacari pueyaracaanu, juuca, niucuanio, janiyari quiocuara secojoquiaani. Cua niishiriojosacari quiajaniya, maninia Pueyaso tojijia quia quiniuucua, janiyari Pueyaso sequequiaani, “paacarasho”. Janiyari nera shitimia poonijioquiaa coojia najiqitishooni, taa pa supuetanaa tojitiaquiaari Pueyasocuaani. ⁴ Majaari cua niyjetanu quiquiaa quia nujuquenu cucua, janiya jaara quia shuriucujia quiaquiaarini. Janiyari cunora jiyanohua jiaatiaa cua niquiniuria quiajaniyani, shuquiriaatia quia quiniuria quia shuriucua. ⁵ Janiyacuajaari niishiyani quiaari seetanujuanaa pa Jiyaniijiaacua tiuujacuaja. Quia ji Loida, quia nucua Eunicenio, nojoriiri coteenujuanaa quiocuaji Pueyasocua tiuujiaa quiquiaari. Majaari cua taacanuunu quiaari seetanujuanaa Jesucristoocua tiuujia quiquiaajuhuj, taa nojori quiaquiaaricuaani.

⁶ Pueyasocujiaari na cumaaca niqutioquiaari quiajaniya, cua secojosacari quiocuara, cua juaashiquia quia niasacari quiocua. Naacujitij, quiaacuajaari Pueyaso Sohuanu cumaacaraca quioojiajinia. Naaratej, Pueyaso Sohuanu quia shanacure quiocua, na cumaaca na poonijiotenura socua quioojiajinia. ⁷ Pueyasoori maja na niqutionu quiquiaari na Sohuanu, puereja pa quiniuria. Na Sohuanu niqutioquiaari pajaniya cutaraari, cumaacaraca pa quiniuria, panijiaa pa quiniurijuhuj, maninia niishiriojojuacarano. ⁸ Naacujitij, majaari quia caririquiniu pa Jiyaniijia Jesucristojiniji quia poojotanura. Naajuhuj, majaari cua naaqui quia caririquiniu, nujuatejojuajinia quia nujuatesaanuucua Jesucristojiniji quia pohuatanuucua. Pueyaso cumaquishacari quiajaniya, juhuajaniya quia rejeretare, quiaa jaara naquiya miishaariquiajuhuj, Jesucristojiniji quia pohuatasacari. ⁹ Pueyasocujiaari pa jiyatequiaari na pueyara. Nojuajaari pa saquiriojoquiaari saa neraja pa quiniuria. Na jiyanooni pajaniyani, majaari na quiniu quiquiaari maninia miijiaa pa quiniuucua juucua. Maja. Nojuacuajaari naa pa jiyanooquiaari saaja naa na miiniu paniniuucua, jiyanoojia na quiniuucujuhuj. Jiya shipiniyaquishacarijia, Pueyasoori jiyacari niishiriojoquiaari taa na jiyanooniutianiya pajaniyani, Jesucristo cusosacari pa niti. ¹⁰ Quiari naataja pocuaji Tacuna Jesucristo niniuucua, Pueyasoori

pa niishitiquiaari taate na naata jiyanooni u pajaniyani. Cunora, Jesucristoori pa niti cusoquiaari. Na samiitiasacariuhua, nojuajaari cusonu shocotaquiaari. Naacuajitij, nocua pa tiuushacari, paari pueyaracaanu rishijara jiyatesaanutaniyani.

¹¹ Pueya niishiniuria nio rupaa, Pueyasoori cunora na jiyaramiquishano pueyanora cua jiyatequiaari, pueya cua niishitiojonura Jesucristojiniji. ¹² Naacuajitij, janiyari niya naquiya miya nujuatejojuajiniani. Naajaa, majaari cua caririquiniu. Janiyacuajaari niishiyani canaacua cua tiuquiaarini. Nojuacuajaari pocuaji Tacuna Jesucristo. Cunora, janiyari seetanujuanaa niishiyani, nojuajaari cumaacaraca na cojuanura janiya, nojuaja cuara tiuquiriohuajaatijia. Naajuhua, nojuacuajaari cumaacaraca na jataniniuria pajaniya, tojetaarucujanaa quiarinio pueya pa quiniuria na tiuquishacariuhua pocua.

¹³ Timoteonaa, maninia niishitiojosano tojjia quia quiriquia taa cua niishitiojoquiaari quiajanuacujani. Naa quia miiriquia Pueyaso ru-paacua tiuujia quia quishacari, pueya panijia quia quiniuucujuhua, Jesucristo rupesano pa quiniucua. ¹⁴ Pueyasocujaaari quia niishitiquiaari seetanu rupajanaa. Pueyaso Sohuanu quiniucua poojiajinia na cumaquiniuria pajaniya, cuno niishitiojosano quia jiitiare maninia, maja tamaatiara na jatanishaanura.

¹⁵ Quiaacuajaari tari niishiya, puetunu Asia jiyajinijinio parta Pueyaso pueyari cua tiujiatuquiaari tamajaaja. Majaari na naacutunu paniniu quiquianu janiya. Nojorijinijinioori quiquianujuhua Figelo, Hermógenesnio. ¹⁶⁻¹⁷ Saniniuujia, Onesíforo cutaraari cucua tiuquitasucanu. Cunora, pa Jiyaniijia cuara nocua taraajeera, puetunu na tijinia quijiacaacujuhua. Nojuaja jaara Roma tiacajinia tiuquiquianu, nojuajaari ritia coteecanu na pajenura janiya, cuara cua riuriatareajaatijia. Jaara cua riuriatacanu, nojuajaari coojia cajitiquianu. Nojuajaari pueyaracaanu cucua tiuquiiiocanu niya nujuatejojuajinia, na naacunura janiya. Majaari cucuaji na caririquiniu quiquianu nujuatesano cua quishacari. ¹⁸ Quiaacuajaari niishiyajuhua taa nojuaja naacuquiaari pajaniyacuajani, Éfeso tiacajinia pa quishacari. Naa maninia na miiniucua pajaniyacuuatej, pa Jiyaniijia tiuquishacariuhua pocua, nojuaja cuara maninia miiria Onesíforo saniniuujia.

2

Jesucristora poonijojua quia quiri quia puereyaquiniutia

¹ Quiajanuacujia saniniuujia quianunaa, quioojia quia cumaquiriquia Jesucristo niqutiosano cumaacata. ² Nocua tiuushano pueya quiarta Pueyaso pueyajinijinio quia niishitiojore Pueyaso rupaa, nojori niishitiojonura tamasaca saniniuujia. Cuno maninia pueya quia niishitiojore puetunu Pueyaso rupajanaa, taa quia tojiquiaari queraatia pueya niqiuara cua pohuatasacaricuajani.

³ Juhua janiya naquiya miiniu rejeretaja quia quiriquia juhua pa Jiyaniijia Jesucristo soldado, puereyashijia. ⁴ Pueyano jaara soldadora saquiriojosaare, cuno pueyanoori maja na naata tama na panishanojuaja miiniu socua. Nojuajaari pueyaracaanu na camarnu tojijia, na camarnu timitianura nojuaja. Naa pa Jiyaniijia tojjia quia quiriquiajuhuaj Timoteonaa. ⁵ Naajuhua, pueya tacuarishijosacari,

nojori cuaara quiiria tacuarishijionu camarnu tojijiaca. Tamonu jaara shocotare na tojiyaquiniutia camarnu, cuno na shocotanuuri najuhuanaj. Naacujitij, majaari na niqitiosaanu casaa, sesa na miiniutia na shocotasacari. ⁶ Nio quia niishirijiuhuaaj: cante cuhuariquia cuhatajani, nojuaja cuaara coteenu na senoosanojiniji racataara na panishano. Na nuhuaji cutara, nojuaja na naata tamasaca niqutiojonu na senoosanojiniji. ⁷ Nio miriqui cua sequesanoocua quia niishiriojore. Pa Jiyaniijiacuajaari quia niishitiniutianiya puetunujuanaa.

⁸ Majaari nio niyajetanu: Jesucristoori macujiniji samiitianishaaquiaariuhua, Pueyaso Niyanu na quiniucua. Pueyano quiquiaariijaariuhuaaj. Nojuacuajaari pa supuetanaa jiyaniijia David niqiuohuacuajinio supueno pueyano quiquiaari. Naacujitij, nojuajaari Pueyaso Jiyarosano quiquiaari mijiria quinia pueya niti na mosaanura. Cunocujaari cua pohuatasano Pueyaso Rupaa. ⁹ Naa cua poojotanuucuatej, janiyari naquiya miyani. Janiyari cumayocuata moronucua quiyajaniuhuaaj, juhua sesa miijia. Naajaa, Pueyaso rupaa cutaraari maja na naata sanaajasaanu. ¹⁰ Cunora, janiyari puetunu naqiniya miiniujianaa rejeretaquiaani, Pueyaso saquirojosano pueya tojinuria Jesucristojiniji. Naacujitij, nojoriiri na naata nocua tiuuniu, Pueyaso pueyara nojori jiyatesaanurajuhuaaj, taa na jatanishano pueya pa quiyacuaani. Naacujitij, paari mariyata shacantuuca quijiacara jatanishaanutaniyani, Jesucristota pa quiniuria pueyaracaanu.

¹¹ Nio sequesanoori seetanujuanaa:

Jesucristoocua pa tiuushacari, Pueyasoori Neyanu mosaanu jiyateya pa niti na quiniuria sesa pa miishanojiniji. Naacujitij, Jesucristo mosaanu jaara pocuara quiquiaari, na samiitianuhuari pajaniyara quiyajuhuaaj, pueyaracaanu rishiriquiano pa quiniuria. ¹² Naajuhuaaj, paa jaara naquiya miitiasaariquia nocua pa tiuuniucuaani, nojuajaari camarucua pa jiyatenutaniya narta jiyaniijianucua pa quiniuria. Saniniuujia, pa jaara pa Jiyaniijia tamacariquia Pueyaso niishiyashijiaca pueya niqiarani, nojuajaari pa tamacanutaniyajuhuaaj. ¹³ Paa jaara na sequesano tojiyashijiaca quiriquiani, naajaa, nojuajaari pueyaracaanu na sequesano miijia. Pueyasoori na sequesano jataniyashijia cutara.

Taamueca quijiate Pueyaso shuquiritiasano nera poonijonani

¹⁴ Parta Pueyaso pueya quia niishitiojorohuarohua maja najuhuaana nojori juayonuujutanura tamaatia niishitiojosanoocua. Jiyanhua quia nacasure nojori Pueyaso niqiara, maja naa nojori nacojonura najuhuaana supuetanaa niishitiojosanoocua. Naa tamaatia niishitiojosanoocua juayonuujutanuni, cunoori maja na cumaquiniu na tojiniaa. Socua nojori sesoya cutaraari. ¹⁵ Tama quia cuaqueyajaaja quia cojuare, saa maninijaja quia niishitiojonura Pueyasojiniji cuno seetanu rupajaanaa. Naacujitij, Pueyasoori quia timitianutaniya nera poonijiona maniniu quia quiniucua. Majaari capa quia niishitiojonu, quiaa mariqui tamajaaja caririquiriiri. ¹⁶ Naaratej, majaari najuhuaana tama mijiria pueya niishishanojuaja quia tojinuu. Pueya tojishacari cuno, nojoriiri socua jiyacatenutaniya Pueyaso tojiyashijiaca nojori quiniuria. ¹⁷ Cuno najuhuaana niishitiojosanoori jiyanhua puereeta. Cunoori Pueyaso pueya tajinia paaqueja, na sesonura puetunu Pueyaso pueya

maanujuanaa. Naa nojori tajinia paaqueyari taa pueyano cusojuaja sapueja pueyano cuaqueya moquijiaquiaacuaani, na camaru na cusojuanura. Himeneo, Fileonio, nojoriiri naa miiquioya quiarijia. ¹⁸ Nojoriiri seetanu rupaajanaa jataniquianu tamaatiara. Nojoriiri pueya niishitiojiya, paanaari tari tojetaarucujanaa samiitianishanocujani. Naacuaajitij, majanaari pa cuaqueya jatanishaanu quiniutianiya, shacantuuca cuaqueyaraca pa quiniuria taa pa Jiyaniijiacuaani. Naa nojori niishitiojosacari najuhuanatej, nojoriiri noojiaqueya Pueyaso pueya cushitiojiya, nojori tiuyaquiniuria pa Jiyaniijia sequesanoocua. ¹⁹ Naajaa, Pueyasojuanaacuajaari pa niishitiquiaari na rupaari seetanujuanaa. Majaari na naata jatanishaanu. Naa naajiotasano quiyacuajaari:

“Pa Jiyaniijiaari na saquiriojosano pueya niishiyacuaja”.

Naa naajiotasanoori quiyajuhuj:

“Canapueete pa Jiyaniijia Jesucristoocua tiuujiacani, nojori cuaara sesa na miijionu tarinitiaara”.

²⁰ Sanajanaa, cua tojiri. Jiyanohua queraatia casamiriaca pueyano tajinia, cuno tajiniaari maja saaja orojiniji shipinijosano coshiquia quiniu, miacojuanao, platajiniji casaanio. Puetunu tamaatia casaajiniji shipinijosano casamijianaari quijia. Quijiajaariuhua mati, suruhuatu numajiniji quejasano. Quijiajaariuhua maraujiniji panishano patacocua, conaanio. Puetunu cuno casamijinijinojuanaani, noojiaqueyari racatasano saaja masu miaquetejarano quiya, na raatojotajaranonio. Quiyajaariuhua rucucuaacuaji casaa, rucucua cajitiaja. ²¹ Paari naajuhuj. Paa jaara tama pa cuaqueyajaaja cojuariquia tojetaarucujanaa sesa pa miiniuucujani, saaja pa Jiyaniijiaari pa quiniurijuhuj, naacuaajitij, pa naata juhua pa Jiyaniijia timitiasano tohuatashiniyujua quiniu. Naacuaajitij, pa Jiyaniijia na naata poonijiotenu pajaniya puetunu maninia casaajanaa pa miiniuria.

²² Sanajanaa, quiaacuajaari niishiya, casaa miiniuucua jiaatiajacate mashiquiorini. Puetunu cuno sesa niishiriojosanojuanaa quia tarinitiariquia. Saniniuujia, saaja maninia miijia quia quiriqia. Saaja Pueyaso rupaacua tiuujia quia quiriqia, pueya panijiajuhuaj. Jiyanoojia quia quiriqiajuhuaj. Naa quia quiriqia, taa puetunu Pueyaso jiyatesano sesa miyashijiaca pueyajanaa miiquiaacuaani, pa Jiyaniijiaacua nojori tiuuniucua. ²³ Pueya jaara nacojoriquia nojori niishiyaquishoo casaajiniji najuhuanaj, nojori quia ruuretare saaja, nojori jaara quia nequesoreetare cuno casaajiniji. Quiaacuajaari niishiya, pueyari jiyano casaacua paracaatiojua. ²⁴ Pueyasora poonijiojua pueyano cuaara quiyaquiriia pueya paracaajia. Saniya cuaara quiiria cutara puetunu pueya panijiajanaa. Cuaara quiiriajuhua maninia niishitiojojua. Cuaara juhujaniya rejeretaja quiiria, tamasaca jaara na taajetere. ²⁵ Cuaara Pueyaso rupaa tojiyashijiaca nacasuura jacaria, nojori na paniniutia, maja nojori na juaaniutia. Naa quia miishacari, Pueyaso naasucuaari nojori jiuujia tacatonutaniya seetanu rupaajanaa niishijiaca nojori quiniuria. ²⁶ Naacuaajitij, nojoriiri maninia niishiriojojuaca quiniutianiya, nojori jaareteenura Sesaacaacuaji, maja Sesaaca miitiniuria nojori taa na paniyacuajani.

3

Taa quijiaa mijiria quiniaa quiniutianiya quera jiya puequesacarini

¹ Quia niishirijuhua Timoteonaa, jiya puequenu panishacari, pueyari socua jiyacatenutaniya sesa miijiacara. ² Pueyari saa tama nera-jaaja niishiriojuaca quiniutianiya. Majaari tamonura na niishirionu quiniutianiya. Pueyari queraatia cumaneeca jiitianuucua ji-aatiajaca quiniutianiyajuhuaaj. Naajuhuaaj, pueyari najuhuana narta pueya niquiara pocuajaca quiniutianiya, na jyanishacari nojori cutara socua niishijiaca narta pueyajiniji, socua shanohua niquishano tamasacajinijinio. Pueyari Pueyaso sesacajaca quiniutianiya, narta pueya sesacajacajuhuaaj. Pueyari na queya tojiyashijiaca quiniutianiya. Majaari quenaaja pueya timitianu quiniutianiya maninia na miijiacara. Pueyari maninia miyashijiaca quiniutianiya, Pueyasojiniji maninia casaa rerequetejaca nojori quiniuucua. ³ Naajuhuaaj, majaari quenaaja na queya panijiaca pueya quiniu quiniutianiya, tapueyocuaca, tama necohuajaajanio. Pueyari tojetaarucujanaa jyanoyashijiaca quiniutianiya. Sacuaraatia rimiaacaturu quiniutianiyajaariuhuaaj. Naajuhuaaj, majaari quenaaja tama nojori cuaqueya panishanojuaaja rejetejaca pueya quiniu quiniutianiya. Pueyari naquiya narta pueya miijiacara quiniutianiya, nojoriicua na taraajeyaquiniutia. Pueyari puetunu maninia miijiacajanaa soojeaca quiniutianiyajuhuaaj. ⁴ Pueyari tama na cojiniaajaaja tacartajaca quiniutianiya. Pueyari cocuaatia casaa miijiacara quiniutianiya, mosanucua nojori quiniuucua. Pueyari juhuajaniya quijiaca quiniutianiya, tama nojori cuaqueyajaaja shuquiritiajaca nojori quishacari. Shuquiriaatia pueya miishacari tama na panishanojuaaja pueyaracaanu, majaari jeya nojori quiniu quiniutianiya nojori shuquiritianura Pueyaso. ⁵ Pueyari sapuenu juhua Pueyaso pueya niquishaanutaniya. Naajaa, nojori miishanojiniji, maatia niishishaanutaniyari, nojoriiri Pueyaso cumaaca maseyaquiquiaari seetanujuanaa jatanishano pueya nojori quiniuria. Cunora cua tojiri Timoteonaa. Majaari jiyano pueya quia rupenutej.

⁶ Tamasaca cuno pueyajinijinioni, nojoriiri tiaco tiuquitiajaca, noo maajipohua na sapojonura, najuhuana pueya pahuatasaanocua ritia tiuujiacatej. Cuno maajipohuari tama na cuaqueya miiniu panishanojuaaja rejetyashijiaca. Naa sesa miijiacara nojori quiniuucuatej, nojoriiri najuhuana tacaquiquiaa. Cunora, nojoriiri cuno sapojonujuaca tojtiaquiaa. ⁷ Cuno maajipohuari najuhuana pueyaracaanu tojtiaquiaa cuno sapojonujuaca niishitiojosano. Saniniuujia, majaari Jesucristojiniji seetanu rupaaajanaa niishijiacara nojori quiniu quiquiaa, Pueyaso jyanooniuria nojori. ⁸ Cuno sapuenu juhua Pueyaso rupaa niishitiojonaari seetanu rupaaajanaa ruuretaquiaa, taa nio shimiacuri, Janes, Jambres ruuretaquiaari supuetana Moisésuaani. Naacuajitij, nojori niishitiajari juhua ninishiqui, sesa nojori miishano timitiajaca nojori quiniuucua. Seetanu rupaaajanaa nojori tojiyaquiniuucua, pueya cuaara tojiyaquiiiria nojori saniniuujia. Nojoricuajaari Jesucristoocua tiuyashijiaca. ⁹ Naajaa, majaari queraatia pueya tiuuniu quiniutianiya nojoriicua. Ritia niishishaanutaniyacuaajaari, nojoriiri seetanujuanaa niishiyashijiaca, taa pa supuetanaa niishiquiaaricuaani cuno shimiacuriiri sapojonujuaca.

Pablo tucuatascari naajionu, socua rootaa Timoteori

¹⁰ Timoteonaa, quiaacuajaari pueyaracaanu cua cojiquiaari maninia quia niishiniuria puetunu cua niishitiojosanojuanaa. Quiaacuajaari

niishiya taa miiija cua quiquiaarini, pa Jiyaniijia cua shuquiritiniuria. Quiaari niishiyajuhuaaj taa seetanujuanaa pa Jiyaniijiaacua tiuuja cua quiquiaarini, jacaria pocuajajuhuaaj, pueya panijiano. Quiaari niishiyajuhuaaj, majaari coojia cua najiquitiniu quijiani, pueya mishacari naquiya janiya. ¹¹ Quiaari niishiyajuhuaaj taa cua miitiasaaquiaari Antioquia tiacajiniani, Iconio tiacajiniajuhuaaj, Listra tiacajiniano. Seetanujuanaa, janiyari naquiya miishaaquiaarini. Naajaa, pa Jiyaniijiaari cucua taraajequiaari maninia na rishitiniuria janiya. ¹² Seetanujuanaa naquiya miishaanutaniyari puetunu noo pueyajanaa, tama na cuaqueyajaaja jiyatejaca saaja Jesucristo tojijiaca nojori quiniuriatej. ¹³ Saniniuujia, sesa miijiaca pueya, sapojonuujacanio, nojoriiri socua sesa miiniuria jiyacatenutaniya. Nojori sapojonuusacari tamasa, nojoriiri naa tama na cuaqueyajaaja sapojonutaniyajaacujua.

¹⁴ Quiajaniya saniniuujia Timoteonaa, majaari quia cartenu puetunu maninia niishitiojosanojuanaa, taa quia niishitiojosaaquiaaricujani. Quiaacuajaari niishiya, cuno niishitiojosanoori seetanu rupaaajanaa. Quiaari niishiyajaacuhuaaj canapute quia niishitiojoquiaarini. ¹⁵ Quiaacuajaari quia naatujujajiniiji tariucuaacaanu Pueyaso Rupaa niishijia. Cunoori quia niishitiquiaari Jesucristoocua quia tiuuniuria, Pueyaso jiyanooshano pueyano quia quiniuria. ¹⁶ Puetunu Pueyaso Rupaaajanaacuajaari Pueyaso naajiotanishano na pueya. Cunora, puetunu cuno rupaaajanaari maninia pajaniyara. Cuno rupaari cumaacaraca na niishitiojonura pajaniya, na niishitiniuria pajaniyajuhuaaj pa miishanoori sesa, na nacasunura pajaniya maninia miijiaca pa quiniuhuaa. Pa rootaajaariuhuaaj tojetaarucujanaa maninia miijiaca pa quiniuria. ¹⁷ Naacuajitij, Pueyaso Rupaari Pueyasora poonijionaa pueya jeenucujaja tojetaarucujanaa, puetunu maninia casaa miijiacajanaa nojori quiniuria.

4

¹ Quiaacuajaari niishiya, Jesucristo tiuquishacariuhua mijiria, Jiyaniijiajanaa na quiniuria, nojuajaari puetunu na tojtiajacajanaa nequesoreenutaniya mijiria pa miishanojiniji, saminiucua, macunucuanio. Cunora, janiyari na niquiara, pa Que Pueyaso niquiara quia sequeya seetanujuanaani. Cua tojiri. ² Majaari pueya niquiara Pueyaso rupaa pohuatano quia tarinitianu. Pueyaracaanu quia pohuatariquia, naajaa, quia jyanishacari jiyacari naasucuaari maja maninia quia pohuatana. Pueyaso rupaata quia niishitiri sesa miijiaca nojori miishanoori sesa Pueyasora. Pueyaso rupaa tojiyashijia quia nacasuriquia. Pueya quia shiniujiuriquia Pueyaso rupaacua nojori tiuuniuria seetanujuanaa. Puetunu cunojuanaa quia miiriquia jacaria quia pocuanuta, maja juaaniutia. ³ Naa quia poojotariquia pueya niquiara, nojori tojiniu panishacarijia Pueyaso rupaa. Na nuhuaji, pueyari seetanu rupaajiniji niishitiojosano tojiniu paniyaquiniutianiya. Saaja na ruuretanutaniyajaariuhuaaj. Naa Pueyaso rupaa nojori tojiniu paniyaquishacaritij, nojoriiri queraatia tamaatia niishitiojonuujuaca rerejotenutaniya, cuno pojori shuquiritiniuria nojori najuhuaana pohuatasana. ⁴ Nojoriiri seetanu Pueyaso rupaaajanaa tarinitianutaniya, najuhuaana sapojonuu-sano tojtiajaca nojori quiniuria saniniuujia. ⁵ Quiajaniya saniniuujia, maninia niishiriojojua quia quiriquia, maja quia sapojosaanurajuhuaaj.

Naquiya miiniu rejeretaja quia quiriquia. Pueyaso rupaa Jesucristojiniji pohuatanuucua cojeja quia quiriquia, pueya tiuuniuria Jesucristoocua. Puetunu quia poonijosanojuanaa Pueyasora quia tucuatere maninia, taa pa Jiyaniijia sequequiaari quiajaniyacuajani.

⁶ Janiya saniniuujia, janiyari quera quianutaniya jiyocuacaanu cua quiniuria pa Jiyaniijiatani. Cua nanaca jaara shootesaare, janiyara, cunoori juhua Pueyasora cua niquticosano quiniutianiya. ⁷ Majaari cua taajenu quijia, pueyaracaanu cua poonijosacari cua Jiyaniijia. Janiyari tari tucuataganu miiniu puetunu na sequesanojuanaani. Pueyaracaanu cua poojotasacari Pueyaso rupaa, majaari cua jataniniu quiquiaari quenaaja. ⁸ Naacuajitij, shanohua tuhuajaari quiriano jiyocuacaanu racatasano quiya tari, maninia miiija cua quiniuucua. Cua Jiyaniijiaari cuno tuhuaja cua niqutionutaniya na samiitianishacariuhua janiya. Pa Jiyaniijiaari jiyanoohua maninia. Na jiyanooshano pueya pa quiniuucua, majaari socua na saneenu quiniutianiya sesa pa miishano. Majaari saaja janiya na niqutionu quiniutianiya cuno tuhuaja. Puetunu noo pojorijianaa niqutionutaniyajaariuhuj, canapuee nojuaja na paniniutia sashiyajaani, cuara tiuquihuara shacantuca na cumacatajatijia.

Pablo sequesano Timoteo miishocoriquiano

⁹ Majaari puera tarishiniu. Quia secoore, cucua quia tiuquiniuria ritia. ¹⁰ Demasri cua tiujiaarucuaani. Tesalónica tiacajinia quiaarucuaari. Nojuacuajaari tama na panishanojuaja miiniu panijiaara jatarohuacuaa. Crecenteeri saniniuujia Galicia jiyajinia quiaarucuaa. Titoori Dalmacia jiyajinia quiaarucuaajaacuhuj. ¹¹ Saaja Lucasri niya cuata quiya. Quiaa jaara cumaji niyare, quiocua Marco rupoyare quiocua. Nojuajaari na naata cua naacunu niya, pa Jiyaniijiaara cua poonijosacari. ¹² Janiyari saniniuujia Tíquico jiyarorucuaa Éfeso tiacajiniani. ¹³ Taa cua sequeya quiajaniyacuajani, quiaa jaara cumaji niyare, quiocua cua tucuaque toque paare quiria, Carpo tiajinia cua tiujiasano, Troas tiacajinia. Quiocua quiria patootaare cua nequesoreetunecajuhuj. Janiyari socua noo paniya quia patootanurani, shoqueecua naajionuutasano Pueyaso Rupaatej.

¹⁴ Noo Alejandro, cumueca casaajiniji shipinijiojua casamitij, nojuajaari jiyanoohua cua paracaajiaara quiquianu. Naajaa, pa Jiyaniijiacuaajaari saniniuujia cucua na naminiutianiyacujua, naa na miiniuucua janiyatej. ¹⁵ Tama quia cuaqueyajaaja quia cojuare maja na miiniuria sesa quiajaniyajuhuj. Nojuajaari pa pahuatasano cuaracashitiya saaja, Pueyaso rupaa ruuretaja na quiniuucua.

¹⁶ Janiya jaara shushajanaa nujuatesaacanu jiyaniijianucua taciitij, nojori nequesoreenura janiya, majaari quenaaja tamonu Pueyaso pueyajinijinio quiniu quiriquiaa tii, cucuaji na tacunura quenaaja. Puetunu cua cojiniaajanaari cua cartecanu tamajaaja. Naa nojori tarinitianuucua tamajaaja janiyatej, Pueyaso cuara jiyanooria nojori. ¹⁷ Naajaa, pa Jiyaniijiaari cua cojiqianuni. Cua cumaquiquianujaariuhuj, nojuajiniji cua pahuatanura puetunu cuniqui quiniaa Pueyaso niishiyashijiaa pueyajanaa. Pa Jiyaniijiaari cocuaatia cua miiniu-jiniji juhua nojori juaashiquiajiniji cua jaaquianu, maja nojori monura janiya. ¹⁸ Janiyari nocua tiuyani, nojuajaari cua mashiquiniutianiya

puetunu sesa casaacuajijianaa. Cua cojuanutaniyajaariuhuaaj, pueyara-caanu rishijia cua quiniuria na shuriucua jiyocuacaanu, Jiyaniijiajanaa na quishacari. ¡Jiyano-hua maniniaari pa Jiyaniijia! ¡Nojuaja cuaara shuquiritiasaaria pueyaracaanu! Cuaara naa quiiriatej.

Pablo sequesano na naajionee na tucuatasaacari

¹⁹ Quiria quia saruhuatate Prisca, neyaca Aquilano, puetunu Onesíforo pueyajanaajuhuaaj, na tiajinia quiniaani. ²⁰ Erastoori Corinto tiacajinia jatecanu. Janiyari saniniuujia Trófimo tiujiacanu Mileto tiacajiniani, cusosu na quiniuucua. ²¹ Cucua quia niniuria quia secoore, shuniya coteyaquishacarijia quia tiuquiniuria cucua. Niya cuata quiniaa parta Pueyaso pueyari cua sequereeni, nojoriria cua saruhuatanura quiajaniya. Nojoriiri Eubulo, Pudente, Lino, Claudiano, puetunu parta Pueyaso pueya maanujuanaanio.

²² Pa Jiyaniijia cuaara quioojiajinia quijia quiiria pueyaracaanu. Pueyaso cuaara cumaquiiria puetunu niajanijajanaa.

PABLO NAAJIONEE TITOOCUARA

Pablo naajiosacari Titoocuara

¹ Janiyari Pablóni, Pueyaso seru. Jesucristoori cua jiyaroquiaari na Que Pueyaso saquiriojosano pueya cua tiuutiniuria Jesuucua, Pueyaso pueya nojori quiniuria. Cua jiyaroquiaariiaariuhua Jesuucua tiuuniaa cua niishitiniuria seetanu rupaajanaa Pueyasojiniji, nojori jatanishaanura maninia quijiacara. ² Nojori tojishacari cuno rupaa, nojoriiri niishiquiaa nojori cutaraari samiitianishaanutaniuhua Pueyaso muerasu nojori quiniucua, pueyaracaanu quijiaca nojori quiniuria Pueyasota. Cunocujaaari tariucuaaanu Pueyaso sequesano, jiyanoehua tarijiatej, jiya shipinishaacarijiyojua. Nojuajaari maja na naata sapojonu. ³ Quiari naataja, Pueyasoori na rupaa niishitiniu paniquiaari pueya, taa na paniquiaari jiyasohuaja tariucuaaanucujani. Naaratej, pa Jiyanoojia Pueyasoori cua jiyatequiaari na rupaa pohuatanarani, pueya cua tiuutiniuria nocua. ⁴ Quiarijiani, quiocuara naajiyanjia Titonaa, juhua cua niyanuniyojua quia quishacari. Quiaari Pueyaso pueyanora quiquiaari quia tiuushacari Cristojiniji cua pohuatasanoocua, taa cua tiuuquiaaricuaani. Naacujitij, paari mariyata nocua tiuujiacani. Pa Que Pueyaso, pocuaji Tacuna Jesucristonio, nojori cuara cumaquiiria quiajaniya. Nojori cuara jiitiaara quioojia maninia, shuquiriaatia quia quiniuria pueyaracaanu.

Titora Pablo sequesano, Creta jiya tucuaatiajajinia na mishocoriquiano

⁵ Janiyari quia tiujiaquiaari Creta jiya tucuaatiajajiniani, quia tuccatanura cua poonijosano cureeno. Naaratej, quia sequecanunjia quia jiyatenura jiyaniijianucua, Pueyaso muerasu maapue jiitanaa quiniuria puetunu cuno jiya tiacajiniajanaa, taa cua sequequiaari quiajanuyacuajani. ⁶ Pueyaso pueya jiitariquiano cuara quiiria maninia pueyano, sesa miyashijia, maja pueya pocuanura sesa nojuajiniji. Cuaara jiitiaara niquiriyatujua niquiocua. Necohua cuara quiiria Pueyaso muerasujuhuj, maja sesa miijiaca, maja tojiyashijiacajuhuj. ⁷ Cante Pueyaso muerasu jiitianani, nojuajaari Pueyasora poonijojua. Naaratej, nojuaja cuara quiiria maninia quijia, sesacasoo, maja tojiyashijia. Cuaara quiaquiiria ritia juaajia, mashaasequejojua, piyojotaja. Cuaara quiaquiiria cumaneeca panijia sesa na miishanota na masenura. ⁸ Naajuhuj, Pueyaso pueya jiitiana cuara quiiria rucoonaacua taraajaja. Cuaara quiiria maninia miijia, maninia niishiriojojua. Cuaara quiirijuhua seetanujanaa Pueyaso rootasano tojijia, maja rimiajata maninia miijia. Cuaara quiirijuhua Pueyaso panijia cutara, tama na cuaqueyajaaja jiitiaja maninia, maja sacuaraatia casaa porocua. ⁹ Cuaara quiiria Pueyaso rupaa tojijia cutara, taa na niishitiojosaaquiaaricujani. Naacujitij, nojuaja na naata pueya cumaquiniu, maninia na niishitiojosanota Pueyaso Rupaajiniji. Naacujijihuhuj, nojuaja na naata pueya tacatonuhua Pueyasocua sesa nojori niishishanoiniji, noo pojori canapueje Pueyaso Rupaa ruuretajaca quiyacuajani.

¹⁰ Naa quia sequereenijia, queraatia tojiyashijiaca pueya quiniuucua, canapuate juhua niishiyashijia niishitiojoquiaa najuhuaana niishitiojosanocujani. Nojoriiri Pueyaso muerasu sapojiya. Queraatia cuno pojoriiri cuarta Judiocuaca. Nojoriiri pueya niishitiojiya pueya cararaatiuquia co miatesaanura, taa Moisés niishitiojoquiaari tarijiacuajani, seetanujuanaa Pueyaso muerasu nojori quiniuria juucua. ¹¹ Nojoriiri queraatia niquiohwaraca pueya jiyajeneteya sesa na niishitiojosanota, puetunu tapueyocucatajanaa nojori juayonuujutanura. Cuno niishitiojonaa cuara sanaajasaaria. Nojoriiri niishitiojoquiaa saaja cumaneeca nojori masenura sesa na niishitiojonuunujiniji.

¹² Creta jiya tucuaatiaja pueyajinijinio tamonu shimiacuuri tama na pueyajinijiaaja naa sequequiaariti: “Creta pueyari pueyaraaanu saaja sapojonuujua. Nojoriiri jyanohua juaajiaca juhua sayoru. Nojoriiri puera miaquenuujua. Nojoriiri taajecorijihuhaj”. ¹³ Seetanujuanaari cuno shimiacu sequesano. Nocuaji, jyanohua quia nacasure nojori, nojori cuara Pueyaso tojijiaca quiiria, maninia quijiaca nojori quiniuria. ¹⁴ Quia rootare nojori maja na tojtianura Judiocuaca nareja najuhuaana pohuatasano, naajuhuj, maja nojori tojiniuria pueya rootasano, canapuate Pueyaso seetanu rupaajanaa tojiyashijiaca quiyacuajani.

¹⁵ Pueyano jaara maninia jiuujiaraca quiri, puetunu casaajanaari maninia quiya nera. Saniniuujia, pueyano jaara sesa jiuujiaraca quiri Pueyaso rupaacua tiyashijia na quiniuucua, majaari quenaaja niquiriyatu casaa maninia quiniu nera. Na niishitiajaari juhua curuutuca, noojiano. ¹⁶ Nojoriiri tama na cuaqueyajaaja sequeya: “Pueyaso niishiyanjia”. Naa nojori sequesacarij, najuhuaana sequeyari. Nojori miishanojiniji, paari niishiyani nojori maja seetanujuanaa Pueyaso muerasu. Nojoriiri jyanohua soosano pueya, puera sesa na quiniuucua. Nojoriiri jyanohua sesa, tojiyashijiacajuhuj. Majaari na naata quenaaja maninia miiniu.

2

Maninia niishitiojosano cutara

¹ Nocuaji, pueya quia niishitiojore maninia nojori quiniuria taa pa niishitiojosaaquiaaricuajani. ² Naaratej, socua saaquiapue quia niishitiojore nojori cuara quiyaquiriiria miaquejoru, mashaasequejorunio. Nojori cuara quiiria tojishano pueya cutara, maja rerequetesano. Nojori cuara quiiria maninia niishiriojojuaca. Cuara quiiria maninia quijiacajuhuj, na tojishacari puetunu Pueyaso niishitiojosanojuanaa, na panishacari pueyano. Nojori cuara quiiriajuhua maninia rejeretajaca taraatia na miishacari, juhuajaniya nojori sashishacari pa Jiyaniijia. ³ Naajuhuj, socua motaja maajipohua quia niishitiojore nojori quiniuria maninia Pueyaso niquiara pueyaracaanu, maja rimiaacatu-juri, maja mashaasequenuujua. Nojori cuara pueyaracaanu miiria maninia tamasa niquiara, tamasa miiniuria juhua nojori miishanojuhuaj. ⁴ Nojori cuara niishitiojora niyacaraca maajipohua, maninia na paniniuria neyaca, necohuanio. ⁵ Cuno jiyaniyacuaca cuara niishitiojora narta maajipohua, maninia niishiriojojuaca nojori quiniuria, saaja neyaca panijia nojori quiniuria, maja tamonu caya panijiacara. Nojori cuara niishitiojosaariajuhuj, maninia poonijiojuaca na tiajinia

nojori quiniuria, caporatujuri nojori quiniuria, neyaca tojitiajacanio. Nojori cuara naa miiria, Pueyaso Rupaa mariqui rerequetesaareeri.

⁶ Naajuhuaaj, mashiquiori quia niishitiojore maninia niishiriojuaca nojori quiniuria. ⁷ Puetunu quia miishanojuanaa cuara quiiria maninia nojori niquiara, nojori jiaatianura quiocua, juhua quiajaniya nojori quiniuriajuhuaaj. Quia niishitiojosacari nojori, tama quia cuaqueyajaaja quia cojuare, tama quia niishitiojosanojuaja tojijia quia quiniuria. Majaari puenujua quia quiniu quia niishitiojosacari. ⁸ Maninia quia niishitiojore Pueyaso Rupaa, taa quia niishitiojosaaquiaaricujani. Naacuajitij, tamasaacari maja na naata ruuretanu quiniutianiya quia niishitiojosano pueya niquiara. Naa maninia quia niishitiojosacaritij, quia niishitiojosano rerequetejacaari caririquiniutianiya. Naacuajitij, nojoriiri maja tari na naata pocuanu quiniutianiya sesa pajaniyajiniji. Nojoriiri sanaajetanutaniya.

⁹ Poonitijosano pueya quia rootare, puetunu na camarucua sequesanojuanaa nojori tojiniuria, na camarucua shuquiritianura nojori. Cuara quiiria na camarucua panijiaa, maja rihuanejaca. ¹⁰ Cuara nohuaseyaquiiria na camarucua casami. Cuara quiiria seetanujuanaa maninia miijiaa, pueya niishiniuria pa Jiyanoojia Pueyaso rootasanoori jiyanohua maninia cutara. Poonitijosano pueya jaara maninia quiriquia, Pueyaso Rupaari juhua maniniushitishano quia tamasa niquiara.

¹¹ Paacuajaari niishiyani Pueyasoori jiyanohua jiyanoojia seetanujanaa, Jesu cusonuucua puetunu pueyacularajanaa, sesa pa miishanojiniji pa jiyanooshaanura. ¹² Pueyaso jiyanooshacari pajaniya, cunoori pa niishitiojiya pa cartenura puetunu sesa pa miishanojuanaa, maja mijiria casaacua pa jiaatianura sacuaraatiajuhuaaj. Naajuhuaaj, Pueyaso jiyanoonuucua pajaniya, cunoori pa shiniujiya maninia niishiriojuaca pa quiniuria mijiria pa quishacarijia, maninia miijiacajuhuaaj, Pueyaso tojijiano pa paniniutia nojuaja. ¹³ Naa Pueyaso jiyanooshacari pajaniya na muerasu pa quiniuriatej, cunora paari na sequesanoocua tiuquaaajuhaaj. Nojuacuajaari pa sequesquiaari pa Pueyaso Cristoori pocua muetanutaniuhua, shacantuuca na cumaacajinia. Naacuajitij, paari shuquiriaatia sashiya pa Jiyanoni. ¹⁴ Nojuajaari tama na cuaqueyajaaja panitiaquiaari pocuara, sesa pa jiiitishano casaacua na tarinitiniuria pajaniya. Pocuara cusoquiaariiri poojia seque jeequesano quiniuria puetunu sesa pa quiniujinijijianaa. Naa miiquiaariiri saaja tama na pueyarajaaja pa quiniuria, jiyanohua maninia miiniuucua jiaatiajaca pa quiniuriajuhuaaj.

¹⁵ Naa quia niishitiojore pueya Titonaa. Pueyaso pueya quia niishitiojore, quia shiniujiuri, quia nacasure. Naa quia cumaquiniuria nojoritij, quia cumaaca quia paaretare juhua cutara jiyaniijia, tojishano pueyano quia quiniuria. Saaja maninia quia miiriquia pueyaracaanu, tamonu mariqui quia rerequetereeri.

3

Maninia rootasano Pueyaso pueyara

¹ Quia pueya quia niishitiojorohua jiya jiyaniijia tojijiaa nojori quiniuria, jiyaniijanucua na jiyatesano pueya nojori tojiniuriajuhuaaj. Nojori cuara cuno pojori naacutaara jaara sequesaaare maninia casaa

nojori miiniuria. ² Pueya quia niishitiojore nojori cuaara pueya sesacaashijiaca quiirijuhuj. Nojori cuaara quiiria juhuajaniya quijiaca, maja juaajiaca. Cuaara quiiria jiyanoojiaca. Cuaara maninia niqiiiria puetunu pueyajanaa, juhua socua maninia pueya nojorijini, maja rimiajata na miiniuria tamasaca.

³ Tariija, paari mariyata mosanucua quiquiaarini, Pueyaso tojiyashiji-acanio. Paari juhua tashucuaano quiquiaarini, sapojosano pa quishacari. Paari sesa miiniuucua jitiquiaarini. Majaari pa naata sesa pa miiniu tarinitianu quiquiaari. Paari pueyaracaanu shuquiriaatia quiniuucua jiaatiajaca quiquiaarini sesa pa niishishanota. Paari sesa miijiaca quiquiaarini. Paari tamasaca jitiiasanoocua jiaatiajaca quiquiaarini, juhua nojori pa quiniurijuhuj. Paari pueya soosano quijiaca quiquiaarini. Paari niqitiojuaca quiyaquiaarini. ⁴ Naajaa, pa Jiyanoojia Pueyaso cutaraari maninia miiquiaari pajaniya. Naacujitij, paari niishitishaquiaarini taa Pueyaso paniya puetunu pueyajanaani, na jiyaronuucua Neyanuniojua pocuara na cusonura. ⁵ Na muerasura pa jiyatequiaariiri saaja pocua na taraajesacari, maninia miyashijia pa quishacariija. Sesa miyashijiacara na Sohuanuta pa jataniquiaari-iri, na Sohuanu jeequesacari poojia, maninia jiuujiaraca pa quiniuria. Pueyaso Sohuanuuri pa jataniquiaa juhua quiarinio pueya pa quiniuria. ⁶ Pocuaji Tacuna Jesucristo miiniuucua maninia, Pueyasoori jiyanohua queraatia na Sohuanu niqitioquiaari pajaniya. Juhua pocua totasaa-reeri na Sohuanu. Maja shiitianiyojua quenaaja. ⁷ Naacujitij, pa jiyatereeri maninia quijiaca pa quiniuria na jiyanooshacari pajaniya. Naa pa jiyatequiaariiri na muerasu pa quiniuria, pa masenura puetunu na jitiiasanojuanaa puera, jiyocuacaanu na racatasano. Naaratej, paari juhuajaniya sashiquiaani, pa niishishacari paari pueyaracaanu quijiaca quiniutianiya natani.

⁸ Nio cua sequesanoori seetanu rupaajanaa. Nio rupaata quia naca-sure Pueyaso tojtiajaca puetunu quioojiatajanaa, nojori cuaara ni-ishiriojora, maninia nojori miiniuria pueyaracaanu. Nio rootasanoori jiyanohua maninia. Maninia cutaraari puetunu pueya cumaquitia-jarajanaa. ⁹ Maja cutaraari quia rupuenu cuno pueya, noo pojori canapuate najuhuaana nacojoquiaani, naajuhuj, noo pojori canapuate pueyaracaanu na supuetanaa sesaca serojoquiaa najuhuanani, juhua pueya shocotajaca nojori quiniuria. Naajuhuj, maja quia rupuenu noo pojori canapuate juaatioquiaani, canapuate tariucuaacaanu Moisés Rootasanoocua juayonuutaquiaacuajani. Puetunu cuno nojori niishishanojuanaari najuhuanaj. Majaari na naacunu nojori.

¹⁰ Quia piriyojore cuno, cante Pueyaso muerasu maanu raquirijitiaani, capa na niishitiojosanota najuhuanaj. Nojuaja jaara quia tojiyaquiri coteenu quia sequesacari nojuaja, quiocua socua na camiriohua piriyojonu. Jaara tojiyaquiri quiajaniya jiyacaritij, nojuaja cuaara quiiriaqui juhua taanusano. ¹¹ Naa na tojiyaquishacari quiajaniyatej, quiocua niishiri cuno pueyano tari seseree. Tama sesa na miishanojuaariija juhua nocuara saquiriojotaa.

Pablo sequesano Titora

¹² Janiya jaara Artemas jiyarore quiocuani, jiyanohua quia sanini-ujjuri cucua quia niniuria Nicópolis tiacajinia. Janiyari quiniqui shuniya tajitiniyu paniyani. Janiya jaara Artemas jiyaroyaquiri quiocuani,

janiyari Tíquico jiyaronutaniya quiocuani. ¹³ Zenas, Apoloori quiocua tiuquiniutianiya. Nojori quia naacutare quia jiiťiasanota, nojori jiiťianura puetunu na panishanojuanaa nojori quianu panishacari quia quiijaťiniji. Zenasri pueyacuaji tacuna pueya nequesoreenaa.

¹⁴ Parta Pueyaso muerasu cuaara niishiiria maninia miijiaca nojori quiniuriajuhuaj, maja najuhuana quijiaca na quiniuria. Maninia cutaraari nojori naacutanura na panishano jiiťiaashijiaca.

Naajioneer puequesacari saruhatasano

¹⁵ Puetunu cuata quiniaajanaari cua sequeya cua saruhatanura quiajaniya. Canaara quia saruhatare parta Pueyaso muerasujuhuaj, canapueťe canaa pañjiacacuajani. Pueyaso cuaara cumaquiiťia puetunu niajaniyajanaa. Cuaara naa quiiriatej. Tariucuaja Titonaa.

PABLO NAAJIONEE FILEMÓN CUARA

Pablo saruhatasacari Filemón

¹ ¿Quiaate quiyajaa canaa panishano Filemónnaa? Janiyari Pablóni. Quiasano pueyanonijia, Jesucristojiniji cua pohuatanuucua. Janiyari parta Pueyaso pueyano Timoteota nio naajija quiarani, jaarajaaja pa Jiyaniijiaara poonijiona quia quiniuucua. ² Canaara quia saruhatatare pa rimiatucua Apia, Arquiponio, jaarajaaja pa Jiyaniijiajiniji pohuatanani. Canaara quia saruhatatarejuhua parta Pueyaso pueya maanu, noo pojori, quia tiajinia rerejoquiaa Pueyaso secojonuunuratej. ³ Pa Que Pueyaso, pa Jiyaniijia Jesucristonio, nojori cuaara cumaquiiria niajaninya, jiyanoojiaca nojori quiniuucua. Nojori cuaara cajitiiria nioojiajuhuaj, juhuajaninya nia quiniuria.

Filemón paniniujiniji pohuatasano, Pueyasoocua na tiuuniujinijinio

⁴ Pueyaso cua secojosacari, janiyari quia seera pueyaracaanu Pueyaso sequequiaani, “paacarasho”. ⁵ Janiyari naa sequequiaa Pueyasoni, quiajanijianiji cua tojinuucua taa quia paniquiaa pa Jiyaniijia Jesuni, puetunu na pueyajanaano. Quiaanaari seetanujuanaa pa Jiyaniijiaacua tiuujia. Janiyari cunora quia timitiaani. ⁶ Janiyari quiocuara secojoquiaani, seetanujuanaa quarta Pueyaso pueya jiyanoojia quia quiniuria, nojoriicua quia taraajenura. Naacuaajitij, nojori quia cumaquishacari, quiaari maatia niishiniutianiya puetunu quioojiajinia quia jitiisanujuanaa Jesucristojiniji, Jesucristoocua tiuujia quia quiniuucua. ⁷ Parta Pueyaso pueya panijia quia quiniuucua, quiaanaari nojori cumanijiacanu, nojoriicua quia taraajesacari. Naa cua niishishacari quia miishanojinijitij, janiyari coojia cumanijiacanujuhua. Cunora, shuquiriaatia quiyaniijia.

Pablo sequesacari Filemón, nojuaja jiyanoonihuhara tama na seru Onésimojuaja

⁸ Jesucristo jiyaramiquishano pueyano cua quiniuucua, cua naata sequenu quiajaninya quia miiniuria cua sequesano. ⁹ Naajaa, majaari cua sequenu paniniu quiajaninya juhua quia jiyaniijia. Saniniuujia, panijia quia quiniuucua, janiyari quia sequenu paniyani quia miiniuria nio cua sequesano quiarijia. Jesucristojiniji cua pohuatanuucua, janiyari quiarijia moronucua quiyani tariucua saaquiano. Naajaa, quia rupuena Pablo cua quiniuucua, cua tojiri Filemónnaa. ¹⁰ Cucua quia taraajere quenaaja. Quia nenecojiyanijia cua niyanuniyojua Onésimoocua. Nojuajaari seetanujuanaa juhua quianura quiriucuaa Jesucristoocua na tiuuniuucua, na tojishacari cua pohuatasano Jesucristojiniji, moronucua cua quishacari.

¹¹ Tariija, Onésimoori sesa seru quiquiaari quiara. Quiarijia saniniuujia, nojuajaari na naata maninia quiniu quiara, taa quiria na quiyacuaani. ¹² Janiyari quiarijia quiocua jiyaroya quianuni. Quiocua na maserohua quia timiniutia, taa quia masequiaa janiyacuaani. ¹³ Moronucua cua quishacari Jesucristo rupaa cua pohuatanuucua, janiyari niyaja na jiyojetenu paniriquiaa juucuaani, na naacunura janiya

quia niti. ¹⁴ Naajaa, majaari naa cua miiniu paniniu quiriquiaa jiyasohuaja, coteenu cua nequesotaaquishacari quiajaniya. Janiya jaara quia sequereni janiya niya na jitianutaniya na naacunura janiyani, quiaa maara cua ruuretaaquiri. Naajaa, janiyari seetanujuanaa saaja quia panishano miiniu paniyani. Cunora, janiyari na jiyaroya quiocuani. ¹⁵ Onésimo jiyoteeri quiocuaji rupatecanu rupaquiriaja, quiarijia quiara na quiniuhua pueyaracaanu cutara. ¹⁶ Quiarijiani, nojuaja naasucuaari socua quia panishano pueyano quiniutianiya serujiniji, seetanujuanaa quia tarajanu na quiniuucua quiarijiani, Jesuucua tiuujia na quishacarijuhuaj. Nojuajaari jiyanohua cua panishano parta Pueyaso pueyano. Naajaa, quiaa cuara jiyanohua na panijia quiiria socua janiyajiniji, maja juhua nareja quia panishano seru. Seetanujuanaa nojuaja quia paniri cutara, quiarta Pueyaso pueyano na quiniuucua.

¹⁷ Naacuajitij, janiya jaara seetanujuanaa quiarta Pueyaso pueyano quiri quiarani, Onésimo tiuquishacari quiocua, nojuaja quia miiri maninia, taa quia miiquiaacuaa janiyani. ¹⁸ Onésimo jaara sesa miiquiaari quiajaniya, jaara quia casaa nohuasequiaarijuuhua, nojuaja quia jiyanoori. Saniniuujia cucua quia tiutiare puetunu sesa na miishanojuanaa quiajaniya. ¹⁹ Janiyacua saniniuujia cua cumaneecajiniji quia niqutioreni puetunu sesa na miishanojinijijianaa quiajaniya. Janiyari Pablóni. Janiyari tama cua juaashiquiatajaaja nio naajiyani, cua sequesanoocua quia tiuuniuria. Janiyari quia niishitini paniyajuhua, Jesucristojiniji cua pohuatasanoocua quia tiuushacari, quiaacuajaari pueyaracaanu quiijara jatanishaacuaari. Naacuajitij, cua naata sequenu quiajaniya, cua serura quia quiniuriajuhuaj. Naajaa, janiyari saaja quia sequeyani Onésimoocua quia taraajenura. ²⁰ Naa quiria quia miiri quenaaja, mariyata Jesuucua tiuujia pa quiniuucua, cua panishano Filemónnaa. Quiaa jaara Onésimo jiyanoori, Cristo panijia quia quiniuucua, quiaari seetanujuanaa coojia cumanijianutaniya.

²¹ Janiyari naa quiocuara naajiyani, cua niishishacari quiaacuajaari cua sequesano miiniutianiya. Janiyari niishiyajaniuhua, quiaari socua maninia na miiniutianiya cua sequesanojiniji. ²² Naajuhua, janiyari juhuacarijia quia sequeyani, cua maquejara quia jeenucuare cucuaji quia tiajinia. Naa pueyaracaanu cucuara nia secojosacari Pueyaso niiquiji cua cartesaanuratej, nojuajaruhua niaacua cua tiuqutiutianiya, niaata cua quiniuria.

Pablo sequesano na naajio na tucuatasaari

²³ Epafrasri cua sequeree cua saruhuatanura nijaniya. Nojuajaari cuarta moronucua juhuaj, Jesucristojiniji canaa pohuatanuucua.

²⁴ Jaarajaaja cuata Jesucristojiniji pohuataana pueyari nia saruhuataajuahuaj. Nojoriiri Marco, Aristarco, Demas, Lucasnio.

²⁵ Pa Jiyaniija Jesucristo cuara cumaquiiria nijaniya.

HEBREO PUEYACUARA NAAJIONEE

Pueyasoori pajaniyara na rupaa pohuataniquiaari Neyanujiniji

¹ Tariucuacaanu, Pueyasoori pueyaracaanu na sequenu panishano caminiujiuniaa pueya poojotaniquiaari pa supuetanaara. Nojuajaari nojuajiniji caminiujiuniaa miijiotequiaari queraatia tamaatia casaa, nojori na niishitiniuria casaa nojuaja sequenu paniriquiaa nojorini. ² Quiari naataja saniniuujia, Pueyasoori tama Neyanujuaaja pohuataniquiaari na sequenu panishano pajaniyara. Nio Neyanu shipinitiquiaari puetunu casaajanaacuajaari; nio jiya, jiya cajiniocua-juhuaj, puetunu pa niquiyaquishoo casaajanaanio. Naajuhuj, Pueyasoori Neyanu jiyatequiaari puetunu tama na shipinishanojuanaa jitiania quiriquiano. ³ Neyanuuri tojetaarucujanaa maninia, juhua na Quejuhuaj, juhua na Que niquishanojuhuaj. Naacuaajitij, nojuajaari jiyanohua shacantuuca cumaacaracajuhuj. Naacuaajitij, nojuajaari puetunu na shipinijosano casaajanaa rucuanetequiaa maninia, saa na rupaa cumaacataja. Nojuaja jaara cusoquiaari puetunu sesa pa miishanojuanaa na tuujunura, na nuhuaji, jiyocuacaanu tacaquiaariuhuari, na Que Pueyaso miaquetajara na cajiniuria Jiyaniijajanaa quiquiojinia.

Pueyaso Niyanuuri Jiyaniijajanaa cutara Pueyaso seyajiniji

⁴ Naacuaajitij, Pueyaso Niyanuuri Jiyaniijarajanaa quiquiaari Pueyaso seyajiniji. Nojuajaari na Que sesaanucua. ⁵ ¿Pueyasoteeri quenaaja tamonu na seyajinijinio sequequiaari: “Nioori cua Niyanu”? ¡Maja! Neyanu sequequiaari cutaraari:

“Quiaari quiyanu. Janiyari pueyanora quia muerateree jiyacuani, cua saquiriojosano pueya Jiyaniijia quia quiniuria”.

Neyanujiniji sequequiaariijaariuhuj:

“Nera, janiyari na Queni. Quiria saniniuujia, nojuajaari quiyanu”.

Pueyasoori maja quenaaja niquiriyatu na seyajinijinio naa na sequenu quiquiaari. ⁶ Tariucuacaanu Pueyaso Rupaajinia, na naajiotasaaquiaariiri casaa Pueyaso sequenutaniyani, Neyanu na tiuquitishacariuhua mijiria, Jiyaniijajanaa na quiniuria:

“Puetunu cua seyajanaa cuaara Quiyanu tojitiaara, Jiyaniijajanaa na quiniuucua”.

⁷ Pueyaso seyajiniji saniniuujia, naa naajiotasano quiyari tariucuacaanu Pueyaso Rupaajinia:

“Pueyasoori na seya jataniquiaa juhua paratura, juhua manirianio, na panishano nojori miiniuria”.

⁸ Neyanu sequeya saniniuurijia:

“Quiyanunaa, quiaacuajaari Pueyasojuhanajaj. Quiaari Jiyaniijia. Quiaari naa quiniutianiya pueyaracaanutej. Quiaari cumaacaracajuhuj, maninia quia jitianura puetunu pueyajanaa. ⁹ Quiaari maninia miiniu porocua. Quiaari sesa miiniu soojea saniniuujia. Cunora, Pueyasonaa, janiyari quia jiyatequiaari Jiyaniijajanaa quia quiniuriani, quia Jiyaniijia cua quiniuucua. Janiyari quia jiyatequiaarijuhua socua shuquiriaatia quijia quia quiniuria puetunu quia cojiniaajinijianaa”.

¹⁰ Pueyasoori naa sequequiaari Neyanujuhujaj:

“Jiyaniijianaa, quiaacuaajaari coteenujuanaa casaa shipinijia. Quiaari jiya shipiniquiaari, puetunu jiya cajiniocua niquishano casaajanaanio. ¹¹ Puetunu quia shipinishanojuanaari shaajeriquianohua. Quiajaniya saniniuujia, quiaari pueyaracaanu quiriquiano cutara. Puetunu quia shipinishano casaajanaari tariucuashiriquiano juhua toqueja. ¹² Naa na tariucuashishacaritij, quiaari juhua toque mocua na jiunioriquiano, quia jatasocoriquiano. Quiaari naa miiniutianiyaquij taa pueyano jocuaquiaacuaa na toque mocuacuaani, quiariqui toque na cushiniuria saniniuujia. Quiajaniya saniniuujia, majaari quia jatanu quiniutianiya tamaatiara. Quia quiniuuri maja puequeriquiano”.

¹³ Pueyasoori Neyanu sequequiaarijuhuaj:

“Miji, cua miaquetajara quia cajishii, janiya jaara quia paraa shocojotare puetunujuanaajaatijia, maja quenaaja niquiriyatu cureenura na miananajonura quiajaniya”.

Majaari naa Pueyaso sequenu quiquiaari quenaaja niquiriyatu na seyajinijinio. ¹⁴ Puetunu nojorijianaacuaajaari Pueyasora poonijionaa. Pueyasoori nojori jiyaramiquiquiaa Jesuucua tiuuriquiano pueya nojori cojuanura.

2

Maja cumaati Jesucristo tojiyashijiacara pa quiniu

¹ Naaratej, Jesucristojiniji pa tojishano tojijiaca pa quiriquia socua, paa mariqui Pueyasoocuaaji rupatereeri. ² Tariucuacaanu, Pueyaso seya caminiujiushano Pueyaso rootasano pueyarani, cuno rootasanoori seetanujuanaa pueya tojishocoriquiano cutara. Cuno rootasano ruuretajaca, na miyashijiacajuhuj, nojoriiri saniitiosaaquiaari. ³ Pueyaso seya caminiujiushano tojiyashijiaca jaara saniitiosaaquiaaricuaa, ¿paateeri jiyaniyani Pueyaso pa jiyanooniutianiya juhuajaniya Neyanu rupaa tojiyashijiaca pa quishacari? ¡Maja! Cuno rupaa nocua pa tiuushano pa jiyanooshaanurani, cunoori pa Jiyaniijajanaa pohuatasano. Pa Jiyaniijia nuhuaji, cuno pojori, canapute pa Jiyaniijajanaa tojiquiaari pueyaracaanuni, nojoriiri saniniuujia cuno rupaa caminiujuquiaari pajaniyara. Canaa sequetuquiaariiri nojori tojishanoori seetanu rupajanaa. ⁴ Naajuhuj, nojori pohuatasacari Jesucristojiniji, Pueyasoori nojori miitiquiaari jiyajeneta casaa jiyanohua na cumaacata, maatia pueya niishiniuria nojori pohuatasanoori seetanujuanaa. Pueyari cunora jiyanohua shiriiquitiquiaari queraatia Pueyaso cumaacata miishano nojori niquishacari. Naajuhuj, Pueyasoori Jesuucua tiuujia niquitioquiaa na Sohuanu, tamaatia pa miiniuria na cumaacata, taa na paniyacuajani. Cunora, paa cumaati seetanujuanaa Pueyaso rupaa Jesucristojiniji tojitiajaca quiyani.

Jesucristo mijiria rasaanquiaari pa puerana na quiniuria

⁵ Cuno quiarinio jiyaranojiniji teyano pa sequeriquiaacuajani, Pueyasoori maja na seya na jiyatenu quiquiaari cuno quiarinio jiya jiyaniijianucuarano nojori quiniuria. ⁶ Naajaa, tariucuacaanu Pueyaso Rupajinia naa naajiotasaaquiaariiri pueyano nequesotasano Pueyaso:

“Pueyasonaa, ¿casaateeri pueyanoni, nocua quia niishiriojonurani? ¿Casaara quia taraajeya pueyacuani? ⁷ Quiaacuajaari na shipiniquiaari rupaquijiara socua cumaacaaju na quiniuria quia seyajiniiji. Naajaa, quiaari na jiyatequiaari jiyaniijia na quiniuria, cumaacaraca quijia na quiniuriajuhuaj. ⁸ Quiaari na sequequiaari puetunu quia shipinishano casaajanaa jiyaniijia na quiniuria”.

Naa Pueyaso sequesacari pueyanotej, puetunu na shipinishano casaajanaa jiyaniijia na quiniuriatej, naacuajitij, majaari quenaaja niquiriyatu casaa cureenu quiniutianiya na jiitiasoo. Saniniuujia, paacuajaari niishiyani, pueyanoori juhuanojuaja maja seetanujuanaa cumaacaraca na quiniu puetunu casaajanaa na tojitiniuria tama nojuajaaja. ⁹ ¿Jesuurijataj? Pueyano na quiniuria, na Que Pueyasoori rupaquijiara na miiquiaari socua cumaacaaju na quiniuria na seyajiniiji. Naacuajitij, pueyano na quishacari, Pueyaso taraajenuucua puetunu pueyacuajanaa, Neyanuuri mosaaquiaari pocuara. Naa na cusonuucua pocuaratej, Pueyasoori na jiyatequiaari Jiyaniijiajanaa na quiniuria, jyanohua cumaacaraca na quiniuriajuhuaj.

¹⁰ Jamueyashijia Pueyaso quiniuucua, nojuajaari puetunu na muerasuranajuanaa panitiaquiaari na cojiniaa nojori quiniuria. Paniquiaari iri jatiqui nata shuquiriaatia pa quiniuria, puetunu tama nerajaaja na shipinishano casaatajanaajuhuaaj. Jeenucuasano pa quiniuria pa cojiniuria Pueyaso, nojuajaari jyanohua maninia miiquiaari pocuara, Neyanu na miitishacari naquiya pa niti. Naacuajitij, Neyanuuri tojetaarucuajanaa maninia quiquiaari Pueyaso muerasuranooquaji Tacuna na quiniuria. ¹¹ Jesucristo jeequenuucua pajaniya sesa pa miishanojiniiji, jatanishano pueya pa quiniuria, paari cunora seetanujuanaa Pueyaso muerasuni. Naacuajitij, Pueyasoori pa Que, taa pocuaji Tacuna Que na quiyacuaani. Cunora, Jesucristoori maja na caririquinu na Que na sequenura pajaniyajiniiji, “cua tapueyocucata”. ¹² Tariucuaaanu Pueyaso Rupaajinia naa naajiotasano quiyacuajaari na sequesano na Que:

“Cua Quenaa, janiyari cua tapueyocucata pohuatanutaniyani taamuecate quiajaniyani. Janiyari quia saquiriojosano pueya niquiara quia jaaquequejotanutaniyani cua shuquiritasacari quiajaniya”.

¹³ Tamaqui, Jesu sequesanoori naa naajiotasano quiyajuhuaaj:

“Janiyari cua Queecua tiuujia quiniutaniyani”.

Naacuajitij, mijiria na quishacari, Jesuuri na Que Pueyasooqua tiuquiaricuaa taa pa tiuquuaa nocuanijia. Socua naa naajiotasano quiyari tamaqui taa Jesu sequenutaniyani, jiyocuaaanu na tiuquitasacari pajaniya na shuquiriniutia:

“Nio pojoriiri cua Que jiyatesano cua tapueyocucara, nojori tojitianuucua janiya”.

¹⁴ Cuaqueyaraca pa quiniuucua, Sesaacaari cumaacaraca quiquiaari na shaajanura pajaniya, Pueyaso tojitiaashijiaca pa quiniuucua. Naaratej, Jesuuri cuaqueyaraca na quiniuria jataquiaarijuhuaj, taa pajaniyacuaani. Naacuajitij, nojuajaari na naata mosaanu quiquiaari pa niti. Naacuajitij, nojuajaari Sesaaca jaariuutiaquiaari pajaniya. ¹⁵ Naacuajitij, nojuajaari juhuajaniya quijacara jiyatequiaari pajaniya, nocua pa tiuuniuucua. Paari niishiyacuajani, pa cusosacari, paari

pa Jiyaniijata quiniuria quianutaniyani. Cunora, majaari tari pa puerenu pa cusonura. Nocua tiuyashijiaca pueyari seetanujuanaa cusonu puerejaca cutara. ¹⁶ Seetanujuanaa, majaari Jesucristo ninu quiquiaari Pueyaso seya na naacunura. Niquiaari cutaraari pueyacuaji na tacunura, noo pojoriicua, nocua tiuujiacate taa supuetana Abraham quiquiaari Pueyasooqua tiuujiacuaani. ¹⁷ Maninia pa naacuna na quiniuria, Jesucristoori puetunu naquiya miiniujanaa rejeretaquiaari mariyata taa narta pueya miishaaquiaacuaani. Naacuajitij, nojuajaari pocua taraajeja, pocuaji na tacunura Pueyaso. Taraatia pa miiniu niishijia na quiniuucua, pa naata nocua tiuuniu pueyaracaanu na Que Pueyaso na jiyanoootiniuria pajaniya, sesa pa miishanojiniji. Na cusonuucua, naacuajiti Pueyasoori na naata pa jiyanooni puetunu sesa pa miishanojinijijianaa. ¹⁸ Mijiria na quishacari, nojuajaari pueyaracaanu taraatia miishaaquiaari. Nojuajaari jiyanoohua saniniujiushaaquiaari sesa na miiniuria juucuajuhuaj. Naacuajitij, nojuacuajaari jiyanoohua niishijia na cumaquiniuria pajaniya, paa jaara sesa miiniuria saniniujiushaariquiani, paa jaara taraatia miishaariquiajuhuaj.

3

Jesucristo cutaraari Jiyaniijajanaa Moisésjiniji

¹ Cuarta Pueyaso pueyanaa, niaacuajaari Pueyaso saquiriojosano tama na pueyajaaja nia quiniuria. Nojuajaari Neyanu Jesu jiyaroquiaari na rupaa na niishitiniuria pajaniya, Pueyaso pueyara pa jatanishaanura. Neyanuuri na jiyanoootijia pajaniya, nocua pa tiuushacari. Cunora, jacaria pa niishiriojore socua Jesucristojiniji. ² Mijiria na quishacari, Jesuuri na Jiyarona tojjia quiquiaari pueyaracaanu, taa Moisés quiquiaari Pueyaso tojjiacuaani, Israel pueya jiihana na quishacari. ³ Naajaa, Jesucristo cutaraari Jiyaniijajanaa Moisésjiniji. Moisésri saaja narta Pueyaso pueyajinijinio pueyano quiquiaari. Saniniuujia, Jesucristoori puetunu Pueyaso pueyajanaa shipininia cutara. Naaratej, Jesucristo cuaraa tojjishaaria socua cutara. ⁴ Puetunu pueyapuejanaari supuetanaaraca. Naajaa, Pueyasojuanaari nojori shipininia seetanujuanaa. ⁵ Naacuajitij, Moisésri pueyaracaanu Pueyaso sequesano caminiujuquiaari Pueyaso saquiriojosano narta Pueyaso pueyara, maninia Pueyaso seru na quiniuucua. ⁶ Saniniuujia, Jesucristoori Pueyaso Niyanujuanaa cutara. Nojuajaari Pueyaso saquiriojosano pueya Jiyaniijajanaa. Nojuajaari nojori jiihaa saa maninijia, taa na Que paniyacuajani. Naaratej, majaari pa cartenu Jesucristo rupaa. Paa jaara Jesucristooqua tiuuquiaani, naajuhuj, paa jaara shuquiriaatia na sashiquiaa na rijionura pajaniyani, naacuajitij, paari niishiyani paari seetanujuanaa Pueyaso muerasuni.

Pueyasoori na pueya samaraataja

⁷ Pueyaso pueya pa quishacari, Pueyaso Sohuanu sequesano pa tojiri, maja pa rupatenura Pueyaso Rupaacuaji. Na sequesanoori naa naajio-tasano quiya tariucuaaanu Pueyaso Rupaajinia pajaniyarajuhuj: “Pueyanaa, niaa jaara quiarijia tojiriquia Pueyaso sequesano nijaniya, majaari na sequesano ruuretajaca nia quiniu. ⁸ Majaari naa nia quiniu taa nia supuetanaa quiquiaaricuaani, carriquia jiyajinia nojori camarucuneejotasacari pueyaracaanu. Nojoriiri Pueyaso

juaatijiojuaca quiquiaari, pueyaracaanu na tojiyashijiaca nojori quishacari. ⁹ Nojoricuajaari pueyaracaanu cua cumaacata cua miijiosano niquitiuquiaari. Cuarenta marijaari shocojoquiaari, pueyaracaanu jiyajeneta casaa cua miijiosacari cua cumaacata, maninia cua jiiitiasacari nojori. Naajaa, nia supuetanaari cua juaatijioquiaari, pueyaracaanu nojori taacanuusacari cucuaji. ¹⁰ Janiyari cunora seetanujuanaa juaaquiaari puetunu cuno pojoritajanaani. Naaratej, janiyari sequequiaarini: ‘Nojoriiri juhua cucuaji tashuquioono rucoojia tamajaaja. Nojoriiri cua niishitiojosano ruuretaquiaa saaja’. ¹¹ Janiyari cunora jiyanojuaa cua juaaniutia naa sequequiaarini: ‘Majaari nojori rupenu quiniutianiya janiya, shuquiriaatia cua quishaqui, cua samaraatanura nojori, pueyaracaanu shuquiriaatia quijiaca nojori quiniuria cuata’ ”.

¹² Naarate cuarta Pueyaso pueyanaa, tama nia cuaqueyajaaja nia cojuare jiyanojuaa, niaa mariqui Pueyaso Rupaacua tiuyashijiacara quiriohuari, Pueyasoocuai nia rupatenura puetunujuanaa. Pa Pueyasocuaajaari quiijajuhuanajaj. Nojuajaari na tojiyashijiaca saniitiojua. ¹³ Cunora, seetanujuanaa Pueyaso Rupaa tojitiajaca nia quiniuria, puetunu juucajanaa nia shiniujiutiooriquia pueyaracaanu. Naa nia miiriquia nio pa quishacari Pueyaso jiyanooniu puequeyaquishacarijia taa na Rupaa sequeyacuajani. Naa nia shiniujiutiooriquiatej nia jiiityaquiniucuaijia sesa miiniuria. Saniniucua, niaa jaara sesa miijiacua quiriquia, tama sesa nia miiniucuaarijia nia sapojonutianiya Pueyaso tojiyashijiacara nia jatanuhuaa. ¹⁴ Jesucristoocua pa tiuuniucua, paari na cojiniaara jiyatesanoni. Naacuaajitij, puetunu na jiiitiasanojuanaari puera quiriquianojuhuaj, paa jaara nocua tiuucua pueyaracaanuni, taa shushajanaa seetanujuanaa nocua tiuucua pa quiriquiaacuajani.

¹⁵ Cunora, naa naajiotasano quiyari tariucuaaanu Pueyaso Rupaa-jinia:

“Pueyanaa, niaa jaara quiarijia tojiriquia Pueyaso sequesano niajaniya, majaari na sequesano rejetejaca nia quiniu, taa nia supuetanaa quiquiaaricuaani. Nojoriiri Pueyaso juaatijiojuaca quiquiaari, pueyaracaanu na tojitiaashijiaca nojori quishacari”.

¹⁶ ¿Canapuateeri cuno pojorini, Pueyaso tojitiaashijiacani? ¿Secaja pueyatee? Maja. Puetunu noo pojoricuajaari Egipto jiyajiniji Moisés mashiquishano pueyatej. Nojorijianaacuajaari Pueyaso tojiquiaari pocuaano. Naajaa, nojoriiri saaja na ruuretajaca quiquiaari. ¹⁷ Nia niishiritioj, ¿canapuatee cuno pojorini, Pueyaso juaatijioquiaarini, pueyaracaanu nojori camarucuneejotasacari cariquia jiyajiniani? Noo pojoricuajani sesa miijiacatej. Nojoriiri cunora cusonuucuaari nojori quiojosacari nucuaco cariquia jiyaco. Na cusonuucuaarijia jamojosaaquiaariiri. ¹⁸ Nia niishirijuhuaaj, ¿canapue naa Pueyaso sequequiaari seetanujuanaa na juaaniutiani: “Majaari nia tiuquitianu quiniutianiya niaarano cua niqutionu panishano jiyajinia, tii juhujaniya shuquiriaatia nia quiniuria cuata”? Puetunu Pueyaso tojitiaashijiaca-janaacuajaari naa sequesaaquiaaritij. ¹⁹ Naacuaajitij, paacuajaari quiarijia maatia niishiyani, Pueyasocua tiuyashijiaca nojori quiniucua, majaari nojori tiuquitianu quiquiaari Pueyaso niqutionu panishano

jiyajinia.

4

¹ Pueyasocuaajaari pa masuyajaa panaatia pa quiniuria nata. Cunora, jiyanohua pa cojuare tama pa cuaqueyajaaja Pueyaso sequesanoocua pa tiuuniuria, tamonu pajaniyajinijinio mariqui jiyanoyaquishaareeri. Na sequesanoocua tiuyashijiacaari maja na rpuenu quiniutianiya Pueyaso, shuquiriaatia na quiniuria Pueyasota. ² Pueyaso rupaacuaajaari tari pa niquiara pohuatasaaquiaarijuhuaj, nocua pa tiuuniuria, taa pa supuetanaa niquiara na pohuatasaaquiaaricuaani. Nojoriiri Pueyaso rupaa tojiqiaari najuhuanaj. Majaari nocua na tiuutiuniu quiquiaari. ³ Cunora, Pueyasoori pa supuetanaajini: ‘Cua sequesanoocua nojori tiuyaquiniuucua, janiyari cunora seetanujuanaa naa sequequiaari tua juaaniutiani: ‘Majaari nojori tiuquitianu quiniutianiya cua niqutionu panishano jiyajinia, cuata nojori quiniuria shuquiriaatia’ ”.

Pajaniya saniniuujia, Jesuucua tiuujia pa quiniuucua, paa cutaraari panaatia quijiacara jatanishanoni, pueyaracaanu Pueyaso rupuejaca pa quiniuria. Pueyasoori naajuhuj: jiya shipininiu na tucuatanu nuhuaji, nojuajaari panaatia quiya. ⁴ Cunora, tamaqui tariucuacaanu Pueyaso Rupaajinia, naa naajiotasaaquiaariiri:

“Seis juucajinia Pueyaso tucuatascari puetunu na poonijosanojuanaa, na nuhuaji nojuajaari séptimo juucajinia samaatequiaari”.

⁵ Pueyaso sequesanoori tariucuacaanu na Rupaajinia naa pacutejosaaquiaari naajiotanu:

“Majaari cua tojitiaashijiaca rpuenu quiniutianiya janiya, panaatia nojori quiniuria cuata”.

⁶ Naa sequesanojinijitij, maatia niishishiyari Pueyasoori pueya masuyajaa, nojori rpuenura nojuaja, panaatia nojori quiniuria nata. Noo pojori, coteenujuanaa Pueyaso Rupaa pohuatasaaquiaaritij, nojoriiri maja panaatia quijiacara na jatanishaanu quiquiaari, Pueyaso tojitaashijiaca nojori quiniuucua. ⁷ Naa Pueyaso panitianuucua pueya, shuquiriaatia nojori quiniuria natajuhuaj, nojuajaari quiarjia masuyajaa pueya. Cunora, jiyanohua Moisés nuhuaji, Pueyasoori supuetana David naajiotaniquiaari pajaniyara saniniuujia. Naa sequeyari:

“Niaa jaara quiarjia tojiri Pueyaso rupaa, Pueyaso sequesano niaarano, majaari na ruuretanu”.

⁸ Supuetana Moisés shaajenu nuhuaji, supuetana Josué cutaraari Israel pueya tiuquitianiquiaari nojoririano Pueyaso niqutionu panishano jiyajinia. Naajaa, nojori tiuquitiasacari cuno jiyajinia, majaari seetanujuanaa panaatia quijiacara nojori jatanishaanu quiquiaari. Cunoori quiquiaari Pueyasocua tiuyashijiaca nojori quiniuucujuhuj, taa nojori supuetanaa quiquiaaricuaani. Naacuajitij, cuno jiyajinia Josué tiuquitiasacari nojori, majaari panaatia quijiacara nojori jatanishaanu quiquiaari. Nojori jaara panaatia quijiacara tari jatanishano quiriqia, ¿Pueyasotucua casaara quiarjia pa masuuriquiaja Jesuucua pa tiuuniuriani, seetanujuanaa panaatia quijia pa quiniuria natani?

⁹ Naacuajitij, paacuaajaari niishiyani, Pueyaso pueyaranoori panaatia quijiacara jatanishaanutaniya, shuquiriaatia pa quiniuria Pueyasota pueyaracaanu. ¹⁰ Naacuajitij, cante Jesucristoocua tiuujiani, nojuajaari panaatia quijiaara jatanishaanutaniya. Majaari socua na tacaaniu

quiniutianiya taa tama na cuaqueyajaaja na jiyanootiniutianiya Pueya-soni. Naacuajitij, nojuajaari juhuajaniya quijia quiniutianiya, tarijia najuhuana na poonijosanojiniji, naatej, taa Pueyasोजना samaate-quiaari na poonijionu nuhuajicuaani. ¹¹ Naaratej, panaatia pa quiriquia quiarijia. Naa na rupaa tojijia pa quiri paa mariqui saniitiosaareeri taa pa supuetanaa Israel pueya saniitiosaaquiaaricuaani, Pueyaso sequesano tojiyashijia nojori quiniucua.

¹² Pueyaso Rupaari samiitianijia, cumaacaracajaariuhua pueya jiuujiajinia na poonijionura. Pueyaso Rupaari jiyanoohua socua shamaticuaja nijiniaquetucujia mueruujiniji. Nijiniaquetucujia mueruuri saaja na naata pa cuaqueya jiyatanu. Pueyaso Rupaa cutaraari pa sohuano tohuariquijia, pa niishitijia tohuariquijiano. Na naata cuhuatanu poojiajinia jiyasohuaja pa niishiriojosano casaa, poojiajinia pa niishishoo casaanio. Naacuajitij, Pueyaso Rupaari poojiajinia sesa casaa pa niishiriojosano nequesoreeja, jiyasohuaja pa miiniu panishano poojiajinia pa niishiriojosano. ¹³ Puetunu Pueyaso shipinishano casaa-janaani, majaari na cureenu quiniutianiya na nequesoreyaquishoo. Majaari quenaaja niquiriyatu jamaaniu quiniutianiya nocuaji, nequesoreesoo na cureenura. Nojuacuajaari maatia niishiya puetunu pa miishanojuanaa, puetunu pa niishiriojosanojuanaanio.

Jesujuanaari Pueyaso jiyanootijia pueya

¹⁴ Pueyaso Niyanu Jesuni, nojuajaari na Que jiyanootijia pajaniya. Nojuajaari jiya cajiniocua tohuariquijiaari na Queecua na tiuquiniuria. Nojuajaari quiarijia tii pocuara secojiya na Que. Naacuajitij, Jesucristoocua tiuujia pa quiniucua, maja cumaati pa pishiniu nocuaji. Paacuajaari na muerasuniyojuani. ¹⁵ Jesu, Pueyaso pa jiyanootijiani, nojuacuajaari pocua taraajenu niishijia paa jaara saniniujiushaariquia sesa pa miiniuriani. Nojuacuajaari naa saniniujiushaaquiaarijuhua sesa na miiniuria juucua, naate taa pa saniniujiushaaquiaacuaani. Maja cutaraari sesa na miiniu quiquiaari quenaaja. ¹⁶ Cunora, pa jiyanoojia Pueyaso pa rupერიquia pa puereyaquiniutia. Nojuacuajaari pa tojiquiaa pa secijosacari nojuaja, na jiyanooniuria pajaniya sesa pa miishanojiniji. Ritia pa cumaquiquiaajaariuhuj, pa rejeretanura paa jaara sesa miiniuria saniniujiushaariquiani.

5

¹ Puetunu pueyacuara secojonaa jiyaniijajanaari pueyaracaanu narta pueyajinijinio saquiriojosano pueyano quiquiaa, taa Pueyaso niishitiquiaari supuetana Moiséscaajani. Nojuajaari jiyatesaaquiaa pueyacuaji na tacunura Pueyaso. Naacuajitij, nojuajaari nareja pueya niqutiojosano Pueyasorano masejojua. Naajuhuj, pueya jaara sesa miiri, pueyacuara secojonaari pueya seya nanaca shootequiaa, Pueyaso jiyanooniuria nojori, sesa nojori miishanojiniji. ² Pueyacuara secojona quiniucua pueyanojuhuj, nojuajaari sesa miijajuhuj. Naacuajitij, nojuajaari na naata narta pueyacuara taraajenu, sesa nojori miishacari, nojori niishiyaquishacari maninia miiniujuhuj. ³ Naacuajitij, nojuajaari tama nocuarajaaja seya nanaca shootequiaa sesa na miiniucua, taa na miiquiaacuaa narta pueyacarani, sesa nojori miishacari. ⁴ Niaacuajaari niishiya, majaari quenaaja tamonu

pueyano na naata tama na cuaqueyajaaja jiyatenu pueyacuara secojona na quiniuria. Pueyasojuanaacuajaari tamajaaja saquiriojojua na panishano pueyano, cuno pueyano quiniuria pueyacuara secojona. Pueyasocuaajaari naa saquiriojoquiaaricuaa Moisés tarajanu Aarón, pueyacuara secojonaa jiyaniijia na quiniuria. ⁵ Naajuhuj, Jesucristoori maja tama na cuaqueyajaaja na jiyatenu quiquiaari pueyacuara secojona na quiniuria, Pueyaso na jiyanootiniuria pajaniya. Tama Pueyasojuarijia na jiyatequiaari pueyacuara secojona na quiniuria. Nojuajanaacuajaari naa sequequiaari Jesu:

“Quiaari quiyanu. Janiyari pueyanora quia muerateree jiyacuani cua saquiriojosano pueya Jiyaniijia quia quiniuria”.

⁶ Pueyaso sequesanoori tamaqui tariucuacaanu na Rupajinia naa naajiotasano quiyajuhuj:

“Pueyaracaanu rishijia quia quiniucua, quiaari pueyaracaanu pueyacuara secojoriquiano cutara, taa Melquisedecuaani”.

⁷ Naa pueyano na quishacari mijiriatej, Jesucristoori jiyanohua saniniujiushaaquiaari. Naquiya na miyaquishaanuucuaaji juucua, nojuajaari na Que Pueyaso secojoquiaari jiyanohua na nujuquenuta. Jiyanohua martequiaariiri na Que na secojosacari, maja na mosaanura. Nojuajaari niishiquiaari na Que na naata nocua taraajenu, maja na mosaanura. Naajaa, na Que tojjia na quiniucua, na Que sequequiaariiri: “Naajaa, quia miiri quia panishano cua Quenaa, taa quia panitiaquiaari miiniu janiyacuajani”. Na Queeri na tojiquiaari. ⁸ Jesucristoori seetanujuanaa Pueyaso Niyanu quiquiaari mijiria na quishacarijuhuaj. Naajaa, na niishishacari nojuajaari jiyanohua naquiya miishaanutaniya nojuaja jaara na Que tojiri, naajaa, nojuajaari saaja na tojiquiaari. ⁹ Naacuajitij, tojetaarucujanaa maninia miijia na quiniucua, nojuajaari pueyacuaji Tacunara quiquiaari, puetunu na tojitiajacajanaa na jiyatenura pueyaracaanu rishijiacara. ¹⁰ Cunora, na Que Pueyasoori na jiyatequiaari pueyacuara secojona na quiniuria pueyaracaanu, juhua Melquisedec.

Jiyanohua puereetaari Jesu tojiniu tarinitianu

¹¹ Janiyari queraatia socua nia niishitiojonu paniya Jesucristojinijini, nia niishiniuria nojuajaari seetanujuanaa juhua Melquisedec. Cunoori puera jiyajeneta, maatia cua niishitiojonura nijaniya, juhua niishiyashijiacara nia quiniuuquiohua. Niaacuajaari tari niyajetarucuaa tariucuacaanu nia tojishano. ¹² Tariucuacaanujiniji Pueyaso rupaa tojjijia nia quiniucua, ¿taateni? Naa mariqui na niishitiojonuujuaca quiriquia tari. Saniniuuja, niaari quiarijia paniya socua nia niishitiojosaanuhua maatia niishishaatia casaa Pueyasojiniji. Niaari juhua naatujooriria quiriohuacuaa, juhua shipiyataaquishoojua. Naacuajitij, majaari nia naata jiyajeneta niishitiojosano casaa niishiniu. ¹³ Naa maatia niishitiojosano niishijia nia quishacari saajatej, niaari juhua conajaa quiyajaa, saaja quitiaacaacua naataja. Majaari Jesucristo niishitiojosano tojitiajaca nia quiniu, maninia miijia nia quiniuria. ¹⁴ Juhua tariucua mashiquioriria nia jiyateriquiani. Mashiquiori cutaraari puetunu casaajanaa miaquenujuaca. Naajuhuj, puetunu Jesucristo niishitiojosanojuanaa niishijia nia quiriquia. Naa jaara

na niishitiojosano tojjiaca quiriquia, saaja maninia miijiaca nia quiniuria, niaari maninia niishiniutianiya teyano casaate maniniani, teyano casaate sesa saniniunijia.

6

¹ Naacuajitij, majaari juhua naatujoori nia quiniu pueyaracaanu. Seetanujuanaa socua Pueyaso rupaa tojtiajaca nia quiriquia, juhua tariucua cumantumaca mashaja nia quiniuria, cumueeca. Niaacuajaari tari coteenujuanaa Jesucristojiniji niishitiojosano niishijiaca. ¿Niaatucua casaara socua niishitiojosaarohua nioojia nia tacatonurani, maja nia tiuuniuria maninia nia miishanoocua najuhuananij? Niaacuajaari tari niishiya, majaari nia naata maninia nia miishanota tama nia cuaqueyajaaja jyanootiniu Pueyaso. Cunora, niaari Jesucristoocua tiuujiacara quiquiaari tari, Pueyaso jyanooniuria nijaniya. ² Naajuhua, niaacuajaari tari niishitiojosaaquiaari moojinia nia tiuquinishaanura Pueyaso pueya nia quiniuucua. Niaari niishitiojosaaquiaarijuhua Pueyaso pueyacia nia nianura nia juaashiquia nojoriicuara nia secijosacari, Pueyaso cumaquiniuria nojori. Niaari niishiyajuhua, macunucuaari samiitiaconutaniuhua. Nojorijinijinio saniniuuja, Pueyaso tojiyashijiacaari pueyaracaanu saniitiosocoriquiano jiyatesaanutaniya. ³ Quiarijiani, majaari socua cua niishitiojonu quiniutianiya nijaniya nio shusha cua sequesanojiniji nijaniyani. Pueyaso cumaquishacari janiya, janiyari socua jiyajeneta casaa Jesucristojiniji niishitiojonutaniya nijaniyani.

⁴⁻⁵ Pueyano jaara Pueyaso Rupaa tojiyashijiara quiriohua, najuhua-naari na niishitiojonu pacutenuhua, nojuaja jaara tari Pueyaso Sohuanu cuhuatasano jiuujiaraca quiquiaari. Najuhuaanaari nojuaja jaara tari jiyanooshano quiquiaari, nojuaja jaara tari Pueyaso Sohuanu cumaaca niishijia quiquiaari. Najuhuanajaariuhua nojuaja jaara tari Pueyaso Rupaa shuquiritiaja quiquiaari, nojuaja jaara tari Pueyaso cumaacaraca quijia quiquiaarijuhua. ⁶ Jiyano pueyanotej, majaari tari na naata sesa miijia na quiniuucua taraajetesaanuhua, Jesucristoocua na tiuuniuhua seetanujuanaa. Nojuajaari juhua Pueyaso Niyanu teetenu pacuteya niyacutesanojinia, naa na ruuretajaca na quiniuucua. Naa Jesucristo tacartaja na quiniuucuatej, tamasaari Jesu rerequetequiaajuhua. ⁷⁻⁸ Naacuajitij, cuno pueyanoori juhua noo cuhuariquia tee cuniqui sesa jiyasocua maniniucuaa moritianucujani, riyocuacanio. Pueyasoori najuhua maru niyojotequiaa. Majaari cuno cuhuariquiajinia nataacuaca muetunu. Jiyano cuhuariquatej, na camaru cuara catijiaataanoj. Pueyasoori naa saniitionutaniya nocuaji ruparequeno pueyajuhua. Saniniuuja, Jesucristo rupaa tojjiacani, nojoriiri juhua maninia cuhuariquia. Pueyasoori maru niyojotequiaa nocua, maninia na muetutenura tii natoosano casaa. Naacuajitij, na camaruuri queraatia miajajauraca quiniutianiya. Naajuhua, Pueyasoori na tojtianu tarinitiaashijiaca shuquiritiniutianiya pueyaracaanura.

Pa niishishacari Pueyasoori maninia pa miiniutianiya, paari cunora na tojiniu tarinitiaaquiquiaani

⁹ Miriqui cua pohuatasano sesa cuhuariquiajinijini, cunoori maja nijaniya cua panishano pueyanaa. Majaari cua taacanunu nijaniyajiniji. Niaacuajaari pa Jiyaniijia tojtiajaca quiquiaa. ¹⁰ Pueyasocujaari

jiyanohua maninia. Nojuajaari maja na niyajetanu quiniutianiya maninia nia miishano niarta Pueyaso pueya, Pueyaso panijiaca nia quiniuucua, taa quiarijia nia miyajaacuajani. ¹¹ Naatej, taa shitimia niarta Pueyaso pueya naacujuacatucaja nijaniyani, naajuhuj, janiyari nia panitiaani pa Jiyaniijia nia sashiniuria nia timiniutiajuhuaj, nojuaja jaara pa rijionuucua tiuquiriohuajaatijia. Nia niishitiriquia-jaaniuhuj, Pueyasoori jiyanohua maninia miiniutianiya pajaniya. ¹² Majaari nia macuhuajeconu juhua taajecori nia quiniuria pa Jiyaniijia. Saniya nia quiriquia cutara juhua tariucuaaanu parta Pueyaso pueya. Nojoriiri shamaatia Pueyasooocua tiuujiaqui quiquiaari pueyaraaanu. Naquiya miiniu rejeretajacaari quiquiaarijuhuaj. Naaratej, Pueyasocujaari tari maninia miiquiaa nojori, taa seetanujuanaa na sequequiaari na pueyarano na miiniuriacuajani.

¹³ Pueyasoori seetanujuanaa saaquiano Abraham sequequiaari taa na miiniutianiya maninia nojuajani. Majaari na naata sequenu, tamonu cuara na saniitiooranon, nojuaja jaara miyaquiri na sequesano saaquiano Abraham. ¿Cantucuaa cumaacaraca Pueyaso na saniitionurani? Shaaqui. Nojuajanaacuajaari Jiyaniijiajanaa. ¹⁴ Naaratej, Pueyasoori naa sequequiaari saaquiano Abraham:

“Janiyari seetanujuanaa maninia miiniutianiya quiajaniyani. Janiyari quia jihuahua muetutenutaniya jiyanohua queraatiarani”.

¹⁵ Naa Pueyaso sequenu nuhuaji saaquiano Abrahamtej, Abrahamri juhuajaniya sashiquiaari Pueyaso cuara na sequesano miiquiaarijiaatijia. ¹⁶ Pueyanaa, niacuajaari niishiya taa pa miiquiaani, parta pueyano niishiniuria paari nojuaja pa sequesano miiniutianiya seetanujuanaani. Paari naa sequequiaani: “Seetanujuanaa quia sequeyanijia. Majaari cua sapojonu. Pueyaso cuara saniitioora janiya, janiya jaara cua sequesano miyaquirini”. Naa pa sequesacaritij, parta pueyanoori juhuajaniya pocua tiuujia. Majaari tari na taacanuunu pocuaji. ¹⁷ Naajuhuj, Pueyaso sequesacari taa seetanujuanaa na miiniutianiya na pueyaranoni, nojuajaari jiyanohua panitiaquiaari pajaniya, na sequesanoocua pa tiuuniuria seetanujuanaa. Majaari na paniniu quiquiaari pa taacanuunura quenaaja na sequesanojiniji. Cunora, nojuajaari naa sequequiaari: “Janiyacujaari Pueyasoni. Majaari cua niishiniu sapojonu. Cua sequesanoori seetanujuanaa”. ¹⁸ Naacuajitij, Pueyasoori maatia sequequiaari taa na miiniutianiya nocua tiuujiacarano pueyarani. Majaari saaja cuno na sequenu quiquiaari. Nojuajaari sequequiaarijuhuaj: “Cua sequesanoori seetanujuanaa”. Pueyaso sequesanoori maja na naata jatanishaanu. Naacuajitij, pajaniya, nocua tiuujiaqui pueyani, paari poojia cajitiquiaani maatia pa niishishacari, pocuaji Tacunaari puetunu na sequesanojuanaa miiniutianiya pajaniyara. Naacuajitij, majaari pa taacanuunu quenaaja. ¹⁹ Naa Pueyaso sequesanoocua tiuujiaqui pa quishacaritij, paari juhuajaniya naquiya miiniu rejeretajaca quiquiaani. Sesaacaari maja na naata Pueyaso jaariutianu pajaniya. Naacuajitij, paari juhua buqueni, pootioyaquishoo, niiquia casaacuaji na jaasutanuucua. Cuno niiquia casaari niquishoo, moo cariquimia pojiyari. Naajuhuj, nocua pa tiuushanoni, nojuajaari jiyocuacaanu quiya, niquishoojaariuhua na Que Pueyaso shuriucua na quiniuucua. ²⁰ Nojuajaari na Quecua quianu pa puetaquiaari. Nojuajaari tii pueyaracaanu secoquiaa na

Que pocuara, na Que jiyanooniuria pajaniya. Naacuajitij, Pueyasoori na jiyatequiaari pueyaracaanu secojona na quiniuria pueyacuara, taa Melquisedec quiquiaaricuaani.

7

Jesuuri pueyacuara secojona, taa Melquisedec quiquiaaricuaani

¹ Cuno Melquisedecni, nojuajaari Salem tiaca jiyaniijia quijia. Nojuajaari Pueyasojuaanaa secojona pueyacuara. Pa supuetana Abraham tacatesacariuhua na naminiu nuhuaji na paraa, tamasaca tiacajiniijinio jiyaniijianucuaani, Melquisedecri nocua tohuataquiaari Salem tiacajiniji. Naa na sequequiaari: “Abrahamnaa, quiaari Pueyaso timitiasano. Pueyasoori quia miiniutianiya jiyanohua maninia”.
² Jiyacaritij, Abrahamri na paraa casami nitariquihua na quiquiojiniohuara. Naacuajitij, nojuajaari puetunu cuno casamijiniijiniojuanaa Pueyasora na riuriosano niqutioquiaari Melquisedec. Abrahamri naa miiquiaari na niishishacari Melquisedecri Pueyaso secojona pueyacuara quiquiaari. Pueyanaa, nio Melquisedecjiniji nia niishiri. Pueyano rupaajinia, na sesaari sequeya, “Saaja maninia miijia jiyaniijia”. Naajuhuj, na tiaca sesa Salemni, cunoori pueyano rupaajinia sequeya, “Juhujaniya quijia pueya tiaca”. Na sesaari naa quiquiaari na pueya jiuujia cajitijia na quiniucua. ³ Majaari tojetaarucujanaa na niishishaanu, ¿queraca quiquiaariti, nucaracajuhuj, supuetanaaracano? Majaari quenaaja na pohuatasaanujuhua na rasaanujiniji, na shaajenujinijinio. Naacuajitij, pajaniyara, Melquisedecri juhua pueyaracaanu quijiajuhanajaj. Majaari na niishishaanujuhuj, tamonute na niti jiyatesaaquiaari pueyacuara secojona na quiniuria. Maja. Naacuajitij, nojuajaari juhua Pueyaso Niyanu, pueyacuara secojona na quiniuria pueyaracaanura.

⁴ Pueyanaa nia niishiri, Melquisedecquiiri seetanujuanaa tojishano pueyano quiquiaari socua pa supuetana Abrahamjiniji. Naaratej, pa supuetana Abrahamri nareja na niqutioquiaari na paraa na shocotasano casamijiniijinio. Secaja niqutioquiaariiri taa Pueyaso rootaquiaari pa supuetanaacuajani, nojori niqutiojonura nera. Tariucuaaanu, Pueyasoori pa supuetanaa niishitiojoquiaari nojori niqutiojonura secaja, puetunu nojori jittiasano casaajiniijijianaa. Naacuajitij, pueyano jaara diez casaa jitiare, cuara Pueyasora niqutioora niqiriyatujua. ⁵ Pueyasocujaari supuetana Leví niquihuacuajinio supueno pueya jiyatequiaari narta Israel pueyacuara secojona nojori quiniuria. Nojoriiri jiyatesaaquiaari Pueyasorano pueya niqutiojosano masejua nojori quiniuriajuhuaj. Naa Pueyaso sequesano cuajaari Moisés Rootasanojinia naajiotasaaquiaari. Abrahamcuajaari puetunu Israel niquihuajanaa supuetana quiquiaari, maja saaja Leví supuetana. Naajaa, Leví niquihuacuajinio supueno pueyari Pueyasora narta Israel pueya niqutiojosano masejua. ⁶ Melquisedecri pueyacuara secojona quiquiaarijuhuaj. Maja cutaraari Leví niquihuacuajinio na supueno quiquiaari. Naajaa, seetanujuanaa pueyacuara secojona na quiniucua, Abrahamri Pueyasorano na riuriotaca na niqutioquiaari. Abrahamri seetanujuanaa Pueyaso timitiasano pueyano quiquiaari. Naaratej, Pueyasojuaanaacuajaari tari Abraham sequequiaari, nojuajaari maninia na miiniutianiya. Naajuhuj, Melquisedecri pa supuetana

Abraham sequequiaari Pueyasoori jiyano hua maninia miiniutianiya nojuaja. ⁷ Paacuajaari niishiyani, Pueyaso jaara maninia miiniutianiya tamonu pueyano, na sequesano caminiujiunia pueyanoori socua tojishano pueyano maninia na miishocoriquiano pueyanojiniji. Naacuajitij, paari niishiyani Melquisedecri socua tojishano pueyano quiquiaari Abrahamjiniji. ⁸ Quiarijiani, Pueyasorano pueya niqutiojosano masejojuacani, puetunu nojorijianaari shaajejaca pueya. Saniniuujia, tariucuacaanu Pueyaso Rupaajinia pa serojosacari Melquisedecjiniji, juhua saminiojiniji pohuatashiyari. ⁹⁻¹⁰ Nia niishirijihuaaj, Leví niqiohuacuajinio pueyacuajaari Pueyasorano pueya niqutiojosano masejojuaca, pueyacuara secojonaa nojori quiniuucua. Cua tojiri pueyanaa, Melquisedec naacuneetoosacari Abrahamta, Abrahamri jiyacari tari na cuaqueyajinia jiitariquiaa puetunu nocuajinio supueriquiano pueyajanaa. Naacuajitij, Abraham niqutiosacari Pueyasorano na riuriotaca Melquisedec, pa naata sequenu Leví quiriquianojuanaari jiyacari Melquisedec niqutioquiaari, Abraham quiniuucua na jiyasorano tari.

¹¹ Leviicuajinio supueno pueyari pueyacuara secojonaa quiquiaari, nojori miiniuria taa Moisés Rootasanojinia sequequiaaricuajani. Naacuajitij, narta Israel pueya jaara sesa miiquiaari, nojoriiri sesa miijiaa seya puecooquiaari pueyaracaanu tama na camaruhuacuara jaaja, nojori na jiyanootiniuria Pueyaso. Naa nojori miishano jaara pueya jiyateriquia tojetaarucuajanaa sesa miyashijiacara, paa maara tamonu pocuara secojoriquiano paniyaquiriquiani. ¡Tamonu pocuara secojoriquiano cutaraari panishaaquiaari! Juhua pueyaracaanu rishijia Melquisedec panishaaquiaari cutaraari, maja juhua Aarón saniniuujia, nocuajinio supueno pueyano. Nojoriiri shaajejaca cutara. ¹² Aarón cuajaari narta pueyacuara secojonaa jiyaniijara jiyatesano quiquiaari, taa Moisés Rootasanojinia sequeyacuajani. Naacuajitij, tamonu pueyano jaara jiyatesaarecuaa pueyacuara secojona na quiniuria, tamonu rootasanoori panishiyajuhuaaj, Moisés Rootasano niti na quiniuria. ¹³ Tariucuacaanu Pueyaso Rupaajinia, maatia sequeyacuajaari, Pueyasoori tamonu pueyano jiyatenutaniya pocuara secojoriquiano. Nojuacuajaari pa Jiyaniijia Jesu. Nojuajaari maja Leví niqiohuacuajinio supueno. Nojuajaari supuetana Israel niyanuucuajiniocuaaja, saniniuujia tamonu neyanuucuajiniojaarohuaaj, teyanuucuajinio quenaaja niquiriyatu pueyacuara secojona supueyaquiquiaaricuajani. ¹⁴ Maatia niishishiyacuajaari, pa Jiyaniijiaari Judá niqiohuacuajinio supueno quiquiaari. Judaari Leví tarajanucuaaja. Moisés pohuatasacari pueyacuara secojonaajinijini, majaari quenaaja Judá na jiyaniquiniu quiquiaari.

¹⁵ Quiarijiani, quiarinio pocuara Secojona quishacari juhua Melquisedec, paari maatia niishiyani Leví niqiohuacuajinio supueno pueyacuara secojonaari sanitishaaquiaari. ¹⁶ Nojoriiri pueyacuara secojonaa quiquiaari saaja Leví niqiohuacuajinio supueno pueya nojori quiniuucua. Jesucristo cutaraari pocuara secojonara jiyatesaaquiaari pueyaracaanu rishijia na quiniuucua. ¹⁷ Cunora, Pueyasoori naa sequequiaari nojuajiniji:

“Quiaari pueyacuara secojona quiniutianiya pueyaracaanura, juhua Melquisedec”.

¹⁸ Naacuajitij, puetunu Moisés rootasanojuanaa pueyacuara secojonaa pueya miishocoriquianoori tari jatasaquiaari, najuhuana na quiniuucua. Cuno miishanoori cumaacaaju quiquiaari pueya na jataniniuria. ¹⁹ Seetanujuanaari, Moisés Rootasanoori maja na naata quiquiaari saaja maninia miijiacara na jataniniuria na tojitiajaca. Quiarijia saniniuujia, paari Pueyaso rupaa Jesucristojiniji jiiitiaani. Nocua pa tiuushacari, Jesucristoori pueyaracaanu pa jiyanootiquiaa na Que, juhuajaniya pa rupuenura nojuaja.

²⁰ Na Que sequesacari Neyanu quiniuria pocuara secojona pueyaracaanura, nojuajaari naa sequequiaari seetanujuanaa. Naacuajitij, paari panaatia quiquiaani pa niishishacari Jesucristoori na Que shuriucua quiya, pueyaracaanu pocuara na secojonura na Que. Saniniuujia, majaari naa Pueyaso sequenu quiquiaari Leví niquiohuacuajinio supueno pueya, seetanujuanaa pueyaracaanu pueyacuara secojonaa nojori quiniuria. ²¹ Saniniuujia, Neyanujiniji na sequesaroni, cunoori seetanujuanaa. Majaari na sequesano jatanishaanu quiniutianiya. Naacuajitij, naa naajiotasano quiyari tariucuaaanu Pueyaso Rupaa-jinia:

“Jiyaniijia Pueyasoori seetanujuanaa sequeree na miishocoriquiano. Majaari na sequesano na jataniniu quiniutianiya. Neyanu sequereecuajaari: ‘Quiaari pueyacuara secojoriquiano pueyaracaanu’ ”.

²² Naacuajitij, pueyaracaanu na Que shuriucua Jesu quiniuucua pocuara na secojonura, paari seetanujuanaa niishiyani paari Pueyaso pueyani, Neyanuucua pa tiuuniuucua. Naacuajitij, Pueyaso rupaa Jesujinijiiri socua jyanohua maninia Moisés Rootasanojiniji. Cunoori pueyaracaanu rishijia Jesu quiniuucua. ²³ Saniniuujia, Leví niquiohuacuajinio supuenoni, queraatia pueyacuara secojonaari quiquiaari pueyaracaanu rishiyashijia nojori quiniuucua. ²⁴ Jesu cutaraari shaa-jeyashijia. Naa pocuara secojona na quishacaritij, majaari quenaaja tamonu sanitiniu quiniutianiya nojuaja. ²⁵ Naacuajitij, nocua pa tiuushacari, nojuajaari pueyaracaanu pocuara secojoquiaa, tojetaarucujanaa maninia miijiacara pa jatanishaanura, Pueyaso pa rupuenura. Majaari pocuara na Que na secojonu na tarinitianu quiniutianiya, shaa-jeyashijia na quiniuucua.

²⁶ Jesuuri namitia pocuara secojona na Que. Majaari tamonu quiniu juhua nojuaja. Nojuajaari tojetaarucujanaa maninia miijiajuhanajaj, juhua na Que Pueyaso. Majaari quenaaja sesa miiniu na niishiniu. Sesa miijiaa tajinia na quishacari mijiria, naajaa, majaari sesa na miiniu quiquiaari quenaaja. Saaja maninia miijia na quiniuucua, nojuajaari tojetaarucujanaa tamaatia quijia mijiria quiniaa pueyajiniji. Naaratej, Pueyasoori jiyocuaaanu quijiaara na jiyatequiaari, Jiyaniijiajanaa na quiniuria na shuriucua, tii na secojonura na Que pocuara. ²⁷ Leví niquiohuacuajinio supueno pueyacuara secojonaa jiyaniijianucuaari pueyaracaanu tama sesa nojori miishanoocuarajaaja seya puecootujua coteenu, Pueyaso jiyanooniuria nojori. Naa nojori miiniu nuhuajitij, nojoriiri jiyacari narta Israel pueya seya puecooquiaari sesa cuno pojori miishanoocuaru saniniuujia. Maja cutaraari naa Jesu miiniu quiquiaari. Nojuaja jaara tama na cuaqueyajaaja tarinitiaquiaari pocuara na mosaanura juhua borregoniyojua sesa pa miishanoocuaru,

cunojuanaari na cusonu quiquiaari. Majaari socua na caminiu quiniutianiuhua cusonu. Naa na cusonuucua pocuaratej, puetunu sesa miijiacajanaari na naata jiyanooshaanu puetunu sesa na miishanojinijijianaa. ²⁸ Moisés Rootasanojinia, Pueyasoori tii sequeyacuaja canapete pueyacuara secojonaa jiyaniijjara jiyateshiyani. Puetunu cuno pueyacuara secojonaa jiyaniijianucujajanaari sesa miijiac quiquiaari, juhua puetunu pueyajuhuj. Jiyanohua Moisés nuhuaji, Pueyasoori saniniuujia tama Neyanujuaaja jiyatequiaari pocuara secojonajanaa na quiniuria pueyaracaanu. Na Que tojjia na quiniuucua pueyaracaanu, naquiya miiniu rejeretaja na quiniuucujuhuj, naacuajitij, nojuajaari tojetaarucujajanaa maninia, pocuara secojonara na jiyatesaanura.

8

Quiarinio Pueyaso Rupaacua pa tiuushacari, Jesuuri pa jiyanootiquiaa na Que

¹ Nio, janiya na pacutenutaniuha sequenuni, cunoori socua panishano nia niishiniuria. Cua tojjiri. Pueyaso Niyanu quiniuucua pocuara secojona, nojuajaari na Que miaquetajara cajiquiaari jiyocuacaanu. ² Nojuajaari tii na Que secojoquiaa pocuara Pueyaso Quishaquijianaa. Cunoori Pueyasojuaanaa shipinishano quiquio, maja pueyano tiasano.

³ Puetunu pueyacuara secojonaajanaari jiyatesaaquiaari nojori masejonura narta pueya poosano casaa, Pueyasora nojori niqutiojosano. Naajuhuj, nojoriiri seya puecojuaca, Pueyaso nojori jiyanootiniuria. Naacuajitij, Jesucristo quiniuucua pueyacuara secojonajuhuj, nojuaja cuaara casaa jiitiaara, Pueyaso na niqutiosocoriguianojuhuj. Cuno casaacujajari tama na cuaqueyajaaja quiquiaari, pocuara na mosaanura, Pueyaso jiyanooniuria pajaniya. ⁴ Leví niqiuoahuacuajinio supueno pueyacuara secojonaacujajari pueya nitiasano nojoriicua masejoquiajaa, Pueyasora nojori niqutiojosocoriguiano taa Moisés Rootasanojinia sequeyacuajani. Naacuajitij, Jesucristo jaara mijiria quiriquiaja, nojuaja maara pueyacuara secojona quiyaquiriquiaj. Pueyacuara secojonaacujajari queraatia quiya. ⁵ Pueyacuara secojonaa jecajosano casaa Pueyaso Secojoua tiajinia nojori jiitiasanoni, nojori miishanonio, puetunu cunojuanaari saaja juhua jiyocuacaanu casaa naaqui. Cunora, Moisés jaara tari shipiniriquiaa Pueyaso Secojouara suhuorotu, puetunu na casamitajajanaano, jiyacaritij, Pueyasoori naa Moisés sequenu pacutequiaari:

“Moisésnaa, cua tojjiri. Maninia quia miiri jacaria puetunujuanaa, naatej, taa cua niqutiquianucujaja quiajaninyani, Sinaí tuhuananuucua quia quishacari”.

⁶ Pocuara Secojonajanaa miishanoori jiyanohua maninia socua pueyacuara secojonaa Leví niqiuoahuacuajinio supueno miijiosanojiniji. Pocuara Secojona cutaraari tama na cusonutajaaja pa jiyanootiquiaari Pueyaso. Naacuajitij, Pueyaso rupaa Jesucristojinijiiri jiyanohua socua maninia Moisés Rootasanojiniji.

⁷ Pueya jiuujia jaara na naata quiriquia seetanujuanaa sesa miyashijiacara jatanishano Moisés Rootasano tojjiaa nojori quiniuucua, Pueyaso maara quiarinio rupaa niishitiyaquiquiaari pajaniya. ⁸ Saniniuujia, Pueyasoori niishiquiaari Israel pueyari maja na naata quiquiaari puetunu Moisés Rootasanojuanaa tojjiniu. Cunora,

tariucuacaanu pueyara Pueyaso sequesano caminiujiunia sequesanoori naa naajiotasano quiya:

“Jiyaniijia Pueyasoori sequeya: ‘Tamacari, janiyari quiarinio rupaa niishitiniutianiya Israel jiyajinijinio pueyani, Judá jiyajinijinio pueyano. Teyano pojoriti nocua tiuyani, nojoriiri seetanujuaanaa cua pueya quiniutianiya. ⁹ Quiarinio cua rupaari tamaatia quiniutianiya Moisés cua niishitiojosano rupaaajiniji puetunu Israel pueyarajanaa. Jiyacaritij, janiyari nojori mashiquiquiaari Egipto jiyajinijini. Juhua nojori que, janiyari nojori jaatucunuuriquiaa juucuan nojori cua niquitiosocoriquiano jiyajiniara. Saniniuujia, nojoriiri Moisés cua rootasano nojoriria tojiniu paniyaquiquiaari saaja. Janiyari cunora nojori cartequiaarini’. Jiyaniijia Pueyasoori naa sequeree. ¹⁰ Socua sequeyari: ‘Nio pa quishacari nuhuaji, janiyari naa miiniutianiya cua saquiriojosano pueyarani: janiyari coojia nianutaniya nojori jiuujiajiniani. Naacujitij, cua rootasanoori juhua naajiotasano quiniutianiya nojori niishitiajajinia, seetanujuaanaa cua tojitiyajaca nojori quiniuria. Naacujitij, janiyari nojori Jiyaniijiajanaa quiniutianiyani. Nojoriiri saniniuujia cua pueya quiniutianiyacujua. ¹¹ Jiyacaritij, pueyano jaara janiyajiniji pohuatanu paniri narta pueyano, na cojiniajuhuaj, tapueyocucanio, cunoori najuhuaana quiniutianiya. Puetunu pueyapuejanaacuajaari tariucua cua niishijaca quiniutianiya; jiyaniijianucua, poonijiotasano pueyano. ¹² Janiyari nojoriicua taraajeja quiniutianiyani. Majaari cua saniitionu quiniutianiya nojori, sesa nojori miishanojiniji. Naa cua jiyanooshacari nojoritij, majaari socua cua saneejonu quiniutianiya sesa nojori miishano. Janiyari puetunujuanaa na niyajetanutianiyan’ ”.

¹³ Naa Pueyaso sequesacaritij, taa nojuaja quiarinio na rupaa niishitiniutianiya pajaniyani, nojuajaari tariucuacaanu Moisés na rootasano jiyatequiaari tariucuneera. Naacujitij, Moisés Rootasanoori quera shaajasaanutaniya puetunujuanaa.

9

Tariucuacaanu Moisés suhuorotesano Pueyaso quiquioranoni, cunoori juhua jiyocuacaanu Pueyaso quiquiojuhuaj

¹ Tariucuacaanu, Pueyasoori Moisés sequequiaari mijiria na quiquiorano na suhuorotenura. Na niishitiojoquiaarijiaariuhua taa pueyacuara secojonaa poonijionutaniya cuno na quiquiojiniani. ² Pueyaso Secojua suhuorotuuri caapiqui sohuacaraca quiquiaari. Samari nujuatacojuaari coteenu sohuacajinia quiquiaari, miaquejanio, tee Pueyaso tacoji pan niojosaquiaari pueyaracaanucujani. Cuno sohuaca sesa quiquiaari “Pueyaso Shuriucua Quiquio”. ³ Cuno coteenu sohuaca puequeetujiniani, tii tunusano quiquiaariiri shiquiaruque toque. Cuno toque tamajiria quiquiaariiri Pueyaso quiquiojuanaa cutara. Naaratej, na sesa quiquiaari “Pueyaso Quishaquijianaa”. ⁴ Pueyaso Quishaqui tacoji nujuatajaari juhuacutu, orojiniji shipinishano. Cuniqii catejaari shanohua jaanutaja Pueyasora. Pueyaso Quishaquijianaa cutarani, tii nujuatajaari puereetuaca casaa, juhua caaja niquishano. Naana-neecejajiniji shipinishaquiaariiri. Puetunu na cuaqueyajanaari orota

mishi quiosano qui quiaari. Na jiniacuma, casamiiri mii racatasano qui quiaari. Pataconiyojua orojiniji shipinishanoori tii cajitia quiaari "maná". Manaari qui quiaari Pueyaso tinishano casaa, Israel pueya miaquesocoriquiano carii quia jiyajinia nojori camarucuneejetasacari. Mii matari quiaajaariuhua Aaron nataca catuutianohua, puetunu na jajautajanaa. Mii maturi quiaajaariuhua sai neeca quejasano, nocua Pueyaso naajiotasano na rootasano, Moisés na ni quitiojosano. ⁵ Cuno caaja tiotiu caco nujuatejosano qui quiaariiri caapiqui shipinishano casaa, nesuharaca, juhua Pueyaso seya ni quishano. Nojori nesuhuari coqueetesano qui quiaari. Teecojuaari, teje Pueyaso shacantuuca mueranacuju quiaari Moisés cuacuajani. Cuno caaja tiotiuuri seya nanaca majiriuutiasa qui jiuuhua, Pueyaso jiyanooniuria puetunu Israel pueyajanaa. Tariucuaja puetunu cuno casaajini jijianaa cua pohuatasano niajaniya.

⁶ Pueyaso Secojoua tia jaara tari naa maninia tiasano qui quiaari puetunu na casamitijanaa, na nuhuaji, pueyacuara secojonaari pueyaracaanu tiuquiijo quiaari Pueyaso Shuriucua qui quiojinia. Nojoriiri tii tiuquiijo quiaari nojori miiniuria taa Moisés Rootasanojinia sequeyacuajani. Maja cutaraari nojori tiuquitianu qui quiaari Pueyaso Quishaquijianaa sohuacamara. ⁷ Saaja nojori jiyaniijia cutaraari tii tiuquishacari saaja rupaquijia puetunu marijiajanaa. Na tiuquishacari Pueyaso Quishaqui, seya nanaca pataquiaariiri Pueyaso jiyanooniuria nojuaja, narta Israel pueyano, sesa nojori miishanojiniji. ⁸ Naa Pueyaso Quishaqui quiniucua mishi quionucua pueyacuajitij, Pueyaso Sohuanuuri pa niishitiya, pueyari juhuanoujaaja maja na naata rupuenu qui quiaari Pueyaso. ⁹ Naacuajitij, puetunu cunojuanaari qui quiaari juhua miriqui miishano, saniniuujia nio pa quishacari pa niishiniuria pocuara Secojonajanaa miishano pocuara. Puetunu pueyacuara secojona catijasano casaajanaari miriqui miishano qui quiaari saaja. Naajuhua, pa supuetanaa ni quitiojosano casaa Pueyaso jiyanooniuria nojorini, puetunu naa miishanojuanaari miriqui miishano qui quiaari. Naacuajitij, cunoori maja na naata cuno pueya jiuujia jeecanu seetanujanaa, juhuajaniya nojori rupuenua Pueyaso. ¹⁰ Naaratej, cuno tariucuacaanu rootasanoori saaja panishaa quiaari Pueyaso cuaara na saniti quiaarijiaatijia quiarinio rupaata. Cuno tariucuacaanu rootasanoori pueya niishiti quiaari teyano sumatuuteja miaqueshiyani, teyano mashacateja ratushiyani. Naajuhua, nojoriiri niishitishaa quiaari taacari pueya jeequeya na cuaqueyani, nojori casaano, juhua maninia jeequejosano nojori quiniuria Pueyaso ni quiaara. Puetunu naa pueya miishanojuanaari maja na naata pueya jiuujia jeecanu sesa nojori miishanojiniji.

¹¹ Quiari naataja saniniuujia, Jesucristoori pocuara Secojonajanaara jiyatesaa quiaari, Pueyasojiniji na masenura Pueyaso jii tiasano pajaniyarano. Cuno qui quio, tee na secojo quiaa na Que pocuaracuajani, cunoori seetanujanaa Pueyaso qui quio jiyocuaaanu, maja pueyano tiasano. ¹² Naa Cristo tiuquishacari na Que qui quiojinia Pueyaso na jiyanooniuria pajaniyatej, nojuajaari maja na tiuquitianu qui quiaari cabra nanaca, juunu ni quiohua nanacano. Nojuaja cutaraari tama na nanacatajaaja Pueyaso jiyanooni quiaari pajaniya. Nojuajaari maja pueyaracaanu na tiuquiijonu na Quecua, taa mijiria pueyacuara

secojonaa jiyaniijianucua miiquiaaricuaani. Maja. Nojuajaari na Queecua tiuquiquiaari puetunujuanaa. Naa pocuara na cusonuu-cuatej, na Queeri Neyanuucua tiuujiaca jiyanooquiaa puetunujuanaa. Naacuajitij, majaari Pueyaso shuriucuaaji pa taanuusaanu quiniutianiya. ¹³ Pueyasoori Moisés niishitiqiaari, pueyano jaara macu masaqui tiuquimia, jaara na quiarejuhuaj, jiyacaritij, nojuajaari juhua curuutuucua Pueyasora. Naacuajitij, cuno pueyanoori maja na naata narta pueya rupuenu. Majaari na naata Pueyaso Secojoua tiajinia tiuquiniujuhuaj. Naajaa, nojuajaari na naata jeequesano quiniuhua, seru nanaca jaara nocua majiriutiasaaquiaari. Cabra nanaca, juunu nanaca, niyaco juunu catijiasano juacani, puetunu cunojuanaari maninia quiquiaari pueyara, juhua jeequesano nojori quiniuhua Pueyasora. ¹⁴ Naa pueya cuaqueya quiniucua juhua jeequesano saaja seya nanacatacuatej, Cristo nanaca cutaraari seetanujuanaa cumaacaraca pueya jiuujia na jeequenura seetanujuanaa, puetunu sesa casaajiniijianaa. Naatej, taa pueyacuara secojonaa jiyaniijianucua tiuquitiaquiaari seru nanaca Pueyaso Quishaquicuaani, pueya jiyanooshaanura, Jesucristoori naa miiquiaarijuhuaj. Pueyaracaanu quijia na quiniucua, Jesucristojuanaari tama na nanacajaaja tiuquiti-aquiaari Pueyasocua, pa jiyanooshaanura puetunu sesa pa miishano-jiniijianaa. Nojuajaari tojetaarucujanaa sesa miyashijia quiquiaari. Naacuajitij, na nanacaari poojia cajitiqiaa, nocua pa tiuushacari. Majaari socua pa jiyaniniu pa naata tama pa cuaqueyajaaja jyanootiniu Pueyaso tama pa miishanotajaaja. Naacuajitij, quiarijia cutaraari pa naata pa Pueyasora poonijionu shitimia, seetanujuanaa jiyanooshano pa quishacari.

¹⁵ Jesucristo cusonucua pocuara, nocua pa tiuushacari, nojuajaari pa jyanootiniara quiquiaari taa quiarinio Pueyaso rupaa sequeyacuajani. Naajuhuaaj, noo pojori, Pueyasocua tiuujiaca mijiria Jesu niyacarijiani, sesa nojori miishanoori jiyanooshaaquiaari Jesu cusonuta quiarini naatajajuhuaaj. Naacuajitij, puetunu Pueyaso saquiriojosano pueyapuejanaari na naata puetunu Pueyaso niqutiojonu panishanojuanaa masenu, taa na sequequiaari niqutionu seetanujuanaacuajani, pueyaracaanu shuquiriaatia jatiqui pa quiniuria nata. ¹⁶ Pueyanaa, pa shaajeyaquishacarijia, paari pa miiniu panishano naajiotanu niishijiani. Paari naa miijiani pa casami serotasaa-nura maninia, teyano pueya pa panitiaa nojori jiitianura pa casamicuajani pa shaajenu nuhuaji. Naacuajitij, paa jaara tari jamosaareni, pueyari maninia miiquiaa taa pa naajiotaquiaaricujani, saminiio pa quishacarijia. ¹⁷ Naacuajitij, saminiio pa quishacarijia, najuhuaanari pa naajiotasano. Pa shaajesacari, jiyacari cutara pa casamiiri niqutiojosano. ¹⁸ Tariucuaaanu naajuhuaaj, seya nanacaari shootesaaquiaari, Israel pueya niishiniuria Moisés Rootasanoori seetanujuanaa, nojori tojishocoriqiano. ¹⁹ Naa quiquiaariiri: Moisésri puetunu Pueyaso rootasanojuanaa nojuaja caminiujuquiaari puetunu Israel pueya niquiarajanaa. Na nuhuaji, Moisésri juunu niquiohua nanaca, cabra nanaca cojitiquiaari mohuacata. Cunojinia shitiaquiaari borrego cajaca naatusu hisopo cashacacuataari. Cunota, mohuacanacu majiriuutiaquiaari Pueyaso Rupaa na naajiotasanoocuaari, puetunu Israel pueyacuajanaanio. ²⁰ Jiyacaritij, nojori sequequiaariiri: “Nio

nanacaari pa niishitiya Pueyasoori seetanujuanaa pajaniyara miiniutianiya puetunu na sequesanojuanaa, paa jaara na rootasano tojjiaca quirini".²¹ Moisésri Pueyaso Secojoua tiaacua majiriuu-tiaquiaari nanacajuhuaaj, puetunu Pueyasora poonijiotajara shipinijosano casamiicujanaanio.²² Moisés Rootasanojiniji niishishiyacua-jaari, quera puetunu casaajanaari saaja nanacata juhua jeequesano quiya Pueyasora. Pueya miishano sesani, cuno cutaraari maja na naata jiyanooshaanu nanaca jaara shooteyaquishaare.

Sesa pa miiniuuri jiyanooshaaquiaa Cristo cusonuucua pocuara

²³ Mijiria Pueyaso Secojoua tia, puetunu na casaatajanaa quiniuucua juhua jiyocuacaanu casaa naaqui, seya nanacaari maninia quiquiaaricuaaja cuno mijiria casami quiniuria jeequesano. Saniniuuja, jiyocuacaanu casaa quiniuria jeequesano, socua maninia nanacaari panishaaquiaari seya nanacajiniji.²⁴ Majaari Cristo tiuquitianu quiquiaari seya nanaca mijiria pueyano tiasano Pueyaso Quishaquijianaa. Cuno quiquioori saaja juhua jiyocuacaanu Pueyaso quiquio naaqui. Cristo cutaraari seetanujuanaa Pueyaso Quishaquijianaa tiuquiquiaari. Nojuajaari tii na Que Pueyaso secojoquiaa pocuara.²⁵ Mijiria pueyacuara secojonaa jiyaniijianucuaari puetunu marijiajarajanaa pueyacaanu tiuquijioquiaari Pueyaso Quishaqui saaja seya nanacata, pueya na jyanootiniuria Pueyaso. Jesucristo cutaraari maja naa na miiniu quiquiaari.²⁶ Jesu jaara Pueyaso pa jyanootiriquia puetunu marijiajarajanaa taa pueyacuara secojonaa jiyaniijianucua miiquiaaricuaani, nojuaja maara jiya shipinishaanujiniji mosaariquia puetunu marijiajarajana. Quiari naataja saniniuuja, Jesucristoori mijiria rasaanquiaari tama na cuaqueyajaaja na tarinitianura pocuara na mosaanura, pueya jiyanooshaanura puetunu sesa nojori miishanojinijijianaa. Majaari socua na pacutesaanu quiniutianihua monu. Naa na mosaanuucuatej, cunoori tariucuaaja puetunu nocua tiuujica pueyajanaa jiyanooshaanura.²⁷ Naatej, taatucuaa pueyani, nojoriiri shaajecoriquiano. Majaari nojori samiitiaconuhua mijiria nojori quiniuhua, socua na cusonuhua juhua coteenu na cusonu. Nojori shaajenu nuhuaji, nojoriiri saaja sashiya Pueyaso nequesoreenura nojori.²⁸ Naajuhuaaj, naa Jesucristo mosaanuucua jiyacaritij, saaja cunojuanaari na mosaanu quiquiaari, queraatia pueya jiyanooshaanura sesa nojori miishanojiniji. Naacuaajitij, pocua na muetasacariuhua, majaari jiyacari socua na mosaanu quiniutianihua pueya jiyanooshaanura sesa nojori miishanojiniji. Jiyacaritij, nojuajaari saaja nocua tiuujica rijionuucua tiuquiniutianihua, noo pojoriria canapuate na sashiyacujani.

10

¹ Moisés Rootasano pueya miishocoriquianoni, pueyacuara secojonaa miishocoriquianojuhuaaj, puetunu cunojuanaari juhua seetanujuanaa Pueyaso jiyocuacaanu casaa naaqui, Pueyaso racatasano Jesucristoocua tiuujica pueyarano. Moisés Rootasano tojtiaajaca pueya cutaraari puetunu marijiajarajanaa na seya puecootequiaari, Pueyaso jiyanooniuria nojori juucua. Naajaa, majaari na naata seetanujuanaa maninia miijica pueyara na jatanishaanu seya nanacata.² Naajuhuaaj, pueya miishacari puetunu Moisés Rootasanojuanaa, naajaa, nojoriiri maja seetanujuanaa tama nojori jiuujiaaja na cajitiniu quiquiaari. Cunora,

majaari nojori tarinitianu quiquiaari nojori seya puecootenu tama sesa nojori miishanoocuarajaaja. Seya nanacaari maja na naata tuujunu quiquiaari sesa nojori miishano, seetanujuanaa juhuajaniya nojori quiniuria. ³ Naa seya puecoosacari puetunu marijarajanaa Pueyaso jiyanooniuria pueyatej, cunoori saaja nojori niishitiquiaariuhua tarijia nojori miishano sesa. ⁴ Paari seetanujuanaa niishiyacuajani, juunu nanaca, cabra nanacanio, cunoori maja sesa pa miishano tuujuna seetanujuanaa.

⁵ Cunora, tariucuacaanu Pueyaso Rupaaajinia, mijiria Jesucristo nishacari na sequesocoriquianoori juhuacarijia naajiotasano quiquiaari. Naa sequeyari:

“Cua Pueyasonaa, janiyacuaajaari niishiyani, majaari quioojia quia cajitiniu quiquiaa seya puecoosacari quiocuara, puetunu nataacuacajiniji pueya niqutiojosacari quiarajuhuj. Saniniuujia, quiaari cuaqueyaraca cua quiniuria cua jiyateree, quiocuara cua mosaanura. ⁶ Majaari quia timiniu quiquiaa seya catijasacari quiocuara, naajuhuj pueya shootesacari na seya nanaca, quia jiyanooniuria nojori sesa nojori miishanojiniji. ⁷ Naaratej, janiyari quia sequeyani: ‘Niya quiyacuajanijia cua miiniuria quia panishano cua Que Pueyasonaa, taa janiyajiniji tariucuacaanu naajiotasaaquiaricuaajani’ ”.

⁸ Moisés Rootasanojiniji pueyari maatia niishitiojosaaquiaari nojori puecootenura tama na seyajaaja Pueyasoocuara, na nataacuacajinijinio nojori niqutiojonura nerajuhuj. Nojoriiri niishitiojosaaquiarijuhuj nojori catijanura na seya Pueyasoocuara, tama nojori seya nanacajaaja shootesaanurajuhuj, sesa nojori miiniuucua. Naajaa, Jesucristo sequesanojiniji, paari quiarijia niishiyani, puetunu naa pueya miishanojuanaari maja na timitiniu quiquiaari Pueyaso. ⁹ Nocuaji, Jesucristoori naa sequequiaari na Que: “Niya quiyacuajanijia, cua miiniuria quia panishano”. Naacuajitij, Jesucristojuanaari mijiria niquiaari pocuara na mosaanura, seetanujuanaa jiyanooshano pa quiniuria cutara, maja najuhuaana seya puecoosaanura socua. ¹⁰ Pueyaso tojjia na quiniuucua, Jesucristoori tama na cuaqueyajaaja tarinitiaquiaari pocuara na mosaanura, tojetaarucujanaa jiyanooshano pa quiniuria pueyaraaanu. Naacuajitij, na Que Pueyasoori juhua tojetaarucujanaa sesa miyashijiacara pa jiyatequiaari, seetanujuanaa na pueya pa quiniuria tama nerajaaja.

¹¹ Israel pueyacuara secojonaa pueya poonijosacari Pueyaso Secojua tiajinia, nojoriiri pueyaracaanu seya puecooquiaa narta pueya miishanoocuara sesa. Naajaa, naa nojori miishanoori maja seetanujuanaa na tuujunu pueya miishano sesa. ¹² Saniniuujia, Jesucristoori tama na cuaqueyajaaja tarinitiaquiaari pocuara na mosaanura niyacutesanojinia. Cunojuanaari na mosaanu quiquiaari. Majaari socua na pacutesaanu quiniutianihua monu. Na cusuucua pa niti, puetunu nocua tiuujia pueya sesa miishanojuanaari tojetaarucujanaa jiyanooshaaquiaa. Naa na tucatanu nuhuaji Pueyaso miini panishano pueratej, nojuajaari na Que miaquetajara cajiquiaari. ¹³ Quiarijia tii sashiyari, Pueyaso cuara na paraa shocotate puetunu juanaajaatijiaj. ¹⁴ Naa niquiriyatu pueyano mosaanuucuatej, puetunu nocua tiuujia pueyajanaari maninia miijiacara jatanishaaquiaa, toje-

taarucujanaa maninia pa quiniuria, Pueyaso rupuejaca pa quiniuria pueyaracaanu. ¹⁵ Pueyaso Sohuanucujaaari naa pa niishitiyajuhua j naa Pueyaso sequesacari tariucuaacaanu na rupaajinia:

¹⁶ “Pa Jiyaniijia Pueyasoori naa sequeya: ‘Nio pa quishacari nuhuaji, janiyari tamaatia miiniutianiya cua saquiriojosano pueyani, quiarinio cua rupaacua nojori tiuushacari. Janiyari quiarinio cua rupaa nianutaniya nojori jiuujiajiniani, na tojjijaca nojori quiniuria. Naajuhua j, janiyari juhua na naajiotanutaniya nojori niishitiajajiniani. ¹⁷ Janiyari puetunu sesa nojori miishanojuanaa niyajetanutaniya seetanujuanaani’ ”.

¹⁸ Naacuajitij, sesa pa miishano jaara tari seetanujuanaa jiyanooshano quiya, cunora, majaari tari na panishaanu seya puecoosaanura, sesa pa miishanojiniji pa jiyanooshaanura.

Pueyaso pa rupuere jeequesano poojiata

¹⁹ Naacuajiti cua panishano cuarta Pueyaso pueyanaa, quiarijia cutara pa naata pa puereyaquiniutia tiuquijionu Pueyaso Quishaquijianaa, Jesucristo shootenuucua na nanaca pocuara.

²⁰ Nojuajaari quiarinio nucuaco pa jaatiaquiaa na Queecua. Nojuajaari juhua pocuaji nuunuquiaari Pueyasoocua. Mijiria Pueyaso Secojoua tiajiniani, Pueyaso Quishaquiiri shiquiaruque toqueta mishiquionucua quiquiaari, pueya tiuquitiaquiniuria Pueyasoocua. Cuno shiquiaruque toque cutaraari sutequiaari Jesu cusosacari. Cunocujaaari pa niishitiya, pocuajiiri juhua nuunusano quiya Pueyasoocua. Neyanu Jesucristocujaaari cuno quiarinio nuu. Nocua pa tiuushacari, paari pueyaracaanu rishijiacara jatanishaaquiaani juhua nojuajuhua j. ²¹ Nojuacuajaari pocuara Secojonajanaa cutara. Na Que Pueyaso secojoquiaari puetunu Pueyaso muerasuucuarajanaa.

²² Cunora, Pueyasoocua pa catecanoriquia seetanujuanaa pa paniniutia nojuaja. Nojuaja pa secojoriquia, seetanujuanaa nocua pa tiuuniutia, maja quenaaja nocuaji pa taacanuunuta. Naa pa rupueriquia nojuaja, jatanishano jiuujiata, juhua poojiaacua Jesu nanaca majiriutiasano quishacari. Naajuhua j, puetunu sesa pa miishanojuanaa cuara jiyanooshano quiiria, naatej, taa pa cuaqueyacuaani, pa nanasacari maniniuniacu mohuacata. ²³ Niaa jaara moojinia tiuquinijiosaaquiaari, niaari maninia pohuataquiaari pueya niqiara Jesuucua nia tiuuniujiniji. Nocua nia tiuushacari, niaacuajaari niishiya puetunu Pueyaso sequesanojuanaari pajaniyara tohuateenutaniya, pueyaracaanu shuquiriaatia pa quiniuria nata. Majaari nia taacanuunu nocuaji. ²⁴ Parta Pueyaso pueyacia tacaajiacua pa quiriquia. Panijiacua pa quiniuria pa shiniujiutiooriquia, maninia miijiacua pa quiniuriajuhua j. ²⁵ Noojiaqueya parta Pueyaso pueyari tari jiitiquiocanu maja na rerejonura narta Pueyaso pueyata. Majaari naa nia miiniujiuhua j. Maninia cutaraari pueyaracaanu pa rerejonura parta Pueyaso pueyata, pa shiniujiutioonura. Naa pa miiriquia pueyaracaanu cutara, pa niishishacari pa Jiyaniijia tiuquiniuuri tari catecanoya.

²⁶ Nia niishiri pueyanaa, maatia pa niishiniu nuhuaji seetanu Pueyaso rupaajanaa, paa jaara saaja sesa miijiocuaa tama pa panishacarijiaajani, ¿cantucua socua pocuara cusonu pacuterohua saajaniuhua j?

Shaaqui. ²⁷ Naa sacuaraatia miijiacani, nojori cuaara niishiiria, nojori cocuaatia miya. Nojori jaara nojori jiuujia tacatoyaquiri sesa nojori miiniujiniji, nojoriiri jiyanohua saniitiosaanutaniya. Narta Pueyaso paraata cojiritiasaanutaniya quejoonu mani quiquojiniaari pueyaracaanura. ²⁸ Pueyano jaara Moisés Rootasano tojiyaquiaari, querajaa pueya jaara nocuara saquiriojotaquiaari, nojori sequesanoori seetanujuanaa quiquiaari. Naacujitij, majaari nocua na taraajenu quishaaquiaari na mosaanura. ²⁹ Moisés Rootasano tojiyashijia jaara naa miishaaquiaaricuaa, ¿paateeri jiyaniyanijia Pueyaso Niyanu soojeaca jiyanooshaanutaniya, na nanaca shootesaanu jiyatejaca juhua najuhuanaratej? ¿Noo pojoritiiri jiyanooshaanutaniyajuhua, Pueyaso Sohuanuucua rimiaaquejaca sacuaraatiatej? ¡Maja! Pueyaso Sohuanuuri nojori cumaquiniu paniriquiaa juucua. Jesu nanacuaajaari Pueyaso jiyanootiquiaari nojori, Pueyaso pueya nojori quiniuria juucua. Naacujitij, Pueyaso Niyanu soojeaca pueyari socua jiyanohua saniitiosaanutaniya Moisés Rootasano tojiyashijia pueyajiniji. ³⁰ Paacuaajaari tari tojiquiaari naa Pueyaso sequesanooni: “Janiyacuaajaari naminiani. Janiyari sesa miijiaa saniitionutaniyani”. Naa naajiotasaaquiaariiaariuhua: “Pa Jiyaniijia Pueyasoori na pueya nequesoreenutaniya”. ³¹ ¡Jiyanohua puereeta quiniutianiya cutaraari Pueyaso jiyanoonu ruuretajaca pueyara, Pueyaso nequesoresacari nojori!

³² Pueyanaa, tariucuacaanu naquiya nia miishaanu nia niishiriquia, niaa jaara shushajanaa Jesuucua tiuquiaari. Naa pueya miiti-asacari naquiya nijaniyatej, niaari juhujaniya rejeretaquiaari saaja. ³³ Noojiaqueya nijaniyajinijinioori cararaatia macaatishaaquiaari. Naaari pueya niqiuara naquiya miishaaquiaarijuhua. Niarta Pueyaso pueya niqushacari naa nia miishaanutej, nojoriiri na puereyaquiniutia nia cojiquiaari saaja, niaacua nojori taraajesacari. ³⁴ Naajuhua, niarta Pueyaso pueyajinijinio jaara nujuatejosano quiquiaari nujuatejojuajinia, Jesu tojtiajaca nojori quiniucua, niaari nojoriicua tiuquijioquiaari, nojori nia cumanijianura nocua nia taraajenuucua. Naajuhua, nia paraa jaara nia jiiitasano casami riutiocojoquiaari tama nojorirajaaja, nojori soosano Jesu pueya nia quiniucua, niaari juhujaniya nojoriria tarinitiaquiaari saaja. Naaari saaja shuquiriaatia quiquiaari nia niishishacari niaari jiyocuacaanu jiiitaa socua maninia casaa cuno casamijiniji, pueya jaariutiasano nijaniyajinijini. Cuno, Pueyaso jiiitasano niaaranoni, cunoori shaajeyashijia casami cutara. ³⁵ Naatej, taa juhujaniya naquiya miiniu rejeretajaca nia quiquiaaricujani, Pueyaso sequesanoocua tiuujia nia quiniucua, naa Pueyaso sequesanoocua tiuujia nia quiriquia pueyaracaanu. Pueyasocuaajaari jiyanohua maninia miiniutianiya nocua tiuuniu tarinitiaashijia. ³⁶ Naquiya nia miishacari pueyaracaanu, juhujaniya nia rejeretaria saaja, maninia nia tucuatana puetunu Pueyaso panishano nia miiniurijanaa. Naacujitij, niaari puetunu Pueyaso sequesanojuanaa masenutaniya, pueyaracaanu shuquiriaatia nia quiniuria. ³⁷ Tariucuacaanu Pueyaso sequesanoocuaajaari naa naajiotasano quiya:

“¡Niaaj! ¡Quera tiuquiyia pueyacu Niriquiano! Maja na tarishiniu. ³⁸ Cua jiyanooshano pueyari pueyaracaanu rishijiacara jatanishaanutaniya saaja Quiyanuucua nojori tiuushacari. Saniniuujia, ta-

monu pueyano jaara nocua tiuuniu tarinitiare, nojuajaari cua soosano pueyano quiniutianiya”.

³⁹ Cuno pojoriiri saniitiosocoriguiano seetanujuanaa. Pajaniya saniniu-
ujia, paa cutaraari maja jiyano pueyajinijinioni. Paacuaajaari pa Jiyani-
ijaacua tiuujiacani, pueyaracaanu nata pa quiniuria shuquiriaatia.

11

Pueyasooocua tiuuniujiniji pohuatasano

¹ Pueyaso sequesanoocua pa tiuushacari, paari niishiyani paari puetunu Pueyaso sequesanojuanaa masenutaniyani. Nocua pa tiuushacari, paari maatia niishiyani puetunu na sequesanojuanaa pajaniyarano pa niquishoo casaani, cunoori seetanujuanaa quiya.

² Noojiaqueya pa supuetanaajinijinioori seetanujuanaa Pueyaso sequesanoocua tiuujiaca quiquiaari. Naaratej, Pueyasoori nojorijiniji naa sequequiaari: “Cuno pojorini, nojoriiri maninia cua pueya, cua sequesanoocua nojori tiuuniuucua seetanujuanaa”.

³ Pajaniyara naajuhuj. Tariucuacaanu Pueyaso Rupaacua pa tiuushacari, paari niishiyani Pueyasoori jiya shipiniquiaari saaja na pocuanuta. Naacuajitij, puetunu pa niquishano casaajanaari shipin-
ishaaquiaari niquishoo casaajiniji.

⁴ Supuetana Abel tiuuniuucua Pueyasooocua, Pueyasooocua na cati-
jiasanoori socua maninia quiquiaari Pueyasora tarajanu Caín catiji-
asanoiniji. Naa Abel tiuuniuucua Pueyasooocuatej, Pueyasoori na jiyate-
quiaari maninia na pueyano na quiniuria. Pueyasoori Abel catijiasano
timitiaquiaari, nocua Abel tiuuniuucua. Cunora, tarajanu Caínri Abel
moquiaari. Naajaa, naa macu na quishacaritij, nojuajaari pa niishitio-
jiyajaa Pueyasooocua pa tiuuniuria taa nojuaja tiuuquiaaricuaani.

⁵ Supuetana Enoc quiniuucua Pueyasooocua tiuuji, Pueyasoori
puetunujuanaa na riquiaari jiyocuacaanu, mijiria na shaajeyaquiniu-
cuaji. Narta pueya pajesacari nojuaja, majaari tari na quiniu quiquiaari.
Pueyasoori tari na riquiaari. Tariucuacaanu Pueyaso Rupaajinia,
nojuajiniiri pohuatashiyacuaja, Enocnaari Pueyaso timitijia pueyano
quiquiaari mijiria na quishacarijia. ⁶ Seetanujuanaari, paa jaara
Pueyasooocua tiuyashijia quirini, majaari pa naata timitiniu Pueyaso.
Naacuajitij, cante Pueyaso niishiniuucua jiaatiaani, nojuaja cuara
tiuria Pueyasoori seetanujuanaa quijia. Nojuaja cuara tiuriajuhuaj,
Pueyasoori na secojonuujuaca tojiquiaa. Nojori panishano miiquiaa
nojoririjaariuhuj.

⁷ Pueyasoori supuetana Noé numootequiaari nojuajaari nio jiya pa-
jaashitianiniutianiya, puetunu mijiria sesa miijiacajanaa na shaaja-
nura. Pueyasoori na sequequiaarijuhuaj puereetuca buque na ship-
ininiuria tii na tacatajara pajaacuaji. Jiyacaritij, Noeri maja na ni-
ishiniu quijia pajaa. Naajaa, Pueyaso sequesanoocua na tiuuniu-
cua, nojuajaari Pueyaso tojiquiaari. Naacuajitij, nojuajaari necocuata,
puetunu necohuatajanaa cureequiaari, necohua niquiocohuatajuhuaj.
Puetunu narta mijiria quijia pueyajanaari cusunuuquiaari pajaajinia,
nojori tiuyaquiniuucua Noé pohuatasanoocua Pueyasojiniji. Noé cu-
taraari juhua sesa miyashijara jiyatesaaquiaari pueyaracaanu Pueya-
sota rishijara na quiniuria, Pueyasooocua tiuuji na quiniuucua.

⁸ Abrahamri Pueyasooocua tiuquuaarijiuhuj. Pueyaso sequesacari nojuaja tamonu jiyajiniara na pacunura, Abrahamri na tojiqiaari. Tama na jiyajiniijiaaja na quiasacari, majaari na niishiniu quiqiaari tee cuniquiria na quiaani. Nojuajaari saaja niishiqiaari Pueyasoori na quijjira na niqutionutaniya tama na jiyaranojuaja. ⁹ Pueyaso niq-uitiosocoriquiano jiyajinia na tiuquishacari, Abrahamri cuno jiyajinia quiqiaari juhua rucuanajoju pueyano. Abrahamri juhuanajuaja maja cuno jiya camaru na quiniu quiqiaari. Naajaa, Pueyaso sequesanoocua tiuujia quiqiaari pueyaracaanuuri. Nojuajaari saaja seya cajacajiniji shitiasano suhuorotujinia quijia quiqiaari pueyaracaanu. Abraham niyanu Isaacri naa quijia quiqiaarijiuhuj, Isaac niyanu Jacobonio. Pueyasoori cuno pojori sequenu pacutequiaarijiuhua coteenujuanaa na sequesano Abraham. Naacuajitij, nojoriiri Pueyaso sequesanoocua tiuujiaa quiqiaari pueyaracaanujuhuj. ¹⁰ Pueyaso jaara Abraham sequequiaari, nojuajaari pueyaracaanu na quijjarano quiqiao na niq-utionutaniya, Abrahamri niishiqiaari Pueyasoori miriqui sequeriquiaa tama na shipinishano tiacajiniijiaaja. Cuno pueyaracaanu rishijia tiacaari Pueyaso niishiriojosano tiaca na saquiriojosano pueyarano. Abrahamri cuno tiacara sashijia quiqiaari pueyaracaanu, Pueyaso sequesanoocua na tiuuniucua.

¹¹ Naajuhuj, seetanujuanaa Pueyaso sequesacari Abraham, nojuaja na muetutenutaniya, Abrahamri jiyacari tariucua saaquiano quiqiaari. Neco Saaraari puera motaja quiqiaarijiuhua na manajenura. Naajaa, Abrahamri niishiqiaari Pueyasoori cumaacaraca quijia na sequesano na tohuatenuura. Naa Pueyasooocua na tiuuniuucuatej, Pueyasoori na cumaquiqiaari neco na manajonura. ¹² Naacuajitij, mueya shipiniyashijia saaquianoori mueya mueratequiaari. Cuno neyanuucujinio supueno pueyari queraatiara canequiaari, queraati-ate juhua riya, serojiyaquishoo, juhua shoniniacu caminia shuriuquioco paajia jaaquia.

¹³ Puetunu cuno pa supuetanaajanaari Pueyasooocua tiuujiaaja shaajecoquiaari. Nojoriiri juhuanajuaja maja na jiitiano quiqiaari seetanujuanaa Pueyaso sequesano nojori na niqutionutaniya. Naajaa, seetanujuanaa nojori tiushacari Pueyasooocua, nojoriria, Pueyaso sequesanoori juhua tariucua tucuaaanuji nojori niquishano quiqiaari. Nojoriiri na timitiaquiaari juhua tariucua nojori jiitiasano. Naacuajitij, nojoriiri juhujaniya quiqiaari juhua rucojuaca nojori quishacari mijiria. Nojoriiri niishiqiaari, mijiria nio jiyani, majaari seetanujuanaa nojori quiqiorano. ¹⁴ Naacuajitij, paari niishiyani nojoriiri tamonu jiya jiitianoocua jiaatiariquiaa, pueyaracaanu nojori quiqiorano cutara. ¹⁵ Nojori jaara saaja mijiria jiya camaruhua quiniuria panijiaa quiqiaari, nojori maara na supuetujua jiyajiniara riujuuquuaariuhua. ¹⁶ Saniniuujia, nojori cutaraari socua maninia jiya jiitianoocua jiaati-aciaari, pueyaracaanu nojori quiqiorano cutara. Cunoori jiyocua- caanu quiqiao, Pueyaso jeenucuasano nojoriria. Naaratej, majaari Pueyaso caririqiniu quiqiaari nojori sequesacari: "Pueyasoori canaa Jiyaniijia". Nojuacuajaari tari jeenucuasano tiaca jiitiaa nojoririano jiyocuaaanu.

¹⁷⁻¹⁸ Pueyaso sequesano Abraham na mueratesano mueya jaara tari mashajaniyोजना quiqiaari, Pueyasoori Abraham saniquiaari, na ni-

ishiniuria nojuajate seetanujuanaa na tojjia. Naacuajitij, na sequequiaariirri cuara na panishano niyanu moora, nocuara na catijiaso-coriquiano. Cuno neyanu Isaaccuajaari Pueyaso sequesano quiquiaari, nojuajiniji canenutaniyari queraatia pueya. Naajaa, Pueyaso sequesacari Abraham, neyanu na monura, nojuajaari maja na ruuretanu quiquiaari Pueyaso. Nojuajaari tari Pueyaso sequesanoocua tiuuriquiaa saaja. ¹⁹ Seetanujuanaa Abraham tiuuniucua Pueyasocua, nojuajaari niishiquiaari Pueyaso na naata neyanu Isaac samiitianiniuhua, nojuaja jaara na more. Naacuajitij, quera Abraham mosacari neyanu Isaac, Pueyasoori nocuaji na tenujuquiaari, tari maatia na niishishacari Abrahamri seetanujuanaa na tojjia. Naacuajitij, Abrahamri neyanuniyojua jaatucuquiaariuhua shuquiriaatia na quiquojin-iohuara, juhua macu samiitianishanohua. Naa Abraham miishanoni, cunoori miriqui quiya pajaniyara taa Pueyaso miiquiaari Neyanu quiari naatajacaani.

²⁰ Isaac tiuuniucua Pueyasocuaajuhua, nojuaja jaara saaquiiano quiquiaarijihuaj, nojuajaari necohua sequequiaari, Jacobo, Esaúnio: “Pueyasoori jiyanojua maninia miiniutianiya niaara, niaacuajinio supueno pueyano, taa na sequequiaari janiyacujani”.

²¹ Jacoboori Pueyaso sequesanoocua tiuujia quiquiaarijihuaj. Naacuajitij, quera na cusonu panishacari, nojuajaari neyanu José niquiohua sequequiaari: “Pueyasoori jiyanojua maninia miiniutianiya niaara, niaacuajinio supueno pueyano”. Naa na sequenu nuhuaji na jihuatej, nojuajaari na natacaacua tanishiquiaari. Pueyaso secojoquiaari na timiniutiaari, na niishishacari Pueyasoori pueyaracaanu miiquiaa puetunu na sequesanojuanaa.

²² Jacobo niyanu Joseeri Pueyaso sequesanoocua tiuujia quiquiaarijihuaj. Naacuajitij, quera na cusosacari, nojuajaari niishiquiaari Pueyasoori tamacari Israel pueya mashiquiniutianiuhua Egipto jiyajiniji. Naacuajitij, nojuajaari narta Israel pueya sequequiaari nocua nojori taraajenura. Nojuajaari nojori sequequiaari maja nojori tiujianura na nucuhua Egipto jiyajinia, nojori jaara quiojorohua Pueyaso niquitiosocoriquiano jiyajiniara.

²³ Moisés queya quiniucua Pueyasocua tiuujia, nojoriiri Moisés jamoquiaari jaara shusha rasaaquiaari, mueya maniniuniyojua na quiniucua. Naa na shocojoquiaariiri jiuujianaraca raca, pueyaracaanu jamosano na quishacari. Egipto jiyaniijia Faraónri tarijia sequequiaari, puetunu Israel pueya niquiocojua shusha roosano canuujuaanaa cuara moojinia quejoosaaria. Naajaa, nojoriiri cuno sequesano tojiyaquiaari nojori puereyaquiniutia saaja, Pueyasocua tiuujia nojori quiniucua.

²⁴ Naajuhua, Moisés quishacari tariucua cumantumaca, Pueyasocua tiuujia na quiniucua, nojuajaari na canashitinia Faraón niyatu tamacaquiaari. Nojuajaari tama sequequiaarijaaja: “Majaari Faraón jinianu cua quiniu paniniu. Janiyacuajaari Israel pueyanoni”. ²⁵ Egipto jiyaniijia jinianu na quiniucua, Moisésri na naata juhuajaniya miiniu quiquiaari puetunu na miiniu panishanojuanaa, shuquiriaatia na quiniuria. Naajaa, nojuajaari niishiquiaari cuno shuquiriaatia quiniuuri saaja rupaquijia mijiria. Nocuaji, majaari na tamacanu quiquiaari narta Israel pueya, shuquiriaatia na quiniuria tamajaaja. Nojuaja

cutaraari narta Israel pueyacuata taraajequiaari, Egipto jiya jiyaniijia poonijiotenuucua nojori puera. Cunora, nojuajaari niishiriojoquiaari nojuaja cuara cojiritiasaaria naquiya miishaanu narta Israel pueyata-juhuaj. ²⁶ Pueyaso sequesanoocua tiuujia na quiniuucua, nojuajaari niishiquiaari Pueyasoori na tojtiajaca miiniutianiya maninia pueyara-caanu cutara. Nocuaaji nojuajaari saquiriojoquiaari narta Israel pueyata soosano na quiniuria mijiria, maja puetunu Egipto casami jittiaja na quiniuria mijiria, Faraón jinianu na quiniuucua.

²⁷ Pueyaso sequesanoocua tiuujia Moisés quiniuucua, na nuhuaji, nojuajaari Israel pueya jaatiaquiaari Egipto jiyajiniji. Majaari na puerenu quiquiaari Egipto jiya jiyaniijia juaashacari jyanohua. Seetanujua-naa Moisés tiuushacari na niqiyiaquishoo Pueyasooocua, nojuajaari Pueyaso niqiquiaari noojiata, juhua na shuriucua quiyano pueyara-caanu. Naacuajitij, Moisésri tama na cuaqueyajaaja cumaquiquiaari maja na tarinitianura miiniu Pueyaso sequesano nojuaja. ²⁸ Quera Israel pueya mashishacari Egipto jiyajiniji, Pueyasoori Moisés sequequiaari: “Janiyari niucua cua seru jiyaronutaniyani, cua tojiyashijiaca jiyapueranuhua na puecoonura puetunujuanaa. Nocuaaji Israel pueya quia numootere, borrego nanaca nojori shuquiujitianura na tia tohuateyaji, maja nia jiyapueranuhua cusojuasaanurajuhuj”. Moisésri Pueyaso sequesanoocua tiuquiaari. Naacuajitij, puetunu Israel pueya jiyapueranuhujinijiniojuanaani, majaari quenaaja niquiriyatu niyanu mosaanu quiquiaari cutara.

²⁹ Israel pueya mashishacari Egipto pueyacuaji juucua, Naatunacu jyanishano caminiaari nojori ritiaquiaari saaja. Nocuaaji, Pueyasoori caminia raqutiaquiaari nojori nuura. Na nuhuaji, Pueyasoori Moisés sequequiaari puetunu nojorijianaa cuara niuutiaara caminia taqijiria. Israel pueya tiuuniuucua Pueyaso sequesanoocua, nojoriiri joojuashiquio niuutiaquiaari juhua puereetunu nucuaco. Egipto jiya jiyaniijia soldadohua jaara juhua nojori niutianu paniquiaarijuhuaj, nojoriiri saaja shushiniuquiaari.

³⁰ Israel pueya tiuquishacari Pueyaso niqutiosocoriguiano jiyajinia, nojoriiri na paraa Jericó tiaca shocua camarucuneetaquiaari siete juuca, naatej, taa Pueyaso rootaquiaari nojori miiniuracuajani. Naa nojori tiuuniuucua Pueyaso sequesanoocuatej, Jericó tiaca shocua sohuacaari puetunu pojotaquiaarijianaa. ³¹ Puetunu Pueyaso tojtiaashijiacajanaari puecoosaaquiaari. Rahab cutaraari jiyanooshaaquiaari. Rahabri naa jiyanooshaaquiaari Israel pueyajinijinio namenujunaa na jamojonuucua tarijia narta pueyacuaji. Rahabri naa maninia miqiaari Pueyasooocua tiuujia na quiniuucua. Naaratej, Israel pueyari cuno paanatu jiyanoocua.

³² ¿Teyano pa supuetanaajiniji cua pohuatanutaniya nijaniya socuani? Socua queraatia pa supuetanaari Pueyasooocua tiuujia quiquiaari. Tariucuaja cua pohuatasano, maninia nia niishiniuria Pueyasooocua tiuujia pueyari Pueyaso jiyanooshano. Naajuhuj, majaari jeya cua quiniu cua pohuatanura maninia nio pojorijiniji: Gedeón, Barac, Sansón, Jefeé, David, Samueljinijinio, socua narta Pueyaso sequesano caminiujunaa pueyajinijinio. ³³ Pueyasooocua tiuujia nojori quiniuucua, nojoriiri tamasa jiyaniijianucua miaquejoquiaari na jiyajiniji. Pueyasooocua tiuujia nojori quiniuucua,

nojoriiri maninia jiyaniijianucua quiquiaari, maninia na jiitianura narta Israel pueya. Pueyaso sequesanoocua tiuujiaa nojori quiniuucua, nojoriiri Pueyaso sequesano nojori na niquitiosocoriquiano masequiaari. Pueyasooocua tiuujiaa nojori quiniuucua, juurunu sareya rupaari juhua seecujutasaaquiaari saaja, maja na soonura nojori. ³⁴ Pueyasooocua nojori tiuuniuucua, nojori jaara manijinia quejoosaaquiaari, nojoriiri maja na catenu quiquiaari. Pueyasooocua tiuujiaa nojori quiniuucua, nojoriiri na paraacuaji mashiquiaari saaja, maja na puecoosaanura nijiniaquetucuaaja mueruuta. Pueyasooocua tiuujiaa nojori quiniuucua, sasaca pueyari jiyanoehua cumaacaraca quijiacara quiquiaari. Pueyasooocua tiuujiaa nojori quiniuucua, nojoriiri jiyanoehua cumaquishaaquiaari na paraa nojori miaquejonura, na paraa nojori mashiquiniuria nojori jiyajiniijiiuhuj. ³⁵ Naajuhuj, Pueyasooocua tiuujiaa maajipohua quiniuucua, nojori macuuri samiiticoquiaariuhua nojoriira.

Tamasacaari jiyanoehua taraatia miishaaquiaari Pueyasooocua tiuujiaa nojori quiniuucua. Cunora, nojori paraa jaara nojori quiooquiaari, nojoriiri puecoonura miananajosaaquiaari nojori jaara Pueyaso tojiniu tarinitiaaquiri. Nojori jaara na paraa sequesano tojiquiaari, nojori maara cartesaaquiaariuhua. Pueyasooocua tiuujiaa nojori quiniuucua, nojoriiri saaja paniquiaari nojori cuuara puecoosaariaqui, naajaa, jiyanoehua naquiya na miiniutia. Nojoricuajaari niishiquiaari, Pueyasoori nojori samiitianijionutaniuhua, jiyanoehua shuquiriaatia nojori quiniuria pueyaracaanura cutara. ³⁶ Tamasaca quiniuucua Pueyasooocua tiuujiaacajuhuj, nojoriiri cararaatia macaatishaaquiaari, jiyanoehua majacusaquiaariijaariuhuj. Naajuhuj, tamasaari cumayocua shipinishano casaata morojosaaquiaari. Nujuatejojuajinia nujuatejosaaquiaariiri. ³⁷ Tamasacaari saitia jacusaaquiaari na puecoosaanura. Tamasacaari na cajiniocua rashiquiojosaaquiaari jacaria jiyaratajata juhua juhuana, socua jiyanoehua naquiya na miishaanura. Naajuhuj, tamasaari nijiniaquetucuaaja mueruuta puetujusaaquiaarijanaa piyonu. Naajuhuj, tamasa quiniuucua Pueyasooocua tiuujiaacajuhuj, nojoriiri juhua taanusano rucojoquiaari puetunu tiquiyocujanaa. Casamiijiuniucua nojori quiniuucua, nojoriiri saaja borrego shoque, cabra shoque cusupuequiaari nojori cushishocoriquiano. Nojoriiri taraatia miitiasano quiquiaari, naquiya miishanojuhuaj. ³⁸ Juhua taanusano nojori quiniuucua, nojoriiri juhua tashuquioono rucojoquiaari cariiquia jiyajinia, tuhuananuhajiniano. Tiaajunucua nojori quiniuucua, nojoriiri saaja raaco maquiyonuujuaca quiquiaari. Mijiria quijiaa pueyari nojori jiyatequiaari juhua najuhua quijiaa pueyara. Naajaa, nojori cutaraari seetanujanaa Pueyaso timitiasano pueya quiquiaari, nocua tiuujiaa nojori quiniuucua.

³⁹ Pueyasooocua nojori jiyanoocua, seetanujanaa nojori tiuuniuucua nocua. Naajaa, nojoriiri juhuanojuaja maja nojori masenu quiquiaari seetanujanaa Pueyaso sequesano nojori na niquitiosocoriquiano. ⁴⁰ Pueyasoori nio pa quishacari nojori sashitijajaara, jiyanoehua maninia na miishacari pajaniya na Sohanuta, Neyanu Jesucristooocua pa tiuuniuucua. Na nuhuaji, Pueyasoori puetunu nojoritijanaa pa cojiritianutaniya jataniniu tojetaarucujanaa maninia miijiaa

pa quiniuria, na shuriucuara na rijiosacari puetunu pajaniyajanaa.

12

Jesu miishano pa niishiriojoriquia, naquiya rejeretajaca pa quiniuria-juhuaj

¹ Naa pa niishishacari taa queraatia pueya maninia miiquiaari Pueyasooocua tiuujiaa nojori quiniucuacuaani, cunora, tama pa cojetasano najuhuana casaa pa tarinitiariquia. Tarinitiahiyari puetunu najuhuana casaajanaa, teyanooocua pa cojequiaa Pueyaso panishano pa miyaquiniuriacuajani. Naajuhuj, puetunu sesa miiniujianaa pa tarinitiare, puetunu pa cumaacajanaa pa jitianura, juhuajaniya rejeretajaca pa quiniuria. Naacuajiti pa naata maninia tucuatunu puetunu Pueyaso panishanojuanaa pa miiniuria. ² Jesu miishano pa niishiriojoriquia pueyaracaanu. Nojuajaari tojetaarucuajanaa na Que Pueyasooocua tiuujia quiquiaari. Nojuajaari niishiquiaari, naquiya na miiniu nuhuaji, na Queeri jiyanoehua shuquiriaatia quijiara na jiyatenutaniya. Naaratej, nojuajaari juhuajaniya rejeretaquiaari naquiya na miiniu niyacutesanojinia, cararaatia na miishaanujuhuj. Cunora, nojuajaari na Que miaquetajara cajiya, Jiyaniijiajanaa na quishacari.

³ Majaari nia niyajetanu taa Jesu rejeretaquiaari juhuajaniyacuuaani, pueyaracaanu sesa miijiaa paraaashacari nojuaja. Nocua nia niishiriojoriquia, niaa mariqui Pueyaso tojiniu tarinitianu paniriiri nia tarajenuta naquiya nia miishacari. ⁴ Niaacuajaari naquiya miishaaquiaa, Jesucristooocua tiuujiaa nia quiniucua. Naajaa, majaari pa Jiyaniijia nia tacartanu, naquiya nia miyaquishaanuucuaaji. Nia rejeretariquia saaja. Majaari juhuanajuaja nia puecoosaanu quiquianu na tojitiajaca nia quiniucua. ⁵ ¿Niaateeri Pueyaso rootasano niyajetarucuaa tari, na rootasano pajaniya juhua necohuj? Naa sequeyari:

“Quiyanunaa, majaari cua rootasano quia soonu, janiya jaara quia niishitiojiya naquiya cua miitishacari quiajaniyani. Janiya jaara quia nacasure socua maninia miijia quia quiniuriani, majaari cucuaji pishiniu. ⁶ Quia Jiyaniijia cua quiniucua, janiyacuajaari cua panishano pueyano jiuujayashijiani sesa na miishacari. Naajuhuj, janiyari cua niyanura cua jiyatesano pueyano saniitiojuani jaara sesa miiriquia”.

⁷ Naaratej, juhuajaniya na rejeretajaca nia quiriquia. Pueyasoori juhua necohua nia niishitiojiya, maninia na canashitiniuria niajaniya, seetanujuanaa necohua nia quiniucua. ¿Pueyanoteeri nareja niqijia neyanu, neyanu jaara na tojiyashijia quiriquia? ¡Maja! ⁸ Naajuhuj, Pueyasoori puetunu necohuarajanaa na jiyatesano pueya saniitioquiaa sesa nojori miishacari. Naacuajitij, Pueyaso jaara nareja niquiriquia niajaniya sesa nia miishacari, cuno maara quiri maja seetanujuanaa necohua nia quiniucua, juhua tamonu queecuajinio nia quishacari. ⁹ Naajuhuj, naatujoori pa quishacari, pa queyari pa majacujua, nojori pa tojiyaquishacari. Majaari cunora nojori rerequetajaca pa quiniu quiquiaari. Naacuajitij, pa Que Pueyaso jaara pa saniitioriquia, ¿paateeri na rerequetenutaniyani? ¡Maja! Nojuacuajaari seetanujuanaa pa sohanu Que, pueyaracaanu rishijiaa pa quiniuria. ¹⁰ Pa queyari pa canashitioquiaari taa nojori paniquiaaricuajani. Nojori rootasacari

pajaniya, nojori saniitiosacari pajaniya, cunoori quiquiaari saaja mijiria pa quiniuria maninia. Pa Que Pueyaso saniniuuja, nojuajaari pa saniitioquiaa seetanujuanaa maninia miijiaca pa quiniuria, juhua nojuaja pa quiniuriajuhuaj. ¹¹ Seetanujuanaa, puetunu saniitionujua-naari taraatia pajaniyara. Majaari pa timiniu paa jaara majacusaareni. Naajaa, na nuhuaji, paa jaara na ruuretaaquirini, paari socua maninia miijiara jatanishaaquiaani, socua Pueyaso tojijiara pa quiniuria juhua-janiyajuhuj.

Jiyanohua cocuaatiaari Pueyaso pa tojiyaquishacari

¹² Naacuajitij, majaari nia pishiniu pueyanaa, Pueyaso saniitiosacari nijaniya. Nocua nia tiuuri saaja. Nioojiaca nia cumaquiriohua. ¹³ Saaja Jesucristo rupaa tojijiaca nia quiri, jatarinitiaja Pueyasocua tiuujiaca mariqui noojia niquijiotereeri. Nojori cuaara saniya cumaquishano quiiria cutara.

¹⁴ Tama nia cuaqueyajaaja nia cumaquiriquia, juhuajaniya quijiaca nia quiniuria puetunu pueyatajanaa. Majaari juayonuujutanu. Nia saniriquia seetanujuanaa sesa miyashijiaca nia quiniuria. Saaja noo pojori cutaraari pa Jiyaniiija niquniutianiya, seetanujuanaa maninia miijiacara jatanishano pueyatej. ¹⁵ Pueyasocuaajaari pa jiyanoojia. Tama nia cuaqueyajaaja nia cojuare niaa mariqui Pueyaso ruuretareeri na naacunu panishacari nijaniya. Nojuajaari cumaacaracacuaaja na cumaquiniuria nijaniya nia panishacari. Naacuajitij, niarta Pueyaso pueyano jaara juaatishaare tamonu miiniuucua sesa nojuaja, nojuaja nia naacure na jiyanoniuria sesa na miinia. Jaara naa miyaquiri-tij, cuno pueyano juaaquiacaari narta pueyacua paaquenutaniya na sesonura queraatia pueya. ¹⁶ Naajuhuj, tama nia cojuatooriquiaajaaja. Naa nia miitiooriquia tamonu nijaniyajinijinio mariqui Pueyaso sequesano na niquitiosocoriquiano pajaniya soojeara quiriiri, saniya tama na cuaqueyajaaja na shuquiritiniuria mijiria. Supuetana Jacobo puerana Esauucuaajaari naa miiquiaaritij. Tamacari na miaajesacari, nojuajaari Jacobo sequesuaari: “Cua tarajanunaa, pa que niquitiosocoriquiano janiya, na jiyapueranu cua quiniuucuaani, cuno cuaara quiiria quiara, quiaa jaara quia sumatuujiniji rupore quiria. Jiyanohua miaajeyanijia”. ¹⁷ Niaacuajaari niishiya, na nuhuaji, Esauuri paniquiaari na que secojonura nocuara, jiyanohua maninia Pueyaso miiniuria nojuaja, na que jiyapueranu na quiniuucua. Na queeri na ruuretaquiaari saaja. Esauuri jiyanohua na que nenecojoquiaari na nujuquenuta. Naajaa, na queeri maja na naata jataniniu quiquiaari tariucua neyanu Jacobo na sequesano Pueyaso niquiara.

¹⁸ Nio pa quishacari, pajaniyara, Pueyasoori maja juhua tariucuaaanu na quishacari pa supuetanaa Israel pueyata. Jiyacaritij, Pueyaso jaara Moisés tacaniquiaari Sinaí tuhananuucua, Moisés na niishitiojonura na rootasano na pueyara, tuhananuuri jiyanohua puereeta niquishano quiquiaari. Tuhuananuuri puereeta noshiriquiaa. Na najacaari tacariquiaa mueruucatej. Jiyanohua ninishiquiiri quiriquiaajuhuj. Paratuuri jiyanohua piyarojoriquiaa puereetajuhuj. ¹⁹ Trompeta jonenenuunuuri jiyanohua tojishaariquiaa. Pueyaso pocuanuuri jiyanohua tojishaariquiaajuhuj. Israel pueya tojishacari Pueyaso pocuaano, nojoriiri jiyanohua pueretuquiaari. Naaratej, nojoriiri Moisés sequetuquiaari maja socua Pueyasojuaanaa pocuanura

nojoriicuara. ²⁰ Nojoriiri maja socua na rejeretanu quiquiaari puera puereeta Pueyaso sequesacari nojori. Pueyasoori jiyacari naa sequeriquiaa nojoritij, cuno tuhuananuucua nojuajanaa quiniuucua:

“Cante nio tuhuananu rupueyani, cuno pueyano cuaara mosaaria saitia jacusano, cashanata soj. Naa miijia seru cuaara naa puecoosaari-ajuhuj”.

²¹ Puetunu Israel pueya niqushanojuanaari jiyanohua puereeta quiquiaari seetanujuanaa. Moisésjanaari na puerequiaarijuhuaj. Nojuajaari na puerenuta sequequiaari: “Cua puerenuta tetecanijia”.

²² Nio pa quishacari saniniuujia, majaari pa catecanonu quiquiaa cuno tariucuacaanu pueya pueresano tuhuananuucua. Jesucristo cusionuucua pocuara, paari Pueyaso quiquiojiniajanaa tiuquitiaquiaani. Cuno na quiquio sesaari miriqui sequeshiya “Sión tuhuananu”. Na pueya pa quiniuucua, nojuajaari jiyocuacaanu pueyaracaanu pa quijiarano tiaca jiidiaa. Cunoori seetanujuanaa jiyocuacaanujinio Jerusalén tiaca. Naacuajitij, paari jiyanohua queraatia Pueyaso seya rupuequiaani, Pueyaso pa maniniuhuaqueetanura nojoritijuhuj.

²³ Paari tii rerejonutaniya puetunu parta Pueyaso pueyatajanaani. Pueyaso saquiriojosano pueya pa quiniuucua, pa sesacaari jiyocuacaanu Pueyaso nequesoreetuneejinia naajiotasano quiya. Paari Pueyasooica catecanomiaani. Nojuajaari puetunu pueya nequesoreenajanaa. Jesucristo niyacarijia Pueyasooica tiuujiaca sohuanuhuari tii quiyajuhuj, canapue Pueyaso jiyatequiaari tojetaarucuajanaa sesa miyashijiacaracuajani. ²⁴ Jesucristoori tii quiyajuhuj.

Nojuajaari tama na cusonutajaaja Pueyaso jiyanootiquiaari nocua tiuujiaca. Tama na nanacajaaja na shootenuucua pocuarajuhuj, paari cunota jeequejosaaquiaari tojetaarucuajanaani. Naacuajitij, Jesu nanacaari jiyanohua socua maninia Abel nanacajiniji. Cain monuucua tarajanu Abel, Abel nanacaari Pueyaso shiniujiya na mona cuaara mosaariajuhuaj. Jesucristo nanaca saniniuujia, cunoori Pueyaso pa jiyanootiquiaacuajia.

²⁵ Cunora pueyanaa, tama nia cuaqueyajaaja nia cojuare maja nia ruuretanura Jesucristo Rupaa. Tariucuacaanu, pueyari jiyanoyaquishaaquiaari nojori ruuretasacari Pueyaso sequesano, nojuaja jaara nojori piriyojoquiaari Sinaí tuhuananujiniji. Nojoriiri jiyanoyaquishaaquiaari nojori tojiyaquiniuucua mijiria Pueyaso quishacari na sequesano. Nojori jaara naa jiyanoyaquishaaquiaaricuaa, nio pa quishacari saniniuujia, ¿paatucua taa jiyanooshaariquia pa ruuretasacari Pueyaso quiarijiani, jiyocuacaanuji na piriyojosacari pajaniyani?

²⁶ Pueyaso pocuasacari Sinaí tuhuananujiniji, jiyari na pocuasacari tetecaquiaari. Quiarijia saniniuujia, Pueyasoori seetanujuanaa sequeya: “Janiyari socua caminiutianihua jiya jiuuquiutianuni. Maja saa jiyaja. Jiya cajiniocuanio. Jiyacunojuanaari quiniutianiya naa cua miniu”. ²⁷ Naa na sequesacari taa socua na caminiutianihua jiya jiuuquiutianuni, naacuajiti paari niishiyani, puetunu na shipinishano casaajanaari shaajeyaquishaquiji shaajenutaniya. Saaja noo casaari cureenutaniya, maja na naata pootiosano casaatej. ²⁸ Quiarinio quiquio, Pueyaso shipinishano na niquitiosocoriquiano pajaniyani, cunoori maja na naata shaajasaanu quiniutianiya cutara. Paari jiyani-ijianucua quiniutianiya tii pueyaracaanuni. Pa Pueyasoori jiyanohua

maninia miiniutianiya pajaniya. Cunora pa shuquiritiare nojuaja. Paari na shuquiritiyani pa timitiasacari nojuaja. Naacujitij, nojuaja pa timiatiare jiyanohua pa paniniutia nojuaja, pa puerenutanio. ²⁹ Nojuajaari puereeta mani, Neyanu ruuretajaca shaajaja, sesa pa miishano catijia-jajuhujaj.

13

Taa pa miyani Pueyaso pa timitiniuria

¹ Majaari panitioonu nia tarinitianu. Naa Pueyaso pueya nia quiniuu-cuatej, pueyaracaanu panitioojuaca nia quiriquia. ² Naajuhujaj, majaari rucoojuaca ruuretano, niaacua nojori tiuquishacari. Nojori panijiaca nia quiriquia. Noojiaqueya pa supuetanaajiniiniocuajaari Pueyaso seya masuuquiaari na tiacora, nojori jiyanihacari nareja pueyano naasucua.

³ Nujuatejosano pueyacua taraajejaca nia quiriquia. Tama nia cuaqueyajaaja nia jiyatere juhua nojoritia nujuatejosanojuhujaj, nojoricua nia taraajenura seetanujuanaa. Naquiya miitiasano pueyacua taraajeja nia quiriquiajuhujaj. Nia niishiriquia, niaari na naata naa miitiasaanujuhujaj.

⁴ Pueyasojuanaacuajaari pa niishitioquiaari pa camitioonura. Cunora, camitioonu pueya cuara saaja neyacata, necocuata quijia quiiria. Cante camiyojuani, nojuaja cuara tama na cuaqueyajaaja cojuara maja narta pueyano niquiocua na numuetucunura, na camishoo maajinio. Nia niishiri, Pueyasocuajaari naa sacuaraatia mijiaca saniitionutaniya.

⁵ Majaari cumaneeca porocua nia quiniu tama niaarajaaja nia jiitiana. Juhujaniya quijiaca nia quiriquia nia jiitiasanota. Nia niishiri, Pueyasocuajaari sequequiaari: “Majaari cua cartenu quiniutianiya nijaniya juhua japueyojua nia quiniuria. Majaari quenaaja cua tiujianu quiniutianiya nijaniya”. Cunora pueyanaa, maja nia tacaaniu. ⁶ Naa seetanujuanaa na sequesanoocua pa tiuushacaritij, pa naata sequenu taa supuetana David naajiotaquiaari na sequesanoocujani. Naa sequequiaariiri:

“Jiyaniijia Pueyasocuajaari cua naacuna. Naacujitij, majaari cua puerenu quiniutianiya. Majaari pueyano na naata taa miiniujaniya”.

⁷ Coteenujuanaa nia jiitianaa pueya nia niishiriojoriquia, noo nojori canapuate shushajanaa nia tojtioquiaari Pueyaso rupaacuajani. Nojoriiri seetanujuanaa Pueyaso tojijiaca quiquiaari, Jesucristoocua tiuujia nojori quiniucua. Juhua nojori quiniucua jiaatiajaca nia quiriquiajuhujaj, taa nojori quiquiaaricuaani.

⁸ Taa quijia Jesucristo quiquiaari tariucuaaanuni, nojuajaari naa quiyajaa. Naa quiniutianiya pueyaracaanuuri. Majaari na jatanu. ⁹ Naaratej, majaari tamaatia niishitiojosano nia tojiniu. Miaquenu pueresanojiniji niishitiojosano cutaraari najuhuanaj. Cunoori maja quenaaja na cumaquiniu quiquiaari na tojtiajaca. Naajuhujaj, majaari pueyacua secojonaa jiuujia cumaquishaanu quiquiaari nojori miaquesacari Pueyasarano puecoosano seya shujiniji. Pueyaso Sohuanu cutaraari poojia cumaquiquiaa, panijiaca pa quiniuria. ¹⁰⁻¹¹ Saniniuujia, pueyacua secojonaa jiyaniijaari maja noo shu

na miaquenu quiquiaari cutara, Israel pueya jiyanooshaanura puecoosaaquiaaritiij. Pueyacuara secojonaa jiyaniijaari cuno seya nanaca tiuquitiaquiaari Pueyaso Quishaquijianaa puetunu marijarajanaa, cuno nanaca na majiriuutianura tii. Na nanaca shootesano seruuri saniniuujia tiacajiniji jiyatasaaquiaari mij, tii na catijiasaanura puetunujuanaa. Pueyacuara secojonaa jiyaniijaari tojetaarucuajanaa tenujusaaquiaari maja na miaquenura cuno shu. Nio pa quishacari saniniuujia, paari jiyanoohua cumaquishaquiaani Jesucristo cusonuucua pocuara. Cunojiniji, paari seetanujuanaa Pueyaso rupuesano quiyacuajani. ¹² Naajuhuj, Jesucristo mosaanura pocuara, nojuajaari Jerusalén tiacajiniji jiyatasaaquiaarijuhuaj, naatej, taa na nanaca shootesano seya jiyatasaaquiaari tamaquiriacuaani. Nojuajaari naa tama na cuaqueyajaaja tarinitiaquiaari na mosaanura, tojetaarucuajanaa jeequesano pa quiniuria puetunu sesa pa miishanojinijijianaa. ¹³ Nojuajaari jiyanoohua cararaatia teetesaaquiaari niyacutesanojinia pa niti. Naa Jesu miiniuucua pocuaracuuatej, Pueyaso niishiyashijiaca jaara cararaatia miiriquia pajaniya Jesuucua pa tiuuniuucuaani, juhuajaniya na rejeretajaca pa quiriquiajuhuaj. ¹⁴ Pajaniyara, Jesuucua tiuujiacani, nio jiyari maja pa quiquio. Mijiria, shaaquiiri pueyaracaanu rishijia quiquio pajaniyarano. Cunora, paari jiyocuacaanu pajaniyarano Pueyaso shipinishano tiacaacua jiaatiaani. ¹⁵ Naa Pueyaso jiitianuucua pueyaracaanu rishijia quiquio pajaniyarantej, nojuaja pa timitariquia pueyaracaanu. Neyanu Jesucristo quiniuucua pocuara Secojona, nojuajaari pa tiuquitiaquiaa na Queecua. Nio pa quishacari quiarijiani, majaari Pueyaso paniniu pa seya nanaca. Nojuacuajaari paniquiaa pa shuquiritianura nojuaja cutara. Naacuajitij, pa rupaa pa jiyatere Pueyasora na quiniuria saaja, pueyaracaanu nata pa maniniuhuaqueetanura nojuaja. Cunocuajaari na panishano. ¹⁶ Naajuhuj, majaari nia niyajetanu maninia nia miiniuria niarta Pueyaso pueya. Nojori jiitiaaquishacari nojori panishano, nia jiitiasano casaajiniji nia niqutiojoriquia nareja nojori. Paa jaara naa miijiaca quirini, paari juhua Pueyasora pa casaa niqutioyani. Cuno cutaraari na timitiquiaa.

¹⁷ Cuarta Pueyaso pueyanaa, nia jiitianaa tojtiajaca nia quiriquia. Majaari nojori niishitiojosano nia ruuretanu. Nojoricuajaari nioojia cojuaquiaa pueyaracaanu, nojori niishishacari Pueyasoori nojori nequesoreenutaniya nia jiitiajaca nojori quiniuucua. Naaratej, shamaatia nojori tojtiajaca nia quiriquia maninia, Pueyaso nojori pohuatanura shitimia nijaniyajiniji. Naa jaara nojori tojtiaashijiaca quiri, nojoriiri Pueyaso pohuatanutaniya na taraajenuta nijaniyajiniji. Jaara naa quiriritij, niaa cutaraari taraatia quiniutianiyajuhuj.

¹⁸ Canaacuara nia secojonuuriquia. Canaacuajaari saaja maninia miiniuria saniniuujiquiaa pueyaracaanuni. Naacuajitij, canaa jiuujiaari panaatia quiya Pueyaso niquiara. ¹⁹ Janiyari jiyanoohua paniyani cucuara nia secojonura, Pueyaso tiuquitiniuhuara ritia janiya niaacua.

Nio naajiona panishacari maninia Pueyaso miiniuria pueya, na saruhuatasacari pueyajuhuj

²⁰ Jesucristo shootenuucua na nanaca pocuara, paari niishiyani puetunu Pueyaso sequesanojuanaari seetanujuanaa pajaniyarano

quiniutianiya pueyaracaanu. Naa Jesucristo miishanoocua pa tiuushacaritij, na Que Pueyasoori pa jiyanooquiaa, juhuajaniya pa rupuenura nojuaja. Pueyasajuanaacuaajaari pa Jiyaniijia Jesucristo samiitianiquiaariuhua macujiniji. Nojuacuajaari pa cojuana, na panishano pueya pa quiniuucua. ¡Jiyanohua maninia pa Pueyaso!
²¹ Neyanu Jesucristoocua nia tiuuniuucua, nojuaja cuaara jataniiria niajaniya tojetaarucujanaa jeenucuasano nia quiniuria, taa na paniyacuajani. Nojuaja cuaara naa miiria niajaniyatej, maninia nia tucuatnura puetunu na panishanojuanaa. ¡Pa Jiyaniijia Pueyaso cuaara pueyaracaanu shuquiritiasaaria jiyanohua maninia na quiniuucua! Cuaara naa quiiriatej.

²² Cuarta Pueyaso pueyanaa, jiyanohua nia secojiyanijia maja nia ruuretanura secaja rupaata cua shiniujiushacari niajaniya nio cua naa-jiojina. ²³ Nia niishiri pueyanaa, parta Pueyaso pueyano Timoteori nujuatejojuajiniji tari tohuatesaarohuacuaa. Nojuaja jaara tarishiyaquiri cucua na tiuquiniuria, janiyari cucua na ruponutaniyani nia niquiniuucua cua quiasacari.

²⁴ Naajuhuj, quiria nia saruhuatate puetunu nia jitianaa pueyajanaa, puetunu cuniqui quiniaa parta Pueyaso pueyajanaanio. Italia jiyajinijinio parta Pueyaso pueyari nia saruhuataajuhuj.

²⁵ Pueyaso cuaara na Sohuanuta cumaquiiria puetunu niajaniyanaa.

SANTIAGO NAAJIONEE

Santiago naajiosano niyaquejeno pueyacuara

¹ Janiyari Santiagoni, Pueyaso seru, Neyanu Jesucristo serujuhuaj. Nia saruhuataanijia puetunu tiqiyocua jiyacajiniajanaa niyaquejeno Israel doce niqiuohuacuajinio caneno pueyanaa.

Niishitaja Pueyasojiniji masesano

² Cuarta Pueyaso pueyanaa, shuquiriaatia nia quiriquia niaa jaara taraatia miishaare, niaa jaara naquiya miishaarejuhuaj. ³ Niaacuajaari niishiya, niaa jaara Pueyasocua nia tiuuniucua saniniujiushaare, niaari socua juhujaniya sashjiacara quiniutianiya. Niaaraari naa miishaanutaniyaqui nia sashishacari Pueyaso cuara puetunu maninijanaa miiria niaarajaatijia. ⁴ Nia rejeretare seetanujuanaa maninia sashjiaca nia quiniuria, majaari quenaaja nia taacanuunu. Niaa jaara naa miijia qiritij, niaari maninia jeenucuasano quiniutianiya, pueyaraanu maninia miijia nia quiniuria.

⁵ Tamonu najaniyajinijinio jaara niishiyaquiri taa na miiniutianiyan, nojuaja cuara Pueyaso maseera, Pueyaso na secojosacari. Pueyasoori na niishitaja niqutionutaniya. Nojuajaari puetunu pueyajanaa niqutioquiaa, capora na quiniucua. Majaari na juaaniu niaa jaara na masere. ⁶ Nia masesacari, seetanujuanaa nia tiuuri Pueyasocua, majaari quenaaja nia taacanuunu. Cante na masesacari taacanuujuan, nojuajaari juhua paratu piyarojosano mohuaca, naatej, taa paratu tacarojiya mohuaca na piyarojosacaricuaani. ⁷ Jiyano pueyanotej, Pueyasoori maja na masesano na niqutionu quiniutianiya, noojia niqijioteja na quiniucua. ⁸ Noojia niqijioteja pueyanoori quiarjia maseya na panishano. Tariqui na secojosacari saniniuujia, tamonu casaa maseyari, na paniyaquishacari coteenu na masesanocuaa. Jiyano pueyanoori noojia niqijioteja pueyaraanu. Majaari quenaaja na miiniu panishano na tucuatenu quiniutianiya.

⁹ Cua panishano Pueyaso muerasunaa, niaa jaara casamijiu quiri, naajaa, shuquiriaatia nia quiriquia. Pueyasocujaari nia jiyatequiaari na muerasura, na jiišanasojiniji nia jiiitianurajuhuj. ¹⁰ Saniniuujia, niaa jaara casamiriaca pueyano quiri, shuquiriaatia nia quiriquia Pueyaso jiyanooshano nia quishacari. Niaacuajaari niishiya niaari tojetaarucujanaa saniitiosocoriquiano quiqiaari juuca sesa miijia nia quiniucua tarijia. Casamiriaca pueyanoori seetanujuanaa juhua naana shuu, majaari na rishiniu. Saaja rupaquijia niqishiya shanohuari. ¹¹ Pananu jaara nasaatia jama, neyonaari sorequee. Na shuuri tiqii. Shanohua niquishanoori shaajequeejuhuj. Casamiriaca pueyanoori naajuhuj. Na casami na niqitiojosacarijia na canijianura juuca, canashiyaquiji shaajenutaniyajaariuhuj.

Naquiya pa miishacari

¹² Shuquiriaatia quijia cutaraari Pueyasocua tiuujia, cante taraatia na miishacari rejeretaja saajani. Naa taraatia na saniniujiushaanuucatej, nojuajaari juhua cutara jiyaniijia tuhuaja niqitiosaanutaniya,

pueyaracaanu rishijia na quiniuria. Cunoori Pueyaso niqutionu panishano na panijiaca, taa na sequequiaaricujani. ¹³ Naa jaara sesa miiniuucua jiaatiaa, majaari sequenu: “Pueyasoqui sesa cua miitiniu paniya”. Pueyasoori maja sesa miijia. ¿Pa Jiyaniijiatucua casaara sesa miitiri pajaniyani? ¹⁴ Saniniuujia, tama poojia sequejaarijia pa shiniujuiquiaa sesa pa miiniuria. Naajuhuj, tama pa niishitajajaarijia pa sapojoquiaa sesa pa panishano pa miiniuria. ¹⁵ Naa sesa miiniuucua pa jiaatiasacaritij, cunora paari sesa miiquiaani. Naa sesa miijia pa quishacaritij, paari cunora shaajasaanutaniyani.

¹⁶ Cuarta Pueyaso pueyanaa, maja tama nia cuaqueyajaaja nia saponu. ¹⁷ Puetunu maninia casaajanaa pa masesanoni, cunoori Pueyaso niqitiosano jiyocuacaanuj. Nojuajaari puetunu jiyocuacaanu pa niqishano casaajanaa shipinijioquiaari, mijiria pa cuhuatariquiano. Pueyasoori pueyaracaanu maninia quijia. Majaari na jatanu tamaatia na quiniuria, na cojuaaquiniuria pajaniya. ¹⁸ Pueyasocuajaari pa sohuanu samiitianijioquiaariuhua na rupaacua pa tiuushacari. Nojuajaari pa jiyatequiaari quiarinio na muerasu pa quiniuria. Naacuajitij, taa pueyano tutaacuaa na shuquiriniutia na saaco rishishacaricuaani, Pueyasoori naa juhua pa tutaquiaari na shuquiriniutiajuhuaj, coteenujuanaa na jiyapueranuhua pa quiniuucua. Nojuajaari tariucuacaanujini nia pa riurioquiaaritij.

Seetanujuanaa Pueyaso tojitiajaca

¹⁹ Naacuajiti cua panishano cuarta Pueyaso pueyanaa, cua tojitiare. Puetunu nijaniyajanaa cuaara quiiria ritia tojjia, jacaria pocuaja. Cuaara quiiria shiniquijahuaj, maja ritia juaajia. ²⁰ Pueyanoori maja na naata Pueyaso panishano miiniu na juaaniutia. ²¹ Naaratej, nia cartere puetunu sacuaraatia nia miiniujuanaa, puetunu sesa nia niishiriojosanojuanaanio. Nio pa quishacarini, puera sesa miiniuuri quiquiaa. Naajuhuj pueyanaa, juhua maninia naatujua nia tojiri Pueyaso rupaa, taa nia niishitiojosaaquiaaricujani. Majaari na ruuretanu. Pueyaso rupaacuajaari cumaacaraca tojetaarucujanaa sesa miyashijiacara na jiyatenura pajaniya.

²² Pueyaso rupaa tojjia nia quiri seetanujuanaa. Majaari nia numaa shama nia tojtianunuj. Naa jaara Pueyaso rupaa tojiaquiri, niaari tama nia cuaqueyajaaja sapojia. ²³ Pueyano jaara Pueyaso rupaa tojiquiaa saaja na numaa shama, nojuajaari juhua noo pueyanojua, na jiquioco niquirii niqutiujinia narejaari. ²⁴ Jaara tacateyarohua, na jiquioco niyajetaseequiohuari taamuecate na jiquioco quiriquiaani. ²⁵ Pueyaso rootasanoori jiyanojua maninia, maja quenaaja sesa. Sesa miiniuucua jiiitinio pueyano jaara na tojjia quiri, nojuajaari na naata sesa na miiniu tarinitianu. Cante na numaama na racatajani, nojuajaari shuquiriaatia quijia quiniutianiya cutara. Puetunu na miishanojuanaari maninia quiniutianiya pueyaracaanujahuaj.

²⁶ Cante na niti rejeteyashijiani, nojuaja jaara tama na cuaqueyajaaja jiyaniya: “Janiya cutaraari Pueyaso tojjiani”, cunoori tama na cuaqueya sapojiaacuajua. Saaja sacuaraatia pocuaja quiya pueyaracaanuuri. Nojuajaari najuhuaana Pueyaso rupaa tojjia. ²⁷ Cante seetanujuanaa pa Que Pueyaso rupaa tojjiani, nojuaja cuaara japueyojuaca niqiniuucua rucaneera, nojori na naacunura. Cuaara naa miiria mashiquiopuerajuhuj, nojori taraajenucujusacari nojori na cumanijianura. Naajuhuj,

cuaara tama na cuaqueyajaaja cojuara, narta pueya na miyaquiniuucujaji sesa. Naa miiijia pueyanotej, nojuajaari Pueyaso pueyano cutara.

2

Maja cumaati rimiajata pa paniniu pueya

¹ Cuarta Pueyaso pueyanaa, pa Jiyaniijia Jesucristoori shacantuuca cumaacajinia quijia. Nojuacuajaari tojetaarucujanaa maninia quijia. Nocua tiuujia nia quishacari, majaari rimiajata nia niquiniu tamasa. ¿Pa Jiyaniijiateeri pa sooquiaaricuaa, ninishiqui quijia pa quishacarijiani? Maja. ² Cunora cua sequesanojinia nia niishiriojore: casamiriaca pueyano jaara nia secojonuujua tijajinia tiuquimia, maniniuqui toqueraca, jaaniishoracajuhua, ¿taa nia miiniutianiyani? ³ Niaari naa sequeja: “Niya quia cajishii pueyanonaa, cajitii maniniujiniani”. Saniniuujia, toqueeju pueyano jaara jiyacari tiuquimijuhua, jiyareta curuutuquenaniyosua, niaari na sequereecujua: “Cuniquijia quia nujuare”. Casaa maaraja: “Cuniquijia quia cajiri quiaa tii nujuaani”. ⁴ Niaa jaara naa miiritij, niaari tama nia cuaqueyajaaja jiyateree juhua niarta pueya nequesoreenara. Niaari casamiriaca pueyano jiyaniya nojuaja naasucua socua maninia pueyano casamiiju pueyanojiniji. Naaratej, niaari casamiriaca pueyano shuquiritiniu panijia.

⁵ Cua tojitiare cuarta Pueyaso pueyanaa, ¿majateeri nia niishiniu, Pueyasocujajaari casamiijuuniucua pueya saquiriojoquiaari nocua tiuujia nojori quiniuria? Nocua tiuujia nojori quishacari, nojoriiri juhua jiyanojua casamiriaca Pueyasora. Naajuhua, Pueyasoori nojori jiyatenutaniya jiyaniijianucua nojori quiniuria, puetunu Pueyaso jiti-asanojuanaa nojori jitianura. Naa miiniutianiya na panijiaaari taa na sequequiaari seetanujuanaacujani. ⁶ Niajanijarijijataj, niaari nojori cararojoquiaacujua. ¿Majateeri nia niishinijuhua, cuno casamiriaca pueyacuajaari nia nohuasejoquiaa na sajonota? Nojoriiri nia jaamitiqiaa nequesoreenaacua, niaacuara na saquiriojotanura. Nojoriiri naa miitiquiaaqui nia jiti-asano casaaniyosua na jariiutianura puetunujuanaa. ⁷ ¿Majateeri nia niishiniu, nojoricujajaari pa shuquiritiasano Jiyaniijia sesacaquiaajuhua? Pa Jiyaniijia sesa jiyaniquitiquiaa na soonutaari.

⁸ Puetunu Pueyaso rootasanojinijianaani, niiori socua tojishocoriquiano. Naa naajiotasano quiyari:

“Pueya nia paniri taa nia paniya tama nia cuaqueyacuanaani”.

Pueyanaa, niaa jaara cuno rootasano miiijia quiriqia, niaacuajaari maninia miiijia. ⁹ Saniniuujia, niaa jaara rimiajata paniri pueya, niaari sesa miya. Niaari saniitiosocoriquiano, Pueyaso niishitiojosano tojiyashijia nia quiniucua. ¹⁰ Pueyano jaara puetunu Pueyaso rootasanojuanaa tojiqiaa maninia, saniniuujia, jaara niquiriyatu cuno rootasanojiniji tojiyashijia quiri, cuno pueyanocujajaari Pueyaso tojiyashijia. ¹¹ Pueyasojanaacujajaari sequequiaari: “Maja nia camishoo maaji nia numuetucunu”. Sequequiaarijiaariuhua: “Maja monu”. Naacuajitij, pueyano jaara na camishoo maaji numuetuqueyquijia quiri, saniniuujia narta pueyano moyari, cuno pueyanoori Pueyaso rootasano tojiyashijiajuhua. ¹² Niaa cumaati niishiya, Pueyasoori na muerasu nequesoreenutaniya taa nojori tojitiqiaaari na rootasanojajani. Nocujaji tama pa cuaqueyajaaja pa cojuare taa pa miiqiaani,

taa pa pocuaquiaani. Nia niishiri, paari nequesoreesaanutaniya pa miishanojinijini, taa pa miiquiaari parta pueyani. Cante pueya panijia quiyani taa Pueyaso rootaquiaaricuaajani, nojoriiri jiyanooshaanutaniya taa nojori jiyanooquiaaricuaa tamascani. ¹³ Saniniuujia, canapuate narta pueyano jiyanooyashijiaca quiquiaarini, Pueyaso nequesoreenu juuca puetunu pueyajanaa, nojoriiri jiyanoyaquishaanutaniyajuhaaj. Canapuate jiyanoojia cutarani, nojoriiri jiyanooshaanutaniya cutara, taa tamascana nojori jiyanooquiaacuaani. Nojoriiri shuquiriaatia quiriquiano cuno juuca, Pueyaso nequesoreesacari nojori.

Pueyasocua tiuujiaaari maninia miijiaca

¹⁴ Cuarta Pueyaso pueyanaa, ¿manimate pueyano jaara sequere: “Janiyacuaajaari Pueyasocua tiuujiani”, nojuaja jaara maninia miyashijia quiyajaa? Nojuaja jaara maninia miijiara jatanishoo quiyajaa, najuhuana sequeyari: “Pueyasocua tiuujianijia”. ¹⁵ Naacujitij, tamonu parta Pueyaso pueyano jaara pa sequesee: “Maja cua jitianu toque. Maja quenaaja cua miaquesocoriquiano cua jitianujuhuaaj”, ¿taa pa miyani? ¹⁶ ¿Manimateeri paa jaara na sequereni: “Juhuaianiya quia quiaarohua. Quia miaquesuhua. Toque quia cushishuhuaajuhuaaj”? Maja. Paa jaara quenaaja na niquitioyaquiri na panishanoni, pa sequesanoori najuhanaj. ¹⁷ Naajuhuaaj, pueyano jaara sequere: “Jesucristoocua tiuujianijia”, jaara seetanujuanaa Pueyaso rootasano tojiyaquiri, na sequesanoori najuhanajuhuaaj. Jiyano pueyanoori maja seetanujuanaa Jesuucua tiuujia. Paa jaara seetanujuanaa Jesuucua tiuujia quirini, pocua maninia miijiaca quirijihuaaj. Maninia miyashijiaari maja seetanujuanaa Pueyasocua tiuujia.

¹⁸ Pueyano jaara tamonu sequeriquia: “Quiaari sequeya quiaa Jesuucua tiuujia cutara. Janiyari saniniuujia maninia miijiani. ¿Taa cua niishiniutianiyani quiaari seetanujuanaa Jesuucua tiuujia, quiaa jaara maninia miyaquiri? Maja cua naata na niishiniu. Janiya cutaraari quia niishiniutianiyani janiyari seetanujuanaa Jesuucua tiuujia cutarani, maninia cua miishacari”. ¹⁹ Pueyaso Rupaacua quia tiuuniucua, quiaari niishiyacuaaja Pueyasoori Jiyaniijajanaa. Cuno quia tiuuniuuri maniniacuaaja. Naajaa, nia niishiri, samaruhuari cuno niishiyajuhuaaj. Na puerutana nocuaji tetecatiuyari. ²⁰ Mosanucuaanaa, ¿majateeri nia niishiniu? Jesuucua tiuujia nia quishacari, niaa jaara maninia miyashijiaa quiyajaa, Jesuucua nia tiuuniuuri najuhanaj, nia tojiyaquishacari Pueyaso. ²¹ Niaacuajaari niishiya taa Pueyaso saniquiaari pa supuetana Abrahamni, na niishiniuria seetanujuanaa nocua tiuujiatee. Pueyasoori naa na saniquiaari: na sequequiaariiri: “Abrahamnaa, quia niyanuniyojua quia more cucuara quia catijiasocoriquiano”. Majaari Abraham ruuretanu quiquiaari Pueyaso sequesano nojuaja. Naaratej, Pueyasoori naa sequequiaari: “Jiyanohua maninia Abraham, cua tojjia cutara”. ²² Naacujiti cuarta Pueyaso pueyanaa, naa Abraham tojinuucua Pueyasotej, paari maatia niishiyani nojuajaari seetanujuanaa Pueyasocua tiuujia quiquiaari. Naajuhuaaj, Pueyaso sequesano na miishacari, nojuajaari Pueyasocua tiuujia quiquiaari tojetaarucuaajanaa. ²³ Naa Abraham miiniucuatej, nojuajaari tariucuaaanu Pueyaso rupaajinia nojuajiniji naajiotasano tohuateequiaari. Naa sequeyari:

“Abrahamri Pueyasooocua tiuquuaari. Naa na tiuuniuucua Pueyasooocuatej, Pueyasoori na jiyatequuaari juhua tojetaarucujanaa sesa miyashijia na quiniuria”.

Naa Abraham quiniuucua Pueyaso tojjiatej, nojuajaari seque-saaquuaari Pueyaso rupuenata.

²⁴ Naacuajiti pueyanaa, Pueyasocuaajaari na sequesano miijia jiyanooquiaa. Maja cutaraari na jiyanooniu noo pojori, nocua tiuuniu sequeja najuhuanatej. ²⁵ ¿Niaate niishiyajuhuj taa Pueyaso jiyanooquiaari Jericó tiacajinijinio paanaticuaani, nooj, Rahab jiyanishanotej? Pueyasoori na jiyanooquiaari neyatu na quiniuriajuhuj. Na jiyanooquiaariiri maninia na miiniuucua caapiqui pueyano Israel pueyajinijinio. Rahabri cuno pueya jamojoquiaari na tiaco. Na nuhuaji, nojori mashiquiquiaariuhua tamocoori, narta Jericó tiacajinijinio pueya puecoyaquiniuucujaji cuno pojori. Rahabri naa maninia miiquiaariti Pueyasojiniji na tojishanoocua na tiuushacari. Niishiquiaariiri Pueyasoori Israel pueya cumaquinia quiquiaari. ²⁶ Nio pohuatasanoori pa niishitiojiya, naatej, taa pa cuaqueya macu quiya sohuanuujucuaani, naajuhuj, paa jaara Pueyaso sequesano miyashijia qirini, paari najuhuaana sequeyani: “Jesuucua tiuujianijia”.

3

Pa niti juhua mani

¹ Cuarta Pueyaso pueyanaa, maja cumaati puera niajanijajinijinio jiaatianu Pueyaso rupaa niishitiojonaa nia quiniuria. Niaacuajaari niishiya, Pueyaso rupaa niishitiojonaari socua jiyanoohua saniitiosaanutaniya tamasacajiniji, nojori tojtiaaquiniuucua tama nojori niishitiojosanojuaja. ² Puetunu pajaniyajanaari sequeyarucua miiquiaa sesani. ¿Teyano pueyanote tojetaarucujanaa narta pueyano najiquitiyaquijia na pocuasacari? Shaaqui. Pueyano sequesano jaara puetunu maninijanaa quiri pueyaracaanu, cuno pueyano maara seetanujuanaa maninia pueyano quiri cutara. Cuno pueyano maara na naata puetunu tama na cuaqueyajaaja jitianu niishiriquiajuhua sesa na miyaquiniuucujaji. ³ Niaacuajaari niishiya, caballo rupaama jaara niasaare na niquitijotaja, na camaru na tojiniuria, na netesacari, na camaruuri puetunu na caballo cuaqueyajanaa niquitijotaa na panishaco. ⁴ Puereetuca buqueeri naajuhuj. Shiitianiyojua na niquitijotaja jitiaajaariuhuj. Jiyanoohua paratu piyarojosacari, naajaa, na camaruuri saa cunotaja na niquitijotaa na panishaco. ⁵ Pa nitiiri naajuhuj, shiitianiyojua casaaniyojuaari pa cuaqueyajinia shipinishano. Naajaa, jiyanoohua pocuanu niishijiaari. Sesa pa miitiyari. Nojuajaari juhua maniyashi. Maniyashi jaara jaare puereetuca cuhuariquiajina, cuno maniyashiiri puereetuca maniria pacusee. Cuhuariquiaari puetunu catemaajanaa. Pa nitiiri naajuhuj. ⁶ Pa nitiiri seetanujuanaa juhua mani quiya pa cuaqueyajinia. Paa jaara sesa pocuareni, paari puetunu pa cuaqueyajanaa sesoyani. Pa nitiiri puetunu sesa niishijajanaa. Paa jaara sesa pocuare pueya niquiarani, puetunu pueyajanaari pa sequesano caminiujuquiaa tamasaca niquiara. Pa nitiiri Sesaaca poonijjotesano. Naacuajiti, sesa pa pocuasacari, paari puetunu mijiria pa quiniujjanaa sesoquiaani. ⁷ Pueyanoori na naata jiyartuutenu puetunu casaajanaa:

jaacuatujuaca, roshiyocuatujuacajuhuaaj, moojinijinio casaanio. Seetanujuanaari, pueyari tari naa na jiyartuutejoquiaa. ⁸ Maja cutaraari pa naata jiyartuutenu pa niti seque, saa maninia pa pocuanuraja. Pueyaracaanu sesa taquiriocuaa saajaari. Nocua quiyari juhua soconu noonacu, puetunu pueyajanaa na sesonura. ⁹ Paari jiyano pa nititija pa Que Pueyaso maniniuhuaqueetaquiaani. Naajuhuaaj, paari Pueyaso shipinishano parta pueya sesacaquiaa natajuhuaaj. ¹⁰ Naacuajitij, pa rupaamaji tohuataari maninia sequesano, sacuaraatia sequesanojuhuaaj. Cuarta Pueyaso pueyanaa, ¡maja cumaati naa pa quiniutij! Maja maninia naatej. ¹¹ Samo nacajiniji pueyaracaanu pacaretajaari shocuanacu mohuaca. ¿Jataquiaate soj? ¿Pianacuta saniniuujia pacaretaquiaacujua? Maja. Samo nacaari pueyaracaanu maniniuniacu quijia. ¹² Cuarta Pueyaso pueyanaa, ¿mariyajate na naata muetunu shucuenajara? ¿Nateecate sacamanajara muetujuajuhuaaj? Maja. Naajuhuaaj, maja pa naata pianacu mohuaca taquitianu cuari maniniujiniji. ¿Mohuacatucua casaara jatara tamaatiuniacurani? Naajuhuaaj, paa cuaara pueyaracaanu maninia pocuaara saaja. Maja cumaati pa pocuasano pa cojitiniu sesa pocuasanota.

Niishijia pueyano

¹³ Tamonu niajanijajinijinio jaara niishijia quiri, nojuaja cuaara juhuajaniya maninia miijia quiiria nareja, maja pueya shocoteja. Jaara naa maninia quijia quiri, pueyari niishiniutianiya nojuaja seetanujanaa niishijia. ¹⁴ Saniniuujia, nioojia jaara najiquitishano quiri, niishijia nia quiaquiniucua juhua niarta Pueyaso pueyano, niaari seetanujanaa mosanucua. Naajuhuaaj, nia miishano jaara quiri nia shocotanura niarta Pueyaso pueya saaja shuquiriaatia nia quiniuria tamajaaja, majaari nia jyaniniu niaari niishijia. Naa miijia nia quishacarij, niaa jaara tama nia niishitajajaaja shuquiritiare, niaari mosanucua saaja. Nia sequesacari: “Niishijia cutaranijia”, niaari sapojiya. ¹⁵ Cuno nia niishitajaari maja jiyocuaaanuji Pueyaso niishitaja. Cuno niishitajaari tama nia niishishanojuajaaja, mijiria niishishanojuhuaaj, Sesaacajanaa niishishanonio. ¹⁶ Pueyanaa, tee Pueyaso pueya juaatishano quiya tamasaca jaara na shocotare, naajuhuaaj, pueya miishacari saaja tama na panishanojuajaaja, tii quiyari juayonuujutanu, puetunu sesa miiniuujianaanio. ¹⁷ Saniniuujia, cante Pueyaso niishitaja jiiitia cutarani, nojuajaari maninia miijia pueyano cutara. Jiyano pueyanoori maninia quijia puetunu pueya niquirajanaa, jyanootio, jacaria pocuaja. Majaari na niishiniu ritia juaaniu. Pueyacuara taraajejaari. Majaari na niishiniu cuaracashijionu pueyacuara. Pueyaracaanu seetanujanaa sequeyari. ¹⁸ Naajuhuaaj, cante juaatoyano jyanootiootejani, nojuajaari jyanohua shuquiriaatia quiniutianiya Pueyaso shuquiritishacari nojuaja maninia na miiniuucua.

4

Mijiria casaacua jiaatijacajiniji pohuatasano

¹ ¿Niaate niishiya casaara nia juayonuujutaquiaa tamajaaja pueyaracaanuni? Niaari naa quiaquij sesa miiniuucua nia jiaatiasacari. Nioojiaari najiquitishano quiquiaa nia panishanoocua nia jiaatiasacari sacuaraatia. ² Naaratej, nia panishano nia maseyaquishacari, niaari na casamiicuaaji pueyano moquiaa. Niaari naa miiquiaa puera

nia jiaatiasacari nia panishanoocuatej. Nia panishanoocua nia jiaatiasacari jiyanoehua, niaari cunora miriyojotaquiaa. ¡Niaari socua piyotariquiaaquij! Niaari naa quiyaqui Pueyaso nia secojiyaquiniucua nojuaja niquitionura niajaniya nia panishano. ³ Naajuhuaaj, niaa jaara na secjore, majaari nia masenu quiquiaa nia masesano. ¿Casaara nia maseyaquiquiaanoj? Nia sequereeraj. Niaari sesa nia jiaatianuta na masequiaajuhuanajaj. Niaari nia jiaatiasanoocua masequiaa juucua, tama nia cuaqueyajaaja nia shuquiritiniuria. ⁴ ¡Pueyanaa, niaaqui Pueyaso rootasano ruuretajacajuhuanajaj! ¿Majateeri nia niishiniu? Cante mijiria sesa miijiaca miishano timitiajacani, nojuajaari Pueyaso paracara quirii. Niaa jaara naa miijiaca quiniu panijajuhuaaj, niaari tari Pueyaso paracara quirii. ⁵ Tariucuacaanu Pueyaso Rupaajinia naa naajiotasanoori quiyaquij:

“Pueyasoori na Sohuanu niaquiaari poojiajinia, nera na cojuanura pajaniya. Jiyanoehua na paniniutia pajaniya, Pueyaso Sohuanuuri pa jamuequiaa juucua saaja Pueyasora pa quiniuria”.

⁶ Naajuhuaaj, Pueyasojuaanaari jiyanoehua maninia naacuquiaa pajaniya, jiyanootio na quiniucua. Na Rupaajiniaari naa naajiotasano quiyajuhuaaj:

“Pueyasoori noo pueya paracaajia, narta pueyajiniji juhua socua cutara pueyano quiniu panijiatej. Saniniuuja noo pojori maniniucuarjia, naa sequejacatej: ‘Maja cua naata miiniu maninia tamajaaja. Pueyaso cuaara cua naacuura’ ”.

⁷ Naarate pueyanaa, seetanujuanaa Pueyaso tojitiajacara nia quiriquia. Cumaatia nia nujuatare Sesaaca, maja na shocotanura niajaniya. Niaa jaara naa miiritij, niaacuaji mashiniutianiyari. ⁸ Niaa jaara Pueyaso rupuere, Pueyasoori nia rupuenutaniyajuhuaaj. Sesa miijiacanaa, cua tojitiare. Taa curuutucojuanucua shuquirioyacuaani, naa tama nia cuaqueyajaaja nia jeequejorejuhua sesa nia miishanojiniji. Nooijaqueya Pueyaso panijiaaari mijiria sesa miishano paniquiaajuhuaaj. Cuno pueya cuaara noojia jeequejora maja socua noojia na niquijiotenura najuhuanaj. Cuaara saaja Pueyaso panijiacara quiiria cutara. ⁹ Sesa nia miiniucua nia nujuqueture, nia taraajerejuhuaaj. Nia sapiyonuure. Sesa miishano nia saroojotanu nia jataniri namijaacatenucua. Sesa miiniujiniji nia shuquiriniu nia jataniri taraajenuucujuhuaaj. ¹⁰ Niaa jaara nioojiajinia sequeriquia Pueyaso niquiara: “Maja cua naata tamajaaja maninia miiniu”, Pueyasoori nia naacutaa maninia nia quiniuria mijiria. Nojuajaari nia jiyatenutaniya jiyaniijianucua nia quiniuria.

Parta Pueyaso pueyacuara rimiaaqueyashijiaca pa quiriquiaj

¹¹ Pueyanaa, maja sacuaraatia nia rimiaaquenu niarta Pueyaso pueyacuara. Maja maninia naatej. Cante narta Pueyaso pueya sesacaani, Pueyaso Rupaajinia naajiotasano tojiyashijiaari jiyanotej. Niaa jaara naa miiritij, niaari Pueyaso Rupaajinia naajiotasano sesacaa. Naajuhuaaj, niaari tama nia cuaqueyajaaja jiyateya juhua jiyaniijiaara, niarta pueya nequesoreenaa nia quiniuria. Naa nia miishacaritij, niaari Pueyaso rupaa tojiyashijiacara quiqii. ¹² Pueyasojuaanaari tamajaaja Jiyaniijajanaa. Nojuacuajaari na rootasano niishitijia pajaniya. Nojuajaari niquiriyatujua pa nequesoreena, pa saniniujiuriquianojuhuaaj.

Nojuajaari cumaacaraca pocuaji na tacunura, na shaajanura pajaniya-juhuj. ¿Canteeri quiajaniyanijia, quia saniniujiuniuria tamasaca, juhua nojori jiyaniijiani?

Majaari pa niishiniu tariquiria

¹³ Pueyari naa sequejaca: “Canaari tariqui quianutaniya tamonu tiacajiniani. Canaari cuniqui shocotenutaniya niquiriyatu marijiani canaa niquitiojosacari tii canaa casami. Canaari queraatia cumaneeca masenutaniya canaa casami samini”. Cua tojitiare naa sequejacanaa. ¹⁴ Majaari nia niishiniu taa nia juhuaquenutaniyani. ¿Niaatucua taa sequereni niaa jaara macu juhuaquema saaja? Nocuaji majaari naa sequenute pueyanaa. Pa quiniuuri juhua shushiquiani. Naatej, taa shushiquiacuaani rupaquijia niquishiyari, na nuhuaji tajimiohuari, paari naajuhuj. ¹⁵ Naaratej, naa nia sequere cutara: “Pueyaso jaara paniri, canaari tariqui quianutaniya poonijionuucuaani”. Naa cutarate maninia sequenu. ¹⁶ Niaari saniniuujia sequequiaacujua: “Janiyari tariqui quianutaniyani cua miiniu panishano cua miiniuria”. Naa nia sequesacaritij, niaari jiyaniya nia naata tamajaaja miiniu puetunu nia panishanojuanaa. Naa nia sequesacari juhua nia miishocoriquianotej, niaari najuhuana nia rupaa riutioconeetequiaa puera, juhua niishijia pueyano. Niaa jaara tama nia cuaqueyajaaja naa jiyateya juhua tariqui miishocoriquiano niishijiatej, cunoori jiyanohua sesa. ¹⁷ Naajuhua pueyanaa, niaa jaara maninia miyaquiri, maninia miiniu niishijia nia quishacari, niaari tari sesa miijiaca.

5

Casamiriaca pueya nacasusaanu

¹ Nia tojitiare, casamiriaca pueyanaa. ¡Juhucarijia nia sapuere! ¡Nia sariyocuatere! ¡Niaari naquiya miiniutianiya taraatia! ² Niaari jiyanohua casamiriaca. Cuno nia jiiitasano casamini, najuhuana moqueyari. Surequeyari nia maniniuquiya toqueya miaqueyajuhuj. Naacujitij, puetunu nia jiiitasanojuanaari moquenutaniya. ³ Nia paati-jiosano oroni, nia cumaneecanio, najuhuana tiyarashiyari. Naacujitij, pa Nequesoreenaari maatia niishiniutianiya niaari sacuaraatia jamuejaca quiquiaari. Naa miijiaca nia quiniuucuatej, niaari saniitosaanutaniya. Niaari socua shaajasaanutaniyaquij. Niaari najuhuana queraatia casami paatijiya shuquiriaatia nia quiniuria tamajaaja mijiria. Saniniuujia, nio pa quishacariiri quera pa Jiyaniijia tiuquishacariuhua na saniniujiuniuria pajaniya. ⁴ ¡Jiyaniijiajanaari nia poonijioteso pueya tojiquiaa! Nojoriiri sariyocuatuiya nia cumaneecajiniji nia niq-uitioyaquiniucua nojori poonijionuunujiniji, niaara na senoonucua natacuaca nia cuhariquiajiniji. ⁵ Mijiria nia quishacarijia, niaari shuquiriaatia quiquiaa puetunu nia panishanojuanaa nia jiiitasacari. Naa shuquiriaatia nia quishacaritij, niaari juhujaniya shiyoshiya juhua puecoosocoriquiano cushiya. Niaari naa miishaanutaniyajuhuj. ⁶ Niaari maninia miijiaca puecooquiaa. Majaari nojori nujuatanu quiquiaa niajaniya, nocuara nia tonujusacari nia cuarachiniutia najuhanaj. Naacujiti casamiriaca pueyanaa, niaa cumaati puetunu nio niaara sequesanojuanaa tojitiaa.

Juhujaniya pa sashiri pa Jiyaniijia

⁷ Naacuajiti cuarta Pueyaso pueyanaa, juhuajaniya nia sashiri pa Jiyaniijia cuaara tiuquiuhuara. Cuhuariquia camaruuri na natanu nuhuaji naa sashiquiaa marujuhuj, maninia na natau moritianura. Maru sashiyajaariuhua cuaara niiria, na natau jajau na querajaacaatinuria. ⁸ Naa nia sashirijuhuj. Majaari pa Jiyaniijiaacuaji nia pishiniu. Nojuacuajaari quera tiuquiniutianiuhua. ⁹ Cuarta Pueyaso pueyanaa, majaari niarta pueyacuara nia rimiaaquenu nojori nia soonuta, niaa mariqui saniitiosaareeri. Nia niishiri, pa saniniujiunia Pueyasoori pocua catecanoya. Tari juhua pa tohuateyaji nujuaari. Nojuajaari seetanujuanaa pa saniniujiunia cutara. Nocuaji maninia pa quirij. ¹⁰ Pueyanaa, juhuajaniya pa rejeretarejuhuj, paa jaara naquiya miishaareni. Naatej, taa tariucuacaanu Pueyaso sequesano caminiujiunia rejeretacoquiaari taraatia nojori miishacaricuaani, naa nia rejeretarejuhuj. ¹¹ Paari niishiyacuajani, Pueyasoori naquiya miiniu rejeretajaca pueya shuquiritiaja. Maninia na miiniutianiyari. Niaacuajaari tari pohuataaquiarijuhuj taa supuetana Job rejeretaquiaari naquiya na miishacaricuaani. Na nuhuaji cutara, Pueyasoori jiyanohua maninia na miiquiaariuhua, jiyanohua pueyacuara taraajeja na quiniucua, jiyanoojiaariuhuj.

¹² Cuarta Pueyaso pueyanaa, nia tojitiare. Nia pocoojosacari, tamonu jaara quia sequesanoocua tiuyaquiri, naajaa, majaari najuhuaana sesa pocuanu. Maja cutaraari sequenu: “Cua sequesanoori seetanujuanaa juhua jiya cajiniocuaja. Majaari na shaajenu quiniutianiya”. Majaari sequenujuhuj: “Cua sequesanoori juhua nio jiya. Majaari na shaajenu quiniutianiya”. Majaari naa pocuanu sacuaraatiatej. Nia sequesano jaara seetanujuanaa quiri, nareja nia sequere: “Taaquiririnij”. Naajuhuj, nia sequesano jaara quiri “maja”, cuaara naa quiri seetanujuanaa. Majaari nia sequesano nia maatenu socua, Pueyaso mariqui nia saniitioreeri.

¹³ Tamonu nijaniyajinijinio jaara naquiya miishiya, nojuaja cuaara Pueyaso secojoora. Shuquiriaatia nia quishacari saniniuuja, Pueyasora nia jaaquequejore. ¹⁴ Cusosu nia quishacari, Pueyaso pueya jitianaa nia sequere nojori cuaara secojoora niaacuara. Nojori cuaara shiyocua cojuata cusosu quiaara, pa Jiyaniijia sesajinia nojori secojosacari. ¹⁵ Nia secojosacari Pueyaso seetanujuanaa nocua nia tiuniutia, cusosuuri naatanutaniuhua. Nojuaja jaara sesa miiquianu, Pueyasoori na jiyanooniutianiya sesa na miishanojiniji. ¹⁶ Cunora, sesa nia miiniu nia sequetoore nia jiyanooshaanura. Majaari sesa nia miishano nia seetanu. Na nuhuaji Pueyaso nia secojore tama niaacuarajaaja. Pueyasocua nia naatanijiorohua. Maninia pueyano secojosacari jiyanohua, cunoori jiyanohua cumaacaraca. Pueyasoori na secojosano tojijia. ¹⁷ Tariucuacaanu pueyara Pueyaso sequesano caminiujiunia Elíasni, nojuajaari nareja pueyano quiquiaarijuhuj taa pajaniyacuaani. Naajaa, nojuaja jaara Pueyaso secojoquiaari maja maru niniuria, majaari maru ninu quiquiaari jiuujanaraca marijia cuaara shocojoquiaarijiaatijia, socua seis racanio. Majaari maru ninu quiquiaari tojetaarucujanaa. ¹⁸ Elías jaara pacutequiaariuhua seconu maru na panishacari, maruuri shusha niquiaariuhua. Pueya nataacuacaari jiyacari shusha moritiaquiaariuhua.

¹⁹ Cuarta Pueyaso pueyanaa, tamonu nijaniyajinijinio jaara Pueyaso

rootasano tojiyashijiara quiriohua, tamasaca jaara na niquiri, cuaara na rootaaranoj, maninia miijia na quiniuhuara. ²⁰ Nia niishiri, cante sesa miijia tacatorohua Pueyasooqua sesa na miiniujinijini, nojuajaari cuno sesa miijiaacuaji tacuya maja senota na shaajasaanura. Pueyaso na jiyanootiyaariuhua puetunu sesa na miishanojinijijianaa. Tariucuaja cua panishano pueyanaa.

COTEENU PEDRO NAAJIONEE

Pedro saruhuatasacari narta Pueyaso pueya

¹ ¿Niaate quiyajaa cuarta Pueyaso pueyanaa? Janiyari Pedroni, Jesucristo jiyaramiquishano na rupaa pohuatana cua quiniuria. Janiyari nio naajiya niaacuarani, noo pojoriicuaa canapujete tiquiyocua niaquecojoquiaaricujani: Ponto jiyajinia, Galacia jiyajinia, Capadocia jiyajinia, Asia jiyajinia, Bitinia jiyajinianio. ² Tariucuaaanu, pa Que Pueyasocuaajaari nia saquiriojoquiaari na pueyarano nia quiniuria. Naaratej, nojuajaari na Sohuanu jiyaroquiaari nioojiajinia na poonijionura, Jesucristoocua nia tiuuniuria. Naacujitij, Jesucristo shootenucua na nanaca, Pueyasoori nia jiyanooquiaa, juhua tojetaarucujanaa jeequesano nioojia quiniuria. Na Sohuanuuri nia jataniquiaa tojetaarucujanaa maninia miijiaca nia quiniuria, seetanujanaa Jesucristo tojijiaca nia quiniurijuhua. Naa Pueyaso panishano pueya nia quiniucua, nojuaja cuara cumaquiiria jiyanohua nijaniya. Cuara nioojia cajitiiria pueyaracaanujuhua.

Pa niishiri, paari jiyanohua maninia miishaariquianoni

³ Pa Jiyaniijia Jesucristo Que Pueyaso pa maniniuhuaqueetare, jiyanohua maninia na miiniucua pajaniya. Jiyanohua na taraajenuucua pocua, na pueya pa quiniucujuhua, nojuajaari pa niishitiquiaari paari juhua quiariniora samiitianijiosaanutaniuhuani. Paari naa samiitianijiosaanutaniuhuani, naatej, taa Jesucristo samiitiaquiaari iuhucuaani. Naa pa niishishacari taa pa miishaanutaniyani, paari shitimia sashiquiaani pa miishaanura taa Pueyaso miiniu paniya pajaniyacujani. ⁴ Naacujitij, niaari niishiya niaari seetanujanaa masenutaniya puetunujanaa niaarano Pueyaso jiiitasano jiyocuaaanu. Cuno, Pueyaso racatasano niaaranoni, cunoori maja na naata shaajasaanu. Majaari na naata sesasaanu. Maja na naata tariucuaashiniujihua. ⁵ Pueyasocua nia tiuuniucua, nojuajaari na cumacata nia cojuaquiaa. Pueyaracaanu nia cojuanutaniyari nojuaja cuara nia rijiorejaatijia mijiria taraatia nia quiniujiniji, tojetaarucujanaa jatanishano quijiaca nia quiniuria. Jiyanohua maninia Pueyaso miiniu panishano na pueyaranoni, shusha jiyacari niqishaanutaniyari.

⁶ Cunora niaari shuquiriaatia quiya. Saniniuujia, niaa naasucuaari taraajeya rupaquijia nia miijiosacari naquiya mijiria. Naajaa, niaa jaara naquiya miishaare, cunoori maja najuhuanaj. ⁷ Naquiya pa miiniuni, cunoori pa saniniujiushaanura paate seetanujanaa Pueyasocua tiuujiacani. Niaacuaajaari niishiya, pueyari jiyanohua oro panijiaca. Saniniuujia, Pueyasocua pa tiuuniuni, cunoori jiyanohua socua panishano orojiniji. Niaacuaajaari niishiya, pueyari oro catijiaja, na sanishaanura maninia oro seetanutejanaa. Naajaa, seetanujanaa maninia oroori shaajejajuhua. Saniniuujia, paa jaara mijiria naquiya pa miiniu rejeretajaca quirini, Pueyasocua tiuujia pa quiniucua, cunoori socua jiyanohua maninia cuno shaajeja orojiniji. Pueyasocua nia tiuuniu jaara saniniujiushaare juhua orojuhua, jaara seetanujanaa maninia

quiri, Pueyasoori nia timitianutaniya. Naacujitij, Jesucristo muetasacari pocua, Pueyasoori jiyanoehua maninia miiniutianiya niajaniya. Jiyaniijianucua nia jiyatenutaniya.

⁸ Majaari juhuanouaja Jesucristo nia niquniu. Naajaa, niaacujaaari na panijiaa. Nia niquishoo na quishacarijia, naajaa, niaari nocua tiuquuaa. Niaari na timitiaquuaa jiyanoehua. Tojetaarucujanaa jiyanoehua nia timiniu quiniucua nioojiajinia, majaari nia naata na pohuatano nia rupaata. ⁹ Niaari naa timiquuaa, tariucua jatanishano nioojia quiniucua, Jesucristoocua nia tiuushacari.

¹⁰ Tariucuaaanu, pueyara Pueyaso sequesano caminiujuunaa pueyari poojotaquiaari taa Pueyaso jiyanooniutianiya nio pa quishacari pueyani, na pueya nojori quiniuria. Nojoriiri tama nojori naajiotasanojuaaja suraatia serojojuaca quiquiaari, Pueyaso Sohuanu niishitishano nojori naajiotasanoni. Nojoriiri jiyanoehua niishiniu paniquaari taa Pueyaso jiyanooniutianiya pueyani. ¹¹ Jesucristo Sohuanucujaaari juhuacarijia nojori niishitiquaari taa Pueyaso jiyarosocoriquiano Pueyano miishaanutaniya naquiya coteenuni. Nojori niishitiquaarijaarihuaj, naquiya na miiniu nuhuaji saniniuujia, nojuajaari Jiyaniijiarajanaa jiyatesaanutaniya, shacantuuca quijia na quiniuria. Naaratej, nojoriiri maninia na niishiniuria saniniuujiquaari juucua, cantejaara cuno quiniutianiyan, Pueyaso Jiyarosocoriquianoni, naajuhaj, taacari na muetanutaniyan. ¹² Pueyasoori saaja nojori niishitiquaari, na Sohuanu poojotanishano nojorini, cunoori maja tama nojoririjaaja na quiniu quiquaari. Cuarta Pueyaso pueyanaa, ¡cunoori niaarano quiquaari seetanujuanaa! ¡Tariucuaaanu poojotasano Pueyaso Jiyarosocoriquianojinijiiri tari tohuateequaari! Jiyocuaaanuji jiyarosano Pueyaso Sohuanuuri Pueyaso rupaa pohuatanaa cumaquiquiaa, taa na cumaquiaari Pueyaso Jiyarosocoriquianojiniji pohuatanaacuaani. Naacujitij, quiari naataja nia tojishano Jesucristojinijini, cunoori supuetanaa pohuatasano quiquiaaricujaja. Pueyaso seyajanaacujaaari pueyarano Pueyaso miishocoriquianoocua maatia niishiniucua jiaatiaajuhaj.

Pueyasoori paniya saaja maninia miijiaa pa quiniuria

¹³ Cunora, cuarta Pueyaso pueyanaa, jeenucuasano nia quiriqia. Jesucristo muetasacari pocua, Pueyasoori jiyanoehua maninia miiniutianiya pajaniya. Cunora, saaja naa nia miiniu panishaanuucua jiaatiajaca nia quiri. Majaari nioojia niquijotejaca nia quiniu. Maninia niishiriojuuca nia quiriqia. ¹⁴ Tarijia, niaari tama nia cuaqueya panishanojuaaja miijiaa quiquaari, Pueyaso niishiyashijia nia quishacarijia. Quiarijia saniniuujia, niaari na tojijiaa cutara. Naaratej, na muerasu nia quiniucua, majaari naa quijiaa nia quiniu socua. ¹⁵ Saniniuujia, saa maninia miijiacaja nia quiriqia. Pueyasocujaaari nia saquiriojuquaaari naa tojetaarucujanaa maninia miijiaa nia quiniuria, juhua nojuajuhaj. ¹⁶ Tariucuaaanu Pueyaso sequesanoori naa naajiotasano quiyajuhaj:

“Tojetaarucujanaa sesa miyashijia nia quiri, taa janiyacuaani”.

¹⁷ Nia secojosacari, niaari Pueyaso sequequiaa, “cua Quena”. Cunoori maniniacujaja. Naajaa, majaari nia niyajetanu cutara, nojuajaari puetunu pueyajanaa nequesoreenutaniya sesa pa miishanojiniji, maninia pa miishanojinijinio. Majaari rimiajata

na saniitionu quiniutianiya. Cunora, mijiria nia quishacarijia, nia puerenuta tama nia cuaqueyajaaja nia cojuare, niaa mariqui na tojiyashijiacara quiriohuari. ¹⁸ Pa supuetanaa quiniuucua sesa miijiaca, paari naa miijiacara quiquiaarijiuhuaaj. Pueyaso cutaraari naa sesa pa quiniujiniji pa jataniquiaari maninia na muerasu pa quiniuria. Niaacuajaari niishiya, majaari Pueyaso masenu quiquiaari pajaniya orota, platatanio, shaajeja casaata. ¹⁹ Nojuajaari pa masequiaari tama Neyanuniyojua nanacatajaaja. Jesucristoori tama na cuaqueyajaaja tarinitiaquiaari pocuara na mosaanura, na nanaca shoonuucua pa jiyanoooshaanura. Tariucuacaanu, borrego jaara Pueyaso niquiara mosaaquiaari na camaru niti, cuno borregoori tojetaarucuajanaa borrego maniniu quiquiaari. Naajuhuaaj, Jesucristoori tojetaarucuajanaa maninia miijia quiquiaari. Naacuajitij, nojuajaari tojetaarucuajanaa maninia pueyano quiquiaari pa niti na mosaanura. ²⁰ Jiya shipiniyaquishacarijia, Jesucristoori tariucua pueya niti mosocoriqiano sequesaaquiaari, sesa miijiaca jiyanoooshaanura. Saniniuujia quiari naataja, nojuajaari shusha mijiria muetaquiaari pocuara na mosaanura, taa Pueyaso miiniu paniquiaari pajaniyaracuajani. ²¹ Naa Jesucristo miiniuucua pocuaratej, niaari Pueyasocua tiuquiaa. Pueyasocuaajaari Neyanu samiitianiquiaariuhua. Na jiyatequiaariiri Jiyaniiijajanaa na quiniuria, shacantuuca cumaacaraca quijia na quiniuria. Naacuajitij, niaari quiarijia Pueyasocua tiuya, na samiitianiniuria nijaniyajuhaaj. Naaratej, niaari juhuajaniya sashiya, shacantuuca quijiacara nia jatanishaanurajuhaaj.

²² Seetanu rupaajanaa tojitiajaca nia quiniuucua, nioojaari tari jeequejosaaquiaari, niarta Pueyaso pueya panijia nia quiniuria seetanujanaa. Naaratej, seetanujanaa panitiojuaca nia quiriquia puetunu nioojiatajanaa, maja sesa nia niishiriojonuta quenaaja. ²³ Naa panijia nia quiri, jatanishano pueya nia quiniuucua. Pueyaso rupaacua nia tiuushacari, niaari juhua roosaaquiaariuhua, pueyaracaanu quijiaca nia quiniuria seetanujanaa. Pueyaso Rupaacuajaari pueyano samiitianijia, saminio na quiniuucua. Naacuajitij, niaari shaajeyashijiacara jatanishaaquiaari pueyaracaanu Quijia rupaacua nia tiuuniuucua. ²⁴ Tariucuacaanu Pueyaso Rupaajinia naajiotasanocuaajaari naa sequeya:

“Puetunu pueyajanaari rishiyashijiaca juhua jiyasocua. Na cumaaca, puetunu na jiišanasojuanaajuhuaaj, cunoori soreja, juhua naana shuu. Jiyasocuaari soreja. Naana shuuri tija. ²⁵ Saniniuujia, Pueyaso Rupaa cutaraari pueyaracaanu quijia”.

Cuno rupaacuajaari nia niquiara pohuatasaaquiaari pueyaracaanu quijiacara na jataniniuria nijaniya.

2

¹ Naaratej, nia tarinitiare puetunu sesa nia miiniuujanaa. Seetanujanaa nia tarinitiare cuaracashijionu. Naajuhuaaj, majaari sapuenu juhua maninia pueyano niquishano nia quiniu najuhuanaj. Majaari tamasaca jiišanasocua jiaatiajaca nia quiniujiuhuaaj. Majaari coriaacojuaca nia quiniu socua. ²⁻³ Naa jaara tari niishiyacuaja pa Jiyaniiijaari seetanujanaa maninia, na rupaacua jiaatiajaca nia quiricuarajaj. Naatej, taa shusha rasano conaaja jiaatiaa supuenucuacuaani, naa Pueyaso

Rupaacua jiaatiajaca nia quiriquiajuhuaj, cumueeca Pueyaso muerasu nia quiniuria seetanujuanaa. Naacujitij, niocua tojetaarucujanaa jatanishano pueya quiri.

Cristoori juhua saminio saajia, Pueyaso quiqiorano tiataja

⁴ Saijiniji shipinishano tiaari pueyaracaanu rishijia. Naaratej, pa Jiyaniijaari miriqui sequeshiya juhua saminio saajiata Pueyaso quiqiora. Mijiria Pueyasora tiajonaari jyaniquiaari cuno saajiaari sesarujau. Naaratej, nojori jiyajenetasacari cuno saajia, nojoriiri na jataquiaari na ruetasacari. Nojuaja cutaraari Pueyaso saajia maniniu, tama na saquirojosanojuaja. Naaratej, nocua pa tiuuri. ⁵ Naajuhuj, puetunu Jesuucua tiuujiaca pueyaranojuanaari pueyaracaanu rishijia quiqiorano Pueyasora. Naacujitij, Jesuucua pa tiuushacari, paari juhua maniniujiaca sai Pueyasorani, na quiqiora na tiatajara. Naajuhuj, Pueyaso quiquio pa quishacari Neyanuucua pa tiuuniuucua, Pueyasoori pa jiyateya pueyacuara secojonaa pa quiniuria na tacoji. Majaari seya pa niqutiojonu quiquiaa Pueyasoni, taa tariucuacaanu pueyacuara secojonaa pueya miiquiaaricuaani. Paa cutaraari tama pa cuaqueyajaaja jiyatequiaa Pueyasora pa quiniuriani, puetunu pa miishanojuanaanio. Puetunu naa pa miishanojuanaa Jesucristoocua pa tiuuniuucua, cunoori Pueyaso timitiquiaa. ⁶ Cunora, tariucuacaanu Pueyaso Rupaajinia, miriqui Pueyaso sequesano Jesucristojinijiiri naa naajiotasano quiya:

“Janiyari Sión tuhuananuucua jyanohua cua panishano saajia nianutaniani. Cuno saajiaari tama cua saquirojosanojuaja. Maninijiajau saajia seetanujuanaari. Cante nocua tiuyani, nojuajaari maja na cararosaanu quiniutianiya”.

⁷ Cua panishano pueyanaa, cuno saajiaacua tiuujiaca nia quiniuucua, cuno saajiaari jyanohua nia timitiasano. Nocua tiuyashijia cutaraari cararosaanutaniya. Nio tariucuacaanu Pueyaso Rupaajinia naajiotasanoori tari tohuatecanu nojoriria. Naa miriqui sequeyari:

“Tiajonaa jatasano saajia, nojori jyanishacari cuno saajia naasucua sesarujau, cuno saajiacujaari socua jyanohua panishano saajiaari jiyatesaaquiaariuhua”.

⁸ Tamaqui, nojuajiniijiiri naa miriqui naajiotasano quiyajuhuj:

“Pueyari cuno saajiaacua tiuriiniutianiya. Nocua jiriatanutaniyaariuhua na tiuriiniuria”.

Nojoriiri nocua tiuriiquiaa, nojori tojiyaquiniuucua Pueyaso rupaa Jesucristojiniji. Pueyasocujaari tariucuacaanu sequequiaari Neyanuucua tiuyashijiaari tiuriiniutianiya puetunurajanaa.

⁹ Niajaniya saniniujia, niaari tama Pueyaso saquirojosano pueyajaaja. Nojuajaari puetunu niajanijajanaa jiyatequiaari nojuaja secojonaa nia quiniuria pueyacuara, pueyaracaanu na panishano miijiaca nia quiniuriajuhuaj. Puetunu niajanijajanaari tamasaca pueyapuejinijinio saquirojosaaquiaari saaja Pueyaso pueya nia quiniuria. Neyanu cusonuta, Pueyasoori naa pa masequiaari tama nerajaaja, maninia Pueyaso miishano pa pohuatanura tamasaca niqiuara. Tarijia, niaacujaari juhua ninishiqui quijiaca quiquiaari. Pueyaso cutaraari nioojia cuhuataquiaari, seetanujuanaa shacantuca cumaacajinia quijiaca nia quiniuria nata. ¹⁰ Tariucuacaanu, Jesucristoocua tiuyashijia nia quishacarijia, niaari juhua soosano taucuaca quiquiaari Pueyasora.

Quiarijia saniniuujia, niaari Pueyaso panishano pueya. Tariucuacaanu, majaari Pueyaso taraajenu quijia niaacua. Quiarijia cutara, niaacua taraajeyari. Cunora, nia jiyanooquiaari.

Pueyaso panishano miijiaca pa quiriquiaj

¹¹ Cua panishano cuarta Pueyaso pueyanaa, nia tojiri cua sequesano. Niaari juhua rucoonaa mijiria. Nio jiyari maja pueyaracaanu pa quijia. Naaratej, majaari tama nia cuaqueya miiniu panishanojuaaja miijiaca nia quiniu, saaja shuquiriaatia nia quiniuria mijiria. Sesa casaacua pa cuaqueya jiaatianuni, cunoori poojia sesojua. ¹² Saaja maninia miijiaca nia quiriquia Pueyaso niishiyashijiaca niqiuara. Naacujitij, nojori jaara niaacuara rimiaaqueriquia juhua sesa miijiacara nojori jiyatesacari niajaniya, naajaa. Jiya puequesacari, Pueyasoori puetunu pueyajanaa nequesoreenutaniya. Jiyacari, niaacuara rimiaaquejacaari niishiniutianiya, Pueyasoori tojetaarucujanaa maninia miijia na saniitiosacari nojori, maninia na miishacari niajaniya saniniuujia.

¹³ Pa Jiyaniijia tojijiaca nia quiniuucua, puetunu mijiria pa jitianaa jiyaniijianucua tojtiajaca nia quiriquiajuhuaj. Naacujitij, nia jiya jiyaniijiajanaa tojijiaca nia quiri. Nojuacuajaari jiyaniijiajanaa cutara. ¹⁴ Cunora, na jiyatesano jiyaniijianucua tojijiaca nia quiriquiajuhuaj. Nojoricuajaari na jiyaramiquishano, sesa miijiaca saniitiosaanura, maninia miijia maniniuhuaqueetasaanura saniniuujia. ¹⁵ Naacujitij, saaja maninia miijiaca nia quishacari, niaari niishiyashijiaca sesa miijiacana sanaajanutaniya, najuhuaana nojori sesacasacari niajaniya. Cunora, Pueyasoori paniya maninia miijiaca nia quiniuria.

¹⁶ Tariucuacaanu, Moisés Rootasanoori juhua nia jiyaniijia quijia puetunu niaarajanaa nia tojishocoriquiano. Quiarijia saniniuujia, Jesu cusunucua nia niti, nojuajaari Moisés Rootasano tohua-teequiaari. Naacujitij, nojuajaari Moisés Rootasano sanaajaquiaari niaara. Naacujitij, Moisés Rootasano tonujiaquishacari niaacuara tari, naajaa, majaari nia jiyaniinu naacujiti nia naata tama nia panishanojuaaja miiniu. Pueyasojuaanaacuajaari nia Jiyaniijiajanaa cutara. Naaratej, seetanujanaa na tojtiajaca seya nia quiriquia cutara. ¹⁷ Majaari quenaaja niquiriyatu pueyano rerequeteja nia quiniu. Niarta Pueyaso pueya panijia nia quiriquia cutara. Seetanujanaa Pueyaso tojijiaca nia quiriquia. Majaari jiya jiyaniijiajanaa rerequetejaca nia quiniu.

Naquiya pa miishacari, sanaa pa rejeretariquia juhua Cristo

¹⁸ Poonijotesano pueyanaa, seetanujanaa maninia nia camarnu tojijiaca nia quiriquia. Nia camarnu jaara juaajia quiriquia, naajaa, saaja na tojijiaca nia quiriquia. Majaari saaja maninia nia jitiijaca tojijiaca nia quiniu, nia jiyanoojiacanio. ¹⁹ Niaa jaara juhuajaniya rejeretariquia najuhuaana nia camarnu saniitiosacari niajaniya, cunoori jiyanojuaa maninia Pueyasora. ²⁰ Pueyaso cutaraari maja na timiniu niaa jaara juhuajaniya rejeretare nia camarnu saniitiosacari niajaniya seetanujanaa sesa nia miiniuucua. Saniniuujia, nia camarnu jaara saniitiore niajaniya maninia nia miiniuucua, niaa jaara na rejeretare juhuajaniya, Pueyasoori cuno timitiaja cutara. ²¹ Pueyasocujiaari nia

saquiriojoquiaari naquiya rejeretajaca nia quiniuria maninia nia miiniucua. Cristojuaanaacuaajaari naquiya miishaaquiaari maninia na miiniuria pajaniya. Nojuajaari naa miiquiaaritiij, pa niishiniuria juhua nojuaja pa miiniuriajuhuaj. ²² Cristoori maja quenaaja sesa na miiniu quiquiaari mijiria na quishacari. Majaari na cuaracashijionu quiquiaari quenaajajuhuaaj. ²³ Jaara sesacasaaciaaari, nojuajaari maja quenaaja nojori na riucuanu quijia na juaaniutia. Jaara miitiasaaquiaari, majaari quenaaja nojori na miananajonu quiquiaari. Nojuajaari saaja na Que Pueyasocua tiuquiaari, na niishishacari nojuajaari seetanujuanaa maninia nequesoreena cutara. ²⁴ Cristo jaara niyacutesanojinia cusojuaaciaaari, nojuajaari tari puetunu sesa pa miiniujuanaa cusotaquiaari. Naa pa niti Cristo cusonuucuatej, cunoori quiquiaari maninia miijiac pa quiniuria saniniuujia, maja socua sesa miijiac pa quiniuria. Naajuhuaaj, nojuajaari pa niti nootusaaciaaari, pa naatanijiosaanura saniniuujia. ²⁵ Tarijia, niaari juhua tashuquioono borregohua rucoojuaa quiquiaari. Quiarijia saniniuujia, niaari nia cojuana Cristoocua tiuquijioquiaari. Nojuacuajaari nioojia jiiitiana maniniu.

3

Camiyono pueyara rootasano

¹ Camishano maajipohuanaa, nia niyaca tojitiajaca nia quiriquia maninia. Naacuajitij, nia niyaca jaara Pueyaso rupaacua tiuyashijia quiriquia, naajaa, nojori tojitiajaca nia quiniucua nojoriiri niishiniutianiya Pueyaso Rupaari seetanujuanaa. Nojoriiri naa niishiniutianiya saa maninia miijiacaja nia quishacari, nojori nia pahuataaquishacarijia Pueyaso Rupaa. ² Nojori niquishacari tojetaarucujanaa maninia miijiac nia quishacari, nojori tojijiacajuhuaaj, saa cunotaja nojoriiri maatia niishiniutianiya Pueyaso Rupaari seetanujuanaa. ³ Maajipohuanaa, majaari nia tacaaniu saaja nia maniniushiniuria, maninia nia niquishaanura. ¿Maajitiiri maniniucasano, saaja na muezaca na canuusacari maninia, na cushitiasacari orojiniji shipinishano tuhuajashiquia, na cushishacari shanohua toquejuhuaj? ¿Jiyano maajitiiri maniniucasano jaara juaaniu maniniu quiriquiajuhuaj? Maja. ⁴ Naaratej, maninia cutaraari nia tacaaniuria nioojia nia maniniushitiniuria. Cunora, saaja maninia maaji quiniucua jiaatiajaca nia quiriquia cutara, jacaria pocuajajuhuaaj, maja juaajia. Jiyano maajitij, cunoori seetanujuanaa maninia niquishano Pueyasora cutara. Niaa jaara nioojia maniniushitiri cutara, cunoori seetanujuanaa shaajeyaquiriquiano. ⁵ Naajuhuaaj, Pueyasocua tiuujiac tariucuaaanu maajipohuari neyaca tojijiac quiquiaari. Naa nojori miiniuucuatej, nojori jiuujiaari seetanujuanaa shanohua maniniushitishano quiquiaari Pueyasora cutara. ⁶ Supuetana Abraham niquiocua Saaraari naa neyaca tojijia quiquiaari. Seetanujuanaa neyaca tojijia na quishacari, nojuajaari na jiyaniquijia na jiyaniijia. Naacuajitij, niaa jaara maninia miijiac quiriquia, niaa jaara nia puereyaquiniutia nia niyaca tojijia quiriquiajuhuaj, Pueyasora, niaari Saara niquiojori.

⁷ Niajanitarijia canuunaa, nia niquiocua nia jiiitariquia maninia, nia niishishacari maajiiri maja cumueeca juhua cayaja. Majaari na rerequetenu. Maajipohuacuajaari Pueyaso jiyanooshanojuhuaj, taa na

jiyanooquiaari niajaniiyacuaani. Pueyasoori niaata nojori cojiritianu-taniya samiitianijionu, pueyaracaanu rishijiaca nojori quiniuriajuhuaj. Naacuaajitij, maninia nia jiitariquia nia niquiocua, Pueyaso mariqui nojuaja nia secojosano tojiyaquiriiri.

Paatucua taa miiriquia parta pueyani

⁸ Pueyanaa, cua sequesano quiarijiani, nioori puetunu Pueyaso pueyarajanaa. Pueyaracaanu jiuujiaatiojuaca nia quiri. Majaari juayonuujutanu. Niarta Pueyaso pueya nia cojiriquia taraatia nojori quishacari, shuquiriaatia nojori quishacarijuhuaj. Seetanujanaa panitiojuaca nia quiri juhua nia tapueyocucata. Taraajetoojuaca nia quirijiuhuaj. Naajuhuj, majaari tama nia cuaqueyajaaja nia jiyatenu juhua socua tojishano pueyano nia quiniuria tamonu pueyanojiniji. ⁹ Naa jaara sesa miishaariquia, majaari na naminiu. Naajuhuj, niaa jaara sesacasaariquia, majaari nojori nia riucuanu nojori nia sesacaturajuhuj. Saaja maninia nia riuhanere nojori. Tariucuaaanu, Pueyaso paraca nia quishacarijia, nojuacuajaari nia saquiriojoquiaari maninia na miiniuria niajaniiya. Naaratej, saaja maninia nia miiriquia nia paracajuhuj. ¹⁰ Tariucuaaanu Pueyaso Rupaajiniaacuajaari naa naajiotasano quiyajuhuj:

“Cante pueyaracaanu mijiria rishiniuucua jiaatiaani, shuquiriaatia na quiniuriajuhuaj, nojuaja cuara na niti cojuara maja sesa na pocuanura. Cuaara na rupaa cojuarajuhua maja na cuaracashijionura. ¹¹ Naajuhuj, cuara sesa na miijionu tarinitiaara saaja maninia na miiniuria. Nojuaja cuara pueya jiyanoootiooteja quiiria. Cuaara naa maninia na miiniu tarinitiaaquiiria. ¹² Cante naa maninia miijiani, Pueyasoori na cojuaja, na secojosano tojiijaariuhuj. Saniniuujia, Pueyasoori sesa miijiaca samiritiaja saaja”.

¹³ ¿Cantucua sesa nia miiriquiani niaa jaara saaja maninia miijiaca quiriquia? ¹⁴ Naajaa, niaa jaara saaja maninia nia miiniuucua miitiasaare, nia timiquiore. Pueyasocuaajaari jiyanohua maninia miiniutianiya niajaniiya saniniuujia. Mijiria quiniaa miananajosacari niajaniiya, majaari puerenu, majaari nioojia nia niqiiotenu. ¹⁵ Saniniuujia, nioojiajania Cristo nia jiyatere nia Jiyaniijiajanaara, seetanujanaa na tojiijia nia quiniuria. Jhuacarijia nia niishiriojoriquia, jeenucuasano nia quiniuria, maninia nia pohuatanura Jesucristojiniji. Naacuaajitij, niaari jeenucuasano quiniutianiya, maninia nia riucuanura tamasa jaara nequesotare niajaniiya, casaara juhuajaniya naquiya miiniu rejeretajacate niajaniiya. ¹⁶ Jacaria nia pohuatare nia paniniutia nojori, maja nia rerequetenuta nojori. Pueyaracaanu maninia miijiaca nia quiriquia, sesa nia miiniu mariqui nioojia macuhajareeri. Naacuaajitij, pueyaracaanu shitimia maninia miijiaca nia quishacari Jesucristoocua tiuujia nia quiniuucua, niaacuara rimiaaquejacaari tama sesa na pocuanuucuaajaaja caririqiniutianiya.

¹⁷ Nio nia niishiri pueyanaa. Pueyaso jaara paniri naquiya nia miishaanura, socua maninia cutaraari naquiya nia miishaanura maninia nia miiniuucua, maja sesa nia miiniuucua. ¹⁸ Cristojuanaacuajaari mosaaquiaari sesa miijiaca pa quiniuucua. Majaari socua na patutenu quiniutianiya cusonu. Nojuajaari tojetaarucujanaa maninia

miiija quiquiaari. Naacujitij, nojuajaari sesa miijiacaacuara cuso-
quiaari, Pueyasooocua na jiyatanura niajaninya. Pueyano cuaqueyaraca
na quishacari, mosaaquiaariiri. Pueyaracaanu rishijia sohuanuraca
na quiniuucua, nojuajaari samiitiaquiaariuhua. ¹⁹ Naa sohuanu na
quiniuucuatej, nojuajaari macunucua quiquiojinia rosequiaari tii tama
nojuajiniijiaaja na pohuatanura macunucua sohuanu. Cuno pojori-
iri nujuatejojuajinia mishiquionucua quiya. ²⁰ Cuno pojoriiri, noo
pojoricuaja tariucuacaanu supuetana Noé tojiyashijia quiquiaaritij,
pueyaracaanu Noé poojotasacari Pueyaso rupaa nojori niquiara ju-
ucua. Pueyaracaanu Noé tarishishacari na puereetuuca buque na
shipinishacari, pajaacuaji na tacajara, Pueyasoori jiyacari cuno sesa
miijiaca sashiquiaari juucua. Pueyaracaanu sashiquiaariiri nojori taca-
tonuhuara noojiaca nocua juucua. Puetunu mijiria quijiaca pueyajini-
jiniojuanaani, saaja ocho pueyari cureequiaari, buquejiniacuma nojori
tiuquitianuucua. Puetunu pueya shushiniuushacari pajaajinia, cuno
pajaari saniniuujia Pueyasooocua tiuujia cuataniquiaari na buque-
jinia. ²¹ Quiarijia pajaniyara saniniuujia, cuno pajaari miriqui pa ni-
ishitiojiya taa Pueyaso miiquiaa pajaniyani, paa jaara moojinia tiuquin-
ishaareni Jesuucua pa tiuushacari. Naatej, taa Noé juhuajaniya cu-
ataquiaari pajaajiniacuaani, Pueyasooocua tiuujia na quiniuucua, puer-
aari naajuhua. Naacujitij, paa jaara moojinia tiuquinishaareni, paari
pa timiniutia moojiniji tohuataquihuanu, poojia cajitishano seetanu-
juanaa pa niishishacari paari tari jiyanooshanoni, pocuaji Tacuna Jesu-
cristo samiitianuucua macujiniji. Majaari pa tiuquinishaanu quiquiaa
pa seca pa jatanura. ²² Jesucristo samiitiasacariuhua, nojuajaari jiy-
ocuacaanu tacaquiaariuhua. Quiarijia cajiya Pueyaso miaquetajaraari.
Jiyaniijajanaa na quiniuucua, nojuajaari cumaacaraca, tama noju-
ajaaja na tojitiniuria Pueyaso seya, puetunu cumaacaraca quijiacajanaa,
samaruhuanio.

4

Maninia miijiaca pa quiriquia, Pueyaso cumaaca pa jiitianuucua

¹ Naacujiti pueyanaa, naatej, taa Cristo rejeretaquiaari naquiya
miiniu mijiria na quishacaricaaani, naa rejeretajaca nia quiriquia-
juhuaj, niaa jaara naquiya miishaariquia. Naquiya pa miishacari,
cunoori sesa pa miiniu pa tarinitijia. ² Naacujitij, paa jaara naa
naquiya miishaariquiani, na nuhuaji paari saaja Pueyasora quiniu
paniyani. Paari saaja na panishano miiniu paniyani, maja tama pa
cuaqueya panishanojuaja pa miiniuria socua. ³ Tarijia, Pueyaso to-
jiyashijia nia quishacarijia pueyanaa, niaari jiyanoohua sesa miijiaca
quiquiaari, taa Pueyaso niishiyashijia miiquiaacuaani. Niaari saaja
nia cuaqueya miiniu panishanoocua shiiniuquijia quiquiaari. Niaari
queraatia tamaatia sesa miiniuucua jiaatiajaca quiquiaari. Niaari
saaja mashaasequenujuaca quiquiaari. Nia queranacunuusaqui, ni-
aari tojetaarucujanaa sacuaraatia miijiaca quiquiaari. Niaari rere-
jojuajuhua puera nia ratunura, jiyanoohua nia mashaasequenuunura-
juhuaj. Naajuhua, niaari juaashiquiata shipinishano nia pueyasora
nia jiyatesano shuquiritiajaca quiquiaari. Niaari na tacoji sacuaraatia
pueresano casaa miiquiaarijuhuaj. ⁴ Quiarijia saniniuujia, Pueyaso
niishiyashijia nia cojiyaquishacari naa sacuaraatia nia miiijionuratej,

nojoriiri jiuujiatequiaa nojori shaacasacari niajaniya. Nojoriiri cunora nia sesacaquiaa. ⁵ Cuno pojori cuaara niishiiria nio, Pueyasoori nojori nequesoreenutaniya na nequesoreesacari puetunu pueyajanaa, saminiucua, macunucuanio. Jiyacaritij, nojori cuaara tama nojoriicuaaji riu-cuaarajaaja. ⁶ Cunora, pa Jiyaniijia Jesucristoori macunucua niquiara pohuataquiaari Pueyaso rupaa tama nojuajiniijiaaja, nocua tiuujiacara na jiyatesocoriguiano. Nocua tiuujiaaari pueyaracaanu rishijiacara quiriquiano, taa Pueyasocuaani. Sesa miijiaa mijiria nojori quiniucua, nojoriiri pajaajinia cusonuuquiaari taa puetunu pueyajanaa shaajecoquiaacuaani. Naajaa, Jesuucua tiuujiaa cutaraari samiitiani-jiosaanutaniuhua.

⁷ Nio pa quishacarini, paari socua quenaacoya jiya puequesacar-icuarani. Naaratej, niishiriojuaca nia quiriquia. Maninia nia jitiariquia tama nia cuaqueyajaaja, saaja Pueyaso secojuaca nia quiniuria pueyaracaanu. ⁸ Jyanohua panitiojuaca nia quiriquiajuhuaj. Cunoori socua panishano cutara. Paa jaara panijiaa quiriquiani, paari queraatia sesa miishano jyanoojia quiniutianiyan. Naaratej, seetanujanaa panijiaa nia quiriquia. ⁹ Niarta Pueyaso pueya jiiitaaquishacari na maquejara, na miaquesocoriguianojuhuaj, nojoriicua taraajeja nia quiriquia. Nojori nia tiuquinitariquia nia tiajinia nia timiniutia. Majaari nojori nia ririjiotanu nia taajenuta. ¹⁰ Pueyasocuaaari na Sohuanu niqutioquiaa puetunu na pueyajanaa, tamaatia maninia casaa miiniu niishijiaa pa quiniuria. Naaratej, puetunu niajanijanaa cuaara maninia miiria niarta Pueyaso pueya pueyaracaanu, taa Pueyaso cumaquiquiaa niajaniya maninia nia miiniuracuajani. Maninia nia poonijioteriquia Pueyaso cumaaca, nojuaja niqutiojosano niajanijani. ¹¹ Naacuajitij, nia pocuasacari, Pueyasocua nia tiuuri nojuaja cumaquiniuria niajanijani na panishano nia sequenura. Naajuhuaaj, niaa jaara casaa miiriquia niarta Pueyaso pueya nia naacunura, nojori nia miiriquia maninia Pueyaso niqutiosano cumaacata. Naa nia miiriquiatej, Pueyaso timitiasaanura socua, Jesucristoocua tiuujiaa nia quiniucua. Nojuaja cuaara maniniuhuaqueetasaaria pueyaracaanu, tojetaarucujanaa maninia miijia na quiniucua, puetunu cumaacara-cajanaa na quiniucuajuhuaj. Cuaara naa quiiriatej.

Juhujaniya pa rejeretare naquiya miiniu, Pueyaso pueya pa quiniucua

¹² Cua panishano cuarta Pueyaso pueyanaa, majaari nia shiriiquiniu niaa jaara jyanohua naquiya miishaariquia. Majaari nia jyanini-ujihuaaj saa niajanijaja naa miishiya. ¹³ Niaa jaara naa naquiya miishaariquatej, nia timiri. Jesucristoocua tiuujiaa nia quiniucua, niaacuajaari naa miishiya taa Jesucristo miishaaquiiaari naquiyacuaani. Naa naquiya miiniu nia rejeretasacaritij, niaari jyanohua timitianutaniya Jesucristo, shacantuuca na cumaacata na tiuquishacariuhua, na jataniniuria niajanijani juhua nojuaja nia quiniurajuhuaaj. ¹⁴ Naajuhuaaj, niaa jaara sesacasaariquia Jesucristo tojjiaa nia quiniucua, shuquiriaatia nia quiriquia. Pueyari naa nia sesacaquiaa, shitimia maninia miijiaa nia quishacari, Pueyaso Sohuanuraca nia quiniucua. ¹⁵ Niaa jaara naquiya miishaariquia pueyanaa, cuno cuaara quiria maninia miijiaa nia quiniucua, maja sesa miijiaa nia quiniucua. Niaa cuaara caririquiria cutara niaa jaara moju quiri, nohuasejojua, sesa miijia,

timia niishiniu panijia tamasa casa. ¹⁶ Saniniuujia, maja cutaraari nia caririquiniu niaa jaara naquiya miishaariquia Jesuucua tiuujiaca nia quiniuucua. Saaja Pueyaso nia shuquiritariquia cunora.

¹⁷ Quiarijiani, Pueyasoori tama na pueyajaaja saniitioquia na tojiti-aquishacari na rupaa. Paa jaara naa saniitiosaaguiaacuaani, ¿taariquitijia noo pojori miishaanutaniya socuatejaj, Jesucristojiniji pohuatasano ruuretajacatej? ¹⁸ Naacuajitij, Pueyaso jiyanooshano pueya jaara queraatia naquiya miiquiaacuaa, ¿taariquitijia Pueyaso tojiyashijia miishaanutaniyatej? ¡Juhuej! Puereeta miishaanutaniyari Pueyaso ruuretajaca, sesa miijiacanio. Nojoriiri jiyanoohua socua naquiya miishaanutaniya, Pueyaso saniitiosacari nojori. ¹⁹ Naacuajitij, Pueyaso jaara naa naquiya nia miishaanura paniya, juhuajaniya nia rejeretariquia naquiya nia miiniu. Majaari nia tarinitianu maninia nia miiniu, naquiya nia miishacari. Saaja Pueyasocua nia tiuriquia nioojia na cojuanura maninia. Nojuacuajaari na Shipinina. Nojuacuajaari saa maninija. Naquiya pa miitiquiaacuajaari socua na jeenucuanura paniya.

5

Socua rootasano Pueyaso pueyara

¹ Quiarijia saniniuujia cuarta Pueyaso pueyanaa, janiyari nia jiitianaa nacasuyani. Niajaniya, Pueyaso pueya maapue jiitianaanaa, cua tojitiare. Janiyacuajaari Pueyaso pueya maanu jiitianajuhua, juhua niajanijuhua. Janiyacuajaari pa Jiyaniijijanaa niquiniani, nojuaja jaara naquiya miijioquiaari mijiria na quishacarijia canaata. Naajuhua, nojuajiniji cua pohuatanuucua, janiyari naquiya miishaaquiaajaaniuhua. Naacuajitij, pa Jiyaniijia muetasacariuhua na shacantuuca cumaacajinia, janiyari jaarajaaja niaata cojiritiasaanutaniya jatanishaanuni, juhua nojuaja pa quiniuria mariyata. ² Cunora Pueyaso pueya jiitianaanaa, shamaatia nia cojuare Pueyaso pueyaniyojua, teyano jiitianaara Pueyaso jiyatequiaari nijaniyacujani. Maninia nia cojariquia nojori, seetanujuanaa nojori nia paniniutia, taq Pueyaso paniya nojori nia cojuanuracujani. Majaari nojori nia jiitianu nia taajenuta saaja nojori jiitianaa nia quiniuucua. Naajuhua, majaari nojori jiitianaa nia quiniu saaja cumaneecaacua nia jiaatianuta. Saniniuujia, seetanujuanaa nojori nia paniniutia nia jiitariquia niarta Pueyaso pueya. ³ Majaari niarta Pueyaso pueya nia jiitianu juhua tama nia seyajaja. Niajaniya saniya cuara maninia miijiacua quiiria nojori niqiuara, nojori niishiniuria naa quijiacate Pueyaso pueya, naa nojori miiniurijuhua. ⁴ Naacuajitij, pa Jiitianajanaa tiuquishacariuhua jiyocuaaanuji, niaari shacantuuca quijiacara jatanishaanutaniya, pueyaracaanu rishijiacua nia quiniurijuhua.

⁵ Niajaniya mashiquoriniaa, Pueyaso pueya jiitianaa tojijiaca nia quiriqiajuhua. Puetunu nijaniyajanaa Pueyaso pueyanaa, tama nia cuaqueyajaaja nia jiyatere niarta Pueyaso pueyano cumaquiniaa nia quiniuria jaarajaaja. Tariucuaaanu Pueyaso Rupaajiniacuajaari naa naajiotasano quiya:

“Pueyasoori na juaaniutia niqijia niarta pueya shocoteja. Saniniuujia, niarta pueyano shocoteyashijia naacujua cutaraari”.

⁶ Naarate pueyanaa, puetunu niarta Pueyaso pueyajanaa nia jiya-teriquia tojishano pueya nojori quiniuria niaara. Majaari quenaaja nojori nia rerequetenu. Naa juhuajaniya niarta Pueyaso pueya tojijiaca nia quishacaritij, pa Jiyaniijia Jesucristo jaara tiuquirohuhua, Pueyasoori na cumaacata nia jiyatenutaniya jiyaniijianucua nia quiniuriajuhuaj. ⁷ Pueyanaa, puetunu nia tacaaniujianaa nia niqutiore Pueyaso. Nojuacuajaari niaacua taraajequiaa.

⁸ Pueyanaa, nia Paraca sequeeri nia shanacujuquiaa, juhua sare, taa sare shanacujiya na sanura casaacuaani. Cunora, soquejaca nia quiriquia pueyaracaanu. Juhua sutejaca nia quiriquia, pueyaracaanu nia secojonura, Sesaaca mariqui juhua sare nia sareeri. ⁹ Cumaatia nia nujuatariquia nojuaja, seetanujuanaa Pueyasocua tiuujia nia quishacari. Majaari Pueyaso Rupaacuaji nia taacanuunu. Naa nia miiriquiatej, nia niishishacari niarta Pueyaso pueyari puetunu tiqiy-ocuaajanaa naa naquiya miiquioyajuhua. ¹⁰ Naa jaara rupaquijia naquiya miishaariquia mijiria, Pueyasoori na nuhuaji nia jataniniu-tianiya tojetaarucujanaa maninia pueya nia quiniuria. Tojetaarucua-janaa pa jiyanoojia na quiniucua, nojuacuajaari nia saquiriojoquiaari nata nia quiniuria shacantuuca na cumaacajinia, Neyanu Jesuucua nia tiuuniucua. Naaratej, nojuacuajaari nia jiyatenutaniya seetanujuanaa nioojia niquijoteyashijiaca nia quiniuria, socua jyanohua na cumaaca jiiitajaca nia quiniuria, maja quenaaja Sesaaca pootionura nijaniya. ¹¹ ¡Jyanohua maniniaari pa Que Pueyaso! Nojuacuajaari puetunu cumaacaracajanaa pueyaracaanura. ¡Cuaara naa quiiriatej!

Pedro sequesano quera na naajio na tucuatascari

¹² Cuarta Pueyaso pueyanaa, janiyari parta Pueyaso pueyano Silvano naajioteree nio posunee naajioneeni. Nojuajaari shamaatia poonijiojua pa Jiyaniijia. Janiyari niaacuara naajiotereeni, cua nacasunura nijaniya, cua shiniujiuniuria nijaniyajuhuaaj maja nia pishiniuria Pueyasocuaaji. Seetanujuanaa jyanoojia na quiniucua, naarate nojuajaari nia jiiitaa maninia, naquiya na miitishacari nijaniyajuhuaaj. Cunora, nocua nia tiuuriquia, pueyaracaanu na cumaquiniuria nijaniya.

¹³ Babilonia tiacajinia quiniaa parta Pueyaso pueyari nia saruhuataa. Nojoriiri Pueyaso saquiriojosano na pueyaranojuhuaj, taa na saquirio-josanotucuaa nijaniyani. Marcoori nia saruhuataajuhuaaj. Nojuajaari juhua quiyanu. ¹⁴ Naa saruhuatasacari niarta Pueyaso pueya, seetanujuanaa nia paniniutia nia nujuutoore.

Pueyaso cuaara nioojia cajitiiria, canapuate Jesucristocua tiuujia-cacuajani.

TANEE PEDRO NAAJIONEE

Pedro saruhuatascari narta Pueyaso pueya

¹ Janiyari Simón Pedroni, Jesucristo seru, na jiyaramiquishanojuhuaj. Janiyari cunora niaacuara naajiyani. Pa Que Pueyasoori nia tiuutiqiaari pocuaji Tacuna Jesucristoocua, taa nocua canaa tiuutiqiaaricuaani. Nocua nia tiuuniuni, cunoori jiyanojua panishano. Naacuajitij, Pueyasoori nia jiyanooquiaa juhua sesa miyashijiaca nia quiniuria na niquiara, taa canaa quiyacuaani. ² Seetanujuanaa maatia nia niishitiriquia Pueyasoni, pa Jiyaniijia Jesunio. Naacuajitij, niaari socua jiyanojua cumaquishaanutaniya. Nioojaari cajitishaanutaniyajuhuj, juhujaniya quijiaca nia quiniuria.

Pueyaso pueya cuaara nio niishitiojosano miijiaca quiriia

³ Jesucristojuanaacuajaari pa sequequiaari na pueya pa quiniuria. Paari na masuunu tojiquiaarini, pa niishishacari nojuajaari seetanujuanaa Pueyaso Nyanu, tojetaarucujanaa maninia miijia. Seetanujuanaa maatia pa niishiniuucua nojuaja, paari Pueyaso cumaacaraca sesa miyashijiaca pa quiniuriani, seetanujuanaa na tojijiaca pa quiniurijuhuj. ⁴ Naa jiyanojua maninia miijia Jesucristo quiniuucuatej, nojuajaari pa niishitiquiaari casaa na miiniu paniya pajaniyarani. Pajaniyarano na sequesanoori seetanujuanaa maninia, tojishocoriguiano. Paa jaara na sequesano tojtiajaca quiri seetanujuanaani, paari jatanishaanutaniyani juhua nojuaja pa quiniurijuhuj. Naacuajitij, paari quiariniora jatanishaaquiaari na cumaacatani maja pa sesenura. Paa jaara Pueyaso tojiyashijiaca quiriquiani, paa maara tojetaarucujanaa seseriquiani, taa mijiria quiniaa pueya sesequiaacuaani tama nojori panishano miijiacajaaja nojori quiniuucua. ⁵ Cunora, tamajaaja nia saniniujiuriquia tojetaarucujanaa maninia quijiaca nia quiniuria, juhua Pueyaso. Niaacuajaari tari nocua tiuujia. Naa nocua tiuujia nia quiniuucuatej, jiyanojua nia saniniujiuri maninia miijia nia quiniuria pueyaracaanu. Naa maninia miijia nia quishacaritij, jiyanojua nia saniniujiuri socua niishijiaca nia quiniuria, sesa miiniu nia ruretanura. ⁶ Naa niishijiaca nia quishacaritij, jiyanojua nia saniniujiuriquia tama nia cuaqueya miiniu panishanojuaaja rejetejaca nia quiniuria, maja nia miiniu sacuaarata casaa nia panishano. Naa tama nia cuaqueyajaaja rejetejaca nia quishacaritij, jiyanojua nia saniniujiuriquia juhujaniya sashijiaca nia quiniurijuhuj. Naa juhujaniya sashijiaca nia quishacaritij, jiyanojua nia saniniujiuriquia seetanujuanaa Pueyaso panijiaca nia quiniuria. ⁷ Naa Pueyaso panijiaca nia quishacaritij, jiyanojua nia saniniujiuriquia niarta Pueyaso pueya panijiaca nia quiniuria socua. Naa niarta Pueyaso pueya panijiaca nia quishacaritij, jiyanojua nia saniniujiuriquia tojetaarucujanaa panijiaca nia quiniuria.

⁸ Naa jaara puetunu nio niishitiojosanojuanaa tojijiaca quiriquia seetanujuanaa, majaari najuhua na Jiyaniijia Jesucristo niishijiaca nia quiniu quiniutianiya. Naajuhuj, majaari najuhua quijiaca nia quiniu quiniutianiya. ⁹ Nio rootasano tojiyashijiaca saniniuujia, nojoriiri juhua cariyujuaru, niishiyashijiaca. Naa nojori quiniuucuatej,

nojoriiri niyajetaquiaa nojoricuajaari juhua jeequejosaaquiaari sesa nojori miishanojiniji. ¹⁰ Cuarta Pueyaso pueyanaa, Pueyasocuajaari nia sequequiaari na pueya nia quiniuria. Nojuajaari nia saquiriojoquiaari. Cunora, puetunu nio cua rootasanojuanaa tojijiaca nia quiriquia seetanujuanaa. Naacujitij, niocua niishiri niaari seetanujuanaa Pueyaso pueya. Majaari quenaaja nocuaji nia rupertenu quiniutianiya. ¹¹ Naa maninia quijiaca nia quiniuucatej, niaari shuquiriaatia tiuquinitiasaanutaniya jiyocuacaanu pocuaji Tacuna Jesucristoocua, pueyaraanu nata nia quiniuria, pueyaracaanu Jiyaniijajanaa na quiniuucua.

¹² Niaacuajaari maatia niishitiojosaaquiaari Pueyaso rupaa Jesucristojiniji. Niaari cuno seetanujuanaa rupaacua tiuujiaca. Naajaa, janiyari pueyaracaanu nia niishitiniutianiyani, maninia nia racatanura nia numaama. ¹³ Mijiria cua rishishacarijia, Jesucristo jiyaramiquishano cua quiniuucua, maniniacuajaari pueyaracaanu cua shiniujiuniuria niajaniya, maja tariucua nia niishishano Jesucristo rupaajiniji nia niyjetanura. ¹⁴ Pa Jiyaniijia Jesucristoori tari cua niishitiriucuaa janiyari quera mosaanutaniyani. ¹⁵ Cunora, janiyari nio naajiya niaarani. Naacujitij, janiya jaara mosaareni, niaari nio cua naajionee jiitianutaniya cua nuhuaji nia serojosocoriquiano. Maniniacuajaari nia jiitianura cua naajionee maja nia niyjetanura puetunujuanaa cua niishitiojosano niajaniya.

Shacantuuca Jesucristo cumaaca niquiniaajiniji pohuatasano

¹⁶ Canaa niishitiojosano niajaniya pa Jiyaniijajinijini, cunoori maja canaa tojishano tamonujiniji. Naajuhua, cunoori maja tama niishijiacajaaja pohuatasano na saPONONURA pueya. Jesucristo cumaacajiniji canaa pohuatasani, naajuhua, taa na tiuquiniutianiuhuani, puetunu cunojuanaari maja tama canaa niishishanojuaja. Canaajanaacuajaari canaa namijiatajanaa na niqiquiaarini nojuaja jaara shacantuucara jataquiaari canaa niqiuara. ¹⁷ Jiyacaritij, na Que Pueyasoori jiyanohua na timitariquiaa canaa niqiuara. Canaari na tojiquiaarini naa na sequesacari Neyanujinijitij: “Nojuajaari Quiyanuniyoyua. Jiyanohua cua timitiasano”. ¹⁸ Canaa quishacari pa Jiyaniijata shacantuucara na jataaquu tuhuanuucua, canaajanaari naa Pueyaso tojiquiaari jiyocuacaanuji pocuaanoni.

¹⁹ Canaa tojiniuucua Pueyaso sequesanojuanaa Neyanujiniji, canaari cunoora seetanujuanaa niishiyani, tariucuacaanu nojuajiniji pueyara Pueyaso sequesano caminiujiuniaa sequesanoori seetanujanaajuhua. Naaratej, maniniacuajaari nia tojiniuria nojori naajiotasano Pueyaso Jiyarosocoriquiano Pueyanojiniji. Nojori naajiotasani, cunoori poojiajinia cuhuataquiaa, naatej, taa samaritiu cuhuataa ninishiquicuaani, cuaara juhuaquemajaatijia. Pananuuri saniniuujia muetanutaniyacua, seetanujuanaa na cuhuatanura pajaniya. Naa quiniutianiyajaariuhua pa Jiyaniijia muetasacariuhua pocua. ²⁰ Maninia nia niishiri nio, pueyanaa. Puetunu tariucuacaanu Pueyaso sequesano caminiujiuniaa naajiotasanojuanaari maja na naata niishishaanu maatia tama pa niishitijatajaaja. ²¹ Tariucuacaanu Pueyaso sequesano caminiujiuniaa naajionuutasani, cunoori maja tama nojori niishishanojuaja. Pueyaso Sohanujuanaacuajaari nojori niishitiquiaari nojori pohuatanura Pueyaso sequenu panishano pueyara.

2

Sacuaraatia miijiaca niishitiojonaajiniji pohuatasano

¹ Tariucuacaanu, noojiaqueya Israel pueyajinijinoori tama na cuaqueyajaaja jiyatequiaari juhua Pueyaso sequenu panishano caminiujiunaa nojori quiniuria. Naacujitij, nojoriiri narta Israel pueya sapojonuquiaari. Naajuhua cua panishano pueyanaa, sapojonujuacaari nia tajinia supenutaniyajuhaaj. Nojori niishitijosacari sacuaraatia tama nojori niishishanojuaaja, nojoriiri nia sapojonutaniya. Nojori niishitijosanoori Pueyaso pueya sesojua cutara. Naacujitij, nojoriiri tama nojori Camarnujuaaja tamacanutaniya, cante nojoriicuara mosaaquiaaricuajani, na pueya nojori quiniuria juucua. Cunora, nojoriiri canashiyaquiji niiquiji puetunu shaajasaanutaniyajanaa saniitiosocoriquiano. ² Queraatia pueyari sacuaraatia miijiaca quiniutianiyajuhaaj, sacuaraatia cuno pojori niishitijosano tojjiaaca nojori quiniuucua. Naa nojori miiniuucuatej, Pueyaso niishiyashijiaacari seetanu rupaajanaa sesacanutaniya. ³ Cuno sacuaraatia niishitijonuujuacaari jiyanhua casamiriaca quiniuucua jiaatiajaca quiniutianiya. Naaratej, nojoriiri najuhua shanhua nojori niishitijosanota nia sapojonutaniya, nareja nia niqutijonura nojori nia cumaneeca, nia casaminio. Naajaa, naa sacuaraatia miijiaca nojori quiniuucuatej, nojoriiri tariucuacaanujiniji Pueyaso riuriosanocuaaja na saniitiosocoriquiano. Majaari Pueyaso jiyanooni quiniutianiya nojori.

⁴ Naajuhuaaj, Pueyaso seya jaara sesa miiquiaari, majaari Pueyaso jiyanooni quiquiaari nojori. Pueyasoori puereeta nojori quejooquiaari ninishiqui. Tii nujuatejosano quiyari, nojori saniitiosaanu juuca cuaraa quiriiaatijia. ⁵ Naajuhuaaj, Pueyasoori Noé quishacari sesa miijiaca pueya jiyanoaquiiaarijuhuaj. Cuno sesa miijiaca pajaashitiani-iquiaariiri nojori cusununura puetunujuanaa. Saaja Noé curoquiaariiri Pueyaso tojjia na quiniuucua, socua siete pueyano. Noeri pueyara- caanu cuno sesa miijiaca pueya numootequiaari juucua, nojori taca- tonura noojia Pueyasocua, sesa nojori miiniujiniji. ⁶ Naajuhuaaj, Sodoma tiacajinia quiniaa pueya quiniuucua jiyanhua sesa miijiaca, Pueyasoori cuno tiaca catijataquiaari tojetaarucujanaa juacara. Naa catijataquiaari Gomorra tiacaariuhuaaj. Cuno caapiqui tiaca naa cati- jiatasaaquiaarini, cunoori quiquiaari cuno nuhuaji quiriquiano pueya na numootenura maja naa sesa miijiaca nojori quiniuriajuhuaj, nojori mariqui saniitiosaarejaariuhuaaj. ⁷ Sodoma tiaca Pueyaso catijiatasacari, saaja Lot curoquiaariiri maninia pueyano na quiniuucua. Sodoma tiacajinia quijia Lot quiniuucua, nojuajaari jiyanhua taajequiaari tari, cuno pueya miijionuucua sacuaraatia casaa, tariucua nojori jiiishano casaacua.

⁸ Puetunu juucajanaa, Lotri narta Sodoma tiacajinia quiniaa niqiquiaari cararaatia miitioojiano. Sacuaraatia nojori pocoojonu tojiquiaariiaariuhuaaj. Maninia pueyano Lot quiniuucua, nojuajaari jiyanhua naquiya miiquiaari noojiajinia. Cunora, quera Pueyaso saniitiosacari cuno pojori, Pueyasoori Lot mashiquiquiaari cuno pueya tajiniji. ⁹ Naacujiti pueyanaa, paari niishiyani, Pueyasoori na tojtiajaca pueya cojuaja, maja nojori miitishaanura sesa. Saniniuujia, Pueyasoori sesa miijiaca racatajajaara nujuatejosano,

nojori saniitiojosaanu juucara. ¹⁰ Pueyasoori socua jiyanhua no pojori saniitioriquiano: na camishoo maajipohua numuetucunuucua jiaatiajacani, maajishuriu numuetucunuujuacajuhua, noo pojorijuhua, pa Jiyaniijia rootasano ruuretajaca saajatej. Naa sacuaaratia miijiacani, nojoriiri tojetaarucujanaa tojiyashijiaca. Majaari na pueretunu quiquiaa sacuaaratia tama nojori panishanojuaja nojori miiniuria. Naajuhua, nojoriiri maja na pueretunu quiquiaa jiyocuacaanu cumaacaraca quijiaca na sesacanura. ¹¹ Saniniuujia, Pueyaso seya cutaraari jiyanhua socua cumaacaraca cuno sesa miijiacua pueyajiniji. Naajaa, majaari nojori riutioconu quiquiaa Pueyaso, cuno jiyocuacaanu cumaacaraca quijiaca nojori sesacanura.

¹² Cuno pojori, saaja sacuaaratia miiniuria niishitiojonaani, nojoriiri niishiyashijiaca. Nojoriiri juhua nacujiniaaco quijiaca casami, teyanote saaja puecosocoriquiano roosaaquiaacuajani. Tojetaarucujanaa niishiyashijiaca nojori quiniuucua, nojoriiri maninia quijiaca pa quiniuria pa Jiyaniijia rootasano sesacaquiaa. Cunora, nojoriiri juhua puecosocoriquiano nacujiniaacoci casaa. ¹³ Naacuajitij, nojoriiri naquiya miishocoriquianojuhua, naquiya nojori miitianuucua narta pueya. Nojoriiri jiyanhua timiquiaa nojori jaara naata quiriquia sesa miiniu juucajuhua taa nojori miiquiaa niucuacaani. Cuno pojoriiri sacuaaratia miijiacua. Majaari na niishiniu caririquiniu. Nojori sapojonuucua nijaniya, nojoriiri jaarajaaja nia cojiquiaa nia queranacunuusaqui. Naa nojori quishacari nia tajinatej, nojoriiri jiyanhua timiquiaa tariucua nojori jiidishano sesa casaacua nojori niishiriojosacari. ¹⁴ Naacuajitij, nojoriiri maja nareja na niquiniu quiquiaa maajipohua. Puetunu maajipohujanaa niqutiuguiaa nocua na jiaatianutaari. Nojoriiri maja na taajenu sesa na miiniuria pueyaraaanu. Canapuate jatarinitiaja pa Jiyaniijia tojiijiani, cuno pojoriiri nojori shiniujuquiaa na sapojonuta, sesa nojori miiniurajuhua. Naajuhua, cuno pojoriiri tariucua jiidinio puetunu nojori panishanojuanaa nojori jiidianura, jaara na naata quiriquia. Nojoriiri tariucua Pueyaso jiyatesano na saniitosocoriquiano. ¹⁵ Pueyaso rootasano tojiyashijiaca nojori quiniuucua, nojoriiri juhua tashuquioono Pueyasocua neteja nuujiniji. Nojoriiri casamiriaca quiniuucua jiaatiajaca juhua supuetana Beor niyanu Balaam. Jiyacaritij, Moab jiya jiyaniijiaari Israel pueya paraca quiquiaari. Naaratej, nojuajaari Balaam sequequiaari, nojuajaari jiyanhua queraatia casami na niqutionutaniya, nojuaja jaara nocua quiaare, Israel pueya na shimiojonura nera. ¹⁶ Casamiicua jiaatiaja na quiniuucua, Balaamri na seru nijinia cajiquiaari. Quiaareeri. Nucua na quiasacari, Pueyasoori Balaam seru pocuatequiaari pueyano rupaa, Balaam na nacasunura. Naacuajitij, pocuaashijia seruuri Balaam tarinitiquiaariuhua, juhua moseeca sesa na miiniu panishacari juucua.

¹⁷ Cuno pojori, pueya sapojoua na niishitiojosanotani, nojoriiri juhua cuari joojequetano. Naajuhua, nojoriiri juhua niqutioocua paratu piyarojosano, tamoco quiamaa saajaari. Nojori niishitiojosanoori naajuhua. Majaari na tojitiajaca na naacunu. Pueyasoori jiyanhua ninishiqui quiquio tari jiidiaa nojoriicuaaji, pueyaracaanu nojori quiquiorano. ¹⁸ Nojori pahuatasanoori najuhua shanohua tojishano. Saaja sapojonuuri. Naacuajitij, nojoriiri shusha Jesuucua tiuujiaa shiniujuquiaa nojori miiniuhua tama nojori cuaqueya panishanojuaja.

Cuno Jesuucua tiuujiacacuaajaari shusha naataja sesa miijiaca pueyajini-jinio jatanishaariquiaa juucua, Pueyaso tojjiaca nojori quiniuria juucua. ¹⁹ Sapojonuujuaca cuno niishitiojonuujuaca quiniucua, nojoriiri pueya niishitiojoquiaa sacuraatia. Pueya niishitiojoquiaari, nojorini-aari seetanujanaa juhuajaniya quijiaca quiniutianiya shuquiriaatia, nojori jaara nojori niishitiojosano tojjiaca quiriquia. ¿Nojori niishitio-josano pueyatucua taa juhuajaniya quijiaca quiriquiani, tama nojoriji-aaja jaara sesa miiniucua jiiitnio quiyajaa? Seetanujanaari, pueyano jaara maja na naata quiriquia sesa casaa na miijionu tarinitianu, cuno pueyanoori seetanujanaa juhua tama sesa na miijosano serujuaaja. Majaari na naata na tarinitianu. ²⁰ Pueyanaa, niaacuajaari niishiya, pueyano jaara pocuaji Tacunaacua tiuujiara quiri, pa Jiyaniijia Jesu-cristoori na cumaquijia na tarinitianura sesa miiniuria na jiiitishano. Saniniuujia, cuno pueyano jaara sesa miijiaa quiriouhua, nojuaja jaara sesa miijionura jiiitiriohua socua, neraari socua puereeta quiniutianiya Pueyaso niishiyashijia pueyajiniji. ²¹ Naacuajiti pueyanaa, pueyano jaara seetanu rupaajanaa niishijia quiriquia, nojuajaari cocuaatia miya jaara na samiritiarohua sesa miijia na quiniuhuara. Cuno pueyanora maara socua maninia quiquiaari maja na niishiniuria Jesucristo rupaa, teyanote na niquiara pohuatasaaquiaricuaajani, jatanishano pueyano na quiniuria. ²² Naa pa Jiyaniijia samiritiajaca pueya quiniuucuatej, sesa miijiaca nojori quiniuhuara, nojoriiri nio tariucuacaanu Pueyaso Rupaajinia naajiotasano tohuateequiaa. Naa miriqui sequeyari: “Sa-reeri coteenu macayoree. Na miaquerohuari”. Naajuhuj: “Cushiiri nanatosaaree juucua. Saaja na cooquiojinia neeneecuasuhuariuhuj”.

3

Pa Jiyaniijia tiuquiniuhua cuaracashitishacari

¹ Cua panishano cuarta Pueyaso pueyanaa, nioori tanee cua naajione niaacuara. Coteenu cua naajiojinia, janiyari nia nacasuquiaarini socua cua shiniujiuniuria niajaniya maja nioojia niquijitejaca nia quiniuria Pueyaso rootasanojiniji. Janiyari naa miya quiarjia nio cua naajio-jiniajuhuaj. ² Maninia nia numaama nia racatariquia tariucuacaanu pueyara Pueyaso sequesano caminiujiunaa pohuatasano, pa Jiyaniijia jiyaramiquishano pueya pohuatasanonio. Cunocuaajaari pocuaji Tacuna rootasano pajaniyara.

³ Nio nia niishiriquia cutara pueyanaa. Quera nio jiya puequesacari, pa Jiyaniijia soojeacaari supuenutaniya. Nojoriiri tama na cuaqueya miiniu panishano miijiacajaaja. Na macaatinuria niajaniya, nojoriiri nia nequesotanutaniya: ⁴ “¿Taa nia Jiyaniijia miiquiaarini? Nojuacua-jaari nia sequequiaari: ‘Tacatenutaniuhanijia’. Majaari na tiuquiniu. Tariucuacaanu na niquiniaa pa supuetanaacuajaari tari puequecanu. Nio jiyajinia, puetunu casaajanaari quiyajaa, juhua shusha na shipin-ishaanujiniji. Majaari quenaaja tamonu casaa jatanu quiquiaa tamaa-tiara”. ⁵ Majaari naate pueyanaa. Cuno pojoriiri tariucuacaanu Pueyaso miishanojiniji niishiniu paniyashijia. Jiyanohua tariucua-caanu, Pueyasoori jiya cajiniocua shipiniquiaari saaja na pocuanuta. Na sequesacarijuhuaj, jiyari mohuacajiniji muetaquiaari, mohuaca jiuuji-ajinia na quiniuria. ⁶ Na nuhuaji, Pueyasoori cuno mohuacaja pajaashi-tiquiaari puetunu mijiria quijiacajanaa na cusojuanura. ⁷ Quiarjia

saniniuujia, jiya cajiniocua, nio jiyanio, Pueyasoori na cumaacata nojori jiiitaaajara. Na nuhuaji cutara, puetunujuanaari catenutaniya, Pueyaso saniitosacari puetunu na ruuretajaca pueyajanaa.

⁸ Naajuhuaaj cua panishano cuarta Pueyaso pueyanaa, pueyaracaanu nio nia niishiriquia. Pa Jiyaniijiaari, niquiriyatu juucaari juhua mil marijia. Naajuhuaaj, mil marijiaari juhua niquiriyatu juuca nera. ⁹ Majaari nia jyaniniu maja pa Jiyaniijia tacatenu quiniutianihua. Majaari na tarishiniu najuhanaj, taa tamasaca jyaniyacuajani. Maja. Maja cutaraari na paniniu pueya quejooaanura mani quiquiojinia. Naacuajitij, nojuacuajaari pueya sashiyajaara nojori tacatonura nojori jiuujia sesa nojori miiniujiniji, Pueyaso pueya nojori quiniuria.

¹⁰ Naajaa, nojuacuajaari tiuquiniutianihua. Pueya jyanishacari Jesucristo maja na tiuquiniu quiniutianihua, jiyacaritij, canashiyaquiji tiuquiniutianihuari. Juhua nohuasejojua tiuquiniutianihuari, sesa miijiaa na saniitionura. Na nuhuaji, jiya cajiniocuaari shaajenutaniya. Jyanohua cojuatunenutaniyari na shaajesacari. Casaajiniji jiya shipinishaaquiaarini, cunoori puetunu catenutaniyajanaa. Naacuajitij, jiyari puetunu mijiria na jiiitiasano casaatajanaa shaajasaanutaniya jyanohua naseca manijinia.

¹¹ Quiarijia pa niishishacari taa pa jiya shaajasaanutaniyani, cunora, seetanujanaa Pueyaso panijiaa nia quiriquia saa maninia miijiaa nia quiniuria. ¹² Naa maninia miijiaa nia quiriquia, Pueyaso cuara pa Jiyaniijia mueraterohua pocuajaatijia. Pa Jiyaniijia sequesano tojijiaa nia quiriquia, na tiuquiniu juuca nia secootenura. Jiyacaritij, Pueyasoori jiya cajiniocua setanutaniya. Naacuajitij, casaata na shipiniquiaari puetunu casaajanaani, cunoori manijinia mohuaquenutaniya. ¹³ Naajaa, Pueyaso cutaraari seetanujanaa sequequiaari pajaniya, nojuajaari quiarinio jiya cajiniocua shipininiutaniya pajaniyara, quiarinio jyanio. Cunora, paari shuquiriaatia na sashiyani. Jiyacaritij, majaari quenaaja sesa miiniu niishishaanu quiniutianiya socua. Puetunu casaajanaari tojetaarucuajanaa maninia quiniutianiya.

¹⁴ Naa nia niishishacari casaa pa sashiya nio pa quishacarini, cunora, jyanohua nia saniniujiuriquia saaja maninia miijiaa nia quiniuria. Tojetaarucuajanaa jiyanooshano nia quiriquiajuhuaaj, juhua-janiya nia quiniuria pa Jiyaniijia tacoji, na nequesoresacari pajaniya.

¹⁵ Naacuajiti pueyanaa, nio nia niishiriquia: pa Jiyaniijiaari tarishiyajaara pueyacua na taraajenuucua, nocua nojori tiuuniuria, Pueyaso jiyanooniuria nojori. Tarishiyajaariuhuaaj tojetaarucuajanaa jeenucuasano pa quiniuria nera. Pa panishano parta Pueyaso pueyano Pabloori naa naajioquiaari niaacuarajuhuaaj, Pueyaso niishitiaja na jitianuucua. ¹⁶ Nojuacuajaari puetunu na naajioneecajiniajanaa mariyata nio cua pohuatasano pohuataa. Noojiaqueya na pohuatasanoori seetanujanaa jiyajeneta pueyara. Naacuajitij, mosanucua, noojia niqijotejacanio, nojoriiri Pablo niishitiojosano jataniquiaa tamaatiara, nojori niishiyaquishacari cuno rootasano. Nojoriiri naa jataniquiaa puetunu Pueyaso Rupaajanaa. Naacuajitij, nojoriiri tama na cuaqueyajaaja jiyatequiaa Pueyaso saniitiosocoriquiano nojori quiniuria.

¹⁷ Cunora cua panishano Pueyaso pueyanaa, niaacuajaari tari niishiya cuno Pueyaso rootasano tojiyashijiacajiniji. Nocuaji jyanohua nia cuuariquia tama nia cuaqueyajaaja maja nia sapojooaanura sesa miijiaa

nia quinihuara. Saaja Pueyaso rupaacua tiuujia nia quiriquia cutara, taa nocua tiuujia nia quiyacuajani, cuno pojori mariqui nioojia niquijiotereeri. ¹⁸ Naajuhuaaj, socua pocuaji Tacuna niishiniucua jiaatiajaca nia quiriquia. Naa maninia nia niishiri pa Jiyaniijia Jesucristo, socua na panijia nia quiniuria, socua na cumaaca nia jitianurajuhuaaj. ¡Pa Jiyaniijaari jyanohua maninia! ¡Nojuaja cuaara shuquiritiasaaria quiarjia, pueyaracaanujuhuaaj! Cuaara naa quiiriatej.

COTEENUJUANAANAA JUAN NAAJIONEE

Pueya samiitianijia rupaa

¹ Jiya shipinishaacarijiyojua, Jesucristoori quijiajuhuanajaj. Canaari niaara naajiyani, canaa niishitiniuria nijaniya nojuajiniji canaa tojishano, canaa niquishanojuhuaj. Pueyanaa, canaari seetanujuaanaa na niquiquiaari canaa namijiatani, pueyaracaanu nata canaa quishacari mijiria. Canaari na cooquiaarijuhuaj canaa rupesacari nojuaja. Nojuajaari pueyaracaanu quijia cutara, pa Samiitianijiaarujuhuaj, pueyaracaanu quijia pa quiniuriajuhuaj, na sequesanoocua pa tiuushacari. ² Cuno pueyaracaanu Quijiani, nojuajaari pueyanora jataquiaari. Canaari na niquiquiaarini. Naaratej, canaari pueya pohuataquiaarini, nojuajaari seetanujuaanaa pa Samiitianijia. Canaari quiarjia cuno pueyaracaanu Rishijajiniji nia pohuatajaanihuaj. Coteenu na Queta quijia jiyocuaanuuri. Na nuhuaji, canaacua muestaquiaariiri. ³ Canaari seetanujuaanaa nia pohuataa canaa niquishanoni, canaa tojishanojuhuaj. Canaa pohuatasanoocua nia tiuushacari, pocua rupetooreni, taa canaa quiya pa Que Pueyaso rupesanoocuaani, Neyanu Jesucristo rupesanonio. ⁴ Niaa jaara nio naajiojina canaa sequesano tojiri, niaari seetanujuaanaa shuquiriaatia quijiaa quiniutianiya. Canaa jaara niaacuaji tojiriquiani, canaari shuquiriniutianiya-jaacuhuj.

Pueyaso pa cuhuatana

⁵ Jesucristocuaajaari nio rupaa canaa niishitioquiaari, canaa nia pohuataani. Nojuajaari naa canaa sequequiaari: “Pueyasoori Cuhuatana cutara. Nojuajaari maja ninishiqui quijia quenaaja”. ⁶ Naacuajitij, paa jaara sequereni: “Pueyaso rupueja cutaranijia”, na rupaa pa tojiaquishacari, paari saaja najuhuaana sapojiyani. Paari juhua ninishiqui quijia quiyajaani. ⁷ Paa jaara seetanujuaanaa cuhuashiqui quiyani, taa Pueyaso quiya cuhuashiquicuaani, paari juhua rupetootesano quiya parta Pueyaso muerasuta cutarani. Naa juhua rupetootesano pa quishacaritij, Neyanu Jesucristo nanacaari puetunu sesa pa miishanojuanaa tuujuquiaa poojajiniji.

⁸ Paa jaara sequereni: “Janiya sesa miyashijiani”, paari tama pa cuaqueyajaaja sapojiyani naa pa sequesacaritij. Majaari Pueyaso rupaa tojijia pa quiniu. ⁹ Paa jaara sesa pa miishano pohuatare saniniunijia, Pueyasoori jyanootio cutara, na jyanooniuria pajaniya, taa na sequesaaaricuaajani. Poojajiniji jeequenutaniya puetunu sesa casaajanaari. ¹⁰ Paa jaara saniniuujia sequereni: “Maja sesa cua miiniu”, paari Pueyaso jiyateya juhua sapojojarani. Paa jaara naa quirini, majaari seetanujuaanaa na rupaa quiniu poojajinia.

2

Jesucristo pocuaji tacuna

¹ Quiquiohuaniojuanaa cua tojitiare. Nio naajiya niaaranijia, maja juhuaajaniya nia miiniuria sesa. Paa jaara sesa miirini, paacuajaari pa Que Pueyaso shuriucua jiitiaa pocuaji Tacunani, na Que Pueyaso

na jiyanootiniuria pajaniya. Nojuajaari Jesucristo, pueyaracaanu maninia miijia cutarani. ² Sesa pa miishanoori jiyanooshaaquiaa Jesucristo cusonuucua pocuara. Majaari saaja jiyareta pa sesa miishano jiyanooshaanu quiquiaa, mariyata puetunu mijiria quiniaa sesa miishanojuanaari jiyanooshaaquiaajuhuaaj.

³ Paa jaara pa Jiyaniijia rootasano tojirini, paari niishiyani paa tari Pueyaso niishirii cutarani. ⁴ Jesu rootasano tojiyashijia jaara sequeriquia: “Pueyaso niishiyaniijia”, jiyano pueyanoori sapojojua. Majaari na jitianu Pueyaso rupaa noojiajinia. ⁵ Cante saniniuujia pa Jiyaniijia sequesano tojijia cutarani, nojuajaari seetanujuanaa pa Que Pueyaso panijia cutara. Naacuajitij, paari niishiyani paari jatiqui quiya natani. ⁶ Cante sequejani: “Janiyari Pueyaso rupuejani”, nojuaja cuara quiria juhua Jesucristo, taa na quiquiaari maniniacuaani, mijiria na quishacari.

Quiarinio Pueyaso rootasano pajaniyara

⁷ Cuarta Pueyaso muerasunaa, majaari quiarinio nio rootasano, janiya niaara na naajiyani. Niocuaajaari tariucuaaanu nia tojishano, majaari quiarinio. Niaacuajaari tari na tojiquiaari, Pueyaso rupaa jaara shushajanaa nia niquiara pohuatasaaquiaari. ⁸ Naajaa, nio rootasano quiarijia cua naajiosanoni, nioori seetanujuanaa juhua quiarinio niaara. Niaari tari na tojiquiaa, pueya panijiacua nia quishacari, taa Jesucristo quiquiaari pueya panijiacuaani mijiria na quishacari. Na rootasano nia tojishacari, niniquiaari tari quiamacuaa nioojiajiniji. Pueyasoori nioojiajinia cuhuataa nia panitioosacari quiarijia.

⁹ Niaa jaara sequeriquia: “Pueyasoori coojia cuhuatarucuaani na rupaa cua niishishacari”, na nuhuaji majaari nia niqiniu paniniu niarta Pueyaso pueyano, niaari ninishiqui quiyajaa. ¹⁰ Cante narta Pueyaso pueya panijia cutarani, nojuajaari cuhuashiqui quijia cutara. Tamasacaari maja na naata sesa na miitiniu, naajuhuaaj, tama nojuajaariija maja sesa na miiniu quiniutianiya, pueya panijia na quishacari. ¹¹ Cante narta Pueyaso pueya niqiniu paniyashijiani, cuno pueyanoori ninishiqui quiyajaa, juhua ninishiqui canujuucuaajaariuhuaaj. Majaari na niishiniu tee na quiaani. Naa na quiniuucua juhua ninishiquitij, nojuajaari juhua cariyojuaru quiya. Majaari na niishiniu Pueyaso casaa.

¹² Quiquiohuaniojuanaa, niaara naajiya nionijia, Pueyaso jiyanooshano muerasu nia quiniuucua, Neyanu Jesucristo mosaanuucua pocuara. ¹³ Queyanaa, niaara naajiyaniijia nia niishiniuucua pueyaracaanu Quijia, cante tari pocuaji quiquiaari jiya coteyaquishacarijiaacuajani. Mashiquioriniaa, janiya niaara naajiyajaniuhua cua timishacari nia shocotanuucua Sesaaca.

Janiyari niaara naajiocanuni quiquiohuanaa, nia niishiniuucua pa Que Pueyaso, Neyanu Jesucristoocua nia tiuushacari. ¹⁴ Janiyari niaara naajiocanujuhua queyanaa, nia tiuuniuucua tariucua pocuaji Quijiaacua, nio jiya coteyaquishacarijia. Janiyari niaara naajiocanujuhuaaj mashiquioriniaa, seetanujuanaa maninia nia tojiniuucua Pueyaso rupaa, niaa jaara na masequiaari nioojiajinia, Sesaaca nia shocotanuucua-juhuaaj.

¹⁵ Majaari mijiria sesa miiniuucua nia jiaatianu, mijiria casamicuanio. Cante mijiria casaacua jiaatiajani, cunoori maja pa Que

Pueyaso panijia. ¹⁶ Mijiria niishijiaca coretanijosano tama nojori niishishanojinijijiaajani, puetunu cunोजनाari maja pa Que Pueyaso niishitishano. Cunoori sacuaraatia tama mijiria pueya niishishanojuaja. Naacujitij, pueyano pa quishacari, paari sesa pa jiaatianuta pueyaraanu casaa paniquiaani tama pa cuaqueya pa shuquiritiniurijaaja. Paari pa niquishano pa maniniucuasano casaa paniquiaa pueyaracaanuni. Naajuhuj, paari pueyaracaanu timiquiaani tamasaca timitiasacari pajaniya. Puetunu naa sacuaraatia pa niishishanojuanaani, cunoori mijiria niishishano. Majaari Pueyaso niishitiojonu naa pajaniyatej. ¹⁷ Nio jiyari tari tariucushiyaree. Socua shaajasaanutaniya puetunujuanaari. Puetunu sesa pa jiaatianujuanaari cojiritiasaanutaniya shaajanu puetunu nio jiyatajanaa. Cante Pueyaso panishano miiquiaa saniniunijia, nojuaja cutaraari pueyaracaanu rishiniutianiya Pueyasota.

Jesucristo paraa

¹⁸ Quiquihuanaa, quiarijiaari quera jiya puequesacari tari. Niaacuaajaari tari pohuatasaaquiaari Cristo Paracaari niniutianiya. Quiarijiani, queraatia na paraari tari supueree. Naacujitij, paari niishiyani nio pa quishacariiri jiya puequesacari quera. ¹⁹ Cuno Cristo paraani, nojoriiri pajaniyajinijinio pueya quiquianucuaaja. Pocuaji rupatetucanuuri maja seetanujuanaa Pueyaso muerasu nojori quishacari. Jaara seetanujuaanaa Pueyaso muerasu quiquianu, mariqui pata quiyacuaateni. Naa nojori miiniuucuatej, paari niishiyani majaari puetunu pata rerejonaa-janaa seetanujuanaa parta Pueyaso muerasu.

²⁰ Saniniuujia niajaniya Pueyaso muerasunaa, Jesucristoori nia niqutioquiaari na Sohanu. Naaratej puetunu niajanijajanaari Pueyaso niishitijaraca. ²¹ Majaari niaacuara cua naajionuni nia niishiyaquishacari Pueyaso rupaa. Niaacuaajaari na niishiya cutara. Niaari niishiyajuhuj, sapojoua sequesanoori maja Pueyasojiniji.

²² Pueyano jaara sequere: “Jesuuri maja Pueyaso Jiyarosano”, cunoori sapojoua. Cante sequejani: “Pueyasoori maja Jesu Que”, cunocuaajaari Cristo paraca. Jaara sequerejuhuaj: “Jesuuri maja Pueyaso Niyanu”, cunoori Cristo paracajuhuj. ²³ Cante Pueyaso Niyanu Cristo tamacajani, majaari Pueyaso na jitianu na Querajuhuj. Cante Pueyaso Niyanu Cristo jiiitaa cutarani, pa Que Pueyaso jiiitaa na Querajaariuhuj.

²⁴ Naaratej, Pueyaso rupaa nia racatare nia numaama taa nia tojiquiaari tariucuaaanucujajani jaara shushajanaa pohuatasaaquiaari nia niquiara. Naa jaara naa racatariquia na rupaa nioojiajiniate, seetanujuanaa nocua nia tiuushacari, niaari jatiqui quiya pa Que Pueyasota, Neyanu Jesucristotanio. ²⁵ Jesucristocuaajaari na Sohanu niqutioquiaari pajaniya, pueyaracaanu pa rishiniuria. Nojuajanaari naa pa sequequiaari.

²⁶ Nio naajioree niaaranijia cua niishitiniuria niajaniya, nia niishiniuria taa Jesu paraa niishitiojonuquiaa sesa najuhuaana na cuaracashiniuuniutiani. ²⁷ ¿Casaara nojori nia tojiquiaani? Niaacujaruhua tari Pueyaso Sohanu jiiitaa, Jesucristo niquticosano niajanijiani. Naacujitij, majaari tari panishaanu tamasaca niishitiojonura socua niajaniya. Pueyaso Sohanucuaajaari nia niishitiojoquiaa puetunu casaajanaa. Puetunu na niishitiojosanojuanaari seetanujuanaa cutara, maja sapojonu. Naaratej, pueyaracaanu jatiqui

nia quiriquia Jesucristota, taa Pueyaso Sohuanu niishitiojoquiaa nia quiniuriacuajani.

²⁸ Quiarijiani quiquiohuaniyojuanaa, jatiqumi nia quiri Cristota, seetanujuanaa juhuajaniya nia quiniuria pa Jiyaniijia jaara tiuquiriohua pocua. Naa nia quiriritij maja nia caririquiniuria nojuaja jaara pa jiiiasuhua. Na rupaa tojiyashijiacaari caririquiniutianiya cutara. ²⁹ Niaacuajaari seetanujuanaa niishiya, Jesucristoori tojetaarucujanaa sesa miyashijia cutara. Naa cumaati niishiyajuhua, puetunu maninia miijiacajanaari Pueyaso muerasu.

3

Pueyaso muerasu

¹ Pueyanaa, pa Que Pueyasoori jiyanoehua pa panijia. Pa sequeyari, “cua niquiohua”. Seetanujuanaa, paari necohuani. Naaratej, majaari mijiria quiniaa pueya niishiniu pajaniya. Pa niishituyaqumiyari nojori niishiyaquiniucua pa Que Pueyaso. ² Cua panishano Pueyaso muerasunaa, paari tari Pueyaso muerasucuajani. Maja cutaraari pa niishiniu taameucaquitijia pa quiniutianiya na nuhuajitijaj. Paari saaja niishiya cutarani, Jesucristo jaara nimiohua, paari juhua nojuaja quiniutianiyani. Na tiuquishacariuhua, paari na niquiniutianiyani taa na quiyacuajani. ³ Puetunu na sashijiacajanaari tama na cuaqueyajaaja jeequequiaa sesa nojori miishanojiniji saaja maninia nojori quiniuria, taa Jesucristocuaani sesa miyashijia tojetaarucujanaa.

⁴ Cante sesa miijiani, cunoori Pueyaso rootasano na rupaajinia tojiyaquijia. Puetunu sesa miiniujanaari Pueyaso rootasano tojiyaquiniu. ⁵ Niaari niishiyajuhua, Jesuuri mijiria pocua niquiaari poojia seque na jataniniuria. Nojuajaari tojetaarucujanaa sesa miyashijia cutara. ⁶ Naacuajitij, cante jatiqumi quiya pa Jiyaniijiatani, nojuajaari maja sesa na miiniu quiquiaa cutara. Cante saniniuujia sesa miijiani, majaari na niishiniu Jesu. Majaari nojuaja na niquiniu quiquiaarijuhuaj. ⁷ Quiquiohuaniyojuanaa, tama nia cuaqueyajaaja nia cojuare niaa mariquii sapojosaareeri. Cante maninia miijiani, nojuajaari maninia pueyano cutara, taa pa Jiyaniijia Jesucuaani, pueyaracaanu maninia quijia cutara. ⁸ Saniniuujia, cante sesa miijiani, nojuajaari Sesaaca pueyano. Shusha jiya coteenujiniji, Sesaacuajaari tari sesa miijia quiquiaari. Pueyaso Niyanuuri cunora niquiaari puetunu sesa na miijiosanojuanaa na shaajanura.

⁹ Puetunu Pueyaso pueyajanaari maja sesa miiniucua na shiini-uquiuniu, quiarinio pueyara Pueyaso rootesano nojori quiniucua. Nojoriiri quiarinio pueyara jatanishano quiya Pueyaso Sohuanu nojori jiiiasacari. Naacuajitij, seetanujuanaa Pueyaso muerasu nojori quishacari, majaari na naata sesa miijia nojori quiniu pueyaracaanu. ¹⁰ Naacuajitij, maatia niishishanocujaaari cante Pueyaso muerasuni. Saniniuujia, cante maninia miyashijiani, nojuajaari maja Pueyaso pueyano. Naajuhua, cante narta pueya paniyaquijiani, nojoriiri Sesaaca pueya. Naa niishishanoori cante Pueyaso muerasuni, cante Sesaaca muerasujaniuhua.

Panitiojuaca pa quirij

¹¹ Pueyanaa, shushajanaa Pueyaso rupaa nia tojishacari, niaacuajaari naa niishitiojosaaquiaritij: “Panitiojuaca nia quiri”. ¹² ¡Maja

cutaraari pa quiniu juhua Caín! Nojuajaari tama tarajanujuaaja moquiaari, Sesaaca tojjia na quiniuucua. Nia niishiritio casaara Caín moquiaari tarajanuni. Nojuajaari tama tarajanujuaaja tacartaquiaari monu, tarajanu miishano quiniuucua maninia. Saniniujia, tama na miishanojuaarjia sesa quiquiaari. Cunora tarajanu moquiaariiri.

¹³ Cuarta Pueyaso muerasunaa, majaari nia jiyajenenu Pueyaso ruuretajaca jaara niquniu paniyaquiriquia niajaniya. ¹⁴ Paacujaari juhua macu samiitianijiosaaquiaariuhuanu, seetanujuanaa saminiucua pa quiniuria. Paari seetanujuanaa na niishiyani panitioojuaca pa quishacari parta Pueyaso pueyata. Cante tapueyocuaa paniyaquijiani, nojuajaari juhua macu quiyajaa. ¹⁵ Naajuhuaaj, narta pueyano niquniu paniyashijiacani, nojuajaari juhua pueya mojuua Pueyasora. Niaacujaari niishiya, pueyano mojuuaari Pueyaso samiitianiyaquishoojuua pueyaracaanu na rishiniuria. ¹⁶ Paacujaari niishiyani, Cristoori jiyanohua pa panijia na cusuucua pocuara. Naacuajiti paari niishiyani taamuecate seetanujuanaa paniniuni. Paa cuara naa panijia quiriujuhuaaj, tama pa cuaqueyajaaja pa tarinitanura parta Pueyaso pueyacuara, jiyanohua pa paniniutia nojori. ¹⁷ Njaa jaara nareja niquiya niarta Pueyaso pueya casamiijiuniucua, puetunu nia panishanojuanaa nia jiiiasacaricuaa, niaari najuhuana sequeya: “Pueyaso panijianijia”. ¿Pueyaso panijia pueyanoteeri jiyano pueyano, narta Pueyaso muerasu niqutioyauquijia na jiiiasanojiniji? ¡Maja! ¹⁸ Quiquiohuaniyojuanaa, majaari najuhuana pa sequenu: “Cuarta Pueyaso pueya panijianijia”. Paa jaara seetanujuanaa nojori panirini, nojoriicua pa taraajere, taraatia nojori miishacari. Pueyaracaanu maninia pa miiri, seetanujuanaa pa paniniutia pueya. Majaari najuhuana pa sequenu: “Nojori paniyanijia”.

Pueyaso tojjiaari juhuaajaniya quijia Pueyaso niqiiara

¹⁹ Naacuajitij, paa jaara pueya panijia quirini, paari niishiyani paa seetanujuanaa Pueyaso tojjiani. Paari niishiyani paa pueyaraacaanu rishiriquiano Pueyasotani. Majaari pa shaajenu quiniutianiya. ²⁰ Pueyaso muerasu pa quishacari, poojia jaara pa taacanuutere saaja nocuaji, naajaa, Pueyaso cutaraari jiyanohua maninia niishijia socua poojia niishishanojiniji. Nojuacuajaari pa niishiya cutara. ²¹ Cua panishano Pueyaso muerasunaa, poojia jaara pa macuhuaajaquiri, paari shuquiriaatia quiya Pueyaso niqiiarani. ²² Nojuajaari puetunu pa masesano niqutionutaniya pajaniya, na rupaa pa tojishacari, puetunu na panishanojuanaa pa miishacarijihuaaj. ²³ Pueyaso sequesano puaari nio: Neyanu Jesucristoocua pa tiuuniuria, pa panitioonurajuhuaaj taa na sequequiaaricujani. ²⁴ Canapueete Pueyaso rootasano tojjiacani, nojoriiri Pueyasota rupuetootesano quijiaca. Naajuhuaaj, Pueyasoori nojorijinia quiyacujua. Nojuacuajaari na Sohuanu niqutioquiaari pajaniya. Naa na Sohuanu pa jiiiasacaritij, paari maatia niishiyani Pueyasoori poojiajinia quiya.

4

Pueyaso Sohuanujiniji pohuatasano, Cristo Paraca sohuanujinijinio

¹ Cuarta Pueyaso pueyanaa, quiarijiani, queraatia Pueyaso sequenu panishano caminiujiunaa pueyari supueya. Majaari ritia nia tiuuniu

puetunu nojoriicujajanaa. Coteenu nojori nia saniniujiuri, nia niishiniuria nojori caminiujiushanote seetanujuanaa Pueyaso Sohuanujiniji, tamonujiniji soj. Mijiria, queraatia sapojonuujuacaari caneya. Nojoriiri najuhuana cuaracashiniuya na sequesacari: “Janiyacuajaari Pueyaso sequenu panishano caminiujiuniani: Pueyaso Sohuanu niishitishano janiya”.² Niaari naa niishiniutianiya cante seetanujuanaa Pueyaso Sohuanu niishitishano caminiujiuniani: Pueyaso Sohuanu jiitiajaari naa sequeja: “Pueyaso jiyarosano Jesucristoori pueyanora quiquiaari, mijiria pocuara cusoriquiano”.³ Cante saniniuujia jiyaniyani Jesu maja pueyanora na quiniu quiquiaari, cunoori maja Pueyaso Sohuanu na jitianu. Saaja Sesaaca sohuanu jiitiaa noojiajinia cutaraari. Nojuacuajaari Jesucristo Paraca. Niaacuajaari tari pohuatasaaquiaari, Cristo Paraca sohuanuuri niniutianiya. Nojuacuajaari tari mijiria quiya.

⁴ Quiquiohuaniojuanaa, niaacuajaari Pueyaso muerasu. Naacuajitij, niaari cuno sapojonuujuaca shocotacanu Pueyaso cumaacata. Nioojiajinia Quijiaari socua cumaacaraca nojori jiitiasano Sesaaca cumaacajiniji.⁵ Cuno sapojonuujuacaari saaja Pueyaso niishiyashijiaca, maja Pueyaso muerasu. Naacuajitij, nojoriiri saaja mijiria casaajiniji pohuatanuuquiaa. Naarate narta Pueyaso ruuretajacaari nojori tojtiaquiaa.⁶ Paa cutaraari Pueyaso pueyani. Naacuajitij, cante Pueyaso tojtiajacani, nojoriiri pa tojtiaquiaa. Canapuate saniniuujia maja Pueyaso pueyani, nojoriiri maja na tojtianu quiquiaa pajaniya. Naacuajitij, pa naata niishiniu cante seetanujuanaa Pueyaso Sohuanu jiitiaa cutarani, cante saniniuujia sapojoua sohuanu jiitiaanjia.

Pueyaso pa panijia cutara

⁷ Cua panishano Pueyaso pueyanaa, jiyanhua panitioojuaca pa quirij. Pueyasocujaari pa panijia. Nojuajaari pa panitijia na Sohuanuta, jiyanhua panijia pa quiniuriajuhuaj. Canapuate puetunu pueya panijiacajanaani, nojoriiri Pueyaso muerasu cutara, seetanujuanaa Pueyaso niishijiacajaarihuaj.⁸ Canapuate pueya paniyashijiacani, nojoriiri maja na niishiniu Pueyaso. Pueyasocujaari panijia cutara.⁹ Nojuajaari pa niishitiquiaari taa na paniquiaa jiyanhua pajaniyani, Neyanuniojua na jiyarosacari mijiria pa samiitianijioriquiano, pocuara na cusosacari.¹⁰ Naa cutarate seetanujuanaa paniniu sequesano: Pueyasoori pa panijia. Paari maja pa coteetanu quiquiaari Pueyaso paniniuni. Nojuajaari saniya coteetaquiaari na paniniuria pajaniya. Neyanu jiyaroquiaariiri pocuara mosocoriquiano, sesa pa miishano jiyanooshaanura. Naa cutarate seetanujuanaa paniniu.

¹¹ Cua panishano Pueyaso muerasunaa, Pueyaso jaara naa pa paniquiaaricuaa, ¿casaara pa panitioyaquiyarinijia? Naa panitioojuacara pa quirijjuhuaj.¹² Majaari quenaaja pa niqiniu quiquiaari Pueyaso, taamuecatejanojoni. Naajaa, paa jaara tamasacata panitioojuaca quirini, Pueyasoori poojiajinia quiyacuaja. Naacuajitij, paari tojetaarucujajanaa panijiacara quiniutianiyanani, na paniniu quishacari poojiajinia.¹³ Nojuajaari na Sohuanu pa niqutioquiaari poojiajinia na quiniuria. Naacuajitij, paari niishiyani paacuajaari nata rupuetoojuaquiyani.¹⁴ Canaajanaari seetanujuanaa canaa niquishano pohuataani: Pueyasoori Neyanu jiyaroquiaari mijiria, mijiria quiniaa niti mosocoriquiano, nocua tiuujiaca jiyatesaanura Pueyaso pueyara.¹⁵ Cante

pueya niquiara sequejani: “Jesuuri seetanujuanaa Pueyaso Niyanu”, Pueyasoori noojiajania quiya. Nojuajaari Pueyasota rupuetoojua quiyajuhuaaj.

¹⁶ Naacuaajitij, paari niishiyani Pueyasoori jiyanoehua pa panijia. Paari na niishiyajaaniuhua na rupaacua pa tiuushacari. Pueyaso cutaraari panijia. Paa jaara pueyaracaanu panijia quirini, paari seetanujuanaa Pueyaso rupuejani. Naajuhuaaj, Pueyasoori poojiajania quiya. ¹⁷ Naa Pueyaso quishacari poojiajinatej, paari pueya panijia jiyacatequiaa socuani. Naa seetanujuanaa panijia pa quishacaritij, paari juhuajaniya quiniutianiya Pueyaso nequesoreesacari puetunu pueyapuejanaani. Majaari pa puerenu quiniutianiya panijia pa quishacari taa panijia nojuaja quiyacuaani. ¹⁸ Cante seetanujuanaa Pueyaso panijiani, majaari na niishiniu puerenu. Naa pa paniniuuri puetunu pa puerenu jataajanaa. Cante puereja quiya saniniunijia, majaari juhuanojuaja na paniniu Pueyaso puetunu noojatajanaa. Puerejaari niishiriojiya: “Saniitiosaanutaniyanijia”.

¹⁹ Niaacuaajaari niishiya, Pueyasoori coteenujuanaa pa paniquiaari, naarate paari saniniuuja na paniyani. ²⁰ Saniniuuja, cante sequejani: “Janiyari Pueyaso panijiani”, narta pueya niquniu paniyaquiya saajaaraariuhuaaj, jiyano pueyanoori sapojoua. Naa na paniyaquishacari tarajanu na niquishano na namijiata cutaratej, ¿maatucua taa Pueyaso panirini, na niquishoo socuani? ²¹ Pueyasocuaajaari naa pa rootaquiaari: “Cante cua panijiani, cuara paniiria narta pueyajuhuaaj”.

5

Taa pa shocotanutaniya mijiria niishishanoni

¹ Niaa jaara Jesuucua tiuuri nojuaja seetanujuanaa Pueyaso Jiyarosano quiquiaari, niaari Pueyaso muerasu. Mijiria, cante muerasu que panijiani, necohua paniyajaariuhuaaj. ² Naacuaajitij, pa panishacari Pueyaso, pa tojishacari na rootasanojuhuaaj, jiyacariti paari niishiyani paari parta Pueyaso muerasu paniyajaacuhuaaj. ³ Paa jaara Pueyaso panijia quiri seetanujuanaani, paari na sequesano tojijiaa quiyajaaniuhuaaj. Na rootasano pajaniyani, majaari jiyajeneta na quiniu pajaniyara. ⁴ Cante seetanujuanaa Pueyaso muerasuni, nojuajaari mijiria sesa niishishano shocotaa. Paari na shocotajani Pueyasocua pa tiuushacari. ⁵ Cante Jesu jiyateya seetanujuanaa Pueyaso Niyanurani, saaja jiyano pueyano na naata mijiria niishishano shocotanu cutara.

Pueyaso Niyanujiniji pohuatasano

⁶ Pueyasoori canaa niishitiquiaari Jesuuri seetanujuanaa Neyanujuhanajaj, Jesu jaara moojinia tiuquinishaacuaari. Canaa niishitiquiaariijaariuhuaaj Neyanu jaara niyacutesanojinia naatequiaari. Jesuuri maja saaja moojinia na tiuquinishaanu quiquiaari canaa niishiniuria nojuaja. Maja. Naajuhuaaj, janiyajanaari na niquiquiaari na nanaca shooteyano na shuucujini. Naajuhuaaj, poojiajania quijia Pueyaso Sohuanuuri pa niishitiquiaa cunoori seetanujuanaa Pueyaso Niyanu quijiajuhanajaj. Pueyaso Sohuanu cutaraari maja na niishiniu sapojonu. ⁷ Jiuujianaraca jiyocuaaanu quijiaaari pa niishitiya Jesucristoori mijiria niquiara pueyano na quiniuria seetanujuanaa. Cuno pojoriiri nio: Pueyasojuanaa, na Rupaa, na Sohuanunio. Nio jiuujianaraca quijiacani, nojoriiri Pueyasojuhanajaj. ⁸ Paari mijiria jiiitia

Jesujini pa niishitijiacajuhua. Cunoori jiuujianaraca quiyajuhua. Cuno pojori nio: poojiajinia quijia Pueyaso Sohuanu, jiyocuaaanuji tojishano rupaa Jesu tiuquinishacari moojinia, naajuhua, na nanaca, pueya niquishano na shuucuaji shoyano. Puetunu cunojuanaari mariyata pa niishitiya Jesuuri seetanujuanaa Pueyaso Niyanu. ⁹ Paa jaara tojiriquia pueya pohuatanuusanoni, ¿casaara saniya Pueyaso sequesano pa tojiaquiyarini? Pueyaso sequesano Neyanujiniijiiri socua seetanu rupaaanaa cutara pueya pohuatanuusanoinijii. ¹⁰ Cante Pueyaso Niyanuucua tiuujiani, Pueyaso Sohuanuuri noojiajinia na niishitiya Jesuuri seetanujuanaa Pueyaso Niyanu. Saniniuujia, cante Pueyaso sequesano Neyanujini ruuretaja saniniunijia, nojuajaari Pueyaso jiyateya sapojuara, na tiuyaquishacari tama Pueyaso sequesanoocuaaja Neyanujini. ¹¹ Pueyasocuaaari sequequiaari, Neyanuucua tiuujiaaari pueyaracaanu rishijiaa quiniutianiya. ¹² Cante Pueyaso Niyanu jiiatia noojiajiniani, nojuajaari tari samiitianishaarohua pueyaracaanu rishijia na quiniuria. Pueyaso Niyanu jiiiaashijiaari saniniuujia maja na rishiniu quiniutianiya.

Nio naajio puequenu panishacari rootasano

¹³ Nio naajiya niaaranijia nia niishiniuria, Pueyaso Niyanuucua nia tiuushacari niaari tari samiitianijiosaarohua pueyaracaanu nia rishiniuria.

¹⁴ Paari Pueyasocuaa tiuquuaani, pa niishishacari nojuajaari pa tojiquiaa pa secojosacari nojuaja, pa masesano jaara quiri taa na paniaacuajani. ¹⁵ Naatej, taa pa niishiyacuaani Pueyasoori pa secojosano tojiquiaa, paari naa niishiyajuhua paari nojuaja pa masesano maseree tarini.

¹⁶ Cante narta Pueyaso pueyano niqiyia sesa miyanoni, cuara Pueyaso secojora nocuara, sesa na miishano jaara na cusojuashijia quiri. Naacuajitij, Pueyasoori cuno sesa miijia naataniniutianihua, sesa na miishano jaara cusojuashijia quiri. Quiyajaariuhua tamonu sesa casaa miiniu. Paa jaara cuno sesa casaa miirini, paari cusoqueeni. Naa cua sequesacari niajaniatej, majaari cua sequenu niajaninya nia secojonura jiyano sesa miishanoocuaratej. ¹⁷ Seetanujuanaa, puetunu sesa miishanojuanaari sesa Pueyasora. Naajaa, majaari puetunu sesa miishanojuanaa cusojuanu quiniutianiya pajaniya.

¹⁸ Paacuajaari niishiyani pueyanaa, cante Pueyaso jiiatia juhua na Que cutarani, nojuajaari sesa miyaquiquiaa, Pueyaso Niyanu cojuasacari nojuaja. Naacuajitij, Sesaacaari maja na naata sesa na mitiniu. Majaari na naata sesa na miiniujuuhua.

¹⁹ Paari niishiyani paa cutaraari Pueyaso muerasuni. Sesaacaari saniniuujia puetunu mijiria quiniaa Pueyaso niishiyashijiacajanaa jiiiaacuua. Nojuajaari nio jiya camarnu.

²⁰ Paari niishiyajuhua Pueyaso Niyanuuri mijiria pocua niqiaari. Nojuajaari na niishitija niqutioquiaari pajaniya, maninia pa niishiniuria na Que, na Que quiniuria pa Quejuhua. Nojuajaari Pueyasojuanaa cutara. Paari nata quiya jatiqini, Neyanu Jesucristota pa rupuetoosacari. Nojuajaari Pueyasojuhanajaj, pa Samiitianijiaariuhua, pueyaracaanu rishijiaa pa quiniuria. ²¹ Quiquiohuaniojuanaa, saaja Pueyaso pa paniri. Tama pa cuaqueyajaaja pa cojuare, maja tamonu casaacua pa jiaatianura socua Pueyasojiniiji. Paa jaara tamonu

casaacua jiaatiareni, paari Pueyaso shocoteya nocuarani. Niojuanaa pueyanaa. Tariucuaja.

TANEE JUAN NAAJIONEE

Pueyaso Rupaa seetanujuanaa paniijara pa jiyateja

¹ ¿Quiaate quiyajaa cua panishano cua rimiatucuaanaa? Quiaacuajaari Pueyaso saquiriojosano, neyatu quia quiniuria. Quiocuara naajiyaniija, quia panishano muerasuucuaranio.

Janiyari saaquiano Juanni, Pueyaso muerasu jitianaa. Seetanujuanaa nia paniyanijia, taa puetunu Pueyaso rupaa tojiniaa pueya paniya niajanayacaani. ² Pueyasojiniji seetanu rupaajanaari poojiajinia quiya. Naaratej, canaari nia paniyani. Cuno rupaari poojiajinia quiniutianiya pueyaracaanu. ³ Nia tojishacari seetanu Pueyaso rupaajanaa, nia panitioosacarijuhuaj, naacujitij, pa Que Pueyasoori Neyanu Jesucristota nia cumaquiniutianiya. Niaacua taraajenutaniyajaarihuaj. Nioojia jiyatenutaniya juhuajaniya quijiacarajaarihuaj.

⁴ Noojiaqueya quia niqiuohujinijinio niqiuquianunijia. Nojori timiticanunijia nojori tojitianuucua maninia seetanu rupaajanaa, taa pa rootasaaquiaari pa Que Pueyasojinijicujani. ⁵ Quiocuara naajia quiar-ijianijia cua panishano cua rimiatucuaanaa, cua sequenura quiajaniya: “Jiyanohua pa panitioore”. Majaari quiarinio rootasano nio, cua naajiosano quiocuarani. Nio rootasanocuajaari pa jiiitasano pueyaracaanu Jesucristojiniji. ⁶ ¿Taate pa naata paniniuni? Paari pueya panijaca quiyani Pueyaso rootasano pa tojishacari. Niocuajaari na rootasano: puetunu pa miishanojuanaa cuaara quiiira Pueyaso pa paniniutia poojiajinia.

Cristo paraari sapojonuujuaca

⁷ Quiarijiani, queraatia sapuenu juhua Pueyaso sequenu panishano caminiujuniaari mijiria quiya. Nojoriiri pueya niishitiojoquiaa: “Majaari Jesucristo rosenu quiquiaari jiyocuaaanuji, cuaqueyaraca na quiniuria, seetanujuanaa pueyano na quiniuria”. Canapuate naa sequejacani, nojoriiri sapojonuujuaca. Nojoricujajaari Cristo paraa. ⁸ Tama nia cuaqueyajaaja nia cojuare cuno pueyacuaji, maja nia tojiniuria nojori, niaa mariqui Pueyaso niquitionu panishano pajaniya maseyaquiri-iri, pa Jiyaniijara nia poonijionujiniji na niquitionu panishano. Suraa-tiaja nia tojiriohuarohua seetanu rupaajanaa, nia masenura puetunu Pueyaso jiiitasanojuanaa niaara. ⁹ Cante tama na cuaqueyajaaja jiyateja Pueyaso casaa niishijara socua Jesucristo jiyaramiquishano pueya niishitiojosanojinijini, cuno shocotajaari Pueyasoojura quiquii, na shocotanuucua Cristo rupaa. Cante saniniuuja seetanu rupaajanaa tojitiaquiaa maniniani, taa pa rootasaaquiaari Cristo rupaacuajani, Pueyasocujajaari na Que, Neyanuuri nocuaji Tacunajuhua. ¹⁰ Seetanu rupaajanaa jiiitaashijia jaara niaacua tiuquiniu paniya tamaatia na niishitiojonura niajaniya, majaari niaacua na shanacununoj. Majaari quenaaja na saruhatanujuhua nia cumaquiniuria nojuaja. ¹¹ Cante na sequeyani: “Pueyaso cuaara cumaquiiira quiajaniya”, naa sequejaari cuno sapojojua cojiritiasaaree tari sesa na miishanotaja.

Juan puecasacari naajionu

¹² Socua queraatia sequenu paniya niajaniyanijia. Naajaa, majaari cua naajionu paniniu. Janiyacuajaari niaacua naquerejiyani, maninia pa pocoojonura, shuquiriaatia pa quiniuria seetanujuanaa. ¹³ Quia tarajanu niqiuohuari cua sequeree nojoriria cua saruhuatanura quiajaniya. Nojuacuajaari Pueyaso saquiriojosano maajjiuhuj. Tariucujaja.

SOCUA TANEE JUAN NAAJIONEE

Juan maninia pahuatasaaquiaari Gayojiniji

¹ ¿Quiaate quiyajaa cua panishano Gayonaa? Janiyari saaquiano Juanni, Pueyaso muerasu jiiitiana. Seetanujuanaa quia paniyanijia, Pueyaso rupaa quiniuucua coojiajinia. ² Quiocuara secojoquiaanijia, puetunu quia miishanojuanaa cuara quiiiria maninia. Janiyari quiocuara secojoquiaaaniuhuj, maninia quia cuaqueya quiniuria, maja cusosu, taa quioojia quiya maniniacuaani, Pueyaso tojjia quia quishacari maninia.

³ Parta Pueyaso muerasujinijinio pueyari cucua tiuquiquianu quia quijia tiacajiniji. Janiyari jiyanohua shuquiriaatia quiquianuni nojori pahuatasacari quiajanijiniji. Quiaanaari seetanujuanaa maninia mijia quiquiaa taa pa rootasaaquiaari Jesucristo rupaacuajani. Quiaacuajaari maninia tojiquiaa seetanu rupajaanana, sanajanaa. ⁴ Jiyanohua timiquiaanijia cua tojishacari cua muerasuuri maninia miya, taa cua rootaquiaari Jesucristo rupaa nojoricuajani. Naa cua tojishacari, cunoori jiyanohua cua timitiquiaa socua tamonu casaajiniji.

⁵ Sanajanaa, quiaacuajaari maninia mijia, maninia quia miishacari parta Pueyaso muerasu. Quiaa cutaraari maninia miiquiaa, quia tiuquitishacari quia tijinia quia niishishoo tamaquicuajinio Pueyaso muerasu. ⁶ Pueyaso muerasu rerejosacari niya, Pueyaso rupaa pahuatanura rucoojuacaari canaa niqiiara pahuatanu maninia quia miishanojiniji nojoriria, quia paniniutia nojori. Quiarijiani, nojori quia niqiiore nareja nojori panishano na jiyatajara, socua nojori quianu panishacari cuniquiji. Naa quia miiri quenaaja, Pueyaso quia shuquiritiniuria. ⁷ Nojoriiri Jesucristojiniji pahuatanura rucoojia. Majaari nojori panishano na masetunu paniniu quiquianu Pueyaso niishiyashijiacajiniji. ⁸ Naaratej, pajaniya cuara naacuura jiyano pueya, noo pojori canapuate pa Jiyaniijia rupaa pahuatanura rucoojiyacuajani. Naa pa miiriti Pueyaso rupaa pahuatanu naacuna pa quiniuriajuhuaj.

Sesa Diótfes miishanojiniji pahuatasano

⁹ Janiyari quia quijia tiacajinia Pueyaso pueya maanuucua naa naajioquiaarijuhuaj. Janiyari nojori sequequiaarini nojori cuara Pueyaso Rupaa pahuatanura rucoojuaca naacuura, cunoojori jiiitiana na panishano. Diótfesri saaja tama na cuaqueyajaaja shuquiritiaja, Pueyaso pueya maanu jiiitiana na quishacari. Nocuaji cua sequesano ruuretacuauuri. Cua rerequetequiaaarijuhuaj. ¹⁰ Naajaa, janiya jaara niaacua quiaareni, janiyari naa sacuaraatia na miiniuucua na nacasunutaniyani. Nojuajaari tamasaca niqiiara canaa sesacaquiaa na sapojonuta. Naa socua sesa miiquiaaarijuhuaj: majaari na tiuquinitianu quiquiaa Pueyaso Rupaa pahuatanaa na tijinia. Canapuate saniniuujia nojori tiuquinitianu paniquiaa nojori tijiniani, Diótfesri nojori tenujuquiaa saaja. Canapuate Pueyaso rupaa pahuatanura rucoojuaca tiuquinitianu paniquiaa na tijiniani, Diótfesri puetunu nojori tenujuquiaajanaa, maja socua nojori rerejonura narta Pueyaso muerasuta.

¹¹ Sanajanaa, majaari quia jiaatianu cuno sesa miiijaacua, quiaa mariqui juhua nojuaja quirijiaariuhuaaj. Saaja quia jiaatiare cutara maninia miiijaacua, juhua nojuaja quia quiniuria. Cante maninia miiijaacua, cunocuaajaari Pueyaso pueyano. Sesa miiija saniniuuja, nojuajaari Pueyaso niishiyashijia.

Maninia Demetrio miishanojiniji pohuatasano

¹² Puetunu pueyajanaari saniniuuja maninia pohuatanuuquiaa Demetriojiniji. Tama Demetrio miiijosanojinijiaaja, pueyari niishiya Demetrioori maninia pueyano. Seetanujuanaa, nojuajaari maninia pueyano, taa tamasaca sequequiaacuajani. Niaacuajaari niishiya canaari seetanujuanaa sequequiaani, naa canaa sequesacari Demetriojiniji.

Naajio puequesacari

¹³ Janiyari queraatia sequenu panijajaa quiajanijani. Naajaa, majaari cua sequenu paniniu saaja cua naajiojinia. ¹⁴ Janiyacuaja quiocua naquerejijani. Jiyacaritij, pocua maninia pocojore cutarani.

¹⁵ Pueyaso cuaara quioojia jiiitaara maninia, juhuajanijani quia quiniuria. Niya pa rupuenaari cua sequeturee cua saruhuatanura quiajanijani. Puetunu cuniqui pa rupuenaajanaa quia saruhuatare canaarajuhuaaj. Tariucuaaja.

JUDAS NAAJIONEE

Judas naajiosano Pueyaso saquiriojosano pueyacuara

¹ Janiyari Judasni, Jesucristo seru, Jacobo tarajanu. Niaacuara naajianijia canapueete pa Que Pueyaso panishano muerasucuaajani. Nojuajanaari nia saquiriojoquiaari nera nia quiniuria. Niajanijari Neyanu Jesucristo cojuasano, nia rupuesacari nojuaja. ² Pueyaso cuaara nia jiuujiaaria. Cuaara nioojia cajitiiriajuhuj. Cuaara paniiria niajanijajuhuj. Pueyaso cuaara naa miiria jiyanohua niajanijatej.

Sapojonuujuacajiniji pohuatasano

³ Cua panishano pueyanaa, janiyari niaacuara naajionu paniriqiaa jiyanohuani, cua pohuatanura niajanijia taa maninia pa miishaanutanianiyani, Pueyaso saquiriojosano pueya pa quiniuucua: niajanijia, canaajuhuj. Saniniuujia, quiarijiani, socua maninia cutaraari cua naajionura niaacuara, cua nacasunura niajanijia seetanujuanaa Pueyaso tojjijia nia quiniuria. Jiyanohua nia tiuri pueyaracaanu Pueyaso rupaacua, cumueeca Pueyaso pueya nia quiniuria. Pueyasocuaajaari na rupaa pohuataniquiaari maninia pa niqiuara. Maja cumaati na jatanishaanu. Cuaara pueyaracaanu maninia pohuatasaaaria, taa pa pohuatasaaquiaaricuaani. ⁴ Naa nia sequeyanijia Pueyaso rerequetejaca supuesacari jiyasohua nia tajinia. Tariucuaaanu Pueyaso Rupaajiniacuajaari cuno sesoriquia pueyajiniji naajiotasaaquiaaricuaaja. Nojoriniaari quejoosaanutaniya pueyaracaanu saniitiosocoriquiano. Nojoriiri sequequiaa: “Shuquiriaatia juhujaniya pa miiri tama pa cuaqueya miiniu panishanojuaja, pa jiyanoojia Pueyaso quishacari. Paa jaara sesa miirini, naajaa, majaari Pueyaso saniitionu quiniutianiya pajaniya”. Nojoriiri naa sequetuquiaa sesatej. Nojoriiri pa Jiitianajanaa jiyatequiaa juhua saniitioyashijia, pa Jiyaniijiajanaa Jesucristoni.

⁵ Niaari niishiyacuaja, Pueyasoori Israel pueya supuetanaa mashiQUIQUIAARI Egipto jiyajiniji, Egipto pueya seya nojori quishacari. Socua nia niishitorohuaraj. Na nuhuaji, Pueyasoori na pueyajinijinio nocua tiuyashijia puecooquiaari. ⁶ Naajuhuj, Pueyasoori tama na seyajaaja nujuatejoquiaari na nujuatejojuajinia, noo pojori canapueete na shuriucua quijiaa quiquiaari jiyocuaacaanucuaajani. Nojoriiri Pueyasora na poonijiosano tiujiaquiaari. Nojori poonijiosaqui tiujiatuquiaarijuajaariuhuj. Cunora, cumayocuaata morojosaaquiaariiri, pueyaracaanu ninishiqui nojori quiniuria, cuaara quiriijaatijia Pueyaso saniitiojonu juuca cutara. Cuno juuca, Pueyasoori puetunu na tojiyashijiacajanaa saniitiojonutaniya. ⁷ Nia niishirijuhua Sodoma tiacajinia quijia pueya, Gomorra tiacajinia quijia pueyano, nojori tiaca shocua quiniaa pueyajuhuj. Puetunu nojorijianaari maninia miiniu ruuretaquiaari tama nojori cuaqueya panishanojuaja nojori miiniuria, jiyanohua sacuaraatia. Nojoriiri maajishuriu numuetucujuaca quiquiaari. Cayashuriuuri narta maaji numuetucujuaca quiquiaarijuhuj. Pueyasoori maja na shipininiu quiquiaari naa pueya quiniuriatej. Naa Pueyaso tojiyashijiaa nojori quishacaritij, mariyata taa tama Pueyaso seyajaaja na tojiyashijiaa quiquiaaricuaani, Pueyasoori nojori quejooquiaari

mani quiquiojinia, tii naquiya nojori miishaanura pueyaracaanu. Naa nojori saniitiosaanuucuaatej, cunoori quiquiaari puetunu pueyajanaa niishiniuria maja Pueyaso tojiyashijiaca pa quiniuria taa nojori quiquiaaricuaani.

⁸ Cuno pojori, sacuaraatia niishitiojonaa nia tajinia quiyani, nojoricuajaari Pueyaso saniitionujiniji niishiya. Naajaa, nojoriiri juhuanianiya miiquiaa puetunu sesajanaa taa noojiajinia nojori niishiyacuajani. Nojoriiri tama nojori jiuujiacajaaja curuushojuquiaa nojori mishacari tama nojori niquishanojuaja na maquenujinia. Pa Jiyaniijia sootiyujajaariuhuj. Nojoriiri jiyanojuaa cumaacaraca quijiaca sesacaquiaajuhuj, jiyocuaaanu quijiacani. ⁹ Supuetana Moisés shaajesacari, Pueyasoori na seya jiyaniijia Miguel jiyaroquiaari Moisés quete na jamonura. Sesaacaari Moisés quete paniquiaari juucua. Nocua Miguelta juayonuutaquiaariiri. Miguel cutaraari seetanujuaana cumaacaraca quijia. Naajaa, majaari na saarijionu quiquiaari Sesaaca. Na sequeree saajaari: “Pueyasojanaa cuaara juaaria cutara quiajaniya”. ¹⁰ Saniniuujia cuno sesa niishitiojonaa nia tajinia quiyani, nojoriiri na niishishoo cumaacaraca casaa sesacaquiaa. Naajuhuj, nojoriiri tama nojori cuaqueyajaaja sesoquiaa sesa na miishanota, taa nacujiniaacoji casaa miiquiaa sesa juhuanianiyacuani, maja na niishiniuria. Naaratej, nojoriiri saniitiosocoriquiano puetunurajanaa.

¹¹ Nojoriiri jiyanojuaa cocuaatia miiquioquiaa. Nojoriiri narta pueya niquiniu paniquiquiaa, taa supuetana Caín niquiniu paniquiquiaari tarajanucuaani. Nojoriiri sesa pueya timitiquiaa casamiriaca nojori quiniuriajuhuaj, naatej, taa supuetana Balaam miiniu paniquiaari juucuacuaani. Nojoriiri mariyata puetunu quejoosaanutanijajanaa nojori ruuretunuucua Pueyaso, taa supuetana Coré cusoquiaaricuaani na ruuretasacari Moisés. ¹² Nia queranacusacari Pueyaso niquiara nia panitioonuta, cuno sacuaraatia niishitiojonuujuaacari jiyanojuaa cararaatia nojori miaquesacari niaata. Majaari nojori paniniu tamasaca. Nojoriiri saaja tama na cuaqueyajaaja shuquiritiniu niishijiaca. Puera miaquenujuaca nojori quishacari, cunoori cararaatia. Jiyano pueyari maja na cumaquiniu niajaniya. Nojoriiri najuhuaa quijiaca, juhua niquitioocuaari tajimiaquiaa paratu piyarojosacari. Majaari maru niniu. Nojoriiri najuhuaa quiya, juhua muetuhuo naana. Nojoriiri tariucua macu Pueyasora, naatej taa naana sorenocuaani, juhua puetunu na nuuacatajanaa majaratasano. ¹³ Nojori nuhuaji, pueyari saaja taraatia quiquiaa, cararaatia nojori miishanojiniji. Sesa nojori miishanoori juhua jiyanojuaa shoniniacu caminia queyocuasacari cushau, curuutuuca. Nojoriiri shanohua niquishiya rupaquijia, juhua rijia tiyano. Na nuhuaji, nojoriiri ninishiqui quiniutianiya pueyaracaanu Pueyasooju. ¹⁴ Pa supuetana Adánri coteenujanaa shipinishano pueyano quiquiaari mijiria. Enocri séptimo jiyaniijia quiquiaari Adán nuhuaji. Enocri Pueyaso niquitishano nojuaja pohuataquiaari taa nio sesa miijiaca pueya miishaanutaniyani. Nojuajaari naa sequequiaariti: “Janiyari Jiyaniijia niquirii cunocoji niyano jiyanojuaa queraatia na pueyatani. ¹⁵ Nijioriquiaari sesa miijiaca na saniitionura. Rerequetetajacaacua tiuutianutaniya puetunu sesa nojori miishanojuanaari. Puetunu na soojecajanaari

saniitiosaanutaniya puetunu nojori sesacanuucujanaa pa Jiyaniijia”.¹⁶ Cuno sesa niishitiojonuujacaari naa miiquioquiaa nia tajinia. Nojoriiri saa juayonuutaquiaajaa. Majaari shuquiriaatia nojori quiniu quiquiaa na jiitiasanota. Nojoriiri tama na cuaqueya panishanojuaaja miiquiaa. Puera pocujaca quiyajaariuhuj. Nojoriiri na sapojonuta maniniuhuaqueetaquiaa narta pueya, maninia nojori miishaanura. Majaari naa nia quiniu pueyanaa.

Pueyaso pueyara rootasano

¹⁷ Cua panishano pueyanaa, nia niishiriohua pa Jiyaniijia Jesucristo jiyaramiquishano pueya sequesano niajaniya. ¹⁸ Nojoricuajaari nia pohuataquiaari taate quera jiya puequesacari quiniutianiyani. Nojoriiri naa sequetuquiaaritij: “Quera jiya puequesacari, Pueyaso sesacajaca pueyari Pueyaso casaa soojeaca quiniutianiya, na rupaa soojeacajuhuj. Nojoriiri sesa miiniutianiya tama nojori cuaqueyajaaja nojori shuquiritiniuria”. ¹⁹ Naa cuno pueya miiniuucuatej, nojoriiri Pueyaso muerasu jiuujia niaquejotequiaa maja rupuetoosano nojori quiniuria. Nojoriiri saaja tama sesa nojori niishishano miiquiaajaacujua, Pueyaso Sohuanuju nojori quishacari.

²⁰ Cua panishano Pueyaso muerasunaa, Jesucristo rupaacua nia tiuri jiyanohua socua, seetanujuanaa na pueya nia quiniuria maninia. Pueyaso nia secojore Pueyaso Sohuanu cumaacata. ²¹ Naacujitij, niocua Pueyaso panishano pueya quiri pueyaracaanu. Juhujaniya nia sashiri pa Jiyaniijia Jesucristo, nojuaja cuuara pueyaracaanu quijiacara pa jiyaterejaatijia, shuquiriaatia pa quiniuria na shuriucua pueyaracaanu. Naa pa miiniutianiyari maninia jyanoojia na quiniuucua.

²² Canapuate pa Jiyaniijiaacuaji taacanuyajaani, nojori nia niishitiojore jacaria, seetanujuanaa nojori tiuniuria maninia pa Jiyaniijiaacua. ²³ Tamasaca nia piriyojorejuhuaj Pueyaso pueya nojori quiniuria, nojori mariqui manijinia puetunu quejooaarejanaari. Tamasacaari jyanohua sesa miijiaca. Naajaa, nojori nia naacure, Jesucristo nojori niishiniuriajuhuaj. Saniniuujia, tama nia cuaqueyajaaja jyanohua nia cojuare niaa mariqui sesa miitishaarejaariuhuj nia cojishacari nojori. Jiyano pueyaca nia taraajere. Saniniuujia, puetunu sesa nojori miishanojuanaa nia soore cutara.

Naajio puequesacari Pueyaso maniniuhuaqueetasaanu

²⁴ Pa Que Pueyasoori pa cojuaquiaa maja pa catenura nocuaji. Nojuacuajaari cumaacaraca na tiuquinitianura pajaniya nocua, puetunu tari maniniushitishanojuanaa pa quishacari, shanohua na cumaaca pa shootianura pueyaracaanu. Pa niquishacari nojuaja, paari jyanohua na timitianutaniyani.

²⁵ ¡Jyanohua maniniaari pa Que Pueyaso! Nojuajaari niishijajanaa. Pa jiyatequiaari na muerasuraari pa Jiyaniijia Jesucristo cusunucua pocuara. ¡Jyanohua shanohua na cumaaca! ¡Nojuajaari Jiyaniijajanaa! ¡Jyanohua maninia pa Jiitiana! ¡Nojuajaari puetunu cumaacaracajanaa cutara! ¡Nojuacuajaari pa Que Pueyaso! Jiya shipinishaacarijiyojua, nojuajaari quijiajuhanajaj. Naa quiyajaari. Naa quiniutianiya pueyaracaanuuri. Taaquiriirinij, naacuaaquiniatejaj.

JESUCRISTO NIQUITISHANO JUAN

Jesucristo niquitishano pajaniyara

¹ Janiyari Pueyaso seru Juanni. Niya naajiotaa Pueyaso niquitishano Jesucristonijia, saniniuujia nojuaja niishitiniuria na tojitiajaca, taa quiari naataja Pueyaso miiniutianiya mijiria quijiacani. Jesucristoori jiyocuacaanuji na seru jiyaroquiaari cucua, na niishitiojonura janiya taa mijiria quijiaca miishaanutaniyani. ² Janiyari puetunu na niquitishanojuanaa caminiujiya niajaniya seetanujuanaani. Niocuaajaari seetanujuanaa Pueyaso rupaa, Jesucristojiniji cua caminiujiushano niaara.

³ Shuquiriaatia quijiaca cutaraari noo pojori, canapue te nio cua caminiujiushano Pueyasojinijini serojonutaniya Pueyaso pueya maapue niquiarani. Na tojitiajacaari shuquiriaatia quijiaca quiniutianiya-juhuaj, nojori tiuniucua nio naajiojinia cua pohuatasanoocua. Nio pohuatasano tohuateenuraari tari catecanoya.

Juan naajiosano siete Pueyaso pueya maapuecuara

⁴ Janiyari Juanni. Asia jiyajinia quiniaa siete Pueyaso pueya maapuecuara naajianijia. Pueyaso cuaara cumaquiiria niajaniya, cuaara nioojia cajitiirijuhuaaj. Pocua niriquiano pa Que Pueyasoori jiyano hua maninia. Nojuajaari pueyaracaanu quijiacuaja. Quiarijia quiyajaariuhuaaj. Na Sohuanuuri juhua siete saminio casaa niquishano, puetunu tiquiyocujanaa quiija na quiniucua. Nojoriiri Pueyaso cajishaqui tacoji quiitiuya. ⁵ Pueyaso Niyanu Jesucristoori seetanujuanaa puera caminiujiunia puetunu na Que Pueyaso Rupaajanaa. Nojuajaari quiarinio na cuaqueyata pa coteetaquiaari samiitianuhua macujiniji. Nojuacuajaari puetunu mijiria jiyaniijianucujanaa Jiyaniijia. Nojuacuajaari pa panijia. Tama na nanacajaaja shootequiaariiri sesa pa miiniujiniji na jayonura pajaniya, tojetaarucujanaa sesa miyashijiacara na jataniniuria pajaniya. ⁶ Nojuajaari pa jiyatequiaari jiyaniijianucua pa quiniuria, na Que Pueyaso secojonaa pa quiniuria pueyacuara, nojuaja pa shuquiritianurajuhuaaj. ¡Pa Jiyaniijiaari jiyano hua maninia! ¡Pa Jiyaniijia cuaara shuquiritiasaaria pueyaracaanu! ¡Nojuacuajaari puetunu cumaacaracajanaa pueyaracaanura! Cuaara naa quiiriatej.

⁷ ¡Nia maure! ¡Pa Jiyaniijia Cristoori cohuajajinia tari cunocojiuhua! Puetunu pueyajanaari na niquiniutianiya, noo pojoriijuhuaaj, na motenaatej. Puetunu mijiria quijiaca pueyapuejanaari nocuaji nujuquenu-taniya nojori martenua. Taaquiririnij. Naa quiniutianiyacuaaquiniateja na tiuquishacariuhua.

⁸ Pa Jiyaniijia Pueyasoori tama nojuajinijiaaja sequeya:

“Janiyacujaari puetunu casaajanaa coteetanani, na shaajariquiano-juhuaj. Puetunu cumaacaracajanaanijia. Janiyacuajaari pueyaracaanu quiijani. Majaari cua supueno quiquiaari. Janiyari niaacua tiuquiriquianohuani”.

Juan niquishacari Cristo puereeta na shacantuuca cumaacajinia quiyano

⁹ Janiyari niarta Pueyaso pueyano Juanni. Pa Jiyaniijia Jesuucua tiuujia cua quiniuucujuhuaaj, janiyari jaarajaaja niaata cojiritiashiya naquiya miiniuni. Naaratej, paari mariyata jiyaniijanucuaa jiyate-socoriquianoni. Cunora, paari juhuajaniya naquiya miiniu rejere-taquiaani Jesucristo cumaquishacari pajaniya. Pueyaso rupaa Jesucristojiniji cua poojotanuucua, janiyari shoniniacu caminia jiuujiajinia jatasano quiyani jiya tucuaatiajaacua. Nio jiya tucuaatiaja sesaari Patmos. ¹⁰ Tamonu juuca, pa Jiyaniijia samiitianuhua pa niishiniu juucani, Pueyaso Sohuanuuri cucua niqiuanu jiyanoehua na cumaacata. Janiyari jiyacari rupaa tojirii nacaano cua nijiniarani, juhua trompeta jonenenu. ¹¹ Cua sequeriquiaari:

—Casaa cua niqitiniutianiya quiajaniyani, cuno quia naajiotare nequesoreetuneerano. Quiocua na nuhuaji na jiyarore Asia jiyajinia nio siete cua saquiriojosano pueya maapueecua. Nojoriiri Éfeso tiacajinia quiniaa, Esmirna tiacajinia, Pérgamo tiacajinia, Tiyatira tiacajinia, Sardis tiacajinia, Filadelfia tiacajinia, Laodicea tiacajinianio.

¹² Janiyari cua nijiniara tacatequeeni cua niqiniuria cante cucua pocuariquiaani. Cua tacatesacari, janiyari siete samari nujuatacojua niquiriini, orojiniji shipinijosano. ¹³ Cuno samari nujuatacojua tajiniani, janiyari pueyano niquiriini, juhua Pueyaso Niyanu niqishano. Tucuaque toque cushiriquiaari. Na niohuacaacuma puecariquiaari. Na jiriquiajinia camarucuteriquiaa orojiniji shipinishano casaari. ¹⁴ Pueyaracaanu quijia na quiniuucua, na muecacaari tojetaarucujanaa jiyanoehua cohuaja quiriquiaa juhua sohuanatuu. Maatia pueya jiuujia niqijia na quiniuucua, na namijiaari juhua mani rimianacuriquiaa. ¹⁵ Na niohuacaari nenecuariquiaa juhua jiyanoehua naseeca casaajinia mohuaquishano bronce. Naa shacantuuca niqishano quiriquiaari puetunu sesa casaajanaa paracaajia na quiniuucua. Cumaacaraca Jiyaniijia na quiniuucua, na pocuasacari, jiyanoehua tojishaariquiaari juhua sararojua, jiyocuaaanuji mohuaca tijia. ¹⁶ Na miaquetajata siete riya muetujuriquiaari. Naajuhuaaj, nijiniaquetucujua mueruuri na rupaamaji mueranacuriquiaa, na rupaa ruuretajaca na puecoonura. Na jiquiooori jiyanoehua shacantuuca quiriquiaa juhua jiyanoehua pananu jasacari panacari.

¹⁷ Cua niquishacari nojuaja, janiyari cua puerenuta na pajama pojiyaree juhua macuni. Nojuajaari saaja na miaquetaja niaree cucua. Cua sequereeri:

—Maja puerenu. Janiyacujaja Jesuni. Janiyari puetunu casaajanaa coetejani, na shaajariquianojuhuaaj. ¹⁸ Janiyari pueyaracaanu quijiani. Macu quiquiaarinijia. Naajaa, janiyari samiitiaquiaarihuani pueyaracaanu saminio cua quiniuria. Janiyari macunucua quiquio riatataja camaruni. Naacuajitij, janiyari cumaacaracani cua tojiyashijiaca cua quejooonura macunucua quiquiojinia. ¹⁹ Pueya niishishocoriquiano, quia niqishano quia naajiotare Juannaa, taa na quiyacuajani, naajuhuaaj taa mijiria quijiaca miishaanutaniya na nuhuajini. ²⁰ Quiarijia quia pohuatareera maatia quia niishiniuria cua niqitishano quiajaniya. Cuno siete riya quia niqishano cua miaquetajata cua muetujusanoni, cunoori siete cua seya. Nojoriiri siete cua saquiriojosano pueya maapue jitianaa. Cuno siete samari nujuatacojua orojiniji shipinijosano quia niqishanojanuhuaaj, cunoori siete cua saquiriojosano pueya maapue.

2

Éfeso tiacajinia quiniaa Pueyaso pueya maanuucuaru naajione

¹ Juhuacatecara naa cua sequereeri:

—Éfeso tiacajinia quijia cua seruucuaru quia naajiore, Pueyaso pueya maanu jitianani. Naa quia sequere nojuaja: “Nojuaja, cante siete riya caca na miaquetajatacuajani, cante siete samaritiu nujatacojua tajinia rucuanajojuacuajani, nojuajaari naa quia sequera: ² ‘Janitari puetunu quia miishanojuanaa niishiyani. Quiaari jiyanojua poonijioquiaa quiria. Naajuhua, quiaari puetunu casaajanaa rejere-taquiaa juhuajaniya. Janitari niishiyajuhua, majaari quia shanacunu quiquiaa sesa miijia nia tajinia. Naajuhua, quiaari cuno sapoju-ujuaca nequesorecanu, noo pojori canapete tama sequeriquiaajaa-jani: “Canaari Jesu jiyaramiquishanoni”. Naa quia nequesorecari nojoritij, quiaari niishiquianu nojoriiri sapojuuujuaca seetanujua-naa. ³ Quiaari puetunujuanaa taraatia quia miiniu rejere-taquiaa, cua tiuujia quia quiniucua. Quiaari pueyaracaanu quiria poonijiojua maninia. Quia samaresacari, naajaa, majaari quia tarinitianu quiquiaa. ⁴ Puetunu naa quia miishanojuanaani, cunoori maninia. Saniniuujia, cua sequesano quia tojiri. Majaari panijia quia quiniu tari, juhua coteenujua. Majaari cuno cua maniniucuanu cutara. ⁵ Cunora, quia niishiri taa jiyanojua cua panijia quia quiquiaarini. Quioojia quia tacatorohua cucua, maninia miijia quia quiniuhua, taa quia quiquiaari coteenucuajani. Quiaa jaara quioojia tacatoyaquiri, janitari quiocua niniutianiyani, Éfeso tiacajinijia cua patanura quia samaritiu nujuataja. ⁶ Quiaari maniniajuhua, sacuaratia casa Nicolás niishitio-josano tojjia miishano sooja quia quiniucua. Janitari cuno pojori miishano soyajuhua. Nio cua sequesano quiajanitari, cunoori puetunu cua pueyarajanaa. ⁷ Cante numaacani, nojori cuara tojiri Pueyaso Sohanu sequesano Pueyaso pueya maapuera. Pueyaso quishaqui, samiitianijia naanaari nujuataa. Cante puetunu sesa casaajanaa nujuataja cumatiani, janitari nojori jiyatenutaniya cuno naanajinijia miojuarani, pueyaracaanu rishijia nojori quiniuria”.

Esmirna tiacajinia quiniaa Pueyaso pueya maanuucuaru naajione

⁸ Jiyaniijia Jesucristoori naa cua sequerejuhua:

—Esmirna tiacajinia quijia cua seruucuaru quia naajiore, Pueyaso pueya maanu jitianani. Naa quia sequere nojuaja: “Naa sequerari cante puetunu casaajanaa coteetenacuajani, na tucuatani. Nojuacua-jaari cusoquiaari, na nuhuaji samiitiaquiaarihuari. Janiyacuajaari nojuajani. ⁹ ‘Janiyacuajaari niishiyani, quiaari naquiya miishaquiaa. Quiaari casamiijujuhua. Naajaa, quiaari jiyanojua casamiriacuaja nia cua shuriucuanu. Janitari niishiyajuhua, cuno Judiocuacari quia sesacquiaa. Nojoriiri tama sequeriquiaajacuaja nojoriniari Pueyaso pueya cutara, Judiocuaca nojori quiniucua. Maja naatej. Nojori cutaraari Satanás pueya maanu. Satanásacuajaari samaruhua jiyaniijia. ¹⁰ Quiaari naquiya miishaanutaniya. Naajaa, majaari puerenu. Satanásri noojiaqueya nijaniyajinijinio nujuatejotenutaniya nujuatejojuajinia nia sanishaanura, niaate cucua tiuujia seetanujuaanaa. Naajaa, niaari saaja rupaquijia miishaanutaniya naquiya. Quia rejere-tariquia saaja. Cua tojjia quia quiriquia pueyaracaanu, quiaa cuara

shaajeyarejaatijia. Quiaa jaara naa miiritij, janiyari quia jiyatenu-taniya jiyanoehua shuquiriaatia quijia quia quiniuria pueyaracaanuni. Nio cua sequesano quiajaniyani, cunoori puetunu cua pueyarajanaa. ¹¹ Cante numaaracani, nojori cuaara tojiiria Pueyaso Sohuanu sequesano Pueyaso pueya maapuera. Cante cucua na tiuuniucua naquiya na miishaanu rejeretaja pueyaracaanuni, nojuaja cutaraari maja quenaaja naquiya na miishaanu quiniutianiya Pueyaso saniitosacari na ruuretajaca. Na ruuretajaca cutaraari quejoosaanutaniya mani noshijia caminiajiniá' ”.

Pérgamo tiacajinia quiniaa Pueyaso pueya maanuucuaa naajione

¹² Jiyaniijia Jesucristoori socua cua sequeree:

—Pérgamo tiacajinia quijia cua seruucuaa quia naajiorejuhuaj, Pueyaso pueya maanu jiiitianani. Naa quia sequere nojuaja: “Nijinia-quetucuaaja mueruu jiiitianaari naa sequeya: ¹³ Janiyari niishiyani, cunoo tiaca quiaa tii quiyani, cunoori Satanás quiquiojuhuaj. Naajaa, quiaari cua tojijia quiquiaa. Majaari cucua quia tiuuniujiniji quia seetanu quiquiaa. Cua seru Antipas cutaraari mosaaquiaari janiyajiniji pohu-atanu na tarinitiaaquiniucua, cuniqui nia tajinia Satanás quishaquini. Naajaa, majaari quenaaja jiyacari quia seetanu quiquiaari cucuaji. Puetunu naa quia miishanojuanaari jiyanoehua maninia. ¹⁴ Saniniuujia, maja cutaraari nio cua maniniucuanu: tamasa niajaniyajinijinioori maja na tarinitianu paniniu sesa na miijionu. Nojoriiri supuetana Balaam niishitiojosano tojijiaa quiyajaa. Balaamcuajaari Israel pueya paraca Balac niishitiojoquiaari na pueya cuaara shiniuuiuuria Israel pueya, jaarajaaja Israel pueya miiniuria sesa nojoritia. Naaratej, Balac pueyari Israel pueya mianuutequiaari noo shu, teyanote juaashiquiata shipinijiosano casaacuaa puecoosano quiquiaaricujajani juhua Pueya-soocuaa. Naa sacuaraatia nojori queranacujusacari nojori paraatatej, Israel pueyari cuniquijia cunoo taatujuri numuetucujuquiaarijuhuaj. ¹⁵ Naajuhuj, majaari nio cua maniniucuanu: noojiaqueya niajaniyajinijinioori maja na tarinitianu paniniu jiyanoehua sacuaraatia casaa Nicolás niishitiojosano. ¹⁶ Quiaari nareja niquiquiaa sacuaraatia nojori miijionu. Cunora, quioojia quia tacatorohua cucua, janiya mariqui quiocua quiaareeri cunoo sacuaraatia miijiaa cua miaquejonura cua rupaamaji mueranacujua mueruuta. ¹⁷ Cante numaaracani, nojori cuaara tojiiria Pueyaso Sohuanu sequesano Pueyaso pueya maapuera. Cante tama na cuaqueya miiniu panishanojuaja rejetejani, janiyari na mianuutenutaniya jiyocuaaanu cua racatasano cua pueyarano cua riuriotacajinijini. Janiyari na niqutionutaniya cohuajajau saajiajuhuaj, teyanocua quiarinio sesa naajiotasano quiniutianiyacujajani. Majaari tamonu niishiniu quiniutianiya cunoo sesa. Saaja na camaruuri na niishiniutianiya, cana cua niqutionutaniya cunoo saajiacujajani' ”.

Tiyatira tiacajinia quiniaa Pueyaso pueya maanuucuaa naajione

¹⁸ Jiyaniijia Jesucristoori socua cua pacuterohua sequenuhuaj:

—Tiyatira tiacajinia quijia cua seruucuaa quia naajiore, Pueyaso pueya maanu jiiitianani. Naa quia sequere nojuaja: “Pueyaso Niyanu, juhua mani rimianacuyano namijiaaracani, juhua bronze mohuquis-hano shacantuca nihuacaracajuhuj, nojuajaari naa quia sequeya: ¹⁹ Janiyari puetunu quia miishanojuanaa niishiyani. Janiyacujajari

niishiyani, quiaari Pueyaso panijia, pueya panijiano. Quiaacuajaari Pueyasocua tiuujia. Quiaari maninia poonijiona Pueyasora, pueya quia naacunura. Naajuhuaaj, quiaari juhuajaniya rejeretaquiaa quiaa jaara taraatia miishaariquia. Janiyari niishiyajuhuaaj, puetunujuanaa quia miishano quiria quiarijiani, cunoori socua queraatia coteenu quia miishanojiniji. ²⁰ Saniniuujia, nio cutaraari cua maniniucuaaquishano: cuno Jesabel niaata quiyani, tama na cuaqueyajaaja sequequiaani, nojuajanaari Pueyaso sequesano caminiujiunia pueyara. Quiaari juhua-janiya na shanacquiaa saaja, sacuaraatia na niishitiojosanota na saponura cua pueya. Naa sacuaraatia na niishitiojosanotatej, cuno maajiiri cua pueya shiniuuiuquiaa juhuajaniya nojori numuetucujunura na camishoo maajipohua. Cua pueya shiniuuiuquiaajaariuhuaaj nojori miaquenuunura noo shu, teyanote juaashiquiacata shipinijosano tau-cuaca pueyasohuacuara puecoosano quiquiaacuajani. ²¹ Janiyacuajaari tari cuno maaji sashiquianu juucuanu, noojia na tacatonura cucua. Majaari na tarinitianu paniniu paanatu na quiniu. ²² Cunora, cua tojiri. Cua saniitionura nojuaja, janiyari na cusotenutaniyani na maquetujinia na matanura. Naajuhuaaj, na numuetucunujuaca jaara noojia tacatoyaquiri sesa nojori miiniuujiniiji, janiyari jiyanoehua naquiya miiniutianiya nojorini. ²³ Noo maajipohuaajuhuaaj, paanatuririria quini-ioni, cuno paanatujuanaa niishitiojonuucua nojori juhua necojorini, janiyari puetunu nojorijianaa puecoonutaniyani. Naacuajitij, puetunu Pueyaso pueya maapuejanaari niishiniutianiya, janiyari puetunu nojori jiuujiajiniajanaa nojori niishiriojosano niishijiani, nojori panishanoocua nojori jiaatianunio. Naacuajitij, janiyari maninia miijiaca nijaniyajinijinio maninia miiniutianiyani. Nijaniyajinijinio sesa miijiaca saniniuujia, nojoriiri saniitiosaanutaniyacujua. ²⁴ Tiyatira tiacajinia quiniaa noojiaqueya nijaniyajinijinio saniniuujia, niaari sacuaraatia cuno maaji niishitiojosano ruuretaquiaa saaja. Naajuhuaaj, majaari nia niishiniu paniniu quijia cuno sacuaraatia casaa jiyasohuaja niishishano, sacuaraatia miijiaca jiyaniquishanoni “jiyajeneta casaa, Satanásjiniji niishishano”. Naa nia ruuretanuucua puetunu cuno sesa niishitiojosanojuanaani, cunoori maniniacuaja. Cunora, majaari socua cua nacasunu quiarijia nijaniya. ²⁵ Saaja tama nia cuaqueyajaaja nia cojuare jiyanoehua, maja nia tarinitianura maninia nia miiniu taa nia miiquiaacuajani. Naa nia miiriquia pueyaracaanu, janiya jaara niaacua tiuquiriohuajaatijia. ²⁶ Cante cua panishano miiquiaa pueyaracaanuni cuara shaajeyarejaatijia, janiyari cuno pueyano jiyatenutaniya tamasa pueyapue jiyaniijia na quiniuriani, taa cua Que jiyatequiaari janiya jiyaniijia cua quiniuriacaani. ²⁷ Jiyaniijianuacuara cua jiyatesano pueyani, nojoriiri cumaacaraca quiniutianiya na jiiitiasano pueya na tojitiniuria nojuaja. Na tojtiaashijiaca na saniitiosacari saniniuujia, nojori piyonutaniya jacanauraari, juhua cumamacata pishano conatu. ²⁸ Naajuhuaaj, janiyari joojea na niqutionutaniyani, juhuaquetaja rijiani, shacantuuca quijia na quiniuria juhua janiyajuhuaaj. ²⁹ Cante numaacani, nojuaja cuara tojiiria Pueyaso Sohuanu sequesano puetunu Pueyaso pueya maapuerajanaa’ ”.

3

Sardis tiacajinia quiniaa Pueyaso pueya maanuucuaru naajione

1 Jiyaniijia Jesucristoori socua cua sequeree:

—Sardis tiacajinia quijia cua seruucua quia naajiorejuhuaj, Pueyaso pueya maanu jiitianani. Naa quia sequere nojuaja: “Naa sequeyari cante Pueyaso Sohuanu jiyaramiquiquiaa cuno siete Pueyaso pueya maapueecuacujani, nojori jiuujiajinia na poonijionura. Nojuacuajaari cuno siete Pueyaso pueya maapue jiitianaa Jiitianajanaa. Janiyacuajaari cunoni. ‘Janiyari puetunu quia miishanojuanaa niishiyani. Pueyari quia jiyaniya quiaari saminio. Janiya cutaraari niishiyani quiaari juhua macu. ² ¡Quia maquenu quia jatara! ¡Suteja quia quiri! Quia cumaquiri noo pojori canapuate jatarinitiaja rishiyajaani. Quera cusonuyari. Janiyari Pueyasora quia miishano niquiquiaani. Majaari maninia na quiniu cua Pueyasora. ³ Quiaacuajaari maninia niishitiojosaaquiaari Pueyaso rupaa. Taa quia niishitiojosaaquiaaricujani, cuno quia niishiriohua. Quioojia quia tacatorohua Pueyasocua, seetanujuanaa na rupaa tojijia quia quiniuria. Quiaa jaara suteja quiniu paniaquiri, janiyari canashiyaquiji quiocua niniutianiya juhua nohuasejojuani, quia jyanishacari maja naasucua juhuanajuaja cua tiuquiniu quiniutianihua. ⁴ Quia jiitiasano pueyajinijinio cuniqui Sardis tiacajiniani, secaja nojorijinijinioori sesa miiniu ruuretajaca saaja. Naa sesa miiniuria nojori na cojiyaquiniuucuatej, nojoriiri juhua curu-ushojiyaquishano janiyara. Naaratej, janiyari nojori cushiyotenutaniya cohuajaqueya toqueni, cuata nojori rucanejonura, cua rupuenaa nojori quiniuucua. Cunoori seetanujuanaa sesa miiniu ruuretajaca nojori quiniuucua, cucua tiuujiaja nojori quishacari. ⁵ Canapuate naa sesa miiniu ruuretajacani cua tojitiaja nojori quiniuucua, nojoriiri naa cohuajaqueya toqueya cushiyotesocoriquianojuhuaj. Cunoori quiniutianiya tojetaarucujanaa sesa miyashijiacara cua jiyatesacari nojori. Naajuhuj, majaari cua tuujunu quiniutianiya nojori sesaca cua naajioneejiniji, tee cuniqui pueyaracaanu rishijiacarano cua saquiriojosano pueya sesaca naajiotasano quiyacuajani. Naajuhuj, janiyari nojori jaatianutaniya cua Queecuan, na seya tacojirianio, cua sequenura nojoriiri cua timitiasano pueyaniyojua. ⁶ Cunora, cante numaacani, nojuaja cuara tojiiria Pueyaso Sohuanu sequesano Pueyaso pueya maapuera’ ”.

Filadelfia tiacajinia quiniaa Pueyaso pueya maanuucua naajionee

7 Jiyaniijia Jesucristoori socua cua sequeree:

—Filadelfia tiacajinia quijia cua seruucua quia naajiorejuhuaj, Pueyaso pueya maanu jiitianani. Naa quia sequere nojuaja: “Cua tojiri. Janiyacuajaari tojetaarucujanaa maninia miijiani, cua Que tojijia cua quiniuucua. Puetunu cua sequesanojuanaari seetanujuanaa. Jiyaniijia-janaa cua quiniuucua cua supuetana David niti, janiyari cua Que tiootiu riatataja jiitianani, cua saquiriojosano pueya cua tiuquinitianura cua Queecua. Janiya jaara cuno tiootiu riatarani, tamonuuri maja na naata na tionuhua. Janiya jaara na tioreni, majaari quenaaja tamonu na naata na riatanuhua. ⁸ Janiyari puetunu quia miishanojuanaa niishiyani. Naajuhuj, janiyacuaajaari juhua tiootiu riatarucuaa quiocujani, cua rupaa quia poojotanura. Naacuajitij, tamasaari maja na naata tenujunu quiajaniya. Quiaacuajaari saaja secaja cumaacaraca. Naajaa, quiaari cua rootasano tojijiacuaja. Naajuhuj, majaari cua soojeaca

pueya niquiara quia tamacanu quiqianu janiya. ⁹ Naa maninia quia miiniuucua janiyaracuaatej, janiyari naa maninia miiniutianiya quiarajuhuj. Janiyari noojiaqueya Satanás pueya maanujinijinio mojoquetanijionutaniya quiocuarani. Cuno pojoriiri tama na cuaqueyajaaja sequeja, nojoriniari seetanujuanaa Pueyaso pueya, Judiocuaca nojori quiniuucua. Naa nojori sequesacaritij, nojoriiri sapojonuya. Nojoriiri maja Pueyaso pueya. Nojori cutaraari niishiniutianiya janiyari quia panijia cutarani. Quiaacuajaari Pueyaso pueyano, cucua tiuujia quia quiniuucua. ¹⁰ Janiyari quia sequequiaarini maja quia tarinitianura quiria poonijionu, quiaa jaara naquiya miishaariquia. Quiaari seetanujuanaa naa miiquianu. Naaratej, Pueyaso saniniujiushacari puetunu mijiria quiniaajanaa puereeta naquiya na miiniutia nojori, janiyacuaajaari jiyacari nia cojuanutaniyani. ¹¹ Quia niishiri: janiyari quera tiuquihuani. Majaari quia tarinitianu cua rupaa tojiniu, quiaa mariqui sapojosaareeri cucuaji quia rupatenura. Naacujitij, quiaa jaara cucuaji catere, majaari Pueyaso niqutionu quiniutianiya quiarano na racatasano. ¹² Cante sesa miiniu samiritiaja saajani, cua rupaa tojjia na quiniuucua, janiyari jiyocuacaanu Pueyaso Secojojua tiajinia na nujuatenutaniya juhua morijiuni Pueyaso quishaquijianaa, tii cua Que Pueyaso na shuquiritianura pueyaracaanu. Majaari socua cuniquiji na pootiosaanu quiniutianiya. Naajuhuj, janiyari cuno pueyanocua naajiotanutaniya cua Que Pueyaso sesani, quiarinio cua sesajuhuj, cua Que Pueyaso tiaca sesanio. Cuno tiacacuajaari quiarinio Jerusalén tiaca, jiyocuacaanuji roshinitiasariquiano. ¹³ Cante numaacarani, nojuaja cuaara tojiiria Pueyaso Sohuanu sequesano Pueyaso pueya maapuera”.

Laodicea tiacajinia quiniaa Pueyaso pueya maanuucuaara naajione

¹⁴ Jiyaniijia Jesucristoori socua naa cua sequere:

—Laodicea tiacajinia quijia cua seruucuaara quia naajiorejuhuaj, Pueyaso pueya maanu jitianani. Naa quia sequere nojuaja: “Cua tojiri. Naa sequeyari noo pueyano cana sequesano seetanu rupajanaacuajani. Puetunu na caminiujiushanojuanaa Pueyasojiniji quiarani, cunoori seetanujuanaa. Pueyasoori na shipinitiquiaari puetunu na shipinishano casaajanaa. Cunocuaajaari janiya. Cunora, cua tojiri. ¹⁵ Janiyari puetunu quia miishanojuanaa niishiyani. Quiaari najuhuaa quijia, quia miyaquiniuucua cua sequesano. Seetanujanaa cua tojiyaquiniu panijia quia quishacari, maara socua maninia quiquiaari cutara maja quia niishiniuria janiya. ¹⁶ Quiaa jaara cua niishiyashijia quiriquia, janiya maara quiocua taraajereni. Saniniuujia, quiaa jaara seetanujuanaa cua tojjia quiriquia, janiya maara quia timitiaren. Saniniuujia, najuhuaa cua pueyano quia quiniuucua, janiyari quia soyani. Naa quia quiniuucuatej, janiyari quera quia saniitioyani. ¹⁷ Quiaari tama sequequiaajaacujua: ‘Janiyari casamiriacani. Janiyari puetunu cua panishanojuanaa jitiaani maninia miijia cua quiniuucua’. Maja cutaraari quia niishiniu quioojiaari cusosu. Janiyara, quiaari tojetaarucujanaa casamiiju, cariyjuaru, juhuasunio. Quiaa jaara na niishiriquia, quiaa maara tama quia cuaqueyajaaja taraajetaja quiriquia. ¹⁸ Cunora, janiyari quia numooteyani moseeca pueyanonaa, cua rupaa tojjia quia quiri, seetanujuanaa casamiriaca quia quiniuria. Naajuhuj, maninia miijia quia quiriquia cua cushitiniuria quiajaniya cohuajaque toque, maja cararaatia quia quiniuria juhuasu. Naajuhuj,

cua niishitiaja quia masere cutara, quioojia namijia riatenura, seetanujuanaa maninia niquijia quia quiniuria. ¹⁹ Janiyari puetunu cua panishano pueyajanaa nacasujuani, nojori saniitiojuajuhuj. Cunora, quioojia quia tacatore cucua. Tama quioojiaaja quia shiniujiurijihuhuj shamaatia cua tojjia quia quiniuria. ²⁰ Cua tojiri. Janiyari quioojia tiotuijiniji jiiquoonuujiyani. Cante cua tojiyani, nojuaja cuaara na tiotiu riataara cucuaji. Janiyacua nocua tiuquiumiani, nata cua mi-aquenura, shuquiriaatia cua pocoojonura nata. ²¹ Janiyari cua Paraca shocotaquiaarini cua Que tojjia cua quiniucua. Naaratej, cua Queeri cua cajitiquiaari na shuriucua, Jiyaniijajanaa cajituijinia. Naajuhuj, janiyari Sesaaca shocotajaca cajitijionutaniya cua shuriucua, jiyani-ijianucua nojori quiniurijuhuj. ²² Cante numaaracani, nojuaja cuaara tojiiria Pueyaso Sohuanu sequesano Pueyaso pueya maapuera' ”.

4

Juan niquishacari Jiyocuacaanu Quijiaari maniniuhuaqueetasariquiaa

¹ Na nuhuaji, janiyari mauquiaarini. Janiyari saaja jiya cajiniocua tiotiu niquiquiaari riatasanoni. Shushajanaa cua tojishano rupaa juhua trompeta jonenenuni, cuno rupaaajaari cua pacutequiaariuhua sequenu. Naa cua sequereeri:

—Miji quia tacama. Janiyari quia niquitiniutianiyani taa nio pa quishacari nuhuaji mijiria quiniaa miishaanutaniyani.

² Jiyacaritij, Pueyaso Sohuanuuri cucua niquiaari. Cua sohuanu tacaniquiaari jiyocuacaanuuri. Janiyari jiyacari Jiyaniijajanaa cajituu niquiriini. Pueyanoori tii cajiriquiaa. ³ Nojuajaari shanohua niquishano quiriquiaa, jyanohua shacantuuca juhua jasp saajia, jyanohua naatucajuhuaj, juhua cornalina saajia. Naashiiri na cajituu caco nujuariquiaa. Jyanohua shacantuuca quiriquiaari neeruucua, pocojuanaque juhua esmeralda saajia. ⁴ Janiyari socua veinticuatro cajituu niquirii Jiyaniijajanaa cajituu shocuani. Tii cajituriquiaari veinticuatro niishijiaa jiyaniijianucua. Cohuajaque toqueya cushiyonuuriquiaari, orojiniji shipinijosano nacaqueyano. ⁵ Jiyaniijajanaa cajituijiniji, micanaari nunujuriquiaa. Jyanohua majacuriquiaajaariuhuj. Jiyaniijajanaa cajituu tacoji, tii noshiquoriquiaari siete samari. Cunocuaajaari siete Pueyaso Sohuanu, puetunu tiqiyocujanaa quijia na quiniucua. ⁶ Jiyaniijajanaa cajituu tacoji, juhua jyanohua puereetucua caminaari quiriquiaajuhuj, juhua cohuaja motiiquio maatia niquishiyari na tamajiria.

Jiyaniijajanaa cajishaqui, cuatro saminio casaari quiriquiaajuhuj, puetunu na shocujanaa. Nojoriiri jyanohua queraatia namijiaaraca quiriquiaa, na jiriquiaacumaji, na nijiniaacumajinio. ⁷ Cuno cuatro saminiucua casaari tamaatia niquishano quiriquiaa tamonujiniji. Niquiriyatuuri juhua juuru sare niquishano quiriquiaa. Tamonuuri juhua seru juunu caya niquishano quiriquiaa. Tamonu casaa jiquiocoori juhua pueyano jiquioco niquishano quiriquiaa. Tamonuuri juhua surohua miooru jaano niquishaariquiaacujua. ⁸ Puetunu cuno cuatro saminio casaajanaari seis nesuharaca quiriquiaa. Puetunu nojori cuaqueyacumajanaa quiriquiaari na namijiaa, nocuaji na niquitiaja, na nijiniara na niquitiajano. Nojoriiri pueyaracaanu Pueyaso

maniniuhuaqueetariquiaa, juuca, niucuanio. Majaari nojori tarinitianu quiriquiaa naa na sequetunu:

—Jiyaniijiajanaanaa, quiaari saa maniniaja, jiyanohua maninia, tojetaarucujajanaa maninia miijia! Quiaacuajaari Pueyaso, puetunu cumaacaracajanaa. Quiaari quijiajuhanajaj. Majaari quia supueni quiquiaari. Quiaari quia pueyacua tacateriquianohua.

⁹ Cuno cuatro saminio casaari naa pueyaracaanu maniniuhuaqueetariquiaa Jiyaniijiajanaa, na cajitiujinia cajiyano, pueyaracaanu Jiyaniijiajanaa quiriquiano na quiniuucua. ¹⁰ Naa pueyaracaanu cuno cuatro saminio casaa timitiasacari Jiyaniijiajanaacuaatej, cuno veinticuatro niishijiaca jiyaniijianucuaari jaarajaaja mojoquetacoquequiaa Jiyaniijiajanaacuara. Nojoriiri na tuhuajaa jartaqueequiaa Jiyaniijiajanaa cajitiu pajama, naa na sequenuta:

¹¹ —Nioori quiara, Jiyaniijianaa. Quiaa cutaraari Jiyaniijiajanaa, maja canaa. Quiaacuajaari canaa Pueyaso. Quiaa cuaara timitiasaaria pueyaracaanu, jiyanohua maninia shacantuuca quijia quia quiniuucua, puetunu cumaacaracajanaa quia quiniuucujahuaj. Quiaacuajaari puetunu casaajanaa shipiniquiaari. Tama quia paniniuucujaja, quiaari na shipiniquiaari.

5

Rupanacujusano naajioneejiniji pahuatasano, Borrego Niquiojuajinjino

¹ Na nuhuaji, janiyari Jiyaniijiajanaa cajitiujinia cajinia juaashiquiajinia niquirii naajioneeni. Na miaquetajara na cacariquiaari. Cuno tucuanee naajioneeri jiuniososano quiriquiaa. Naajioori nocua quiriquiaa, na nijinia, na jiniacumano. Cuno naajioneejinia, siete naajioori tii naajiotasano quiriquiaa. Cuno siete naajio coteejajiniani, juhua roshitia rupanacujutasanoori quiriquiaa. ² Jiyacaritij, janiyari jiyanohua cumaacaraca Pueyaso seru niquiriini. Naa nequesoreeriquiaari jiyanohua na nacanuta:

—¿Cante seetanujuanaa maninia miijia cutarani? Cuno cuaara rupartaara rupanacutasano, na riatanura cuno naajionee.

³ Jiyacaritij, majaari quenaaja maninia miijia quiniu quiquiaari jiyocuacaanu, jiyajinia, jiya cariquimiano na riatanura cuno jiuniososano naajionee. Tojetaarucujajanaa shaaqui quiquiaariiri cuno naajionee serojoriquiano. ⁴ Naaratej, janiyari jiyanohua nujuqueriquiaani, tojetaarucujajanaa shaaqui maninia miijia quiaquiniuucua cuno naajio na riatanura, na serojonurano. ⁵ Cua nujuquesacari, tamonu cuno veinticuatro niishijiaca jiyaniijianucujinijinoori cua sequeree:

—Maja nujuquenu. Quia cumantare. Quia niquiri. Pa Jiyaniijiajanaacuajaari jiyanohua cumaacaraca. Tariucuacaanu Pueyaso Rupaa-jinia, nojuacuajaari miriqui sequeshiya Juurunu sareta, Judá niquiohuacuajinio supueriquiano, Jiyaniijiajanaa na quiniuria na supuetana David niti. Nojuacuajaari pa paraca Satanás shocotana, tojetaarucujajanaa Jiyaniijia Pueyaso tojjia na quiniuucua. Naaratej, nojuaja na naata cuno siete naajio coteeja rupanacujutasano rupareetanu na serojosocoriquiano.

⁶ Jiyacaritij, janiyari Borrego Niquiojua niquiriini Jiyaniijiajanaa cajitiu tacoji nujuaano, cuno cuatro saminio casaa tajiniano. Cuno

veinticuatro niishijiaca jiyaniijianucuaari na shocua quiriquiaajuhuaaj. Borrego Niquiojuaari seetanujuanaa juhua mosano samiitanohua niquishaariquiaa. Nojuajaari siete jiyaniijia tuhuaajaraca quiriquiaa, puetunu cumaacaracajanaa na quiniuucua. Naajuhuaaj, siete namijiaaraca quiriquiaari. Cuno na siete namijiaani, cucocuaajaari Pueyaso Sohuanu, Pueyaso jiyaramiquishano puetunu mijirijajanaa. ⁷ Cua niquishacari, Borrego Niquiojuaari Jiyaniijiajanaa cajitiujinia cajiyano juaashiquiajiniji jiuniocosano naajionee masetaree. ⁸ Nojuaja jaara cuno naajionee cacariquiaa tari, cuno cuatro saminio casaari nocuara mojuquetacoquiaari, cuno veinticuatro niishijiaca jiyaniijianucuanio. Puetunu nojorijianaari taquiniojosano casaa jiitariquiaa. Naajuhuaaj, orojiniji shipinijosano suhuococua mueetacoriquiaari, mishaja shanohua jaanutajata. Nojori mueetacosano shanohua jaanutajani, cunoori nio jiyajiniji Pueyaso muerasu secjonuusano Pueyaso. ⁹ Nojoriiri Borrego Niquiojuaa jaaquejotariquiaa nio quiarinio jaaquejijosano:

—Saaja quiajanitari seetanujuanaa maninia miijia. Naaratej, quia naata cuno naajionee patanu quia rupareetanura na rupanacujusano. Quiaari jiyanojuaa maninia. Naaratej, quiaari jiyajinia quiniaacuara mosaaquiaari. Quiaari quia nanacata pueya masequiaari Pueyasora puetunu tamaatiuucua pueyapuejinijiniojuanaa, puetunu tamaatia rupaa pocuajacajinijiniojuanaa, puetunu tiacajinijiniojuanaajuhuaaj, puetunu jiyacajinijiniojuanaano. ¹⁰ Quiaari nojori jiyatequiaari tama quia pueyarajaaja, puetunu nojorijianaa quiniuria jiyaniijianucua, pueyacuara secjonaa, pueyaracaanu nojori maniniuhuaqueetanura pa Pueyaso. Nojoriiri jiyacua jiyaniijianucua quiriquianojuhuaaj.

¹¹ Na nuhuaji janiyari tojetaarucujanaa jiyanojuaa jiyanojuaa queraatia Pueyaso seya niquiriini. Jiyaniijiajanaa cajitiu shocua mariquiaari, cuno cuatro saminio casaa shocuaajuhuaaj, niishijiaca jiyaniijianucua shocuanio. Nojoriiri jiyanojuaa queraatia quiquiaari, juhua jaaquia, serojiaquishoo. Janiyari nojori tojiri pa Jiyaniijia Jesu maniniuhuaqueetaanoni. ¹² Nojoriiri naa na sequeturiquiaa na nacanuta:

—¡Pa Jiyaniijiaari jiyanojuaa maninia! Pueyacuara mosaaquiaariiri juhua borrego niquiojua. Naaratej, saaja nojuaja cuaara quiriia Jiyaniijiajanaa pueyaracaanura. Saaja nojuaja cuaara jiitiaara puetunu casamijianaa. Saaja nojuajaari tojetaarucujanaa niishijia. Nojuajaari puetunu cumaacaracajanaa. Cuaara naa quiriia pueyaracaanutej. Puetunu quijiaca casaajanaa cuaara tojitiaara pa Jiyaniijia. Saaja nojuaja cuaara quiriia jiyanojuaa timitiasano. Puetunu quijiacajanaa cuaara na maniniuhuaqueetaara.

¹³ Naajuhuaaj, janiyari puetunu Pueyaso shipinishano saminio casaajanaa tojiriini, jiyocuaaanu quijiaca, jiyajinia quijiaca, jiya cariquimia quijiacajuhuaaj, shoniniacu caminiajinia quijiacanio. Puetunu nojorijianaari jiyanojuaa na timiniutia sequeturiquiaa:

—¡Cuno, na shacantuca cumaacajinia cajiyani, Borrego Niquiojuanio, nojori cuaara maniniuhuaqueetasaaria pueyaracaanu! ¡Puetunu casaajanaa cuaara tojitiaara nojori pueyaracaanu! ¡Nojori cuaara timitiasariajuhuaaj! ¡Saa nojorijia cuaara na cumaaca jiitiaara pueyaracaanura!

14 Jiyacaritij, cuno cuatro saminio casaari nojori riuhaneriquiaa saniniuujia:

—¡Taaquiririnij! ¡Cuaara naa quiiriatej!

Cuno veinticuatro niishijaca jiyaniijianucuaari saniniuujia mojuquetacoquecujua cuno pueyaracaanu Quijiacaacuara, nojori na shuquiritianura.

6

Jiuniocosano naajioneecua seis rupanacujutasano rupareetasacari

¹ Na nuhuaji, cua shootiasacari, Borrego Niquiojuaari coteenujanaa cuno naajioneejinia rupanacutasano rupartaree. Naa miiriiri cua niq-uitishaanura taa mijiria quiniaa miishaanutaniya jiyanohua naquiyani, quera nio jiya puequesacari. Jiyacaritij, janiyari tamonu cuno cuatro saminio casaajinijinio tojirii sequeyanoni: “¡Miji!”. Na pocuanuuri juhua miacana majanu tojishano quiriquiaa. ² Naa na sequesacaritij, janiyari cohuajohuana caballo niquirii nocua canujiyanoni. Na nijinia cajiniaari balista cacariquiaa. Jiyacaritij, jiyaniijiaara shipinishano nacaque cushitishaareeri. Na nuhuaji, na caballoori na netetaaree jiyocua na quianura, tii na miquejonura Pueyaso paraa. Majaari quenaaja na nujuatasaanu quiniutianiya.

³ Na nuhuaji, Borrego Niquiojuaari segundo rupanacutasano rupartaree. Janiyari jiyacari segundo saminio casaajinijinio tojirii sequeyanoni: “¡Miji!” ⁴ Naa na sequesacaritij, naatuhuana caballoori nocua canujumaa. Na nijinia cajiniaari cumaaca niqutiosaare. Naacuajitij, nojuajaari mijiria quijiaca tojetenutaniya tama nojori miaquetojonurajaaja. Cunora, nojuajaari puereetunee nijiniaquetucujaja mueruu niqutiosaree.

⁵ Na nuhuaji, Borrego Niquiojuaari tercero rupanacutasano rupartaree. Janiyari jiyacari tercero cuno saminio casaajinijinio tojirii sequeyanoni: “¡Miji!” Jiyacaritij, janiyari mueruhuana caballo niquirii nocua canujiyanoni. Na nijinia cajiniaari niiquia shanacujutaja jaasutetariquiaa, mijiria quiniaara miajajau shanacujusaanura nojori serotasaanura. ⁶ Jiyacaritij, janiyari cuno cuatro saminio casaajinijini rupaa tojirii naa sequeyanoni:

—Niquiriyatu juuca poonijionu sami, cuaara niqutiosaaria saaja niquiriyatu kilo trigo jajau. Jaara trigo jajau paniyaquiri, cuaara niqutiosaaria tres kilo cebada jajau. Saniniuujia, majaari shiyocua shanacujunu cutara, vinonio. Cunocujajaari queraatia quiniutianiya cutara.

⁷ Na nuhuaji, Borrego Niquiojuaari cuarto rupanacutasano rupartaree. Jiyacaritij, janiyari cuarto saminio casaajinijini naa sequeyanoni: “¡Miji!” ⁸ Janiyari jiyacari tiirihuana caballo niquirii nocua canujiyanoni. Na nijinia cajinia sesaari quiriquiaa “Cusojuana”. Macunucua Quiquoori na neteyotariquiaa, Cusojuana puecoosano na rijionura na miitiascoriquiano. Nojoriiri cumaaca niqutiosaaree jiyanohua queraatia pueya na cusojuanura. Naacuajitij, jiyanohua queraatia pueyari puecoosaanutaniya miaquetojosacari. Tamasacaari cusonuunutaniya jiyanohua miaajesacari. Tamasacaari paaqueja cusonu cusonuutanutaniya. Naajuhuj, tamasaari sarea sootesaanutaniya. Sacocua satejosaanutaniyajaarihuaj. Naacuajitij, jiyanohua jiyanohua queraatia pueyari cusojuasaanutaniya. Na nuhuaji, puetunu macunucujanaa

jaara serojosaare, puetunu nojorijianaari na cajiniocua quiniutianiya puetunu mijiria quijiaca pueya cajiniocujajinijinojuanaa.

⁹ Na nuhuaji, Borrego Niquiojuaari quinto rupanacutasano rupartaree. Jiyacaritij, janiyari Pueyasoocuaa catijiasaqi juhuacutu cariquiaco niquirii Pueyaso pueya sohanuhuani, noo pojori canapueete puecoosaquiaaricujani Pueyaso Rupaa tojijiaca nojori quiniuucua, Jesucristojiniji nojori pohuatanuucujuhuj. ¹⁰ Jiyacaritij, nojoriiri naa jiyanhua nacaree:

—¡Jiyaniijianaa! ¡Quiaari saa maniniaja! Quiaari quia sequesano miijia seetanujuanaa. ¿Taa quia tarishiniutianiyajaara canaa puecoonaa quia nequesoreenurani, nojori quia naminiuria canacua saniniuuja?

¹¹ Jiyacaritij, puetunu nojorijianaari cohuajaque toqueya niquitiosaaaree. Nojoriiri naa sequesaaaree:

—Socua rupaquijia nia samaaterejaara, Pueyaso saquiriojosano niarta Pueyaso pueyajinijinio cuara puecoosaaria nia shirijaatijia, taa nia puecoosaquiaaricuaani.

¹² Na nuhuaji, Borrego Niquiojuaari sexto rupanacutasano rupartaree. Jiyacaritij, rijiaari jiya jiuuquiujutiaree jiyanhua. Janiyari na niquiriquiaani. Pananuuri mueruucara quiquii juhua muerunque toque. Racaari naatuucara quiquii juhua nanaca. ¹³ Riyari jiya cajiniocujaji toteree jiyocua, taa satuna totequiaa jiyanhua paratucaricuaani. ¹⁴ Jiya cajiniocuaari shaajequeejuhuj, juhua tucuanee naajioneeri jiunio-cosaaree. Shoniacu caminiajina, puetunu jiya tucuaatiajajanaa, puetunu tuhuananuhajuhuj, puetunu cunोजनाari jiyajeetaquee na nujuatusaqui. ¹⁵ Nojori puerenuta, mijiria jiyaniijianucuaari raacajinia jamaatiushii, sai tajinia tuhuananuhajajinijuhuj. Naa jamaatiushiiijaariuhua noo pojori: pueyacia paaretajaca na cumaacatej, soldadohua jiyaniijianucua, jiyanhua casamiriaca pueya, pueya tojishano pueya, poonitijosano pueyajuhuj, puetunu narta pueyajanaano. Puetunu pueyajanaari naa mashiriquiaa juucua. ¹⁶ Nojoriiri tuhuananuhua sequeriquiaa, sainio:

—¡Canaacia nia tiyare canaa nia jamonura cunooquaji, na cajitiujinia cajiya na shacantuuca cumaacajiniani! ¡Canaa nia jamojore maja na niqiara canaa quiniuria, naajuhuj, maja Borrego Niquiojua sanitionura canaa, jiyanhua na juaashacari! ¹⁷ Quiarijiacuajaari Pueyaso sanitionu juuca. Jiyanhua puereeta. ¿Cante na naata na nujuatanuni? Shaaqui.

7

Pueyaso saquiriojosano pueyajiniji pohuatasano, Israel niquiohuacujinio supueno pueyajinijinio

¹ Naa cua niquiniu nuhuajitij, janiyari socua cuatro Pueyaso seya niquirii nio jiya shocua nujuatiuyano tuhuaquini, pananu muetasamaji, na tiuquishocora, na muetasamaji na muenecara, na miaquetajaranio. Nojoriiri na nujuatusaqui paratu tenujuriquiaa maja na piyarononura jiya, shoniacu caminia, nacuhanio. ² Jiyacarijuhuaj, janiyari socua tamonu Pueyaso seru niquirii jiya pajamaji niyanoni. Pueyaso naajio jiriataja casaa cacariquiaari. Nojuajaari narta cuatro Pueyaso seyacia nacaree jiyanhua, noo pojoriicua canapueete cumaacaraca

quiriquiaacuajani nojori sesonura jiya, shoniniacu caminianio. Naa nojori sequereeri:

³—¡Cuaara! ¡Maja juhuanojuaja jiya nia sesonu, shoniniacu caminia, nacuahuanio, canaa niojiyaquishacarijia Pueyaso sesa, na pueya jiniji, na niishishaanura nojoriiri Pueyaso pueya!

⁴Janiyari jiyacari tojiriini taa pueyate na jiniji jirioosaareni. Puetunu supuetana Israel doce niquiohuacuajinio supueno pueyapuejinijinioori ciento cuarenta y cuatro mil pueya jirioosaaree. ⁵Naacuajitij, supuetana Judá niquiohuacuajinio supueno pueyajinijinionio, doce mil pueyari jirioosaaree. Supuetana Rubén niquiohuacuajinio supueno pueyajinijinio, doce miljuhuaj. Supuetana Gad niquiohuacuajinio supueno pueyajinijinio, doce miljuhuaj. ⁶Supuetana Aser niquiohuacuajinio supueno pueyajinijinio, doce miljuhuaj. Supuetana Neftalí niquiohuacuajinio supueno pueyajinijinio, doce miljuhuaj. Supuetana Manasés niquiohuacuajinio supueno pueyajinijinio, doce miljuhuaj. ⁷Supuetana Simeón niquiohuacuajinio supueno pueyajinijinio, doce miljuhuaj. Supuetana Leví niquiohuacuajinio supueno pueyajinijinio, doce miljuhuaj. Supuetana Isacar niquiohuacuajinio supueno pueyajinijinio, doce miljuhuaj. ⁸Supuetana Zabulón niquiohuacuajinio supueno pueyajinijinio, doce miljuhuaj. Supuetana José niquiohuacuajinio supueno pueyajinijinio, doce miljuhuaj. Supuetana Benjamín niquiohuacuajinio supueno pueyajinijinio, doce miljuhuaj. Puetunu nio pojorijianaari na jiniji jirioosaaree.

Cohuajaque toqueya cushitishano pueya maanu

⁹Naa cua niquitishaanu nuhuajitij, janiyari jiyanohua queraatia pueya niquirii maanoni juhua tereya. Nojoriiri puetunu nio tiqiyocua jiyacajinijiniojuanaa pueya quiriquiaa, puetunu tamaatiuucua pueyapuejinijiniojuanaanio. Quiriquiaajaariuhua puetunu tamaatia rupaaca pocuajacajinijiniojuanaa, puetunu tiqiyocua tiacajinijiniojuanaanio. Naa tojetaarucujanaa jiyanohua queraatia nojori quiniuucatej, majaaari na naata serojosaanu quiriquiaa. Nojoriiri Pueyaso shacantuuca cajituu tacoji nujuaturiquiaa, Borrego Niquiojuajuhua. Puetunu nojorijianaari tucuaqueya cohuajaque toqueyaraca quiriquiaa. Shuquiriaatia nojori quiniuucua, nojoriiri juhua teruhuanajaquera niquishano mueetacoriquiaa. ¹⁰Puetunu nojorijianaari naa mariyata sequeriquiaa na nacanata:

—¡Jiyanohua maniniaari pa Que Pueyaso, na shacantuuca cajitujinia cajiyani, Borrego Niquiojuajuhua. Nojoricuajaari pa jiyanoquiaari, tojetaarucujanaa quiariniora jatanishano pa quiniuria!

¹¹Naajuhua, puetunu Pueyaso seyajanaa, canapueete shacantuuca cajituu shocua nujuaturiquiaacuajani, niishijiaa jiyaniijianucua shocujuhua, cuno cuatro saminio casaa shocuanio, nojoriiri Pueyasooacara jacamaturee nojori timitianura nojuaja. ¹²Pueyaso na timitiatuacari, naa sequetureeri:

—¡Taaquiririnij, seetanujuanaacuaj! ¡Canaari pueyaracaanu quia maniniuhuaqueetanutaniyani! ¡Quiaacuajaari canaa timitiasano! ¡Saaja quiajaniyari seetanujuanaa niishijia cutara! ¡Paacarasho, canaa Pueyasonaa! ¡Quiaa cuara tojishaaria pueyaracaanu! ¡Quiaari canaa Jiyaniijiajanaa pueyaracaanura! ¡Quiaari puetunu

cumaacaracajanaa maninia quia jitianura quia shipinishano!
¡Cuaara naa quiiria pueyaracaanu, pueyaracaanutej!

¹³ Jiyacaritij, tamonu cuno veinticuatro niishijiaca jiyaniijianucujini-jinioori cua nequesotaree:

—¿Canapuede cuno pojorini, cohuajaque toqueyaracani? ¿Tejenote no-jorini?

¹⁴ Janiyari na riucuarree saajani:

—Quiaa cutara na niishiya, jiyaniijianaa.

Cua sequereeri:

—Nojoricuajaari jiyajinijinio pueya. Jiyajinia nojori quishacarijia, nojoriiri cuno jiyanohua naquiya miishacari rejeretajaca quiquiaari. Nojori tiuuniucua Borrego Niquiojuaacua, nojoriiri puetunu sesa nojori miishanojiniji juhua nojori toqueya jeequejoquiaari Borrego Niquiojua nanacajinia. Naacuajitij, nojoriiri cohuajaqueya toqueya cushiyonuya. ¹⁵ Naa Pueyaso jiyanooshano pueya nojori quiniuucuatej, nojoriiri Pueyaso cajishaqui tacoji quijiaca. Nojoriiri pueyaracaanu tii Pueyaso Secojoua tiajinia miiquiaa Pueyaso panishano, juuca, ni-ucuanio, nojori timitiasacari nojuaja. Na shacantuuca cumaacajinia cajijiani, nojuajaari na cumaaca teutenutaniya nojori caco, jatiqui na quiniuria nojoritia pueyaracaanu. ¹⁶ Naacuajitij, majaari socua nojori miaajenu quiniutianiya, jiyamuenunio. Pananuuri maja socua nojori na catijianu quiniutianiya. Naajuhuj, majaari socua nasaatia pananu jartanu nojori niishiniu quiniutianiya. ¹⁷ Borrego Niquiojuacuajani, Jiyaniijiajanaa cajitiu jiuujiajinia cajijiani, nojuajanaari nojori jitianu-taniya juhua tama na borregohuaaja. Nojuajaari nojori rucuan-ejotanutaniya, nojori na raatenura pueya samiitianijia mohuaca pacar-tajajiniji, pueyaracaanu shuquiriaatia quijiaca nojori quiniuria. Pueya-sojuanaacuajaari nojori namijiaaca tujuunutaniya nojori namijiajiniji.

8

Séptimo rupanacutasanojiniji pahuatasano, shanohua jaanutaja pata-jajinijinio

¹ Borrego Niquiojua jaara séptimo rupanacutasano rupartaree, cuno naajione saacatanura puetunujuanaa, tojetaarucujanaa sanaacara quiquiiri jiyocuacaanu pueyaracaanura. Maja cua niishiniu, media horaruhua. ² Na nuhuaji, Pueyaso tacoji, janiyari siete Pueyaso seya niquirii nujuatiuyanoni. Nojoriiri jiyacari siete trompeta niquitio-josaaree. ³ Na nuhuaji, socua tamonu Pueyaso seruuri shanohua jaanutaja pataja pamaa, orojiniji shipinishano. Orojiniiji shipinishano Pueyasoocuara catijiaja casaa tacoji nujuaseeri, Jiyaniijiajanaa cajitiu tacoji. Queraatia shanohua jaanutaja niquitiosaareeri Pueyasoocuara na catijianura. Jaanutajaari catijiasaariquiano puetunu Pueyaso pueya secjonuusanotajanaa, Pueyasoocuara na jaanujunura cuno catijiaja casaajiniji. ⁴ Naacuajitij, Pueyaso seruuri Pueyaso pueya secjosano tacanirii Pueyasoocuara, shanohua jaanujua najacata. ⁵ Na nuhuaji, cuno Pueyaso seruuri catijiaja casaajiniji na shanohua jaanutaja pataja mishinirii nishiyata. Jiyanohua na majiriataree nio jiyacuaari. Mi-acanaari ritia nunujuquee. Jiyanohua majacureeri. Jiyanohua coju-atunereeri. Rijjaari jiuquiujutiareejuhuj.

Trompetaa jonenejosacari

⁶ Cuno siete Pueyaso seya, trompetaa cacariquiaani, nojoriiri jeecanecoree na trompetaa na jonenenura. ⁷ Jiyacaritij, niquiriyatu cuno Pueyaso serujinijinoori na trompeta jonenenu coteeree. Jiyacaritij, miacanajaa shiniitujiaacaari, mariyata mani cojitishano nanacata jiyocua jartasaaree. Jiyari quera na cajiniocua cateree, puetunu na nacuhuatajanaa, na jiyasocuataniao.

⁸ Segundo Pueyaso seruuri na trompeta joneneree. Jiyacaritij, casaa juhua puereetuca tuhuananu noshiyanoori shoniniacu caminiajinia jatasaaree. Quera shoniniacu caminia cajiniocuaari nanacara quiquii. ⁹ Puetunu shoniniacu caminiajinia quijiaca casaajanaari, quera na cajiniocua cusonuuree. Naajuhuj, shoniniacu caminiajinia ruhuanetasano puereetuca buqueyajinijinoori, quera puetunu na cajiniocujanaa sesosaaree.

¹⁰ Tercero Pueyaso seruuri na trompeta joneneree. Jiyacaritij, puereetuca rijiaari jiyocuacaanuji tiquii, jiyanojua nishitiuucua juhua shucuenaja jaamasu noshitishano. Tiyareeri quera na cajiniocua nio jiyacua moocujinia, mijiria cuariyajiniajuhuj. ¹¹ Cuno rijia sesaari quiriquiaa “Piiquia”. Cunora, tee cuno rijia tiyareeni, puetunu cuno mohuacajanaari piiqiara quiquii. Pueya ratusacari cuno mohuaca, queraatia pueyari saaja cusonuuree.

¹² Cuarto Pueyaso seruuri na trompeta joneneree. Jiyacaritij, casaari pananuucua pitiaree, racaacua, quera na cajiniocua riyacuanio. Cunora, puetunu mijiria cuhuatajaca casaajanaari quera na cajiniocua sesosano quiquii. Quera na cajiniocuaari ninishiqui quiriquiaa. Cunora, pananuuri maja na cuhuatanu quiriquiaa quera juuca cajiniocua. Naajuhuj, riya, racanio, majaari na cuhuatanu quiriquiaa quera niucua cajiniocujuhuj.

¹³ Na nuhuaji, janiyari juhua puereetuca surohua miooru niquirii jiya cajiniocuanii. Na jaasacari naa nacariquiaa jiyanojuari:

—¡Puereeta, puereeta, puereeta! Seetanujanaa jiyanojua puereeta quiniutianiyari jiyacua quijiaca pueyara, jiuujanaraca cureecono Pueyaso seya jaara jonenere, canapuate joneneyaquiyajaa juhuanojuaacujani.

9

Quinto trompeta jonesacari

¹ Na nuhuaji, quinto Pueyaso seruuri na trompeta joneneree. Jiyacaritij, janiyari jiyocuacaanuji jiyocua tinio rijia niquiriini. Cuno rijiaari tiotiu riatataja niqutiosaaree, puequeetuujuu raa na riatanura.

² Na riatasacari, najacaari nojoomaa juhua puereetuca cuhuariquia sesacari. Pananu namijia tiomaari. Jiya cajiniocuaari mueruucara quiqiijuhuj. ³ Sequeruuri cuno najacajiniji mueratumaa. Puetunu nio jiyacujanaa paaquemaari. Sequeruuri cumaaca niqutiosaaree nojuaraca na quiniuria juhua turucuanii. ⁴ Sequeruuri rootasaaree maja nojori miaquenura jiyasocua, nacuhua jaamasujuhuj, puetunu moritajaca jaamasunio. Sequeru cutaraari jiyaramiquishaare puetunu pueyapuejanaa na sojonura, canapuate na jiniji jirioyagishoo quiriquiaa Pueyaso sesatacujani. ⁵ Sequeruuri rootasaareejuhuj, maja nojori cusojuanura pueya. Cinco raca cuara nojori shocojoora

cutara, pueyaracaanu sequeru saashi noosacari. Cuno sequeru saashiiri juhua turucuaniiinu saashi noonutaniya.

⁶ Naa pueya miishacari naquiya na noonutatej, pueyari cusonu paniniutianiya juucua. Saaja cusoyaquiniutianiyari. Jiyanhua na shaajenu panishacari juucua, nojoriiri saaja rishiniutianiya, jiyanhua naquiya nojori miishacari.

⁷ Sequeruuri puereeta niquishano quiriquiaa juhua miaquetoojonura jeenucuasano caballohua. Sequeruuri casaa jiitariquiaa na nacajinia juhua jiyaniijianucua orojiniji shipinijosano nacaqueya. Nojori jiquiocoori juhua pueyano jiquioco niquishano quiriquiaa. ⁸ Nojoriiri juhua maaji muecaraca quiriquiaa, tucumuejarujuri. Juhua juurunu sare quiacaraca quiriquiaajaariuhuj. ⁹ Nojori jiriquiaqueeri cumueeca quiriquiaa juhua turtuco. Nojori jaacuatusacari, na nesuhuari jiyanhua cojuatuneriquiaa juhua caballohua jayotasacari queraatia rucuanejotaruhua, miaquetoojonuucua na netecuatusacari. ¹⁰ Cuno sequeruuri juhua turucuaniiinu nojuacaraca quiriquiaa. Jiyanhua noonacuracajuhuj. Jaara nojori saare, cunoori quiquiaari nojori na noonura cinco raza. ¹¹ Cuno sequeruuri jiyaniijiaraca quiriquiaa. Nojuajaari Sesaaca seru. Cuno puereeta puequeetuuj raa camarujaariuhuj. Hebreo rupaajinia, na sesaari “Abadón”. Griego rupaajinia saniniuujia “Apolión”. Pueyano rupaajinia saniniuujia, nioori sequeya “Pueya Puecoona”.

¹² Janiyari naa niqutishaareeni taa coteenujuanaa naquiya miishaanu quiniutianiyani, cuno jiuujianaraca naquiya mishocoriquianojiniji. Socua caapiquiiri cureyajaa na nuhujiria.

Sexto trompeta jonesacari

¹³ Sexto Pueyaso seruuri na trompeta joneneree. Janiyari jiyacari rupaa tojirii pocaaanoni, shanhua jaanutaja catijiaja juhuacutu cuatro tuhuajaa tajiniji, Pueyaso tacoji nujuatajani, orojiniji shipinisanoni. ¹⁴ Cua tojishano rupaani, noo sexto Pueyaso seru sequereeri, na trompeta cacariquiaani:

—Cuno cuatro Sesaaca seya quia saacarojore, puereetuuca Eufrates moo shuriucua morojosano quiyani.

¹⁵ Jiyacaritij, cuno cuatro Sesaaca seyari samaacarojosaaree jiyanhua queraatia pueya nojori puecoonura, quera na cajiniocua puetunu mijiria quijiaca pueyajinijiniojuanaa. Cuno Sesaaca seyari tariucuaaanu naa morojosano quiquiaari, jeenucuasano nojori quiniuria namitia jiyacari nojori cartesaanura, cuno hora, cuno juuca, cuno racara, cuno marijiara. ¹⁶ Janiyari tojiriini cuno cuatro Sesaaca seya soldadohuari, doscientos millones pueya quiriquiaa saa caballohuaracaja.

¹⁷ Janiyari cuno caballohua niqutishaaree juhua cua maquenujiniani, na nijinia cajitiuniaanio. Jiyanhua tamaatia niquishano quiriquiaari. Puetunu nojori jiriquiacajanaari turtucojiniji shipinijosano casaata mishiquiojosano quiriquiaa. Cuno, nojori naatiyaquishaanuucujaji nojori cushiyosano turtuconi, cunoori puereeta niquishano quiriquiaa; naatuca juhua mani, nentuca juhua jacinto saajia, pocojuanaque juhua azufrejuhaj. Puetunu cuno caballohua nacacajanaari juhua juurunu sare nacaca niquishaariquiaa. Maniiri nojori rupaamaji rimianacuriquiaa. Najacaari nojonuucuariquiaajuhuj, azufrenio. ¹⁸ Cuno

jiuujianaraca puereeta casaata quera na cajiniocua puetunu pueyajinijinojuanaari cusojuasaaree. ¹⁹ Naacujitij, caballohuari cumaaca jiitariquiaa na rupaama, na pituijiniajuhaaj, nojori puecoonura pueya. Na pitucuaari juhua sacocua niquishano quiriquiaa. Juhua sacocua nacacaraca quiriquiaajaariuhuaaj pueya na sajitiajara.

²⁰ Cureeno pueya, canapuete maja na puecoosaanu quirii cuno jiuujianaraca puereeta casaatani, nojoriiri sesa miiniu tarinitiaaquiriquiaa saaja. Nojoriiri samaruhua secojonu tarinitiaaquiriquiaa. Naajuhuaaj, nojoriiri orojiniji shipinijosano casaa shuquiritariquiaa Pueyaso niti, platajiniji shipinishano, broncejiniji, saajiajinijijiuuhuaaj, macajinijinio. Puetunu cunojuanaa, nojori jiyatesano tama na pueyasohuarajaajani, cunoori maja na niquniu. Majaari na tojinuu. Majaari na rucuanenujuhuj. ²¹ Naajuhuaaj, majaari pueya tarinitianu quiriquiaa narta pueya monu, shimiojonujuhuaaj. Naajuhuaaj, majaari nojori tarinitianu quiriquiaa na camishoo maajipohua numuetucujunu, maajishuriu numuetucujunujuhuaaj. Nohuasejonu tarinitiatuayaquiriquiaajaariuhuaaj.

10

Pueyaso seru mueetasano tucuanee naajioneeniyujuajiniji pohuatasano

¹ Na nuhuaji, janiyari socua tamonu jiyanoehua cumaacaraca Pueyaso seru niquirii jiyocuacaanuji roseyanoni. Cohuaja najacajinia cuhuajaatariquiaari. Na nacaacua camarucuteriquiaa naashiiri. Na jiquio-coori jiyanoehua shacantuuca quiriquiaa juhua pananu. Na cashacucuaari juhua mani niquishano quiriquiaa, naatej, taa mani nujuaa na noshishacaritij. ² Na miaquetajara mueetariquiaa shiitianiyojua naajioneeri, tariucua riatasano. Nio jiyacua nujuaseeri. Na miaquetajara na niohuaca niaree shoniniacu caminiaacuaari. Tacujua niaree nio jiyacua saniniuuriija. ³ Nocua na nujuasacari, jiyanoehua nacareeri juhua juurunu sare sariyocuanu. Na nacasacari, siete miacanaari jiyacari majacuree, juhua pueyano pocuanu. ⁴ Cuno siete miacana pocuanu nuhuaji, janiyari na sequesano naajiotanu paniriquiaa tari juucuanu. Jiyacaritij, janiyari tamonu rupaa tojirii jiyocuacaanuji naa cua sequeyano saajani:

—¡Maja pueya niishitiniu cuno siete miacana sequesano! ¡Maja na naajiotanu! Tama quioojiajiniajaaja quia racatare.

⁵ Jiyacaritij, Pueyaso seru cua niquishano shoniniacu caminiaacua nujuaanoni, nio jiyacuajuhuaaj, nojuajaari na miaquetajara na juaashiquia shiitioree jiyocuacaanu, seetanujuanaa na sequenura. ⁶ Naa sequereeri:

—Cuno, pueyaracaanu Quijiani, nojuajaari jiya cajiniocua shipinina, jiya shipinina, shoniniacu caminia shipininajuhuj, puetunu tii quijiacaa casaajanaa shipininiano. Nojuajaari seetanujuanaa naa cua pohuataniya: “Majaari tari na tarishiniu quiniutianiya. ⁷ Séptimo Pueyaso seru coteesacari jonenenu na trompeta, cuno juucaja, puetunu jiyasohuaja Pueyaso miiniu panishanojuanaari tari tohuateesano quiniutianiya. Naa quiniutianiyari taa na pohuataquiaari na sequenu panishano caminiujiunaa pueyacujani”.

⁸ Cua tojishano rupaa jiyocuacaanuji pocuaanoni, socua cua pacutero-hua naa sequenuuri:

—Pueyaso seruucua quia quiaare, cuno, shoniniacu caminiaacua nujuaani, jiyacuanio. Nojuaja quia masetasee cuno riatasano naajioneeniyojua, na mueetaani.

⁹ Janiyari Pueyaso seruucua quiaareeni. Janiyari na sequeeseeni na naajioneeniyojua na niqutionura janiya. Cua riucuaereeri:

—Jajaa, quia patare. Quia miaquerenoj. Shoqueeca quiniutianiya quia rupaamaari juhua samiyatu. Quia seecojinia jatanutaniya pi-iquiara saniniuuriija. Cunoori, pueya na saniitotaja rupaa na quiniu-ucua.

¹⁰ Janiyari jiyacari cuno naajioneeniyojua pataree Pueyaso seru juaashiquiajinijini. Janiyari na miaquereeni. Seetanujuanaa shoqueeca quiriquiaari juhua samiyatu. Cua miasacari, cua seecojinia jatasee piiquiaraari. ¹¹ Jiyacaritij, janiyari naa sequesaareeni:

—Quiocua Pueyaso sequesano caminiujiuriohua pohuatanu queraatia pueyapue niquiara, queraatia tamaatia jiyacajinia quiniaa niquiara, queraatia tamaatia rupaaca pocuajaca niquiarajuhuj, queraatia jiyani-ijianucua niquiaranio.

11

Caapiqui Pueyaso sequesano caminiujiunias miishanojiniji pohuatasano

¹ Na nuhuaji, janiyari tia shanacujutaja naajua niqutiosaareeni, juhua nataca niquishano. Janiyari naa sequesaareeni:

—Quiariija cutara quia quiaare Jerusalén tiacajinia. Tii nujuataja Pueyaso Secojojua tia quia shanacujusee quia shanacujutajata, orojiniji shipinishano shanohua jaanutaja catijiajanio. Quia serojore-juhuaj puetunu Pueyaso secojonuujuacajanaa tii. ² Maja cutaraari quia shanacujunu Secojojua tia carijiniacuma. Cunocuaaari taucuaa niqutiosaarucuaa tari. Pueyaso soojeaca taucuaaari Pueyaso saquiriojosano na tiacarano jiitianutaniya pueyaracaanu, cuarenta y dos raca cuara na shocojorejaatija. ³ Janiyari caapiqui cua saquiriojosano pueya jiyaronutaniyani, janiyajiniji nojori pohuatanura pueya niquiara. Nojoriiri janiyajiniji pohuatanutaniya cuara shocojorejaatija mil doscientos sesenta juuca. Nojoriiri cocuaque toqueya cushiniutianiya taa pueya cushiyoquiaacuajani nojori taraajesacari.

⁴ Cuno caapiqui janiyajiniji pohuataanaani, nojoriiri cuno caapiqui olivo naana, tariucuaacaanu Pueyaso Rupaajinia pohuatashiyacuajani. Naajuhuj, nojoriiri cuno caapiqui samari nujuatacojua, Jiyaniijajanaa tacoji nujuatacojuani. Cuno, nojori Jiyaniijiani, nojuajaari jiya Jiyaniijiajuhuaj. ⁵ Tamonu jaara sesa miiniu paniri cuno caapiqui pueya, nojoriiri na paraa catijianutaniya nojori rupaamaji mueranacujua manitia, nojori na puecoonura. Nojoriiri saaja naa cusojuanutaniya noo pojori, canapuate nojori miiniu paniya sesa juucuaacuajani. ⁶ Nojori, janiyajiniji pohuataanaani, nojoriiri cumaaca jiitianutaniya maja na nitiniuria maru pueyaracaanu mijiria nojori pohuatasacari Pueyaso rupaa. Naajuhuj, nojoriiri cumaaca jiitianutaniya mohuaca na jataniniuria nanacara. Nojoriiri cumaaca jiitianutaniyajuhuj nojori sesonura jiya puetunu puereeta tamaatia casaatajanaa. Nojoriiri pueyaracaanu naa miijionutaniya nojori panishacari. ⁷ Nojori jaara janiyajiniji pohuatanu tucuatere, jiyacaritij, puequeetuuju raamaji tohuatariquiano

pueresano sacuaraatia Casaani, cunoori nojori paracaaniutianiya. Nojori shocotanutaniyari. Naacujitij, nojori pucoonutaniya socuuari.⁸ Nojori queteeri cuno puereetuca niishishano tiaca nuucujinia pojocanutaniya, tee nojori Jiyaniijia mosaaquiaari niyacutesanojinia teetsanocujani. Cuno tiacaari miriqui jiyaniquishiya Sodomata, Egiptotanio.⁹ Naacujitij, jiuujianaraca juuca, socua niquiriyatu juuca cajiniocuanio, queraatia tamaatiuucua pueyari nojori quete shootianutaniya. Naa nojori queteya shootianutaniyari queraatia tiquiyocua tiacajinijinio pueya, tamaatiuucua rupaaca pocujaca pueyajuhuj, queraatia tamonu jiyacajinijinio pueyano. Nojori paraari maja na shanacunu quiniutianiya nojori jamojosaanura.¹⁰ Puetunu mijiria quinaajanaari shuquiritiuniutianiya, macunucua cuno caapiqui Pueyaso sequesano caminiujiuniaa quishacari. Pueyari jiyanojua timiquionutaniya, naquiya nojori miitajaca pucoosaanuucua. Naaratej, mijiria quijiaaari tama na casamijinijiaaja nareja niquitiojotoonutaniya nojori shuquiriniutia.

¹¹ Naajaa, jiuujianaraca juuca, socua tamonu juuca cajiniocua nuhuaji, Pueyasoori nojori samiitianijiorohua. ¡Nojoriiri na matusaquiji saneecuaturuhua! Puetunu nojori niquiniaajanaari jiyanojua shiriqitiurii.¹² Jiyacaritij, cuno caapiqui Jesucristojiniji pohuatanaari puereetuca rupaa tojitiurii jiyocuacaanuji pocuaano. Naa nojori sequeriquiaari:

—¡Miji nia tacatama!

¡Jiyacaritij, nojoriiri na paraa niquiara tacataquee cohujajinia jiyocuaaanura!¹³ Na paraa shootiasacari nojori, jiyacaritij, rijiaari jiyanojua jiuuquiutiaree. Naa rijia jiuuquiutiasacaritij, Jerusalén tiacajinia queraatia tiacaari niyarequetaquee. Siete mil pueyari tii cusuuree. Cureno pueyari jiyanojua jiuujiateree Pueyasooajaji. Nojoriiri jiyacari niishirii Jiyocuacaanu Quijiaari seetanujanaa Pueyaso cutara.

¹⁴ Janiyari naa segundo naquiya miiniu niquitishaareejaaniuhuj, taa na nuhuaji na miishaanutaniyacujani. Tercero naquiya miishacariiri quera ritia cuno nuhuajijia quiniutianiya.

Séptimo trompeta jonesacari

¹⁵ Séptimo Pueyaso seruuri na trompeta jonenerree. Jiyacaritij, puereetuca rupaacaari jiyocuacaanu tojishaaree. Naa sequeturiquiaari:

—¡Quiarijiani, pa Jiyaniijia Pueyasoori tari jiiitianutaniya puetunu jiyacua jiyaniijianucua jiiitiasanojuanaa! ¡Nojuajaari pa Jiyaniijia Cristota Jiyaniijianucujanaa quiniutianiya! ¡Nojoricuajaari pueyaracaanu Jiyaniijiajanaa quiriqiano!

¹⁶ Jiyacaritij, cuno veinticuatro niishijiaca jiyaniijianucua, shanohua cajitujinia cajitiuriquiaa Pueyaso tacojini, nojoriiri Pueyasooajara jacamaturee jiyanojua na shuqiritianuta nojuaja.¹⁷ Naa sequeturee Pueyasoori:

—¡Paacarasho canaa Jiyaniijianaa! ¡Quiaari puetunu cumaacaracajanaa! ¡Quiaari quijiajuhuanajaj! ¡Quiaari pueyaracaanu quijia! ¡Quiaari tari juhuacatecara quia cumaaca poonijioteree, Jiyaniijiajanaa quia quiniuria pueyaracaanu!¹⁸ Cunora, puetunu jiyacua jiyaniijianucujanaari juaaquioya. Naajaa, quiarijiaari

quia juaashacari cutara. Quiarijiaari macunucua quia neque-soreenu juucajuhuaj. Saniniuujia, quiaari pueyara quia sequesano caminiujujia pueya niquitiojonutaniya nojoririano quia riuriotaca, puetunu quia saquiriojosano pueyajanaajuhuj, puetunu quia timitiajaca pueyajanaanio, jiyaniijianucua, narejaca pueyanio. Naajuhuj, quiaari jiya sesojuaca pueya shaajanutaniya.

¹⁹ Jiyacarijuhuaj, jiyocuacaanu Pueyaso Secojoua tiaari riataasaaree. Janiyari Pueyaso Quishaquijianaa niquiriini. Tii matariquiaari Pueyaso caaja, seetanujuanaa na Rupaajanaa na racataja. Cuno na Rupaari na pueya na jiyanoitiaja, na tojiyashijiaca na saniitotajajuhuj. Jiyacaritij, miacanaari nunujuree. ¡Jiyanhua majacureeri! ¡Puereetatej, jiyanhua cojuata! ¡Rijiaari jiyacari jiuuquiutiaaree! ¡Jiyanhua queraatia miacana-jaa shiniitujiaacaari juhua maru totereejuhuaj! ¡Jiyanhua puereetaari quiriquiaa!

12

Miriqui pohuatasano maajijiniji, puereetuuca Naaquerujinijijuhuj, juhua cohuaniquia niquishano

¹ Na nuhuaji, pueya jiuujiatenura, casaari jiya cajiniocua niquishaa-ree. Maajiiri quiriquiaa cuno, cua niquishanoni. Juhua toqueta pananujinia cuhuajaatiariquiaari. Racaacua nujuariquiaari. Doce ri-yari na nacaque quiriquiaa. ² Cuno maajiiri manajaraca quiriquiaa. Nooriquiaari. Cunora na sariyojotariquiaari quera na ranu panishacari. ³ Jiyacaritij, janiyari socua tamonu casaa niquitishaaree jiya cajin-iocuani. ¡Puereetuuca Naaqueruuri quiriquiaa, naatuhuana! Juhua cohuaniquia niquishano quiriquiaari. Siete nacacaracaari quiriquiaa, diez tuhuajaaracano. Jiyaniijianucuaara shipinijosano nacaqueya ni-quitiacoriquiaari na siete nacacaacua. ⁴ Cuno naatuhuana Naaqueruuri quera na cajiniocua riyajinijinio nocuara rerecoree jiyocuacaanuji na pitiutia. Nio jiyocua na jacutareeri. Naaqueruuri rariquiano maaji tacoji shanacuriquiaa. ¡Na sashiriquiaari cuaara raara, mueya na mianura jaara rasaare! ⁵ Maajiiri cayaniyoyua raree. Nojuajaari puetunu mijiria quijiaca pueyapuejanaa Jiyaniijajanaa quiriquiano. Nojuajaari pueyaracaanu na maca mueturiquiano, na tojiyashijiaca na piyotajara. Mueyari na nucua jaariutiasaaree Naaqueruucuaaji. Pueyasoori na shuriucuaara na ririi, tii na cajitiniuria, Jiyaniijia quiriquianoni. ⁶ Maajiiri saniniuujia cariiquia jiyajinia mashirii, tee Pueyaso jeenu-cuaquiaari tari nocuaji na quijiaracuajani, tii na mianuutesaanurajuhuj, cuaara shocojorejaatijia mil dosciento sesenta juuca.

⁷ Na nuhuaji, janiyari Pueyaso seya jiyaniijia Miguel niquirii narta Pueyaso seyatani, cuno naatuhuana Naaquerujuhuj puetunu na sey-atajanaa. Puetunu nojorijianaari puereeta quiaquetooriquiaa jiyocua-caanu. Cuno Naaqueruuri na seyata jiyanhua quiaqueriquiaa Pueyaso seya juucua. ⁸ Naajaa, majaari nojori naata quiriquiaa Pueyaso seya shocotanu. Pueyaso seya paracaaniuucua jiyanhua nojori, majaari quiquio quiniu quiriquiaa socua nojoriria jiyocuacaanu. ⁹ Naacuajitij, cuno Naaqueruuri jiyocuacaanuji taanusaaree. Nojuacuajaari cuno tariucuaaanu Soconu, Eva sapojoquiaarini. Cuno Sesaaca seque

sesaari “Satanás”. Nojuajaari puetunu mijiria quiniaajanaa sapojoquiaa. Pueyaso seya shocotanuucua nojuaja, nojuajaari puetunu na seyatajanaa nio jiyacua quejoosaaree.

¹⁰ Jiyacaritij, janiyari jiyocuaaanu quijiaca queraatia pueya rupaa tojiriini. Juhua niquiriyatu rupaari tojishaariquiaa jatiqúi nojori paaretasacari na rupaa. Naa sequeturiquiaari:

—¡Pueyasoori parta Pueyaso pueyacuara Saquiriojotana jataree tari! Nojuajaari pueyaracaanu Pueyaso saquiriojotaja Pueyaso pueyacuara, juuca, niucuanio. Naa pa Paraca jatasaanuucuatej, Pueyasoori quiaríjia tohuateenutaniya puetunu na sequesanojuanaa na jiyanooshano pueyara. ¡Nojuajaari maninia jítianutaniya pajaniya, jiyanoohua na cumaacata! ¡Pa Jiyaniijia Cristoori tari jiyatesaaree Jiyaniijiajanaa na quiniuria! Naa na miishaanuni, cunoori na Que saquiriojosano na quiniuucua. ¹¹ ¡Pueyaso Borrego na quiniuucua, nojuajaari na nanaca shootequiaari, tojetaarucua-janaa jiyanooshano pa quiniuria sesa pa miishanojiníj! Naacua-jitij, Satanás saquiriojotasacari parta Pueyaso pueyacuara, nojoriiri na sanaajaquiaari nojori tiuuniuucua Jesucristoocua. Nojoriiri na shocotaquiaaríjianaa, nojori pohuatanuucua Jesucristoocua nojori tiuuniujiníj. Nojoriiri maja na puerenu quíjia na mosaanura. Nojoriiri seetanujuanaa juhuajaniya tama na cuaqueyajaaja panítiaquiaari nojori mosaanura. ¹² ¡Naaratej, jiyocua-caanunaa, shuquíriaatia quia quiri! ¡Naa Sesaaca jatasaanuucuatej, nia timiquiore jiyocuaaanu quíjiacanaa! ¡Niajaniya saníniuujia, jiyacua quíjiacanaa, shoníniacu camíniajinia quíjiacanio, jiyanoohua nia taraajere! ¡Sesaaca niishishacari maja puera Pueyaso tarishíniu quíniútianiya na saníitionura nojuaja, nojuajaari niaacua roseyarucuaa jiyanoohua na juaaniútia!

¹³ Cuno puereeta níquishano Naaqueru niishishacari nojuaja tari jatasaaree jiyocua, nojuajaari cuno mueya nucua neteyojotanu coteeree na mianura juucua. ¹⁴ Cuno maajíiri querajaa puereetuuca nesu níquítiosaaree saaja, juhua jiyanoohua puereetuuca surohua miooru nesu. Cuno nesuta, maajíiri na quíquíojiníara jaaree caríiquia jiyajinia, tu-cuacaanu cuno Naaqueruucua. Tii mianuutesaanutaniya pueyara-caanuuri cuaara na shocojorejaatíjia jiuujíanaraca maríjia, socua seis racanio. ¹⁵ Jiyacaritij, Naaqueruuri mohuaca quecaree juhua moo, maajíi nuhuají na saquíitíniuria, maajíi na jaatíntíanura juucua. ¹⁶ Jiyari maajíi naacutaree. Jiyari juhua na rupaa riataree. Naaqueru rupaamajíi pojuaretaano moo raturee saajaari. ¹⁷ Naaqueruuri jiyamítia maají-íca macaarií jiyanoohua. Quiaareeri maajíicuajiníio supueno pueyata miaquetoojonura. Cuno pojoricuaajaari Pueyaso rootasano tojítiajaca, canapúete Jesucristoocua nojori tiuuniu seetaashíjiacuaajani.

¹⁸ Naaqueruuri shoníniacu camínia casaqueyajíi nujuasee.

13

Caapíqui puereeta níquishano Casaajiníj pohuatasano

¹ Na nuhuají, janiyari puereeta níquishano Casaa níquiríi shoníniacu camíniajiníj tacaanoní. Siete nacacaraca quíríquiaari, diez nacajaaracanio. Puetunu na diez nacajaacua jíitíaríquiaa jíyaniíjianucuaa ship-iníjiosano nacaqueyari. Puetunu na nacacaacuaajanaa, sesacaari nocua

naajiotasano quiriquiaa. Na nacacaacua naajiotasano sesacani, cunoori Pueyaso rerequeteriquiaa, juhua Pueyaso shocotaja na quiniuucua. ² Janiyara, cuno cua niquishano puereeta niquishano Casaani, cunoori juhua marucuatuque sare niquishano quiriquiaa. Na niohuacaari juhua oso niohuaca niquishano quiriquiaa, tucuacocua juaashococuaraca. Na rupaari juhua juurunu sare rupaa quiriquiaajuhuj. Cuno tari cua pohuatasano naatuhuana juhua cohuaniquia niquishano Naaqueruuri na cumaaca na niquitioree. Tama na cajitiujiniajaaja na cajitiriiri jiyaniijajanaa na quiniuria jiyacua. ³ Cuno puereeta niquishano Casaa siete nacacaracani, niquiriyatu na nacacajiniijioori pishano quiriquiaa na mosaanura juucua. ¡Cuno puereetuca piyashi na nacaacua quiriquiaani, saaja cushiriiquiiri! Puetunu mijiria quiniaa pueyajanaari jiuujiateree na cushiriishacariuhua. Cunora, puetunu nojorijianaari cuno puereeta Casaa tojjiacara quirii. ⁴ Jiyacaritij, mijiria quiniaa pueyari cuno naatuhuana Naaqueruucuaa jacamaturee juhua Pueyasocuaru, cuno puereeta niquishano Casaa na jiyatenuucua nojori jiyaniijajanaa na quiniuria. Pueyari cuno siete nacacaraca puereeta niquishano Casaacuara jacamatureejuhuj. Nojoriiri naa sequetooree tamajaaja:

—Maja socua tamonu jiyaniijia quiniu juhua nio pa jiyaniijia. ¿Tamonu jiyaniijiateeri cumaacaraca, nata na miaquetojonura? Shaaqui.

⁵ Jiyacaritij, cuno naatuhuana Naaqueruuri cuno siete nacacaraca puereeta niquishano Casaa niishitiojoree sacuaraatia na rimiaaquenura Pueyasocuaru, Pueyaso na rerequetenurajuhuj. Naa miiriiri na jyanishacari nojuajaari socua maninia quijia Pueyasojiniji. Naajaa, nojuajaari jiyaniijijara jiyatesaaree saaja cuarenta y dos racara. ⁶ Naacuajitij, cuno puereeta niquishano Casaari Pueyaso rerequetenu coteeree. Pueyasocuaru rimiaaquereeri. Jesuucua tiuujiaa pueya sesacareejaariuhuj, jiyocuacaanu Pueyaso quiquionio. ⁷ Mijiria quijiaa Pueyaso saquirojosano pueya paracaatishaareejaariuhuj. Cumaquishaareejaariuhuj Pueyaso pueya na shocotanura. Cumaaca niquitiosaareejaariuhuj jiyaniijajanaa na quiniuria, puetunu tamaatiuucua pueyapuejanaa na jitianura, puetunu tiqiyocua tiacajiniijinio pueyajanaa, puetunu tamaatia rupaaca pocujaca pueyajuhuj, puetunu tamonu jiyacajiniajanaa quijiacanio. ⁸ Naacuajitij, puetunu mijiria quijiaa pueyajanaari cuno puereeta niquishano Casaacuara jacamaturee na shuquiritianura nojuaja, nojori pueyaso na quiniuucua. Cuno pojoriiri maja Pueyaso saquirojosano pueya. Naaratej, jiya shipinishaanujiniji, nojori sesacaari maja na naajiotasaanu quiquiaari Borrego Niquiojua jitiiasano naajioneejinia, cante pocuara mosaaquiaaricujani. Pueyaso muerasu sesaca cutaraari cuno naajioneejinia naajiotasaaquiaari jiya shipinishaacarijiyujua, pueyaracaanu rishijiaca pa quiniuria.

⁹ Cante numaacani, nojuaja cuara tojjiiria nio: ¹⁰ “Cante Pueyaso jiyatesano quiasocoriquianoni, nojuajaari seetanujuanaa quiasano pueyano quiniutianiya. Naajuhuj, cante nijiniaquetucujaa mueruuta mosocoriquianoni, seetanujuanaa naa mosaanutaniyari”. Naaratej, Pueyaso pueya cuara puetunu casaajanaa rejeretajaca quiiria, seetanujuanaa nojori tiushacari Pueyasocua.

¹¹ Na nuhuaji, janiyari tamonu puereeta niquishano Casaa niquirii

jiyajiniji muetaanoni. Caapiqui nacajaraca quiriquiaari, juhua borrego niquiojua nacajaa niquishano. Juhua cumaacaraca jiyaniijia na rupaa paaretariquiaari. ¹² Jiyanojua cumaacaraca quiriquiaari, juhua narta puereeta niquishano Casaa, teyano naca pishanotucuaaja cushiriiriohuani. Nojuajaari na naca cushiriiniohua narta puereeta niquishano Casaa naacuriquiaa. Naacuajitij, nojuajaari puetunu mijiria quiniaa pueyajanaa mojuquetanijioree juhua Pueyasooacara, nojori timitianura na naca pishano cushiriiniohua puereeta niquishano Casaa. ¹³ Naajuhuj, nojuajaari na cumaacata miiri jiyajeneta casaa pueya jiuujiatenura nocuaji. Jiyanojua cumaacaraca na quiniuucua, pueya niquiara, nojuajaari mani tinirii jiyocuaaanuji jiyocua. ¹⁴ Naa na cumaacata na miiniuucua cuno na naca cushiriiniohua puereeta niquishano Casaa tacojitij, puetunu mijiria quiniaa pueyajanaa sapojoreeri. Naacuajitij, nojuajaari pueya shipinitirii casaa. Juhua cuno siete nacacaraca puereeta niquishano Casaa quiriquiaa, teyanote na nacajinia mueruuta pishano na quishacari samiitiarohua saajacuajani. ¹⁵ Jiyacaritij, nojuajaari cumaaca niqutiosaree pueya shipinishano Casaa na jiyatenura saminiora, pocuajara na quiniuria, nocuara jacamatiuyashijiaca na puecootenurajuhuj. ¹⁶ Naajuhuj, cuno caapiqui nacajaraca puereeta niquishano Casaa na pueya sequeree nojori naajiotanura puetunu pueyacuajanaa narta puereeta niquishano Casaa sesa. Naajiotasareeri nojori miaquetaja juaashiquiaacua. Jaara nojori juaashiquiaacua naajiotaaquishaare, nojori jiniji naajiotasareeri. Naacuajitij, puetunu mijiria quiniaa pueyacuajanaa naa naajiotasareeri, tojiaquishoo pueyacu, tojishano pueyacu, casamiriaca pueyacu, casamiijuniucua pueyacu, tama nojoriria poonijionuujuacajaaja pueyacuajuhuj, poonijiotasano pueyacuano. ¹⁷ Jiyacaritij, canapueete cuno puereeta niquishano Casaa sesa naajiotasano jitiiaquiriquiaa na cuaqueyacuani, nojoriiri maja na naata na panishano masenu quiriquiaa na cumaneecata. Naajuhuj, majaari nojori naata na casami niqutiojonu quiriquiaa na cumaneecara. Pueya jaara cuno puereeta niquishano Casaa sesa jitiiaquiri naajiotasano na cuaqueyacu, na naata na sesa número jitianu nocua naajiotasano.

¹⁸ Nio niishishaanura maninia, jiyanojua niishitijaari panishiya cutara. Niishijiaca pueya cuara serojoora puereeta niquishano Casaa sesa número. Na númeroori pueyano sesa número. Cuno númeroori seisciento sesenta y seis. ¡Cunora pueyanaa, tama nia cuaqueyajaaja nia cojuare maja cuno puereeta niquishano Casaa sesa naajiotasaanura niaacuajuhuj!

14

Borrego Niquiojua cojiniaajiniji pohuatasano

¹ Na nuhuaji, janiyari Borrego Niquiojua niquiriini, Sión tuhuananucua nujuano. Ciento cuarenta y cuatro mil pueyari na cojiriquiaa. Borrego Niquiojua sesaari naajiotasano quiriquiaa puetunu nojori jinijijianaa, na Que Pueyaso sesajuhuj. ² Na nuhuaji, janiyari casaa tojirii juhua sararojua cojuatuneyano jiyocuaaanujini, juhua miacana majachyano, juhua queraatia pueya arpa taquinionuyanojuhuj. ³ Cua tojishanoori quiarinijo jaaquequejosano quiriquiaa. Jaaquequenuunaari Pueyaso cajitiu tachoji jaaquequenuuriquiaa, cuno cuatro saminio casaa

tacojijuhuaaj, cuno veinticuatro niishijiaca jiyaniijianucua tacojinio. Majaari quenaaja tamonu naata quiriquiaa cuno jaaquequejosano niishiniu nojori jaaquequejonurajuhuaaj. Saaja cuno ciento cuarenta y cuatro mil pueya cutaraari cuno jaaquequejosano niishiriquiaa. Cuno pojoricuajaari mijiria quiniaajinijinio saquiriojosaaquiaari Pueyaso pueya nojori quiniuria. ⁴ Nojoriiri tojetaarucujanaa maaji numuetuqueyashijiaca quiquiaari, saaja pocuaji Tacunaacua jiaatiajaca nojori quiniuucua. Naaratej, tiquiyocua Borrego Niquiojua rucuanajosacari, nojoriiri pueyaracaanu na cojiquiaa. Nojoriiri saquiriojosaaquiaari mijiria quiniaa pueyajinijinio, saaja Pueyasora nojori quiniuria, Borrego Niquiojuara nojori quiniuriajuhuaaj. Nojoriiri socua Pueyaso timitiasano pueya puetunu Pueyaso saquiriojosano pueyajinijiniojuanaa, taa pa shuquiritiaa shushajanaa pa carojosano pa nataujinijicuaani. ⁵ Nojoriiri tojetaarucujanaa sapojonu niishiyashijiaca quiquiaari, tojetaarucujanaa sesa miyashijiaca nojori quiniuucua.

Jiuujianaraca Pueyaso seya pohuatasano

⁶ Na nuhuaji, janiyari tamonu Pueyaso seru niquirii jiya cajiniocua jaanoni. Jaariquiaari mijiria quijiaca pueya niquiara na pohuatanura Pueyaso Rupaa, puetunu jiyacajinia quiniaa pueyarajanaa, puetunu tamaatiuucua pueyapuerajanaa, puetunu tamaatia rupaaca pocuajaca pueyarajanaajuhuaaj, puetunu tiquiyocua tiacajinia quijiaca pueyarajanaanio. Na pohuatasanoori seetanu rupaajanaa pueyaracaanura. ⁷ Pueyaso seruuri mijiria quiniaa pueyacia nacariquiaa naatej:

—¡Pueyaso puerejaca nia quiriquia! ¡Nojuaja nia maniniuhuaqueetare! ¡Quiarijaari na nequesoreesacari pueya! ¡Nocuara nia mojoquetacore nia shuquiritianura nojuaja! ¡Nojuacuajaari jiyocuacaanu shipininia, nio jiya, puereetuca shoniniacu caminiajuhuaaj, puetunu samocua nacaca pacartacojuacajanaanio!

⁸ Jiyacaritij, tamonu Pueyaso seruuri narta Pueyaso seru nuhuajimiaajuhuaaj. Naa miriqui sequeriquiaa Roma tiacajinijiiri:

—¡Babilonia tiaca tari saniitioshiya! ¡Cuno puereetuca tiaca tari saniitioshiya! Babilonia tiacaari puetunu jiyacajinia pueyajanaa niishitiojua, sacuaraatia nojori miiniuria juhua nojuajuhuaaj. Babilonia tiacani, nojuajaari puetunu sesa casaa na miijosanotajanaa juhua mashaasequetejoquiaari puetunu mijiria quijiacajanaa. Naacuajitij, puetunu pueyajanaari tama na cuaqueya miiniu panishanojuaja miijiacara quiquiaari, jiyanojua nojori jiaatianuta sacuaraatia casaa na miiniuria, taa Babilonia tiacajinia quiniaa miijioquiaacuaani.

⁹ Na nuhuaji, socua tamonu Pueyaso seruuri narta caapiqui na puetanaa Pueyaso seya nuhuajimiaajuhuaaj. Mijiria quiniaa pueyacia nacaree naari:

—¡Jiyanojua puereeta quiniutianiyari noo pojoriria, canapuate cuno puereeta niquishano na naca pishano cushiriiniohua Casaacuara mojoquetacojua juhua Pueyasoocuarani! ¡Jiyanojua puereeta quiniutianiyari noo pojoririajuhuaaj, canapuate juhua na naca cushiriiniohua niquishano shipinishano Casaacuara jacamatujuacani! ¡Naajuhuaaj, puereeta quiniutianiyari noo pojoriria, canapuate na cuaqueya tarinitiajacani, cuno puereeta niquishano Casaa sesa naajiotasaanura nojori jinijini, nojori juaashiquiaacua soj! ¹⁰ ¡Pueyasoori puetunu cuno pueyajanaa

saniitionutaniya jiyanoehua na juaaniutia! ¡Majaari quenaaja Pueyaso jiuujiaani quiniutianiya nojori! ¡Pueyaso seya niquiara, Borrego Niquiojua niquiarajuhuaaj, nojoriiri pueyaracaanu naquiya miishaanutaniya manitia, azufretanio! ¹¹ ¡Naa Pueyaso miitiasacari nojoritij, najacaari pueyaracaanu nojonutaniya! ¡Majaari quenaaja nojori samaraatasaanu quiniutianiya juuca, niucuanio! ¡Naquiya miiniuuri naa nojori miitianutaniya pueyaracaanu! ¡Naa miishaanutaniyari cuno pojori, canapueete na naca pishano cushiriiniohua puereeta niquishano Casaacuara jacamatujuaca juhua Pueyasooouarani, juhua nojuaja niquishano shipinishano Casaacuarajuhuaaj! ¡Naa miishaanutaniyajaariuhuaaj noo pojori, canapueete cuno puereeta niquishano Casaa sesa naajiotaniniutianiya tama nocuajaajani!

¹² Cunora, Pueyaso saquiriojosano pueyani, canapueete na rootasano tojitiajacani, Jesuucua tiuuniu tarinitiaashijiacajuhuaaj, nojori cuaara juhuaajaniya rejeretaara naquiya nojori miishacari.

¹³ Jiyacaritij, janiyari rupaa tojirii jiyocuacaanuji naa cua sequeyanoni:

—Nio quia naajiotare: “¡Quiarijiani, jiyanoehua shuquiriaatia quijia cutaraari cuno macunucua, canapueete tariucua Jiyaniijia Jesucristoocua tiuujiaa cusonuunutaniyani!” Pueyaso Sohuanuuri naa sequeyajuhuaaj: “¡Taaquiriirinij! Nojoriiri samaateya, pueyaracaanu na Jiyaniijiaara na poonijionuunu nuhuaji. Maninia nojori miishanocuaari niyajetaaquishaanutaniya. Cunora, nojoriiri maninia miishaanutaniya”.

Pueyaso seya senoosacari pueya juhua nataacuaca nio jiyajiniji

¹⁴ Na nuhuaji, janiyari cohuaja najaca niquiriini. Cuno cohuaja najaca caco cajiniaari juhua Pueyaso Niyanu niquishano quiriquiaa. Jiyaniijiaara shipinishano nacaque cushitariquiaari, orojiniji shipinishano. Nataacuaca na senootajara shamatucuaaja jacatunee mueruu mueruriquiaari. ¹⁵ Jiyacaritij, tamonu Pueyaso seruuri Pueyaso Quishaquiji tohuatamaa. Cohuaja najaca caco cajiyanoocua nacaree jiyanohuari. Naa na sequereeri:

—¡Quia mueruuta quia canuujure, nataacuaca quia senoonura! ¡Jiyajinia nataacuacacuaajaari tari noshuriujua! ¡Cuaara quiarijia senoosaaria!

¹⁶ Jiyacaritij, cohuaja najaca caco cajiyanoori na jacatunee mueruuta canuujuree jiya caco. Nataacuaca senooreeri. Cuno nataacuacaari Pueyaso pueyacuaja. Nojoriiri naa rijiosaanutaniya jiyocuacaanu.

¹⁷ Jiyacaritij, socua tamonu Pueyaso seruuri tohuatamaa jiyocuacaanu Pueyaso Quishaquiji. Nojuajaari shamatucuaaja jacatunee mueruu mueruriquiaajuhuaaj. ¹⁸ Na nuhuaji, socua tamonu Pueyaso seruuri tohuatamaa Pueyasooouara catijiaaja casaajiniji. Nojuajaari mani camaru. Nojuajaari narta Pueyaso seruucua nacaree, shamatucuaaja mueruu mueruyanoocua. Na sequereeri:

—¡Quia shamatucuaaja mueruuta uva quia carojotare, jiyajinia moriticonuni! ¡Tari noshuriujuacuaja!

¹⁹ Jiyacaritij, Pueyaso seruuri uva carojotaree na mueruuta, puetunu nio jiyajinia cuhuariquiacajinijijianaa. Uva jaapuejoree saajiajinia quejasano puereetuca surocohuamaari. Pueyasoori tii na rapijiotenutaniya jiyanoehua na juaaniutia. Cuno uvani, nojoriiri Pueyaso ruretajaca pueyacuaja. ²⁰ Cuno uvaari rapijiosaaree tucuacaanu naata

tiacajiniji. Uva rapijiosaquiji, nanacaari tojetaarucujanaa jaateriquiaa juhua mohuaca. Jiyanoehua nanaca quiniuucua, cabollohua rupaacuma puecariquiaari. Pueyaso tojiyashijiaca pueya nanacaari jiyanoehua tucacaanu jaateree juhua moo. Tresciento kilómetro jaatereeri.

15

Siete Pueyaso seya, siete naquiya miitiaja na mueetacosacari

¹ Na nuhuaji, janiyari jiya cajiniocua socua niquitishaareeni, cua niishiniuria taa mijiria quiniaa saniitiosaanu tucuatasaanutaniyani. Cua niquishanoori jiyanoehua puereeta quiriquiaa. Janiyari nocuaji jiuujiatereeni. Janiyari siete Pueyaso seya niquiriini. Siete Pueyaso naquiya miitiaja mueetacoriqiaari. Pueyaso jaara cuno siete casaata naquiya miitiri pueya, nojuajaari cunota na juaaniu tucuatanutaniya puetunujuanaa.

² Janiyari casaa niquiriijiaaniuhuj juhua puereetuca caminia motiiquiojiniji shipinishano. Manitia cojitishanoori quiriquiaa. Pueyari cuno caminia shocua nujuaturiquiaa. Nojoriiri noo pojori quiriquiaacuaja, canapuate na naca pishano cushiriinohua Casaa shocotaquiaaricujani, juhua nojuaja niquishano shipinishano Casajuhuj. Naajuhuj, nojoriiri maja na shanacunu quiquiaari cuno Casaa sesa naajiotasaanura nojoriicua. Puetunu nojoriijianaari Pueyaso niquitiojosano arpa taquinionuuriqiaa. ³ Nojoriiri Pueyaso seru Moisés jaaquequejosano jaaquequenuuriqiaa, Borrego Niquiojua jaaquequejosanonio. Nojoriiri naa jaaquequenuuriqiaa:

—Jiyaniijianaa, puetunu quia miishanojuanaari jiyanoehua maninia, nocuaji jiuujiatesano. ¡Quiaari seetanujuanaa puetunu cumaacaracajanaa! Casaa quia miishacari, quiaari maninia na miiquiaa. Majaari quenaaja quia jiyajenenu. Quiaacuajaari puetunu jiyacajinia quiijaca pueya Jiyaniijiajanaa. ⁴ ¡Quiaari pueresano, Jiyaniijianaa! ¡Quiaari tojetaarucujanaa maniniuhuaqueetasano seetanujuanaa! ¡Saaja quiajaniya cutaraari tojetaarucujanaa maninia miijia pueyaracaanu! Naaratej, puetunu jiyacajiniinio pueyajanaari quiocua nijionutaniya nojori shuquiritianura quiajaniya, maninia quia saniitiojonuucua quia paraajuhuj.

⁵ Naa cua tojinu nuhuajitij, janiyari jiyocuacaanu Pueyaso Quishaquijianaa niquirii riateyanoni, tee cuniqui seetanu Pueyaso rupaajanaa racatasaan quiyacuajani. ⁶ Cua niquishacari, cuno siete Pueyaso se-yari Pueyaso Quishaquijijianaa tohuareetariqiaa, canapuate cuno siete naquiya miitiaja patootariqiaacuajani. Nojoriiri tojetaarucujanaa cohuaja linojiniji toqueyaraca quiriquiaa, shacantuqueya. Nojoriiri orojiniji shipinijosano casaa na jiriquiacajinia camarucuteriquiaa. ⁷ Jiyacaritij, niquiriyatu cuno cuatro saminio casaajiniinioori miacojua niquitiojoree puetunu cuno siete Pueyaso seyajanaa. Cuno miacojuuari orojiniji shipinijosano quiriquiaa. Pueyaracaanu rishijia Pueyaso juaaquiacata mishinijosano quiriquiaari. ⁸ Jiyacaritij, Pueyaso Quishaquijianaari maatia najacata mishiquiimaa. Cunora, majaari tamonu na naata Pueyaso Quishaqui tiuquiniu quiriquiaa, cuno siete Pueyaso seya cuara puecaarajaatijia naquiya nojori miitajaca pueya. Cuno najacaari Pueyaso shacantuca cumaacajiniji quiriquiaa, naa na saniitiojosacari na paraa.

16

Saniitionujiniji pohuatasano

¹ Jiyacaritij, janiyari tamonu rupaa tojirii Pueyaso Quishaquiji nacaanoni. Naa cuno siete Pueyaso seya sequereeri:

—¡Nia siete miacojuajiniji Pueyaso juaaquiaca nia taroosee jiyocua!

² Niquiriyatu Pueyaso seruuri juhuacatecara coteeree. Quiaareeri. Na miacojuajiniji jaapuesee jiyocuaari. Jiyacaritij, jiyanoehua nootuca sapueyari pueyacua supueree. Noo pueyacua supuereeri, canapueete nocua naajiotasano jitiariquiaa na naca pishano cushiriiniohua puereeta niquishano Casaa sesacujani. Sapueyaraca pueyari cuno puereeta niquishano shipinishano Casaacuara jacamatujuaca quiriquiaajuhuj. Jiyanoehua nootujuaaca sapueyari quiriquiaa.

³ Segundo Pueyaso seruuri na miacojuajiniji Pueyaso juaaquiaca jaapuesee puereetuca shoniacu caminiajinia. Mohuacaari puetunu nanacara quiquijianaa, juhua shusha mosano pueyano nanaca. Cunora, puetunu shoniacu caminiajinia quijia casaajanaari cusuuree.

⁴ Tercero Pueyaso seruuri miacojuajiniji Pueyaso juaaquiaca jaapuesee puetunu moocujiniajanaa, puetunu samocua nacaca pacarta-cojuacajiniajanaano. Jiyacaritij, nanacara jataquee puetunujuanaari.

⁵ Cuno nuhuaji, janiyari mohuaca camaru Pueyaso seru tojirii naa Pueyaso sequeyanoni:

—Pueyasonaa, quiaari quijiajuhanajaj. Majaari quia supueni quiquiaari. Quiaari tojetaarucujanaa maninia. Naa quia miitiasacari quia tojitiaashijiatej, quiaari seetanujanaa maninia namirii nojori. ⁶ Nojoricuajaari quia saquiriojosano pueyajinijinio nanaca shootejoquiaari pueyaracaanu, quia sequesano caminiujuniaa nanacano. Quiarjia saniniuujia, naa miijiaa nojori quiniuucatej, quiaari nojori raatejoree nanaca. ¡Maniniacujia Jiyaniijianaa!

⁷ Jiyacaritij, janiyari Pueyasooacara catijiaja casaa tojirii juhua pueyano pocuaanoni. Naa sequeriquiaa Pueyasoori:

—Taaquiriirini Jiyaniijianaa, puetunu cumaacaracajanaa Pueyasonaa. Quiaacuajaari maninia saniitioree quia tojiyashijiaa, taa quia sequequiaari tariucuacaanu nojoricujani, quiaari quia tojiyashijiaa saniitionutaniya. Quiaari seetanujanaa sequequiaari quia miishocoriquiano. Quiaari puetunu sesa nojori miishanojuanaa niishijia.

⁸ Na nuhuaji, cuarto Pueyaso seruuri miacojuajiniji Pueyaso juaaquiaca jaapuesee pananuucua. Naacuajitij, pananuuri socua jiyanoehua nasecara quiquii, pueya na catijianura juhua mani. ⁹ Naa pananu januucua jiyanoehua nasaatiatej, pueyari jiyanoehua cateree. Nojoriiri Pueyaso sesacaree saaja, cumaacaraca na quiniuucua, naa nojori na saniitionuucatej. Majaari quenaaja nojori pishiniu quirii sesa nojori miiniujiniji, nojori tacatonuhuaa noojia Pueyasooacara, nojori jiyaniijiaara nojori jiyatenura Pueyaso. Pueyaso rerequeteturee saajaari.

¹⁰ Na nuhuaji, quinto Pueyaso seruuri miacojuajiniji Pueyaso juaaquiaca jaapuesee. Na naca pishano cushiriiniohua puereeta niquishano Casaa cajishaqui na jaapueseeri, tee cuniqui juhua

jiyaniijajanaa na cajiriquiaacuajani. ¡Jiyacaritij, puetunu na jiiitasano jiyacajanaari ninishiquiria quiquii! Cunora, na pueyari na niti saaquioriquiaa jiyanoehua nooeta naquiya na miiquiosacari. ¹¹ Naa Pueyaso saniitosacari nojoritij, naajaa, majaari nojori pishiniu quiriquiaa sesa nojori miiniujiniji. Nojori nootunenuucua, nojoriiri jiyocuacaanu quijia Pueyaso sesacaree saaja, nootujuaaca sapueyaraca nojori quiniuucujuhua.

¹² Cuno nuhuaji, sexto Pueyaso seruuri miacojuajiniji Pueyaso juaaquiaca jaapuesee cuno puereetua Eufates moojinia. Moori joojequetaquee jiya pajamaji niriquiano jiyaniijianucua niuutijara.

¹³ Jiyacarijihuaj, janiyari jiuujianaraca samaruhua niquiriini, juhua sacarohua niquishano. Cuno samaruhuari tohuareetariquiaa juhua cohuaniquia niquishano naatuhana Naaqueru rupaamaji. Tohuareetariquiaajaariuhua na naca pishano cushiriinohua puereeta niquishano Casaa rupaamaji, narta puereeta niquishano Casaa rupaamajinio. Cuno puereeta niquishano Casaari mijiria quiniaa pueya sapojoriquiaacuaja, nojori tojiniuria na naca pishano cushiriinohua puereeta niquishano Casaa. ¹⁴ Cuno jiuujianaraca samaruhuari cumaacaraca quiriquiaa, na cumaacata nojori miiniuria nocuaji jiuujiatesano casaa, pueya tiuuniuria nojori sequesanoocua. Nojoriiri naa miiriquiaatej, puetunu mijiria jiyaniijianucujanaa nojori rerejotenura. Jiyaniijianucuaari naa rerejotesaaree nojori miaquetoojonura puetunu cumaacaracajanaa quijia Pueyasota. Pueyasocujaaari tariucuaaanu niishiriojoquiaari naa cuno juuca na miaquetoojonura nojoritia. Naa paniquiaaricujaaari na paraa na pucoonura.

¹⁵ Jiyacaritij, janiyari pa Jiyaniijajanaa tojirii naa sequeyanoni:

—Cua tojitiare cua pueyanaa. Janiyari canashiyaquiji tiuquiniutianihuani nia niishiyaquishacari. Janiyari naa niaacua tiuquiniutianihuani taa nohuasejojua tiuquiquiaa casami nohuasenuucuaacuaani, juhuajaniya casami camaru quishacari. Shuquiriaatia quijia cutaraari noo pueyano, cante juhua suteja quiquiaani, pueyaracaanu na secosacari, na sashishacari janiya. Tojetaarucujanaa sesa miyaquijia nia quiri, niaa mariqui cua tiuquishacariuhua cararaatia juhua juhua-sunucua quiri cua niquiaraari.

¹⁶ Cua Jiyaniijia sequesano cua tojiniu nuhuaji, janiyari cuno samaruhua niquirii mijiria jiyaniijianucua rerejoteyanoni. Hebreo rupaajinia, nojori rerejosaqui sesaari, “Armagedón”.

¹⁷ Séptimo Pueyaso seruuri miacojuajiniji Pueyaso juaaquiaca jaapuesee paratujinia. Jiyacaritij, jiyocuacaanu Pueyaso Quishaquijianaa Jiyaniijia cajitiujiniji, janiyari rupaa tojirii naa nacaanoni:

—¡Tari miishaaree puetunujuaanaacujaja!

¹⁸ Jiyacaritij, miacanaari nunujuree. ¡Jiyanoehua majacureeri! Cojuataari quiriquiaa puereeta. Rijiaari tojetaarucujanaa jiyanoehua jiuuquiujiutiaaree. Pueyano shipinishaanujiniji, majaari naa rijia jiuuquiujiutianu quijia juhua nio rijia. ¹⁹ ¡Naa rijia jiuuquiujiutianucua jiyanoehuatej, cuno puereetua tiacaari neequeresetaquee! Jiuujianaracara raquitiiquiiiri. Puetunu jiyacajinia tiacajanaari niyarequetaree. Jiyacaritij, Pueyasoori cuno puereetua Babilonia tiaca saniitiooree, taa tariucuaaanu na niishiriojoquiaari cuno juuca na saniitionuracuajani. ¡Jiyanoehua na juaaniutia na

saniitioreeri! Niya sequeshiya Babilonia tiacatani, cunoori Roma tiacacuaaja. ²⁰ Jiyacarijuhuaj, puetunu shoniniacu caminiajina jiya tucuaatiajacajanaari shaajeequee, puetunu tuhuananuhujanaanio. ²¹ Naajuhuaaj, jiyocuacaanuji jiyanhua puereetujaaca miacanajaa shiniitujiaacaari toteree pueyacia. ¡Noojiaqueyari jiyanhua niiquia quiriquiaa; cuarenta kilo! Mijiria quiniaa pueyari Pueyaso sesacaree, naa nojoriicua na totinijanuuca shiniitujiaaca miacanajaatej.

17

Miriqui pahuatasano Roma tiacajiniji, juhua paanatu

¹ Na nuhuaji, cucua nimiaari niquiriyatu cuno siete Pueyaso seyajini-jinio, canapuate siete miacojua patootariquiaacuajani. Cua sequeseeri:

—Miji quia nimia. Janiya quia niqitiniutianiyani taa Pueyaso saniitionutaniya cuno Paanatuni, puetunu jiyajinia mohuacacua-janaa cajiyani. ² Mijiria jiyaniijianucuaari cuno Maaji numuetucuju-juaca. Sacuaraatia cuno Paanatu niishitiojosanota, nojuajaari juhua mashaasequetejojua puetunu jiyacua quiniaa pueyajanaa. Naacujitij, nojoriiri sacuaraatia miijiacara quiquiaari, juhua nojuajuhuaaj.

³ Pueyaso seru niqitiniuria janiya na niqitini panishano, nojuajaari cua sohanu jiyataare cariquia jiyajinia. Janiyari tii niquishii Maajini, naatuhuana puereeta niquishano Casaa nijinia cajiyano. Queraatia sesacaari cuno naatuhuana Casaa cuaqueyacia quiriquiaa, Pueyaso rerequeteja sesaca, juhua Pueyasora na jiyatesacari tama na cuaqueyajaaja. Siete nacacaracaari quiriquiaa, diez tuhuajaaracanio. ⁴ Cuno Maajiiri shanhua toqueya cushiriquiaa, naatuque, shaaruquejuhuaj, juhua jiyaniijianucua cushishano. Queraatia shanhua maniniushitiaja casaa cushitariquiaari: orojiniji shipinijosano casaa, shanhua saijiniji shipinijosano tiujiaujuhuaaj, noturu shipinijosano saijiniji tiujiaunio. Orojiniji shipinishano miacojua mueetariquiaari. Mishaja quiriquiaari puetunu sacuaraatia na miijosano casaatajanaa, numuetucujusaanu porocua na quiniuucua. ⁵ Na sesaari miriqui naajiotasano quiriquiaa na jiniji. Naa naajiotasano quiriquiaari: “Janiyari puereetua Babilonia tiacani. Janiyari paanatuji nucuani, puetunu mijiria sacuaraatia miishanojuanaa coretanijojua nucuani”. ⁶ Maninia cua niquishacari, cuno Paanatuuri juhua mashaaseca quiriquiaa na puecootesano Pueyaso pueya nanacata. Nojuajaari jiyanhua timijia, Jesujiniji pahuatanaa puecoonu porocua na quiniuucua.

Naa cua niquishacari nojuajatej, janiyari jiyanhua jiuujiatereeni. ⁷ Pueyaso seruuri jiyacari cua sequeree:

—¿Casaara quia jiuujiateya nocuajini? Quiarijia quia pahuatareera quia niquishanojiniji. Cuno puereeta niquishano Casaa, siete nacacaracani, diez nacajaaracanio, Maaji cajitiya na nijiniani, puetunu cunोजनाari miriqui. ⁸ Cuno puereeta Casaa quia niquishanoni, cunoori tariucuaanujiniji quijia quiquiaari. Quiarijia saniniuujia, majaari tari na quiniu. Naajaa, quera tacanutaniuhua cuno puequeetuuju raamajiiri, seetanujuanaa puetunujuanaa na shaajasaanuhua cutara. Pueyaso ruuretajaca pueyari jiyanhua shiriqitiniutianiya nojori jaara cuno puereeta niquishano Casaa niquiri tacatehuano, teyanote tariucuaaanu quijia quiquiaaricujani, quiarijia saniniuujia majaari na quiniu.

Jiya shipiniyaquishacarijia, cuno pueya sesacacuaajaari Pueyaso saquiri-
ojosano pueya sesaca naajiotasaqui naajiotasoo quiquiaari.

⁹ Cante niishijiani, nojuaja cuaara niishiiria cua pohuatasano. Cuno
puereeta niquishano Casaa, na siete nacacani, cunoori siete jiy-
aca jiyaniijianucua, mariyata siete tuhuananuhua, teyanoooca cuno
Paanatu cajiyacuajani. ¹⁰ Cuno siete jiyaniijianucujinijinioni, cinco
nojorijinijinioori tari shaajasaquiaari. Cuno caapiqui cureenoini-
jini, niquiriyatuuri jiyaniijia quiya quiarijia. Tamonuuri supueyo-
jua. Nojuaja jaara supuere, saaja rupaquijia rishiniutianiyari jiyaniijia
na quishacari. ¹¹ Cuno puereeta niquishano Casaa, teyanote tariu-
cuacaanu quijia quiquiaaricuajani, nojuajaari cuno cinco shaajasano
jiyaniijianucujinijinio quiquiaaricuaja. Majaari quiarijia na quiniu.
Na nuhuaji supuenutaniuhuari octavo jiyaniijia na quiniuria rupaqui-
jia. Na nuhuaji shaajasaanutaniya cutaraari.

¹² Cuno diez nacajaa quia niquishanojanihuahaj, cunoori diez jiyani-
ijianucuaranocuaaja. Nojoriiri cumaaca niquitiosaanutaniya saaja
niquiriyatu hora jiyaniijianucua nojori quiniuria cuno puereeta niquis-
hano Casaata. ¹³ Cuno diez jiyaniijianucuaari mariyata niishiriojonu-
taniya nojori cumaquiniuria cuno puereeta niquishano Casaa puetunu
nojori cumaacatajanaa, jiyaniijiajanaa cuno puereeta niquishano Casaa
quiniuria. ¹⁴ Nojoriiri Borrego Niquiojuata miaquetoojonutaniya. Bor-
rego Niquiojuaari nojori shocotanutaniya saaja, seetanujanaa Jiyani-
ijiajanaa na quiniuucua. ¡Nojuajaari puetunu jiyaniijianucujanaa
Jiyaniijia! Nata quiniaa pueyari Pueyaso saquiriojosano pueya, Neyanu
tojitiajacatuhuj.

¹⁵ Pueyaso seruuri socua cua sequeree:

—Quiaacuajaari cuno Paanatu niquirii puetunu mohuacaacuajanaa
cajiyo. Cuno mohuacaacuajaari queraatia tiaca, tamaatiuucua pueya-
pue, tamaatia rupaaca pocuajacajuhuj, tamaatia jiyacajinia quiijaca
pueyano. ¹⁶ Cuno puereeta niquishano Casaa quia niquishanoni, na
diez nacajaanio, nojoriiri cuno Paanatu niquiniu paniyaquiniutianiya
tojetaarucujanaa. Na cartetunutaniyari. Tojetaarucujanaa juhuasu
na tiujiatunutaniyari. Nojoriiri cuno Paanatu miaquenutaniya. Na
nuhuaji, na nuchua catijiatunutaniyari. ¹⁷ Pueyasojuanaacuajaari
cuno Paanatu paraa niishitiniutianiya naa nojori miiniuria cuno
Paanatutej, taa Pueyaso paniya na miishaanuracuajani. Naajuhuj,
Pueyasoori cuno diez jiyaniijianucua niishiriojotenutaniya jatiqui.
Naacuajitij, cuno jiyaniijianucuaari rojotoonutaniya nojori cuaara
cumaquiiiria cuno puereeta niquishano Casaa puetunu nojori cumaa-
catajanaa. Naacuajitij, Pueyaso panishanoori tohuateesaanutaniya taa
na sequequiaaricuajani. ¹⁸ Naajuhuj, cuno Paanatu quia niquishanoni,
nojuajaari cuno puereetuuca Roma tiacacuaja, miriqui sequeshiya Ba-
biloniatani. Nojuajaari puetunu mijiria jiyaniijianucujanaa tojitiquiaa
nojuaja.

18

Babilonia tiaca catetanujiniji pohuatasano

¹ Naa Pueyaso seru niquitiniu nuhuaji janiyatej, janiyari socua ta-
monu Pueyaso seru niquirii jiyocuacaanuji roseyanoni. Jiyanohua

cumaacaracaari quiriquiaa. Na shacantuuca cumaacaari jiya cuhuatariquiaa. ²Jiyocuacaanuji na rupaa paaretaree jiyanohuari. Seetanujuanaa miishocoriquiano na sequesano quiniuucua, nojuajaari juhua tariucua miishano na nacatariquiaa:

—¡Tari saniitiosaaree Babilonia tiaca! ¡Juhua niyarequetasaareeri cuno puereetuuca tiaca! Samaruhua quiquiorea jatanishaaree quiarijia saniniuuriija. Naaquiya quiquiorea quiniutianiyajaariuhuj, puetunu pueya soosano pueresano jaacuatujuaca casaajanaa quiquioranio. ³Puetunu jiyacajinijiniojuanaa pueyari sapojonuusaquiaari Babilonia tiacajinijinio niishitiojosanota, juhuajaniya sacuaraatia miijiaca nojori quiniurijuhuj, juhua mashaaseca. Naajuhuj, jiyaca jiyaniijianucuaari Babilonia tiacajinia sacuaraatia miijiosano miijioquiaajuhuj, cuno paanatu shiniuujuniuucua nojori. Babilonia tiacajinia quiniaa pueyari puetunu na panishano casamijianaa masejoquiaa puetunu jiyacajiniijianaa, saaja tama nojori cuaqueyajaaja nojori shuquiritiniuria. Naacujitij, cumaneecara na casami niqutiojonuujuaca pueyari jiyanohua cumaneecaraca pueya.

⁴Na nuhuaji, janiyari tamonu rupaa tojirii jiyocuacaanujini. Babilonia tiacajinia quiniaa Pueyaso pueya sequereeri:

—¡Cua muerasunaa, cuno tiacajiniji nia quiojore, niaa mariqui sesa miijiacara quiriohuari, cuno sesa miijiaca nia cojiniuucua! Nojorijiniji nia carajere, niaa mariqui puetunu nojoritijanaa cojiritiasaare naquiya miiniuuri. Nojoricuajaari quera saniitioshiya. ⁵Cuno tiacajinia sacuaraatia miishanoori puera jiyanohua caneyaree. Juhua tuhuananuri maashiyaree jiyocuacaanura. Pueyasocujaari sacuaraatia nojori miijiosano niishiya. Majaari socua tari na naata rejeretanu. ⁶Babilonia cuaara namishaaria taa naquiya na miijioquiaa tamasaacuaani. ¡Nojuaja cuaara saniitionu caminiuujishaaria saniniuujia, sesa na miiniuucua tamasa! Babiloniaari juhua pueya raatejoquiaari sacuaraatia na niishishano, sesa miijiaca nojori quiniuria juhua nojuajuhuj. Cunora, nojuaja cuaara puetunu Pueyaso juaaquiacajanaa raatesaaria, tama na suhuocojiniaajaaja mishinishanoni. ⁷Naatej, taa tama na cuaqueyajaaja na shuqiritiquiaa sacuaraatia na miishacaricuaani, saniniuujia cuaara naa jiyanohua miitiasaariajuhuj. ¡Jiyanohua tama na cuaqueyajaaja timitiaja na quiniuucuajuhuj, cuaara saniitiosaaria! Nojuajaari tama sequequiaajaacujua: “Janiyari niya cajiya shuquiriatiani, cumaacaraca maaji, pueya tojishano jiyaniijia. Janiyari maja mashiquioni. Majaari quenaaja cua taraajenu quiniutianiya”. ⁸Cunora, niquiriyatu juucajiniaaja, cuno Paanatuuri jiyanohua taraatia miitiasaanutaniya. Jiyacaritij, cusonuunuuri quiniutianiya, naquiya miiniu, miaajenujuhuj. Jiyacari catijiatasaanutaniyajaariuhuj. Jiyanohua cumaacaraca Jiyaniijia Pueyaso quiniuucua, nojuajaari naa saniitionutaniya cuno Paanatu.

⁹Mijiria jiyaniijianucuaari sacuaraatia miiniuria cojiquiaa cuno Paanatucujaja, tama nojori cuaqueyajaaja nojori shuquiritiniuria. Cunora, nojoriiri jiyanohua nujuquetunutaniya cuno Paanatu jaara saniitiosaare. Nojori niquishacari najaca tacaano jiya cajiniocua, Babilonia tiaca catesacari, nojoriiri nocua sapiyonuunutaniya.

¹⁰Nojoriiri na puerenuta na shootianutaniya tucuaaanuji, nojori

mariqui saniitiosaarejaariuhuj. Nojoriiri jiyacari naa sequenutaniya Babilonia tiaca:

—¡Juhuej! ¡Quiaa taraatia miishiya tiaca maniniuniaa! ¡Quiaari jiyanoehua cumaacaraca quijia juucua Babiloniana! ¡Quiaari canashiyaquiji saniitiosaaree!

¹¹ Puetunu jiyacajiniajanaa, cumaneecara na casami niqutiojonaa pueyari Babilonia tiacaacua nujuquetunutaniya. Nojoriiri jiyanoehua taraatia quiniutianiya nojori niishishacari, nojoritiucua tee na casami niqutiojore na cumaneecarani. ¹² Tucuacaanuji Babilonia tiacajiniara nojori nitiasano casami quijiaari nio: oro, plata, jiyanoehua panishano saijiuhuaj, noturu shipinijiosano sainio. Nitiasaaquiaajaariuhua maniniuqui toqueya linojiniji, sedajiniji toqueya, shaaruque toqueyajuhuj, juhua jiyaniijia cushishano, naatuque toqueyano. Nitiasaaquiaajaariuhua puetunu tamaatia shanohua jaanujua juhuana raquiquia, elefante quiaajajiniji shipinijiosano casamijiuhuaj, shanohua naanajiniji shipinijiosano casaminio. Nitiasaaquiaajaariuhua broncejiniji shipinijiosano casami, cumueeca casaajiniji shipinijiosano casamijiuhuaj, shanohua mármol saajiajiniji shipinijiosano casaminio. ¹³ Naajuhuj, nio shanohua jaanujua casami: canela, muesu nunacuhua, catijasocoriquiano shanohua jaanujua casa, mirrajuhuj, cuaqueyacua shuquiujutiasano shanohua jaanutajanio. Nitiasaaquiaajaariuhua jereeca uva caaca, shiyocua, maninia cashojuajuhuj, trigo jajaunio. Nitiasaaquiaajaariuhua casami niyotesano seya, borregohua, caballohua, caballohua jayotasocoriquiano shipinijiosano casaanio, cumaneecara niqutiojosocoriquiano pueyajuhuj seya nojori quiniuria. ¹⁴ Jiyacaritij, Babilonia tiacaari naa sequesaanutaniya:

—¡Majaari socua quia mioonu quiniutianiya jiyanoehua quia maniniucasano naana jajau, jiyanoehua quioojia jiaatiasano nocuani! ¡Puetunu quia timitiasano casaajanaari maja tari na quiniu quiniutianiya quiaara, shanohua niquishano casami, jiyanoehua cumaneecata quia masesano casaminio!

¹⁵ Puetunu cuno casami niqutiojonaa pueyajanaari jiyanoehua casamiriaca quia Babilonia tiacajinia quiniaa masejonuucua nojori casami. Maja nojori saniitiosaanurajuhuj, cuno pojoriiri tucuacaanuji na puerenuta nocua nujuquetunutaniya. Nojoriiri na sapuenuta naa na sohuarejotanutaniya:

¹⁶ —¡Juhuej! ¡Babiloniaari tiaca maniniu quijia juucua! Jiyanoehua shanohua niquishano quijiaari, taa casamiriaca maajicuaani, na cushishacari na maniniushitiaja casa. Naa shanohua niquishiyari juhua maaji linojiniji cohuajaque toqueya cushitishano, shaaruque toqueya, naatuque toqueyano juhua jiyaniijia cushishano, orojiniji shipinishano casaata na maniniushishacarijuhuaj, noturu shipinijiosano saitiajuhuaj, shanohua niquishano saitanio. ¹⁷ ¡Jiyanoehua queraatia puetunu na jiatiasano casamijianaari canashiyaquiji catijiasaaree juhua sohuanatuu!

Puetunu pueyajanaa, canapueete shoniniacu caminiajinia poonijionaa na cumaneecaracuajani, nojoriiri tucuacaanuji shootiariquiaa Babilonia tiaca catetasacari. Naa shootiatuquiaajaariuhua casami jaque-rojuaca tamaquicua tiaca tacatajajiniaqueya, rucoonaa pueya, buquejinia poonijionaa pueyajuhuj, nojori camarucuanio. Puetunu cuno pojorijianaari tucuacaanuji shootiariquiaa Babilonia tiaca catetasacari.

18 Nojori niquishacari najaca nujuuaano jiya cajiniocuara, nojoriiri naa sariyocuaturee:

—¿Socua tamonu tiacateeri quiya juhua cuno Babilonia tiacajuhua? ¡Shaaqui!

¹⁹ Jiyanhua nojori taraajenuta, nojoriiri jiyojua nanooree na nacaacua. Nojori nujuquenuta, nojoriiri naa sariyocuaturee:

—¡Juhuej! ¡Babiloniaari tiaca maniniu quiija juucua! ¡Puetunu shoniniacu caminiajania buque jiitianaajanaari jiyanhua casamiriaca quiya, jiyanhua casamiriaca Babilonia quiniucua! ¡Quiarjia saniniuujia, canashiyaquiija puetunujanaari shaajasaaree!

²⁰ Jiyacaritij, Pueyaso seruuri naa nacaree:

—¡Nia shuquiriri, jiyocuacaanu quijiacanaa! ¡Babilonia saniitiosaanuucua nia timiquiore, Pueyaso saquiriojosano pueyanaa, Jiyaniijia Jesu jiyaramiquishano pueyajuhua, Pueyaso sequesano caminiujuniano! ¡Pueyasocuaaari niaacua namirii Babilonia!

²¹ Jiyacaritij, cumueeca Pueyaso seruuri jiyanhua puereetuca saajia paree, juhua trigo jajau jacanojotaja saajia. Shoniniacu caminiajania na jatasacari, naa sequereeri:

—¡Taa cua jatasano saajia shaajemaa shoniniacu caminia queroni-jiniacuaani, quiaari naa shaajasaanutaniya canashiyaquiijijuhua, Babilonia tiacanaa! ¡Majaari socua quia niquishaanu quiniutianiya! ²² ¡Quia nuucuaari tojetaarucujanaa sanaaca quiniutianiya! ¡Majaari arpa taquiniojonu tojishaanu quiniutianiya socua, turequenaco jone-nenuunujuhua, trompeta jonenenuunio! ¡Puetunu tamaatia pooni-jiosano niishijiaa juaashiquiaraca pueyajanaari shaajasaanutaniya-juhua! ¡Majaari quenaaja niquiriyatu cureenu quiniutianiya quia quishaqui! ¡Naajuhua, majaari socua riiquiniuuni tojishaanu quiniutianiya! ²³ ¡Majaari quenaaja niquiriyatu samaritiu niquishaanu quiniutianiya noshiyano quia quishaqui! ¡Naajuhua, majaari camishacari queranacunuunu cojuatunenu tojishaanu quiniutianiya socua! ¡Quiaari naa saniitiosaareequij, jiyanhua cumaacaraca quia casami niquitiojona pueya quiniucua puetunu jiyacajiniajanaa! ¡Naajuhua, quiaari puetunu jiyacajinia quiijaca pueyajanaa shimiojona, sapojosano nojori quiniuria puetunu sacuaraatia casa quia miijiosanotajanaa! ²⁴ ¡Quiarjia saniniuujia, quiocua tiuutiashiyari pueyara Pueyaso sequesano camini-ujiniaa puecoošanu, Pueyaso saquiriojosano pueya puecoošanu-juhua, puetunu jiyacajiniajanaa pueya puecoošanuio!

19

¹ Naa cua tojinu nuhuajitij, janiyari jiyocuacaanu tojirii queraatia rupaacani. Naa sequeturiquiaa jiyanhuari:

—¡Jiyanhua maninia pa Pueyaso! ¡Nojuaja pa shuquiritiare! ¡Nojuacuaaari pa Jiyanoojia! ¡Nojuajaari jiyanhua shacantuuca, tojetaarucujanaa maninia miijia na quiniucua! ¡Puetunu cumaacaracajaariuhua! ² ¡Maninia na niishiniucua puetunu cuno Paanatu miishano sacuaraatiajanaa, nojuajaari maninia na saniitioree! ¡Cuno Paanatuuri jiyacua quiijaca pueya sesoquiaari tojetaarucujanaa, sacuaraatia na miijiosano na niishitiojosanota! ¡Pueyasoori cunora na saniitioree! ¡Naajuhua, Babilonia puecoošanuucua Pueyaso tojitiajaca pueya, Pueyasoori na namirijijuhua!

³ Jiyocuacaanuji rupaaca cua tojishanoni, nojoriiri naa sequero-huacuhuj:

—¡Jiyanohua maninia pa Pueyaso! ¡Nojuaja pa timitiariquia pueyara-caanu! ¡Pueyaracaanu cuno Paanatu saniitiosacari, majaari na najaca turetano quiniutianiya quenaaja!

⁴ Cuno veinticuatro niishijiaca jiyaniijianucua, cuno cuatro saminio casaajuhuj, nojoriiri jiyacari jiyocuara jacamaturee Pueyasocuara. Nojoriiri naa timitiaree Pueyaso, cante na shacantuuca cumacacajinia cajiriquiaacuajani. Nojoriiri naa na sequeturiquiaa:

—¡Cuaara naa quiiriatej! ¡Pa Jiyaniijia cuaara timitiasaaria pueyara-caanu!

⁵ Jiyacaritij, tamonu rupaari tojishaaree Pueyaso cajishaquijijianaa. Naa sequeriquiaari:

—¡Pa Pueyaso nia timitiariquia, puetunu na tojtiajaca pueyanaa! ¡No-juaja nia shuquiritiare, tojishano pueyanaa, niajanijajuhuj, to-jishoo pueyanaa!

Borrego Niquiojua camishocoriquiano maaji maniniushishacari

⁶ Jiyacaritij, janiyari queraatia pueya tojirii jiyanohua nacaanoni, juhua puereetuca sararajua, juhua miacana majacunujuhuj. Puetunu nojorijianaari naa sequeriquiaa:

—¡Jiyanohua maninia pa Jiyaniijia Pueyaso! ¡Nojuaja pa timitiariquia pueyaracaanu! ¡Nojuacuajaari Jiyaniijijajanaa! ¡Puetunu cumaacaracajanaajuhuj! ⁷ ¡Pa shuquiriri! ¡Pa timiri! ¡Quiarijiacuajaari Borrego Niquiojua caminiu juuca, pueyaracaanu na saquiriojosano pueya rupuenura nojuaja! ¡Cunora, nojuaja pa timitiare jiyanohua! Necoranoori tari maniniushirii na caminiuria. ⁸ Maniniuqui lino toque cushitishaareeri, cohuajaque shacantuque. Necoranoni, nojoricuajaari puetunu nocua tiuujica pueyajanaa. Naajuhuj, cuno cohuajaque na toqueni, cunocuajaari puetunu maninia nojori miiijosanojuanaa.

⁹ Pueyaso seruuri jiyacari cua sequeree:

—Quia naajiotare nio: “Shuquiriaatia quiijica cutaraari noo pojori, canapuate Borrego Niquiojua camishacari queranacujuajiniara masu-sanoni”.

Naa cua sequeree socuaari:

—Cua sequesaroni, cunoori seetanu Pueyaso rupajanaa.

¹⁰ Jiyacaritij, janiyari Pueyaso seruucua mojoquetareeni, juhua Pueyasocuara, nojuaja cua timitianura juucua. Cua sequequee saajaari:

—¡Maja pueyanonaa! ¡Maja naa quia miiniu! Janiyari nareja Pueyaso seruni taa quiajanijacuaani, juhua quia tapueyocacajuhuj, noo pojori canapuate pa Jiyaniijia Jesujiniji pohuatanu tarinitiaashijiacani. ¡Pueyasocuara quia mojoquetare cutara, quia timitianura nojuaja! Puetunu Jesujiniji pohuatasanojuanaani, cunoori Pueyaso Sohuanu ni-shitishano na pohuatanaa, janiya, niajanijajuhuj.

Cohuajohuana caballo nijinia cajiniajiniji pohuatasano

¹¹ Na nuhuaji, janiyari jiyocuacaanu Pueyaso quiquio niquirii tarucua riatasanoni. Janiyari tii niquirii cohujohuana caballoni. Na nijinia cajiniaari caapiqui sesacaraca quiriquiaa. Nioori na sesaca: “Na sequesano miiija”, “Seetanu sequejajanaa”. Naari na sesaca.

Tojetaarucujanaa maninia miijia na quiniuucua, puetunu niishijia-janaajuhuj, nojuajaari seetanujanaa maninia saniitiojua sesa miijia. Naajuhuj, majaari najuhuaana na miaquetoojonu na paraata. ¹² Puetunu casaajanaa niqijia na quiniuucua, na namijiaari juhua mani rimianacuyano niquishaariquiaa. Jiyaniijianucuarano shipinijiosano nacaqueya pasacoriquiaa na nacaacuaari. Cunoori seetanujanaa Jiyaniijiajanaa na quiniuucua. Tamonu na sesaari naajiotasano quiriquiaajuhuj. Cuno sesaari tama na niishishanojuaaja cutara. ¹³ Na toqueeri nanacatuque quiriquiaa. Nojuajaari tariucuaaanu nio sesaraca quijiacuaja, “Pueyaso Rupaa”. ¹⁴ Jiyocuacaanu nata quiniaa na soldadohuari na nuhuaji sacuariquiaa. Puetunu nojorijianaari cohuajohuanaca caballohua nijinia cajituriquiaa. Naajuhuj, nojoriiri linojiniji cohuajaquijasano toqueyaraca quiriquiaa, jiyanojua cohuajaqueya tojetaarucujanaa. ¹⁵ Nojori Jiyaniijiajanaa rupaamaji, nijiniaquetucua mueruuri puereeta mueranacuriquiaa. Cunoori puetunu mijiria jiyacajinijanaa na tojtiaashijiaa na puetujutajara. Nojuajaari jiyacari nojori Jiyaniijiajanaa quiniutianiya, nojori na jitianura jiyanojua na cumaacata. Puetunu cumaacaracajanaa Pueyaso juaaquiata nojori saniitionutaniyari, naatej, taa uva rapijioshiya na caaca shoonoracuaani. ¹⁶ Na tucuaque toqueecua, na ruhuajacuucujuhuj, naa naajiotasanoori quiriquiaa: “Jiyaniijianucua Jiyaniijiajanaa”, “Camarucua Camarnujanaa”.

¹⁷ Na nuhuaji, janiyari tamonu Pueyaso seru niquirii pananuucua nujuaanoni. Nojuajaari puetunu jiya cajiniocua jaacuatujua casaajanaa jiiquioonuuriquiaa jiyanojua, tevano jaacuatujucate shu miojonuujuacacujani. Naa cuno jaacuatujua casa sequeriquiaari:

—¡Miji, niya nia rerejosee! ¡Pueyasoori nia queranacutenutaniya!
¹⁸ ¡Nojuajaari queraatia shu nia mianuutenutaniya! ¡Cuno shuuri jiyaca jiyaniijianucua shu, soldadohua camarucua shu, jiyanojua cumueeca puereyaquijiaa shu, caballohua shu, na nijinia cajituniana pueya shujihuj! ¡Camarucuaaju pueya shuuri quiniutianiyajuhuj, poonijiotasano pueya shu, tojishoo pueya shujihuj, tojishano pueya shunio!

¹⁹ Jiyacaritij, janiyari cuno puereeta niquishano Casaa niquiriini, mijiria jiyaca jiyaniijianucuanio, puetunu nojori soldadohuatajanaa. Puetunu nojorijianaari tariucua rerejonu quiriquiaa na miaquetoojonura cohuajohuana caballo nijinia cajianota, nata quiniaa na soldadohuatanio. ²⁰ Cuno na naca pishano cushiriinohua puereeta niquishano Casaari jiyacari quiasaaree, narta puereeta niquishano Casaanio. Nojuajaari cumaacaraca quiriquiaacuaja mijiria quijiaa pueya na sapojonura na cumaacata na miishanota, nojori na tiutiniuria na naca pishano cushiriinohua Casaacua. Naa na sapojonuucua mijiria quijiaa pueyatej, nojoriiri nojori cuaqueya tarinitiaquiari na naca pishano cushiriinohua Casaa sesa naajiotasaanura nojoriicua. Naajuhuj, nojoriiri juhua cuno puereeta niquishano shipinishano Casaacuara mojuquetacojua quiquiaari juhua Pueyasooacara. Jiyacaritij, cuno caapiqui puereeta niquishano Casaari azufreta noshiyano mani quiquiojinia quejoosaaree saminiucua. Nojoriiri tii pueyacaanu naquiyaa miishaanutaniya. ²¹ Puetunu nojoritia quiniaajanaari saniniujia puecoosaaree nijiniaquetucua mueruuta, teyanote cohuajohuana caballo nijinia cajiyano rupaamaji mueranacuriquiaacua-

jani. Puetunu jiya cajiniocua jaacuatujuaca casaajanaari nojori shu tooquioree jiyanoehua.

20

Mil marijiara Satanás morosaanujiniji pohuatasano

¹ Na nuhuaji, janiyari tamonu Pueyaso seru niquirii jiyocuacaanuji roseyanoni. Puequeetuuju raa riatataja patariquiaari, puereetiuyocua cumayocua shipinishano casaanio, Pueyaso Paraca na morotajara. ² Pueyaso seruuri cuno naatuhuaana Naaqueru juhua cohuaniquia niquishano quiasee. Na morojoreeri mil marijiara. Nojuacuajaari cuno tariucuaaanu Soconu, samaruhua jiyaniijajanaatuhuj. Na sesaari “Satanás”. ³ Maninia na morojonu nuhuaji, Pueyaso seruuri puequeetuuju raama na jartaree. Raa tiotiu mishiquiorohuari. Tiootiu rupanacureeri, maja na riatasaanura. Sesaacaari naa mishiquiosaareequij mijiria quijiaca pueya na sapojyaquiniucuaaji cuaara na shocojorejaatijia mil marijia. Cuno mil marijia jaara na shocojore, rupaquijiara cartesaanutaniuhuari na saniitiosaanuhuarajanaa cutara.

⁴ Janiyari jiyacari queraatia pueya niquirii jiyaniijia cajitiucujinia cajitiuyanoni. Nojoriiri nequesoreenaara Pueyaso jiyatesano pueya quiriquiaa, mijiria quijiaca nojori jiiitanura. Janiyari noo pojori sohuanuhua niquiriijiaaniuhuj, canapue te nacareesaquiaaricujani nojori poojotanuucua pa Jiyaniijia Jesujiniji, Pueyaso rupaa tojitijaca nojori quiniucujuhuj. Nojori cutaraari cuno na naca pishano cushiriinohua Casaacuara jacamatiyuaquiquiaari tojetaarucujanaa, juhua nojuaja niquishano shipinishano Casaacuarajuhuj. Naa-juhuj, majaari nojori shanacunu quiquiaari cuno puereeta niquishano Casaa sesa naajiotasaanura nojoriicua. ¡Cua niquishacari, nojoriiri cua niquiara samiitiacoquee, jiyaniijianucua nojori jiyatesaanura! Mil marijiaari nojori shocojoree, jiyaniijianucua nojori quishacari pa Jiyaniijia. ⁵ Saniniujia, narta macunucuaari maja na samiitiani-jiosaanu quiriquiaa cuno mil marijia cuaara shocojorejaatijia. Nio macunucua samiitianiijosacari cua niquishanoni, cunoori coteenujanaa Pueyaso samiitianiijosacari pueya. ⁶ Shuquiriaatia quijiaca cutaraari noo pojori, canapue Pueyaso samiitianiijionutaniya coteenujanaacujani. Nojoriiri jiyacari tojetaarucujanaa maninia quijiacara jatanishaanutaniya pueyaracaanu rishijiaca nojori quiniuria. Naacujitij, Pueyaso ruuretajaca pueya jaara puetunu shaajasaarejanaa, jiyacari majaari Pueyaso pueya pacutenu quiniutianuhua cusonu. Saniniujia, nojoriiri pueyaracaanu shamaatia timitianutaniya Pueyaso, Cristonio. Naajuhuj, nojoriiri jiyaniijianucua quiniutianiya Cristota, mijiria quijiaca nojori jiiitasacari cuno mil marijiara.

Sesaaca saniitiosacarijanaa cutara

⁷ Cuno mil marijia shocojonu nuhuaji, Satanásri tohuatesaanutaniuhua na nujuatesaquiji. ⁸ Nojuaja jaara tohuatesaare, quianutaniyari puetunu jiyacajinia quijiaca pueyajanaa na sapojonura, Gog pueya, Magog pueyano. Nojori na sapojonuta, nojuajaari puetunu jiyaca jiyaniijianucujanaa rerejotenutaniya, puetunu nojori soldadohuatajanaa, nojori miaquetojonura pa Jiyaniijia, puetunu na pueyatajanaanio. Nojori soldadohuari jiyanoehua queraatia pueya quiniutianiya, juhua

shoniniacu caminia shuriuquioco paajia jaaquia. Majaari na naata serojosaanu.

⁹ Cua niquishacari, tojetaarucuajanaa jiyanoehua queraatia pueyari nijioriQUIAA. Jiya pueturiQUIAA puetunujuanaari, juhua tereya nojori quiniucua. Nojoriiri Pueyaso panishano tiaca cosejoree, cuno tiaca shocua quijiaca Pueyaso pueyano. Jiyacaritij, maniiri jiyocua-caanuji tinishaare nojoriicua. Puetunu cuno pueyajanaari catijiasaaree tojetaarucuajanaa. ¹⁰ Satanás, cante puetunu cuno pueyajanaa sapojoreecuajani, nojuajaari caminiajina jatasaree tee cuniqui mani noshiya azufretacuajani. Tariucuacaanu tii jaqueroosaaQUIAAricua-jaari na naca pishano cushiriinohua Casaa, narta puereeta niquishano Casaanio. Cuncuajaari mijiria quijiaca pueya sapojoQUIAAricuaja, na naca cushiriinohua Casaacuara jacamatujuaca nojori quiniuria. Nojoriiri tii miitiasaanutaniya tojetaarucuajanaa pueyaracaanura, juuca, niucuanio.

Macunucua nequesoreesacari cohuaja cajitiu tacoji

¹¹ Na nuhuaji, janiyari Jiyaniijajanaa cohuaja puereetuca cajitiu niquiriini, tii cajinianio. Na niquiara, jiyari puetunu shaajequuejanaa, jiya cajiniocuanio. Majaari socua na niquishaanu quiriohua. ¹² Jiyacaritij, janiyari puetunu macunucuajanaa niquirii nujuatiuyano cuno cohuaja cajitiu tacojini; jiyaniijianucua, tojishoo quijiaca pueyano. Jiyacaritij, na cohuaja cajitiujinia cajiniaari na nequesoreetuneeca riataqueree, socua tamonu nequesoreetuneenio. Cuno nequesoreetuneejinia naajiotasano quiyacuajaari Pueyaso saquiriojosano pueya sesaca, pueyaracaanu rishijiaca nojori quiniuria. Puetunu cuno tariucuacaanu macunucuajanaari nequesoreesaaree puetunu nojori miishanojinijijianaa, taa cuno nequesoreetuneecajinia na naajiotasaaQUIAAricuajani. ¹³ Cua niquiara, macunucua quiquiojini racatasano puetunu cusonuuno sohuanuhujanaari na cuaqueya rupuetesaarohua, shoniniacu caminiajina moquecono, jiyacua moquecononio. Puetunu nojorijianaari nequesoreesaaree taa miijiaca nojori quiQUIAAricuajani. ¹⁴ Na nuhuaji, Cusojuana, macunucua Quiquiojuhuaj, nojoriiri mani noshiyano caminiajina jaqueroosaaree. Canapuete cuno mani noshiyano caminiajina quejoosocoriquiano pueyacuajani, nojoriiri cusonuuno pacuteriquianocujaja. ¹⁵ Naacuajitij, canapuete Pueyaso samiitianijosocoriquianohua nequesoreetuneejinia naajiotasoo quiriquiaani, nojoriiri mani noshiyano caminiajina quejoosaaree pueyaracaanura.

21

Quiarinio jiya cajiniocujiniji pohuatasano, quiarinio jiyajinijinio

¹ Na nuhuaji, janiyari quiarinio jiya cajiniocua niquiriini, quiarinio jiyano. Coteenujanaa jiya cajiniocuaari tari shaajasano quiriquiaa, jiyano. Naajuhuj, majaari shoniniacu caminia quiniu quiriquiaa tari. ² Janiyari jiyacari quiarinio Jerusalén tiaca niquirii Pueyaso Quishaquiji roseyanoni. Tojetaarucuajanaa shanohua maniniushitishano quiriquiaari, juhua neyacarano camishocoriquiano niyaco. ³ Naajuhuj, janiyari Jiyaniijajanaa cajitiujiniji tojirii jiyanoehua naca-nuni. Naa sequeriquiaari:

—¡Pueyaso Quiquioori pueya tajinia quiya tari! ¡Nojuajanaari nojoritia quiniutianiya! ¡Nojoriiri na pueya quiniutianiyajuhua! ¡Nojuajaari nojori cojiniutianiya, nojori Jiyaniijiajanaa na quiniuria, maninia na jiitianura nojori! ⁴ ¡Nojuajaari puetunu nojori namijiaacajanaa tuujunutaniya! ¡Jiyacaritij, majaari pueya niishiniu quiniutianiya shaajenu, sapuenu, taraajenu, nootunenunio! ¡Puetunu cuno taraatia miiniucuaajaari tari shaajasano quiriquiaa!

⁵ Na nuhuaaji, Jiyaniijiajanaa cajitiujinia cajiniaari naa sequeree:

—¡Cua tojiri! ¡Janiyari quiariniora miijia puetunu casaajanaani!

Cua sequereeaariuhuaaj:

—Cua sequesano quia naajiotare. Seetanujuanaari cua sequesano. Janiyacuajaari cua sequesano tohuateequiaa pueyaracaanuni.

⁶ Cua sequerohuariuhuaaj:

—Cua sequesano cua miishocoriquianoni, janiyari tari na tucutataree miiniuni. Janiyari quijiajuhanani. Janiyari pueyaracaanu quiriquianojuhuaaj. Janiyari puetunu casaajanaa coretanijiani, na shaajajajuhuaaj. Cante jiyamueyani, janiyari pueyaracaanu pacartaja samo nacajiniji na raatenutaniyani, na naatanuhuaa. Cuno samiitianijia mohuacani, cunoori cua Sohuanucuaaja. Janiyari nareja na niqitioquiaani. Majaari na sami cua masenu quiquiaa na ratuna. ⁷ Cante puetunu casaajanaa rejeretaja quijiani, cua tojjia na quiniucua, nojuajaari puetunu cua jiitiasanojuanaa jiitiana quiniutianiya. Nera, janiyari na Pueyaso quiniutianiyan. Nojuajaari quiyanu quiniutianiyacujua. ⁸ Sesa pueya saniniuujia, nojoriiri puetunu quejoosaariquianojuanaa azufreta noshiyano mani caminiajinia. Naa quejoosaanutaniyari nio pojori: Pueyaso tojitiaashijiaca pueya, puerejaca nojori quiniucua, Pueyaso Rupaacua tiuyashijiaca, soosano pueya tama sesa nojori miiniucuaajaaja seseno, pueya moojuaca, na camishoo maajipohua numuetucunujuaca, shimiacuri, shipinijosano casaacura jacamatujuaa juhua Pueyasocura, puetunu cuaracashionuujuaca pueyajanaani. Puetunu cuno pojorijianaa jaara nequesoreesaare, nojoriiri puetunu taanuusaanutaniyajanaa Pueyaso shuriucuaaji. Nojoriiri mani noshiyano caminiajinia quejoosaanutaniya, pueyaracaanu naquiya nojori miishaanura tii. Cunocuaajaari sequeshiya, “pueya pacutesacariuhua cusonu”.

Quiarinio Jerusalén tiacajiniji pohuatasano

⁹ Janiyacuajaari tari nia pohuataree cuno siete Pueyaso seyajinjini, canapute siete miacojua patootanaa quiquiaaricuaajani, mishaja Pueyaso saniitotajata. Niquiriyatu nojorijinijinioori cucua nimiaa. Nojuajaari cua sequesea:

—Miji. Quia niqitiriiria Borrego Niquiojua niquiorano. Nojuacuajaari pa Jiyaniijia pueya, na quiquiojaariuhuaaj.

¹⁰ Jiyacaritij, nojuajaari cua sohuanu jiyataaree jiyanojua puereetuca jyaconaja tuhananuucua. Tiji cua niqitirii cuno puereetuca quiarinio Jerusalén tiacaari, Pueyaso shuriucuaaji roseyano. Tojetaarucuaajanaa shanohua maniniushitishano quiriquiaari.

¹¹ Nenecuariquiaari Pueyaso shacantuca cumaacata. Na nenecuanuuri juhua jiyanojua panishano saajia nenecuanu quiriquiaa, juhua jaspe saajia. Maatia niqishiyari na tamajiria, juhua cohuaa motiiquio. ¹² Cuno tiaca shocua matacaari jiyanojua

puereetuca quiriquiaa, jyaconajahuaj. Tiaca shocua matacaari doce tiotiuhuaraca quiriquiaa. Niquiriyatu Pueyaso seruuri puetunu cuno tiotiujinijijianaa nujuaturiquiaa. Naajuhuj, supuetana Israel doce niquiohuacuajinio supueno doce pueyapue sesacaari puetunu cuno tiotiuhuacuajianaa naajiotasano quiriquiaa. ¹³ Jiuujianaraca tiotiuhuari pananu muetasamajiria quiriquiaa, cuno tiaca matacaacua. Socua jiuujianaraca tiotiuhuari quiriquiaa pananu muetasamaji miaquetajara. Naajuhuj, socua jiuujianaraca tiotiuhuari pananu muetasamaji muenecara quiriquiaa. Socua jiuujianaraca tiotiuhuari quiriquiaa pananu tiuquishocora. ¹⁴ Cuno tiaca matacaari doce puereetujuaaca saicua nujuatariquiaa. Borrego Niquiojua doce jiyaramiquishano pueya sesacaari cuno doce saicua naajiotasano quiriquiaa.

¹⁵ Cuno Pueyaso seru cuata pocojoriquiaani, nojuajaari orojiniji shipinishano shanacujutaja maca mueturiquiaa. Na mueturiquiaari nata na shanacujunura cuno tiaca, na tiotiuhua, tiaca shocua mat-acanio. ¹⁶ Cuno tiacaari jyanohua tucuhuana quiriquiaa. Na cajiniocuaari mariyata juhua na tucuhuana quiriquiaajuhuj. Maninia tiasano quiriquiaari, maja rimiajata. Pueyaso seru shanacujunu nuhuaji puetunu cuno tiacajanaa, mariyata dos mil dosciento kilómetro quiriquiaari na tucuhuana, na jyaconaja, na cajiniocuanio. ¹⁷ Na nuhuaji, tiaca mataca shanacujureejaariuhuj. Setenta y cinco metro jitiariquiaari. Pueyaso seru shanacujutaja tucuaneri mariyata juhua mijiria pueyano shanacujutaja quiriquiaa. ¹⁸ Cuno tiaca matacaari puetunu jaspe saijinijijianaa shipinishano quiriquiaa. Tiacaari saniniuujia saaja orojiniji shipinishano quiriquiaa, maja quenaaja tamonu casaata cojitishano. Naacujitij, cuno oroori juhua cohuaja motiiquio quiriquiaa. Maatia niquishiyari na tamajiria. ¹⁹ Cuno mataca nuju-ataja doce sairi queraatia tamaatiujiaaca shanohua niquishano saitia maniniushitishano quiriquiaa. Cuno mataca nujuataja doce saijinijini, coteenu saajaari jaspe saitia maniniushitishano quiriquiaa. Jaspe sairi neeruca cojitishano pocojuanaqueta. Segundo saajaari zafiro saitia maniniushitishano quiriquiaa. Zafiro sairi nentujuaaca naata. Tercero saajaari ágata saitia maniniushitishano quiriquiaa. Ágata sairi tejatujuaaca neeruca. Cuarto saajaari neeruca esmeralda saitia maniniushitishano quiriquiaa. ²⁰ Quinto saajaari ónice saitia maniniushitishano quiriquiaa. Ónice sairi pocojuanaque naatuca cojitishano. Sexto saajaari naatuca cornalina saitia maniniushitishano quiriquiaa. Séptimo saajaari crisólito saitia maniniushitishano quiriquiaa. Crisólito sairi tiiijaaca. Octavo saajaari berilo saitia maniniushitishano quiriquiaa. Berilo sairi neerujuaaca juhua naashi. Noveno saajaari topacio saitia maniniushitishano quiriquiaa. Topacio sairi jyanohua pocojuanaque. Décimo saajaari crisoprasa saitia maniniushitishano quiriquiaa. Crisoprasa sairi jyanohua neerujuaaca. Undécimo saajaari jacinto saitia maniniushitishano quiriquiaa. Jacinto sairi jariya naata naatuca. Duodécimo saajaari jyanohua nentuuca amatista saitia maniniushitishano quiriquiaa. Puetunu cuno saijianaari jyanohua shanohua sai, shacantujuaaca. ²¹ Tiaca shocua mataca doce tiotiuhuari noturu shipinijosano saijiniji shipinijosano quiriquiaa. Niquiriyatu tiotiuuri niquiriyatu noturu saajajiniji shipin-

ishano quiriquiaa. Naa shipinijosano quiriquiaari puetunu cuno doce tiotiuhuajanaa. Tiaca nuucuacaari tojetaarucuajanaa orojiniji shipin-
ishano quiriquiaa. Jiyanhua maninia cuno oro quiniuucua, Pueyaso
shacantuucaari na tohuariquiriquiaa, juhua motiiquo cohuajaco na
quiniuucua.

²² Cuno tiacajinia, majaari cua niqiniu quirii Pueyaso Quishaqui,
tii pa rupuenura nojuaja. Cuniqi, majaari socua Pueyaso Secojua
tia panishaanu. Puetunu cumaacaracajanaa Pueyasojuanaari tii quiy-
acuaja, Borrego Niquiojuajuhuj. Puetunu cuno tiacajanaari nojori
quishaquicuaja, pueyaracaanu nojori rupuesano pa quiniuria. ²³ Cuno
tiacaari maja na paniniu pananu na cuhuatariquiano, racajuhuj.
Pueyaso shacantuuca cumaacacuajaari na cuhuataa. Borrego Niquio-
juacuajaari na cuhuatana. ²⁴ Puetunu jiyacajinia quijiaca pueyajanaari
cuno tiaca caaniuji quijiaca quiniutianiya. Puetunu jiyaca jiyani-
jianucuaajanaari socua nojori panishano casami patootanutaniya no-
jori cuhuatana tiacajiniara, Jiyaniijiajanaa nojori niquitiosocoriguiano.
²⁵ Cuno tiaca tiotiuhuari pueyaracaanu riataquesano quiniutianiya,
juuca na quiniuucua pueyaracaanu. Cuniqi, majaari quenaaja niu-
cua niishishaanu quiniutianiya. ²⁶ Jiyajinia quijiaca pueyari socua na
panishano casami patootanutaniya cuno tiacajiniara. Cuno tiacaari
jiyanohua nojori timitiasano quiniutianiya. ²⁷ Saniniuujia, maja cu-
taraari sesa casaa tiuquinishaanu quiniutianiya cuno tiacajinia. Naa-
juhuaj, majaari sesa miijia tiuquiniu quiniutianiya tii, sajonuujua-
canio. Saaja noo pojori cutaraari tii tiuquitianutaniya canapue sesacate
pueyaracaanu rishijiacarano Borrego Niquiojua naajioneejinia naajio-
tasano quiyacuajani.

22

¹ Na nuhuaji, Pueyaso seruuri cua niqitirii pueya samiitianijiotaja
moo, cohuajanacu tojetaarucuajanaa. Nenecuariquiaari. Cuno mohua-
caari Jiyaniijia Pueyaso cajitiujiniji pacartariquiaa, tee Borrego Niquio-
jua cajiyajaaniuhuj. ² Samiitianijia naanaari tiaca nuu jiuujiaaco nuju-
aturiquiaa, cuno moo shuriuquiocojuhuaj, niqijiria, na taquijiriano.
Cuno naanaari puetunu racarajanaa muetujuaca. Naacuajitij, puetunu
marijarajanaa, doce caminiujiya muetunuuri. Na muecaari maninia,
puetunu jiyacajinia quijiaca pueyajanaa naarajotajara. ³ Cuniqi, ma-
jaari socua Pueyaso sesacasano casaa quiniu quiniutianiya. Naacuajitij,
Pueyasojuanaa, Borrego Niquiojuajuhuj, nojoricuajaari cuno tiaca-
jinia quijiaca quiniutianiya, Jiyaniijiajanaa cajitiu quiniuucua tii. No-
jori tojtiajacaari nojori timitianutaniya pueyaracaanu tii. ⁴ Nojoriiri
Pueyaso jiquioco shootiajaca quiniutianiya. Na sesaari nojori jiniji
naajiotasano quiniutianiya. ⁵ Cuniqi, majaari niucua niishishaanu
quiniutianiya. Tii quijiaca pueyari maja na paniniu quiniutianiya
samaritiu, pananunio. Jiyaniijia Pueyasojuanaacuajaari nojori cuhu-
atanutaniya. Nojoriiri jiyanijianucua quiniutianiyajuhuj, puetunu
Pueyaso shipinishanojuanaa nojori jitianura pueyaracaanura.

Jesucristo quera tiuquihua

⁶ Na nuhuaji, Pueyaso seruuri cua sequeree:

—Cua niqitishano quiajaniani, cua sequesanojuhuaj, puetunu
cunojuanaari seetanujanaa. Puetunujuanaari tohuateeriquiano.

Pueyasoori na Sohuanuta niishitiquiaa na sequesano caminiujiuniaa pueya, nojori pohuatanura pueya niquiara na niishitiniu panishano. Naajuhuaaj, nojuacuajaari quiarijia na seru jiyaroree, na tojitiajaca na niishitiniuria taa quiari naataja nojuaja tucuatantaniya puetunu na sequesanojuanaani. ⁷ Pa Jiyaniijiacuajaari naa sequeya: “Janiya quera tiuquiuhua niaacuani”. Shuquiriaatia quijiaca cutaraari noo pojori, canapuate nio naajioneejinia Pueyasojiniji niishitishano tojijiacani.

⁸ Janiyajanaacuajaari nio cua naajiotasano niquiniani, na tojiniajuhuaaj. Janiya Juanni. Naa cua niquiniu nuhujitij, cua tojinia nuhujijuhuaaj, janiyari Pueyaso seru pajama mojoquetareeni. Janiyari naa mojoquetaree nojuaja cua timitianura juucuan, juhua Pueyaso.

⁹ Nojuajaari cua sequequee saaja:

—¡Maja naa miiniu pueyanonaa! Janiyari Pueyaso serujuhuaaj, juhua quiajanijuhuaaj, juhua puetunu quiarta Pueyaso sequesano caminiujiuniaa pueyajuhuaaj. Naajuhuaaj, nio naajioneejinia naajiotasano tojijiacapueyani, nojoriiri cuarta Pueyaso seyajuhuaaj. ¡Pueyasojuanaa quia timitiare cutara!

¹⁰ Cua sequereajaariuhuaaj:

—Pueyaso niishitishano nio naajioneejinia quia naajiotasani, cunoori maja saa quiaraja. Puetunu pueyajanaa cuara na niishiirianoj. Puetunu niya naajiotasano cuajaari quera tohuateya. ¹¹ Naacuajitij, canapuate sesa na miiniu tarinitianu paniaquiyani, sacuaraatia miiijiojuacajuhuaaj, cuara na tarinitiaaquiiriaqui. Saniniuujia, canapuate maninia miiijiojuaca cutarani, saaja Pueyasora poonijionuujuacajuhuaaj, nojori cuara tarinitiaaquiiria maninia nojori miiniuujuhuaaj.

¹² Pa Jiyaniijiacuajaari naa pa sequeya:

—¡Taaquiririnij! ¡Quera tiuquiuhuanijia! Janiyari cua tojitiajaca cua niqutiojosocoriquiano casaa tiuquitianutaniuhuan. Janiyari puetunu nojorijianaa nareja niqutiojonutaniyani, maninia nojori miiniuucua quiria, nojori miishano jaara maninia quiri. ¹³ Pueyaso Rupaa cua quiniuucua, janiyari puetunu Pueyaso sequenu panishanojuanaa caminiujiuniani. Janiyari quijiajuhuanani. Majaari cua supueno quiquiaari. Janiyari puetunu casaajanaa coretanijiani, na shaajiriquianojuhuaaj.

¹⁴ Shuquiriaatia quijiaca cutaraari noo pojori, canapuate juhuacarijia nojori jiuujia jeequecanu Borrego Niquiojua nanacatani. Nojoriiri juhua cohuajaque toqueyaraca quiniutianiya cua niquiara. Naacuajitij, nojoriiri tiuquitianishaanutaniya Pueyaso quijia tiacajinia, nojori mioonura pueyaracaanu pueya rishitijia naanajiniji. ¹⁵ Saniniuujia, nio pojoriiri Pueyaso tiaca mataca tamajiria jateenutaniya: sacuaraatia casaa miijiaca, shimiacuri, na camishoo maajipohua numuetucunujuaca, narta pueya puecojuaca, shipinijosano casaacura jacamatujuaca juhua Pueyasocura, cuaracashijionu porocua pueyanio.

¹⁶ Janiyacuajaari cua seru jiyarorucuaa quiocuan, na niishitiniuria quiajanija puetunu niya quia naajiotasanojuanaa, saniniuujia Pueyaso pueya maapue niquiara na caminiujiushaanura. Janiyacuajaari Jesuni, supuetana David niquiohuacuajinio caneno pueyajinijinio supueno, Jiyaniijiajanaa cua quiniuria David niti. Naajuhuaaj, Pueyaso Niyanu cua quiniuucua, janiyari noo rijiani, joojeatej, taa janiyajiniji naajiotasano quia tariucuacaanu Pueyaso Rupaaajiniacuajiani.

¹⁷ Pueyaso Sohuanuuri Borrego Niquiojua niquioranota naa sequetiuya: “¡Miji Jiyaniijianaa!” Canapuete naa nio naajioneerjinia naajiotasano tojiyani, nojori cuaara naa sequeerajuhuaaj: “¡Miji!” Cante jiyamueyani, nojori cuaara niiria, Pueyaso samiitianijiotaja mohuacajiniji nojori ratunura. Na ratunaa pueyari, maja na ratunu sami na cumaneeca mashiniquishaanu.

¹⁸ Cante nio naajioneerjinia juhuacarijia Pueyaso niishitishano tojirini, taa Pueyaso miiniutianiyani, janiyajanaari nia numooteyani, majaari quenaaja na pohuatasano nia jataniniu. Cante niya pohuatasano maateya socuani, Pueyasoori na saniitionutaniya nio naajioneerjinia na pohuatasano naquiya na miitiaja casaata. ¹⁹ Naajuhuaaj, cante nio naajioneerjinia pohuatasano cuaracashitijiani, Pueyasoori cuno pueyano taanuunutaniya, maja na quijia tiacajinia na tiuquiniuria. Naacuaajitij, majaari nojori mioonu quiniutianiya cuno tiacajinia naana jajau, pueyaracaanu rishijiaca nojori quiniuria, taa nio naajioneerjinia na pohuatashiyacuajani.

²⁰ Cante nio sequeyacuajani, nojuajaari naa sequeya: “Taaquiririnij, quera tiuquihuanijia”.

Jaa, Jiyaniijia Jesunaa. ¡Naacuaaquinatejaj! ¡Ritia quia nimiohua canaacua!

²¹ Pa Jiyaniijia Jesu cuaara puetunu niajanijajanaa cumaquiiria na Sohuanuta.